


Burum-Mindik Bible



The New Testament and portions of the Old Testament in the
Somba-Siawari language of Papua New Guinea, also called the
Burum Mindik language.

Burum-Mindik Bible
The New Testament and portions of the Old Testament
in the Somba-Siawari language of Papua New Guinea,
also called the Burum Mindik language.
Sampela hap Buk Baibel long tokples Burum Mindik
long Niugini

Copyright © 1992, 2002 The Bible Society of Papua New Guinea

Language: Burum-Mindik or Somba-Siawari (Somba-Siawari or Burum-Mindik)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-11-22

PDF generated using Haiola and XeLaTeX on 21 Feb 2024 from source files dated 31 Aug 2023

c0871260-68cc-5a50-953f-52200e105d1e

Contents

Matyu	1
Mak	97
Luk	153
Jon	251
Aposol	325
Rom	422
1 Korint	469
2 Korint	512
Galesia	544
Efesus	561
Filipai	577
Kolosi	589
1 Tesalonaika	601
2 Tesalonaika	610
1 Timoti	616
2 Timoti	630
Taitus	640
Filemon	646
Hibru	649
Jeims	684
1 Pitö	696
2 Pitö	710
1 Jon	719
2 Jon	730
3 Jon	732
Juda	734
Indelindel	739

Matyu

Ölöwak Buña Matyunöŋ ohoyök. Jim-asa-asari

Matyu qet mianğö könaŋi mi Kembugöreŋ kalem. Qetŋi alaŋi Liwai. Rom gawmangö takis meme azia malök. Nup mi memba maliga Jisösnöŋ kaba oholiga uruŋi melenđa gwarek 12 yengö sutŋine malök.

Ölöwak Buña ki Jisösgö könaŋi nanŋe Juda könagesö yengöra jim asarim engimangöra aka ohoyök. Keu kötŋi bohonŋi kewö, “Jisös Kraistnöŋ Amötqeŋe Tonini aka Kiŋnini akza.” Juda ambazip yengöra keu mi qahö dop köli uruŋinan bölü qaköget. Mianğöra Matyunöŋ Jisös nupŋangö könaŋi mi aukŋe jim asariba törörök kusum engiyök. Jöhöjöhö Walŋe amötqeŋegö jöhöjöhö keu (promis) ahözawi, mi pakpak mönö Jisösgöra aka aukŋe ahum kuwuleiba öŋambuk ahök. Amötqeŋe Tonŋi mi Hibru keunöŋ Mesaia aka Grik keunöŋ Kraist.

Jisösnöŋ urugö nup bahöŋi karöbut memba malök: Yanön Ölöwak Buña ambazip kusum engiba uruŋini mianğön kuŋguba kawölŋini mem ölöwaka malök. Mewö memba aniga angöletot asuhugetka mala maripom ipnöŋ öngöba kömuiga löm kölgetka kunbuk wahörök. Mewö mianğön Anutu bemtohoŋangö könaŋi kondel neŋgiyök. Mewö aiga nini letota Anutugö nahönböraturupŋi akingö könaŋi asuhuyök. Jisösgö lesan bohonŋi 5 mi kewö: 1) Boŋ 5-7, 2) Boŋ 10, 3) Boŋ 13, 4) Boŋ 18 aka 5) Boŋ 24-25

Buk kianğö bahöŋi bohonŋi 7 mi kewö:

Jisösgö ambösakonurupŋi aka ahuahuŋi 1.1-2.23

Jon O-melun azinöŋ urugö nup meyök 3.1-12

Jisös o melun meiga Satanöŋ esapköyök 3.13-4.11

Jisösnöŋ Galili uruŋe qenjarök nup meyök 4.12-18.35

Jisösnöŋ Galili mosöta Jerusalem anök 19.1-20.34

Sonda qöndökŋi Jerusalem mala kömuyök 21.1-27.66

Kömupnöhök wahöta mala Suepnöŋ öngöyök 28.1-20

Jisös Kraistkö ambösakon yengö qet aren

Luk 3.23-38

¹ Jisös Kraistkö ambösakon yengö qet arenini kewö: Abrahamgö gwölönarökŋi kun Deiwid. Deiwidkö gwölönarökŋi kun Jisös.

² Abrahamgö nahönŋi Aisak. Aisakö nahönŋi Jeikob. Jeikobkö nahönurupŋi Juda aka yangö darumunurupŋi.

³ Judagö nahönyahötŋi Perez aka Zera, namŋiri Tamar.

Perezgö nahönñi Hezron. Hezrongö nahönñi Ram. ⁴ Ramgö nahönñi Aminadab. Aminadabkö nahönñi Nason. Nasongö nahönñi Salmon. ⁵ Salmongö nahönñi Boaz, namñi kantri kungö ambiñi Rahab. Boazgö nahönñi Obed, namñi kantri kungö ambiñi Rut. Obedkö nahönñi Jesi. ⁶ Jesigö nahönñi kiñ Deiwid. Deiwidkö nahönñi Solomon, namñi mutuk Uriagö anömña malök. Juda kiñ pakpak mi Deiwidkö gwölönarökurupñi aka malget.

⁷ Solomongö nahönñi Rehoboam. Rehoboamgö nahönñi Abiya. Abiyagö nahönñi Asa. ⁸ Asagö nahönñi Jehosafat. Jehosafatkö nahönñi Jehoram. Jehoramgö nahönñi Usia. ⁹ Usiagö nahönñi Jotam. Jotamgö nahönñi Ahaz. Ahazgö nahönñi Hezekia. ¹⁰ Hezekiagö nahönñi Manase. Manasegö nahönñi Amon. Amongö nahönñi Josia. ¹¹ *Josiagö nahönurupñi Jekonia aka yangö darumunurupñi. Nalö mianğoreñ Babilon yeñön Israel könagesö enğuanğitketka Babilon anda kösö mire malmal ewö tandök welenqeçenina malget.

¹² Babilon kösö mire malmal ewö tandök mala mianğoreñ Jekoniagö nahönñi Sealtiel asuhuyök. Sealtielgö nahönñi Jerubabel. ¹³ Jerubabelgö nahönñi Abiud. Abiudkö nahönñi Eliakim. Eliakimgö nahönñi Azor. ¹⁴ Azorgö nahönñi Jadok. Jadokö nahönñi Akim. Akimgö nahönñi Eliud. ¹⁵ Eliudkö nahönñi Eleazar. Eleazargö nahönñi Matan. Matangö nahönñi Jeikob. ¹⁶ Jeikobkö nahönñi Josef, Mariagö apñi. Marianöñ Jisös meiga qetñi Kraist Amötqeçe Tonji qerakzin.

¹⁷ Nalö Abrahamğoreñök könahiba mala kotketka Deiwid asuhuyöhi, isik miengö jañgö areñi mi 14. Kunbuk kiñ Deiwidköreñök könahiba mala kotketka Israel könagesö enğuanğitketka Babilon anda kösö mire malmal ewö tandök malgeri, isik miengö jañgö areñi mi mewöyök 14. Babilon kösö mire malmal ewö tandök malgeri, nalö mianğoreñök könahiba mala kotketka Kraist asuhuyöhi, isik miengö jañgö areñi mi mewöyök 14.

Jisös Kraist mi kewö asuhuyök:

Luk 2.1-7

¹⁸ *Jisös Kraist asuhuyöhangö kösohotñi kewö: Yangö namñi Maria mi Josefbuk buñabuña mala mindimindiri qahö aka malohotka nalö mianğoreñ Urja Töröñan mem letot wañgiiga köröbuk mali könani mewö miwikñaiget. ¹⁹ Mewö miwikñaigetka azi buñani Josef yañön malmal diñdini malöhangöra Mariagö könani aukñe asuhui gamuñambuk

* **1:11:** 2 Kiñ 24.14-15; 2 Hist 36.10; Jer 27.20 * **1:18:** Luk 1.27

akapuköra tököyök. Mewö tököba uruñan i ölöñ mosötmanğö mötmöt arenji alök.

²⁰ Mewö mötmöriba ahöiga Kembugö garata kunñan gaunöñ asuhum wañgiba kewö jiyök, “Josef Deiwidkö gwölöñarökñi, Uña Töröñan mönö Maria letot wañgiiga köröñambuk malja. Mianğöra gi mönö i örönöñ mirige kaba anömgi akñapkö keñgötki kude mötman. ²¹ *Marianöñ mönö morö nahön mema. Azi mianöñ könagesöñi siñgisöndokñineyök amöt qem enjiiga solanime. Mianğöra göñön qetñi Jisös qetman.” Mewö jiyök.

²² Kembunöñ kezapqetok azi kun sölölohöiga keu kun jiyöhi, mianöñ öñambuk akñapköra yuai pakpak mi asuhuyök. Kezapqetok keu mi kewö, ²³ * “Ambi seram jömukñi kunöñ gölöñambuk aka morö azia meiga qetñi Imanuel qetme.” Qet mianğö könanji kewö, “Anutunöñ nembuk malja.”

²⁴ Josefnöñ imbiñi möta wahöta Kembugö garatanöñ jim kutum wañgiyöhi, mönö mianğö dop aka Maria anömñi akñapköra wañgita miriñe anök. ²⁵ * Anda malohotmö, nalö sutñe mianğöreñ mohotñe qahö ahöyohot anda nahönñi meiga Josefnöñ qetñi Jisös qerök. Morö meiga mianğö andöñe awanöm malohot. Mewö.

2

Mötkutukutu azi wehön kotkotñeyök kaget.

¹ Jisösnöñ kiñ kembu Herodkö nalöñe Judia prowinsgö taon qetñi Betlehem asuhuyök. Asuhuyöhi, nalö mianğöreñ señgelaugö mötmöt azi wehön kotkotñeyök Jerusalem sitinöñ kaget. ² Kaba kewö qesiget, “Juda enğöreñ kiñ kembu akñawi, morö mi asuhuba denike ahöza? Nini wehön kotkotñe mala yañğöreñ undi asuhui eka könanji mewö möta waikñi memba möpöseibingöra kazin.”

³ Mewö qesigetka kiñ kembu Herod aka Jerusalem könagesö yambuk malgeri, yeñön körek pakpak keu mi möta aurugot. ⁴ Aurugotka kiñ Herodnöñ keu ala könagesögö jike nup galöm bohönñi aka Kona keugö böhi pakpak köl öröm enji kaget. Kaba tokogetka kewö qesim enjiyök, “Amötqeqe Tonj Kraistnöñ mönö denike asuhumapköra jigetka ahöza?”

⁵ Qesim enjiiga kewö melen wañgiget, “Yañön mönö Judia prowinsgö taon qetñi Betlehem mianğöreñ asuhuma. Mianğö keunji mi kezapqetok azi Maikanöñ kewö ohoi ahöza,

⁶ * O Betlehem könagesö Juda gölmenöñ maljei, enğö sutñineyök kembu ketanji asuhuba nani Israel könagesö mindiñgöba köyan köl neñgima. Mianğöra inini

Juda gölmegö jitnememe yengö sutnjine malgetka qetbuñaninan eretji qahöp mahöp akza.’ ”

⁷ Mewö melenj wañgigetka mötkutukutu azi mi ölöñ engoholi kagetka kewö qesim engiyök, “Undiñi mönö wani nalönöñ asuhui könahiba eket?” Mianğö könañi törörök mötmangö möta mewö qesim engiyök. ⁸ Mianğö keuñi möta melaiba kewö jim kutum engiyök, “Inini mönö Betlehem anda morö mi törörök qesiba miwikñaiba mianğöreñök buzup keu algetka nöñgöreñ kama. Nöñön mi möta mewöñanök anda i waikñi memba möpöseim wañgimam.”

⁹ Kiñnöñ mewö munen jiba jim kutum enjiiga möta könanöñ anget. Anda undi wehön kotkotñe mala ekeri, mianñön nöörpñine mutukmutuk ani mötötei-get Betlehem anda miri morö nahön ahöyöhi, mönö mianğöreñ kinök. ¹⁰ Undi mi kini eka sösöñgai keta bölökñi aket. ¹¹ Sösöñgai aka miri uruñe öngöba morö aka namñi Maria etkeket. I etkeka simin köla sipköba waikñi memba möpöseim wañgiget. Möpöseim wañgiba bayañsöñjini qeañda mianğöreñök goul, jinij paura aka sanda qetñi mör mi uzeta kalem wañgiget.

¹² Sunjem kun ahöget-ka Anutunöñ gaun kondela kiñ Herodköreñ kunbuk anbepükö qetal enjiyök. Mianğöra köna kungenök nanñini miri gölmenjine lilingöba anget. Mewö.

Herodköra asamböta Josef anöm-moröñi Ijipt anget.

¹³ Mötkutukutu azi mienñön angetka Josefnöñ gaun ehiga Kembugöreñ garata kunñan asuhum wañgiba kewö jii mörök, “Herodnöñ morö qei kömumapkö jarum wañgima. Mianğöra mönö wahöta morö aka namñi etkuangita ölöñ köla Ijipt kantrinöñ anme. Mianğöreñ anda malgetka bian nanak kamegö nalö jimami, mianğöreñ mönö lilingöba kame.”

¹⁴ Mewö jii möta wahöta sunjem mianğöreñök morö nahön aka namñi etkuangita Ijipt anget. ¹⁵ *Ijipt anda malgetka kiñ Herodnöñ kömuiga nalö mianğöreñök lilingöba kaget. Mutuk Kembunöñ kezapqetok azi Hosea sölölohöiga keu kewö jii ahöza, “Nöñön nahöni oholbiga Ijipt gölme mosöta kayök.” Kezapqetok keu mianñön mönö mewö asuhuiga öljambuk ahök. Mewö.

Morö azi Betlehem gölmenöñ enjuget kömuget.

¹⁶ Mötkutukutu azi mienñön Juda gölme ölöñ mosöta angetka Herodnöñ mianğö könañi eka “Tilipköm ningiget,” jiba irimñi gwötpuk seholiiga jimkutukutu kewö alök, “Yarö azi, injini Betlehem aka gölme pakpak mi liliköba ahözawi, mönö mianğöreñ anda azi morö (yara) yambuñini yahöt aka mianğö bapñe akzei, mi körek enjuget kömume.” Mötkutukutu azi undi

* 2:15: Hos 11.1

asuhuyöhangö nalögöra törörök qesim enjiiga jiget möröhi, mianjö dop morö azi yambuñinangöra jimkutukutu mi alök.

¹⁷ Kezapqetok azi Jeremaianöñ keu kun jii ahözawi, mianjöñ mönö mewö asuhuiga öljambuk ahök. Keu mi kewö,

¹⁸ **“Silat mi Betlehem kösutneyök miri qetñi Rama mianjörenök mötketka sahöt gigilahöze. Reizöl ambigö gwölönarökurup yeñön moröurupñini qahöwaketka ururen meze. Mianjöra sahötketka urukölalep mem enjibingö aketka urukondumök mörakze.”* Mewö.

Ijpt mosöta Josef anöm-moröñi Nazaret lilingöget.

¹⁹ Josefnöñ Ijpt maliga kiñ Herodnöñ kömuiga mianjörenök Kembangören garata kunñan gaunöñ asuhum wanğiba ²⁰ kewö jiyök, “Morö qeget kömumapkö mönögeri, yeñön lök kömuget. Mianjöra mönö wahöta morö aka namñi etkuangita lilingöba Israel gölmenöñ anme.” ²¹ Mewö jiiga Josefnöñ wahöta morö aka namñi etkuangita lilingöba Israel gölmenöñ anget.

²² Könanöñ anda keu kewö mörök, “Herodkö nahönñi Arke-lausunöñ iwiñangö salupñe Judia prowins galöm köla malja.” Mewö möta mianjören anmamgö kenğötñi mörök. Möta mali Anutunöñ gaunöñ Galili prowinsnöñ anmegö jim kutum wanğiga wahöta mianjören anget. ²³ *Galili prowinsnöñ anğota taon qetñi Nazaret mianjören malget. Mewö malgetka kezapqetok azi yeñön Amötqeqe Tonangöra keu jigeri, mianjöñ öljambuk ahök. Keu mi kewö, “Yanğö qetñi mi Nazaret azi qeta malme.” Mewö.

3

Jon O-melun azinöñ Jisösgö köna mesarök.

Mak 1.1-8; Luk 3.1-18; Jon 1.19-28

¹ Yambu tosatñi teköiga Jon O-melun azinöñ kaba Judia prowinsgö gölme qararanğölkölñe liliköba ambazip uruñini Buña keunöñ kuñguba kewö jiba malök, ² **“Suep Tonjan be-mtohonñi almawanğö nalöñan lök kam kuñguza. Mianjöra mönö uruñini melenđa mianjören anğotket.”* ³ **Jongöra kezapqetok azi Aisaianöñ keu kun kewö jiba ohoyök, “Kolek garata kunöñ gölme qararanğölkölñe qeta maliga anda jölñi kewö mötme, ‘Kembunöñ kamawo! Mianjöra mönö jöjöröba könañi mesatket. Mönö uruñini mindiñgöba könañi köl diñgiba qölöleiget.’”*

⁴ **Jongören maluku mi kamel jupñan memenñi aiga kembangö örigit sömbup silenñan memenñi mi jöhöba malök. Nenenamñi mi gawöt jinam aka arökñangö moron onñi. Mi*

* **2:18:** Jer 31.15 * **2:23:** Mak 1.24; Luk 2.39; Jon 1.45 * **3:2:** Mat 4.17; Mak

1.15 * **3:3:** Ais 40.3 * **3:4:** 2 Kiñ 1.8

pakpak kezapqetok azi Elaija (Elia) yangö dowa. ⁵ Jonöñ nupñi meiga ambazip kambuleleme yenön Jerusalem siti aka Judia prowinsgö miri tosatñi pakpak miengörenök yangören öröba kaget. Mewöñanök Jordan o likeplikep miri pakpak tat angeri, miengörenök kaget. ⁶ Kaba kañgota siñgisöndokñini jim miwikñaigetka Jonöñ i Jordan o töwatñe o melun mem enjyök.

⁷ *Mem enjyökmö, Farisi (Köna keugö kapañkölköl) aka Sadyusi (Jike nupkö kapañkölköl) ambazip gwötpukñan o melun mem enjimapköra kagetka engeka yenjöra kewö jiyök, “O qatö moröñi, inini uruñini qahö melengetka Anutugö irimñan sehologiikepñi melen enjimmangö akza. Mi ölöñ kölbängö goro keuñi mi mönö danön jii möta sömbuñini möta ki kaze? ⁸ Mianjöra mönö ölnanök uruñini melenme. Bölöñamñineyök lilingögetka ölni asuhui mi mönö ahakmemenjanan aukñe kondela malme.

⁹ *“Uruñine möndömöndö keu kewö jibingö kude mötmörime, ‘Neñön mönö Abrahamgö gwölöñarökña malinga Anutunöñ qahö ayuhum neñgima.’ Mewö jiba töptöpñine qemakzemö, ölni mi qahö ahakze. Nöñön mianjöra kewö jibi mötket, Anutunöñ köt ki ölop jim kutum enjiiga letota Abrahamgö gwölöñarökurupñi aka Anutu möpöseimakñemö, inini denöwö?

¹⁰ *“Uruñini qahö melenme ewö, Anutunöñ mönö inini ip ewö tenjöri etpingö akze. Ip pakpak kötni ölopñi qahö kuñgumakzei, mi mönö köli etket könöpnöñ gili geme. Ip mewöñi kölmangö kesinji lök jitñi sañe ala ip könane ali jöjöröba ahöza. Anutunöñ mönö bölöñamñinangö likepñi melen enjima.

¹¹ “Nöñön inini uruñini melenmeangöra o töhönöñ melun mem enjizalmö, nöngö andöne azi kukösumñi köhöikñi kun kama. Yangö kukösumñi öngöngöñan mönö nöngören ongitma. Yanön azi öngöngöñi akñawangöra nöñön yangö köna esuñi bauköba gösönöñ löngöta tenjömamgö qötötangömam. Yanön mönö Uña Töröñi uruñine ali könöp bölamñan köl könjorat enjiiga mewö mianön melun mem enjima.

¹² “Yanön ölni aka kamböñi menden etkimangö sapakñi memba kañgota uba qörörengöba kewötma. Kewöta wit kötni tokoba köweñe almapmö, kamböñi aka gwaugulapñi mi mönö usuñniga könöpnöñ geba teteköñi qahö jema.” Mewö.

Jonöñ Jisös o melun mem wanjyök.

Mak 1.9-11; Luk 3.21-22

¹³ Nalö mianjören Jisösnöñ Galili prowins mosöta Jordan o töwatñe Jongören kaba o melun mem wanjimapköra qesiyök.

¹⁴ Qesiyökmö, Jonöŋ qetal waŋgiba kewö jiyök, “Göŋön ölop ni o melun mem niŋgibanakmö, göŋön siŋgisöndok qahö aka mönö denöwögöra nöŋgöreŋ kazan?”

¹⁵ Mewö jiiga Jisösnöŋ kewö melenök, “Nalö kewöŋe mi ölop akŋan. Mewö akziga mianön Anutunöŋ ahakmeme diŋdiŋi wuatangöbingö keu jiyöhi, miangö ölni asuhuiga dop kölma.” Mewö jiiga Jonöŋ möri dop kölīga urumohot ahök.

¹⁶ Urumohot aka o melun mem waŋgii teköiga miangöreŋök onöhök koriga kewö asuhuyök: Suepnöŋ aŋaŋiiga Jisösnöŋ uba ehiga Anutugö Uŋa Töröŋan melenäda kembö nei ewö aka Jisösgö qakŋe eta meyök. ¹⁷ *Eta meiga Suepnöhök qet kun kewö asuhuyök, “Yaŋön mönö nani wölböt nahöna aiga köröni ölöwahiga eknahöm ak waŋgizal.” Mewö.

4

Satanöŋ Jisös esapköba malök.

Mak 1.12-13; Luk 4.1-13

¹ *Miangö andöŋe Uŋa Töröŋan Jisös kuŋgum waŋgiiga gölme qararaŋkölkölŋe Bölöŋangö Toŋan esapköm waŋgimapköra aka anök. ² Miangöreŋ anda sungem asak 40 Anutugöra nene siŋgi mala nenegö kömuyök. ³ Nenegö kömuiga öme bohonŋini qetŋi esapesap Toŋi yaŋön asuhuba kewö jiyök, “Gi Anutu Nahönŋa akzan ewö, mi mönö kondela köt ki jim kutunöŋga letota beret aketka neman.”

⁴ *Mewö jiyökmö, Jisösnöŋ keu kewö melenök, “Qahö! Buŋa Kimbinöŋ keu kun kewö ohoget ahöza, ‘Nenenöhök ambazip malmal qahö neŋgimakzapmö, Anutugö jitŋeyök keu kamakzawi, mi pakpak tem kölīga mianön mönö gumohom neŋgiiga köhöiba maljin’.”

⁵ Mewö jiiga Bölöŋangö Toŋan Jisös waŋgita Jerusalem siti töröŋe anda jöwöwöl jikegö boŋe euyangöreŋ öŋgöba ali kinök.

⁶ *Mewö kiniga kewö jii mörök, “Gi Anutugö Nahönŋa akzan ewö, mönö kiangöreŋök luhuba emu geman. Buŋa Kimbinöŋ keu kun kewö ohoget ahöza, ‘Anutunöŋ göhöra aka garataurupŋi jim kutum eŋgiiga ölop kököbihigetka geba kötnöŋ könage qahö guhum qizit akŋa.’

Miangöra geba kude ayuhuman.”

⁷ *Mewö jiiga kewö melenök, “Qahö! Buŋa Kimbinöŋ keu kun mewöyök kewö ahöza, ‘Gi mönö Kembang Anutu kude esapköm waŋgiman.’ ”

⁸ Mewö jiiga Bölöŋangö Toŋan kunbuk waŋgita kundunji köröp tiŋtiŋi kunöŋ öŋgöba gölme pakpak yeŋgö kantri tohoŋi

* 3:17: Jen 22.2; Sum 2.7; Ais 42.1; Mat 12.18; 17.5; Mak 1.11; Luk 9.35 * 4:1:

Hib 2.18; 4.15 * 4:4: Dut 8.3 * 4:6: Sum 91.11-12 * 4:7: Dut 6.16

tohoŋi aka mienḡö inap yuainini aködammunŋinambuk pakpak kondel waŋgiyök. ⁹ Kondel waŋgiba kewö jiyök, “Göŋön simin köl niŋgiba waikni memba möpöseim niŋgiman ewö, nöŋön öröyuai pakpak ki mönö tököm gihibi buŋa qem aŋguba galöm köl enḡiman.”

¹⁰ *Mewö jiiga Jisösnöŋ kewö jii mörök, “Qahö! Satan gi mönö kesalnöŋ. Buŋa Kimbinöŋ keu kun kewö ohoget ahöza, ‘Gi mönö Kembugi Anutu, ia mohot simin köl waŋgiba waikni memba möpöseiman.’”

¹¹ Mewö jiiga Bölöŋaŋgö Toŋan mianḡöreŋök Jisös mosöta kesalök. Mewö aiga garata yeŋön kaba Jisös bauköm waŋgiḡet. Mewö.

Jisösnöŋ könahiba Galili uruŋe urugö nup meyök.

Mak 1.14-15; Luk 4.14-15

¹² *Mianḡö andöŋe Jon O-melun azi kösö mire * alget tari Jisösnöŋ mi möta Judia prowins mosöta Galili anök. ¹³ *Anda prowins mianḡöreŋ miriŋi Nazaret mosöta Kaperneam anda malök. Kaperneam siti mi Zebulun aka Naftali gölmenöŋ Galili o aŋgö qöhöröŋe ahöza. ¹⁴ Mianḡöreŋ mala nupŋi meiga Anutunöŋ keu kun kezapqetok azi Aisaia sölölohöiga jiyöhi, mianḡön ölnambuk ahök. Keu mi kewö,

¹⁵ * “Ambazip Zebulun gölmenöŋ aka Naftali gölmenöŋ Jordan likepŋe malgetka sutŋine köna namŋi köwetnöŋ göröken anda kinjawi aka Juda qahöpmö, kambu tosatŋan Galili prowinsnöŋ maljei,

¹⁶ könagesö mienḡön söŋaupnöŋ mala asakŋi ketanji ekŋe. Kömupnöŋ ambazip aum köl enḡiiga pandaman gölmenöŋ maljei, yeŋgöra mönö miri waŋgaran suruma.”

¹⁷ *Jisösnöŋ Kaperneam mala nalö mianḡöreŋök könahiba Buŋa keuŋi jim asariba ambazip uruŋini kuŋguba kewö jiba malök, “Suep Toŋan bemtohoŋi almawaŋgö nalöŋan mönö kam kuŋguza. Mianḡöra mönö siŋgisöndok malmalŋini mosöta uruŋini melenḡet.” Mewö.

Jisösnöŋ gwarekurupŋi mutukŋi enḡoholök.

Mak 1.16-20; Luk 5.1-11

¹⁸ Mewö jiba liliköba mala Galili o aŋgögö göraŋe mötöteiba anda darumun yahöt Saimon qetŋi alaŋi Pitö aka munŋi Andru etkehök. Yetköŋ söra örörö azia mala mösakŋiri o aŋgönöŋ söra öröbitköra gila malohot. ¹⁹ Jisösnöŋ etkeka kewö

* **4:10:** Dut 6.13 * **4:12:** Mat 14.3; Mak 6.17; Luk 3.19-20 * **4:12:** Kiŋ Herodnöŋ ambi kun ölöŋ meiga Jon O-melun azinöŋ i mianḡöra jim waŋgiiga irimŋi sehonii jiiga opotöröp yeŋön Jon jöhöba kösö mire alget tarök. * **4:13:** Jon 2.12

* **4:15:** Ais 9.1-2 * **4:17:** Mat 3.2

jiyök, “Aziyahöt, injiri mönö ni nuatanğöba kayohotka kusum etkibi ambazip söra ewö öröm engimakhahot.”²⁰ Mewö jiga mianğöreñök mösakhiri mosöta könahiba Jisös wuatanğöba anohot.

²¹ Jisösnöñ yetpuk borom kun toroqeba anda kunbuk darumun yahöt Zebedigö nahönyahötñi Jeims aka Jon etkehök. Yetkön iwinjiri Zebedibuk wanğenöñ tata mösakhini möhamğöba jöhöba malgetka engeka etkoholök. ²² Mewö engeka etkoholiga mianğöreñök wahöta wanğe aka iwinjiri mosöta könahiba Jisös wuatanğöba andöñe anohot. Mewö.

Jisösnöñ ambazip kusum engiba mem ölöwak engiyök.

Luk 6.17-19

²³ *Jisösnöñ anda Galili prowins uruñe lökñanök liliköba köuluk miriñine öngöba bemtohoñgö Ölöwak Buñani jim asariba uruñini kuñguba kusum engiba malök. Mewö aka sutñine ambazip kawöl aka jepajerepe könani könani engöhöi malgeri, mi mem ölöwak engiba malök.

²⁴ Mewö memba maliga Jisösgö qetbuñanjan sehiba Siria kantri dop köl teköba anök. Mewö ani mi möta kawöl ambazip pakpak enğuangita yangöreñ kaget. Tosatñan uzi kawöl aka jepajerepe könani könani engöhöi malget. Tosatñan ömewörömenöñ uruñine geiga töñöt me kölköljinjinbuk malget. Tosatñan tala eta enğuga bözok mitiba semben auba malget. Tosatñan sileninañgö likepñi kömukömuñi malget. Mewö mewöñi mienön Jisösgöreñ kagetka mem ölöwak engiyök.

²⁵ Mewö ak enğiiga ekeranğöra ambazip könagesö ketanji yeñön Jisösgö andöñe wuatanğöba kaget. Kambu ketanji ketanji mi Galili prowins aka Ten Taon distriknöhök kaget. Kambu tosatñan Jerusalem siti aka Judia prowinsgö miri tosatñeyök kaget. Kambu tosatñan Jordan o likepñeyök kaget. Mewö.

5

Jisösnöñ kundunje kindi kusum engiyök.

¹ Jisösnöñ ambazip kambu ketanji engeka kundunje öngöba tariga gwarekurupñan kanğota liliköm wanğiget. ² Liliköm wanğigetka könahiba ambazip kambuñi kambuñi kusum engiba kewö jiyök.

Denike yeñön simbawoñ akze?

³ “Denike yeñön Anutugö jene etqeqeñi tandök mötzei, yeñön Suepkö bemtohoñi buña qem anğumeanğöra mönö simbawoñ akze.

⁴ *Denike yeñön jinğen köla sahötzei, Anutunöñ i urukölalep engimapköra mönö simbawoñ akze.

* 4:23: Mat 9.35; Mak 1.39 * 5:4: Ais 61.2

5* Denike yeñon guñbönjönjön malakzei, Anutunön gölme ki mi yeñgöra enġii buñañina akñapköra yeñon mönön simbawon akze.

6* Denike yeñon Anutugö jeñe solanibingöra kapan köla mi nene aka ogö ewö kömumba qemjeñ qeba maljei, Anutunön mönön sihimñini mi gumohom enġima. Mianğöra yeñon mönön simbawon akze.

7 Denike yeñon tosatñi ak kömum enġimakzei, Anutunön i ak kömum enġimapköra yeñon mönön simbawon akze.

8* Denike yeñgö uruñinan sarakñi akzawi, yeñon ölop Anutu ekñe. Mianğöra yeñon mönön simbawon akze.

9 Denike yeñon luai qemakzei, yeñgö qetñini mi Anutugö nahönböraturupñi qetme. Mianğöra yeñon mönön simbawon akze.

10* Anutunön keuñini jim teköi solanizeangöra sesewerowero ak enġimakzei, yeñon Suepkö bemtohoñi buña qem anġume. Mianğöra yeñon mönön simbawon akze.

11* Ambazipnön inñini nöngöra aka uruqeqe keu töhöreñ jim enġiba sesewerowero aka keu bölönji könañi könañi silenine ala muneñmuneñ jimakzei, enñon mönön simbawon akze.

12* Mötket, Anutunön töwañini öngöngöñi Suep mire ali ahözawañgöra mönön gönköirañ ala sösoñgai aka malme. Mi kewögöra: Kezapqetok ambazip mutuk malgeri, mi sesewerowero tandökñi mewöñanök ak enġigetka enñon yeñgö andöñine asuħuba yembuk örörön malje.” Mewö.

Inñini gölmegö sihi aka kiwa ewö akze.

Mak 9.50; Luk 14.34-35

13 Jisösnön jiyök, “Inñini gölme ambazip yeñgö howe tandök akzemö, howe nahömñan piahima ewö, mi mönön denöwö möhamgöinga kunbuk nahömñambuk akawak? Mianğö könañi kun qahö. Toroqeba yuai kungöra qahö dop kölmapmö, mi nesak ewö gilget geiga ambazipnön mi könañinan tiahöme.

14* “Inñini gölmeñi gölmeñi yeñgö kiwa tandök ewö aka malje. Siti kun kundunje öngöba meget tatzawi, mianñon tölapñe tatmamgö osimakza. 15* Kunñan kiwa ohotiriba kumbut bapñe qahö almapmö, kiwagö dum tatatñe ali tatma. Mewö tata asariiga ambazip miri uruñe maljei, mönön körek yeñgö jeñini kuñguiga asakñi ehakñe.

16* “Mewöñanök mönön enġö asakñini kondelgetka ambazip sutñine asariiga ehakñe. Amba-zipnön ahakmemenini ölopñi

* 5:5: Sum 37.11 * 5:6: Ais 55.1-2 * 5:8: Sum 24.3-4 * 5:10: 1 Pitö

3.14 * 5:11: 1 Pitö 4.14 * 5:12: 2 Hist 36.16; Apo 7.52 * 5:14: Jon 8.12;

9.5 * 5:15: Mak 4.21; Luk 8.16; 11.33 * 5:16: 1 Pitö 2.12

eka mianğöra Iwiñini Suep mire maljawi, mönö i möpöseiba malme.” Mewö.

Jisösnöñ Köna keugö könañi kusum enğiyök.

17 “Nöñön Mosesgören Köna Keu aka kezapqetok ambazip yenğö Buzup Kimbiñini mi qeapkömamğöra aka qahö kaba maljal. Mewö lañ kude mötmörime. Nöñön qeapkömamğöra qahöpmö, keu mi tem köl teköbi miengö ölnjanan pöndañ asuhumapköra aka kaba maljal. 18 *Nöñön keu ölni kun kewö jibi mötket, Mosesgö Köna keunöhök kulem moröñi morö közömñi kun me kirifi ohohogö jönbölanñi mohok-kun mi qahö kötökñi ayapkömapmö, keu pakpak mi mutuk ölnjanambuk asuhugetka Suep gölme yetkөн göröñ qemahot.

19 “Mianğöra kunñan Köna keugö jimkutukutu morörökñi miengörenök keu kun koyonaniba ambazip mewö kusum enğimakzawi, yañön Suepkö bemtohoñe anğoriga qetñi morörökñi bezup qetme. Mewö qetmemö, kunñan mi tem köla wuatangöba ambazip mewö kusum enğimakzawi, yañön Suepkö bemtohoñ uruñe anğoriga qetñi ketañamnini qetme.

20 “Nöñön mianğö dop kewö jibi mötket: Engö ahak-memenjini solanñi mianğön mönö Köna keugö böhi aka Farisi (Köna keugö kapañkölköl) yenğö silikñini tandök ewö öröröñ akapuk. Silikñinan yenğö silikñini gwötpuk qahö onğitma ewö, enñön mönö Suepkö bemtohoñ uruñe qahö anğotme.” Mewö.

Yom kazik aka enğuget kömukömugö könañi.

21 *Jisösnöñ toroqeba jiyök, “Enñön möpñeyök keu kun kewö jiget mötzema, ‘Ambazip kun kude qeget kömuma aka kunñan kazikñi qei kömumawi, i mönö distrikö keu jakeñe algetka keuñi jim teköme.’

22 “Mewö jiget mötketmö, nöñön keu mi kewö jim tuaribi mötme: Kunñan alañambuk anğururuk aka irimñan sehooli yom kazik akzawi, i mönö mewöyök distrikö keu jakeñe al wañgiget keuñi jim tekömeañgö dop akza. Mewöñanök kunñan alañi jijiwilit keunöñ jim böliba ‘Gi uruqahö akzan,’ jizawi, i mönö kantrigö jike kaunsöl yenğö jeñine al wañgiget keuñi jim tekömeañgö dop akza. Kunñan alañi lösö keunöñ jim böliba ‘Gi anğöjörakabuk akzan,’ jizawi, yañön mönö könöp sianöñ gemawañgö dop akawak.

23 “Mianğöra göñön kalem naluki memba kaba altanöñ almamğö aknöñga mianğören keu kewöñan mötmötke kañgotpawak: Alagahö uruñe keu ahöi yañön kazik ak gihimamğö mötza. Keu mewöñi mötmöriman ewö, 24 kalemgi mi mönö alta wösöñe ala mutuk alagahören anda yambuk

* 5:18: Luk 16.17 * 5:21: Eks 20.13; Dut 5.17

keuñiri jim solaniba urumohot aka mianğö andöñe kunbuk kaba kalem naluki Anutugöra alman.

²⁵ “Kerökan silege ala keu jakeñe öröm gihimamğö aiga komitigörej anda köna namñe mianğörej mönö kapan köla imbi mohot aka keuñiri jim solanimahot. Mewö qahö akñahot ewö, kerökan ölop örörahöm ghiiga (jas, majistreit) jimtekötekö toñangö jeñe añgotnöñga möta jii opotöröpkö böröñe genöñga kösö mire al gihibapuk. ²⁶ Nöñön keu ölni kewö jibi mötnöñ, Gi mianğörej töwagi pakpak almanangö dop qaköba tatman. Toiyagi kondikñi mewöyök al teköbagun mönö töwagi memba etman.” Mewö.

Sero yonğorögö könañi

²⁷ * “Keu kun kewö jiget mötzema, ‘Sero yonğorö kude akñan.’ ²⁸ Mewö jiget mötketmö, nöñön keu mi kewö jim tuaribi mötme: Kunñan serogö sihim kömbönañi qakñe ambi uba ekzawi, yañön lök uruñan yambuk sero yonğorö akza.

²⁹ * “Jegi ölnan siñgisöndok akñangö kölgorom ak gihima ewö, mi mönö qözöla gilynöñ anma. Sile kitipki kunñan ayuhui mewö Suepnöñ öngönöñga dop kölmappmö, silegi jömkñi malnöñga gil gihigetka könöp sianöñ geba ayuhubanbuk. ³⁰ * “Börögi ölnan siñgisöndok akñangö kölgorom ak gihima ewö, mi mönö yandiba gilynöñ anma. Sile kitipki kunñan ayuhui Suepnöñ öngönöñga dop kölmappmö, silegi jömkñi mala könöp sianöñ geba ayuhubanbuk.” Mewö.

Awanöm añğömosötmosötkö könañi

³¹ * “Keu kun kewö jiget ahöza, ‘Kunñan anömnji mosötmawi, yañön mönö añğömosötmosöt papia ohoba anömnji wanğima.’ ³² * “Mewö jiget ahözappmö, nöñön kewö jibi mötme: Kunñan anömnji qesabulum aiga mosötpawakmö, könañi kungöra anömnji mosöt-mawi, mewö mianğön mönö anömnjan qesabulum akñapkö kondota siñgisöndokö keuñambuk akña. Mewö aiga azi kunbuk meiga azi dölkñi mianğön mönö mewöyök qesabulum akña.” Mewö.

Keuñini jöjöpañ keunöñ kude jim köhöime.

³³ * “Keu kun mi mewöyök möpñeyök kewö jiget mötzema, ‘Keuñini jöjöpañ keunöñ jim köhöigeri, mi mönö kude oñgitme. Kembugöra yuai akingö keuñini jöjöpañ keunöñ jim jöhögeri, mi mönö wuatangögetka ölnambuk akña.’

* **5:27:** Eks 20.14; Dut 5.18 * **5:29:** Mat 18.9; Mak 9.47 * **5:30:** Mat 18.8; Mak 9.43 * **5:31:** Dut 24.1-4; Mat 19.7; Mak 10.4 * **5:32:** Mat 19.9; Mak 10.11-12; Luk 16.18; 1 Kor 7.10-11 * **5:33:** Lew 19.12; Jan 30.2; Dut 23.21

34 **“Mewö jiget mötketmö, nöñön keu mi kewö jim tu-
aribi mötme: Keuñini mönö jöjöpañ keunöñ qahöpmañöp jim
köhöime. Suep mi Anutugö jakömbuak dumñi akzawañgöra
aka keu kewö kude jime, ‘Keu ölni qahö jimam ewö, Suep
Toñan ölop likepñi melenñi qakne öñgöma.’*

35 **“Gölme mi Anutugö könañangö döpnñi akzawañgöra aka
keu kewö kude jime, ‘Keu ölni qahö jimam ewö, gölmenöñ ölop
tiñgita turum niñgima.’ Jerusalem mi Kiñ Tök-kutukutuñangö
sitiñi akzawañgöra aka keu kewöñi mi mewöyök kude jime,
‘Keu ölni qahö jimam ewö, Kiñ Ketañi yañön ölop qema-
solokepnañgö likepñi melenñi qakne öñgöma.’ 36 Gi nörop
jupki injañi menöñ tuatñi akñapakö osiman aka nörop Jupki tu-
atñi menöñ injañi akñapakö osiman. Miñgöra keu kewö kude
jiman, ‘Keu ölni qahö jimam ewö, Anutunöñ ölop nöropni
qeiga jupñangö mundañan uteköma.’ 37 Jöjöpañ keu kude
jimemö, oñ-keugöra mönö ‘Oñ!’ jime aka qahö-keugöra ‘Qahö!’
jime. Keu diñdiñi miñgöreñ keu yuai toroqemei, mi mönö
Bölöñangö Toñan sölölohöm enñii asuhuma.” Mewö.*

Jinöñ jibi aknöñ aki mi kude akñe.

Luk 6.29-30

38 **“Keu kun kewö jiget mötzema, ‘Kunñan jegi qösökömawi,
gi mönö kitipñi melenña yañgö jeñi qösököman. Kunñan jitki
kumburatimawi, gi mönö kitipñi melenña yañgö jitñi kumbu-
ratiman.’*

39 *“Mewö jiget mötketmö, nöñön keu mi kewö jim tu-
aribi mötme: Kunñan bölöñi ak enñimawi, i mönö kude qe-
tala tuarenjoñ ak wañgime. Mewö qahöpmö, nuñgulumgi
ölni qekötahöma ewö, mönö nuñgulumgi likepñi mewöyök
qekötahömapköra melenñan. 40 Kunñan ‘Sileötañgi memam,’
jiba keunöñ al gihimangö mötza ewö, mönö mosöta malukugi
qakñi mewöyök wañginöñga buña qem añguma.*

41 *“Mewöyök kunñan gösöñi kilomita (mail) mohotkö dop
siriba anmangö kuñgum gihima ewö, mönö ölop tem köla
kilomita (mail) yahötkö dop siriba yambuk anman. 42 Kunñan
göhöreñ yuai kungöra qesim gihimawi, mi mönö wañgiman.
Kunñan ‘Yuai niñginöñga kitipñi bian melenñam,’ jiba qesim
gihimawi, i mönö andö kude qeman.” Mewö.*

Kazikurupki mönö urugan jöpaköm enñiman.

Luk 6.27-28, 32-36

43 **“Keu kun kewö jiget mötzema, ‘Ambazip kösutñine mala
alaurupñini akzei, mi jöpaköm enñimakñemö, kazikurupñini
mönö melenña kazik ak enñiba malme.’*

* 5:34: Jei 5.12; Ais 66.1; Mat 23.22 * 5:35: Ais 66.1; Sum 48.2 * 5:38: Eks

21.24; Lew 24.20; Dut 19.21 * 5:43: Lew 19.18

44 “Mewö jiget mötketmö, nöñön keu mi kewö jim tularibi mötme: Inini mönö kazikurupñini jöpaköm engiba kinda sesewerowero ak engimakzei, yengöra mönö köuluköba malme. 45 Mewö ahakñe ewö, mewö mianñon Iwiñinan Suep mire maljawi, mönö yangö könani kondela nahönböraturupñi aka malme. Yangö könani kewö: Yanñon wehönñi qahö angön köliga kota ambazip ölöpnji aka bölöñi mewöyök mem asarim engiba kie aliga ambazip diñdñi aka gonñonji yengö nupñini mewöyök mem kelörakza.

46 “Enñon mönö niñginöñ gihibigö tandökñi onñgita Anutugö könani kondela ahakñe. Takis tilipqilipñinambuk megetka sisitñini memakzei, yeñon alaurupñinan jöpaköm engigetka i melenña jöpaköm engimakze. Mi urumelenñö silikñi qahö. Inini yengö silik miyök wuatangöba ahakñe ewö, Anutugörenñ tosa kun qahö ahuiga yanñon mönö silikñinanñö likepnji qahö engiiga töwa kun qahö buña qem angume. Mianñöra mönö ambazip körek pakpak jöpaköm engiba malme.

47 “Urumelenñö kopa ambazipnöñ mewöyök sutñine jölöñini jim anguba maljemö, mi urumelenñö aiwesökñi qahö. Inini yengö dop alaurupñini engö sutñineyök jölöñini jim angumakñe ewö, mewö mönö kopa ambazip ewö akze. Kopa ambazip yengö silikñini mönö onñgita qetpuk sorokñi aka malme? 48 *Engö Suep Iwiñinan aködamun sorokñi akzawi, enñon mönö mianñö dop aködamun sorokñinambuk aka malme.” Mewö.

6

Mözöqözöröñ ambazip mi kalem engimakñe.

1 *Jisösnöñ kewö kusum engiyök, “Möno kewögöra galöm mem anguba malme: Ahakmemenñini solanñi diñdñi mi ambazipnöñ eka engöra mötket öngömapköra aka kude ahakñe. Mewö ahakñe ewö, engö Iwiñini Suepnöñ maljawañon mönö silikñinanñö likepnji qahö engiiga töwa qahö buña qem angume.

2 “Mianñöra ‘Mözöqözöröñ ambazip kalem engimam,’ jiba mi qenjarökñöñ kömam tömunbuk uba kolek almegöra kude akñan. Urumelenñö silesile ambazip yeñon ambazipnöñ miwidimgöm (mem biwim) engimegöra möta köuluk mire aka köna namñe anda ambazip enñgeka mewö ahakze. Nöñon keu ölö töhönñi kun kewö jibi mötme, Yeñon mönö silikñinanñö töwanñi pakpak lök buña qem angugetka Suep Tonñan mi qahö toroqema.

3 “Göñon mewö kude akñanmö, ‘Mözöqözöröñ ambazip kalem engimam,’ jiba börögi ölnan denöwö akzawi, börögi

qaniḡan mi kude mōtma. * ⁴ Kalemgi mianḡön tōlapḡe ahōiga Iwigan ahakmeme tōlapḡi ehakzawi, yaḡön mönō tōwa gi-hima.” Mewō.

Kōuluk nupkō kōnaḡi kewō:

Luk 11.2-4

⁵ * “Mianḡōra Anutugō kōulukōmei, mi mönō urumelenḡō silesile ambazip yeḡō dop kude akḡe. Yeḡön ambazipnōḡ enḡekneḡōra mōta sihimḡinan kōuluk mire aka kōna soḡanōḡ kinda kōulukōmakze. Nōḡön keu öl tōhōnḡi kun kewō jibi mōtme, Yeḡön mönō silikḡinanḡō tōwaḡi pakpak lōk buḡa qem anḡugetka Suep Toḡan mi qahō toroqema.

⁶ “Gōḡön mewō kude akḡanmō, ‘Anutugō kōulukōmam,’ jiba mönō nangi miri uruḡi morōḡe öḡḡōba nanḡu kōla Iwigi tōlapḡe maljawi, i kōulukōm waḡgiman. Mewō aknōḡa Iwigan ahakmeme tōlapḡi ehakzawi, yaḡön mönō tōwa gi-hima.

⁷ “Kōulukōmei, mianḡōreḡ mönō urumelenḡō kopa ambazip yeḡō tandōk ewō † keu oyōḡdewetdewet mi kude jiba malme. Yeḡön keu jit sehisehiḡi jigetka Anutunōḡ mianḡōra aka kezap ala mōt enḡimapkō mōtmōrimakze. ⁸ Mönō kewōḡōra yeḡō dop kude aka malme: Inini wani yuaigōra osiba mözōqōzōrōḡ akzei, Iwiḡinan mi qahō kōulukōgetka qeljiḡe lōk mōtza. ⁹ Mönō kewō kōulukōmakḡe:

“Neḡō Iwinini, gi Suepnōḡ maljan. Gōhō qetki mönō tōrōḡi ahōma.

¹⁰ Mönō galōm kōl neḡḡinōḡa bemtohoḡḡahō öḡḡi asuhuma.

Gōhō jitsihitki Suepnōḡ tem kōlakzei, mewōḡanōk mönō gölmenōḡ asuhuma.

¹¹ Merakō neneḡi mönō dopnine neḡḡiman.

¹² Tosatḡi yeḡḡōreḡ tosa neḡḡōreḡ ahōzawi, nini mi mosōt enḡizin ewō, gi mönō mianḡō dop neḡḡō tosanini saḡḡoḡman.

¹³ Esapesapnōḡ et neḡḡubapukōra mönō anḡön kōl neḡḡiba Bōlōḡi Toḡanḡō bōrōḡeyōk ‡ meköm neḡḡiman. (Gi nangak bemtohoḡ Toḡi, kukōsum Toḡi aka asakmararaḡ Toḡi mi nalōḡi nalōḡi mala kota malnōḡ aka tetekōḡi qahō mal öḡḡōman. Mi öḡḡa.)

¹⁴ * Inini ambazip yeḡō siḡḡisōndokḡini mosōtme ewō, enḡō Suep Iwiḡinan mönō mewōyōk enḡō siḡḡisōndokḡini mosōtma.

¹⁵ Mosōtmapmō, ambazip yeḡō siḡḡisōndokḡini qahō mosōtme

* **6:3:** Bōrōḡi qaniḡan mi kude mōtma, keu mianḡō kōnaḡi kewō: Mi mönō tōlapḡe aknōḡa wōlbōt alagan mewōyōk mi kude mōtma. Anutunōḡ sōlōlōhōm gihiiga nup öḡḡḡi amḡeba memakzani, mi mönō nangak ölum guhumakza. * **6:5:** Luk 18.10-14 † **6:7:** Kian kantri yeḡḡön Anutu qahō mōt waḡḡiba bemḡini murutḡi murutḡi kōulukōba keu omanḡi oyōḡdewetdewet mi lanḡ jiba malje. ‡ **6:13:** “Bōlōḡi Toḡanḡō bōrōḡeyōk meköm neḡḡiman,” tosatḡan keu mi kewō melenḡe: bōlōḡeyōk meköm neḡḡiman.

* **6:14:** Mak 11.25-26

ewö, enjö Iwiñinan mönö mewöyök enjö siñgisöndokñini qahö mosötma.” Mewö.

Nenegö siñgi malmal mi kewö ahakñe:

16 “Nenegö siñgi malmei, miangören mönö urumelenjö silesile ambazip ewö kukbosole kude aka malme. Yeñon Anutugöra nene siñgi malakzei, ambazipnöñ mi ekñegöra aka zolon örögetka jemesoholñinan mölmölimakza. Nöñon keu öl töhönñi kun kewö jibi mötme, Yeñon mönö silikñinanjö töwanj pakpak lök buña qem anjugetka Suep Tonjan mi qahö toroqema.

17 “Göñon mewö kude akñanmö, Anutugöra nenegö siñgi mala miangören mönö sinim jupuknöñ me saipenöñ jemesoholgi sanğonda nörop jupki qeba malman. 18 Mewö aka nenegö siñgi malnöñga ambazipnöñ qahöpmö, Iwigi tölapñe maljawanön mi ekña. Mewö aknöñga Iwigan ahakmeme tölapñe ehakzawi, yanön mönö töwa gihima.” Mewö.

Söngöröñi ketanji yuai mi mönö Suepnöñ tokome.

Luk 12.33-34

19* “Moneñ inap yuai mi mönö gölmenöñ ahöm enjimapköra kude tokome. Mewö tokogetka miangören jijilukut kezaplonlonnöñ mi yöhötigetka kahawet töromnöñ (ros, ufeñ) mem böliiga kegwek-kahasiliñ yeñon miri qesin da öngöba yonğorö memakze.

20 “Gölmenöñ qahöpmö, Anutugö jitsihitñi tem kölgetka qet-buñanjan qarimapköra mönö kapan kölme. Mewö aketka guli dötnamñini qainñi kun mi Suep mire ahöiga gurem jijilukutnöñ mi qahö yöhötigetka kahawet töromnöñ (ros, ufeñ) mi qahö mem bölime. Kegwek-kahasiliñ yeñon eu qahö öngöba miri qesin da qahö yonğorö meme. 21 Yuaigöra aködamunñi memba mötnöñ öngözawi, mianön miri kungen ahöiga göñon mönö urugi mewöyök miangören qekötahöba malman.” Mewö.

Silegö asakñi mi kewö:

Luk 11.34-36

22 “Göhö jegi mi uru silegahö kiwanj akza. Mianğöra kawöl kunöñ jegi qahö mem böliza ewö, mianön mönö unöñ asarim teköi Anutugö asakñan ölop uruge mem asariiga malmalgi pakpak asakñe malman.

23 “Asakñe malmanmö, sihim kömbönañi bölöñan me yuai kunñan jegi mem böliba asakñi közambötza ewö, mianön silegö malmalgi pakpak mewöyök mem söñauiga pandaman uruñe jipjap malman. Mewö aiga söñaupnöñ urugahö asakñi közamböri söñauza ewö, nangi pandamanöñ mönö Yei! keta bölökñi wewelipñambuk akza.” Mewö.

* 6:19: Jei 5.2-3

*Anutu me money möt nariman?**Luk 16.13; 12.22-31*

²⁴ “Kunjan kembu yahöt welen qem etkimangö osimakza. Kunjan mewö akrjangö mötzawi, yanön mönö kun kazik ak wanğiba kun urujan jöpaköma. Kungöreñ qekötahöba kun jijiwilit ak wanğima. Mianğöra enön Anutu aka money inap mi mindiriba welen qem etkibingö osime.” Mewö.

Anutu möt nariba waimanjat kude akçe.

²⁵ “Mewö aiga nöjön kewö jibi mötket: İjini gölmenöñ malmeangö waimanjatñi mi kewö jiba kude akçe, ‘Mönö wani yuainöñ gumohom anğubinak aka wanatnöñ sileninağö löngötpinak?’ Jeninambuk maljei, mianön bohonñi aiga nenenöñ mönö mianğö nemböñe akza. Sileninambuk maljei, mianön bohonñi aiga opo sörönöñ mönö mianğö nemböñe ahöza. Mönö mi mötmörime.

²⁶ “Könakemba neiñi neiñi mönö enğekçe. Mienön nene kötnji qahö qesiñ gilakze. Padi ölnji qahö yandiba köwe miriñine qahö tokomakze. Mi qahöpmahöp aiga enğö Suep Iwiñinan mönö töndup i gumohom enğimakza. İjini nei yenğö dop qahöpmö, enğö söñğöröñinan mönö nei söñğöröñini enğonğita öñğöñğöñi akza me qahö? Mönö mi mötmöriget anök.

²⁷ “Enğöreñök kunjan waimanjat aka mewö mianön gölmenöñ malmawangö nalöñi mi sömañi mohotkö dop mem toroqema me qahö? Mi qahöpmahöp! § ²⁸ Opo söroninağöra mönö denöwögöra waimanjat akze? Mi qahö dop kölja. Sombemğö jariñ jurañi qarimakzei, mönö mi uba enğekçe. Mienön opo söroninağöra möt qahö lonğalakze aka nup tosatñi qahö memakze.

²⁹ * “Mi töndup nöjön kewö jibi mötme, Kiñ Solomonöñ goul silwöñi qeraköba asonbilikñambuk malökmö, yanğö malukuñi mi kiteñ soranñi me jura kungö dop eksihimñambuk qahö ahöyök. ³⁰ Sombemğö jariñ jurañi töhön merak kösutnine ahöi uran kölgetka eri qezaköba gila ohoget jemapmö, mi töndup Anutunöñ mi ölopñanök meñölömakza. Mianğöra yanön iñini mewöyök ölop esuhum enğima. İjini jariñ jurañanğö dop qahö. Anutunöñ köyan köl enğimangö möta mianğöra sihimñi öñğöñğöñi mörakza. O ambazip, mötnariñinan mönö wuanöñğöra öne töhön morörökñi akza?

³¹ “Mewö aiga iñini mönö malmalñinağö waimanjat aka mötkurumkurum kude ahakçe. Mi aka lömböriba kewö jibepuk, ‘Nini mönö wani nene aka wani oya nembinak?’ aka ‘Wani yuainöñ silenini esuhubinak?’

§ **6:27:** Tosatñan jabö 27 mi kewö melenđa jize: Enğöreñök kunjan waimanjat aka mewö mianön silenji wan fitğö dop toroqeba mem körimangö osima. * **6:29:** 1 Kiñ 10.4-7; 2 Hist 9.3-6

³² “Mi kewögöra: Urumelenğö kopa yeñön yuai pakpak mi buña qem aņgubingö kapan köla urukönöp ahakze. İñini yuai pakpaköra mözöröñğöba osimakzei, eñğö Suep Iwiñinan mönö mi möt teköza. ³³ Mianğö urukönöp kude akñemö, mutuk mönö Anutugö bemtohoññöñ aņgota yanğö jeñe solanibingö kapan kölme. Uruñini mianğöreñ alget ahöiga yanğön mönö galöm köl eñgiba yuai mewöñji pakpak mi mewöñjanök eñgima.

³⁴ “Mewö aiga iñini mönö uran malmeañğö waimanjatñji kude ahakñe. Urangö waimanjatñji mi urangöra. Silim mohot mohotkö waimanjatñini mönö nanñök nanñök bisiinga dopñine akña.” Mewö.

7

Jimtekötekö tonji ewö kude akñe.

Luk 6.37-38, 41-42

¹ Jisösnöñ toroqeba kewö jiyök, “Anutunöñ keuñini kewöta jim teköi etpepuköra mönö tosatñji yeñğö keuñini kude kewöta jim teköme. ²* Mianğö könañji kewö: İñini tosatñji yeñğö keuñini kewöta jim tekömei, Anutunöñ mönö dop mohot mianñönök nanñini keuñini kewöta jim teköma. İñini tosatñji yeñğöra jimkutukutu ala memba öñğöba eta kewöt eñgimakzei, Anutunöñ mönö mianğö dop nanñini ak eñgii öñğöba erakñe.

³ “Gi alagahö jeñe gödöwöröt morörökñji ekzanmö, nangi jege ip sahöñji ketañji ahözawi, mia mönö wuanöñğöra kude ek kutuzan? ⁴ Me denöwögöra aka amqeba alagahöra kewö jizan, ‘Alani mötnöñ, ni ölop jegeyök gödöwöröt itaköbi etma?’ Mewö amqeba jizanmö, ip sahöñji ketañji mi nange jege ahöza.

⁵ “O gi urumelenğö silesile azia, gi mönö mutuk nange jegeyök ip sahöñji (tametñji) ketañji memba gilman. Mi mem gilagun törörök ek kutuba alagahö jeñeyök gödöwöröt morörökñji mi ölop itakönöñga etma. ⁶ Yuaigöra mötketka tök-kutukutuñji qainñji kun akzawi, mi mönö kiam kude eñgime. Guli damandan qeqeñji mi mönö bau wösöñjine kude gilget anma. Mewö akñe ewö, yeñön mönö mi könañinan tiahom eñgiba dumñe melenđa nanñini eñğöhöba yöhöqöhötım eñgibepuk.” Mewö.

Mönö qesiba jaruba Anutugö nanñunje qeba malme.

Luk 11.9-13

⁷ “Mönö Anutu köuluköme. Köulukögetka kewöta eñgima. Urugö yuaigö Anutugöreñ böröjan memba jarume. Mi jarugetka kondeliga miwikñaime. Kinda nanñunöñ geme. Qegetka nanñunji öröm eñgima. ⁸ Kunñan Anutu köulukömakzawi, yanğön mönö likepñji buña qem aņguma.

* 7:2: Mak 4.24

Yuaigö jarumakzawañön mönö mi miwikñajima. Nanğunöñ gemakzawañgöra mönö nanğu öröm wañgima.

9 “Mötket, ambazip engöreñök dañön kewö akawak: Nahönñan bisketköra qesiiga köt wañgima? 10 Me nahönñan söragöra qesiiga qatö wañgima?

11 “Mewö aiga injini ambazip bölöñi aka töndup kalem ölöpñi ölöpñi nahönböraturupñini engibingö dop akze ewö, engö Iwiñini Suep mire maljawañön mönö kalemñi denöwö aňgön kölbawak? Yangö uruñangö ahakmemeñi mi nenğonğita tandökñi kun akza. Mianğöra injini yuai ölöpñangöra köülüköba qesim wañgime ewö, yañön mönö sihimñan mi enğima.

12 * “Mianğöra ambazipnöñ yuai pakpak nanñinañgö ak enğimegö mörakzei, mianğö dop mönö nanñini mewöyök i ak enğimakñe. Mewö aketka Mosesgö Köna Keu aka kezapqetok ambazip Buzup Kimbi keuñini mianñön mönö öñinambuk aketka mindimindiri könañan aukñe asuhuma.” Mewö.

Mönö kiripo nanğu giwikñi kutuba anme.

Luk 13.24

13 “Könöp sianöñ gebingö könañi mi amqeqeñi aka numbuñangö nanğunji mi ketañi. Ambazip sehisehiñan nanğu mi kutuba köna mi mötöteiba anme. Mianğöra injini mönö kiripo nanğu giwikñi kutuba mianğö uruñe anme.

14 “Malma köhöikñe aňgotpingö könañi mi pökpökñi (pipitñi) osukosubuk aiga numbuñangö nanğunji mi giwikñi. Ambazip awamdökñan nanğu mi miwikñajime.” Mewö.

Ipkö könañi mi öñi eka möt kutume.

Luk 6.43-44

15 “Kezapqetok ambazip takapulakañi yeñön lamagö sile ewö esuñini löngöta engöreñ kamakzemö, uruñinan ubibi kiam kalñi ewö akze. Mianğöra injini mönö yengöra aka tihitñini möta galöm mem aňguba malme. 16 Nupñinañgö öñi eketka könañini kondeli ölöp möt kutume. Nejoñ köñi mi jömnöñ asuhumakza me qahö? Warun köñi mi koururuknöñ (köwörörök) asuhui tokomakzin me qahö? Qahö.

17 “Mianğö dop ip ölöpñi pakpak mienñön öñi ölöpñi kuñgumakzemö, ip bölöñan mönö köñi bölöñi kuñgumakza. 18 Ip ölöpñan öñi bölöñi kuñgumangö osiza aiga ip bölöñan köñi ölöpñi kuñgumangö osiza.

19 * “Ip pakpak öñi ölöpñi qahö kuñgumakzei, mi mönö galömñan kutuba memba köñöpnöñ giliga geme. 20 * Mianğö dop ambazip miengö nupñinañgö öñi eketka könañini kondeli ölöp möt kutume.” Mewö.

* 7:12: Luk 6.31 * 7:19: Mat 3.10; Luk 3.9 * 7:20: Mat 12.33

*Gwarek ölnangö könani**Luk 13.25-27*

²¹ “Nöngö Suep Iwinangö jitsihitji tem kölakzawanön mönö yangö bemtohonöñ angotma. Gwötpuk yeñön nöngöra ‘Kembuni, Kembuni!’ qeta jimakzemö, körek yeñön Suepkö bemtohonöñ qahö angotme.

²² “Jimtekötekögö nalö ketani miangöreñ gwötpuk yeñön kaba nöngöra kewö jime, ‘O Kumbu Kumbu, neñön mönö göhö qetke yuai asuhumapkö kezapqetok keu qeljine jiba malin. Neñön mönö göhö qetkahö ösumnöñ ömewöröme enjuatanböba malin. Göhö qetkan mönö nam köl nenngiiga angöletot ösummumuñinambuk gwötpuk memba malin. Mi ölum guhuza me?’

²³ *Mewö jigetka nalö miangöreñ könani aukne kewö jibi mötme, ‘Nöñön injini nalö kunöñ qahö möt enñial. Iwilele ahak ambazip, injini mönö nömosöta kesalget.’ ” Mewö.

*Miri memegö mötkutukutu ölöñji aka piromñi**Luk 6.47-49*

²⁴ “Mewö aiga denike yeñön keu jitni jizali, mi möta miangö dop tem köla memakzei, nöñön körek yeñgö könaniñini kondela mötkutukutu azigö dop ala kewö jimam, Yanön miriñi jamönjinj köt qakne meyök. ²⁵ Mewö meiga kie uru nalöñe kie römbum yöhöba eriga göulu luhuiga luhut ketani qeiga o göulu köhöikñi gila miri selne kuñguyökmö, miri mi jamönjinj köt qakne mei kinöhanöra aka qahö kusuyök.

²⁶ “Denike yeñön keu jitni jizali, mi möta miangö dop qahö tem köla memakzei, nöñön körek yeñgö könaniñini kondela azi mötkutukutuñi piromñangö dop ala kewö jimam, Yanön miriñi sak kösahet qakne meyök. ²⁷ Mewö meiga kie uru nalöñe kie römbum yöhöba eriga o luhuiga luhut ketani qeiga o göulu köhöikñi gila miri selne kuñgui kusuiga goromorongöba erök.” Mewö.

Ambazipnöñ jisösgö kukösumñangöra welipköget.

²⁸ *Jisösnöñ keu mi jim teköiga ambazip kambuñi kambuñi yeñön mötketka kusum enñiyöhi, tandök miangöra auruba welipköget. ²⁹ Yanön yeñgö Köna keugö böhiurupñinangö tandök qahö kusum enñiyökmö, kukösum Tonji akzawangö dop ambazip kusum enñiiga möta tandök miangöra welipkögetka nemböñini teköyök. Mewö.

8*Jisösnöñ uzikuku azi kun mem solaniyök.**Mak 1.40-45; Luk 5.12-16*

* 7:23: Sum 6.8 * 7:28: Mak 1.22; Luk 4.32

¹ Jisösnöñ kundunji mi mosöta eri könagesö kambulelembe ketanjan andöñe wuatangöget. ² Mewö kagetka miangören uzikuku azi kunöñ kaba simin köla Jisösgö wösöñe geba kewö jiyök, “O Kembu, göñön sihingan mem ölöwak niñgimangö mötzan ewö, mönö ni ölop mem solanim niñgiman.”

³ Mewö jiiga böröñi böranña sileñi misiriba jiyök, “Nöñön mi akñamgö mötzal. Gi mönö solaniman.” Mewö jiiga uzikukunji mi miangörenök solanii ölöwahök. ⁴ *Solaniiga kewö jim kutum wangiyök, “Mötnöñ, kiangö buzup keunji mi kun kude jinöñ mötme. Qahöpmö, mönö jike nup galömgören anda silegi kondel wangiman aka Mosesgören jimkutukutunji wuatangöba solani-zanangö saiwap nalukñi ala jöwöwöl ohoman. Mi ohonöñ ehiga ambazipnöñ könanjamgi möt kutume.” Mewö.

Jisösnöñ suahö galöm kungö nup azinji mem ölöwahök.

Luk 7.1-10

⁵ Jisösnöñ Kaperneam taonöñ kançoriga Rom suahö galöm kunñan yangören kaba köuluköba kewö jiyök, ⁶ “O Kembu, nöngö nup azinangö sileñi likepñan kömukömunji aiga sihimbölo kanjamñambuk möta mire ahöza.”

⁷ Mewö jiiga kewö jii mörök, “Nöñön mönö anda i mem ölöwakñam.” ⁸ Mi möta kewö melenña jiyök, “O Kembu, ni mewöröpñan malbiga nöngö miri boñan goalöñmapkö gamuni mötzal. Miangöra keu jitkanök jinöñga welen azinan ölöwakña.

⁹ “Mi kewögöra: Ni nanak mewöyök galömnangö kukösum bapñe al niñgigetka maljal. Nöngö bapne yarö azi malgetka mi jim kutum engimakzal. Yengörenök kungöra ‘Anman,’ jim kutubi yanön anma. Kungöra ‘Kanöñ,’ jim kutubi yanön kama aka welen azini kungöra ‘Nup ki meman,’ jibiga yanön mi mema.”

¹⁰ Jisösnöñ keu mi möta welipköba ambazip wuatangöba kageri, yengören lilingöba kewö jiyök, “Nöñön keu ölnji kun kewö jibi mötme: Israel könagesö sutñine mewöyök mötnarip ketanji mewöñi mi kungö uruñe qahö miwikñajial.

¹¹ * “Nöñön keu kewö jibi mötme: Ambazip kambulelembenöñ mönö wehön kotkotñeyök aka wehön gegeneyök kaba Suepkö bemtohoñ uruñe kançota Abraham, Aisak aka Jeikob yembuk nene sösongai aka malme. ¹² *Yenön mewö malmemö, bemtohongö nahönböraturop mi mönö engömosöta aköm engigetka pandamanöñ yaigep geme. Miangören malmei, yenön mönö sahöt gigilahöba irimñini yöhözömgögetka qetñi qeri malme.”

* **8:4:** Lew 14.1-32 * **8:11:** Luk 13.29 * **8:12:** Mat 22.13; 25.30; Luk 13.28

13 Mewö jiba suahö galömgöra kewö jiyök, “Gi mönö mirige anman. Mötnaripkahö dop mönö asuhum gihima.” Mewö jiiga welen aziñan mönö aua mianğörenjök ölöwahök. Mewö.

Jisösnöñ kawöl ambazip gwötpuk meiga ölöwaket.

Mak 1.29-34; Luk 4.38-41

14 Jisösnöñ Pitögö mire anda Pitögö suhunñan silekönöp kawöl yöhöi ahöiga ehök. 15 I eka böröñe misiriiga silekönöpñan mosöri wahöta könahiba Jisös nene ohoba gumohom wañgiyök.

16 Mewö malgetka miri söñauiga mianğören ambazipnöñ alaurupñini ömeninambuk mi gwötpuk enğuanğita yañğören kaget. Kagetka ömewöröme mi keuñan jiba közöl enğiiga kota anget aka kawöl ambazip pakpak mi mem ölöwak enğiyök.

17 *Mewö mianğön Anutunöñ keuñi kezapqetok azi Aisa-iağö uruñe ali jii ahözawi, mianğön ölnambuk ahök. Keu mi kewö, “Yañğön mönö neñgö uzi kawölnini meiga qakñe öñgöiga bisiyök.” Mewö.

Jisös wuatañğöbingö möndömöndö keuñi

Luk 9.57-62

18 Jisösnöñ ambazip kambu ketañi liliköm wañgiget enğeka nalö mianğören gwarekurupñi yembuk o añgö kutuba likep añgotpingö jim kutuyök. 19 Köna keugö böhi kunñan Jisösgören kaba kewö jii mörök, “Böhi, gi denike denike anmani, nöñön mönö mianğören gi guatañğöba kamam.”

20 Mi möta Jisösnöñ kewö jii mörök, “Arökñañgö kiam yeñön köteñine ahögetka könakemba nei yeñön öñgot jajöñini memba malakzemö, Suep gölmegö azi ölnan mönö denike anda nöropñi wani qömböñnöñ nariba luhut membawak?”

21 Mewö jii gwarek yeñğörenjök kunöñ kewö jii mörök, “Mi ölöpmö, iwinan kömumamgö aiga mutuk jinöñga anda galöm kölbi kömui löm kölbigun.” 22 Mewö jiyökmö, Jisösnöñ melenđa jiyök, “Mosötnöñ, köhömuñi yeñön qamötñini köhömuñi mi ölöp löm kölmemö, göñön mönö kaba ni nuatañğöman.” Mewö.

Jisösnöñ jiiga raidimbom göröñ qeyök.

Mak 4.35-41; Luk 8.22-25

23 Jisösnöñ anda wañge uruñe öñgöiga gwarekurupñan wu-atañğöba yambuk mohotñe anget. 24 Angetka raidimbom ketañan ömtöröp (töröpñanök) o añğönöñ asuhuba gilök. Giliga sirinöñ wañge uruñe geiga numbuñe qemamgö ahökmö, Jisösnöñ gaun ahöyök. 25 Gaun ahöiga gwarekurupñan anda möndöba jiget, “Hei Kembu, mönö bauköm nenginöñ. Nini añğönöñ ayuhubingö akzin.”

* 8:17: Ais 53.4

26 Mewö jigetka melenđa kewö jim enġiyök, “O inġini mötnaripġini morörökġi, mönö wuanöngöra kenġöt mötmöt azia akze?” Mewö jiba wahöta luhut aka siri jim qetal etkiiga sirinöŋ nön qeba ahöyök. 27 Mewö aiga awöwöliba qesiba jiget, “Yei! Azi kia mönö denöwöŋan malja. Yaŋön mönö luhut aka köwet jim kutum etkiiga jitġi tem köl waŋgizahot.” Mewö.

Ömenöŋ bau uruġine gegetka azinöŋ ölöwahot.

Mak 5.1-20; Luk 8.26-39

28 Mewö asuhuiga o aŋġö kutuba likepġe Gadara yeŋġö gölmenöŋ aŋgorök. Mianġöreŋ aŋgota azi ömenjirambuk yahöt yetköŋ qaksirinöhök kaba Jisös miwikġaiyohot. Yetköŋ irimsesewöl azi urukönöpġirambuk ahotka kunġan köna mianġöreŋ anmamġö osiyök. 29 Yetköŋ Jisös miwikġaiba silata kewö qet gigilahöyohot, “Aek! Gi Anutugö Nahönġi akzan. Gi mönö denöwö ak neŋgimamġöra kazan? Sihimbölä mötmöt nalöŋan qahö kam kuŋguiga qelġine mi könöpġambuk ak neŋgimamġö ki kazan me?”

30 Mianġöreŋök köröwen qahöpmö, kösutġine mianġöreŋ bau kambu ketanġi kun gwözözak uruġe kulunđa malġet.

31 Mianġöra ömenöŋ kewö jiba Jisös ulet waŋgiget, “Göŋön nini közöl neŋgiman ewö, mönö melaim neŋginöŋga öläp bau kambu mienġö uruġine gebin.”

32 Ulet waŋgigetka Jisösöŋ “Mönö anda geget,” jiba jim kutuyök. Mewö jim kutuiga mianġöreŋök azi uruġireyök kota anda bau uruġine geget. Gegetka bau kambu körek yeŋön mönö luhuba nembönembönöŋ anda jororonġöba o aŋġönöŋ geba nemulahöba kömuġet.

33 Kömuġetka bau galöm yeŋön ölöŋ unjurata taonöŋ anda keu buzupġini pakpak jiget. Azi ömenjirambuk yetköreŋ yuai asuhuyöhi, mianġö buzupġi mewöyök jiget mötket. 34 Jiget möta taon ambazip pakpak yeŋön mosöta Jisös miwikġaiba ekingö kaget. Kaba eka Jisösöŋ yeŋġö mindimindiri sel gölme mosöta anmapkö ulet waŋgiget. Mewö.

9

Jisösöŋ azi sile likepġi kömukömuġi möhamġöyök.

Mak 2.1-12; Luk 5.17-26

1 Jisösöŋ waŋge uruġe öŋġöba kunbuk o aŋġö kutuba likepġe aŋgota nanġe taonöŋ kayök. 2 Nalö mianġöreŋ azi tosatan alaŋini sile likepġi kömukömuġi tumbulahöpnöŋ ahöyöhi, mi kululunöŋ ala aŋguba kaget. Mewö kaba Anutu möt narim waŋgigeri, Jisösöŋ yeŋġö tandökġini mi ehi dop köliga kawöl azigöra kewö jiyök, “Nahöni, nönön siŋgisöndoki mosötzal. Mönö köhöiba ewebibigabuk saitġit malman.”

³ Mewö jiiga Köna keugö böhi tosatñan kinda uruñinan kewö mötmöriget, “Azi kianñon mönö Anutu ilita mepaqepaik akza.”

⁴ Mewö mötmörigetmö, Jisösnöñ mötmötñini mi möt kutuba kewö jiyök, “Injini mönö wuanöñgöra keu bölöñi uruñinan mötmörize? ⁵ Nöñon ‘Sinjisöndoki mosötzal,’ jizali, keu mianñon mönö awamñanök jijiña. Kunñan mewö jiiga tosatñan keu mianñö ölni qahö ekñe. Mianñöra mi keu awamñanñö dop. Nöñon keu kun kewö jimamñö mötzal, ‘Mönö wahöta anöñ.’ Keu mi mönö lömbötñambuk jijiña akza. Mewö jibiga ölni ahuma me qahöwi, mianñon mönö aukñe asuhui ekñe.

⁶ “Mötket, gölmenöñ sinjisöndok mosötmosötkö kukösumñi mi Suep gölmegö azi ölnañgöreñ ahözawi, injini mianñö könañanñöra janjuñ malbepuk. Mianñöra keu lömbötñi mi azi kianñöra jibi ölni eket.” Mewö jiba azi sile likepñi kömukömuñanñö jeñe eka jiyök, “Gi mönö wahöta tumbulahöpki memba mirige anöñ. Keu lömbötñi mi ölnambuk akña ewö, keu awamñi mi mönö mewöyök denöwögöra omanñi akawak?”

⁷ Mewö jiiga mianñöreñök wahöta miriñe anök. ⁸ Mewö asuhuiğa ambazip kambu yeñon mi eka welipköba Anutu möpöseim wanñiget. Gölmö azigöra kukösum mewöñi wanñiyöhañgöra Anutu möpöseiget. Mewö.

Jisösnöñ Matyu (Liwai) oholök.

Mak 2.13-17; Luk 5.27-32

⁹ Jisösnöñ mianñöreñök anda takis ofis onñitmamñö aiga mianñöreñ azi qetñi Matyu tariga eka jii mörök, “Gi mönö nöñgö andöne kanöñ.” Mewö jii möta wahöta takis nup mosöta Jisösgö andöñe anök.

¹⁰ *Anda Matyugö mire anda nene nema tatkeri, nalö mianñöreñ takis meme azi tilipqilipñinambuk aka sinjisöndok azi gwötputkñan kaba Jisös aka yanñö gwarekurupñi yembuk tata nene mohotñe neget. ¹¹ Mewö negetka Farisi (Köna keugö kapanñököl) yeñon mi eka Jisösgö gwarekurupñi kewö jim enñiget, “Aek! Enñö böhiñinan mönö wuanöñgöra takis meme tilipqilipñinambuk aka sinjisöndok ambazip yembuk tata nene neza? Mi qahö dop kölja.”

¹² Mewö jim enñigetka Jisösnöñ likepñi kewö jii mötket, “Sile unditundit ambazipnöñ doktagöra qahö ak enñimakzapmö, kawöl ambazipnöñ mönö doktagöreñ anakze. ¹³ *Nöñon sinjisöndok ambazip enñoholmamñöra kaba maljalmö, ambazip nanñinanñö mötketka solanñi akzei, i qahö. Mianñöra keu kianñö könanñi mönö anda kusum anñuba mötme, ‘Nöñon

jöwöwöl ohobingö qahöpmö, ak kömum anğubingö sihimñi mötzal.’” Mewö.

*Nene sinği malmalgö keuñi
Mak 2.18-22; Luk 5.33-39*

14 Nalö mianğoreñ Jon O-melun azigö gwarekurupñi yeñön Jisösgöreñ kaba kewö qesiget, “Neñön aka Farisi (Köna keugö kapankölköl) yeñön Anutugöra nene sinği gwötpuk mala-hakzin. Nangi gwarekurupkan mönö wuanöngöra nene sinği qahö malje?”

15 Mewö qesigetka kewö meleşnök, “Ölña, nini wani nalönöñ nene sinği malakzin? Ambi meme nalöñe azigö andöurupñan könöpñi algetka ambigö sepkitipurupñan yuai mi tökömakze me qahö? Nöñön nani gwarekurupni yeñgö azi buñaya aka yeñgö sutñine köisirik tatzal. Tatpiga yeñön mianğöra aijölöñ söñgaiba tata sinği malbingö osimakze. Os-imakzemö, Anutunöñ noanğiri kömumbiga yeñön mönö nalö mianğoreñ ölop sinği malakñe.

16 (“İñini malmal walñi aka söşöngai Buña dölökñi mi mindirim etkibingö osime. Mianğö keu pasetñi mi kewö jibi mötket:) Löñgölöngöt walñi jurariga kunöñ opo dölökñi qahö sanğonşanğonñi mitiba mianñön opo su jöhanñi qahö ala umğoreñgömakza. Opo su jöhanñi dölökñi mewöñan mönö waziba löñgölöngöt walñi öröiga kunbuk tinğiriga kinimñan qariba böliqölibapuk.

17 “Mewöñanök kunöñ wain o dölökñi mi jobö me toru walñi lama silenñan memenñi mianğoreñ qahö kusuiga gemakza. Mewö akawak ewö, wain o dölökñan mönö qariba toru qesinñiga jula mokoiga gölmenöñ eta sohoiga toruñan böliqölibepuk. Mianğöra wain o dölökñi mi toru dölökñeyök mokoin geiga dop kölma. Möwö ahinga mietkön ölöwakñahot. (Mewöñanök o ölopñi mi gina gisagisahöñe qahö umakzin. Mewö ubinak ewö, mianñön mönö jula kisipisirik eriga nemba kawöl neñgöhöbapuk. Mewö akapüköra o ölopñi mi gina ölopñe umakzin. İñini mewöyök malmal walñi aka Ölöwak Buña dölökñi mi mindirim etkibingö osime.) Mewö.”

*Jairusnöñ börtanğöra Jisös köulüköyök.
Mak 5.21-43; Luk 8.40-56*

18 Jisösnöñ keu mi jii mötketka keu galöm kunñan kanğota Jisösgö wösöñe geba simin köla kewö köulüköm wañgiyök, “Nöñgö börtanñan mönö dölki kömuzapmö, mönö kaba börtögan silene misirinöñga guliba toroqeba malma.”¹⁹ Köulüköm wañgiiga wahöta gwarekurupñi yembuk i wuatangöba anget.

Kawöl ambi kunöñ Jisösgö malukuñi misiriyök.

²⁰ Angetka mianğoren sutıne ambi kun malök. Yanön (yara) yambu 12 mianğö dop köinön ehiga nalö dop kawöl yöhöiga malök. Ambi mianön Jisösgö andöne kaba malukuñğö kitip suni misiriyök. ²¹ Mi misiriba nanñangöra kewö jiyök, “Nöñön i oseimangö möt lömböriba malukuñeyök borom kun misiribileñak ewö, mönö ölop ölöwakñam.”

²² Mewö jiba misiriiga Jisösnön mianğorenök lilingöba i eka kewö jii mörök, “Böratni, mötnaripkan mönö mem ölöwak ghiza. Mönö köhöiba ewebibigabuk saitingit malman.” Mewö jii möta aua mianğorenök ölöwahök.

Jisösnön Jairusgö böratni mem guliyök.

²³ Toroqeba angetka Jisösnön keu galömñangö mire öngöba ambazip jıngeñ köla awölop ugeri aka ambazip kambu göju gilgeri, mi engeka kewö jim kutum engiyök, ²⁴ “Mönö yaigep anget. Ambi moröñan qahö kömuzapmö, gaunök ahöza.” Mewö jim kutum engiiga mötketka gönahit ewö aiga gön köl wañgiget.

²⁵ Gön köl wañgigetmö, ambazip kambu ketanı mi jiiga yaigep angetka ambi moröñangö ahöahö miri uruñe öngöba böröñe meiga wahörök. ²⁶ Wahöriga mianğö buzup keuñan sehiba mindimindiri sel mi körek dop köla anök. Mewö.

Jisösnön jegömöl azi yahöt mem ölöwak etkiyök.

²⁷ Jisösnön miri gölme mi mosöta anmamgö ani jegömöl azi yahötñan wuatangöba andöne kaba kewö qerohot, “Deiwidkö gwölönarökñi, gi mönö ak kömum netkiman.”

²⁸ Mewö qerohotka miri kungö uruñe öngöiga jegömöl azi yetkön Jisösgoren kayohotka kewö qesim etkiyök, “Jeniri mem tohomangö kukösumñi nöñgoren ahözawi, mi möt narizahot me qahö?” Qesim etkiiga kewö melen wañgiyohot, “Kembuniri, mi ölop möt narizit.” ²⁹ Mewö melen wañgiyohotka je dapötñire misiriba jiyök, “Mötnaripñirañgö dop mönö asuhuma.”

³⁰ Mewö jiiga jeniran tohoyök. Mewö asuhuiga galöm meme keu köhöikñi al etkiba kewö jiyök, “Mörohot, kiangö buzupñi mi kun kude jiyohot mötme.” ³¹ Mewö jiyökmö, yetkön mosöta anda mianğö buzupñi jim sehiyohotka mindimindiri sel mi körek dop kölok. Mewö.

Jisösnön mötök azi kungö keuñi möhamgöyök.

³² Jeniri tohoi anohotka töñöt azi keu jjiñi qahö mi wañgita Jisösgoren kaget. ³³ Kagetka Jisösnön ömeñi közöli mötök azinön keu jiiga ambazip kambu yeñön mi eka welipköba jiget, “Tandök kewöñi mi Israel uruñe mönöwök nalö kungen qahö ehin. Qahö. Dölki je murutña ekzin.”

³⁴ *Mewö jigetmö, Farisi (Köna keugö kapañkölköl) yeñön

* **9:34:** Mat 10.25; 12.24; Mak 3.22; Luk 11.15

jiget, “Yañön mönö öme yengö kembuñinangö ösumnönj ömewöröme enjguatanğömakza.” Mewö.

Jisösnönj könagesö yengö wösönj mörök.

³⁵ *Jisösnönj anda miri aka taon dop liliköba ambazip köuluk mirinijine kusum engiba bemtohongö Ölöwak Buña jim asariba mianjön urunijini kuñguba uzi kawöl aka jepajerepe könani könani mem ölöwak engiba malök. ³⁶ *Mewö mala ambazip kambuñi kambuñi engehiga lama galömnijini qahö tandök simbisembel aka ilingösönj qengalanğa malgetka yengöra wösönj mörök.

³⁷ *Mewö engeka gwarekurupñi kewö jii mötket, “Anutugö nupnönj nene ölni gwötpuk öliba ahözapmö, mi tokobingö nup meme ambazipnönj mönö awamdökñi malje. ³⁸ Mianğöra nene öliölinangö Kembuñan nup meme ambazip melaim engimapköra mönö köuluköba malme. Köuluköm wanğigetka nup ambazip asuhuba ölni mi mem tokome.” Mewö.

10

Aposol 12 yengö qetñini

Mak 3.13-19; Luk 6.12-16

¹ Jisösnönj gwarekurupñi 12 engoholi yangörenj kagetka ömewöröme közöl engimegö kukösumñi al engiyök. Mewöyök uzi kawöl qemjem-mamjenj könani könani mem ölöwaknegö kukösumñi al engiyök. ² Melaimelai azi aposol 12 miengö qetñini kewö: mutukñi yanjön Saimon, qetñi kun Pitö qetket aka yangö munñi Andru. Mianğö andöñe Jeims aka munñi Jon, iwinjiri qetñi Zebedi.

³ Filip aka Bartolomyu, Tomas aka Matyu takis meme azi, Jeims Alfiusgö nahönñi aka Lebeus qetñi kun Tadius,

⁴ Saimon Zelot-politik azia * aka Judas Iskariot. Kariot azi mianjön könanjen Jisös mamalolo mem wanğiyök.

Jisösnönj gwarekurupñi 12 melaim engiyök.

Mak 6.7-13; Luk 9.1-6

⁵ Jisösnönj azi 12 mi melaim engiba kewö jim kutum engiba jiyök, “Injini kian kantrigö ambazip yengörenj kude anme. Mewöyök Samaria prowins yengö taonñini kunönj kude anme.

⁶ Mianğörenj kude anmemö, Israel könagesögö lama sohogeri, mönö yengörenj anme. Mi nup mutukñi. ⁷ *Denike denike anmei, mianğörenj mönö Buña keu kewö jiba jim asarime,

* **9:35:** Mat 4.23; Mak 1.39; Luk 4.44 * **9:36:** Jan 27.17; 1 Kin 22.17; 2 Hist 18.16; Eze 34.5; Mak 6.34 * **9:37:** Luk 10.2 * **10:4:** Nesönöl pati Zelot yanjön Rom gawman tuarenjonj aka nanñine kinkin membingöra tuaköpek memba

malget. * **10:7:** Luk 10.4-12

‘Suepkö bemtohoŋan mönö dowe kazawa mianğö uruŋe aŋgotme.’

⁸ “Ambazip kawölŋinambuk mönö mem ölöwak engiba kömukömuŋi mi mem gulim engiba malme. Uzikuku ambazip mönö mem solanim engigetka öme wöröme közöl engiba malme. Anutunöŋ yuai kalema engiyöhi, mi mönö toroqeba kalema engiba malme.

⁹ “Köna anmeaŋğöra soujeŋi goul me silwö me ain kopönöŋ memenji mi mönö irimuŋaŋine kude jöhöme. ¹⁰* Ambazipnöŋ nup meme ambazip malmalŋini naŋğömeaŋğö dop akze. Mianğöra köna anmeaŋğö yuaiŋi ki mi kude memba anme: gösö qahö, maluku semönŋi qahöpmö, mohot meme, köna esu qahö, öröp qahö.

¹¹ “Anda taon me miri denike denike aŋgotmei, mianğöreŋ mönö daŋön azi ipŋi qetbuŋaŋambuk akzawi, mianğöra qe-sigetka miri engime, mönö mianğöreŋök mala nup memba taon mi mosöta köna anme. ¹²Miri kunöŋ öŋğöba luainöŋ yembuk ahömapkö jime. ¹³Mi jigetka luainini aŋğön kölmeaŋğö dop akze ewö, luaininan mönö yeŋğö qakŋine öŋğömapmö, mi aŋğön kölmeaŋğö dop qahö akze ewö, luaininan mönö lilingöba nanŋine kama.

¹⁴ * “Anda mala miri kunöŋ aŋgotketka qahö köl öröm engiba keuŋini qahö mötketka nesampurekŋini mönö kewö jiba kondel engime, ‘Nini engö gölmenöŋ kainga sölbuham köna tambönine mekötahözawi, mi mönö tim tönjöraringa nanŋine lilingöba gema.’ Mewö jiba ölop miri me taon mi mosöta toroqeba anme. ¹⁵* Nöŋön keu ölni kun kewö jibi mötme: Anutunöŋ nalö ketaje qemasolokepŋinaŋğö likepŋi melenji taon mianğö qakŋe öŋğömawi, dop mianğön mönö Sodom aka Gomora gölme yeŋğö dop oŋgita toroqem engima.” (Sodom Gomora yeŋğön bölöŋi kanjamŋambuk memba uruŋini qahö melenjetka Anutunöŋ könöpnöŋ könderŋ engiyök.) Mewö.

Anda nup megetka sesewerowero asuhuma.

Mak 13.9-13; Luk 21.12-17

¹⁶ * “Mötket, lama yeŋğön arökŋaŋğö kiam kalŋi yeŋğö sutŋine gegetka luhuba engöhöbepuk, nöŋön iŋini mianğö tandök ewö melaim engibi anme. Mianğöra mönö mokolen † ewö mötkutukutu qakŋe galöm mem aŋguba mala kembö ewö ambazip böŋjöŋi köpösihitkö keuŋini qahö malme.

* **10:10:** 1 Kor 9.14; 1 Tim 5.18 * **10:14:** Apo 13.51 * **10:15:** Mat 11.24; Jen 19.24-28 * **10:16:** Luk 10.3 † **10:16:** Mokolen aka raskol yeŋğön aukŋe bim qegetka zilaŋ miwikŋaiba jöhöm engibeak. Mianğö dop lömböribapuköra gwarek nenöŋ maslim, komyunist aka tosatŋi yeŋğö sutŋine qetnini misinari mi aukŋe qahö jimakzin. Mötkutukutu mi ölopŋi.

17 *Ambazipnõj injini öröba keu jakejine al engiba köuluk mirinjine keu nupjini memba ihilek wahinjambuknõj taukõm engime. Miangöra ambazip mewõj yengöra mönõ galõm mem anguba malme.

18 “Tosatjan nõngöra aka enguangitketka kantriji kantriji yengõ kin kembu aka premiõ yengõ jemesoholjine kinme. Mewõ kinda nõngõ kõnanamni nangõba jigetka azi ipji mi aka kian kantri kõnagesõ yenjõn mi mötme. 19 Mi mötmemõ, keu jakeje al engigetka kinmei, nalõ miangõrenj wani keuya denõwõ jibinak, miangõ waimanjatji kude mötme. Keu jimei, mi Uña Törõjan aua miangõrenjõk engima. 20 Nanjine urujineyõk keu kude jimemõ, Iwinjanjõ Uña Törõjan mönõ urujini sölölöhõiga keu jime.

21 * “Urumelengõ kopa kunõj darumunjan uruji melenõ-hanjõra aka i mamalolo meiga keu jakeje algetka qeget kõmuma. Mewõyõk iwi kunõj nahõnbõratji mamalolo meiga kõmuma aka nahõnbõrat yenjõn iwinamurupjini qetal engiba jigetka enguget kõmume. 22 *Nõngõ qetnanjõra aka kantriji kantriji yenjõn kõrek kazik al engigetka malmemõ, kunjan kapan kõla nalõ tekõmawangõ dop kõhöiba bõj qeba kinmawi, yanjõn mönõ oyaenkoyaj buja gem anguma.

23 “Taon kunõj sesewerowero ak engime, mi mönõ kök ala taon kunjan anme. Nõjõn keu õlji kun kewõ jibi mötme: Injini Israel taonji taonji qahõ lilikõm tekõgetka Suep gölmegõ azi õljan mönõ lilingõba kama. 24 *Gwarek kunjan böhiji õngita mötmõtjambuk qahõ akza aka welenqeqe kunjan ketanjani õngita nupkõ mötmõt qahõ memba malja.

25 * “Gwareknõj böhiji ewõ mötmõtjambuk aiga dop kõlma aka welenqeqenõj ketanjani ewõ nupkõ mötmõt memba maliga dop kõlma. Miri uruji kungõ saiwa galõmji jim böliba qetji Katakõmulat † qetket ewõ, yanjõ saiwaurupji yengõ qetjini mönõ amqeba awamjanõk mewõ qerakje.” Mewõ.

Dagõra kenjõtjini mötketka dop kõlma?

Luk 12.2-7

26 * “Ambazipnõj yuai õnun meget ahõzawi, mi pakpak mönõ lulujetka aukje ahuma. Mewõjanõk keu asambõtket ahõzawi, mi pakpak mönõ indelgetka möt kutume. Miangöra ambazip yengöra kenjõtjini kude möta malme. 27 Nõjõn keu

* **10:17:** Mak 13.9-11; Luk 12.11-12; 21.12-15 * **10:21:** Mak 13.12; Luk 21.16
 * **10:22:** Mat 24.9, 13; Mak 13.13; Luk 21.17 * **10:24:** Luk 6.40; Jon 13.16; 15.20
 * **10:25:** Mat 9.34; 12.24; Mak 3.22; Luk 11.15 † **10:25:** Juda yengõrenj Katakõmulat qetji Belzebul. Mi õmewõrõme yengõ ketanjani. Matyu 9.34 miangõrenj Jisõsgõra qet bölõji mi qetket. Miangõ dop Jisõsgõ alaurupji nenjõra qet bölõji kõnanj kõnanj qerakje. * **10:26:** Mak 4.22; Luk 8.17

sõnaupnõj õlõj jimami, mi mõnõ asakje jime. Keu saņep algetka kezapņine gei mõtmei, mi mõnõ sombemnõj aukņe jime. Mianģõra mõnõ keuņinaņģõ galõm memba malme.”

Dagõra keņģõtnini mõringa dop kõlma.

²⁸ “Tosatņan silenini qem kõmumbeakmõ, uņaņini qem kõmumbingõ osimei, yeņģõra keņģõtnini kude mõta malme. Mi qahõpmõ, yuai mutukņi ki: Kunņan kukõsum memba uņa aka sile mohot ayuhum etkiiga kõnõp sianõj gemahori, yaņģõra mõnõ keņģõtnini mõta malme. ²⁹ Tosatņan bekõsõm (jõjõrõm, ulisit) yahõt monerj kõtņi mohot-tõpnõj sõņģõrõņi memegõra alakzemõ, etkerigetka Iwiņinan oņ qahõ jiiga yetkõreņõk mohotnõj gõlmenõj qahõ etma.

³⁰ “Anutunõj kõyan kõl eņgiba nõrõp juņņini pakpak mewõyõk oyoņ tekõba jaņģõņini mõtza. ³¹ Ambazip eņģõ sõņģõrõņini mi bekõsõm ulisit gwõtpuk eņģõņgita õņģõņģõņi akza. Mianģõra keņģõtnini mõnõ kude mõta malme.” Mewõ.

Kraist jim miwikņaime me qaņ kõlme?

Luk 12.8-9

³² “Mewõ aiga kunņan ni ambazip jeņine jim miwikņaim niņģimawi, nõņõn mõnõ mewõņanõk i Iwini Suep mire maljawaņģõ jeņe jim miwikņaimam. ³³ *Mewõmõ, kunņan ni ambazip jeņine qaņ kõl niņģimawi, nõņõn mõnõ mewõņanõk Iwini Suep mire maljawaņģõ jeņe qaņ kõlman.” Mewõ.

Jisõsgõra luai qahõpmõ, kazik asuhuma.

Luk 12.51-53; Luk 14.26-27

³⁴ Jisõsnõj toroqeba kewõ jiyõk, “Kewõ kude mõtmõrime: Jisõsnõj luai qemamgõra aka gõlmenõj erõk. Nõņõn luai qemamgõra qahõpmõ, nõņģõra aka jula denģetka bimģõ sou ketaņan aume.

³⁵ * “Mi kewõgõra jizal: Nõņģõ Buņa keunan ambazip uruņini kuņgui melenģeraņģõra kewõ asuhuma, ‘Iwi morõ yetkõn jula kerõk-kerõk ahotka nam morõ yetkõn tõtal aņguyohotka iranņan iranņi qetala julmahot. ³⁶ Ambazip nanņini saiwaurupņinan mõnõ kerõkurupņini akņe.’

³⁷ “Kunņan ni gõragõra al niņģiba iwiņi me namņi jegerp ala jõpakõmawi, yaņõn mõnõ nõņģõreņ qahõ dop kõlma. Kunņan ni gõragõra al niņģiba nahõnņi me bõratņi jegerp ala jõpakõmawi, yaņõn mõnõ nõņģõreņ qahõ dop kõlma. ³⁸ *Sisitņini megetka kunņan ni nuataņģõba sihimbõlõ mõta maripomnõj kõmumamģõ qahõ jõjõrõmawi, yaņõn mõnõ nõņģõreņ qahõ dop kõlma.

* **10:33:** 2 Tim 2.12 * **10:35:** Mai 7.6 * **10:38:** Mat 16.24; Mak 8.34; Luk 9.23

39 **“Kunjan nanji malmal siyonsayonji qahö mi miwikñaimawi, yanğö malmalñan mönö sohoma. Kunjan nöngöra aka malmalñi köleñniga sohomawi, yanğön mönö oyaenköyaen malmal miwikñaima.”* Mewö.

Anutunöñ nupñinanğö töwañi enjgima.

Mak 9.41

40 **Jisösnöñ jiyök, “Kunjan inini miriñe köl öröba köyan köl enjgimawi, yanğön mönö ni köl öröm niñgima. Kunjan ni köl öröm niñgimawi, yanğön melaim niñgiyöhi, mönö i miriñe köl öröm wañgima. 41 Kunjan kezapqetok ambazip kun kezapqetok nupñanğöra aka miriñe köl öröba köyan kölmawi, yanğön mönö kezapqetok ambazipkö töwañi buña qem anğuma. Kunjan ambazip solanñi kun solanñi akzawañgöra aka miriñe köl öröba köyan kölmawi, yanğön mönö ambazip solanñanğö töwañi buña qem anğuma.*

42 *“Kunjan morö kienğöreñök kungöra nöngö gwarekni akzawañgöra aka o amötñi qambinambuk nemapköra wañgimawi, Anutunöñ mönö mianğö töwañi melenđa wañgima. Nöñön keu ölni kun kewö jibi mötme: Nanğöm enjgimei, mienğön mönö töwa meme.”* Mewö.

11

Jongö gwarekyahötñi Jisösgöreñ kayohot.

Luk 7.18-35

1 *Jisösnöñ gwarekurupñi 12 keu mewö kusum enjii teköiga miri mi mosöta toroqeba Galili prowinsğö taon tosatñe anda Buña keu kusum enjiba mianğön uruñini kuñguba malök.*

2 *Nalö mianğöreñ Jon O-melun azinöñ kösö mire tata Kraistnöñ nup mewö meyöhi, mi möta gwarekyahötñi melaim etkii Jisösgöreñ anohot. 3 Kewö qesim wañgimahotköra melaim etkii anda jiyohot, “Mem ölöwak azi kamapköra mambörakzini, gøyön mia akzan me azi kun bian kamapköra mambötpin?”*

4 *Mewö qesim wañgiyohotka kewö melenök, “Yuai eka mötzahori, mianğö kösohotñi mönö anda Jon kewö jiyohot mötma: 5 *Jegömöl yeñön jeñini uba eketka lokon yeñön köna anda kagetka uzikuku yeñön solanigetka kezapduhup yeñön keu mötketka kömuget yeñön guliba wahötketka etqeqeñi yeñgöra Ölöwak Buña jim asaribiga mörakze. 6 Mewö asuhui eketka kungö uruñan qahö bölili andö nuñgumawi, yanğön mönö simbawoñ akza.”*

7 *Mewö jiiga Jongö gwarek yetkön anohotka Jisösnöñ könahiba Jongö könañi ambazip kambu yeñgöra kewö jim*

* **10:39:** Mat 16.25; Mak 8.35; Luk 9.24; 17.33; Jon 12.25 * **10:40:** Mak 9.37;

Luk 9.48; 10.16; Jon 13.20 * **11:5:** Ais 35.5-6; 61.1

asariyök, “İnini gölme qararančkölkölne میانگören wania ekingöra anget? Luhutnön jehot uwutapköba metali anjanbanjan ahakzawi, İnini azi mewöni ekingöra anget me? ⁸ Me wanat yuaia ekingöra anget? Azi malukuñi aködamunñambuk löngöta malöhi, mi ekingöra me? Mötket, ambazip malukuñini eksihimñinambuk löngörakzei, mienön mönö kiñ yengö jakömbuak miriñine malje. Mi gölme qararančkölkölne qahö.

⁹ “Me wanat yuaia ekingöra anget? Kezapqetok azi kun ekingöra me? Ölña, nönön kewö jibi mötket: Azi ekeri, yañön mönö kezapqetok ambazip pakpak enğonğita tandökni kun akza. ¹⁰ *Yağö könañi mi mönöwök kewö ohoget ahöza, ‘Mötnön, nönön kolekni garata kun melaibiga qeljiñe anda ambazip uruñini mindiğöba göhö könaği mesariga göñön mönö yağö andöñe gölmenön emu geman.’

¹¹ “Keu mewö ahözapmö, nönön keu ölñi kun kewö jibi mötket: Ambinöhök morö pakpak asuhugeri, yengö sutñine Jonön mönö körek enğonğita qetbuñambuk kinja. Kinjapmö, Suepkö bemtohoñ uruñe anğota Anutugö qetbuñani miwikñaimakzei, yengö sutñine eretñi kondikni yañön mönö Jon onğitza.

¹² *“Jon O-melun azinön Buña keu jiiga nalö میانگörenök könahiba Suepkö bemtohoñi könöñambuk tuarenjon aka yarö gilakzemö, tondup ösumñan anda qarimakza. Könöñinambuk yarö gilakzeañön mönö bemtohoñ mi nanñinağöra öröba buña gem anğumakze. ¹³ Bemtohoğö könañi mi Mosesğören Köna keunön aka kezapqetok ambazip körek yengö Buzup Kimbiñine ohogetka oyoğda mala koringa Jonön asuhuba ölñi aukne indelök. ¹⁴ *Keu ki möt anğön kölbingö mötze ewö, Elaija (Elia) asuhumawağö dop ahöhi, Jonön mönö mia akza. ¹⁵ Kunñan urukezapñambuk maljawi, yañön mönö keu mi kezap ala möt kutuma.

¹⁶ “Ambazip merak gölmenön maljei, mi mönö wanatpuk dop al enğibileñak? Yeñön namande ewö akze. Mienön maket sombemnön tata keu gön gila lañ qeta kewö jimakze,

¹⁷ ‘Nini awölop uinga İnini liñet gwawet qahö unduget. Nini jingən kölinga İnini qahö toroqeba sahötket.’

¹⁸ “Miağö könañi kewö: Jon O-melun azinön kaba nene siñgi mala wain o qahö neiga yağöra jimakze, ‘Öme kunön uruñe geiga malja.’

¹⁹ “Suep gölmegö azi ölñan kaba nene nem söñgaip aiga yağöra kewö jimakze, ‘Mötket, yañön bau numbu tandök közöjeriba wain o gwötpuk namba takis tilipqilipñinambuk aka

bölöŋi meme yeŋgö alanina malja! Anutugö mötkutukutu köl gulimakzei, yeŋgö ahakmemenjanŋö öljan mönö mötkutukutu-ŋinan dop köljawı, mi kondelakza.” Mewö.

Jisösnöŋ taon 3 yeŋgöra Yei wösöbirik! jiyök.

Luk 10.12-15

²⁰ Mianŋö andöŋe Jisösnöŋ könahıba taon tosatŋi tembul eŋgiyök. Taon tosatŋi miengöreŋ aŋgöletotŋi kukösumŋinambuk sehısehiŋi meıga asuhugetmö, töndup uruŋini qahö melenget. Mianŋöra i tembula kewö jim eŋgiyök, ²¹ **“O Korazin toŋi, nöŋön eŋgöra Yei! jıba sahötzal aka Betsaida toŋi, eŋgöra mewöyök Yei! jıba sahötzal. Nöŋön yeŋgöreŋ anbiga keuni jıbi sösonıhıi aŋgöletotni kukösumŋinambuk asuhugetmö, uruŋini töndup qahö melenget. Aŋgöletot mi kian gölmenöŋ Taiö aka Saidon sitinöŋ asuhubeak ewö, yeŋön mönö nalö köröpŋi uruŋini melenbingö kaisöpsöpŋi kondela dodohonöŋ aŋgömirıba kau ariba sahötpeak.*

²² *“Sahötpeakmö, nöŋön kewö jıbi mötme: Anutunöŋ könaŋgep Korazin aka Betsaida yeŋgö keuŋini jim teköba likepŋi melenŋi sıhimbölö mötmei, nalö ketanŋi mianŋöreŋ mi mönö Taiö aka Saidon yeŋgö sıhimbölö dopŋi oŋgıta mötme.*

²³ **“Aka Kaperneam toŋi, Anutunöŋ iŋini ölop mem wahöt eŋgıi Suep mire öŋgöbeak me qahöpto? Qahöpmahöp! İjini mönö kömupkö senjom mire kölölohoba geme. Nöŋön yeŋgöreŋ anbiga keuni jıbi sösonıi aŋgöletotni kukösumŋinambuk asuhugetmö, uruŋini töndup qahö melenget. Aŋgöletot mi Sodom taonöŋ asuhubeak ewö, taon mianöŋ mönö nalö kewöŋe mewöyök toroqeba kinbawak.*

²⁴ **“Kinbawakmö, nöŋön kewö jıbi mötme: Anutunöŋ könaŋgep Kaperneam eŋgö keuŋini jim teköba likepŋi melenŋi sıhimbölö mötmei, nalö ketanŋi mianŋöreŋ mi mönö Sodom gölme yeŋgö sıhimbölö dopŋi oŋgıta mötme.” Mewö.*

Lömbötŋinambuk eŋön mönö nöŋgöreŋ kaba luhut meget.

Luk 10.21-22

²⁵ Nalö mianŋöreŋ Jisösnöŋ keu kewö jiyök, *“O İwini, göŋön Buŋa keugi mötkutukutu ambazıp mötmöt ketanŋi megeri, yeŋgöreŋ asambötönöŋmö, ambazıp nahönbörat ewö nanŋinanŋöra mötketka gukmaulem akzei, mi mönö yeŋgöreŋ indelnöŋga möt asarize. Mianŋöra nöŋön Suep gölmegö Kembuŋi gi möpöseim gıhızal. ²⁶ O İwini, gi nangak mewö asuhumapköra mötnöŋ dop köli ölöwahök.*

²⁷ **“İwınan mönö yuai pakpak jim kutuıga nöŋgö buŋaya*

* **11:21:** Ais 23.1-18; Eze 26.1-28.26; Joel 3.4-8; Amos 1.9-10; Zek 9.2-4 * **11:23:**

Ais 14.13-15; Jen 19.24-28 * **11:24:** Mat 10.15; Luk 10.12 * **11:27:** Jon 3.35;

1.18; 10.15

ahök. Iwinan Nahönñanğö könañi nanñök möt yaköiga kunöñ mi qahö mötza. Mewöyök Nahönñan Iwinanğö könañi möt yaköiga kunñan mi qahö mötza. Mewöyök kunñan Iwinanğö könañi qahö möt yaköiga Nahönñanök mi mötza aka ambazip möwölöhöm enğiba yeñğora mi indelmawi, yeñön mönö Iwi möt wañgime.

28“Nup memba urulömbötñinambuk maljei, inini mönö körek nöñğoreñ kagetka uruawam enğibi luhut meme. 29 *Nöñğö temni mönö awötñine ala anğugetka Buñani kusum enğibi mi möt soroköba malme. Nöñön uruni memba et ala gunñönjönjönñ azia akzalanğöra ölöp uruawam enğibi luhut mi-wikñaime. 30 Nöñğö temni meget anğuinga dopñine akza aiga lömböt enğibi bisimei, mianñön mönö awamñi akza.” Mewö.

12

Jisösnöñ Sabat kendongö Kembunji akza.
Mak 2.23-28; Luk 6.1-5

1 *Mianğö andöñe Sabat kendon kunöñ Jisösnöñ wit padi nup köröñi ketanji kutuba anök. Aniga gwarekrupñan wösöñini enğuga wit ölni mohot mohot könahiba böröñinan misiba neget. 2 Negetmö, Farisi (Köna keugö kapanğölköl) tosatñan mi eka Jisös kewö jiget mörök, “Mötnöñ, göhö gwarekurupkan mönö Sabat kendongö nup meme soñğonji onğitze?”

3 *Mewö jigetka kewö meleñnök, “Kin Deiwidnöñ yarö az-iurupñi yembuk liliköba wösöñini enğuga yuai akeri, mi lök oyonget me qahö? 4 *Yañön mönö Anutugö opo seri jikenöñ öñğöba beret kömbukñi Anutugö jemesoholñe altanöñ alget tariga ösumñan walöñniga qekögeri, mi mönö meiga neget. Beret kömbukñi mosötmosötñi mi jike nup galöm yeñönök nezema. Yañön aka yañğö sunğurumurupñan mi nembepuköra soñgo ahöyökmö, mi töndup neget. 5 *Mewöñanök jike nup galöm yeñön Sabat kendonöñ jöwöwöl jikenöñ kinda nup memba nup memegö soñğonji onğita töndup keunñinambuk qahö ahakze. Keu mi Köna keunöñ oyonget me qahö?”

6 “Mi oyonget, mewö mötzalmö, nöñön kewö jibi mötme: Ki kinjawi, yañön mönö jöwöwöl jike onğita öñğöñğöñi akza. 7 *Buñ Kimbigö keu kun kewö ahöza, ‘Nöñön jöwöwöl ohomeğöra qahöpmö, sutñine ak kömum anğumegöra mötzal.’ Inini keu mianğö könañi mötpeak ewö, ambazip pinjitkö ke-unini qahö neñğö keunini mönö lan qahö jim teköbeak.

* 11:29: Jer 6.16 * 12:1: Dut 23.25 * 12:3: 1 Sml 21.1-6 * 12:4: Lew 24.9 * 12:5: Jan 28.9-10 * 12:7: Mat 9.13; Hos 6.6

⁸ “Mi kewögöra jizal: Suep gölmegö azi öljän mönö Sabat kendongö Kembuñj akza.” Mewö.

Jisösnöñ azi böröñi sösröngöñi mem ölöwahök.

Mak 3.1-6; Luk 6.6-11

⁹ Jisösnöñ miri mi mosöta köuluk miriñine öngöyök.
¹⁰ Mianğöreñ azi böröñi sosoholiñi kun tarök. Ambazipnöñ Jisös keu jakeñe al wañgibingöra kewö qesim wañgiget, “Azi Sabat kendonöñ möhamğöba Köna keu ongitpin me qahö?”

¹¹ *Qesim wañgigetka kewö melenök, “Enğöreñök dañön kewö akza: Azi kungö lamanj mohok-kunñan Sabat kendonöñ lömnöñ gema ewö, yañön mi qahö memba öroiga kotma? ¹² Azigö bohonñan mönö lamagö bohonñi gwötpuk ongitzawi, mönö mi mötmörime. Mianğöra Sabat kendonöñ nup ölöpnj memba mewö Köna keu qahö ongitpin.”

¹³ Mewö melenđa azi mianğö jiyök, “Gi mönö börögi qötöteinöñ.” Mewö jiiga qötöteiiga mutuk ahöhi, mianğö dop ölöwaka böröñi alañğö dop ahök. ¹⁴ Mewö asuhuiga Farisi (Köna keugö kapañkölköl) yeñön yaigep anda totoko ala Jisös denöwö aka qein kömumapkö keu jim jaruget. Mewö.

Anutugö nup meme azi tök-kutukutuñi kewö:

¹⁵ Jisösnöñ keuñini mi ek kutuba mianğöreñök miri mi mosöta kungen anök. Aniga gwötpukñan yañğö andöñe wu-atañğöba angetka yeñğö sutñine kawöl ambazip pakpak mem ölöwak enğiyök. ¹⁶ Mi mem ölöwak enğiba könañi aukñe jibepüköra köhöikñanök qetal enğiyök. ¹⁷ Mewö aiga Anu-
tunöñ kezapqetok azi Aisaia sölölohöiga keu kun jiyöhi, mi-
añön mönö mewö öljambuk ahök. Keu mi kewö jii ahöza,

¹⁸ *¹⁸“Eket, ki mönö nöngö nup azini aiga i möwölöhöm wañgial. Nöñön wölböt alani yañğöra mötpi ölöwahiga urunan yañğöra söngaimakzal. Nöñön Uñani Töröñi yañğö uruñi dop kölmapköra melaibi geiga yañön keu diñdiñanök jim tekömakzalañğö Buñani indela jim sehiiga kantriñi kantriñi yeñğöreñ anma.

¹⁹ Yañön anğururuk qahö aka keu töhöreñ qahö qerakña. Ambazip kunñan yañğö qet kourukñi mi rowoñqeqe könanöñ qahö mötma.

²⁰ Jehot qölökögeri, yañön mi qahö qesiñma. * Lambegö wikñan jem kutuba sanjöp aiga bölamñan jem bökbök ahakzawi, yañön mönö mi qahö qömbököma.

* **12:11:** Luk 14.5 * **12:18:** Ais 42.1-4 * **12:20:** Jehot aka lambegö wikñi mi ambazipköra jiza. Ambazipnöñ kun qeba jañğaurañga ak wañgigetka mötnariñan pömsöm qemapkö akzawi, Jisösnöñ i mem ölöwakña.

Mewö nupñi memba ambazipnõj keu diñdini wu-
atañgömegöra bim qeba maliga keu mianjõn luhut aliga
köirañ alme.

21 Kantriñi kantriñi yeñõn mönõ yañõn baukõm engimapkõra
mambõta jörõmqörõmñini yangõ qetñe ala malme.”
Mewö.

Jisösnõj õme yeñgõ õsumñini õngita qei etza.

Mak 3.20-30; Luk 11.14-23

22 Ömenõj azi kun tõñõt aka numbuñi jõhöiga jeñan gömölii
mõtök malõhi, mi wañgita Jisösgõreñ kaget. Jisösnõj i mem
ölõwahiga õmeñan kota mosõri nesilamñan lolohoiga kunbuk
keu jiba uba ehök. 23 Uba ehiga ambazip kambu pakpak
yeñõn mi eka auruba Jisösgõra jiget, “Azi kianjõn mönõ Dei-
widkõ gwölõnarõkñi akza me?”

24* Mewö jigetmõ, Farisi (Kõna keugõ kapañkõlkõl) yeñõn mi
möta kewõ jiget, “Azi kianjõn kungõ õsumnõj qahõpmõ, õme
yeñgõ Kambuñini Katakõmulat yangõ õsumnõj õmewõrõme
enjuatañgõmakza.”

25 Mewö jigetmõ, Jisösnõj urumõtmõtñini möt tekõba kewõ
jii mötket, “Kantri denike yeñgõ galõmurupñinan sutñine
añgururuk aka julmei, yeñõn mönõ ayuhum añgugetka
kantriñinan böliba sahopñanõk aka qeqelanñan ahõma.
Mewõyõk siti me miri kungõ kõnagesõ yeñõn sutñine
añgururuk aka julmei, yeñõn mönõ galõmkõlkõl nupñini
mema kinbingõ osime.

26 “Mõtket, Satanõj mönõ alañi Satan kun wuatangõbawak
ewõ, yeñõn mönõ sutñine añgururuk aka julbeak. Mewõ aiga
gawman nupñini membingõ osigetka õmetohoñinan mönõ
denõwõ kinbawak?

27 “Mõtket, nõjõn Katakõmulatkõ õsumnõj õmewõrõme kõzõl
engibileñak ewõ, engõ alaurupñinan mönõ dagõ õsumnõj mi
kõzõl engibeak? Miangõra yeñõn mönõ keuñini õlñi me qahõ,
mi kewõta jim tekõme. † 28 Mi jim tekõmemõ, Anutugõ õsumñan
nõngõ börõ kesõtni sõlõlõhöi õme enjuatañgõmakzal ewõ, Anu-
tugõ bem-tohoñan mönõ engõreñ kam kuñguza. 29 Kunñan
azi kõhöikñangõ kõna börõñi mutuk qahõ jõhöma ewõ, yañõn
mõnõ denõwõ miriñe õngõba qezanña sukinapñi membawak?
Mutuk i jõhöi tarigun mönõ õlõp miriñeyõk õrõyuainji pakpak
wañgita memba anma. (Miangõ dop nõjõn mewõyõk Satan
jõhöba andõje õmeñi enjuatañgõmakzal.)

* **12:24:** Mat 9.34; 10.25 † **12:27:** Nanñini silegalõmurupñinan Anutugõ qetñi
õme mi Katakõmulatkõ kukõsumnõj kõzõl engigetka nõjõn mi Anutugõ õsumnõj
kõzõl enjimakzal. Örõrõj qahõ kinjinañgõra danjõn keu munerji wuatangõmakza?
Yeñõn me nõjõn?

30 **“Kunŋan nömbuk qahö maljawi, yaŋön mönö qetal niŋgimakza. Kunŋan ambazip nöŋgö qetne tokomegöra qahö öröm eŋgimakzawi, yaŋön mönö mendeŋ eŋgimakza. 31 Mianğöra nöŋön keu kun kewö jibi mötme: Ambazip siŋgisöndok aka mepaqepaik pakpak ahakzei, mi Anutunöŋ ölöp mosörakzapmö, kunŋan Uŋa Töröŋi ilita mepaikömawi, mianğö siŋgisöndokŋi Anutunöŋ mönö nalö kunöŋ qahö mosötma. Saumbaŋ!*

32 **“Kunŋan Suep gölmegö azi ölni qetala keu jima ewö, Anutunöŋ mi ölöp mosötmapmö, kunŋan Uŋa Töröŋi qetala keu yuai jimawi, yaŋgö siŋgisöndokŋi mi Anutunöŋ gölmenöŋ mal-mawaŋgö dop me kömup andöŋe mianğöreŋ qahö mosötma.”*

Ipkö könaŋi mi ölni eka kewöta möt kutume.

Luk 6.43-45

33 **“Ipkö könaŋi mi ölni eka kewöta mötzin. Mianğöra mönö ip galöm kölgetka ölöwaka ölni ölöpŋi kuŋgumakŋa me ip mem böligetka ölni bölöŋi kuŋgumakŋa. 34 *Azi uruŋan yuai kokolak qei ahözawi, mia mönö numbuŋan aukŋe jimakza. Mianğöra qatögö moröŋi inŋini, nanŋinak bölöŋi aka mönö denöwö keu ölöpŋi jibeak? 35 Azi ölöpŋaŋgö uru köweŋe ölöpŋaŋgö möriamŋi ahözawi, yaŋön mönö ölöpŋi mi aukŋeyök jimakza. Azi bölöŋaŋgö uru köweŋe bölöŋaŋgö möriamŋi ahözawi, yaŋön mönö bölöŋi mi aukŋe jimakza.*

36 **“Mewö jimakzapmö, nöŋön keu ölni kun kewö jibi mötme: Ambazipnöŋ soŋgo walöŋda keu jit omaŋi omaŋi jimei, yeŋön mönö keu pakpak mianğö könaŋi mi jimtekötekögö nalö ketaje Anutugöra jim asarigetka kewötma. 37 Mianğö könaŋi kewö: Anutunöŋ mönö keu jitki kewöta mianğö dopkeugi jim teköi solaniman me keugabuk aka lömböt miwikŋaiman.” Mewö.*

Böhi tosatŋan aŋgöletököra kapaŋ köla uletket.

Mak 8.11-12; Luk 11.29-32

38 **Nalö mianğöreŋ Farisi (Köna keugö kapaŋkölköl) aka Köna keugö böhi tosatŋan Jisösgöra kewö jiget, “Böhi, gi ölöp aŋgöletot kun menöŋga mi ekingö mötzin.”*

39 **Mewö jigetka kewö melen eŋgiyök, “Ambazip merak gölmenöŋ maljei, mi kambu bölöŋi aka serowilin ahakze. Yeŋön Anutugö aiwesökŋaŋgöra kapaŋ kölakzemö, aiwesök kun kezapqetok azi Jonagöra lök asuhuyök. Anutunöŋ aiwesök murutŋi kun qahö al eŋgima. 40 *Jonanöŋ suŋgem silimŋi karöbut köwet sömbupkö (gajugaju) gölömŋe malöhi,*

* 12:30: Mak 9.40 * 12:32: Luk 12.10 * 12:33: Mat 7.20; Luk 6.44 * 12:34:

Mat 3.7; 23.33; 15.18; Luk 3.7; 6.45 * 12:38: Mat 16.1; Mak 8.11; Luk 11.16

* 12:39: Mat 16.4; Mak 8.12 * 12:40: Jon 1.17

miaŋgö dop Suep gölmegö azi ölnan mewöyök sunjem asak karöbutkö dop gölme uruŋe ahöma.

41 *“Jonanöŋ Niniwe ambazip sutŋine anda Anutugö keunöŋ uruŋini kuŋgui möta miaŋgöreŋök uruŋini melengetmö, mötket, nöŋön sutŋine asuhuba kinda Jonagö ahakmemeŋi oŋgita ahakzal. Mewö ahakzalmö, inini töndup nesampurek ak niŋgimakze. Miaŋgöra Niniwe ambazipnöŋ jimtekötekögö nalö ketanŋe ambazip kambu ki kinjei, embuk öröröŋ kömupnöhök wahöta enŋö qöhöröŋine mohotŋe kinme. Mohotŋe kinda Niniwe yeŋön keu kewö enŋö silenŋine alme, ‘Inini Suep gölmegö azi ölni nesampurek ak waŋgigetka Anutunöŋ likepŋi melenŋ enŋii sihimbölö öŋgöŋgöŋi mötme.’ Niniwe yeŋön mewö jigetka ahakmemeŋinan nanŋini könaŋamŋini indelgetka gamuŋini mötme.

42 *“Könaŋamŋinaŋgö kaisöpsöŋŋi kun kewö: Anutunöŋ mönöwök mötkutukutu öŋgöŋgöŋi ketanŋi mi kiŋ Solomon waŋgiiga Saut görökenök kantri kuŋgö qin ambinöŋ Solomongö mötkutukutuŋi mötmamgö sihimŋi mörök. Sihimŋi möta gölme göraŋeyök wahöta köna köröp tiŋtiŋi kaba mala Solomongö mötmöŋi mörök.

“Mi mörökmö, mötket, nalö kewöŋe nöŋön sutŋine asuhuba kinda Anutugöreŋ mötkutukutu öŋgöŋgöŋi memba kazali, mi Solomongö mötkutukutuŋi oŋgitza. Oŋgitzapmö, inini töndup nesampurek ak niŋgiba tönpin kingetka qahö dop kölja. Miaŋgöra Anutunöŋ könaŋep ambazip körek pakpak öröm enŋii keuŋini jim tekömapköra jeŋe aŋgotmei, nalö miaŋgöreŋ Saut kantrigö qin ambi miaŋön mönö mewöyök aŋgotma. Yaŋön ambazip kambu ki kinjei, embuk öröröŋ kömupnöhök wahöta enŋö qöhöröŋine mohotŋe kinma. Mohotŋe kinda keu kewö enŋö silenŋine alme, ‘Inini Jisös nesampurek ak waŋgigetka Anutunöŋ likepŋi melenŋ enŋii sihimbölö öŋgöŋgöŋi mötme.’ Yaŋön mewö jiiga silikŋi kewöta nanŋinaŋgöra gamuŋini mötme.” Mewö.

Öme yeŋön azi uruŋe liliŋgöbingö kapaŋ kölje.

Luk 11.24-26

43 “Ömenöŋ azi uruŋeyök kota gölme qararaŋkölkölŋe anda laŋ liliköba mala luhut memamgö miri jaruba kun qahö miwikŋaima. 44 Mi qahö miwikŋaiba osiba kewö jima, ‘Mirini mosöta kazali, miaŋgöreŋ mönö kunbuk liliŋgömam.’ Mewö jiba liliŋgöba miriŋi usuŋda meŋölöi ahöyöhi, mi gwamöŋŋi ahöi miwikŋaima.

45 “Mewö miwikŋaiba anda öme tosatŋi 7 enŋuaŋgitma. Öme 7 mi nanŋi oŋgita bölöŋi kötökŋi akze. Yaŋön mi enŋuaŋgiriga

* 12:41: Jon 3.5 * 12:42: 1 Kiŋ 10.1-10; 2 Hist 9.1-12

kaba miri mi öngöba mianğö uruñe malme. Mewö aiga azi mianğö könarı mutuk kileñkileñ ahökmö, könarıgep böliqölim teköma. Ambazip kambu bölöñi ki merak gölmenöñ maljei, engöreñ mewöyök mewö asuhuma.” Mewö.

Jisösgö nam-munurupñi
Mak 3.31-35; Luk 8.19-21

⁴⁶ Jisösnöñ toroqeba ambazip kambu yeñğöra keu jiba maliga nam-munñan kaba yaigep kinda yambuk keu jibingö mötket. ⁴⁷ Mötketka kunñan kewö jii mörök, “Mötnöñ, göhö nam-mungan mönö yaigep kinda göbuk keu jibingö mötze.”

⁴⁸ Keu mi jii mörökmö, yañğöra melenđa kewö jiyök, “Nöñgö namni dañön? Nöñgö munurupni mi dañön?” ⁴⁹ Mewö jiba böröñi gwarekurupñi yeñğöreñ göröken böranda jiyök, “Eket, nöñgö namni aka munurupni öñji mönö ki.” ⁵⁰ Denike yeñön nöñgö Suep Iwinanğö jitsihitñi tem kölakzei, körek mienñön mönö nöñgö namni aka nenmunurupni akze.” Mewö.

13

Qesin qesin azigö dopkeu.
Mak 4.1-9; Luk 8.4-8

¹ Nalö mianğöreñök Jisösnöñ miri mi mosöta o anğö jitñe geba tarök. ² *Tariga ambazip kambulembenöñ yañğöreñ anda tokogetka wañgenöñ öngöba tarök. Tariga ambazip kambu pakpak yeñön anğö gorañe sakñöñ tokoget.

³ Mewö tokogetka dopkeu gwötpuk jii mötketka kewö jiyök, “Mötket! Azi kunñan nene köñji qesin gilmamğöra nupñöñ anök. ⁴ Anda qesin giliga köñji tosatñan köna jitñe geba kölget. Geba kölgetka (warawen) neiñi neiñi kañgota mi nem teköget.

⁵ “Köñji tosatñan köt jamönjiññöñ geba kölget. Geba köla mianğöreñ gölme gwötpuk qahö miwikñaget. Gölme dutñi qahö ahöyöhanğöra korapñi zilañ kotket. ⁶ Kotketmö, wehönöñ kota enguba jem kutum engiiga jalöñini qahöpköra soholiba gororöñğöget.

⁷ “Köñji tosatñan siriuret wahiñinambukñöñ geba kölget. Geba kölgetka mienñön kota qem turuba böbölohot mem engiget. ⁸ Mewö pömsöm qeyökmö, köñji tosatñan gölme ölopñe geba kölget. Geba köla tosatñi miengö köñjini 100 asuhuget. Tosatñan köñjini 60, tosatñan 30 mianğö dop ahum sehiget. ⁹ Kunñan urukezapñambuk malja ewö, yañön mönö dopkeu ki kezap ala möt kutuma.” Mewö.

Jisösnöñ wanigöra dopkeu jiyök.
Mak 4.10-12; Luk 8.9-10

* 13:2: Luk 5.1-3

10 Mewö jiiga gwarekurupñan kaba Jisös kewö qesim wanjiget, “Gi mönö wuanöñgöra ambazip yenjö ‘Keu jimam,’ jiba dopkeunöñ ala jimakzan?” 11 Qesim wanjigetka kewö melenđa jiyök, “Mi kewögöra: Suepkö bemtohoñe angota malbingö keu tolapñi mi engöra aukñe jibi möt kutuzemö, yenjöra mi mewö qahö.

12 **“Miangö könañi kewö: Kunñan mötkutukutuñambuk maljawi, Anutunöñ mönö mi toroqem wanjiiga köl guliba möriamñambuk malmappmö, kunñan mötkutukutuñi qahö maljawi, Anutunöñ mönö mötmötñi moröñi ahözawi, mi mewöyök qeköba wanjitma.*

13 *“Ambazip yenjö keu jimam jiba kewögöra dopkeunöñ ala jimakzal: Yenñon nanñini jeñinan yuai ekagun könañi töndup qahö ek kutume. Nanñini kezapñinan keu törörök mötagun könañi töndup qahö möt asarime. 14 *Kezapqetok azi Aisianöñ qeljiñe keu kun jiba ohoyöhi, mianñon ambazip mewöñi yenjöreñ öljambuk ahakza. Keu mi kewö, ‘Keu möt bibihibagun könañi töndup kude möt asarime. Yuai ek bibihibagun könañi töndup kude ek kutume.*

15 *Ambazip kambu kiengö uruñinan mönö köhöikñi gwözöñđa ahöza. Kezapñinan keu möt bibihiba jeñini kömaziliköba (kömazilihiwa) malje. Mewö qahö akeak ewö, mönö jeñinan yuai ek kutuba kezapñinan keu möta uruñinan könañi möt asariba uruñini melengetka nöñon i ölop mem ölöwak engibileñak.’*

16 **“Keu mewö ahözappmö, engö jeñinan yuai ek kutuzawanjöra mönö simbawoñ akze. Kezapñinan keu möt kutuzawanjöra mönö simbawoñ akze. 17 Nöñon keu öl töhöññi kun kewö jibi mötket: Kezapqetok ambazip aka Anutugöreñ ambazip solañi gwötpukñan iñini yuai ki ekzei, mi ekingö awöweñgöba malgetmö, qahö eket. Iñini keu ki mötzei, yenñon mi mötpingö awöweñgöba malgetmö, qahö mötket.” Mewö.*

Jisösnöñ dopkeugö könañi jiyök.

Mak 4.13-20; Luk 8.11-15

18 *“Qesiñ gilgil azigö dopkeu jizali, miangö könañi mi kezap ala mötme. 19 Nene köñi qesiñ giliga köna jitñe geba kölöhi, mi kewö: Kunñan bemtohoñgö Buña keuñi möta könañi qahö möt asariiga Bölöñangö Toñan kaba uruñe köñi kömötkeri, mi qeköma. 20 Nene köñi qesiñniga köt jamönjiññöñ geba kölöhi, mi ambazip söpsöpñi kun. Yenñon Buña keu möta mi miangöreñök sösongai qakñe möt angön kölakze.*

21 *“Mewö ahakzemö, uruñine jalöñi qahö ahöm engimappmö, nalö töröptökñi miyök kin köhöiba malme. Buña keugöra aka*

* 13:12: Mat 25.29; Mak 4.25; Luk 8.18; 19.26 * 13:14: Ais 6.9-10 * 13:16: Luk 10.23-24

kahasililiŋ me sesewerowero asuhuiga nalö mianğöreŋök mönö tala enğuma. ²² Nene kötnji qesiŋniga siriuret wahiŋinambuknöŋ geba kölgeri, mi kewö: Yeŋön Buŋa keu mötketka uruŋine gezapmö, gölmenöŋ malmalgö waimanjatŋi aka monen inap memegö urukönöpŋi ahuba lömbörim enğimakza. Qetbuŋaŋinambuk akingöra köpösöŋgögetka sihim kömbönaŋi bölöŋi tosatŋan mewöyök uruŋine dumgöba Buŋa keu böbölohot mem waŋgize. Mewö aiga ölniŋi qahö gilipitŋi (ambetakŋi) akŋe.

²³ “Nene kötnji gölme ölöpnje qesiŋniga geba kölgeri, mi ambazip kewöŋi: Yeŋön Buŋa keu kezap ala möta möt asariba pöndaŋ kinda ölniŋi miwikŋaimakze. Tosatŋan keu jit mohotnöhök kötnji 30 miwikŋaimakze. Tosatŋan ölniŋi 60, tosatŋan keu köt mohot mohot miengö ölniŋi 100 mem sehiba miwikŋaimakze.” Mewö.

Dorowetkö söpsöp keu

²⁴ Jisösnöŋ söpsöp keu kun kewö jii mötket, “Suepkö bemtohoŋgö könaŋi mi azi kewöŋgö dop ala jimam. Yaŋön nupŋe anda nene kötnji ölöpnji qesiŋ gilök. ²⁵ Qesiŋ gilökmö, suŋgem ahögetka mianğöreŋ kerök aziŋan kaba wit padi sutŋine mianğöreŋ dorowetkö kötnji qesiŋ gila mosöta anök. ²⁶ Wit padi kötnjan jula wahöta öngöba ölni asuhuyöhi, nalö mianğöreŋ dorowetnöŋ mewöyök aukŋe asuhuyök.

²⁷ “Mianğön aukŋe asuhuiga welenqeŋeurupŋan mi eka nup toŋaŋgöreŋ kaba kewö jigetka mörök, ‘Ketaŋamnini, nupke nene köt ölöpnji qesiŋ gilnöŋ me qahö? Dorowetkö kötnji mi mönö denikeyök mianğöreŋ geba asuhuza?’

²⁸ “Mewö jigetka möta kewö jii mötket, ‘Kerök azinöŋ mi qesiŋ gilök.’ Mewö jii möta welenqeŋe yeŋön kewö jiget, ‘Nini ölöp anda dorowet mi qözöla tokobingö mötzan me qahö?’ ²⁹ Mewö jigetmö, kewö jii mötket, ‘Qahö! Inini dorowet qözöla tokoba mianğöreŋ padi tosatŋi mi mewöyök qözölbepuk.

³⁰ “Mönö mosötketka mohotŋe qariba wahörohotkun ölni meme nalöŋan kam kuŋguiga nalö mianğöreŋ nöŋön padi misimisi ambazip yeŋgöra kewö jibi mötme: Mönö mutuk dorowet memba tokoba ohomegöra börangöba kösönöŋ jöhöme. Mi jöhöbagun mönö wit padi ölni mi tokoba memba kaba nöŋgö köwe mire alme.’ ” Mewö.

Nejoŋ kötnaŋgö dopkeu

Mak 4.30-32; Luk 13.18-19

³¹ Jisösnöŋ dopkeu kun kewö toroqeba jii mötket, “Suepkö bemtohoŋi mi kewö: Azi kuŋŋan nejoŋ (nemuya) kötnji memba nanŋe nup gölmeŋe anda alök. ³² Kötnji mi morö közözömŋi. Mi nene köt pakpak miengö eretŋini akzapmö,

jula wahöta yöha pakpak engongita qariba ip akña. Mewö aka kiniga könakemba neiñi neiñi kanğota aipñini ip mianğö böröñe alakze.” Mewö.

Yistkö dopkeu

Luk 13.20-21

³³ Jisösnöñ dumñe kunbuk söpsöpkeu kun kewö jii mötket: “Suepkö bemtohoñi mi yist me flaua mem qariqarigö dop kewö akza: Ambi kunöñ ‘Beret ohomam,’ jiba yist memba flaua amae (dis) karöbut mianğöreñ mindiriba melenqelen aka anda anda tari körekñanök qariyök.” Mewö.

Jisösnöñ denöwögöra söpsöpkeuñi keuñi jiyök?

Mak 4.33-34

³⁴ Jisösnöñ keu pakpak mi könagesö yengöra söpsöp keunöñ jiyök. Söpsöpkeu qahö mewö keu kun qahö jii mötket. ³⁵ *Mewö aiga Anutunöñ kezapqetok azi kun sölölohöiga keu kun jiyöhi, mianğön öljambuk ahök. Yanğön keu mi kewö jii ahöza, “Nöñgö numbunan mönö amqeiga söpsöp keuñi keuñi jimam. Anutunöñ gölme miwikñaiiga asuhuyöhi, nalö mianğöreñök keu tölapñe ahöi mala korini, nöñön mönö keu mi aukñe jim indelmam.” Mewö.

Dorowetkö söpsöpkeugö könañi

³⁶ Jisösnöñ söpsöp keu mi jim teköba ambazip kambu ketañi engömosöta miri uruñe öngöyök. Öngöiga gwarekurupñan yanğöreñ kaba kewö qesiba jiget, “Dorowet nene nupnöñ asuhuyöhi, gi mönö söpsöp keu mianğö könañi jim asarim nenğiman.”

³⁷ Mewö jigetka kewö melenđa jiyök, “Suep gölmegö azi öljän mönö nene kötñi ölöpñi ölöpñi qesiñ gilakza. ³⁸ Nene nup mi gölmegö kantri pakpak. Nene kötñi ölöpñi mi bemtohoñgö nahönbörat engöra jizal aka dorowet mi azi bölöñangö nahönbörat yengöra jizal. ³⁹ Keröknöñ mi qesiñ gilöhi, mi Bölöñangö Toñangöra jizal. Padi misimisi nalöñi mi gölmegö nalöñan tekömawanğö nalö ketañi mi. Padi misimisi ambazip mi Suep garata yengöra jizal.

⁴⁰ “Dorowet tokoba könöpnöñ ohoget jemawi, mianğö dop mönö gölmegö nalöñan tekömawanğö nalö ketañe asuhuma. ⁴¹ Suep gölmegö azi öljän mönö garataurupñi melaim engiiga kaba keu areñ bölöñi pakpak Kraistkö bemtohoñ uruñe siñgisöndok akingö kondorakzawi, mi qeapköba mindiñgöme aka bölöñi meme ambazip pakpak mi qözöla qezaköm engime.

*

* **13:35:** Sum 78.2 * **13:41:** Keu areñ (ideology) bölöñi yauen mötmöt, komunism, maslim aka mötmöt areñ tosatanji mi ambazip jöhöm engiget qakögetka malmalñinan böliba sohomakzawi, garata yenğön mönö mi pakpak qeapköba mindiñgöme.

42 “Mewö mindinçindinç aka ambazip mi gil engigetka owen imarurubuk jeba ahözawi, mianğoreñ geme. Mianğoreñ gemeañön mönö sahöt gigilahöba irimñini yöhözömgögetka qetñi qeri malme. 43 Nalö mianğoreñ ambazip solanñi mienñön mönö wehön tandök aka Iwiñinanğö bemtohoñ uruñe asariba mal öngöme. Kunñan urukezapñambuk maljawi, yañön mönö keu mi kezap ala möt kutuma.” Mewö.

Guli dötnam mesamesambötñanğö söpsöpkeu

44 “Suepkö bemtohoñi mi guli damandan sönğöröñi öngöngöñi mianğö dop kewö akza: Mi nupnöñ mesambötket ahöiga azi kunñan mi miwikñaiba anğön köla kunbuk gölmenöñ mesambörök. Mesamböta mianğöra sönğaiba anda sukinapñi pakpak bohonñi memegöra ali moner kaiga mianñön nup gölme mi bohonñi meyök.” Mewö.

Sorom kötnanğö dopkeu

45 “Suepkö bemtohoñi mi stua azigö dop ala söpsöp keu kun kewö jimam: Yañön sorom kötni ekjeritñambuk jaruba malök. 46 Jaruba mala sorom kötni mohot sönğöröñi ketanñi miwikñaiba anda sukinapñi pakpak bohonñi memegöra ali moner kaiga mianñön sorom kötni mi bohonñi meyök.” Mewö.

Mösak örörögö söpsöpkeu

47 “Suepkö bemtohoñi mi mösakö dop ala söpsöpkeu kun kewö jimam: Mi o anğönöñ gilget geiga söra tandökñini könanñi könanñi gegetka engömem tokoyök. 48 Tokoi kokolak qeiga ambazipnöñ mi örögetka körökñe koriga eta tata söra ölöñni kewöta sakapnöñ tokogetmö, bölöñi mi gilgetka anök. 49 Keu mianğö dop mönö gölmegö nalöñan tekömawanğö nalö ketanñe asuhuma. Suep garata yeñön kaba ambazip bölöñi mi solanñi mienğoreñök kewöt engime. 50 Kewöt engiba ambazip bölöñi mi gil engigetka owen imarurubuk jeba ahözawi, mianğoreñ geme. Mianğoreñ gemeañön mönö sahöt gigilahöba irimñini yöhözömgögetka qetñi qeri malme.” Mewö.

Keu kötni walñi aka dölökñi

51 Jisösnöñ söpsöp keu mi jim teköba kewö qesim engiyök, “Keu pakpak jizali, mi möt asarize me qahö?” Qesim engiiga melença “On!” jiget. 52 “On!” jigetka kewö jii mötket, “Miri tonan mirinğö köweñeyök inap yuai walñi aka dölökñi uzeta alakza. Mianğö dop Köna keugö böhi pakpak Suep bemtohoñgö gwarekurupñi akeri, yeñön mönö mewöyök uruñinanğö köweñineyök keu aködammunñinambuk dölökñi aka keu ölop sorokñi walñi uzeta jimakze.” Mewö.

Nazaret yeñön Jisös andö qeget.

Mak 6.1-6; Luk 4.16-30

⁵³ Jisösnöŋ dopkeu mi jim teköba miri gölme mi mosöta anök.
⁵⁴ Anda malqarip taonŋe aŋgota köuluk miriŋine öŋgöba Buŋa keu kusum eŋgiyök. Kusum eŋgiiga auruba welipköba kewö jiget, “Ye! Kezapjupjup! Yaŋön mötkutukutu ki aka aŋgöletot kukösumŋinambuk mi mönö denikeyök meza?” ⁵⁵ Azi ki mönö miri kiangö mitimqeŋe azigö nahönŋa. Namŋangö qetŋi Maria aka munurupŋi Jeims, Josef, Saimon aka Juda. Mi ölöŋ mötzin. ⁵⁶ Nenurupŋan mönö körek sutnine ki malje. Miangöra yuai pampak ki mönö denikeyök memba kaba akza?”

⁵⁷ *Nazaret yeŋön mewö jigetka uruŋinan böliiga miangören qaköget. Qakögetmö, Jisösnöŋ kewö jii mötket, “Kezapqetok azi mi nanŋi taonöŋ aka nanŋi mire jijiwilit ak waŋgimazemö, miri tosatŋe mewö qahö.” ⁵⁸ Mewö jiiga mötnariŋinan qahö asuhuiga yaŋgiseniŋanagöra aka aŋgöletot kukösumŋinambuk mi miangören gwötpuk qahö meyök. Mewö.

14

Jongö jölŋi kutugetka kömuyök.

Mak 6.14-29; Luk 9.7-9

¹ Nalö miangören gölme bahönangö (Galili prowinsgö) kiŋ Herod yaŋön Jisösgö qetbuŋaŋi mörök. ² Mi möta welenqeŋeurupŋi yeŋgöra kewö jiyök, “Mi mönö Jon O-melun azia. Yaŋön mönö kömupnöhök wahöta nupŋi meiga aŋgöletot kukösumŋinambuk asuhumakze.” Waimanjat möta mewö jiyök.

³ *Mi kewögöra jiyök: Herodnöŋ munŋi Filipkö anömŋi Herodias ölöŋ meiga Jon O-melun azinöŋ kiŋ jim waŋgiiga opotöröp melaim eŋgiiga anda Jon memba jöhöba kösö mire al waŋgiget. ⁴ *Jonöŋ Herodköra keu kewö jiyök, “Gi qambötki memba mala Köna keu oŋgitzan.” ⁵ Mewö jiiga Herodnöŋ Jon qeget kömumapkö mörökmö, könagesö yeŋön Jongöra mötketka kezapqetok azia malöhi, miangöra könagesö yeŋgöra keŋgötŋi mörök.

⁶ Keŋgötŋi mörökmö, Herodkö ahuahu nalöŋan kaiga ke-taurupŋan tokoba tatketka Herodiasgö böratŋan yeŋgö jenine danis aliga Herodnöŋ miangö eksihimŋi gwötpuk mörök. ⁷ Miangöra ambi seram mianöŋ wani yuaigöra qesibawak, kiŋnöŋ mi tököm waŋgimangö keu jöhöba keu mi jöjöpäŋ keunöŋ jim köhöiyök. ⁸ Mewö jim köhöiiga namŋan ambi seram mi kuŋgum waŋgiiga kewö jiyök, “Mönö qesinöŋga Jon O-melun azigö jölŋi yandigetka nööröpŋi memba ki kaba köndenöŋ niŋgima.”

* 13:57: Jon 4.44 * 14:3: Luk 3.19-20 * 14:4: Lew 18.16; 20.21

⁹ Mewö jiiga kingö urujan kömbuhiiga wösöbirik mörökmö, jöjöpən keujan jöhöi ketaurupñan mi mötketka yeñgö jemeso-holñine etpapuköra möta nöropñi wañgimegöra jim kutuyök. ¹⁰ Mewö jim kutuba opotöröpñi kun melaiba jiyök, “Gi mönö kösö mire anda Jongö jölñi yandiba nöropñi memba kaman.” ¹¹ Mewö jiiga Jongö nöropñi köndenöñ ala memba kaba ambi seram mi wañgiiga memba anda namñi wañgiyök. ¹² Jongö gwarekurupñan miangö buzupñi möta anda qamötñi memba qaksirigö köt köteñnöñ ala löm kölget. Löm köla anda keu mi Jisös jiget mörök. Mewö.

Jisösnöñ azi 5000 nene gumohom enjgiyök.

Mak 6.30-44; Luk 9.10-17; Jon 6.1-14

¹³ Jisösnöñ Jongö kösohotñi möta miri mi mosöta wañgenöñ öngöba gölme kötikñi kunöñ nanñinök malbingöra anget. Ambazip kambu yeñön miangö buzupñi möta taon aka miriñini mosöta Jisösgö andöñe wuatangöba gölme köna anget. ¹⁴ Angetka Jisösnöñ wañgenöhök eta ambazip kambulelemebe engeka yeñgöra wösöñi mörök. Wösöñi möta sutñine kawöl engehöi malgeri, mi mem ölöwak enjgiyök.

¹⁵ Mewö aka mali mare aiga gwarekurupñan Jisösgöreñ kaba kewö jiget, “Böhi, nini gölme kötikñi kiangöreñ malinga wehön jeñan teköba gemangö akza. Miangöra gi ölop ambazip kambu ki melaim enjinöñga miriñi miriñi miengöreñ anda numbu nenenini söngöröñi memba neme.”

¹⁶ Mewö jigetmö, Jisösnöñ kewö jii mötket, “Yeñön ölop kiangöreñ tatme. Eñön mönö nanñinak i nene gumohom enjgime.” ¹⁷ Mewö jii möta jiget, “Nini beret 5 aka söra yahöt miyök memba maljin.” ¹⁸ Mewö jigetka jiyök, “Mönö mi memba kaba niñgime.”

¹⁹ Mewö jiba ambazip kambu mi kegwan luplupnöñ eta tatmegöra jim kutum enjiiga tatket. Tatketka beret 5 aka söra yahöt mi memba Suenöñ ui öngöiga kötuatköba beret mindipköba gwarekurupñi enjiiga ambazip kirip dop mendenða enjiget. ²⁰ Mendenða enjigetka ambazip körekmakörek nema nem timbireñ aket. Nem timbireñ aka nene kitipñi kitipñi mosötkeri, mi gwarek yeñön qezakögetka sakap 12 miangöreñ geba kokolak qeyök. ²¹ Azi beret negeri, yeñgö jañgöñini mi 5000. Ambi nahönbörat yeñgö jañgöñini mi qahö meget. Mewö.

Jisösnöñ o anjö qakñe tiba tiba anök.

Mak 6.45-52; Jon 6.15-21

²² Neget teköiga Jisösnöñ miangöreñök gwarekurupñi jim kutum enjgiba kewö jiyök, “Injini mönö wañgenöñ öngöba qeljiñe o anjö kutuba likepñe anme. Nöñön ölop nalö sutñe

ambazip kambu ki melaim engibagun kamam.”²³ Ambazip melaiba engubula kunduje öngöba nanñök mala köuluköyök. Köuluköba mali mare aiga kunduje nanñik kötiki tarök.²⁴ Tariga wañgeninan lök o anğö bibiñe köröwen aniga luhutnön angerañgörenök gila kaiga sirinön wañgenön giliga kekwilik anda kayök.

²⁵ Mewö ahiga miri awörañgöiga (3-6 kilok) miangören Jisösnön o anğö qakñe tiba tiba gwarekurupñi yeñgören kayök.²⁶ Kaba o anğö qakñe tiba tiba kaiga gwarekurupñan mi eka keñgötporiñ aka “Köwet Songoriñnön kaza,” jiba sömbuñini möta qeta silatket.

²⁷ Qeta silatketmö, Jisösnön miangörenök keukeu jiba kewö jii mötket, “Alaurupni, mönö ewebibiñinambuk saitiñgit malme. Nanak kazal. Keñgötñini kude mötme.”²⁸ Mewö jii möta Pitönön melenđa kewö jii mörök, “Gönön Kembuya akzan ewö, mönö ölop jinönğa nönön o qakñe tiba tiba göhören kamam.”

²⁹ Jisösnön mi möta “Ölop kanön,” jiyök. Mewö jiiga Pitönön wañge mosöta o anğö qakñe tiba tiba könahiba Jisösgören anök.³⁰ Könahiba anökmö, luhutnön gwötpuk gili mi eka keñgötporiñ aka könahiba o uruje geba kewö qerök, “Kembu, bauköm niñginön.”³¹ Qeriga Jisösnön miangörenök böröñi böränđa Pitögö böröñe memba kewö jiyök, “Mötnariptki morörökñi. Mönö wuanönğöra uruyahöt akzan?”

³² Mewö jiba bauköm wañgii wañgenön öngöyohotka luhutnön nön qeba görön alök.³³ Görön aliga azi wañgenön tatkeri, yeñön waikñi memba möpöseim wañgiba kewö jiget, “Alakña, gi Anutugö nahönña.” Mewö.

Jisösnön Genesaret mala mem ölöwak nup meyök.

Mak 6.53-56

³⁴ O anğö kutuba likepñe Genesaret mire anğota wañge mosöta saknön geget.³⁵ Saknön gegetka miri miangö ambazipnön Jisös möt kutum wañgiget. Möt kutum wañgiba keu algetka miri pakpak kösutñe tatkeri, miangören aniga buzupñi möta kawöl ambazip körek enğuanğita Jisösgören kaget.³⁶ Kagetka kinda Jisös malukuñğö suñe misiribingö ulet wañgiba malget. Misirigeri, körek yeñön mönö ölöwak teköget. Mewö.

15

Ambösakon yeñön keu kusum sohoget.

Mak 7.1-13

¹ Miangö andöñe Farisi (Köna keugö kapañkölköl) aka Köna keugö böhi tosatñan Jerusalem sitiyoök Jisösgören kaba kewö qesim wañgiget,² “Göhö gwarekurupkan wuanönğöra

köna walönda ambösakoninangö silikñini qeze? Yeñön mönö böröñini sanjonja dom-amöt qahö qeba töndup könahiba nene neze?”

³ Mewö qesim wanjigetka kewö jii mötket, “Nanñinak mönö wuanöngöra ambösakoninangö silikñini wuatangöbingöra köna walönda Anutugöreñ jöjöpañ keu qeze? ⁴ *Miangö keuñi kun kewö: Anutunöñ kewö jim kutuyök, ‘Iwinamgi mönö göda qem etkimakñan,’ aiga ‘Kunñan iwiñi me namñi qesuahömawi, i mönö qegetka kömuma.’

⁵ “Mewö jim kutuyökmö, inñini keu mi ongita kewö jimakze, ‘Kunñan iwiñangöra me namñangöra kewö jima: Wösöni mötzal. Nöngö nanğönanğö yuaini buña qem angubanak, mi lök Anutugö saiwap naluköra kewöta albi ahöza. Kunñan mewö jiba iwiñi me namñi göda qem wanğimawanğö dop qahö akza.’

⁶ “Mewö jiba silikñini walñangöra aka Anutugö jöjöpañ keuñi utalgetka omañi aka pömsöm qemakza. Mi qahö dop kölja. ⁷ O urumelenğö silesile ambazip, kezapqetok azi Aisianöñ mönö enğö könanamñini törörök qeljiñe indela kewö jii ahöza,

⁸ *⁸ ‘Ambazip kambu kianğön mönö numbu jitiñinan ölopñanök göda qem niñgimakzemö, uruñinan nönöñgan ak niñgiba kungen algetka köröwen ahöza.

⁹ Mewö ahöiga nöngö waikni öne töhön memba möpöseim niñgimakze. Köna keu kusum enğibin, jiba salupñe ambazip yengö jimkutukutuñini mi numbu o alakze.’” Mewö melen enğiyök.

Azi uru mi denöwö tölohoba lantiza?

Mak 7.14-23

¹⁰ Jisösnöñ ambazip kambu kunbuk enğoholi kagetka kewö jii mötket, “Inñini mönö keu ki kezap ala möt asarime. ¹¹ Yuai azigö numbuñeyök uruñe gemakzawi, mianğön qahö tölohom wanğimakzapmö, nanñi numbuñeyök keu erakzawi, mianğön mönö tölohom wanğimakza.”

¹² Mewö jii mötketka gwarekurupñan kaba kewö qesiget, “Farisi (Köna keugö kapañkölköl) yeñön keu mi mötket enğui uruñinan bölizawi, mi mötzan me qahö?” ¹³ Qesigetka kewö melenñök, “Nöñön warök pakpak nöngö Suep Iwinan qahö kömörohü, mi mönö jalöñinambuk qözölmam. ¹⁴ *Muat, i mönö enğömosötme. Yeñön ‘Jegömöl ambazip enğuanğitpin,’ jimakzemö, nanñini jeñinan mönö gömöliza. Jegömöl kunñan jegömöl alañi kun böröñe memba wanğitma ewö, yetkön mönö mohotñe lömnöñ geba etkuma.”

* 15:4: Eks 20.12; 21.17; Dut 5.16; Lew 20.9 * 15:8: Ais 29.13 * 15:14: Luk 6.39

15 Mewö melenjiga Pitönöñ jiyök, “Dopkeu miangö könanji mönö jim asarinöñ mörin.” 16 Mewö jiiga Jisösnöñ jiyök, “O alaurupni, injini mewöyök toroqeba mötmötñini ölöpnji qahö akze me? 17 Yuai pakpak azi numbuñeyök uruñe gemakzawi, mi kömgokñe geba yaigep erakza. Mi möt kutuze me qahö?”

18 **“Mi erakzapmö, keu uru könömñeyök kota numbuñeyök erakzawi, mianjön mönö tölohom wanjimakza. 19 Ambazip uru könömñineyök yuai kewöñi asuhuba korakza: Keu bölöñji mötmöriba suña jinanñ memba ambazip enjuget kömumegö mörakze. Qesabulum aka serowilin akingö mörakze. Yonjorö membingö mörakze. Jitnöñ alal keu munenji jibingö mörakze. Andöqege keu yöhösañ jiba Anutu mepaiköbingö mörakze. 20 Yuai mewöñan mönö ambazip tölohom enjimakzapmö, böröñini qahö sanjonda nene nemakzei, mianjön azi kun qahö tölohomakza.”* Mewö.

Kenan ambi kunjan kapan köla köuluköyök.

Mak 7.24-30

21 Jisösnöñ Genesaret gölme mosöta siti qetñiri Taiö aka Saidon mietkö distrik qetñi Fonisia miangö uruñe anök. 22 Aniga Kenan ambi, gölme miangö toñji kunjan kaba Jisös uleta kewö qeta jiyök, “Kembu, Deiwidkö gwölönarökñi, mönö ak kömum niñgiman! Ömenöñ böratni kölköljinjin ak wanjiiga sihimbölo ketanji mörakza.”

23 Qeta jiyökmö, Jisösnöñ keu kun qahö melenjök. Mewö aiga gwarekurupñan kaba kewö kungum wanjiba jiget, “Ambi mi sahöta qeta könanine kazawanjöra mönö bauköm wanjinöñga anma.” 24 Mewö jigetka melenjök, “Iwinan Israel könagesögö lama sohosoñji miyöhök amöt qem enjimamjöra aka melaim niñgiiga казал.” 25 Mewö melenjiga ambi mianjön kösutñe kaba simin köl wanjiba jiyök, “Kembu, mönö bauköm niñginöñ!”

26 Mewö jiyökmö, Jisösnöñ kewö melenj wanjiyök, “Qahö, morö yeñgö miriñineyök beret memba kiam enjiinga qahö dop kölbapuk. Juda nini kianurup enjgö qetñini kiam qerakzin. Nöñön mutuk Juda ambazip bauköm enjgibiga kantri tosati enjön mönö kiamgö dop mamböta malme.”

27 Melenj wanjiyökmö, ambinöñ jiyök, “Kembu, mi ölop mötzalmö, kiam moröñji yeñön mönö mewöyök toñinanjgö tebolnöhök nene boromñi eriga nemakze.” 28 Mewö jiiga Jisösnöñ kewö jii mörök, “O ambi, göhö mötnaripki mi ketanji. Mianjöra ulet niñgizananjgö ölnji mönö asuhuma.” Mewö jii möta böratñan aua mianjörenjök ölöwahök. Mewö.

Jisösnöñ kawöl ambazip sehisehiji meiga ölöwaket.

* 15:18: Mat 12.34

²⁹ Jisösnöñ gölme mi mosöta kaba Galili o angögö jitñe kanğota kundunje öngöba eta tarök. ³⁰ Tariga ambazip kambulembenöñ yangören kaba ambazip kewöñi enğuanğitket: Simalokon aka jegömöl ambazip, tosatñi köna böröñini heramheramgöñi, tosatñi keuñini mötökñi aka kawöl tosatñi gwötpuk engöhöi malgeri, mi enğuanğita Jisösgö köna kösutñe al engigetka mem ölöwak engiyök.

³¹ Mem ölöwak enğiiga ambazip keuñini mötökñi yeñön keu jigetka köna böröñini heramheramgöñi yeñön ölöwaka diñgigetka simalokon yeñön köna tiba anda kagetka jeñini döndöngöñi yeñön je uba eketka ambazip kambu yeñön mi eka welipköba Israel neñgö Anutunini möpöseiget. Mewö.

Jisösnöñ azi 4000 nene gumohom engiyök.

Mak 8.1-10

³² Jisösnöñ gwarekurupñi engoholi yangören kagetka kewö jii mötket, “Nöñön ambazip kambu kienğöra wösöni mötzal. Yeñön nöngören kaba wehön karöbut lök mala kotketka nenenjini qahöwahiga ekzal. Könanöñ anda mala kembera jeñini gili tirinbirin akepuköra i öne melaim enğimamgö töközal. Mianğöra i nene gumohom enğimamgö mötzal.”

³³ Mewö jii gwarekurupñan melenđa kewö jiget mörök, “Gölme qararanğölkölñe kianğören neñön mönö denikeyöhök numbu nene gwötpuk miwikñaiba ambazip kambulembe ki gumohom enğibinak?” ³⁴ Mi möta Jisösnöñ kewö qesim engiyök, “Engören beret dawik ahöza?” Qesim enğiiga “Beret 7 aka söra moröñi tosatñi ahöza,” jiget. ³⁵ Jigetka Jisösnöñ ambazip kambu mi gölmenöñ geba tatmegöra jim kutum enğiiga geba tatket.

³⁶ Geba tatketka beret 7 aka söra mi memba Anutugö saiwap jiba mindipköba gwarekurupñi enğiiga yeñön mi ambazip kambu dop toto qem engiget. ³⁷ Toto qem engigetka namba nem timbirenğöget. Nem timbirenğöba nene kitipñi mosötket geyöhi, mi sakap 7 mianğören qezakögetka numbuñe qeyök. ³⁸ Azi nene negeri, yeñgö jañğöñini mi 4000. Ambi nahönbörat yeñgö jañğöñini mi qahö meget. ³⁹ Jisösnöñ ambazip kambu melaim enğiiga angetka nanñi wañgenöñ öngöba Magadan gölmenöñ anök. Mewö.

16

Böhi tosatñan angöletot ekingöra kapan kölget.

Mak 8.11-13; Luk 12.54-56

¹ *Farisi (Köna keugö kapanğölköl) aka Sadyusi (jike nupkö kapanğölköl) tosatñan Jisösgören kaba keugö bötaknöñ örömap-köra esapköm wañgiba kewö qesiget, “Mönö jinöñga

* 16:1: Mat 12.38; Luk 11.16

Suepnöhök anğöletot kun asuhuiga ekin.” ² Mewö jigetka kewö melenök, “Wehön gemangö ahiga mianğoren kewö jimakze, ‘Suepnöñ pisihiwawğöra uran wehön ölopñi akña.’

³ “Mewöyök soñanök kewö jimakze, ‘Suepnöñ pisihiiga kousunöñ töwizawawğöra mönö kie luhut gilma.’ Mewö mewö jiba suepkö tandökñi eka kie wehögö kónañi ölop kewörakzemö, nalö maljini, mianğö aiwesökñi kewötpingö qahö mötze. Mi qahö dop kölja. ⁴ *Ambazip kambu bölöñi gölmenöñ mala qesabulum ahakzei, yeñön Anutugö aiwesökñi asuhumapköra kapan kölakzemö, Anutunöñ kezapqetok azi Jonagö aiwesökñi lök enğiiga aiwesök tosatñi qahö toroqeba kondel enğima.” Mewö jiba enğömosöta kungen anök. Mewö.

Farisi aka Sadyusi yeñön wösökömbuk ewö akze.

Mak 8.14-21

⁵ Jisösnöñ gwarekurupñi yembuk o anğö kutuba likepñe anğota semön memingö ölüm enğuyöhi, mi eket. ⁶ *Mi eketka Jisösnöñ kewö jii mötket, “Injini Farisi aka Sadyusi pati yahöt yeñgö wösökömbukñini aka gipñi kakñi mietköra mönö galömñini meme. Mi ölopñanök qahö kewöta andö qegetka mietkön mönö yist ewö qariba mem bölim enğimahot.”

⁷ Jiiga keu pasetñi mi qahö möt asariba sutñine kewö eraum mötket, “Nini beret qahö memba kazin. Mianğöra jiza me denöwö?” ⁸ Mi eraum mötket kezapñe geiga kewö jii mötket, “O injini mötnariñini morörökñi, wuanöngöra ‘Beret qahö mezin,’ jiba nanñini eraum mötze? ⁹ *Nöngö kónañamni mi wuanöngöra qahö möt kutuze? Nöñön beret 5 mi 5000 yeñgöra mindipköbiga mianğö kitipñi qezakögetka künde dawiknön geba numbuñe qeyök? Mi ölüm enğuzame qahö?”

¹⁰ * “Mewöyök beret 7 mi 4000 yeñgöra mindipköbiga mianğö kitipñi qezakögetka sakap dawiknön geba kokolak qeyök? Mi ölüm enğuzame qahö? ¹¹ Ni beretköra keu qahö jizali, mi denöwö aka qahö möt kutuze? Nöñön beretköra qahöpmö, Farisi aka Sadyusi pati yeñgö wösökömbukñini aka gipñi kakñi kewöta andö qemegöra jizal.” ¹² Mewö jiiga mianğorenök keuñanğö kónañi kewö möt asariget, “Aha! Plaua mem qariqari yistkö galöm mem anğubingöra qahö jiyökmö, Farisi pati aka Sadyusi pati yeñgoren keu lolonqalonji andö qebingöra jiyök.” Mewö.

Pitönöñ Jisösgö kónañi jim miwikñaiyök.

Mak 8.27-30; Luk 9.18-21

* **16:4:** Mat 12.39; Luk 11.29

* **16:6:** Luk 12.1

* **16:9:** Mat 14.17-21

* **16:10:** Mat 15.34-38

13 Jisösnöŋ Sisaria Filipai taongö kösutŋe anda miangören gwarekurupŋi kewö qesim engiyök, “Ambazipnöŋ Suep gölmegö azi ölni nöngöra denöwö jimakze? Ni ninjia akzal?”
 14 *Jiiga melenđa kewö jiget, “Tosatŋan ‘Gi Jon O-melun azia akzan,’ jimakzemö, tosatŋan ‘Gi Elaija akzan,’ jimakze aka tosatŋan toroqeba kewö jimakze, ‘Gi Jeremaia me kezapqetok azi walŋi yeŋgöreŋök kun akzan.’ ”

15 Mewö jigetka kewö qesim engiyök, “Aka nanŋinak nöngöra denöwö jize? Ni ninjia akzal?” 16 *Qesim engiiga Saimon Pitönöŋ melenđa jii mörök, “Gi Amötqeqe Toŋi Kraist aka malmal Toŋi Anutugö Nahönŋi akzan.”

17 Mewö jiiga Jisösnöŋ melenđa kewö jii mörök, “O Saimon Jonagö nahönŋi, gölme azi sep busuŋambuk kunŋan qahöpmö, nöngö Iwini Suep mire maljawi, yaŋön mönö keu mi göhöreŋ indelök. Miangöra göŋön mönö simba-won akzan. 18 Nöŋön kewö jibi mötman: Gi Pitö (nanine keunöŋ jamönjin) aknöŋga nöŋön jamönjin miangö qakŋe urumelen könagesönaŋgö tandönji albi naŋgöm enŋinöŋga uruŋini möhamgöba köhöiba kinme. Göŋön i galöm köl enŋinöŋga kömup Toŋan i senjom mirigö kiripo naŋguŋe öröm enŋimangö osima. Ömewöröme tosatŋi yeŋgö kukösumŋinan mewöyök i köndenđa luhut al enŋibingö osime.

19 * “Nöŋön Suep bemtohoŋangö ki moröŋi yahöt gihimam. Gi gölmenöŋ siŋgisöndok jöhönöŋga mianön mönö Suep mire mewöyök jöhöjöhönji ahöma. Gi gölmenöŋ siŋgisöndok mosöta pösatnöŋga mianön mönö Suep mire mewöyök pösatpösatŋi ahöma.” 20 Mewö jiba Amötqeqe Toŋi Kraist ahöhi, mi aukŋe jiget kunŋan mötpepuköra gwarekurupŋi yeŋgöra sonŋo köhöikŋi al engiyök. Mewö.

Jisösnöŋ kömumangö keuŋi jiyök.

Mak 8.31-9.1; Luk 9.22-27

21 Nalö miangöreŋök Jisösnöŋ könahiba gwarekurupŋi yeŋgöra keu kewö indelök, “Nöŋön Jerusalem anda sihimbölö gwötpuk mötmam. Kantrigö jitŋememe, jike nup galöm aka Köna keugö böhi yeŋön nuŋgugetka kömumam. Kömumbiga wehön karöbut aiga kömupnöhök wahötmam.”

22 Jisösnöŋ mewö jiiga Pitönöŋ öröm waŋgiba göraŋe anda könahiba qetala kewö jim waŋgiyök, “O Kembu, mi nalö kunöŋ asuhum ghibapuköra Anutunöŋ mönö sel jöhöm gihima.”
 23 Qetal waŋgiiga lilingöba Pitö kewö jim waŋgiyök, “Gi keu mötmörizani, mi Anutugöreŋ keuya qahöpmö, gölme ambazip aka Satangö sihima. Gi nöngö köna utumangö mötnöŋga

* 16:14: Mat 14.1-2; Mak 6.14-15; Luk 9.7-8
 Mat 18.18; Jon 20.23

* 16:16: Jon 6.68-69

* 16:19:

urunan böliza. Mianğöra Satan, gi mönö dölki nönğö jemesoholneyök kesalnön!” Mewö.

Kraist wuatangöbingö söngöröni

²⁴ *Nalö mianğören Jisösnön gwarekurupni keu kewö jii mötket, “Kunñan nönğö andöne kamamgö mötzawi, yañön mönö nanñi urusilenangö sihim kömbönañi bölöni andö qeiga sisitni megetka sihimbölö mi bisimakña. Mi maripomnöy kömumawangö dop mökösoñda ni nuatangöba kama. ²⁵ *Kunñan malmalñi nanñangöra angön köla nanñi imbi-imbi maljawí, yañön mönö malmalñi ölni jöhöi sohoma. Sohomapmö, kunñan gölmegö malmalñi nönğöra aka kölenđa tököm niñgimawi, yañön mönö malmal ölnangö könañi miwikñaiba köhöiba malma.

²⁶ “Kunñan gölmeñi gölmeñi miengö öröyuaini pakpak köl öröiga buñani an teköiga uruñangö malmalñi mem sohoba silebile mala kömuiga Anutunön keunji jim teköiga uñañan ayuhuiğa qahö dop kölma. Sukinapñi mianñön mönö urusösöngai qahö ak wangima. Qahöpmahöp. Körek neñön mönö bohonini jöhöm angubingö osibin.

²⁷ *“Suep gölmegö azi ölnan könangep Suep garata töröni yembuk ki etketka Iwiñangö asakmararañi eka aurume. Nalö mianğören mohot mohot neñgö ahakmemenini kewöta likepñi mianğö dop neñgima. ²⁸ Nönñön keu ölni kun kewö jibi mötme: Kiangören kinjei, engö sutñineyök tosatñan Suep gölmegö azi ölnan kiñ aka asuhumawi, mi ek kutume. Jebuk mala kömupkö sihimbölöni qahö mötketka asuhum tiñgiriga mi ekñe.” Mewö.

17

Jisösgö silenje letotqetot ahök.

Mak 9.2-13; Luk 9.28-36

¹ *Wehön 6 teköiga Jisösnön Pitö, Jeims aka Jeimsgö munñi Jon enğuangita nanñinök kundunji köröpñi kunön öngöba kötikñe malget. ² Malgetka jemesoholñine kiniga Jisösgö sile tandökñan letota murutñi ahök. Jemesoholñan wehön jeni ewö kölköl-bilikbilikñambuk asariiga malukuñan tuat lalamñi aka asakñambuk ahök.

³ Mewö aiga eketka Moses aka Elaija yetkön asuhum engiba Jisösbuk keukeu jiget. ⁴ Jigetka Pitönön könahiba keu jiba Jisösgöra kewö jiyök, “Kembu, neñön kiangören uruölöwak mötzin. Mianğöra sihimgan mötzan ewö, nönñön ölop koun karöbut qemam. Göhö kun, Mosesgö kun aka Elaijagö kun.”

* **16:24:** Mat 10.38; Luk 14.27 * **16:25:** Mat 10.39; Luk 17.33; Jon 12.25

* **16:27:** Mat 25.31; Sum 62.12; Rom 2.6 * **17:1:** 2 Pitö 1.17-18

5 *Mewö jiba kiniga unuñunuñ tuat lalamñi asakmararañambuk kunöñ eta aumñan esuhum enñiiga mianğö uruñeyök qet kun kewö eriga mötket, “Azi ki mi nani wölböt nahöna. Nöñgö urusihimni ketañan mönö yanğöreñ ahöza. Mönö yanğö keuñi möta malme.”⁶ Gwarek yeñön keu mi möta jönömñini undui sipköba gölmenöñ eta kengötniñi gwötpuk mötket.

7 Mewö mötketka Jisösnöñ yengöreñ kaba silenini oseiba kewö jii mötket, “Mönö wahötket. Kengötniñi kude mötme!”⁸ Keu mi möta uba wahöta tosatñi qahö engekemö, Jisösnöñ nanñök kiniga eket. Mewö.

Jon O-melun-azi mi Elaijagö salupñi akza.

9 Kunduñeyök etketka Jisösnöñ sörokñi mianğöreñ kewö jim kutum enñiyök, “Inini yuai ekzei, mianğö buzupñi mi ambazip kun kude jiget mötme. Suep gölmegö azi ölnan kömupnöhök wahoriga mianğö andöñe mi ölöp jim asariba malme.”

10 *Mewö jim kutum enñiiga gwarekurupñi karöbut yeñön Jisös kewö qesim wañgiget, “Köna keugö böhi yeñön keu kewö mi wuanöñgöra jimakze, ‘Kezapqetok azi Elaijanöñ mönö mutuk Suepnöhök eriga Amötqeqe Tonjan mianğö andöñe asuhuma?’ ”

11 Qesim wañgigetka melenja kewö jiyök, “Elaijanöñ mutuk eta asuhuba malmal pakpak möhamgöma. Keu mi ölnapmö, 12 *nöñön kewö jibi mötme: Elaijanöñ lök eta asuhuyökmö, i eka könañi qahö möt kutugetmö, ambazipnöñ i nanñini sihimñini wuatangöba lañ ak wañgiget. Mewöñanök Suep gölmegö azi ölni mewöyök lañ ak wañgigetka Juda yengö böröñine geba sihimbölö mötma.”¹³ Elaijagöra mewö jiba ölna Jon O-melun azigöra keu jii mötkeri, gwarek yeñön mi mewö möt asariget. Mewö.

Jisösnöñ öme wuatangöi morönöñ ölöwahök.

Mak 9.14-29; Luk 9.37-43

14 Jisös aka gwarek karöbut yeñön kunduñeyök eta ambazip kambu yengöreñ kagetka azi kunöñ Jisösgö kösutñe kaba simin köl wañgiba kewö jii mörök,¹⁵ “Kembu, göñön mönö nahöni ak kömum wañgiman. Kawölnöñ yöhöiga tala eta qeiga bözok mitiba semben auba sihimbölö gwötpuk mörakza. Nalö gwötpuk tala könöpnöñ me onöñ gemakza.¹⁶ Nöñön i wañgita gwarekurupki yengöreñ kazalmö, yeñön i mem ölöwak wañgibingö osize.”

17 Mewö jiiga melen wañgiba jiyök, “Yei, gölmegö yanğisen aka misimkaulup ambazip, mönö nalö dawik embuk

* 17:5: Jen 22.2; Dut 18.15; Sum 2.7; Ais 42.1; Mat 3.17; 12.18; Mak 1.11; Luk 3.22

* 17:10: Mal 4.5 * 17:12: Mat 11.14

mala qatön enjgubiga Anutu qahö möt narigetka sihimbölö mötman? I mönö wanğita nönğöreñ ki kaget.”¹⁸ Wanğita kagetka Jisösnöñ öme mi jim wanğii mosöta ani morönöñ nalö mianğöreñök ölöwahök.

¹⁹ Ölöwahiga gwarekurupñan mi eka nanñinök Jisösgöreñ kaba tata kewö qesim wanğiget, “Neñön mönö wuanöngöra mi naninök wuatangöbingö osizin?”

²⁰ *Qesim wanğigetka kewö jii mötket, “Mötnaripñinan morörökñi akzawangöra mi wuatangöbingö osize. Nöñön keu ölni kun kewö jibi mötme: Mötnaripñinanğö ölni mi nejon kötñangö dop ahöbawak ewö, enñön ölop kundunji kiangö Toñangöra kewö jim kutubeak, ‘Gi mönö kundunji mi meköba wahöta anda likepñe endu alman.’ Mewö jiba möt narigetka mianğö dop aiga endu anma. Anutu möt narigetka inahöm enjiiga yuai kungöra qahö qaköbeak.”²¹ (Öme tandökñi mewöñi mi mönö köuluköba nene sinji mala wuatangöbin. Yuai murutñi kun ahinga qahö kota anma. Mewö.)

Jisösnöñ kömumamğö Bunñani jüiga yahöt ahök.

Mak 9.30-32; Luk 9.43b-45

²² Jisösnöñ gwarekurupñi yembuk mohotñe Galili prowins uruñe liliköba könanöñ angetka Jisösnöñ keu kötñi kewö jii mötket, “Anutunöñ Suep gölmegö azi ölni mi gölme ambazip yeñgö böröñine al wanğii gema.²³ Geiga i qegetka kömuma. Kömuiga wehön karöbut aiga mönö kömupñöhök wahötma.” Gwarekurupñan mi möta uruñinan lömböriiga wösöbirik mötket. Mewö.

Jisösnöñ jöwöwöl jikegö takisñi alök.

²⁴ *Jisösnöñ gwarekurupñi yembuk Kaperneam taonöñ kanğotketka jöwöwöl jikegö takis meme azi yeñön Pitögöreñ kaba kewö qesim wanğiget, “Enğö böhiñinan jöwöwöl jikegö takisñi alma me qahö?”

²⁵ Qesim wanğigetka “On!” jiyök. Mianğö andöñe Pitönöñ miri uruñe öngöiga Jisösnöñ keu mutukñi kewö qesim wanğiyök, “Saimon, gi denöwö mötmörizan? Denike yeñön kölköl-örörögö töwanji aka takis tosatñi mi gölmegö kiñ azi kembu yeñgöra alakze? Kantri tonji neñön me kian yeñön mi algetka tokomakze?”

²⁶ Mewö qesim wanğiiiga melenđa “Kian yeñön,” jiyök. Mewö jüiga Jisösnöñ kewö jii mörök, “Mewö aiga kantri tonji neñön mi albinangö dop qahö akzin.²⁷ Mewö akzinmö, takis qahö alinga azi mienğö uruñinan bölibapuköra mönö anda kösö kawiki o angönöñ gilman. Gila söra mutukñi öröba memani,

* **17:20:** Mat 21.21; Mak 11.23; 1 Kor 13.2 * **17:24:** Eks 30.13; 38.26

mönö mianğö numbuñi mesaköba monerj kötñi mianğören miwikñaiman. Monerj kötñi mi azi yahöt netkö takisnirangö dop. Mönö mi memba engiba mianğön nöngö aka nangi takisniri alman.” Mewö.

18

Gwarek sutñine dañön mutukñi akza?

Mak 9.33-37; Luk 9.46-48

¹ *Nalö mianğören gwarek yeñön Jisösgören kaba kewö jiget, “Suepkö bemtohoñ uruñe dañön öngöngöñi akza?”

² Mewö jigetka namande moröñi kun qeri kaiga sutñine ali kinök. ³ *Kiniga kewö jiyök, “Nöñön keu öñi kun kewö jibi mötme: Uruñini qahö melenđa nahönbörat ewö qahö akñe ewö, iñini mönö nalö kunöñ Suepkö bemtohoññöñ qahö angotme.

⁴ Mianğöra kunñan nanñi memba et ala morö kianğö dop akñawi, yañön mönö Suepkö bemtohoñ uruñe öngöngöñi akza.

⁵ Kunñan namande kewöñi kun nöngö qetne köl öröba köyan kölmawi, yañön mönö ni köl öröm niñgima.” Mewö.

Siñgisöndökö kölgorom mönö qetal engime.

Mak 9.42-48; Luk 17.1-2

⁶ Jisösnöñ toroqeba kewö jiyök, “Morö kewöñi möt narim niñgizei, kunñan yengörenök kun kölgorom ak wañgiiga siñgisöndök akñawi, azi mianğön mönö lömböt öngöngöñi miwikñaima. Anutunöñ lömböt mianğö likepñi denöwö wañgiiga dopñe akawak? Kemuñ jamönjiñ jölñe jöhöba köwet röndumnöñ gilget mulungöi gebawak, mianğön mönö awamñi ahum wañgii tandök akawak.

⁷ “Siñgisöndökö supatitikñan mönö awamñanök asuhumakza. Mianğöra gölme ambazip engöra Yei wösöbirik! mötzal. Kunñan supatitik angön kölmamgö osimakzapmö, kun dañön tosatñi kölgorom ak engiiga siñgisöndök akñei, yañöra mönö Yei! jiba sahötzal. Sihimbölä öngöngöñan mönö yañgö qakñe öngöma.

⁸ * “Börögan me könagan siñgisöndök akñangö kölgorom ak gihima ewö, mönö yandim gilman. Yandim gilagun böröta me könatohot mala malmal köhöikñi miwikñaiiba oyaenköyaen akñanmö, köna börö yahötpuk malnönga könanğep könöp sianöñ gil gihigetka gebanbuk. Sia könöpñi mi teteköñi qahö jema.

⁹ * “Mewöñanök jegan siñgisöndök akñangö kölgorom ak gihima ewö, mönö qözöla gilman. Qözöla gilagun je-ilik mala malmal köhöikñe anğota oyaenköyaen akñanmö, je yahötpuk

* 18:1: Luk 22.24 * 18:3: Mak 10.15; Luk 18.17 * 18:8: Mat 5.30 * 18:9: Mat 5.29

malnönnga könöp siagö könöpnön gil gihigetka gebanbuk.” Mewö.

Lamanönj sohayöhi, miangö dopkeu

Luk 15.3-7

10 “Ambazip moröni kienjörenök kun memba et al wanjibepuköra mönö galömñini meme. Nönön keu kewö jizal: Yengö kölközizip garataurupñinan mönö Suep miri miangören nönjö Suep Iwinangö kösutñe mala jemesoholñi sundan ehakze. Mianjöra jijiwilit kude ak engime. 11 (Suep gölmegö azi ölnan mönö ambazip sohosohonji mem letot engii oyaenköyaen akñegöra erök.)

12 “Keu kianjöra denöwö mötmörize? Azi kungö lamaurupñi 100 malgetka miengörenök kunñan sohoba janjuñ aniga toñan denöwö akña? Yanñon mönö 99 mi kundunje engömosöta anda mohot janjuñ anöhi, miangö jaruba anma. 13 Jaruba anda mala miwikñaima ewö, nönön keu ölni kun kewö jibi mötme: Yanñon 99 janjuñ qahö angeri, miengöra nalö miangören gwötpuk qahö söngaimapmö, mohot mianjöra önöni qahö söngaiba malma. 14 Mianjö dop engö Iwinñini Suep mire maljawanñon mönö ambazip moröni kienjörenök kunñan sohoba könöp sianönj gebapuköra mörakza.” Mewö.

Alagan sinjisöndok ak ghiiga kewö akñan:

15 * “Urumelen alagan sinjisöndok ak ghiima ewö, gi mönö yangören anda mesohol köl wanjiba köna sinjiyöhi, mi kon-del wanjiman. Mewö aknönnga keugi möta bapñe anma ewö, gönön mönö alagi luhut al wanjinönnga kunbuk urumohot aka malmahot. 16 * Mewö aknönnga keugi möta miangö bapñe qahö anma ewö, gönön mönö toroqeba ala mohot me yahöt etkuangita yangören anme. Mewö Buña Kimbigö keu kianjö dop akñan, ‘Keu pakpak mi ambazip yahöt karöbutñan nanjöba jigetka köhöima.’

17 “Mewö aketka keunñini möta miangö bapñe qahö anma ewö, gönön mönö urumelen könagesögö jitñememe yengöra jinönnga yambuk eraum mötme. Eraum mötmemö, yengö keu bapñe mewöyök qahö anma ewö, mi mönö aukñe jigetka jabö ahui urumelenjö kopa ewö ak wanjiba malman. Takis tilipqilip-ñinambuk megetka sisitñini memakzei, miangö tandök ewö i mönö mosötnönnga yaigep malma.”

Sinjisöndokö jöhöjöhöni aka pösatpösatñi

18 * “Nönön keu öl töhöñni kun kewö jibi mötme: Enñon sinjisöndok gölmenönj jöhömei, mi pakpak mönö Suep mire mewöyök jöhöjöhöni ahöma aka sinjisöndok gölmenönj mosöta

pösatmei, mi pakpak mönö Anutunöŋ mosöri Suep mire mewöyök pösatpösatŋi ahöma.

19 “Toroqeba keu kewö jibi mötme: Gölmenöŋ engörenök yahötŋan keu mi me mi mianğöra urumohok aka köuluköbitkö keu jöhömahori, mi nöŋgö Iwini Suep mire maljawaŋön mönö etkiiga buŋa qem aŋgumahot. 20 Mi kewögöra: Ambazip yahöt me karöbutŋan nöŋgö qetne igen me waigen tokomei, nöŋön mönö mianğöreŋ yeŋgö sutŋine malmam.” Mewö.

Welenqege ak-kömukömuŋi qahöpkö söpsöp keu

21 *Nalö mianğöreŋ Pitönöŋ Jisösgöreŋ kaba keu kewö jii mörök, “Kembu, alanan siŋgisöndok ak niŋgimakzawi, nöŋön mi indimŋi dawikö dop mosötpiga dop kölma? Indimŋi 7 mi gwötpuk. Mianğö dop mosötpiga dop kölma me qahö?”

22 Jisösnöŋ mi möta kewö melen waŋgiyök, “Indimŋi 7 qahöpmö, 70 taims 7 * mi mosötnöŋga dop kölma. Nöŋön göhöra mewö jizal. 23 Mianğö könaŋi mi kewö jim tuarimam. Suepkö bemtohoŋi mi kiŋ azi kembangö dop albi kewö akza: Kiŋnöŋ welenqegeurupŋi engohola moneŋini galöm kölgeri, mianğö areŋ papiaŋi kondelget mindiŋgömapköra ka paŋ kölök.

24 “Mewö könahiba moneŋaŋgö kösohotŋi kewöta mindiŋgögetka mianğöreŋ azi kun waŋgita kagetka yaŋgö jeŋe kinök. Tosaŋi 10 milyön kina mi yaŋgöreŋ ahöyök.

25 Mi ahöyökmö, tosaŋi mi mekömamğöra moneŋi qahö dop köli osiyöhaŋgöra aka ketaŋamŋan kinda kewö jim kutuyök, ‘Sukinapŋi ahözawi, mi pakpak mönö söŋgöroŋi memegöra alme. I aka anöm-moröŋi i mewöyök mönö söŋgöroŋini memegöra algetka moneŋ kaiga mianğön tosaŋi mi meköme.

26 “Mewö jim kutuiga welenqegeŋan wösöŋe eta simin köla sipköba kewö ulet waŋgiyök, ‘Gi mönö urukönöp kude aka mökösoŋda mamböt niŋginöŋga göhöreŋ tosagi pakpak mi ölop meköm gihimam.’ 27 Mewö ulet waŋgiiga ketaŋamŋan welenqegeŋaŋgöra wösö mötmöt aka tosaŋi mi kutuba mosöta pösari erök. 28 Erökmö, yaigep anda mianğöreŋ welenqege alaŋi kun miwikŋaiba ehök. Yaŋgö tosaŋi mi silim 100:kö töwaŋi (Kina500,-) mianğö dop yaŋgöreŋ ahöyök. I eka memba jölŋi köhöikŋanök mözöhöla kewö jiyök, ‘Nöŋgöreŋ tosa göhöreŋ ahözawi, mi mönö meköm niŋgiman me?’

29 “Mewö jiiga welenqege alaŋan wösöŋe eta simin köla sipköba kewö ulet waŋgiyök, ‘Gi mönö urukönöp kude aka mökösoŋda mamböt niŋginöŋga göhöreŋ tosagi mi ölop meköm gihimam.’

* **18:21:** Luk 17.3-4 * **18:22:** 70 taims 7 = 490. Mianğö dop alagahö siŋgisöndokŋi mi mönö qösösök mosötman.

³⁰ “Mewö jiyökmö, yanön mi tököba anda jii memba jöhöba kösö mire alget tari tosanj mekögetka etma. ³¹ Yuai mi asuhuiga welenqeçe alaurupñan tandök mi eka uruñinan kömbuhiiga wösöbirik möta anda mianğö kösohotñi mi körek ketañamñinanğöra jigetka mörök.

³² “Mi möta ketañamñinan welenqeçe mutukñi mi qeri jeñe kañgoriga kewö jii mörök, ‘Gi nup meme azi bölöñi! Gi tosagi kutuba mosöt mamğö qesim niñginöñga nöñön mi pakpak mosöt gihizal. ³³ Nöñön gehoriba ak kömum gihibiga göñön mewöyök mianğö dop welenqeçe alagi ak kömum wañginöñga dop kölbawak.’

³⁴ “Ketañamñan mewö jiiga irimñi seholiiga welenqeçe mianğö keuñi jim teköba kösö mirigö galöm yeñgö böröñine al wañgiiga sihimbölö gwötpuk möta tatma. Mianğöreñ tata tosanj kiñgöreñ ahöyöhi, mi pakpak meköm teköiga etma. ³⁵ Söpsöp keu kianğö ölni kewö: Inini mohot mohot alañinanğö siñgisöndokñi uruñinan qahö mosötme ewö, nöñgö Suep Iwinan mönö mewöyök keu mianğö dop ak eñgima.” Mewö.

19

Awanöm aņgömosötmosötkö keuñi

Mak 10.1-12

¹ Jisösnöñ keu mi jim teköbagun Galili prowins mosöta Jordan o kutuba likepñe anda mötöteiba eta kunbuk o mi kutuba Judia prowinsnöñ kayök. ² Kaiga ambazip kambulelemenöñ wuatangöba kagetka mianğöreñ mem ölöwak eñgiyök.

³ Mem ölöwak eñgiiga Farisi (Köna keugö kapañkölköl) tosatñan yanğöreñ kaba keugö bötaknöñ örömapkö esapköm wañgiba kewö qesim wañgiget, “Azinöñ könañi i me waigöra anömñi mosötmawi, mi Köna keu oñgitma me qahö?”

⁴ *Qesim wañgigetka melenđa kewö jiyök, “Miwimiwikñai Toñan lök könakönahineyök i ‘azi aka ambi malmegöra miwikñaim eñgiyök.’ Buña keu mi oyoñget me qahö?”

⁵ *Miwikñaiaba kewö jiyök, ‘Mianğöra azinöñ mönö iwinamñi etkömosöta anömñanğöreñ anda qekötahöiga yetkön sile mohot aka malmahot.’ Keu mi oyoñget me qahö? ⁶ Mewö aka toroqeba yahöt qahö akzahötmö, sile mohot aka malmahot. Anutunöñ azi aka ambi mindirim etkiyöhi, ambazip kunöñ mönö i kude mendeñ etkima.”

⁷ *Mewö jii möta kewö jiget, “Azinöñ aņgömosötmosöt papia ohoba anömñi ölop mosötma. Mosesnöñ mönö wuanöñgöra keu mewö jim kutum neñgii ahöza?” ⁸ Mewö jigetka kewö jim

* 19:4: Jen 1.27; 5.2 * 19:5: Jen 2.24 * 19:7: Dut 24.1-4; Mat 5.31

engiyök, “Mosesnöḡ mönö uruköhöikḡinanḡöra aka anömḡi mosötmapkö keu mewö jim kutuyökmö, könakönahinḡeyök mewö qahö ahöyök. ⁹ *Nöḡön kewö jibi mötme: Anömḡan qesabulum qahö ahiga töndup wuatḡḡöba ambi kun memawi, yaḡön mönö sero yoḡgorö akḡa. Kunḡan ambi mosötmosötḡi memawi, yaḡön mönö sero yoḡgorö akḡa.”

¹⁰ Jisösnöḡ mewö jiiga gwarek yeḡön jiget, “Awanöm sutḡire aḡḡömosötḡpitkö soḡgo mewö ahöza ewö, mönö awanöm qahö ahinga dop köлма.”

¹¹ Mewö jigetmö, Jisösnöḡ kewö meleḡnök, “Miaḡḡö keuḡi kusum eḡgizali, ambazip köreḡḡan mi nanḡinanḡöra aḡḡön köla miaḡḡö dop ölop qahö akḡemö, Anutunöḡ keu mi ambazip tosatḡi yeḡḡöra eḡgihö, yeḡönök mönö miaḡḡö dop akḡe. ¹² Miaḡḡö könaḡi kewö: Tosatḡan nam köro uruḡe ahuba miaḡḡöreḡök könahiba awanöm akingö qahö mötze. Tosatḡan ambazipnöḡ sileḡini yandiba * kondot eḡgigetka awanöm akingö dop qahö akze. Tosatḡan Suep bemtohoḡḡḡöra aka awanöm qahö akingö keuḡi jim jöhöba keuḡini mi wuatḡḡömakze. Kunḡan keu mia me mia möt aḡḡön köla wuatḡḡömamḡö dop akzawi, yaḡön mönö miaḡḡö dop akḡa.” Mewö.

Jisösnöḡ nahönbörat kötuetköm eḡgiyök.

Mak 10.13-16; Luk 18.15-17

¹³ Nalö miaḡḡöreḡ tosatḡan nahönbörat morömorö eḡḡuaḡgita Jisösnöḡ böroḡi nöroḡḡine ala kölulukömapköra yaḡḡöreḡ kagetmö, gwarek yeḡön ambazip mi jim ḡetal ak eḡgiget. ¹⁴ Mewö aketka Jisösnöḡ kewö jiyök, “Nahönbörat moröḡi mi ölop eḡḡömosötḡetka nöḡḡöreḡ kame. Suepkö Toḡan ambazip mewö mia bemtohoḡi buḡa ḡem eḡgima. Miaḡḡöra i kude jöhöm eḡgime.” ¹⁵ Mewö jiba böroḡi nöroḡḡine ala eḡḡömosöta kungen anök. Mewö.

Jisösnöḡ azi pomḡi kungö qambaḡ keu jiyök.

Mak 10.17-31; Luk 18.18-30

¹⁶ Nalö kungen azi kunöḡ Jisöḡöreḡ kaba kewö qesim waḡḡiyök, “Böhi, nöḡön ahakmeme ölopḡi denöwö aka malmal köhöikḡaḡḡö buḡa ḡem aḡḡubileḡak?” ¹⁷ Qesim waḡḡiiga kewö jii mörök, “Ahakmeme ölopḡi denöwö, wuanöḡḡöra mewö qesim niḡḡizan? Mohot-kunḡan mönö ölopḡi akza. Malmal köhöikḡe aḡḡotmamḡö mötman ewö, mönö jöjöpaḡ keu tem köla malman.”

¹⁸ *Mi möta kewö jii mörök, “Wani jöjöpaḡ keugöra jizan?” Jisösnöḡ mi möta jiyök, “Möno ki, ‘Ambazip kun kude ḡenöḡ

* 19:9: Mat 5.32; 1 Kor 7.10-11
Eks 20.13-16; Dut 5.17-20

* 19:12: Azi köḡḡi kölkölgöra jiza.

* 19:18:

kömuma, Sero yonğorö kude akñan, Yonğorö kude meman, Jitnönj alal keu kude jiman, ¹⁹ *Iwinamgi mönö göda qem etkimakñan,' aka 'Nangi jöpaköm anğumakzani, mianğö dop mönö ambazip pakpak jöpaköm enğimakñan.' "

²⁰ Mewö jiiga azi gwabönönj kewö jiyök, "Mi pakpak mönö tem köla mala kotzal. Wanigöra kunbuk osizal?" ²¹ Mewö jiiga Jisösnönj jiyök, "Gi aködamungabuk malmamgö mötman ewö, mönö anda sukinapki söngörönji memegöra alnönj monen kaiga ambazip wanapñi enğiman. Mewö aknönğa sukinapki ketanji (guli masapu, milyön Kina ewö) mi Suep mire ahöm gihima. Mewö aka ni nuatanğöba kaman."

²² Mewö jiyökmö, gwabönönj keu mi möta sukinapñi gwötpuk ahöyöhanğöra aka wösöbirik möta jeni asöliiga öne mosöta anök. Mewö. ²³ Mosöta aniga Jisösnönj gwarekurupñi kewö jii mötket, "Nönjön keu ölnji kun kewö jibi mötme: Yei! Ambazip pomñi yejön mönö Suepkö bemtohoñnönj anğotpingö lömböriba kupuk-kapak akñe. ²⁴ Mi kewö jim tuarimam: Sömbup ketanji kamel mi kondi kinimñe ölop qahö anğotma. Mianğö dop ambazip pomñi yejön Anutugö bemtohoñ uruñe anğotpingö lömböriba qaköme."

²⁵ Mewö jii möta gwarek yejön aurum tililingöba kewö jiget, "Oponoj! Ambazip danön mönö Suepkö buñaya akawak?" ²⁶ Mewö jigetka Jisösnönj uba enğeka kewö jiyök, "Ambazipnönj mi esapköba osiba qakömakzemö, Anutunönj mönö yuai pakpak ölop ahakza. Yanön yuai kun aka memamgö qahö osiba qakömakza." Mewö.

Jisösgö nup memegö töwanji

²⁷ Pitönönj keu mi möta melenja kewö jiyök, "Mötnönj, nejön mönö yuai pakpak mosöta gi guatanğöba kain. Mianğö likepñi mönö wani yuaia membin?" ²⁸ *Mewö jiiga Jisösnönj kewö jii mötket, "Nönjön keu ölnji kun kewö jibi mötme: Yuai pakpak kölöñaiiga Suep gölmeğö azi ölnjan jakömbuak dumñe tari asakmararanan asarimawi, nalö qainñi kun mianğöreñ ni nuatanğöba kageri, enjön mönö mewöyök jakömbuak dum 12 mianğöreñ tata Israel kambu 12 yeñgö keunini kewöta jim teköme.

²⁹ "Kunñan nönğö qetnanğöra aka yuai kun mosöröhi, - mi jike mirinji, darumunñi, nenbehötñi, iwinamñi, nahönböratñi me nup kisinji - mi enğömosöriğa Anutunönj mönö mianğö likepñi onğita melenj wanğiiga sehima. Mewö sehiiga mal-mal köhöikñi tetekönji qahö buña qem anğuma. ³⁰ *Mewö asuhumapmö, mutukñi enğöreñök gwötpukñan dagibezupñi

* 19:19: Eks 20.12; Dut 5.16; Lew 19.18

* 19:28: Mat 25.31; Luk 22.30

* 19:30: Mat 20.16; Luk 13.30

aketka dagibezupni yenğörenök gwötputknan mutukni akne.”
Mewö.

20

Wain nup meme ambazip yenğö dopkeu

¹ Jisösnöñ jiyök, “Suepkö bemptohöni mi kewö: Gölme toni kunöñ söñanök wahöta yaigep anda azi tosatni enğeka wain nupne monen nup memegöra qesim enğiyök. ² Qesim enğiiga ‘Ölöp,’ jigetka silim mohotkö töwanini (Kina 5) enğimapkö uru-mohot aketka melaim enğiiga wain nupne anget.

³ “Angetka 9 kilok miangö dop aiga kunbuk toroqeba anda azi tosatni maket sombemne önewat kingetka enğehök. ⁴ Enğeka kewö jii mötket, ‘Inini mönö mewöyök nöngö wain nupne anda nup megetka töwanini dopneyök enğimam.’

⁵ “Mewö jiiga wain nupne anget. Angetka 12 kilok aiga kunbuk anök aka mare 3 kilok miangö dop dumne kunbuk yaigep anda mewöñanök ahök. ⁶ Mewö aka mare 5 kilok miangö dop yaigep aniga azi tosatni dumne kunbuk öne lan kingetka enğehök. Enğeka kewö qesim enğiyök, ‘Inini mönö wuanöñgöra silim köröp ki öne malje?’

⁷ “Mewö qesim enğiiga kewö melenget, ‘Kunñan monen nup memingöra qahö qesim nenğiza. Miangöra öne ki kinjin.’ Melengetka kewö jii mötket, ‘Inini mönö mewöyök nöngö wain nupne anda nup meget.’ ⁸ *Nup megetka mare aiga wain nup tonan nup galömni öröba kewö jii mörök, ‘Gi mönö nup meme azi enğohola töwanini enğiman. Mare qöndökni kazei, yenğörenök könahiba enğiba anda söñanök kazei, yenğören teköman.’

⁹ “Mewö jiiga mare 5 kilok nupnöñ kageri, yenön kañgotketka silim mohotkö töwanini (Kina 5) mi mohot mohot enğiiga meget. ¹⁰ Mutuk nupnöñ kageri, yenön kañgota töwanini onğita memegöra mötmörigetmö, i mohot mohot mewöyök silim mohotkö töwanini (Kina 5) enğiiga meget. ¹¹ Töwa mohot miyök memba könahiba gölme tonangöra uruninan ihururuk möta jimongot ak wanğiba kewö jiget, ¹² ‘Nini wehöngöra nöngöp ariba nupkö lömbötñi bisizinmö, azi mi dölök-kun nup memegöra qesim enğizan. Yenön aua mohot-kungö dop nup mezemö, gönön töndup yenğöra mötmörinönğa nembuk örörön akze. Mi qahö dop kölja.’

¹³ “Mewö jigetmö, yenğörenök kungöra kewö melenğa jiyök, ‘Alani, ni göbuk keu jiba silim mohotkö töwa (Kina 5) gi-himangö urumohot akzit. Miangö dop töwa miyöhök gi-hibiga dop kölja. Mönö mi mötmöriman. ¹⁴ Urugi miangöra bölilapukmö, mönö nangi töwagi memba anman. Azi dölök-kun

* 20:8: Lew 19.13; Dut 24.15

nup memegöra qesim engizali, yengöra mewöyök töwa gihizali, mönö miyök engimangö mötzal.

¹⁵ “Nani monejnöñ nani sihimnañgö dop akiga dop kölja me qahö? Nöñön ekbonep qahö akiga urugan auiga jegi bosoleiza me?” ¹⁶ *Jisösnöñ keu mi jim teköba kewö jiyök, “Miañgö dop qöndökñi yeñön mutukñi aketka mutukñi yeñön qöndökñi akñe.” Mewö.

Jisösnöñ kömumangö keuñi jüga karöbut ahök.

Mak 10.32-34; Luk 18.31-34

¹⁷ Jisösnöñ Jerusalem sitinöñ öñgöbingöra gölme köna angetka gwarekurupñi 12 mi öröm engiba görane anda kewö jii mötket, ¹⁸ “Mötket, nini Jerusalem öñgöbin. Miañgören kunñan Suep gölmegö azi ölñi mamalolo mem wañgiiga jike nup galöm aka Köna keugö böhi yengö böröñine gema. Yeñön kömumapkö keuñi jim teköba ¹⁹ kian gawman yengö böröñine al wañgime. Al wañgigetka mepaiköba ihilek wahinambuknöñ tauköm wañgime. Tauköm wañgiba maripomnöñ qegetka kömuma. Kömumba wehön karöbut aiga kömupnöñök wahötma.” Mewö.

Jeims Jon namñiran yuaigöra ulerök.

Mak 10.35-45

²⁰ Nalö miañgören Zebedigö nahönyahöt yetkö namñiran nahönyahötñi yetpuk Jisösgören kaba simin köl wañgiba yuai qainñi kungöra uletmangö jiyök. ²¹ Mewö jüga qesim wañgiyök, “Gi wani yuai akñangö mötzan?” Qesim wañgiiga kewö jiyök, “Göñön ölöp jim kutunöñga nöñgö nahönyahötñi kietkön mönö göhö bemtohoñnöñ eu öñgöba kunöñ börögi ölñe aka kunñan börögi qaniñe tata yuai pakpak galöm kölbeak.”

²² Mewö jiyökmö, Jisösnöñ melenđa kewö jiyök, “Inini miañgö könañi qahö möt yaköba uletze. Nöñön qambi kakñambuk nemami, inñiri mi ölöp nemba sihimbölö mötmahot me qahö?” Mi möta “Ölöp nembit,” jiyohot. ²³ Jiyohotka kewö jii mörohot, “Mi ölña! Nöñön qambi kakñambuk nemami, inñiri mi mewöñanök nemahotmö, nöñgö böröni ölñe me qaniñe dañön tatmahori, nöñön keu mi jim kutumamangö dop qahö. Nöñgö Iwinan dum yahöt mi denike yetköra mözözömgöyöhi, mi mönö yetköra etkiiga nömbuk tata galöm kölmahot.” Mewö.

Galöm ölñan mönö welenqeqeya akza.

²⁴ Darumun yahöt yetkön mewö ulerohotka alaurupñi 10 yeñön mi möta urubölö aket. ²⁵ *Mewö aketmö, Jisösnöñ engoholi kagetka kewö jii mötket, “Gölmegö kantrinñi kantrinñi miengö jembonñinan mönö azi kembu tandök ak engimakze.

* 20:16: Mat 19.30; Mak 10.31; Luk 13.30

* 20:25: Luk 22.25-26

Yengö ketanjamñinan mönö keu jim kutuba mindingöm enggiba kukösumñini kondelakze. Inini könajini mi ölop mötze. ²⁶* Engö sutñine silik mewö ahöbapukmö, kunñan engö sutñine ketanjamñini akñamgö mötzawi, yañön mönö welen qem enggiba malma.

²⁷ “Mewöyök kunñan engö sutñine mutukñi malmamgö mötzawi, yañön mönö engö nembö bapñine mala welenqeqeñini omanñi akña. ²⁸ Suep gölmegö azi ölñan mönö mewöyök silik mewöñi kondela nanñi welen qem wangimegöra aka qahö kayök. Qahöpmö, mönö welen qem enggiba ambazip sehisehñi yengö sohopñini memamgöra aka eta malmalñi kölenja mosötma.” Mewö.

Jisösnöñ jegömöl azi yahöt mem ölöwak etkiyök.

Mak 10.46-52; Luk 18.35-43

²⁹ Jisösnöñ gwarekurupñi yembuk Jeriko siti mosötpingö aketka ambazip kambulembenöñ enguatanğöba andöñine kaget. ³⁰ Mewö kagetka jegömöl azi yahöt köna jitñe tarohot. Tarohotka “Jisösnöñ nenğonğitmamgö akza,” jiget möta kewö qerohot, “Kembu Deiwidkö gwölönarökñi, mönö ak kömum netkinöñ!”

³¹ Mewö qerohotka ambazip kambu yeñön keu bök tatmahotköra qetal etkigetmö, yetkön mönö kapan köla kewö qerohot, “Kembu Deiwidkö gwölönarökñi, mönö ak kömum netkinöñ!” ³² Mewö qerohotka Jisösnöñ dörök ala yañgöreñ kama-hotköra qeri kayohotka kewö qesim etkiyök, “Alayahötñi, nöñön wani yuai ak etkimamgöra mötzahot?”

³³ Mewö qesim etkiiga kewö jiyohot, “Kembu, niri jeniri kunbuk ubitköra mötzit.” ³⁴ Mewö jiyohotka Jisösnöñ yetköra wösöñi möta jeñiri misirii mianğöreñök tohoiga uba Jisös wu-atanğöba andöñe anohot. Mewö.

21

Jisösgöra köirañ kölgetka Jerusalem öngöyök.

Mak 11.1-11; Luk 19.28-40; Jon 12.12-19

¹ Jisösnöñ gwarekurupñi yembuk Jerusalem siti dopdowiba Oil ip kundunje Betfage mirinöñ kaget. Kaba gwarekyahötñi yahöt melaim etkimamgöra aka ² kewö jii mörohot, “Miri wösöñire tatzawi, mönö mianğöreñ anmahot. Anda mianğöreñ angota donki ambinñi kösönöñ jöhöget kinjawi aka donki moröñi mi mianğöreñök miwikñaim etkimahot. Mi mönö pösat etkiba memba nöñgöreñ kamahot.

³ “Pösarohotka kunñan keu kun jiiga kewö jimahot, ‘Kembu-niran mönö mianğöra osiza.’ Mewö jiyohotka donki mi zilañ

* 20:26: Mat 23.11; Mak 9.35; Luk 22.26

al etkiiga ki kamahot. ⁴ Anutunöŋ keu kun kezapqetok azi kungö uruŋe ali jiyöhi, mianjön öljambuk akŋapköra mewö asuhuyök. Keu mi kewö,

⁵ **“O Jerusalem ambazip Zaion kundunji liliköba maljei, yengöra mönö kewö jigetka mötme, ‘Mötket, engö kiŋ kembunjanan mönö engöreŋ asuhuma. Yanjön gunbönjönjön aka donki qakŋe tata kama. Donki lömböt bisimakzawanjö moröŋi mianjö qakŋe tata kama.’”*

⁶ Jisösnöŋ gwarekyahötŋi melaim etkiiga anda keu jiyöhanjö dop ahot. ⁷ Yetköŋ donki ambiŋi moröŋambuk etkömembra kayohot. Kayohotka malukuŋini qeköba donki qakŋire algetka Jisösnöŋ moröŋanjö qakŋe öngöba tarök.

⁸ Mewö tata aniga ambazip kambulemberjan göda qeba malukuŋini qeköba köna namŋe tumbulgetka tosatŋan ip uruŋe anda böröŋi qezunyata köna namŋe tumbulget.

⁹ **Tumbulgetka ambazip kambu jeŋe köl öröba angeri aka andöŋe wuatanjöba kageri, yeŋön kewö jiba qetket, “Hosana! Anutu möpöseizin. Deiwidkö gwölönarökŋi owe owe! Kembugö qetŋe kamawi, Anutunöŋ mönö i kötuetköma. Hosana! Qetbuŋagi möpöseininga euyanjöreŋ öngöza! Owe owe!”*

¹⁰ Mewö qetketka Jerusalem sitinöŋ öngöba sitigö ambazip körekŋan auruba göjupmajup aka kewö qesiget, “Azi ki mönö niŋia?”

¹¹ Qesigetka ambazip kambuleleme yeŋön kewö melenget, “Yanjön mönö kezapqetok azi Jisös, Galili prowinsjö Nazaret mirigöra.” Mewö.

Jisösnöŋ jöwöwöl jike jim kömbuhiyök.

Mak 11.15-19; Luk 19.45-48; Jon 2.13-22

¹² Jisösnöŋ jöwöwöl jikegö tohoŋ uruŋe anök. Mianjöreŋ ambazip engehiga inap bohonŋi memegöra algetka söngöröŋi megeri, yanjön mi pakpak közöl engiiga etket. Moneŋ utekutek ambazip yengö jakeniŋi metali anget. Mewöyök kembö bohonŋini memegöra algeri, miengö dum tatatŋini mi tok tötaliga anget. ¹³ **Mewö aka kewö jii mötket, “Aisaianöŋ keu kun kewö ohoi ahöza, ‘Nöngö jikenan mönö köulukö mirinina akŋapkö qetme.’ Keu mi ahözapmö, inini mi utekögetka kegwek-kahasililiŋ yengö banjet ewö akza.”*

¹⁴ Mewö aiga jegömöl aka simalokon ambazip jöwöwöl jikenöŋ yanjöreŋ kagetka mem ölöwak engiyök. ¹⁵ Mewö asuhuyökmö, jike nup galöm aka Köna keugö böhi yeŋön anjöletot meyöhi, mi eket aka nahönbörat jöwöwöl jikenöŋ

* 21:5: Zek 9.9 * 21:9: Sum 118.25, 26 * 21:13: Ais 56.7; Jer 7.11

qeta “Hosana! Deiwidkö gwölönarökñi owe owe!” jigeri, mi engeka urubölö aket.

16 *Urubölö aka kewö jim wanget, “Morö mi keu qetzei, mi mötzan me qahö?” Jim wangetka kewö melen engiyök, “Ölöp mötzal. Inini nalö kungen Buña keu ki oyonget me qahö, ‘Göñön mönö nahönbörat aka morösepsep juzu nemakzei, mi kusum enjinönga nangi törörök möpöseim gihimakze.’ ”

17 Mewö jiba enjömosöta siti mosöta mare aiga Betani anda ahöyök. Mewö.

Jisösnöñ fig ip kun qesuahöiga ululungöyök.

Mak 11.12-14, 20-24

18 Ahöba söñanök wahöta kunbuk sitinöñ anda nenegö kömuyök. 19 Nenegö kömumba köna jitje fig ip * kun eka miangö könañe anök. Anökmö, ölni qahö miwikñaiiga sinñanök kiniga ehök. Mewö eka ip mi kewö jim wangetyök, “Göñön mönö nalö kunöñ ölgü kunbuk kude kuñguman.” Mewö jim wangetiiga fig ip mianjön mönö miangörenjök ululungöyök.

20 Ululungöiga gwarekurupñan mi eka auruba kewö jiget, “Fig ipnöñ mönö denöwö ösumok ululungöza?” 21 *Jigetka Jisösnöñ kewö melenök, “Nöñön keu ölni kun kewö jibi mötme: Mötnarip töp memba uruyahöt qahö akeak ewö, fig ipköra yuai asuhuzawi, inini miyök qahö akeakmö, ki mewöyök ölp akeak: Kunduñi kiangö tonjängöra kewö jim kutubeak, ‘Mönö kunduñi ki qeköba wahöta anda köwetnöñ alman.’ Mewö jim kutuba Anutu möt nariiga mönö miangö dop ahuma. 22 Wani yuaigöra qesiba köulukömei, mi pakpak buña qem angubingö möt narigetka mönö buñanini akña.” Mewö.

Jitnememe yeñön Jisösgö kukösumñangö qesiget.

Mak 11.27-33; Luk 20.1-8

23 Jisösnöñ jöwöwöl jikegö tohon uruñe anda ambazip kusum enjiiga jike nup galöm aka kantrigö jitnememe tosatñi yeñön yangören kangetket. Kangetka kewö qesim wanget, “Gi kiangören yuai akzani, mi mönö danön jim kutum gihiiga ahakzan? Miangö kukösumñi mi danön gihiyök?”

24 Qesim wangetka kewö melen engiyök, “Nöñön mewöyök keu kun qesim enjimam. Mi melen ningime ewö, nöñön mewöyök danön kukösum ningiiga yuai ki ahakzali, mi jibi mötme. 25 Jonöñ ambazip o-melun mem enjiba malöhi, yanön miangö kukösumñi mi denikeyök meyök? Suep Tonjan wangetyök me gölme tonjan wanget?” Mewö qesim enjiiga

* 21:16: Sum 8.2 * 21:19: Fig mi sambu ipkö alañi kun. Mi nupñine kömötketka kötñi nahömñinambuk asuhugetka gwötpuk nemakze. * 21:21: Mat 17.20; 1 Kor 13.2

sutɲine eraum möta kewö jiget, “‘Kukösumɲan Suepnöhök asuhuyök,’ mewö jibin ewö, yaɲön mönö kewö jima, ‘Inini mönö wuanöɲgöra Jon qahö möt narim waɲgiget?’ Mi qahö dop kölja.

²⁶ “Me ‘Gölme ambazipnöhök asuhuyök,’ jibin ewö, neɲön mönö ambazip kambu yeɲgöra keɲgötnini möta osibin. Könagesö pakpak yeɲön mönö Jongöra ‘Kezapqetok azia akza,’ jiba malje.” ²⁷ Keu mewö kewöta Jisösgöra kewö melenget, “Mi qahö mötzin.” Mewö melengetka Jisösnöɲ kewö jii mötket, “Mewö aiga nöɲön mewöyök yuai ki ahakzalangö kukösumɲi daɲön niɲgiyök, mi qahö jibi mötme.” Mewö.

Kungö nahönyahöt yetkö söpsöpkeu

²⁸ Jisösnöɲ söpsöpkeu kun kewö jiyök, “Inini keu kiangöra denöwö mötmörize? Azi kun nahönyahötɲi yahöt malget. Nalö kunöɲ iwiɲiran nahönɲi kungöreɲ anda kewö jiyök, ‘Nahöni, gi ölop merak nöɲgö wain kösö nupne anda nup meman.’

²⁹ “Mewö jüiga kewö melennök, ‘Ni töközal.’ Mewö jiyökmö, könaɲgep keuɲi miangö möt böliba elenɲa anda nup meyök. ³⁰ Mianɲgö andöɲe iwiɲiran nahönɲi kungöreɲ anda nahönɲi mutukɲangö jiyöhi, keu miyök jii mörök. Mi möta keu kewö jiba melennök, ‘Oɲ! Ketaɲamni, ölop anmam.’ Mewö jiyökmö, töndup qahö anök.”

³¹ Jisösnöɲ mewö jiba qesim enɲiyök, “Yahöt yetköreɲök daɲön mönö iwiɲiranɲgö jitɲi tem kölök?” Mewö qesim enɲiiga kewö melenget, “Nahönɲi mutukɲi yaɲön.” Mewö melengetka kewö jii mörök, “Nöɲön keu öl töhöɲɲi kun kewö jibi mötme: Takis meme ambazip tilipqilipɲinambuk aka köna ketaɲi ambi yeɲön mönö inini enɲoɲgita mutuk Anutugö bemtohoɲ uruɲe öɲgöme.

³² * “Keu miangö könaɲi kewö: Jon O-melun azinöɲ enɲgöreɲ kaba Anutugö jeɲe solanibingö könaɲi kondeliga inini yaɲgö keuɲi mi qahö möt narigetmö, takis meme ambazip tilipqilipɲinambuk aka köna ketaɲi ambi yeɲön mönö i möt narim waɲgiget. Yeɲön i möt narim waɲgigeri, inini mi eka töndup könaɲgep mewöyök nanɲini qahö möt bölim aɲguba elenɲa i qahö möt narim waɲgiget.” Mewö.

Wain kösö nup galöm bölöɲi miengö dopkeu

Mak 12.1-12; Luk 20.9-19

³³ * Jisösnöɲ jiyök, “Dopkeu kun kewö mötme: Gölme toɲi kunöɲ wain kösö nup kun köla kömörök. Köla kömöta selɲi memba liliköyök. Mem liliköba kötnöɲ wain jout ketaɲi kötnöɲ meyök. Mianɲgöreɲ waingö ölni ala könanöɲ tözöhölget oɲan lalanöɲ geyök. Wain jout ketaɲi mi kötnöɲ memba wain

* 21:32: Luk 3.12; 7.29-30 * 21:33: Ais 5.1-2

yoŋgorö membepuköra galöm meme jake köröŋŋi köweŋambuk meyök. Yuai pakpak mem teköba wain nup galöm tosatŋi miwikŋaim eŋgiba kewö jiyök, 'Mönö nup memba ölnaŋgö bahöŋi nanŋini memba bahöŋi toŋi ni niŋgime.' Mewö jiba nup mi böröŋine ala eŋgömosöta kantri kunöŋ anda malök.

³⁴ "Mala mali ölni öliyöhaŋgö nalöŋi (yambu 5) töriiga miangöreŋ welenqeŋeurupŋi kun melaim eŋgiiga galöm yeŋgöreŋ anda wain nup ölnaŋgö bahöŋi waŋgimegöra jiget. ³⁵ Jigetmö, galöm yeŋön i eŋgömemba jöhöba tosatŋi kömbinöŋ sepgwörörök eŋguba tosatŋi eŋguget kömugetka tosatŋi kötnöŋ gila eŋguget kömuget. ³⁶ Miangö andöŋe welenazi tosatŋi toroqeba melaim eŋgiiga gwötpuk aketmö, i mewöŋanök öröm ureim mem eŋgiget.

³⁷ "Mewö aketka wain nup toŋan keu jaruba jiyök, 'Nani nahöni mönö göda qem waŋgime me denöwö?' Mewö jiba qöndökŋi mi nahönŋa melaiiga yeŋgöreŋ anök. ³⁸ Anökmö, wain nup galöm yeŋön nahönŋi eka sutŋine kewö eraum möta jiget, 'Yaŋön mönö börösamotŋaŋgö toŋi akŋa. Ayop, mönö memba qein kömuiga wain kösö nupŋan mönö nanine buŋanina akŋa.'

³⁹ "Mewö jiba memba jöhöba gilgetka nup yaigepŋe geiga qeget kömuyök. ⁴⁰ Wain nup toŋan mi möta kaba nup galöm mi mönö denöwö ak eŋgima?"

⁴¹ Jisösnöŋ mewö qesiiga kewö jiget mörök, "Galöm bölöŋi mi mönö könderŋa yayapaleleŋ mem eŋgima aka nup galöm dölökŋi miwikŋaim eŋgiba wain kösö nupŋi yeŋgö böröŋine alma. Yeŋön ölni ölimawaŋgö nalöŋe bahöŋi törörök waŋgimakŋe." ⁴² *Jisösnöŋ mi möta kewö jii mötket, "Buŋa Kimbigö keu ki nalö kungen oyöŋget me qahö, 'Miri meme yeŋön köt tandö kun andö qeba öne mosötkeŋ taröhi, mianön mönö tandö kömbönaŋi aiga miwikŋaiget. Mianön tiŋgiriga mirinöŋ gororongöba eta kölma. Kembunöŋ tandö mi kuŋguiga jeninan ehinga qetbuŋabuk aiga welipkömakzin?"

⁴³ "Miangöra kewö jibi mötme, Anutunöŋ mönö bemtohoŋi eŋguaŋgita ambazip kambu kun eŋgiiga yeŋön miangö ölni ölop kuŋgumakŋe. ⁴⁴ Kunŋan tandö bohönŋi miangöreŋ töttöŋgata eta qemawi, mi mönö silenŋi kutumutumapmö, ain tandö mianön jöla tala kungö qakŋe eta kölmawi, mi mönö körek qözömözö-zamgöma."

⁴⁵ Jisösnöŋ mewö jiiga jike nup galöm aka Farisi (Köna keugö kapankölköl) yeŋön dopkeuŋi mi möta könaŋi möt asariba kewö jiget, "Mi mönö neŋgöra jiza." ⁴⁶ Miangöra i memba jöhöbingö mötketmö, ambazip kambu yeŋgöra keŋgötŋini möta

* 21:42: Sum 118.22-23

osiget. Ambazip kambu yeñon Jisösgöra mötketka kezapqetok azia ahök. Mewö.

22

Maren lömbuanğö söpsöp keu

Luk 14.15-24

¹ Jisösnöñ kunbuk könahiba söpsöp keunöñ keu kewö jiyök, ² “Suepkö bemtohoñi mi kiangö dop akza: Kiñ azi kembunöñ nahönñanğöra maren lömbuanğ arengöba mözözömgöyök. ³ Mözözömgöba welenqeçeurupñi melaim engiba kewö jiyök, ‘Nöñon ambazip tosatñi maren lömbuanğnöñ kamegö mötzal. İnini mönö yeñğoreñ kolek anda kamegö jiget mötme.’ Mewö jii anda jigetmö, ambazip mienöñ mi möta kabingö tököba tanqanğ aket.

⁴ “Miangö andöñe welenqeçeurup tosatñi kunbuk melaim engiba kewö jiyök, ‘Ambazip kamegöra jiali, mönö yeñğoreñ anda kewö jime: Mötket, nöñon lömbuanğö neneñamni lök mözözömgöbiga tatza. Nöñğö bulmakau azinñi aka bulmakau tosatñi gumohom engiinga kelökñinambuk akeri, mi enguba ohom qeraköinga yuai pampak lök jöjöröba ahöza. İnini mönö maren lömbuanğnöñ kaget.’

⁵ “Mewö jii angetka ambazip mienöñ keu miangö kezap qahö algetmö, nöñonğan aka lañ anget. Tosatñan nene nupñine angetka tosatñan kölköl-örörö nupñine anget. ⁶ Tosatñan kiñğö welen-qeçeurupñi qelanjiba engömemba öröm ureim ak engiba enguget kömuget. ⁷ Kömugetka kiñğö irimñi seholiiga yarö kambunñi melaim engiiga anda kinda enguget kömükömu azi mi köndenğ engiba taon mirinñini mi ohogetka jeyök.

⁸ “Miangö andöñe kiñnöñ welenqeçeurupñi yeñğöra kewö jiyök, ‘Maren lömbuanğ mözözömgöingä jöjöröba tatzapmö, ambazip kamegöra jiali, yeñon mönö sösoñğainöñ kakagö dop ölöpnñi qahö akze. ⁹ Miangöra inñini mönö köna soñanöñ aka miri sombemñi sombemñi miangöreñ anda ambazip mi me mi miwikñaim engime, i mönö maren lömbuanğnöñ kamegöra jiba kapanğ köla kuñğum engime.’

¹⁰ “Mewö jiiga welenqeçeurupñan mosöta könanñi könanñi miangöreñ anda ambazip mi me mi miwikñaim engigeri, mi körek pampak öröm tokom engiget. Ambazip ölöpnñi aka bölöñi mewöyök mi mewö kagetka maren lömbuanğ mirinöñ kokolak qeiga tebol liliköba tatket. ¹¹ Tebol liliköba tatketmö, kiñnöñ i engeknamğöra kaba miangöreñ azi kun maren lömbuanğö maluku tuatñi qahö köli geiga ehök. ¹² Azi mi eka kewö jii mörök, ‘Alani, gi maren lömbuanğö malukuñi qahö löngöta

töndup denöwögöra miri kiangö uruñe kazan?’ Mewö jiiga azi mianjön keuñi bököiga ölöñ tarök.

13 **“Mewö tariga kiñnön welenqegeurupñi kewö jim kum engiyök, ‘Mönö azi mi memba köna böröñi jöhöba yaigep gilgetka pandamanön gema.’ Miangören malmeanön mönö sahöt gigilahöba irimñini yöhözömgögetka qetñi qeri malme.* 14 *Keu miangö dop Anutunön ambazip sehisehiñan kamegöra jiyökmö, awamdökñi yeñön keu mi möt angön köla kaba Anutunön kambu möwölöhöm engiyöhi, mönö yeñgö sutñine kangotme.”* Mewö.

Takis alalgö Jisös esapköm wanjiget.

Mak 12.13-17; Luk 20.20-26

15 Miangö andöñe Farisi (Köna keugö kapankölköl) yeñön anda eraum möta Jisös qesiba keugö bötakñöñ öroi gwaröhöm wanjibingö areñi alget. 16 Mewö areñ ala gwarekurupñi aka premiö Herodkö pati-alaurupñi tosatñi melaim engigetka Jisösgören kaba kewö qesiba jiget, “Böhi, göñön azi ölni akzani, nini mi mötzin. Göñön ambazip tosatñi qahö engek soriba tosatñi qahö qepureim engimakzanmö, dop mohotñöñ kewöt neñgimakzan. Miangöra kuñgum gihigetka qahö goñgiba ketanji qahö esuhum engimakzanmö, Anutugören köna mi keu ölnanjö dop kusum neñgimakzan. Göñön Anutugören keu diñdiñi mianjön öngöñgöñi eretñi mohot pakpak jim qindiñ ak neñgimakzan. 17 Miangöra keu kiangöra denöwö mötmörizan, mi jinön mötpin. Nini sisa-kingöra takis ala mianjön Mosesgö Köna keu siñgibin me qahö?”

18 Mewö qesigetka areñini munenji möt kutuba kewö jii mötket, “O urumelenjö silesile azi, inñini mönö wuanöngöra keugö bötakñöñ al niñgibingö esapköm niñgize? 19 Ölop takis alalgö monenji kun kondel niñgigetka eki.” Mewö jiiga silwö monenji (Kina 5) kun memba kaget.

20 Kagetka kewö qesim engiyök, “Dagören imut aka qet mi ki ohoget ahöza?” 21 “O mi sisa-kingören,” mewö melenja jiget. Jigetka kewö jii mötket, “Mewö aiga yuai sisa-kingö imutñambuk buñanji akzawi, mi mönö yangöra al wanjime. Yuai kun Anutugö buñaya akzawi, mi mönö Anutugö buñageme.” 22 Mewö jii möta yangöra gwötpuk welipköba mosöta yaigep anget. Mewö.

Kömupñöhök wahötwahötkö Jisös esapköm wanjiget.

Mak 12.18-27; Luk 20.27-40

23 **Sadyusi (Jike nupkö kapankölköl) yeñön ‘Kömugeri, yeñön kude wahötme,’ jiba malget. Nalö miangören yeñgörenök tosatñan Jisösgören kaba kewö qesim wanjiba*

jiget, ²⁴ * “Böhi, Mosesnön kewö jim kutum nenngiyök ahöza, ‘Azi kun ambi meiga nahönbörat qahö ahui kömuiga munñan ölop malöni memba mala gwölönarök qiwikñaim wanñiiga datñangö qet bisiba malma.’ ²⁵ Mötnön, nalö kunön darumun 7 malget. Datñini mutukñan ambi memba mala gwölönarökñi qahö öne mala kömuyök. Kömuiga munñan malöni mi meyök.

²⁶ “Memba mala kömuiga munñi kunñan malöni mi meyök. Meiga miangö andöñe munñi kunön ambi miyök meyök. Mewöña mewö darumun 7 pakpak yeñön ambi mohok miyök memba gwölönarök qahö mala kömum teköget. ²⁷ Kömum tekögetka qöndökñi malöñini mi mewöyök kömuyök. ²⁸ Göñön ‘Kömugeri, yeñön guliba wahötme,’ jizannö, nini mi qahö möt narizin. Mötnön, azi 7 pakpak mi örörön wahötpeak ewö, ambi mohok mi anömñina meget malöhanğöra aka mönö dagö anömña akawak?”

²⁹ Mewö qesigetka Jisösnön melenđa kewö jii mötket, “Injini keu jim sohoze. Urumelenğö Buña Kimbiñi aka Anutugö kukösumñi qahö möt kutuzeanğöra mönö janjuñ ahakze. ³⁰ Ölna, kömupnöhök wahöta nalö miangöreñ awanöm qahö akñemö, garata yeñön Suep mire maljeanğö tandök aka malme.

³¹ “Mötket! Kömugeri, yeñön guliba wahötmegö keuñi Anutunön enğöra jiyöhi, injini mi lök oyonget me qahö? Keu mi kewö, ³² * “Nöñön Anutu Abrahamğö Kembu, Aisakö Kembu aka Jeikobkö Kembu mala kota maljal.’ Anutunön kömukömuñi yeñgö Kembuñini qahöpmö, malmal köhöikñi maljei, mönö yeñgö Kembuñina malja.” ³³ Jisösnön mewö ambazip kambu kusum enğii möta welipköget. Mewö.

Jöjöpañ keu bohonñi yahöt mi denöwö?

Mak 12.28-34; Luk 10.25-28

³⁴ Sadyusi (Jike nupkö kapanğölköl) yeñön Jisös qesim wanngigetka melenđa jim soroköiga keu bök akeri, mi Farisi (Köna keugö kapanğölköl) yeñön möta kaba tokoget.

³⁵ *Yeñgöreñök böhi kun Köna keu törörök möt kutuyöhi, yanön kaba Jisös bötak ala kewö qesim wanngiyök, ³⁶ “Böhi, Mosesğö Köna keu uruñe wani jöjöpañ keu mi bohonñi ketanñi akza?”

³⁷ *Qesim wanngiiga melenñök, “Bohonñi ketanñi mi kewö, ‘Gi urugi jömukñi, unjagi jömukñi aka mötmötki jömukñi miangön mönö Kembu Anutugi jöpaköba malman.’ ³⁸ Mianñön jöjöpañ keu bohonñi aka mutukñi akza. ³⁹ *Jöjöpañ keu miangö alañi kewö, ‘Nangi jöpaköm anğumakzani, mewöñanök mönö

* 22:24: Dut 25.5 * 22:32: Eks 3.6 * 22:35: Luk 10.25-28 * 22:37: Dut

6.5 * 22:39: Lew 19.18

ambazip pakpak jöpaköm enjiba malman.’⁴⁰ Jjöpaŋ keu yahöt mi mönö Mosesgö Köna keu aka kezapqetok ambazip yeŋgö Buzup Kimbi pakpak mienjö bohonŋina akza.” Mewö.

*Kraist mi kiŋ Deiwidkö Kembuŋi aka gwölönarökŋi.
Mak 12.35-37; Luk 20.41-44*

⁴¹ Farisi (Köna keugö kapaŋkölköl) yeŋön kaba tokogetka Jisösnöŋ kewö qesim enjyök, ⁴² “Inini Kraistköra denöwö mötze? Yeŋön mönö dagö nahönŋa akza?” Mewö jiiga melenđa jiget, “Mönö kiŋ Deiwidkö gwölönarökŋa akza.”

⁴³ Jigetka jiyök, “Mewö akzapmö, denöwö aka Uŋa Töröŋan Deiwid sölölohöm waŋgiiga yaŋgöra ‘Nani Kembuni,’ qeta kewö jiyök,

⁴⁴ *‘Anutunöŋ kinda nöŋgö Kembuni kewö jii mörök, Göŋön mönö kaba nöŋgö böröni ölje tatnöŋga nöŋön nalö sutŋe kerökurupki tim tötala luhut al enjiba göhö köna tambö gwaröŋe al enjimam. Nalö mi kam kuŋgumawaŋgö dop mönö asak-mararaŋnöŋ ki tatman.’

⁴⁵ Deiwidnöŋ nanŋak mewö jiba qetŋi ‘Nöŋgö Kembuni’ jiza. Kembuni jiba mönö denöwö aka yaŋgö gwölönarökŋi mohot akawak?”

⁴⁶ Mewö jiiga miangö kitipŋi kunöŋ kun melenmamgö osiba keu bök kinget. Sömaŋi miangöreŋök körek yeŋön Jisös kunbuk keu kungö qesim waŋgibingö kölköldömdöm aka mosötket. Mewö.

23

*Urumelenjö silesile malmalgö galöm meme keu
Mak 12.38-39; Luk 11.43, 46; 20.45-46*

¹ Nalö miangöreŋ Jisösnöŋ ambazip kambulelembe aka gwarekurupŋi yeŋgöra kewö jii mötket, ² “Köna keugö böhi aka Farisi (Köna keugö kapaŋkölköl) yeŋön Mosesgö jakömbuaknöŋ tata Köna keugö könaŋi kukösum qakŋe kusum enjimakze. ³ Miangöra keu pakpak jim kutum enjimakzei, mi mönö tem kölmemö, ahakmemeŋini mi kude wuatangöme. Yeŋön keu jitŋinan jim asarimakzemö, nanŋinak mi qahö wuatangömakze. Miangöra mönö i ewö kude ahakŋe.

⁴ “Yeŋön keuŋi keuŋi jim kutuba miangö köŋjöŋ lömbötŋi ambazip awötŋine alagun algetka mi tem kölbingö lömböriiga jaraŋbaraŋ ahakzemö, nanŋinak i kesötŋini moröŋi kunöŋ bauköm enjibingö wösömötmötŋini kun qahö ahöza.

* 22:44: Sum 110.1

5 **“Yenön ahakmemenini pakpak ambazipnön engeknejegöra aka memakze. Baiböl keu köt (memori wös) irimunğa bokisjnini mem qariba aukne kondela Buja mötmötjninağgöra aiweliköm angumakze. Malukuñinağgö suñe aködamungö biretni ketanji ketanji memba möndömakze. * 6 Yenön közölömbuañnön dum tatat mutukne jegep tatpingö mörakze aka köuluk mire qaikne eu tatpingö sihimñi mörakze. 7 Maketnön me könanön ambazip engeketa jölönini jimegö möta ‘O ketanamnini,’ qetjnini mewö qetmegöra sihimjnini mörakze.*

8 *“Yenön mewö ahakzemö, mohok-kun yanön engö Böhinini aiga inini körekñan yanğö urumelen alaurupñi akze. Mianğöra engö qetjnini böhinini qetmegöra kude mötme. 9 Mohok-kun yanön Iwinini akza. Yanön Suep mire maljawağgöra gölme azi kungöra neğgö iwinini qet mewö kude qetme. 10 Kraist mohok-kun nönön engö ketanamnini akzal. Mianğöra engö qetjnini ketanamnini qetmegöra kude mötme.*

11 **“Mewö qahöpmö, engö sutjne bohonñi akzawañön mönö welen qem engiba malma. 12 *Mewö malmapmö, kunñan nanñi uruñi memba öngömawi, Anutunön mönö i memba et al wañgima. Kunñan nanñi uruñi memba etmawi, Anutunön mönö i memba öngöba al wañgima.”*

Jisösnön Farisi yengöra wöziköba Yei! jiyök.

Mak 12.40; Luk 11.39-42, 44, 52; 20.47

13 *“O Köna keugö böhi aka mianğö kapañkölköl ambazip! Inini urumelenğö silesile ambazip aketka lömböt qakñine öngözawağgöra mönö wöziköba Yei! jizal. Ambazip Suepkö bemtohon uruñe anğotpepukö nanñuñi köla jöhömakze. Nanñinak mianğö uruñe qahö anğotze aka tosatñan mianğö uruñe anğotpingö akzei, inini i jöhöba anğön köl engimakze. 14 O Köna keugö böhi aka mianğö kapañkölköl ambazip! Inini urumelenğö silesile ambazip aketka lömböt qakñine öngözawağgöra mönö wöziköba Yei! jizal. Inini malö yengören miri yuai bidanğa gagabe köla enğuanğirakze aka qetbuñanini asuhumapköra aka köuluk köröpñi köuluköba töptöpñine qemakze. Mianğöra Anutunön keuñini jim teköba likepñi öngöngöñi meleşni engö qakñine öngöma.*

15 *“O Köna keugö böhi aka mianğö kapañkölköl ambazip! Inini urumelenğö silesile ambazip aketka lömböt qakñine öngöza-wağgöra mönö wöziköba Yei! jizal. Inini kunön Juda ambazip kun akñapköra kapañ köla köwetñi köwetñi*

* **23:5:** Mat 6.1; Jan 15.38; Dut 6.8 * **23:5:** Baiböl memori wös irimunğani mi (Dut 6.8) koropeñ me jenjen ewö jöhömalget. Malukuñinağgö suñe aködamungö biretni mötnön memba möndömalgeri, mi Anutugö ambazip öl töhöñni akeranğö aiwesökñi ahök. * **23:11:** Mat 20.26-27; Mak 9.35; 10.43-44; Luk 22.26

* **23:12:** Luk 14.11; 18.14

kutuba gölmenji gölmenji lilikömakze. Mewö aketka kunñan Juda nenjö ahakmemenöñ qekötahömawi, i mönö kusum sohom wañgigetka könöp siagö buñaya kun akña. Nanñini ewö qahöpmö, indimñi yahöt nanñini enjöñgita böliqölima.

16 “Jeninan gömöliiga ambazip böröñine memba enjuañgirakzei, lömböt enjö qakñine öngözawañgöra mönö wölziköba Yei! jizal. Inini keu kewö jimakze, ‘Kunñan jöwöwöl jikegö qetñe keuñi jöjöpañ keunöñ jim köhöima ewö, mianñon qahö köhöimapmö, kunñan jöwöwöl jikegö yuai goulñonñ memenji mianñon qetñe jöjöpañ keuñi jima ewö, jöjöpañ keu mianñon mönö jöhöm wañgima.’

17 “O jegömöl ambazip mötkutukutuñini piromñi! Yuai goulñonñ memenji aka jöwöwöl jike yahöt mietkörenjök wani yuainöñ öngöñgöñi akza? Goulñonñ nanñak kömbukñi qahö akzäpmö, jöwöwöl jikenöñ algetka mianñon mönö mi mem kömbuhiza.

18 “Keu kun kewö jimakze, ‘Kunñan altagö qetñi qeta keuñi jöjöpañ keunöñ jim köhöima ewö, mianñon qahö köhöimapmö, kunñan naluk kötin altanöñ ahözawi, mianñon qetñi qeta jöjöpañ keuñi jima ewö, jöjöpañ keu mianñon mönö jöhöm wañgima.’

19 “O jegömöl ambazip! Naluk kötin aka alta mietkörenjök wani yuainöñ öngöñgöñi akza? Nalukñonñ nanñak eretñi akzäpmö, altanöñ algetka mianñon mönö naluk mem kömbuhiza. 20 Mianñon kunñan altagö qetñe keuñi jöjöpañ keunöñ jim köhöimawi, yañon alta aka yuai pakpak altanöñ ahözawi, mönö mianñon qetñe keuñi jim köhöima.

21 “Kunñan jöwöwöl jikegö qetñe keuñi jöjöpañ keunöñ jim köhöimawi, yañon mönö jike mianñon aka mianñonren mal köhöizawañgö qetñe keuñi jim köhöima. 22 *Mewöyök kunñan Suepkö qetñe keuñi jöjöpañ keunöñ jim köhöimawi, yañon Anutugö jakömbuak dum aka mianñonren tatzawañgö qetñe keuñi jim köhöima.

23 * “O Köna keugö böhi aka mianñon kapañkölköl ambazip! Inini urumelenjö silesile ambazip aketka lömböt qakñine öngözawañgöra mönö wölziköba Yei! jizal. Inini nene pakpak mendenña bahöñi 10 mianñonrenjök mohot Anutugö buñaya qemakze. Gipñi, raki aka kiap kösö köt mi mewöyök mendenña tenöhök mohot mi Anutugö buña qemakze. Naluk mi törörök alakzemö, Köna keugö kötni bohonñi ki mönö onñgita mosörakze: Gi ambazip sutñine ahakmeme diñdiñi wuatañgöba ak kömum anñguba keu pöndañ wuatañgöba malman. Keu bohonñi mi mönö kapañ köla wuatañgöba malme aka keu morömorö mi mewöyök kude onñgita mosötme. 24 Jeninan

* 23:22: Ais 66.1; Mat 5.34

* 23:23: Lew 27.30

gömöliiga ambazip böröñine memba enḡuanḡirakzei, inḡini söp obuk nembepuköra onḡini saianonḡ kewörakzemö, sömbup ketanḡi kamel mi laḡ gwahörakze. ²⁵ O Köna keugö böhi aka mianḡö kapanḡölköl ambazip! Inḡini urumelenḡö silesile ambazip aketka lömböt qakḡine öḡgözawaḡöra mönö wöziköba Yei! jizal. Inḡini amöt qem anḡubingöra qambi aka al nenegö silenḡi saḡonḡ yakömakzemö, dogo jimamonḡini qahö galöm köla yuai laḡ göröngöba membagun megetka nepaqepalok mianḡon uruḡini kokolak qei malje.

²⁶ “O jegömöl azi Köna keugöra kapanḡ kölakzani, gi mönö mutuk qambigö uruḡi saḡonḡonḡa silenḡan mewöyök sarakḡi akḡa. ²⁷* O Köna keugö böhi aka mianḡö kapanḡölköl ambazip! Inḡini urumelenḡö silesile ambazip aketka lömböt qakḡine öḡgöza-waḡöra mönö wöziköba Yei! jizal. Inḡini qaksirigö maripomḡi saḡonḡetka tuatḡi akeak, mönö mianḡö dop akze. Silenḡinan eksihimḡinambuk tandök akzemö, qaksirigö uruḡe qamöt sihit aka yuai imbilonḡonḡambuk mianḡon kokolak qei ahöza.

²⁸ “Mianḡö dop enḡon mewöyök ambazip jeḡine ölna diḡdiḡi tandök asuhumakzemö, urumelenḡö silesile tandök aka qewölonḡonḡ mönö uruḡini kokolak qei malje.”

Bölöñi memenḡö likeḡi

Luk 11.47-51

²⁹ “O Köna keugö böhi aka mianḡö kapanḡölköl ambazip! Inḡini urumelenḡö silesile ambazip aketka lömböt qakḡine öḡgöza-waḡöra mönö wöziköba Yei! jizal. Inḡini kezapqetok ambazip yeḡö qaksirinonḡ simen koum memakze aka ambazip solanḡi yeḡö köt köteḡini meḡölömakze. ³⁰ Mewö aka kewö jimakze, ‘Neḡon ambösakonini yeḡö nalönonḡ malbinak ewö, mönö yembuk qahö toroqeinga kezapqetok ambazip yeḡö seḡinan mönö neḡö qakḡine qahö öḡgöbawak.’

³¹ “Mewö jiba mianḡon nanḡinak kezapqetok ambazip enḡugeri, yeḡö isiurupḡina akzei, mönö keu mi nanḡöba jiba dangunu ewö kinje. ³² Mianḡöra ambösakonḡinan siḡisöndok könahiba akeri, mianḡö dop inḡini mönö toroqeba körek ak teköme.

³³* “O soramen, inḡini mönö qatö moronḡi ewö akze. Anu-tunonḡ keuḡini jim teköi könöp sianonḡ gebepuköra mönö denöwö unjuratpeak? Mi mönö osime. ³⁴ Mianḡöra mötket, nönḡon kezapqetok aka mötkutukutu ambazip aka Köna keugö böhi melaim enḡibi enḡöreḡ kame. Kagetka yeḡöreḡök tosatḡi i enḡuget kömume aka tosatḡi maripom qakḡe al enḡime. Tosatḡi köuluk miriḡine örörahöm enḡiba keuḡini jim

* **23:27:** Apo 23.3 * **23:33:** Mat 3.7; 12.34; Luk 3.7

teköba ihileknöj tauköm engiba közöl engigetka taonni taonni mianğoreñ anakne.

35 **“Azi solanni Abelgö sepñan eriga mianğoreñök könahiba enguba kota mala Zekaraia jöwöwöl jike kömbukni aka jöwöwöl alta mietkö sutjire qeget sepni eri mianğoreñ teköyök. Ambazip solanni yengö sepñini gölmenöj mokomalgeri, sep pakpak mianğö kitipñan mönö engö qakñine öngöma. 36 Nöñön keu ölni kun kewö jibi mötme: Sepñinanğö kitipni pakpak mi mönö ambazip merak maljei, engö qakñine öngöi Anutunöj likepni melenj engii mötme.”*

Jisösnöj Jerusalem könagesö jöpaköm engiyök.

Luk 13.34-35

37 Jisösnöj jiyök, “O Jerusalem Jerusalem, injini kezapqetok ambazip enguget kömugetka Anutunöj ambazip melaim engii engörej kamakzei, mi kötnöj kumbuköm engimakze. Poi namñan moröurupni ginginji bapne ala köjöjohom engimakzawi, nöñön mönö mianğö dop nalöni nalöni göhö könagesöurupki kötala tokom engimangö möta malalmö, injini mi tököba mala kotket. 38 *Mötket, Anutunöj mönö jike mirinini andö qeiga sahopñanök ahöma.

39 **“Mewö ahömapmö, nöñön kewö jibi mötket, injini ni kumbuk qahö nekne. Könanğep nalö kun kam kuñgui mianğoreñ neka kewö jime, ‘Kembugö qetne kam neñgizawi, Anutunöj mönö i kötuetköm wanğima.’ Mewö.”*

24

Jöwöwöl jikenöj köndenmönderj asuhuma.

Mak 13.1-2; Luk 21.5-6

1 Jisösnöj jöwöwöl jike mosöta eriga gwarekurupñan yanğoreñ kaba jöwöwöl jikegö tohoñ uruñe miri tatkeri, mi Jisös kondel wanğiget. 2 Kondel wanğigetka melenđa kewö jii mötket, “Miri pakpak mi ölop engekzemö, nöñön keu ölna kewö jibi mötket: Mi mönö köndengetka mirigö köt kun mi köt kungö qakne qahö ahömapmö, qeqelanlanj aka sahopñanök ahöma.” Mewö.

Kahasililij aka sesewerowero asuhuma.

Mak 13.3-13; Luk 21.7-19

3 Jisösnöj Oil ip kundunje anda tariga gwarekurupñan nanñinöhök yanğoreñ kaba kewö qesim wanğiget, “Böhi, keu jizani, mianğö ölni mönö wanat nalönöj asuhum tinğitma aka göñön kanönga gölmegö nalöñan tekömangö akñawi, mianğö aiwesökñan mönö denöwö asuhum? Mia ölop jinöj mörin!”

* 23:35: Jen 4.8; 2 Hist 24.20-21

* 23:38: Jer 22.5

* 23:39: Sum 118.26

⁴ Mewö qesim wanğigetka melenđa kewö jiyök: “Kunñan isimkakalek aiga janjuñ anbeputkora mönö galömnini memba malme. ⁵ ‘Ambazip gwötpukñan asuhuba nöngö qetne kewö jime, ‘Nöñön Amötqeçe Tonji Kraist akzal’. Mewö jiba ambazip gwötpuk tilipköm engime. ⁶ İnini yarö miengö buzupñini aka ötöñini asuhugetka mörakñe. Mi möta jönömnini undubapukora mönö galömnini meme. Yuai mewöñi mi mutuhök asuhumapkö jijija. Mi asuhumapmö, gölmegö nalöñan mönö miangörenök zilañ qahö teköma.

⁷ “Kantri kunñan kantri kun engubingöra wahötme. Ambazip kambu kunñan kambu kun yembuk aröñ angubingöra wahötme. Gölmeñi gölmeñi miangören bödiñi bödiñi (buöröñi buöröñi) asuhume aka kenöñ ketañi ketañi mi qözöla memba gölme melenñi gemakña. ⁸ Yuai pakpak mi ambi köröbuknöñ masi könahiba engumakzawanğö dop. Gölmegö nalöñan mönö miangö dop könahiba tekömamğö akña.

⁹ * “Mewö akñapmö, nalö miangören tosatñan inini uruñini melenğerağöra aka gawman yeğö böröñine al engigetka sihimbölo ak engiba enguget kömume. Kantri pakpak yeñön nöngöra aka kazik ak engimakñe. ¹⁰ Nalö miangören gwötpukñan mötnaripñini mosöta angöñañ memba kazik ak angume. ¹¹ Kezapqetok ambazip takapulakañi gwötpukñan asuhuba ambazip gwötpuk kilik-kaluk ak engigetka janjuñ anakñe.

¹² “Iwilele Tonjan sehiba ambazip galöm köl engimawanğöra aka urumelen ambazip sehisehijni yeğö uruñinan amöriiga urukalemñinan söroauma. ¹³ * Kunñan kapan köla köhöiba böñ qeba kinda maliga gölmegö nalöñan tekömawi, yanön mönö oyaenköyaen buña qem anguma. ¹⁴ Anutugö bemtohoñangö Ölöwak Buña ki mönö mutuk gölmegö kantrini kantrini pakpak miangören jim sehigetka könagesö dop nanğöñangö keuñi mötketkun gölmegö nalöñan miangö andöñe teköma.” Mewö

Jerusalem sitigö köndenmönder uru-önönjambuk

Mak 13.14-23; Luk 21.20-24

¹⁵ * “Kezapqetok azi Danielnöñ köndenmönder uru-önönjambukö keuñi jii ahöza. Keu miangö dop tosatñan kaba köndenmönder aka yuai angöjörakñambuk mi jöwöwöl jike töröñe alget kiniga ekñei, - keu ki oyoñmawanön mönö ölop kezap ala möt kutuma- ¹⁶ nalö miangören Judia prowinsnöñ malmei, enön mönö misingöba öröba kundunje anme. ¹⁷ * Miri kösutñe sombemnöñ malmawanön mönö eta gösö yuaini memamğöra miri urunje kude öngöma. ¹⁸ Nupnöñ

* 24:9: Mat 10.22 * 24:13: Mat 10.22 * 24:15: Dan 9.27; 11.31; 12.11

* 24:17: Luk 17.31

anda malmawanön mönö mewöyök malukuñi memamgöra lilingöba mirinöñ kude anma.

19 “Yei! Ambi gölömbuk aka morö juzunöñ yeñön nalö miangöreñ denöwö ösumñinan anbeak? 20 Miangöra yuai mi kie uru me Sabat kendongö nalöñe kude asuhumapköra köuluköme.

21 **“Mi kewögöra: Nalö miangöreñ kahasililij keta bölökñi asuhuma. Kahasililij dopñi mewöñi mi mönöwök nalö kungen kude asuhuba ahöyök. Anutunöñ yuai pakpak miwikñaiyöhi, nalö miangöreñök könahiba nalö kiangöreñ mala kota nalö sutñe kun kude asuhuyök. Mönöwök qahö asuhuyök aka könangep nalö kunöñ kunbuk qahö ahuma. Miangöra mönö köuluköba malme. 22 Kembunöñ wahöjalij nalö mi qahö mem töribawak ewö, ambazip körekñan mönö ayuhum teköbeakmö, ambazip nanñangöra möwölöhöm engiyöhi, yeñgöra aka wehön miengö qötöñjini mem törima.*

23 *“Nalö miangöreñ kewö jime, ‘Mötket! Kraistnöñ ki malja,’ me ‘Eket! Amötqege Toñan endu kinja.’ Kunñan mewö jima ewö, mi mönö kude möt narime. 24 Mi kewögöra: Amötqege tonji munenji aka kezapqetok ambazip takapulakanji asuhuba angöletot aka aiwesök ketanji ketanji megetka letotme. Mewö letotketka Anutunöñ ambazip nanñangöra möwölöhöm engiyöhi, i mewöyök enjololon mem engimegö esapköba kapanj kölgetka janjuñ akepuk. Enñön ölpñanök galömñjini memba malgetka mi osibeak. 25 Mötket! Nöñön yuai pakpak mi qahö asuhuiga qeljine lök jibi mötze.”*

Suep gölmegö azi öññan mönö asuhum tinñitma.

Mak 13.24-27; Luk 21.25-28

26 **“Miangöra ‘Amötqege Toñan mönö gölme apopamkölkölñe malja,’ mewö jiget mötme ewö, miangöreñ mönö kude anme. Me ‘Mötket! Kraistnöñ mönö miri miangö uruñe asuhuba tatzawi,’ mewö jiget möta mi kude möt narime. 27 Mi kewögöra: Suep gölmegö azi öññan kunbuk kamawi, nalö mi mönö wölbilikö dop kewö akña: Mi wehön kotkotñeyök zilañ biliksik ala likepñe wehön gegenje dop köla asariba ani ekzini, yanñön mönö miangö dop asuhuma.*

28 **“Sömbup gisakñan kungen ahöiga, manu köraraknöñ miangöreñ öröba tokomakzei, miangö dop asuhuma.” Mewö*

Suep gölmegö azi öññan asuhuma.

Mak 13.24-27; Luk 21.25-28

29 **“Wahöjalij nalö mianñön teköiga miangöreñök wehön jeñan inñan köliga köiññöñ ömuñ kölma. Senjelau yeñön*

* 24:21: Dan 12.1; Ind 7.14 * 24:26: Luk 17.23-24 * 24:28: Luk 17.37

* 24:29: Ais 13.10; 34.4; Eze 32.7; Joel 2.10, 31; 3.15; Ind 6.12-13

suepnöhök teköba etme aka suepnöñ uturuköiga miangö öröyuaini mi tatatñini mosöta enololon aketka sohoma.

³⁰ *Nalö miangörenj Suep gölme azi ölnangö aiwesökñan suepnöñ asuhuiga ekñe. Nalö miangörenj gölmegö könagesö pakpak yeñon jinñeñ köla sahötme. Sahöta Suep gölmegö azi ölni yeñon suepkö kousu qakñe kanñori ekñe. Kukösumñi ketanjan saköl-diñdiñambuk aukñe asuhuiga asakmararanj ekñe.

³¹ Kanñori eketka tömunñi qainñi kun ugetka ötöñi köhöikñi mötketka Suep garataurupñi melaim enñiiga yeñon ambazip Anutunöñ nanñangöra möwölöhöm enñiyöhi, i gölme göranj likeplikep euke emuke miangörenjök kölolohoba enñuanñitme.” Mewö

Geröp ipkö dopkeu

Mak 13.28-31; Luk 21.29-33

³² “Inñi geröp ip eka tandökñi mötmöriba dopkeu ki mötme. Böröñan lök onambuk aiga sinñini yeñgoigetka mi eka möta kewö jimakze, ‘Wehön nalöñan mönö dopdowiza.’ ³³ Enñon mewöñanök aiwesök miangö dop asuhuiga eka möt asariba könanj kewö jime, ‘Jisösnöñ mönö nanñunöñ dopdowiza.’

³⁴ “Nöñon keu ölni kun kewö jibi mötket: Ambazip ki merak gölmenöñ maljei, yeñon qahö kömugetka yuai pakpak jizali, mi mönö yeñgö malmal nalöñine asuhuma. ³⁵ Suep gölmenöñ ayapkömahotmö, nöñgö Buña keunan mönö nalö kunöñ qahö ayapköma.” Mewö.

Jisös kamawangö nalöñi mi kunñan qahö mötza.

Mak 13.32-37; Luk 17.26-30, 34-36

³⁶ “Suep gölmegö azi ölnan kamapmö, dawinöñ kam kunñumawi, miangö wehönñi me aua nalöñi mi kunñan kun kude mötza. Suep garatanöñ mi qahö mötze. Anutugö Nahönñan mewöyök mi qahö mötza. Iwinöñ nanñök mi mötza. ³⁷ *Mönöwök Noagö nalöñe ambazipnöñ malmalñini qemasolokep qakñe mala ayuhugeri, miangö dop mönö Suep gölmegö azi ölnan kunbuk kamawangö nalöñe asuhuma.

³⁸ “O göulu ketanjan qahö kaiga qelñine miangörenj ambazip nene lömbuanj ala o köhöikñi nempa ambi kenam bohonñangö alget anda kaiga anñomeget. Ahakmeme mewö aka mempa qemasolokep malgetka Noanöñ wanñe urunñe öñgöyöhi, silim miangörenj teköyök. ³⁹ *Teköiga wanat yuai asuhumawi, mi qahö mötketka o göulu ketanjan kaba jinonñi qahö ayuhum enñiyök. Könanñep Suep gölmegö azi ölnan kunbuk kamawi, nalö miangörenj ambazipnöñ mewöñanök qemasolokep aka mala ayuhume.

* **24:30:** Dan 7.13; Zek 12.10-14; Ind 1.7
7.6-24

* **24:37:** Jen 6.5-8

* **24:39:** Jen

⁴⁰ Nalö mianğörenj azi yahöt nupnönj malohotka yetkörenjök kun waŋgita kun mosötme. ⁴¹ Mewöñanök ambi yahöt tawen urasiba (bunahöba) tatmahori, yetkörenjök kun waŋgita kun mosötme.

⁴² “Kembunönj kamawaŋgö nalönji me auañi qahö mötzeañgöra mönö uruguliguli aka malme. ⁴³ *Gwölö malbingö keu ki mönö möt kutume: Sunğem aiga kegwek-kahasiliñ azinönj wani nalönönj me auanönj kamawi, miri toñan mi mötpawak ewö, yañön mönö gwölö mala miriñi ölöpñanök galöm meiga qesiñda öngömamgö osima. ⁴⁴ Injini ‘Suep gölmegö azi ölnjan nalö kianğörenj qahö kaŋgotma,’ jiba mötmörigetka yañön mönö nalö mianğörenjök kaŋgotma.” Mewö.

Nup azinönj silekmalek mala ayuhuyök.

Luk 12.41-48

⁴⁵ “Mewö aiga nup meme ambazip sutñine dañön tiñ kutuba tosatñi enğonğitza? Tosatñan sörörauba nup mosötketka kunñan mötkutukutu ölöpñañgö qakñe kapan köla pöndañ memakzawi, yañön mönö simbawon akza. Miri toñan ahak-memeni kewöta eka kungen anda miriñañgö öröyuainji mi böröñe ali galöm akña. Galöm aka welenqeçeurupñi jiyöhanğö dop köyan köla nalö diñdiñe gumohom enğimakña. ⁴⁶ Mewö köyan köl enğiba maliga toñan lilingöba kaba mewö eka mönö simbawon jima.

⁴⁷ “Nöñön keu ölnji kun kewö jibi mötket: Toñan simbawon jiba sukinapñi pakpakö galömnji kuŋgum waŋgima. ⁴⁸ Kuŋgum waŋgimapmö, nup meme okonñi yañön uruñan mötmöriba kewö jima ewö, ‘Kembunañgö kaka nalöñan mönö köröpñi ahöza.’ ⁴⁹ Mewö jiba könahiba nup meme ambazipurupñi enğum ureiba közölömbuanj ala söñgaiba o köhöikñi nempa uruñi sohoiga enololonj silekmalek aka malma.

⁵⁰ “Mewö mala nalö kunönj kembuñi kaŋgotmapköra qahö mambötmawi, mönö mianğörenj kaŋgotma. Nalögöra ikmaok injululuñ mali mönö aua mianğörenj kaŋgota ⁵¹ qeba yay-japalelenj mem waŋgiba jim kutuiga urumelengö silesile ambazip ewö könöp sianönj geba sihimbölö mötma. Mewö möta sahöt gigilahöba irimñini yöhözömgögetka qetñi qeri malme.” Mewö.

25

Ambi seram tengö söpsöp keu

¹ *Jisösnönj jiyök, “Kunbuk kamami, nalö mianğörenj Suepkö bemtohoñan kewö akña: Maren lömbuanj nalöñe ambi seram jömukñi tenñan ‘Azi buñabuk aitonğöbin,’ jiba kiwanjini memba

* 24:43: Luk 12.39-40 * 25:1: Luk 12.35

könanöŋ anget. ² Yeŋgöreŋök 5 mi mötkutukutuŋinambuk aketmö, tosatŋi 5 yeŋgö mötkutukutuŋini mi piromŋi. ³ Mötkutukutuŋini piromŋi yeŋön kiwaŋini megetmö, könöp (kuwiŋ) kelökŋi * qahö memba anget. ⁴ Mötkutukutuŋinambuk yeŋön kiwaŋini aka kuwiŋ kelök kirinŋini mewöyök memba anget. ⁵ Angetka azi buŋanöŋ zilaŋ qahö kaiga mambötketka nalö köriyöhaŋgöra körek yeŋgö jeŋini böŋböŋ meiga nöropŋini eri sipköba gaun ahöget.

⁶ “Gaun ahögetmö, sunjem bibiŋe kunöŋ tömun qeri qet kewö mötket, ‘Mötket, azi buŋa kazawo! Mönö yaŋgöreŋ anda aitoŋgöme.’ ⁷ Qet mi möta ambi seram ten mi körekŋan wahöta kiwaŋini memba möhaŋgöba ohotiriget. ⁸ Ohotirigetka mötkutu-kutuŋini piromŋi yeŋön mötmöt ambi yeŋgöreŋ kaba kewö jiget, ‘Neŋgö kiwaninan böközawaŋgöra eŋön mönö kuwiŋ kelökŋi tosatŋi neŋgime.’

⁹ “Mewö jigetka mötkutukutuŋinambuk yeŋön melenŋa kewö jiget, ‘Qahö. Mi inini aka nini dopnine qahö. Mianŋgöra mönö stuanöŋ anda nanŋini kuwiŋ kelökŋini söŋgöroŋi meme.’

¹⁰ “Mewö jigetmö, kuwiŋ kelökŋi bohonŋi memingöra anda könanöŋ malgetka azi buŋanöŋ mönö mianŋgöreŋök kaŋgorök. Ambi seram jöjöröba kingeri, yeŋön anda yambuk aitoŋgöba maren lömbuaŋ miri uruŋe öŋgögetka naŋguŋi kölget. ¹¹ *Ambi seram stuanöŋ angeri, yeŋön mewöyök könaŋgep kaŋgota naŋgu qeba kewö qetket, ‘Kembu Kembu, mönö naŋgu metal neŋginöŋ!’

¹² “Mewö qetketmö, kewö melenŋa jiyök, ‘Qahö. Ni inini qahö möt eŋgizal. Keu ölna mi jizal.’” ¹³ Jisösnöŋ söpsöp keu mewö jiba gwarekurupŋi yeŋgöra keu kewö jii mötket, “Inini ni kamamaŋgö nalöŋi me auaŋi kude mötzeanŋgöra mönö uruguliguli aka malme.” Mewö.

Moneŋ esu galöm kölgeraŋgö söpsöpkeu.

Luk 19.11-27

¹⁴ * “Mönö dopkeu kianŋö dop asuhuma: Azi kun mirinŋi mosöta köröwen kantri kunŋan anmamgö möta welenqeŋeuprupŋi eŋgoholi kagetka moneŋ sukinapŋi galöm kölmegöra jim kutum eŋgiba böröŋine alök. ¹⁵ Nup memeni kewöta ölni dawik asuhumawaŋgö dop möta nup meme azi kungöra moneŋ esu 5 (Kina 5000,-) waŋgiba kun moneŋ esu yahöt (Kina 2000,-) waŋgiba kun mohok-kun (Kina 1000,-) waŋgiyök. Mewö galöm kölmegöra mendeŋ eŋgiba eŋgömosöta anök.

* **25:3:** Könöp (kuwiŋ, qiwiŋ) kelökŋi mi Oil ipkö kötŋi mözözamgögetka kelökŋi mi asuhuyök. Miri söŋauiga ip suŋe opo köpeiba kelök mianŋgöreŋ kundumgöba kiwa ohotiriba könanöŋ angetka 15 minitkö dop jeyök. * **25:11:** Luk 13.25 * **25:14:** Luk 19.11-27

16 “Azi Kina 5000,- meyöhanön miangörenök anda kölköl-örörö nup meiga monej sehiiga esu 5 kunbuk meyök. 17 Mewöjanök Kina 2000,- meyöhanön anda kölköl örörö nup meiga monej sehiiga esu yahöt kunbuk meyök.

18 “Mewö meyohotmö, azi monej esu mohok-kun (Kina 1000,-) meyöhanön mönö mosöta anda gölme esiba azi kembuñgö moneji löm köla asambörök. 19 Nalö köröpñi teköiga welenqege yengö azi kembuñinan lilingöba kaba ‘Nup megerangö kösohotñini möta kewötмам,’ jiba köl öröm enjiiga kaget.

20 “Mewö kagetka azi Kina 5000,- meyöhanön jeje kangota esu 5 kunbuk toroqeba memba kaba kewö jiyök, ‘Ketanjamni mötnöñ, göñön monej esu 5 niñginöñi, nöñön miangö kölköl öröröñi membi sehiiga esu 5 kunbuk asuhiiga memba kazal.’

21 “Mewö jiiga azi kembuñan kewö melenj wañgiyök, ‘Mi ölop. Gi nup meme azi ölopñi memburik-qemburiki qahö. Gi yuai awamñi memba mi kapankapan aka galöm köla malnönga sehiyök. Miangöra nöñön yuai gwötpuk göhö böröge albi miangö galömña malman. Ölop kaba azi kembugi nöngö miri uruje kangota mohotje sösöngai aka malbin.’ 22 Azi Kina 2000,- meyöhanön mewöjanök kangota kewö jiyök, ‘Ketanjamni mötnöñ, göñön monej esu yahöt niñginöñi, nöñön miangö kölköl-öröröñi membi sehiiga esu yahöt kunbuk asuhiiga memba kazal.’

23 “Mewö jiiga azi kembuñan kewö melenj wañgiyök, ‘Mi ölop. Gi nup meme azi ölopñi memburik-qemburiki qahö. Gi yuai awamdökñi memba mi kapankapan aka galöm köla malnönga sehiyök. Miangöra nöñön yuai gwötpuk göhö böröge albi miangö galömña malman. Ölop kaba azi kembugi nöngö miri uruje kangota mohotje sösöngai aka malbin.’

24 “Miangö andöñe azi monej esu mohok-kun (Kina 1000,-) meyöhanön kangota kewö jiyök, ‘Ketanjamni mötnöñ, nöñön könañangi kewö möt yaköyal: Azi kembunan mönö azi köhöikñi könöpñambuk akza. Nangak nene kötni qahö qesin gilynönga miangören mönö töndup ölni sounöñ yandiba memangö mörakzan. Padi kötni qahö esinöñ geiga miangören mönö töndup ölni qezakömangö mörakzan.

25 “Mewö möt yaköba keñgötni möta anda göhö monej esugi mi gölmenöñ asambötpiga ahöyök. Eknöñ, monej esu niñginöñi, miyöhök mönö törörök ki.’ 26 Mewö jiba mi wañgiyökmö, azi kembuñan melenja kewö jim wañgiyök, ‘Gi injarere aka welenqege bölöñi akzan! Gi könañamni möt yakönöñ: Nanak nene kötni qahö qesin gilbiga miangören mönö töndup ölni sounöñ yandiba memangö mörakzal. Nanak padi kötni qahö esibi geiga miangören töndup ölni

qezakömamgö mörakzal. Nöngö tandökni mewö möt yaköbagun mönö wuanöngöra ak sohoba malnöj?

²⁷ “Gi nöngö monenji benknöj alnönga dop kölbawak. Benknöj alnönga qariiga lilingöba kayali, nalö kiangören mi ölop sunambuk membilenak.” ²⁸ Toroqeba tosatji yengöra jiyök, ‘Inini mönö qölzöm injarere azi miangö monen esunji mi wangita kun esu 10 miwikñaiyöhi, mönö i wangime.’

²⁹ *²⁹ “Dopkeu kiangö könaji kewö: Denike yengören yuai ahözawi, körek yengöra mönö toroqeba engiget sehiiga kelenmalelen ahöm engima. Mewö sehimapmö, kungören yuai kun qahö ahözawi, yangören yuai mi mönö mewöyök wangitketka öne töhöntöhön malma. ³⁰ *Ayop, welenqece azi omanji nupñangö ölnji qahö i mönö yaigepne gilgetka söñaupnöj gema. Miangören geba sahöt gigilahöba göbonjini yöhözömgögetka qetji qeri malme.” Mewö.

Jimtekötekögö nalö ketanje kewö asuhuma:

³¹ *³¹ “Suep gölmegö azi ölnjan kinda Suep garata pakpak enguangita mohotje kamei, nalö miangören Suepkö asakmararajan asuhuiga yanön Kin Kembugö jakömbuak dumnöj tatma. ³² Tata jiiga gölmegö ambazip kambu pakpak qezaköm engigetka yangö jeje asuhume. Asuhugetka lama galömnjan lamaurupni meme (nonin) yengörenök mendenj engizawi, miangö dop i mendeqendenj ak engima. ³³ Mi ak engiba jiiga lama mi böröni ölnje aka meme (nonin) mi qaninje al engime.

³⁴ “Mewö al engigetka Kin Kembunöj böröni ölnje kinmei, yengöra kewö jima, ‘Nöngö Iwinan kötuetköm engii malgeri, injini mönö kaget. Iwi Anutuninan gölme pakpak miwikñaim engiyöhi, nalö miangörenök lök engöra bemtohon mözözömgöba mei jöjöröba ahöba kotzawi, injini mönö kaba mi buja qem anguba malme.

³⁵ “Mi kewögöra jizal: Nöjön yakanangö kömumba malbiga injini nene ningiba malget. Nöjön ogöra qemjen qeba malbiga injini o ningiba malget. Nöjön kian aka malbiga injini köl öröm ningigetka mirinje öngöba malal. ³⁶ Nöjön sile esunangöra osiba malbiga injini opo kerenj ningiba malget. Nöjön kawöl nöhöi ahöbiga injini galöm köl ningiba malget. Nöjön kösö mire malbiga injini ni nekingöra miangören kaba malget.’

³⁷ “Mewö jiiga ambazip solanji yanön kewö melenj wangiba jime, ‘Kembu, gi mönö wani nalönöj yakagahö kömunöj geke gumohom gihiba malin? Mönö wani nalönöj ogöra qemjen qeba malnönga geke o gihiba malin? ³⁸ Mönö wani nalönöj kiana kanönga geke köl öröm gihiinga mirinine öngönönga

* 25:29: Mat 13.12; Mak 4.25; Luk 8.18 * 25:30: Mat 8.12; 22.13; Luk 13.28

* 25:31: Mat 16.27; 19.28

malin? Mönö wani nalönöŋ sile esugahöra osiba malnönŋa geke opo kereŋ gihiba malin?

³⁹ ‘Mönö wani nalönöŋ kawöl göhöi ahönönŋa geke me kösö mire malnönŋa möta gi gekingöra göhöreŋ kaba malin?’
⁴⁰ Mewö jigetka Kiŋ Kembunöŋ melenŋa kewö jii mötme, ‘Nönön keu ölni kun kewö jibi mötme: Inini nani urumelenŋ alaurupni etqeŋeŋi kienŋöreŋök kungöra yuai kun akeri, mi pakpak mönö ni ak niŋgiba malget.’

⁴¹ ‘Mewö jiba mianŋö andöŋe böröŋi qaniŋe kinmei, yeŋgöreŋ melenŋa kewö jima, ‘Iwinan qesuahöm enŋii malgeri, inini mönö nömosöta kesalget. Könöp sia teteköŋi qahö jem öŋgömawi, mönö mianŋöreŋ anda geme. Anutunöŋ mi Bölöŋaŋgö Toŋi aka yaŋgö garataurupni yeŋgöra mözözömgöba meköiga jöjöröba ahöza. ⁴² Mi kewögöra jizal: Nönön yakananŋö kömumba malbiga inini nene qahö niŋgiba malget. Nönön ogöra qemjeŋ qeba malbiga inini o qahö niŋgiba malget.’

⁴³ ‘Nönön kian aka kabiga inini qahö köl öröm niŋgigetka miriŋine qahö öŋgöba malal. Nönön sile esunanŋöra osiba malbiga inini opo kereŋ qahö niŋgiba malget. Nönön kawöl nöhöi ahöyal aka kösö mire malalmö, inini ni nekingöra mianŋöreŋ qahö kaba malget.’

⁴⁴ ‘Mewö jiiga yeŋön mewöyök melenŋ waŋgiba kewö jime, ‘Kembu, gi mönö wani nalönöŋ yakagahö kömunöŋ me ogöra qemjeŋ qeba malnönŋ me kiana malnönŋ me sile esugahöra osiba malnönŋ me kawöl göhöi ahönöŋ me kösö mire malnönŋa nini gi qahö welen qem gihiba malin?’

⁴⁵ ‘Mewö jigetka melenŋa kewö jii mötme, ‘Nönön keu ölni kewö jibi mötme: Inini urumelenŋ alaurup etqeŋeŋi kienŋöreŋök kungöra yuai kun qahö akeri, mi pakpak mönö ni qahö ak niŋgiba malget akza.’

⁴⁶ *‘Mewö jii mötketka likepni melenŋ enŋii qakŋine öŋgöiga aköm enŋii anda sihimbölö nalö teteköŋi qahö möta mal öŋgöme. Mewö mal öŋgömemö, solanŋi yeŋön oyaenŋkoyaenŋ malmal mi nalö teteköŋi qahö mal öŋgöba malme.’ Mewö.

26

Jisös qein kömumapkö anŋönaŋ alget.

Mak 14.1-2; Luk 22.1-2; Jon 11.45-53

¹ Jisösnöŋ keu pakpak mi jim teköba gwarekurupni kewö jii mötket, ² *‘Silim yahöt teköigun Pasowa kendonŋi kam kuŋguma. * Inini mi ölöp mötze. Kam kuŋguiga Suep gölmegö

* 25:46: Dan 12.2 * 26:2: Eks 12.1-27 * 26:2: Pasowa mi nanine keunöŋ Ak-kömukömu kendon. Keu mianŋö könaŋi: nenŋehoriba nenŋonŋirök. Eksodus 12.15

azi ölni mi kian gawman yengö böröjine algetka maripomnöŋ qegetka kömuma.”

³ Nalö mianğörej jike nup galöm aka kantrigö jitnememe yeŋön tokoba jike nup galöm bohonŋi qetŋi Kaiafas yaŋgö jakömbuak miriŋe tatket. ⁴ Mianğörej tata denöwö möndöŋninga Jisös ölöŋ memba qeget kömumbawak, mianğö könaŋi jaruba kewötket. ⁵ Jaruba kewöta kewö jiget, “Ambazip irimŋini seholiiga karimŋi karimŋi asuhubepuköra mi sösoŋgai kendon nalöŋe akingö osibin.” Mewö.

Ambi kunöŋ Jisös o umköhöwakŋambuknöŋ miriyök.

Mak 14.3-9; Jon 12.1-8

⁶ Jisösnöŋ Betani mirinöŋ mala Saimon kun uzikukuŋi mem solaniyöhi, yaŋgö mire öngöba tarök. ⁷ *Mianğörej nene memba tariga ambi kunöŋ köt-kirin kun memba yaŋgörej kayök. Kirin mi nöluk tuat-tuat qetŋi alabastö mianön memena. Mia o umköhöwakŋambuk mianön kokolak qeŋeŋa. Yaŋön mi bohonŋi ketaŋan memba kaba oŋi Jisösgö nöropŋe mimbiliba miriyök.

⁸ Miriiga gwarekurupŋan mi eka urubölö aka kewö jiget, “Mi mönö wuanöŋgöra mewö ayuhuzawi? ⁹ O kelökŋambuk mi bohonŋi memegöra ali moneŋ öngöŋgöŋan asuhuiga mi ambazip wanapŋi enjiiga dop kölbawak.”

¹⁰ Jisösnöŋ urumötmötŋini mi ek kutuba kewö jii mötket, “Ambi kianğö uruŋi mi wuanöŋgöra mem bölize? Yaŋön silik ölöŋŋi ak soroköm niŋgiiga dop kölja. ¹¹ *Ambazip wanapŋi mi nalöŋi nalöŋi sutŋine malmemö, nöŋön enğö sutŋine nalö dop qahö malmam.

¹² “Nöŋön kömumbi löm köl niŋgimeanğöra aka kelök mianön sileni nömiriza. ¹³ Nöŋön keu ölni kun kewö jibi mötket: Ölöwak Buŋa ki kantri igen waigen jim sehigetka anmawi, mianğörej ambi kianön yuai ak niŋgizawi, mianğö buŋaŋi mohok jiget sehiiga yaŋgöra mötmöriba malme.” Mewö.

Judasnöŋ Jisös mamalolo mem waŋgimamgö urumohot ahök.

Mak 14.10-11; Luk 22.3-6

¹⁴ Nalö mianğörej gwarekurupŋi 12 yengörejök kun qetŋi Judas Iskariot yaŋön jike nup galöm yengörej anda ¹⁵ *kewö qesim enjiyök, “Nöŋön Jisös mamalolo mem waŋgiba böröjine albiga enön töwa wania niŋgibeak?” Qesim enjiiga silwö moneŋ kötŋi 30 oyoŋda böröŋe alget. ¹⁶ Aua mianğörejök könahiba Jisös nalö kungen mamalolo mem waŋgimamgö köna möt jaruba köiŋbiŋgöba malök. Mewö.

* 26:7: Luk 7.37-38 * 26:11: Dut 15.11 * 26:15: Zek 11.12

Jisösnöñ gwarek yembuk Pasowa lama neget.

Mak 14.12-21; Luk 22.7-13, 21-23; Jon 13.21-30

17 Beret yistñi qahö miangö kendon silim mutukñe (Seqononöñ) gwarek yetköñ Jisösgöreñ kaba kewö qesim wañgiyohot, “Böhi! Nini miri denikeañgöreñ anda pasowa lama mözözömgöm gihiziga neman? Sihimgi denöwö ahöza?”

18 Qesim wañgiyohotka kewö melenök, “Injiri Jerusalem sitinöñ öngöba azi kun mötzali, i miwikñaiba kewö jiyohotka mötma, ‘Böhinöñ jiza: Nöngö nalönan mönö † dopdowiza. Nöñön göhö mire kaba gwarekurupni yembuk Pasowa lama membin.’ ” 19 Gwarek yetköñ Jisösnöñ jim kutum etkiyöhi, miangö dop aka Pasowa lama mözözömgöyohot.

20 Mare aiga miri söñauiga Jisösnöñ gwarekurupni 12 yembuk miri miangöreñ kañgota öngöba dum kösutñe tata nene mendeña neget. 21 Nene negerañgöreñ Jisösnöñ kewö jii mötket, “Nöñön keu ölni kun kewö jibi mötket: Engöreñök kunñan mönö mamalolo mem niñgima.” 22 Mewö jii möta miangöreñök uruñinan wösöbirik ketañi aiga könahiba nannök nannök qesim wañgiba jiget, “Kembu, mönö nöngöra jibanbuk?”

23 *Qesim wañgigetka kewö melenök, “Nömbuk beret kulñnöñ kundungözawi, mönö yañön. 24 Suep gölmegö azi ölnan mönö yañgöra keu ohoget ahözawañgö dop ölna gölme mosöta anmapmö, kunñan i mamalolo mem wañgimawi, yañgöra mönö Yei! jiba sahötzal. Miangö likepñi kanjamñambukñöñ mönö yañgö qakñe öngöma. Azi mi nam köro uruñeyök qahö asuhubawak, miañön mönö amqem wañgibawak.” Mewö.

25 Mewö jiiga Judas mamalolo mem wañgimawañön kewö melenöda jiyök, “Böhi, mi mönö nöngöra jibanbuk?” Jisösnöñ kewö jii mörök, “Jizani, mönö mewö!” Mewö.

Kembubuk semön qöndökñi neget.

Mak 14.22-26; Luk 22.14-20; 1 Kor 11.23-25

26 Nene nembra tata Jisösnöñ beret memba kötuatköba mindipköba engiba kewö jiyök, “Ki nani busuni. Ki memba neget.”

27 Mewö jiba wain qambi memba saiwap jiba engiba kewö jiyök, “Injini körek qambi kiangöreñök neget. 28 *Ki nani sepni. Mi Anutunöñ ambazip yembuk jöhöjöhö areñ aiga köhöimapköra sepni mokoget geiga ambazip gwötpuk yengö siñgisöndokñini mosötma. 29 Nöñön keu kun kewö jibi mötket: Nöñön wain kösögö ölni ki kiangöreñ kunbuk toroqeba qahö nemam. Könañgep Iwinañgö bemtohoñ uruñe eu taringa

† 26:18: Anutunöñ Jisös kömumawañgö nalöni alöhi, miangöra jiza.

* 26:23:

Sum 41.9 * 26:28: Eks 24.8; Jer 31.31-34

közölömbuan almawi, wehön mianğoreñ mönö wain o qainñi kun mia nemam.”

³⁰ Mewö jüga sösöngai liñet köla mosöta anda Oil ip kundunje öngöget.

Pitönöñ Jisös qañ kölmakö jii mörök.

Mak 14.27-31; Luk 22.31-34; Jon 13.36-38

³¹ *Öngöba Jisösnöñ kewö jii mötket, “Kezapqetok azi kunöñ keu kun kewö ohoi ahöza, ‘Nöñön galömñini qebiga lama kambunan deñme.’

Miangö dop eñön körek sunğem kianğoreñ uruñini nöngöra aka bölüiga nömosöta buratime. ³² *Buratigetka nuñgumemö, nöñön mönö kömupnöhök wahöta mutuk Galili prowinsnöñ anda mianğoreñ asuhum eñgiman.”

³³ Mewö jüga Pitönöñ melenđa kewö jii mörök, “Yeñön körek uruñini göhöra aka bölüiga gömosöta buratime ewö, nöñön mönö töndup nalö kunöñ qahö gömosötmam.” ³⁴ Jüga Jisösnöñ jii mörök, “Nöñön keu ölni kun kewö jibi mötnöñ: Kuruknöñ qahö qeriga göñön merak sunğem qañ köl niñginöñga indimñi karöbut akña.”

³⁵ Mewö jiyökmö, Pitönöñ kewö jii mörök, “Böhi! Mewö qahöpmö, ni nuñgugetka göbuk mohotñe kömumbirak, mi töndup nöñön gi qahö qañ köl gihimam.” Gwarek tosatñi pakpak mewöyök keu miyöhök jiget. Mewö.

Jisösnöñ Gezemaner arönöñ köuluköyök.

Mak 14.32-42; Luk 22.39-46

³⁶ Mewö eraum möta anda yembuk arö kun qetñi Gezemaner mianğoreñ anğotket. Anğota Jisösnöñ gwarekurupñi kewö jii mötket, “Nöñön endu anda köuluköbiga iñini ölop nalö sutñe ki nanñinök tatme.” ³⁷ Mewö jiba Pitö aka Zebedigö nahönyahötñi yahöt etkuangita angetka Jisösnöñ könahiba wösöbirik möriga köñjiliñan köna böröñi qeköyök. ³⁸ Nalö mianğoreñ kewö jii mötket, “Nöñgö urunan mönö kondum köla kotzawanğöra aka wösöbirik mötpiga kömukömuñi ak niñgiza. Iñini ölop kianğoreñ tata nömbuk guli malbin.”

³⁹ Mewö jiba nanñök borom kun toroqeba anda simin köla sipköba kewö köuluköba jiyök, “Iwini, gi yuai kun qahö mölölömbizan. Mianğöra sihimgi ahöza ewö, sihimbölogö qambiñi kianñön mönö nöñgö qakne öngöbapuköra noañgitman. Noañgitman me qahö, mi mönö nangi jit keugahö dop asuhuma. Mi nöñgö sihimgö dop qahö.”

⁴⁰ Mewö jiba liliñgöiga gwarekurupñi karöbut yeñön gaun ahöget eñgeka Pitögö kewö jii mörök, “Iñini aua mohotöp nömbuk guli malbingö kude köhöize me? ⁴¹ Uruninan

guli malbingö sihimñi mörakzinmö, sileninan lölöwöröñi akza. Mianğöra esapesapnöñ et engubapuköra mönö köuluköba guliguli malme.”

⁴² Mewö jii möriga kunbuk engömosöta anda indimñi yahöt aiga kewö köuluköba jiyök, “Iwini, sihimbölögö qambi kianjön qahö noñgitma ewö, mi ölop nemam-mö, mi mönö nangi jtkahö dop asuhuma.”

⁴³ Köuluköba lilingöiga jeñini böñböñ meyöhanğöra kunbuk gaunök ahöget engehök. ⁴⁴ Kunbuk engömosöta likep anda keu miyöhök kunbuk jiba köuluköiga indimñi karöbut ahök. ⁴⁵ Gwarek yeñğöreñ lilingöba kaba kewö jii mötket, “Injini toroqeba luhut memba gaunök ahöbingö mötze me? Mötket! Kunöñ Suep gölmegö azi ölni mamalolo mem wañgiiga bölöñi meme yeñğö böröñine öngöma. Mianğö aua nalöñan lök kam kuñguza. ⁴⁶ Mönö wahötketka anin! Mamalolo mem niñgimawi, yañön mönö dowe ki kaza.” Mewö.

Jisös qeraköba memba jöhöget.

Mak 14.43-50; Luk 22.47-53; Jon 18.3-12

⁴⁷ Jisösnöñ mewö jiba kiniga mianğöreñ gwarekurupñi 12 yeñğöreñök kun qetñi Judas yañön kambu ketañi kun jitñe mem enñgiiga kañgotket. Jike nup galöm aka kantrigö jitñememe yeñön i melaim enñigetka bingö sou ketañi aka lingipñini memba kaget. ⁴⁸ Mamalolo memamgö ahöhi, yañön mutuk yembuk aiwesök keu kewö jöhöba jii mötket, “Nöñön azi numbuñi yöhötüm nemami, yañön mönö mia akza. Mönö i memba jöhöme.”

⁴⁹ Mewö jiba kaba mianğöreñök Jisösgöreñ añağota “Böhi, böñjöñ!” jiba numbuñi yöhötüm neyök. ⁵⁰ Yöhötüm neiga Jisösnöñ kewö jii mörök, “Alani, gi wuanöñğöra kazani, mi mönö zilañ akñan.” Mewö jiiga azi kambu yeñön Jisösgöreñ kañağota qelanjiba memba jöhöget. ⁵¹ Jöhögetka Jisösbuk malgeri, yeñğöreñök kunñan böröñan bingö sou ketañi öröba jike nup galöm bohonnañğö welenqeqeñi qeba kezapñi köteköi erök.

⁵² Jisösnöñ mi eka kewö jii mörök, “Mönö mosötnöñ! Bingö sou ketañi körök memei, i mönö körek bingö sou ketañan enñui kömume. Mianğöra mönö sougi kupinñe qenöñ geyök! ⁵³ Nöñön Iwini köuluköbiga ölop bauköm niñgimawi, mi mötzan me qahö? Köuluköm wañgibileñahi, yañön mönö mianğöreñök garata yarö kambu † 12 oñgita melaim enñii kaba bauköm niñgibeak. ⁵⁴ Bauköm niñgibeak ewö, Buña Kimbigö keuñan

† 26:53: Rom yeñğöreñ lijön me yarö kambu kun mi yarö azi 6000 mianğö dop aka maljema. Mianğöra yarö kambu 12 miñğö jañğöñini mi Suep garata 72.000 mianğö dop.

mönö denöwö ölnambuk akawak? Buña Kimbi keugö dop yuai kianön mönö asuhumapkö dop jijiña akza.”

⁵⁵ *Nalö miangñörenök Jisösnöñ yarö kambu yeñgöra kewö jii mötket, “Ni kegwek-kahasiliñ azia qahöpmö, töndup nöngöra mewö möta bimgö sou ketanji aka lingip memba nömemba jöhöbingöra kangetze. Nöñön wehön dop jöwöwöl jikenöñ embuk tata kinda Buña keu kusum engiba malbiga qahö nömiget. ⁵⁶ Mewömö, yuai pakpak ki mönö kezapqetok ambazipnöñ keu ohogeri, mienön ölninambuk akñapaköra asuhuza.” Jisös jöhögetka gwarek yeñön körek Jisös mosöta buratiba unjurata anget. Mewö.

Jikegö jitñememe yeñön Jisösgö keu nup meget.

Mak 14.53-65; Luk 22.54-55, 63-71; Jon 18.13-14, 19-24

⁵⁷ Yarö azi Jisös memba jöhögeri, yeñön i wañgita jike nup galöm bohonñi qetñi Kaiafas yañgö mire anget. Angetka Köna keugö böhi aka kantrigö jitñememe yeñön miangören kaba tokoget. ⁵⁸ Angetka Pitönöñ sikepsikep enguatangöba miangören añgota jakömbuak mirigö kiripo uruñe öngöyök. Öngöba teteköñe denöwö asuhumawi, mi ekñamgöra welenqege azi yeñgö sutñine tarök.

⁵⁹ Mewö tarökmö, jike nup galöm aka jike kaunsöl kambu yeñön Jisösgö silenöñ alal keu denöwö möndöba nañgöinga qeget kömumapkö jim jaruget. ⁶⁰ Jaruba kinda gwötpukñan wahöta kinda keu munenji Jisösgö silenje ala nañgöba jigetmö, töndup könanji kun qahö miwikñaget. Qahö miwikñagetmö, teteköñe azi yahöt kangeta ⁶¹ *kewö jiyöhot, “Azi kianön kewö jiiga mörit, ‘Ni ölöp Anutugö jöwöwöl jikenji köndenbiga gölmenöñ eriga wehön karöbutkö uruñe mi kunbuk mem wahöta kuñgumam.’”

⁶² Mewö jiyohotka jike nup galöm bohonñan wahöta Jisös qesim wañgiba kewö jiyök, “Yeñön göhö silege keu ala nañgözei, miangö likepñi kun jiman me qahö?” ⁶³ Qesim wañgiiga Jisösnöñ yuai bölöñi kun qahö ahökmö, töndup keuñi bökö kinök. Keuñi bökö kiniga jike nup galöm bohonñan kewö jii mörök, “Nöñön Anutu malmal Tonangö qetñe kewö qesiba kuñgum gihizal: Gi Anutugö Nahönñi Kraist akzan me qahö, mi törörök jiba jöjöpañ keunöñ jim köhöinöñga mötpin.”

⁶⁴ *Mewö jiiga kewö jiyök, “Jizani, mönö mia. Miamö, nöñön körek engöra kewö jibi mötket: Nalö kewöñeyök könahiba Suep gölmegö azi ölnan mönö Kukösum Tonangö böröñi öñje tata suepkö kousu qakñe eri ekñe.”

* 26:55: Luk 19.47; 21.37 * 26:61: Jon 2.19 * 26:64: Dan 7.13

⁶⁵ *Keu mi jiiga jike nup galöm bohonnan malukuñi munju-rata kewö jiyök, “Yei, iwinanğö jitñi! Mönö Anutu me-paiköza. Tosatñan keuñi nanğömegöra kunbuk qahö qesim enğibin. Anutu mepaiközawi, mi dölki nanñinak möt teköze. ⁶⁶ Mianğöra denöwö mötmörize?” Mewö qesim enğiiga kewö jim teköget, “Yañön mönö kömupkö buñaya akña.”

⁶⁷ *Mewö jim teköba jeñe söutkölap söutköm miriba böröñinan misiba mesoholñe qekötahöget. Tosatñan nuñgulumñe qekötahöba ⁶⁸ kewö jiget, “Gi kezapqetok azi Kraist akzananğöra dañön guhuzawi, mönö yanğö qetñi qetnön mörin.” Mewö.

Pitönöñ Jisös qañ köläk.

Mak 14.66-72; Luk 22.56-62; Jon 18.15-18, 25-27

⁶⁹ Mewö asuhuiga Pitönöñ yaigep kiripo uruñe somben-nön tarök. Tari welenqege ambi kunñan yanğöreñ kaba kewö jiyök, “Gi mewöyök Galili azi Jisösbuk mohotñe malnön.” ⁷⁰ Mewö jiyökmö, körek yeñğö jeñine qañ köla kewö jiyök, “Keu jizani, mi köndatzal.” ⁷¹ Mewö jiba kiripo nanğunje geiga welenqege ambi kunñan i eka azi kösutñe kingeri, mi kewö jii mötket, “Azi kianñön mönö mewöyök Nazaret azi Jisösbuk malök.”

⁷² Mewö jiiga kunbuk qañ köla jöjöpauñ keunön jim köhöiba kewö jiyök, “Nönön azi mi qahö möt wanğizal.” ⁷³ Nalö borom kun teköiga azi kösutñe kingeri, yeñön Pitögöreñ kota kewö jiget mörök, “Alakña! Göñön mewöyök yeñğöreñök kun akzan! Galili keu jöl jizani, mianñön mönö mewöyök mi kondeliga mötzin.” ⁷⁴ Mi möta könahiba nanñi qesuahöm anguba jöjöpauñ keunön jim köhöiba jiyök, “Ni azi mi qahö möt wanğizal! Munen jibilenak ewö, Anutunön mönö likepñi meleş niñgima.” Mewö jiiga mianğöreñök kuruk qerök.

⁷⁵ Kuruk qeri möta Jisösnön keu kewö jii möröhi, mi mötmöriyök, “Göñön mutuk indimñi karöbut qañ kölä niñginönğa kuruknön qetma.” Keu mi mötmöröba wösöñi julmamğö aiga yaigep geba sahöt böliyök. Mewö.

27

Jisös wanğita Pailötkö böröñe alget.

Mak 15.1; Luk 23.1-2; Jon 18.28-32

¹ Miri gianğiga amandinje jike nup galöm pakpak aka kantrigö jitñe meme (70) yeñön tokoba Jisös qeget kömumapkö keuñi eraum mötket. ² Eraum mötket teköiga Jisös jöhöba wanğita Rom premiö Pailötkö böröñe alget. Mewö.

*Judasnöy imbi auyök.**Apo 1.18-19*

³ *Jisös qeget kömumawangö keunji jim tekögetka Judas mamalolo wangiyöhanön mi möta möt bölim anguba silwö monen köt 30 wangigeri, mi memba jike nup galöm aka kantrigö jitnememe yengören anda melenđa engiba kewö jiyök,⁴ “Nöñön siñgisöndok aka azi köpösihitñi qahö mi mamalolo mem wangibiga qeget kömuma.” Mewö jiyökmö, yeñön jiget, “Mi nenğören yuaia qahö! Mi mönö nangi manjara!”⁵ Mewö jiget möta silwö monen köt mi memba gil tipköiga jöwöwöl jike uruñe anök. Aniga nanñi mosöta anda imbi auyök.

⁶ Jike nup galöm bohonñi yeñön monen köt mi memba kewö jiget, “Monen ki mönö azi sepñangö bohonña. Mianğöra mi jöwöwöl jikegö monen köwenöñ albingö dopñi qahö. Mewö aka Mosesgö Köna keu oñgitpinbuk.”

⁷ Mewö jiba eraum möta monen mianñön gwakömnöñ kimbut meme azi kungören gölme köröñi kun bohonñi megetka kian ambazip yengö qaksirinñina ahök. ⁸ Mianğöra aka gölme köröñi mianğö qetñi mi nalö kewöñe mewöyök toroqeba ‘Gölme köröñi sepñambuk,’ qerakze.

⁹ *Kezapqetok azi Jeremaianöñ keu qeljine jiyöhi, mianñön mönö öñambuk ahök. Keu mi kewö, “Yeñön Israel könagesögö jitnememenini aka azi mi söñğöröñi memegöra kewöta algetka silwö monen köt 30 ahöhi, mi meget. Mi azigö bohonña.

¹⁰ Yeñön mi memba mianñön gwakömnöñ kimbut meme azi kungören gölme köröñi kun bohonñi meget. Mi mönö Kembunöñ jim kutum niñgiyöhanğö dop mewö meget.” Mewö.

*Pailötnöy Jisös qesim wangiyök.**Mak 15.2-5; Luk 23.3-5; Jon 18.33-38*

¹¹ Nalö mianğören Jisösnöñ Pailötkö jene kiniga kewö qesim wangiyök, “Ölña, gi Juda yengö kinja akzan me qahö?” Qesim wangiiğa Jisösnöñ melenđa jii mörök, “Mönö nangak jizani, mewö.” ¹² Jike nup galöm aka kantrigö jitnememe (70) yeñön keu gwötpuk Jisösgö silene ala jigetmö, töndup keu kitipñi kun qahö melenñök.

¹³ Keu böc kiniga Pailötnöñ Jisös kunbuk qesim wangiba jiyök, “Mötnöñ! Yeñön keu gwötpuk göhö silege ala nangöba jizei, mi mötzan me qahö?” ¹⁴ Mewö jiyökmö, Jisösnöñ bölöñi kun qahö ahökmö, töndup keu mienğö likepñi kun qahö melenñök. Keu böc kiniga premiönöñ gwötpuk welipköyök. Mewö.

* 27:3: Apo 1.18-19 * 27:9: Zek 11.12-13

Pailötnöñ Jisös kömumapkö jim teköyök.

Mak 15.6-15; Luk 23.13-25; Jon 18.39-19.16

¹⁵ Rom premiönöñ yambu (yara) dop pasowa sösöñgai nalöñe kösö mireyök azi mohok sihimñinanğö dop qetñi qeta qesigeri, mi pösat engizapma. ¹⁶ Nalö mianğöreñ azi kun qetñi Barabas qetkeri, yañön kösö mire tarök. I bölöñamñanğöra miwidimğögetka malök.

¹⁷ Mewö aiga tokogetka kewö qesim engiyök, “Barabas me Jisös, qetñi Kraist qerakzei, yetköreñök niñia pösat engibi etmapköra mötze?” ¹⁸ Galöm yeñön Jisösgöra körögisigisi mötkeñanğöra aka i premiögö böröñe al wañgiget. Mi möta sihimñinanğö mewö qesim engiyök.

¹⁹ Mi mörökmö, jimtekötekögö jakömbuak dum tatatñe tariga anöññan buzup keu kun kewö ali kayök, “Ni merak sunğem gaun kun eka mianğöreñ azi mianğöra aka sihimbölö gwötpuk mötzal. Mianğöra azi solanñi mi mönö lömböt kude wañgiman.”

²⁰ Keu mewö kayökmö, jike nup galöm aka kantrigö jittjememe yeñön ambazip kambu uruesiesi mem engiba kewö jiget, “Mönö Barabas pösata Jisös maripomnöñ qemegöra jiman. Mewö qesim wañgime.”

²¹ Mewö jigetka premiönöñ melenđa qesim engiyök, “Azi yahöt mietköreñök mönö niñia pösat engibi etmapköra mötze?” Mewö qesim engiiga “Barabas!” jiget. ²² Mewö jigetka Pailötnöñ kewö qesim engiyök, “Mewö jizeanğöra Jisös, qetñi Kraist qerakzei, nöñön i mönö denöwö ak wañgibileñak?” Mewö qesim engiiga yeñön körek qetket, “Mönö maripomnöñ qeget jiman!”

²³ Mewö qetketka premiönöñ jiyök, “Mi wuanöñğöra? Yañön mönö wani bölöña ahök?” Mewö jiyökmö, yeñön mi möta kapan köla toroqeba qet gigilahöba kewö qetket, “Mönö maripomnöñ qeget jiman!” ²⁴ *Mewö qetketka kezapölök aketka göjupmajupnöñ kunbuk qariiga Pailötnöñ mi eka möta bim karim asuhubapüköra o memba böröñi ambazip kambu jeñine sañonđa kewö jiyök, “Azi kianğö sepñi mokoget gemawi, mianñön mönö nöñgö qakne qahöpmö, mönö nanñini qakñine öñgöma.”

²⁵ Mewö jiiga ambazip kambu körek pakpak yeñön kewö melenğet, “Sepñanğö likepñan mönö nini aka nahönböratnini neñgö qaknine öñgöma!” ²⁶ Mewö melenğetka Pailötnöñ Barabas pösat engii erökmö, Jisösyajiiga ihilek wahinambuknöñ qeyöyaköba qeget. Mewö qegetka maripomnöñ qemegöra Rom yarö azi yeñgö böröñine alök. Mewö.

Jisös kukulömbuan ak wañgiget.

Mak 15.16-20; Jon 19.2-3

* 27:24: Dut 21.6-9

²⁷ Böröjine aliga Rom premiögö yarö azi yeñön Jisös wañgita premiögö jakömbuak mirigö kiripo uruñe aᅅgotket. Aᅅgota yarö kambu lökñanök öröm eᅅgigetka kaba tokoba Jisös liliköm wañgiget. ²⁸ Liliköm wañgiba nanñi sile esuñi köteköba maluku pisikñi gugakgugak kun löᅅgöt wañgiget. ²⁹ Löᅅgöt wañgiba sötman kösö limbiñda ila ewö nöropñe kölget geyök. Geiga jehot kun böröñi ölñe ala simin köl wañgiba göᅅgönahit ak wañgiba kewö jiget, “Owe owe, Juda yeᅅgöreñ kiñ, owe!”

³⁰ Titipepe mewö aka söutkölap qeba jehot öröpñi wañgita mianñön nöropñe qeget. ³¹ Mepaqepaik mewö ak wañgim teköba maluku pisikñi gugakgugak mi qeköba nanñe sile esu kunbuk löᅅgöt wañgiba maripomñöñ qebingöra wañgita anget. Mewö.

Jisös maripomñöñ qeget.

Mak 15.21-32; Luk 23.26-43; Jon 19.17-27

³² Anda köna namñe azi kun qetñi Saimon miwikñaiget. Yañön Afrika siti qetñi Sairini mianᅅö azaña. Miwikñaiba kuᅅgum wañgigetka Jisösgö maripomñi memba aᅅguyök. ³³ Jisös mewö wañgita gölme kun qetñi Golgota mi nanine keunöñ Nöröpsihit, mianᅅöreñ anda aᅅgotket. ³⁴ *Aᅅgota wain o aka marasin qetñi mör mi mindiriba lolonqalonñ memba nemapköra wañgigetmö, Jisösnöñ mi esapköba nembra möta tököyök.

³⁵ *Tököiga kinda maripomñöñ qeget. Qeget kiniga kiawen meget qötöñi ahuiga mianᅅö dop Jisösgö sile esuñi sutñine mendeñda meget. ³⁶ Mi memba tata Jisös jegalöm ak wañgiget. ³⁷ Nöropñe eu qegeraᅅö könañi kewö ohoba qeget, ‘Juda yeᅅö kiñ kembuñina ki.’ ³⁸ Kegwek-kahasiliñ azi yahöt mi yambuk maripomñöñ etkuget. Kun böröñi ölñe, kun qañeñe likeplikep mewö etkuget.

³⁹ *Ambazip oᅅgita anda kaba kukulömbuanñ aka jelikit aka nörop köla kewö jiget, ⁴⁰ *“Yei! Gi mönö jöwöwöl jike ölöp köndeññöᅅga gölmenöñ eriga wehön karöbutkö uruñe kunbuk mem wahöt kuᅅgumamᅅö jinöñ. O, gi azi qetpuk! Gi Anu-tuᅅö Nahönña akzan ewö, mönö ölöp nangi bauköm aᅅguba maripomñöhök etman.”

⁴¹ Jike nup galöm, Köna keuᅅö böhi aka kantrigö jitñememe yeñön mewöyök mepaqepaik ak wañgiba kewö jiget, ⁴² “Tosatña bauköm eᅅgiba malökmö, nanñi bauköm aᅅgumamᅅö osiza. Yañön Israelᅅö kiñ akza ewö, mönö dölkü maripomñöhök eri eka mi möt naribinak. ⁴³ *Yañön Anutu möt narim wañgiba ewebibiñambuk mala nanñaᅅöra

* 27:34: Sum 69.21 * 27:35: Sum 22.18 * 27:39: Sum 22.7; 109.25

* 27:40: Mat 26.61; Jon 2.19 * 27:43: Sum 22.8

'Anutugö Nahönñi akzal' jiiga mörin. Ayop, Anutunöñ i nalö kewöñe meköm wanğimangö mötza me qahöwi, mi ölop ekin." Mewö jiget. ⁴⁴ Kegwek-kahasiliñ azi yambuk maripomnöñ etkugeri, yetköñ mewöñanök uruqeçe keu töhöreñ jim wanğiyohot. Mewö.

Jisösnöñ kömuyök.

Mak 15.33-41; Luk 23.44-49; Jon 19.28-30

⁴⁵ Silim bibiñi 12 kilok aiga miangöreñök söñaupnöñ eta gölme pakpak dop köla ahöiga anda aua karöbutkö dop ahök.

⁴⁶ *Jisösnöñ 3 kilok miangöreñ nanñe keunöñ kewö qet ketañi qerök, "Eloi, eloi, lama sabaktani?" Mi nanine keunöñ: Anutuni, Anutuni, mönö wuanöñgöra andö nunğuzan?

⁴⁷ Mewö qeriga azi kösutñe kingeri, yeñgöreñök tosatñan mi möta jiget, "Mönö Elaijagöra qetza." ⁴⁸ *Miangöreñök yeñgöreñök kunñan ösumñan anda mömöndö kun kahali tandök mi memba wain o asöñambuknöñ kundungöba ip göröm kitipñe jöhöba suruba Jisös numbuñe eu ali neyök. ⁴⁹ Neyökmö, tosatñan jiget, "Mönö mosötketka nanñök kinök. Elaijanöñ kaba meköi etma me qahöpto, mönö mi ekin."

⁵⁰ Mewö aketka Jisösnöñ kunbuk qet ketañi qeta söñgöro ösum kondikñi öröba kömuyök. ⁵¹ *Kömuiga miangöreñök jöwöwöl jikegö uruñe opo * kinöhi, miangön euyök bibiñe jurata eta yahöt ahök. Mewö eriga gölmenöñ kenöñ ketañan meiga köt ketañi ketañi mesiñnök. ⁵² Qaksirigö köt köteñi miengö numbuñinan nanñök añañigetka ambazipñi sarakñi kömugeri, yeñgöreñök gwötpukñan guliba wahötket. ⁵³ Wahöta qaksirigö köt köteñini mosöta Jisösnöñ kömupnöñök wahöröhi, miangö andöñe Jerusalem siti töröñi miangöreñ kaba ambazip gwötpuk asuhum enğigetka engeget.

⁵⁴ Suahö galöm aka yarö azi yambuk Jisösgö jegalöm memba malgeri, yeñön kenöñ meiga yuai tosatñi pakpak asuhuyöhi, mi eka auruba jönömñini gwötpuk unduiga keñgötporiñ aka kewö jiget, "Yañön mönö ölna Anutugö Nahönña akza."

⁵⁵ *Ambi gwötpukñan sikep kinda yuai mi mewöyök eket. Yeñön Jisös wuatangöba Galiliyök kaba welen qem wanğiba malget. ⁵⁶ Yeñgö sutñine Magdalagö Maria aka Maria Jeims aka Joses yetkö namñiri aka Zebedigö nahönyahöt yetkö namñiri. Mewö.

Jisösgö qamötñi löm kölget.

Mak 15.42-47; Luk 23.50-56; Jon 19.38-42

* 27:46: Sum 22.1 * 27:48: Sum 69.21 * 27:51: Eks 26.31-33 * 27:51: Opo mi jöwöwöl jikegö olenji kömbukñi aka olenji töröñi kötökñi mietkö sutñire kinök.

* 27:55: Luk 8.2-3

⁵⁷ Mare aiga Arimatia azi pomñi kun qetñi Josef kayök. Yañön mewöyök Jisösgö gwarekñi kun ahök. ⁵⁸ Yañön Pailötgöreñ anda Jisösgö qamötñi memamgö qesiyök. Qesiiga suahö azinöñ mi Josef wañgimegö jim kutum engiyök.

⁵⁹ Jim kutum engiiga Josefnöñ anda Jisösgö qamötñi memba eta opo tuatñan esuhuyök. ⁶⁰ Esuhuba memba qaksirinöñ anda nanñi köteñ dölökñi kötnöñ urorohogetka kinöhi, qamötñi mi mianğöreñ alök. Mewö ala köt ketañi kun met-aliga köteñ numbuñi közipköiga mosöta anök. ⁶¹ Magdalagö Maria aka Maria alañi kun yetkön mianğöreñ köt köteñ mesohol köla tarohot.

Yarö azi qaksiri galöm meget.

⁶² Sabat kendon tatatköra yuai mözözömgöba ahöba wahöta mianğöreñ jike nup galöm aka Farisi (Köna keugö kapañkölköl) yenñön Pailötköreñ anda tokoba kewö jiget, ⁶³ **“Ketanjamni, enjololonğö urukunğukunğü azi mianñön jebuk malöhi, nalö mianğöreñ kewö jii mörin, ‘Nöñön wehön karöbut teköiga kunbuk guliba wahötmam.’ Neñön keu mi mötmörizin.*

⁶⁴ Mianğöra göñön ölop yarö aziurupki jinöñ möta qaksirinöñ anda mi törörök jegalöm memba malgetka wehön karöbut teköiga mosötme. Mewö qahö galöm membeak ewö, gwarekurupñan mönö anda qamötñi ölöñ memba asamböta ambazip kewö jiget mötpeak, ‘Jisösnöñ mönö kömupnöhök wahörök.’ Mewö jigetka tilipqilip enjololon keu mutukñi onğiriga böliqölibapuk.” ⁶⁵ Mewö jigetka kewö jii mötket, “Yarö azi ki mönö ölop enğuanğita anda al engigetka qaksiri köteñ numbuñi mi törörök galöm köl soroköme.”

⁶⁶ Mewö jii möta qaksirinöñ anda köt köteñanğö numbuñe köt ketañi algetka közipköba kinöhi, mi supapñi ala yarö azi al engigetka jegalöm köhöikñi meget.

28

Jisösnöñ kömupnöhök wahörök.

Mak 16.1-10; Luk 24.1-12; Jon 20.1-10

¹ Sabat kendon tatket teköiga Sonda söñanök wahöta miri gianñiiga Magdalagö Maria aka alañi Maria kun yetkön qaksirigö köt köteñ ekitkö anohot. ² Anohotka mianğöreñök kenöñ ketañi kewögöra meyök: Kembugö garata kunöñ Suepnöhök eta qaksirinöñ kaba numbuñe köt ketañi qetali ani qakñe tarök. ³ Garatagö kaisonğolomñi mi wöl ewö aiga malukuñi mi kousu ewö tuat lalamñi ahök.

* **27:63:** Mat 16.21; 17.23; 20.19; Mak 8.31; 9.31; 10.33-34; Luk 9.22; 18.31-33

⁴ Mewö asuhuiga yarö azi qaksiri galöm megeri, yeñon yangöra awöwöliba jönmöni undui kömum töriget. ⁵ Mewö aketka garatanöñ ambi yahöt yetköra keu kewö jiyök, “Jisös maripomnöñ qegeri, inñiri yangöra jaruzahot, mi mötzal. Mianğöra mönö keñgötñiri kude mötmahot. ⁶ Nannak jiyöhanğö dop mönö kömupnöñök wahötza. Mianğöra ki qahö ahöza. Mönö kaba dum ahöyöhi, salupñi mi ekñahot.

⁷ “Mi eka ösumok gwarekurupñi yeñgöreñ anda buzup keu ki jiyohot mötme, Jisösnöñ kömupnöñök wahötza. Mötket, yeñon mönö qeljiñe mutuk Galili prowinsnöñ anma. Inñini ölöp mianğöreñ anda i ekñe. Mötket, nöñon mi lök jibi mötze.”

⁸ Mewö jiiga zilañök qaksiri mosöta keñgötñiri möta töndup öñöñi qahö söñgaiba buzup mi memba gwarekurupñi jiyohot mötmegöra ösumñiran anohot. ⁹ Ösumñiran anohotka Jisösnöñ i könanöñ asuhum etkiba “Söñanñiri!” jiyök. Mewö jiiga kösutñe anda sipköba könañe meraköba waikñi memba möpöseim wañgiyohot. ¹⁰ Möpöseim wañgiyohotka kewö jii mörohot, “Keñgötñiri kude mötmahot. Mönö anda munurupnan Galili anmegö keu jiyohotka mianğöreñ anda ni nekñe.” Mewö.

Qaksiri galöm meme yeñon kösohotñini jiget.

¹¹ Ambiyahöt yetköñ köna anohotka qaksirigö köt köteñ galöm meme yarö azi tosatñan sitinöñ kaba jike nup galöm engeka yuai pakpak asuhuyöhi, mianğö kösohotñi jiget mötket. ¹² Yeñon mi möta Juda yeñgö jittjememeurupñini öröm enğigetka mohotñe totoko ala Jisös wahötwahötkö keu asambötpingö keu areñ miwikñaiba monen keta bölökñi mi yarö azi enğiget.

¹³ Mi enğiba kewö jim kutum enğiget, “Inñini mönö keu kewö jime: Nini sunğem gaun ahöinga gwarekurupñan ölöñ kaba qamötñi yoñgorö memba anget. ¹⁴ Keu mewö jigetka keu mianğon premiögö kezapñe gei mötma ewö, lömböt enğö qakñine öngöbapüköra neñon mönö uruñi mölöwöriba memba eta alinga waimanjat qahö malme.”

¹⁵ Mewö jim kutum enğigetka mianğö dop aka monen memba anda nup keuñini wuatangöget. Mewö aketka Juda yeñon keu mi sutñine jim sehigetka möta malgetka anda nalö kewöñe mewöyök mi toroqeba jiget mörakzin. Mewö.

Misin nup membingö jimkutukutuñi

Mak 16.14-18; Luk 24.36-49; Jon 20.19-23; Apo 1.6-8

¹⁶ *Gwarekurup 11 yeñon Jerusalem mosöta Galili prowinsnöñ anda Jisösnöñ kundunje anmegöra jiyöhi, mianğöreñ öngöget. ¹⁷ Mianğöreñ öngöba Jisös eka waikñi memba möpöseim wañgigetmö, tosatñan yangöra uruyahöt

* 28:16: Mat 26.32; Mak 14.28

aket. ¹⁸ Möpöseim wanjigetka yengöreŋ kaba kewö jiiga mötket, “Suepkö aka gölmegö kukösum pakpak mi Anutunöŋ niŋgiiga nöngöreŋ ahöza.

¹⁹ * “Miangöra iŋini mönö gölme dop anda ambazip kambu pakpak kewö engömegetka nöngö gwarekurupni akŋe: I mönö Iwi, Nahön aka Uŋa Töröŋi neŋgö qetnine o melun mem engime ²⁰ aka nöŋön keu wuatangömegöra jim kutum engiali, mi pakpak tem kölmegöra mönö kusum engiba malme. Mötket, nöŋön mönö nalöŋi nalöŋi embuk mala anda malbiga gölmegö nalöŋan teköma.” Mewö.

* 28:19: Apo 1.8

Mak Ölöwak Buᅇa Maknöᅇ ohoyök. Jim-asa-asari

Mak namᅇi qetᅇi Maria, iwiᅇi qetᅇi qahö mötzin. Jerusalem siti toᅇi malget. (Aposol 12.12) Nanᅇi kösohotᅇi kun qetᅇi qahö qeta boᅇ 14.51-52 miangöreᅇ ohoi ahöza. Pitönöᅇ bauköm waᅇgiiga uruᅇi melenᅇniga Buᅇa kusum waᅇgiyök. Waᅇgiiga numbutᅇi Barnabas aka Pol yetpuk liliköba misin nup memba anda Pol mosöta deᅇnohot. Deᅇnohotka toroqeba nup memba mala Buᅇa kösohot mohok mohok qezaköba mindiriba kian kantri yengöra Grik keunöᅇ ohoyök. Jisösgö keuᅇi mi Arameik. Mi “Eli eli lama lama sabaktani,” miangö dop.

Jisösnöᅇ urugö nupᅇi denöwö memba Anutugö Nahönᅇi aka ambazip bauköm engiba malöhi, Maknöᅇ keu mi jim asariba ohoyök. Jisösgö nupᅇi bohönᅇi karöbut: Buᅇa kusum engiyök, ömewöröme közöl engiyök aka singisöndok mosöta kawölᅇi kawölᅇi mem ölöwahök.

Buk kianᅇo bahöᅇi bohönᅇi 6 mi kewö:

Keu mutukᅇi: Jon aka Jisös 1.1-13

Qenjarök nup Galili uruᅇe meyök 1.14-9.50

Galili mosöta Jerusalem anök 10.1-52

Jerusalem Sonda mohot mala kömuyök 11.1-15.47

Jisösnöᅇ kömupnöᅇhök wahörök 16.1-8

Wahöta asuhuba Suepnöᅇ öᅇgöyök 16.9-20

¹ Amötqeqe Toᅇi Jisös Kraist mi Anutugö Nahönᅇi akza. Nöᅇön yaᅇgö Ölöwak Buᅇaᅇi könahiba ohozal.

Jonöᅇ Jisösgö köna mesarök.

Mat 3.1-12; Luk 3.1-18; Jon 1.19-28

²* Anutunöᅇ Suep uruᅇe Nahönᅇaᅇgöra keu kun jiiga kezaqetok azi Aisaianöᅇ mi ohoiga yaᅇgö Buzup Kimbinöᅇ kewö ahöza,

“Mötnöᅇ. Nöᅇön kolek garatani kun melaibiga qelᅇiᅇe anda ambazip uruᅇini mindiᅇgöba göhö könagi mesariga göᅇön yaᅇgö andöᅇe gölmenöᅇ geman.”

³* “Kolek garata kunöᅇ gölme qararanᅇkölkölᅇe qeta maliga anda qetᅇi kewö mötme, ‘Kembunöᅇ kamawo! Miangöra mönö jöjöröba könaᅇi mesatket. Mönö uruᅇini mindiᅇgöba könaᅇi qölöleiget.’”

⁴ Keu mianğö dop azi kun qetņi Jon asuhuyök. Qetņi alaņi O-melun azi. Asuhuba gölme qararaņkölkolņe mala kinda Buņa keuņi kewö jiba malök, “Inini mönö uruņini melengetka nöņön o melun mem enğimam. Mewö aketka Anutunöņ singisöndokņini saņğonda mosötma.” ⁵ Mewö jiba maliga Judia prowinsgö miriņi pakpak aka Jerusalem siti yeņön kambuņi kambuņi köla öröba Jongöreņ kaget. Kaba kaņgota singisöndokņini jim miwikņaigetka Jonöņ i Jordan o töwatņe o-melun mem enğiyök.

⁶ *Jongöreņ silepöke mi kamel juņņan memerņi aiga kemaņe örigit sömbup sileņan memerņi mi jöhöba malök. Neneņamņi mi gawöt jinam aka arökņaņgö moroņ onņi, mia nema malök. Mi pakpak kezapqetok azi Elaija (Elia) yaņgö dowä. ⁷ Jonöņ keu kewö jim asariba malök, “Nöņgö andöne azi kukösumņi köhöikņi kun kama. Yaņgö kukösumņi öņgöņgöņan mönö nöņgöreņ oņgitma. Yaņön azi öņgöņgöņi akņawaņgöra nöņön yaņgö köna esuņaņgö kösöņi bauköba pösatmamgö qötötäņgömam. ⁸ Nöņön o töhönöņ melun mem enğizalmö, yaņön mönö Uņa Töröņan melun mem enğima.” Mewö.

Jonöņ Jisös o melun mem waņgiyök.

Mat 3.13-17; Luk 3.21-22; 4.1-13

⁹ Nalö mianğöreņ Jisösnöņ Galili prowinsgö miri Nazaret mianğöreņök Jongöreņ kaiga Jordan o töwatņe o-melun mem waņgiyök. ¹⁰ Mem waņgiiga onöhök koriga mianğöreņök Suepnöņ aņaņiiga Jisösnöņ uba ehiga Uņa Töröņi melenđa kembö nei ewö aka Jisösgö qakņe eta meöyk. ¹¹ *Mi ehiga Suep mireyök keu kun kewö asuhuyök, “Göņön mönö nani wölböt nahöni aknöņga köröni ölöwahiga geknahöm ak gi-hizal.” Mewö.

Satanöņ Jisös esapköba malök.

Mat 4.1-11; Luk 4.1-13

¹² O melun mem waņgiiga mianğöreņök Uņa Töröņan Jisös kuņgum waņgiiga gölme qararaņkölkolņe anök. ¹³ Anda wehön 40 mianğö dop mianğöreņ maliga öme bohonņini Satan yaņön esapköm waņgiba malök. Sömbup kalņi mienğö sutņine maliga Suep garata yeņön bauköm waņgiba malget. Mewö.

Jisösnöņ gwarekurupņi mutukņi enğoholök.

Mat 4.12-22; Luk 4.14-15; 5.1-11

¹⁴ Könaņgep Jon kösö mire alget tariga Jisösnöņ nalö mianğöreņ Galili prowinsnöņ liliņgöba anök. Anda Anutugö Ölöwak Buņaņi jim asariba malök. ¹⁵ *Jim asariba kewö jiyök,

* 1:6: 2 Kiņ 1.8 * 1:11: Jen 22.2; Sum 2.7; Ais 42.1; Mat 3.17; 12.18; Mak 9.7;

Luk 3.22 * 1:15: Mat 3.2

“Anutunöŋ bemtohoŋi almawaŋgö nalöŋan mönö dopdowiza. Anutunöŋ nalö aliga mala malgetka döлки akza miangöra mönö uruŋini melenđa Ölöwak Buŋa möt nariget.”¹⁶ Jisösnöŋ mewö jiba liliköba mala Galili o angögö göraŋe mötöteiba anda söra örörö azi yahöt ekehök. Qetŋiri Saimon, munŋi qetŋi Andru. Yekŋön mösakŋiri o angönöŋ söra öröbitköra gila malohot.¹⁷ Jisösnöŋ etkeka kewö jiyök, “Aziyahöt, iŋiri mönö ni nuataŋgöba kayöhotka kusum etkibi ambazip söra ewö öröm enŋimakŋahot.”¹⁸ Mewö jiiga miangörenök mösakŋiri mosöta könahiba Jisös wuataŋgöba anöhot.¹⁹ Jisösnöŋ yetpuk borom kun toroqeba anda Zebedigö nahönŋi Jeims aka munŋi Jon ekehök. Yetköŋ mewöŋanök waŋgenöŋ tata mösakŋiri möhamgöba jöhöba malohot.²⁰ Malohot ekeka miangörenök etkoholök. Etkoholiga iwiŋiri Zebedi aka moneŋ nup aziurupŋi waŋgenöŋ enŋömosöta könahiba Jisös wuataŋgöba andöŋe anohot. Mewö.

Jisösnöŋ öme kun wuataŋgöyök.

Luk 4.31-37

²¹ Mewö mohotŋe anda Kaperneam sitinöŋ anŋotketka Sabat kendon aiga Jisösnöŋ miangörenök köuluk miriŋine öngöba Buŋa kusum enŋiyök.²² *Köna keugö böhi ewö qahöpmö, kukösum ahöm waŋgiyöhaŋgö dop kusum enŋiba ahakmemeŋaŋgö dop akŋegöra jiyök. Mianŋöra könagesö yeŋön mi eka auruba welipköget.

²³ Köuluk miriŋine miangörenöŋ nalö miangörenök azi kun ömeŋambuk tariga öme mianöŋ qetŋi kewö qerök,²⁴ “O Jisös, Nazaret asia! Gi wania ak neŋgimangö akzane? Mönö ayuhum neŋgimangöra kazan me? Ni könaŋamgi möt kutuzal. Gi Anutugörenöŋ azi Tök-kutukutuŋi mi akzan.”

²⁵ Mewö qeriga Jisösnöŋ tembula kewö jim waŋgiyök, “Gi mönö keugi bököiga azi ki mosöta kesalnöŋ.”

²⁶ Mewö jim waŋgiiga ömenöŋ azi mi utuköba urepköm waŋgiba qet bölobölö qeta kota mosöta anök.²⁷ Aniga körekŋan nemböŋini teköiga welipköba qesim anŋuba kewö jiget, “Yei! Ki mönö wani yuaia? Ki mötmöt dölokŋi kukösumŋambuk. Yaŋön ömewöröme mewöyök jim kutum enŋiiga jitŋi tem kölje.”

²⁸ Mewö asuhuiga Jisösgö qetbuŋaŋan könöpuk sehiba miri kösutŋe tat angeri, miangörenöŋ anda anda Galili prowins pak-pak dop kölök. Mewö.

Jisösnöŋ kawöl ambazip gwötpuk meiga ölöwaket.

Mat 8.14-17; Luk 4.38-41

²⁹ Jisösnöŋ Kaperneam yeŋgörenöŋ köuluk miri mosöta miangörenök Jeims Jon yetpuk Saimon aka Andru yetkö

* 1:22: Mat 7.28-29

mire öngöget. ³⁰ Mianğöreñ öngögetka Saimongö suhunñan silekönöp kawöl yöhöi ahöyök. Ahöiga buzupñi mi ösumok Jisös jiget mörök. ³¹ Jiget möta yanğöreñ anda böröñe memba kökobiiga wahörök. Wahöriğa silekönöpñan mosöriğa nene ohoba gumohom enğiyök.

³² Gumohom enğiiga mare aiga wehön jeni geiga mianğöreñ Kaperneam tonji yeñön kinda ambazipñi ambazipñi kawöl ömeñinambuk mi körek enğuanğita Jisösgöreñ kaget. ³³ Kaperneam taonöhök kambulelembenöñ kaba Saimongö miri nanğunje tokoget. ³⁴ Tokogetka kinda ambazip kawöl könañi könañi enğöhöyöhi, mi gwötpuk mem ölöwak enğiyök. Mewöyök ömewöröme yeñön Jisösgö könañi mötkerañğöra Jisösnöñ numbuñini muhungöba gwötpuk enğuatangöyök. Mewö.

Amöt böröñi Galili körek dop kölök.

Luk 4.42-44

³⁵ Jisösnöñ gaun ahöiga miri wanğarañ suruiga wahöta miri yaigepñe geba görañe anda nanñök tiñ kutuba mianğöreñ köuluköyök. ³⁶ Köuluköiğa Saimon aka alaurupñi yambuk malgeri, yeñön zilañ könañe anget. ³⁷ Anda miwikñaiba kewö jiget mörök, “Ambazip körekñan mönö göhöra jaruze.”

³⁸ Mewö jigetka möta kewö jiyök, “Miri tosatñi tosatñi liliköba tat anjei, ekze. Nöñön Buña keu miri dop jim sehi-mangöra eta maljal. Mianğöra mönö miri liliköba anbin.”

³⁹ *Mewö jiba anda Galili prowins körek liliköba köuluk miriñine Buña keu jiba ömeñi ömeñi mi enğuatangöba malök. Mewö.

Jisösnöñ uzikuku azi kun mem solaniyök.

Mat 8.1-4; Luk 5.12-16

⁴⁰ Jisösnöñ taon kunöñ maliga uzikuku azi kunñan kaba simin köla Jisösgö wösöñe geba kewö köuluköm wanğiyök, “Göñön sihimangan mem ölöwak niñgimangö mötzan ewö, mönö ni ölop mem solanim niñgiman.”

⁴¹ Mewö jiiga yanğöra wösöñi möta böröñi böranda silenji misiriba jiyök, “Nöñön mi akñamgö mötzal. Gi mönö solaniman.” ⁴² Mewö jiiga uzikukuñi mi mianğöreñök solanii ölöwahök. ⁴³ Solaniğa galöm meme keu köhöikñi wanğiba mianğöreñök “Ölop anman,” jiyök. ⁴⁴ *Goro mi kewö jiiga mörök, “Mötnöñ. Kianğö buzup keuñi mi kun kude jinöñ mötme. Qahöpmö, mönö jike nup galömgöreñ anda silegi kondel wanğiman aka Mosesgöreñ jimkutukutu wuatangöba solanizanañgö saiwap nalukñi ala jöwöwöl ohoman. Mi ohonöñ ehiga ambazipnöñ könañamgi möt kutume.”

* 1:39: Mat 4.23; 9.35 * 1:44: Lew 14.1-32

⁴⁵ Jisösnöŋ mewö jiyökmö, yaŋön anda töndup könahiba keu buzupŋi mi gwötpuk jiba maliga sehiyök. Sehiiga Jisösnöŋ taonŋi taonŋi mianğöreŋ aukŋe kunbuk anmamgö osiyök. Osiba taon andöŋine miri gwamönŋi mianğöreŋök malök. Mianğöreŋ maliga miri dop mianğöreŋök ambazipŋi ambazipŋi mi yaŋğöreŋ kaget. Mewö.

2

Jisösnöŋ azi sile likepŋi kömukömuŋi möhamğöyök.

Mat 9.1-8; Luk 5.17-26

¹ Mewö liliköiga nalö tosatŋi teköiga Jisösnöŋ lilingöba kunbuk miriŋe Kaperneam kayök. Kaiga “Mire malja,” jiget mötket. ² Ambazip gwötpukŋan mi möta tokoba yaŋgö miri nanğu söndakŋe gwözöŋda sombemŋe kokolak qeget. Kokolak qegetka Jisösnöŋ kinda Buŋa keu jiiga mötket. ³ Mötketka mianğöreŋ azi kun sile likepŋi kömukömuŋi, mi waŋgita yaŋğöreŋ kaget. Azi 4:ŋan i kululunöŋ ala aŋguba kaget. ⁴ Kagetka gwözöŋda kingeraŋgöra aka Jisösgö kösutŋe anda albingö osiget. Osiba miri qakŋe öŋgöba Jisösgö bohonŋeyök bo esim lulunget. Lulungetka kinimŋi ahuiga mianğöreŋ kawöl azi mi kululunambuk kösönöŋ jöhöba algetka geiyök. ⁵ Mewö geiga Anutu möt narim waŋgigeri, Jisösnöŋ yengö tandökŋini mi ehi dop köliga kawöl azigöra kewö jiyök, “Nahöni! Nöŋön siŋgisöndoki mosötzal.”

⁶ Mewö jiiga Köna keugö böhi tosatŋan sutŋine tata uruŋinan kewö mötmöriŋet, ⁷ “Azi kianön denöwögöra mewö jiza. Mönö Anutu ilita mepaqepaik akza. Anutu mohotŋan siŋgisöndoknini mosörakzapmö, azi kunŋan mi qahö.”

⁸ Uruŋinan mewö mötmöriŋetka Jisösnöŋ mianğöreŋök uruŋan mi möt kutuba kewö jii mötket, “Inini mönö wuanöŋgöra keu mewöŋi uruŋinan mötmöriŋe? ⁹ Nöŋön ‘Siŋgisöndoki mosötzal,’ kawöl azigö mewö jizali, keu mianön mönö awamŋanök jijiŋa. Kunŋan mewö jiiga tosatŋan keu mianğö ölni qahö ekŋe. Mianğöra mi keu awamŋaŋgö dop. Nöŋön keu kun kewö jimamgö mötzal, ‘Mönö wahöta tumbulahöpki memba anöŋ.’ Keu mi mönö lömbötŋambuk jijiŋa akza. Mewö jibiga ölni ahuma me qahöwi, mianön mönö aukŋe asuhui ekŋe. ¹⁰ Mötket, gölmenöŋ siŋgisöndok mosötmosötkö kukösumŋi mi Sup gölmegö azi ölnaŋğöreŋ ahözawi, inini mianğö könaŋaŋgöra janjuŋ malbepuk. Mianğöra keu lömbötŋi mi azi kianğöra jibi ölni eket,” Mewö jiba azi sile likepŋi kömukömuŋaŋgö jeŋe eka jiyök, “Nöŋön göhöra jizal: Gi mönö wahöta tumbulahöpki memba mirige anöŋ. Keu lömbötŋi mi ölnambuk akŋa ewö, keu awamŋi mi mönö mewöyök denöwögöra omani akawak?” ¹¹ Mewö jiba

azi sile likepñi kômukömuñi kewö jii mörök, “Nöñön göhöra jizal: Gi mönö wahöta tumbulahöpki memba mirige anöñ.”

¹² Jiiga mönö wahöta mianğöreñök tumbulahöpñi memba ambazip pakpak yeñgö jeñine yaigepeñe anök. Mewö aniga körekñan welipköba Anutu möpöseiba kewö jiget, “Ye! Tandök kewöñi mi mönöwök nalö kungen qahö ehin. Qahö. Dölki je murutña ekzin.” Mewö.

Jisösnöñ Matyu (Liwai) oholök.

Mat 9.9-13; Luk 5.27-32

¹³ Jisösnöñ kunbuk Kaperneam mosöta anğönöñ geba sak qöhöröñe anda malök. Maliga ambazip kambulelemenöñ yanğöreñ kagetka Buña keu kusum enğiyök. ¹⁴ Anda takis ofis onğitmamgö aiga mianğöreñ azi qetñi Liwai Alfiusgö nahönñi tariga eka jii mörök, “Gi mönö nöñgö andöne kanöñ.” Mewö jiiga möta wahöta takis nup mosöta Jisösgö andöñe anök.

¹⁵ Anda Liwaigö mire anda nene nemba tatkeri, nalö mianğöreñ takis meme azi tilipqilipñinambuk aka siñgisöndok azi gwötpukñan kaba Jisös aka yanğö gwarekurupñi yembuk tata nene mohokñe neget. Gwötpukñan mönö Jisös wuatangöba malget. ¹⁶ Jisösnöñ takis meme tilipqilipñinambuk aka siñgisöndok ambazip tosatñi yembuk tata nene negeri, mi Farisi (Köna keugö kapañkölköl) aka yeñgöreñ böhi tosatñan eka Jisösgö gwarekurupñi kewö jim enğiget, “Aek! Yanöñ mönö wuanöñgöra takis meme tilipqilipñinambuk aka siñgisöndok ambazip yembuk tata nene neza? Mi qahö dop kölja.”

¹⁷ Mewö jim enğigetka Jisösnöñ likepñi kewö jii mötket, “Sile unditundit ambazipnöñ doktagöra qahö ak engimakzapmö, kawöl ambazipnöñ doktagöreñ anakze. Nöñön siñgisöndok ambazip engoholmamgöra kaba maljalmö, ambazip nanninañgö mötketka solanñi akzei, i qahö.” Mewö.

Nene siñgi malmalgö keuñi

Mat 9.14-17; Luk 5.33-39

¹⁸ Nalö mianğöreñ Jongöreñ gwarekurupñi aka Farisi (Köna keugö kapañkölköl) yeñön nene siñgi malgetka tosatñan Jisösgöreñ kaba kewö qesiget, “Jon O-melun azigö gwarekurupñi neñön Anutugöra nene siñgi malahakzin. Farisi (Köna keugö kapañkölköl) yeñgö gwarekurupñinan mewöñanök aka malje. Nangi gwarekurupkan mönö wuanöñgöra Anutugöra siñgi qahö malje?”

¹⁹ Mewö qesigetka kewö melenök, “Ölña! Nini wani nalönöñ nene siñgi malakzin? Ambi meme nalöñe azigö andourupñan könöpñi algetka ambigö sepkitipurupñan yuai mi tökömakze me qahö? Nöñön nani gwarekurupni yeñgö

azi bunjaya aka yeŋgö sutŋine köisirik tatzal. Tatpiga yeŋön mianğöra aijölöŋ söŋgaiba tata siŋgi malbingö osimakze. ²⁰ Osimakzemö, Anutunöŋ noaŋgiri kömumbiga yeŋön mönönalö mianğöreŋ ölop siŋgi malakŋe.

²¹ (Iŋini malmal walŋi aka sö söŋgai Buŋa dölökŋi mi mindirim etkibingö osime. Mianğö keu pasetŋi mi kewö jibi mötket;) Löŋgölöŋgöt walŋi jurariga kunŋan opo dölökŋi qahö saŋgoŋsaŋgoŋi mitiba mianjön opo su jöhanŋi qahö uhum memba umğöreŋğömakza. Mewö akawak ewö, opo su jöhanŋi dölökŋan mönönö waziba löŋgölöŋgöt walŋi öröiga kunbuk tiŋgiriga kinimŋan qariba böliqölibapuk. ²² Mewöŋanök kunŋan wain o dölökŋi mi jobö me toru walŋi lama silenŋan memenji mianğöreŋ qahö kusuiga gemakza. Mewö akawak ewö, wain o dölökŋan mönönö qariba toru qesiŋniga jula mokoiga gölmenöŋ eta sohoiga toruŋan böliqölibepuk. Mianğöra wain o dölökŋi mi toru dölökŋeyök mokoin geiga dop kölma. (Mewöŋanök o ölopŋi mi gina gisagisahöŋe qahö umakzin. Mewö ubinak ewö, mianjön mönönö jula kisipisirik eriga nemba kawöl neŋgöhöbapuk. Mewö akapuköra o ölopŋi mi gina ölopŋe umakzin. Iŋini mewöyök malmal walŋi aka Ölöwak Buŋa dölökŋi mi mindirim etkibingö osime.) Mewö.”

Jisösnöŋ Sabat kendongö Kembuŋi akza.

Mat 12.1-8; Luk 6.1-5

²³ *Mianğö andöŋe Sabat kendon kunöŋ Jisösnöŋ wit padi nup köröŋi ketanji kutuba anök. Aniga gwarekurupŋan wösöŋini eŋguiga wit ölpŋi mohot mohot könahiba böröŋinan misiba neget. ²⁴ Mewö negeraŋgöra Farisi (Köna keugö kapaŋkölköl) tosatŋan Jisös kewö jiget mörök, “Mötnöŋ, yeŋön mönönö wuanöŋgöra Sabat kendongö nup meme soŋgoŋi oŋgitze?”

²⁵ *Mewö jigetka kewö melenök, “Kiŋ Deiwidnöŋ yarö aziurupŋi yembuk liliköba wösöŋini eŋguiga nenegöra osiba yuia akeri, mi lök nalö kunöŋ oyonget me qahö? ²⁶ *Yaŋön mönönö Anutugö opo seri jikenöŋ öŋgöba beret kömbukŋi Anutugö jemesoholŋe altanöŋ alget tariga ösumŋan walöŋniga qekögeri, mi mönönö memba neyök. Beret kömbukŋi mosötmosötŋi mi jike nup galöm yeŋönök nezema. Tosatŋan mi nembepuköra soŋgo ahöiga töndup neyök. Nemba aziurupŋi tok eŋgiiga mohotŋe neget. Nalö mianğöreŋ azi qetŋi Abiatar yaŋön jike nup galöm bohonŋaŋgö nup memba malök.”

²⁷ Mewö jiba kewö jii mötket, “Anutunöŋ Sabat kendon mi ambazip ölöwakŋegöra ali ahöza. Mia ambazipnöŋ laŋ jim

kutumegöra aka qahö. ²⁸ Mewö aiga Suep gölmegö azi ölnjan mönö Sabat kendongö Kembunji mewöyök akza.”

3

Jisösnöñ azi böröñi sösöröngöñi mem ölöwahök.

Mat 12.9-14; Luk 6.6-11

¹ Jisösnöñ kunbuk köuluk mire öngöiga miangöreñ azi böröñi sosoholiñi kun tarök. ² Miangöreñ azi böröñi sosoholiñi kun tarök. Ambazipnöñ Jisös keu jakeñe al wanğibingöra “Azi mi Sabat kendonöñ möhamgöma me qahö?” jiba Jisös je galöm memba tatket. ³ Megetka Jisösnöñ azi böröñi sosoholiñi mi kewö jii mörök, “Mönö wahöta jenine kinöñ.” ⁴ Mewö jiba kewö jii mötket, “Köna keu wuatangöba Sabat kendonöñ yuai ölöpñi me bölöñi akin? Ölöp kungö bohonñi jöhöbin me mosöringa kömuma? Wanat kun meinga dop kölma?” Mewö jii möta göröñ alget.

⁵ Keuñini göröñ tatketka lilingöm purik engehi uruñinan köhöikñi gwözöñnöhanğöra wösöbirik aka kukjejenöñ engehök. Mewö engeka azi miangö jiyök, “Gi mönö börögi qötöteinöñ.” Mewö jiiga böröñi qötöteiba kunbuk ölöwahök. ⁶ Ölöwahiga Farisi (Köna keugö kapañkölköl) yeñön yaigep anda miangöreñök premiö Herodkö pati alaurup yembuk totoko ala “Jisös denöwö qein kömuma?” jiba keu nup meget. Mewö.

Jisösnöñ kawöl ambazip mem ölöwak enğiyök.

⁷ Mewö megetka Jisösnöñ gwarekurupñi enğuanğita o anğö jitñe anget. Angetka Not prowins qetñi Galili miangöreñök ambazip kambulelembe yeñön könañe wuatangöba anget. Judia prowins miangöreñök mewöyök yangöreñ kaget. ⁸ Siti bohonñi qetñi Jerusalem, Saut prowins qetñi Aidumia aka Jordan o likepñeyök Wehön Kotkotñe yeñön aka Wehön Gegeñe görökenök taon qetñiri Taiö aka Saidon liliköba maljei, yeñön mohok kambulelemenöñ öröba kaget. Jisösnöñ anğöletot ketañi ketañi memba malöhi, miangö buzupñi möta mindiqindiriba kañgotket. ⁹ *Mewö kañgota utal wanğibepüköra Jisösnöñ gwarekurupñi kewö jii mötket, “Ölököm ningibepüköra inñi mönö wanğe kun miwikñaiba nöñgöra dowe alget tarök.” ¹⁰ Mewö jii möta ambazip sehisehiñi mem ölöwak enğiba malök. Miangöra qemjem-mamjeñ aka sile lölömböröñinambuk pakpak yeñön sileñe misiribingöra liliköba gwötpuk aum metala utal wanğiget. ¹¹ Ömeñi ömeñi yeñön Jisös eka jemesoholñe gölmenöñ geba kewö qetket, “Gi Anutugö Nahönñi akzan!”

* 3:9: Mak 4.1; Luk 5.1-3

¹² Mewö qetketka Jisösnöñ qetal engiba könönjamñan aukñe asuhubapuköra sonjo köhöikñi al engiyök. Mewö.

Jisösnöñ gwarekurupñi möwölöhöm engiyök.

Mat 10.1-4; Luk 6.12-16

¹³ Könañgep Jisösnöñ kundunje öngöba miangören nanñi sihimñangö dop azi engoholiga yangören kaget. ¹⁴ Kagetka azi 12 mi yambuk malmegöra al engiba Buña keunji jim sehimegöra melaim engiyök. ¹⁵ Melaim engiba ömewöröme közöl engimegö kukösumñi engiyök.

¹⁶ Mewö aka azi 12 ki kewö al engiyök: Pitö, Jisösnöñ qet mi Saimon wañgiyök. ¹⁷ Jeims aka munñi Jon, iwiñiri qetñi Zebedi. Jisösnöñ yetkö qetñiri kun Boanerges qerök. Mi nanine keunöñ Pöndandañgö Nahönyahötñi. ¹⁸ Andru, Filip, Bartolomyu, Matyu, Tomas, Jeims Alfiusgö nahönñi, Tadius, Saimon Zelot-politik azia* ¹⁹ aka Judas Iskariot. Kariot azi miangön könañgen Jisös mamalolo mem wañgiyök. Mewö.

Jisösnöñ öme yeñgö kukösumñini ongita qei etza.

Mat 12.22-32; Luk 11.14-23; 12.10

²⁰ Jisösnöñ mi al engiba kunduneyök eta nanñi miriñe kayök. Mire kaiga ambazip kambu ketanji kunbuk kangota tokogetka mönö miangöra tosolomñi yembuk nene nembangö osiget. ²¹ Osigetka sepkitipurupñan mi möta “Urunji lök sohoza!” jiget. Jiba geba wañgitpingöra anget.

²² *Angetka Köna keugö böhi Jerusalemök kageri, yeñon jiget, “Satangö Katakömulatnöñ mönö urunje geiga malja. Yañon öme yeñgö kembuñinañgö ösumnöñ ömewöröme enguatanömakza.”

²³ Mewö jigerangöra Jisösnöñ engoholi kagetka dopkeunöñ kewö jii mötket, “Satanöñ mönö denöwö alañi Satan kun wuatañgöbawak? ²⁴ Kantri kungö galömurupñinan sutñine angururuk aka julme ewö yeñon mönö galömkölköl nupñini memba kinbingö osime. ²⁵ Mewöyök miri kungö könagesö yeñon sutñine angururuk aka julme ewö, mönö galömkölköl nupñini memba kinbingö osime. ²⁶ Mewöyök Satangö könagesö yeñon sutñine angururuk aka tuarenjon ak angubeak ewö, galömkölkölñinañgö ösumñan eriga bemtohonñinan mönö qahöwakñamgö akza.

²⁷ Kunñan azi köhöikñangö köna böröñi mutuk qahö jöhöma ewö, yañon mönö miriñe öngöba qezanda sukinapñi memangö osima. Mutuk i jöhöi tarigun mönö ölop miriñeyök öroyuaiñi pakpak wañgita memba anma. (Miangö dop nöñon

* **3:18:** Nasönöl pati zelot yeñon Rom gawman tuarenjon aka nanñine kinkin membangöra tuaköpek memba malget. * **3:22:** Mat 9.34; 10.25

mewöyök Satan jöhöba andöŋe ömenji enġuataŋgömakzal.” Mewö.

Sinġisöndok mosötmosötŋi qahö

²⁸ Nöŋön keu ölnji kun kewö jibi mötme, “Ambazip ke-taŋi moröŋi sinġisöndok ahakzei, mi Anutunöŋ mosörakza. Lömbötŋambuk me awamŋi mepaqepaik akeak mönö mi Anu-tunöŋ saŋgoŋ enġima. ²⁹ *Saŋgoŋ enġimappmö, Kunŋan Uŋa Töröŋi ilita mepaikömawi, miangö sinġisöndokŋi Anutunöŋ mönö nalö kunöŋ qahö mosötma. Saumban! Sinġisöndok mianön mönö qakŋe öŋgöiga nalö teteköŋi qahö Anutugö jeŋe keuŋambuk malma.” Mewö jiyök. ³⁰ “Ömenöŋ uruŋe geyöhawa malja,” Jigeranġöra aka mewö kusum enġiyök. Mewö.

Jisösgö nam-munurupŋi.

Mat 12.46-50; Luk 8.19-21

³¹ Mewö eraum mötketka nam-munŋan kaba yaigep kinda yeŋgören etmapkö keu alget yaŋgören anök. ³² Aniga ambazip kambu yeŋön liliköm waŋgiba tata kewö jiget mörök, “Mötnöŋ! Göhö nam-mungan mönö yaigep kinda göhöra qesize.”

³³ Jigetka melenġa kewö jii mötket, “Nöŋgö namni mi daŋön aka munurupni daŋön?” ³⁴ Jisösnöŋ mewö jiba ambazip liliköm waŋgiba tatkeri, i uba enġeka kewö jiyök, “Eket nöŋgö namni aka munurupni mönö ki. ³⁵ Anutugören jitsihitŋi tem kölahakzei, mienön mönö nöŋgö namni aka nen-munurupni akze.” Mewö.

4

Qesiŋ gilgil azigö dopkeu

Mat 13.1-9; Luk 8.4-8

¹ *Jisösnöŋ kunbuk o anġö jitŋe geba könahiba kusum enġiyök. Kusum enġiiga ambazip kambulelebenöŋ yaŋgören anda tokogetka waŋgenöŋ öŋgöba o anġö qakŋe anda tarök. Tariga ambazip pakpak yeŋön anġö görane saknöŋ tokoget. ² Mewö tokogetka dopkeu gwötpuk jiba kusum enġiyök. Kusum enġiba kewö jiyök.

³ “Mötket! Azi kunŋan nene kötŋi qesiŋ gilmangöra nupnöŋ anök. ⁴ Anda qesiŋ giliga kötŋi tosatŋan köna jitŋe geba kölget. Geba kölgetka (warawen) neiŋi neiŋi kaŋgota mi nem teköget. ⁵ Kötŋi tosatŋan köt jamönjiŋnöŋ geba kölget. Geba köla miangören gölme gwötpuk qahö mi-wikŋaiget. Gölme dutŋi qahö ahöyöhanġöra korapŋi zilaŋ kotket. ⁶ Kotketmö, wehönöŋ kota enguba jem kutum enġiiga jalöŋini qahöpköra soholiba gororonġöget. ⁷ Kötŋi tosatŋan sir-iuret wahinambuknöŋ miangören geba kölget. Geba kölgetka

* 3:29: Luk 12.10 * 4:1: Luk 5.1-3

mienjön kota qem turugetka böbölöhot mem enjiget. Mewö aka ölni qahö kuñguget. ⁸ Kötni tosatñan gölme ölöpnje geba kölget. Geba köla korapñini jula wahöta ipñinanğö ölnini ölöpnji asuhuget. Tosatñan kötnini 30, Tosatñan kötnini 60, tosatñan 100 miangö dop ahum sehiget.” ⁹ Mewö jiba jim teköyök, “Kunñan urukezapñambuk malja ewö, yañön mönö dopkeu ki kezap ala möt kutuma.” Mewö.

Jisösnöñ wanigöra dopkeu jiyök.

Mat 13.10-17; Luk 8.9-10

¹⁰ Kambu ketani yeñön denđa angetka Jisösnöñ nanñök tarök. Nanñök tariga gwarekurupñi 12 aka tosatñi liliköm wanğigeri, mi mohotñe dopkeu kienğö könaninanğöra qesim wanğiget. ¹¹ Qesim wanğigetka kewö melenđa jiyök, “Anutugö bemtohone anğota malbingö keu tölapñi mi enğöra aukñe jibi möt kutuzemö, yaigep maljei, yeñğöra mi pakpak mönö dopkeunöhök asuhumakza. ¹² *Mewö asuhuiga ‘Nanñini jeñinan yuai ekagun könani tøndup qahö möt kutume. Nanñini Kezapñinan keu törörök mötagun könani tøndup qahö möt asarime.

Mi möt asaribeak ewö, mönö ölop uruñini melengetka Anu-
tunöñ siñgisöndokñini mosötpawak.’ ”

Jisösnöñ dopkeugö könani jiyök.

Mat 13.18-23; Luk 8.11-15

¹³ Jisösnöñ toroqeba kewö jii mötket, “Dopkeu miangö könani kewö. Mi kude möt asarize ewö, dopkeu tosatñi pakpak jimami, mi mönö denöwö möt asaribeak? ¹⁴ Dop Keu miangö könani kewö: Qesiñgilil azinöñ Buña keu qesiñda gilja. ¹⁵ Nene kötni köna jitñe geba kölgeri, mi kewö: Buña keu qesiñ gilgetka ambazip uruñine gezapmö, mi mötketka Satanöñ miangöreñök kaba keu uruñine qesiñget geyöhi, mi qeköba enğuanğirakza. ¹⁶ Nene Kötni qesiñniga köt jamönjiñnöñ geba kölgeri, mi mewöyök ambazip söpsöpñi kun. Yeñön Buña keu möta miangöreñök sösongai qakñe möt anğön kölakze. ¹⁷ Mewö ahakzemö, uruñine jalöñi qahö ahöm enğimapmö, nalö töröptökñi miyök kin köhöiba malme. Buña keugöra aka kahasililiñ me sesewerowero asuhuiga nalö miangöreñök mönö tala enğuma. ¹⁸ Nene kötni qesiñniga siriuret wahinambuknöñ geba kölgeri, mi kewö: Yeñön Buña keu mötketka uruñine geza. ¹⁹ Gezapmö, gölmenöñ malmalgö waimanjatñi aka monen inap memegö urukönöpñi ahuba lömbörim enğimakzal. Qetbuñaninambuk akingö köpösöngögetka sihim kömbönani bölöñi tosatñan mewöyök uruñine dumgöba Buña keu böbölöhot mem wanğize.

* 4:12: Ais 6.9-10

Mewö aiga ölnini qahö gilipitni (ambetakni) akne. ²⁰ Nene kötni gölme ölopne qesiniga geba kölgeri, mi ambazip kewöni: Yenön Buña keu kezap ala möta möt anğön köla pöndañ kinda ölnini miwikñaimakze. Tosatñan keu jit mohoknöhök kötni 30 miwikñaimakze. Tosatñan ölnini 60, tosatñan keu köt mohot mohot mienğö ölnini 100 mem sehiba miwikñaimakze.” Mewö.

Lampe mi asakni neñgimapköra ahöza.

Luk 8.16-18

²¹ *Jisösnöñ keu kun kewö jiyök, “Kunñan lambe me kiwa memba ohotiriba kimbut me dum bapne alma me qahö? Mi waniñe alma? Mi mönö mianğö dum tatatnöñ aukne alma. ²² *Mewöñanök yuai kun asambötket ahözawi, mi mönö aukne asuhum tiñgitmapköra ahöza. Yuai kun köl turuget ahözawi, mi mönö lulunget kötulmapköra aka ahöza. ²³ Kunñan urukezapñambuk malja ewö, yañön mönö dopkeu ki kezap ala möt kutuma.” Mewö.

Denöwö diwelopmen ahuza?

²⁴ *Jisösnöñ keu kewö jii mötket, “Keu mötzei, mi mönö möt anğön köla urukönimñine ala köl guliba malme! (Mewö malgetka uruñini diñgiiga mötmötñinan qariiga möt kömume.) Inini tosatni yeñğö keuñini kewöta jim tekömei, Anutunöñ mönö jimkutukutuñini mohot mianğö dop nanñini keuñini kewöta jim teköma. Dop mi mönö oñgita likepni melen eñgima. ²⁵ *Mianğö könani kewö: Kunñan mötkutukutuñambuk maljawi, Anutunöñ mönö mi toroqem wañgiiga malmappmö, kunñan mötkutukutuñi qahö maljawi, Anutunöñ mönö mötmötñi moröñi ahözawi, mi mewöyök qeköba wañgitma. Mewö.

Buña keu kötni mi korapñambuk.

²⁶ Jisösnöñ dopkeu kun kewö jiyök, “Anutugöreñ bemtohonji mi kianğö dop: Azi kunñan nuwe anda nene kötni qesinida gilma. ²⁷ Qesinida gila anda sunğem silim ahöba wahöta ahöba wahoriga nene kötnañğö korapni jula korakze. Denöwö jula korakzei, mi nanñak qahö möt kutuza. ²⁸ Gölmenöñ nanñök nam köli ölni asuhumakza: Mutuk ipni, könanğep ölni aka mianğö andöñe ölnañğö kötni mi körek asuhuba qarim teköme. ²⁹ *Ölni qarim teköba öliiga ölni memegö nalöni aiga welenqe-geurupni melaim eñgiiga souñini kapenkapenğöni jitñinambuk memba ölni memingöra nupne anme.” Mewö.

Nejon kötnañğö dopkeu

Mat 13.31-32, 34; Luk 13.18-19

* 4:21: Mat 5.15; Luk 11.33 * 4:22: Mat 10.26; Luk 12.2 * 4:24: Mat 7.2;

Luk 6.38 * 4:25: Mat 13.12; 25.29; Luk 19.26 * 4:29: Joel 3.13

³⁰ Jisösnöñ dopkeu kun kewö jiyök, “Anutugö bemtohoñi mi wanatpuk dop albinak me wanat söpsöp keu jiba jim asaribinak? ³¹ Mi nejoñ kötñangö dop kewö akza: Kötñi mi morö közözömnji. Mi gölmegö nene köt pakpak mienjö eretñini akza. Mewö aiga nup gölmenöñ esize. ³² Esizemö, jula wahöta yöha pakpak engongita qariba böröñi ketanji gili anje. Mewö gili angetka könakembagö neiñi neiñi mienjön aipñini miangö aumñe alakze.” Mewö.

Jisösnöñ dopkeu gwötpuk jiyök.

³³ Jisösnöñ dopkeu mewöñi mewöñi mi gwötpuk jiba mala Buña keu jiiga mötket. Möt kutugerañgö dop mi jiiga möta malget. ³⁴ Nalö dopkeuñi pakpak mi dopkeunöñ jiba malök. Keuñi kun öne kude jiyökmö, gwarekurupñi yembuk nanñinök malgetka keu pakpak mienjö könañini mi jim asarim engiba malök. Mewö.

Jisösnöñ jiiga raidimbom göröñ qeyök.

Mat 8.23-27; Luk 8.22-25

³⁵ Wehön miangöreñ mare aiga Jisösnöñ gwarekurupñi kewö jii mötket, “Mönö mosöta angö kutuba likepñe angotpin.” ³⁶ Mewö jiiga ambazip kambu engömosöta Jisös wangigetka wanjenöñ tari anget. Wanje tosatñi mi mewöyök yembuk awatañ anget. ³⁷ Angetka raidimbom ketanjan ömtöröp (töröpñanök) giliga sirinöñ wanje uruñe gegetka wanje numbunje qemamgö ahök. ³⁸ Mewö aiga Jisösnöñ wanje teteköñe tata qömböñnöñ nariba gaun ahöyök. Gaun ahöiga gwarekurupñan anda möndöba jiget, “Hei böhi! Nini angönöñ ayuhubingöra akzin. Miangö waimanjatñi kun mötzan me qahö?”

³⁹ Mewö jigetka imbiñi möta luhut aka siri kewö jim qetal etkiyök, “Mönö bököba öne ahönöñ!” Mewö jiiga luhutnöñ döngöiga sirinöñ nöñ qeba ahöyök. ⁴⁰ Mewö aka kewö jim engiyök, “Inini mönö wuanöngöra kenjöt mötmöt azia akze? Denöwögöra aka Anutu qahö möt narize? Sömbunñini mönö öne mötze.”

⁴¹ Jiiga awöwöliba qem sömbunñini möta eraum mötket, “Yei, azi kia mönö denöwöñan malja? Yanön mönö luhut aka köwet jim kutum etkiiga jitñi tem köljahot?” Mewö.

5

Ömenöñ bau uruñine gegetka azinöñ ölöwahot.

Mat 8.28-34; Luk 8.26-39

¹ Mewö asuhuiga angö kutuba likepñe Gerasin yenjö gölmenöñ angotket. ² Angota körökñe öngögetka Jisösnöñ wanje mosöriga miangöreñök azi ömenambuk kun mi qaksirinöhök kaba kinda Jisös miwikñaiyök. ³ Azi mi qaksirinöñ

mala qamöt kötenji esiba urorohoget ahögeranğoren ahöm malök. Azi körekñön könabörönji tapep (muᅇgamuᅇga) kösönön jöhöbingö osiba malget. ⁴ Indimñji gwötpuk könanji tapep kösönön jöhöba börötakñi qeba malgetmö, börö takñi kusula köna kösönji titikutuba maliga körekñan i galöm köl osiget. ⁵ Osiba suᅇgem asak dop sundan qaksirigö köt kötenñön me kundunje lanlan ahöba malök. Mewö mala silata qeta silenji kötnön qem kutumutuba malök.

⁶ Jisösnön tikep kaiga eka ösumñan kaba gölmenön kösutñe geba simin kölök. ⁷⁻⁸ Simin köliga Jisösnön ömenji mi kewö jim waᅇgimamğöra ahök, “Öme bölönji! Gi mönö azi ki mosöta anön!” Mewö jimamğöra aiga qet bölöbölö ketanji qeta jiyök, “Aek! Gi Jisös, Anutu öᅇgöᅇgöᅇanğö Nahönñi akzan. Gi denöwö ak niᅇgimamğöra kazan? Nönön Anutugö jemeso-holñe ulet gihizal: Gi keu jöhöba jöjopan keunön jim köhöiba mönö sihimbölö könöpñambuk kude ak niᅇginön.”

⁹ Mewö jiiga kewö qesiyök, “Gi qetki niñi?” Qesiiga jiget, “Nini gwötpuk maljinanğöra qetnini Lijön jizin.” Mi nane keunön Kerök kambu ketanji. ¹⁰ Mewö jiba kapan köla kewö ulet waᅇgiget, “Gi neᅇguatanğöbanak, mewö mönö gölme kianğorenök kude melaim neᅇgiman.”

¹¹ Kösutñine kundunji marömñe miangören bau kambu ketanji kun gwözözak urunje kulunđa malget. ¹² Mianğöra ömenön kewö jiba Jisös ulet waᅇgiget, “Gönön melaim neᅇginönğa nini ölop bau miengö urunje gebin.” ¹³ Jigetka “Mönö anda geget,” jiba jim kutum enᅇiiga azi uruneyök kota anda bau urunje geget. Gegetka miangörenök bau kambu 2000 miangö dop mi mönö luhuba nembönembönön anda jororonğöba o anğönön geba nemulahöba kömuget.

¹⁴ Kömugetka bau galöm yeñön ölon unjurata taon aka miri morömorö miangören anda keu buzupñi jiget. Jiget mötketka ambazip sesegilgil yeñön yuai asuhuyöhi, mi ekingöra kaget. ¹⁵ Kaba Jisösgören kanğota eketka azi öme kambuñambukñön malöhanön mönö opo sileotanji törörök jöhöba tata urunji amöriiga imbi mötmötnji pakpak asuhiiga eka awöwöliget. ¹⁶ Kingetka bau mi denöwö geba kömugeru aka azi ömenambuk yanğoren yuai asuhuyöhi, mi ekeranön kösohot yahöt mi jiget mötket.

¹⁷ Möta kinda Jisösnön mindimindiri sel gölmeñini mosöta anmapkö ulet waᅇgiget.

¹⁸ Ulet waᅇgigetka mosöta waᅇgenön öᅇgömamğöra ahiga azi ömenambuk malöhanön kaba Jisösbuk mohotñe anda mal-mamğöra qesiyök.”

¹⁹ Qesiyökmö, Jisösnön qetal waᅇgiba kewö jii mörök, “Gi mönö mirige anda tinitosolomurupki enᅇeka Kembunön

angöletot ketanji aka ak-kömum gihiyöhi, mianjö kösohotnji jinönga mötme.”

²⁰ Mewö jiiga mosöta anda Jisösnöy angöletot ketanji ketanji ak wanjiyöhi, mianjö keunji könahiba Ten-taon distrik urunje jim sehiiga körekjan welipköget. Mewö.

Jairusnöy bōratjanjöra Jisös köuluköyök.

Mat 9.18-26; Luk 8.40-56

²¹ Jisösnöy wanjenöy öngöba lilingöba angö kutuba likepne kaiga ambazip kambu gwötpukjan yangören kaba tokogetka angö jitne kinget. ²² Kingetka köuluk mirigö keu galöm kun qetnji Jairus yanön kaba Jisös eka wösöne geba simin köl wanjiyök. ²³ Simin köl wanjiba kapan köla köuluköba kewö jiyök, “Bōratni morönan mönö kömumangö akza. Mönö kaba börögi qakne alnönga ölöwaka toroqeba malma.”

²⁴ Mewö jiba Jisös wanjiriga mohotne anohotka ambazip kambulembe yenön andönjire anda ölöqölököba liliköm etk-iba anget. Mewö.

Kawöl ambi kunöy Jisösgö malukunji misiriyök.

²⁵ Angetka mianjören sutjine ambi kun malök. Yanön (yara) yambu 12:gö dop köinöy ehiga nalö dop kawöl yöhöiga malök. ²⁶ Mewö mala sihimbölö gwötpuk möriga sile galöm gwötpukjan yangö nup megetka baukbauk kun kude miwiknaiba malök. Yanön sile galöm ambazip yengö töwaninanjöra monej inapni körek gila malökmö, kawöljni mianön mönö mem bölim wanjiiga malök. ²⁷⁻²⁸ Mewö mala Jisösgö buzupni möta kewö jiyök, “Nöyön i oseimangö möt lömböröiba malukuneyök borom kun misiribilejak ewö, mönö ölöp ölöwakjam.” Mewö jiba ambazip kambu sutjine Jisösgö andöne anda malukunje misiriyök.

²⁹ Misiriiga sepni mianjörenök jöpköiga qemjem-mamjenan qahöwahiga silenjan ölöwahiga mörök. ³⁰ Ölöwahiga Jisösnöy mianjöreök ösumni kun kutuba anöhi mi möta ambazip kambu sutjine lilingöba jiyök, “Danön malukuni misiriza?”

³¹ Mewö jiiga gwarekurupjan kewö jiget mörök, “Ambazip kambunöy ölököba liliköm gihiba goseize. Mi eka denöwö ‘Danön nömisiriza?’ jizan?”

³² Mewö jigetmö, Jisösnöy kunbuk “Danön mi akza?” jiba mi miwiknajaimangöra lilingöba uba engehök. ³³ Engehiga ambi silenje angöletot asuhuyöhi, yanön mi möta mianjöra kenjötni möta jönömni unduiga kaba Jisösgö wösöne geba simin köla könanji pakpakjiiga mörök. ³⁴ Jisösnöy mi möta kewö jii mörök, “Bōratni, mötnaripkan mönö mem ölöwak gihiza. Qemjem-mamjenan mönö qahöwahiga ölöp urubönjöyönöy anman.” Mewö.

Jisösnöñ Jairusgö böratñi mem guliyök.

35 Keu mewö jiba kiniga köuluk mirigö keu galömñangö mireyök kunñan welen kaba Jairusgöra jiyök, “Böratki kömuza! Mianğöra böhigö qakñe lömböt toroqeba kude alman.”

36 Jiiga Jisösnöñ keu mianğö nönöñgan aka köuluk mirigö keu galömñi kewö jii mörök, “Keñgötki kude mötnöñ! Mönö ni möt narim niñginöñ.” 37 Mewö jiba ambazip tosatñi enğömosöta Pitö, Jeims aka Jeimsgö munñi Jon miyök enğuanğiri i wuatangöba anget. 38 Anda köuluk mirigö keu galömñangö mire anğotketka ambazip kambu göju megetka enğehök. Gwötputkñan jinğen köla köhöikñanök sahöta amburereñ meget. 39 Enğeka mire öngöba kewö jii mötket, “Injini mönö wuanöngöra göju memba sahötze? Morö mianğön qahö kömuzapmö, gaunök ahöza.”

40 Mewö jii mötket gönahit ewö aiga gön köl wañgigetmö, yañön i körek enğuatangöba morögö iwinamñi aka tosatñi yambuk malgeri, miyök enğuanğiriga morönöñ ahöyöhañğöreñ öngöget. 41 Öngögetka börat mi böröñe memba yañğöra jiyök, “Talita kum.” Mi nanine keunöñ Ambi moröñi, ni göhöra jizal: Mönö wahötnöñ!

42 Mewö jiiga ambi (yara) yambuñi 12 mianğön mönö mianğöreñök wahöta kinda anda kayök. Mewö aiga eka kesötñini yöhözömgöba welipköget. 43 Welipkögetka mianğö buzupñi kun jiget mötpepukö jiba sonjo köhöikñi al enğiyök. Al enğiba ambi moröñi numbu nene wañgiget nemapkö jiyök. Mewö.

6

Nazaret yeñön Jisös andö qeget.

Mat 13.53-58; Luk 4.16-30

1 Mi asuhuiga Jisösnöñ Jairusgö miri gölme mosöriğa gwarekurupñan wuatangöba yambuk anda Jisösgö malqarip taonön anğotket. 2 Sabat kendonöñ kaiga köuluk mire öngöba Buña keu könahiba kusum enğiyök. Kusum enğiiga möta ambazip gwötputkñan auruba welipköba kewö jiget, “Yei, kezapjupjup! Yuai pakpak ki mönö denikeyök möta jiza? Mötkutukutuñi mi mönö dañön kusum wañgiiga jiza? Aka anğöletot kukösumñinambuk mewöñi mi mönö dañön inahöi böröñan meiga asuhuze? 3 Azi ki mönö miri kianğö mitimqege azia. Mariagö nahönñi aka Jeims, Josef, Juda aka Saimon yeñgö datñina. Nenurupñan mönö sutnine ki malje.” Nazaret yeñön mewö jigetka uruñinan böliiga mianğöreñ qaköget.

⁴ *Qakögetka Jisösnöj kewö jii mötket, “Kezapqetok azigö sepkitip aka tinitosolomurupñan mönö nanñi taonöj jijiwilit ak wanğimakzemö, miri tosatñi miangörej mewö qahö.

⁵ Mewö akerangöra Jisösnöj kawöl ambazip mohot mohot böröñi qakñine ala mem ölöwak engiyökmö, angöletot kukösumñinambuk tosatñi memangö osiyök. ⁶ Mewö ahiga mötnaripñinan qahö asuhuiga yangisenjanangöra aka auruyök. Auruba Nazaret mosöta kösutñe miriñi miriñi liliköba Buña keu kusum engiba malök. Mewö.

Jisösnöj gwarekurupñi 12 melaim engiyök.

Mat 10.5-15; Luk 9.1-6

⁷ Jisösnöj gwarekurupñi 12 mi engoholi kagetka könahiba yahöt yahöt pakpak melaim engiyök. Melaim engiba ömewöröme közöl engimegö kukösumñi engiyök. ⁸ *Mi engiba kewö jim kutum engiyök, “Köna anmeangöra öröpñini memba anme. Yuai tosatñi kun kude meme. Köna nalem qahö, gösö qahö me soujeñi mi irimunganine kude jöhöme. ⁹ Köna esu ölop könañine jöhöba maluku semönñi qahöpmö, mohot meme.” ¹⁰ Mewö jiba kewö jii mötket, “Anda miri denike denike angotmei, mönö miangörejök mala nup memba taon mi mosöta köna anme. ¹¹ *Anda mala miri kunöj angotketka qahö köl öröm engiba keuñi qahö mötketka nesampurekñini mönö kewö jiba kondel engime, ‘Nini engö gölmenöj kainga sölbuham köna tambönine mekötahözawi, mi mönö tim tönjöraringa nanñine lilingöba gema.’ Mewö jigetka könañamñini solanñi möt kutugetka ölop miri me taon mi mosöta toroqeba anme.”

¹² Mewö jiuga mosöta anda ambazip uruñini melemegö Buña keuñi jim sehiba malget. ¹³ *Mala öme gwötpuk enğuatangöba kawöl ambazip gwötpuk kelöknöj engömiriba mem ölöwak engiget. Mewö.

Kiñ Herodnöj kenğötñi mörök.

Mat 14.1-12; Luk 9.7-9

¹⁴ *Jisösgö qetbuñan sehiba kiñ Herodkö kezapñe gei mörök. Ambazipnöj kewö jiget, “Jon o melun azinöj mönö kömupnöhök wahöta nupñi meiga angöletot kukösumñinambuk asuhumakze.”

¹⁵ Mewö jigetmö, tosatñan kewö jiget, “Mi mönö Elaija (Elia)” Tosatñan toroqeba jiget, “Mi kezapqetok azi walñi yeğöreñök kun.”

¹⁶ Mewö jigetmö, kiñ Herodnöj mi möta kewö jiyök, “Jon o melun azi nöñön jibi jölñi kutugeri, yanñon mönö kömupnöhök wahöta malja.” Waimanjat möta Mewö jiyök.

* 6:4: Jon 4.44 * 6:8: Luk 10.4-11 * 6:11: Apo 13.51 * 6:13: Kemb 5.14

* 6:14: Mat 16.14; Mak 8.28; Luk 9.19

Jongö jölñi kutugetka kömuyök.

17 *Mi kewögöra jiyök: Herodnön munñi Filipkö anömñi Herodias ölöñ meiga Jon o melun azinön kiñ jim wañgiiga opotöröp melaim enñiiga anda Jon memba jöhöba kösö mire al wañgiget. 18 Jonön Herodköra keu kewö jiyök: Gi qamböt ki memba mala Köna keu oñgitzan.”

19 Mewö jiiga Herodiasnön Jon kazik ak wañgiba qeget kömumapkö mörökmö, miangö könañi kun qahö miwikñaiyök. 20 Qahö miwikñaiiba Jonön azi solanñi aka sarakñi töröñi ahöhi, mi möta sel jöhöba kölközizip ak wañgiba Jongöra kenğöñi möta malök. Mewö mala Jongö jitñeyök keu möröhi, mi uruñi kuñgugetka keu gwötpuköra uruyahöt ahök. Mi töndup töndup Jongö keuñi mötmangö sihim mörök.

21 Mewö aiga Herodiasnön Jon qemamgö könañi qahö miwikñaiiba maliga miangö nalöñi ölöñi kewö kam kuñguyök: Kiñgö ahuahü nalöñan kaiga közölömbuan ala jembon aka suahö galömurupñi aka Galili prowinsgö jitñememe bohonñi mi köl öröm, enñiiga kaba tatket. 22 Kaba tatketka Herodiasgö börtanñan miri miangö uruñe kañgota danis aliga Herod aka yambuk tebol liliköba tatkeri, yeñön miangö eksihimñi gwötpuk mötket. Mewö mötketka kiñnön ambi seramgöra kewö jiyök, “Börtanñi! Wani yuaigöra sihimgi mötzani, mi ölöp qesinönga tököm gihimam.” 23 Mewö jiba keu mi jöjopañ keunön jim köhöiba kewö jii mörök, “Wani yuaigöra qesim niñgimani, mi mönö ölöp gihimam. Yuai mi me mi me prowins galöm kölakzali, mi tok ölöp endenña likepñi kun gihibiga galömñi akñan.”

24 Mewö jii möta yaigep anda namñi kewö qesim wañgiyök, “Namni, ni mönö Kiñnön wani yuaiya niñgimapköra qesimam?”

Mewö qesim wañgiiga kewö melenök, “Mönö jinönga Jon O-melun azigö jölñi yandigetka nöropñi memba kaba niñgiman.”

25 Mewö melenniga miangörenök miri uruñe kiñkiñgöba kiñgören öngöba kewö qesiba jiyök, “Kewöni! Nönön sihimnan kewö mötzal: Göñön mönö jimkutunönga Jon O-melun azigö jölñi yandiba nöropñi memba kaba köndenön algetka mia döldöpki niñgiman.”

26 Mewö jiiga kiñgö uruñan kömbuñiiga wösöbirik mörökmö, jöjopañ keuñan jöhöi ketaurupñan mi mötketka yeñgö jemesoholñine etpapaköra qequesiñi andö qemamgö möt lömböriba tököyök. 27 Tököba miangörenök opotöröpñi kun melaiba jiyök, “Gi mönö anda Jongö jölñi yandiba nöropñi memba kaman.” 28 Mewö jiba melaiiga kösö miri gwaröñe anda jölñi yandiba nöropñi memba kaba köndenön ala ambi seram

* 6:17: Luk 3.19-20

mi wan̄giiga nam̄ni wan̄giyök. ²⁹ Jongö gwarekurup̄nan mian̄gö buzup̄ni möta anda qamötn̄i memba qaksirigö köt kötejn̄öñ ala löm kölget. Mewö asuhuyöhan̄göra kin̄ Herodn̄öñ könan̄gep̄ Jisösgöra jiyök, “Jonöñ mönö kömup̄nöhök guliba wahöta malja.” Mewö.

Jisösnöñ azi 5000 nene gumohom en̄giyök.

Mat 14.13-21; Luk 9.10-17; Jon 6.1-14

³⁰ Melai melai azi Aposol yeñön Jisösgöreñ kaba tokoba yuai memba ambazip̄ kusum en̄gigeri, mian̄gö kösohot̄ni pakpak jiget mörök. ³¹ Jiget möriga ambazip̄ totn̄öñ totn̄öñ qösösök kaba anda aketka sileñini köñgan̄jiiga nene nemingö nalö qahö ahöyök. Mian̄göra Jisösnöñ gwarekurup̄ni kewö jii mötket, “In̄ini mönö kaba gölme kötik̄ne naninök malbingöra anda borom kun luhut meme.” ³² Mewö jiiga en̄gömosöta wan̄genöñ öngöba gölme kötik̄ni kungen nan̄jinök malbingöra anget.

³³ Angetka ambazip̄nöñ mi eka gwötpuk̄nan mian̄gö buzup̄ni möta taon aka miri dop miengöreñök gölme köna kin̄kin̄göba mutuk anda mian̄göreñ an̄gotket. ³⁴ *An̄gotketka Jisösnöñ wan̄genöhök eta ambazip̄ kambu ketan̄i en̄gehiga lama galöm̄ni qahö tandök ilingösöñ lan̄ malgetka yeñgöra wösöñi mörök. Wösöñi möta könahiba Buña keu könan̄i könan̄i kusum en̄giyök. Mewö.

Jisösnöñ azi 5000 nene gumohom en̄giyök.

³⁵ Mewö aka maliga miri jeñan teköba gemangö ahiga gwarekurup̄nan Jisösgöreñ kaba kewö jiget, “Böhi! Nini gölme kötik̄ni kian̄göreñ malinga miri lök söñaumangö akza. ³⁶ Mian̄göra gi ölop̄ ambazip̄ ki melaim en̄ginöñga miri aka koum dowe dowe tat an̄jei, mian̄göreñ anda numbu nenen̄ini söñgöron̄i memba neget.

³⁷ Mewö jigetmö, kewö melen̄da jii mötket, “En̄ön mönö nan̄jinak i nene gumohom en̄gime.” Mewö jiiga jiget, “Neñön mönö denöwö akinto? Nup meme nalö 200:kö töwan̄i (Kina 1000,-) ahöza. Moneñ mia memba anda nene beret söñgöron̄i memba gumohom en̄gibingöra jizan me?”

³⁸ Mewö qesim wan̄gigetka jiyök, “Nan̄jine nene beret dawik ahöza? Mi anda eket.” Mewö jiiga gösöñini qeand̄a jiget, “Beret 5 aka söra yahöt mia memba maljin.”

³⁹ Mewö jigetka Jisösnöñ ambazip̄ kambu kewö jim kutum en̄giyök, “Ambazip̄ pakpak, in̄ini mönö den̄da nene nemingö kambu morömorö tokoba lup̄lup̄ görök̄ne geba tatket.” ⁴⁰ Mewö jim kutum en̄jiiga kambun̄i kambun̄i dowe dowe den̄da tatket. Kirip tosat̄ni 100 aka tosat̄ni 50 mewö mewö

* 6:34: Jan 27.17; 1 Kin 22.17; 2 Hist 18.16; Eze 34.5; Mat 9.36

tokoba tat anget. ⁴¹ Tat angetka beret 5 aka söra yahöt mi memba Suepnöŋ ui öngöiga kötuetköba beret mindipköba gwarekurupŋi enŋiiga ambazip kirip dop mendenŋa sutŋine alget. Söra yahöt mi mewöyöhök kambu pakpak yenŋöra mendenök. ⁴² Mendenŋiga ambazip körekmakörek nemba nem timbireŋ aket. ⁴³ Nem timbireŋ aka nene kitipŋi kitipŋi mosötkeri, mi gwarek yenŋön qezakögetka sakap 12 mianŋörenŋeba kokolak qeyök. Mewöyök söra kitipŋi mi mem kiripköget. Mewö. ⁴⁴ Azi beret negeri, yenŋö jaŋŋöŋini mi 5000.

Jisösnöŋ o anŋö qakŋe tiba tiba anök.

Mat 14.22-33; Jon 6.15-21

⁴⁵ Neget teköiga Jisösnöŋ mianŋörenŋök gwarekurupŋi jim kutum enŋiba kewö jiyök, “Inŋini mönö waŋgenöŋ öngöba qelŋine o anŋö kutuba likepŋe Betsaida mire anme. Nöŋön ölop nalö sutŋe ambazip kambu ki melaim enŋibagun kamam.” ⁴⁶ Mewö jiba yaizözkök jim enŋiba enŋubula kundune öngöba köuluköyök. ⁴⁷ Köuluköba mali mare ahiga nanŋik kötikŋi kundune maliga waŋgenŋinan anŋö bibiŋe anök. ⁴⁸ Ani lökuatnöŋ qeba qem bibihiba nanŋöget aniga luhutnöŋ angeranŋörenŋök gila kai lömböriiga bömbömgöget. Miri awöraŋŋöiga (3-6 kilok) mianŋörenŋ Jisösnöŋ mewö enŋeka o anŋö qakŋe tiba tiba gwarekurupŋi yenŋörenŋ Kaba enŋonŋitmangö ahök. ⁴⁹ O anŋö qakŋe tiba tiba kaiga eka “Köwet Sonŋoriŋnöŋ kaza!” jiba könahiba qeta silatket. ⁵⁰ Qeta silata körek i eka kenŋötporiŋ aketmö, Jisösnöŋ mianŋörenŋök keukeu jiba kewö jii mötket,

“Alaurupni! Mönö ewebibiŋinambuk saitiŋgit malme. Nanak kazal. Kenŋötŋini kude mötme.” ⁵¹ Mewö jiba yenŋörenŋ waŋgenöŋ öngöiga luhutnöŋ nöŋ qeba göröŋ alök. Göröŋ aliga jönömŋini undui önöŋi qahö auruget. ⁵² Mutuk beret mem sehiba gumohom enŋiyöhi, mianŋö könaŋi qahö möt asariŋgetmö, uruŋinan gwözönŋiga tok auruba tatket. Mewö.

Jisösnöŋ Genesaret mala mem ölöwöwak nup meyök.

Mat 14.34-36

⁵³ O anŋö kutuba likepŋe Genesaret mire anŋota waŋge mosöta saknöŋ geget. ⁵⁴ Waŋge mosöta Saknöŋ gegetka ambazipnöŋ Jisös mianŋörenŋök möt kutum waŋiget. ⁵⁵ Möt kutum waŋgiba keu algetka kiŋkiŋgöba mindimindiri sel gölmeŋine miri dop liliköget. Lilikögetka möta könahiba kawöl ambazip kululunöŋ anŋum enŋiba Jisösnöŋ miri denike malöhanŋö dop enŋuanŋita kaget. ⁵⁶ Miri dop, taon, miri me koum kungö uruŋe anöhanŋö dop kawöl ambazip enŋuanŋita sombemŋine al enŋiget. Al enŋiba silene me Jisös malukuŋanŋö

sunje misiribingö ulet wanjiba malget. Misirigeri, körek yeñon mönö ölöwak teköget. Mewö.

7

Ambösakon yeñon keu kusum sohoget.

Mat 15.1-9

¹ Köna keugö kapañkölköl aka miangö böhi tosatni Jerusalem sitinöhök kageri, yeñon Jisösgöreñ kaba tokoget.

² Nalö miangöreñ Jisösgö gwarekurup tosatnan böröñini kude sanjonnda dom amöt qahö qeba nene negetka engeka uruñini böliyök.

³ Farisi (Köna keugö kapañkölköl) aka Juda ambazip tosatni pakpak yeñon ambösakon yeñö silikñini wuatangöba malget. Miangöra böröñini mutuk sanjon soroköbagun nene nemalget.

⁴ Mewöyök nupnöhök me maketnöhök kamei, mutuk o utuba arim tönjoratagun nene misirimalget. Mewöyök kiwi qambi, közökimbut aka jout pakpak mi sanjonnda amöt qemalget. Silik mewöñi mewöñi mi gwötpuk wuatangöba malget.

⁵ Miangöra Köna keugö kapañkölköl aka miangö böhi yeñon Jisös kewö qesim wangiget, “Göhö gwarekurupkan wuanöngöra ambösakoninañgö silikñini qahö wuatangöba böröñini domamöt qahö qeba töndup nene neze.”

⁶ *Mewö qesim wangigetka kewö jii mötket, “O urumelenjö silesile ambazip, kezapqetok azi Aisaianöñ mönö engö könañamñini törörök indela Buzup Kimbi kun kewö ohoi ahöza,

‘Ambazip kambu kianñon mönö numbu jitñinan ölopñanök göda qem ningimakzemö, uruñinan nönöngan ak ningiba kungen algetka köröwen ahöza.

⁷ Mewö ahöiga nöngö waikni öne töhön memba möpösem ningimakze.

Köna keu kusum engibin, jiba salupñe ambazip yeñgö jimkututuñini mi numbu o alakze.’

⁸ Aisaianöñ mewö ohoyök. Injini mönö miangö dop Anutugöreñ jöjopañ keu andö qeba ambösakonñinañgö silikñi wuatangömakze. Mi qahö dop kölja.”

⁹ Mewö jiba kewö jiyök, “Nanñini silikñini walñi wuatangöbingöra mönö ölopñanök Anutugöreñ jöjopañ keu qeapkömakze. ¹⁰ *Miangö keuñi kun kewö: Mosesnöñ kewö jim kutuyök, ‘Iwinamgi mönö göda qem etkimakñan,’ aiga

‘Kunñan iwinñi me namñi qesuahömawi, i mönö qegetka kömuma.’ ¹¹ Mewö jim kutuyökmö, injini keu mi ongita kewö jimakze, ‘Kunñan iwinamñi yetköra kewö jima. Wösöni mötzal. Nöngö nanñonañgö yuaini buña qem angubahorak, mi

* 7:6: Ais 29.13 * 7:10: Eks 20.12; 21.17; Lew 20.9; Dut 5.16

lök Anutugö danje tahaya albi ahöza. Mi saiwap naluköra kewöta albi ahöza. ¹² Kunjan mewö jiiga dop kölma. Mewö jiba jöhöm wanjigetka iwinamni yetköra baukbauk kun qahö toroqeba etkimakña. Mi qahö dop kölja. ¹³ Yei! Mewö aka nanjini ahakmemeñinanjö silikñini jim kutuba mianjón Anutugören jöjöpañ keu utala omani aka pömsöm qemakza. Injini yuai mewöni gwötpuk ahakze.” Mewö melen enjyök. Mewö.

Azi uru mi denöwö tölohoba lantiza?

Mat 15.10-20

¹⁴ Jisösnöñ ambazip kambu kunbuk engehoholi kagetka kewö jii mötket, “Injini mönö körek keu ki kezap ala möt asarime. ¹⁵ Azi yaigepneyök yuai uruñe gemakzawi, mianjón mönö tölohom wanjimamgö osimakzadmö, nanjini urukönömneyök keu kota erakzawi, mianjón mönö tölohom wanjimakza. ¹⁶ Kunjan kezapñambuk malja ewö, yanjón mönö keu ki kezap ala möt kutuma.” Mewö.

¹⁷ Jisösnöñ mewö jiba ambazip kambu engehomosöta anda miri kunöñ öngöyök. Öngöba tariga gwarekurupñan dopkeu mianjö kónañanjöra qesiget. ¹⁸ Qesigetka kewö jii mötket, “O alaurupni, injini mewöyök mötmötñini ölöpñi qahö akze me? Nene yuai azi yaigepneyök uruñe gemakzawi, mi tölohom wanjimamgö osimakza. Mi möt kutuze me qahö? ¹⁹ Mi urukönömñe qahö gemakzadmö, kömgokñe geba yaigep erakza.” Jisösnöñ keu mewö jiba mianjón “Numbu nene pakpak mem sarahim teköyök.”

²⁰ Jisösnöñ toroqeba kewö jiyök, “Azi urukönömneyök keu kota erakzawi, mianjón mönö tölohom wanjimakza. ²¹ Ambazip uru könömñineyök yuai kewöni asuhuba korakza: Keu bölöñi mötmöröba serowilin akingö mörakze. Yongorö memba suna jinan memba ambazip enjguget kömumegö mörakze. ²² Qesabulum akingö mörakze. Membagu memingö nepaqepalok köpösöngömakze. Bidañda gatmisimisi, jiliwitin aka isimkakalek akingö mörakze. Lösö jiba urupik akingö mörakze. Kezapjupjup aka körögisigisi akingö mörakze. Söngöröqök mala andöqeke keu yöhösan jiba Anutu mepaiköbingö mörakze. Jakbak-öranjörañ aka uruqahö ahakze. ²³ Yuai bölöñi pakpak mianjón mönö ambazip uru könömñineyök kota ambazip tölohom enjimakza.” Mewö.

Kenan ambi kunjan kapan köla köuluköyök.

Mat 15.21-28

²⁴ Jisösnöñ wahöta Genesaret gölme mosöta siti qetñiri Taiö aka Saidon mietkö distrik qetñi Fonisia mianjö uruñe anök. Anda miri kunöñ öngöba buzupñi kunjan mötpapaköra numbuñini muhungöyökmö, töndup tölapñe malmamgö osiyök.

²⁵ Osiiga mianğöreñök ambi kun bōratñi morōñan ömenjambuk maliga Jisösgö buzupñi möta yañğöreñ kaba könaje geba simin kölök. ²⁶ Ambi mi Judaya qahöpmö, Grik keu jiba malök. Iwinamñan Siria prowinsgö Fonisiagöra. Yañön bōratñanğö uruñeyök öme közölmapköra ulet wañgiyök. ²⁷ Ulet wañgiiga kewö jii mörök, “Juda nini mutuk nanine nahönbōraturupnini gumohom enğiinga bikñi enğuma. Mianğöra morö yeñğö miriñineyök beret memba kiam enğiinga qahö dop kölbpuk. Juda nini kianurup enğö qetñini kiam qerakzin. Nöñön mutuk Juda ambazip bauköm enğibiga kantri tosatñi enñön mönö kiamğö dop mamböta malme.”

²⁸ Mewö jii möta kewö meleşnök, “Kembu, mi ölop mötzalmö, kiam moröñi yeñön mönö mewöyök morö yeñğöreñ nene boromñi tebol bapñe eriga nemakze.”

²⁹ Mewö meleşniga Jisösnöñ kewö jii mörök, “Keu mewö jizanağöra ölop möt gihizal. Öme mianñön mönö dölki bōratki mosöta anja. Mianğöra ölop anman.”

³⁰ Mewö jii möta miriñe ani ömenöñ bōratñi mosöriğa dumñe ahöiga ehök. Mewö.

Jisösnöñ azi kun möhamğöyök.

³¹ Jisösnöñ kunbuk Taiö siti gölme mosöta Saidon sitinöñ anda oñgita mösököba Ten-taon gölmegö bibiñi oñgita Galiligö o añğö kösutñe kayök. ³² Kaiga kezapduhup azi kun keuñi qahöwakñapköra ahöhi, mi wañgita Jisösgöreñ kaget. Kaba bōröñi nöropñe almapköra qesim wañgiget. ³³ Qesim wañgigetka azi mi wañgita ambazip kambu mosöta kungen anohot. Anda Jisösnöñ bōrö suapñi kezapñe ala kinda kunbuk nanñi bōrö suapñe söutköba nesilamñe misiriyök. ³⁴ Misiriba suepnöñ ui öñğöiga osonğombuk köuluköba nanñe keunöñ “Efata,” nanine keunöñ Tohonöñ! mewö jiyök.

³⁵ Mewö jiiga kezapyahöñan tohoyohotka nesilamñan lolo-
hoiga keuñi ölopñanök jiyök. ³⁶ Jiiga Jisösnöñ mianğö buzupñi ambazip jiget mötpepuköra qetal enğiyök. Qetal enğiba kapan kölīga yeñön mi kapan köla jim sehiba malget. ³⁷ Jim sehiba malgetka ambazipnöñ kamböñda welipköba kewö jiget, “Yuai pakpak ölopñanök ahakza. Kezapduhup kezapñini metohoiga mötketka ambazip mötökñi yeñğö nesilamñini pösariga keu jimakze.” Mewö.

8

Jisösnöñ ambazip 4000 nene gumohom enğiyök.

Mat 15.32-39

¹ Nalö mianğöreñ ambazip kambu ketañan dumñe kunbuk tokoget. Neneñini qahö malgerağöra Jisösnöñ gwarekurupñi

engoholi yangören kagetka kewö jii mötket, ² “Nöñön ambazip kambu kienğöra wösöni mötzal. Yenön nöngören kaba wehön karöbut lök mala kotketka nenenjini qahöwahiga ekzal. ³ Yengörenök tosatñan köröwenök kaba malgetka nöñön ‘Ölöp miriñine anme,’ jibi nene qahö negetka öne melaim engibiga könanöñ anda mala kambañe jeñini gili tirinbirin akepuk.”

⁴ Mewö jiiga gwarekurupñan melenđa kewö jiget mörök. “Gölme qararanjökölñe kianğören kunñan mönö denikeyöhök numbu nene mewöñi mi mönö miwikñaiba kambu ki gumohom engibawak?”

⁵ Mewö möta kewö qesim engiyök, “Engören beret dawik ahöza?” Qesim engiiga “Beret 7 ahöza,” jiget.

⁶ Jigetka Jisösnöñ ambazip kambu mi gölmenöñ geba tatmegöra jim kutum engiiga geba tatket. Geba tatketka beret 7 mi memba Anutugö saiwap jiba mindipköba gwarekurupñi engiba ambazip kambu dop sutñine almegöra jiyök. Mewö jiiga miangö dop alget. ⁷ Yengören söra morömorö tosatñi mewöyök ahöyök. Mi tok memba kötuetsköba ambazip kambu dop sutñine toto qem engimegöra jim kutuyök. ⁸ Jim kutuiga engiget namba nem timbirengöget. Nem timbirengöba nene kitipñi mosötket geyöhi, mi sakap 7 miangören qezakögetka numbuñe qeyök. ⁹ Azi nene negeri, yengö jangöñi mi 4000. Negetka melaim engiiga miriñine anget. Mewö.

Böhi tosatñan angöletot ekingöra kapañ kölget.

Mat 16.1-4

¹⁰ Angetka miangörenök gwarekurupñi yembuk wañgenöñ öngöba distrik qetñi Dalmanuta miangören anget. ¹¹ *Farisi (Köna keugö kapañkölköl) tosatñan miangören kaba Jisösbuk könahiba jitnakölik aket. Keu bötaknöñ örömapköra esapköm wañgiba kewö kapañ köla qesiget, “Mönö jinöñga Suepnöhök angöletot kun asuhuiga ekin.” ¹² *Mewö jigetka uruñan lömböriiga osongombuk qeiga jiyök, “O ambazip nalö kewöñe gölmenöñ maljei, inini mönö wuanöngöra Anutugö aiwesök asuhumapköra kapañ kölake? Nöñön keu ölni kun kewö jibi mötme: Anutunöñ aiwesök mewöñi mi qahö memba kondel engima. Ombañ saumbañ!”

¹³ Mewö jiba engömosöta kunbuk gwarekurupñi yembuk wañgenöñ öngöba angö kutuba likepñe angotket. Mewö.

Farisi aka Herod yenön wösökömbuk ewö akze.

Mat 16.5-12

¹⁴ Mianğören angota semön memingö ölum enguiga beret mohot-töp mia wañgenöñ memba tatket. ¹⁵ *Tatketka Jisösnöñ

* 8:11: Mat 12.38; Luk 11.16 * 8:12: Mat 12.39; Luk 11.29 * 8:15: Luk 12.1

kewö jim kutum enġiyök, “Inġini Köna keugö kapanġkölköl (Farisi) yengö wösökömbukġini aka Herodkö gipmi kakġi mi-etköra mönö galömġini meme. Mi ölopġanġök qahö kewöta andö qegetka mietkön mönö yist ewö qariba mem bölim enġimahot.”

¹⁶ Jiiga keu pasetġi mi qahö möt asariba sutġine kewö eraum mötket. “Beretnini qahöpköra jiza me denöwö?”

¹⁷ Mi eraum mötket kezapġe geiga kewö jii mötket, “Wuanöngöra beretnini qahö jiba eraum mötze? Nöngö könaġamni mi wuanöngöra qahö möt kutuze? Mi tok qahö möt asarize me? Urukezapġinan gwözönda tatza me? ¹⁸ *Jeġini ahözapmö, töndup qahö ek kutuze me? Kezapġini ahözapmö, töndup qahö möt asarize me? Yuai asuhuyöhi, mi ölum enġuza me qahö? ¹⁹ Nöġön beret 5 mi 5000 yengöra mindipköbiga miaġgö kitipġi qezakögetka könde dawiknöġ geba numbuġine qeyök?” Qesim enġiiga “Könde 12,” jiget.

²⁰ Jigetka toroqeyök, “Nöġön beret 7 mi 4000 yengöra mindipköbiga miaġgö kitipġi qezakögetka sakap dawiknöġ geba kokolak qeyök?” Qesim enġiiga sakap 7 jiget.”

²¹ Jigetka jii mötket, “Miaġgöra könaġamni mi mönö tok qahö möt asarize me?” Mewö

Jegömöl azi kun jeġi metohoyök.

²² Jisösnöġ gwarekurupġi yembuk Betsaida taonöġ kaget. Miaġgöreġ kaba jegömöl azi kun waġgita Jisösgöreġ kaġgota böröġan misirimapkö köuluköm waġgiget. ²³ Köuluköm waġgigetka jegömöl azi mi böröġe memba waġgita miri yaigepġe anohot. Anda söutnezit jeġe ala böröġi nöropġe ala qesim waġgiyök, “Yuai kun ekzan me qahö?”

²⁴ Qesim waġgiiga jeġi ui öngöiga jiyök, “Ambazip enġekzalmö, mi ip tandöktandök aketka imutimutġanök enġekiga anda kaba kinje.”

²⁵ Mewö jiiga kunbuk böröġan jeyahötġi misiriiga to-hoyohotka törörök uiga asarim sölölöngöiga yuai pakpak ölopġanök ek teköyök. ²⁶ Ek teköiga melaim waġgiba kewö jii mörök, “Gi miri kungen kude anmanmö, diġdiġanök nangi mirige anman.” Mewö.

Pitönöġ Jisösgö könaġi jim miwikġaiyök.

Mat 16.13-20; Luk 9.18-21

²⁷ Jisösnöġ Betsaida mosöta gwarekurupġi yembuk Sisarea Filipai taongö kösutġe anget. Könanöġ anda gwarekurupġi kewö qesim enġiyök, “Ambazipnöġ nöngöra denöwö jimakze? Ni niġia akzal?”

* **8:18:** Jer 5.21; Eze 12.2; Mak 4.12

28 *Jiiga melenḁa kewö jiget, “Tosatḁan ‘Gi Jon O-melun azia akzan,’ jimakzemö, tosatḁan ‘Gi Elaija akzan,’ jimakze aka tosatḁan toroqeba kewö jimakze, ‘Gi kezapqetok azi walḁi yengörenḁok kun akzan.’

29 *Mewö jigetka kewö qesim engiyök, “Aka nanḁinak nöḁgöra denöwö jize? Ni ninḁa akzal?” Qesim engiiga Pitönöḁ kewö melenḁök,

“Gi Anutugörenḁ Amötqeqe Tonḁi Kraist akzan.”

30 Mewö jiiga könaḁi aukḁe jiget kunḁan mötpapuköra sonḁo köhöikḁi al engiyök.

Jisösnöḁ kömumamḁo keuḁi jiyök.

Mat 16.21-28; Luk 9.22-27

31 Jisösnöḁ gwarekurupḁi könaḁiba kewö kusum engiyök, “Suep gölmegö azi öḁḁan mönö sihimbölö gwötḁuk mötma. Kantrigö jittjememe, jike nup galöm aka Köna keugö böhi yeḁön mönö andö qeba qegetka kömuma. Kömui wehön karöbut teköiga kömupnöhök wahötma.” 32 Jisösnöḁ keu mi qahö köyatiba aukḁe jiiga Pitönöḁ miangörenḁok öröm waḁgiba göraḁe anda könaḁiba qetal waḁgiyök. 33 Qetal waḁgiiga lilingöba gwarekurupḁi uba enḁeka Pitö qetala kewö jim waḁgiyök, “Gi keu mötmörizani, mi Anutugörenḁ keuya qahöpmö, gölme ambazip aka Satangö sihima. Mianḁöra Satan, gi mönö döḁki nöḁgö jemesoholneyök kesalnöḁ.” Mewö.

Kraist wuatangöbingö söḁgörüḁi.

34 *Jisösnöḁ ambazip kambu aka gwarekurupḁi enḁoholi kagetka keu kewö jii mötket, “Kunḁan nöḁgö andöne kamamḁo mötzawi, yaḁön mönö nanḁi urusilenangö sihim kömbönaḁi bölöḁi andö qeiga sisitḁi megetka sihimbölö mi bisimakḁa. Mi maripomnöḁ kömumawaḁgö dop mököstöḁa ni nuatanḁöba kama. 35 *Kunḁan malmalḁi nanḁangöra angön köla nanḁi imbi-imbi maljawi, yaḁön mönö malmalḁi öḁḁi jöhöi sohoma. Sohomapmö, kunöḁ gölmegö malmalḁi mi ni aka nöḁgö Ölöwak Buḁanangöra aka köḁḁa tököm niḁimawi, yaḁön mönö malmal öḁḁangö könaḁi miwikḁaiba köhöiba malma. 36 Kunḁan gölmeḁi gölmeḁi mienḁö öröyuaḁi pakpak köḁ öroi buḁaḁi an teköiga uruḁangö malmalḁi mem sohoba silebile mala kömuiga Anutunöḁ keuḁi jim teköiga uḁaḁan ayuhuiga qahö dop köḁma. Sukinapḁi mianḁön mönö urusöstöḁgai qahö ak waḁgima. Qahöpmahöp! 37 Körek neḁön mönö bohönini jöhöbingö osibin. 38 Ambazip kambuḁi kambuḁi nalö kewöḁe gölmeḁöḁ qesabulum aka siḁgisöndok tosatḁi aka malakze. Kunḁan yeḁgö sutḁine nöḁgö qetni aka

* **8:28:** Mak 6.14-15; Luk 9.7-8 * **8:29:** Jon 6.68-69 * **8:34:** Mat 10.38; Luk 14.27 * **8:35:** Mat 10.39; Luk 17.33; Jon 12.25

Buŋa keuni memba et aljawi, mi Suep gölmegö azi ölnan mewöyök ehöröŋ köлма. Yaŋön könanŋep Suep garata töröŋi yembuk ki etketka Iwiŋanŋö asakmararaŋi eka aurugetka yaŋön azi me ambi mewöŋi mönö ehöröŋ köl waŋgima.” Mewö.

9

¹ Mewö jiba kewö jii mötket, “Nöŋön keu ölni kun kewö jibi mötme: Kianŋöreŋ kinjei, enŋö sutŋineyök tosatŋan Anu-tunöŋ bemtohoŋi kuŋguiga kukösumŋan asuhumawi, mi ek kutume. Jebuk mala kömupkö sihimbölöŋi qahö mötketka asuhum tinŋiriga ekŋe.” Mewö.

Jisösgö silenŋe letotqetot ahök.

Mat 17.1-13; Luk 9.28-36

² *Wehön 6 teköiga Jisösnöŋ Pitö, Jeims aka Jon enŋuanŋita ambazip enŋömosöta nanŋinök kundunŋi köröpŋi kunöŋ öngöba kötikŋe malget. Mianŋöreŋ malgetka jemesoholŋine kiniga Jisösgö sile tandökŋan letota murutŋi ahök. ³ Malukuŋan tuat lalamŋi asakmararaŋambuk ahök. Gölmönöŋ opo tu-atŋi saipenöŋ (omo bliz) saŋoŋmakzei, mönö mi onŋita tu-ariyök. ⁴ Mewö aiga Elaija aka Moses yetköŋ asuhum enŋiba Jisösbuk keukeu jiget. ⁵ Jigetka Pitönöŋ könahiba keu jiba Jisösgöra kewö jiyök, “Ketaŋamnini! Neŋön kianŋöreŋ uruölöwak mötzin. Mianŋöra neŋön ölop koun karöbut qebin: Göhö kun, Mosesgö kun aka Elaijagö kun.” ⁶ Gwarek yeŋön jönömŋini gwötpuk unduiga Pitönöŋ “Denöwö jimam,” jiba keu jaruyök.

⁷ *Keu jaruba kiniga unuŋununŋ tuat lalamŋi asakmararaŋambuk kunöŋ eta aumŋan esuhum enŋiiga mianŋö uruŋeyök qet kun kewö eriga mötket, “Azi ki nani wölböt nahöna akza. Mönö yaŋö keunŋi möta malme.” ⁸ Keu mi möta könöpuk liliŋöm purik um jaruba tosatŋi kunbuk qahö etkeketka Jisösnöŋ nanŋök yembuk kinök. Mewö.

Jon O-melun azi mi Elaijagö salupŋi akza.

⁹ Kundunŋeyök etketka Jisösnöŋ sörokŋi mianŋöreŋ kewö jim kutum enŋiyök, “Inŋini yuai ekzei, mianŋö buzupŋi mi mönö ambazip kun kude jiget mötme. Suep gölmegö azi ölnan kömupnöhök wahöriŋa mianŋö andöŋe mi ölop jim asariba malme.”

¹⁰ Mewö jim kutum enŋiiga gwarekurupŋi karöbut yeŋön keu mi uruŋine anŋön köla “kömupnöhök wahötawahötkö” könaŋi mi nanŋini qesim anŋuba eraum mötket. ¹¹ *Eraum möta Jisös kewö qesim waŋgiget, “Köna keugö böhi yeŋön

* 9:2: 2 Pitö 1.17-18 * 9:7: Mat 3.17; Mak 1.11; Luk 3.22 * 9:11: Mal 4.5; Mat 11.14

mönö keu kewö jimakze, ‘Kezapqetok azi Elaijanöŋ mönö Suepnöhök mutuk eta asuhuma.’

¹² Qesim wanġigetka melenġa kewö jiyök, “Elaijanöŋ mutuk eta asuhuba malmal pakpak möhamġöma. Keu mi ölna akzapmö, keu kun ki mönö wuanöŋġöra ohoget ahöza: Suep gölmegö azi ölnan mönö sihimbölö gwötpuk möriga jijiwilit ak wanġime.” ¹³ Keu yahöt mi ahözahotmö, nöŋön kewö jibi mötme: Elaijanöŋ lök eta asuhuyökmö, yanġöra Buġa keu ohoget ahözawanġö dop ambazipnöŋ i nanġini sihimġini wu-atanġöba lan ak wanġiget.” Mewö.

Jisösnöŋ öme wuatanġöi morönöŋ ölöwahök.

Mat 17.14-21; Luk 9.37-43

¹⁴ Jisös aka gwarek karöbut yeŋön kunduneyök eta gwarekurupġi tosatġi yanġöreŋ kaba yuai kewö eket: Köna keugö böhi tosatġan kinda yembuk jitnakölik aka goranora keu jigetka ambazip jesöŋġöŋan liliköba enġeka kinget. ¹⁵ Mewö kinda ambazip kambu pakpak yeŋön Jisös eka mianġöreŋök auruba kiŋkiŋġöba kösutġe anda jölöŋi jiget. ¹⁶ Jölöŋi jigetka kewö qesim enġiyök, “Inġini wanatköra yembuk jitnakölik aka goranora keu jize?”

¹⁷ Qesim enġiiga kambuneyök azi kunöŋ melenġa kewö jii mörök, “Böhi! Nöŋgö nahöni ömenöŋ numbuġi muhungöba töŋöt mem wanġiiga wanġita göhöreŋ kazal. ¹⁸ Mi mianġöreŋ me mianġöreŋ memba mendawöla öröm giliga eta qeba numbuġeyök qölgöl söutsöt eriga irimġi yöhözömgöba silenġan sölöpkömakza. Mewö ahiga kaba göhö gwarekurupki ulet enġiba öme mi wuatanġömegö jizalmö, yeŋön osize.”

¹⁹ Mewö jiiga melenġ wanġiba jiyök, “Gölmegö yanġiseŋ ambazip yei! Mönö nalö dawik embuk mala qatön enġubiga Anutu qahö möt narigetka sihimbölö mötman. I mönö wanġita nöŋġöreŋ kaget.

²⁰ Mewö jiiga wanġita yanġöreŋ kaget. Kagetka ömenöŋ Jisös eka mianġöreŋök morö utuköba urepköm wanġiiga wölöhariba tala gölmenöŋ qeba pöranpöran mitiba semben auba ahöiga numbuġeyök qölgöl söutsöt kota erök. ²¹ Jisösnöŋ mi eka iwiŋi kewö qesim wanġiyök, “Nalö dawikö dop yuai ki lök asuhum wanġiiga kotza?” Qesim wanġiiga jiyök, “Mi lök morörökneyök asuhum wanġiyök.

²² Mi mem bölim wanġimamġöra nalö tosatġe könöpnöŋ, nalö tosatġe onöŋ metal wanġiiga nalö gwötpuk geba qebayök kinahakza. Mewömmö, mianġö kukösumġi kun göhöreŋ ahöza ewö, mönö ak kömumba bauköm netkiman.”

²³ Mewö jiiga jiyök, “ ‘Kukösumġi göhöreŋ ahöza ewö,’ jizan. Anutugö kukösumġan mönö yuai kungöra qahö qakömakza. Anutu möt narizawanġön mönö yuai pakpak ölöp ahakġa.”

²⁴ Mewö jiiga iwiñan miangörenjök qeta jiyök, “Anutu möt narizalmö, mötnaripnan lölöwöröñi akza. Mötnaripni mönö mem köhöiman.”

²⁵ Jiiga ambazip jesöngöñan ösumñinan kaba kingetka eka miangöra öme mi kewö jim wañgiyök, “Gi töñöt aka kezapduhupkö ömeñi, nöñön jim kutum gihizal: Gi mönö azi ki mosöta kota anda kunbuk kude lilingöba kaman.”

²⁶ Jim wañgiiga qeta silata morö mi utuköba könöpuk urepköm wañgii wölöhariiga utala kota anök. Kota aniga qeba qamöt tandök aka ahöiga gwötpukñan mi eka “Wösöñi alja!” jiget. ²⁷ Mewö jigetmö, Jisösnöñ böröñe memba köbibiiiga wahöta kinök.

²⁸ Mewö kiniga Jisösnöñ miri uruñe öngöiga gwarekurupñan nanñinök tata kewö qesim wañgiget, “Neñön mönö wuanöngöra mi naninök wuatangöbingö osizin?”

²⁹ Qesim wañgigetka kewö jii mötket, “Öme tandökñi mewöñi mi mönö köuluköba nene siñgi mala wuatangöbin. Yuai murutñi kun ahinga qahö kota anma.” Mewö.

Jisösnöñ kömumangö Buñani jiiga yahöt ahök.

Mat 17.22-23; Luk 9.43b-45

³⁰ Jisösnöñ gwarekurupñi yembuk miri gölme mi mosöta anda Galili prowins uruñe liliköba denike malgeri, mi kunñan mötmapkö tököyök. ³¹ Mia tököba gwarekurupñi kusum engimangöra ölöñ anget. Könanöñ anda keu kötni kewö jii mötket, “Anutunöñ Suep gölmegö azi ölni mi gölme ambazip yeñgö böröñine al wañgii gema. Geiga i qegetka kömuma. I qeget kömui wehön karöbut teköiga miangören mönö kömupnöhök wahötma.”

³² Keu kötni mewö jii mötketmö, mi qahö möt kutuget aka könanñi denöwö, mi qesibingö kölköldömdöm aket. Mewö.

Gwarek sutñine dañön mutukñi akza?

Mat 18.1-5; Luk 9.46-48

³³ Mewö anda Kaperneam taonöñ kañgotket. Miangören kañgota nanñi miri uruñe öngöba gwarekurupñi kewö qesim enjiyök, “Injini Könanöñ kaba wani keuya eraum mötze?”

³⁴ *Yeñön könanöñ kaba ‘Dañön öngöñgöñi akza’ mia nanñinök eraum möta kaget. Miangöra qesim enjiiga keu böc tatket. ³⁵ *Keu böc tatketka Jisösnöñ geba tata gwarekurupñi 12 engoholi kagetka kewö jii mötket, “Kunñan mutukñi malmangö mötza ewö, yañön mönö körek enjö nembö bapñine eta qöndökñi aka tosatñi pakpak welen qem engimakña.” ³⁶ Mewö jiba namande moröñi kun memba sutñine ali kinök. Kiniga böröñan memba tambuñe ala kewö

jii mötket, ³⁷ **“Kunñan namande kewöñi kun nöñgö qetne miriñe köl öröba köyan kölmawi, yañön mönö ni köl öröm niñgima. Kunñan mewö ak niñgizawi, yañön niyök qahöpmö, danñön melaim niñgiyöhi, mönö i mewöyök köl öröm wañgima.”* Mewö.

Jisösnöñ gwarekurupñi mindiñgöm enñgiyök.

Luk 9.49-50

³⁸ Jonöñ Jisös kewö jii mörök, *“Böhi! Nini azi kun neñgö andönine qahö kayöhi, yañön göhö qetnöñ ömewöröme közöl enñgiiga ehin. Yañön nembuk qahö liliköba maljawañgöra nini i qetal wañgiin.”*

³⁹ Mewö jüiga Jisösnöñ jiyök, *“I kude qetal wañgime. Kunñan nöñgö qetni qeta añgöletot mezawi, yañön mönö mianñgö andöñe nöñgö andöqeqe keu awamñanök jimamgö osima.*

⁴⁰ **Kunñan qahö qetal neñgimakzawi, yañön mönö neñgö arenñöñ malja. (Mianñgöra nöñgö alaurupni tosatñi mi kude qetala añgösirip meme.)* ⁴¹ **I mönö nañgöm enñgigetka Anutunöñ töwañini enñgima. Kunñan Kraistkö qetñe yañgö buñañi akzeañgöra aka o qambi nemegö enñgimawi, Anutunöñ mönö mianñgö töwañi melenñda wañgima. Nöñön keu öññi kun kewö jibi mötme: Nañgöm enñgimei, mienñön mönö töwa meme.”* Mewö.

Siñgisöndökö kölgorom mönö qetal enñgime.

Mat 18.6-9; Luk 17.1-2

⁴² Jisösnöñ keu kewö jiyök, *“Morö kewöñi möt narim niñgizei, kunñan yenñgörenñök kun kölgorom ak wañgiiga siñgisöndök akñawi, azi mianñön mönö lömböt öñgöñgöñi miwikñaima. Anutunöñ lömböt mianñgö likepñi denöwö wañgiiga dopñe akawak? Kemuñ jamöññiñ jölñe jöhöba köwet röndumnöñ gilget mulungöi gebawak, mianñön mönö awamñi ahum wañgii tandök akawak.* ⁴³ **Mianñgöra börögan siñgisöndök akñangö kölgorom ak gihima ewö, mönö yandim gilman. Yandim gilagun börötak mala malmal köhöikñi miwikñaiba oyaenñkoyaenñ akñanmö, börö yahötpuk mala könañgep könöp sianöñ gebanbuk. Sia könöpñi mi nalö kunöñ qahö bököma.* ⁴⁴ *Mianñgörenñ ‘Döhöñini enñgöhöm pilikuta mala qahö kömume aiga könöpñinan nalö kunöñ kude bököma.’*

⁴⁵ Mewöyök könagan siñgisöndök akñangö kölgorom ak gihima ewö, mönö yandim gilman. Yandim gilagun könatohot mala malmal köhöikñi miwikñaiba oyaenñkoyaenñ akñanmö, köna yahötpuk malnöñga könöp sianöñ gil gihigetka gebanbuk. ⁴⁶ *Mianñgörenñ ‘Döhöñini enñgöhöm pilikuta mala qahö kömume aiga könöpñinan nalö kunöñ kude bököma.’*

* **9:37:** Mat 10.40; Luk 10.16; Jon 13.20 * **9:40:** Mat 12.30; Luk 11.23 * **9:41:**

Mat 10.42 * **9:43:** Mat 5.30

47 *Mewöñanök jegan singisöndok akñangö kölgörom ak gihima ewö, mönö qözöla gilman. Qözöla gilagun je-ilik mala Anutugö bemtohonñöñ añaota oyaenköyaen akñanmö, je yahötpuk malnöñga könöp sianöñ gil gihigetka gebanbuk. 48 *Miañgöreñ ‘Döhönini engöhöm pilikuta mala qahö kömume aiga könöpñinan nalö kunöñ kude bököma.’

49 Könöp sia miañgöreñ ambazip körek mi howe sihi kölköl ewö könöpñöñ engohogetka sihimbölöñi mötme.

50 *Howe mi ölöññi akzapmö, howegö sihimñi mosötma ewö, mi mönö denöwö möhamgögetka nahömñi kunbuk ahubawak? Inini mewöñanök urumohot malmalgö nahömñi mosötpepuk. Miañgöra Suep howeñini mosötpepuköra mönö galömñini memba sutñine luai qem añauba malme.” Mewö.

10

Awanöm añaömosötmosötkö keuñi

Mat 19.1-12; Luk 16.18

1 Jisösnöñ wahöta Kaperneam miri mosöta Jordan o kutuba likepñe anda mötöteiba eta kunbuk o mi kutuba Judia prowinsnöñ kayök. Kaiga ambazip kambulelembenöñ kunbuk yañgöreñ tokogetka akmalöhi, miañgö dop kunbuk kusum enjiyök.

2 Kusum enjiiga Farisi (Köna keugö kapañkölköl) tosatñan yañgöreñ kaba keugö bötakñöñ örömapkö esapköm wañgiba kewö qesim wañgiget, “Azinöñ anömñi mosötmawi, mewö miañön Köna keu ongitma me qahö?”

3 Qesim wañgigetka melenña kewö jii mötket, “Mosesnöñ miañgö keuñi denöwö jim kutum enjiiga ahöza?”

4 *Mewö jii möta kewö jiget, “Azinöñ añaömosötmosöt papia ohoba anömñi ölöp mosötma. Mosesnöñ mewö jim kutui ahöza.”

5 Mewö jigetka kewö jim enjiyök, “Yañön mönö uruköhöikñinañgöra aka jimkutukutu mewö ohom enjiyök.

6 *Ohom enjiyökmö, Anutunöñ könakönahiñe yuai pakpak miwikñaiyöhi, nalö miañgöreñök ‘Azi aka ambi malmegöra miwikñaim enjiyök.’ 7 *Miañgöra azinöñ mönö iwinamñi etkömosöta anömñañgöreñ anda qekötahöiga 8 yetkön sile mohot aka malmahot. Mewö aka toroqeba yahöt qahö akzahotmö, sile mohot aka malmahot. 9 Anutunöñ azi aka ambi mindirim etkiyöhi, ambazip kunñan mönö i kude mendeñ etkima.”

* 9:47: Mat 5.29 * 9:48: Ais 66.24 * 9:50: Mat 5.13; Luk 14.34-35 * 10:4:

Dut 24.1-4; Mat 5.31 * 10:6: Jen 1.27; 5.2 * 10:7: Jen 2.24

¹⁰ Jisösnöŋ mewö jiba miri uruŋe öŋgöiga gwarekurupŋan keu mianğöra kunbuk qesim waŋgiget. ¹¹ *Qesim waŋgigetka kewö jii mötket, “Azi kunöŋ anömŋi wuatangöba ambi kun memawi, yaŋön mönö qesabulum sero yoŋgorö akŋa. ¹² Mewöyök ambi kunöŋ apŋi wuatangöba azi kun memawi, yaŋön mönö qesabulum sero yoŋgorö akŋa.” Mewö.

Jisösnöŋ nahönbörat kötuatköm enğiyök.

Mat 19.13-15; Luk 18.15-17

¹³ Ambazip tosatŋan nahönbörat morömorö enğuanğita Jisösnöŋ enğömisirimapköra yaŋgöreŋ kagetmö, gwarek yeŋön ambazip mi jim qetal enğiget. ¹⁴ Mewö aketmö, Jisösnöŋ mi eka uruŋi bölliiga kewö jii mötket, “Nahönbörat moröŋi mönö enğömosötketka nöŋgöreŋ kame. Anutunöŋ ambazip mewö mia bemtohoŋi buŋa qem enğima. Mianğöra i kude jöhöm enğime. ¹⁵ *Nöŋön keu ölni kun kewö jibi mötme, “Kunŋan Anutugö bemtohoŋi mi nahönbörat ewö buŋa qahö qem aŋgumawi, yaŋön mönö mianğö uruŋe aŋgotmamgö osima. ¹⁶ Mewö jiba tambuŋe ala dohongöm enğiba böröŋi nörorŋine ala kötuatköm enğiyök. Mewö.

Jisösnöŋ azi pomŋi kungö qambaŋ keu jiyök.

Mat 19.16-30; Luk 18.18-30

¹⁷ Jisösnöŋ könahiba köna anmamgö ahiga azi kunöŋ ösumŋan yaŋgöreŋ kayök. Kaba wösöŋe geba simin köla kewö qesim waŋgiyök, “Böhi ölöpŋi, nöŋön mönö denöwö aka malmal köhöikŋaŋgö buŋa qem aŋgubileŋak?”

¹⁸ Qesim waŋgiiga kewö jii mörök, “Nöŋgöra ‘Böhi ölöpŋi,’ mi wuanöŋgöra jizan? Anutu mohotŋan ölöpŋi akza. Azi kunŋan i ewö ölöpŋi qahö akza. ¹⁹ *Gi jöjöpaŋ keu ki möt teközan, ‘Ambazip kun kude qenöŋ kömuma. Sero yoŋgorö kude akŋan. Yoŋgorö kude meman. Jitnöŋ alal keu kude jiman. Kalöpköba yoŋgorö kude meman. Iwinamgi mönö göda qem etkimakŋan.’”

²⁰ Mewö jii möta kewö jiyök, “Böhi, mi pakpak mönö gwaböneyök tem köla mala kotzal.”

²¹ Mewö jiiga Jisösnöŋ uba eka urukönömŋan jöpaköm waŋgiba kewö jii mörök, “Mohot kungöra kewö osizan: Gi mönö anda sukinapki pakpak söŋgöroŋi memegöra alnöŋ moner kaiga ambazip wanapŋi enğiman. Mewö aknöŋga sukinapki ketanji (guli masapugi milyön kinagi ewö) ketanji mi Suep mire ahöm gihima. Mewö aka ni nuatangöba kaman.”

²² Jisösnöŋ mewö jiyökmö, sukinapŋi gwötpuk ahöyöhaŋgöra

* **10:11:** Mat 5.32; 1 Kor 7.10-11
Dut 5.16-20

* **10:15:** Mat 18.3

* **10:19:** Eks 20.12-16;

aka keu mi möta uruñi bosoleiiga wösöbirik aka jeni asöliiga öne mosöta anök.

²³ Mosöta aniga Jisösnöñ ui anda kaiga gwarekurupñi kewö jii mötket, “Yei! Ambazip moneñ inapñinambuk yeñön mönö Anutugö bemtohoññöñ aņgotpingö lömböriba kupuk-kapak akñe.”

²⁴ Mewö jüiga gwarek yeñön mi möta welipkögetmö, Jisösnöñ toroqeba kewö jii mötket, “Gupanurupni, ambazip denike yeñön moneñ inapñini möt narimakzei, yeñön mönö Anutugö bemtohoñ uruñe aņgotpingö lömböriba kupuk-kapak akñe. ²⁵ Mi kewö jim tuarimam: Sömbup ketañi kamel mi kondi kinimñe ölop qahö aņgotma. Mianğö dop ambazip pomñi yeñön Anutugö bemtohoñ uruñe aņgotpingö lömböriba qaköme.”

²⁶ Mewö jii möta aurum tililingöba nanñinağöra kewö jiget, “Oponoñ! Ambazip dañön mönö Suepkö buñaya akawak?”

²⁷ Mewö jigetka Jisösnöñ uba eņgeka kewö jiyök, “Ambazipnöñ mi esapköba osiba qakömakzemö, Anutunöñ mewö qahö ahakza. Anutunöñ mönö yuai pakpak ölop ahakza. Yanñön yuai kun aka memangö qahö osiba qakömakza.” Mewö.

Jisösgö nup memegö töwañi

²⁸ Pitönöñ keu mi möta melenđa Jisös kewö jii mörök, “Mötnöñ, neñön mönö yuai pakpak mosöta gi guatağöba kain.”

²⁹ Mi möta Jisösnöñ kewö jiyök, “Nöñön keu ölni kun kewö jibi mötme: Kunñan nöngö aka Ölöwak Buñagöra aka yuai kun mosöröhi, - mi jike miriñi, darumunñi, nenbehötñi, iwinamñi, nahönböratñi me nup kisiñi - mi eņğömosöriğa Anutunöñ mönö mianğö likepñi oņgita melen waņgiiga sehima. ³⁰ Kunñan yuai mi mosöröhi, Anutunöñ mönö salupñe mi 100:kö dop toroqeba waņgiiga nanñi buñaya akñe. Gölmegö malmalnöñ sesewerowero uruñe malmapmö, jike miri, darumun, nenbehöt, iwinam, nahönbörat aka nup kisi mi mönö salupñe ahum waņgima aka nalö könaneņpñe malmal köhöikñi teteköñi qahö buña qem aņguma. ³¹ *Mewö asuhumapmö, mutukñi eņğöreñök gwötpukñan dagibezupñi aketka dagibezupñi yeņğöreñök gwötpukñan mutukñi akñe.” Mewö.

Kömumangö keuñi jüiga karöbut ahök.

Mat 20.17-19; Luk 18.31-34

³² Jisösnöñ gwarekurupñi yembuk Jerusalem sitinöñ öņgöbingöra gölme köna anget. Jisösnöñ mutuk aniga gwarekurupñan andöñe anda welipköget aiga ambazip andöñine kageri yeñön mönö keņğötñini mötket. Mewö aketka Jisösnöñ gwarekurupñi 12 mi kunbuk öröm eņgiba

* 10:31: Mat 20.16; Luk 13.30

könahiba kusum enjgiyök. Yangören yuai asuhumawi, keu mi jim asariba kewö jiyök, ³³ “Mötket, nini Jerusalem öngöbin. Miangören kunjan Suep gölmegö azi ölni mamalolo mem wanjiiga jike nup galöm aka Köna keugö böhi yengö böröjine gema. Yenön kömumapkö keunji jim teköba kian gawman yengö böröjine al wanjime. ³⁴ Al wanjigetka mepaiköba söutkölap qeba ihilek wahinambuknöñ tauköm wanjime. Tauköm wanjiba qegetka kömuma. Kömumba wehön karöbut teköiga kömupnöhök wahötma.” Mewö.

Jeims Jon yetkön yuaigöra ulerohot.

Mat 20.20-28

³⁵ Jisösnöñ mewö jiiga Jebedigö nahönyahötñi Jeims aka Jon yetkön yangören anda kewö jiyohot, “Böhi, niri yuai kungöra ulet gihiziri mi ak netkimangö mötzit.”

³⁶ Jiyohotka qesim etkiyök, “Injiri wani yuai ak etkimangöra mötzahot?”

³⁷ Qesim etkiiga kewö jiyohot, “Gönön ölop jim kutunönga niri göhö asakmararañnöñ eu öngöba kunöñ börögi öñje aka kunjan börögi qaniñe tata yuai pakpak galöm kölbina.”

³⁸ *Mewö Jiyohotmö, Jisösnöñ kewö jii mörohot, “Injiri miangö könani qahö möt yaköba uletzahot. Nönön qambi asölnambuk nemami, injiri mi ölop nempa sihimbölö mötmahot me qahö? Jöm nöngwambuknöñ melun mem ningime, injiri mi memahot me qahö?”

³⁹ Jii möta jiyohot, “Mi ölop membit.”

Jiyohotka kewö jii mörohot, “Mi ölna! Nönön qambi asölnambuk nemami, injiri mi mewöñanök nemahot aiga jöm nöngwambuknöñ melun mem ningime, mianön mönö injiri mewöyök melun mem etkime. ⁴⁰ Mem etkimemö, nöngö böröni öñje me qaniñe dañön tatmahori, nöñön keu mi jim kutumamangö dop qahö. Anutunöñ dum yahöt mi denike yetköra mözözömgöyöhi, mi mönö yetköra etkiiga nömbuk tata galöm kölmahot.” Mewö.

Galöm ölnan mönö welenqeqeya akza.

⁴¹ Jeims Jon yetkön mewö ulerohotka alaurupñi 12 yenön mi möta könahiba urubölö aket. ⁴² *Mewö aketmö, Jisösnöñ engoholi kagetka kewö jii mötket, “Gölmegö kantriñi kantriñi miengö jembonñinan galöm köñ engibingö jizei, yenön mönö azi kembu tandök ak engimakze. Yengö ketañamñinan mönö keu jim kutuba mindingöm enjiba kukösumñini kondelakze. Injini könani mi ölop mötze. ⁴³ *Engö sutñine silik mewö ahöbapukmö, kunjan engö sutñine ketañamñini akñamgö

* **10:38:** Luk 12.50 * **10:42:** Luk 22.25, 26 * **10:43:** Mat 23.11; Mak 9.35; Luk 22.26

mötzawi, yañön mönö welen qem engiba malma. ⁴⁴ Mewöyök kunjan engö sutñine mutukñi malmamgö mötzawi, yañön mönö körek engö nembö bapñine mala welenqeqeñini omanñi akña. ⁴⁵ Suep gölmegö azi ölnjan mönö mewöyök silik mewöñi kondela nanñi welen qem wañgimegöra aka qahö kayök. Qahöpmö, welen qem engiba ambazip sehisehñi yengö sohoppñini memamgöra aka eta malmalñi kölenja mosötma.

Bartimeus jeñi gömöliiga mem ölöwahök.

Mat 20.29-34; Luk 18.35-43

⁴⁶ Jisösnöñ gwarekurupñi yembuk Jeriko sitinöñ kaget. Kaba siti mi mosötpingö aketka ambazip kambulelembenöñ enguatangöba andöñine kaget. Mewö kagetka jegömöl azi qetñi Bartimeus, Timeusgö nahönñi yañön monenñi aka nene wañgimegö ulet engiba köna jítje tarök. ⁴⁷ Tariga “Nazaret-azi Jisösnöñ kaza!” jiget möta könahiba kewö qerök, “Jisös Deiwidkö gwölönarökñi, mönö ak-kömum niñgiman!”

⁴⁸ Mewö qeriga gwötpukñan bök tatmapköra qetal wañgigetmö, yañön mönö kapan köla qerök. “Deiwidkö gwölönarökñi, mönö ak-kömum niñginöñ!”

⁴⁹ Qeriga Jisösnöñ dörök ala kewö jiyök, “Ölöp qetketka ki kama.” Mewö jiiga jegömöl azi mi qeta kewö jiget mörök, “Göhöra qeza. Mönö mötkurumkurum mosöta wahöta kaman.”

⁵⁰ Mi möta malukuñi qeköba gila pörañ wahöta kinda Jisösgöreñ anök.

⁵¹ Aniga kewö qesim wañgiyök, “Alani, nöñön wani yuai ak gihimamgöra mötzan?” Mewö qesim wañgiiga jegömöl azinöñ jiyök, “Ketanamni, ni jeni kunbuk umamgöra mötzal.”

⁵² Mewö jiiga Jisösnöñ kewö jii mörök, “Mötnariptan mönö mem ölöwak gihiza. Mönö ölöp anman.” Mewö jii möta jeñan mianğöreñök tohoiga uba andöñine Jisös wuatangöba anök. Mewö.

11

Jisösgöra köirañ kölgetka Jerusalem öngöyök.

Mat 21.1-11; Luk 19.28-40; Jon 12.12-19

¹ Jisösnöñ gwarekurupñi yembuk Jerusalem siti dopdowiba Betfage aka Betani miri yahöt kösutñire kaba Oil ip kunduje öngöba gwarekyahötñi yahöt melaim etkimamgöra aka ² kewö jii mörohot, “Miri wösöñire tatzawi, mönö mianğöreñ anohot. Anda mianğöreñ angota donki moröñi kösönöñ jöhöget kinjawi, mi mianğöreñök miwikñaimahot. Donki mi dölökña, azi kunjan qakñe qahö tatatña. Mi mönö pösata memba ki kama-hot. ³ Pösarohotka kunjan ‘Wuanöngöra mewö akzahot?’ jiba qesim etkiiga kewö jimahot, ‘Kembuniran mönö mianğöra osiba jiiga kazira zilañ melenñiga kunbuk ki kama.’

4 Mewö jiba melaim etkiiga anda donki moröñi miri towokne miri kungö nanğunje kösönöñ jöhöget kiniga mi-wikñaiba pösarohot. 5 Pösarohotka azi tosatñi mianğöreñ kingeri yeñön kewö qesim etkiget, “Hei, wania akitkóra donki moröñi pösatzahot?”

6 Mewö qesim etkigetka Jisösnöñ jiyöhangö dop jiyohot möta “Ölöp memba anmahot,” jiget. 7 Jigetka memba Jisösgöreñ kayohotka malukuñini qeköba donki moröñangö qakne algetka öngöba tarök. 8 Mewö tata aniga ambazip jesöngöñan göda qeba malukuñini qeköba köna namne tumbulgetka tosatñan gölme köröñe anda ip sinñi mitiba tumbulget. 9 *Tumbulgetka ambazip jeñe köl öröba angeri aka andöñe wuatangöba kageri, yeñön kewö jiba qetket, “Hosana, owe owe! Anutu möpöseizin. Kembugö qetne kamawi, Anutunöñ mönö i kötuetköm wañgima. 10 Kiñ Deiwidnöñ kantri tohoñ kuñguba galöm köl engiyöhi, nalö mewöñan mönö kunbuk kam neñgiza. O Anutu mönö kantri tohoñnini kötuetköman. Hosana! Qetbuñagi möpöseininga euyangöreñ öngöza. Owe Owe!”

11 Mewö qetketka Jerusalem sitinöñ öngöba jöwöwöl jikegö tohoñ uruñe anök. Mianğöreñ liliköba yuai pakpak ehi mare ahiga eta gwarekurupñi 12 yembuk jike mosöta Betani mire anda ahöget. Mewö.

Jisösnöñ fig ip kun qesuahöiga ululungöyök.

Mat 21.18-19

12 Ahöba söñanök wahöta gwarekurupñi yembuk Betani miri mosöta angetka Jisösnöñ nenegö kömuyök. 13 Nenegö kömumba ui aniga fig ip kun* sinñambuk kini ehök. Eka “Sinñangö uruñe ölni tari miwikñaiba nembilenjak,” jiba fig ipkö könañe anök. Anökmö, ölnangö nalöñan qahö törüyöhangöra sinñanök kini ehök. 14 Mewö eka ip mi kewö jim wañgiyök, “Kunñan ölgi kunbuk kude nema.”

Mewö jim wañgiiga keu mi gwarekurupñan mötket. Mewö.

Jisösnöñ jöwöwöl jike jim kömbuhiyök.

Mat 21.12-17; Luk 19.45-48; Jon 2.13-22

15 Anda mala Jerusalem sitinöñ öngögetka Jisösnöñ jöwöwöl jikegö tohoñ uruñe anök. Mianğöreñ ambazip engehiga inap bohonñi memegöra algetka söngöröñi megeri, mi könahiba közöl enğiiga etket. Moneñ utekutek ambazip yengö jakeñini metali anget. Mewöyök kembö bohonñini memegöra algeri, miengö dum tatatñini mi tok tötaliga anget. 16 Sombem kömbukñi kutuba yuai siriba angotkanğotkö könañi jöhöyök.

* **11:9:** Sum 118.25-26 * **11:13:** Fig mi sambu ipkö alañi kun. Mi nupñine kömötketka kötni nahömñinambuk asuhugetka gwötpuk nemakzema.

17 *Mewö aka kusum enggiba kewö jii mötket, “Aisaianöŋ keu kun kewö ohoi ahöza, ‘Nöŋgö jikenan mönö gölmeŋi gölmeŋi pakpak yeŋgö köulukö miriŋina akŋapkö qetme.’ Keu mi ahözapmö, iŋini mi utekögetka kegwek-kahasiliŋ yeŋgö banjet ewö akza.”

18 Mewö jii möta ambazip kambu pakpak yeŋön miangöra nemböŋini teköiga welipköget. Miangöra jike nup galöm aka Köna keugö böhi yeŋön mi möta Jisösgöra keŋgötŋini möta eraum möta kewö jiget, “Mönö denöwö jiinga qegetka kömumbawak?”

19 Mare ahiga Jisösnöŋ gwarekurupŋi yembuk siti mosöta yaigep anda ahöget. Mewö.

Fig ipnöŋ ululungöiga eket.

Mat 21.20-22

20 Ahöba söŋanök wahöta könanöŋ anda fig ip mi ongitpingö aketka jalöŋambuk ulungöba kini eket. 21 Kiniga Pitönöŋ Jisösgöreŋ keu mötmöriba kewö jii mörök, “Ketanjamni eknöŋ, fig ip qesuahönöŋi, mi mönö ululungöba kinja.”

22 Jii möta Jisösnöŋ kewö melenök, “Anutugö mötnarip mönö töp memba malme.” 23 *Nöŋön keu ölni kun kewö jibi mötme, “Kunŋan keuŋgö ölni ahumapkö uruyahöt qahö aka kundunŋi kiangö toŋgöra kewö jim kutubawak, ‘Mönö kundunŋi ki qeköba wahöta anda köwetnöŋ alman.’ Mewö jim kutuba Anutu möt nariiga ölni mönö miangö dop ahuma. 24 Miangöra nöŋön kewö jibi mötme: Wani yuaigöra qesiba köulukömei, mi pakpak lök buŋa qem anguzin, mewö möt narigetka mönö buŋaŋini akŋa. 25 *Iŋini kinda Anutu köulukögetka kunŋan alaŋgö pinjtköra urubölö akŋa ewö, pinjit mi mönö mosötme. Mewö akŋe ewö, engö Iwiŋini Suep mire maljawaŋön mönö mewöŋanök engöreŋ siŋgisöndok mosötma. 26 (Iŋini tosatŋi yeŋgöreŋ siŋgisöndok qahö mosötme ewö, engö Iwiŋini Suep mire maljawaŋön mönö mewöŋanök engöreŋ siŋgisöndok qahö mosötma.)” Mewö.

Jitŋememe yeŋön Jisösgö kukösumŋangö qesiget.

Mat 21.23-27; Luk 20.1-8

27 Jisösnöŋ gwarekurupŋi yembuk kunbuk Jerusalem sitinöŋ öŋgöget. Öŋgöba jöwöwöl jikegö tohoŋ uruŋe anda kaiga jike nup galöm, Köna keugö böhi aka kantrigö jitŋememe tosatŋi yeŋön yangöreŋ kaŋgotket. 28 Kaŋgota kewö qesim waŋgiget, “Gi kiangöreŋ yuai akzani, mi mönö daŋön jim kutum gihiiga ahakzan? Mi memamgö kukösumŋi mi daŋön gihiyök?”

* 11:17: Ais 56.7; Jer 7.11

* 11:23: Mat 17.20; 1 Kor 13.2

* 11:25: Mat 6.14-15

²⁹ Qesim wanjigetka kewö melenj enjgiyök, “Nöñön mewöyök keu kun qesim enjimam. Mi melenj ninjigetka nöñön mewöyök dañön kukösum ninjiiga yuai ki ahakzali, mi jibi mötme. ³⁰ Jonöñ ambazip o-melun mem enjgiba malöhi, yañön miangö kukösumñi mi denikeyök meyök? Suep Toñan wanjigiyök me gölme toñan wanjiget? Mi jiget mötmam.”

³¹ Mewö melenj enjiiga sutñine eraum möta kewö jiget, “ ‘Kukösumñan Suepnöhök asuhuyök,’ mewö jibin ewö, yañön mönö kewö jima: Injini mönö wuanöñgöra Jon qahö möt narim wanjiget? Mi qahö dop kölja. ³² Me ‘Gölme ambazipnöhök asuhuyök,’ jibinak? Mi qahö dop kölja.” Ambazip köreñan Jongöra ‘Ölña kezapqetok azia akza,’ jigerañgöra aka ambazip kambu yengöra kenjötñini möta mi jibingö osiget. ³³ Miangöra “Mi qahö mötzin,” melenjget. Mewö melenjgetka Jisösnöñ kewö jii mötket, “Mewö aiga nöñön mewöyök yuai ki ahakzalanjög kukösumñi dañön ninjigiyök, mi qahö jibi mötme.” Mewö.

12

Wain kösö nup galöm bölöñi miengö dopkeu

Mat 21.33-46; Luk 20.9-19

¹ *Jisösnöñ könahiba ambazip dopkeunöñ kewö jii mötket, “Azi kunöñ wain kösö nup kun köla kömörök. Köla kömöta selñi memba liliköyök. Mem liliköba wain jout ketanji kötnöñ meyök. Miangörej waingö ölni ala könanöñ tözöhölget oñan lalanöñ geyök. Wain jout ketanji mi memba wain yonjorö membepuköra galöm meme jake köröpñi köweñambuk meyök. Yuai pakpak mem teköba wain nup galöm tosatñi miwikñaim enjgiba kewö jiyök, “Mönö nup memba ölnanjög bahöñi nanñini memba bahöñi tonji ni ninjime.” Mewö jiba nup mi böröñine ala enjgömosöta kantri kunöñ anda malök. ² Mala mali ölni öliyöhanjög nalöñi (yambu 5) töriiga miangörej welenqeqeñi kun melaim wanjiiga galöm yengörej anda wain nup ölnanjög bahöñi wanjimegöra jiyök. ³ Jiyökmö, galöm yeñön i memba jöhöba kömbinöñ qeba wuatanjöggetka böröñi börak lilingöyök. ⁴ Miangö andöñe welen azi kun melaii yengörej aniga nöropñi qesinda gamu qem wanjiget. ⁵ Miangö andöñe welen azi kun kunbuk melaiiga ani qeget kömuyök. Mewöñanök azi tosatñi gwötpuk melaim enjiiga tosatñi kömbinöñ sepgwörörök enjguba tosatñi enjuget kömuget. ⁶ Mewö aketka wain nup toñan keu jaruba jiyök, ‘Nani wölböt nahöni mohok mi tok malja. I mönö göda qem wanjime me denöwö?’ Mewö jiba qöndökñi mi nahönña melaiiga yengörej anök. ⁷ Anökmö, kaiga eka sutñine kewö jiget, ‘Yañön mönö börösamotñanjög tonji akña. Ayop, mönö memba qein kömuiga wain kösö nup kianjön mönö

* 12:1: Ais 5.1-2

nanine bujanina akña.' ⁸ Mewö jiba memba jöhöba qeget kömuiga qamötñi nup yaigepñe gilget geyök.

⁹ Wain nup toñan mi möta mönö denöwö akña? Yanñon mönö nanjak kaba nup galöm mi köndenñ engima aka nup galöm dölökñi miwikñaim engiba wain kösö nupñi yeñgö böröñine alma. ¹⁰ *Buña Kimbigö keu ki lök oyonget me qahö?

'Miri meme yeñon köt tandö kun andö qeba öne mosötket taröhi, mianñon mönö tandö kömbönañi ahiga miwikñaiget. Mianñon tinjiriga mirinöñ mönö gororonñgöba eta kölma.

¹¹ Kembunöñ tandö mi kuñguiga jeninan ehinga qetbuñabuk ahiga welipkömakzin.' "

¹² Jisösnöñ mewö juiga galöm yeñon keu mianñö könañi möt asariba kewö jiget. "Dopkeu mi mönö neñgöra jiza." Mianñöra i memba jöhöbingö mötketmö, ambazip kambu yeñgöra kenñgötñini möta osiba mosöta anget. Mewö.

Takis alalgö Jisös esapköm wanñiget.

Mat 22.15-22; Luk 20.20-26

¹³ Juda jitmeme yeñon Farisi aka premiö Herodkö pati alaurup tosatñi melaim engiba kewö jiget, "Injini mönö Jisösgöreñ anda qesiba keugö bötaknöñ öroi gwaröhöm wanñime." Mewö jigetka Jisösgöreñ kaget. ¹⁴ Jisösgöreñ kaba kewö jigetka mörök, "Böhi, göñon azi ölni akzani, nini mi mötzin. Göñon ambazip tosatñi qahö engek soriba tosatñi qahö qepureim engimakzanmö, dop mohotnöñ kewöt neñgimakzan. Mianñöra kuñgum gihigetka qahö gonñgiba ketanñi qahö esuhum engimakzanmö, Anutugöreñ köna mi keu ölnañgö dop kusum neñgimakzan. Göñon Anutugöreñ keu diñdiñi mianñon öngöngöñi eretñi mohot pakpak jim qindiñ ak neñgimakzan. Mianñöra nini sisa-kinñgöra takis ala mianñon Mosesgö Köna keu siñgibin me qahö? Mi alinga dop kölja me qahö?"

¹⁵ Mewö jiget möta areñini munenñi mi möt kutuba kewö jii mötket, "Injini wuanöñgöra keugö bötaknöñ al niñgibingö esapköm niñgize? Ölop silwö moneñ (Kina 5) kun memba kaget eki."

¹⁶ Mewö juiga mi memba kagetka kewö qesim enñiyök. "Dagöreñ imut aka qet mi ki ohoget ahöza?" "Mi sisa kinñgöreñ!" Mewö melenñda jiget.

¹⁷ Jigetka kewö jii mötket, "Mewö ahiga yuai sisa-kinñgö imutñambuk buñanñi ahözawi, mi mönö yanñgöra al wanñime. Yuai kun Anutugö buñaya ahözawi, mi mönö Anutugö buñageme." Mewö jii möta yanñgöra gwötpuk welipköget. Mewö.

* 12:10: Sum 118.22-23

Kömupnöhök wahötwahötkö esapköm wanjiget.

Mat 22.23-33; Luk 20.27-40

18 *Sadyusi (Jike nupkö kapañkölköl) yeñon “Kömugeri yeñon kude wahötme,” jiba malget. Yeñgöreñök tosatñan Jisösgöreñ kaba kewö qesim wanjiget, 19 **“Böhi, Mosesnöñ kewö jim kutum neñgiyök ahöza,*

‘Azi kun ambi meiga nahönbörat qahö ahui kömumba malöñi öne mosoriga munñan ölop malöñi memba gwölönarök qiwikñaim wanjiiga datñanğö qet bisiba malma.’

20 Mötnöñ! Nalö kunöñ darumun 7 malget. Datñini mutukñan ambi memba mala gwölönarökñi qahö öne mala kömuyök. 21 Kömuiga munñan malöñi mi memba mala mewöyök gwölönarökñi qahö öne kömuyök. Kömuiga munñi kun yanğö bapñe mianñon ambi miyöhök memba mala öne kömuyök. 22 Mewöña mewö darumun 7 pakpak yeñon ambi mohot miyöhök memba gwölönarök qahö mala kömum teköget. Körek kömugetka qöndökñi malöñini mi mewöyöhök kömuyök. 23 Göñon Kömugeri yeñon guliba wahötme,’ jizannö, nini mi qahö möt narizin. Mötnöñ! Azi 7 pakpak mi öröröñ wahötpeak ewö, ambi möhot mi anöññina meget malöhangöra aka mönö dagö anöñña akawak?”

24 Mewö qesigetka Jisösnöñ melenđa kewö jii mötket, “Injini keu jim sohoze. Urumelenğö Buña Kimbiñi aka Anutugö kukösumñi qahö möt kutuzeangöra mönö janjuñ ahakze.

25 Ölna, kömupnöhök wahöta nalö mianğöreñ awanöm qahö akñemö, garata yeñon Suep mire maljeanğö tandök aka malme. 26 *Mötket! Kömugeri, yeñon guliba wahötmegö keuñi mi Mosesgö Buknöñ kewö ahöza: Sötman köhösonöñ könöp bölam ahuba qahö jem kutuyöhi, injini kösohot mi oyonget me? Anutunöñ mianğöreñ Moses kewö jii mörök,

‘Nöñon Anutu Abrahamğö Kembu, Aisakö Kembu aka Jeikobkö Kembuya mala kota maljal.’

27 Isik bömön karöbut yeñon Anutubuk mala mal köhöiba öngöme. Anutunöñ köhömuñi yeñgö Kembuñini qahöpmö, malmal köhöikñi maljei, mönö yeñgö Kembuñina akza. O Sadyusi (Jike nupkö kapañkölköl pati) injini mönö keu gwötpuk möt sohomakze.” Mewö melenñök.

Jöjopañ keu bohonñi yahöt mi denöwö?

Mat 22.34-40; Luk 10.25-28

28 *Jisösnöñ Sadyusi (Jike nupkö kapañkölköl) yembuk er-aum möta jim soroköba melenğ enğiyöhi, mi Köna keugö böhi azi kunöñ mörök. Mewö möta jeñe kañgota kewö qesim

* 12:18: Apo 23.8 * 12:19: Dut 25.5 * 12:26: Eks 3.6 * 12:28: Luk 10.25-28

wanjiyök, “Jöjöpañ keu pakpak miengöreñök bohonñi ketañi mi denöwö?”

²⁹* Qesim wanjiiga melenök, “Bohonñi ketañi mi kewö, ‘Israel könagesö mötket! Anutu mi Kembunini. Yanñon Kambu mohot ahiga bem alañi kun qahö.

³⁰ Miangöra urugi jömukñi, unagi jömukñi, mötmötki jömukñi aka kuki jömukñi, mianñon mönö Kambu Anutugi jöpaköba malman.”

³¹* Jöjöpañ keu miangö alañi kewö, ‘Nangi jöpaköm anjumakzani, mewöñanök mönö ambazip pakpak jöpaköm engiba malman.’

Jöjöpañ keu kunñan mönö keu yahöt mi qahö etkonñitza.”

³²* Köna keugö böhigöra mewö melenniga jiyök, “Böhi! Gi törörök keu ölñangö dop jizan. Anutunöñ mohot akza. Bem alañi kun qahö. ³³* Gi urugi jömukñi, mötkutukutugi jömukñi aka kuki jömukñi, mianñon Anutu jöpaköba malman. Aka nangi jöpaköm anjumakzani, mewöñanök mönö ambazip pakpak jöpaköm engiba malman. Jöjöpañ keu yahöt mi bohonñi ketañi akzahot. Mi tem kölmani, mianñon mönö jöwöwöl pakpak aka naluk kötin tosatñi engonñitza.” ³⁴ Mewö jiiga Jisösnöñ urumötmötni möri dop köliga kewö jii mörök, “Gi Anutugö bemtohoñnöñ angotmamgö dopdowizan.” Mewö er-aum möröhotka körek yeñon Jisös toroqeba qesim wanjibingö kölköldömdöm aka mosötket. Mewö.

Kraist mi kinj Deiwidkö kembunji aka gwölöñarökñi.

Mat 22.41-46; Luk 20.41-44

³⁵ Jisösnöñ jöwöwöl jikenöñ kinda Buña keu kusum engiba kewö qesim enjiyök, “Kraistnöñ kinj Deiwidkö gwölöñarökñi akzawi, Köna keugö böhi yeñon keu mi denöwögöra jimakze?

³⁶* Deiwidnöñ nanñak Uña Töröñan sölölohöm wanjiiga kewö jiyök,

‘Anutunöñ kinda nöngö Kembuni kewö jii mörök: Göñon mönö kaba nöngö böröni ölñe tatnönga nöñon nalö sutñe kerökurupki tim tötöla luhut alengiba göhö köna tambö gwaröñe al engimam. Nalö mi kam kunjumawanñö dop mönö asakmararanñöñ ki tatman.’

³⁷ Deiwidnöñ nanñak mewö jiba qetñi ‘nöngö Kembuni’ jiza.’ Kembuni jiba mönö denöwö aka yanñö gwölöñarökñi mohot akawak?” Mewö jiiga ambazip kambu ketañi yeñon Jisösgö keunñangö sihimñi möta kezap alget. Mewö.

Urumelengö silesile malmalgö galöm meme keu.

Mat 23.1-36; Luk 20.45-47

* 12:29: Dut 6.4-5 * 12:31: Lew 19.18 * 12:32: Dut 4.35 * 12:33: Hos

6.6 * 12:36: Sum 110.1

³⁸ Jisösnöŋ kusum enġiba toroqeba kewö jiyök, “Inġini mönö Köna keugö böhi yeŋgöra galöm memba malme. Yeŋön maluku köröpŋi löŋgöta anda kaba kondel aŋgubingö mörakze aka maketnöŋ me könanöŋ ambazip enġigetka jölöŋjini jimegö mörakze. ³⁹ Köuluk mire qaikŋe eu tatpingö sihimŋi mörakze, aka közölömbuaŋnöŋ dum tatat mutukŋe jejep tatpingö mörakze. ⁴⁰ Yeŋön malö yeŋgören miri yuai bidanġa gagabe köla enġuaŋgirakze, aka qetbuaŋjini asuhumapköra köuluk köröpŋi köuluköba töptöpŋine qemakze. Mianġöra Anutunöŋ keuŋjini jim teköba likepŋi öŋgöŋgöŋi melenġi qakŋine öŋgöma.” Mewö.

Ambi malö kunöŋ naluk kötin öŋŋi alök.

Luk 21.1-4

⁴¹ Jisösnöŋ jöwöwöl jikenöŋ naluk dundum andöŋe tariga ambazipnöŋ moneŋ mianġören alget geiga uba enġehök. Ambazip pomŋi sukinapŋinambuk gwötpuk yeŋön kaŋgota kina moneŋ lömbötŋambuk alget geyök. ⁴² Alget geiga malö wanapŋi kunöŋ kaŋgota souje köŋŋi yahöt, mi toiya tosatŋi mianġö dop ali geyök. ⁴³ Jisösnöŋ mi eka gwarekurupŋi köl öröm enġiba kewö jii mötket, “Nöŋön keu öŋŋi kun kewö jibi mötme: Malö wanapŋi kianöŋ naluk aljawi, mi mönö tosatŋi pakpak yeŋön yuai dundumnöŋ alget gezawi, mianġö dopŋi oŋgita alja. ⁴⁴ Körek yeŋön moneŋ gwötpuk ahöm enġiiga kitipŋanöhök aljemö, ambi kianöŋ mönö köruebörue maljawaŋgö dop yuainġi pakpak al teköba öne töhön malma.” Mewö.

13

Jöwöwöl jikenöŋ könderŋmönderŋ asuhuma.

Mat 24.1-2; Luk 21.5-6

¹ Jisösnöŋ jöwöwöl jike mosöta eriga gwarekurupŋi yeŋgörenök kunġan kewö jii mörök, “Böhi eknöŋ! Jikegö tohoŋ uruŋe miriŋi miriŋi mi mönö wewelipŋambuk. Mi kötnöŋ memba meŋölögetka ölöpböläpŋi kinja.”

² Jisösnöŋ mi möta keu kewö melenök, “Jikegö tohoŋ uruŋe miri ketanġi ki enġekzanmö, mi mönö köndenġetka mirigö köt kun mi köt kungö qakŋe qahö ahömapmö, qeqelanġan aka sahoŋŋanök ahöma.”

Kahasiliŋ aka sesewerowero asuhuma.

Mat 24.3-14; Luk 21.7-19

³ Mewö jiiga Oil ip kundunġe öŋgöba likepŋe endu jöwöwöl jikenöŋ kinöhi, mi eka tatket. Mianġörenġa tata Pitö, Jeims, Jon aka Andru yeŋön Jisös nanġök öröba kewö qesim waŋget, ⁴ “Böhi! Keu jizani, mianġö öŋŋi mönö wanat nalönöŋ asuhum tiŋgitma aka yuai pakpak mi könahiba asuhum tekömawi,

mianğö aiwesökñan mönö denöwö asuhuma? Mia ölop jinöñ mörin.”

⁵ Mewö qesim wangigetka könahiba kewö jii mötket, “Kunñan isimkakalek aiga janjuñ anbepeköra mönö galömñini memba malme. ⁶ “Ambazip gwötpukñan asuhuba nöñgö qetne kewö jime, ‘Nöñön Kraist akzal.’ Mewö jiba ambazip gwötpuk tilipköm engime. ⁷ Injini yarö miengö buzupñini aka ötöñini asuhugetka mörakñe. Mi möta jönömñini kude undumakña. Yuai mewöñi mi mutuhök asuhumapkö jijinja. Mi asuhumapmö, gölmegö nalöñan mönö mianğöreñök zilañ qahö teköma. ⁸ Kantri kunöñ kantri kun engubingöra wahötme. Ambazip kambu kunöñ kambu kun yembuk aröñ angubingöra wahötme. Gölmeñi gölmeñi mianğöreñ kenöñ ketañi ketañi qözöla memba gölme melenñi gemakña. Mewöyök bödiñi bödiñi (buöröñi buöröñi) asuhuba öñgöba ahöma. Yuai mewöñi mi ambi köröbuknöñ masi könahiba engumakzawangö dop. Gölmegö nalöñan mönö mianğö dop könahiba tekömangö akña.

⁹ *Mewö akñapmö, injini ölop galömñini mem anguba malme. Ambazipnöñ injini öröba keu jakeñe al engiba köuluk mireñini keu nupñini memba kömbinöñ engume. Tosatñan nöñgöra aka enguangitketka kantriñi kantriñi yeñgö kiñ kembu aka premiö yeñgö jemesoholñine kinme. Mewö kinda nöñgö könajamni nañgöba jigetka mötme. ¹⁰ Ölöwak Buña ki mönö mutuk gölmegö kantriñi kantriñi pakpak yeñgöra jim sehim tekögetkun gölmegö nalöñan mianğö andöñe teköma. ¹¹ Öröba enguangita keu jakeñe al engigetka kinmei, nalö mianğöreñ keu denöwö jibinak, mianğö waimanjatñi qeljiñe kude mötme. Uña Töröñan aua mianğöreñök keu engimawi, mönö mia jime. Nannjine uruñinañgöra keu qahö jimemö, Uña Töröñan mönö uruñini sölölohöiga keu jime. ¹² Urumelenğö kopa kunöñ darumunñan uruñi melenñöhangöra aka i mamalolo meiga keu jakeñe algetka qeget kömuma. Mewöyök iwi kunöñ nahönböratñi mamalolo meiga kömuma aka nahönbörat yeñön iwinamurupñini qetal engiba jigetka enguget kömume. ¹³ *Kantri pakpak yeñön nöñgö qetnañgöra aka kazik ak engigetka malmemö, kunñan kapañ köla köhöiba böñ qeba kinda maliga gölmegö nalöñan tekömawi, yañön mönö oy-aenköyaen buña qem anguma. Mewö.

Jerusalem sitigö könderñmönder uru-önönñambuk

Mat 24.15-28; Luk 21.20-24

¹⁴ *“Könañgep tosatñan kaba könderñmönder aka yuai angjöörakñambuk jikenöñ qahö alalgö dop mi altanöñ ala

* **13:9:** Mat 10.17-20; Luk 12.11-12 * **13:13:** Mat 10.22 * **13:14:** Dan 9.27; 11.31; 12.11

kiniga eknei, - keu ki oyoṅmawaṅön mönö ölop kezap ala möt kutuma - nalö miaṅgöreṅ Judia prowinsnöṅ malmei, eṅön mönö misiṅgöba öröba kunduje anme. ¹⁵ *Miri kösutje sombemnöṅ malmawaṅön mönö eta yuaiṅi memaṅgöra miri uruje kude öṅgöma. ¹⁶ Nupnöṅ anda malmawaṅön mönö mewöyök malukuṅi memaṅgöra liliṅgöba mirinöṅ kude anma. ¹⁷ Yei! Ambi gölömbuk aka morö juzunöṅ yeṅön nalö miaṅgöreṅ denöwö ösumṅinan anbeak. ¹⁸ Miaṅgöra yuai mi kie luhut nalöṅe kude asuhumapköra köuluköme. ¹⁹ *Nalö miaṅgöreṅ kahasililiṅ keta bölokṅi asuhuma. Kahasililiṅ dopṅi mewöṅi mi mönöwök nalö kungen kude asuhuba ahöyök. Anutunöṅ yuai pakpak miwikṅaiyöhi, nalö miaṅgöreṅök könahiba nalö kiaṅgöreṅ mala kota nalö sutje kun qahö asuhuyök. Mönöwök qahö asuhuyök aka könagep nalö kunöṅ qahö ahuma. Miaṅgöra mönö köuluköba malme. ²⁰ Kembunöṅ wahöjalinṅ nalö mi qahö mem töribawak ewö, ambazip körekṅan mönö ayuhum teköbeakmö, ambazip nanṅaṅgöra möwölöhöm enṅiyöhi, yeṅgöra aka wehön miengö götöṅini mi mem törima.

²¹ Nalö miaṅgöreṅ kewö jime, 'Mötket! Kraistnöṅ ki malja.' aka 'Eket! Amötqeṅe Toṅan endu kinja.' Kunṅan mewö jima ewö, mi mönö kude möt narime. ²² Mi kewögöra: Amötqeṅe toṅi muneṅi aka kezapqetok ambazip takapulakanṅi asuhuba aṅgöletot aka aiwesök jemurutṅi megetka letotme. Mewö letotketka Anutunöṅ ambazip nanṅaṅgöra möwölöhöm enṅiyöhi, i mewöyök eṅololonṅ mem enṅimegö esapköba kapanṅi kölgetka janjuṅ akepuk. Eṅön ölopṅanök galöṅṅini memba malgetka mi osibeak. ²³ Nöṅön yuai pakpak mi kude asuhuiga qeljiṅe lökṅanök jibi mötze. Mi mutuk jizalaṅgöra mi mönö uruṅine ala galöṅṅini mem aṅguba malme. Mewö.

Suep gölmegö azi öṅṅan mönö asuhum tiṅgitma.

Mat 24.29-31; Luk 21.25-28

²⁴ *Wahöjalinṅ mi teköiga nalö miaṅgöreṅök wehön jeṅan in-jaṅ köliga köiṅnöṅ ömuṅ kölma. ²⁵ *Sengelau yeṅön suepnöhök teköba etme aka suepnöṅ uturuköiga miaṅgö öroyuaiṅi mi tatatṅini mosöta eṅololonṅ aketka sohoma. ²⁶ *Nalö miaṅgöreṅ Suep gölmegö azi öṅṅi yaṅön kousu qakṅe kaṅgori ekṅe. Kukösumṅi ketaṅan saköl-diṅdiṅambuk aukṅe asuhuiga asakmararaṅi ekṅe. ²⁷ Kaṅgota Suep garataurupṅi melaim enṅiiga yeṅön ambazip Anutunöṅ nanṅaṅgöra möwölöhöm enṅiyöhi, i

* **13:15:** Luk 17.31 * **13:19:** Dan 12.1; Ind 7.14 * **13:24:** Ais 13.10; Eze 32.7; Joel 2.10, 31; 3.15; Ind 6.12 * **13:25:** Ais 34.4; Joel 2.10; Ind 6.13 * **13:26:** Dan 7.13; Ind 1.7

gölme göräñi likeplikep, euke emuke mianğörenğök köllohoba enğuanğitme. Mewö.

Geröp ipkö dopkeu

Mat 24.32-35; Luk 21.29-33

²⁸ İjini geröp ip eka tandökñi mötmörība dopkeu ki mötme. Böröñan lök oñambuk aiga sinñan yoñgoigetka mi eka möta kewö jimakze, 'Wehön nalöñan mönö dopdowiza.' ²⁹ Eñön mewöñanök aiwesök mianğö dop asuhuiga eka möt asarība könañi kewö jime, 'Jisösnöñ mönö nañgunöñ dopdowiza.' ³⁰ Nöñön keu ölni kun kewö jibi mötket: Ambazip ki merak gölmenöñ maljei, yeñön qahö kömugetka yuai pakpak jizali, mi mönö yeñğö malmal nalöñine asuhuma ³¹ Suep gölmenöñ göröñ qemahotmö, nöñğö Buña keunan mönö qahö ayapköma.' Mewö.

Jisös kamawañğö nalöñi mi kunñan qahö mötza.

Mat 24.36-44

³² *Suep gölmegö azi ölnan dawinöñ kamawi, mianğö wehönñi me aua nalöñi mi kunñan kun qahö mötza. Suepnöñ garata yeñön mi qahö mötze. Anutugö Nahönñan mewöñanök mi qahö mötza. İwinöñ nanğök mi mötza. ³³ Nalö dawinöñ asuhumawi, mi qahö mötzeañğöra eñön mönö alöm memba uruguliguli malme. ³⁴ *Mi dopkeu kianğö dop ahöza: Azi kunöñ miriñi mosöta kantri kungen anök. Anmamğöra aka galömurupñi yuai pakpakñañğöra jim kutum enğiba nañgu kiñi böröñine ala kukñi enğiyök. Kukñi enğiba welenqe-qeurupñi mohok mohok nup keu enğiyök. Enğiba mala nañgu galömñi mewöyök uruguliguli malmapköra jim kutum wañgiyök. ³⁵ Miri toñan dawinöñ lilingöba kamawi, mi qahö mötze. Mare me suñgem ömbibiñe kama me? Wañgarañ suruiga kama me? Wehön gianjiiga kama me? Mianğö dop ijini mi qahö mötzeañğöra mönö uruguliguli malme. ³⁶ Könöpuk wölañ kaiga eñön gaun ahögetka mewö miwikñaim enğibapuk. ³⁷ İjini mönö uruguliguli malme. Keu mi gwarekurupñi enğöra jizali, mi mewöyök alaurupni körek pakpak enğögöra jizal: İjini mönö urugwölögwölö malme." Mewö.

14

Jisös qein kömumapkö añğönañ alget.

Mat 26.1-5; Luk 22.1-2; Jon 11.45-53

¹ *Pasowa kendon * aka beret yistñi qahö mianğö kendonñi törıyohot. Wehön yahöt teköiga mianğörenğöñ könahıbitkö ahotka

* 13:32: Mat 24.36 * 13:34: Luk 12.36-38 * 14:1: Eks 12.1-27 * 14:1:

Kantri qetñi İjıpt mianğörenğö Kembugö garatanöñ enğehorıba enğonğırök, kendon mianğö qetñi Nei keunöñ Pasowa. Eksodus 12.15

jike nup galöm aka Köna keugö böhi yeñön tokoget. Tokoba denöwö möndöñninga Jisös ölöñ memba qeget kömumbawak, miañgö könañi jaruba kewötket. ² Jaruba kewöta kewö jiget, “Ambazip irimñini seholiiga karimñi karimñi asuhubepuköra mi sösoñgai kendon nalöñe akingö osibin.” Mewö jiget.

*Ambi kunñan Jisös o umköhöwakañambuknöñ miriyök.
Mat 26.6-13; Jon 12.1-8*

³ *Jisösnöñ Betani mirinöñ mala Saimon kun uzikukunji mem solaniyöhi, yañgö mire öngöba tarök. Miañgöreñ nene namba tariga ambi kunñan köt kirin kun memba yañgöreñ kayök. Kirin mi nöluk tuat-tuat qetñi alabastö miañön memena. Mia o um-köhöwakañambuk ölni qetñi nad miañön kokolak qeba tarök. Yañön mi bohonñi ketañan memba kaba nöluk jölñi kutuba onji Jisösgö nöropñe mim-biliba miriyök. ⁴ Miriiga azi tatkeri, yeñgöreñök tosatñan urubölö aka nanñinök kewö eraum mötket, “Nad o mi mönö wuanöñgöra mewö ayuhuzawi? ⁵ Nad o kelökñambuk mi bohonñi memegöra albawak ewö, ölop silim 300:kö töwanji (Kina 1500,-) ongita yöhötibawak. Mi ambazip wanapñi engiiga dop kölbawak.” Mewö jiba ambi mi jim wañgiget.

⁶ Jim wañgigetka Jisösnöñ kewö jii mötket, “Ambi ki kude jim wañgime. Wuanöñgöra urunji mem bölize? Yañön silik ölopñi ak soroköm niñgiiga dop kölja. ⁷ *Ambazip wanapñi mi nalöñi nalöñi sutñine malgetka ölopñi ak engibingö möta mi ölop nalö dop akñemö, nöñön engö sutñine nalö dop qahö malmam. ⁸ Yañön mi nanñi akakmemenañgö dop ak niñgiza. Nöñön kömumbi löm köl niñgimeañgöra ölop qeljine sileni kelöknöñ nömiriza. ⁹ Nöñön keu ölni kun kewö jibi mötket: Ölöwak Buña ki kantri igen waigen jim sehigetka anmawi, miañgöreñ ambi kianañön yuai ak niñgizawi, miañgö buñañi mohok jiget sehiiga yañgöra mötmöriba malme.” Mewö.

*Judasnöñ Jisös mamalolo mem wañgimamgö urumohok ahök.
Mat 26.14-16; Luk 22.3-6*

¹⁰ Gwarekurupñi 12 yeñgöreñök kun qetñi Judas Iskariot yañön Jisös mamalolo mem wañgimamgöra aka jike nup galöm yeñgöreñ anök. ¹¹ Yeñgöreñ anda keunji jiiga mi möta urunjan ölöwahiga söñgörüñi monen wañgibingöra keu jöhöget. Keu jöhögetka Jisös nalö kungen mamalolo mem wañgimamgö köna möt jaruba köiñbingöba malök. Mewö.

*Jisösnöñ gwarek yembuk Pasowa lama neget.
Mat 26.17-25; Luk 22.7-14, 21-23; Jon 13.21-30*

* 14:3: Luk 7.37-38 * 14:7: Dut 15.11

12 Beret yistñi qahö mianğö kendon silim mutukñe (Seqononöñ) pasowa lama kun qeba ohozema. Mianğöra Jisösgö gwarekurupñan jiget, “Böhi, nini miri denikeañğoreñ anda pasowa lama mözözömgöm gihiba nembin? Sihimgi denöwö ahöza?”

13 Mewö jigetka gwarekyahötñi yahöt kewö jiba melaim etkiyök, “Injiri Jerusalem sitinöñ öngöyohotka azi kun o kumbut kunduta kaiga miwikñaimahot. Miwikñaiba i ölop wuatañğöba anmahot. 14 Anohotka mire öngöiga mianğö tonji kewö jiyohot mötma, ‘Böhinöñ kewö jiza: Ölop miri uruñi kun niñginöñga mianğoreñ öngöba gwarekurupni yembuk pasowa lama nembin.’ 15 Mewö jiyohotka tonjan möta miri qakñe eu öngöba uruñi ketañi kun kondel etkima. Mianğoreñ dum tatat yuai mözözömgöget ahöza. Mi kondel etkiiga mianğoreñ lama qeba ohomahot.”

16 Mewö jiiga gwarekyahötñan mosöta sitinöñ öngöba Jisösnöñ keu jiyöhi, mianğö dop miwikñaiba kinda lama qeba ohom mözözömgöyohot.

17 Miri söñauiga Jisösnöñ gwarekurupñi 12 yembuk miri mianğoreñ kañgotket. 18 *Kañgota öngöba dumnöñ tata nene negetka Jisösnöñ kewö jii mötket, “Nöñön keu ölni kun kewö jibi mötket: Engörejök kun nömbuk nene nemba tatzawañön mönö mamalolo mem niñgima.”

19 Mewö jiiga uruñinan wösöbirik aiga könahiba nanñök nanñök qesim wañgiba jiget, “Nöñgöra jibanbuk?”

20 Qesim wañgigetka kewö jii mötket, “12 engörejök kun nömbuk beret kuluñnöñ kundunğözawi, yañön. 21 Suetp gölmegö azi ölnan mönö yañğöra keu ohoget ahözawañğö dop gölme mosöta anma. Anmapmö, mamalolo mem wañgimawi, yañğöra Yei wösöbirik! jizal. Anutunöñ mönö likepñi öngöñgöñi melen wañgima. Azi mi nam köröuruñeyök qahö ahubawak, mianñön mönö amqem wañgibawak.” Mewö.

Kembubuk semön qöndökñi neget.

Mat 26.26-30; Luk 22.14-20; 1 Kor 11.23-25

22 Nene nemba tata Jisösnöñ beret memba kötuatköba mindipköba engiba kewö jiyök, “Ki nani busuni. Ki memba neget.”

23 Mewö jiba wain qambi memba saiwap jiba enjiiga körekñan qambi kianğoreñök neget. 24 *Negetka kewö jii mötket, “Ki nani sepni. Ki Anutunöñ ambazip yembuk jöhöjöhö areñ aiga köhöimapköra sepni mokoget geiga ambazip gwötpuk amöt qem enjima. 25 Nöñön keu ölni kun kewö

* 14:18: Sum 41.9 * 14:24: Eks 24.8; Jer 31.31-34

jibi mötket: Nöñön wain kösögö ölni kianğoreñ kunbuk toroqeba qahö nemam. Könañgep Anutugö bemtohoñ uruñe eu taringa közölömbuan almawi, wehön mianğoreñ mönö wain o qainñi kun mia nemam.”

²⁶ Mewö jiiga sösoñgai liñet köla mosöta anda Oil ip kundunje öñgöget. Mewö.

Pitönöñ Jisös qañ kölmapkö jii mörök.

Mat 26.31-35; Luk 22.31-34; Jon 13.36-38

²⁷ * Öñgöba Jisösnöñ kewö jii mötket, “Kezapqetok azi kunöñ keu kun kewö ohoi ahöza,

‘Nöñön galömñini qebiga lama kambuñan denme.’

Mianğö dop eñön körek uruñini böliiga nömosöta buratime.

²⁸ * Buratigetka nuñgumemö, nöñön mönö kömupnöñök wahöta mutuk Galili prowinsnöñ anda mianğoreñ asuhum enjimmam.”

²⁹ Mewö jiiga Pitönöñ kewö jii mörök, “Yeñön körek uruñini böliiga gömosöta buratime ewö, nöñön mönö töndup mewö qahö akñam.”

³⁰ Jiiga Jisösnöñ jii mörök, “Nöñön keu ölni kun kewö jibi mötnöñ: Kuruknöñ indimñi yahöt qahö qeriga göñön merak sunjem qañ köl niñginöñga indimñi karöbut akña.”

³¹ Mewö jiyökmö, Pitönöñ kapañ köla köhöiköhöi ahök, “Böhi! Mewö qahöpmö, ni nuñgugetka göbuk mohotñe kömumbirak, mi töndup nöñön gi qahö qañ köl gihimmam.” Gwarek tosatñi pakpak mewöyök keu miyöhök jiget. Mewö.

Jisösnöñ Gezemane arönöñ köuluköyök.

Mat 26.36-46; Luk 22.39-46

³² Mewö eraum möta anda arö kun qetñi Gezemane mianğoreñ angotket. Angota gwarekurupñi kewö jii mötket, “Nöñön endu anda köuluköbiga iñini ölop nalö sutñe ki tatme.”

³³ Mewö jiba Pitö, Jeims aka Jon enğuanğita anget. Angetka Jisösnöñ könahiba köñjiliñ kanjamñambuk möriga köna böröñi qeköyök. ³⁴ Mewö aka kewö jii mötket, “Nöñgö urunan mönö kondum köla kotzawañgöra aka wösöbirik mötpiga kömukömunñi ak niñgiza. Iñini ölop kianğoreñ tata nömbuk guli malbin.”

³⁵ Mewö jiba nanñök boromkun toroqeba anda simin köla sipköba sihimbölo nalöñi mi Iwiñangö jitrangö dop ongitmapköra köuluköyök. ³⁶ Köuluköba jiyök, “Aba Iwini, gi yuai kun qahö mölölömbizan. Mianğöra sihimbölogö qambinñi ki mönö noañgitman. Noañgitpanak, mi nöñgö sihimgö dop qahöpmö, mönö nangi jirkahö dop asuhuma.”

³⁷ Mewö jiba liliñgöiga gwarekurupñi karöbut yeñön gaun ahöget engeka Pitögö kewö jii mörök, “Saimon, gi gaun ahözan

me? Gi aua mohot-töp guli malmamgö kude köhöizan me?
³⁸ Uruninan guli malbingö sihimñi mörakzinmö, sileninan lölöwöröñi akza. Mianğöra esapesapnöñ et engubapuköra mönö köuluköba guliguli malme.”

³⁹ Mewö jii möriga kunbuk engömosöta anda keu miyöhök kunbuk jiba köuluköyök. ⁴⁰ Köuluköba lilingöiga jeñini böñböñ meyöhañğöra kunbuk gaunök ahöget engehök. Gaunöhök wahöta keu melenbingö janjuñ aket.

⁴¹ Jisösnöñ ani indimñi karöbut aiga lilingöba kaba kewö jii mötket, “Inini toroqeba luhut memba gaunök ahöbingö mötze me? Mötket! Kunöñ Suep gölmegö azi ölni mamalolo mem wanğiiga bölöñi meme yeñgö böröñine öngöma. Mianğö aua nalöñan lök kam kuñguza. Engö gaun ahöahö nalöñinan mönö teköza. ⁴² Mönö wahötketka anin. Mötket! Mamalolo mem niñgimawi, yañön mönö dowe ki kaza.” Mewö.

Jisös qeraköba memba jöhöget.

Mat 26.47-56; Luk 22.47-53; Jon 18.3-12

⁴³ Jisösnöñ mewö jiba kiniga mianğörenök gwarekurupñi 12 yeñgörenök kun qetñi Judas yañön kambu kun jitñe mem enğiiga kañgotket. Jike nup galöm, Köna keugö böhi aka kantrigö jitñememe yeñön i melaim engigetka bingö sou ketanji aka lingipñini memba kaget. ⁴⁴ Mamalolo memamgö ahöhi, yañön mutuk yembuk aiwesök keu kewö jöhöba jii mötket, “Nöñön azi numbuñi yöhötüm nemami, i eka ‘Mönö mi!’ jiba memba jöhöba törörök galöm köla anme.”

⁴⁵ Mewö jiba kaba mianğörenök Jisösgören angota “O Böhini!” jiba numbuñi yöhötüm neyök. ⁴⁶ Yöhötüm neiga eka Jisös qelanjiba memba jöhöget. ⁴⁷ Jöhögetka kösutñe kingeri, yeñgörenök kunñan bingö sou ketanji öröba jike nup galöm bohonñangö welenqeqeñi qeba kezapñi köteköi erök. ⁴⁸ Jisös jöhögetka keu kewö jii mötket, “Ni kegwek-kahasililin azia qahöpmö, töndup nöngöra mewö möta bingö sou ketanji aka lingip memba nömemba jöhöbingöra kañgotze. ⁴⁹ *Nöñön wehön dop jöwöwöl jikenöñ embuk kinda Buña keu kusum enğiba malbiga qahö nömigetmö, yuai ki mönö Buña Kimbigö keunñan öñambuk akñapköra asuhuza. ⁵⁰ Jisös jöhögetka gwarek yeñön körek Jisös mosöta buratiba unjurata anget. Mewö.

Sepguli kunöñ unjurata anök.

⁵¹ Azi gwabö kunöñ bindoñi tuatñanök köpeiba Jisösgö andöñe wuatangöba anök. Oponi tosatñi qahö löngöta aniga i esapköba meget. ⁵² Memingö osiba bindoñi qekögetka aukñamñe unjurata anök. Mewö.

* 14:49: Luk 19.47; 21.37

Jikegö jitnememe yeñon Jisösgö keu nup meget.

Mat 26.57-68; Luk 22.54-55, 63-71; Jon 18.13-14, 19-24

⁵³ Jisös jöhöba wañgita jike nup galöm bohonñangö mire anget. Angetka jike nup galöm pakpak, kantrigö jitnememe aka Köna keugö böhi yeñon miangöreñ anda tokoget. ⁵⁴ Angetka Pitönöñ sikepsikep enjuatanğöba jike nup galöm bohonñangö mire angota jakömbuak mirigö kiripo uruñe öñgöyök. Öñgöba welenqeçe azi yeñgö sutñine tata könöp kösutñe jömörök. ⁵⁵ Mewö tarökmö, jike nup galöm aka jike kaunsöl kambu yeñon Jisösgö silenöñ alal keu denöwö nanğöinga qeget kömumapkö jim jarugetmö, könañi kun qahö miwikñaiget. ⁵⁶ Jaruba kinda gwötpukñan keu muneñi silene ala nanğöba jigetmö, keuñinan könañi mohok qahö ahök.

⁵⁷ Mewö aiga tosatñan wahöta kinda keu muneñi silene ala nanğöba kewö jiget, ⁵⁸ **“Yañon kewö jiiga mörin, ‘Nöñon jöwöwöl jike börönöñ memeni ki könderñbiga gölmenöñ eriga wehön karöbutkö uruñe jike qainñi kun börönöñ memeni qahö mi mem wahöta kuñgumam.’ ”* ⁵⁹ Mewö jigetmö, töndup keuñinan könañi mohok qahö ahök.

⁶⁰ Mewö aiga jike nup galöm bohonñan wahöta mesohol köl enğiba kinda Jisös qesim wañgiba kewö jiyök, *“Yeñon göhö silege keu ala nanğözei, miangö likepñi kun jiman me qahö?”*

⁶¹ Qesim wañgiiga yuai bölöñi kun qahö ahökmö, töndup likepñi kun qahö melenđa keuñi bök kinök. Keuñi bök kiniga jike nup galöm bohonñan kunbuk kewö qesim wañgiyök, *“Anutu möpöseim wañgimakzini, gi yañgö Nahönñi Kraist akzan me qahö?”*

⁶² *Qesim wañgiiga *“On!”* jiba kewö jii mötket, *“Suep gölmegö azi öññan mönö kukösum Tonangö böröñi öññe tata suepkö kousu qakñe eri ekñe.”*

⁶³ Keu mi jiiga jike nup galöm bohonñan malukuñi munju-rata kewö jiyök, *“Yei, iwinangö jitñi! Tosatñan keuñi nanğömegöra kunbuk qahö qesim enğibin.* ⁶⁴ **Anutu me-paiközawi, mi mönö nanñinak möt teköze. Miangöra denöwö mötmörize?”* Mewö qesim enğiiga yeñon körek Jisös kömupkö buñaya akñapköra jim teköget.

⁶⁵ Mewö jim teköba tosatñan könahiba söutkölap miriba jemesoholñi esuhuba böröñinan misiba qeba kewö jiget mörök, *“Dañon guhuzawi, mi ölop jinöñ mörin.”* Jikegö kiripo galöm (sikiriti) yeñon mewöyök Jisös memba nuñgulumñe qekötahöget. Mewö.

Pitönöñ Jisös qañ kölök.

Mat 26.69-75; Luk 22.56-62; Jon 18.15-18, 25-27

* 14:58: Jon 2.19 * 14:62: Dan 7.13 * 14:64: Lew 24.16

⁶⁶ Nalö mianğörej Pitönöŋ kiripo uruŋe sombemnöŋ malök. Emu maliga jike nup galöm bohonŋaŋgö welenqeŋe ambiŋi kunŋan mianğörej kaŋgorök. ⁶⁷ Kaŋgota Pitönöŋ könöp kösutŋe jömöri ehiba kewö jiyök, “Gi mewöyök Nazaret azi Jisös miambuk malnöŋ.”

⁶⁸ Mewö jiyökmö, Pitönöŋ qaŋ köla kewö jiyök, “Keu jizani, mi qahö möta köndatzal.” Mewö jiba kiripo naŋguŋe geiga kinda kuruk qerök.

⁶⁹ Naŋgunöŋ geiga welenqeŋe ambi kunŋan i mianğörej kunbuk eka azi kösutŋe kingeri, i könahiba kewö jii mötket, “Azi kianön mönö yeŋğöreŋök kun akza.”

⁷⁰ Mewö jii mötketmö, yaŋön kunbuk qaŋ kölök. Qaŋ kölīga nalö borom kun teköiga azi kösutŋe kingeri, yeŋön kunbuk Pitögöra kewö jiget, “Göŋön Galili azia kun akzanagöra mönö alakŋa, yeŋğöreŋöhök kun akzan.”

⁷¹ Mi möta könahiba nanŋi qesuahöm anguba jöjopaŋ keunöŋ jim köhöiba jiyök, “Azi keuŋi jizei, mi qahö möt waŋgizal. Munen jibilenak ewö, Anutunöŋ mönö likepŋi melenŋingima.”

⁷² Mewö jiba kiniga mianğöreŋök kuruk qeri yahöt ahök. Kuruk qeriga Jisösgö keu kewö jii möröhi, Pitönöŋ mi mötmöriyök, “Göŋön indimŋi karöbut qaŋ köl niŋginöŋga kuruknöŋ qeri indimŋi yahöt akŋa.” Keu mi mötmöriba wösöŋi julmamgö aiga sahot bölüyök. Mewö.

15

Jisösnöŋ premiö Pailötkö jeŋe kinök.

Mat 27.1-2, 11-14; Luk 23.1-5; Jon 18.28-38

¹ Miri gianjiiga amandine jike nup galöm, kantrigö jitŋememe (70), aka Köna keugö böhi aka jike kaunsöl pakpak yeŋön kot öŋgöŋgöŋi mianğö totoko ala Jisösgö keu jim teköget. Jim tekögetka Jisös jöhöba waŋgita premiö Pailötkö böröŋe alget.

² Rom premiö yaŋön Jisös kewö qesim waŋgiyök, “Ölŋa, gi Juda yeŋgö kiŋa akzan me qahö?” Qesim waŋgiiga Jisösnöŋ melenŋa jii mörök, “Mönö nangak jizani, mewö.”

³ Jike nup galöm yeŋön keu gwötpuk Jisösgö silene ala jiget.

⁴ Jigetka Pailötnöŋ Jisös kunbuk qesim waŋgiba jiyök, “Mötnöŋ! Yeŋön keu gwötpuk göhö silege ala jizei, göŋön mianğö likepŋi kun jiman me qahö?”

⁵ Mewö jiyökmö, Jisösnöŋ bölöŋi kun qahö ahökmö, töndup keu kitipŋi kunbuk qahö melenök. Keu bök kiniga premiönöŋ welipköyök. Mewö.

Pailötnöŋ Jisös kömumapkö jim teköyök.

Mat 27.15-26; Luk 23.13-25; Jon 18.39-19.16

⁶ Yambu (yara) dop pasowa sösöngai nalöje premiönöŋ kösö mireyök azi kun qetŋi qeta qesigeri, mi pösat engizapma. ⁷ Nalö mianğöreŋ azi kun qetŋi Barabas qetkeri, yaŋön kösö mire tarök. Yaŋön kegwek-kahasiliŋ azi tosatŋi yembuk karim gila azi kun qeget kömuyöhi, mianğöra kösö mire al engiget. ⁸ Mewö aiga könagesö yeŋön premiögö miri sombemŋe eu öngöba kinda könahiba akŋalöhaŋgö dop akŋapkö qesim waŋgiget. ⁹ Qesim waŋgigetka melenđa kewö jii mötket, “Nöŋön Juda engöreŋ kiŋ pösatpi etmapkö mötze me?” ¹⁰ Jike nup galöm yeŋön Jisösgöra körögisigisi mötkeŋgöra aka i premiögö böröŋe al waŋgiget. Mi möta sihimŋinaŋgö mewö qesim engiyök.

¹¹ Qesim enğiiga jike nup galöm yeŋön ambazip kambu uruesiesi mem engiba kewö jiget, “Mönö Jisös mosöta Barabas pösatman! Mewö qesim waŋgime.” ¹² Mewö jigetka kunbuk melenđa qesim engiyök, “Mewö jizeaŋgöra Juda engöreŋ kiŋ qetŋi mewö qerakzei, nöŋön mönö i denöwö ak waŋgibileŋak?”

¹³ Mewö qesim enğiiga kunbuk qetket, “Mönö maripomnöŋ qeget jiman!”

¹⁴ Mewö qetketka Pailötnöŋ kewö jii mötket, “Mi wuanöŋgöra? Yaŋön mönö wani bölöŋa ahök?” Mewö jiyökmö, yeŋön mi möta kapan kōla toroqeba qet gigilahöba kewö qetket, “Mönö maripomnöŋ qeget jiman!”

¹⁵ Mewö qetketka Pailötnöŋ ambazip kambu sihimŋinaŋgö dop akŋamgö möta Barabas pösat engii erökmö, Jisösyia jiga ihilek wahinambuknöŋ qeyöyaköba qeget. Mewö qegetka maripomnöŋ qemegöra Rom yarö azi yeŋgö böröŋine alök. Mewö.

Jisös kukulömbuan ak waŋgiget.

Mat 27.27-31; Jon 19.2-3

¹⁶ Yarö azi yeŋön Jisös waŋgita premiögö jakömbuak mirigö kiripo uruŋe aŋgotket. Aŋgota yarö kambu lökŋanök öröm engigetka mianğöreŋ kaget. ¹⁷ Kaba maluku pisikŋi gugakgugak mi Jisösgö silene löŋgöt waŋgiba sötman kösö limbiŋda ila ewö nöropŋe kölget geyök. ¹⁸ Mewö geiga könahiba waikŋi memba jölöŋi jiget, “Owe owe, Juda yeŋgöreŋ kiŋ, owe!” ¹⁹ Titipepe mewö aka jigetka jehotnöŋ nöropŋe qeba söutkölap qeba simin köl waŋgiba sipköba möpöqöpösei munenŋi mem waŋgiget. ²⁰ Mepaqepaik mewö ak waŋgim teköba maluku pisikŋi gugakgugak mi qeköba nanŋe sile esu löŋgöt waŋgiba maripomnöŋ qebingöra waŋgita anget. Mewö.

Jisös maripomnöŋ qeget.

Mat 27.32-44; Luk 23.26-43; Jon 19.17-27

²¹ *Anda köna namñe azi kun qetñi Saimon miwikñajiget. Yanñon Afrika siti qetñi Sairini miangö aziña aka Aleksander aka Rufus yetkö iwiñira. Yanñon nupnöhök kanğoriga kuñgum wañgigetka Jisösgö maripomñi memba anguyök. ²² Jisös mewö wañgita gölme kun qetñi Golgota mi nanine keunöñ nöröp sihit, miangöreñ anda angotket. ²³ Angota wain o aka marasin qetñi mör mi mindiriba lolonqalon memba wañgigetmö, Jisösnöñ mi tököyök. ²⁴ *Tököiga kinda maripomnöñ qeget. Qeget kiniga kiawen meget qötöñi ahuiga Jisösgö sile esuni mohok mohok sutñine miangö dop mendenña meget. ²⁵ Söñan 9 kilok miangöreñ maripomnöñ qeget. ²⁶ Maripomnöñ qeba nöröpñe eu qegerangö könañi kewö ohoba qeget, “Juda yeñgö kiñ kembuñina ki.” ²⁷ Kegwek-kahasililiñ azi yahöt mewöyök yambuk maripomnöñ etkuget. Kun böröñi öñe kun qaniñe likeplikep mewö etkuget. ²⁸ *(Anutugöreñ Buña Kimbinöñ keu kewö ohoget ahöza, “I kewöta kegwek-kahasililiñ azi ewö mötmöriba yeñgö sutñine alget.” Keu miangöñ mewö öñjambuk ahök.)

²⁹ *Ambazip onğita anda kaba kukulömbuan aka jelikit aka nöröp köla kewö jiget, “Ye! Gi mönö jöwöwöl jike ölop könderñöñga gölmenöñ eriga wehön karöbutkö uruñe kunbuk mem wahöt kuñgumangö jinöñ. O, gi azi qetpuk! ³⁰ Mönö nangi bauköm anguba maripomnöñök etman.”

³¹ Jike nup galöm aka Köna keugö böhi yeñon mewöyök sutñine mepaqepaik ak wañgiba jiget, “Tosatña bauköm enğiba malökmö, nanñi bauköm angumangö osiza. ³² Yanñon Amötqeqe Tonñ Kraist aka Israelgö kiñ akza ewö, mönö dölkü maripomnöñök eri eka mi möt naribinak.” Mewö jiget.

Azi yambuk maripomnöñ etkugeri, yetkөн mewöyök uruqeçe keu töhöreñ jim wañgiyohot. Mewö.

Jisösnöñ kömuyök.

Mat 27.45-56; Luk 23.44-49; Jon 19.28-30

³³ Silim bibiñi 12 kilok aiga miangöreñ söñaupnöñ eta gölme pakpak dop köla ahöiga anda aua karöbutkö dop ahök.

³⁴ *Jisösnöñ 3 kilok miangöreñ nanñe keunöñ kewö qet ketanñi qerök, “Eloi, eloi, lama sabaktani?” Mi nanine keunöñ: Anutuni, Anutuni mönö wuanöñgöra andö nuñguzan?

³⁵ Mewö qeriga azi kösutñe kingeri, yeñgöreñök tosatñan mi möta jiget, “Mötket! Mönö Elaijagöra qetza.” ³⁶ *Yeñgöreñök kunöñ ösumñan anda mömөndö kun kahali tandök mi memba wain o asöñjambuknöñ kundungöba ip göröm kitipñe jöhöba

* 15:21: Rom 16.13 * 15:24: Sum 22.18 * 15:28: Ais 53.12 * 15:29: Sum 22.7; 109.25; Mak 14.58; Jon 2.19 * 15:34: Sum 22.1 * 15:36: Sum 69.21

suruba Jisös numbu susuŋe eu ali neiga jiyök, “Mönö mosötketka nanŋök kinök. Elaijanöŋ kaba meköi etma me qahöpto, mönö mi ekin.”

³⁷ Mewö aketka Jisösnöŋ qet ketanji qeta wösöŋi nöŋ qeiga kömuyök.

³⁸ *Kömuiga mianğöreŋök jöwöwöl jikegö uruŋe opo kinöhi, mianğön mönö euyök bibiŋe jurata eta yahöt ahök. ³⁹ Suahö galömnöŋ maripom mesohol köla kinda Jisösnöŋ wösöŋi nöŋ qeiga kömuyöhi, mi eka kewö jiyök, “Azi kianğön mönö ölna Anutugö nahönŋa akza.”

⁴⁰ *Ambi tosatŋan mewöyök sikep kinda yuai mi eket. Yeŋgö sutŋine Magdalagö Maria aka Maria Jeims dubatŋi aka Joses yetkö namŋiri aka Salome yeŋön mohotŋe kinget. ⁴¹ Yeŋön Jisösnöŋ Galili prowinsnöŋ maliga mianğöreŋ i wuatangöba welen qem waŋgiba malget. Mewöyök ambi tosatŋi gwötpuk Jisösbuk Jerusalem sitinöŋ öngöba kageri, yeŋön mewöŋanök kösutŋe kinget. Mewö.

Jisösgö qamötŋi löm kölget.

Mat 27.57-61; Luk 23.50-56; Jon 19.38-42

⁴² Sabat kendon tatatköra yuai mözözömgögetka Sabat kendonöŋ könahimangöra dopdowiiga mare aka kayök. ⁴³ Neŋgogie mianğöreŋ Arimatia tonji, azi qetbuŋaŋambuk qetŋi Josef yaŋön kayök. Yaŋön mewöyök Anutu bemtohoŋangö ölni asuhumapköra mamböta malök. Yaŋön Juda yeŋgö jike kaunsöl kambugö jitŋememe kun aka Sabat kendonöŋ könahimangö ahöraŋgöra aka keŋgötŋi yaköriba Pailötköreŋ anda Jisösgö qamötŋi memangö qesiyök. ⁴⁴ Qesiiga “Ölna kömuza me qahöpto?” jiba mötmöriba suahö galömnji jii kaiga “Jisösnöŋ nalö köröpŋi me töröpŋi kömuza,” jiba qesim waŋgiyök. ⁴⁵ Qesim waŋgiiga buzup keuŋi möta Jisösgö qamötŋi Josef jim teköm waŋgiyök. ⁴⁶ Jim teköm waŋgiiga opo tuatŋi söŋgöroröŋi memba anda qamötŋi maripomnöhök qeköba memba eta oponöŋ esuhuyök. Esuhuba memba qaksirinöŋ anda kötnöŋ köteŋ urorohogetka dum ahöyöhi, mianğöreŋ alök. Ala köt kötanji kun metaliga köteŋ numbuŋi közipköyök. ⁴⁷ Denike alöhi, mi Magdalagö Maria aka Maria Josesgö namŋi yetköŋ kinda ehot. Mewö.

16

Jisösnöŋ kömupnöhök wahörök.

Mat 28.1-8; Luk 24.1-12; Jon 20.1-10

¹ Sabat kendon tatket teköiga mianğöreŋ Magdalagö Maria, Maria Jeimsgö namŋi aka Salome yeŋön “Jisösgö qamötŋi

* 15:38: Eks 26.31-33 * 15:40: Luk 8.2-3

anda miribin.” jiba jiniḡ jimoroḡ umköhöwakhambuk söḡgöroḡni meget. ² Memba ahöba Sonda söḡjanök wahöta miri gianji wehön jilinbölan kori qaksirinöḡ anget. ³ Anda eraum möta jiget, “Qaksirigö numbuḡe köt ketanji tatzawi, mi mönö daḡön qetalma?” ⁴ Mewö jiba ugetka ani kewö eket: Köt keta bölöknji mi lök qetalget anda ahöyök. ⁵ Qaksirigö köt köteḡ numbuḡi mewö aḡañiba kiniga uruḡe öḡgöget. Öḡgögetka öḡḡine göröken azi gwabö kun malukuḡi köroḡpni tuatḡi tariga eket. Mewö eka gwötpuk awöwöḡiget.

⁶ Awöwöḡigetmö, kewö jii mötket, “Mönö keḡgötḡini kude mötme. Inini Nazaret azi Jisösgöra jaruze. I maripomnöḡ qegetmö, mönö guliba wahörök. Mianḡöra ki kude ahöza. Eket! Dumḡi ki, mianḡoreḡ soluget ahöyök. ⁷ *Mianḡöra mönö anda Pitö aka gwarekurupḡi pakpak buzup kewö jiget mötme, ‘Yaḡön mönö qeljiḡe mutuk Galili prowinsnöḡ anma. Inini mewöyök mianḡoreḡ anda keuḡi jiyöhanḡö dop i ekḡe.’”

⁸ Mewö jiiga auruba jönömḡini unduiga köt köteḡök eta ösumḡinan anget. Sömbuḡini mötkeraḡöra keu kun kude jigetmö, keuḡini bököyök. Mewö.

Jisösnöḡ Magdalagö Mariagöreḡ asuhuyök.

Mat 28.9-10; Jon 20.11-18

⁹ Jisösnöḡ Magdalagö Maria yaḡö uruḡeyök öme 7 enḡuataḡöiga malök. Jisösnöḡ kömupnöhök wahöta Sonda söḡjan amandiḡnöḡ mutuk Maria mi asuhum waḡḡiyök. ¹⁰ Asuhum waḡḡiiga alaurupḡan Jisösbuk mala kota nalö mianḡoreḡ jinḡeḡ köla sahötkeri, Marianöḡ mönö yeḡgöreḡ anda buzupḡi jii mötket. ¹¹ Mötketmö, Jisösnöḡ guliba mali Marianöḡ ehöhi, mi qahö möt nariget. Mewö.

Jisösnöḡ alayahötḡi yetköreḡ asuhuyök.

Luk 24.13-35

¹² Mianḡö andöḡe alayahötḡan Jerusalem siti mosöta miri kunöḡ anbitköra könanöḡ anohotka Jisösnöḡ kaisoḡgolomḡan melenḡniga asuhum etkiyök. ¹³ Yetköḡ mewöyök anda buzupḡi mi alaurupḡi jiyohot mötketmö, yeḡön mi mewöyök qahö möt nariget. Mewö.

Jisösnöḡ gwarekurupḡi asuhum enḡiyök.

Mat 28.16-20; Luk 24.36-49; Jon 20.19-23; Apo 1.6-8

¹⁴ Könaḡep gwarekurupḡi 11 mienöḡ tokoba nene nempa tatketka yeḡgöra mewöyök asuhuyök. Asuhuba uruköhöikḡinanḡöra tembula kömupnöhök wahöriga ekeranöḡ buzupḡi jiget möta mi qahö möt narigeri, mianḡöra i jim enḡiyök. ¹⁵ *Jisösnöḡ kewö jii mötket, “Inini mönö kantri dop

* 16:7: Mat 26.32; Mak 14.28 * 16:15: Apo 1.8

anda gölmeni gölmeni liliköba ambazip mal anjeangö dop Ölöwak Buñani jim asarigetka mötme. ¹⁶ Kunñan Anutu möt nariiga o melun mem wañgigetka uruñi melenmawi, yañon mönö letota Suepkö buñaya akña. Kunñan qahö möt nariba yañisen malmawi, Anutunöñ mönö yañgö keuñi jim teköiga könöp siagö buñaya akña. ¹⁷ Möt narim niñgiba malmei, mi aiwesök mem enjibiga könañamñini kewö asuhuma: Yenön nöngö qetne ömewöröme enguatangöme. Kantri tosatñi yengö keuñini jime. ¹⁸ Mokolen böröñinan memba wahötme. Möröm warabe o yuai negetka mianön mönö qahö mem bölim enjima. Böröñini kawöl ambazip qakñine algetka ölöwakñe.” Mewö.

Jisösnöñ Suep mire öngöyök.

Luk 24.50-53; Apo 1.9-11

¹⁹ *Kembu Jisösnöñ keuñi mewö jii mötketka Anutunöñ wañgiriga Suepnöñ öngöba Anutugö böröñi ölñe tata malja. ²⁰ Eu maljapmö, gwarekurupñan mosöta miri gölme dop anda Buña keuñi jim sehiba malget. Mewö malgetka Kembunöñ yembuk nup memba inahöm enjiiga anjöletot asuhugetka keuñinan köhöiyök. Mewö.

* **16:19:** Apo 1.9-11

Luk Ölöwak Buña Luknöŋ ohoyök. Jim-asa-asari

Urumelenŋ yeŋön miti dölökŋi qahö memba kazei, dokta Luknöŋ mi azi öngöngöŋi Tiofilusgöra kondelmamgöra aka Ölöwak Buña ki ohoyök. Luk yeŋön Jisösgö gwarekŋi 12 yeŋgöreŋök kun qahöpmö, Grik azia aka kawöl ambazip mem ölöwak nupnöŋ malök. Luknöŋ Jisösgö könaŋi yahöt kewö kondel neŋgiza: 1) Anutunöŋ Amötqeŋe Toŋi melaimamgö keu jöhöiga Israel yeŋgöra asuhuyök, 2) Yeŋön mönö kantriŋi kantriŋi mem ölöwak neŋgimamgöra kayök. Kembugö Uŋaŋan Jisös oholiga “ambazip etqeŋeŋi yeŋgöra Ölöwak Buña” jim asariyök. Ambazip yuai könaŋi könaŋi miangöra osigeri, Jisösnöŋ yeŋgöra waimanjat möta bauköm eŋgiba malök. Luknöŋ kösohot mewöŋi sehisehiŋi areŋgöba ohom teköyök. Luknöŋ sösoŋgaigö kösohotŋi gwötpuk ohoyök. Jisösnöŋ mutuk gölmenöŋ erök aka teteköŋe miangöreŋ gölme mosöta Suepnöŋ öŋgöyök. Miangöra sösoŋgai sehisehiŋi mi boŋ 1-2 aka boŋ 24 miangöreŋ ahöza. Jisösnöŋ Suepnöŋ öŋgöiga Buña nup mem sehigetka mötnariŋ kambunöŋ qariba qariba anök. Luknöŋ miangö kösohotŋi mi buk qetŋi “Aposol nup meme” miangöreŋ ahöi ahöza.

Luknöŋ Ölöwak Buña ohoyöhi, miangö keu bohonŋi mi kewö dop köla ali ahöza: Köuluk nup megetka ölni asuhuyök, Uŋa Töröŋan ambazip sölölohöm eŋgii malget, Ambi yeŋön Jisösbuk nup gwötpuk naŋgöba meget, Anutunöŋ siŋgisöndokŋini mosöta malök.

Buk kiangö bahöŋi bohonŋi 8 mi kewö:

Buk kiangö könaŋi Luknöŋ ohoyök boŋ *1.1-4*

Jon O-melun azi aka Jisös asuhiba qariyohot *1.5-2.52*

Jon O-melun azinöŋ Anutugö nup meyök *3.11-20*

Jisös o melun mem waŋgiiga esapesap miwikŋaiyök *3.21-4.13*

Jisösnöŋ qenjarök nupŋi Galili prowinsnöŋ meyök *4.14-9.50*

Galili mosöta köna anda Jerusalem aŋgorök *9.51-19.27*

Jerusalem aŋgota sonda qöndökŋi malök *19.28-23.56*

Wahöta asuhum eŋgiba Suepnöŋ öŋgöyök *24.1-53*

Matyu Mak Jon yeŋön kösohot tosatŋi qahö ohogeri, mi Luknöŋ nanŋök ohoi bahöŋi 2 aka 6 miangöreŋ ahöza. Kösohot tosatŋi mi kewö: Garata yeŋön liŋet kölget, Lama galöm yeŋön Jisös asuhuiga kaba eket, Jisösnöŋ moröröpŋe jöwöwöl jikenöŋ öŋgöyök, Samaria azinöŋ gurusep azi ak kömum waŋgiyök

aka nanŋi imbi-imbi azinöŋ siŋgisöndoknöŋ geba sohoŋi, mianŋö dopkeu.

Luknöŋ kimbi Tiofilusgö ohoyök.

¹ Kezapqetok ambazipnöŋ Amötqeqe Toŋi ahumapkö keu jigetka mianŋö ölni sutnine asuhuyöhi, ambazip gwötpukŋan mianŋö kösohotŋi könahiba ohoget. ² Yuai ölni mi sutnine asuhuiga tosatŋan mi könakönahinŋeyök könahiba kota nanŋine jeŋinan eka möt yakögeri, yeŋön mianŋö dop mianŋö buzupŋi toroqeba jim sehigetka kezapnine geba nanine buŋaya ahök. Ambazip mewöŋi yeŋön Buŋa mi könahiba papianöŋ ohoba areŋgöget ahöza.

³ Nöŋön mewöyök yuai pakpak asuhiba koröhi, mi törörök qesim eŋgibi könaŋeyök könahiba jigetka möt kutuzal. O Tiofilus nöŋön göhöra mötpi öŋgöŋgöŋi akzan. Nöŋön göbuk keu eraum mötpitkö mötpi ölöwahiga Jisösgö kösohotŋi mi körekŋanök areŋgöba ohozal. ⁴ Buŋa keu ölni kusum gi-higetka mötzani, göŋön mianŋö könaŋi oyoŋda körekŋanök möt kömuman. Mewö.

Jon asuhumapkö keuŋi Geibrielnöŋ jiyök.

⁵ *Judia prowinsgö kiŋ qetŋi Herod yaŋgö nalöŋe azi kun qetŋi Zekaraia malök. Yaŋön jike nup galöm mala Abaiagö nup areŋnöŋ kinök. Anömŋi qetŋi Elisabet yaŋön mewöyök jike nup galöm Arongö gwölönarökŋi kun ahök. ⁶ Yekŋön Anutugö jeŋe malmal diŋdiŋi mala Kembugö jöjopaŋ keu aka jimkutukutuŋi pakpak törörök wuatangöba köpösihitkö keuŋiri qahö malohot. ⁷ Malohotmö, Elisabetnöŋ köpingöra gwölönarökŋiri qahö mala ambazip namŋi ahot.

⁸ Nalö kunöŋ Abaiagö nup areŋ nalöŋan kaiga Zekaraianöŋ jike nup galöm nup memapköra Anutugö jemesoholŋe kaŋgorök. ⁹ Kaŋgoriga jike nup galöm yeŋön aiakanini wuatangöba sutŋine nup mendeŋda Zekaraia mekögetka Kembugö altanöŋ öŋgöba jiniŋ wörönŋambuk ohoyök. ¹⁰ Jiniŋ wanafu ohoho nalöŋan kam kuŋguiga yaŋön yuai wörönŋambuk mi ohoiga ambazip kambu pakpak yeŋön jöwöwöl jike yaigepŋe mamböta Anutu köuluköba malget.

¹¹ Jiniŋ ohoiga wörönŋan pukpuköba miri uruŋi dop köliga mianŋöreŋ Kembugö garata kunöŋ altanöŋ eu asuhum waŋgiba böröŋi ölnŋe göröken kinök. ¹² Kiniga Zekaraianöŋ eka auruba keŋgötŋi mörök. ¹³ Keŋgötŋi mörökmö, garatanöŋ kewö jii mörök, “Zekaraia, gi keŋgötki kude mötnöŋ. Anutunöŋ köuluki lök mötza. Mianŋöra anömŋan gölöm ala morö nahöna mema. Mi meiga göŋön qetŋi Jon qetman.

* 1:5: 1 Hist 24.10

14 Nahönji asuhuiga urugan yangöra ölöwahiga söngainönga ambazip gwötpukñan sösongai akñe. 15 *I nam körö uruñe tariga Uña Töröñan miangörenök könahiba uruñi kokolak qeiga qariba wain me o köhöikñi mi qahö nemba Kembugö qöhöröñe azi öngöngöñi aka malma.

16 Mewö mala Israel ambazip gwötpuk urumelenj engiiga Kembunini Anutugörenj lilingöme. 17 *Anutugö Uñañan kezapqetok azi Elaija inahöiga kukösum qakñe nup meyöhi, yanön mönö miangö dop mutuk qeljiñe aniga Kembunöñ andöñe kama. Yanön anda könagesö uru kuñgum engiiga Kembunöñ kamapköra jöjöröba kinme. Iwi aka nahönbörat jula dengetka uru kuñgum engiiga kunbuk mindirim angume aka qegetal ambazip mi diñdiñi yengö mötmöt arenöñ angotme.”

18 Suep garatanöñ mewö jiiga Zekaraianöñ jiyök, “Anömmi netkön ambazip namñi akzirangöra keugan mönö dewöwö öljambuk akawak?”

19 *Mewö jiiga meleşnök, “Ni Geibriel. Nöñön Anutugö mesoholñe kinbi melaim niñgii buzup ölöpñi ki memba kaba jibi mötzan. 20 Nöñgörenj keu jit öljambuk asuhumawi, göñön mi jibi qahö möt narizanañgöra keugan mönö qahöwahiga mötök malman. Mewö malnöñga buzup keu kiangö ölni asuhumapkö nalöñan kam kuñguiga miangörenj nesilamgan lolohoi keu kunbuk jiman.”

21 Nalö sutñe miangörenj ambazipnöñ mamböt mala Zekaraianöñ jöwöwöl jikenöñ nalö köröp tiñtiñi kinöhangöra mötkurumkurum aket. 22 Mewö aka tatketka yaigep eta keu jimangö osiiga möt asariba kewö jiget, “Yanön jöwöwöl jikenöñ kinda jeñi meleşni Suepnöhök imut kun ekza.” Mewö jigetka böröñanök kaisöpsöp al engiba mötök aka malök.

23 Mewö mala jike nup meme nalöñan teköiga lilingöba miriñe anök. 24 Wehön tosatñi teköiga Elisabetnöñ gölöm ala köiñ 5 miangö dop mire asamböta kewö jiba tata malök, 25 “Moröni qahöpköra ambazipnöñ memba eta al niñgigetka Kembunöñ mesohol köl niñgiba miangö lömbötñi memba gila ak kömum niñgiza.” Mewö.

Jisös asuhumapkö keuñi Geibrielnöñ jiyök.

26 Elisabetnöñ gölöm alöhangö köiñi 6 aiga Anutunöñ garatanj qetñi Geibriel melaiiga Galili prowinsgö miriñi kun qetñi Nazaret miangörenj erök. 27 *Eta ambi seram jömukñi qetñi Maria yangörenj anök. Yanön azi qetñi Josef yangö ambi buñaya malök. Josefñöñ kiñ Deiwidkö gwölönarökñi kun ahök.

* 1:15: Jan 6.3 * 1:17: Mal 4.5-6 * 1:19: Dan 8.16; 9.21 * 1:27: Mat 1.18

²⁸ Garatanöŋ Mariagöreŋ anda kewö jiyök, “O Maria, silingi ölöŋŋi. Kembunöŋ kalem möriam gihiba göbuk kinma.”

²⁹ Mewö jiyökmö, Marianöŋ jölöŋ miangöra gwötpuk auruba könaŋi jaruba mötkurumkurum ahök. ³⁰ Mötkurumkurum aiga kewö jii mörök, “Maria, Anutunöŋ kalem möriam gihiiga yangö jeŋe dop köljan. Miangöra keŋgötŋi kude mötnöŋ. ³¹ *Mötnöŋ, göŋön gölöm ala morö nahöna meman. Memba qetŋi Jisös qetman. ³² *Jisös yaŋön qariba azi qetbuŋaŋambuk aiga qetŋi ‘Öŋgöŋgöŋi ketaŋaŋgö Nahönŋi,’ qetketka malma. Mewö mali Kembu Anutunöŋ amböŋi kiŋ Deiwidkö jakömbuak dum waŋgiiga salupŋe ambazip galöm köl eŋgiba malma. ³³ Jeikobkö könagesö yeŋgö kiŋa aka teteköŋi qahö galöm köl eŋgiba malma. Bemtohoŋi miangön mönö nalö kunöŋ kude qahöwakŋa.”

³⁴ Garatanöŋ mewö jiiga Marianöŋ jii mörök, “Yei! Ni azigö könaŋi qahö mötzal. Miangöra keu jizani, miangö ölni mönö denöwö asuhuma?”

³⁵ Mewö jii möta meleŋnök, “Uŋa Töröŋan mönö aum köl gihiiga Anutu öŋgöŋgöŋi ketaŋaŋgö ösumŋan dop köla turum gihima. Miangöra morö memani, yaŋön töröŋi aiga ambazipnöŋ qetŋi ‘Anutugö Nahönŋi,’ jiba qerakŋe. ³⁶ Mötnöŋ, Tinigi Elisabet yaŋön mewöyök ‘Köpin mala morö memangö osiza,’ jigetmö, töndup ambi namŋi aka nalö kewöŋe morö nahöngö gölömŋambuk aiga köiŋi 6 akza. ³⁷ *Anutunöŋ yuai kun akŋamgö jiba mi qahö qaköba osimakza.”

³⁸ Mewö jiiga Marianöŋ jiyök, “Mötnöŋ, nöŋön Kembugö welenqeŋe ambia akzal. Miangöra keu jizani, miangö dop ölöŋ ahum niŋgima.” Mewö jiiga Suep garatanöŋ mosöta anök. Mewö.

Marianöŋ Elisabetköreŋ kusuk anda ehök.

³⁹ Marianöŋ mi möri nalö köröŋŋi qahö aiga wahöta zilaŋ jöjöröba gölme kundupŋe öŋgöba Judia prowinsgö taon kunöŋ anök. ⁴⁰ Anda Zekaraiagö mire öŋgöba anöŋŋi Elisabet eka söŋgaiba jölöŋi jiyök. ⁴¹ Jölöŋi jiiga miangöreŋök möri morö nahönöŋ körö uruŋe luhuba öŋgöba eri Uŋa Töröŋan Elisabetkö uruŋi kokolak qeyök.

⁴² Kokolak qeiga qet ketaŋi qeta kewö jiyök, “O alani, Anutunöŋ kötümötuŋeŋi öŋgöŋgöŋi al gihiiga ambi sutnine malman aka morö memani, i mewöŋanök kötuetköm waŋgima. ⁴³ Denöwögöra Kembuŋaŋgö namŋan kaba neiga mewö asuhum niŋgiza? ⁴⁴ Mötnöŋ, gi jölöŋŋi jinöŋga keu jölgi kezapne gei morönöŋ urune mewöyök söŋŋgai qakŋe luhuba öŋgöba etza. ⁴⁵ Kembunöŋ buzup keuŋi jiiga möta miangö ölni

* 1:31: Mat 1.21 * 1:32: 2 Sml 7.12, 13, 16; Ais 9.7 * 1:37: Jen 18.14

asuhumawi, mi möt narizanaŋgöra göhö mötpti simbawon akzan." Mewö.

Marianöŋ sösöŋgai liŋet kölök.

⁴⁶ *Marianöŋ keu mi möta kewö jiyök,

"I-ia! Nöŋgö urukönömnan mönö önöŋi qahö Kambu möpöseiza.

⁴⁷ Nöŋgö uŋanan Anutu, Amötqeŋe Toni yaŋgöra söŋgaiba köiraŋ kölja.

⁴⁸ *Nöŋön welenqeŋe ambi etqeŋeŋi maljalmö, Anutunöŋ töndup mesohol köla ak kömum niŋgiza.

Mötnöŋ, ambazip kambuŋi kambuŋi merak könahiba asuhumei, yeŋön mönö nöŋgöra 'Simbawon!' jiba möpöseim niŋgiba malme.

⁴⁹ Kukösum Toŋan mönö aŋgöletot öŋgöŋgöŋi mem niŋgii maljal.

Yaŋgö qetŋi mi Töröŋi.

⁵⁰ Ambazip merak gölmenöŋ maljei aka könaŋgep ahum sehimei, yeŋgö sutŋine gwöt isik denike yeŋön Anutugö jitŋi oŋgitpinbukö keŋgötŋini mötmei, yaŋgö ak-kömukömuŋan mönö yembuk pöndaŋ ahöma.

⁵¹ Anutunöŋ böröŋan aŋgöletot memba mianöŋ kukŋi kondel neŋgiiga ehin.

Ambazip nanŋini miwidimgöba söŋgöröqök malgeri, yaŋön mönö i köndaŋ eŋgiiga simbisembel aka malget.

⁵² *Kiŋ kembuŋi kembuŋi jakömbuak dumŋine tata ambazip galöm

köl eŋgiba malgeri, yaŋön i miangöreŋök qeköba utal eŋgiiga etket.

Etketmö, etqeŋeŋi ia mönö mem wahöta al eŋgiyök.

⁵³ Ambazip yuaigö jaŋkötataŋ malgeri, miŋgö uruŋini mönö yuai ölöŋŋi ölöŋŋi mianöŋ kokolak qeyökmö, ambazip pomŋi mi melaim eŋgiiga böröŋini börak öne anget.

⁵⁴⁻⁵⁵ *Yaŋön ambösakonurupnini meköba eŋgömeiga Israel aketka nini toroqeba Anutugö welenqeŋeuruŋi maljin.

Anutunöŋ mönöwök jöjöpaŋ keuŋi kewö jim jöhöm neŋgiyök, 'Nöŋön Abraham aka yaŋgö gwölönarökuruŋi teteköŋi qahö mal öŋgöba malmei, i ak kömum eŋgiba malmam.'

Mewö jiba keuŋi mi qahö ölum qei mala korök.

Qahöpmö, yaŋön mönö keu jitŋi mi wuatangöba mala merak bauköm neŋgimangöra kaza."

Marianöŋ mewö jiyök.

* 1:46: 1 Sml 2.1-10 * 1:48: 1 Sml 1.11 * 1:52: Job 5.11; 12.19 * 1:54-55:

⁵⁶ Marianöj köinj karöbut mianğö dop Elisabetpuk mala kunbuk miriņe lilingöyök. Mewö.

Jon O-melun azinöj asuhuyök.

⁵⁷ Elisabetkö morö meme nalöjan kam kuņguiga morö nahöna meyök. ⁵⁸ Morö nahöna meiga miri kösutņe malgeri aka tinitosolomurupņi yejön Kembunöj ak-kömukömu öngöngöņi kondel waņgiyöhi, mi möt asariba yambuk mohtņe sösöņgai aket.

⁵⁹ *Sösöņgai aka wehön 7 teköiga wahöta anda Anutugö aiwesökņi morö silene yandimegöra tokoget. Tokoba iwiņangö qetņi Zekaraia mi wakan mem waņgibingöra jiget. ⁶⁰ Jigetmö, namņan jiyök, “Mi qahöpmahöpmö, qetņi mönö Jon qetpin.”

⁶¹ Jiiga kewö jiget mörök, “Jon qetzanmö, göhö tinitosolomgi yeņgörenök kunņangö qetņi mi qahö ahöza.” ⁶² Mewö jiget möri kinda iwiņan yaņgö qetņi qetmapkö qesiba böröņinan kaisöpsöp alget.

⁶³ Kaisöpsöp algetka tafegöra qesii waņgigetka mianğören kulem kewö ohoyök, “Qetņi mi Jon.” Mewö ohoiga mianğöra körek aurum tililingöget. ⁶⁴ Aurum tililingögetka mianğörenök numbuņi angöiga nesilamņi lolohoiga keu jiba Anutu möpöseiyök. ⁶⁵ Möpöseiiga miri alaurupņini pakpak yejön qemsömbuņini gwötpuk mötket. Mötketka yuai asuhuyöhi, mianğö buzupņi eraum mötketka sehiba Judia kundunji gölme pakpak dop kölök.

⁶⁶ Buzupņi eraum mötketka körekņan mi möta urukönömnine ala aņgön kölget. Kembunöj kukösumņi morösepsep qakņe mokoi malöhi, mianğö könaņi möt asariba kewö jiget, “Morö kianjön qariba mönö wani yuaia kun denöwö akņa?” Mewö.

Zekaraianöj kezapqetok keu jiyök.

⁶⁷ Mewö jigetka Uņa Töröjan iwiņi Zekaraiağö uruņi kokolak qeiga kezapqetok keu kewö jiyök,

⁶⁸ “Nini Israel neņgöreņ Kembu Anutu möpöseibin. I-ia!

Yaņjön mönö könagesöurupņi mesohol köl neņgiba sohoppini memangöra jöjöröba kama.

⁶⁹ Anutunöj welen aziņi kiņ Deiwidkö könagesö neņgö sut-nineyök

azi kukösumņambuk kuņgui wahöta Amötqeqe Tonina akņa.

⁷⁰ Möpņangö möpņeyök kezapqetok ambazipurupņi tök-kutukutuņi

i sölhöm eņgii keu jit kewö jiba malget,

⁷¹ ‘Nöjön mönö kerökurupņini yeņgö ösumņini qebi eriga bohonnini jöhömam.

* 1:59: Lew 12.3

Denike yeñon kazik ak enjime, nõñon mõnõ körek yeñgõ
bõrõñineyök meköba sel jõhõm enjgimam.'

⁷² Keu mewõ jiba bõmõnurupnini ak kõmum enjgiba yembuk
jõhõjõhõ

areñ qainñi kun jõhöyõhi, mi mõtmõriba wuatangõiga
amõtqeqegõ õlñi asuhuma.

⁷³ Jõhõjõhõ keu mi bõmõnini Abrahamgõra jiba jõjöpañ
keunõñ jim kõhöii ahõza.

⁷⁴ Jõhõjõhõ keu miangõ õlñi kewõ:

Yañon nini kerõkurupnini yeñgõ bõrõñineyök meköm neñgiiga
yeñgõra keñgõtnini qahõ mõta welenñi qem wañgiba
malbin.

⁷⁵ Yañon keunini jim tekõi solaniba yañgõ jeñe sarakñi aka
malmalnini õlulup mewõ mala kõmumbin.

⁷⁶ *O gömokni Jon, gõñon qariba mala qeljiñe mala am-
bazip uruñini mindiñgõba mewõ miangõn Kembangõ
kõnañi mesatnõñga kama.

Miangõra qetki 'Anutu õngõngõñi ketañangõ kezapqetok azia,'
mewõ qetketka malman.

⁷⁷ Mewõ mala amõtqeqegõ kõnañi mi Anutugõ kõnagesõurupñi
kusum

enjinõñga mi mõt kutuba uruñini melengetka Anutunõñ
siñgisõndokñini sañgoñda mosõtma.

⁷⁸ Anutuninan uruñan jõpakõba ak kõmum neñgimakza.

Mewõ aka mesohol kõl neñgiba undiñi euyangõreñök ali gilik-
bilik akza.

Mewõgõra neñon mõnõ wañgarañ surui aukñe asaribingõ
akzin.

⁷⁹ *Nini pandamanõñ jipjap taringa kõmupkõ kondotkon-
dot Tonjan aum kõl neñgimakzapmõ, wehõn jilinjõlan
kota qaknine kuñguba mem asarim neñgima.

Mem asarim neñgiiga luaigõ kõnañi aukñe asuhui eka
miangõreñ angota tiba kinbin." Zekaraianõñ mewõ
jiyök.

⁸⁰ Morõ Jon yañon qariba wahõriga Uña Tõrõñan inahõm
wañgiiga Anutugõ kolek azi kõhöikñi ahõk. Mewõ aka
gõlme qararañkõlkõlñe mala mali nalõñan kam kuñguiga Is-
rael kõnagesõ yeñgõ jeñine aukñe asuhuba qenjarõk nupñi
kõnahiba meyök. Mewõ.

2

Jisõs Betlehem taonõñ ahuyök.

Mat 1.18-25

¹ Jon O-melun azinõñ ahuiga nalõ miangõreñ sisa kiñ Ogas-
tus yañon Rom sitinõñ gõlmeñi gõlmeñi galõm kõl enjgyök.

* 1:76: Mal 3.1 * 1:79: Ais 9.2

Galöm köl enġiba takis könahiba memegöra gawmangö jimkutukutu aliga gölmenġi gölmenġi pakpak yeġön tokogetka kuskus (sensus azi) yeġön qetġini papianöġ ohoba areġġoġet.

² Areġ nup mi nalö mutukġa meġet. Megeri, nalö mianġöreġ azi qetġi Qirinius yaġön Siria prowinsġö premiö mala galöm köl enġiyök. ³ Ogastusnöġ jimkutukutu aliga ambazip körek pakpak yeġön öröba anda qetġini areġnöġ ohomeġöra nanġini ahuahu miri bohonnġini dop anġet.

⁴ Galili prowinsġö taon qetġi Nazaret mianġöreġ azi qetġi Josef malök. Yaġö amböġi mi kiġ Deiwid. Kiġ Deiwidkö taonġi qetġi Betlehem mi Judia prowinsnöġ ahöyök. Mianġöra Josefnöġ Nazaret mosöta öġġöba geba Betlehem anök. ⁵ Anmam jiġga nalö mianġöreġ ambi buġaġi qetġi Marianöġ gölömnġambuk malök. Maliga i auanġita qetġiri ohomeġöra mohotġe anohot.

⁶ Anda Betlehem anġorohotka Mariagö morö meme nalöġan kam kuġguyök. ⁷ Kam kuġguġga qeġjarök ahöahö mire anġota mianġö uruġe tiġi qahö miwikġaiyohot. Mianġöra bau bulmakau miriġe öġġöba tarohot. Tata mianġöreġ nahönġi mutukġi memba oponöġ esuhuba bulmakau joutġe ali geba ahöyök. Mewö.

Lama galöm yeġön Suep garata enġeket.

⁸ Betlehem taon gölme mianġöreġ azi tosatġan suġgem dop gölme köröġi mianġöreġ anda lama kambuġini galöm köl enġiba malġet. ⁹ Mewö malġetka suġgem mianġöreġ Kembuġö garata kuġġan kösutġine asuhum enġiyök. Asuhum enġiġga Kembuġö asakmararaġan liliköm enġiba asariġga qem sömbuġini möta jönömġini unduyök. ¹⁰ Jönömġini unduyökmö, Suep garatanöġ jii mötket, “Mönö kezap alġet. Nöġön sösongai Buġa ketanġi ambazip körek pakpak yeġöra memba kazal, mi indel enġimam. Mianġöra jönömġini kude unduma. ¹¹ Buġa mi kewö: Enġö Amötqeqe Toġinan döлки ahuza. Yaġön kiġ Deiwidkö taonöġ asuhuba Kembu qetġi Kraist akza. ¹² Keu mianġö aiwesökġi kewö: Iġini anda morö sepsep oponöġ esuhuba bulmakau joutġe alġet ahözawi, mi miwikġaime.”

¹³ Garatanöġ mewö jiġga mianġöreġök garata kambu ketanġan Suepnöhök kaġgota yambuk aitöġöba Anutugö möpömöpösei liġet köla kewö jiġet,

¹⁴“Anutugö qetbuġaġi möpöseininga Suepnöġ euyanġöreġ öġġöza.

Yaġön ambazip nanġanġöra meköm enġiyöhi, yeġöra körö ölöwak möta gölmenöġ luai al enġiza.” Mewö.

Lama galöm yeġön anda Jisös eket.

15 Garata yeñon engömosöta Suepnöñ lilingöba öngögetka lama galöm yeñon naninak kewö jiget, “Ayop, Betlehem miangöreñ yuai ahuiga Kembunöñ miangö keunji jii mötzini, nini mönö mia anda ekin.”

16 Mewö jiba ösumñinan anda Maria Josef aka morösepsep bulmakau joutje ahöyöhi, miwikñaiba eket. 17 Eka kinda garatanöñ morögöra keu jii möta kageri, mi indela jim asariget. 18 Jim asarigetka mötkeri, yeñon körek pakpak auruba welipköget.

19 Welipkögetmö, Marianöñ keu pakpak mi uru könömñe ala dungöba jöhöba könañi mötmöriba malök. 20 Welipkögetmö, yuai pakpak Suep garatanöñ jiyöhañgö dop asuhuyöhi, mi lama galöm yeñon eka möta miangöra Anutugö sösongai linjet köla möpöseiget. Möpöseiba mosöta lilingöba anget. Mewö.

Morö qetñi Jisös qetket.

21 *Jisös ahui Sonda mohot miangö dop teköiga Anutugö aiwesökñi silene yandibingö nalöñi kaiga qetñi Jisös qetket. Suep garatanöñ qet mi mutuk qeta wañgiigun nalö miangöreñök namñañgö gölöm uruñe ahuyök. Mewö.

Jisös wañgita Anutugö buñaya alget.

22 *Mosesgö Köna keunöñ keu kewö ahöza, “Ambinöñ morö nahöññi mutukñi memba silim 40 koumñe mali teköiga söro guluñi köl köñjörat wañgiba inini mönö jöwöwöl jikenöñ öngöba morö mi Anutugö jeñe algetka yañgö buñaya akña.” Miangöra nalö mi kam kuñguiga Josef Maria yetköñ keu mi tem köla Jisös wañgita Kembugö buñaya akñapköra Jerusalem öngöyohot.

23 *Kembugö Köna keunöñ keu kewö ohoget ahöza, “Morö nahöñ pakpak sep mutuk mökozei, mi mönö Kembugö buñaya akñapköra qem teköba mem sarahime.” Yetköñ keu mi wuatangöyohot. 24 Mewöyök Kembugö Köna keunöñ jimkutukutu keu ahözawañgö dop kembö me kembö supsup nei yahöt mi jöwöwöl ohomahotköra Jerusalem sitinöñ öngöba anohot.

25 Nalö miangöreñ azi kun qetñi Simeon Jerusalem malök. Yañon uruñi jömuk Anutugöreñ qekötahöba urumelengö kölguliguli aiga Uña Töröñan yambuk kiniga Amötqeçe Toñan Israel uruñe asuhumapköra mamböta malök. 26 Mamböta maliga Uña Töröñan keu kewö indeli mörök, “Gi Kembugö Amötqeçe Toñi Kraist ahui mutuk ekagun kömupkö sihimbölöñi mötman.” 27 Iwinamñan Mosesgö Köna keu wuatangöba Jisös wañgita jöwöwöl jikenöñ öngöyohot. Öngöyohotka Uña Töröñan Simeon sölölohöi nalö miangöreñök

* 2:21: Lew 12.3; Luk 1.31 * 2:22: Lew 12.6-8 * 2:23: Eks 13.2, 12

mewöyök jikenöŋ öngöyök. ²⁸ Öngöba morö mi eka memba dohongöba Anutu möpöseiba kewö jiyök,

Simeongö sösöŋgai liŋet

²⁹ “O Kembu, merak welen azigan ölop anda uruluainöŋ mala kömuma.

³⁰ Göhö keugahö dop Amötqeqe Tonji melainöŋ asuhuiga i nani jenan

eka simbawon mötzal.

Miaŋgöra ölop anda kömumam.

³¹ Göñön amötqeqegö könani mözözömgöba kantri pakpak yengöra indel enŋinöŋga mi eka möt kutume.

³² *Göñön Amötqeqe Tonŋö asakni indelnöŋga kian kantri yengö

uruŋini kuŋguiga asarime

aka qetbuŋagan nangi könagesögi Israel neŋgö sutnine mewöyök qarima.”

Simeongö kezapqetok keu

³³ Simeonöŋ morögöra keu mewö jiiga iwinamŋan möta köŋkuŋ aka welipköyohot. ³⁴ Welipköyohotka kötuetköm enŋiba namŋi Maria kewö jii mörök,

“Mötnöŋ, Anutunöŋ morö ki kuŋguba ali Israel ambazip sehisehiŋan i andö qeba eta enŋugetka

gwötpukŋan uruŋini melenŋda ölöwakŋe.

Anutunöŋ nanŋak i ali aiwesök aiga gwötpukŋan i tuaköpek jim waŋgime.

³⁵ Tuaköpek jim waŋgigetka urumötmötŋini asaasambötŋan mewö aukŋe asuhuma.

Nangi urugan mewöyök wösöbirik aiga miaŋön sou zuluk alalŋi ewö urugi kuŋguba qesiŋma.” Mewö.

Ana ambigö kezapqetok keu

³⁶ Jerusalem miaŋgöreŋ kezapqetok ambi namŋi kun qetŋi Ana malök. Yaŋgö isikŋi qetŋi Aser, iwiŋi qetŋi Fanuel. Ambi miaŋön seramŋe azi memba mali yambu (yara) 7 mohotŋe malohot. ³⁷ Malohotka apŋi kömui malö aka mala kori nalö miaŋgöreŋ yambuŋi 84 ahök. Yaŋön nalö dop jöwöwöl jikenöŋ öngöba mi silim kun qahö mosörökmö, suŋgem asak Anutugöra nene siŋgi mala köuluköba waikŋi memba möpöseiba malök.

³⁸ Yaŋön nalö miaŋgöreŋök kaŋgota morö mi eka Anutu möpöseiyök. Anutunöŋ Jerusalem ambazip sohopeni memapköra mamböta malgeri, körek yengöra morö miaŋgö könani jim asarii mötket. Mewö.

Jisösbuk Nazaret liliŋöget.

* 2:32: Ais 42.6; 49.6; 52.10

39 *Josef Maria yetkôn Kembunöŋ arenji jim kutuiga Kôna keunöŋ ahözawi, mi körek ahot teköiga Galili prowinsnöŋ lilingöba taonŋiri Nazaret mianğoreŋ anohot. 40 Morönöŋ qariba wahöta köhöiba mötkutukutuŋi ahuba kokolak qeiga Anutugö kalem möriamŋan qakŋe öngöi kinök.

Jisös yaraŋi 12 aiga jöwöwöl jikenöŋ öngöget.

41 *Jisös iwinamŋan yambu (yara) dop ak-kömukömu* kendon nalöŋe Jerusalem siti öngöba anjahotma. 42 Mewö mala Jisös yambu (yara)ŋi 12 aiga silikŋini ahakzeangö dop nalöŋi kam kuŋguiga mewöyök öngöba anget. 43 Anda mala kendon nalö mianjôn teköiga lilingöba miriŋire anohot. Anohotmö, morö gwabö Jisösnöŋ Jerusalem tari iwinamŋan mi qahö möt kutuyohot. 44 “Yaŋôn ambazip kambu yembuk anja,” jiba silim mohotkö dop köna anda sepkitip aka alaurupŋiri yeŋgö uruŋine qeta jaruyohot. 45 Qeta jaruyohotmö, qahö miwikŋaiba kunbuk lilingöba Jerusalem anda jaruyohot.

46 Jaruba malohotka silim karöbut teköiga jöwöwöl jikenöŋ öngöba mianğoreŋ miwikŋaiyohot. Miwikŋaiyohotka azi ketani yeŋgö sutŋine tarök. Tari kusum waŋgigeri, mi möta qesim engiba tarök. 47 Tata Buŋa keugö könaŋi törörök möt asariba diŋdiŋanök melenjiga körek pakpak yeŋjôn mi möta welipköget. 48 Iwinamŋan eka auruba namŋan jii mörök, “Nahöni, gi denöwögöra mewö ak netkizan? Mötnöŋ, niri iwigabuk göhöra waimanjat möta qeta jaruba malit.”

49 Mewö jiiga kewö melenj etkiyök, “Injiri mönö wuanöngöra ni göraim niŋgizahot? Ni Iwinangö mire tatpi dop kölja, mi mötzahot me qahö?” 50 Mewö melenj etkiyökmö, yetkôn keu jiyöhi, mianğö könaŋi mi qahö möt asariyohot.

51 Qahö möt asariyohotmö, töndup wahöta yetpuk lilingöba Nazaret taonöŋ anda iwinamŋi tem köl etkiba malök. Jisösnöŋ keu jiyöhi, namŋan mi pakpak möta urukönömŋe ala jöhöba anğön kölök. 52 *Jisösnöŋ mala qarii yambu (yara)ŋi öngöiga mötkutukutuŋi asariba sehiiga Anutunöŋ kalem möriamŋi waŋgii köhöiba ambazip aka Anutu yeŋgö jeŋine dop köl engiyök. Mewö.

3

Jon O-melun azinöŋ Buŋa keu jiyök.

Mat 3.1-12; Mak 1.1-8; Jon 1.19-28

1 Zekaraiagö nahönŋi Jon yaŋôn nupŋi könahiyök. Nalö mianğoreŋ sisa kiŋ qetŋi Taiberius yaŋôn Rom sitinöŋ mala

* 2:39: Mat 2.23 * 2:41: Eks 12.1-27; Dut 16.1-8 * 2:41: Anutunöŋ Ijpit mianğoreŋ Israel ambazip enğehoriba enğonğiröhi, ak-kömukömu kendon mianğö qetŋi kun Pasowa. * 2:52: 1 Sml 2.26; Qam 3.4

gölmeñi gölmeñi mindiriba yambu (yara) 15 azi kembu aka toroqeba galöm köl eñgii malget. Galöm köl eñgimangöra gölmeñi gölmeñi Israel liliköba ahözei, mi mesinjetka bahöñi 4 aiga mienjö kiñini 4 mi kewö kuñguget:

Pontius Pailöt, Herod, Filip aka Lisantias. Pontius Pailöt mi Judia prowinsgö premiönjina malök. Kiñ Herodnöh Galili prowins galöm köl eñgiyök aka datñi Filipnöh Ituria aka Trakonitis prowins yahöt mienjö kembunjina malök aka Lisantias yañön Abilene gölme memba malök.

² Jike nup galöm bohonñini yahöt malohot, qetñiri Anas aka Kaiafas. Nalö mianjören Zekaraiagö nahönñi Jon yañön gölme qararanjökölñe maliga Anutugören Buña keu asuhuiga mörök. ³ Anutugö Buña möta anda Jordan o töwatñangö kösutñe miri dop liliköba malök. Liliköba mala Buña keunöh uruñini kuñguba kewö jiba malök, “Injini mönö uruñini melenjetka nöñön o melun mem eñgimam. Mewö aketka Anutunöh sinjisöndokñini sañgonñda mosötma.”

⁴ *Mianjö keuñi mi kezapqetok azi Aisaianöh ohoi yañgö Buzup Kimbinöh kewö ahöza,

“Kolek garata kunñan gölme qararanjökölñe qeta maliga anda qetñi kewö mötme,

‘Kembunöh kamawo! Mianjöra mönö jöjöröba könañi mesatket. Mönö uruñini mindingöba könañi qölöleiget.

⁵ Köna örue pakpak mönö qem tigetka diñdiñi akña.

Kunduñi wanjañi pakpak mi mönö qeköba köl qölöleigetka köröñi akña.

Köna mösöqösökñambuk mi mönö möhamgögetka diñgime.

Luhutnöh köna misiiga simbiñsambañ tatzawi, mi mönö kutuba mesatketka solanima.

⁶ Anutunöh oyaenköyaen Toñi melaii kaiga gölmeñi gölmeñi pakpak

yeñön mi eka ek kutume.”

⁷ *Jonöh mianjö dop uruñini kuñguiga ambazip kambuñi kambuñi yeñön o melun mem eñgimapköra yañgören kagetka eñgeka yeñgöra kewö jiyök, “O qatö moröñi, injini uruñini qahö melenjetka Anutugö irimñan seholiiga likepñi melen eñgimangö akza. Mi öloh kölbingsö goro keuñi mi mönö dañön jii möta sömbuñini möta ki kaze?

⁸ *“Mianjöra mönö ölnanök uruñini melenje. Bölönamñineyök lilingögetka ölni asuhui mi mönö ahakmemeñinan aukñe kondela malme. Uruñine möndömöndö keu kewö kude mötmörime, ‘Neñön mönö Abrahamgö gwölönarökña malinga Anutunöh qahö ayuhum

* 3:4: Ais 40.3-5 * 3:7: Mat 12.34; 23.33 * 3:8: Jon 8.33

nenjima.' Mewö töptöpñine qemakzemö, ölnji mi qahö ahakze. Nöñön mianğöra kewö jibi mötket: Anutunöñ köt ki ölop jim kutum enjiiga letota Abrahamgö gwölönarökurupñi aka Anutu möpöseimakñemö, injini denöwö?

9*“Uruñini qahö melenme ewö, Anutunöñ mönö injini ip ewö tengöri etpingö akze. Ip pakpak ölnji ölopñi qahö kungumakzei, mi mönö köli etket könöpnöñ gili geme. Ip mewöñi kölmamgö kesinji lök jitñi saje ala ip könañe ali jöjöröba ahöza. Anutunöñ mönö bölönamñinañgö likepñi melen enjima.”

10 Mewö jiiga ambazip kambuñi kambuñi yeñön kewö qesiba jiget, “Mewögöra nini mönö denöwö ahinga dop kölma?”

11 Qesiba jigetka kewö melenök, “Kunñan maluku yahöt memba maljawi, yañön mönö mietköreñök kun mi malukuñi qahö i wañgima aka denike yeñön neneninambuk maljei, yeñön mönö mewöyök nenenini qahö yeñgöra menden enjime.”

12 *Takis meme azi tosatñan mewöyök o melun mem enjimapkö kaba qesim wañgiget, “Böhi, neñön mönö denöwö ahinga dop kölma?” 13 Qesim wañgigetka jii mötket, “Gawmanöñ takisgö jim kutum enji ahözawi, dop mi mönö qahö onğita meme.”

14 Yarö azi tosatñan mewöyök qesim wañgiget, “Niniato? Neñön denöwö ahinga dop kölma?” Qesim wañgigetka kewö jii mötket, “Kungöreñ monenğöra kunguba upetkupet aka kiom kude kölmemö, nanñini töwañini memakzei, miambuk mönö urumohok aka ösöñ malme.” 15 Ambazip pakpak yeñön “Jonöñ Amötqeqe Tonji Kraist akapuk,” jiba uruñinan mewö mötmöriget. Mianğö könañi mötpingö kezapñini köröpñi aket.

16 Mewö aketka Jonöñ körek yeñgöra kewö jiyök, “Nöñön o töhönöñ melun mem enjizalmö, azi kukösumñi köhöikñi kun kama. Yañgö kukösumñi öngöngöñan mönö nöñgöreñ onğitma. Yañön azi öngöngöñi akñawañgöra nöñön yañgö köna esunañgö kösöñi bauköba pösatmamgö qötötanğömam. Yañön mönö Uña Töröñi uruñine ali könöp bölamñan köl könjörat enjiiga mewö mianñön melun mem enjima. 17 Yañön ölnji aka kamböñi menden etkimamgö sapakñi memba kañgota uba qöröreñgöba kewötma. Kewöta wit kötni tokoba köweñe almapmö, kamböñi aka gwaugulapñi mi mönö usuñniga könöpnöñ geba teteköñi qahö jema.”

18 Keu mewöñi mewöñi gwötpuk toroqeba jiba uruñini kunguba Ölöwak Buña ambazip kambu yeñgöra jim asariba malök. 19 *Malökmö, gölme bahöñañgö kiñ Herod yañön datñañgö anömñi qetñi Herodias mi ölöñ meyök aka bölöñi

könaŋi könaŋi aka malöhi, mianğö sapŋi Jonöŋ qeba munju-rariga jim waŋgiyök. ²⁰ Jim waŋgiba bölöŋamŋi kun toroqeba aka Jongöreŋ nupŋi tözöpköba suahö galöŋmŋi jii Jon memba kösö mire alget. Mewö.

Jonöŋ Jisös o melun mem waŋgiyök.

Mat 3.13-17; Mak 1.9-11

²¹ Jonöŋ ambazip pakpak o melun mem enğiba Jisös mewöyök o melun mem waŋgiyök. Mem waŋgi köuluköiga mianğöreŋök Suepnöŋ aŋaŋiyök. ²² *Aŋaŋiiga Uŋa Töröŋan melenđa kembö nei ewö aka Jisösgö qakŋe erök. Mewö eriga Suepnöhök qet kun kewö asuhuyök, “Göŋön mönö nani wölböt nahöna aknöŋga köröni ölöwahiga geknahöm ak gi-hizal.” Mewö.

Jisösgö isikurupŋi yengö qet areŋini

Mat 1.1-17

²³ Jonöŋ Jisös o melun mem waŋgiiga yambu (yara)ŋi 30 mianğö dop aiga amötqeŋe nupŋi könahiba memba malök. Memba maliga Josefgö nahönŋa akzawi, ambazipnöŋ mewö mötmöriget. Jisös iwiŋi Josef, asaŋi qetŋi Heli. ²⁴ Jisös amböŋi qetŋi Matat, sukumŋi qetŋi Liwai. Liwai iwiŋi Melki, asaŋi Janai, amböŋi Josef, ²⁵ sukumŋi Matatias. Matatias iwiŋi Amos, asaŋi Nahum, amböŋi Esli, sukumŋi Nagai. ²⁶ Nagai iwiŋi Mat, asaŋi Matatias, amböŋi Semen, sukumŋi Josek. Josek iwiŋi Joda, ²⁷ asaŋi Joanan, amböŋi Resa, sukumŋi Zerubabel. Zerubabel iwiŋi Sealtiel, asaŋi Neri,

²⁸ amböŋi Melki, sukumŋi Adi. Adi iwiŋi Kosam, asaŋi Elmadam, amböŋi Er, ²⁹ sukumŋi Josua. Josua iwiŋi Eliezer, asaŋi Jorim, amböŋi Matat, sukumŋi Liwai. ³⁰ Liwai iwiŋi Simeon, asaŋi Juda, amböŋi Josef, sukumŋi Jonam. Jonam iwiŋi Eliakim, ³¹ asaŋi Melea, amböŋi Menna, sukumŋi Matata. Matata iwiŋi Neitan, asaŋi Deiwid, ³² amböŋi Jesi, sukumŋi Obed. Obed iwiŋi Boaz, asaŋi Salmon, amböŋi Nason,

³³ sukumŋi Aminadab. Aminadab iwiŋi Admin, asaŋi Arni, amböŋi Hezron, sukumŋi Perez. Perez iwiŋi Juda, ³⁴ asaŋi Jeikob, amböŋi Aisak, sukumŋi Abraham. Abraham iwiŋi Tera, asaŋi Nahor, ³⁵ amböŋi Serug, sukumŋi Reu. Reu iwiŋi Peleg, asaŋi Eber, amböŋi Sela, ³⁶ sukumŋi Kainan. Kainan iwiŋi Arpaksad, asaŋi Siem, amböŋi Noa, sukumŋi Lamek. ³⁷ Lamek iwiŋi Metusela, asaŋi Enok, amböŋi Set, sukumŋi Adam. Adam mi Anutunöŋ mei ahuyök. Mewö. ³⁸ (-)

* 3:22: Jen 22.2; Sum 2.7; Ais 42.1; Mat 3.17; Mak 1.11; Luk 9.35

4

Satanöŋ Jisös esapköba malök.

Mat 4.1-11; Mak 1.12-13

¹ Jonöŋ Jisös o melun mem wanŋiiga Uŋa Töröŋan uruŋi kokolak qei Jordan onöhök lilingöiga wanŋita gölme qararanŋkölkölŋe anök. ² Anda miangöreŋ mali Bölöŋi Toŋan esapköm wanŋi wehön 40 teköyök. Nalö 40 miangöreŋ nene kun qahö nembra mali teköiga nenenanŋö kömuyök.

³ Yakananŋö kömuiga Bölöŋi Toŋan jii mörök, “Gi Anutugö nahönŋa akzan ewö, mi mönö kondela köt ki jim kutunöŋga letota beret aketka neman.”

⁴ *Jii möta melenök, “Qahö, Buŋa Kimbinöŋ keu kewö ohoget ahöza, ‘Nenenöhök ambazip malmal qahö nenŋimakza.’”

⁵ Melenniga wanŋita kunduŋi köröpŋi kunöŋ öngöba gölmegö kantriŋi kantriŋi pakpak mi zilaŋ kondel wanŋiyök. ⁶ Kondel wanŋiba jii mörök, “Nöŋön kantri pakpak mi galöm köl enŋimangö kukösumŋi aka inap yuaianŋö aködamunŋi mi nöŋgö böröne alalŋa ahöza. Miangöra mi nani sihimnanŋö dop niŋia wanŋimam jiba ölop wanŋimam. Miangöra yuai pakpak ki mönö göhö böröge almam. ⁷ Miangöra gi waikni memba möpöseim niŋiman ewö, mi pakpak mönö göhö buŋaya ak teköma.”

⁸ *Mewö jii möta kewö melenök, “Qahö, Buŋa Kimbinöŋ keu kewö ohoget ahöza, ‘Gi mönö Kembugi Anutu waikŋi memba möpöseiba ia mohot welen qem wanŋiba malman.’”

⁹ Melenniga Jisös wanŋita Jerusalem sitinöŋ anda jöwöwöl jikegö boŋe euyanŋöreŋ öngöba kewö jii mörök, “Gi Anutugö nahönŋa akzan ewö, mönö kianŋöreŋök luhuba emu geman.

¹⁰ *Buŋa Kimbinöŋ keu kun kewö ohoget ahöza, ‘Anutunöŋ garataurupŋi jim kutum enŋiiga ölopŋanök galöm köla sel jöhöm gihime,’ ¹¹ *aka keu kun kewö, ‘Yeŋön böröŋine ala nöŋögölim gihigetka geba kötnöŋ könage qahö guhum qizit akŋa.’” Miangöra geba kude ayuhuman.

¹² *Mewö jiyökmö, Jisösnöŋ kewö melen wanŋiyök, “Qahö! Anutunöŋ jiza, ‘Gi mönö Kembugi Anutu kude esapköm wanŋiman.’”

¹³ Bölöŋi Toŋan esapesap pakpak mi Jisös ak wanŋi teköiga mosöta anök. Mewö.

Jisösnöŋ könahiba amötqeqe nup meyök

Mat 4.12-17; Mak 1.14-15

¹⁴ Jisösnöŋ gölme qararanŋkölkölŋi mosöri Uŋa Töröŋanŋö ösumŋan yambuk kiniga Galili prowinsnöŋ lilingöyök.

* 4:4: Dut 8.3 * 4:8: Dut 6.13 * 4:10: Sum 91.11 * 4:11: Sum 91.12

* 4:12: Dut 6.16

Lilingöiga keu buzupņan sehiba miri gölme liliköba tat angeri, mi pakpak dop köla anök. ¹⁵ Dop köli miriņi miriņi liliköba köuluk miriņine öngöba Buņa keu kusum enġiyök. Kusum enġiiga mötkeri, körek yeņön mönö söņgaiba möpöseim waņgiget. Mewö.

Nazaret yeņön Jisös andö qeget.

Mat 13.53-58; Mak 6.1-6

¹⁶ Jisösnöņ lilingöba malqarip taonņi Nazaret miangöreņ anök. Sonda kendonöņ kaiga ahakzawaņgö dop köuluk mire öngöba Buņa Kimbi oyoņ enġimamgö wahörök. ¹⁷ Wahöri kezapqetok azi Aisaiagö Buzup Kimbi waņgigetka kötula keu kemaņi kewö ohoget ahözawi, mi miwikņaiyök:

¹⁸ **“Kembugö Uņa Töröņan nöņgö urune geba nup memegö kelök supapņi*

köl niņgiba ambazip etqeceņi yeņgöra Ölöwak Buņa jim asari-makzal. Yaņön melaim niņgiiga keu kewö jim sehi-makzal:

Bölöņan gwaröhöm enġii maljei, Anutunöņ mönö i pösata meköm enġiiga malme.

Anutunöņ jegömöl ambazip jeņini mem tohoiga kunbuk uba ekņe.

Taikpaik memba eta alget maljei, Anutunöņ mönö i meköm enġiiga siyoņsayoņi qahö malme.

¹⁹ *Kembunöņ amötqegegö yambu ölöpņi ali kam kuņgumawi, nöņön miangö kolekņa kaba mi jim asarimakzal.”*

²⁰ Keu mewö oyoņda köpöp supap mi köpeiba galömnji waņgiba eta tarök. Tariga köuluk mire tatkeri, yeņön körek je qisilmisilņi qahö dörötköba ehiget. ²¹ Ehigetka könahiba kewö jii mötket, “Buzup Kimbigö keu ki oyoņbi kezapņine gei mötzei, miangö ölņan mönö merak asuhuza.”

²² Mewö jii mötketka kalem möriam keuņi keuņi num-buņeyök eriga körekņan mi möta welipköba jim soroköm waņgiba keu miangö jiji-kilik-kilikņi mi kewö jiget, “Azi ki Josefgö nahöņņa me?”

²³ Jigetka kewö jii mötket, “Inini nalöņi nalöņi keu kötņi ki jimakze, ‘Mem ölöwak azi gi mönö nangi mem ölöwak aņguman.’ Inini keu kötņi mi dölki nöņgöra jibingö mötze, mi mötzal. Mi jiba kewö jibeak, ‘Gi Kaperneam taonöņ anda aņgöletot öngöņgöņi menöņga buzupņi mörini, miangö dop mönö nangi miri kiangöreņ mewöyök meman.’” ²⁴ *Mewö jiba jiyök, “Nöņön keu ölņi kun kewö jibi mötme: Kezapqetok ambazip kunöņ mönö nanņi malqarip taonöņ qahö dop kölja.

* 4:18: Ais 61.1-2 * 4:24: Jon 4.44

25 *²⁵“Nöñön keu ölbölñi kun kewö jibi mötme: Elaijagö (Elia) nalöñe Anutunöñ Suep nanğunj köli yambu (yara) karöbut aka köiñ 6 miangö uruñe kie qahö yöhöiga bödi ketanj ahuiga gölme pakpak dop kölök. Nalö miangörej ambi malö gwötpuk Israel uruñe malget. 26 *²⁶Gwötpuk malgetmö, Anutunöñ Elaija yeñgörejök kungörej anmapkö qahö melaiyökmö, kian gölme Saidongö miri qetñi Sarefat miangörej ambi malö mohot-töp yanğörej melaiiga anök. 27 *²⁷Kezapqetok azi Elisagö nalöñe uzikukunöñ Israel azi gwötpuk turum enğiiga malgetmö, yeñgörejök kunñan kun qahö solaniyök. Qahöpmö, kian gölme Siriagö azi qetñi Naman yanñon mohot-kun mönö Elisagö keunji möt nariba solaniba ölöwahök.”

28 Jisösnöñ mewö jiiga köuluk mire tatkeri, yeñön körek keu mi möta irimñini seholiiga urupik aket. 29 Urupik aka wahöta Jisös közöla taon yaigepñe wuatangöba taon mi kundunangö sem kösutñe meget kinöhi, miangörej aköget gemapköra anget. 30 Angetmö, sutñine qendenja enğömosöta anök. Mewö.

Kaperneam taonöñ öme kun közölök.

Mak 1.21-28

31 Jisösnöñ Galili prowins uruñe Kaperneam sitinöñ eta anğota Sabat kendonöñ ambazip kambu kusum enğiyök. 32 *³²Kusum enğiiga keunjan kukösumñambuk aiga jiyök. Miangöra könagesö yeñön mi eka auruba welipköget.

33 Köuluk miri miangörej azi kun ömeñambuk tarök. Tariga ömeñan teriñgöba silata qetñi kewö qerök, 34 “Aek! Jisös, Nazaret asia! Gi wania ak neñgimangö akzane? Mönö ayuhum neñgimangöra kazan me? Ni könañamgi möt kutuzal. Gi Anutugörej azi Tök-kutukutunji akzan.”

35 Mewö qeriga Jisösnöñ tembula kewö jim wanğiyök, “Gi mönö keugi bököiga azi ki mosöta kesalnöñ.” Mewö jim wanğiiga ömenöñ azi mi memba gili tala sutñine gölmenöñ geiga miziqizikñi qahöpmahöp aka kota mosöta anök.

36 Aniga körekñan nemböñini teköiga welipköba sutñine er-aum möta kewö jiget, “Yei! Keu ki mönö wani keuya? Yanñon kuk aka ösum-mumu qakñe ömewöröme jim kutum enğiiga tem köla kota anje.” 37 Mewö asuhuiga Jisösgö qetbuñanjan sehiba miri pakpak kösutñe tat angeri, miangörej anda gölme mi dop kölök. Mewö.

Jisösnöñ kawöl ambazip gwötpuk meiga ölöwaket.

Mat 8.14-17; Mak 1.29-34

38 Jisösnöñ wahöta Kaperneam köuluk miri mi mosöta Saimon Pitögö mire öñgöyök. Öñgöiga Saimongö suhunñan sile

* 4:25: 1 Kiñ 17.1 * 4:26: 1 Kiñ 17.8-16 * 4:27: 2 Kiñ 5.1-14 * 4:32: Mat 7.28-29

könöp öngöngöñi yöhöi ahöyök. Ahöiga yanğöra aka Jisös köuluköm wanğiget. ³⁹Köuluköm wanğigetka anda sipköba geba sile könöp jim kutum wanğiiga mosöriğa miangörenjök wahöta nene ohoba gumohom enğiyök.

⁴⁰Wehön jeñi teköba geiga miangören ambazip denike yeñön alaurupñini kawöl könañi könañi mianjön enğöhöi ahögeri, mi körek enğuanğita Jisösgören kaget. Kagetka böröñi körek yeñgö qakñine inannik inannik aliga ölöwak teköget. ⁴¹Ömewöröme yeñön mewöyök ambazip gwötpuk yeñgö uruñineyök kota silata kewö qetket, “Gi Anutugö nahönñi akzan.”

Jisösnöñ Amötqeçe Tonji Kraist akzawi, yeñön mi mötkerañgöra Jisösnöñ jim enğiba numbuñini muhungöba enğuatañgöyök. Mewö.

Amötqeçe nupñi Galili dop kölök.

Mak 1.35-39

⁴²Jisösnöñ gaun ahöiga miri wanğarañ suruiga wahöta nannik tiriñ (tiñ) kutuba geba görañe kunöñ anök. Anökmö, ambazip yeñön göraim wanğiba anda miwikñaiba kude enğömosöta anmapköra esapköba anğön köl wanğiget. ⁴³Anğön köl wanğigetmö, kewö jii mötket, “Nöñön Anutu bemtohonñanğö Ölöwak Buñañi mi taon tosatñi yeñgöra mewöyök jim asarim enğibi dop kölma. Anutunöñ mönö mianğöra melaim niñgiyök.”

⁴⁴Mewö jiba anda Galili prowins liliköba köuluk miriñine Buña keunöñ uru kuñgum enğiba malök. Mewö.

5

Jisösnöñ gwarekurupñi mutukñi enğoholök.

Mat 4.18-22; Mak 1.16-20

¹*Nalö kunöñ Jisösnöñ Genesaret o anğö jitñe kiniga ambazipnöñ kambu köla Anutugö Buña keu mötpingö ölöqölököba liliköm wanğiget. ²Liliköm wanğigetka kinda wanğe yahöt köwet görañe tarohotka etkehök. Söra örörö yeñön wanğe mi mosöta geba mösakñini kusahöla sanğonget. ³Wanğe kun mi Saimongöreña. Jisösnöñ miangören öngöba tonji kewö qesim wanğiyök, “Göñön mönö nanğönöñga borom kun noanğita onöñ göröken anma.” Qesim wanğiiga nanğöiga anda wanğenöñ tata ambazip kambu kusum enğiyök.

⁴Kusum enğim teköba Saimongöra jiyök, “Göñön mönö wanğe ki nanğönöñga o anğö bibiñe aniga alaurupki yembuk mösakñini söragöra gilgetka gema.”

* 5:1: Mat 13.1-2; Mak 3.9-10; 4.1

⁵ *Jiiga Saimonöŋ melenök, “Ketanamni, nini sunjem köröp mösak gil bibihiba öŋi kun qahö mezin. Qahöpmö, göŋön jim kutuzananğora mönö tøndup anda gilin gema.”

⁶ *Mewö meleni jiyöhaŋgö dop aketka söranöŋ awamni qahö mösakine gegetka buratibingö aket. ⁷ Mewö aketka alaurupŋini waŋge kunöŋ malgeri, yeŋgöra kaba bauköm engimegö börökaek kölgetka kaget. Kagetka waŋge yahöt mi söranöŋ kokolak qegetka nemulahöm taköyohot.

⁸⁻⁹ Söra öŋgöŋgöŋi mewö memba eka mianğöra körekŋan welipköget. Welipköba Saimon Pitönöŋ mi eka Jisösgö wösöŋe geba simin köla jiyök, “O Kembu, ni siŋgisöndok azia akzalanğora mönö nömosöta anöŋ.” ¹⁰ Saimongö alayahötŋi Jeims aka Jon Zebedigö nahönyahötŋi yetkön mewöyök nemböŋiri teköiga welipköyohot. Saimonöŋ keuŋi jiyökmö, Jisösnöŋ kewö melenök, “Mönö keŋgötki kude mötman. Gi kianğö andöŋe ambazip mi söra ewö öröba engömemba malman.”

¹¹ Mewö jiiga waŋgeŋini öröba kota saknöŋ ala öröyuaiŋini pakpak mosöta Jisösgö andöŋe wuatangöba anget. Mewö.

Jisösnöŋ uzikuku azi kun mem solaniyök.

Mat 8.1-4; Mak 1.40-45

¹² Jisösnöŋ taon kunöŋ maliga mianğoreŋ azi kun silenji uzikukunöŋ mem bölim teköiga tarök. Tata Jisös eka kösutŋe simin köla geba kewö köuluköm waŋgiyök, “O Kembu, göŋön sihimgan mem ölöwak niŋgimangö mötzan ewö, mönö ni ölöp mem solanim niŋgiman.”

¹³ Mewö jiiga böröŋi böranda silenji misiriba jiyök, “Nöŋön mi akŋangö mötzal. Gi mönö solaniman.” Mewö jiiga uzikukuŋi mi mianğoreŋök solaniyök. ¹⁴ *Solaniiga kewö jim kutum waŋgiyök, “Mötnöŋ kianğö buzup keuŋi mi kun kude jinöŋ mötme. Qahöpmö, gi mönö jike nup galömgöreŋ anda silegi kondel waŋgiba Mosesgöreŋ jimkutukutuŋi wuatangöba solanizanangö saiwap nalukŋi ala jöwöwöl ohoman. Mi ohonöŋ ehiga ambazipnöŋ könaŋamgi möt kutume.”

¹⁵ Mewö jiyökmö, mi tøndup Jisösgö qetbuŋaŋi sehiba miri dop asariba anök. Anöhaŋgö dop ambazip kambuŋi kambuŋi yeŋön keuŋi mötpingö aka kawöŋiŋini mem ölöwakŋapkö yaŋgöreŋ kaba tokoget. ¹⁶ Kagetmö, Jisösnöŋ engömosöta gölme qararaŋkölkölŋe anda mala köuluköyök. Mewö.

Jisösnöŋ azi sile likepŋi kömukömuŋi möhamgöyök.

Mat 9.1-8; Mak 2.1-12

¹⁷ Jisösnöŋ wehön kunöŋ Buŋa keu kusum enğiiga Farisi (Köna keugö kapaŋkölköl) aka Köna keugö böhi tosatŋan Galili aka Judia prowinsgö miriŋi miriŋi aka Jerusalemök kaba

ambazip kambu sutɲine tatket. Kembugö kukösumɲan Jisös nam köl waɲgiiga ambazip kawölɲini mei ölöwaket.

¹⁸ Nalö mianğoreɲ azi tosatɲan alaɲini sile likepɲi kömukömuɲi mi kululunöɲ ala aɲguba kaget. Kaba kutuba Jisösgö kösutɲe miri uruɲe öngöba albingö esapköget. ¹⁹ Esapkögetmö, ambazip kambunöɲ ölököba kingerağöra paɲpağöba miri uruɲe öngöbingö köna kun qahö miwikɲaiba memba miri qakɲe öngöget. Öngöba bo kötnöɲ memenji mi esim lulungetka kinimɲi ahui kawöl azi kululunambuk kösönöɲ jöhöba mianğoreɲ algetka ambazip sutɲine Jisösgö wösöɲe geyök. ²⁰ Mewö geiga Anutu möt narim waɲgigeri, Jisösnöɲ yeɲgö tandökɲini mi ehi dop köliga kawöl azigöra kewö jiyök, “Alani, nöɲön siɲgisöndoki mosötzal.”

²¹ Mewö jiiga Köna keugö böhi aka Farisi yeɲön mi möta könahiba kewö jiba mötmöriget, “Azi ki niɲia? Yaɲön mönö Anutu ilita mepaqepaik akza. Anutu mohotɲan siɲgisöndoknini mosörakzapmö, azi kunɲan mi qahö.”

²² Mewö mötmörigetmö, Jisösnöɲ uruɲini ek kutuba kewö jii mötket, “Tosatɲi iɲini uruɲinan wuanöngöra keu jizali, mianğöra gwötpuk mötmörize? Mi qahö dop kölja. ²³ ‘Nöɲön siɲgisöndoki mosötzal, jizali, keu mianğön mönö awamɲanök jijiɲa. Kunɲan mewö jiiga tosatɲan keu mianğö ölnji qahö ekɲe. Mianğöra mi keu awamɲağö dop. Nöɲön keu kun kewö jimamamgö mötzal, ‘Mönö wahöta anöɲ.’ Keu mi mönö lömbötɲambuk jijiɲa akza. Mewö jibiga ölnji asuhuma me qahöwi, mianğön mönö aukɲe asuhui ekɲe.

²⁴ Mötket, gölmenöɲ siɲgisöndok mosötmosötkö kukösumɲi mi Suep gölmegö azi ölnağoreɲ ahözawi, iɲini mianğö könaɲağöra janjuɲ malbepuk. Mianğöra keu lömbötɲi mi azi kianğöra jibi ölnji eket.” Mewö jiba azi sile likepɲi kömukömuɲi yaɲgöra jiyök, “Nöɲön göhöra jizal: Gi mönö wahöta tumbulahöpki memba mirige anöɲ. Keu lömbötɲi mi ölnambuk akɲa ewö, keu awamɲi mi mönö mewöyök denöwögöra omanji akawak?”

²⁵ Mewö jiiga mianğoreɲök jeɲine wahöta tumbulahöpɲi ahöyöhi, mi memba Anutu möpöseiba mosöta miriɲe anök.

²⁶ Mewö asuhuiga ambazip körekɲan welipköba sömbuɲini möta Anutu möpöseiba jiget, “Yei! Merak yuai qetɲuk soroha ekzin.” Mewö.

Jisösnöɲ Matyu (Liwai) oholök.

Mat 9.9-13; Mak 2.13-17

²⁷ Mianğö andöɲe Jisösnöɲ Kaperneam mosöta anda takis ofis oɲgitmamgö aiga mianğoreɲ takis meme azi qetɲi Liwai tariga eka jii mörök, “Gi mönö nöngö andöne kanöɲ.” ²⁸ Mewö jii möta nupɲi pakpak mosöta wahöta Jisösgö andöɲe anök.

²⁹ Anda Jisös miriñe köl öröba yangöra közölömbuan ketani mözözömgöyök. Mözözömgöba takis meme tilipqilipñinambuk aka alaurupñi tosatñi öröm enjiiga kambu ketani köla yembuk tata nene neget. ³⁰ *Mewö negetka Farisi (Köna keugö kapañkölköl) aka yeñgören böhi yeñön mi eka jimongot aka Jisösgö gwarekurupñi kewö jim enjiget, “Aek! Inini mönö wuanöngöra takis meme tilipqilipñinambuk aka siñgisöndok ambazip yembuk tata nene aka o neze? Mi qahö dop kölja.”

³¹ Mewö jim enjigetka Jisösnöñ likepñi kewö jii mötket, “Sile unditundit ambazipnöñ doktagöra qahö ak engimakzapmö, kawöl ambazipnöñ mönö doktagören anakze. ³² Nöñön siñgisöndok ambazip uruñini melenmegö engehölmamgöra kaba maljalmö, ambazip nanninangö mötketka solanñi akzei, i qahö.”

Nene siñgi malmalgö keuñi

Mat 9.14-17; Mak 2.18-22

³³ Ambazip tosatñan Jisösgören kaba qesiget, “Jon O-melun azigö gwarekurupñi neñön nalö gwötpuk Anutugöra nene siñgi mala köuluk totoko köröpñi alakzin. Farisi (Köna keugö kapañkölköl) yeñgö gwarekurupñinan mewöñanök aka maljemö, nangi gwarekurupkan mönö pöndañ nene aka o nemakze.”

³⁴ Mewö qesigetka kewö melenök, “Ölñal! Nini wani nalönöñ nene siñgi malakzin? Ambi meme nalöñe azigö andöurupñan könöpñi algetka ambigö sep kitipurupñan yuai mi tökömakze me qahö? Nöñön nani gwarekurupni yeñgö azi buñaya aka yeñgö sutñine köisirik tatzal. Tatpiga siñgi malbingö jigetka yeñön aijölöñ söñgaiba tata siñgi malbingö osimakze. ³⁵ Osimakzemö, Anutunöñ noañgiri kömumbiga yeñön mönö nalö miangören ölop siñgi malakñe.

³⁶ “Inini malmal walñi aka sösongai Buña dölökñi mi mindirim etkibingö osime. Miangö dopkeu pasetñi kun mi kewö jibi mötket: Löngölöngöt walñi jurariga kunöñ löngölöngöt dölökñi mitiba opo su jöhanñi mianön qahö ala uhum göreñgömakza. Mewö akawak ewö, opo su jöhanñi dölökñan mönö walñambuk öröröñ qahö aka mi öröba munjarariga böliqolibapuk.

³⁷ “Mewöñanök kunöñ wain o dölökñi mi jobö me toru walñi lama sileñan memeni miangören qahö kusuiga gemakza. Mewö akawak ewö, wain o dölökñan mönö qariba toru qesiñniga jula mokoiga gölmenöñ eta sohoiga toruñan böliqolibepuk.

* 5:30: Luk 15.1-2

38 “Mianğöra wain o dölökñi mi toru dölökñeyök mokoin geiga dop kölma. (Mewöñanök kunöñ o ölopñi mi gina gis-agisahöñe qahö umakzin. Mewö ubinak ewö, mianğön mönö jula kisipisirik eriga nemba kawöl neñgöhöbapuk. Mewö akapuköra o ölopñi mi gina ölopñe umakzin. Inini mewöyök malmal walñi aka Ölöwak Buña dölökñi mi mindirim etk-ibingö osime.) 39 Kunñan wain o walñi möpöseiba nemba malakzawi, yañön wain o dölökñi nemamgö sihimñi qahö möta ölan alakza.” Mewö.

6

Jisösnöñ Sabat kendongö Kembuñi akza.

Mat 12.1-8; Mak 2.23-28

1 *Mianğö andöñe Sabat kendon kunöñ Jisösnöñ wit padi nup köröñi ketañi kutuba anök. Ani gwarekurupñan wösöñini enğuiga wit ölni mohot mohot böröñinan misiba sömanđa neget. 2 Mewö negeranğöra Farisi (Köna keugö kapanğölköl) tosatñan mi eka kewö jiget, “Inini mönö wuanöñgöra Sabat kendongö nup meme soñgoñi oñgitze?”

3 *Mewö jigetmö, Jisösnöñ kewö meleşnök, “Kin Deiwidnöñ yarö aziurupñi yembuk liliköba wösöñini enğuiga yuai ak-eri, mi lök oyonget me qahö? 4 *Yañön mönö Anutugö opo seri jikenöñ öngöba beret kömbukñi Anutugö jemesoholñe altanöñ alget tariga ösumñan walöñniga qekögeri, mi mönö meiga neget. Beret kömbukñi mosötmosötñi mi jike nup galöm yeñönök nezema. Yañön aka yañgö sunğurumurupñan mi nembepuköra soñgo ahöyök mi tönđup neget.”

5 Mewö jiba kewö jii mötket, “Suep gölmegö azi ölnan mönö Sabat kendongö Kembuñi akza.” Mewö.

Jisösnöñ azi böröñi sösöröngöñi mem ölöwahök.

Mat 12.9-14; Mak 3.1-6

6 Jisösnöñ Sabat kendon kunöñ köuluk mire öngöba Buña kusum enğiyök. Mianğöreñ azi kun böröñi ölni soholiiga tarök. 7 Köna keugö böhi aka Farisi (Köna keugö kapanğölköl) yeñön Jisös eka keu jakeñe al wañgibingö könañi jaruba “Azi mi Sabat kendonöñ möhamgöma me qahö?” jiba je galöm memba tatket. 8 Tatketmö, Jisösnöñ mötmötñini mi möt kutuba azi böröñi sosoholiñi mi kewö jii mörök, “Mönö wahöta jenine kinöñ.” Mewö jiiga wahöta kinök.

9 Kini Jisösnöñ jii mötket, “Köna keu wuatangöba Sabat kendonöñ yuai ölopñi me bölöñi akin? Ölop kungö bohonñi jöhöbin me mosöringa ayuhuma. Wanat kun meinga dop

* 6:1: Dut 23.25 * 6:3: 1 Sml 21.1-6 * 6:4: Lew 24.9

kölma? Mi qesim engibi jiget.”¹⁰ Mewö jiba körek pak-pak lilingöm purik engeka azi miangö jiyök, “Gi mönö börögi qötöteinöj.” Mewö jiiga böröni qötöteiiga kunbuk ölöwahök.

¹¹ Ölöwahökmö, galöm yeñon irimñini gwötpuk seholiiga “Jisös denöwö ak wanjibin?” jiba nanñini eraum mötket. Mewö.

Gwarekurupñi 12 möwölöhöm engiyök.

Mat 10.1-4; Mak 3.13-19

¹² Nalö miangören Jisösnöj kundunye köulukömamgö öngöba sungem köröp mi Anutu köuluköm wanjiba mali miri alök.
¹³ Miri gianjiiga gwarekurupñi engohola yengörenök ¹² möwölöhöm engiba melaimelai azi aposol qet mi engiyök.

¹⁴ Qetñini kewö qerök: Saimon, Jisösnöj qetñi Pitö wanjyök, yangö munñi Andru aka Jeims, Jon, Filip, Bartolomyu,
¹⁵ Matyu, Tomas, Jeims Alfiusgö nahönñi aka Saimon qetñi kun Tuaköpek azi qetket.* ¹⁶ Judas Jeimsgö nahönñi aka Judas Iskariot. Kariot azi mianjon könanjen mamalolo azia ahök.

Jisösnöj kawöl ambazip mem ölöwak engiyök.

Mat 4.23-25

¹⁷ Jisösnöj aposolurupñi yembuk kundunyeök eta gölme köröje anda kinget. Kingetka gwarek kambunji ketanji aka ambazip kambulelembe yeñon yangöra tokoba mambötket. Yeñon “Bunaji jii möringa kawölnini mem ölöwakña,” jiba miangöra Judia prowins pakpak, Jerusalem siti aka köwet jitneyök Taiö aka Saidon taon miangörenök kaba tokoget.
¹⁸ Ömewörömenöj kölköljinjin mem engiyöhi, yeñon mewöyök kaba ölöwaket. ¹⁹ Kukösumñan yangörenök kutuba yengören öngöiga körek ölöwak engiyök. Miangöra ambazip körekñan Jisös misiribingö jaram tiget. Mewö.

Simbawon aka kezapjupjup ahakö keunji

Mat 5.1-12

²⁰ Jisösnöj gwarekurupñi uba wahöta engeka kewö jiyök, “Anutugö bemtohon mi wanapñi engö bunaya. Miangöra wanapñi inini mönö simbawon akze.

²¹ Nalö kewöje nenegö ewö kömumba qemjen qeba maljei, Anutunöj mönö sihimñini mi gumohom engima. Miangöra inini mönö simbawon akze. Nalö kewöje sahötzei, enon mönö sösöngai aka gön kölme. Miangöra wösöbirik maljei, inini mönö simbawon akze.

* **6:15:** Nasönöl pati zelot yeñon Rom gawman tuarenjon aka nanñine kinkin memingö tuaköpek memba malget.

22 **“Ambazipnõj injini Suep gölmegö azi ölnanğöra aka kazik aka yaköriba silenje ala uruqeçe keu töhörenj jim enğiba kiam sekbölö ewö qetnini kutumei, injini mönö simbawon akze.*

23 **Ambösakonurupninan mianğö dop kezapqetok ambazip yengöra ak*

enğiba malget. Mötket! Anutunõj töwanjini öngöngöñi Suep mire ali ahöza. Mianğöra mewö ak enğigetka nalö mianğörenj mönö söngaiba köiranj kölme.

24 *Injini simbawonj maljemö, pomñi sukinapninanambuk injini malmal*

siyonşayonj qahö maljei, mi teköma. Mianğöra nõñon enğöra wöziköba ‘Yei!’ jizal.

25 *Nalö kewöñe nem timbirenj maljei, injini mönö wösönjini ali (buörö)*

bödi malme. Mianğöra nõñon enğöra wöziköba ‘Yei!’ jizal.

Nalö kewöñe sösongai aka gön köljei, injini mönö amburereñ aka sahötme. Mianğöra nõñon enğöra wöziköba ‘Yei!’ jizal.

26 *“Ambösakonurupninan kezapqetok ambazip takapulakanj jim*

möpöseim enğiba malget. Ambazip pakpak mianğö dop ak enğigetka nõñon enğöra wöziköba ‘Yei!’ jizal.” Mewö.

Kerökurupki mönö jöpaköm enğiman.

Mat 5.38-48; 7.12a

27 *“Bölönj ak enğimemö, injini keuni möta maljei, nõñon enğöra kewö jibi mötme: mönö kerökurupnini urunjan jöpaköm enğiba malme. Denike yeñon kazik ak enğizei, i mönö ölopnanök ak enğiba malme.*

28 *“Denike yeñon qesuahöba jinjererenj ak enğizei, i mönö köl tömbiba kötuetköm enğime. Örom ureim ak enğizei, yengöra mönö Anutugö köuluköme.*

29 *“Kunñan nunğulumgi likepñi qekötahöliiga likepñi mewöyök melenj wanğiman. Kunñan qakñanğö malukugi goanğiriga göñon mönö dutñanğö oponj mohokñe memanğö möri mi kude anğon kölman.*

30 *“Yuaigö ulet gihigetka mi mönö körek yengöra enğiman. Kunñan göhö inap yuaigi meiga mi mönö melenj gihimapkö kude kapanj köla qesiman.* 31 **Ambazipnõj yuai nanñinanğö ak enğimegö mörakzei, mianğö dop mönö nanñini mewöyök i ak enğimakeje.*

32 “Gölmegö siŋgisöndok ambazipnöh alaurupñinan jöpaköm engigetka kitipñi melenđa jöpaköm engiba möpöseim anğumakze. İñini miangö dop gölmegö tandökñi wuatangömakze ewö, Anutugöreñ tosa qahö ahuiga mönö denöwö inini möpöseim engibawak? Alaurupñini aka kerökurupñini mi mönö mohotñe jöpaköm engigetka töwa engiiga oyaenğoyaenğ akñe.

33 “Gölmegö siŋgisöndok ambazipnöh alaurupñinan yuai ölöpnji ak engigetka kitipñi melenğ engiba ala ak anğuba möpöseim anğumakze. İñini miangö dop aka gölmegö tandökñi wuatangömakze ewö, Anutugöreñ tosa qahö ahuiga inini qahö möpöseim engima.

34 “Gölmegö siŋgisöndok ambazipnöh moneğ yuai mi siŋgisöndok ambazip tosatñi yengöra engiba kitipñi miyök melenğ engimeğöra kapanğ kölakze. Mi gölmegö ahakmemeya. İñini tosatñan tosañini melenğ engimeğö al mambötketka Anutunöh mönö denöwö möpöseim engibawak? Tosatñan tosañini qahö melenğ engigetka Anutunöh mönö kitipñi mi melenđa töwa engima.

35 “İñini mönö Suep Toñangö ahakmemeya aka memba malme. Gölme ambazipnöh bölöñi aka saiwap qahö jimakzemö, Anutunöh töndup i ölöpnji ak engimakza. Miangöra inini mönö kerökurupñini uruñinan jöpaköba ölöpnjanök ak engiba moneğ yuai engiba miangö likepnji kun melenđa engimeğöra kude al mambötme. Mewö aka malgetka töwañinan sehiba öngöngöñi aiga Anutu öngöngöñangö nahönböraturopñi aka malme.

36 “Suep Iwiñinan körek pakpak ak kömum engimangö mötzawi, inini mönö miangö dop ambazip pakpak ak kömum engiba malme.” Mewö.

Jimtekötekö toñi ewö kude akñe.

Mat 7.1-5

37 “Ambazip tosatñi yengö keuñini mi kude kewöta jim teköme. Mi qahö jim teköm engigetka Anutunöh mönö nanñini mewöyök qahö jim teköm engima. İñini tosatñi yengö siŋgisöndokñinanğö likepnji mi qahö melenğ engime. Mi qahö melenğ engigetka Anutunöh mönö nanñini siŋgisöndokñinanğö likepnji mi mewöyök qahö melenğ engima. İñini mönö tosatñi yengö siŋgisöndokñini mosötme. Mi mosötketka Anutunöh nanñini siŋgisöndokñini mewöyök sanğonđa mosötma.

38 “İñini ambazip tosatñi yengöra yuai ak engigetka Anutunöh mönö miangö dop kewöta yuai mi melenđa engöra ak engima. Miangöra inini mönö yuai kalema engimakñe. Mewö engigetka Anutunöh mönö mewöñanök kalema engimakña.

Ölña, Anutunöŋ ekbonep qahö möta bauköm enġimakña. Anutunöŋ kewöta inġini enġigeri, mianġö dopŋi jömuġ memba kiwinöŋ mokoi numbuŋe kori utuköi qöröraŋ aiga mulungöi gei toroqeba qakŋe mokoi dopŋi oŋgita qeqelanlaŋ eri, mi mönö gösöŋine löŋgöt enġima.” Anutugö könaŋi mewö.

Ambazipnöŋ nanŋini könaŋini eka mötme.

³⁹ *Jisösnöŋ dopkeu kun kewö jii mötket, “Jegömöl ambazip kunöŋ jegömöl alaŋi kun ölöp böröŋe memba waŋgitma me qahö? Mewö anbahorak mönö mohotŋe lömnöŋ geba etkubawak. ⁴⁰ *Gwareknöŋ böhiŋi qahö oŋgita. Böhiŋinan mötmöt pakpak törörök kusum enġii möt kömumei, körek yeŋön mönö böhiŋini ewö akŋe.

⁴¹ “Gi wuanöŋgöra alagahö jeŋe gödöwöröt morörökŋi ekzanmö, nangi jege ip sahötŋi ketaŋi ahözawi, mia denöwö kude ek kutuzan? ⁴² Nangi jege ip sahötŋi ketaŋi ahözawi, mi qahö ek kutuba denöwögöra alagahö kewö jibanak, ‘Alani mötnöŋ! Jege euke gödöwöröt geba tatzawi, mi ölöp itaköbi etma.’ O urumelenġö silesile azi, gi mönö mutuk nange jegeyök ip sahötŋi (tapötŋi) ketaŋi mi memba gilman. Mi mem gilagun törörök ek kutuba alagahö jeŋe gödöwöröt geba tatzawi, mi ölöp itakönöŋga etma.” Mewö.

Ipkö könaŋi mi ölni eka kewöta möt kutume.

Mat 7.16-20; 12.33-35

⁴³ “Ip ölöpŋi kunŋan ölni bölöŋi qahö kuŋgumakza. Mewöŋanök ip bölöŋi kunŋan ölni ölöpŋi qahö kuŋgumakza.

⁴⁴ *Jau kötŋi mi jömnöŋ asuhuiga membingö osimakzin aka muli ölni mi koururuknöŋ asuhuiga qeköbingö osimakzin. Mianġö dop ipkö ölni eka kewöta könaŋi möt kutume.

⁴⁵ *“Azi uruŋan yuai kokolak qei ahözawi, mia mönö numbuŋan aukŋe jimakza. Mianġöra azi ölöpŋaŋgö uru köweŋe ölöpŋaŋgö möriamŋi ahözawi, yaŋön mönö ölöpŋi mi aukŋeyök jimakza. Azi bölöŋaŋgö uru köweŋe bölöŋi ahözawi, yaŋön mönö bölöŋi mi aukŋe jimakza.” Mewö.

Miri tandö köhöikŋi aka lölöwöröŋi

Mat 7.24-27

⁴⁶ “Inġini nöŋgöra ‘Kembu Kembu!’ qet mi mönö wuanöŋgöra qerakzemö, nöŋön yuai memegö jimakzali, mi qahö tem köla memakze.

⁴⁷ “Denike yeŋön nöŋgöreŋ kaba keuni möta tem köla mezei, nöŋön yeŋgö könaŋamŋini kondela dopkeunöŋ jimam.

⁴⁸ Yaŋön mitim qeqe azi kianġö dop akza: Azi mianġön ‘Miri memam,’ jiba löm köröpŋi esiba geba tandöŋi köt jamönjin

* 6:39: Mat 15.14 * 6:40: Mat 10.24-25; Jon 13.16; 15.20 * 6:44: Mat 12.33

* 6:45: Mat 12.34

qakŋe kuŋgum köhöii kinök. Mewö kiniga kie uru nalöŋe o göulu köhöikŋi gila miri kembraŋe kuŋguyökmö, ölöŋŋanök mem muhungöi kinök. Mianğöra kusumamgö qem bibihiiga köhöiba kinök. ⁴⁹ Qem bibihiyökmö, kunöŋ keuni möta qahö tem köla mezawi, yaŋön mönö mitimqeqe azi kianğö dop akza: Yaŋön ‘Miri memam,’ jiba tandö qahö esim kömöta gölme qakŋe kut bim miyök ala meyök. Mei kiniga kie uru nalöŋe o göulu köhöikŋi gila miri kembraŋe kuŋguiga miri mi mianğöreŋök kusuiga goromororöŋgöba erök.” Mewö.

7

Jisösnöŋ suahö galöm kungö nup aziŋi mem ölöwahök.

Mat 8.5-13

¹ Jisösnöŋ ambazip kambu sutŋine mala Buŋa keuŋi pak-pak mi jii mötketka eŋgömosöta Kaperneam taonöŋ kaŋgorök. ² Mianğöreŋ Rom suahö galöm kungö nup aziŋan kawöl yöhöi kömumamgö ahök. Galömŋan yaŋgö möri öŋgöŋgöŋi ahök.

³ Mianğöra Jisösgö buzupŋi möta Juda yeŋgö jitŋememe tosatŋi melaim eŋgiiga Jisösgöreŋ anda kewö qesiget, “Mönö kaba welen aziŋi mem ölöwakŋan.” ⁴ Anda Jisösgöreŋ aŋgota kapaŋ köla köuluköba jiget, “Ketaŋamnini, suahö galöm mianğön mönö bauköm waŋgimanaŋgö dop ölöŋ sorokŋi akza. Mianğöra mönö kanöŋ.” ⁵ Mötnöŋ, yaŋön Juda ambazip kambu neŋgöra ak waŋgiiga ‘Köuluk mirinini membin,’ jiinga kian yaŋön moneŋ ali meget.”

⁶ Mewö jiget möta yembuk anök. Anökmö, suahö galömgö miriŋi dopdowii yaŋön alaurupŋi melaim eŋgiba Jisösgöra keu kewö alök, “O Kembu, ni mewörökŋi malbiga nöŋgö miri boŋan gualöŋmapkö gamuni mötzal. Mianğöra mönö qahö aum kömumba kaman. ⁷ Ni nananğö mötŋi eretŋi akzawaŋgöra göhöreŋ kamamgö dop kude mötzalmö, keu jitkanök jinöŋga welen azinan ölöwakŋa. ⁸ Mi kewögöra: Ni nanak mewöyök galömnanğö kukösum bapŋe al niŋgiget maljal. Nöŋgö bapŋe yarö azi malgetka mi jim kutum eŋgimakzal. Yeŋgöreŋök kungöra ‘Anman’ jim kutubi yaŋön anma. Kungöra ‘Kanöŋ’ jim kutubi yaŋön kama aka welen aziŋi kungöra ‘Nup ki memam,’ jibiga yaŋön mi mema.”

⁹ Jisösnöŋ keu mi möta suahö galömgöra welipköba ambazip kambu wuatanağöba kageri, yeŋgöreŋ lilingöba kewö jiyök, “Nöŋön kewö jibi mötme: Israel könagesö sutŋine mewöyök mötnariŋ ketanŋi mewöŋi mi kungö uruŋe qahö miwikŋaial.”

¹⁰ Mewö jiiga suahö galömgö kolekaziurupŋan lilingöba mire aŋgota welen azi miwikŋaiba eketka ölöwaka tarök. Mewö.

Jisösnöŋ malö kungö nahöŋŋi mem guliyök.

¹¹ Mianḡö andöḡe Jisösnöḡ taon qetḡi Nain mianḡöreḡ aniga gwarekurupḡi aka ambazip kambulembenöḡ wuatangöba anget. ¹² Mianḡöreḡ taon kiripo nanḡuḡi dopdowiiga qamöt kun aḡguba kaget. Malö kungö nahönḡa mohok-kunḡan kömuiga taongö ambazip kambu ketanḡan tokoba löm kölbängö kaget.

¹³ Kembunöḡ malö mi eka wösöḡi möta jii mörök, “Kude sahötman.” ¹⁴ Mewö jiba anda bokis aḡguba kageri, mi jii dörök algetka bokis misiriba kewö jiyök, “Azi gwabö, mönö wahötnöḡ. Nöḡön göhöra mewö jizal.” ¹⁵ Mewö jiiga qamöt mianḡön guliba wahöta könahiba keu jiyök. Keu jiiga Jisösnöḡ namḡambuk anmapkö waḡgiyök.

¹⁶ Ambazip pakpak yeḡön mi eka qem sömbunḡini möta Anutu möpöseiba jiget, “Kezapqetok azi ketanḡi kunöḡ mönö sutnine asuhuba malja.” Tosatḡan jiget, “Anutunöḡ könagesöḡi mesohol köl nenḡii maljin.”

¹⁷ Yanḡö keu buzupḡi mi sehiba Judia prowins pakpak dop köla gölmeḡi gölmeḡi likeplikep mianḡöreḡ an teköyök. Mewö.

Jongö gwarekyahötḡi Jisösgöreḡ kayohot.

Mat 11.2-19

¹⁸ Jon O-melun azinöḡ kösö mire tariga gwarekurupḡan yuai pakpak mi asuhuyöhi, mianḡö kösohotḡi jiget mörök. ¹⁹ Jiget möta gwarekḡi yahöt etkoholi kayohotka Kembugöreḡ anda kewö qesim waḡgimahotköra melaim etkiyök, “Mem ölöwak azi kamapköra mamböringa göḡön mia akzan me azi kun bian kamapköra mambötḡin.”

²⁰ Melaim etkiiga Jisösgöreḡ aḡgota jiyohot, “Jon O-melun azinöḡ kewö qesim gihibitköra melaim netkiiga kazit, ‘Mem ölöwak azi kamapköra mamböringa göḡön mia akzan me azi kun bian kamapköra mambötḡin.’”

²¹ Jisösnöḡ nalö mianḡöreḡök ambazip gwötḡuk uzi kawöl izekwaizek (ijenwaijeḡ) aka ömeḡinambuk mi mem ölöwak enḡiyök aka jegömöl ambazip gwötḡuk jeḡini metohoi uba eket. ²² *Jongö gwarek yahötḡan aḡgota qesim waḡgiyohotka kewö meleḡnök, “Yuai eka mötzahori, mianḡö kösohotḡi mönö anda Jon kewö jiyohot mötma: Jegömöl yeḡön uba eketka lokon yeḡön köna anda kagetka uzikuku yeḡön solanigetka kezapduhup yeḡön keu mötketka kömuget yeḡön guliba wahötketka etqeḡeḡi yeḡöra Ölöwak Buḡa jim asaribiga mörakze. ²³ Mewö asuhui eketka kungö uruḡan qahö bölii andö nuḡgumawi, yanḡön mönö simbawoḡ akza.”

²⁴ Mewö jiiga Jongö gwarek yetkön anohotka Jisösnöḡ könahiba Jongö könaḡi ambazip kambu yeḡöra kewö jim

* 7:22: Ais 35.5-6; 61.1

asariyök, “Injini gölme qararančkölkölne miangöreñ wania ekingöra anget? Luhutnöñ jehot uwutapköba metali anjanbanjan ahakzawi, injini azi mewöñ ekingöra anget me?”

25 “Me wanat yuaia ekingöra anget? Azi malukunji aködamunñambuk löngöta malöhi, mi ekingöra me? Mötket, ambazip malukunjini kulemñi ek sihimñambuk löngöta anda kaba siyonşayonji qahö maljei, mienön mönö kin yengö jakömbuak mirinje malje. Mi gölme qararančkölkölne qahö.

26 “Me wanat yuaia ekingöra anget? Kezapqetok azi kun ekingöra me? Ölña, nöñön kewö jibi mötket: Azi ekeri, yanön mönö kezapqetok ambazip tosatñi engonşgita tandökñi kun akza. 27 *Yanğö könani mi mönöwök kewö ohoget ahöza, ‘Mötnöñ, nöñön kolekni garata kun melaibiga qeljine anda ambazip urunji mindinğöba göhö könagi mesariga göñön mönö yanğö andöñe gölmenöñ emu geman.’ 28 Keu mewö ahözapmö, nöñön kewö jibi mötket: Ambinöhök morö pakpak engömegetka asuhugeri, yengö sutñine Jonöñ mönö körek engonşgita qetbuñambuk kinja. Kinjapmö, Anutugö bemtohoñ uruñe anğota Anutugö qetbuñani miwikñaimakzei, yengö sutñine eretñi kondikñi yanön mönö Jon onğitza.”

29* Ambazip könagesö pakpak aka yengö sutñine takis meme yenön mohokñe Jongö Buñani mötkeri, yenön jim kölenđa “Aha! Anutugö köna diñdiñi jim asariza,” jiba urunji melengetka Jonöñ o melun mem engiyök. 30 Mewö engiyökmö, Farisi aka Köna keugö böhi yenön Anutugö areñi qahö tem köla Buñani andö qeba silekmalek aketka Jonöñ o melun qahö mem engiyök.

31 “Ambazip merak gölmenöñ maljei, mi mönö wanatpuk dop al engibileñak? Yengö silikñini mi denöwö? 32 Yenön namande ewö akze. Mienön maket sombemnöñ tata keu gön gila lañ geta kewö jimakze, ‘Nini awölop uinga injini linjet gwawet qahö unduget. Nini jinğen kölinga injini qahö toroqeba sahötket.’ 33 Miangö könani kewö: Jon O-melun azinöñ kaba nene sinji mala wain o qahö neiga injini yanğöra jimakze, ‘Öme kunöñ uruñe geiga malja.’

34 “Suep gölmegö azi ölñan kaba nene nem söñgaip aiga enön jimakze, ‘Mötket, yanön bau numbu tandök közöjeriba wain o gwötpuk nempa takis tilipqilipñinambuk aka bölöñi meme yengö alanina malja.’ 35 Körek pakpak Anutugö mötkutukutu köl gulimakzei, yengö ahakmemeninanğö ölñan mönö mötkutukutunjan dop köljawi, mi kondelakza.” Mewö.

Sinğisöndok ambinöñ jisösgö könani kelök miriyök.

* 7:27: Mal 3.1 * 7:29: Mat 21.32; Luk 3.12

³⁶ Farisi (Köna keugö kapaŋkölköl) azi yeŋgöreŋök kunŋan Jisös mi nanŋi miriŋe kaba nene nemapkö köl öröyök. Köl öröi anda miriŋe öŋgöba nene dumŋe tarök. ³⁷ *Taon mianŋöreŋ siŋgisöndok ambi kun malök. Yaŋön Jisös Farisi azigö mire öŋgöba tata nene neyöhi, mianŋö buzupŋi möta kelök umköhöwakŋambuk mokoi köt kirin kun kokolak qeyöhi, mi memba öŋgöba kayök. Kirin mi nöluk tuat-tuat qetŋi alabastö mianŋön memenŋa.

³⁸ Öŋgöba kaba Jisösgö könaŋe geba tata könaŋiba sahöri imbilŋan tiŋgita geba könaŋe miriyök. Miriiga nörop juŋŋan kereŋ memba kutui öröniiga könaŋi numbuŋan yöhötim nembra kelök umköhöwakŋambuknöŋ miriyök. ³⁹ Miriyökmö, Farisi azinöŋ Jisös köl öröyöhi, yaŋön mi eka uruŋan kewö mötmöriyök, “Ambi ki siŋgisöndokŋambuha. Azi kianŋön keza-pqetok azia malbawak ewö, yaŋön mönö ambi könaŋe misi-rizawaŋgö könaŋi möt kutubawak.”

⁴⁰ Jisösnöŋ mi möt kutuba kewö melenŋa jiyök, “Saimon, nöŋön keu kun jimangö mötzal.” Jiiga jiyök, “Böhi, ölop jinöŋ mötpi.”

⁴¹ Jiiga Jisösnöŋ kewö jii mörök, “Ambazip yahötŋan benknöŋ anda tosa albitkö moneŋ galömnangö qesiyohot. Kunöŋ silim 500:kö töwaŋi (Kina 2500,-), kunöŋ silim 50:gö töwaŋi (Kina 250,-) mianŋö dop tosa albitkö qesiyohot. Qesiyohotka mianŋö dop etkiyök. ⁴² Etkiba könaŋep tosaŋiri misimahot jiiga moneŋiri qahöwahiga osiyohot. Osiyohotka benk galömnan tosaŋiri qeköba kutuba mosöt etkiyök. Mosöt etkiiga yetköreŋök daŋön i uruŋan gwötpuk jöpaköm waŋgimakza?”

⁴³ Mewö qesiiga Saimonöŋ kewö melenŋök, “Nöŋgö mötmötnöŋ tosa ketani kutuba mosöt waŋgiyöhi, yaŋön.” Mewö melenŋiga jiyök, “Gi keu törörök kewöta jizan.”

⁴⁴ Mewö jiba ambigöreŋ lilingöba kewö jii mörök, “Ambi ki eknöŋ. Nöŋön mirige kotpiga göŋön könani saŋoŋmamgö o kun qahö niŋgizanzmö, ambi kianŋön mönö könani imbilŋan miriba nörop juŋŋan kereŋ memba kutui öröniza. ⁴⁵ Göŋön numbuni qahö yöhötim nezanmö, ambi kianŋön mönö mire kotpiga mianŋöreŋök kapaŋ köla könani yöhötim nembra malja. ⁴⁶ Göŋön nöropni kelök kude mirizanzmö, ambi kianŋön mönö kelök umköhöwakŋambuknöŋ könane nömiriza. ⁴⁷ Mianŋöra nöŋön kewö jibi mötnöŋ: Anutunöŋ ambi kianŋö siŋgisöndokŋi gwötpuk mi mosöta saŋoŋniga mianŋöra uruŋan ni gwötpuk jöpaköm niŋgiza. Kunöŋ siŋgisöndok boromdökŋi ahiga Anutunöŋ siŋgisöndokŋi morörökŋi mosöriŋa yaŋön uruŋan borom kun miyök jöpaköm niŋgimakza.”

* **7:37:** Mat 26.7; Mak 14.3; Jon 12.3

48 Mewö jiba ambi mi kewö jii mörök, “Nöñön göhö siñgisöndoki sanğonđa mosötzal.”

49 Mewö jüga azi mohotje nene nemba tatkeri, yeñön könahiba nanñinök kewö jiget, “Siñgisöndok sanğonđa mosözwawi, yañön mönö niñi azia akñamgö mötza?”

50 Mewö jigetmö, Jisösnöñ ambigöra jiyök, “Mötnaripkan mönö amöt qem gihiza. Ölop luainöñ anman.” Mewö.

8

Ambi tosatñan Jisös nanğöba anget.

1 Mianğö andöñe Jisösnöñ liliköba taonñi taonñi aka miriñi miriñi mianğöreñ anda Anutugö bemtohonğö könañi jim asariba Ölöwak Buña keunöñ ambazip uruñini kuñguba malök. Gwarekurupñi 12 yeñön yambuk mohotje anget.

2 *Mewöyök ambi tosatñan yambuk anget. Ambi mi mutuk kawöl engöhöi ömenöñ kölköljinjin mem engii malgetka Jisösnöñ mem ölöwak engiyök. Ambi mi kewö: Maria qetñi kun Magdalagö ambia qetket. Jisösnöñ yanğö uruñeyök öme 7 közöl engii kota anget. 3 Ambi kun qetñi Joana. Yanğö apñi qetñi Kuza yañön kiñ Herodkö jakömbuak miri mianğöreñ gawmangö moner galömña malök. Ambi kun qetñi Susana, Yeñön aka ambi tosatñi gwötpuk yeñön nanñini moner inapñinan Jisös aka gwarekurupñi könanöñ galöm köla nanğöm engiget. Mewö.

Qesinqesin azigö dopkeu

Mat 13.1-9; Mak 4.1-9

4 Ambazipnöñ taon dop mianğöreñök öröba Jisösgöreñ kaba kambulembenöñ tokogetka Jisösnöñ dopkeu kun kewö jiyök:

5 “Azi kunöñ nene kötñi qesin gilmamgö anök. Anda qesinqesin kötñi tosatñan köna jitje geba kölget. Geba kölgetka ambazipnöñ tim tökötahögetka könakemba (warawen) neiñi neiñi kañgota mi nem teköget. 6 Kötñi tosatñan köt jamönjinñöñ geba kölget. Geba köla mianğöreñ gölme onjambuk qahö miwikñaiba korapñi kota soholiba gororonğöget.

7 “Kötñi tosatñan siri uret wahiñinambuknöñ geba kölget. Geba kölgetka mienöñ öröröñ kota enğonğita qem turuba böbölohot mem engiget. 8 Kötñi tosatñan gölme ölopñe geba kölget. Geba köla jula wahöta ölniñi ölopñi asuhuba handötkö dop ahum sehiget.”

Keu mi jim teköba qet ketañi kewö qerök, “Kunñan urukezapñambuk malja ewö, yañön mönö dopkeu ki kezap ala möt kutuma.” Mewö.

* 8:2: Mat 27.55-56; Mak 15.40-41; Luk 23.49

Jisösnöñ denöwögöra dopkeugö könañi jiyök.

Mat 13.10-17; Mak 4.10-12

⁹ Mewö jiiga gwarekurupñan dopkeu kiangö könañangöra Jisös qesim wanjiget. ¹⁰ *Qesim wanjigetka jiyök, “Anutugö bemtohone angota malbingö keu tölöpñi mi engöra aukñe jibi möt kutuzemö, tosatñi yeñgöra mia dop keunöñ jibi mörakze. Mewö möta nanñini jeñinan yuai ekagun könañi töndup qahö ek kutume. Nanñini kezapñinan keu törörök mötagun könañi töndup qahö möt asarime.”

Jisösnöñ dopkeugö könañi jiyök.

Mat 13.18-23; Mak 4.13-20

¹¹ “Dopkeu miangö könañi kewö: Köt qesiñ giljawi, mi Anutugöreñ Buña keu. ¹² Nene kötni köna jítñe geba kölgeri, mi kewö: Ambazip tosatñan Buña keu mötzemö, mi mötketka Bölöñi Toñan kaba uruñini melenđa Suepkö buña akepuköra keu kötni mi uruñineyök qeköba enguanñgirakza. ¹³ Nene kötni qesiñniga köt jamönjijnöñ geba kölgeri, mi ambazip söpsöpñi kun. Yeñön Buña keu möta mi sösoñgai qakñe möt angön kölakzemö, uruñine geba jalöñini qahö megerangöra nalö töröptökñi miyök möt nariba malgetka esapesapkö nalöñe mönö tala enguma.

¹⁴ “Nene kötni qesiñniga siriuret wahiñinambuknöñ geba kölgeri, mi kewö: Yeñön Buña keu mötketka uruñine gezapmö, gölmenöñ malmalgö waimanjatñi aka monen inap memegö urukönöpñi ahuba lömbörim engimakza. Qetbuñanñambuk akingöra köpösöñgögetka sihim kömbönañi bölöñi tosatñan mewöyök uruñine dumgöba Buña keu böbölohot mem wanjize. Mewö aiga ölni qahö gilipitñi akñe. ¹⁵ Qahöpmö, nene kötni gölme ölöpnje geba kölgeri, mi ambazip kewöñi: Yeñön Buña keu kezap ala mötketka uruñini ölöpnje geñmonñi qahö miangöreñ geiga sohobapukö mökösoñđa skapan köla galöm kölgetka ölni ölöpnje ölöpnje miwikñaimakze.” Mewö.

Yuai asa-asambötñi pakpak mi aukñe ahuma.

Mak 4.21-25

¹⁶ * “Kunñan lambe me kiwa ohotiriba kimbutnöñ kude köl turuma me dum bapñe qahö alma. Mi qahöpmö, mi miangö dum qakñe ali tatma. Tata asariiga tosatñan miri uruñe öñgöbingö mötzei, yeñön miangö asakñi eka ölöp öñgöme.

¹⁷ * “Mewöñanök urunine yuai kun asambötket tölöpñe ahözawi, mi mönö aukñe asuhum tinñitma. Yuai kun köl turuin ahözawi, mi mönö lulungetka kötula ahöma.

* **8:10:** Ais 6.9-10 * **8:16:** Mat 5.15; Luk 11.33 * **8:17:** Mat 10.26; Luk 12.2

18 **“Miangöra Anutugö keu mötzei, mi mönö urukönömñine ala mötmöriba köl guliba malme. Kunñan mötkutukutuñambuk maljawi, Anutunöñ mönö mi toroqem wañgii qarimapmö, kunñan mötkutukutuñi qahö maljapmö, ‘Miambuk maljal,’ jizawi, Anutunöñ mönö mötmötñi moröñi mi mewöyök qeköba wañgitma.”* Mewö.

Jisösgö nam-munurupñi.

Mat 12.46-50; Mak 3.31-35

19 Jisösnöñ mewö jiba maliga nam munñan i ekingö kagetmö, ambazip kambu ketañan ölököba gwözöñgerañgöra kösutñe anbingö osiget. ²⁰ Osiba kingetka kunñan kewö jii mörök, “Göhö nam-mungan mönö yaigep kinda gi gekingö mötze.”

²¹ Jii mörökmö, Jisösnöñ kewö melenja jii mötket, “Ambazip ki Anutugö Buña keu möta tem köla köl gulimakzei, mienñon mönö nöñgö namni aka munurupni akze.” Mewö.

Jisösnöñ jiiga raidimbom göröñ qeyök.

Mat 8.23-27; Mak 4.35-41

²² Wehön kunöñ Jisösnöñ gwarekurupñi kewö jii mötket, “Mönö mosöta o añgö kutuba likepñe añgotpin.” Mewö jiiga wañgenöñ mohotñe öñgöba o añgö qakñe anget. ²³ Anda opo seri möröreñgögetka luhutnöñ nanñgöiga angetka Jisösnöñ gaun ahöyök. Ahöiga luhut raidimbom o añgönöñ gila siri kunduriga wañge uruñe geyök. Geba numbuñe qemangö aiga ayuhubingö aket.

²⁴ Ayuhubingö aka gwarekurupnan anda möndöba jiget, “Kembu Ketañamnini, mönö nini añgönöñ ayuhubingö akzin.” Mewö jigetka imbinji möta luhut aka o añgögö siriñi kewö jim getal etkiiga ösumñiran eriga nöñ qeba ahöyök.

²⁵ Mewö aiga jii mötket, “Eñgö mötnaripñini mi denike?” Mewö jiyökmö, yeñon awöwöliba qem sömbuñini möta jiget, “Yei, azi kia mönö denöwöñan malja? Yanñon mönö luhut aka köwet siri jim kutum etkiiga jitñi tem köl wañgizahot.” Mewö.

Ömenöñ bau uruñine gegetka azinöñ ölöwahök.

Mat 8.28-34; Mak 5.1-20

²⁶ Jisösnöñ gwarekurupñi yembuk toroqeba opo seri möröreñgögetka luhutnöñ nanñgöi anda o añgö kutuba Galili prowins likepñe Gerasa gölmenöñ añgotket. ²⁷ Miangören añgota saknöñ öñgöi azi ömenambuk kun mi taonöhök kaba Jisös miwikñaiyök. Azi mi qaksirinöñ mala qamöt kötenji esiba uroroget ahögerañgören ahöm malök. Nalö köröpñi opo maluku qahö löñgöta miri kungö uruñe qahö ahömalök.

* **8:18:** Mat 25.29; Luk 19.26

28-29 Ömenöŋ nalö köröpŋi öröm ureim waŋgiiga azi gwötpukŋan börö takŋi qeba könaŋi tapepnöŋ (muŋgamuŋga) jöhöba galöm köla malgetmö, tapepŋi öroi tiŋgitqiŋgiriga ömenöŋ kuŋguiga gölme qararaŋkölkölŋe anda laŋ malök. Miangöra Jisösnöŋ ömeŋi mi kewö jim kutum waŋgimamgöra ahök, “Öme bölöŋi, gi mönö kota azi ki mosöta anöŋ.” Mewö jimamgö aiga Jisös eka silata gölmenöŋ kösutŋe geba qet gigilahöba kewö qerök, “Aek Jisös, gi Anutu öŋgöŋgöŋangö nahönŋi akzan. Gi mönö denöwö ak niŋgimamgöra ki kazan. Nöŋön ulet gihizal: Gi sihimbölö könöpŋambuk kude ak niŋginöŋ.”

³⁰ Mewö jiiga kewö qesiyök, “Gi qetki niŋi?” Ömewöröme gwötpuk uruŋe geba malgeraŋgöra “Qetnini lijön jizin” jiget. Mi nanine keunöŋ Kerök kambu ketanŋi. ³¹ Mewö jiba Jisös kewö ulet waŋgiget, “Gi neŋguataŋgöba öme löm dutŋi qahö miangöreŋ gebingöra kude jim kutum neŋgiman.”

³² Kösutŋine kundunŋi marömŋe miangöreŋ bau kambu ketanŋi kun gwözözak uruŋe kulunŋa malget. Miangöra ömenöŋ kewö jiba ulet waŋgiget, “Gi ölop jinöŋga nini bau miengö uruŋine gebin.” Ulet waŋgigetka “Mönö anda geget.” Jiba jim kutum eŋgiyök. ³³ Jim kutum eŋgiiga azi uruŋeyök kota anda bau uruŋine geget. Gegetka bau kambu yeŋön mönö luhuba nembönembönöŋ anda jororöŋgöba o aŋgönöŋ geba nemulahöba kömuget.

³⁴ Mi asuhuiga bau galöm yeŋön mi eka taon aka miri morömorö miangöreŋ ölöŋ unjurata anda keu buzupŋi mi jiget mötket. ³⁵ Jiget möta ambazip sesegilgil yeŋön yuai asuhuyöhi, mi ekingöra kaget. Kaba Jisösgöreŋ kaŋgota azi uruŋeyök ömenöŋ kotkeri, yaŋön könaŋe tariga mi-wikŋaiget. Opo sileötaŋi törörök jöhöba uruŋi amöriiga imbi mötmötŋi pakpak asuhuiga eka awöwöliget. ³⁶ Azi ömeŋambuk malöhaŋön denöwö ölöwahöhi, mi jeŋinan ekeranöŋ jiget mötket.

³⁷ Möta gwötpuk awöwöliba qem sömbuŋini mötket. Miangöra Gerasa gölmegö ambazip kambu pakpak yeŋön Jisösnöŋ eŋgömosötmapköra ulet waŋgiget. Ulet waŋgigetka lilingöba anmamgö waŋgenöŋ öŋgömamgö ahök. ³⁸ Öŋgömamgö aiga azi uruŋeyök ömenöŋ kotkeri, yaŋön kaba Jisösbuk mohotŋe anda malmamgöra qesiyök. Mewö qesiyökmö, Jisösnöŋ qetala melaim waŋgiba kewö jiyök,

³⁹ “Gi mönö lilingöba mirige anda Anutunöŋ aŋgöletot ketanŋi ketanŋi ak gihiyöhi, miangö kösohotŋi jinöŋga mötme.” Mewö jiiga anda Jisösnöŋ aŋgöletot ketanŋi ketanŋi ak waŋgiyöhi, miangö keuŋi mi taon uruŋe liliköba miri dop jim sehiyök. Mewö.

Jairusnōḡ bōratḡaḡōra Jisōs kōulukōyōk.

Mat 9.18-26; Mak 5.21-43

⁴⁰ Ambazip pakpak Jisōsgō mambötketka lilingōba kaiga kambu kōla sōḡgaiba örōm waḡiget. ⁴¹ Kōuluk mirigō keu galōm kun qetḡi Jairus yaḡōn kaba Jisōsgō wōsōḡe geba simin kōla miriḡe kamapkōra kōulukōm waḡiyōk. ⁴² Morōurupḡi qahōpmō, bōratḡi mukmorō mohok yambuḡi (yara) 12:gō dop mala kōmumamgō ahōk. Jisōs kōl örōm waḡigetka aniga ambazip kambunōḡ likeplikep ölōkōba utal waḡiget. Mewō.

Kawōl ambi kunōḡ Jisōsgō malukuḡi misiriyoḡk.

⁴³ Utal waḡiba angetka miangōreḡ sutḡine ambi kun malōk. Yaḡōn yambu (yara) 12 miangō dop kōiḡnōḡ ehiga nalō dop kawōl yōhöiga malōk. Yaḡōn sile galōm yeḡgō tōwaḡini monēḡ inapḡi pakpak gil maliga sile galōm kōreḡḡan mem ölōwakingō osiget. ⁴⁴ Ambi miangōn Jisōsgō andōḡe anda malukuḡaḡō kitip suḡi misiriiga miangōreḡōk sepḡi jōpkōyōk.

⁴⁵ Jisōsnōḡ qesiba jiyōk, “Daḡōn nōmisiriza?” Mewō jiyōkmō, ambazip kōreḡḡan mi qaḡ kōlgetka Pitōnōḡ jiyōk, “Ketaḡamni, ambazip kambunōḡ ölōkōba utal aḡguba kaba goseize.”

⁴⁶ Jiiga Jisōsnōḡ jiyōk, “Qahō, kunḡan nōmisiriiga osumni kun ani mōtzaḡ.” ⁴⁷ Mewō jiiga ambinōḡ “Kōnaḡamni lōk asuhuza,” jiba jōnōmḡi unduiga kaba Jisōsgō wōsōḡe simin kōla kawōlḡaḡō kōnaḡi aka misiriba miangōreḡōk ölōwahōhi, miangō kōnaḡi aukḡe jiiga ambazip kambu kōreḡḡan mōtket. ⁴⁸ Mōtketka Jisōsnōḡ kewō jii mōrōk, “Bōratni, mōtnaripkan mōnō mem ölōwak gihiza. Ölōp urubōḡjōḡnōḡ anman.” Mewō.

Jisōsnōḡ Jairusgō bōratḡi mem guliyōk.

⁴⁹ Keu mewō jiba kiniga kōuluk mirigō keu galōmḡaḡō mireyōk kunḡan welen kaba Jairusgōra jiyōk, “Bōratkan kōmuza! Miangōra bōhiḡō qakḡe lömböt toroqeba kude alman.”

⁵⁰ Jiyōkmō, Jisōsnōḡ keu mi mōta kōuluk mirigō keu galōmḡi kewō jii mōrōk, “Keḡgōtki kude mōtman! Mohok-kun akḡan. Mōnō ni mōt narim niḡḡinōḡa bōratkan ölōwakḡa.”

⁵¹ Mewō jiba yaḡō mire anda ambazip tosatḡi eḡgōmosōta Pitō, Jon, Jeims aka morō bōratkō iwinamḡi iyōk eḡḡuaḡiri nanḡinōk miri uruḡe öḡgōget. ⁵² Öḡgōgetka ambazip kōreḡḡan jḡḡeḡ kōla sahōta amburereḡ megetmō, Jisōsnōḡ jiyōk, “Yaḡōn qahō kōmuzapmō, gaunōk ahōza. Miangōra mōnō sahōt mosōtme.”

⁵³ Mewō jiiga gōnahit ewō aiga “Mōnō kōmuza!” mōta gön kōl waḡiget. ⁵⁴ Göñ kōl waḡigetmō, bōrat mi bōrōḡe memba qeta jiyōk, “Bōratni, mōnō wahōtnōḡ.” ⁵⁵ Mewō jiiga uḡaḡan lilingōiga miangōreḡōk wahōta kinōk. Kiniga

numbu nene wanğiget nemapkö jiyök. ⁵⁶ Iwinamñan mi eka welipköyohotmö, Jisösnöñ yuai asuhuyöhi, miangö buzupñi kun jiget mötpepekö soñgo al engiyök. Mewö.

9

Jisösnöñ gwarekurupñi 12 melaim engiyök.

Mat 10.5-15; Mak 6.7-13

¹ Jisösnöñ gwarekurupñi 12 mi engoholi tokogetka ömewöröme pakpak közöl engimegöra aka uzi kawöl mem ölöwakñegöra kukösumñi ösum-mumuñambuk al engiyök. ² Kukösum engiba kewö jiba melaim engiyök, “Injini mönö anda Anutugö bemptohañgö könañi ambazip jim asarim engiba kawöl ambazip mem ölöwak engiba malme.” ³ *Melaim engiba jii mötket, “Injini köna anmeañgöra yuaini kun qahö memba anme, öröp qahö, gösö qahö, köna nalem qahö, soujeñi qahö. Maluku semönñi qahöpmö, mohok meme.

⁴ “Anda mire denike denike anğotmei, mönö miangöreñök mala nup memba taon mi mosöta köna anme ⁵ Anda mala miri kunöñ anğotketka qahö köl öröm engiba keuñini qahö mötketka nesampurekñini mönö kewö jiba kondel engime, ‘Nini engö gölmenöñ kainga sölbuham köna tambönine mekötahözawi, mi mönö tim tönjöraringa nannine lilingöba gema.’ Mewö jigetka könañamñini solanñi möt kutugetka ölop taon mi mosöta toroqeba anme.”

⁶ Mewö jiiga mosöta anda mirinji mirinji liliköba miri dop Ölöwak Buña jim asariba kawöl ambazip mem ölöwak engiba malget. Mewö.

Herodnöñ Jisösgöra lalalulu siksauk ahök.

Mat 14.1-12; Mak 6.14-29

⁷ *Yuai pakpak asuhuyöhi, miangö qetbuñañan sehiba gölme bahöñangö (Galili prowinsgö) kiñ Herodkö kezapñe geiga mörök. Ambazip tosatñan kewö jiget, “Jon O-melun azinöñ mönö kömupnöhök wahöta malja.” Mianğöra kiñnöñ keugö jaruba lalalulu siksauk ahök. ⁸ Ahökmö, tosatñan jiget, “Elaijanöñ kunbuk asuhuba malja.” Tosatñan toroqeba jiget, “Kezapqetok azi walñi yengöreñök kunöñ mönö guliba wahöta malja.” ⁹ Mewö jigetmö, kiñ Herodnöñ kewö jiyök, “Jon O-melun azi mi nöñön jibi jölñi kutugetmö, kungö keuñi mewö jiget mötzali, mi mönö dañön?” Mewö jiba Jisös ekñamgö kapan köla jörömqröm ahök. Mewö.

Jisösnöñ azi 5000 nene gumohom engiyök.

Mat 14.13-21; Mak 6.30-44; Jon 6.1-14

* 9:3: Luk 10.4-11; Apo 13.51 * 9:7: Mat 16.14; Mak 8.28; Luk 9.19

10 Melaimelai azi aposol yeñon Jisösgörej lilingöba yuai aka megeri, mianğö kösohotnji pakpak jiget mörök. Jiget möta enğuanğita ambazip qenjarökñini mosöta taon qetnji Betsaida mianğö kösutnje nannjinök kötikle malbingö anget. 11 Angetmö, ambazip kambu yeñon mi möta Jisös andöñe wuatangöba anget. Anda Jisösgörej kagetka köl öröm enğiba Anutu bemtohoñangö könani jim asariba kawöl ambazip mem ölöwak enğiyök.

12 Mewö aka mali wehön jeñan teköba gemangö ahök. Mewö aiga gwarek 12 yeñon kaba Jisös kewö jiget mörök, “Nini gölme kötikle kianğörej maljinağöra gi ölop ambazip kambu ki melaim enğinoñga miri koum dowe dowe tat anjei, mianğörej anda ahöahö miri aka nene miwikñaiame.”

13 Mewö jigetmö, kewö jii mötket, “Enñon mönön nannjinak i nene gumohom enğime.” Mewö jiiga melenget, “Nini beret sahötñi 5 aka söra yahöt miyök memba maljin. Mianğöra denöwö akinto? Nini ölop anda ambazip kambu ki pakpak yeñğöra nene söngöröñi membinak me? 14 (Yeñon azi 5000:gö dop malje.)” Mewö melengetka gwarekurupñan kewö jii mötket, “Enñon mönön ambazip enğöra jiba menden enğigetka kambu dop 50:gö dop nene nemingö tokoba eta tatme.”

15 Jiiga mewö aka menden enğigetka ambazip körekñan eta kambuñi kambuñi tat anget. 16 Tat angetka beret 5 aka söra yahöt mi memba suepnöñ ui öngöiga kötuatköyök. Kötuatköba beret mindipköba gwarekurupñi enğiiga ambazip kirip dop menden da sutñine alget. 17 Sutñine algetka körekmaköre neme nem timbireñ aket. Nene kitipñi kitipñi mosötkeri, mi gwarek yeñon qezakögetka sakap 12 mianğörej geba kokolak qeyök. Mewö.

Pitönön Jisösgö könani jim miwikñaiyök.

Mat 16.13-20; Mak 8.27-30

18 Nalö kunöñ Jisösnöñ nannök gölme kungen köuluköiga gwarekurupñan yambuk malgetka qesim enğiba kewö jiyök, “Ambazipnöñ nöñğöra denöwö jimakze? Ni ninia akzal?”

19 *Jiiga melen da kewö jiget, “Tosatñan ‘Gi Jon O-melun azia akzan,’ jimakzemö, tosatñan ‘Gi Elaija akzan,’ jimakze aka tosatñan toroqeba kewö jimakze, ‘Gi kezapqetok azi walñi yeñğörejök kunñan kömupnöhök wahöta maljan.’ ”

20 *Mewö jigetka kewö qesim enğiyök, “Aka nannjinak nöñğöra denöwö jize? Ni ninia akzal?” Qesim enğiiga Pitönön melen da jii mörök, “Gi Anutugörej Amötqeqe Tonji Kraist akzan.” Mewö.

* 9:19: Mat 14.1-2; Mak 6.14-15; Luk 9.7-8 * 9:20: Jon 6.68-69

Jisösnöŋ kömumamgö keuŋi jiyök.

Mat 16.20-28; Mak 8.30-9.1

²¹ Mewö jiiga könaŋi aukŋe jiget kunŋan mötpepuköra sonŋo köhöikŋi al enŋiyök. Mewö. ²² Jisösnöŋ jiyök, “Suep gölmegö azi ölnan mönö sihimbölö gwötpuk mötma. Kantrigö jitŋememe, jike nup galöm aka Köna keugö böhi yeŋön mönö andö qeba qegetka kömuma. Kömumba wehön karöbut aiga kömupnöhök wahötma.” Mewö.

Kraist wuatangöbingö söngöröŋi

²³ *Jisösnöŋ ambazip pakpak yeŋgöra keu kewö jii mötket, “Kunŋan nöŋgö andöne nuatangöba kamamgö mötzawi, yeŋön mönö nanŋi urusilenangö sihim kömbönaŋi bölöŋi andö qeiga sisitŋi megetka sihimbölö mi bisimakŋa. Mi maripomnöŋ kömumawanŋö dop mökösoŋda ni nuatangöba kama.

²⁴ * “Kunŋan malmalŋi nanŋangöra angön köla nanŋi imbi- imbi maljawi, yeŋön mönö malmalŋi ölni jöhöi sohoma. So- homapmö, kunŋan gölmegö malmalŋi nöŋgöra aka kölenŋa tököm niŋgimawi, yeŋön mönö malmal ölnangö könaŋi mi- wikŋaiba köhöiba malma.

²⁵ “Kunŋan gölmeŋi gölmeŋi miengö öröyuaini pakpak köl öröiga buŋaŋi an teköiga uruŋangö malmalŋi mem sohoba silebile mala kömuiga Anutunöŋ keuŋi jim teköiga könöp sianöŋ geba uŋaŋan ayuhuiga qahö dop kölma. Sukinapŋi miaŋön mönö urusösöŋgai qahö ak waŋgima. Qahöpmahöp!

²⁶ “Kunŋan nöŋgö qetni aka Buŋa keuni memba eta al- jawi, i Suep gölmegö azi ölnan mewöyök ehöröŋ kölma. Yeŋön könaŋep Suep garata töröŋi yembuk ki etketka yeŋgö, nanŋangö aka Iwiŋangö asakmararaŋini eka aurume. Nalö miaŋgöreŋ azi me ambi mewöŋi mönö ehöröŋ köl waŋgima. ²⁷ Nöŋön keu ölni kun kewö jibi mötme: Kiangöreŋ kinjei, engö sutŋineyök tosatŋan Anutugö bemtohoŋan asuhumawi, mi ek kutume. Jebuk mala kömupkö sihimbölöŋi qahö mötketka asuhum tiŋgiriga mi ekŋe.” Mewö.

Jisösgö sileŋe letotqetot ahök.

Mat 17.1-8; Mak 9.2-13

²⁸ *Keu mi jiiga wehön 8:kö dop teköiga Jisösnöŋ Pitö, Jon aka Jeims enŋuaŋgita kundune öngöba Anutu köuluköyök. ²⁹ Köuluköiga miaŋgöreŋ jemesoholŋangö kaisongolomŋan letota tandökŋi murutŋi ahök. Malukuŋan tuat lalamŋi aka kölköl-bilikbilikŋambuk asariyök. ³⁰ Miaŋgöreŋök eketka azi yahötŋan asuhuba Jisösbuk keu keu jiget. Mi Moses aka Elaija. ³¹ Asakmararaŋ uruŋe asuhuba Jisösbuk keu kewö eraum

* 9:23: Mat 10.38; Luk 14.27 * 9:24: Mat 10.39; Luk 17.33; Jon 12.25 * 9:28: 2 Pitö 1.17-18

mötket, “Anutunöŋ Jisös sihimbölö möta kömumapkö melaiiga eta zilaŋ Jerusalem sitinöŋ aniga areŋ mianöŋ ölnambuk ak teköma.”

³² Mewö eraum mötketmö, Pitönöŋ alayahöŋŋi yetpuk jeŋinan lömböriiga gaun ahöget. Ahögetmö, gaunöhök imbiŋini möta jeŋini uba Jisösgö asakmararaŋi aka azi yahöt yambuk kinohori, mi engeket. ³³ Engeketka kinda Jisös mosötpitkö ahotka Pitönöŋ Jisösgöra jiyök, “Ketaŋamnini, neŋön kiangöreŋ uru ölöwak mötzin. Miangöra neŋön ölop koum karöbut qebin: Göhö kun, Mosesgö kun aka Elaijagö kun.” Pitönöŋ mewö jiyökmö, nanŋi keuŋaŋgö könaŋi mi qahö möt kutuyök.

³⁴ Mewö jiba kiniga unuŋunuŋ kunöŋ eta aumŋan esuhum enŋiiga kousu uruŋe mala awöwöliba jönömŋini unduyök.

³⁵ *Jönömŋini undui kingetka kousu uruŋeyök qet kun kewö eriga mötket, “Azi ki mi nani nahöna. I ambazip amöt qem enŋimangöra möwölöhöm waŋgial. Mönö yaŋgö keuŋi möta malme.”

³⁶ Qet mianöŋ eri möta gwarek yeŋön miangöreŋök uba Jisösnöŋ nanöŋk kini eket. Kunduŋe yuai ekeri, miangö buzupŋi mi nalö miangöreŋ kude jiba keu bök malgetka kunŋan kun qahö mörök. Mewö.

Jisösnöŋ öme wuatangöi morönöŋ ölöwahök.

Mat 17.14-21; Mak 9.14-29

³⁷ Ahöba wahötketka Jisösnöŋ gwarekurupŋi karöbut yembuk kunduyök eta sörokŋe ambazip kambulelembe engeget.

³⁸ Engegetka ambazip kambunöhök azi kunŋan qeta kewö jiyök, “Böhi, nöŋgö nahöni mukmoröya akzawaŋgöra mönö kaba i ekŋan. Miangöra köuluköm gihizal. ³⁹ Mötnöŋ, öme kunöŋ i memba mendawöli miangöreŋök qet gigilahöi utuköm waŋgii wölöhariiga numbuŋeyök qölqölsöutsöt erakza. Öme mianöŋ öröm ureim waŋgiba nalö gwötpuk qahö mosörakza. ⁴⁰ Mewö aiga göhö gwarekurupki öme mi wuatangömegö ulet enŋizalmö, yeŋön mi osize.”

⁴¹ Mewö jiiga Jisösnöŋ melen waŋgiba jiyök, “Yei, gölmegö yaŋgiseŋ aka misimkaulup ambazip, nöŋön mönö nalö dawik embuk mala qatön enŋubiga Anutu qahö möt narigetka sihimbölö mötmam? Nahöŋgi mönö waŋgita ki kanöŋ.”

⁴² Morö mi waŋgita kaiga nalö miangöreŋ mewöyök ömenöŋ morö utuköba urepköm waŋgiiga wölöhariyök. Mewö ahökmö, Jisösnöŋ öme mi jim waŋgii mosöri morö mem ölöwaka iwiŋi waŋgiyök. ⁴³ Anutugö kukösumŋi ketaŋan mewö asuhuiga köreŋŋan mi eka nemböŋini teköi welipköget. Mewö.

* 9:35: Ais 42.1; Mat 3.17; 12.18; Mak 1.11; Luk 3.22

Jisösnöŋ kömumamgö bunjaŋi jiiga yahöt ahök.

Mat 17.22-23; Mak 9.30-32

Jisösnöŋ yuai pakpak mi meyöhi, miangöra ambazip körekŋan welipkögetka Jisösnöŋ nalö miangöreŋ gwarekurupŋi keu kötŋi kewö jii mötket, ⁴⁴ “Keu ki mönö kezap ala mötme: Anutunöŋ Suep gölmegö azi ölni mi gölme ambazip yeŋgö böröŋine al waŋgii gema.” ⁴⁵ Keu kötŋi mi jii mötketmö, mi qahö möt kutuget. Anutunöŋ mi köl turui tölapŋe ahöiga mi qahö möt asariget aka könaŋi denöwö, mi qesibingö kölköldömdöm aket. Mewö.

Gwarek sutŋine daŋön mutukŋi akza?

Mat 18.1-5; Mak 9.33-37

⁴⁶ *Gwarek neŋgöreŋök ‘Daŋön öŋgöŋgöŋi akza?’ jiba keu mi mötmöriget. ⁴⁷ Mi mötmörigetmö, Jisösnöŋ urumötmöŋini möt kutuba namande moröŋi kun memba qöhöröŋe ali kinök.

⁴⁸ *Kiniga kewö jii mötket, “Körek eŋgöreŋök kunŋan eretŋi kondökŋi akzawi, yaŋön mönö öŋgöŋgöŋi akza. Miangöra kunŋan namande ki nöŋgö qetne miriŋe köl öröba köyan kölmawi, yaŋön mönö ni köl öröm niŋgima. Kunŋan ni köl öröm niŋgimawi, yaŋön melaim niŋgiyöhi, mönö i mewöyök köl öröm waŋgima.” Mewö.

Kunöŋ keröki qahö, yaŋön mönö alagi akza.

Mak 9.38-40

⁴⁹ Nalö miangöreŋ Jonöŋ könahiba keu kewö jiyök, “Ketanaŋni, azi kunŋan göhö qetnöŋ öme közöl eŋgiiga ehin. Yaŋön nembuk qahö liliköba maljawaŋgöra nini i qetal waŋgiin.”

⁵⁰ Mewö jiyökmö, Jisösnöŋ kewö jii mörök, “I kude qetal waŋgime. Kunŋan qahö qetal eŋgimakzawi, yaŋön mönö eŋgö areŋnöŋ malja. (Miangöra iŋini mönö nöŋgö alaurupni tosatŋi mi qetala aŋgösirip mem eŋgibepuk.)” Mewö.

Samaria miri kun yeŋön Jisös andö qeget.

⁵¹ Jisösnöŋ Suepnöŋ öŋgömamgö ahök. Miangö nalöŋi törizawaŋgöra Jisösnöŋ kinda “Jerusalem sitinöŋ anmam,” jiba jim köhöiba könahiba könanöŋ anök. ⁵² Anda kolek qeljiŋe aliga mutuk anget. Könanöŋ anda mala Samaria prowinsgö miri kunöŋ aŋgota “Jisösgöra mözöqözözöm akingöra kazin,” jiget. ⁵³ Jiba angetka anökmö, “Ni Judia prowinsnöŋ Jerusalem jike göröken anmam” jiiga miangöra miri aŋgön köla yaizözkök qahö jiget. ⁵⁴ *Mewö aketka gwarekyahötŋi Jeims aka Jon yekŋön mi eka jiyohot, “O Kembu, Suepnöhök könöp eta eŋgohoi qahöwakeak, mewö köuluköbingö mötzan me qahö?”

* 9:46: Luk 22.24 * 9:48: Mat 10.40; Luk 10.16; Jon 13.20 * 9:54: 2 Kir 1.9-16

⁵⁵ Mewö jiyohotmö, Jisösnöñ lilingöba tembula jim etkiyök.
⁵⁶ Mianğöreñök toroqeba miri kunöñ anget. Mewö.

Jisös wuatangöbingö möndömöndö keunji

Mat 8.18-22

⁵⁷ Könanöñ angetka azi kunñan kaba Jisösgöra jiyök, “Gi denike denike anmani, nöñön mönö mianğöreñ gi guatangöba kamam.”

⁵⁸ Mi möta Jisösnöñ kewö jii mörök, “Arökñangö kiam yeñön köteñine ahögetka könakemba nei yeñön aipñini memba malakzemö, Suep gölmegö azi ölñan mönö denike anda nööröñji wani qömböññöñ nariba luhut membawak.”

⁵⁹ Jisösnöñ azi kungöra jiyök, “Gi kaba ni nuatangöman.” Jiyökmö, kewö melenök, “Kembu, mi ölöpmö, iwinan kömumangö aiga mutuk jinöñga anda galöm kölbi kömui löm kölbigun.”

⁶⁰ Mewö jiyökmö, Jisösnöñ melenđa jiyök, “Mosötnöñ! Köhömuñji yeñön çamötniñi köhömuñji mi ölöp löm kölmemö, göñön mönö anda Anutu bemtohoñangö könañi jim asarim enğiba malman.”

⁶¹ *Kunbuk azi kunñan kañgota jiyök, “Kembu, nöñön gi guatangömangö sihimni mötzalmö, mötnöñ, gi ölöp jinöñga mutuk mire anda tinitosolomurupni yaizözkökñini jibigun.”

⁶² Jiyökmö, Jisösnöñ melenök, “Kunöñ gölme mesinmesinğö kinöñ mi hos andöñe jöhöba böröñan kinöñ supñe memba kini aniga dumñe lilingöba andöñe uzawi, yañön mönö Anutugö bemtohoññöñ añgota nupñi memawañgö dop qahö akza.” Mewö.

10

Jisösnöñ gwarek 72 melaim enğii anget.

Mat 9.37-38; 10.7-16

¹ Mianğö andöñe Kembunöñ gwarek tosatñi 72* mi möwölöhöm enğiyök. Nanñak “Taonñi taonñi mirinji mirinji anmam,” jiba mianğöreñ yahöt yahöt meköba mutuk melaim enğiyök. ²*“Melaim enğimam,” jiba kewö jii mötket, “Anutugö nupñöñ nene ölñi gwötpuk öliba ahözapmö, mi tokobingöra nup meme ambazip nini awamdökñi maljin. Mianğöra mönö nene öliöliñangö Kembuñi köuluköm wañgigetka nup meme ambazip melaim enğiiğa ölñi mem tokome.

³*“Injini mönö anme. Mötket, lama yeñön arökñangö kiam kalñi yeñgö sutñine gegetka luhuba enğöhöbepuk, nöñön injini mianğö tandök ewö melaim enğibi anme. ⁴*Injini monen

* **9:61:** 1 Kiñ 19.20 * **10:1:** Tosatñan oyoñđa 70 jize. Tosatñan 72 jize. * **10:2:**

Mat 9.37-38 * **10:3:** Mat 10.16 * **10:4:** Mat 10.7-14; Mak 6.8-11; Luk 9.3-5

irimunḡa me ḡösö kun me köna esu mi kude memba anme. Anda könanöḡ ambazip enḡeka jiji-kilik-kilik yaizökzök kude akḡe.

⁵ “Anda miri kunöḡ öḡḡöba mutuk kewö jime, ‘Anutunöḡ miri kianḡoreḡ luai ali böḡjöḡ malme.’ ⁶ Mewö jigetka kunḡan luai anḡön kölmangö dop akzawi ewö, luainḡinan mönö yanḡö qakḡe öḡḡömapmö, kunḡan mi qahö anḡön köлма ewö, luainḡinan mönö lilingöba nanḡini qakḡine öḡḡöma. ⁷ *Miri öḡḡömei, mönö miangöreḡök mala nup meme. Ambazipnöḡ nup meme ambazip malmalḡini nanḡömeanḡö dop akze. Mianḡöra yeḡön nene aka o enḡimei, mi mönö neme. Miri tosatḡe lanḡan kude ahöme. Miri suen kude anda kame.

⁸ “Taon miangöreḡ me miangöreḡ anḡotketka köл öröba nene enḡimei, mia mönö neme. ⁹ Nemba tosatḡan miangöreḡ kawöl enḡöhöi ahömei, i mönö mem ölöwak enḡime. Mewö aka kewö jiget mötme, ‘Anutugö bemtohoḡan mönö dowe kaiga miangö uruḡe anḡotme.’ ¹⁰ *Mewö akḡemö, taon kunöḡ anḡotketka andö enḡumei, miangöreḡ mönö maketnöḡ me sombemnöḡ anda kewö jiget mötme,

¹¹ ‘Nini enḡö taonöḡ kainga sölbuham yuai köna tambönine mekötahözawi, mi mönö tim töḡjöraringa nanḡine lilingöba gema. Gemapmö, keu ki mönö möt yaköme: Anutugö bemtohoḡan mönö kösutḡine asuhuza.’ ¹² *Nöḡön kewö jibi mötket: Anutunöḡ nalö ketanḡe qemasolokepḡinanḡö likepḡni melenḡni taon miangö qakḡe öḡḡömawi, dop mianḡön mönö Sodom yeḡö sihimbölö dopḡi onḡita toroqem enḡima.”†

Jisösnöḡ taon 3 yeḡöra ‘Yei wösöbirik!’ jiyök.

Mat 11.20-24

¹³ * “O Korazin tonḡi, nöḡön enḡöra ‘Yei!’ jiba sahötzal aka Betsaida tonḡi, enḡöra mewöyök ‘Yei!’ jiba sahötzal. Nöḡön yeḡöreḡ anbiga keuni jibi söösönihii anḡöletotni kukösumḡinambuk asuhugetmö, uruḡini töndup qahö melenḡet. Anḡöletot mi kian ḡölmönöḡ Taiö aka Saidon sitinöḡ asuhubeak ewö, yeḡön mönö nalö köropḡni uruḡini melenḡbingö kaisösöpḡni kondela dodohonöḡ anḡömiriba kau ariba sahötpeak.

¹⁴ “Sahötpeakmö, Anutunöḡ könanḡep Korazin aka Betsaida yeḡö keuḡini jim teköba likepḡni melenḡni sihimbölö mötmei,

* **10:7:** 1 Kor 9.14; 1 Tim 5.18 * **10:10:** Apo 13.51 * **10:12:** Jen 19.24-28; Mat 11.24; 10.15 † **10:12:** Sodom yeḡön bölöḡni kanḡamḡambuk memba mala uruḡini qahö melenḡetka Anutunöḡ könoḡnöḡ köndenḡ enḡiyök. * **10:13:** Ais 23.1-18; Eze 26.1-28.26; Joel 3.4-8; Amos 1.9-10; Zek 9.2-4

nalö ketanji mianğoreñ mi mönö Taiö aka Saidon yeñgö si-himbölö dopñi oñgita mötme. ¹⁵ *Aka Kaperneam tonji, Anu-tunöñ injini ölop mem wahöt enğii Suep mire öngöbeak me qahöpto? Qahöpmahöp! Injini mönö kömupkö senjom mire kölölohoba geme.

¹⁶ *“Kunjan keunini mötmawi, yañön mönö nöñgö keuni mötma. Kunjan andö engumawi, yañön mönö ni andö nuñgumapmö, kunjan ni andö nuñgumawi, yañön melaim niñgiyöhi, mönö i andö qema.” Mewö.

Gwarek 72 yeñön lilingöba söñgaiget.

¹⁷ Gwarek 72[‡] yeñön mala lilingöba kaba söñgaiba kewö jiget, “Kembu, nini göhö qetke öme wöröme jim kutum enğiinga yeñön mewöyök keunini bapñe anda tököba anget.”

¹⁸ Mewö jigetka Jisösnöñ melenök, “Nöñön Satan kakögetka Suepnöhök luhuba wölbilik ewö aköba gei ehal. ¹⁹ *Mötket, nöñön kukösum enğibiga injini ölop kitim sora-men, skorpion (nendañ kömbukñi pomemba) aka kerökñinañgö ösum-mumuñi jitñambuk pakpak tiget eriga luhut alme. Mianğöra yuai kunjan qahö enğum mizit ak enğima.

²⁰ “Mianğöra ömewöröme yeñön keunini bapñe anjemö, töndup enğoreñ sö söñgai bohonñi mi mianğöra kude söñgaime. Enğö qetñini Suep mire ohoget Anutugö bukñöñ ahözawi, mianğöra mönö önöñi qahö söñgaime.” Mewö.

Jisösnöñ söñgaiba Anutu möpöseiyök.

Mat 11.25-27; 13.16-17

²¹ Nalö mianğoreñ Uña Töröñan Jisös inahöm wañgiiga söñgaiba keu kewö jiyök, “O Iwini, göñön Buña keugi mötkutukutu ambazip mötmöt ketanji megeri, yeñgöreñ asambötnöñmö, ambazip nahönbörat ewö nanñinañgöra mötketka gukmaulem akzei, mi mönö yeñgöreñ indelnöñga möt asarize. Mianğöra nöñön Suep gölmegö Kembuñi gi möpöseim gihizal. O Iwini, gi nangak mewö asuhumapköra mötnöñ dop köli ölöwahök.

²² *“Iwinan mönö yuai pakpak jim kutuiga nöñgö buñaya ahök. Iwinan Nahönñangö könañi nanñök möt yaköiga kunjan mi qahö mötza. Mewöyök kunjan Iwiñangö könañi qahö möt yaköiga Nahönñanök mi mötza aka ambazip möwölöhöm enğiba yeñgöra mi indelmawi, yeñön mönö Iwi möt wañgime.”

²³ Jisösnöñ mewö jiba gwarekurupñi yeñgöreñ lilingöba nanñinök ölöñ kewö jii mötket, “Injini yuai ek kutuzei, denike yeñön mi ek kutuzei, yeñön mönö jeñinañgöra aka simbawon

* **10:15:** Ais 14.13-15 * **10:16:** Mat 10.40; Mak 9.37; Luk 9.48; Jon 13.20

‡ **10:17:** Tosatñan oyoñda 70 jize. Tosatñan 72 jize. * **10:19:** Sum 91.13

* **10:22:** Jon 3.35; 10.15

akze. ²⁴ Mianḡö könaḡi kewö: Nöḡön keu kewö jibi mötket, Kezapqetok ambazip aka kiḡ azi kembu gwötpukḡan iḡini yuai ki ekzei, mi ekingö awöweḡöba malgetmö, mi qahö eket. Iḡini keu ki mötzei, yeḡön mi mötpingö awöweḡöba malgetmö, mi qahö mötket.” Mewö.

Jöjöpaḡ keu bohonḡi yahöt mi denöwö?

Mat 22.34-40; Mak 12.28-31

²⁵ *Köna keugö böhi kunḡan wahöta Jisös bötak ala kewö qesim waḡgiba jiyök, “Böhi, nöḡön denöwö aka malmal kömbönaḡi teteköḡi qahö buḡa qem aḡgubilenḡak?” ²⁶ Jiiga Jisösnöḡ kewö melenḡa qesiyök, “Mosesḡö Köna keunöḡ keu denöwö ohoget ahöza? Mianḡö könaḡi denöwö?” ²⁷ *Qesiiga melenḡa jiyök, “‘Gi urugi jömukḡi, uḡagi jömukḡi, kuki jömukḡi aka mötmötki jömukḡi mianḡön mönö Kembu Anutugi jöpaköba malman,’ aka ‘Nangi jöpaköm aḡgumakzani, mewöḡanök mönö ambazip pakpak jöpaköm eḡgiba malman.’ ”

²⁸ *Jiiga Jisösnöḡ melenḡök, “Törörök melenḡan. Mi tem köla malmal kömbönaḡaḡö buḡaya aḡḡan.” ²⁹ Mewö melenḡökmö, Köna keugö böhinöḡ ‘Mi tem köla solanḡi akzal,’ mewö mötmöriba könaḡamḡi kondelmamḡö möta Jisösgöra jiyök, “Ambazip sutḡine mala korali, yeḡöreḡök mönö dagöra jizan? Niḡia qahö jöpaköm waḡgubilenḡak?”

Samaria azinöḡ gurusep azi ak-kömum waḡḡiyök.

³⁰ Mewö jiiga Jisösnöḡ melenḡa jiyök, “Azi kunḡan Jerusalem siti mosöta Jeriko mire geba könanöḡ kegwek-kahasililin yeḡö böröḡine gei meget. Memba inap yuainḡi waḡgita oponḡi qeköba gurusep qeba gila angetka kömumamḡö aka ahöyök. ³¹ Ahöba mamböriga jike nup galöm kunḡan köna miyök anda eka ek siriba köna likeḡḡeyök anda oḡgita anök. ³² Aniga mamböri jike nup azi (Liwait) kunḡan mianḡöreḡ kaḡgota eka mewöḡanök ek siriba oḡgita anök. ³³ *Anökmö, Samaria prowinsḡö azi § kunḡan köna miyök anda ahöyöhi, mianḡöreḡ aḡgota eka wösöḡi möta ehoriyök.

³⁴ “Ehoriba kösutḡe geba uziḡi kelök aka wain oḡan miriba esuhuyök. Uziḡi esuhuba memba kököbihiba doḡkiḡi qakḡe ala waḡgita qenjarök ahöahö mire anda ala köyan köl waḡḡiyök. ³⁵ Köyan köl waḡgiba ahöba wahöta söḡanök silim yahötkö töwaḡi (Kina 10,-) uzeta qenjarök mirigö toḡi waḡgiba jiyök, ‘Azi ki mönö köyan köl waḡgiba malnöḡga moneḡ gihizali, mi kude dop köla oḡgitma ewö, mi mönö lilingöba kaba mianḡöreḡ toroqeba gihimam.’ ³⁶ Azi karöbut

* **10:25:** Mat 22.35-40; Mak 12.28-34 * **10:27:** Lew 19.18; Dut 6.5 * **10:28:**

Lew 18.5 * **10:33:** 2 Hist 28.15 § **10:33:** Juda yeḡön Samaria ambazip jijiwilit ak eḡgizema.

könaŋamŋini mewö kondelget. Azi kegwek-kahasililiŋ yeŋgö böröŋine geyöhi, yaŋgö alaŋi daŋön ahök? Yeŋgöreŋök dagöra mötnöŋ, i uru kalem ak waŋgiyök?”

³⁷ Qesim waŋgiiga melenök, “Ak kömum waŋgiyöhi, yaŋön.” Mewö meleniga Jisösnöŋ jii mörök, “Gi mönö anda mewöŋanök aka malman.” Mewö.

Jisösnöŋ Marta Maria yetpuk kusuk tarök.

³⁸ *Jisösnöŋ gwarekurupŋi yembuk könanöŋ angetka Kem-buŋinan miri kunöŋ aŋgorök. Aŋgoriga ambi kun qetŋi Marta yaŋön köl öröm waŋgii miriŋe öŋgöyök. ³⁹ Martagö munŋi qetŋi Maria malök. Yaŋön Kambu eka könaŋi kösutŋe eta tata Buŋa keu jiyöhi, mi kezap ala mörök. ⁴⁰ Mörökmö, Martanöŋ lömbuaŋ nupnöŋ öröi anda kaba mökösususu aka Jisösgöra jiyök, “Kambu, munan nömosöri nanök welen nup membi mötnöŋ dop kölja me qahö? Miangöra mönö Maria jinöŋga kaba baukôm niŋgima.”

⁴¹ Jiiga Kembunöŋ melenŋa jii mörök, “Marta Marta, gi yuai könaŋi könaŋi miangöra waimanjat möta mötkurumkurum aka könöpŋambuk aka kinjan. ⁴² Mewö kinjanmö, waimanjat mohok kun memba mem köhöininga dop köлма. Nini yuai sehisehiŋi miangöra qahö osizin. Marianöŋ kewöta urugö likepŋi möhamgöm aŋgumangö möwölöhöba simbawoŋ akza. Malmalgö bahöŋi ölopŋi mi kunŋan kun kude waŋgitma.” Mewö.

11

Jisösnöŋ köulukö könaŋi kusum eŋgiyök.

Mat 6.9-13; 7.7-11

¹ Jisösnöŋ miri kunöŋ köuluköba mali teköiga gwarekurupŋi yeŋgöreŋök kunŋan kewö jiyök, “Kambu, Jon O-melun azinöŋ gwarekurupŋi köulukö könaŋi kusum eŋgiyöhi, gi mönö mewöŋanök nini kusum neŋgiman.”

² Jiiga Jisösnöŋ kewö jii mötket, “Iŋini köuluköbin jiba kewö jime:

Iwi, göhö qetkan mönö töröŋi ahöma. Mönö galöm köl neŋginöŋga bemtohoŋgahö ölni asuhuma. (Göhö jitsi-hitki Suepnöŋ tem kölakzei, gölmenöŋ mönö mewöŋanök asuhuma.)

³ Gi wehön dop nene dopnine neŋgiman.

⁴ Tosatŋan bölöŋi ak neŋgigeri, nini körek yeŋgö siŋgisöndokŋini mosötzin ewö, gi mönö neŋgöreŋ siŋgisöndok saŋgoŋ neŋgiman.

* 10:38: Jon 11.1

Gi esapesapnōḡ eta neḡgubapukōra aḡḡōn kōl neḡgiba Bōlōḡi Toḡaḡḡō bōrōḡeyōk mekōm neḡgiman.”*

⁵ Jisōsnōḡ toroḡeba kewō jii mōtket, “Eḡḡōreḡōk kunḡan sunḡem bibiḡe alaḡaḡḡō mire anda mōndōba kewō jima, ‘Alani, beret karōbut niḡḡinōḡa likeḡḡi bian melenḡ gihibi. ⁶ Alani kunḡan kōnanōḡ mala nōḡḡōreḡ kaḡḡoriga nenenamni qahōpkōra gumohom waḡḡimamḡō jaruzal.’ ⁷ Mewō jii alaḡan miri uruḡeyōk kewō melenḡda jima, ‘Gi gaun gwōlō ak neḡgizan. Ni naḡḡuḡi lōk kōl kōhōibiga nahōnbōraturupnan nōmbuk tumbulahōḡḡnini tumbula gaun ahōzin. Mianḡōra wahōta mi gihimamḡō osizal.’ ⁸ Mewō jimapmō, nōḡōn jibi mōtket: Miri toḡan alaḡi akzawaḡōra aka qahō wahōta waḡḡimapmō, mi tōndup kapaḡ kōla jiba kinjawaḡōra mi ōlōp wahōta qesizawaḡō dop kōrek waḡḡima.

⁹ “Nōḡōn mianḡō likeḡḡi kewō jibi mōtket: Mōnō Anutu kōulukōme. Kōulukōgetka eḡḡima. Anutugōreḡ mōnō yuaigō bōrōḡaḡ memba jarume. Mi jarugetka kondeliga miwikḡaime. Kinda naḡḡunōḡ qeme. Qegetka naḡḡu tal eḡḡima. ¹⁰ Kunḡan Anutu kōulukōmakzawi, yaḡōn mōnō likeḡḡi buḡa qem aḡḡuma, yuaigō jarumakzawaḡōn mōnō mi miwikḡaima. Naḡḡunōḡ qemakzawaḡōra mōnō naḡḡu ōrōm waḡḡima.

¹¹ “Iwiurup eḡḡōreḡōk daḡōn kewō akza: Nahōḡḡan sōraḡōra qesiiga salupḡe qatō waḡḡima. ¹² me kuruk kōtḡaḡḡō qesiiga skorpion (nendaḡ kōmbukḡi pomemba) waḡḡima? ¹³ Mewōḡōra iḡini ambazip bōlōḡi akze aka tōndup kalem ōlōḡḡi ōlōḡḡi mi nahōnbōraturupḡini eḡḡibingō mōtze ewō, Suep Iwinōḡ mōnō kalemḡi denōwō aḡḡōn kōlbawak? Yaḡḡō uruḡaḡḡō ahakmemenḡi mi neḡḡōḡḡita tandōkḡi kun akza. Mianḡōra Uḡa Tōrōḡaḡḡōra kōulukōba qesim waḡḡime ewō, yaḡōn mōnō sihimḡan i melaiiga uruḡine gema.” Mewō.

Jisōsnōḡ ōme yeḡḡō ōsumḡini oḡḡita qei etza.

Mat 12.22-32; Mak 3.20-27

¹⁴ Ōmenōḡ azi kun tōḡōt aka numbuḡi jōhōiga mōtōk maliga Jisōsnōḡ ōmenḡi mi wuatāḡḡōiga kota mosōri nesilamḡan lolo-hoiga kunbuk keu jiyōk. Keu jiiga ambazip kambu yeḡōn mi eka welipkōget. ¹⁵ *Welipkōgetmō, yeḡḡōreḡōk tosatḡan kewō jiget, “Yaḡōn mōnō ōme yeḡḡō kembuḡini Katakōmulat yaḡḡō ōsumnōḡ ōmewōrōme eḡḡuatāḡḡōmakza.”

¹⁶ *Mewō jigetka tosatḡan Jisōs keugō bōtaknōḡ ōrōmapkōra esapkōm waḡḡiba kewō qesiget, “Gi mōnō jim kutunōḡa Sueḡḡnōhōk aḡḡōletot kun asuhuiga ekin.” ¹⁷ Qesigetmō, yaḡōn uru mōtmōtḡini mōt tekōba kewō jii mōtket, “Kantri

* **11:4:** Tosatḡan keu mi kewō melenḡda jimakze: bōlōḡeyōk mekōm neḡgiman.

* **11:15:** Mat 9.34; 10.25 * **11:16:** Mat 12.38; 16.1; Mak 8.11

denike yeŋgö galömurupŋinan sutŋine aŋgururuk aka julmei, yeŋön mönö ayuhum aŋgugetka kantriŋinan böliba sahopŋanök ahöma. Mewöyök miri kungö könagesö yeŋön julmei, miriŋinan mönö qeqelanŋ ahöma.

18 “Mötket! Satangö könagesö yeŋön mewöyök sutŋine aŋgururuk aka julbeak ewö, yeŋön mönö gawman nupŋini memingö osigetka ömetohonjan mönö denöwö kinbawak? Inini nöŋgöra kewö jize: Yaŋön Katakömulatkö ösumnöŋ ömewöröme eŋguataŋgömakza. 19 Mewö jizemö, mötket, nöŋön Katakömulatkö ösumnöŋ ömewöröme közöl eŋgibileŋak ewö, eŋgö alaurupŋinan mönö dagö ösumnöŋ mi közöl eŋgibeak? Miaŋgöra yeŋön mönö keuŋini ölni me qahö, mi kewöta jim teköme.† 20 Mi jim tekömemö, Anutugö ösumŋan nöŋgö börö kesötni sölölohöi öme eŋguataŋgömakzal ewö, Anutugö bemtohonjan mönö eŋgöreŋ kam kuŋguza.

21 “Azi köhöikŋan timbi liŋgipŋambuk miri gölmeŋi galöm meiga sukinapŋan mönö kahaimök ahöma. 22 Mewö ahömapmö, azi köhöikŋi kötökŋan luhuba kaba qeba luhut al waŋgiba timbi liŋgipŋi nariyöhi, mi körek waŋgita qezanŋa sukinapŋi memba anda alaurupŋi mendeŋ eŋgima.

23 **“Kunŋan nömbuk qahö maljawi, yaŋön mönö qetal niŋgimakza. Kunŋan ambazip nöŋgö qetne tokomegöra qahö öröm eŋgimakzawi, yaŋön mönö mendeŋ eŋgimakza.”* Mewö.

Öme yeŋön azi uruŋe liliŋgöbingö kapan kölje.

Mat 12.43-45

24 “Ömenöŋ azi uruŋeyök kota gölme qararaŋkölkölŋe anda laŋ liliköba mala luhut memangö miri jaruba kun qahö miwikŋaiba ölan yöhöiga kewö jima, ‘Mirini mosöta kazali, miaŋgöreŋ mönö kunbuk liliŋgömam.’ 25 Mewö jiba liliŋgöba miriŋi usuŋda meŋölöi ahöyöhi, mi mewöŋanök ahöi miwikŋaima. 26 Mewö miwikŋaiba anda öme tosatŋi 7 eŋguaŋgitma. Öme 7 mi nanŋi oŋgita bölöŋi kötökŋi akze. Yaŋön mi eŋguaŋgiriga kaba miri mi öŋgöba miaŋgö uruŋe malme. Mewö aiga azi miaŋgö könaŋi mutuk kilenkilen ahökmö, könaŋep bölüm qölim teköma.” Mewö.

Denike yeŋön simbawoŋ akze?

27 Jisösnöŋ keu mewö jiba mali ambazip kambu sutŋineyök ambi kunŋan qeta Jisös kewö jii mörök, “Gömokni, ambinöŋ gölöm ala gömimba juzu gumohom gihiyöhi, nöŋön yaŋgö mötŋi simbawoŋ akza.” 28 Mewö jiyökmö, Jisösnöŋ kewö

† 11:19: Nanŋini sile galömurupŋinan Anutugö qetŋi qeta töndup öme mi Katakömulatkö kukösumnöŋ közöl eŋgigetka nöŋön mi Anutugö ösumnöŋ közöl eŋgimakzal. Öroröŋ qahö kinjinanŋöra danön ölni aka danön keu munenŋi wuataŋgömakzawi, mi ambazipnöŋ kewöta jim teköme.

* 11:23: Mak 9.40

melenök, “Mi jizanmö, nõjõn kewö jimam: Ambazip Anutugö keugöra kezap ala möta tem köla köl gulimakzei, yejõn mönõ simbawõj akze.” Mewö.

Bõhi tosatjan anjõletokõra kapan köla uletket.

Mak 8.11-12; Mat 12.38-42

²⁹ *Ambazip kambunõj tokogetka qariiga Jisõsnõj torogeba keu kewö jiyök, “Ambazip merak gölmenõj maljei, mi kambu bölõja. Yejõn Anutugö aiwesõknanjõra kapan kölakzemö, aiwesök kun kezapqetok azi Jonagöra lõk asuhuyök. Anutunõj aiwesök murutji kun qahö al engima.

³⁰ *Keu mianjõ könanji kewö: Anutunõj mönõwök Jona melaiiga Niniwe yejõ sutjine anda Anutugö aiwesõkji ahök. Mianjõ dop Suep gölmegö azi õljan mewöyök ambazip kambu kianjõ sutjine asuha urujini melenmegöra kunjum engiba aiwesõkjinakja.

³¹ *“Kõnanjanjanjõ kaisõsõpji kun kewö: Anutunõj mönõwök mötkutukutu õngõngõji ketanji mi kin Solomon wanjiiga Saut görõkenök kantri kungö qin ambinõj Solomongö mötkutukutunji mötmangö sihimji mörök. Sihimji möta gölme göranejök wahõta kõna kõrõp tinjini kaba mala Solomongö mötmõtnji mörök. Mi mörõkmö, mötket, nalö kewõje nõjõn sutjine asuha kinda Anutugõren mötkutukutu õngõngõji memba kazali, mi Solomongö mötkutukutunji õngitza. Õngitzapmõ, injini tõndup nesampurek ak ninjiba tõnpin kingetka qahö dop kölja.

“Mianjõra Anutunõj kõnanjep ambazip körek pakpak örõm engii keunji jim tekõmapkõra jeje anjõtmei, nalö mianjõren Saut kantrigö qin ambi mianjõn mönõ mewöyök anjõtma. Yanjõn ambazip kambu ki kinjei, embuk örõrõj kõmupnõhök wahõta engö qõhõrõjine mohõtje kinma. Mohõtje kinda keu kewö engö silenjine alma, ‘Inji Jisõs nesampurek ak wanjigetka Anutunõj likepji melenj engii sihimbõlõ õngõngõji mötme.’ Yanjõn mewö jiiga silikji kewõta nanjinanjõra gamunji mötme.

³² *“Jonanõj Niniwe ambazip sutjine anda Anutugö keunõj urujini kunjui möta mianjõrenjõk urujini melengetmõ, mötket, nõjõn sutjine asuha kinda Jonagö ahakmemenji õngita ahakzal. Mewö ahakzalmö, injini tõndup nesampurek ak ninjimakze.

Mianjõra Niniwe ambazipnõj jimtekõtekögö nalõ ketanje ambazip kambu ki kinjei, embuk örõrõj kõmupnõhök wahõta engö qõhõrõjine mohõtje kinme. Mohõtje kinda Niniwe

* **11:29:** Mat 16.4; Mak 8.12 * **11:30:** Jona 3.4 * **11:31:** 1 Kin 10.1-10; 2

Hist 9.1-12 * **11:32:** Jona 3.5

yeñön keu kewö engö silenine alme, 'Inini Suep gölmegö azi ölni nesampurek ak wanğigetka Anutunöñ likepnji melenj engii sihimbölä öngöngöñi mötme.' Niniwe yeñön mewö jigetka ahakmemenjanan nanñini könañamñini indelgetka gamuñini mötme." Mewö.

Kiwa mi asakñi neñgimapköra ahöza.

Mat 5.15; 6.22-23; Mak 4.21-23

³³* "Kunñan lambe me kiwa ohotiriba köwe wanğömñe me kimbutnöñ qahö almappmö, mi mönö mianğö dum tatatnöñ alma. Mewö ali tosatñan miri uruñe öngöbingö mötzei, yeñön mianğö asakñi eka öläp öngöme. ³⁴ Göhö jegi mi uru silegahö kiwanji akza. Mianğöra kawöl kunöñ jegi qahö mem böliza ewö, mianjön mönö tohoba asarim teköi Anutugö asakñan öläp uruge mem asariiga malmalgi pakpak asakñe malman. Asakñe malmanmö, sihim kömbönañi bölöñan me yuai kunñan jegi mem böliiba asakñi közambötza ewö, mianjön silegö malmalgi mewöyök mem söñauiga pandaman uruñe jipjap malman.

³⁵ "Mewö aiga mötnöñ, söñaupnöñ urugahö asakñi közamböri söñaubapaköra mönö tihitki möta galöm mem anğuman. ³⁶ Mewö aknöñga Anutugö asakñan urugi körek dop köli wanğömñi kun qahö söñauza ewö, göhö silegan mönö mewöyök asoñ-kilik-kilikñambuk aka jemesoholgan asariza. Kiwa ketanñan silege kuñguba kölköl-bilikbilikñambuk mem asarim gihizawi, malmalgi mönö mianğö dop Anutugö asakñe al teköba malman." Mewö.

Urumelenğö silesile tandököra 'Yei!' jiiga 6 ahök.

Mat 23.1-36; Mak 12.38-40; Luk 20.45-47

³⁷ Jisösnöñ keu mi jim teköi Farisi (Köna keugö kapanğököl) azi kunöñ kewö jiba köl öröm wanğiyök, "Gi öläp nöngö mire öngöba tata nene nembın." Mewö jiiga anda öngöba nene nemamğö tarök. ³⁸ Mutuk böröñi qahö sanğonnda eta tarökmö, Farisi azinöñ silik mi eka welipköyök. ³⁹ Welipköiga Kembunöñ kewö jii mörök, "O Farisi inini mönö ölna amöt qem anğubingöra qambi aka al nenegö silenji sanğon yakömakzemö, nanñini uruñinan mönö tölohoza. Mi dogo jimamonñ aka qewöloñ mianjön kokolak qei malje.

⁴⁰ "O inini, uruñini qahö. Kunöñ silenji pakpak miwikñaiyöhi, yanjön mönö uruñi mewöyök miwikñaiyök me qahö? Inini mönö wuanöngöra uru likepnangöra tanqañ akze? Mi qahö dop kölja. ⁴¹ Mianğöra yuai kiwi al nenenöñ tatzawi, mi mönö kalema ambazip wanapñi engime. Mewö aketka Anutunöñ amöt qem engii engöreñ yuai pakpak mönö sarakñi ahöma." Mewö.

* 11:33: Mat 5.15; Mak 4.21; Luk 8.16

42 *⁴²“O Farisi ambazip, lömböt qakñine öngözawañgöra mönö wöliköba ‘Yei!’ jizal. Inini nene pakpak menden da bahöni 10 miangöreñök mohot Anutugö buñaya qemakze. Gipñi, supe aka yöha könañi könañi mi mewöyök men den da tenöhök mohot mi Anutugö buña qemakze. Naluk mi törörök alakzemö, Köna keugö kötni bohonñi ki mönö on gita mosörakze: Gi Anutu uru könömgan jöpaköm wañgiman aka ambazip sutñine ahakmeme diñdñi wuatangöba malman. Keu bohonñi mi mönö kapan köla wuatangöba malme aka keu morömorö mi mewöyök kude on gita mosötme.

43 “O Farisi, lömböt qakñine öngözawañgöra mönö wöliköba ‘Yei!’ jizal. Inini köuluk mire dum tatat mutukñe jegep tatpingö sihimñi mörakze. Maketnönñ me könanönñ ambazip engeketa jölönjini jimegö mörakze. ⁴⁴ O inini, lömböt qakñine öngözawañgöra wöliköba ‘Yei!’ jizal. Inini qaksiri qetñini qahö miangö dop akze. Ambazipnönñ qamöt wörönñambuk denike ahözawi, mi qahö möta qakñine lanlan tiba yuai dönqizinñambuk oseiba tölohomakze.” Mewö.

45 Jisösnönñ keu mewö jüga Köna keugö böhi yengöreñök kunñan möta melen da kewö jiyök, “Böhi, gi keu mewö jiba nini mewöyök gamu qem nen gizan.”

46 Mewö jiyökmö, Jisösnönñ keu kewö jiyök, “O Köna keugö böhi, engö qakñine mewöyök lömböt öngözawañgöra wöliköba ‘Yei!’ jizal. Inini keuñi keuñi jim kutuba miangö könjönñ lömbötñi ambazip qakñine alagun algetka mi tem kölbingsö lömböriiga jarañbarañ ahakzemö, nanñinak i kesötñinan borom kun bauköm en gibingö wösömötmötñini kun qahö ahöza.

47 “O inini, lömböt qakñine öngözawañgöra mönö wöliköba ‘Yei!’ jizal. Inini kezapqetok ambazip yengö qaksirinönñ simen kouw memba menjölömakzemö, nanñini ambösakonñinan mönö i en guget kömuget. ⁴⁸ Nanñini ambösakonñinan kezapqetok ambazip en guget kömugetka inini yengö qaksirinñine kouw memba simen alakze. Mewö aka mianjön ambösakonñini yengö ahakmemegöra imbi köla keuñini nan göba jiba dangunu ewö kinje.

49 “Miangöra Anutu, mötkutukutu Tonji yanön kewö jiza, ‘Nönjön kezapqetok ambazip aka aposol melaim en gibi en goren kame. Kagetka yengöreñök tosatñi i en guget kömume aka tosatñi sesewerowero ak en gime.’

50 “Anutunönñ Sup gölme miwikñaim etkiyöhi, nalö miangöreñök könahiba kezapqetok ambazip en gugetka sepñini mokoget eri, miangö sep kitipñi pakpak mi ambazip merak maljei, mönö engö qakñine öngöi sihimbölö mötme. ⁵¹ *⁵¹ Abelgö sepñan eri miangöreñök könahiba en guba kota mala Zekaraia

* 11:42: Lew 27.30 * 11:51: Jen 4.8; 2 Hist 24.20-21

jöwöwöl alta aka jöwöwöl jike kömbukñi mietkö sutñire qeget sepñi eri mianğöreñ teköyök. Nöñön keu kewö jibi mötme: Sepñinağö kitipñan mönö ambazip merak maljei, engö qakñine öngöiga sihimbölä mötme.

⁵² “O Köna keugö böhi inñini, lömböt qakñine öngözawağöra mönö wöziköba ‘Yei!’ jizal. Inñini Anutugö mötmöt membingö nañgu ki moröñi mi ambazip enğuağita ağön köl engimakze. Nanñinak mianğö uruñe qahö ağotket aka tosatñan mianğö uruñe ağotpingö akzei, inñini i jöhöba ağön köl engiba malget.”

⁵³ Jisösnöñ keu mewö jiba mosöta ani Köna keugö böhi aka Farisi yeñön könahiba keu könöpñambuk jim wañgiba keu könani könani jimapkö qeqesi gwötpuk al wañgiget. ⁵⁴ Al wañgigetka numbuñeyök keu kun qiwitipköiga mianğön köpeiba keugö bötaknöñ örömapköra mönöget. Mewö.

12

Urumelengö silesile malmalgö galöm meme keu

Mat 10.26-27

¹ *Jisösnöñ keuñi jiiga nalö sutñe mianğöreñ ambazip tausenni tausenni yağöreñ tokoba ölöqölököba utakutal ağuba kinget. Mewö aka kingetka könahiba gwarekurupñi kewö jii mötket, “Yuai mutukñi ki: Inñini mönö Farisi (Köna keugö kapañkölköl) yeğö urumelengö silesile ahak-memeñinağöra galömñini meme. Mi wösö kömbukñi ewö akza. Mi qahö mosötme ewö, mianğön mönö yist ewö qariba mem bölim engima.

² *“Ambazipnöñ yuai önun meget ahözawi, mi pakpak mönö kötulgetka aukñe ahuma. Mewöñanök keu asambötket ahözawi, mi pakpak mönö indelgetka möt kutume. ³ Mianğöra mönö keuñinağö galöm memba malme. Inñini keu söñaupnöñ ölöñ jimei, mi mönö asakñe jigetka mötme. Inñini miri uruñe wañgömñi kungen sañepnöñ kezapñine jimei, mi sobemnöñ aukñe jim asarime.” Mewö.

Dagöra keñgötnini mörin dop köлма.

Mat 10.28-31

⁴ “Alaurupñi nöñön engöra kewö jibi mötme: Tosatñan sileñini qem kömumba mianğö andöñe yuai kun toroqeba akingö osimei, yeğöra mönö keñgötñini kude möta malme. ⁵ Mi qahöpmö, dagöra keñgötñini mötketka dop kölmawi, nöñön mi kondel engimam. Kun dañön kukösum memba enğui kömugetka tötal enğii könöp sianöñ gemei, yağöra mönö keñgötñini möta malme. Engöra keu mi kunbuk jizal: yağöra mönö keñgötñini möta malme!

* 12:1: Mat 16.6; Mak 8.15

* 12:2: Mak 4.22; Luk 8.17

⁶ “Tosatñan bekösöm (jøjöröm, ulisit) 5 mi toiya yahötñan söngöröñi memegöra alakzemö, Anutunöñ miengörenök mohok-kungö qahö ölum qeyök. ⁷ Anutunöñ köyan köl engiba nörop jupñini pakpak mewöyök oyon teköba jañgöñini mötza. Ambazip engö söngöröñini mi bekösöm ulisit gwötpuk engonñgita öngöñgöñi akza. Miangöra keñgötñini mönö kude möta malme.” Mewö.

Kraist jim miwikñaima me qañ kölme?

Mat 10.32-33; 12.32; 10.19-20

⁸ “Nöñon keu kun jibi mötket: Kunñan ni ambazip jeñine jim miwikñaim niñgimawi, Suep gölmegö azi ölñan mönö mewöñanök i Anutugö garataurup yeñgö jeñine jim miwikñaima. ⁹ Mewömö, kunñan ni ambazip jeñine qañ köl niñgimawi, nöñon mönö mewöñanök i Anutugö garataurup yeñgö jeñine qañ kölmam.

¹⁰ * “Kunñan Suep gölmegö azi ölñi qetala keu jimawi, Anutunöñ mi ölöp mosötmapmö, kunñan Uña Töröñi ñlita mepaqepaik akñawi, yañgö siñgisöndokñi mi Anutunöñ qahö mosötma.

¹¹ * “Ambazipnöñ inñini öröba keu jakeñine al engigetka köuluk miriñine me kiap premiö aka kantriñi kantriñi miengö kiñ kembu yeñgö jemesoholñine kinmei, nalö miangören keuñinañgö likepñi wani keuya denöwö jibinak miangö waimañjatñi kude mötme. ¹² Mi kewögöra: Inñini keu jime, mi Uña Töröñan aua miangörenök kusum engiiga jime.” Mewö.

Nepaqepalok azi pomñañgö dopkeu

¹³ Ambazip kambu sutñineyök azi kunñan Jisösgö jiyök, “Böhi, iwiniñiran kömuiga gi mönö datnañgö jinöñga iwiniñangören börösamotñi mendenña niñgima.”

¹⁴ Mewö jiyökmö, Jisösnöñ kewö melen wañgiyök, “O azi, dañon etkö jimtekötekö tonñiri akñamgöra kuñgum niñgiyöha gölmeñiri mendenñilenak?” ¹⁵ Mewö jiba keu kewö toroqeyök, “Inap ainemalukuñinan awamñanök me kelenmalelen ahöbawak, malmalñinañgö könañi mi miangören qahö ahöza. Malmalñini qahö kewöta monen sukinapnöñ möndöme ewö, mönö ayuhume. Miangöra membagun mendingö nepaqepalok (gridi) pakpaköra mönö galömñini memba malme.”

¹⁶ Mewö jiba dopkeu kun kewö jii mötket, “Azi pomñi kun malök. Yañon gölmeñe nene nupñi meiga töhötmöriam ketañi asuhuyök. ¹⁷ Mi asuhuiga uruñan kewö mötmöriiba jiyök, ‘Nöñgö köwe mirini mi morörökñi. Miangöra padi gösöñi gösöñi, koñ kambuñi kambuñi, sehoñ börannñi börannñi mi mönö denikeañgören tokobilenak? Mönö denöwö akñamto?”

* **12:10:** Mat 12.32; Mak 3.29 * **12:11:** Mat 10.19-20; Mak 13.11; Luk 21.14-15

18 Mewö jiba jiyök, 'Mönö kewö akñam: Ni köwe mirini köndennda salupñe köwe miri ketanji ketanji memam. Mi memba nene töhötmöriamni aka sukinapni pakpak mönö mianğöreñ qezaköbi tatma. 19 Mianğöreñ tariga nananğöra kewö jimam: O gi simbawonj! Töhötmöriamgi mönö awanñi qahö ahöm gihiza. Mianğöra mönö nene nem sönğaiba yambuñi yambuñi siyonşayonji qahö luhut memba ösön malman.' 20 Mewö jiyökmö, Anutunönj kewö jii mörök, 'O gi, urugi qahö! Nönön nalögi ala jim teköba unagi sunğem kianğöreñök goanğitpiga kömuman. Kömunönğa öroyuai pakpak buña qem anğuba malnöñi, mi mönö dagö buñaya akñapto?'

21 "Kunñan nanñanğöra ainemaluku guli dötnam yuai tokomakzapmö, Anutugö qöhörönje urugö töhötmöriamñi qahö ahöm wanğizawi, yanğöra mönö lömböt ketanji mewö asuhuma." Mewö.

Anutu möt nariba waimanjat kude akñe.

Mat 6.25-34

22 Jisösnönj gwarekurupñi kewö jii mötket, "Mewö asuhumapmö, nönön enğöra kewö jibi mötket: Inini gölmenönj malmeanğö waimanjatñi mi kewö jiba kude akñe: Nini mönö wanat yuainönj gumohom anğubinak aka wanatnönj sileninanğö löngötpinak? 23 Sileñinambuk maljei, mianjön bohonñi aiga opo kereñnönj mönö mianğö nembö bapñe ahöza. Jeñinambuk maljei, mianjön bohonñi aiga nenenönj mönö mianğö nembö bapñe ahöza.

24 "Mönö koekoe nei enğekñe: Mienjön nene kötnji qahö qesiñ gilakze. Padi ölnji qahö yandiba köwe mirinñine qahö tokomakze. Yöha sihinñini mi qeköm nemi mirinönj qahö alakze aka Anutunönj mi töndup i gumohom enğimakza. Ambazip enğö söngörönjini mi nei söngörönjini enğonğita öngöba ahöza. Mönö mi mötmöriget anök.

25 "Enğöreñök kunñan waimanjat aka mewö mianjön gölmenönj malmawanğö nalönji mi sömanji mohotkö dop mem toroqema me qahö? Mi qahöpmahöp!*

26 "Mewö aiga yuai morörökñi mewö akingö osime ewö, yuai tosatñi pakpaköra mönö denöwögöra waimanjat akeak?

27 *Inini mönö jariñ juranji aködamunñinambuk mi enğekñe: Mienjön opo söronñanğöra möt qahö loñgalakze. Nup yuai tosatñi kun qahö memakze aka mi töndup kewö jibi mötket: Kin Solomonönj goul silwönji qeraköba malukuñi asonbilikbilikñambuk löngöta malökmö, yanğö malukuñi mi kiten soranjinğö dop eksihimñambuk qahö ahöyök.

* **12:25:** Tosatñan kewö melennda jize: Enğöreñök kunñan waimanjat aka mewö mianjön silenji wan fitkö dop toroqeba mem körimanğö osima. * **12:27:** 1 Kin 10.4-7; 2 Hist 9.3-6

28 “Jariŋ juranji töhöŋ mi merak gölmenöŋ kösutnine ahöi uran kölgetka eri gila qezaköba ohoget jema. Mi töndup Anutunöŋ juranji mewöŋi kun mi tok ölöpŋanök meŋölömakza. Mianğöra yaŋön iŋini mewöyök ölop esuhum engima. Iŋini jariŋ juranji mianğö dop qahö akze. Anutunöŋ köyan köl engimangö mötzawi, sihimŋi mianğön mönö yuai pakpak engoŋgita öngöza. O ambazip, mötnaripŋinan mönö wuanöŋgöra morörökŋi akza?

29 “Mewö aiga iŋini mewöyök malmalŋinanğöra mötkurumkurum kude akŋe. Mi aka lömböriba kewö jibepuk, ‘Nini mönö wani nene aka wani o nembinak?’ Mewö jiba uruŋini mianğöreŋ kude ala urueret aka urukönöpuk miwikŋaibepuk. 30 Kantri dop urumelengö kopa yeŋön yuai mewöŋi pakpak buŋa qem aŋgubingö kapaŋ köla urukönöp ahakze. Mi ahakzemö, iŋini nene opo yuaigöra mözöröŋgöba osizei, Iwiŋinan mönö mi möt teköza. 31 Mianğö urukönöp kude akŋemö, mönö Anutugö bemtohoŋnöŋ aŋgotpingö kapaŋ kölme. Uruŋini mianğöreŋ alget ahöiga yaŋön mönö galöm köl engiba yuai mewöŋi mi mewöŋanök toroqem engima.” Mewö.

Buŋanini Suepnöŋ me gölmenöŋ tokoinga dop kölja?

Mat 6.19-21

32 “O kambuni morörökŋi, Iwiŋinan bemtohoŋ al engimangö mötzawaŋgöra mönö keŋgötŋini kude möta malme. 33 Gölmegö moner inapŋi mi kapaŋ köla qeraköbepuk. Mianğöra yuai ahöm engizawi, mi mönö söŋgöröŋaŋgö ala moner öroba bahöŋi ambazip wanapŋi kalemŋinanğöra engime. Mewö aketka qetbuŋaŋini guli dötnam ewö mi Suep mire ahöba sehiba kude qahöwakŋa. Moner gösöŋini qainŋi kun mi Suep mianğöreŋ qahö bölime. Gurem jijilukut aka yoŋgorö meme yeŋön mönö eu öngöba yuai mem bölibingö osime.

34 “Yuaigöra aködamunŋi memba mötnöŋ öngözawi, mianğön miri kungen ahöiga göŋön mönö urugi mewöyök mianğöreŋ gekötahöba malman.” Mewö.

Urugwölö mala nup megetka dop kölma.

35 * “Iŋini mönö Anutugö nupŋi memingöra jöjöröba opo söroŋini jöhöm yaköba aködamunŋinambuk kinda uruŋinaŋgö kiwanan ohotirigetka jeiga malme. 36 * “Mi kianğö dop: Miri toŋi kun mi ambazip amemegö lömbuaŋnöŋ kaba söŋgaibingöra öröm waŋgigetka anök. Mianğöreŋ ani moröurupŋan mire tata lilingömapköra jeŋinan yaigep uba ‘Kiŋsiŋ-paŋsaŋ!’ jiba kapaŋ köla mambötze. Mamböta malgetka yaŋön nalö mianğöreŋ me mianğöreŋ kaŋgota

nanḡunöḡ qebawak, yeḡön mönö mianḡöreḡök nanḡu örögetka kotma. Inḡini mönö morö mienḡö dop aka jöjöröba malme.

³⁷ “Kembunöḡ lilingöba kaiga nup memeurupḡi tosatḡan urugwölö malgetka mewö miwikḡaim enḡimawi, yeḡön mönö simbawoḡ akze. Nöḡön ölna kewö jibi mötket: Yaḡön kaḡgota tokom enḡiba nene dumnöḡ ali tatketka nene gumohom enḡimamḡö jöjöröm aḡguba welen qem enḡima. ³⁸ Yaḡön ömbibiḡe me miri awöraḡöiga mianḡöreḡ lilingöi tosatḡan urugwölö malgetka miwikḡaim enḡimawi, yeḡön mönö simbawoḡ akze.

³⁹ *³⁹ “Gwölö malbingö keu ki mönö ölop mötmörime: Sunḡem aiga kegwek azinöḡ wanat nalönöḡ me auanöḡ kamawi, miri toḡan mi mötpawak ewö, yaḡön mönö gwölö mala miriḡi ölop galöm meiga qesiḡda öḡḡömamḡö osima. ⁴⁰ Inḡini ‘Suep gölmegö azi ölnan nalö kianḡöreḡ qahö kaḡgotma,’ jiba mötmörimei, yaḡön mönö nalö mianḡöreḡök kaḡgotma. Mianḡöra inḡini mewöyök jöjöröba malme.” Mewö.

Nup azinöḡ silekmalek mala ayuhuyök.

Mat 24.45-51

⁴¹ Jisösnöḡ keu mewö jii Pitönöḡ qesiyök, “Kembu, gi dopkeu ki mi neḡöra me ambazip tosatḡi pakpak yeḡöra mohok jizan?”

⁴² Mewö qesii Kembunöḡ jiyök, “Nup meme ambazip sutḡine daḡön tiḡ kutuba tosatḡi enḡoḡgitza? Tosatḡan söroräuba nup mosötketka kunḡan mötkutukutu ölopḡaḡö qakḡe kapaḡ köla pöndaḡ memakzawi, yaḡön mönö simbawoḡ akza. Miri toḡan ahakmemeḡi kewöta eka kungen anda miriḡaḡö öroyuaiḡi mi yaḡö böröḡe ali galöm akḡa. Galöm aka welenqeḡeurupḡi jiyöḡaḡö dop köyan köla nalö diḡdiḡe gumohom enḡimakḡa. ⁴³ Mewö köyan köl enḡiba maliga toḡan lilingöba kaba mewö eka mönö simbawoḡ jima.

⁴⁴ “Nöḡön keu ölni kun kewö jibi mötket: Toḡan simbawoḡ jiba sukinapḡi pakpakö galömḡi kuḡgum waḡgima. ⁴⁵ Kuḡgum waḡgimapmö, nup meme okonḡi yaḡön uruḡan mötmöriba kewö jima ewö, ‘Kembunaḡö kaka nalöḡan mönö köröpḡi ahöza.’ Mewö jiba könahiba nup meme ambazipurupḡi enḡum ureiba közölömbuaḡ ala söḡgaiba o köhöikḡi nempa uruḡi sohoiga eḡololoḡ silekmalek aka malma. ⁴⁶ Mewö mala nalö kunöḡ Kembuḡi kaḡgotmapköra qahö mambötmawi, mönö mianḡöreḡ kaḡgotma. Nalögöra ikmaok inḡululuḡ mali mönö aua mianḡöreḡ kaḡgota qeba yayiapaleḡeḡ mem waḡgiba jim kutuiga qeḡetal ambazip ewö könöp sianöḡ geba sihimbölä mötma.

* 12:39: Mat 24.43-44

47 “Nup meme kunjan Kembunangö jitsihitni möt yaköyökmö, keu areni jiyöhangö dop qahö jöjöröm anguba nupni memba malöhi, Kembunan miangö likepni jiiga jöhöba ihileknöñ ambemni gwötpuk qeaköba geme. 48 Mewö qememö, nup meme azi kunjan Kembunangö jitsihitni qahö möt yaköba yuai aka meiga likepni ölop jiget ihileknöñ gemeangö dop akzawi, Kembunöñ miangö likepni jiiga amqeqeñi geme. Anutunöñ kungöra yuai gwötpuk wanjiyöhi, yanön mönö mi mem sehiiga ölni gwötpuk ahumapköra al mambötma. Anutunöñ kungöra yuaigö warökni sehisehini al wanjiyöhi, yanön mönö mi mem sehiiga ölni sehisehini ahui melen wanjimapköra qesima.” Mewö.

Jisösnöñ könöp bölam memba eri denök.

Mat 10.34-36

49 “Nöñön gölmenöñ könöp ala ubi jemapköra etpiga urusi-himni miangö bölamnan lök jeyöhangöra ahöza. 50 *Ahözapmö, mi ‘Ala umam,’ jibi sihimbölö gwötpuk mi nöngö qakne öngöba mösölumgöm niñgimangö akña. Anutunöñ mewö mianjön melun murutni mem niñgima. O ni wahöjalin ketani möta malbi mem niñgii miangöreñ teköma. 51 Kewö mötmöribepuk: Jisösnöñ luai qemangöra aka gölmenöñ erök. Nöñön kewö jibi mötket: Nöñön luai qemangöra qahöpmö, nöngöra aka jula dengetka kön jabö ahuma.

52 “Mi kewögöra jizal: Nöngö Buña keunan ambazip uruñini kuñgui melengerangöra nalö kewöñeyök könahiba kewö asuhuma: Miri kungö uruñe ambazip 5 yeñön sutñine anjururuk aka julme. Likep karöbut yeñön yahöt yetpuk anjururuk aketka likep yahöt yetköñ karöbut yembuk jujul aka malme. 53 *Iwi morö yetköñ jula kerök-kerök ahotka nam morö yetköñ tötal angyuyohotka iranñan iranñi qetala julmahot.” Mewö.

Nalö maljini, mi möt kewötme.

Mat 16.2-3

54 Jisösnöñ toroqeba ambazip kambu yeñgöra kewö jii mötket, “Wehön gegene miri böuleiba kousu töwiiga inini mi eka miangöreñök ‘Kie kama,’ jimakze. Mewö jigetka kama. 55 Saut görökenök luhut giliga eka möta kewö jimakze, ‘Miri könöpñambuk akña.’ Jigetka miangö dop akña. 56 O urumelenjö silesile ambazip, inini suep gölmegö tandökñiri eka kie wehögö könajiri ölop kewörakzemö, nalö ki maljini, miangö könajiri qahö kewöta möt kutugetka qahö dop kölja.” Mewö.

* 12:50: Mak 10.38 * 12:53: Mai 7.6

Anggururukh̄ini mindiŋgögetka solanima.

Mat 5.25-26

⁵⁷ “In̄ini ‘Yuai diŋdiŋi mi denöwö akin,’ jiba mian̄gö könaŋi mi denöwögöra aka nann̄inak qahö kewöta jim tekömakze? Mi qahö dop kölja. ⁵⁸ Kerökan silege ala keu jakene öröm gihimangö aiga jimtekötekö galömgöreŋ anda köna namŋe mian̄göreŋ mönö kapaŋ köla imbi mohok aka keuŋiri jim solanimahot. Mewö qahö akr̄ahot ewö, kerökan ölop örörahöm gihiiga (jas, majistreit) jimtekötekö ton̄angö jeŋe an̄gotnöŋga möta jii opotöröpkö böröŋe genöŋga kösö mire al gihibapuk. ⁵⁹ Nöŋön kewö jibi mötnöŋ, Gi mian̄göreŋ töwagi pakpak almanangö dop qaköba tatman. Toiyagi kondik̄i mewöyök al teköbagun mönö töwagi memba etman.” Mewö.

13

Uruŋini melen̄get me kömumba ayuhuget.

¹ Nalö mian̄göreŋök tosatŋan kaŋgota Jisös kösohot kewö jiget mörök, “Galili ambazip tosatŋan Jerusalem jikenöŋ jöwöwöl ohogetka premiö Pailötnöŋ jiiiga suahö galömurupŋan mian̄göreŋ öngöba en̄gum kömugetka seŋŋini eta lama bulmakau seŋŋinambuk lolonqalon ahök.”

² Mewö jigetka melen̄da kewö jii mötket, “In̄ini mian̄göra kewö mötmöribepuk: Galili ambazip mien̄ön Galili ambazip tosatŋi pakpak en̄goŋgita siŋgisöndok aka malgerangöra sihimbölö mi mötket. ³ Mewö qahöpmö, nöŋön kewö jibi mötket: In̄ini uruŋini qahö melen̄me ewö, in̄ini körekŋan mönö mewöyök ayuhum teköme. ⁴ Me miri qetŋi Siloam mian̄göreŋ miri köröpŋi kunŋan eta köla ambazip 18 turum en̄gii kömugeri, in̄ini yen̄göra kewö mötmöribepuk: Yen̄ön Jerusalem könagesö tosatŋi pakpak en̄goŋgita siŋgisöndok aka keuŋinambuk malget. ⁵ Qahöpmö, nöŋön kewö jibi mötket: In̄ini uruŋini qahö melen̄me ewö, in̄ini körekŋan mönö mewöyök ayuhum teköme.” Mewö.

Muli ip goroson̄angö dopkeu

⁶ Jisösnöŋ dopkeu kun kewö jiyök, “Azi kunŋan muli ip kömöri nupŋe kota kini mian̄gö öln̄i jarumangö anökmö, kun qahö miwikŋaiyök. ⁷ Qahö miwikŋaiba nup galömn̄angöra jiyök, ‘Mötnöŋ, nöŋön muli ip kian̄gö öln̄i yambu (yara) karöbutkö dop kaba jaruyalmö, kun qahö miwikŋaial. Mian̄göra mi mönö wuanöŋgöra toroqeba gölmegö kelökŋi önewat öroi sihitŋanök akapuk. Mian̄göra mi mönö köla gilnöŋ anma.’ ⁸ Ton̄an mewö jiyökmö, galömnöŋ melen̄da jii mörök, ‘O azi kembuni, mi ölop mosötnöŋga yambu (yara) ki kunbuk kinma. Nöŋön nalö sutŋe kian̄göreŋ kinöŋnöŋ gölme esiba kundupköba ison̄bason̄ ala liliköbi kelökŋambuk

akña. ⁹ Nöñön mewö akiga yambu (yara) andöñe miangö ölni ölop ahubawak. Mi qahö ahuma ewö, mi ölop kölman.' ” Mewö.

Jisösnöñ Sabat kendonöñ ambi kun mem ölöwahök.

¹⁰ Jisösnöñ Sabat kendonöñ köuluk miri kunöñ öngöba Buña keu kusum engiyök. ¹¹ Miangörej ambi kun tarök. Ömenöñ yambu (yara) 18 miangö dop mem löwörim wangiiga könisemñi milipköiga qötöteimangö osiba tata malök. ¹² Jisösnöñ ambi mi eka oholi kaiga kewö jii mörök, “Ambi, eksekpeksek kawölğan mönö gömosöri ölöwakzan.” ¹³ Mewö jiba böröñi nöropñe ali miangörejök qötöteiba Anutu möpöseim wangiyök.

¹⁴ *Möpöseim wangiyökmö, Jisösnöñ Sabat kendonöñ ambi mi mem ölöwahöhi, köuluk mirigö galömñan mi eka miangöra möri bölüi keu könahiba ambazip kambu yengöra jiyök, “Nup memegö nalö 6 ahözawi, miangörej mönö kaba mem ölöwak engimapköra jime. Mi Sabat kendonöñ qahö.”

¹⁵ Mewö jiyökmö, Kembunöñ melenña kewö jiyök, “O urumelenö silesile ambazip! Injini pakpak bulmakau azinjini me donqinjini mi Sabat kendonöñ mireyök pösata enguanqitketka onöñ anda nemakze me qahö? Engörejök kunöñ mi qahö anöñ köl engimakza. ¹⁶ Mötket! Ambi ki-anöñ Abrahamgö gwölönaröha aiga Satanöñ jöhöm wangii yambu (yara) köröpñi 18:gö dop maliga nöñön kösöñi mi Sabat kendonöñ pösatpi dop köl engiza me qahö?” ¹⁷ Mewö jiiga tuarenjoñurupñi pakpak yeñön gamuñini mötket aka ambazip kambu pakpak yeñön anöletot wewelipñambuk meyöhi, mi pakpak eka möta söngaiget. Mewö.

Nejoñ kötnangö dopkeu

Mat 13.31-32, 34; Mak 4.30-32

¹⁸ Jisösnöñ dopkeu kun kewö jiyök, “Anutugö bemtohoñgö könañi mi denöwö? Mi wanatpuk dop albilenjak? ¹⁹ Mi nejoñ kötnangö dop kewö akza: Azi kunñan mi memba nupñe anda esiiga wahöta qariba ip ahök. Ip aiga könakemba neñi neñi mienöñ aipñini ip miangö böröñe alget.” Mewö.

Yistkö dopkeu

Mat 13.33

²⁰ Jisösnöñ dumñe kunbuk dopkeu kun kewö jiyök, “Anutugö bemtohoñi mi wanat yuaibuk dop albilenjak? ²¹ Mi yist me flaua mem qariqarigö dop kewö akza: Amba kunñan ‘Beret ohomam,’ jiba yist memba flaua könde karöbut miangörej mindiriba melenqelen aka anda anda tari köreñanök qariyök.” Mewö.

* 13:14: Eks 20.9-10; Dut 5.13-14

Mönö nanju giwiknje jaram tiba angotme.

Mat 7.13-14, 21-23

²² Jisösnöj anda taonñi taonñi aka mirinji mirinji miangören Buja kusum engiba anda mala Jerusalem sitinöj göröken anök. ²³ Ani kunjan kewö qesim wanjiyök, “Kembu, uruñini melenget Anutunöj amöt qem engii letotmei, mi ambazip awamdökña me denöwö?” Qesim wanji kewö jii mötket,

²⁴ “Inini mönö nanju giwiknje angotpingö jaram tiba aum-mörime. Nöñön kewö jibi mötket: Ambazip gwötpukñan Anutugö bemtohoj uruñe angotpingö esapkömömö, mi osime. ²⁵ Könanjep miri tonjan wahöta nanju köligun inini nalö miangören könahiba yaigep kinda nanjunöj qeba kewö jime, ‘Kembu, mönö nanju öröm nenjinöj.’ Mewö jigetka melenđa kewö jii mötme, ‘Ni qahö möt engizal. Inini denikegöra, mi qahö mötzal.’ ²⁶ Mewö jiiga inini miangörenök könahiba kewö jime, ‘Neñön mönö göbuk köisirik tata nene nein. Göñön mönö liliköba neñgö sombemnöj Buja kusum nenjinöj.’ ²⁷ *Mewö jimemö, yanön keu kewö jima, ‘Inini denikeangöra, ni qahö möt engizal. Miangöra kewö jibi mötket: Bölöñi meme pakpak, inini mönö nömosöta kesalget.’

²⁸ **“Kesalgetka miangören Abraham, Aisak, Jeikob aka kezapqetok ambazip pakpak yanön Anutugö bemtohoj uruñe kingetka engekñemö, nanñini aköm engigetka yaigep kinme. Könanñini mewö miwikñaiba sahöt gigilahöba irimñini yöhözömgögetka qetñi qeri malme. ²⁹ Ambazipñi ambazipñi mi wehön kotkotñeyök aka gegeneyök aka likeplikap Not Saut miangörenök kaba Anutugö bemtohojñöj angota dum tatatñini memba nene nem söngaip aka malme. ³⁰ *Mewö malmemö, mötket! Qöndökñi yengörenök tosatñan mutukñi akñe aka mutukñi yengörenök tosatñan qöndökñi akñe.” Mewö.

Kin Herodnöj kiam soñ miangö dop akza.

Mat 23.37-39

³¹ Nalö miangörenök Farisi (Köna keugö kapankölköl) tosatñan Jisösgören kaba kewö jiget, “Kin Herodnöj guhui kömumangö mötza. Miangöra mönö miri ki mosöta anman.”

³² Jigetka kewö melenj engiyök, “Inini mönö arökñangö kiam soñ mi kewö jiget mötma, ‘Mötnöñ! Nöñön merak aka uran ömewöröme enguatangömam aka kawöl ambazip mem ölöwak engiba malmam. Anmami, uruwale mönö miangören angota nupni mekömam.’ ³³ “Kezapqetok ambazip sehisehiñi mi Jerusalem sitinöj engugetka kömuget. Miri tosatñe qahö toro-qeba enguget kömumakze, miangö tandöktandök ahöza ekzal.

* 13:27: Sum 6.8 * 13:28: Mat 22.13; 25.30 * 13:28: Mat 8.11-12 * 13:30: Mat 19.30; 20.16; Mak 10.31

Miangöra nõñõn merak aka uran uruwale kõna anda malamam. Jerusalem angotpiga nuñguget kõmumam ewõ, mõnõ yengõreñ aiakanina mi toroqeba akñe.” Mewõ.

Jisõsnõñ Jerusalem sitigöra sahörök.

Mat 23.37-39

³⁴ Jisõsnõñ jiyök, “O Jerusalem Jerusalem, injini kezapqetok ambazip enjuget kõmugetka Anutunõñ ambazip melaim enjii enjõreñ kamakzei, mi kõtnõñ kumbukõm enjimakze. Poi namñan morõurupñi ginginñi bapñe ala kõjõjohom enjimakzawi, nõñõn miangõ dop nalõñi nalõñi gõhõ kõnagõsourupki suhuba tokom enjimamgõ mõta malalmõ, injini mi tõkõba mala kotket. ³⁵ *Mõtket! ‘Anutunõñ mõnõ jike mirinñi andõ qeiga sahopñanõk ahõma.’ Mewõ ahõmapmõ, nõñõn kewõ jibi mõtket, injini ni kunbuk qahõ nekñemõ, kõnanjep nalõ kun kam kuñgui miangõreñ neka kewõ jime, ‘Kembugõ qetñe kam neñgizawi, Anutunõñ mõnõ i kõtuetkõm wañgima.’ Mewõ.”

14

Jisõsnõñ kawõl azi kun mem õlõwahõk.

¹ Jisõsnõñ Sabat kendon kunõñ Farisi (Kõna keugõ kapañkõlkõl) yengõ jitñememe kungõ mirinñe õngõba nene neyök. Nemba tari tosatñan galõm memba ektiget. ² Miangõreñ yangõ jemesoholñe kawõl azi kun kõna bõrõñi onõñ õlõkõba qarri tarõk. ³ Jisõsnõñ i eka kõnahiba Kõna keugõ böhi aka Farisi mi qesim enjiba kewõ jiyök, “Sabat kendonõñ azi mem õlõwak wañgiba mewõ miangõn Kõna keu õngitpin me qahõ?”

⁴ Mewõ jiyõkmõ, yeñõn görõñ qeba tatket. Tatketka bõrõñan azi mi misiriba mem õlõwaka melaii anõk. ⁵ *Ani kewõ jii mõtket, “Enjõreñõk kungõreñ morõ me bulmakau azinñi mi Sabat kendonõñ o lõmnõñ gema ewõ, mi mõnõ õsumok õrõgetka kotma. Dañõn mi qahõ õrõi kotpawak?” ⁶ Mewõ qesim enjii miangõ likepñi melenbingõ lõmbõriba numbuñini muhungõba bõk tatket. Mewõ.

Jisõsnõñ sile mem-õngõ-õngõ mi qetalõk.

⁷ Farisi (Kõna keugõ kapañkõlkõl) azinõñ ambazip nenegõra kõl õrõm enjyõhi, yeñõn dum qaikñe eu mekõba tatkeri, Jisõsnõñ mi eka miangõra dopkeu kun kewõ jii mõtket, ⁸ * “Kunñan gi amembitkõ lõmbuangõreñ kõl õrõm gihii miangõreñ anda dum jegenñeyõk qahõ memba tatman. Mewõ akñan ewõ, tosatñi kõl õrõm enjyõhi, yeñõreñõk kunñan gi gõngita qetbuñañambuk akapuk.

* 13:35: Sum 118.26; Jer 22.5 * 14:5: Mat 12.11 * 14:8: Qam 25.6-7

⁹ “Yañön kañgoriga lömbuañ toñan göhöreñ kaba kewö jibawak, ‘Gi dum ki mosötnönga öñgöñgöñi yañön tatma.’ Mewö jima ewö, gi mönö wahöta bapñe emu eta dum memba tata gamugi senjombuk mötpanbuk. ¹⁰ Mewö qahöpmö, kunöñ köl öröm gihimawi, gi ölöp dum siminñe emu anda tatman. Mewö tatnönga lömbuañ toñan kota geke jima, ‘Alani, gi ölöp kaba dum jegenñe eu anda tatman’. Mewö jiiga göñön ambazip göbuk tata nene nezei, mönö körek yeñgö jeñine qetbuñagabuk akñan. ¹¹ *Mi kewögöra: Nannini uruñini memba öñgömei, Anutunöñ i körek memba et al enñgima. Kunñan nannini uruñi memba etmawi, Anutunöñ mönö i memba öñgöba al wanñgima.”

¹² Farisi (Köna keugö kapañkölköl) azinöñ ambazip köl öröm enñgi lömbuañnöñ tatketka Jisösnöñ lömbuañ toñi lilingöba eka kewö jii mörök, “Gi silingö me sunñgemgö lömbuañ kun ohoba miangöreñ nangi alaurupki me darumunurupki mi kude köl öröm enñgiman. Tinitosolomurupki me miri kasunñangö ambazip pomñi qetbuñaninambuk mi kude köl öröm enñgiman. Mewöñi lömbuañgöra köl öröm enñginöñi, i mewöñanök köl öröm gihiba tosagi mi meköm gihiget teköma. Mewö akñan ewö, Anutunöñ mönö miangö töwanñi qahö gihima.

¹³ “Mewö qahöpmö, lömbuañ mözözömgöba ohomani, gi mönö ambazip etqeñeñi mia köl öröm enñgiman. Ambazip wanapñi, simalokon aka jegömöl akzei, mönö mia enñgoholnönga dop kölma. ¹⁴ Mi köl öröm enñginönga yeñön tosa meköm gihibingö osigetka gi miangöra simbawonñ aka malman. Tosañini mi öne ahöi malnönga solañni yeñön kömupnöñök wahötketka nalö miangöreñ Anutunöñ nannak mi göhöra meköm gihima.” Mewö.

Lömbuañ ali möndömöndö keu jiba tököget.

Mat 22.1-10

¹⁵ Jisösnöñ mewö jiiga nene nempa tatket yeñgöreñök kunñan mi möta kewö jii mörök, “Kunöñ Anutugö bemtohonñ uruñe anñgota nene nempa tatmawi, nöñön yañgöra simbawonñ jizal.”

¹⁶ Mewö jiiga kewö meleñnök, “Azi kunñan sunñgemgö lömbuañ ketañi mözözömgöba ohoba ambazip gwötpuk öröm enñgiget kamegöra jiyök. ¹⁷ Lömbuañ nalöñi kam kuñgui welenqeñeñi kun melaii köl öröm enñgimangö jiyöhi, yeñgöreñ anda jii mötket, ‘Yuai pakpak lök mözözömgöingä ahöza. Miangöra mönö ölöp kame.’ ¹⁸ Jii mötketmö, mi möta yeñön körekmakörek könahiba yuai tosatñe möndöba tököget. Mutukñan jiyök, ‘Ni arö kun söñgöronñi mealangöra miangöreñ anda ekñangö mötzal. Mianñön jöhöm niñgiza. Miangöra ölöp anda jinönga

* 14:11: Mat 23.12; Luk 18.14

möta kude möt bölim ningima.' ¹⁹ Kunñan jiyök, 'Ni bulmakau aziñi 10 söngöröñini meali, mi kösonöñ ilikñine jöhöbi kinöñ örögetka anda nup esapköba qeba qindipkömam. Mi-anñon jöhöm ningizawanğöra ölop jinöñga möta kude möt bölim ningima.' ²⁰ Kunñan toroqeba kewö jiyök, 'Ni ambi urandöpki bohonñi mealanğöra kamangö osizal.'

²¹ "Mewö jigetka welenqeqenöñ lilingöba azi kembunğöra buzup mi jii mörök. Möta uruñi könöp jeiga welenqeqenñi kewö jim kutum wanğiyök, 'Gi mönö wölañ taongö köna namñe aka sombemnöñ anda ambazip etqeqenñi, wanapñi, köna böröñini titiñgitñi, jegömöl aka simalokon ambazip mi mönö enğuanğitnöñga lömbuanñ miri uruñe ki kame. ²² Jiyöhanğö dop ak teköba kaba kewö jiyök, 'Kembuni, jim kutum ningizananğö dop akzalmö, dum tiñi tok ahöza.'

²³ "Mewö jiiga azi kembunöñ jiyök, 'Gi mönö könanöñ aka rowonqeqenine anda ambazip tat anjei, mi kapañ köla kuñgum enğinöñga lömbuanñ miri uruñe kañgota kokolak qeme. ²⁴ Nöñon kewö jibi mötket: Ambazip mutuk köl öröm enğimangö jiali, yeñgöreñök kunñan kun nöñgö lömbuanñon qahö kañgota nemba nahömñi mötma.'" Mewö.

Jisösgö gwarek malmalgö könani

Mat 10.37-38

²⁵ Jisösnöñ ani ambazip kambu ketani yeñon wuatangöba angetka lilingöba kewö jii mötket, ²⁶ * "Kunñan nömbuk kaba malmam jiba ni göragöra al ningiba iwinamñi, anöm-moröñi, darumunñi, nenbehötñi aka nanñi malmalñi mewöyök jegep ala jöpakömakzawi, yanñon mönö nöñgö gwarekni akñamgö osima. ²⁷ * Sisitñini megetka kunñan ni nuatangöba sihimbölö möta maripomnöñ kömumangö qahö jöjörömawi, yanñon mönö nöñgö gwarekni akñamgö osima.

²⁸ "Enğöreñök kunñan miri köröpñi memangö mötza ewö, yanñon mönö mutuk eta tata moneñi miri mem tekömawanğö dop akza me qahö, miangö könani kewöta ek kutuma. ²⁹ Mewö qahö aka miri tandöñi kömöta mi mem tekömangö köhököhöiñi qahö ahöm wanğiiga mosöri öne kiniga ambazip pakpak mi eka könahiba jiji-ilit jiba mepaik wanğibepuk. ³⁰ Mewö ak wanğiba kewö jibepuk, 'Azi mi könahiba miriñi meyökmö, mi mem tekömangö qahö köhöiyök.' Miangö dop Jisös wuatangöman me qahö, mi törörök kewöta möt kutuman." Mewö

³¹ Jisösnöñ keu mi toroqeba kewö jiyök, "Mewöyök kiñ azi kembu kunñan kiñ kunbuk aröñda 'Bim qemam,' jiba denöwö akña? Yanñon zilañök kerök qahö al wanğimapmö,

* **14:26:** Mat 10.37 * **14:27:** Mat 10.38; 16.24; Mak 8.34; Luk 9.23

mutuk jembonurupñi öröm tokom enġii tata qambañ keu kewö eraum mötme, 'Nanine aziurupnini 10.000 maljin aiga likepñe kerökurupnini mi 20.000 malje. Azi kembuñinan i enġuanġita kaget enġeka ölöp köhöiba enġubin me qahöpto?'³² 'Qahö köhöibin,' jime ewö, yañön kerök kiñnön körowen tariga mianġörenök jitñememeurupñi melaim enġii yañgören anda luai qebingö goro eraum mötme.³³ Mewöyök enġörenök kunñan yuai pakpak ahöm wañgizawi, mi jegep almawañön mönö nöngö gwarekni akñamgö osima. Mianġöra mönö nia jegep al niñgigetka dop kölma." Mewö.

Howe nahömñi qahö mi yuaia omani kötökñi.

Mat 5.13; Mak 9.50

³⁴ "Howe mi ölöpñi akzapmö, sihimñi mosötma ewö, mi mönö denöwö möhamgöinga kunbuk sihimñambuk akawak?³⁵ Nesak omani mi gölme kelökñambuk akñapköra tokoba isonbason alakzinmö, howe nahömñi qahö mi yuai kungöra qahö dop kölma. Qahö! Mi mönö önewat gölmenön gilinga geba öne töhöntöhön ahöma. (Gi mewöñanök nöngö gwarekni aka kambañe kutuba nömosötman ewö, mönö yuai omani akñan.) Kunñan kezapñambukñön malja ewö, yañön mönö keu mi möt kutuma." Mewö.

15

Lamanönj sohayök, mianġö dopkeu

Mat 18.12-14

¹ *Takis tilipqilip aka megeri aka siñgisöndok ambazip tosatñi mi jesöngöñan Jisösgö Buñani mötpingö kaget. ² Mewö kagetmö, Farisi aka Köna keugö böhi yeñön Jisösgöra uruñinan böliiga irikuruk keu kewö jiget, "Azi mianñön siñgisöndok ambazip enġimemba yembuk tata nene neza." ³ Mewö jigeranġöra Jisösnön dopkeu kun kewö jii mötket,

⁴ "Enġörenök kungö lamaurupñi 100 malgetka miengörenök kunñan sohoba janjuñ aniga toñan denöwö akña? Yañön mönö 99 mi gölme qararanölkölñe enġomosöta anda mohot janjuñ anöhi, mianġö jaruba anda mala miwikñaiiga teköma. ⁵ Miwikñaiiba urusösöñgai aka awötñe ala kama. ⁶ Mire kaba alaurupñi aka tosatñi kösutñe malmei, mi enġoholi tokogetka kewö jii mötme, 'Lamani sohayöhi, mi lök miwikñaiizalanġöra mönö nömbuk sösöñgai akin' ⁷ Nöñön kewö jibi mötme: Mianġö dop siñgisöndok azi mohotñan uruñi melenmawi, yañgöra Suep mire sösöñgai ketani asuhuma. Ambazip 99 nanñine jenine solanñi diñdiñi aka uruñini melenbingö qahö möta maljei, yeñgöra sösöñgai mewöñi qahö asuhuma." Mewö.

Moneñ kötñi sohayök, mianġö dopkeu

* 15:1: Luk 5.29-30

⁸ “Mewöyök ambi kunñan silwö moneñ kötñi 10 memba maliga miengörenök mohokñan geba sohoiga denöwö akña? Yañön mönö kiwa ohotiriba kapan köla miri usuñda jaruma. Jaruba mala miwikñaiiga teköma. ⁹ Mi miwikñaiiba ambi alaurupñi aka ambi tosatñi kösutñe maljei, mi engoholi tokogetka kewö jii mötme, ‘Nöngören soujeñi mohotñan sohoiöhi, mi miwikñaiizalañgöra mönö nömbuk sösongai aki.’ ¹⁰ Mianğö dop nöñön kewö jibi mötme: Siñgisöndok ambazip kunñan uruñi melenñiga Anutugö garataurupñi yeñön mianğöra sösongai öngöñgöñi akñe.” Mewö.

Nanñi imbi-imbi azinöñ kumkanjam aka imbiñi melenñök.

¹¹ Jisösnöñ toroqeba kewö jiyök, “Azi kungö nahönyahötñi yahöt malohot. ¹² Munñan iwinanğöra kewö jiyök, ‘Iwini, gi mönö moneñ sukinapki mendenđa nöngö bahöñi ningiman.’ Mewö jiiga öröyuaini pakpak dopñire mendenđa etkiyök. ¹³ Mi etkiiga nahönñi moröñan sömañi yahöt karöbut mala inap yuaini pakpak mi kölölohoba memba kantri kungen anök. Mianğören anda nanñi imbi-imbi aka köna ketanji ambi yembuk kiam bau ewö söñaup malmal mala moneñ inapñi gil teköyök.

¹⁴ “Yuai pakpak gil teköiga bödi (buörö) ketanji asuhaba gölme pakpak mi dop kölök. Yañön nalö mianğören könahiba öngöpñi aka osiyök. ¹⁵ Osiba kantri mianğö tonji kungören anda nupköra qesim wanjiiga melaii yanğö bau selñe geba bau galömnina malök. ¹⁶ Mianğören mali bau yeñön sokop kötñi neget eka ‘Ölöp mi nembi gölömnini dop kölbawak,’ jiyökmö, mi mewöyök kunñan qahö wanjiyök.

¹⁷ “Mewö mala uruñi ahuiga kewö jiyök, ‘Iwinanğö nup ambazip wanat awamñi yeñön nup megetka söngöröñi engii nene nem timbireñ aka maljemö, nöñön kianğören uzukörörap aka bödi mala kömumamğö akzal. ¹⁸ Ni mönö wahöta iwinanğören lilingöba anda kewö jibi mötma, ‘Iwini, ni siñgisöndok memba mianñön gi aka Suep Tonji qetal etkiba qetki mem böliäl. ¹⁹ Mianğöra göñön kunbuk nöngöra ‘Nahöni,’ jimananğö dop qahö akzal. Gi ölöp jinöñga welenqeqega kun akñam.’

²⁰ “Mewö jiba wahöta iwinanğören anök. Anda mala miri dopdowii iwinan tikep endu kinda ehi kaiga wösöñi pöröraköiga ehoriba ösumñan diñdiñgöba anda imbiñe gili geiga numbuñi yöhötüm nempa ‘Nahöni, owe owe!’ jiyök. ²¹ Mewö ahökmö, nahönñan jiyök, ‘Iwini, ni siñgisöndok memba mianñön gi aka Suep Tonji qetal etkiba qetki mem böliäl. Mianğöra göñön kunbuk nöngöra ‘Nahöni,’ jimananğö dop qahö akzal.’

22 “Mewö jii iwiñan mianğörejök welenqequeurupni kewö jii mötket, ‘İjini mönö ösumok maluku aködamunğambuk kun memba kaba löngöt wañgiget. İla jalö imbiñe köla meñölöm wañgiba köna esu könañe löngöt wañgiget. 23 Mewöyök selnöñ anda bulmakau dömnji kelökñambuk kun memba kaba qeba ohogetka nembra sösöñgai albin. 24 Nahöni ki kömum taköyöhañön mönö kunbuk guliba kaza. Yañön lök sohoigun Anutunöñ kunbuk miwikñaiiga asuhum tiñgitza.’ Mewö jiiga könahiba sösöñgai alget.

25 “Sösöñgai algetmö, datñan nupnöñ mala lilingöba miri dopdowiba mianğöreñ liñet gwawet köla unduba söñgaigeri, mianğö kourukñi mörök. 26 Mi möta welen morö kun qeri kaiga ‘Mi denöwögöra akze?’ jiba qesim wañgiyök. 27 Qesim wañgiiga kewö jiyök, ‘Mungan lilingöba kaiga iwiñan i kunbuk meiga unditundit aiga mianğöra jiiga bulmakau dömnji kelökñambuk qeba ohoba söñgaize.’

28 “Mewö jiiga irimñi seholiiga mire öngömamgö tököyök. Tököyökmö, iwiñan mi möta yaigep eta uruluai keu ösöñ jiba mölöwörim wañgiyök. 29 Mölöwörim wañgiyökmö, yañön melenđa kewö jiyök, ‘İwini, nöñön yambu gwötpuk welengi qeba mala jimkutukutugi nalö kunöñ qahö öñgita malalmö, töndup göñön nalö kunöñ meme (noniñ) moröñi kun alaurupni yembuk sösöñgai albingöra qahö niñginöñ. 30 Qahö niñginöñmö, nahöngi kianön köna ketañi ambi yembuk mala moneñ inapki ayuhuba kañgoriga göñön mönö yañğöra aka jinöñga bulmakau dömnji kelökñambuk qeba ohoze.’

31 “Jiiga iwiñan kewö jii mörök, ‘Nahöni, gi nalö dop nanambuk malakzan. Mianğöra nani buñani pakpak mi mönö göhö buñaya mohok akza. 32 Mohok akzapmö, mungi kianön kömum taköyöhañön kunbuk guliba kaza. Yañön lök sohoiga Anutunöñ kunbuk miwikñaiiga asuhum tiñgitza. Mianğöra döлки nene sösöñgai alinga dop kölja.’ ” Mewö.

16

Sukinap galöm tilipqilipñambukö dopkeu

1 Jisösnöñ gwarekurupni keu kun kewö jii mötket, “Azi pomñi kungö sukinap galömñi kun malök. Tosatñan kaba azi pomñi mi luasö keu jiget mörök, ‘Yañön göhöreñ moneñ inapki köndenđa lañ gila malja.’ 2 Mi möta galöm mi jii kaiga jim wañgiyök, ‘Ni göhöra buña bölöñi jiget mötzal. Gi nöngö miri aka sukinapni kunbuk galöm kölmanangö dop qahö akzan. Mianğöra mi denöwö galöm köla malnöñ, mianğö löpötñi jim asarim niñgiman.’ 3 Mewö jiiga uruñan kewö mötmöriyök, ‘Miri toñan galömkölköl nupni noañgiri denöwö akñamto? Ösumni qahö dop köljawañğöra gölme esimamgö osizal aka ulet

azi malmamgö gamuni mötzal. ⁴ Yanjön galömkölköl nupni noanğitmawi, nõnõn nalö mianğoreñ denöwö akiga tosatñan mirinñine köl öröba köyan köl niñgibeak? Aha! Kõna kun mötmörizal.

⁵ “Mewö jiba ambazip toñan tosa al engiyöhi, mi pakpak nanñik nanñik öröm enğıga kaget. Mutukñan kaiga yangöra kewö jiyök, ‘Tonanğoreñ tosa göhöreñ dawik ahöza?’ ⁶ Mewö qesiiga jiyök, ‘Oil dram 100 meal.’ Mewö jiiga kewö melenñök, ‘Gi tosa papiagi memba ki tata ösumok uteköba 50 ohonõnga ahöma.’ ⁷ Mewö jiba azi kun qesim wanğiyök, ‘Aka gi? Göhöreñ tosa dawik ahöza?’ Qesiiga kewö jiyök, ‘Wit flaua mi 21.000 kilogram meal.’ Mewö jiiga jiyök, ‘Gi tosa papiagi memba mianğoreñ 16.800 kilogram mewö ohonõnga ahöma.’

⁸ “Mewö aiga miri toñan möta jim-ölöwak keu kewö jiyök, ‘Galömnan tilipqilip qakñe yuai ahöhi, mi mötkutukutu ölöpnji kondelja.’” Kembu jisösnõñ kösohot mewö jiba toroqeba jiyök, “Sõñaupkö ahakmeme wuatangömakzei, yenğö mötkutukutuñini mi ambazip tosatñi merak maljei, mi tilipqilip ak engimeanğö dop ahözapmö, Anutugö asakñe maljei, yenğö mötkutukutuñini mi mianğö bapñe akza.

⁹ “Mianğöra kewö jibi mötket: Tosatñan gölmegö monen inapnõñ ambazip tilipköm engimakzemö, enñon mönõ mi-anñon memba alaurup miwikñaim engime. Mi miwikñaim engigetka gölmegö yuainõñ qahöwakñawi, Anutunõñ mönõ nalö mianğoreñ köl öröm enğıga malmal köhöikñi mire anğota tetekõñi qahö malme.

¹⁰ “Kunñan yuai morörökñi memba kapan köla törörök galöm köljawi, yanjön mönõ yuai ketanji mewöyök törörök galöm köлма. Kunñan yuai morörökñi galöm köla kitik-katuk akzawi, yanjön mönõ yuai ketanji mi mewöyök galöm kölmapkö jiinga kitik-katuk akña. ¹¹ Gölmegö monen inapñi börõñine algetka mi pöndañ qahö galöm kölgetka ölnji qahö asuhuyök ewö, kunñan mönõ yuai buñañi öngöngõñi ölnji mi börõñine qahö alma. ¹² Inini tosatñi yenğoreñ yuai mi pöndañ qahö galöm kölgetka ölnji qahö asuhuyök ewö, nanñini uruñinangö buña ölnji mi dañon kun enğibawak?

¹³ *“Welenqege kunñan kembu yahöt welen qem etki-mamgö osimakza. Kunñan mewö akñamgö mötzawi, yanjön mönõ kun kazik ak wanğiba kun uruñan jöpaköma. Kungöreñ qekötahöba kun jijiwilit ak wanğima. Mianğöra enñon Anutu aka monen inap mi mindiriba welen qem etkibingö osime.” Mewö.

*Monenğö urukönöp akepukö goro keu
Mat 11.12-13; 5.31-32; Mak 10.11-12*

* 16:13: Mat 6.24

14 Farisi (Köna keugö kapankölköl) yeñon monengö nahöm gwötpuk ahöm engii malgerangöra Jisösnöñ keu pakpak mi jiyöhi, mi möta je misiba ilit wangiget. 15 Ilit wangigetka kewö jii mötket, “Farisi enñon mönö ambazip jeñine solanñi tandök kondel engibingö könöpuk ahakzemö, Anutunöñ uruñinañgö könañi möt kutum teköza. Ambazip jeñine yuai kungöra mötketka öngöngöñi akzawi, mi Anutunöñ ehi imbilonlonambuk ahakza.

16 * “Bemtohongö könañi mi Mosesgöreñ Köna keunöñ aka kezapqetok ambazip yeñgö Buzup Kimbiñine ohogetka oyoñda mala koringa Jonöñ asuhuba ölni aukñe indelök. Nalö mianğöreñök könahiba keu mi jim sehiba Anutugö bemtohone anğotmegöra ambazip uruñini kuñgumakzin. Ambazip körekñan mönö jaram tiba kapan köla bemtohon mianğö uruñe anğotpingö ahakze. 17 * Suep gölmenöñ göröñ qemahotkö dop akzahotmö, Köna keugö kulem jönbölanñi mohok-kun mi nalö kungen qahö kötökñi ayapköma. Mewö.

18 * “Azi kunñan anömñi mosöta ambi kun memawi, yañon mönö qesabulum akña. Azi kunñan ambi apñan mosöröhi, mi memawañon mönö mewöyök qesabulum akña.” Mewö.

Azi pomñi aka Lazarus

19 “Azi pomñi kun malök. Yañon opo maluku gugakgugak pisikñi aködamunñambuk löngöta mala nalö dop nene söñgaip aka siyoñsayoñi qahö malök. 20 Mewö malökmö, yañgö miri nanğunji kösutñe azi wanapñi kun qetñi Lazarus ahöba malök. Uzi nömböñnöñ silenji dop köla tarök. 21 Wösöñi aliga gwarönöñ ahöba azi pomñanğö tebolnöhök nene irip boromñi eri mia nemangö mörök. Möta ahöiga kiam yeñon kanğota uzi nömböñi bözöba malget.

22 “Mewö mala wanapñi yañon kömuyök. Kömui Suep garata yeñon wangita öngöba Abrahamgö qöhöröñe alget tarök. Azi pomñi yañon mewöñanök kömuiga löm kölget. 23 Löm kölgetka kömupkö senjom mire geiga jem sölöngöi sihimbölö ketanji möta ui öngöiga Lazarus Abrahamgö qöhöröñe köröwen endu tari etkehök. 24 Etkeka silata qeta jiyök, ‘O iwini Abraham, mönö wösögi möt niñgiman. Ni könöp bölamnöñ nohoi kianğöreñ wahöjalij öngöngöñi möta kinjal. Mianğöra mönö Lazarus melainöñ anda kesöt suñan onöñ kusahöla kaba nesilamne mirii amörima.’

25 “Mewö jiyökmö, Abrahamnöñ melenñök, ‘Nahöni, mönö ki mötmörinöñ anök. Göñon gölmenöñ malmal sösoñgainñambuk lök malnöñ teköyökmö, Lazarusnöñ gölmenöñ malmalñi qemjem-mamñeñ aka malök. Mewö malökmö, nalö kewöñe

* 16:16: Mat 11.12-13 * 16:17: Mat 5.18 * 16:18: Mat 5.32; 1 Kor 7.10-11

urukölalep ak waŋgiinga tatzapmö, göŋön sihimbölö möta wahöjalinŋ qakŋe kinjan. ²⁶ Mewö maljin aiga toroqeba kewö jizal: Anutunöŋ nini aka inŋini sutnine mendenŋa jabö al köhöii ahöza. Mianŋöra tosatŋan jabö qösököba neŋgöreŋök enŋöreŋ kaŋgotpingö mötpeak, mi mönö osime. Mewöyök likep endu maljei, enŋön mewöyök neŋgöreŋ yuhu kaŋgotpingö qaköme.' ²⁷ Mewö jiiga kewö jiyök, 'Iwini, mewö aiga kewö ulet gihizal: Göŋön mönö Lazarus melainöŋga iwinanŋö mire anma. ²⁸ Miri mianŋöreŋ darumunurupni 5 maljei, yeŋön mewöŋanök senjom miri kianŋöreŋ eta sihimbölö ketanŋi mötpepuk. Mianŋöra mönö jinöŋga anda kezapqetok keu jii mötme.'

²⁹ "Mewö ulerökmö, Abrahamnöŋ jiyök, 'Qahö! Mosesgö Köna keu aka kezapqetok ambazip yeŋgöreŋ Buzup Kimbi mi yeŋgö buŋaya ahöza. Keu mia mönö kezap ala mötme!'" ³⁰ Mewö jiiga kewö jiyök, 'O iwi Abraham, mewö qahöpmö, kömukömuŋi neŋgöreŋök kunŋan yeŋgöreŋ anbawak, mewö mönö uruŋini melenŋbeak.' ³¹ Jiiga Abrahamnöŋ kewö jii mörök, 'Yeŋön Moses aka kezapqetok ambazip yeŋgö keugöra kezap qahö alje ewö, mewöŋanök kömukömuŋi neŋgöreŋök kunŋan wahöta keu jibawak, yeŋön mönö töndup Anutu qahö möt narim waŋgibeak.'" Mewö.

17

Sinŋisöndökö kölgorom mönö qetal enŋime.

Mat 18.6-7, 21-22; Mak 9.42

¹ Jisösnöŋ gwarekurupŋi keu kewö jii mötket, "Bölönanŋö supatitikanŋ mönö awamŋanök asuhumakza. Kunöŋ supatitik anŋön kölmamgö osimakzapmö, kun danŋön tosatŋi kölgorom ak enŋiiga sinŋisöndök akŋei, yanŋöra mönö wölziköba 'Yei!' jizal. Sihimbölö öngöŋgöŋan mönö yanŋö qakŋe öngöma. ² Yanŋön ambazip moröŋi yeŋgöreŋök kun kölgorom ak waŋgiiga sinŋisöndök akŋawi, azi mianŋön mönö lömböt öngöŋgöŋi miwikŋaima. Anutunöŋ lömböt mianŋö likepŋi denöwö waŋgiiga dopŋe akawak? Kemuŋ jamönŋinŋ jölŋe jöhöba köwet röndumnöŋ gilget mulumgöi gebawak, mianŋön mönö awamŋi ahum waŋgii tandök akawak.

³ *"Mianŋöra mönö nanŋini galömŋini mem anŋuba malme. Alagi kunŋan sinŋisöndök akzawi, i mönö jim mindinŋ ak waŋgiman. Jim mindinŋ ak waŋginöŋga möt bölim anŋuba wösöŋi mötma ewö, gi mönö sinŋisöndökŋi mosöt waŋgiman. ⁴ Wehöŋ kungö uruŋe sinŋisöndök 7 ak bölim gihiba indimŋi 7 göhöreŋ liliŋgöba kewö jima, 'Alani, ni sinŋisöndök akzalangöra

* 17:3: Mat 18.15

möt bölim anğuzal.' Mewö jima ewö, gi mönö siŋgisöndokŋi mosöt waŋgiman." Mewö.

Mötnaripkö öljı mi kukösumŋambuk.

Mat 17.20; 21.21; Mak 11.23

⁵ Aposol yeŋön Kembugöra jiget, "Mötnaripnini mönö toro-geba mem köhöiman." ⁶ Mewö jigetka Kembunöŋ melenök, "Mötnaripŋinaŋgö öljı mi nejoŋ kötnaŋgö dop ahöbawak ewö, eŋön ölop nömozup ip* kianağöra kewö jim kutubeak, 'Gi mönö jöla jalögabuk wahöta luhuba köwetnöŋ geba nangi kömöta kinman.' Mewö jiba möt narigetka ip mianaŋön mönö keuŋini tem kölma." Mewö.

Welenqeŋe ölöŋi mi denöwö?

⁷ "Eŋgöreŋök kungö nup azinöŋ bulmakau memba nupnöŋ anda kinöŋ öroi gölme mesinma me lama galömnina malma. Mala mire kaŋgori mianağoreŋ toŋan kewö jii mötma me qahöpto, 'Gi mönö mire kota tata nenegi neman.' ⁸ Mewö qahö! Yaŋön mönö kewö jima: 'Gi mönö o ariba möhamgöm anğuba sunğemgö neneŋamni ohoba ala niŋginöŋ nemam. Mianağö andöŋe nangi neneŋamgi ohom neman.' ⁹ Mewö jim kutum waŋgiiga nup aziŋan jiyöhaŋgö dop nupŋi mem teköi dop köliga galömnian mianağöra möpöseim waŋgima me qahö? Qahö! ¹⁰ Eŋgö könaŋini mi mewöŋanök ahöza. Galömninan yuai pakkak jim kutum eŋgiyöhi, iŋini mi ak teköba mianağoreŋ kewö jime, 'Nini nup ambazip töhöna maljin. Galömninan yuaigöra jiyöhi, mönö miyök memba kazinağöra möpömpöseı jarubingö osizin.' " Mewö.

Jisösnöŋ azi 10 silenini mem solaniyök.

¹¹ Jisösnöŋ Jerusalem sitinöŋ anmamgöra Galili aka Samaria prowins yahöt mietkö sutjire köna ahöyöhi, mianağoreŋ anök. ¹² Könanöŋ anda miri kunöŋ anğoriga azi 10 silenini uzikukuŋambuk yeŋön miwikŋaıba eka tikep endu kinget. ¹³ Kında köhöikŋanök qeta jiget, "Ketaŋamnini Jisös, mönö neŋgöra ak kömum gihima!"

¹⁴ *Qeta jigetka eŋgeka kewö jii mötket, "Iŋini mönö jike nup galöm yeŋgöreŋ anda silenini kondel eŋgime." Mewö jiıga tem köla könanöŋ angetka sileninan mianağoreŋ solaniba ölöwahök. ¹⁵ Ölöwahökmö, 10 yeŋgöreŋök kunŋan silenı solanii eka lilingöba kaba Anutu köhöikŋanök qeta möpöseiyök. ¹⁶ Möpöseıba Jisösgö könaŋe geba sipköba simin köla 'Saiwap!' jiyök. Azi mi Samaria azia. Juda yeŋön Samaria prowinsgö ambazip yeŋgöra mötketka eretŋi ahakzapma.

* **17:6:** Jisösnöŋ mulberi ip kun kondelök. Ip mi nömozup ewöya, kötnı köuruk (köwörörök) kötnı ewö neneŋa. * **17:14:** Lew 14.1-32

¹⁷ Saiwap! jiiga Jisösnöŋ melenđa jiyök, “Mi ölop akzanmö, azi pakpak 10 engö sileninan lök solanim teköyök me? Azi 9 mienön mönö denike malje? ¹⁸ Kian azi göjön nangik lilingöba kaba Anutu möpöseizänmö, azi 9 yejön mönö anda nönöngan akze.” ¹⁹ Mewö jiba kewö jii mörök, “Mötnaripkan mönö mem ölöwak gihiza. Mianğöra ölop wahöta anman.” Mewö.

Anutugö bemtohoŋi mi denöwö asuhuma?

Mat 24.23-28, 37-41

²⁰ Farisi (Köna keugö kapanğölköl) yejön Jisös kewö qesim waŋgiba jiget, “Anutugö bemtohoŋ mi mönö wanat nalönöŋ asuhuma?” Jiget möta melenđa kewö jiyök, “Anutugö bemtohoŋan mönö jeninan ekinangö dop qahö asuhuma. ²¹ Mötket! Anutugö bemtohoŋi mi sutŋine uruŋine asuhuba ahöza. Mianğöra mi kianğoreŋ me enduyangöreŋ ahözawi, mewö jibingö osimakzin.”

²² Jisösnöŋ gwarekurupŋi kewö jii mötket, “Könaŋgep nalö kun kam kuŋgumawi, mianğoreŋ Suep gölmegö azi ölnangö nup meme wehönŋi miengöreŋök kun ekingö ak engimapmö, mi kunbuk ekingö osime. ²³ Nalö mianğoreŋ kewö jiget mötme, ‘Mötket! Amötqege Toŋan mönö endu malja. Mötket! Mönö ki asuhuza.’ Mewö mewö jigetka i ekingöra mianğoreŋ ösumok kude luluhuba anme. ²⁴ Mi kewögöra: Suep gölmegö azi ölnan kunbuk kamawi, nalö mi wölbilikö dop kewö akŋa: Mi suep likepŋeyök zilaŋ biliksik ala asariba likepŋe dop köla anjawi, yaŋön mönö mianğö dop asuhuma. ²⁵ Könaŋgep mewö asuhumapmö, mutuk ambazip nalö kewöŋe gölmenöŋ maljei, yejön azi mi yaköriba andö qem waŋgigetka sihimbölo ketanŋi mötma.

²⁶ *²⁶“Mönöwök Noagö nalöŋe ambazipnöŋ malmalŋini qemasolokep qakŋe mala ayuhugeri, mianğö dop mönö Suep gölmegö azi ölnan kunbuk kamawaŋgö nalöŋe mewöyök asuhuma. ²⁷ *²⁷Noagö nalöŋe nene lömbuaŋ ala o köhöikŋi namba ambi kenam bohönangö alget anda kaiga angömeget. Ahakmeme mewö aka memba qemasolokep malgetka Noanöŋ waŋge uruŋe öngöyöhi, silim mianğoreŋ teköyök. Teköiga o göulu ketanŋan kaba ambazip jinonŋi qahö löm köl engii o nemulahöba kömuget.

²⁸ *²⁸“Lotkö nalöŋe mewöyök qemasolokep malgetka mewöŋanök asuhuyök. Ambazipnöŋ nene lömbuaŋ ala o jawat namba nup köl kömöta jike mirinŋi memba qeköm nemi ala yuai bohönŋi memegöra algetka yuai tosatŋi bohönŋi memba malget. ²⁹ Mewö aka memba malgetmö, Lotnöŋ Sodom miri mosöta aniga wehön mianğoreŋök könöp

* 17:26: Jen 6.5-8 * 17:27: Jen 7.6-24 * 17:28: Jen 18.20-19.25

aka köt sömsöm könöpñambuk mi mönö kie ewö suepnöhök eta ambazip jinonñi qahö engohoi kömuget. ³⁰ Könañgep Suep gölmegö azi ölnan kunbuk asuhumawi, nalö miangöreñ ambazipnön mewöñanök qemasolokep aka mala ayuhume.

³¹ “Silim miangöreñ sombemnön malmawañön mönö inap yuaini memamgöra miri uruñe kude öngöma me nupnön anda malmawañön mönö mewöñanök miriñe kude lilingöba kama. ³² Lot anömñan melenða andöñe uba kömumba köt ahöhi, mönö mi mötmörime. ³³* Kunñan malmalñi siyonñsayonñi qahö nanñangöra angnön köla nanñi imbi-imbi malmamgö mötzawi, yanğö malmalñan mönö sohomapmö, kunñan malmalñi nöngöra aka köleñniga sohomawi, yanñön mönö malmal ölnañğö könañi miwikñaiba oyaenñkoyaen malma.

³⁴ “Nöñön kewö jibi mötket: Sunğem miangöreñ azi yahöt dumnön mohotñe ahöyohotka yetköreñök kun wañgita kun mosötme. ³⁵ Mewöyök ambi yahöt mi mohotñe tawenñ urasiba (bunahöba) tatmahori, yetköreñök kun wañgita kun mosötme.” ³⁶ (Azi yahöt nupnön malohotka yetköreñök kun wañgita kun mosötme.)

³⁷ Jisösnön mewö jiiga gwarekurupñan melenða jiget, “O Kambu, mi denikeañgöreñ asuhuma?” Mewö jigetka kewö jii mötket, “Sömbup gisakñan kungen göröken ahömawi, manu köraraknön mönö miangöreñ öröba tokomakzei, mönö miangö dop asuhuma.” Mewö.

18

Malönön kapan köla uleriga azi ketanñan bauköyök.

¹ “Inini mönö nalö dop Anutu köuluköba qemalokolip qahö aka malme.” Jisösnön mewö jiba miangö dopkeuñi kewö jii mötket, ² “Taon kunön keu jimtekötekö azi kun malök. Yanñön ambazip yenğö keugöra gamuñi qahö möta nanñi imbi-imbi mala Anutugö jitñi onğitpilenñbuköra kenğötñi qahö mörök. ³ Taon miangöreñ malö ambi kun malök. Yanñön sundan dop keu jimtekötekö azi miangöreñ anda kewö jiba malök, ‘Kunñan nömbuk anğururuk akzawañgöra göñön ölop bauköm niñgibanak.’

⁴ “Mewö jiiga nalö köröpñi mi möta andö qeba malökmö, könañgep uruñan kewö jiyök, ‘Nöñön ambazip yenğö keugöra gamuni qahö möta nani imbi-imbi mala Anutugö jitñi onğitpilenñbuköra kenğötñi qahö mötzal. ⁵ Mewö maljalmö, malö kianñön mönö keu söksök pöndañ jim niñgiba kamakzawañgöra ölan nöhöiga ölop bauköm wañgibiga keuñi teköma.

* 17:33: Mat 10.39; 16.25; Mak 8.25; Luk 9.24; Jon 12.25

Qahö bauköm wangibileŋjak ewö, yaŋön mönö qösösök kaiga qeriqerinqi mötpileŋbuk.’ ”

⁶ Kembunöŋ kösohot mi mem teköba jiyök, “Jimtekötekö azi goŋgoŋan keu jiyöhi, mönö mianğöra kezap ala könaŋi mötmöriget. ⁷ Anutunöŋ ambazip nanŋaŋöra möwölöhöm enğiyöhi, yeŋön sunğem asak bauköm enğimapköra köulukögetka Anutunöŋ mönö yeŋğö keuŋini kewöta jim teköi ölöwakŋe. Bauköm enğimamğö jiba taŋqaŋ qahö aka nalö qahö könjörari öŋğöma. Mi qahöpmağöp! ⁸ Nöŋön kewö jibi mötket: Anutunöŋ mönö nalö kude köriiga keuŋini kewöta jim teköi ölöwakŋe. Wölaŋ bauköm enğimakzapmö, mi töndup Suep gölmegö azi ölnaŋ liliŋğöba kaba ambazip kewöt enğimawi, nalö mianğöreŋ mötnariŋ ölni miwikŋajima me qahöpto?” Mewö.

Farisi aka takis meme yetkö köulukŋiri

⁹ Ambazip tosatŋan nanŋinaŋğö mötket öŋğöiga solanŋi diŋdiŋi akzin jiba tosatŋi mötketka eretŋi ahök. Jisösnöŋ i enğeka dopkeu kun kewö jii mötket, ¹⁰ “Azi yahötŋan jöwöwöl jikenöŋ öŋğöba köuluköyohot. Kunöŋ Farisi aka kunŋan takis meme azia.

¹¹ “Farisi (Köna keugö kapaŋkölkö) yaŋön kinda nanŋök kewö köuluköyök, ‘O Anutu, ambazip tosatŋan uruŋini goŋgiiga kalöpmağöp aka sero yoŋğorö ahakze, ni yeŋğö dop qahö maljal me takis meme endu kinjawi, ni yaŋğö dop mewöyök qahö maljal. Mianğöra saiwap jim gihizal. ¹² Nöŋön sonda dop sömaŋi yahöt nenegö siŋgi malakzal. Nöŋön moner inapni pakpak mendenğa 10:nöhök mohok Anutugö buŋaya qemakzal.’

¹³ “Mewö köuluköyökmö, takis meme yaŋön wangömqi kunöŋ kinda Suepnöŋ eu umamğö gamuŋi möta böröŋan jeŋi esuhuba kewö köuluköyök, ‘O Anutu, siŋgisöndok azi ni mönö ak kömum niŋgiman.’ ¹⁴ *Nöŋön kewö jibi mötme: Yaŋön mönö Anutugö jeŋe solaniba miriŋe liliŋğöyökmö, Farisi (Köna keugö kapaŋkölkö) yaŋön mewö qahö. Denike yeŋön nanŋini uruŋini memba öŋğömei, Anutunöŋ mönö i körek memba et al enğimapmö, kunŋan nanŋi uruŋi memba etmawi, Anutunöŋ mönö i memba öŋğöba al wangima.” Mewö.

Jisösnöŋ nahönbörat kötuatköm enğiyök.

Mat 19.13-15; Mak 10.13-16

¹⁵ Ambazip tosatŋan nahönbörat morömorö mewöyök enğuaŋgita Jisösnöŋ böröŋan enğimisirimapköra yaŋğöreŋ kaget. Kagemö, gwarek yeŋön mi eka jim qetal ak enğiget. ¹⁶ Mewö aketmö, Jisösnöŋ nahönbörat mi köl öröm enğii kagetka kewö

* 18:14: Mat 23.12; Luk 14.11

jiyök, “Nahönbörat moröni mi ölop engömosötketka nöngören kame. Anutunöy ambazip mewö mia bemtohoji buja qem engima. Mianjöra i kude jöhöm engime. ¹⁷ Nöñön keu ölni kun kewö jibi mötme: Kunjan Anutugö bemtohoji mi nahönbörat ewö buja qahö qem angumawi, yañön mönö mianjö uruñe angotmamgö osima.” Mewö.

Jisösnöy azi pomñi kungö qambañ keu jiyök.

Mat 19.16-30; Mak 10.17-31

¹⁸ Galömkölköl azi kunjan Jisösgören kaba kewö qesim wañgiyök, “Böhi ölopñi, nöñön mönö denöwö aka malmal köhöikñañgö buja qem angubilenak?”

¹⁹ Qesim wañgiiga kewö jii mörök, “Gi nöngöra ‘Böhi ölopñi’, mi wuanöngöra jizan? Anutu mohotjan ölopñi akza. Azi kunjan i ewö ölopñi qahö akza. ²⁰ *Gi jöjöpañ keu ki möt teközan, ‘Sero yoñgorö kude akñan, Ambazip kun kude qenöy kömuma, Yoñgorö kude meman, Jitnöy alal keu kude jiman, Iwinamgi mönö göda qem etkimakñan.’ ”

²¹ Mewö jiyökmö, galömkölköl azinöy kewö jiyök, “Mi pakpak mönö gwaböneyök tem köla mala kotzal.” ²² Jii Jisösnöy möta kewö jii mörök, “Mohot-kungöra kewö osizan. Gi mönö anda sukinapki pakpak söngöröñi memegöra alnöy moneñ kaiga menñenda ambazip wanapñi engiman. Mewö aknönga sukinapki ketañi (guli masapu, milyön kina ewö) mi Suep mire ahöm gihima. Mewö aka ni nuatañgöba kaman.” ²³ Mewö jiyökmö, azi mianjön kindinbirik malöhañgöra aka keu mi möta wösöbirik aka jeñi asöliiga öne mosöta anök.

²⁴ Wösöbirik ahöhi Jisösnöy mi eka kewö jiyök, “Yei! Ambazip moneñ inapñinambuk yeñön mönö Anutugö bemtohoñnöy angotpingö lömböriba kupuk-kapak akñe. ²⁵ Mi kewö jim tuarimam: Sömbup ketañi kamel mi kondi kinimñe ölop qahö angotma. Mianjö dop ambazip pomñi yeñön Anutugö bemtohoñ uruñe angotpingö lömböriba qaköme.”

²⁶ Keu mi jii mötkeri, yeñön kewö jiget, “Opopon! Ambazip dañön mönö Suepkö buñaya akawak?” ²⁷ Mewö jigetka kewö melenök, “Ambazipnöy mi esapköba osiba qakömakzemö, Anutunöy mönö yuai pakpak ölop ahakza. Yañön yuai kun aka memamgö qahö osiba qakömakza.”

Jisösgö nup memegö töwanji

²⁸ Pitönöy keu mi möta melenña kewö jiyök, “Mötnöy, neñön mönö miri gölmenini mosöta gi guatañgöba kain.” ²⁹ Mewö jiiga Jisösnöy kewö jii mötket, “Nöñön keu ölni kun kewö jibi mötme: Kunjan Anutugö bemtohoñañgöra aka yuai kun mosörohü, - mi miri gölmenji, anöm-moröñi, darumunji me

* 18:20: Eks 20.12-16; Dut 5.16-20

iwinamñi - mi enğömosöriğa ³⁰ Anutunöñ mönö salupñe toroqeba oñgita likepñi melen wañgiğa mi gölmegö malmalnöñ mema aka malmal könanğepñe malmal köhöikñi teteköñi qahö buña qem aņguma.”

Jisösnöñ kömumamğö keuñi jiğa karöbut ahök.

Mat 20.17-19; Mak 10.32-34

³¹ Jisösnöñ gwarekurupñi 12 mi öröm enğii kagetka kewö jiyök, “Mötket, nini Jerusalem öngöbin. Kezapqetok ambazipnöñ Suep gölmegö azi ölnağöra keu pakpak ohogeri, mi mönö ölnambuk ak teköma. ³² Kunöñ i mamalolo mem wañgiğa kian gawman yeñgö böröñine gema. Yeñön jiji-wilit aka mepaiköba keu töhöreñ jim wañgiba söutkölap qeme. ³³ Söutkölap qeba ihilek wahıñambuknöñ tauköm wañgiba qeget kömuma. Kömumba wehön karöbut aiga kömupnöñök wahötma.”

³⁴ Mewö jiyökmö, gwarek yeñön keu mi qahöpmañöp möt asariget. Keu jiyöhi, mi asa-asambötñe ahöiğa mi qahö möt kutuget. Mewö.

Jisösnöñ jegömöl azi kun mem ölöwahök.

Mat 20.29-34; Mak 10.46-52

³⁵ Jisösnöñ anda Jeriko mire dopdowiğa jegömöl azi kunñan nene moneñ wañgimeğöra uleta köna jıtñe tarök. ³⁶ Tariga ambazip kambu könanöñ oñgita angetka kourukñini möta “Wanat yuai asuhuza?” jiba qesim enğiyök.

³⁷ Qesim enğiiğa kewö jiget, “Jisös, Nazaret azinöñ mönö könanöñ kaba goñgitmamğö akza.”

³⁸ Jigetka kewö qerök, “Jisös, Deiwidkö gwölönarökñi! Gi mönö ak-kömum niñgiman!”

³⁹ Mewö qeriga ambazip mutuk angeri, yeñön bök tatmapköra qetal wañgigetmö, yañön kapan köla qet gigilahöyök, “Deiwidkö gwölönarökñi! Gi mönö ak-kömum niñgiman!”

⁴⁰ Qet gigilahöiğa Jisösnöñ dörök ala kewö jim kutuyök, “I mönö böröñe memba nöngöreñ kame.” Jiğa memba dowe kañgotketka kewö qesim wañgiyök,

⁴¹ “Alani! Gi mönö wani yuai ak gihimamğöra mötzan?” Qesim wañgiğa jiyök, “Kembu! Ni jeni kunbuk umamğöra mötzal.”

⁴² Jiğa Jisösnöñ kewö jii mörök, “Mönö jegi unöñ. Mötnaripkan mönö mem ölöwak gihiza.”

⁴³ Mewö jiğa miangöreñök jeñi tohoiğa törörök uba Anutu möpöseiba Jisös wuatangöba andöñe anök. Ambazip pakpak yeñön yuai mi eka Anutu möpöseiget. Mewö.

19

Zakiusnõḡ uruḡi melenõk.

¹ Jisõsnõḡ Jeriko taonõḡ kaḡgota kutuba anmamgõ ahõk. ² Mianḡõrenḡ azi kun qetḡi Zakius malõk. Yanõn azi pomḡi aka takis meme yeḡgõ jitḡememenḡina malõk. ³ Yanõn Jisõsgõ kaisõḡgolomḡi ekḡamgõ ak waḡḡiyõkmõ, azi tõrõptõkḡaḡgõra ambazip kambu sutḡine kinda kõkõriba osiyõk. ⁴ “Jisõsnõḡ ki kaba neḡḡõḡgitma,” jiget mõta ekḡamgõra õsumõk anda ambazip enḡõḡgita sikamore ip* qakḡe õḡḡõba tarõk. ⁵ Tari Jisõsnõḡ mianḡõrenḡ aḡgota jeḡan ui õḡḡõi eka yaḡgõra kewõ jiyõk, “Zakius, gi mõnõ õsumõk etnõḡ. Ni merak gõhõ mire kabi mohotḡe tatpit.”

⁶ Mewõ jiiga õsumõk eta sõḡgaiba kõl õrõm waḡḡiiga miriḡe anohot. ⁷ Anohotka ambazip kõreḡḡan mi eka irikuruk aka kewõ jiget, “Mõnõ wuanõḡgõra siḡḡisõndok azi mewõḡaḡgõ mire õḡḡõba tatza?”

⁸ Mewõ jigetmõ, Zakiusnõḡ ambazip sutḡine aukḡe wahõta kinda Kembugõra kewõ jiyõk, “Kembu mõtnõḡ, nõḡõn ainemalukuni bibiḡe mendeḡda likeḡḡi ambazip wanapḡi yeḡgõra enḡimam aka denike yeḡgõrenḡ õrõyuaḡi kun dop õḡḡita tilipqilip aka waḡḡirali, mi mõnõ ambemḡi 4:gõ dop toroqeba melenḡda enḡimam.”

⁹ Mewõ jiiga Jisõsnõḡ yaḡḡõ kõnaḡaḡgõra kewõ jiyõk, “Anu-tunõḡ merak miri kianḡõ tonḡi amõt qem waḡḡii letotza. Yanõn mewõyõk Abrahamgõ gwõlõnarõkurupḡi yeḡḡõ sutḡine malja. ¹⁰ *Suep gõlmegõ azi õlḡan mõnõ ambazip sohogeri, mi jaruba amõt qem enḡimamgõra aka erõk.” Mewõ.

*Moneḡ esu 10 mendeḡda enḡiyõk, mianḡõ dopkeu.**Mat 25.14-30*

¹¹ *Jisõsnõḡ kaba Jerusalem siti dopdowiba keuḡi jii ambazip mi mõtkeri, yeḡõn kewõ mõtmõriget, “Anutugõ bem-tohoḡaḡgõ õlḡan zilaḡ asuhuma.” Mewõ mõtmõriganḡõra Jisõsnõḡ dopkeu kun kewõ jiyõk, ¹² “Azi qetbuḡaḡambuk kunḡan kewõ jiyõk, ‘Ni mirini mosõta kantri kunõḡ kõrõwen anbiga mianḡõrenḡ ni kiḡ kembu kuḡḡum niḡḡigetka mala lilingõba kamam.’ ¹³ Mewõ gõlme kõrõwen anmamgõ jiba nup aziurupḡi 10 enḡoholi kagetka moneḡ esu 10 mendeḡda enḡiba kewõ jiyõk, ‘Nõḡõn anda mala bianḡ lilingõba kamam. Enõn nalõ sutḡe kianḡõrenḡ moneḡ kianõn kõlkõl-õrõrõ nup memba mem sehime.’ ¹⁴ Mewõ jiba anõkmõ, kõnagesõurupḡan kazik ak waḡḡiba kewõ jiget, ‘Nini azi kianõn nanine azi kembu aka

* 19:4: Sikamore mi kõwu ewõya, kõtḡi neneḡa.

* 19:10: Mat 18.11

* 19:11:

Mat 25.14-30

galöm köl neŋgimapkö töközin.’ Mewö jiba welen azi tosatŋi melaim eŋgiget andöŋe anda buzup mi jiget mörök.

¹⁵ “Mewö mörökmö, töndup kantri anök, mianğöreŋ yeŋön i azi kembu kuŋgum waŋgigetka nanŋi prowinsnöŋ kunbuk liliŋğöba kayök. Kaba nup aziurupŋi moneŋ esu eŋgiyöhi, mi jiiga yaŋğö jeŋe kaŋgotket. Mohot mohot yeŋön kölköl-örörö nup memba moneŋ mem sehigetka dawik asuhuyöhi, mi kondelget ekŋamğöra qesim eŋgiyök. ¹⁶ Nup azi mutukŋan jeŋe kaŋgota jiyök, ‘Kembu, nöŋön moneŋ esugi mem sehibiga toroqeba kunbuk esu 10 miwikŋaijal.’

¹⁷ “Mewö jiiga kewö jii mörök, ‘Mi ölop. Gi nup meme azi ölopŋi. Gi yuai morörökŋi memba mi kapankapan aka galöm köla malnöŋga sehiyök. Mianğöra nöŋön taon gölme 10 mindiriba göhö böröge albi yeŋğö galömŋina malman.’ ¹⁸ Mewö jiiga nup azi alañan jeŋe kaŋgota kewö jiyök, ‘Kembu, nöŋön göhö moneŋ esugi mem sehibiga toroqeba kunbuk esu 5 miwikŋaijal.’ ¹⁹ Mewö jiiga yaŋğöra mewöyök kewö jii mörök, ‘Mi ölop. Nöŋön taon gölme 5 mindiriba göhö böröge albi yeŋğö galömŋina malman.’

²⁰ “Kunbuk kuŋŋan kaŋgota jiyök, ‘Kembu eknöŋ. Göhö moneŋ esugi ki. Mi oponöŋ esuhuba lolongöbi ahöyök. ²¹ Göŋön azi könöpŋambuk akzanaŋğöra aka göhöra keŋğötni möta malal. Gi nangak inap yuai köwenöŋ qahö alnöŋi, mia töndup memamğö mörakzan. Gi nangak nene kötni qahö kömötnöŋga asuhuyöhi, mianğö ölni mi töndup yandiba memamğö mörakzan.’

²² “Mewö jiiga melenđa kewö jim waŋgiyök, ‘Gi nup azi bölöŋi. Nangak keu jizani, nöŋön mianğö dop kewöt gihiba likepŋi melen gihimam. Ni azi könöpŋambuk akzal. Nanak yuai köwenöŋ qahö ala mi memamğö mörakzal. Nanak nene kötni qahö kömöta mianğö ölni mi töndup yandiba memamğö mörakzal. Mi ölop möta malnöŋ. ²³ Gi könani mewö mötagun mönö wuanöŋğöra moneŋ esuni mi benknöŋ qahö alnöŋga qariyök. Mi kölköl-örörö nupnöŋ albanak ewö, mianğön mönö sehiiga nöŋön kaba suŋambuk membilenak.’

²⁴ “Mewö jiba azi kösutŋe kingeri, mi kewö jii mötket, ‘Inini mönö yaŋğö böröŋeyök moneŋ esuŋi mi waŋgita esu 10 miwikŋaiyöhi, i waŋgime.’ ²⁵ Jii möta kewö jiget, ‘Kembu, yaŋğöreŋ moneŋ esu 10 mi lök ahöza!’ ²⁶ *Mewö jigetka melenđa jiyök, ‘Nöŋön kewö jibi mötket: Ambazip yuai ahöm eŋgizawi, yeŋğöra körek mönö mi toroqem eŋgigetka sehimapmö, kungöreŋ yuai kun qahö ahözawi, morörökŋi mia mönö mewöyök waŋgitketka öne töhön malma.’ ²⁷ Mewö jizalmö, kerökurupnan nöŋön kiŋ kembu aka galöm köl

* 19:26: Mat 13.12; Mak 4.25; Luk 8.18

enġimamgö tökögeri, i mönö enġuanġita kagetka enġeka jim kutubi enġugetka kömume.’ ” Mewö.

Jisösgöra köiraġ kölgetka Jerusalem öngöyök.

Mat 21.1-11; Mak 11.1-11; Jon 12.12-19

²⁸ Jisösnöġ keu mi jim teköba mosöta Jerusalem sitinöġ öngömamgöra mutuk anök. ²⁹ Anda Betfage aka Betani miri yahöt kösutġire kaba kundunġi qetġi Oil ip kundunġi qerakzei, mianġöreġ öngöba gwarekyahötġi yahöt melaim etkiyök. Melaim etkimamgö aka ³⁰ kewö jiyök, “Miri wösöġire tatzawi, mönö mianġöreġ anmahot. Anda mianġöreġ anġota donġi moröġi kösönöġ jöhöget kinjawi, mi miwikġaimahot. Donġi mi dölökġa, azi kunöġ qakġe qahö tatatġa. Mi mönö pösata memba ki kamahot. ³¹ Pösarohotka kunġan ‘Mi wanigöra pösatzahot?’ jiba qesim etkiġa kewö jimahot, ‘Kembuniran mianġöra osiza.’ ”

³² Mewö melaim etkiġa anda jiyöhanġö dop miwikġaiyohot. ³³ Miwikġaiba donġi moröġi pösatpitkö ahotka tonġan jiget, “Hei! Donġi moröġi mi wanigöra pösatzahot?”

³⁴ Jigetka kewö melenġohot, “Kembuniran mianġöra osiza.” ³⁵ Mewö jiba memba Jisösgöreġ kaba malukuġini qeköba donġi qakġe tumbula jigetka Jisösnöġ öngöba tarök. ³⁶ Mewö tata anġa ambazip kambu yeġön göda qeba opo malukuġini qeköba köna namġe tumbulget.

³⁷ Tumbulgetka anda Jerusalem dopdowiba Oil ip kundunġangö sörokġe geġa gwarek kambu pakpak yeġön könahiba söġgaiba anġöletot pakpak kukösum qakġe mei ekeri, miengöra qet ketanġi qeta Anutu möpöseim wanġiba ³⁸ *kewö jiba qetket, “Anutu möpöseizin. Kiġ Kembugö qetġe kamawi, Anutunöġ mönö i kötuetsköma. Luaġi aka qetbuġagi möpöseininga Suepnöġ euyangöreġ öngöza. Owe owe!”

³⁹ Mewö qetketka Farisi (Köna keugö kapanġölköl) tosatġan ambazip kambu sutġine kinda kewö jim wanġiget, “Böhi, mönö gwarekurupki jim enġinöġ.” ⁴⁰ Mewö jim wanġigetka kewö melenök, “Nöġön kewö jibi mötme: Yeġön göröġ kin-beak ewö, köt yeġön mönö silata qetpeak.” Mewö.

Jisösnöġ Jerusalem sitigöra sahörok.

⁴¹ Jisösnöġ Jerusalem dopdowiba siti mi eka sahörok. ⁴² Sahöta kewö jiyök, “Enġöreġ luai denöwö ahubawak! Inġini mianġö könanġi wehön kianġöreġ möt kutugetka dop kölbawakmö, nalö kewöġe mi jeġini qahö tohozawanġöra aka tölapġe ahöza. ⁴³ Mianġö könanġi kewö: Nalö kun kam kuġumawi, mianġöreġ kerök yeġön kanġota kiripo köhöikġan siti ki kuġum liliköba likeplikep eu emu kinda gwan ala

* 19:38: Sum 118.26

kahasililin ak engime. ⁴⁴ Anutunöŋ mesohol köla engoholiga injini nalö bohonji mi qahö möt kutuba nesampurek aka Anutu andö qeba laŋ mala kotzei, miangöra kerök yeŋön köndenmönden engigetka mirigö köt kun mi köt kungö qakŋe qahö kinmapmö, siti kianön mönö qeqelanlaŋ ahöma. Yeŋön jike mirinini köndenja moröurupŋini siti uruŋe maljei, mi engum ureime.” Mewö.

Jisösnöŋ jöwöwöl jike jim kömbuhiyök.

Mat 21.12-17; Mak 11.15-19; Jon 2.13-22

⁴⁵ Jisösnöŋ keu mi jim teköba jöwöwöl jikegö tohoŋ uruŋe anda inap bohonji memegöra algeri, mi könahiba közöl engiiga etket. ⁴⁶ *Közöl engiba kewö jii mötket, “Aisaianöŋ keu kun kewö ohoi ahöza, ‘Nöngö jikenan mönö köulukö mirinina akŋa.’ Keu mi ahözapmö, injini mi utekögetka kegwek-kahasililin yeŋgö baŋet ewö akza.”

⁴⁷ *Jisösnöŋ nalö dop jöwöwöl jikenöŋ öngöba Buŋa keu kusum engiba malök. Mewö malökmö, jike nup galöm aka Köna keugö böhi yeŋön tokoba kantri jike kaunsöl yembuk eraum möta kewö jiget, “Mönö denöwö jiinga qegetka kömumbawak?” ⁴⁸ Mewö jigetmö, ambazip kambu pakpak mienön yambuk qekötahöba Buŋaŋi kezap ala mötket. Miangöra “Mönö denöwö akinak?” jiba köna kun qahö mi-wikŋaiget. Mewö.

20

Jitŋememe yeŋön Jisösgö kukösumŋaŋgö qesiget.

Mat 21.23-27; Mak 11.27-33

¹ Jisösnöŋ jöwöwöl jikenöŋ öngöba ambazip kambu kusum engiba Ölöwak Buŋa jim asarim engiba malök. Nalö kunöŋ mewö aiga jike nup galöm aka Köna keugö böhi yeŋön kantrigö jitŋememe tosatŋi yembuk Jisösgö jeŋe kaŋgotket. ² Kaŋgota kewö qesim waŋgiget, “Gi kiangören yuai akzani, mi mönö daŋön jim kutum gihiiga ahakzan? Miangö kukösumŋi mi daŋön gihiyök? Mi jinöŋga mötpin.”

³ Qesim waŋgigetka kewö melen engiyök, “Nöŋön mewöyök qesim engibi mi jiget mötmam. ⁴ Jonöŋ ambazip o-melun mem engiba malöhi, yaŋön miangö kukösumŋi mi denikeyök meyök? Suep Toŋaŋ waŋgiyök me gölme toŋaŋ waŋgiget?”

⁵ Mewö melen engiiga sutŋine eraum möta kewö jiget, “ ‘Kukösumŋaŋ Suepnöhök asuhuyök,’ mewö jibin ewö, yaŋön mönö kewö jima, ‘Mewö aiga injini i mönö wuanöngöra qahö möt narim waŋgiget? Mi qahö dop kölja.’ ⁶ Könagesö pakpak yeŋön Jongöra ‘Kezapqetok azia akza,’ jiba mi köhöikŋanök

* 19:46: Ais 56.7; Jer 7.11 * 19:47: Luk 21.37

möt nariba malje. Mianğöra ‘Gölme ambazipnöhök asuhuyök; jibin ewö, yeñön mönö irimñini seholiiga kötnöñ neñgume.’
 7 Keu mewö kewöta kewö melenget, “Kukösumñan denikeyök ahuyöhi, nini mi qahö mötzin.”

8 Mewö melengetka Jisösnöñ kewö jii mötket, “Mewö aiga nöñön mewöyök yuai ki ahakzalañgö kukösumñi dañön niñgiyök, mi qahö jibi mötme.” Mewö.

*Wain kösö nup galöm bölöñi, mienğö dopkeu
 Mat 21.33-46; Mak 12.1-12*

9 *Jisösnöñ könahiba ambazip dopkeunöñ kewö jii mötket, “Azi kunñan wain kösö nup köla kömörök. Köl kömöta nup galöm tosatñi miwikñaim eñgiba jiiga nupñi memba ölnağö bahöñi nanñini memba bahöñi tonji wañgimeğöra böröñine alök. Böröñine ala eñgömosöta kantri kunöñ anda nalö köröñni malök.

10 “Mala mali ölni öliyöhanğö nalöñi (yambu 5) töriiga mianğöreñ welenqeçeñi kun melaim wañgiiga galöm yeñgöreñ anda wain nup ölnağö bahöñi wañgimeğöra jiyök. Jiyökmö, nup galöm yeñön i kömbinöñ qeba wuatanağögetka böröñi börak lilingöyök. 11 Mianğö andöñe welenazi kun melaim wañgiiga anökmö, i mewöyök kömbinöñ qeba gamu qem wañgiba wuatanağögetka böröñi börak lilingöyök. 12 Lilingöiga nup toñan welenazi kun kunbuk melaii aniga ambemñi karöbut ahökmö, i mewöyök sepgwörörök qeba nup yaigepñe gilget geyök.

13 “Mewö aketka wain nup toñan keu jaruba jiyök, ‘Mönö denöwö akñamto? Nani wölböt nahöni mönö melaibiga ani i eka göda qeme me denöwö?’ 14 Mewö jiba nahönñi melaiiga anökmö, wain nup galöm yeñön i eka sutñine kewö eraum möta jiget, ‘Yañön mönö börösamotñağö tonji akña. Ayop, i mönö qein kömuiga wain kösö nup kianñön mönö nanine buñanina akña.’ 15 Mewö jiba gilgetka nup yaigepñe geiga qeget kömuyök. Wain nup toñan mi möta mönö denöwö ak eñgima?

16 Yañön mönö nanñak kaba nup galöm mi könden eñgima aka nup galöm döläkñi miwikñaim eñgiba wain kösö nupñi yeñgö böröñine alma.” Jisösnöñ dopkeu mewö jii möta jiget, “Mi qahö dop kölja. Yapmakek!” 17 *Jigetmö, Jisösnöñ i törörök eñgeka kinda kewö jiyök, “Buña Kimbigö keu kun kewö ahöza, ‘Miri meme yeñön köt tandö kun andö qeba öne mosötket taröhi, mianñön mönö tandö kömbönañi aiga miwikñaiget.

Mianñön tiñgiriga mirinöñ mönö gororonağöba eta kölma.’ Keu mianğö könañi denöwö?

18 Mianğöra kewö jibi: Kunñan tandö bohonñi mianğören tötöngata eta qemawi, mi mönö silenñi kutumutumapmō, ain tandö mianğön jöla tala kungö qakñe eta kölmawi, mi mönö körek qözömözözamğöma.”

19 Jisösnöñ mewö juiga Köna keugö böhi aka jike nup galöm yeñön keu mianğö könañi möt asariba kewö jiget, “Dopkeu mi mönö neñğöra jiza.” Mianğöra i nalö mianğörenğök memba jöhöbingö mötketmō, ambazip kambu yeñğöra keñğötñini möta osiget. Mewö.

Takis alalgö Jisös esapköm wañgiget.

Mat 22.15-22; Mak 12.13-17

20 Juda jitñememe yeñön Jisösgö jegalöm meget. Mewö memba keunji kun qiwitipkōi keugö bötaknöñ örōi gwaröhöm wañgimeğöra aka azi tosatñi melaim engiget yañğörenğaget. Opotöröp aka premiö yeñğö böröñine al wañgibingö möta Buña keu ölöpnñi jiji tandök aka qesiba keuñangö kezap alget.

21 Aren mewö ala qesiba kewö jiget, “Böhi, nini göhö könagi mötzin. Göñön keu diñdiñi jiba kusum neñgimakzan. Göñön ambazip tosatñi qahö engek soriba tosatñi qahö qepureim ençgimakzanmō, dop mohotnöñ kewöt neñgimakzan. Mewö aka Anutugöreñ köna mi keu ölnangö dop kusum neñgimakzan. 22 Mianğöra nini sisa-kingöra takis ala mianğön Mosesgö Köna keu siñgibin me qahö?”

23 Mewö jigetmō, Jisösnöñ isimkakalek arenini möt kutuba kewö jii mötket, 24 “Ölöp silwö moneñ (Kina 5) kun kondel niñgigetka eki. Dagöreñ imut aka qet mi mianğöreñ ohoget ahöza?” “O, mi sisa-kingöreñ,” mewö melenđa jiget.

25 Jigetka kewö jii mötket, “Mewö aiga yuai sisa-kingö imutñambuk buñañi akzawi, mi mönö yañğöra al wañgime. Yuai kun Anutugö buñaya akzawi, mi mönö Anutugö buña qeme.” 26 Jisösnöñ mewö jiyöhanğöra ambazip kambu yeñğö jeñjine keugö bötaknöñ al wañgibingö osiba keuñangöra welipkōba keu bök kinget. Mewö.

Kömupñöhök wahötwahötkö Jisös esapköm wañgiget.

Mat 22.23-33; Mak 12.18-27

27 *Sadyusi böhi pati yeñön “Kömugeri, yeñön kude wahötme,” jiba malget. Yeñğörenğök tosatñan Jisösgö jeñe kañgota kewö qesim wañgiba 28 *jiget, “Böhi, Mosesnöñ kewö jim kutum neñgiyök ahöza, ‘Azi kun ambi meiga nahönbörat qahö ahui kömuiga munñan ölöp malöñi memba mala gwölönarök qiwikñaim wañgiiga datñangö qet bisiba malma.’

* 20:27: Apo 23.8 * 20:28: Dut 25.5

29 “Mötnöñj! Nalö kunöñ darumun 7 malget. Datñini mutukñan ambi memba mala gwölöñarökñi qahö öne mala kömuyök. 30 Kömuiga munñan malöñi mi meyök. 31 Mianğö andöñe munñi kunñan ambi miyök meyök. Mewöña mewö darumun 7 pakpak yeñön ambi mohok miyök memba gwölöñarök qahö mala kömum teköget. 32 Kömugetka tekögetka qöndökñi malöñini mi mewöyök kömuyök. 33 Göñön ‘Kömugeri yeñön guliba wahötme,’ jizanmö, nini mi qahö möt narizin. Mötnöñ, azi 7 pakpak mi öröröñ wahötpeak ewö, ambi mohok mi anömñina meget malöhañğöra aka mönö dagö anömña akawak?”

34 Mewö jigetka Jisösnöñ kewö melenñök, “Nalö kewöñe gölme kianğoreñ ambazip awanöm aka malahakze. 35 Mi malahakzemö, ambazip uruñini melengetka Anutunöñ eka möri dop köliga kömupñöhök wahöta miri gölme kun eu-yanğoreñ anğota malmei, yeñön mianğoreñ qahö amime.

36 “Mianğö könañi kewö: Mötnarip ambazip guliba kömupñöhök wahötmei, yeñön Anutugö nahönböraturuñi akze. Yeñön Sup garata tandök ewö aka kunbuk qahö kömumemö, teteköñi qahö mal öngöme. 37 *Mötket! Kömugeri, yeñön guliba wahötmegö keuñi mi Mosesnöñ mewöyök nañğöba jiyök. Ip köhösonöñ könöp bölam ahuba qahö jem kutuyöhi, yanğön mi eka kösohotñi ohoi mianğoreñ keu kewö ahöza, ‘Nöñön Anutu Abrahamğö Kembu, Aisakö Kembu aka Jeikobkö Kembuya mala kota maljal.’ 38 Isik bömön karöbut yeñön Anutubuk mala mal köhöiba öngöme. Körek köhöiba maljei, yeñön mönö malmalñini Anutugöra malje. Mianğöra Anutunöñ köhömuñi yeñö Kembuñini qahöpmö, malmal köhöikñi maljei, mönö yeñö Kembuñina akza.”

39 Jisösnöñ mewö melenñiga Köna keugö böhi tosatñan melenđa kewö jiget, “Böhi, mi törörök jizan.” 40 Mewö jiba keu kun kunbuk qesim wañğibingö kölköldömdöm aka mosötket. Mewö.

Kraist mi kiñ Deiwidkö Kembuñi aka gwölöñarökñi.

Mat 22.41-46; Mak 12.35-37

41 Jisösnöñ keu kun kewö jii mötket, “Kraistnöñ Kiñ Deiwidkö gwölöñarökñi akzawi, tosatñan keu mi denöwögöra jimakze? 42 *Deiwidnöñ nanñak keu kewö jiiga Sumbara (Buña liñet, sam) Kimbinöñ ahöza,

‘Anutunöñ kinda nöñğö Kembuni kewö jii mörök, Göñön mönö kaba nöñğö böröni ölñe tatnöñga

43 nöñön nalö sutñe kerökurupki tim tötala luhut al enğiba göhö köna tambö gwaröñe al enğimam.

Nalö mi kam kungumawanğö dop mönö asakmararanğö ki tatman.'

⁴⁴ Deiwidnön mewö jiba qetnji 'Nöngö Kembuni' jiza. 'Kembuni' jiba mönö denöwö aka yangö gwölönarökñi mohot akawak?" Mewö.

Urumelengö silesile malmalgö galöm meme keu

Mat 23.1-36; Mak 12.38-40; Luk 11.43

⁴⁵ Jisösnön gwarekurupñi yeğöra keu kewö jiiga ambazip kambu pakpak mi mötket, ⁴⁶ "Köna keugö böhi yeğöra mönö galömñini memba malme. Yejön maluku köröpñi löngöta anda kaba kondel anğubingö mörakze. Maketnön me könanön ambazip enğeketka jölönjini jimegö mörakze. Mewöyök köuluk mire qaikñe eu tatpingö sihimñi mörakze aka közölömbuanğö dum tatat mutukñe jegep tatpingö mörakze. ⁴⁷ Yejön malö yeğören miri yuai bidanđa gagabe köla enğuanğirakze aka qetbuñjini asuhumapköra köuluk köröpñi köuluköba töptöpñine gemakze. Mianğöra Anutunön keuñini jim teköba likepñi öngöngönjine melenjine qakñine öngöma." Mewö.

21

Ambi malö kunñan naluk kötin ölni alök.

Mak 12.41-44

¹ Jisösnön kinda ui ani ambazip pomñi yejön nalukñini mi naluk dundumñe alget geyök. ² Alget geiga ambi malö wanapñi kunñan kaba souje kötni pisikñi yahöt ali geyöhi, mi mewöyök ehök. ³ Mi eka kewö jiyök, "Nöjön keu ölni kun kewö jibi mötket: Malö wanapñi kianğon naluk aljawi, mi mönö tosatñi pakpak enğonğita alja. ⁴ Mianğö könanj keuwö: Körek yejön monen ketanj ahöm enğiiga kitipñanöhök aljemö, ambi kianğon köruebörue maljawanğö dop yuainj pakpak al teköba öne töhön malma." Mewö.

Jöwöwöl jikenön köndermönder asuhuma.

Mat 24.1-2; Mak 13.1-2

⁵ Jerusalem jöwöwöl jike mi köt eksihimñambuk aka kalemñi kalemñi Anutugöra algeri, mianğon menölögetka aködamunñambuk ahöyök, gwarek tosatñan mi eka eraum mötketka Jisösnön keu kewö jii mötket, ⁶ "Miri ki enğekzei, mi mönö köndergetka mirigö köt kun mi köt kungö qakñe qahö ahömappmö, qeqelanñan aka sahopñanök ahöma."

Kahasililij aka sesewerowero asuhuma.

Mat 24.3-14; Mak 13.3-13

⁷ Mewö jiiga möta qesim wangiget, "Böhi, keu jizani, mianğö ölni mönö wanat nalönön asuhum tingitma aka asuhumangö akñawi, mianğö aiwesökñan mönö denöwö asuhuma?"

⁸ Qesim wangetka kewö jiyök, “Kunjan isimkakalek aiga janjan anbepekora mönö galömjini memba malme. Ambazip gwötpukjan asuha nongö qetne kewö jime, ‘Nöhön Kraist akzal,’ aka, ‘Nalönöh mönö töriza.’ Mewö jimemö, enjön mönö yengö andöhine kude anme. ⁹ Yarö aka karimji karimji asuhugetka ötöhini mötmemö, jönömjini kude unduma. Yuai mi mutuhök asuhumapkö jijina. Mi asuhumapmö, gölmegegö nalöjan mönö miangörenök zilan qahö teköma.”

¹⁰ Mewö jiba toroqeba kewö jii mötket, “Kantri kunöh kantri kun engubingöra wahötme. Ambazip kambu kunöh kambu kun yembuk aröh angubingöra wahötme. ¹¹ Gölmeji gölmeji miangören kenöh ketani ketani qözöla memba gölme melenji gemakja. Mewöyök bödiñi bödiñi (buöröhji buöröhji) asuha öngöba ahöma. Kawöl köhöikñi köhöikñi mienön asuhugetka sesegilgil kömumakje. Suepnöh aiwesök ketani jemurutñi murutñi engeka kenöt kotkot akje.” Mewö.

Ölöwak Buñagöra kerök asuhuma.

Mat 24.9-14; Mak 13.9-13

¹² “Yuai pakpak mi asuhumemö, mutuk qeljine tosatjan injini urunjini melengerangöra aka engömemba jöhöba sesewerowero ak engime. Tosatjan öröm engiba köluluk mirijine keu nupñini memba jim tekögetka kösö miriji miriji miangören al engime. Tosatjan nongö qetnangöra aka enguangetketka kantriji kantriji yengö kin kembu aka premiö yengö jemesoholjine kinme. ¹³ Mewö kinda nongö könanamni nangöba jigetka mötme. ¹⁴ *Keu jakeje al engigetka kinmei, nalö miangören keu denöwö jibinak, miangö waimanjatñi qeljine kude mötme. Keu mi mönö urukönömjine algetka ahöma.

¹⁵ “Mi kewögöra: Nöhön embuk kinda mötkutukutu engiba numbuñini mem amqemam. Uruawamjanök malgetka tuarenjonurupñini yengörenök kunjan mötkutukutu mi qetala keunjini qeapköba memba et al engibingö osima. ¹⁶ Nanjini iwinam, darumun, tinitosolom aka alaurupñini yenön mewöyök angönan mem engigetka engörenök tosatñi engugetka kömume. ¹⁷ Kantri pakpak yenön nongö qetnangöra aka kazik ak engigetka malme.

¹⁸ “Mewö malmemö, nöjön köyan köl engibi nöropñinangö jupñi kunjan qahö sohoma. ¹⁹ Injini kapan köla köhöiba böñ qeba kinda miänön mönö luhut ala oyaenköyaen malmal buñ qem angume.” Mewö.

Jerusalem sitigö köndermönder uru-önönjambuk

Mat 24.15-21; Mak 13.14-19

* 21:14: Luk 12.11-12

20 “Könangep yarö kambu yeñon kangota Jerusalem siti liliköba gwan almei, injini mi eka miangören kewö mötmörime, ‘Siti bohonji köndenmöndenmegö nalöñan mönö kam kuñguza.’
21 Nalö miangören Judia prowinsnöñ malmei, eñon mönö misiñgöba öröba kundunje anme. Sitinöñ malmei, eñon mönö siti mosötme. Siti yaigepñe mire malmei, eñon mönö sitinöñ kude anme.

22 **“Mi kewögöra: Buña Kimbinöñ kezapqetok keu ohoget ahözawi, mi pakpak mönö öljambuk akña. Keu miangö dop Anutunöñ nalö miangören siñgisöndokninangö likepñi melenja qakñine ali öngöma. 23 Anutunöñ Israel könagesö siñgisöndokñinangöra irimñi seholiiga kazikñi kondel enjiiga gölmenöñ kahasililiñ keta bölökñi asuhuma. Ambi gölömbuk aka morö juzunöñ yeñon mönö nalö miangören denöwö ösumñinan anbeak? Miangöra Yei! jizal.*

24 “Köndenmönden miangören ambazip tosatñi mi bimgö sou ketañan engugetka kömume. Tosatñi kösö gwaröhöm enjiba enguangetka kantri pakpak yengö sutñine angotme. Angotketka kian kantri yeñon kangota Jerusalem tiangöba malme. Mewö malgetka Anutunöñ nalöñini tohot qei tatzawi, miangön kam kuñguiga mosötme.” Mewö.

Suep gölmegö azi öñan mönö asuhum tinjitma.

Mat 24.29-31; Mak 13.24-27

25 **“Wehön aka köin jeñire aka senjelau miangören aiwesök murutñi murutñi asuhume. Köwetnöñ siri qegetka ötöñ ketañi ahumakzawangöra gölmegö kantri pakpak yeñon tötbörömñini kaiga wahöjalin möta malme. 26 Mewö malgetka suepnöñ uturuköiga miangö öroyuaiñi mi tatatñini mosöta enjololöñ aketka sohoma. Miangöra gölmenji gölmenji miangören lömböt bölöñi kötökñi asuhumapköra mamböt-torok mala kenjötñini möta uruñini duhuiga jegilgil akñe.*

27 **“Nalö miangören Suep gölmegö azi öñi yañon kousu qakñe kangori ekñe. Kukösumñi ketañan saköl-dinjinambuk aukñe asuhuiga asakmararañi ekñe. 28 Mewö kangotmapmö, yuai mi könahiba asuhumei, eñon mönö nalö miangören Suepnöñ öngöbingö nalöñinan törimawangöra nöropñini uba wahöta uruñini qezaköba awösamkakak kinme.” Mewö.*

Geröp ipkö dopkeu

Mat 24.32-35; Mak 13.28-31

29 Jisösnöñ dopkeu kun kewö jii mötket, “Injini geröp aka ip tosatñi mi eka tandökñini mötme. 30 Ip mi sinñan yongoigetka mi eka miangö könarñi nanñinak möt asariba kewö jimakze,

* 21:22: Hos 9.7 * 21:25: Ais 13.10; Eze 32.7; Joel 2.31; Ind 6.12-13 * 21:27: Dan 7.13; Ind 1.7

'Wehön nalöñan lök dopdowiza.' ³¹ Eñön mewöñanök keu jizali, miangö ölnjan asuhuiga eka möt asariba köñani kewö jime, 'Anutugö bemtohoñan mönö dopdowiza.'

³² "Nöñön keu ölni kun kewö jibi mötket: Ambazip merak gölmenöñ maljei, yeñön qahö kömugetka yuai pakpak jizali, mi mönö yeñgö malmal nalöñine asuhuma. ³³ Suep gölmenöñ göröñ qemahotmö, nöngö Buña keunan mönö qahö ayapköma." Mewö.

Urugwölö mosöta köhömuñi malbinbuk.

Mat 24.42-44; Mak 13.33-37

³⁴⁻³⁵ "Nalö ketanji mianöñ ambazip körek gölmenöñ maljei, yeñgö qakñine mewö asuhuma. Miangöra mianöñ wölanök kaba simba ewö qeraköm enjibapuk. Miangöra gölmenöñ malmalgö waimanjatñan qakñine öngöiga közölömbuanñ ala o köhöikñi negetka enjololöñ aiga uruñinan lömböribapuköra mönö galömqini mem anğuba malme.

³⁶ "Miangöra mönö nalö dop urugwölö mala köuluköba malme. Mewö malgetka ösum enjiiga yuai pakpak mi asuhumawi, miangö uruñeyök kök ala mönö Suep gölmegö azi ölnjanğö jemesoholñe awösamkakak kinme." Mewö.

³⁷ *Nalö miangöreñ Jisösnöñ wehön dop jöwöwöl jikenöñ kinda Buña kusum enjiiga miri mare aiga mosöta kundunji qetñi Oil ip kundunji qerakzini, miangöreñ öngöba ahömalök. ³⁸ Mewö maliga ambazip kambu pakpak yeñön wehön dop söñanök jöwöwöl jikenöñ öngöba Buñani jii mötpingöra yanğöreñ kamalget. Mewö.

22

Jisös qein kömumapkö anğöñanñ alget.

Mat 26.1-5; Mak 14.1-2; Jon 11.45-53

¹ *Mewö malgetmö, beret yistñi qahö miangö sösoñgaiñi, qetñi kun Pasowa kendon jimakzin, mi töriyök.* ² Töriiga miangöreñ jike nup galöm aka Köna keugö böhi yeñön ambazip kambu yeñgö keñgötñini mötkerañgöra aka nanñinök tokoba "Denöwö ahinga qeget kömumbawak," jiba köna jaruba mötmöriget.

Judasnöñ Jisös mamalolo mem wanğimamgö urumohok ahök.

Mat 26.14-16; Mak 14.10-11

³ Nalö miangöreñ Satanöñ Judasgö uruñe geyök. Judas mi Jisösgö gwarekurupñi 12 yeñgöreñök kun. Kariot mireyök kayöhañgöra qetñi kun Iskariot qetket. ⁴ Yanöñ jike nup galöm aka jikegö kiripo galöm bohonñi yeñgöreñ anda Jisös

* **21:37:** Luk 19.47 * **22:1:** Eks 12.1-27 * **22:1:** Pasowa mi nanine keunöñ neñgehoriha neñgoñgirök. Eksodus 12.15

mamalolo memba böröjine almamgö keuñi jiyök. ⁵ Yeñon mi möta “Ayop!” jiba uruñinan ölöwahiga söngöröñi monen wañgibingö keu jöhöget. ⁶ Keu jöhögetka Judasnöñ Jisös ölöñ mamalolo memba böröjine almamgö köna möt jaruba köiñbingöba malök. Mewö.

Jisösnöñ gwarek yembuk Pasowa lama neget.

Mat 26.17-25; Mak 14.12-21; Jon 13.21-30

⁷ Beret yistñi qahö mianğö kendon silim kunöñ Pasowa lama qeba ohozema. Nalö mianñon kam kuñguyök. ⁸ Jisösnöñ Pitö aka Jon kewö jiba melaim etküyök, “Inñiri anda Pasowa lama mözözömgöyohotka nembin.”

⁹ Mewö jüga qesim wañgiyohot, “Mi denikeañğoreñ anda mözözömgöbit?”

¹⁰ Qesim wañgiyohotka kewö melenñök, “Mörohöt! Inñiri sitinöñ anğorohotka azi kun o kimbut kunduta kaiga miwikñaimahot. Miwikñaiaba i wuatañğöba anda mire öngömawi, mianğoreñ öngömahot. ¹¹ Öngöba miri tonñi kewö jiyohot mötma, ‘Böhinöñ göhöra jiza: Ala mirigi denike? Neñon ölöp mianğö uruñe kaba gwarekurupni yembuk Pasowa lama nembin?’ ¹² Mewö jiyohotka möta miri qakñe eu öngöba uruñi ketañi kun kondel etkima. Mianğoreñ dum tatat yuai mözözömgöget ahöza. Mi kondel etkiiga mianğoreñ lama qeba ohomahot.”

¹³ Mewö jii anda Jisösnöñ keu jiyöhi, mianğö dop miwikñaiaba kinda lama qeba ohom mözözömgöyohot. Mewö.

Kembubuk semön qöndökñi neget.

Mat 26.26-30; Mak 14.22-26; Jon 13.21-30; 1 Kor 11.23-25

¹⁴ Nene nalöñan kaiga Jisösnöñ aposolurupñi yembuk nene nemingö eta tatket. ¹⁵ Tatketka kewö jii mötket, “Nöñon Pasowa lama ki embuk nemingö gwötpuk ak niñgiba malök. Nene ki nembagun mönö sihimbölö mötmam. Mianğö nalöñan töriza. ¹⁶ Mi törizawañğöra kewö jibi mötket: Nöñon Pasowa lama kianğoreñ kun toroqeba qahö nemam. Könañgep nene semön kianğö ölnañ aukñe asuhumawi, mi Anutugöreñ bemtohoñ uruñe euyañğoreñ nemam.”

¹⁷ Mewö jiba wain qambi memba kötuetsköba kewö jiyök, “Mönö ki memba nanñinak anğuba neme. ¹⁸ Nöñon kewö jibi mötket: Ni wain kösögö ölni kianğoreñ kunbuk toroqeba qahö nemam. Kunbuk nemami, mi Anutugöreñ bemtohoñ asuhum teköiga mianğoreñ nemam.”

¹⁹ Mewö jiba beret memba kötuetsköba mindipköba enğiba kewö jiyök, “Ki nani busuni. Ki enğöra aka tököm enğizal. Nemba ni mötmörim niñgiba malme.” ²⁰ *Mi enğii negetka

* 22:20: Jer 31.31-34

mewöñanök wain qambi memba kewö jiyök, “Qambi ki mi jöhöjöhö arenj dölökñi akza. Nöñön amöt qem engimangöra aka sepni mokoba kömumam. Sep mianjön mönö Anutugören jöhöjöhö arenj mem köhöima.

21 * “Mewö akzappmō, mötket, mamalolo mem ningimawanjön mönö mohotje ki nene nempa tatzit. 22 Ölña, Anutunöñ jim kutuyöhi, Suep gölmegö azi ölñan mönö mianjögö dop gölme mosöta anma. Anmapmō, mamalolo mem wanjimiawi, yangöra mönö wölköba ‘Yei!’ jizal. Anutunöñ mönö likepñi öngöngöñi melej wanjima.”

23 Mewö jiiga gwarekurupñan könahiba sutñine eraum qesim anjuba jiget, “Nengörenök mönö danjön mamalolo mem wanjibawak?” Mewö.

Gwarek yenjön sutñine goranora aket.

Mat 20.25-27; Mak 10.42-44

24 * “Gwarek nengörenök galöm bohonñi mi danjön akza?” mewö jigetka mianjögöra mewöyök sutñine goranora asuhuyök.

25 * “Mi asuhuiga Jisösnöñ kewö jii mötket, “Gölmegö kantrinji kantrinji miengö kinjan mönö azi kembu tandök aka galöm köl engimakze. Yengö pom jembonñinan mönö keu jim kutuba könagesöñini mindingöm engigetka welenñini qeba ‘Azi ölöñji!’ jiba möpöseim engimakze. 26 * Mewö ahakzemö, enjön mianjögö dop kude akñe. Engö sutñine kunñan ketanjamñini akzawanjön mönö eretñanjögö dop aka malma. Galöm bohonñan mönö welenqege ewö aka malma.

27 * “Kunöñ tata nene neiga kunñan nene köl wanjiba anda kamakzawi, yetkörenök öngöngöñi mi danjön? Ölña, ‘Tata nene nezawanjön mönö öngöngöñi akza.’ Mewö jiget mörakzinmō, nöñön engö sutñine welenqege ewö aka maljal.

28 “Mewö malbi esapköm ningigetka wahöjalinj wahösömbu uruñe angotpiga injini töndup kapañ köla nömbuk qekötahöba mala kotze. 29 Iwinan jim kutum ningiiga nöñön yangö bemtohoñi kukösum qakñe galöm kölakzal. Mianjögöra nöñön toroqeba jim kutum engibiga injini mewöyök kukösum qakñe ambazip kin ewö galöm köl engimakñe. 30 * Mianjögöra injini ölöñ nöngö bemtohoñne angota nene dumni liliköba tata o aka nene nempa malme aka azi kembu tatatnöñ tata Israel ambazip kambu 12 yengö keunñini kewöta jim teköm engime.” Mewö.

Pitönöñ Jisös qañ kölmapkö jii mörök.

Mat 26.31-35; Mak 14.27-31; Jon 13.36-38

* 22:21: Sum 41.9 * 22:24: Mat 18.1; Mak 9.34; Luk 9.46 * 22:25: Mat 20.25-27; Mak 10.42-44 * 22:26: Mat 23.11; Mak 9.35 * 22:27: Jon 13.12-15

* 22:30: Mat 19.28

³¹ Jisösnöñ jiyök, “O Saimon Saimon! Mötnöñ! Kölkömöt azinöñ wit padi kötñi joutnöñ ala uturuköiga kamböñi denða erakzawi, Satanöñ mönö miangö dop enjön löwöriba yangö böröñe gemegöra uturuköba esapesap al engimangö kapan köla jöjöröza. ³²Jöjörözapmö, göhö mötnaripkan sörauba pömsöm qebapuköra nöñön göhöra köuluköba malal. Miangöra nalö kungen urugi melenða nöngörej kamani, miangörej mönö mötnarip alaurupki nangöba mem köhöim engiman.”

³³ Mewö jiiga Saimonöñ melenök, “Kembu, nöñön göbuk kösö mire anbitkö aka mohotñe kömumbitkö jöjöröba maljal.”

³⁴ Mewö jiyökmö, Jisösnöñ jii mörök, “Pitö, nöñön kewö jibi mötnöñ: Kuruknöñ merak qahö qeriga göñön mutuk ni möt niñgimangö qañ kölnöñga indimñi karöbut akña.

Gösö aka bingö sou ketañi miyök memba anme.

³⁵ *Jisösnöñ gwarekurupñi kewö qesim engiyök, “Nöñön injini mutuk gösö qahö, moneñ gösö qahö, köna esu qahö mewö melaim enjibi angeri, miangörej yuai kungöra osiget me qahö?” Qesim enjiiga “Yuai kungöra qahö osiin,” jiget.

³⁶ Jigetka kewö toroqeba jiyök, “Mutuk mewö aketmö, nalö kewöñe kungörej gösö aka moneñ gösö tunji ahözawi, mi ölop memba tenjöba malma. Bingö sou ketañi mi kungörej qahö ahöza, yanön mönö malukuñi bohonñi memegöra ala moneñ miwikñaiba sou mi bohonñi mema. ³⁷*Nöñön miangöra kewö jibi mötket: Anutugö keu nöngöra jigeri, mi körek pakpak köhöim teköma. Miangö nalöñan mönö kam kuñgumangö akza. Buña keu kun kewö ohoget ahöza, ‘Yanön bölöñi meme yengö kambuñine ahöma, jiget.’ Miangöra jizal: Keu miangö ölni mi nöngörej asuhum teköma.”

³⁸ Mewö jiiga gwarekurupñan jiget, “Kembu eknöñ, bingö sou ketañi yahöt ki ahözahot.” Mewö jigetka “Mi dop kölja,” jiba melen enjiyök. Mewö.

Jisösnöñ Gezemane arönöñ köuluköyök.

Mat 26.36-46; Mak 14.32-42

³⁹ Jisösnöñ miri mosöta silikñi wuatangöba Oil ip kundunje öngöiga gwarekurupñan andöñe anget. ⁴⁰ Öngöba miangörej angota kewö jii mötket, “Esapesapnöñ et engubapuköra mönö köuluk nup meme.”

⁴¹ Mewö jiba engömosöta köt gilin anakzawi, miangö dop anda simin köla köuluköyök ⁴² Köuluköba kewö jiyök, “Iwini, göñön urusihimgi mötzan ewö, sihimbölögö gambiñi kianön mönö nöngö qakne öngöbapuköra noangitman. Noangitman me qahö, mi mönö nangi jit keugahö dop asuhuma. Mi

* 22:35: Mat 10.9-10; Mak 6.8-9; Luk 9.3; 10.4 * 22:37: Ais 53.12

nöngö sihimgö dop qahö.”⁴³ Mewö köuluköiga garata kunjan Suepnöhök asuhuba mem köhöim wanjiyök.⁴⁴ Mem köhöim wanjiiga könjilij öngöngöñi möta mönö kapan köla urunji qezaköba köuluköyök. Köuluköiga nöngöpñi mi sep jöjöl ewö tingita gölmenöñ etket.

⁴⁵ Köuluköm teköba wahöta gwarekurupñi yengören anök. Anda miwikñaiba engehi wösöbiriknön mem et enji söroraua gaun ahöget.⁴⁶ Ahögetka jiyök, “Mönö wuanöngöra gaunök ahöze? Mönö wahöta esapesapnön et enjubapuköra köuluköget.” Mewö.

Jisös qeraköba memba jöhöget.

Mat 26.47-56; Mak 14.43-50; Jon 18.3-11

⁴⁷ Jisösnön mewö jiba kiniga miangören azi kambu kangetket. Gwarekurupñi 12 yengörenök kun qetñi Judas yanön jitnemem enjiba Jisösgören kangeta numbuñi yöhötüm neyök.⁴⁸ Yöhötüm neyökmö, Jisösnön kewö jii mörök, “Judas, gi numbuni yöhötüm namba mewö mianön Suep gölmegö azi öñji mamalolo mem wanjizan me?”

⁴⁹ Mewö aiga tosatñan Jisös liliköm wanjiba kingeri yanön yuai asuhumangö ahi mi eka jiget, “Kembu, nini bimgö sou ketanjan enjuin me?”⁵⁰ Mewö jiba yengörenök kunjan jike nup galöm bohonñangö welenqeqenji qeba kezapñi öñji köteköi erök.

⁵¹ Erökmö, Jisösnön melenja “Mönö mosötket!” jiba welenqeqegö kezapñi yandiyöhi, mi misiriiga ölöwahök.

⁵² Ölöwahiga kinda jike nup galömurup, jikegö kiripo galöm bohonñi aka kantrigö jitnememe yanön Jisös membingö kangetkeri, mi kewö jii mötket, “Ni kegwek-kahasililij azia qahöpmö, töndup nöngöra mewö möta bimgö sou ketanji aka lingip memba kangetze.⁵³ *Nönön wehön dop jöwöwöl jikenön embuk malbiga injini böröñini böranda ni qahö nömiget. Mi qahöpmö, döлки söñaupkö ösumñan luhut ala aukñe asuhuiga enjö nalöñinan kam kunjuza.” Mewö.

Pitönön Jisös qan kölök.

Mat 26.57-58, 69-75; Mak 14.53-54, 66-72; Jon 18.12-18, 25-27

⁵⁴ Mewö aiga yarö azi yanön Jisös memba jöhöba wanjita jike nup galöm bohonñangö mire anget. Angetka Pitönön andöñjine sikepsikep enjuatanjöba anök.⁵⁵ Miangören anda jakömbuak mirigö kiripo urunje geba sombem bibiñe könöp ohoba mohotñe tatket. Pitönön mewöñanök yengö sutñine tarök.⁵⁶ Tari welenqeqe ambi kunjan Pitönön könöp kösutñe

* 22:53: Luk 19.47; 21.37

tari ehiba kewö jiyök, “Azi kianjon mönö mewöyök yambuk malök.”

⁵⁷ Mewö jiyökmö, Pitönöñ qañ köla kewö jiyök, “Ambi, ni i qahö möt wañgizal.”

⁵⁸ Mewö jiba tari kude köriiga azi kunjan eka jiyök, “Gi mewöyök yengöreñök kun akzan.” Mewö jiyökmö, Pitönöñ melenök, “Alani, ni qahö.”

⁵⁹ Aua mohotkö dop teköiga kunjan keu mi kunbuk kapan köla jiyök, “Azi kianjon mewöyök ölña yambuk malök. Yañon mönö Galili azia akza.”

⁶⁰ Mewö jiyökmö, Pitönöñ melenök, “Azi, keu jizani, mi köndatzal.” Mewö jiba kiniga miangöreñök kuruk qerök.

⁶¹ Qeriga Kembunöñ lilingöba Pitö uba ehiga miangöreñök keuñi kewö jiyöhi, mi mötmöriyök, ‘Gi merak indimñi karöbut qañ köl niñginöñga kuruknöñ qetma.’ ⁶² Keu mi mötmöriba wösöñi julmangö aiga yaigep geba sahöt böliyök. Mewö.

Jisös jim gönahit ak wañgiget.

Mat 26.67-68; Mak 14.63-65

⁶³ Yarö azi Jisös memba jöhögeri, yeñon mepaqepaik ak wañgiba kinda qeapköget. ⁶⁴ Qeapköba jemesoholñi es-uhuba qesiba jiget, “Gi kezapqetok azia akzananğöra danjon guhuzawi, mönö yañgö qetñi qetnöñ!” ⁶⁵ Mewö jiba gwötpuk tereñqereñda ilita jim qetal wañgiget. Mewö.

Jikegö jitnememe yeñon Jisösgö keu nup meget.

Mat 26.59-66; Mak 14.55-64; Jon 18.19-24

⁶⁶ Jim qetal wañgiba malgetka miri gianjiiga kantrigö jitnememe aka jike nup galöm aka Köna keugö böhi yeñon tokoba Jisös wañgita Juda yeñgö jike kaunsöl kambu yeñgö jenine alget.

⁶⁷ Miangöreñ algetka jiget, “Göñon Amötqeqe Tonji Kraist akzan ewö, mi mönö aukñe pañ jinöñga mötpin.” Mewö jigetka melenök, “Mi jibi mötpeaha kun, mi mönö qahö möt narime. ⁶⁸ Me qesim engibileñaha kun, mi mönö qahö melen niñgime. ⁶⁹ Mewö mötzalmö, nalö kewöñeyök könahiba Suep gölmegö azi ölñi yañon mönö Anutu, kukösum Tonjanğö böröñi ölñe tata malma.”

⁷⁰ Mewö jiiga miangöreñök körekñanök kewö jiba qesiget, “Ölña, gi Anutugö nahönña akzan me qahö?” Mewö qesigetka kewö melen engiyök, “Mi akzalanğö keuñi mönö nanñinak jize.” ⁷¹ Melen engiiga jiget, “Nanñak unjemunem (gunjemgunjem) keuñi mönö nanñi numbuñan jiiga möt teközin. Miangöra tosatñan keuñi nanğömegöra mönö wuanöñgöra kunbuk qesim engibinak?” Mewö.

23

Jisösnöj premiö Pailötkö jeje kinök.

Mat 27.1-2, 11-14; Mak 15.1-5; Jon 18.28-38

¹ Mewö jiiga kambu körek yejön wahöta Jisös waŋgita premiö Pailötköreŋ anget. ² Yaŋgöreŋ anda könahiba silenje keu ala undenda kewö jiget, “Azi kiangö könani kewö eka mörin: Yaŋön ambazip kuŋgum enjiiga enjololoŋ aka karim asuhumakze. Nini Sisa kiŋgö takis kude almegöra songo alakza. Nanŋaŋgöra ‘Ni Amötqeqe Toŋi Kraist aka kiŋ akzal,’ jimakza.”

³ Mewö jigetka Pailötnöŋ kewö qesim waŋgiyök, “Ölŋa, gi Juda yeŋgö kiŋa akzan me qahö?” Qesim waŋgiiga Jisösnöŋ melenŋa jiyök, “Mönö nangak jizani, mewö.”

⁴ Pailötnöŋ jike nup galöm aka ambazip kambu yeŋgöra kewö jii mötket, “Nöŋön azi kiangö pinjitŋi kun qahö mi-wiŋaizal.”

⁵ Mewö jii möta kunbuk kapan köla kuŋguba jiget, “Yaŋön mönö ambazip kambu kuŋgum enjiba Buŋani Galili prowinsnöŋ könahiba kusum enjiba gölme dop köla kaba Judia prowins kiangöreŋ mewöyök mi jim sehimakza.”

⁶ Mewö jiget möta qesim enjiba jiyök, “I Galili azia me akza qahö?” ⁷ Mewö jiiga “Mönö mi!” jiget möta Herodnöŋ Galili aka prowins tosatŋi mindiriba galöm köl enjiba nalö miangöreŋök Jerusalem sitinöŋ kaba malöhi, miangöra Pailötnöŋ Jisös Herodköreŋ waŋgita anget. Mewö.

Jisösnöj kiŋ Herodkö jeje kinök.

⁸ Herodnöŋ Jisösgö kösohotŋi möta lök nalö köröpŋi ekŋamgö sihimŋi möta malöhaŋgöra i eka uruŋan gwötpuk ölöwahök. Jisösnöŋ aŋgöletot kun meiga ekŋamgö al mamböta malök. ⁹ Miangöra qeqesi gwötpuk Jisös qesim waŋgiyök. Mi qesim waŋgiyökmö, Jisösnöŋ likepŋi kun qahö jii mörök.

¹⁰ Jike nup galöm aka Köna keugö böhi yejön kinda silenöŋ alal keu könöpŋambuk jim waŋgiget. ¹¹ Herodnöŋ yarö aziurupŋi yembuk Jisös memba et ala jijiwilit aka mepaqepaik mem waŋgiget. Mewö aka maluku aködamunŋambuk kun löngöt waŋgiget kini melaiiga kunbuk premiö Pailötkö jeje anök. ¹² Mutuk Pailöt aka Herod yetkön kerök-kerök ak aŋguba malohora nalö miangöreŋ ala-ala ahot. Mewö.

Pailötnöj Jisös kömumapkö jim teköyök.

Mat 27.15-26; Mak 15.6-15; Jon 18.39-19.16

¹³ Jisösnöŋ kaiga premiö Pailötnöŋ jike nup galöm aka galömkölköl aziurupŋi aka ambazip kambu öröm enjii tokoget. ¹⁴ Tokogetka kewö jii mötket, “Injini azi ki kewö jiba nöŋgöreŋ waŋgita kaze, ‘Yaŋön ambazip kambu kuŋgum enjiiga enjololoŋ ahakze.’ Mötket! Injini keu silenje aljei, nöŋön

miangö könani engö jeñine kewöta kewö miwikñaizal: Injini azi kiangö sileñe keu aljei pakpak, mianön pinjitni qahö akza. ¹⁵ Herodnön keu mewöñanök jiba melaiiga kunbuk nenngören kaza. Mötket, yañön yuai pinjitñambuk kun qahö ahök. Miangöra kömupkö buñaya akñapkö osima. ¹⁶ Miangöra nönön jibi yarö azi yeñön ihileknöhök qegetka pösatpi etma.” ¹⁷ (Pailötnön yambu (yara) dop Pasowa sösöngai nalöñe kösö mireyök azi mohok pösat engimaljapma.)

¹⁸ Mewö jiiga yeñön körebörek silata qeta jiget, “Ia mönö yapmakek! Barabas mönö pösat nenjinön.” ¹⁹ Barabas mianön sitinön karim gila malgeri, yeñgö galömñina aka azi kun qei kömuyöhi, miangöra kösö mire alget tarök.

²⁰ Pailötnön Jisös pösatmamgö möta keu kunbuk jiyök. ²¹ Jiyökmö, yeñön qetala örañbörañ misiba qet gigilahöget, “Maripomnön qeget! Maripomnön qeget!”

²² Qet gigilahögetka yeñön keu indimñi karöbut kewö jiyök, “Yañön mönö wani bölöña ahök? Nönön yangören pinjit kun kude miwikñaibiga kömupkö buñaya akñawangö dop qahö akza. Mewö aiga nönön jibi yarö azi yeñön ihileknöhök qegetka pösatpi etma.”

²³ Mewö jiyökmö, yeñön jakbak memba kapañ köla toroqeba qet gigilahöba qetket, ‘Jisös maripomnön qeget kömuma.’ Mewö qeta Pailötköreañ keu mi qeapköget. ²⁴ Qeapkögetka Pailötnön keuñini bapñe anda keu kapañ köla jigeri, miangö ölni ahumapkö jim teköyök. ²⁵ Jim teköba Barabas etmapkö kapañ kölgerangöra i pösari erök. I karim qeba malgeri, yeñgö galömñina aka azi kun qei kömuyöhi, miangöra kösö mire alget tarök. Mi pösari erökmö, Jisös sihimñinangö dop jaungaurangä ak wangimegöra böröñine alök. Mewö.

Jisös maripomnön qeget.

Mat 27.32-44; Mak 15.21-32; Jon 19.17-27

²⁶ Pailötnön Jisös böröñine aliga wangita köna namñe anda Afrika siti qetñi Sairini miangö azi kun qetñi Saimon miwikñaiget. Yañön nupnöhök kañoriga jim kutum wangiba Jisösgö maripomñi wangita yangö awötñe algetka anguba wuatañgöba anök.

²⁷ Mewö aniga ambazip kambu ketani yeñön lulunđa andöñe wuatañgöba anget. Yeñgö sutñine ambi tosatñan mewöyök jinñeñ köla sahöta anget.

²⁸ Sahöta angetka Jisösnön lilingöba engeka kewö jiyök, “O Jerusalem ambi, injini mönö nongöra kude sahötket. Nongöra qahöpmö, nanñini aka nahönböraturupñini miengöra mönö sahötme. ²⁹ Mötket! Könañgep nalö kun kai miangören kewö jime, ‘Ambi köpin mi simbawon. Gölöm qahö ala morö kude megeri, mi simbawon akze. Nahönbörat juzu engiba qahö

dohongögeri, mi simbawon.’³⁰ *Nalö miangören ambazipnöḡ könahiba kundunḡi Toḡi yeḡgöra kewö uletme, ‘Inḡini mönö kundunḡi mi jigetka teköba qaknine öḡgöme.’ Aka sem siagö Toḡi mi kewö ulet engime, ‘Inḡini mönö banḡetḡine asamböt nenḡgime.’

³¹ “Nöḡön Anutugören ip gwölögwölö akzal aka nöḡgöra töndup kewö ak niḡgize. Inḡini ip köhömunḡi siḡgisöndokḡinambuk köḡöp sihit qeba kinje. Miangöra Anutunöḡ likeḡḡi melenḡ enḡiiga köḡöpnöḡ amqeqeḡanök enḡohotiriiga sihimbölo öḡgöḡḡi mötme.”

³² Bölöḡi meme yahöt mi mewöyök Jisösbuk mohotḡe etkubingöra etkuangita anget. ³³ Anda gölme qetḡi Nöröpsihit qetzei, miangörenḡ angota Jisös maripomnöḡ qeget. Qeba bölöḡi meme yahöt mi mohotḡe kun öḡḡe kun qaniḡe likeḡlikeḡ mewö etkuget. ³⁴ *Mewö aketmö, Jisösnöḡ jiyök, “Iwini, yeḡön yuai akzei, miangö könaḡi qahö möt kutuzeangöra siḡgisöndokḡini mönö mosöt enḡiman.”

Qeget kiniga Jisösgö sile esuḡangöra kiawen megetka qötöḡi ahui miangö dop mendenḡa meget.

³⁵ *Mewö aketka ambazip kambu yeḡön kinda mi uba eket. Eketmö, Juda jḡḡememe yeḡön mewöyök mepaqepaik mem waḡgiba kewö jiget, “Anutunöḡ möwölöhöm waḡḡi Amötqeqe Toḡi Kraist akza ewö, tosatḡi bauköm enḡiba malöhanöḡ mönö nanḡi bauköm anḡuma.”

³⁶ *Yarö azi yeḡön mewöyök keu gönahit jiba ilita kösutḡe anda wain o asölḡambuk kusahöla memba öḡgöba waḡgiba ³⁷ kewö jiget, “Gi Juda yeḡgörenḡ kiḡ kembuya akzan ewö, mönö ölöḡ nangi bauköm anḡuman.”

³⁸ Nöröpḡe eu kulem kun kewö ohoget kinök, “Juda yeḡḡo kiḡ kembunḡina ki.”

³⁹ Kegwek-kahasililiḡ azi yahöt mohotḡe möndögetka kingeri, yetkörenök kunḡan uruqeqe keu töhörenḡ Jisös jim waḡgiba kewö jiyök, “Gi Amötqeqe Toḡi Kraist akzan ewö, mönö nangi bauköba niri mewöyök bauköm netkinöḡ.”

⁴⁰ Mewö jiyökmö, alaḡan jim waḡgiba kewö jiyök, “Gi gödaqeqegi qahö. Gi Anutugöra mewöyök kenḡötḡi qahö mötzan me? Yeḡön jim teköba sihimbölo öröröḡ nenḡigetka bisizin. ⁴¹ Niri öḡḡa pinḡit ahiraḡgöra likeḡḡi dopḡe melenḡa ak netkigetka sihimbölo mötzit. Mi mötzitmö, azi kianöḡ bölöḡi kun qahö aiga ia töndup ayuhuze.” ⁴² Mewö jiba jiyök, “Jisös, gi bemtohongahö uruḡe anḡotmani, miangörenḡ mönö ni mötmörim niḡgiman.”

* 23:30: Hos 10.8; Ind 6.16 * 23:34: Sum 22.18 * 23:35: Sum 22.7

* 23:36: Sum 69.21

⁴³ Jiiga kewö jiyök, “Nöñön keu ölña jibi mötnöñ; Göñön mönö merak nömbuk oyaenƙoyaen mire öngöba malman.” Mewö.

Jisösnöñ kömuyök.

Mat 27.45-56; Mak 15.33-41; Jon 19.28-30

⁴⁴ Silim bibiñi 12 kilok aiga wehön jeñi böuleiiga söñaupnön eta gölme pakpak dop köla ahöiga anda aua karöbutkö dop ahök. ⁴⁵ *Nalö mianğoreñ jöwöwöl jike uruñe opo kinöhi, mianğön mönö euyök bibiñe jurata eta yahöt ahök. ⁴⁶ *Jisösnöñ nalö mianğoreñ köhöikñanök qeta kewö jiyök, “Iwini, nöñön uñani göhö böröge aljal.” Mewö jiba söngörö ösum kondikñi öröba kömuyök.

⁴⁷ Kömuiga yuai asuhuyöhi, suahö galömnöñ mi eka Anutu möpöseiba kewö jiyök, “Yañön mönö ölña azi solanña akza.”

⁴⁸ Ambazip kambu pakpak mi ekingö kaba tokogeri, yeñön yuai mi asuhui eka wösöñini juliga nörop gila mohot mohot miriñine anget. ⁴⁹ *Angetmö, ambazip pakpak Jisös möt wañgigeri, yeñön sikep kindi i uba eket. Ambi tosatñan Jisös wuatangöba Galiliyök kageri, yeñön mewöyök kindi mi eket. Mewö.

Jisösgö qamötñi löm kölget.

Mat 27.57-61; Mak 15.42-47; Jon 19.38-42

⁵⁰⁻⁵¹ Juda yeñgoreñ taon qetñi Arimatia mianğoreñök azi ölöpñi qetbuñañambuk qetñi Josef yañön mewöyök kayök. Yañön Anutu bemtohoñangö ölni asuhumapköra mamböta malök. Yañön Juda yeñgö jike kaunsöl kambugö jitñememe mala Jisösgö keu jim jöhöba akeri, mianğö urumohok qahö ahök.

⁵² Yañön Pailötkoreñ anda Jisösgö qamötñi memangö qesiyök. ⁵³ Qesiba öngöba qamötñi maripomnöñök qeköba memba eta opo tuatñan esuhuyök. Esuhuba memba qaksirinöñ anda köt köteñ kun urorohoba qamöt kun mianğoreñ qahö algeri, Jisösgö qamötñi mi mianğoreñ alök. ⁵⁴ Sabat kendon tatatkö yuaiñi mözözömgögeri, mianğö wehön jeñi gemangö ahök.

⁵⁵ Gemangö aiga ambi Jisösbuk Galiliyök kageri, yeñön Josefgö könañe qaksirinöñ anda yañön Jisösgö qamötñi memba köt köteñnöñ alöhi, mi eket. ⁵⁶ *Mianğoreñök lilingöba mire anda jiniñ suamburup umköhöwakñambuk aka kelök qösösökñambuk Jisösgö qamötñe miribingö mözözömgöget. Mözözömgögetmö, Mosesnöñ Köna keunöñ Sabat kendongöra

* 23:45: Eks 26.31-33 * 23:46: Sum 31.5 * 23:49: Luk 8.2-3 * 23:56: Eks 20.10; Dut 5.14

jim kutui ahöyöhi, mi wuatangöba luhut memba ösöñ tatket. Mewö.

24

Jisösnöñ kömupnöhök wahörök.

Mat 28.1-10; Mak 16.1-8; Jon 20.1-10

¹ Sabat kendon tatket teköiga Sonda söñanök miri gianjiga ambi yeñön wahöta jiniñ jimoron umköhöwaktambuk mözözömgögeri, mi memba qaksirinöñ anget. ² Anda kunñan qaksirigö numbuñe köt ketañi qetali ani eket. ³ Mi eka köt köteñ uruñe öngögetmö, Kembu Jisösgö qamötñi qahö miwikñaget. ⁴ Mianğöra mötkurumkurum möta kingetka azi yahöt malukuñiri tuatñi kölköl-bilikbilikñambuk yetkөн wösöñine kinohotka etkeket.

⁵ Mi etkeka awöwöliba gölmenöñ geba dapkögetka kewö jiyohot mötket, “Jebuk mal köhöizawi, i mönö denöwögöra kömukömuñi yeñgö sutñine jaruze? ⁶ *Yañön ki qahö ahözapmö, mönö guliba wahötza. Galili prowinsnöñ mala keu jii mötkeri, mi mönö mötmörime: ⁷ Yañön kewö jiyök, ‘Kunöñ Suep gölmegö azi ölni mamalolo mem wangiiga bölöñi meme yeñgö böröñine geiga maripomnöñ qeget kömumba wehön karöbut aiga guliba wahötma.’ ”

⁸ Mewö jiyohotka keuñi mi mötmötñine angoriga mötmöriget. ⁹ Mewö mötmöriba qaksirinöhök lilingöba kaba yuai pakpak asuhuyöhi, mianğö buzup keuñi mi gwarek 11 aka tosatñi pakpak yeñgöra jiget mötket. ¹⁰ Keu mi jigeri, mi Magdalagöra Maria, Joana aka Maria Jeimsgö namñi aka ambi tosatñi yembuk malgeri, yeñön mi kaba aposol yeñgöra jiget mötket.

¹¹ Buzup keu mi jiget mötketmö, keu jigeri, mi keu omanñ tandök ahöhi, mewö mötmöriba mi qahö möt nariget. ¹² Qahö möt narigetmö, Pitönöñ wahöta ösumñan qaksirinöñ anda köt köteñ uruñe ui aniga opo esu miyök mianğoreñ tari ehök. Mi eka yuai asuhuyöhi, mi nanñök mötmöriba welipköba mire lilingöyök. Mewö.

Gwarek yahötñan Emeus könanöñ anohot.

Mak 16.12-13

¹³ Wehön mianğoreñök Jisösgö gwarekurupñi yeñgöreñök yahötñan Jerusalem siti mosöta miri qetñi Emeus sewen mail mianğoreñ anbitkö anohot. ¹⁴ Könanöñ anda yuai asuhuyöhi, mi pakpak nanñirök eraum mörohot. ¹⁵ Mi eraum möta könanñi jim lömböriba anohotka Jisösnöñ nanñak kösutñire angota mohotñe anget. ¹⁶ Angetmö, jeñiri közamböri i qahö ek kutuyohot. ¹⁷ Qahö ek kutuyohotka kewö jiyök, “Inñiri nanñirök wani

* 24:6: Mat 16.21; 17.22-23; 20.18-19; Mak 8.31; 9.31; 10.33-34; Luk 9.22; 18.31-33

keuya könanöŋ eraum möta kazahot?" Mewö jiiga dörök mitiba wösöbirik jeje uba eka kinohot.

¹⁸ Eka kinda yetköreŋök kun qetŋi Kliopas yaŋön kewö qesim waŋgiyök, "Pasowa kendonöŋ yuai asuhuyöhi, mi Jerusalem ambazip körekŋan mötze. Gi mohotŋan kiana aka mi qahö mötzan me?"

¹⁹ Qesim waŋgiiga "Mi wania?" jiiga möta kewö jiyohot mörök, "Nazaret azi Jisösgöra yuai asuhuyök mi. Yaŋön kezapqetok azia mala Anutu aka ambazip pakpak yeŋgö jeŋje ahakmeme kukösumŋambuk aka keu köhöikŋi jiba malök. ²⁰ Mewö maliga neŋgö jike nup galömnini aka galömkölköl aziurupninan i waŋgita premiögö böröŋe algetka kömumapkö jim teköi maripomnöŋ qeget kömuyök. ²¹ Yaŋön Israel könagesönini kösönöhök pösata sohohnini memapköra al mamböta jörömqröm aka malinmö, Yei! i mönö qeget kömuyök. Yuai mi asuhuiga mala koringa merak sömaŋi karöbut lök akza.

²² "Mi qahö dop köliga merak neŋgöreŋök ambi tosatŋan keunöŋ kuŋguba welipköm neŋgiget maljin. Yeŋön söŋan amandine qaksirinöŋ anda, ²³ qamötŋi qahö miwikŋaiba lilingöba kewö jize, "Nini Suep garata yahötkö jemelen imut ehinga yetköŋ 'Jisösnöŋ guliba malja,'" jiyohotka mötzin. ²⁴ Keu mi möta azi nembuk maljei, yeŋgöreŋök tosatŋan qaksirinöŋ anda ambi yeŋön keu jizei, miangö dop ahöiga ekze. Löm gwamönŋi ekzemö, nanŋi qahö ekze."

²⁵ Keu mi möta kewö jii mörohot, "Yei! Inini kezapqetok yeŋön keu jigeri, mi pakpak mönö wuanöŋgöra ölanbölan aka ajojohoba gawönjeje mala qahö möt narize? ²⁶ Amötqeŋe Tonji Kraistnöŋ sihimbölö mewöŋi mötagun nanŋi asakmararaŋ uruŋe öŋgöma. Miangö dop ohoget ahöza me qahö?" ²⁷ Mewö jii mörohotka Moses aka kezapqetok ambazip pakpak yeŋön keu jigeri, miangöreŋök könahiba nanŋaŋgöra keuŋi pakpak ohoget ahözawi, miangö könaŋi jim asarim etkiyök.

²⁸ Jim asarim etkiba anda miri anbitkö jiba anohori, mi dopdowiba miangöreŋ toroqeba anmamgö mörök. ²⁹ Mewö mörökmö, yetköŋ kapaŋ köl waŋgiba kewö jiyohot, "Miri mare aiga wehön jeŋan lök gemamgö akza. Miangöra ölop netpuk tata ahöman." Mewö jiyohotka yetpuk mire öŋgöba tatket. ³⁰ Tata yetpuk nene nemingö aka beret memba kötuetköba mindipköba etkimamgö aiga yuai kewö asuhuyök:

³¹ Miangöreŋök jeŋiran tohoiga ek kutuyohotka atatop (jihataton) köliga kunbuk qahö ehot. ³² Mewö aiga nanŋirök kewö eraum mörohot, "Köna namŋe Buŋa Kimbigö keu jiba könaŋi jim asarim netkizawi, nalö miangöreŋök mönö urunire könöp jezawaŋgö dop mötzit."

33 Mewö jiba miangörenök wahöta Jerusalem sitinöŋ lilingöba aŋgota gwarekurupŋi 11 aka alaurup yembuk tokoba tatkeri, mi miwikŋaim enġiyohot. 34 Miwikŋaim enġiyohotka kewö jiget mörohot, “Kembunöŋ mönö ölna wahöta Saimongören asuhum waŋgiza.”

35 Mewö jigetka nanŋirak könanöŋ yuai asuhuyök aka beret mindipköyöhi, nalö miangören uruŋiri tohoiga möt kutuyohot, miangö kösohotŋi mem enġiyohot. Mewö.

Jisösnöŋ gwarek kambuŋi asuhum enġiyök.

Mat 28.16-20; Mak 16.14-18; Jon 20.19-23; Apo 1.6-8

36 Gwarekurupŋi yeŋön keu mi eraum möta tatketka miangörenök Jisösnöŋ nanŋak sutŋine asuhuba kinda kewö jiyök, “Alaurupni, luainöŋ embuk ahöma!”

37 Mewö jiiga keŋgötporiŋ aka jönömŋini undui “Öme imura ekzin,” mewö mötmöriġet. 38 Mewö mötmöriġetmö, kewö jii mötket, “Inini denöwögöra auruba mötmöt mewöŋi uruŋine ahuza? 39 Ni nanak ki maljal. Mi nanŋinak köna böröni uba eka mötme. Öme imut mi bususihitŋini qahö. Ni bususihitnambuk kinbi nekze. Mönö nömisiriba nek kömume.”

40 Mewö jiba köna böröŋi kondel enġiyök. 41 Kondel enġiyökmö, mi sösoŋgainaŋgöra töndup qahö möt nariba welipköba tatketka kewö qesiba jiyök, “Nenenamŋini kun ki tatza me qahö?” 42 Mewö jiiga söra jejeŋi miangö kitipŋi kun waŋġiget. 43 Waŋġigetka memba neiga eket.

44 Neiga eketka kewö jii mötket, “Ni embuk mala nalö miangören keu jibi mötkeri, miangö ölni nalö kiangören asuhui ekze. Nöŋön kewö jiba malal: Nöŋgö keu mi Mosesgö Köna keu aka kezapqetok azi yeŋgö Buzup Kimbi aka Sumbara (Buŋa liŋet) bukŋöŋ ohoġet ahözawi, mi pakpak mönö ölnambuk ak teköma.”

45 Mewö jii mötketka miangörenök Buŋa Kimbigö könaŋi möt kutumegöra uruŋini metohoyök. 46 Metohoba kewö jii mötket, “Keu kewö ohoġet ahöza: Kraistnöŋ sihimbölö möta kömumba sömaŋi karöbut aiga kömupnöhök wahötma. 47 Miangöra eŋön mönö Jerusalem sitinöŋ könahiba Buŋa keu nöŋgö qetne jim asariba kantri pakpak dop köla anda uru kuŋgum enġimakŋe. Denike yeŋön uruŋini melenmei, Anu-tunöŋ mönö yeŋgö siŋgisöndokŋini mosöta saŋgoŋma.

48 “Keu mi ölnambuk ahök aka akŋawi, inini mi asuhui eka naŋgöba jiba dangunu ewö kinme. 49 *Mötket! Iwinan kalem enġimapkö keu jöhöyöhi, nöŋön i melaibiga uruŋine gema. Euyangörenök kukösum albi qakŋine öŋgöma. Inini siti kiangören miangöra mamböta tata malme.” Mewö.

* 24:49: Apo 1.4

Jisösnöŋ Suep mire öŋgöyök.

Mat 16.19-20; Apo 1.9-11

⁵⁰ *Jisösnöŋ keuŋi jim teköba gwarekurupŋi enġuaŋgita anda Betani miri kösutŋe aŋgota miangörenj böröŋi mem wahöta kötuatköm enġiyök. ⁵¹ Kötuatköm enġiiga miangörenjök Anutunöŋ waŋgiriga enġömosöta Suepnöŋ öŋgöyök. ⁵² Öŋgöiga söŋŋai ketarŋi möta sipköba waikŋi memba möpöseim waŋgiba Jerusalem liliŋöget. ⁵³ Liliŋöba sundan dop jöwöwöl jikenöŋ mala Anutu möpöseim waŋgiba malget. Mewö.

* 24:50: Apo 1.9-11

Jon

Ölöwak Buña Jonöñ ohoyök.

Jim-asa-asari

Jonöñ nanji qetnji Ölöwak Buña kianğoreñ auknje qahö ohoyökmö, nanñanğora kewö jiza, “Gwarek Jisösnöñ uruñan jöpaköm wanğiyök.” (19.26) Jonöñ urujöpak urukalemğö keunji kapañ köla jimakza. Jonöñ Ölöwak Buña ki mi ambazipnöñ keu kewö möt kutumegöra (20.31) ohoyök, “Jisös Kraist mi gölme aziyöhök qahö malökmö, ölña Anutugö Nahönñi aka Amötqeçe Tonji akza. Injini mönö i möt köhöiba mewö mianjön malmal köhöikñi miwikñaima.” Jisösnöñ mutuk Iwigöreñ mala keu jitña malök. (1.1) Mewö mala gölme azia aka ösum-mumuñi aka mötmötñi mi aiwesök anğöletot memba mianjön kondelök. Mi kondela bemtohoñğö könani jim asariiga tosatñan uruñini melengetka tosatñan tøndup yanğiseñ aket.

Jisösnöñ kewö akza, jiyök: Amötqeçe Tonji (4.26), malmalgö nene wötñi (6.35), miri gölme euyangö buñaya (8.23), bem koñkoñ (8.58), gölme pakpakö asakñi (9.5), nanğu (10.7), lama galöm ölöpnji (10.11), Anutugö Nahönñi (10.36), Kembu aka Böhi (13.13), kömupnöhök wahötwahöt Tonji aka malmal kömbönanji Tonji (11.25), köna, keu ölñi aka malmal köhöikñi (14.6), wain ip ölñi (15.1), kulem namñi mutukñi aka teteköñi A aka Z (Ind 1.8), Mutukñi aka Qöndökñi (Ind 1.17) aka mewö mewö.

Jisösnöñ gwarekurupñi ölña jöpaköm enğiba malöhi, goro keu qöndökñan (Boñ 13-17) mi törörök kondelja. Keu mi nahömñambuk. Kömupnöhök wahötagun Pitö mem köhöimapköra kewö qesiyök: “Ni jöpaköm ningizan me qahö? Mewö akzan ewö, mönö alaurupni köyan köl enğiman.”

Buk kianğö bahöñi bohönñi 6 mi kewö:

Keu mutukñi 1.1-18

Jon O-melun azi aka gwarekurup mutukñi 1.19-51

Jisösnöñ qenjarök nup meyök 2.1-12.50

Teteköñe Jerusalem kaba mala kömuyök 13.1-19.42

Guliba wahöta alaurupñi asuhum enğiyök 20.1-31

Galili kaba gwarekurupñi asuhum enğiyök 21.1-25

Anutugö numbu jitñi malmalñambuk.

¹ Könakönahije möpñangö möpñeyök keu jit malök. Yanjön malmalgö könani nanğöba jiba kota malök. Keu jit yanjön Anutugö qöhöröñe mala korök aka nanñak bem Anutuyöhök ahök.

² Keu jit yanjön könakönahije Anutugö qöhöröñe malök. ³ Yanğö

qöhöröñe mala baukôm wanjiiga yuai pakpak ahuyök. Yuai kun qahö baukôm wanjibawak, mi mönö qahö ahubawak. ⁴ Keu jit yanjon malmal bömöññanök ahök. Yanjöreñ malmal köhöikñi mianjon ambazip mem asarim enjiiga eka mala kotket. ⁵ Asakñan panaman uruñe asarimakzapmō, söñaupnōñ malgeri, yeñon asakñanğö könañi mi qahö möt asariba mala kotket. Mewö.

⁶⁻⁷ *Anutunōñ ambazip körek pakpak asakñi möt narimegöra möta kolek azi qetñi Jon melaiiga asuhuyök. Asuhuba kaba asakñanğö könañi indela nanğöba jiba malök. ⁸ Jonōñ nanñak asakñi mi qahö aka malökmō, yanjon mönö asakñanğö könañi mi nanğöba jiba malök. ⁹ Asak ölbölñi yanjon ambazip gölme dop mem asarim neñgim�akzawi, yanjon gölmenōñ asuhumamğö ahök.

¹⁰ Yanjon könakönahiñe gölmeñi gölmeñi miangö öröyuaini pakpak mi nam köl enjiiga ahuget. Ahugetka nanñak sutñine mala korökmō, gölme ambazipnōñ tondup i qahö möt kutum wanjiba tönpin malget. ¹¹ Mewö tönpin malgetka nanñi miri gölmeñe kaiga könagesöurupñan zikzik tököba nesampurek aka andö qem wanjiget. ¹² Mewö aketmō, denike yeñon köl öröm wanjiba qetbuñañi möta möt narigeri, yanjon mönö körek yeñgöra köna mesari kewö asuhuyök: Nanñak nam köla kukösum enjiiga ahuahu dölöknñi ahuba Anutugö nahönböraturupñi aket. ¹³ Anutugö jitsihitñan mönö nam köl enjiiga asuhuet. Gölme azinōñ jit sihitñi wuatangöba anöññambuk keu jöhöiga gölöm ala morö meiga asuhuzawi, yeñon köna mewö mianjon Anutugö nahönböraturupñi qahö aket. Mewö.

¹⁴ Keu jit yanjon azi silebuk aka sutnine anda kaba malök. Mewö maliga aködammunñi uba eka malin. Iwiñan Nahöññi mohok-kungöra aködammunñi pakpak ala aum köl wanjiiga qainñi kun maljawi, yanjon mönö miangö dop kalem möriamñan uruñi kokolak qeiga aködammunñambuk aka nalö dop keu öl töhöññi jiba malök.

¹⁵ Jonōñ azi miangö könañi nanğöba kewö qeta jiba malök, “Nöñon kungöra keu jiba malali, yanjon mönö mia akza. Kewö jiba malal: Nöñgö andöne azi kun kamawi, nöñon qahö asuhubiga yanjon mutuk malök. Miangöra yanğö qetbuñañan mönö ni nonğita öñğöñğöñi akza.” Jon O-melun azinōñ mewö jiba malök.

¹⁶ Kalem möriamñan azi miangö uruñi kokolak qeiga aködammunñambuk malöhi, yanjon mönö miangö dop kötuetköm neñgiba malök. Kötumötuetñi mi nalöñi nalöñi mokoiga

* 1:6-7: Mat 3.1; Mak 1.4; Luk 3.1-2

körek nenğö qaknine öngöi malin. ¹⁷ Mosesnönj Köna ke-unini nam köli asuhuyökmö, Jisös Kraistnönj keu ölni indel teköba Anutugö kalem möriamni nam köli aukne asuhuyök. ¹⁸ Gölme azi kunñan Anutu nalö kunönj qahö ehök. Nahönñi mohok-kunñan Iwigö wösöñe mala kota malöhi, yañön mönö gölmenönj eta könañi indel nenğii mörin. Mewö.

Jon O-melun azinönj nanñi könañi jim asariyök.

Mat 3.1-12; Mak 1.1-8; Luk 3.1-18

¹⁹ Juda jitñememe yeñön jike nup galöm aka jöwöwöl jikegö welenqeçe tosatñi Jerusalem sitinöhök melaim engigetka Jongörenj kaget. Kaba qesim wañgiba jiget, “Gi wani azia akzan? Könañamgi denöwö?” Mewö jigetka könañamni indela jii mötket.

²⁰ Könañamni qahö qañ kölökmö, aukne kewö jim mi-wikñaiyök, “Nönön Amötqeçe Tonji Kraist qahö akzal.”

²¹ *Mewö jiiga kapañ köla qesim wañgiget, “Gi mönö azi niñia akzan? Gi Elaija (Elia) akzan me qahö?” Qesim wañgigetka “Qahö!” jiyök. “Gi kezapqetok azi kun akzan me qahö?” Mewö qesigetka “Mewö qahö!” melenök.

²² Melenniga qesiget, “Gi niñia akzan? Melaim nenğigetka kazini, yeñgöra mönö denöwö melenja jiiin mötme? Gi nangi könañi denöwö jim asariman?”

²³ *Qesigetka kewö jii mötket,

“Kezapqetok azi Aisaianönj keu kun kewö jii ahöza, ‘Ni garata aka gölme qararañkölkölñe mala kewö qerakzal: Kem-bunönj kamawo!

Miañgöra inini mönö uruñini mindiñgöba könañi mesata möhamgöget.’ Ni miañgö kolek garatañi akzal.”

²⁴ Azi melaim engigetka Jongörenj kageri, mi Farisi (Köna keugö kapañkölköl) azia aket. ²⁵ Yeñön kunbuk kewö jiba qesim wañgiget, “Gi Amötqeçe Tonji Kraist qahö akzan aka Elaija (Elia) me kezapqetok azi yeñgörenök kun qahö akzani, miañgöra mönö wuanöngöra ambazip o melun mem engimakzan?”

²⁶ Qesim wañgigetka kewö melenj engiyök, “Nönön o töhönönj engömirimakzalmö, azi kun inini qahö möt kutuzei, yañön lök sutñine kinja. ²⁷ Azi kun nöngö andöne kamapköra jiba malali, yañön mönö mi. Yañön kaiga ketañamni aka malma. Miañgöra nöñön yañgö kösutñe anda wayangösöñi tenğöba köna esuñangö kösöñi pösatmamgö qötötangömam.”

²⁸ Jonönj Jordan o likepñe miri qetñi Betani miañgörenj mala ambazip o melun mem engiba malök. Yuai mi mönö miañgörenj asuhuyök. Mewö.

* 1:21: Dut 18.15, 18; Mal 4.5 * 1:23: Ais 40.3

Jonöñ Jisösgöra “Anutugö lama moröñi,” jiyök.

²⁹ Mi asuhuiga miri gianjiiga Jonöñ Jisös tikep kaiga eka jiyök, “Eket, azi mi Anutugöreñ lama moröñi. Yañön mönö gölmeñi gölmeñi nengö singisöndoknini köl könjörari solanibin. ³⁰ Nöñön kungöra keu jiba malali, yañön mönö mia akza. Kewö jiba malal: Nöñgö andöne azi kun kamawi, nöñön qahö asuhubiga yañön lök mutuhök malök. Miangöra yangö qetbuñajan mönö ni nongita öngöngöñi akza. ³¹ Nöñön i mutuk qahö möt kutubalmö, Anutunöñ könañamñi Israel ambazip nengöra indeli mötpingöra mötza. Mi möta ni melaim niñgiiga kaba o melun mem enjimakzal.”

³² Jonöñ mewö jiba dangunu ewö kinda nangöba kewö jiyök, “Uña Töröñan mönö Suepnöhök eta kembö nei ewö yangö nöropñe eta köla tari ehal. ³³ Nöñön i mutuk qahö möt kutuba malalmö, kunöñ ambazip o melun mem enjimagöra melaim niñgiyöhi, yañön kewö jii möral, ‘Uña Töröñan kungö nöropñe eta köla tari ekñani, yañön mönö Uña Töröñi ambazip uruñine ala melun mem enjima.’ ³⁴ Nöñön mi ehalangöra aka könañamñi kewö nangöba jizal, ‘Yañön Anutugö Nahöññi akza.’” Mewö.

Jisösnöñ gwarekurupñi mutukñi engholök.

³⁵ Mewö jiiga miri gianjiiga Jonöñ kunbuk o jitñe miangöreñök aniga gwarekurupñi yengöreñök yahötñan yambuk mohotñe kinget. ³⁶ Kingetka Jisösnöñ miangöreñ enghongita anöhi, i törörök uba ehiba jiyök, “Azi mi ehot. Yañön mönö Anutugöreñ lama moröñi ewö akza.”

³⁷ Mewö jiiga gwarek yahöt yetkön keu mi möta Jisösgö andöñe anohot. ³⁸ Anohotka Jisösnöñ lilingöba andöñe kayohori, i etkeka kewö qesim etkiyök, “Injiri niñia jaruba kaza-hot?” Mi möta jiyohot, “Ketañamniri! Gi miri denike ahöba maljan?” (Juda yeñön ‘Ketañamnini’ keu mi böhigöra jiget.)

³⁹ Mewö jiyohotka melenök, “Mönö kaba ehot!” Mewö melenñiga wehön möñaiiga 4 kilok miangö dop ahök. Wehön möñaiiga miangöreñ mohotñe anda miri denike ahöba malöhi, mi eket. Mi eka miangöreñ yambuk malohotka miri söñaubu sunjem aiga mosöta kayohot.

⁴⁰ Jonöñ keu jiiga gwarek yahötñan möta Jisösgö andöñe anohori, yetköreñök kungö qetñi Andru, datñi qetñi Saimon Pitö. ⁴¹ Andru yañön mutuk datñi Saimon miwikñaiba kewö jii mörök, “Niri Amötqeqe Toñi mönö miwikñaizit.” Amötqeqe Toñi mi Grik keunöñ Kraist. ⁴² Mewö jiba datñi wanñita Jisösgöreñ anohot. Anohotka Jisösnöñ Saimon törörök uba

ehiba jiyök, “Gi Saimon, Jongö nahönñi akzanmö, nöñön qetki Sifas qetpi ahöma.”* Mewö.

Jisösnöñ Filip aka Natanael etkoholök.

⁴³ Miri gianjiiga Jisösnöñ Galili prowinsnöñ anmamgö möta anda könanöñ azi qetñi Filip miwikñaiba kewö jii mörök, “Gi mönö ni nuatanğöba kaman!” ⁴⁴ Filipnöñ Andru aka Pitö yetpuk mirinini mohok. Taonñini qetñi Betsaida.

⁴⁵ Filipnöñ azi qetñi Natanael miwikñaiba kewö jii mörök, “Mosesnöñ azi kungöra Köna keunöñ ohoba kezapqetok yeñön toroqeba ohoget ahözawi, nini mönö azi mia miwikñaizini. Azi mi qetñi Jisös, iwiñi qetñi Josef, mirinji qetñi Nazaret.”

⁴⁶ Natanaelnöñ mi möta welipköba jiyök, “O Nazaret! Mi miri qandakña. Yuai ölöpnji kun mönö mianğöreñök asuhumawanğö dop qahö.” Mewö jiiga Filipnöñ jii mörök, “Mönö kaba nangak ek kutuman!”

⁴⁷ Mewö jii möta Jisösgöreñ kaba asuhuiga eka yanğöra keu kewö jiyök, “Eket! Azi kianğön mönö Israel azi ölnji akza. Uruñe munen geñmonji kun qahö.”

⁴⁸ Mewö jiiga Natanaelnöñ qesim wangiba jiyök, “Gi mönö denöwö aka ni möt kutum niñgizan?” Mewö jiiga Jisösnöñ melenđa jiyök, “Gi fig ip† könañe tatnönğa gek kutuyal. Mutuk gek kutubiga Filipnöñ mianğö bapñe geke goholök.”

⁴⁹ Mewö jiiga Natanaelnöñ melenđa jii mörök, “O Ketañamni, gi mönö ölnja Anutugö Nahönñi akzan. Gi Israel nenğöreñ azi Kembuya maljan!”

⁵⁰ Mewö jiiga Jisösnöñ melenđa jiyök, “Ni mutuk kewö jizal, ‘Gi fig könañe tatnönğa gek kutuyal.’ Mewö jim miwikñaizalanğöra ölöpn möt narim niñgizan. Anutugöreñ kukösum ki eka mötzani, mi mönö yuai kötonğökñi akza. Ölnji ketañi mi mönö bian eka möta malman.”

⁵¹ *Mewö jiba toroqeba jii mörök, “Nöñön keu öln töhönñi kun kewö jibi mötnöñ: Könañgep nöngö gwarekurupni aketka kutum enğuasöriğa imut kewö ekñe: Suep nangunöñ taliga Anutugö garataurupñan asuhuba Suep gölmegö Azi Ölnji yambuk nariba yanğöreñ eta öngöba aketka enğekñe.” Mewö.

2

Jisösnöñ o mem letoriga wain ahök.

¹ Jisösnöñ Filip aka Natanael etkoholiga silimñi karöbut teköi malgetka kunöñ ambi memegö maren lömbuan ali

* **1:42:** Sifas mi Grik keunöñ Pitö, nanine keunöñ köt jamönñin. † **1:48:** Fig mi sambu ewöya. Mi nupñine kömötkeka kötnji nahöñjambuk asuhuiga mi nalö

gwötputk nezema. * **1:51:** Jen 28.12

tokoget. Mi Galili prowinsgö miri qetnji Kana mianğörej alget. Jisösgö namñan mianğörej mohotñe ani malget. ² Jisös aka yangö gwarekurupnji mi mewöyök öröm engigetka lömbuanñöñ mohotñe malget. ³ Mianğörej malgetka wain onöñ qahöwahiga Jisös namñan nahönñanğöra jiyök, “Yeñğörej wain o qahöwakza.”

⁴ Mewö jiiga kewö jii mörök, “Namni, mi denöwö akñamğöra jizan? Jim kutum niñgizan me? Nöngö anğöletot meme nalönan mönö qahö kam kuñguiga maljal.”

⁵ Mewö jii möta welenqeçe yeñğöra kewö jiyök, “Yañön yuai kungöra jim kutum engimawi, mi iñini ölöp akñe.”

⁶ Juda yeñön amöt qem anğubingöra Köna keuñini wu-atanğöba böröñini sanğonmaljema. Mianğö dop miri mianğörej köurañen ketanji 6 tarök. Köurañen mohot mohot mi o gina 8 me 12 mianğön geba kokolak qenahanğö dopñan tatket.

⁷ Jisösnöñ mi eka kewö jii mötket, “Iñini mönö o uba kaba mokogetka köurañen ki kokolak qeget.” Mewö jii möta jiyöhanğö dop aket. ⁸ Köurañen mi kokolak qegetka kewö jim kutum engiyök, “Mönö o qakñi tosatñi uba anda lömbuan galöm wañgime.” Jim kutum engiiga memba anget.

⁹ Uba angetmö, galömnöñ o letota wain ahöhi, mi nemba möta denikeyök memba kageri, mi qahö möt asariba auruyök. Auruyökmö, welenqeqenöñ o ugeri, yeñön mi möta jigetka galömnöñ maren toñi oholi kayök. ¹⁰ Kaiga kewö jii mörök, “Maren nalöñe körek pakpak yeñön wain o ölöpñi mi mutuk memba kaba engimakze aka mi nemba enololon aketkun wain o nahömñi qahö mi könanğep engimakze. Göñön wain o ölöpñi mi mutuk anğön köla qahö engiba dölki nalö onğita memba kazan. Mi silik murutñi kun akzan.”

¹¹ Jisösnöñ anğöletot mutukñi ki mi Galili prowinsgö miri qetnji Kana mianğörej meyök. Mi memba mewö mianğön kukösumñi indeliga asuhuyök. Mi asuhuiga gwarekurupñan möt narim wañgiet.

¹² *Közölömbuanñöñ malget teköiga Jisös, yangö nam-munñi aka gwarekurupñi yeñön miriñine Kaperneam anget. Mianğörej anda sömañ tosatñi toroqeba malget. Mewö.

Jisösnöñ jöwöwöl jike jim kömbuhiyök.

Mat 21.12-13; Mak 11.15-17; Luk 19.45-46

¹³ *Nalö mianğörej Juda neñğörej ak-kömükömu kendon nalöñan dopdowiyök. Anutunöñ mönöwök neñgehori-
ba neñğonğirohi,* mianğöra söñgaibingö aketka Jisösnöñ

* 2:12: Mat 4.13 * 2:13: Eks 12.1-27 * 2:13: Anutunöñ Ijpt mianğörej Israel ambazip neñgehori-
ba neñğonğirök, mianğö sö söñgainji mi Nei keunöñ Pasowa. Eksodus, Mekömekö 12.15

mewöyök miriņi mosöta Jerusalem sitinöņ öņgöyök. ¹⁴ Sitinöņ öņgöba jöwöwöl jikegö tohoņ uruņe anda yuai kewö miwikņaiyök: Ambazip bulmakau aziņi, lama aka kembö nei mi bohonņi memegöra alget aka tosatņan monerņ utekutek albingöra tatkeri, mi eņgehök.

¹⁵ Mi eņgeka kösönöņ tapep (munğamunğa) mönjöņda mianöņ eņgohotiriba eņguyök. Eņguba ambazip mi körek közöl eņgiba lama bulmakaunįambuk jöwöwöl jikenöhök eņguatanğöyök. Utekutek ambazip yeņgö souje kötņini metaliga mokoba eriga tebolņini metali anget. ¹⁶ Kembö bohonņini memegöra algeri, ambazip mi kewö jim eņgiyök, “Yuai mi mönö memba kesala yaigep anget. İņini nöņgö Iwinanğö jöwöwöl jikeņi ki mönö wuanöņgöra utekögetka kölköl-örörö miri ewö akza?”

¹⁷ *Mewö jįiga Buņa keu kun gwarek yeņgö mötmötņine kaņgoriga mötmöriget. Keu mi kewö ohoget ahöza, “Nöņgö urunan göhöreņ jike mi kömbukņi ahömapköra kapan kölbiga mianöņ urune newaņ könöp ewö jeiga waimanjat mianöņ kawöl miwikņaimakzal.”

¹⁸ Mi közöl eņgiiga Juda jįtememe yeņön tembula wahöta Jisösgöreņ kaņgota kewö qesim waņgiget, “Gi mönö wani aņgöletot kun aknöņga kukösumgi ehinga dop köl neņgiigun kimbi mewöņi akanak?”

¹⁹ *Mewö qesim waņgigetka kewö melen eņgiyök, “İņini jöwöwöl jike ki köndengetka gölmenöņ eriga nöņön mi wehön karöbutkö uruņe memba wahöta kuņgumam.”

²⁰ Melen eņgiiga kewö jiget, “Yambu (yara) 46:gö uruņe jöwöwöl jike ki memba mala mem tekögetka asuhuba kinja aiga göņön mi wehön karöbutkö uruņe mönö denöwö aka memba wahöta kuņgubanak?”

²¹ Mewö jigetmö, Jisösnöņ jikegö keu mi nanņi silenanğö söpsöpņa ala jiyök. ²² Jisösnöņ könanğep kömupnöhök wahöriga söpsöp keu jiyöhi, mi nalö mianğöreņ gwarekurupņi yeņgö mötmötņine kaņgori ölöp möt asariget. Mi mötmöriba Jisösnöņ keu jiyöhi, mi aka Buņa keu ohogeri, mi pakpak möt nariget. Mewö.

Jisösnöņ ambazip könanğamnini möt teköza.

²³ Jisösnöņ Jerusalem sitinöņ ak-kömukömu kendongö nalöne mala aņgöletot kukösumņambuk meyöhi, mi ambazip gwötņukņan eka qetņi möt nariba yaņğöreņ lapingöget. ²⁴ Lapingögetmö, Jisösnöņ ambazip pakpak yeņgö könanğamņini möt kutum teköyök. Mewögöra ambazip pakpak qahö möt narim teköm eņgiba keuņinanğö bapņe qahö anda malök. ²⁵ Ambazip uruņine keu yuai ahöyöhi, Jisösnöņ kuņņan

* 2:17: Sum 69.9 * 2:19: Mat 26.61; 27.40; Mak 14.58; 15.29

ambazip uruñinangö könañi mi indela kondel wañgimawangö dop qahö ahök. Mönö nanñak mi ölop möt kutum teköyök. Mewö

3

Jisösnöñ Nikodemus urumelenğö könañi kusum wañgiyök.

¹ Juda könagesögö jike kaunsöl sutñine jitñememe azi kun getñi Nikodemus malök. Yañön Farisi (Köna keugö kapañkölköl) kambunöñ kinök. ² Yañön sunğem kunöñ Jisösgöreñ kañgota kewö jii mörök, “Ketañamni, gi añğöletot memakzani, mi azi kunñan Anutu yambuk qahö kiniga nanñök memamğö osimakza. Mianğöra gi Anutunöñ nam köl gihiiga böhi akzan, mewö mötzin.”

³ Mewö jiiga kewö jiba melen wañgiyök, “Nöñön keu öl töhöññi kun kewö jibi mötnöñ: Kunñan Anutugöreñök ahuahü dölökñi qahö ahuma ewö, yañön mönö Anutugö bemtohoñe añgota ekñamğö osima.”

⁴ Melen wañgiiga kewö jiyök, “Kunñan lök ahuba ambazip namñi aka malagun ahuahü dölökñi mönö denöwö ahubawak? Yañön mönö nam körö uruñe añğori kunbuk gölöm ala memamğö osima.”

⁵ Mewö jiiga kewö melenñök, “Nöñön keu öl töhöññi kun kewö jibi mötnöñ: Kunñan o melun mem wañgigetka Uña Töröñan uruñe geiga mewöñi mianñön ahuahü dölökñe qahö ahüza ewö, mewöñi mianñön mönö Anutugö bemtohoñ uruñe añgotmamğö osima. ⁶ Gölmegö iwinam eñğöreñök morö ahuzawi, mi gölme moröya. Uña Töröñan inahöba nam köliga morö asuhumakzawi, mi mönö Suepkö moröya.

⁷ “Mewögöra inñi ahuahü dölökñi Anutugöreñök qahö ahume, mianñön mönö qahö dop kölja. Keu mi jibiga mianğöra mönö kude auruman. ⁸ Luhutnöñ nanñi imbi-imbilaj giliga ötöñi mörakzanmö, mi denikeyök kaba gilakza aka denike gila anakzawi, gi mianğö könañi qahö möt asarizan. Uña Töröñan ambazip nam köl eñgiiga ahuahü dölökñe ahugeril, körek yeñğö könañinan mönö luhut mianğö dop akza.”

⁹ Mewö melenñiga Nikodemusnöñ köñkuñ aka kewö jiyök, “Mi ahakö dop qahö.”

¹⁰ Mewö jiiga Jisösnöñ jiyök, “Gi Israel könagesö kusum neñgimakzan aka töndup keu mianğö könañi qahö möt asarizan. Mi kude dop kölja. ¹¹ Nöñön keu öl töhöññi kun kewö jibi mötnöñ: Neñön wania möt kutuzini, mi jiba indelakzin aka wania jeninan eka mötzini, mi nañğöba jimakzin. Mewö ahakzinmö, eñön töndup Buña keunini mi qahö möt añğön kölakze.

¹² “Gölmegö yuainñi jenöñ ehekñi mianğö keunñi jibiga möta qahö möt narim niñgize ewö, nöñön Suepkö yuainñi qahö

ehekñi mianğö kónañi jibiga mötmei, mi mönö denöwö möt naribeak? ¹³ Gölmeğö azi kunñan Suepnöñ qahö öñğöyökmö, Suep gölmeğö Azi ölnan Suep mire mala eta asuhuyöhi, yañön mönö lilingöba Suepnöñ öñğöma.

¹⁴ *“Anutunöñ Moses gölme qararankölkölñe jim kutui kopö ainöñ mokoleñ imutñi memba tohotnöñ kösököi kinöhi, mianğö dop Suep gölmeğö Azi Ölni mi kösökögetka öñğöba kinma. ¹⁵ Ambazip i möt narim wañgizei, yeñön körek pakpak malmal köhöikñi miwikñaiba malmegöra aka eu öñğöma.

¹⁶ “Mianğö kónañi kewö: Ambazip i möt narim wañgizei, yeñğöreñök kunñan ayuhubapuköra Anutunöñ gölme dop önöñi qahö jöpaköm neñgiyök. Neñön körek letota malmal köhöikñañğö buñaya akingöra mönö Nahönñi mohotsirik mi neñgiyök. ¹⁷ Ambazip gölme dop mal anjini, Anutunöñ Nahönñi neñğö keunini jim tekömapköra aka qahöpmö, Nahönñan amöt neñguiga kantri dop letota oyaenköyaeñ akingöra aka melaiiga gölmenöñ erök.

¹⁸ “Ambazip kunñan Nahönñi möt narizawi, Anutunöñ yañğö keuñi jim teköiga qahö ayuhumapmö, kunñan Jisös qahö möt narim wañgizawi, Anutunöñ yañğö keuñi lök jim teköiga malja. Anutugö Nahönñi mohotsirikö qetñi qahö möt narizawañğöra aka könöp siagö buñaya akña. ¹⁹ Anutunöñ gölme ambazip keunini jim tekömakzawi, mianğö kónañi kewö: Asakñan lök gölmenöñ eta asuhuyökmö, ambazipnöñ ahakmeme bölöñi bölöñi aka memba malget. Mewö mala Anutugö asakñi tököba uruñini söñaupkö ahakmemenöñ lan jöhöba mala kotket.

²⁰ “Körek pakpak ahakmeme bölöñi ahakzei, yeñön Anutugö asakñi tököba andö qemakze. Anutunöñ ahakmemeni bölöñi bölöñi mi indela jim enğıga gamuñini mötpepuköra keñğötñini mörakze. Mi möta asakñañğö uruñe qahö anğorakze. ²¹ Qahö anğorakzemö, kunñan kun keu ölni wuatñağöba maljawı, yañön ölop asakñañğö uruñe kañgotma. Anutunöñ sölölohöm wañgiiga ahakmemeni aka memba malöhi, mianğöra ahakmemeni mianñön aukñe asuhumapköra mötza.” Mewö.

Jon O-melun azinöñ Jisösgö kónañi jim miwikñaıyök.

²² Jisösnöñ mewö jim teköba kinda gwarekurupñi enğuanğita Jerusalem siti mosöta Judia prowinsğö miri andöñe anget. Mianğöreñ anda gwarekurupñi yembuk sonda tosatñi toroqeba yembuk mala ambazip o melun mem enğiba malök. ²³ Jisösnöñ mewö malökmö, Jonöñ mewöyök miri qetñi Salim mianğö kösutñe malök. Miri qetñi Ainon mianğöreñ o jök ahöyök aka ambazipnöñ Jongöreñ kañgota o melun mem

* 3:14: Jan 21.9

enġimapkö qesigetka amqeba mem enġiba malök. ²⁴ *Nalö mianġoreġ Jon mi kösö mire qahö algetka tarök.

²⁵ Juda yeġön amöt qem anġubingöra böröjini sanġonmaljema. Mewögöra Jongö gwarekurupġi yeġön Juda azi kunbuk keu mianġö goranora aka könahiba jitnakölik jiget. ²⁶ Mewö jigetka lömböriiga Jongöreġ kaba kewö jiget mörök, “Ketanġamnini mötnöġ, azi Jordan o likepġe göbuk maliga nangak könaġamġi naġgöba jinöġi, yaġön ambazip o melun mem enġiiga jesöġgöġan mönö yaġgöreġ anakze.”

²⁷ Jonöġ mi möta kewö meleġnök, “Anutunöġ azi kungöra yuai kun Suepnöhök qahö al waġgibawak ewö, yaġön mönö mi buġa qem anġumamgö osiza. ²⁸ *Yambuk mala kewö jial, ‘Ni Amötqeqe Tonġ Kraist qahö akzalmö, Anutunöġ melaim niġgiiga mutuk kazala yaġön andöne kama.’ Nöġön keu mi jiali, inġini mi öläp nanġinak naġgöba jiba malbeahaġgö dop akze. ²⁹ Mianġö keuġi dop ala kewö jimam: Azi kunġan ambi buġaġambuk aka ambi memamgöra sösoġgai keu jim sehiba malġa. Mewö maliga azi alaġan kösutġe kinda sösoġgai keuġaġgö jölġi möta yaġgöra önöġi qahö söġgaimakza. Mianġö dop nöġön Jisösgö alaġi aka yaġgöra söġgaibiga sösoġgai mi-aġön dölkö uruni kokolak qeiga malġal. ³⁰ Jisösgö qetbuġaġan qarim sehiiga nöġgöreġan mönö waziiga dop kölma.” Mewö.

Jisösnöġ Suepnöhök eröhaġgö könaġi jiyök.

³¹ “Daġön euyaġgöreġök eröhi, yaġön ambazip körek pakpak enġonġita öġgöġgöġi akza. Kunġan gölmenöġ asuhuba gölmegö buġaya akza aka gölmenöġ malmalgö keuġi jimakza. Suepnöhök eta kayöhaġön mönö körek pakpak enġonġita öġgöġgöġi akza. ³² Yaġön yuai eka möt kutuba malöhi, mianġö könaġi jiba naġgöba dangunu ewö kinġa. Mewö kinġapmö, naġgönaġgö keuġi mi ambazip kunġan kun qahö möt anġön kölġa.

³³ “Ambazip kunġan naġgönaġgö keuġi möt anġön kölġawi, yaġön Anutu ölbölġi akzawaġgö keuġi mem köhöiiga pöwöwömġi akġa. ³⁴ Anutunöġ kolek aziġi melaiba Uġaġi Töröġi musa qakġe qahöpmö, kelenmaleleġ waġgimakza. Mianġöra kolek aziġan mönö Anutugö keu töhöġi indela jimakza. ³⁵ *Iwinöġ Nahönġi uruġan jöpaköm waġgimakzawaġgöra aka yuai pakpak buġa qem waġgiba böröġe ali ahöza.

³⁶ “Ambazip kunġan Nahönġi möt nariba uruġi melenġawi, yaġön mönö kunbuk letota malmal köhöikġaġgö buġaya akza.

* **3:24:** Mat 14.3; Mak 6.17; Luk 3.19-20 * **3:28:** Jon 1.20 * **3:35:** Mat 11.27; Luk 10.22

Kunjan Nahönjanjö keunji qahö tem kölakzawi, Anutugö ir-
 imsesewöljan mönö yangö qakne öngöba pöndañ kini malmal
 köhöikjanjö könañi qahö ek kutuba önewat lanj malja.” Mewö

4

Jisösnöñ Samaria ambi kunbuk keu eraum mörohot.

¹ Jisösnöñ mewö ambazip kusum enjiiga gwarekurupñi
 aketka o melun mem enjiba mewö mianjón Jon O-melun azi
 luhut ala malöhi, keu mi Farisi (Köna keugö kapañkölköl)
 yengö kezapñine gei mötket. Yenön mi mötkeri, buzup mi jiget
 sehiba Kembugö kezapñe gei mörök. ² Jisösnöñ nanjak am-
 bazip qahö o melun enjyökmö, yanön jiiga gwarekurupñan
 mi aket. ³ Mi möta Judia prowins mosöta lilingöba kunbuk
 Galili prowinsnöñ göröken anget. ⁴ Köna mewö anda Samaria
 prowins ongita anget.

⁵ * Ongita anda Samaria prowinsgö taonñi kun qetñi
 Sikar mianjöreñ angorök. Sikar taon mi Jeikobnöñ gölme
 bahöñi kun nahönñi Josef wanjiyöhi, mianjö kösutñe ahöza.
⁶ Jeikobkö o lömñi diginñambuk mi Sikar taonöñ ahöza.
 Jisösnöñ köna kayöhanjöra aka silenji lömböriiga silim bibiñe o
 lömñi mianjöreñ angota kösutñe eta tarök.

⁷ O löm kösutñe tariga Samaria ambi kunöñ o umamgö
 kayök. Kaiga Jisösnöñ eka kewö jii mörök, “Gi ölop o niñginöñga
 nembilenjak.” ⁸ Nalö mianjöreñ gwarekurupñan nene bo-
 honñi mendingöra i mosöta taonöñ angetka nanñirök kino-
 hot.

⁹ * Juda ambazipnöñ Samaria prowins qepureim enjiba
 yembuk köisirik qahö maljema aka pake mohot mianjón o
 qahö uzema. Mewögöra nanñirök kinohot mianjöreñ am-
 binöñ kewö jii mörök, “Gi Juda azia aiga ni Samaria am-
 biapmö, denöwögöra ‘O niñginöñga nembilenjak,’ jiba qesim
 niñgizan?”

¹⁰ Jisösnöñ qeçesi mi möta kewö melen wanjiyök, “Gi Anutu
 kalemjanjö könañi möt kutunöñga dop kölbawak. Dañön ‘O
 niñginöñga nembilenjak,’ jiba qesim gihizawi, yangö könañi
 möt asaribanak ewö, i mönö qesinöñga malmalgö onji gi-
 hibawak.”

¹¹ Mewö jiiga kewö jii mörök, “O ketañamni, o umamgö
 pakegi kun qahö ahöza aka o löm kianjón mönö diginñambuk
 akza. Mianjöra malmalgö ögöra jizani, mi mönö denikeyök
 miwikñainöñga ahubawak? ¹² Isik bömönini Jeikob yanön o
 lömñi ki nenjiyök. Yanön mutuk nanjak aka yangö andöñe
 nahönurupñan ki kaba o uba nempa maljema aka bulmakau
 kambunji kambunji o enjigetka nempa maljema. Gi Jeikob

* 4:5: Jen 33.19; Jos 24.32

* 4:9: Esra 4.1-5; Neh 4.1-2

onḡita öngöngöñi aka ambazip o mem sehim enḡimamgö jizan me?”

¹³ Mi möta Jisösnöñ kewö meleşnök, “Ambazip köreḡñan o ki nembagun mönö kunbuk ogö kömumba nembingö mörakñe. ¹⁴ Mewö malmemö, nöñön kungöra o waḡimami, yañön mi nembagun nalö kunöñ ogö kunbuk qahö kömuma. Mewö qahöpmö, o waḡimami, mi mönö yaḡgö uruñe letota malmalgö o jeñi jöpjöpköñi qahö aiga malma. Mewö mali mönö uzumgöba malmal köhöikñi teteköñi qahö waḡimakñe.”

¹⁵ Mewö meleşniga ambinöñ jiyök, “O ketañamni, gi mönö o mia niḡinöñga nemi. Mi nembagun nalöñi nalöñi kunbuk ogö qahö kömumbilenjak aka o umamgöra ki könasöksök qahö tibilenjak.”

¹⁶ Mi jiiga kewö jim kutum waḡiyök, “Gi mönö anda apki waḡita ki kamahot.”

¹⁷ Mewö jim kutum waḡiiga “Ni apni qahö,” jiba meleşnök. Meleşniga kewö jii mörök, “Gi ‘Apni qahö,’ keu mi törörök jizan. ¹⁸ Gi öñña azi 5 enḡömembra malnöñ aka merak kun memba maljani, yañön mönö göhö apki qahö akza. Keu jizani, mi ölä töhöñña.”

¹⁹ Ambinöñ mi möta kewö jii mörök, “Ketañamni, gi mönö kezapqetok azi qainñi kun akzan. Nöñön tandöki mewö gek kutum gihizal. ²⁰ Neḡgö ambösakonurupninan kundunji kondela kiangören öngöba sipköba köuluköba malgetmö, Juda enön kewö jimakze, ‘Samaria enön mönö Jerusalem sitinöñ öngöba jöwöwöl jikenöñ sipköba köulukögetka dop köñja.’ ”

²¹ Mi möta Jisösnöñ kewö jim kutuyök, “O ambi, nalö kun kam kuḡuma. Inini nalö miangören Iwi waikñi memba möpöseibingöra kundunji kiangören me Jerusalem miangören qahö öngöba malme. Gi keu mi öläp möt narinöñga dop köñma. ²² Samaria inini Anutugö köñañi törörök qahö möt kutuba töndup yaḡgö waikñi lañ memba möpöseimakze. Amötqeqegö köñañi mi Juda neḡgö sutnine aukñe asuhuba ahöza. Miangöra Juda neñön Anutuninaḡgö köñañi möt kutuba waikñi memba möpöseininga dop köñja.

²³ “Töndup nalö kun kewö asuhuma: Nalö miangören Uña Töröñan ambazip sölölohöba inahöm enḡiiga keu öññi wuataḡöba Iwi waikñi memba öñña möpöseiba malme. Iwininan ambazip mewöñi jarum enḡiba asuhumegöra sihimñi möta malja. Nalö murutñi miangön mönö lök kam kuḡguba döñki ahöza. ²⁴ Anutunöñ Uñaya akza. Miangöra Uña miangö waikñi memba möpöseimakzei, yeñön mönö Uña Töröñan sölölohöba inahöm enḡiiga keu öññi wuataḡöba möpöseiba malme.”

²⁵ Jisösnöñ mewö jim kutuiga ambinöñ jii mörök, “Amötqeqe Toñi qetñi Kraist qetzei, yañön kamamgö akza, mi mötzal.

Yañön kamawi, nalö miangören mönö keu pakpak indel nenngiiga mötpin.”

²⁶ Jisösnöñ keu mi möta könañi kewö indelök, “Göbuk ki kinda keu eraum mötziri, nöñön mönö mia akzal.” Mewö.

Gwarek yeñön kaba yetpuk toroqeget.

²⁷ Könañamñi indeliga gwarek yeñön miangörenök lilingöba kaget. Kaba ambibuk eraum mörohot, mi eka welipkögetmö, kunöñ kewö qahö qesiyök, “Gi denöwögöra yambuk keukeu jizahot?” me “Wanigöra ak gihiza?” Mewö qesibingö mötketmö, körekñan ölöñ tatket.

²⁸ Ölöñ tatketka ambinöñ o pakeni mosöta taonöñ anda ambazip yeñgöra kewö indela jii mötket, ²⁹ “Mötket! Nöñön azi kun miwikñaibiga yuai pakpak aka malali, miangö könañi indela jii mötzal. Miangöra yañön mönö Amötqege Tonji Kraist akapuk. Mönö nanñinak kaba azi mi ekñe.” ³⁰ Keu mi möta taon mosöta öröba Jisösgören anget.

³¹ Gwarek yeñön nalö sutñe miangören Jisös qesim wañgiba kewö jiget, “Ketanamñini, ölöp nene nenöñ.”

³² Mewö jigetmö, kewö jiyök, “Nöñön nenenamni qainñi kun memba maljali, inñini miangö könañi qahö möt kutuze. Qahö!”

³³ Mi möta nanñini qesim añguba kewö jiget, “Kunñan nene kun memba kaba wañgiza me denöwö?”

³⁴ Mewö jigetka kewö jii mötket, “Melaim niñgiiga kayali, nöñön yañgö jitñi tem köla nupñi mem sorokömakzali, miangön mönö nöñgö nenenamni akza. ³⁵ Inñini keu kewö jibepuk, ‘Köiñ 4 kunbuk ahöiga ölöm-izi-izi nalöñan törima.’ Mötket, nöñön miangöra kewö jizala kezap alget: Nup bonji ketanñi miangö öljinan lök öliiga meme nalöñinan kam kuñguza. Inñini mönö jeñini uget aniga mi uruñine ek kutume. ³⁶ Tosatñan mutuk keu kötni qesinñi gila malgetka öljnan nalö kewöñe asuhuiga tosatñan mi lök tokoba töwanñini megetka ambazipñi ambazipñi malmal köhöikñangö buñaya ahakze. Mewö asuhuiga öljni meme yeñön qesinñi gilgil ambazip yembuk mindiriba mohotñe söñgaiba simbawon mötze.

³⁷ ‘Kunöñ kötni qesinñi giliga kunöñ öljni mezawi,’ keu mewö jimakzei, mi keu öljna. Mi Anutugö nup memegö könañi indelja. ³⁸ Nöñön inñini melaim engibiga nup qainñi kunöñ nanñinak yuai kötni qahö kömötkeri, mönö nup miangören anda öljni meme. Tosatñan mutuk silenñini qeba nup memba malgetka eñön yeñgö könañine anda nup megerangö öljni miwikñaiba memakñe. Mewö melaim engizal.” Mewö

Samaria ambazip gwötpukñan uruñini melenget.

³⁹ Samaria ambinöñ keu kewö nañgöba jiyök, “Nöñön azi kun miwikñaibiga yuai pakpak aka malali, yañön mönö

mianğö könanji indela jii mötzal.” Mewö jiyöhanğöra Samaria ambazip gwötpukñan Sikar taon mianğöreñ uruñini melenđa Jisös möt narim wañgiget. ⁴⁰ Möt narim wañgiba yañğöreñ kaba yembuk toroqeba malmapköra kapan kôla qesigetka silim yahötkö dop toroqeba mianğöreñ malök.

⁴¹ Mewö mala keu jiba malöhanğöra aka gwötpukñan Jisös möt nariba toroqem wañgigetka kambuñini qariyök. ⁴² Toroqem wañgiba ambigöra kewö jiget, “Azi kianön ölña gölmenji gölmenji neñğöreñ Amötqeqe Tonina akza. Neñön mi göhö keugörök qahö toroqeba möt narizinmö, mi naninak kezap ala möta möt kutuzin.” Mewö.

Jisösnöñ jembon azi kungö nahönñi mem ölöwahök.

⁴³ Jisösnöñ Samaria maliga silim yahöt teköiga engömosöta Galili prowinsnöñ anök. ⁴⁴ *Jisösnöñ nanñak nalö kunöñ keu kun kewö nañğöba jiyök, “Kezapqetok ambazip kunñan nanñe miri gölmenöñ maliga yañğöra qahö mötket öngöiga göda qahö gem wañgimakze.”

⁴⁵ *Mewö jiyökmö, töndup nalö mianğöreñ nanñe Galili prowinsnöñ kañgoriga mianğöreñ mewöyök tosatñan jölöñi jiget. Yeñön ak-kömukömu kendongöra Jerusalem sitinöñ öngöba Jisösnöñ kendon nalöñe angöletot meyöhi, mi pakpak eka mötket. Mianğöra nalö mianğöreñ ölop köl öröm wañgiget.

⁴⁶ *Galili prowins yeñön köl öröm wañgigetka miri qetñi Kana mutuk o meiga letota wain ahöhi, mianğöreñ kunbuk kayök. Taon qetñi Kaperneam mianğöreñ kiñ kembugö jembonñi kun malök. Yañğö nahönñan kawöl yöhöiga ahöyök.

⁴⁷ Ahöba kömumamgö ahök. Mianğöra Jisösnöñ Judia prowins mosöta Galili uruñe kayöhi, yañön mianğö buzupñi möta Jisösgöreñ anda kewö qesim wañgiyök, “Gi ölop kaba nahöni mem ölöwak wañgiman.” ⁴⁸ Qesim wañgiiga kewö jii mörök, “Inini ni öne qahö möt narim niñgimeañğö dop akzei, mi qahö dop kölja. Nöñön angöletot aiwesök membi ekagun mönö amqeba ni möt narim niñgiba uruñini melenbeak.”

⁴⁹ Mewö jii mörökmö, jembonöñ kewö jiyök, “Ketanamni, nahönan kömumbapaköra mönö ösumok kaman.”

⁵⁰ Mewö jiiga melenj wañgiyök, “Nahöngan mönö ölöwaka malma. Mianğöra mönö ölop lilingöba anman.” Mewö melenj wañgiiga yañön mi möt nariba lilingöba anök. ⁵¹ Anda könönöñ maliga welenqeçeurupñan kaba miwikñaiba kewö jiget mörök, “Nahöngan lök ölöwaka malja.”

⁵² Mi möta qesim engiba jiyök, “Wani nalönöñ könahiba ölöwahök?” Mewö jiiga jiget mörök, “Uran mare wan kilok

* 4:44: Mat 13.57; Mak 6.4; Luk 4.24

* 4:45: Jon 2.23

* 4:46: Jon 2.1-11

miaŋgöreŋ sile könöpŋi mosörök.”⁵³ Mi möta mötmötŋi kewö ahuba asariyök: Aha! Jisösnöŋ “Nahöŋgan mönö ölöwaka malma,” jiyöhi, mönö aua miaŋgöreŋök ölöwahök. Keu mi möt asariba i aka saiwaurupŋi pakpak yeŋön uruŋini melenċa Jisös möt narim waŋgiċet.

⁵⁴Jisösnöŋ Judia mosöta Galili prowins uruŋe kaba aŋgöletot kun ki meiga yahöt ahök. Mewö.

5

Jisösnöŋ Betesda o aŋgö jitŋe azi kun mem ölöwahök.

¹ Könaŋgep nalö kunöŋ Juda yeŋgö kendon ketani kun töriiga Jisösnöŋ Jerusalem sitinöŋ öŋgöyök. ² Jerusalem sitigö selnöŋ naŋgu kun mi lama yeŋgöra ahöyök. Miaŋgö kösutŋe o aŋgö kun qetŋi Hibru keunöŋ Betesda qetkeri, mi ahöyök. Miaŋgö goraŋe luhut miri köröpŋi ketani 5 tatket. ³ Luhut miri 5 miaŋgö uruŋe kawöl ambazip kambu ketani ahözema. Tosatŋan jeŋjini gömölii tatket. Tosatŋan simalokon aka tatket. Tosatŋan likepŋini kömukömuŋa tatket.*

⁴ Nalö tosatŋe Kembugöreŋ garata kunöŋ eta o aŋgönöŋ timjaliiga unduzapma. Onöŋ unduiga nalö miaŋgöreŋök kunŋan mutuk aŋgönöŋ geiga kawölŋi mi me mi mianön ölöwahakzapma. Miaŋgöra mamböta tatket. ⁵ Miaŋgöreŋ azi kun yambu (yara) 38 miaŋgö dop kawöl yöhöiga ahömalök. ⁶ Miaŋgöreŋ ahöiga Jisösnöŋ kaŋgota eka lök nalö köröp tiŋtiŋi kawöl yöhöi ahöba malöhi, mi möta kewö qesim waŋgiyök, “Gi ölöwakŋangö ak gihiza me qahö?”

⁷ Qesim waŋgiiga kewö melenċ waŋgiyök, “O Kambu, onöŋ unduba ötöŋ qeiga alani daŋön noaŋgita o aŋgönöŋ anda al niŋgibawak? Alani mewöŋi kun qahö malja. Nanak anmamgö möta esapköba malali, nalö miaŋgöreŋök tosatŋi yeŋgöreŋök kunöŋ ni noŋgita anda gemalċet.”

⁸ Melenċ waŋgiiga Jisösnöŋ jii mörök, “Gi mönö wahöta tumbulahöpki memba anöŋ.” ⁹ Mewö jii möta miaŋgöreŋök ölöwaka tumbulahöpŋi memba anök. Anökmö, yuai mi Sabat kendonöŋ asuhuyök. ¹⁰ *Miaŋgöra Juda yeŋön azi ölöwahöhi, yaŋgöra kewö jiget mörök, “Merak Sabat kendon akza. Miaŋgöra tumbulahöpki memba aŋgunöŋga qahö dop kölja.”

¹¹ Mi möta kewö melenċni mötket, “Möhamgöm niŋgizawaŋön mönö kewö jim teköm niŋgiza, ‘Gi mönö tumbulahöpki memba anöŋ’.”

* **5:3:** Mötmöt ambazip tosatŋan kewö mötmörimakze: Könakönahiŋe jabö 3:gö kitipŋi teteköŋi aka jabö 4 mi kewö ohoċet ahöyök: Yeŋön o aŋgönöŋ gwözöŋda undumapkö mamböta tatzema. * **5:10:** Neh 13.19; Jer 17.21

¹² Mi möta kewö qesim waŋgiget, “Azi daŋön göhöra ‘Tumbulahöpki memba anöŋ, jiza?’”

¹³ Qesim waŋgigetmö, Jisösnöŋ mem ölöwahiga ambazip kambu ketanjan ölökögetka yeŋgö sutŋineyök sömuniba anök. Miangöra daŋön mi ak waŋgiyöhi, mi qahö möta tönpin kinök.

¹⁴ Miangö andöŋe jöwöwöl jike tohon uruŋe öŋgöiga Jisösnöŋ miangöreŋ miwikŋaim waŋgiba qamban keu kewö jii mörök, “Mötnöŋ, gi lök ölöwakzan. Miangöra ayuayuhu törösait bölöŋi kötökŋi kun asuhum gihibapuköra mönö siŋgisöndok kunbuk kude aka malman.”

¹⁵ Azi ölöwahöhi, yaŋön Jisös ek kutuba anda Juda jitŋememe yeŋgöra kewö jii mötket, “Azi mem ölöwak niŋgiyöhi, yaŋgö qetŋi Jisös.” ¹⁶ Mi möta Jisösnöŋ Sabat kendonöŋ nup mewöŋi meyöhi, Juda jitŋememe yeŋön miangöra aka sesewerowero ak waŋgiba malget. ¹⁷ Mewö malgetmö, Jisösnöŋ kewö melen eŋgiyök, “Nöŋgö Iwinan sundan dop nup memakza aiga nöŋön mewöŋanök mi memakzal.”

¹⁸ Mewö melen eŋgiba ambazip Sabat kendongö keu tosatŋi toroqeba algetka Jisösnöŋ mi ahakmemeŋan qeapköba yeŋgö jeŋine siŋgisöndok ahök. Siŋgisöndok mi toroqeba Anutugöra ‘Iwini’ jiba Anutu tandök ewö maljawangö dop aka nanŋi mem öŋgöyök. Juda ambazip yeŋön yuai yahöt miangöra aka möt kömbuhiba kapan köla Jisös qebingö jim köhöiget. Mewö.

Malmal gulimapkö kukösumŋi mi Jisösgöreŋ ahöza.

¹⁹ Mewö aketmö, Jisösnöŋ keu kewö jii mötket, “Nöŋön keu ölö töhöŋŋi kun kewö jibi mötket: Nahönöŋ nanŋi uruŋangö yuai kun qahö memakzapmö, Iwinöŋ yuai memakzawi, Nahönŋan mönö mewöŋanök memakza. Miangöra Iwinöŋ yuai meiga ehakzawi, yaŋön mönö miyök memakza. ²⁰ Iwinöŋ Nahönŋi urunöŋ jöpaköm waŋgiba mala nanŋak nup memakzawi, mi pakpak kondel waŋgimakza. Miangöra aŋgöletot eka maljei, mi yuai eretŋi. Miangö ölni mi könaŋep kondel eŋgiiga eka nemböŋini teköi welipköba malme.

²¹ “Kun kewögöra welipköme: Iwinöŋ ambazip kömukömuŋi eŋgömindiiiga gulimakze. Nahönŋan mönö miangö dop mewöŋanök ambazip köhömuŋi niŋia gulimegö mötzawi, mi eŋgömindiiiga gulimakze. ²² Mewöŋanök Iwinöŋ kungö keuŋi qahö jim tekömakzapmö, jimtekötekö nupkö kukösumŋi pakpak mi kewögöra Nahönŋangö böröŋe ali ahöza:

²³ “Ambazip Iwi göda qem waŋgimakzei, miangö dop körekŋan Nahönŋi göda qem waŋgimegöra mötza. Iwinöŋ Nahönŋi melaim waŋgiyök. Miangöra kunŋan Nahön qahö göda qem waŋgizawi, yaŋön mönö Iwi mewöyök göda qahö qem waŋgiza.

24 “Miangöra nöñon keu öl töhöñji kun kewö jibi mötket: Kunñan nöñgören Buña keu möta mötmöriba ni melaim niñgiyöhi, i möt narim wañgiza ewö, yañon mönö malmal köhöikñangö buñaya akza. Nöñon keunji jim teköbiga könöp siagö buñaya qahö akña. Kömup köhöikñangö likepñji mosöta jabö kutuba malmal köhöikñangö likepñje añgota mal öñgöma.

25 “Nöñon keu öl töhöñji kun kewö jibi mötket: Nalö kun kama aka nöñgöra aka lök kam kuñguza. Nalö miangören siñgisöndok aka uru köhömuñji akzei, yeñon Anutugö Nahönñan keu qeri mötme. Mi möta tem kölmeanön mönö guliba köhöiba malme. 26 Mi kewögöra: Iwinöñ nanñak malmal köhöikñji kondorakzawi, miangö dop malmal gulim köhöimapkö kukösumñji mi Nahönñji wañgii yañon mewöyök ambazip mem gulim eñgimakza. 27 Yañon Suep gölmegö Azi Ölnji maljawañgöra aka Iwinöñ ambazip keunji jim tekömapkö kukösumñji mewöyök yangö böröñje ali buñaji ahök.

28 “Nöñon keu kötnji jizali, miangöra mönö kude aurume. Nalö kun kam kuñgumawi, miangören körek pakpak qaksirinöñ ahözei, yeñon mewöyök qet qetmawi, mi mötme. 29 *Qetñji mi möta wahöta aukñje asuhugetka ahakmeme ölöpnji aka malgerañon malmal köhöikñje öñgömemö, ahakmeme bölöñji aka malgeri, nöñon yeñgö keunji jim teköbiga kömup köhöikñangö buñaya akñje. 30 Nöñon nani urunañgö yuai kun nanak aka memangö osizal. Ni Iwigö jitñje mörakzali, mönö miangö dop ambazip keunji jim teköm eñgimakzal. Nani imbinañgö dop lañ qahö memakzalmö, melaim niñgiyöhi, mönö yangö keunji wuatañgömakzal. Miangöra jimtekötekö keuni jimakzali, mi mönö dopñeyök asuhumakza.” Mewö.

Tosatñan Jisösgö könañamñji nañgöba jiget.

31 “Nöñon nani könañamni nañgöba jibileñak ewö, keuni mi-añon ölöp qahö köhöibawak. 32 Alani kunöñ nöñgö könañamni nañgöba jimakza. Yañon nöñgöra keu jimakzawi, mi-añon mönö köhöiba ölnambuk akza, mi mötzal. 33 *Injini jitñjememe melaim eñgigetka Jongören kagetka keu ölnañgö dop nöñgö könañamni indela jiba nañgöyök.

34 “Jiba nañgöyökmö, nöñon gölme azigö nañgönañgö keunji mi möta qahö mötpi öñgöza. Qahö öñgözapmö, Jongö nañgönañgö keugöra jimakzali, mi mönö injini nalö kewöñje letotketka Anutunöñ bohönñini jöhömapköra aka jimakzal. 35 Jonöñ kiwa ketañji aka ölöpnanök jeba asariyökmö, injini nalö

* 5:29: Dan 12.2 * 5:33: Jon 1.19-27; 3.27-30

köröpni qahöpmö, töröptökñanök yangö asakñe lan sönğaibingö sihimñi mötket.

³⁶ “Jonöñ könani töröptökñanök jiiga mötketmö, kunöñ mi nañgöba jimakzawi, yangö keuñan mönö Jongören nañgönañgö keu oñgitza. Nani Iwinan nupñi al niñgii membiga ölni asuhumakza. Ölni mianön mönö könanamni kewö nañgöba indelakza: Iwinöñ mönö melaim niñgii jitñe memenji akzal. ³⁷ *Iwinöñ melaim niñgii erali, yañön könanamni nañgöba jiba malök. Inini nalö kunöñ yangö keu kourukñi qahö mötket aka kaisongolomñi qahö eket. ³⁸ Yañön niñia melaiiga eröhi, inini i qahö möt narim wañgize. Mianğöra yangö keuñan mönö eñgö uruñine qahö kinja.

³⁹ “Inini malmal köhöikñanğö könani mi Buña Kimbinöñ ahöm eñgiza, mewö mötmöriba mi oyoñda uru könömñine ala Suepkö buñaya akingö mötze. Mewö mötzemö, kimbiñi kimbiñi pakpak mienön mönö nöngö könanamni nañgöba indelakze. Mi möt yaköze me qahö? ⁴⁰ Nañgönañgö keu gwötpuk ahözapmö, inini malmal köhöikñi buña qem añgubingöra nöngören kabingö tökömakze.

⁴¹ “Gölme ambazipnöñ qetbuña niñgigetka qarimapköra qahö mambötzal. Mi niñgigetka mötpi qahö öngöi maljal. ⁴² Mewö maljalmö, eñgö könanamñini mi kewö ahöza, mi mötzal: Inini uruñini Anutugören qahöpmahöp jöhöba urukalem qahö ak wañgiba malje. ⁴³ Nöñön Iwinanğö qetñi qeta kabiga inini andö qem niñgimakzemö, kunöñ nanñi qetñi qeta kamawi, inini mönö i ölop möt añgön köla köl öröm wañgime.

⁴⁴ “O inini nanñini möpöseim añguba qetbuñani qarimapkö mötket öngöza. Öngözapmö, bem mohotñan Anutu ölni akzawi, yañön qetbuña eñgimapköra qahö kapan kölje. Mewö aködamunñinambuk akñegöra qahö jaram tiba kinje. Mianğöra denöwö ni möt narim niñgibeak? Mi mönö osibeak.

⁴⁵ “Nöñön inini ‘Iwigö jemesoholñe keu jakeñe al eñgimam,’ mewö mötmöribepuk. Inini Mosesgö keugö jörömqöröm al wañgiba Sup mire öngöbingö mamböta maljemö, Anutugö jeñe añgotketka Mosesnöñ nanñak Anutugö keu jakeñe ala jim aum eñgiiga gamuñini mötme.

⁴⁶ “Mi kewögöra: Mosesnöñ nöngö könanamni jim asariba Buña Kimbinöñ ohoi ahöza. Mianğöra Moses möt narim wañgibeak ewö, mönö nia möt narim niñgibeak. ⁴⁷ Mewömö, Mosesgören kimbia qahö möt nariba tem köljeağöra mönö nöngö keuni mi denöwö möt naribeak? Mi kupuk-kapakñambuk akapak.” Mewö.

* 5:37: Mat 3.17; Mak 1.11; Luk 3.22

6

Jisösnöŋ azi 5000 nene gumohom enġiyök.

Mat 14.13-21; Mak 6.30-44; Luk 9.10-17

¹ Mianġö andöŋe Jisösnöŋ Galili o anġö, qetŋi kun Taiberias o anġö qetkeri, mi kutuba likepŋe anġorök. ² Kawöl ambazip möhamgöm enġii anġöletot asuhui ekeranġöra aka ambazip kambu jesöŋgöŋan Jisösgö andöŋe wuatangöba kaget. ³ Jisösnöŋ gwarekurupŋi enġömeiga kundunġe öŋgöba tatket.

⁴ Nalö mianġöreŋ Juda neŋgöreŋ ak-kömükömu kendonöŋ törüyök.* ⁵ Jisösnöŋ je ui aniga ambazip kambu jesöŋgöŋan yanġöreŋ kanġotkeri, i enġeka Filipköra jiyök, “Nini nene denikeyök bohonŋi meinga kambu mewöŋan nem timbireŋ aketka dop kölbawak?” ⁶ Yuai akŋamgö ahöhi, mi nanŋak mörökmö, keu mi Filip esapköm wanġiba jiyök.

⁷ Mewö jiiga kewö melenök, “Nene beret silim 200:kö töwanġi (Kina 1000,-) mianġön bohonŋi memba mendenġinga körek yeŋön kitipŋanöhök nembeak aka töndup qahö dop köl enġibawak.”

⁸ Mewö jiiga gwarekurupŋi yeŋgöreŋök kun qetŋi Andru, Saimon Pitögö munŋan kewö jii mörök, ⁹ “Azi moröŋi kun kianġöreŋ malja. Yanġöreŋ bali† beret 5 aka söra yahöt ahözapmö, ambazip sehisehiŋi kewö kagetka yeŋgöra mi qahö dop kölma.”

¹⁰ Jisösnöŋ jiyök, “Inġini mönö ambazip kambu ki jiba mendenġ enġigetka nene nemingö eta tatme.” Gölme mianġöreŋ kegwanġ luplup gwötpuk ahöyök. Mianġöra azi janġöŋini 5000:gö dop yeŋön gölmenöŋ eta tatket.

¹¹ Eta tatketka Jisösnöŋ beret mi memba saiwap jiba ambazip tatkeri, mendenġa enġiyök aka söra mi mewöyök mendenġa sihimŋinan jigeranġö dop enġiyök. ¹² Mendenġa enġiiga memba nem timbireŋ aketka Jisösnöŋ gwarekurupŋi kewö jii mötket, “Nene kitipŋi ayuhubapüköra mi mönö qezaköget.” ¹³ Mewö jiiga möta bali beret 5 mianġöreŋök memba kitipŋi kitipŋi mosötket taröhi, mi qezakögetka sakap 12 mianġöreŋ geba kokolak qeyök.

¹⁴ Jisösnöŋ anġöletot mewö mei asuhuiga ambazipnöŋ eka welipköba jiget, “Kezapqetok azi gölmenöŋ asuhumapkö jigeri, yanġön mönö ölna mia akza.” ¹⁵ Mewö jiba Jisösgöra köiraŋ ala kiŋ kembunġini akŋapkö mötmöriġet. Mötmöriba kaba liliköm wanġiba walimgöba kiŋ kunġum wanġibingö aket.

* **6:4:** Anutunöŋ mönöwök neŋgehoriba neŋgoŋgiröhi, Juda yeŋön mianġöra yambu (yara) dop nalö ala söŋgaimakze. Nei keunöŋ qetŋi Pasowa jize. Eksodus 12.15 † **6:9:** Bali mi padi, wit, out aka sehoŋ mianġö alanġini kun.

Mewö möt kutuba engek tököba engömosöta kunbuk kundunje öngöba nanjök malök. Mewö.

Jisösnöj o anjög qakne tiba tiba anök.

Mat 14.22-33; Mak 6.45-52

¹⁶ Neget teköiga mare aiga Jisösgö gwarekurupni yenjön o anjögö jitje geget. ¹⁷ Geba wanjenöj öngöba gölme mi mosöta o anjög kutuba likepne Kaperneam mire göröken anget. Angetka miri söñaum teköiga Jisösnöj töndup yengörej qahö asuhuyök. ¹⁸ Angetka luhut köhöikjanök giliga o anjönöj könöpuk kunduta öngöba erök.

¹⁹ Öngöba eriga lökuatnöj qeba nanjögöba 5 me 6 kilomita miangö dop angetka Jisösnöj o anjög qakne tiba tiba wanje kösutne kaiga eka auruba kenjötporinj aket. ²⁰ Mewö mötketka kewö jii mötket, “Nanak kazal. Kenjötjini kude mötme.” ²¹ Mewö jii möta Jisösnöj wanjenöj öngömapkö jigetka öngöyök. Öngöiga wanjeninan miangörejök ösumok enjuaņgita gölme göranje anbingö akeri, miangörej anjotket. Mewö.

Ambazip yenjön Jisösgöra um jarum bibihiget.

²² Miangörej anjotketka miri gianjiga ambazip kambu ketanj yenjön o anjög likepne toroqeba mala kewö mötmöriget, “Uran wanje mohotjan tari ehinga Jisösnöj gwarekurupni yembuk wanjenöj qahö öngöba anök. Jisös umbula nanjinök anget. Wanje murutji kun qahö ehin. Miangöra Jisösnöj kunbuk ki malja.”

²³ Mewö mötmöriba tosatjan kewö jiget, “Wanje mohotnöj angetmö, ölja, Taiberias taonök wanje tosatji kaget. Wanje mi Kembunöj beretköra saiwap jüiga nemba tarini, mönö gölme miangö kösutne kagera Jisösnöj wanje miengörejök kunöj öngöba anök me denöwö?” ²⁴ Ambazip kambu yenjön mewö jiba Jisös aka gwarekurupni miangörej qahö miwikjaim enjiget. Mewö eka möta mewöjanök wanjenöj öngöba Kaperneam taonöj anda Jisös jaruget. Mewö.

Jisösnöj malmal köhöikjanjög neneji akza.

²⁵ Ambazipnöj Jisös jaruba o anjög likepne yuke göröken miwikjaiba eka kewö jiget mörök, “O Ketanjamnini, gi mönö wani nalönöj ki kazan?”

²⁶ Mewö jigetka kewö melenj enjyök, “Nönjön keu öl töhönnji kun kewö jibi mötket: Injini anjöletot membi ekeranjöra aka ni qahö jarum ninjizemö, nene beret kötuetköbi nemba nem timbirej akeri, mönö miangöra ni nuatanjögöba ki kaze. ²⁷ Nene ayapkömawi, mi miwikjaibingöra urukönöp kude aka malmemö, urugö nenejan malmal köhöikji enjimakzawi, mönö mia buja qem anjübingöra kapan köla malme. Iwi

Anutunöŋ munğem silimbannı Suep gölmegö Azi Ölnı waŋgiiga kukösumŋan walöŋniga ölop urugö nene enğiiga oyaenköyaen akŋe. Mewö aka mal köhöiba kömumba toroqeba teteköŋi qahö malme.”

²⁸ Mewö melen enğiiga kewö qesim waŋgiget, “Anutugö sihimŋaŋgö dop ahakmeme tandökŋi mönö denöwö ahinga dop kölbawak?”

²⁹ Qesim waŋgigetka kewö melenök, “Anutunöŋ azi melaim waŋgiyöhi, inini i möt narim waŋgiba malme. Ahakmeme mianön mönö Anutu sihimŋaŋgö dop akza.”

³⁰ Mewö melenniga kewö qesim waŋgiget, “Mewö aiga gi kunbuk wani aŋgöletot kukŋambuk kun menöŋga eka möt narim gihibinak? Gi mönö wani yuai kun Mosesnöŋ ahök, mianğö dop aka meman? ³¹ *Buŋa Kimbi kun kewö ohoget ahöza, ‘Yaŋön Suepnöhök nene beret enğiiga neget.’ Keu mianğö dop nanine ambösakon yeŋön gölme qararaŋkölkölŋe anda mala nene qetŋi mana nemba malget aka gi mönö könaŋamgi Moses onğita denöwö kondelbanak?”†

³² Qesim waŋgigetka Jisösnöŋ kewö jii mötket, “Inini mianğö könaŋi ölop qahö möt kutuze. Nöŋön keu öl töhönni kun kewö jibi mötket: Mosesnöŋ aŋgöletot Tonı qahö ahök. Yaŋön nene beret mi Suepnöhök qahö enğii negetmö, nani Iwinan mönö Suepnöhök beret ölbölŋi enğimakza. ³³ Anutugö nene beret mi mönö Suepnöhök eta asuhuba gölme dop ambazip malmal köhöikŋi enğimakza.”

³⁴ Mewö jii möta kewö jiget mörök, “O Kembu, gi nalö dop nene beret mi neŋinöŋga nemba malbin.”

³⁵ Jisösnöŋ mi möta jiyök, “Nöŋön malmal köhöikŋaŋgö nenenı akzal. Kunŋan nöŋgöreŋ kazawi, yaŋön nem timbirenı aka wösöŋi nalö kunöŋ qahö alma. Kunŋan ni möt narim niŋgimakzawi, yaŋön ogöra qahö kömuma. ³⁶ Mewö aigun inini ni nek teköba töndup qahö möt narim niŋgize. Mi mönö lök jibi mötze. ³⁷ Aka töndup Iwinöŋ ambazip tosatŋi niŋgimakzawi, yeŋön mönö körek nöŋgöreŋ kame. Kunŋan nöŋgöreŋ kamawi, nöŋön mönö i qahö yakörimam.

³⁸ “Nöŋön Suepnöhök eta nani imbinanğö dop yuai laŋ aka memba malmangöra qahö asuhuyal. Mewö qahö. Melaim niŋgiyöhi, mönö yanğö jitkö dop nup memba malmangöra eral.

³⁹ “Melaim niŋgiyöhi, yanğö jitsihitŋan kewö ahöza: Yaŋön ambazip nöŋgö böröne al enğiiga maljei, nöŋön mi pakpak

* **6:31:** Eks 16.4, 15; Sum 78.24 † **6:31:** Gölme qararaŋkölkölŋe Anutunöŋ söŋan dop söŋanğö yuai amötŋi, jöhanŋi tuatŋi aka awamŋi juzu paura ewö ali gölmenöŋ ahöi eka yaigep sombemnöŋ anda qezaköba kounŋine kaba beret lölöwöröŋi memba nezema. Eks 16.13-36

köyan köl enğiba malbiga yeñgöreñök kunñan kun qahö sohoba ayuhuma. Qahö ayuhugetka nöñön i nalö ketaje enğömindiba mem gulim enğimam.

⁴⁰ “Iwinanğö jitsihitñan kewö ahöza: Tosatñan Nahönñi eka möt narim wañgizei, yeñön körek nalö kewöñe letota malmal köhöikñi buña qem anğuba malme. Mewö mal kömugetka nöñön i nalö ketaji mianğöreñ enğömindiba mem gulim enğimam.”

⁴¹ Jisösnöñ mewö jiiga keu kötni kun kewö ahök, “Nöñön malmalgö nene ölni aka Suepnöhök eta asuhuyal.” Mewö jiyöhanğöra aka Juda jitñememe yeñön möt böliba uruñinan ihururuk jiba jim wañgiget. ⁴² Jim wañgiba jiget, “Azi ki Jisös, Josefko nahönña. Yanğö iwinamñi mi ölop möt etkizimö, mönö denöwögöra ‘Suepnöhök eta asuhuyal,’ jiza?”

⁴³ Mewö jigetka möta kewö melenñök, “Uruñinan mönö kude ihururuk jiba jim niñgime. ⁴⁴ Iwi ni melaim niñgiyöhi, yanñön ambazip qahö öröm enğiza ewö, enğöreñök kunñan nöñgöreñ kamamğö osima. Öroi kabawak ewö, nöñön i mönö nalö ketaje enğömindiba mem gulim wañgimam.

⁴⁵ *⁴⁵ “Kezapqetok yeñgöreñ kimbinöñ keu kewö ohoget ahöza, ‘Anutunöñ i körek pakpak kusum enğii mötme.’ Iwinöñ ambazip kusum enğii keu möta urukönömñine ala maljei, yeñön mönö köreknanök nöñgöreñ kame. ⁴⁶ Ambazip kunñan Iwi qahö eka malja. Iwigöreñök eröhi, yanñön mohot kun mönö i eka malja. ⁴⁷ Nöñön keu öl töhönñi kun kewö jibi mötket: Kunñan ni möt narim niñgizawi, yanñön mönö malmal köhöikñi buña qem anğuba mal öñgöma.

⁴⁸ “Nöñön malmal köhöikñanğö nene ölni akzal. ⁴⁹ Mötket! Enğö ambösakonuruñinan gölme qararañkölkölñe anda mala nene qetñi mana namba malgetmö, töndup kömumba gisahöget. ⁵⁰ Yeñön kömugetmö, nene beret nalö kewöñe Suepnöhök eta maljawi, kunñan mi namba mala qahö kömum köhöima.

⁵¹ “Nene beret malmalñambuk Suepnöhök eröhi, mi nöñön akzal. Kunñan nene mi namba malmawi, yanñön mönö teteköñi qahö köhöiba malma. Nene wañgiba malmami, mi nöñgö busuni. Gölmeñi gölmeñi yeñön köhöiba malmegöra mi al enğimam.”

⁵² Jisösnöñ mewö melenñiga Juda jitñememe yeñön sutñine urukönöpñöñ jim qesim anğuba jiget, “Yei! Azi kianñön mönö denöwö aka busuñi neñgiiga nembinak?”

⁵³ Mi möta jigetka kewö jii mötket, “Nöñön keu öl töhönñi kun kewö jibi mötket: Inini Suep gölmeğö Azi ölnanğö sepñi aka busuñi qahö neme ewö, malmal köhöikñi mianñön mönö

* 6:45: Ais 54.13

engö uruñine qahö ahöma. ⁵⁴⁻⁵⁵ Nöñgö sepnan o ölni akza aka nöñgö busunan nene ölni akza. Mianğöra kunñan nöñgö sep busuni nemakzawi, yañön mönö letota malmal köhöikñangö buñaya aka mal öngöma. Mewö mal kömuiga nöñön i nalö ketanje mindiba mem gulim wañgimam.

⁵⁶ “Kunñan nöñgö sep busuni nemakzawi, yañön mönö nömbuk qekötahöba kinakza aka nöñön yambuk kinakzal. ⁵⁷ Iwinöñ Malmal Toñi aka melaim niñgiba wötni aka nam köl niñgiiga köhöiba maljal. Mewöñanök kunñan ni nem niñgimakzawi, nöñön mönö mewöñanök yangö wötni aka nam köl wañgibiga ölop köhöiba malma. ⁵⁸ Nene ölni Suepnöhök eröhi, mi nöñön akzal. Engö ambösakonurupñinan Anutugö nene nempa mala kömugetmö, nalö kewöñe engöreñök kunñan beret ki nempa malmawi, yañön mönö teteköñi qahö köhöiba malma.”

⁵⁹ Jisösnöñ Kaperneam taongö köuluk miriñe kinda keu mi jim kusum engiyök. Mewö.

Gwarek gwötpukñan uruñini böliiga Jisös mosötket.

⁶⁰ Jisösgö gwarekurupñi yengöreñök gwötpukñan keu mi möta jiget, “Keu jit jizawi, mianñön mönö keu köt ewö lömbötñambuk akza. Mi möringa uruninan lömböriba bölim teköza. Mianğöra mi kunbuk mötpingö ölan neñgöhöiga i mönö mosötpin.”

⁶¹ Gwarek yeñön Jisösgö keugöra möt böliba uruñinan ihururuk jiba jim wañgigetka Jisösnöñ mi uruñan enğuanğita möta kewö jii mötket, “Keu jizali, mi möt bölizize me qahö? ⁶² Keu mianğöra möt bölizize ewö, könangep mönö denöwö asuhubawak? Suep gölmegö Azi ölnan mutuk miri mala koröhi, euyangöreñ kunbuk lilingöba öngöi ekñe ewö, nalö mianğöreñ mönö denöwö mötme?”

⁶³ “Uña Töröñi yañön ambazip mem gulim engimakza. Inini gölme ambinöhök ahuba busuñinambuk akzemö, ahuahu dölokñe qahö ahuba nanñini ösumñinan öne letota Suepkö buña ahak mi qahöpmahöp. Uña Töröñan malmal köhöikñi engizawi, nöñön keu kötni mi jim tuaribi möta malget. ⁶⁴ Mewö möta malgetmö, engöreñök tosatñan töndup ni qahö möt narim niñgiba malje.” Denike yeñön qahö möt narim wañgigeri aka dañön könangep mamalolo mem wañgimawi, Jisösnöñ mi könakönahineyök möta korök. Mianğöra mewö jiyök.

⁶⁵ Mewö jiba toroqeba jiyök, “Mianğöra nöñön kewö jibi mötme: Nöñgö Iwinan ambazip kun qahö inahöm wañgiza ewö, yañön mönö nöñgöreñ kamangö osima.”

⁶⁶ Keu mianğöra aka gwarek yengöreñök gwötpukñan poraiba ziriñziriñ aka mosöta yambuk qahö toroqeba anda

kaget. ⁶⁷ Mianğöra Jisösnöŋ gwarek 12 mienğöra kewö jiyök, “İjini mönö mewöŋanök nömosöta anbingö mötze me qahö?”

⁶⁸ *Mewö jiiga Saimon Pitönöŋ meleşnök, “O Kembu, nini mönö dagöreŋ anbinak? Malmal köhöikŋaŋgö Buŋa keuŋi mi mönö göhöreŋ ahöza. ⁶⁹ Göŋön Anutugöreŋ azi sarakŋi akzani, nini mi möt nariba möt asariba maljin.”

⁷⁰ Mewö meleşniga Jisösnöŋ möta jiyök, “Nöŋön azi 12 ijini möwölöhöm enğial aka enğöreŋök kunöŋ mönö bölöŋaŋgö bohonŋi akza.” ⁷¹ Judas Saimon Iskariotkö nahönŋi yaŋön gwarek 12 yeŋgö sutŋine mala könanğep mamalolo mem waŋgiyök. Jisösnöŋ keu mi yaŋgöra möta jiyök. Mewö.

7

Jisösnöŋ munurupŋi yembuk keu eraum mötket.

¹ Juda jitŋememe yeŋön Jisös qebingö kapaŋ kölgeraŋgöra Judia prowins uruŋe anda kamamgö tököyök. Mianğöra Judia mosöta Galili prowins uruŋe anda liliköba maliga köiŋ tosatŋi teköyök. ² *Mi teköiga Juda yeŋgöreŋ kendon kun qetŋi koumkoum mianğö nalöŋan töriyök.*

³ Mianğöra Jisösgö munurupŋan kewö jiget mörök, “Gi kianğöreŋ mala aŋgöletot memakzani, mi gwarekurupkan mewöyök ek kutumegöra gi mönö gölme ki mosöta Judia anöŋga dop kölma. ⁴ Kunŋan nanŋak aukŋe asuhumamgö mörakzawi, yaŋön yuai kun tölapŋe qahö memakza. Aŋgöletot mewöŋi memakzanaŋgöra mönö ambazip kambuŋi kambuŋi yeŋgö jeŋine anda asuhaba könaŋamgi indelman.” ⁵ Munurupŋan qahö möt narim waŋgiba tönpin malgeraŋgöra aka mewö laŋ jiget.

⁶ Mewö jigetka kewö jii mötket, “Urugö nup aukŋe memamgö nalöŋan qahö kam kuŋguiga maljalmö, enğö nalöŋinan mönö sundan dop anmeaŋgö dop ahöza. ⁷ Gölme ambazipnöŋ kazik ak enğibingö osimakzemö, nöŋön yeŋgö ahakmemeŋini bölöŋi indela naŋgöba jibi mötzeaŋgöra mönö ni kazik ak niŋgimakze. ⁸ Anmamamgö nalöŋan mönö qahö kam kuŋguza. Mianğöra nöŋön sösoŋgai kendon kianğöreŋ qahö öŋgömam. Nöŋön mire tatpiga ijini ölop endu anda öŋgöba söŋgaime.” ⁹ Keu mewö jii mötketka Galili prowins uruŋe toroqeba malök. Mewö.

* **6:68:** Mat 16.16; Mak 8.29; Luk 9.20 * **7:2:** Lew 23.34; Dut 16.13

* **7:2:** Juda yeŋgöreŋ yambu jeŋi qeŋe sösoŋgai kendonŋi mi yambu (yara) dop kewö alget: Wain nupŋine anda ip sinŋi memba koumkoum qeba mianğöreŋ ahöba wehön 8 söŋgaiba kendon tata malget. Wehön kondikŋe sösoŋgai öŋgöŋgöŋi alget. Mönöwök gölme qararaŋkölkölŋe yambu (yara) 40 mianğö dop opo koumŋine ahöba kaba malgeri, mi mötmöriba söŋgaiget. Lew 23.33-36,39-43; Dut 16.13-15

Jisösnöŋ koumkoum sösöŋgainöŋ malök.

¹⁰ Jisösgö munurupŋan koumkoum kendongöra angetmö, nanŋak mire tata könaŋgep aukŋe qahöpmö, tölapköba anda Jerusalem öngöyök. ¹¹ Juda yeŋgö jitŋememeurupŋinan sösöŋgai nalöŋe Jisösgö jeŋi jaruba qesiqesi aka kewö jiget, “Azi mi denike?”

¹² Ambazip kambu yeŋön sutŋine Jisösgöra saŋep keu gwötpuk jiget. Tosatŋan “Azi mi ölop sorokŋi,” jigetmö, tosatŋan kewö jiget, “Qahö! Yaŋön mönö ambazip kambu enololon ak enŋiiga kahapmahap ahakze.” ¹³ Mewö mewö laŋ jigetmö, Juda jitŋememe yeŋgöra keŋgötŋini möta malgeraŋgöra kunŋan yaŋgö keuŋi aukŋe qahö jiyök. Mewö.

Jisösnöŋ nanŋi könaŋi ambazip kusum enŋiyök.

¹⁴ Kendon sösöŋgai bibiŋe malgetka Jisösnöŋ jöwöwöl jike tohoŋ uruŋe öngöba könahiba ambazip kusum enŋiyök. ¹⁵ Kusum enŋiiga Juda yeŋön welipköba kewö jiget, “Azi ki mötmöt jake öngöŋgöŋe qahö öngöba töndup Buŋa Kimbigö könaŋi denöwö möt soroköza?” Mewö jiba welipköget.

¹⁶ Welipkögetka kewö jii mötket, “Mötmöt Buŋa jimakzali, nöŋön miaŋgö Toŋi qahö akzal. Nanak qahöpmö, melaim niŋgiyöhi, nöŋön mönö yaŋgö mötmötŋi memba kaba jimakzal. ¹⁷ Ambazip kunŋan Anutugö jitsihitŋaŋgö dop aka memaŋgö mötzawi, yaŋön mötmöt jibiga miaŋgö Toŋi daŋön akza, mi möt kutuma. Anutunöŋ Buŋaŋi nöŋgö urune ali asuhuza me nani imbinanŋö keu laŋ jimakzal?”

¹⁸ “Kunŋan nanŋi imbiŋe mötmöriba keu jimakzawi, yaŋön nanŋak qetbuŋaŋambuk akŋamgö mötza. Mewö mötzapmö, melaimelai azi kun toŋan qetbuŋaŋambuk akŋapköra kapaŋ köljawi, yaŋön mönö jitŋememe ölbölŋi geŋmoŋi qahö akza. ¹⁹ Mosesnöŋ Köna keu al enŋii mi ahöza me qahö? Mi ahözapmö, engöreŋök kunŋan mi qahö tem köla wuatanaŋgömakza. Inini mönö wuanöŋgöra kapaŋ köla ni nuŋgubingö mötmörize?”

²⁰ Mewö jii möta ambazip kambu yeŋön kewö melenget, “Ömewörömenöŋ mönö uruge geba kinja. Daŋön kapaŋ köla gi guhumamgö mötmöriza?”

²¹ Mewö melengetka jii mötket, “Nöŋön aŋgöletot mohot membiga inini körek pakpak auruba köŋkuŋ akze. ²² *Mosesnöŋ sileŋine Anutugö aiwesök yandibingöra jim kutum enŋiyöhi, o Mosesnöŋ mi mutuk qahö jim kutuyökmö, ambösakonurupŋinan mi könahiba memba malgetka silik mi neŋgöreŋ kaiga Sabat kendonöŋ mewöyök azi sileŋini yandimakze.

* 7:22: Jen 17.10; Lew 12.3

23 **“Nini Mosesgö Kōna keu walōḡnin siḡgisōndok ahuba-pukōra kōhöikḡi mōtzin. Mi mōtzinmō, keu mi qetala Sabat kendonōḡ mewōyōk azi sileḡini yandiba tōndup nanḡini qahō jim aḡguba silebile malje. Mewō maljemō, nōḡōn azi jōmukḡi Sabat kendonōḡ mem ölöwak waḡgiali, miāḡōra mōnō wuanōḡgōra mi yom jim niḡgize? 24 Inḡini ambazip sileḡini miyōhōk eka mewō miāḡōn bahōsōhamōk kewōta keu laḡ jim tekōmakzei, mi mōnō mosōtme. Mi mosōta uruḡini törōrōk mōt kewōta keu öḡḡanōk jim tekōme.”* Mewō.

Jisōsnōḡ Amōtqeḡe Toḡi akza me qahō?

25 Jerusalem toḡi yeḡgōreḡōk tosatḡan kewō jiget, “Azi ka-pan kōla qebingō mōtmōrizei, yaḡōn mōnō mia me? 26 Eket, yaḡōn ambazip jeḡine aukḡe keu jiiga qahō jim waḡgize. Mewōgōra azi kianōn Amōtqeḡe Toḡi Kraist akzawi, keu mi öḡḡa galōmkōlkōl azi yeḡgō kezapḡine geiga mōtze me qahō? 27 Amōtqeḡe Toḡi Kraistnōḡ kamapköra jiba kota malgeri, yaḡōn ‘Denikeyōk asuhumawi, mi kunōḡ kun qahō mōtma,’ jizemō, azi kianōn denikeyōk asuhuyōhi, mi mōnō ölöp mōtzin.”

28 Mewō eraum mōtketka Jisōsnōḡ jōwōwöl jikegō tohoḡ uruḡe kindā imbiḡi memba wahōta kusum eḡgiba keu kewō jiyōk, “Inḡini nōḡgōra kewō jize, ‘Azi mi mōt waḡgiba miriḡi denikegō mi ölöp mōtzin.’ Nani kukōsum qakḡe qahō asuhuba kinjal. Melaim niḡgiyōhi, yaḡōn melaimelai Toḡi öḡḡi aiga i qahō mōt kutum waḡgiba malje. 29 Yaḡōn melaim niḡgiiga yaḡgōreḡōk eralaḡgōra i ölöp mōt waḡgizal.”

30 Mewō jiiga i memba jōhöbingō mōtketmō, nalōḡan qahō kam kuḡguyōhaḡgōra aka kunḡan sileḡe qahō meyōk. 31 Mewō mōtketmō, ambazip kambu yeḡgōreḡōk gwōtpukḡan mōt narim waḡgiba kewō jiget, “Kraistnōḡ kamawi, yaḡōn mōnō azi ki oḡgita aḡgōletot memba malma me denōwō? Mewō tandōk akza.” Mewō.

Jisōs memba jōhömeḡōra naḡgu galōm melaim eḡgigetka kaget.

32 Ambazip kambu yeḡōn Jisōsgōra mewō goranora jiba jitnakōlik akeri, mi Farisi (Kōna keugō kapaḡkōlkōl) yeḡōn mōtket. Mi möta jike nup galōm yembuk kindā naḡgu galōm (sikiriti) tosatḡi melaim eḡgigetka memba jōhöbingō kaget. 33 Kagetka Jisōsnōḡ kewō jiyōk, “Nōḡōn embuk nalō törōptōkḡi toroqeba malmam. Mi malagun eḡgōmosōta melaim niḡgiiga erali, mōnō yaḡgōreḡ lilingōba öḡgōmam. 34 Öḡgōbiga göraim niḡgiba malmemō, ni qahō miwikḡaim niḡgime. Nōḡōn miri malmami, inḡini miāḡgōreḡ kabingō osime.”

* 7:23: Jon 5.9

³⁵ Mewö jiiga Juda jitnememe yeñon sutñine kewö erauget, “‘Nini miwikñaim wañgibingö osibin,’ jiza. Mianğöra mönö denikeañğoreñ öngömamğöra jiza? Juda ambazip tosatñan denđa kantri tosatñe anda Grik yeñgö sutñine maljei, mönö yeñğöreñ anda Grik ambazip kusum engimamğö möta jiza me? ³⁶ Keu kewö jiza, ‘Göraim niñgiba malmemö, ni qahö miwikñaim niñgime,’ aka keu kun kewö jiza, ‘Nöñon miri malmami, inini mianğöreñ kabingö osime.’ Keu yahöt mietkö könañiri denöwö?”

Malmal köhöikñanğö oñan mönö jeñi tohoba kañgotma.

³⁷ *Mewö eraugetmö, kendon söñgaigeri, mianğö wehön qöndökñi ketani mianñon kam kuñguiga Jisösnöñ kinda köhöikñanök qeta kewö jiyök, “Kunñan ogöra kömuzawi, yañon mönö nöñğöreñ kaba nema. ³⁸ *Buña Kimbigö keu kun kewö ohoget ahöza, ‘Kunñan ni möt narim niñgizawi, yañğö uruñeyök malmal köhöikñanğö oñan mönö tohoba saksaköba kañgorakña.’ ”

³⁹ Mewö jiyökmö, keu mi Uña Töröñanğöra aka kewö jiyök, “Denike eñon ni möt narim niñgizei, inini mönö Uña Töröñi buña qem añguba malme.” Anutunöñ Jisös gölmenöñ malöhanğö dop Suepkö asakmararanı qahö al wañgiiga malök. Mianğöra Uña Töröñi qahö melaiiga eta uruñine geiga öne malget. Mewö.

Ambazip sutñine jujul ahui malget.

⁴⁰ Jisösnöñ mewö jiiga ambazip kambu yeñğöreñök tosatñan keu mi möta kewö jiget, “Azi kianñon mönö ölnja kezapqetok azi asuhumapkö jigeri, mönö mia akza.”

⁴¹ Tosatñan jiget, “Yañon Amötqeqe Tonı Kraist akza.” Mewö jigetmö, tosatñan qetala jiget, “Kraistnöñ mönö denöwö Galili prowinsnöhök kabawak? Mi qahö dop kölja. ⁴² *Buña Kimbinöñ kewö jiza, ‘Kiñ Deiwidnöñ Judia prowinsgö taon moröñi Betlehem mianğöreñ malöhi, Kraistnöñ mianğöreñök asuhuba Deiwidkö gwölönarökurupñi yeñğöreñök kunñan akña.’ ”

⁴³ Mewö mewö lañ jigetka ambazip kambu yeñon Jisösgöra aka jula denget. ⁴⁴ Yeñğöreñök tosatñan memba jöhöbingö mötketmö, kunñan sileñe qahö meyök. Mewö.

Juda galöm yeñon Jisös qahö möt narim wañgiget.

⁴⁵ Jöwöwöl jikegö kiripo galöm (sikiriti) yeñon lilingöba jike nup galöm aka Farisi (Köna keugö kapankölköl) yeñğöreñ kagetka kewö jim engiget, “Inini wuanöñğöra i qahö memba kaze?”

* 7:37: Lew 23.36 * 7:38: Eze 47.1; Zek 14.8 * 7:42: 2 Sml 7.12; Mai 5.2

⁷ Ohoyökmö, toroqeba kapan köla qesim wanğigetka hök ala wahöta diñdiñi kindi kewö jii mötket, “Engöreñök kunñan siñgisöndok kun qahö aka maljawi, yañön mönö ölop köt mutukñi memba gila qema.” ⁸ Mewö jii mötketka kunbuk sipköba eta kulem kunbuk gölmenöñ ohoyök.

⁹ Jisösnöñ keu jiyöhi, mianñon engömembra jöhöiga nanñini siñgisöndokñini gamuñambuk akeri, mi Anutunöñ kondeliga nanñini uruñinan nañgöba jiiga isikusukñini qahöwahök. Mianñon qahöwahiga keu göröñ kingetka bohonñinan mutuk engömosöta aniga yañgö nemböñan andöñe aniga tosatñi mohot mohot yeñön mömölaköba körek an teköget. Qöndökñan aniga Jisösnöñ zoñ kuñguba tari ambinöñ nanñök yambuk kinök. ¹⁰ Jisösnöñ hök ala wahöta diñdiñi kindi ambi eka kewö jii mörök, “Ambi, keu jakeñe al gihibingö jizei, yeñön mönö denike gi sök ni sök anjeje? Yeñgöreñök kunöñ kindi gi kömumangö keuñi qahö jim teköza me?”

¹¹ Jii möta meleñnök, “O Kembu, kunöñ qahö jim teköm niñgizal!” Mewö meleñniga jii mörök, “Nöñön mewöyök gi qahö jim teköm gihizal. Gi mönö döлки könahiba siñgisöndok kunbuk kude aka malman.” Mewö.

Gölme dop neñgö asaknini mi Jisös.

¹² *Jisösnöñ keu kunbuk suariba kewö jii mötket, “Nöñön ambazip gölmeñi gölmeñi tat anjei, engö asakñini akzal. Kunñan ni nuatanğöba kamawi, yañön mönö söñaupnöñ jipjap qahö qeba malmappmö, malmal köhöikñañgö asakñi miangğö uruñe malma.”

¹³ *Mewö jiiga Farisi (Köna keugö kapankölköl) yeñön kewö jiget mörök, “Nanganök könañamgi nañgöba jim asarimakzani, mianñon mi qahö dop köl köhöiza. Qahö!”

¹⁴ Mewö jiget möta kewö jii mötket, “Nöñön denikeyök eta kayali aka denike anda öngömami, mi möt teközal. Miangğöra nanak könañamni nañgöba jim asarimakzali, keu mi mönö ölop dop köl köhöiza. Mi köhöizapmö, inñini nöñgö könani mi ölña qahö möt kutuze. ¹⁵ Eñön ambazip silenñini miyöhök eka mewö mianñon bahösapsap kewöt engiba keuñini lañ jim tekömakzemö, nöñön ambazip kungö keuñi qahö jim tekömakzal.

¹⁶ “Ni nanök qahö maljalmö, Iwi melaim niñgiyöhi, yañön mönö nömbuk kini maljit. Miangğöra kungö keuñi jim teköbilenak ewö, mi mönö diñdiñanök kewöta dopñe jim teköbilenak. ¹⁷ *Yahötñan keu kun urumohot aka nañgöba jiyohotka dop köl köhöimakza. Keu mi engö Köna keuñine mewöyök ohoget ahöza.

* 8:12: Mat 5.14; Jon 9.5 * 8:13: Jon 5.31 * 8:17: Dut 19.15

18 “Nöñön nani kõnañamni nañgöba jimakzal aka Iwi melaim niñgiyöhi, yañön mewöyök nõngö kõnañamni nañgöba jimakza. Mianğöra yahöt akziga mianñön ölop dop kõla kõhöim teköza.”

19 Jisösnöñ mewö jii möta kewö qesim wañgiget, “Göhö Iwigi mi denike malja?” Qesim wañgigetka melenök, “Inini ni aka Iwini netkö kõnañamniri qahö möta malje. Inini nõngö kõnañamni möt kutubeak ewö, mönö nõngö Iwini mewöyök möt wañgibeak.”

20 Jisösnöñ jöwöwöl jikegö naluk dum kösutje kinda ambazip kusum engiba keu mi jiyök. Mi jiyökmö, nalöñan qahö kam kuñguyöhañgöra aka kunñan i qahö memba jöhöyök. Mewö.

“Denike öñgömami, inini mianğöreñ öñgöbingö osime.”

21 Jisösnöñ keu kun kewö toroqeba jii mötket, “Nöñön engömosöta anda malbiga inini ni göraim niñgiba malme aka siñgisöndok akeri, mianğöreñ qekötahöba kinda kömum kõhöime. Mianğöra denike öñgömami, inini mianğöreñ öñgöbingö osime.”

22 Juda jitñememe yeñön mi möta jiget, “Kewö jiza, ‘Denike öñgömami, inini mianğöreñ öñgöbingö osime.’ Keu mi denöwö? Imbi aumangöra jiza me?”

23 Mewö jigetka jii mötket, “Inini gölme kianğö tonji aka maljemö, nõñön miri gölme euyangö buñaya akzal. Enñön gölmenöñ ahuba gölme kianğö buñaya aka maljemö, nõñön mutuhök gölme kianğöreñ qahö ahuyal. 24 Qahö ahuba malmalgö kõnañi nalö dop mala korali, nõñön mönö mia akzal. Nõngöra mewö qahö möt narize ewö, mönö siñgisöndok akeri, mi qahö mosötpiga mianğöreñ qekötahöba kinda kömum kõhöime. Kõnañi mianğöra aka kewö jibi mötze, ‘Inini siñgisöndok akeri, mönö mianğöreñ qekötahöba kinda kömum kõhöime’. Keu mi ölja.”

25 Keu mi möta kewö qesim wañgiget, “Gi mönö ninja akzan?” Qesim wañgigetka melenök, “Kõnañamni lök indelbiga mötzei, nõñön mönö mia akzal. 26 Nöñön engöra keu gwötpuk ölop toroqeba jibileñak aka siñgisöndok gwötpuk akeri, mianğö keuñi ölop jim teköbilenakmö, melaim niñgiyöhi, yañön mönö nõngö melaimelai Toni ölni akza. Yañön keu jiiga yangöreñök möta kota maljali, nõñön mönö keu mi aukñe jibiga gölmeñi gölmeñi yeñön mörakñe.”

27 Mewö melenökmö, Iwigöra keu suariba jiyöhi, yeñön mi qahö möt asariget. 28 Jisösnöñ toroqeba kewö jii mötket, “Nöñön malmalgö kõnañi nalö dop mala korali, mönö mia akzal. Mianğö kõnañi mi kõnañep ölop möt asarime. Nöñön yuai kun nani ösumnan me nani imbinangö dop qahö ahakzalmö, Iwinan keu kusum niñgiba malöhi, mönö mianğö

dop keu jitni ki jimakzal. Keu kötñi yahöt miangö könañi mi könañgep möt asarime. Injini Suep gölmegö Azi Ölni kösökögetka eu öngöba kömumawi, nalö miangöreñ mi ölop möt asarime.

²⁹ Melaim niñgiyöhi, yañön mönö nömbuk kini maljit. Ahakmeme möri dop köl wañgimakzawi, nöñön mönö sundan mia ahakzal. Miangöra yañön qahö nömosöriga nanök qahö maljal.”

³⁰ Keu mewö jiyöhañgöra aka ambazip gwötpukñan uruñini melenja Jisös möt narim wañgiget. Mewö.

Abrahamgö gwölönarökurup muneñi aka Jisös.

³¹ Jisösnöñ Juda ambazip tosatñan möt narim wañgigeri, yengöra keu kewö jii mötket, “Nöñgö Buña keunan uruñine geiga miangöreñ qekötahöba kinje ewö, mönö ölna nöñgö gwarekurupni akze. ³² Mewö mala keu ölnañgö könañi möt kutugetka Buña keu ölnan injini bölöñañgö kösönöhök pösat enjiiga solanñi (fri) aka malme.”

³³ *Mewö jii möta melenja kewö jiget, “Nini Abrahamgö gwölönarökurupñi mala könagesö walñi akzin. Mewögöra azi kunöñ kösö gwarö mem neñgiiga maljinañgö jizani, mi qahö. Nini mönö nalö kunöñ etqeçenji mewö qahö aka malin. Aiga gi denöwögöra aka kewö jizan, ‘Kösönöhök pösat enjiiga solanñi aka malme?’ Keu mi qahö dop kölja.”

³⁴ Mewö jigetka kewö melenj enjiyök, “Nöñön keu öi töhöññi kun kewö jibi mötket: Singisöndok akzei, körek yeñön singisöndokö welenqeçe omanji töwa qahö aketka miangö kösöñan köpeim enjimakza. ³⁵ Köpeim enjimakzapmö, welenqeçenöñ tonañgö miri uruñe nalö dop qahö mal öngöma. Nanñi Nahönñan ölop miriñe nalö teteköñi qahö malma.

³⁶ “Nahönñan bölöñañgö kösönöhök pösat enjiiga solanime ewö, enñön mönö ölna kösö gwarö qahö solanñi (fri) aka malme. ³⁷ Injini Abrahamgö gwölönarökurupñi maljei, mötzalmö, bölöñan uruñini gwözöñjawanğöra nöñgö Buña keunan mösösönihim enjiba kondondöñgöba erakza. Könañi miangöra mönö kapan köla ni nuñgubingö mötze. ³⁸ Nöñön Iwinañgö qöhöröñe mala yuai eka mala koral, miangö keuña jimakzal. Enñön mewöyök iwinñan keu jii mötkeri, miangö dop ahakze.”

³⁹ Jisösnöñ mewö melenj enjiiga kewö jiget mörök, “Abrahamnöñ mönö nanine iwiambönini akza.” Mewö jiget möta jiyök, “Injini Abrahamgö gwölönarökurupñi akeak ewö, mönö yañgö ahakmemeñi wuatañgögetka dop kölbawak. ⁴⁰ Miangö tandökñi kewö akza: Nöñön Anutugö jitñeyök keu möta miangö dop keu ölbölñi mi jibi mörakze. Nalö kewöñe injini

* 8:33: Mat 3.9; Luk 3.8

kapan köla azi ni nuŋgubingö mötzemö, Abrahamnön mewö qahö ahök. ⁴¹ Nannini iwiurupŋinanğö ahakmeme miyök wu-atanğöba malje.” Mewö jüiga jiget mörök, “Serowilinön qahö ahuba iwi qahö (bastet) mi qahö akzinmö, Iwininambuk maljin. Anutunön mohok-kun nannak iwi ak neŋgiza.” Mewö.

“Bölöŋi Toŋaŋö buŋaya akze,” jiyök.

⁴² Jisösnön kewö jii mötket, “Anutunön nannak iwi ak enğibawak ewö, nöŋön yaŋğörenök eta asuhuyalaŋğöra mönö ölöp ni uru jöpaköm niŋgibeak. Nani ösumnön nam köliga qahö asuhuyalmö, Anutunön melaim niŋgiiga eta maljal. ⁴³ Keu jimakzali, mi wuanönğöra möt asaribingö lömbörimakze? Nöŋğö keunan uruŋini undenjawañğöra mi möt kutubingö olan qeba zikzik tökömakze. Mewöğöra mi möt asaribingö osimakze?

⁴⁴ “Mönö iwiŋini Bölöŋi Toŋaŋö buŋaya akze. Sihim kömbönaŋinan mönö iwiŋinanğö sihimŋi bölöŋi wuataŋğöbingöra ahöza. Yaŋön könakönahineyök ambazip enğuget kömükömu azia aka kota malja. Keu ölnan uruŋe qahö kinjawañğöra aka keu ölni oŋgita lolonqalolon kinja. Munen jiji azia aka munen jijigö iwiŋi akzawaŋğöra munen jimakzawi, mi mönö nannj uruŋaŋğöra jimakza.

⁴⁵ “Yaŋön munen jimakzappmö, nöŋön keu ölni jimakzal aigun inini ni qahö möt narim niŋgimakze. ⁴⁶ Inini körekŋan nöŋğö könani kewö kondelbingö osize: Yaŋön ŋiŋisöndok aka keuŋambuk malja. Könaŋamni mewö jaruzemö, nöŋön keu ölni jimakzali, mi mönö wuanönğöra qahö möt narim niŋgize?

⁴⁷ “Kunŋan Anutugö buŋa akzawi, yaŋön mönö Anutugören keu kezap ala mörakza. Inini Anutugö buŋa qahö akzeañğöra aka keu mi qahö möta möt asarimakze.” Mewö.

Jisösnön nannañğöra denöwö jim miwikŋaiyök?

⁴⁸ Jisösnön Juda ambazip yeŋğö könani indeliga likepŋi melen da kewö jiget mörök, “Gi Samaria prowinsgö lolonqalon azia aknönğa ömewörömenön uruge geiga maljan. Mewö jiba dopŋe jizin me qahöwi, mi ölöp nangak jinön mörin.”

⁴⁹ Mewö möta kewö melenök, “Ömenön urune qahö geiga maljal. Ni Iwinanök göda qem waŋgiba maljal aigun töndup enön gamu qem niŋgimakze. ⁵⁰ Mewö ahakzemö, nanak qet-buŋanambuk akŋamgö jaram qahö timakzal. Mohot kunŋan mewö akŋamgö bimŋi qeba malja. Azi yaŋön mohot kewöt niŋgiba ‘Dop köljan,’ jiba jim teköm niŋgimakza. ⁵¹ Nöŋön keu öl töhöŋŋi kun kewö jibi mötket: Kunŋan nöŋğö Buŋa keuni tem köla wuataŋğömakzawi, yaŋön mönö nalö kunön kömup köhöikŋañğö buŋaya qahö akŋa.”

⁵² Mewö melenjiga Juda jitjememe yeñon Jisös kewö jiget mörök, “Abraham aka kezapqetok ambazip yeñon kömuget aigun göñon töndup kewö jinönga siksauk akza, ‘Kunjan nöngö Buja keuni tem köla wuatangömakzawi, yanön nalö kunöñ kömup köhöikjanjö bujaya qahö akja.’ Mewö jizanañgöra gi öme kunöñ uruge geiga maljan. Mi dölki ölop möt asarizin. ⁵³ Neñgö bömönnini Abraham kömuyöhi, göñon mönö i ongita yanjö ketanjanji akzan me? Kezapqetok yeñon mewöyök kömuget. Gi nangahöra mötnöñ öngöiga ‘Ketanji ninja akzal?’ jiba mötzan?”

⁵⁴ Mewö jiget möta kewö melenjök, “Nanañgöra mötpi öngöiga Anutugö aködamunji mi nana buja qem angubilenjak ewö, qetbuñani mi mönö nesak akawak. Iwina nanji aködamunji ninjiyöhanjöra aka qetbuñanambuk aka maljal. Eñon yanjöra ‘Neñgö bem Anutunini akza,’ jize. ⁵⁵ Eñon könanji mi ölop qahö möt kutumakzemö, nöñon i ölop möt wanjizal. ‘I qahö möt wanjizal,’ jibilenjak ewö, mönö injini ewö tilipqilip azi akilenjak. Ni azi mewöñi qahö akzalmö, i ölop möt wanjizal aka yanjö keunji tem kölakzal. ⁵⁶ Eñgö bömönnini Abrahamnöñ ni gölmenöñ eta malmangöra mamböta nalö mi ekjanjöra uru sösongai aka malök. Nalö kewöñe Suepnöñ mal köhöiiga nöñon asuhubiga nöngö nalöni eka mianjöra söngaiyök.”

⁵⁷ Mewö melenjiga Juda jitjememe yeñon kewö jiget mörök, “Yambugi (yara) 50 qahö ongita mianjö bapne maljan aka ‘Abraham ehal,’ jinönga qahö dop kölja.”

⁵⁸ Mi möta jii mötket, “Nöñon keu öl töhöñji kun kewö jibi mötket: Abrahamnöñ qahö asuhuiga nöñon lök nalö mianjöreñ malal.”

⁵⁹ Mewö jii möta kötnöñ gila qebingöra köt umburanjöba megetmö, Jisösnöñ tölapköba jöwöwöl jikegö tohoñi mosöta ölöñ köla anök. Mewö.

9

Jisösnöñ jegömöl azi kun mem ölöwahök.

¹ Jisösnöñ toroqeba köna anda azi kun nam körö uruñeyök jegömöl asuhuyöhi, mi ehök. ² Mi ehiga gwarekurupjan qesim wanjiba jiget, “Ketanjanjini, yanön mönö dagö sinjisöndököra aka jegömöl mewöñi asuhuyök? Nanji sinjisöndököra me iwinanji yetkö sinjisöndököra?”

³ Jigetka kewö melenjök, “Nanjak sinjisöndök kun qahö ahök aiga iwinanjan sinjisöndök qahö ahotmö, Anutugö kukösumjan yanjö malmalje aukne asuhumapköra mewö ahuyök. ⁴ Wehöñon asariba ahözawanjöreñ mönö melaim ninjiyöhanjö nuwa töp memba malbin. Sunjem akñawi,

mianğoreñ körek nup memingö osibin. ⁵ *Nöñön gölmenöñ malmamañgö dop gölmenji gölmenji engö asakñini aka asariba malmam.”

⁶ Mewö jiba gölmenöñ söutköi geiga gwakötak melenđa jegömöl azigö jeñe timbiliyök. ⁷ Timbiliba kewö jim kutuyök, “Gi mönö Siloam o anğönöñ anda jegi sañgoñman.” (Siloam qet mi nanine keunöñ Melaimelai azi.) Mewö jim kutuiga anda jeni sañgoñni tohoiga ui asariiga lilingöba miriñe kayök.

⁸ Mewö kaiga alaurupñan kösutñe malgeri aka tosatñan mutuk nene yuaigöra ulet engiba mali ekeri, yeñön i eka jiget, “Jegömöl azi nenegö uleta tata malöhi, yañön azi mia me?”

⁹ Tosatñan jiget, “Yañön mönö mia.” Tosatñan jiget, “Qahö, kaisongolomñi i ewö akzapmö, yañön qahö.” Mewö mewö jigetka nannak jiyök, “Nöñön mönö ia akzal.”

¹⁰ Mewö jiiga kewö qesiget, “Jegi mönö denöwö aknöñga tohoza?”

¹¹ Qesigetka kewö melenj engiyök, “Azi qetñi Jisös qerakzei, yañön söutköi gwakötaknöñ geiga melenđa jene timbiliba jim kutuba kewö jiyök, ‘Gi mönö Siloam o anğönöñ anda jegi sañgoñman.’ Mewö jiiga o mianğoreñ anda jeni sañgoñbi tohoiga ubi asariyök.”

¹² Mewö melenj engiiga kewö qesiget, “Azi mi denike malja?” Qesim wañgigetka “Qahö mötzal,” jiyök. Mewö.

Farisi yeñön jeni tohoyöhanğöra qeqesi alget.

¹³ Azi jegömöl malöhi, yañön “Qahö mötzal,” jiiga ambazipnöñ i wañgita Farisi (Köna keugö kapañkölköl) yengöreñ anget. ¹⁴ Jisösnöñ söutñan gwakötakpuk melenđa jene timbiliba metohoyöhi, mi mönö Sabat kendon nalöñe meyök. ¹⁵ Mianğöra Farisi yeñön mewöyök kewö qesim wañgiget, “Jegi mönö denöwö aknöñga tohoza?” Qesim wañgigetka kewö melenj engiyök, “Azi mianğön mönö söutñan gwakötakpuk melenđa jene timbiliiga anda jemesoholni sañgoñda jeni ubi asariza.”

¹⁶ Mewö melenj engiiga Farisi yengöreñök tosatñan jiget, “Azi mianğön Sabat kendon köteközawi, mianğöra mönö Anutugöreñ azia qahö akza.” Tosatñan jiget, “Mewö qahö! Azi goñgoñi kunñan mönö denöwö aka anğöletot mewöñi memamgö köhöibawak?” Mewö mewö jiba nannini jula denget.

¹⁷ Mewö dengetka jegömöl azi mianğoreñ kunbuk lilingöba jiget, “Jegi metohoyöhi, yañgöra mönö denöwö jiman?” Mewö jigetka “Kezapqetok azia akza,” jiyök.

¹⁸ Mewö jiiga jeni ölna gömöliyöha tohoiga uyöhi, Juda jitñememe yeñön mi qahö möt nariget. Qahö möt nariba uruyahöt kinda iwinamñi öröm etkigetka kayohot.

* 9:5: Mat 5.14; Jon 8.12

¹⁹ Kayohotka kewö qesim etkiget, “Azi ki etkö nahönjira me qahö? ‘Jegömöl asuhuyök,’ jizahotmö, denöwö aka mönö dölki jeni uba ekza?”

²⁰ Qesim etkigetka kewö melenjohot, “Azi ki netkö nahönira akza aka jegömöla asuhuyök, mi ölop mötzit. ²¹ Mewö mötzitmö, denöwö aka dölki jeni uba ekzawi, mi qahö mötzit. Dañon jeni metohoi uzawi, niri mewöyök qahö mötzit. Gömokni qahö, lök qariba töwatni jörak alalna aka mötkutukutuñambuk akza. Mianğöra mönö nanñangö qesigetka könani ölop jima.”

²² Juda jitnememe yeñğöra keñğötñiri möta mewö jiyohot. Yeñon sutñine keu kewö jöhöba urumohot aka kinget, “Kunñan Jisös Amötqeçe Tonji Kraist akzawi, mewö jim miwikñaima ewö, i mönö köuluk miri kambunöhök közöl wañgibin.” ²³ Keu mianğöra aka kewö jiyohot, “Gömokni qahö, lök qariza. Mianğöra mönö nanñi qesim wañgime.”

²⁴ Mianğöra azi jegömöl malöhi, mi kunbuk öröget kaiga kewö jiget mörök, “Azi mi siñgisöndok azia akza, mi mötzin. Mianğöra mönö Anutugö qetbuñani möpöseinönga aködamunñambuk ahi dop kölma.”

²⁵ Mi möta kewö melenök, “Siñgisöndok azia akza me qahö, nöñon mi qahö mötzal. Mohot kewöyök mötzal: Nöñon jegömöl malalmö, dölkewöñe kunbuk ölop uba ekzal.”

²⁶ Mewö melenjiga kewö qesim wañgiget, “Wani yuaia ak gihiza? Jegi mönö denöwö metohoza?”

²⁷ Qesim wañgigetka kewö melenj engiyök, “Nöñon lök melenj engizalmö, eñon keu jizali, mi qahö mötze. Wuanöñğöra mi kosikni kunbuk jibi mötpingö kapan kölje? Eñon mönö mewöyök yañğö gwarekurupni akingö mötze me?”

²⁸ Mewö melenj engiiga mepaqepaik aka uruqeçe keu töhörej kewö jim wañgiget, “Gi mönö yañğö gwarekña akzanmö, neñon Mosesgö gwarekurupña maljin. ²⁹ Anutunöñ Mosesya Buña keu wañgii mötzinmö, azi mianñon mönö igen me waigenök asuhuyöhi, mi qahö mötzin.”

³⁰ Mewö jigetka keu kewö jii mötket, “Yañon denikeyök asuhuyöhi, inini mianğöra tok kök qeba tönpin akzeangöra mi welipközal. Ölna welipközalmö, töndup nöñgö jeni metohoiga ölop uba ekzal. ³¹ Ambazip gonñoni yeñon Anutu köulukögetka qahö möt engimakza, mi mötzin. Mi mötzinmö, kunñan Anutu göda qem wañgiba diñgiba keu jitñi tem köla wuatangömakzawi, yañğö köulukni mönö kezap ala mörakza. ³² Kun jegömöl asuhuiga kunöñ kaba jeni metohoyöhi, kösohot mewöñi mi mutuhök qahö möta malin. Suep gölmenöñ asuhuyohot, nalö mianğorenök könahiba kota mala merak mianğorenj kösohot

mewöŋi kun qahö mörin. ³³ Anutugöreŋök qahö kabawak ewö, yaŋön mönö yuai mewöŋi memamgö osibawak.”

³⁴ Mewö jii möta kewö jim waŋgiget, “Iwinamgan siŋgisöndokpuk gölöm alohotka siŋgisöndok pampak miambuk ahuba qarinoŋaŋön merak ninia kusum neŋgimangö mötzan. Mi qahö dop kölja.” Mewö jim waŋgiba közölgetka gunnön erök. Mewö.

Urujenöŋ gömöliiga ilingösöŋ jipjap malmal.

³⁵ Közölgetka gunnön eröhi, keu miaŋön Jisösgö kezapŋe gei möta azi mi miwikŋaiba kewö jii mörök, “Gi Anutugö Nahönŋi möt narim waŋgizan me qahö?”

³⁶ Mi möta kewö qesiba meleŋnök, “O Ketaŋamni, azi mi daŋön? Mi jinöŋ mötagun i ölop möt narim waŋgimam.”

³⁷ Meleŋniga kewö jim kutum waŋgiyök, “Gi kewö uba neknöŋ. Göbuk keu jizali, azi mia mönö nöŋön akzal.”

³⁸ Mi möta jiyök, “O Kembu, ni möt narim gihizal.” Mewö jiba sipköba köuluköm waŋgiyök.

³⁹ Jisösnöŋ jiyök, “Nöŋön ambazip kewöta keuŋini jim tekömamgöra aka eta gölmenöŋ asuhuyal. Nöŋgöra aka tosatŋan jegömöl akzei, yeŋgö jeŋini tohoiga ölop uba ek kutume. Tosatŋi jeŋini ölopŋi maljei, yeŋön nöŋgöra aka bau jegömöl aka malme.”

⁴⁰ Mewö jiiga Farisi tosatŋan kösutŋe miaŋgöreŋ kinda keu mi möta kewö qesiget, “Wae! Nini tok jegömöl azia akzin me? Neŋgöra jizan me?”

⁴¹ Mewö qesigetka kewö jii mötket, “Injini ‘Jegömöl akzin,’ jibeak ewö, mönö siŋgisöndok qahö ahöm eŋgibawakmö, nalö kewöŋe ‘Ölop ek kutuzin,’ mewö jimakzeanğöra aka siŋgisöndokŋinan mönö ahöm köhöim eŋgima.” Mewö.

10

Lama aka galömŋini ölopŋi.

¹ Jisösnöŋ galöm meme keu kewö jiyök, “Nöŋön keu öl töhöŋŋi kun kewö jibi mötket: Tosatŋan lama tohoŋ uruŋe öŋgöbingöra naŋgunöhök qahöpmö, sel walöŋda gezei, yeŋön mönö kegwek aka yoŋgorö meme ambazip akze. ² Kunŋan naŋgunöŋ gezawi, yaŋön lama miengö galömŋina akza. ³ Yaŋön kaŋgoriga naŋgu galömŋan eka naŋgu öröm waŋgiiga eta qeriga lama yeŋön keu jölŋi ölop möt kutumakze. Galömŋinan nanŋi lamaaurupŋi eŋgohola qetŋini qeta eŋguaŋgiriga tohoŋini mosöta ölop yaigepŋe anakze.

⁴ “Nanŋi lamaaurupŋi pampak eŋguaŋgiriga tohoŋini mosöta yaigepŋe angetka yaŋön jitŋememeŋini aka mutuk aniga keu jölŋi möt kutuzeanğöra andöŋe wuatangöba anakze.

⁵ Nanŋini galömŋini ölop wuatangömakzemö, kian kunŋan

kaiga i qahöpmahöp wuatängöme. Kian yengö keu jölni qahö möt kutuzeängöra mönö zirinžirin aka yängöra kök ala denme.”

⁶ Jisösnöñ keu tölapñi mi jii mötketmö, keuñängö könani qahö möt asariba könkuñ qeget. Mewö.

Jisösnöñ lama galöm ölöpnj akza.

⁷ Könkuñ qegetka toroqeba engöra kewö jiyök, “Nöñön keu öl töhöñni kun kewö jibi mötket: Nöñön lama tohongö nanñuñi akzal. ⁸ Nöñgö andöne kambu galöm pakpak mutuk kageri, yeñön kegwek aka yongorö meme ambaziwa aket. Mewö akerängöra lama yeñön i qahö möt kutum engiba malget.

⁹ “Nöñön mohot lama tohongö nanñuñi akzal. Denike enñön Anutubuk köhöiba malbingö jiba nömbuk qekötahöba maljei, nöñön mönö amöt qem engibiga letotme. Mewö aka lama tohoñ uruñe öngöba eta yaigep anda nene gölmeñi möriamñambuk miwikñaimakñe. ¹⁰ Yongorö meme yeñön wuanöngöra kamakze? Yeñön yongorö memba neñguba ayuhum neñgibingöra kamakze. Yuai murutñi akingöra qahö. Nöñön mewö qahö akzal. Nöñön inñi malmal köhöikñi miwikñaiba oyaenjkoyaen aka malmegöra kaba maljal.

¹¹ “Nöñön lama galöm ölöpnj akzal. Lama galöm ölöpnjan mönö lamaurupñi yengöra aka malmalni kölenđa engima. ¹² Kunñan lama toñi qahö aka bohon memegörök kaba lañ galöm köl engimakzawi, mi kewö: Kiam kalñan kaiga eka lamaurup engömosöta unjurata aniga kiam kalñan lama engöhöba kiom enguba mender engima. ¹³ Yanñön yaigewök kaba bohon memegörök ‘Lama galöm köl engimam,’ mi jitnöñ jiba lama engöra waimanjat qahö möta nesampurek qakñe mala lañ unjurata anma.

¹⁴⁻¹⁵ * “Nöñön lama galöm ölöpnj akzal. Iwinan ni möt niñgiiga nöñön Iwini möt wañgiba maljal. Miangö dop nöñön nani lamaurupni möt engibiga yeñön ni möt niñgimakze. Nöñön malmalni lamaurupni engöra aka kölenđa mosötmam. ¹⁶ Nöñgöreñ lama kambu tosatñi mi mewöyök ahuba malme. Yeñön lama tohoñ kiangö toñi qahö maljemö, töndup nöñgö keu jölñi mörakñe. Nöñön i mewöyök enñuanñitpiga miangö dop anda kamakñe. Könangep kambuñi kambuñi mienñön mindiriba kambu mohot aketka galöm mohotñan galöm köl engiiga malme.

¹⁷ “Iwinöñ kewögöra aka ni urunöñ jöpaköm niñgimakza: Nöñön malmalni mosöta kunbuk guliba mal öngömam. Mi Iwigö jene dop kölja. ¹⁸ Malmalni kunñan qahö noangitmapmö, mi nanak kölenđa mosötmam. Iwinan jim kutum niñgiiga

* 10:14-15: Mat 11.27; Luk 10.22

nanak malmalni kölenḡa mosötḡmam aka mianḡö andöḡe kunbuk guliba mal öngöḡmam. Kukösum mewöḡni mi nöḡḡöḡen ahöza.”

¹⁹ Jisösnöḡ keu mi jiyöḡḡḡöḡa aka Juda jitḡememe yeḡḡö sutḡine goranora kunbuk asuhuyök. ²⁰ Yeḡḡöḡöḡök gwötḡpukḡḡan kewö jiget, “Ömewörömenöḡ uruḡe geyöhawa mala kahapmahap akza. Mönö wuanöḡḡöḡa keuḡi möḡḡpinak? Muat mosötḡpin.”

²¹ Tosatḡḡan jiget, “Keu mewöḡni mi kölköljinjin azigö keu ewö qahö. Ömewörömenöḡ mönö jegöḡmöl ambazip yeḡḡö jeḡḡini denöwö metohobawak?” Mewö erauget.

Juda jitḡememe yeḡḡön Jisös andö qeget.

²² Mönöwök jöwöwöl jike köḡ köḡḡörata naḡḡuḡi öḡöget. Mi yambu (yara) dop möḡḡmöriba kendongö söḡḡaibingöḡa* Jerusalem tokoget. Nalö mianḡön kam kuḡḡuiga köḡmunḡḡ kie uru nalö amötḡḡi ahök.

²³ Jisösnöḡ jöwöwöl jikeḡö toḡḡḡ uruḡe kiḡ Solomongö sombem söḡḡḡambuk qetkeri, mianḡöḡen anda liliköyök. ²⁴ Anda liliköiga Juda jitḡememe yeḡḡön kaba liliköm waḡḡiba kewö qesim waḡḡiget, “Köḡḡḡamgi köyatinöḡḡa mönö nalö dawik toroqeba mambötḡḡingö möḡzan? Gi Amötqeqe Toḡḡi akzan me qahö, mi mönö aukḡe jinöḡḡa möḡḡpin.”

²⁵ Mewö jim qesim waḡḡigetka kewö melenḡ enḡiyök, “Nöḡḡön lök jibiga möḡketmö, inḡini nöḡḡö keuni mi qahö möḡ narize. Nöḡḡön Iwinanḡö qetḡe anḡöletot ahakzali, mianḡön mönö köḡḡḡamni indela naḡḡöba kondelakze. ²⁶ Mi naḡḡöba kondelakzemö, inḡini nöḡḡö lama kambu uruḡe qahö maljeanḡöḡa aka keuni qahö möḡ narimakze.

²⁷ “Nöḡḡön mönö lamaurupni möḡ enḡibiga yeḡḡön mewöyök nöḡḡö keu jölḡni möḡa ni nuatanḡöḡmakze. ²⁸ Nöḡḡön malmal köhöikḡi enḡibiga letota nalö kunöḡ qahö köḡökḡi ayuhume. Kunḡḡan kun i nöḡḡö böḡröneyök qahö öḡöba köndenḡ enḡima. ²⁹ Nöḡḡö Iwinan i nöḡḡö böḡrone al enḡiyöhi, yaḡḡön köḡek enḡonḡita öḡḡöḡḡöḡi ketanḡi akza. Mianḡöḡa köḡekḡḡan i nöḡḡö Iwinanḡö böḡröneyök öḡöba köndenḡ enḡibingö osime. ³⁰ Ni aka Iwi netköḡ mönö mohot aka maljit.”

³¹ Jisösnöḡ mewö juiga Juda jitḡememe yeḡḡön kunbuk gölmenöhök köḡ umburanḡöba memba mianḡön gila qebingö aket. ³² Mewö aketmö, kewö jim enḡiyök, “Iwinöḡḡ nam köḡ niḡḡiiga anḡöletot ketanḡi gwötḡpuk aka membiga ekeri, miengöḡöḡök mönö wania kun möḡḡmöriba ni köḡnöḡ gila nuḡḡubingö möḡḡze?”

* **10:22:** Kendon qetḡḡi Hanuka mi Disemba 25 köḡḡḡḡa weḡön 8 mianḡö dop tata söḡḡaiget. Miri pakpak kiwa ohotiriget asariiga ip sinḡḡi tokoba liḡet köḡa söḡḡḡḡaia aket.

³³ *Jim enjiiga Juda yenön melenḁa jiget, “Nenön anḁöletot ketanji aknönanḁöra aka qahö kötnönḁ gila guhubingö akz-inmö, Anutu mepaqepaik ak wanḁgizananḁö likepñi ak gihibin. Gi gölme azia aigun silegi öne mem öñḁöba Anutu tandök akñamḁo jizan.”

³⁴ *Mewö jigetka Jisösnönḁ melenḁ enḁiyök, “Buña Kimbinönḁ Köna keu kun kewö ohoget ahöza, ‘Anutu nöñön jial: Injini mönö nöñḁö bemurupni akze.’ ³⁵ Buña Kimbigö keu mi mönö pömsöm qahö qemapmö, pöwöwöm ahöma. Mianḁöra Anutunönḁ keunji ali kaba ambazip buñanḁina ahöhi, Anutunönḁ yenḁö qetñjini ‘bemurup’ mewö qet enḁiyök. ³⁶ Ambazip omanji mewö qet enḁiyökmö, Iwinönḁ azi mem sarahiba melaiiga gölmenönḁ eröhi, enön mönö denöwö aka yanḁöra kewö jize, ‘Gi Anutu mepaqepaik ak wanḁgiba maljan.’ Nöñön ‘Anutugö nahönñi akzal,’ keu mewö jibiga enön mönö wuanönḁöra mi mötket qahö dop kölja? Injini Anutugörenḁ Buña keu mi qeze me?”

³⁷ “Nup memakzali, mi eketka Iwinanḁö ahakmemegö dop qahö ahakza ewö, mönö kude möt narim niñḁime. ³⁸ Iwinanḁö ahakmemegö dop aka memba maljal ewö, könanḁamni mewö eka mönö möt narim niñḁime. Mi keunanḁöra aka qahö möt naribeak ewö, mönö anḁöletotnanḁöra aka töndup möt narim niñḁime. Iwinönḁ nömbuk qekötahöba kinja aka nöñön Iwibuk qekötahöba kinjali, injini mianḁö könanji möt sölöñḁöba asarimeḁöra jizal.”

³⁹ Jisösnönḁ mewö jiiga kunbuk memba jöhöbingö mötketmö, börö bapñineyök unjurata eta anök.

⁴⁰ *Enḁömosöta Jordan o töwatñi kutuba kunbuk likepñe anda Jonönḁ mutuk o melun mem enḁgiba malöhi, mianḁörenḁ anḁota nalö tosatñi toroqeba mianḁörenḁ malök. ⁴¹ Mianḁörenḁ maliga ambazip gwötpukñan yanḁörenḁ kanḁota eka kewö jiget, “Jonönḁ anḁöletot mohot kun qahö meyökmö, keu pakpak azi kianḁöra jiyöhi, mi mönö keu ölna jiba malök.” ⁴² Kanḁotkeri, yenḁörenḁök gwötpukñan urunḁini melenḁa möt narim wanḁiget. Mewö.

11

Jisösgö alanji Lazarusnönḁ kömuyök.

¹ *Betani taongö azi kun qetñi Lazarus mianḁön kawöl yöhöi ahöyök. Maria aka Marta darumun yetkön Betani taon mianḁörenḁök malohot. ² *Maria mianḁön Kembu o köhöwaktambuknönḁ miriba nörop jupñan könanji kerenḁ meyök. Lazarus kawöl yöhöi ahöyöhi, mi yanḁö nenña. ³ Lazarusnönḁ

* 10:33: Lew 24.16 * 10:34: Sum 82.6 * 10:40: Jon 1.28 * 11:1: Luk 10.38-39 * 11:2: Jon 12.3

kawöl yöhöi ahöiga nenyahötñan buzup keu kewö alohotka Jisösgöreñ anök, “Kembu mötnöñ, alagi yangö ak gihi-makzawi, yanñon mönö kawöl yöhöi ahöza.”

⁴ Buzup mi anökmö, Jisösnöñ mi möta kewö jiyök, “Kawöl mianñon azi alani kömumapköra aka qahö asuhum wanñii ahöza. Mianñöra qahöpmö, Anutugö Nahönñan i mem ölöwaka mianñöra Suepkö aködammunñambuk aiga ambazipnöñ könañi mi ek kutuba Anutu möpöseigetka qetbuñanñan asarim sehima. Kawöl mi mianñöra aka asuhum wanñiyök.”

⁵ Jisösnöñ Marta, yangö munñi aka nennñiri Lazarus yengöra ak wanñiiga malök. ⁶ Mewö malökmö, töndup kawölñangö buzupñi möta miri malöhi, mianñöreñök sömañ yahöt toroqeba malök. ⁷ Mi mali nalö mi teköiga gwarekurupñi yengöra kewö jii mötket, “Nini mönö Judia prowinsnöñ lilingöba anbin!”

⁸ Mewö jiiga melenget, “Ketanamnini, Juda yengön uruwale kapañ köla kötnöñ gila guhubingö mötket. Mianñöra kunbuk Judia lilingöba anmamgö jizani, mi qahö dop kölja.”

⁹ Mewö melengetka Jisösnöñ keu kewö jiyök, “Wehöngö auañi 12 ahözei, kunñan mianñö asakñe köna anmawi, yanñon mönö yuai kunñan qem mizit qahö ak wanñima. Gölmegö asakñan asarim wanñiiga ölop eka anma. ¹⁰ Ölop anmapmö, kunñan kiwanñi qahö ahöm wanñiiga sunñem jipjap anmawi, yanñon mönö qem mizit miwikñaima.” ¹¹ Keu mi jibagun kewö jii mötket, “Alanini Lazarusnöñ gaunwat ahözapmö, nöñon anda gaunöhök möndöbi wahötma.”

¹² Keu mi möta kewö jiget mörök, “Kembu, ölna gaun ahöza ewö, mönö ölop ahöba ölöwakña.”

¹³ Jisösnöñ Lazarus kömuyöhanñö keu sainñi jiyökmö, gwarek yengön ‘Gauna ahöza,’ jiyöhi, mianñö möt bibihiba keu könañi qahö möt kutuget. ¹⁴ Qahö möt kutugeranñöra Jisösnöñ aukñeyök jim miwikñaiiba jiyök, “Lazarusnöñ kömuyöha ahöza. ¹⁵ Nöñon yambuk qahö malbiga kömuyöhanñöra nöñon anda mem gulibiga wahöri eketka mötnaripñinan asuhum köhöima. Mewö aiga engöra söñgaiba ‘Simbawon akñe!’ jizal. Mönö wahötketka yanñöreñ anin.”

¹⁶ Mewö jim miwikñaiiga Tomas qetñi kun Siwisiwi qetkeri, yanñon gwarek alaurupñi yengöra kewö jii mötket, “Nini ölop mohotñe mianñöreñ anin. Andagun yambuk kömuin.” Mewö.

Malmal Tonñan nenyahötñi urunñiri qesawöliyök.

¹⁷ Lazarusnöñ kömumba wehön 4 lök qaksirinöñ ahöi teköiga Jisösnöñ kanñoriga buzupñi mewö jiget mörök. ¹⁸ Betani taon mi Jerusalem siti mosöta 3 kilomita anangö dop dowe ahöyök. ¹⁹ Mianñöra Juda ambazip gwötpukñan Marta Maria nennñiri kömuyöhanñöra ‘Songon etkekin,’ jiba kaba tatket.

²⁰ Tatketka Martanöŋ “Jisös kaza,” jiget möta miri mosöta könanöŋ anda miwikŋaiyökmö, Marianöŋ mire tarök. ²¹ Könanöŋ miwikŋaiba kewö jii mörök, “Kembu, gi kiangören malbanak ewö, nenan mönö qahö kömumbawak. ²² Qahö kömumbawakmö, göŋön nalö kewöŋe mewöŋanök Anutugö yuai kungöra köuluköman ewö, mi pakpak ölop miwikŋaim gihiiga asuhuma, mewö mötzal.”

²³ Keu mi möta Jisösnöŋ jii mörök, “Göhö nengan mönö guliba wahötma.”

²⁴ Mi möta Martanöŋ jiyök, “Gölmegö nalö teteköŋe kömukömunji yeŋön wahötmei, yaŋön mönö nalö ketanji miangören guliba wahötmawi, mi möt yaközal.”

²⁵ Mewö jiiga Jisösnöŋ jii mörök, “Kömupnöhök wahötwahötkö Toŋi mi nöŋön akzal. Nanak Malmal köhöikŋangö Toŋi akzal. Miangöra kunŋan ni möt narim niŋgizawi, yaŋön kömumapmö, töndup toroqeba mal köhöiba malma. ²⁶ Kunŋan kun gölmenöŋ mala möt narim niŋgiza ewö, yaŋön mönö nalö kunöŋ qahö kömum köhöima. Qahö! Keu mi möt narizan me qahö?”

²⁷ Martanöŋ keu mi möta jiyök, “O Kembu, mi möt narizal. Göŋön Anutugö Nahönŋi akzan. Amötqeŋe Toŋi Kraist gölmenöŋ asuhumapkö jigeri, göŋön mönö mia akzan. Mewö möt narizal.” Mewö.

Jisösnöŋ sahöri imbilŋan erök.

²⁸ Martanöŋ keu mewö jiba miriŋe lilingöba anda munŋi Mariagöra keu ölöŋ jiiga göraŋe kaiga jiyök, “Böhinöŋ kaba könanöŋ kinda göhöra endu anda eknangöra jiza.”

²⁹ Mewö jiiga Marianöŋ keu mi möta miangörenök i mosöta Jisösgören anök. ³⁰ Anökmö, Jisösnöŋ miri sombemnöŋ qahö kaŋgoriga endu Martanöŋ köna namŋe miwikŋaiba ehöhi, miangörenök kinök. ³¹ Juda ambazip yeŋön Mariabuk miri uruŋe uru qesawölökö tatketka Marianöŋ zilaŋ wahöta gumnöŋ eta aniga eka kewö mötmöriba jiget, “Yaŋön mönö qaksirinöŋ anda sahötma.” Mewö jiba yangö andöŋe wu-ataŋgöba anget.

³² Marianöŋ anda Jisös kinöhaŋgören aŋgota eka könaŋe sipköba eta kewö jii mörök, “O Kembu, göŋön ki malbanak ewö, nenan mönö qahö kömumbawak.”

³³ Mewö jiba silata qeta sahöriŋa Juda ambazip yambuk kaba naŋgöba mohotŋe sahötkeri, Jisösnöŋ mi eka wösöŋi pölpölgöiga jeŋi asöliiga köna böroŋi jönömŋambuk unduyök. ³⁴ Jönömŋambuk undui qesim enŋiyök, “I denike alget ahöza?” Qesim enŋiiga jiget mörök, “Kembu, kewö kaba eknöŋ!”

³⁵ Mewö jigetka Jisösnöŋ sahörök. ³⁶ Sahöriga Juda ambazip yeŋön eka jiget, “Ye! Mönö alaŋaŋgöra önöŋi qahö ak waŋgi malök.”

³⁷ Mewö jigetmö, tosatŋan keu mi qeba kewö jiget, “Jegömöl ambazip jeŋini metohoba malök ewö, mönö ölop Lazarus jiiga qahö kömumbawak me?” Mewö.

Jisösnöŋ Lazarus mem guliiga kömupnöhök wahörök.

³⁸ Mewö laŋ jigetka Jisösgö wösöŋi kunbuk pölpölgöiga jeŋi asöliiga qaksirinöŋ anök. Qaksirinöŋ anda yuai kewö ehök: Köt köteŋ urorohoba qamötŋi miaŋgö uruŋe ala naŋguŋi köt ketaŋan köl közipkögetka tarök. ³⁹ Mi eka kewö jiyök, “Mönö köt qililiŋgögetka anök.” Mewö jiiga azi kömuyöhaŋgö nenŋi Marta yaŋön kewö jii mörök, “O Kembuni, sömaŋ 4 ahözawaŋgöra lök wörönŋambuk akza.”

⁴⁰ Jisösnöŋ mi möta Martagöra kewö jiyök, “Gi möt narim niŋgibanak ewö, Anutugö kukösumŋan aködamunŋambuk asuhuiga ekanak. Mutuk keu mewö jibiga mötnöŋ me qahö?”

⁴¹ Mewö jiiga köt qililiŋgöget aniga Jisösnöŋ eu ui öŋgöiga kewö jiyök, “Iwi, gi köulukni mötzanaŋgöra aka ‘Pipsaiwap!’ jim gihizal. ⁴² Gi nalö dop köulukni mörakzani, mötzalmö, göŋön melaim niŋginöŋga gölmenöŋ erali, ambazip kambu liliköm niŋgiba ki kinjei, yeŋön mi möta möt narimegöra aka keu ki jizal.”

⁴³ Mewö jiba imbiŋi memba wahöta ketaŋanök qeta kewö jiyök, “Lazarus, gi mönö wahöta kaŋgotnöŋ!” ⁴⁴ Mewö qeriga azi kömükömuŋi yaŋön guliba wahöta kayök. Köna böröŋi opo kawukŋambuknöŋ esuhuba jemesoholŋi opo jöhanŋan köpeiba jöhöget ahöi dundunŋambuk kayök. Mewö kaiga Jisösnöŋ jiyök, “Mönö dundunŋi pösatketka ölop anma.” Mewö.

Juda galöm yeŋön Jisös kömumapkö aŋgönaŋ geget.

Mat 26.1-5; Mak 14.1-2; Luk 22.1-2

⁴⁵ Juda ambazip Mariagöreŋ kaŋgota Jisösnöŋ yuai aiga asuhuiga ekeri, yeŋgöreŋök gwötpukŋan uruŋini melaŋda Jisös möt narim waŋgiget. ⁴⁶ Möt narim waŋgigetmö, tosatŋan Farisi (Köna keugö kapaŋkölköl) yeŋgöreŋ anda Jisösnöŋ yuai ahöhi, miaŋgö kösohotŋi jiget mötket.

⁴⁷ Mi jiget mötketka jike nup galöm aka Farisi yeŋön jike kaunsöl jitŋememe öröm engiget tokogetka kewö jiget, “Azi mi-aŋön aŋgöletot kukösumŋambuk sehisehiŋi memakzawaŋgöra i mönö denöwö ak waŋgiinga dop kölbawak? ⁴⁸ Wakosoraŋ aka yuai kun qahö ak waŋgiinga toroqeba mewö aka malma ewö, mönö ambazip körek pakpak i möt narim waŋgibeak. Mewö aketka Rom gawman yeŋgö irimŋini seholiiga kaba nanini jöwöwöl jikenini aka ambazip kambu ki nenguaŋgitketka öne töhön malbinbuk.”

49 Mewö jiget tatketka yengörenök kun qetņi Kaiafas yaņön yambu (yara) miangören jike nup galöm bohonņi aka nup mia memba malök. Yaņön wahöta goro keu kewö jii mötket, “Injini uru mötmötņinaņgö kinimņi tok qahö tohoza. 50 Injini keu ki ölop qahö kewötze: Nini ambazip kambu körekņanök ayuhuinga lömböt keta bölökņi akapuk. Miangöra azi mo-hotņan Juda kambu neņgö aip selnini ala sohopnini memba kömuiga dop kölma.”

51 Yaņön keu mi nanņi imbiņe qahö ahuiga jiyökmö, yambu (yara) miangören jike nup galöm bohonņi malöhaņgöra aka nanņak keuņaņgö kōnaņi qahö möta kezapqetok keu jiyök, “Jisösnöņ ambazip kambu neņgöra aka kömui dop kölma.” Keu mi ölna jiyök. 52 Juda ambazip kambu neņgörohök qahö kömuyökmö, Anutugören urumelen kōnagesö gölme dop denqenda mal anjini, nini mewöyök mindirim neņgiiga urumelen kambu mohok aka malbingöra kömuyök. Kömumapkö keuņi mi qeljine jiyök.

53 Wehön miangörenök kōnahiba jitņememe yeņön tokoba mewö eraum möta Jisös kömumapkö keuņi jim köhöiba areņi alget. 54 Miangöra Jisösnöņ toroqeba Juda yengö sutņine aukņe qahö anda kaba malök. Mewö qahöpmö, engömosöta gölme qararaņkölkölnaņgö göraņe anök. Miangören anda taon qetņi Efraim miangören aņgota gwarekurupņi yembuk nanņinök malget.

55 Juda neņgören ak-kömukömu kendonöņ törüyök.* Miangöra Juda ambazip gwötpukņan miri dop miriņini mosöta köl kōnjörat ak aņgubingöra möta Jerusalem sitinöņ öngöget. 56 Jisös jaruba mala jöwöwöl jikegö tohoņ uruņe kinda eraum möta kewö qesim aņguget, “Jisösnöņ sösöņgai kendongöra ki kama me qahöpto? Denöwö mötze?”

57 Mewö qesim aņgugetmö, jike nup galöm aka Farisi yeņön jimkutukutu keu kewö algetka sehiyök, “Kunņan Jisösgö ahöm tatatņi eka mötmawi, yaņön mönö neņgören kaba buzupņi jii möta anda memba jöhöbin.” Mewö.

12

Marianöņ Jisös o köhöwakņambuknöņ miriyök.

Mat 26.6-13; Mak 14.3-9

1 Anutunöņ mönöwök neņgehoriba neņgoņgiröhi, miangö ak-kömukömu kendonņan* töriba sömaņi 6 teköiga miangören kam kuņgumamgö ahök. Jisösnöņ nalö miangören miri qetņi Betani miangören anök. Mutuk azi qetņi Lazarus mem

* **11:55:** Kendon qetņi Nei keunöņ Pasowa jize. Anutunöņ mönöwök Israel ambazip neņgehoriba neņgoņgiröhi, miangöra yambu dop nalö ala söņgaimakzema.

Eksodus 12.15 * **12:1:** Eksodus 12.15

gulii kômupnöhök wahöta malöhi, mönö yaŋgö mire aŋgorök.
² Miangöreŋ aŋgoriga Jisös göda qem waŋgibingöra miri kunöŋ nene ohoba mözözömgöget. Martanöŋ ohom tönden kol engiyökmö, azi Jisösbuk mohotŋe tata nene neger, Lazarusnöŋ yeŋgö sutŋine tarök.

³ *Mewö tatketka Marianöŋ kelök kirin kun lömbötŋi 500 gram mi memba Jisösgöreŋ kayök. Kirin mi o umköhöwakŋambuk ölni qetŋi nad bohonŋi öngöngöŋi ketanŋi mianön kokolak qeŋeŋa. Yaŋön mi memba kaba simin köla Jisös könaŋe mimbiliba miriba nörop jupŋan kereŋ meyök. Mewö aiga miri uruŋe tatkeri, mi ogö wöronŋan pukpuköba dop köla ahöiga mötket.

⁴ Mewö asuhuiga Jisösgö gwarek yeŋgöreŋök kun qetŋi Judas Iskariot, könaŋep Jisös mamalolo meyöhi, azi mianön qetala kewö jiyök, ⁵ “O köhöwakŋambuk mi mönö wuanöngöra bohonŋi memegöra qahö alök? Iwinanöŋo jitŋi! Mi albawak ewö, mönö silim 300:kö töwaŋi (Kina 1500,-) mianöŋo dop yöhötibawak. Mia ambazip wanapŋi engiinga dop kölbawak.”

⁶ Mewö jiyökmö, keu mi ambazip wanapŋi yeŋgöra waimanjat möröhaŋgöra aka qahö jiyök. Yeŋgöra aka qahöpmö, yongorö meme asia mala moneŋ gösö kutukutulaŋini galöm köli moneŋ alget geiga miangöreŋök kitipŋi nanŋanöŋora memba malök. Mönö mianöŋora aka mi jiyök.

⁷ Mewö jiiga Jisösnöŋ jiyök, “Inini ambi ki mönö kude jim waŋgime. Nönön kömumbiga löm kol niŋgimeanöŋo nalöŋi törizawaŋgöra ölop sileni o umköhöwakŋambuknöŋ nömiriza.

⁸ *Ambazip wanapŋi mi mönö nalö dop sutŋine malakzemö, nöŋön embuk nalöŋi nalöŋi qahö malmam.” Mewö.

Lazarus qebingö keu jöhöba aŋgönaŋ alget.

⁹ Jisösnöŋ Betani mire malöhi, mi Juda ambazip kambu gwötpukŋan möta miangöreŋ kaget. Jisösgöröhök qahö kagetmö, Lazarus kômupnöhök mem gulii wahöröhi, i mohot ekingö likeplikep öröba kaŋgotket. ¹⁰ Mewö kaŋgotketmö, jike nup galöm yeŋön Lazarus mewöyök qein kömumapkö keu jöhöget. ¹¹ Juda ambazip gwötpukŋan Lazarusgöra aka Betani anda uruŋini melenŋa Jisös möt nariget. Mianöŋora keu mewö jöhöget. Mewö.

Jisös köiraŋ kölgetka Jerusalem öngöyök.

Mat 21.1-11; Mak 11.1-11; Luk 19.28-40

¹² Mewö aketka ahöba wahöta miangöreŋ ambazip kambulembenöŋ ak-kömukömu kendongöra Jerusalem sitinöŋ kaŋgota malgeri, yeŋön buzup keu kewö mötket, “Jisösnöŋ

* 12:3: Luk 7.37-38 * 12:8: Dut 15.11

Jerusalem kamamgö könanöŋ kaza.”¹³ *Keu mewö möta umji böröŋi memba könanöŋ miwikŋaibingö anda kewö jiba qetket, “Hosana, owe owe! Anutu möpöseizin. Kembugö qetŋe kamawi, Anutunöŋ mönö kötuetköma! Israel nenŋö Kiŋ Kembunini owe owe!”

¹⁴ Jisösnöŋ doŋki moröŋi kun miwikŋaiba miangö qakŋe öŋgöba tarök. Mi kezapqetok keu kun kewö ohoget ahözawanŋö dop asuhuyök,

¹⁵ **“O Jerusalem ambazip Zaion kundunŋi liliköba maljei, inŋini mötket, engö Kiŋ Kembuninan mönö kama.*

Doŋki moröŋaŋgö qakŋe tata kama. Miangöra kengötniŋi mönö kude mötme.”

¹⁶ Jisösgö gwarekurupŋan yuai asuhuyöhi, miangö könanŋi mutuk qahö möt kutugetmö, könanŋep ölop möt asariget. Jisösnöŋ Suepnöŋ öŋgöba asakmararaŋambuk malöhi, keu mi nalö miangöreŋ mötmöriba kewö jiget, “Aha! Keu mi mönö Jisösgöra ohoget ahöza aka ambazipnöŋ keu miangö dop ak wanŋigetka ölnambuk ahök.”

¹⁷ Ambazip Jisösbuk Betani malgeri, yeŋön dangunu ewö kinda buzupŋi jim sehiget. Jisösnöŋ Lazarus qeriga kömupnöhök guliba wahöta qaksirigö köt köteŋ mosöta kaŋgoriga ambazip kambunöŋ ekeri, yeŋön Jisösgö könanŋi naŋgöba jiba jim asariget. ¹⁸ Jisösnöŋ aŋgöletot mi meyöhi, keu mi mötkeraŋgöra aka ambazip kambunöŋ luluŋda köl öröm wanŋibingö anget.

¹⁹ Mewö angetka Farisi (Köna keugö kapaŋkölköl) yeŋön nanŋinök eraum möta kewö jiget, “Mötket. Gölmeŋi gölmeŋi ambazip yeŋön mönö luluŋda öröba yaŋgö andöŋe anakze aka nini keu nup miyök mem bibihiŋga ölnŋi kun qahö asuhuza.” Mewö.

Grik ambazip tosatŋan Jisös jaruget.

²⁰ Juda ambazip ak-kömukömu kendongöra Jerusalem sitinöŋ öŋgöba Anutu waikŋi memba möpöseigeri, yeŋgö sutŋine Grik ambazip tosatŋi mohotŋe malget. ²¹ Yeŋön gwarek qetŋi Filip yaŋgöreŋ kaget. Filipnöŋ Galili prowinsgö taon qetŋi Betsaida miangö azia malök. Grik yeŋön yaŋgöreŋ kaba qesiba kewö jiget mörök, “Ketaŋamnini, nini sihimninan Jisös ekingö mötzin.”

²² Mewö jiget möta Andrugöreŋ anda keu mi jii mörök. Jii möta mohotŋe anda Jisös jiyohot mörök. ²³ Keu mi möta melenŋa kewö jiyök, “Suepkö asakmararaŋan Suep gölmegö Azi Ölnŋi yaŋgöreŋ kunbuk asuhum kutuiga asari-mawi, miangö nalöŋan mönö töriza. ²⁴ Nöŋön kömupnaŋgö söpsöp keu öl töhöŋŋi kun kewö jibi mötket: Sehoŋ kötnŋi

* 12:13: Sum 118.25, 26 * 12:15: Zek 9.9

gölmenöŋ qahö geba julma ewö, mönö öne miyök ahöma. Mewö öne ahömapmö, geba julma ewö, korapŋan mönö jula öndölböndöl wahöri ölni gwötpuk söhöma.

25 **“Miangö dop denike yeŋön malmalŋini nanŋinanöŋöra aŋgön köla nanŋini imbi-imbi siyoŋsayoŋi qahö malbingö ak eŋgimakzawi, yeŋgö malmalŋinan mönö sohoma. Mewö sohomapmö, kunŋan kun nanŋi malmalŋi göragöŋöra ala nia jegep al niŋgimawi, yaŋön mönö malmal ölni öndölböndölŋambuk miwikŋaiba köhöiba tetekoŋi qahö mal öŋgöma. 26 Kunŋan ni welen qem niŋgimangö jizawi, yaŋön mönö ni nuataŋgöba mali dop köлма. Weleni qemakzawi, mönö ni anda kaba malmamaŋgöreŋ mewöyök nömbuk malma. Kunŋan nömbuk mala weleni qem niŋgimakzawi, Iwinöŋ mönö i göda qem waŋgii malma.”* Mewö.

Jisösnöŋ kömumba gulimawaŋgö keu saiŋi jiyök.

27 Jisösnöŋ jiyök, “Wösöni döлки kot gwözöŋniga amqam aka maljal. Denöwö jibilenak? Keu jaruzal. O Iwi, gi ölop aua nalö kewöŋaŋgö köŋjiliŋnöhök meköm niŋgiman. Töndup kewögöŋöra mewö qahö köulukömam: Aua kiangö sihimbölöŋi mi mökösoŋda bisimangöŋöra aka nangak qakne aljan. 28 O Iwi, gi mönö nangi aködamungi al niŋgiba qetbuŋagi mem qariman.” Mewö köuluköiga Suepnöhök keu kewö asuhiba erök, “Nöŋön aködamuni lök al gihiba mewö qetbuŋani mem qarial aka toroqeba mem qaribiga sehiba anma.”

29 Keu mi asuhuiga ambazip kambu kinget yeŋön mi möta jiget, “Wöl pöndaŋ qetza.” Tosatŋan jiget, “Suep garata kunŋan yaŋgöŋöra keu jiiga kourukŋi mötzin.”

30 Mewö mewö jigetka kewö jii mötket, “Kouruk mi nöŋgöŋöra aka qahö asuhuzapmö, mi eŋgöŋöra aka asuhiba. 31 Nalö kewöŋe gölmeni gölmeni ambazip ahakmeme bölöŋi wuataŋgömakzei, yeŋgö kewötkewöt nalöŋinan mönö mesohol köл eŋgiza. Anutunöŋ yeŋgö keunini jim teköba likepŋi melen eŋgiiga qakŋine öŋgömapkö akza. Nalö kewöŋe Anutunöŋ Bölöŋaŋgö Kembuŋi gölme dop galöm köл eŋgimakzawi, mönö i közöliga yaigep etmapkö akza. 32 Yaŋön etmapmö, nöŋgöŋöra kewö asuhuma: Ambazipnöŋ gölmenöhök nömemba könakemba kösököm niŋgigetka öŋgöba kinbiga köna ahuiga ambazip gölme dop öröm eŋgibiga lulunja nöŋgöreŋ kaba kambu köla kinme.” 33 Mi kömup denöwöŋi kömumawi, miangö keu saiŋa mewö jii mötket.

34 **Ambazip kambu yeŋön mi möta kewö jiget mörök, “Nini Köna keu oyoŋda kewö mötzin, ‘Kraistnöŋ qahö kömumba*

* 12:25: Mat 10.39; 16.25; Mak 8.35; Luk 9.24; 17.33

* 12:34: Sum 110.4; Ais 9.7; Eze 37.25; Dan 7.14

teteköŋi qahö mal öŋgöba malma.' Göŋön wuanöŋgöra kewö jizan, 'Suep gölmegö Azi Ölŋi gölmenöhök memba kösökögetka könakemba öŋgöba kinma.' Suep gölmegö Azi Ölŋi mi daŋön?"

³⁵ Mi möta melenj enjgiyök, "Asakŋan nalö töröptökŋi kunbuk sutŋine asariba malma. Söŋaupnöŋ qakŋine öŋgöba turum enjii mianğö buŋaŋi akepuköra mönö asakŋe anda kaba malme. Asakŋan ahöm enjimawanğö dop mönö asakŋe malme. Daŋön panamanöŋ jipjap anda kamakzawi, mönö denike anğotmawi, mi qahö mötza. ³⁶ Mianğöra asakŋan nalö dawik embuk malmawi, nalö mianğoreŋ mi mönö urunöŋ möt anğön köla malme. Asakŋanğö könagesö aka malmegöra mönö asakŋi mi möt nariba malme." Jisösnöŋ keu mewö jiba enğomosöta tölapköba anök. Mewö.

Juda ketanŋi yenğö uruköhöikŋinan qahö löwöriyök.

³⁷ Jisösnöŋ anğöletot gwötpuk memba maliga Juda yenön mi jeŋinan eketmö, töndup i qahö möt narim wanğiba silebile malget. ³⁸ *Mewö malgetka kezapçetok azi Aisaiağoreŋ keu kun mi ölŋambuk asuhuyök. Yanön keu mi kewö ohoyöha ahöza,

"O Kembu, neŋön Buŋa keu jim asariba uruŋini kuŋgum enjimakzinmö, daŋön mi möt naribawak? Kembunöŋ kukösumŋi mi mönö dagöra indeli möt asarima?"

³⁹ Amötqeŋe Toŋi möt narim wanğibingö lömböriba osigeri, Aisaianöŋ mianğö könanŋi möta keu kun qelŋiŋe kewö jiba ohoyöha ahöza,

⁴⁰ *"Nanŋini jeŋinan yuai eka könanŋi ek kutubepuk me uruŋinan keu könanŋi möt asaribepuk. Mi möt asariba uruŋini melenjebuk.

Uruŋini melenjgetka mem ölöwak enjibilenjbuk. Yanön mewö asuhubapuköra ambazip jeŋini mem gömöliba uruŋini gwözöŋniga malje."

⁴¹ Jisösnöŋ Suepkö asakmararanöŋ asariba mali Aisaianöŋ mewö eka könanŋi jim asariba keu mi jiyök.

⁴² Jitŋememe aka galömkölköl azi yenğoreŋök gwötpukŋan mewöyök Jisös möt narigetmö, Farisi (Köna keugö kapaŋkölköl) yenön köuluk miri kambunöhök közöl enjibepuköra mi aukŋe qahö jim miwikŋaiget. ⁴³ Ambazipnöŋ möpöseim enjimegöra kapaŋ kölgetmö, Anutunöŋ möpöseim enjimapköra mi gemasolokep aket. Mewö.

Jisösgö keuŋan ambazip kewöta keunini jim teköma.

⁴⁴ Tosatŋan mewö aketmö, Jisösnöŋ keu qeta kewö jiyök, "Kunŋan möt narim niŋgizawi, yanön niyök qahö möt narim niŋgizapmö, kunöŋ melaim niŋgiyöhi, i mewöyök möt narim

wanğiza. ⁴⁵ Kunjan ni neka mönō melaim niŋgiyōhi, i mewōyōk ehakza. ⁴⁶ Ambazip kun ni möt narim niŋgizawaŋōn mönō sōjaupnōŋ qekōtahōba malbapuk. Mianğōra nōŋōn eta asuhuba gōlmeŋi gōlmeŋi eŋgō asakŋina aka maljal.

⁴⁷ “Nōŋōn eta asuhuba gōlmeŋi gōlmeŋi eŋgō keuŋini jim tekōmamğōra aka qahō kayalmō, ambazip gōlme dop amōt qem eŋgibiga nalō kewōŋe letota Suepkō buŋaya akŋegōra aka kayala maljal. Mianğōra ambazip nōŋgō Buŋa keuni möta qahō tem kōla wuatangōmakzei ewō, nōŋōn yeŋgō keuŋini qahō jim tekōmam. ⁴⁸ Denike yeŋōn jijiwilit ak niŋgiba Buŋa keuni qahō möt aŋgōn kōljei, yeŋgō jim tetekōŋinan mönō kewō asuhuma: Nōŋōn Buŋa keu jibi mötkeri, keu mianğōn mönō nalō ketarŋe keuŋini jim tekōiga sihimbōlōŋini mianğō dop mötme.

⁴⁹ “Kōnaŋi kewōgōra mewō asuhuma: Nōŋōn Buŋa keu jiba malali, mi keu omanŋi qahō. Mi nani imbineyōk qahō asuhuga jiba kota malal. Mewō qahōpmō, Iwi melaim niŋgiyōhaŋōn nanjak keu jit denōwō jimami, mianğō jim kutum niŋgiiga jiba kota maljal. ⁵⁰ Iwigōreŋ jimkutukutu mianğōn mönō iŋini malmal kōhōikŋe al eŋgimakza, mi mötzal. Mianğōra Iwinan mi jimamgō jim kutum niŋgiyōhi, mönō mianğō dop Buŋa keu jimakzal.” Mewō.

13

Jisōsnōŋ gwarek yeŋgō kōnaŋini saŋgoŋnōk.

¹ Ak-kōmukōmu kendonōŋ * tōriiga Jisōsnōŋ kōnaŋi kewō möt yakōyōk, ‘Gōlme mosōta Iwinanğōreŋ ōngōmamanğō nalōŋan mönō tōriza.’ Mewō möt yakōba nanŋi alaurupŋi gōlmeŋōŋ malgeri, mi uruŋan jōpakōm eŋgiba mala tetekōŋe mianğōreŋ mewōyōk uru jōjōpaŋi mi kondel eŋgiyōk.

² Kōmumawaŋgō nalōŋan kam kuŋgumamgō aiga nalō kunōŋ suŋgemgō nene nemingō tokoba mohotŋe tatketka yuai kewō asuhuyōk: Saimon Iskariotkō nahōnŋi qetŋi Judas i Satanōŋ lōk sōlōlōhōyōk. Jisōs mamalolo ak wanğimapkō keuŋi mi saŋep ali uruŋe geiga möta tarōk. ³ Jisōsnōŋ nanŋi kōnaŋi mi kewō möt kutuyōk, ‘Iwinōŋ yuai pakpakō kukōsumŋi mi nōŋgō bōrōne aliga Anutugōreŋjōk eta mala kunbuk yanğōreŋ ōngōmamgō akzal.’

⁴ Kōnaŋi mewō möt kutuba nene nempa tatkeranğōreŋjōk wahōta malukuŋi kōtekōba nupkō opo jōhanŋi kun memba kempaŋe kōpeiba jōhōyōk. ⁵ Mi jōhōba o joutnōŋ mokoi geiga kōnahiba gwarekurupŋi yeŋgō kōnaŋini saŋgoŋnōk. Saŋgoŋ tekōba opo jōhanŋi (tauōl) kempaŋe kōpeiba jōhōyōhi, mianğōn

* **13:1:** Anutunōŋ mönōwōk Israel ambazip neŋgehoriba neŋgoŋgirōhi, kendon mianğō qetŋi Nei keunōŋ Pasowa jize. Eksodus 12.15

kōnaḽini kutuyök. ⁶ Saḽḽoḽda anda Saimon Pitögö kōnaḽe kaḽgoriga kewö jii mörök, “O Kembu gi welenqeḽe etqeḽeḽi qahö. Göḽön nöḽgö kōnani saḽḽoḽnöḽga qahö dop kölma.”

⁷ Mewö jii möta kewö melenök, “Yuai dölki akzali, göḽön miangö kōnaḽi nalö kewöḽe qahö möt kutuzanmö, kōnaḽeḽnöḽ mi ölöḽ möt asariba malman.”

⁸ Melenöḽniga kewö kapaḽ kölā jiyök, “Gi mönö nöḽgö kōnani nalö kunöḽ qahöpmaḽöḽ saḽḽoḽman.” Mewö jiiga kewö jiyök, “Nöḽön gi qahö saḽḽoḽ giḽimam ewö, gi mönö nöḽgö gwarekni toroḽeba malmamgö osiman.”

⁹ Mewö jiiga Saimon Pitönöḽ pörösöl ala auruba melenök, “Kembu, mewögöra gi kōnananök qahöp mö, böroni aka nöroḽni mi mohotḽe saḽḽoḽman.”

¹⁰ Mewö melenöḽniga kewö jii mörök, “Kunḽan o ariba kaiga kōnaḽi tok saḽḽoḽninga töwötḽi qahö sarakḽi ak teköma. Inḽini körek lök sarakḽi ak teközemö, mohotnöḽök sarakḽi qahö akza.” ¹¹ Daḽön mamalolo ak waḽḽimamgö ahöhi, Jisösnöḽ mi möta miangöra kewö jiyök, “Inḽini körek sarakḽi qahö akze.”

¹² *Kōnaḽini saḽḽoḽ teköba malukuḽi kunbuk löḽgöta eta tari negetka kewö qesim eḽgiba jiyök, “Nöḽön yuai ak eḽgizali, inḽini miangö kōnaḽi möt asarize me qahö? ¹³ Inḽini nöḽgöra ‘Böhi!’ aka ‘Kembu!’ mewö noholakze aka nöḽön mi öḽḽa akzal. Miangöra mi dopḽe jimakze. ¹⁴ Nöḽön eḽgö Kembu Böhiḽini aka welenqeḽe eretḽaḽgö silik memba kōnaḽini saḽḽoḽjal ewö, inḽini mönö mewöḽanök memba et al aḽguba weleqeḽe aka kōnaḽini saḽḽoḽ aḽguba malgetka dop kölma. Mi mönö nupḽina.

¹⁵ “Nöḽön aka kondel eḽgizali, inḽini mönö miangö dop naḽgöba welen qem aḽguba malme. Mewö malmegöra miangö silikḽi nöḽön merak kondel eḽgibiga ekze. Mi mötmöriba miangö tandökḽi wuatḽaḽgögetka dop kölma. ¹⁶ *Nöḽön keu öḽ töhöḽḽi kun kewö jibi mötket: Welenqeḽeḽöḽ eretḽi aiga toḽan öḽgöḽgöḽi akza. Gwareknöḽ böhiḽi öḽgita öḽgöḽgöḽi akḽamgö osima. Mewöyök azi kembu kunöḽ garataḽi melaiḽiga kolek anda nup memakzawi, yaḽön mönö kembuḽaḽgö baḽḽe malakza. ¹⁷ Inḽini keu kötni mi merak möt kutuze. Mewögöra silememe mosöta alaurupḽini nembö baḽḽine anda malme ewö, nöḽön mönö eḽgöra ‘I-ia simbawoḽ!’ jiamam.” Mewö.

Kunöḽ mamalolo ak waḽḽimamkö qelḽiḽe jiyök.

Mat 26.20-25; Mak 14.17-21; Luk 22.21-23

¹⁸ * “Keu jizali, mi mönö inḽini lökḽanök qahö eḽgömeza. Nöḽön niḽia möwölöhöba eḽgömeali, eḽgö kōnaḽamḽini mönö

* **13:12:** Luk 22.27 * **13:16:** Mat 10.24; Luk 6.40; Jon 15.20 * **13:18:** Sum 41.9

ölöp möt kutuzal. Mewö maljalmö, Buja Kimbi kun mianjön öljambuk aiga dop kölma. Keu mi kewö, ‘Kunöj nönjören nene mohotje neziri, yanjön mönö kelewele aka gwakötjan tötal niñgiba nuñgumangö jöjöröza.’†

19 “Ni öljä könanjep asuhumawangö keuja mutuk jizal. Mianjöra öljä asuhumawi, injini nalö mianjören nönjö könanä möt asariba kewö jime, ‘Aha! Malmalgö könanä nalö dop mala kota malöhi, yanjön mönö mia akza.’ Mewö jiba möt narim niñgimegöra nönjön keu mi qeljine aukje jibiga mötze.

20 * “Nönjön keu öl töhönnä kun kewö jibi mötket: Nönjön ambazip kun melaibi nup memangöra kaiga kunjan i köl örözawi, yanjön mönö ni tok köl öröm niñgima. Mewönanök ni köl öröm niñgizawanjön mönö melaim niñgiyöhi, mönö i mewöyök köl öröm wangima.”

21 Jisösnöj keu mewö jiba wösöj kot gwözönda jul takömangö ahiga keu indela kewö jiyök, “Nönjön keu öl töhönnä kun kewö jibi mötket: Engjörenök kunjan ni mamalolo mem niñgima.”

22 Mewö jiiga gwarekurupjan nanjini kunjalilin uba angehäba nanjök nanjök kewö mötmöriget, ‘Mönö dagöra jizapto?’ Mewö mötmöräba uruyahöt tönpin tatket. 23 Tönpin tata nene negetka Jisösgö wölböt gwarekjan yangö qöhöröneyök tarök. 24 Yanjön tariga Saimon Pitönöj nöropjan gwarek mi söpsöp ak wangiba kewö jii mörök, “Keu mi dagöra jizawi, mi qesäba jinöj mötpi.”

25 Mewö jii mötä lapingöba Jisösgö töptöpje nangöba kewö qesiyök, “Kembu, azi mi danjön?”

26 Mewö qesiiga melenj wangiyök, “Beret kitipnä kulunjöj kundungöba kun wangimami, yanjön mönö mi.” Melenj wangiba beret kitipnä memba kulunjöj kundungöba Judas wangiyök. Judasgö iwinä qetnä Saimon Iskariot. 27 Beret kitipnä mi wangäiga Satanöj mianjörenök Judasgö urune geyök. Mianjöra Jisösnöj i jim kutum wangiba kewö jiyök, “Yuai aknäni, mi mönö zilanä aknä.” 28 Keu mewö jiyökmö, mi wuanöngöra jii möröhi, mi gwarek tosatjan mohokje tata nene negeri, yengjörenök kunjan kun qahö möt asariyök. 29 Gwarek tosatjan mianjöra kewö mötmöriget, “Judasnöj monej gösögö galömna malöhi, mianjöra kendon nalöje yuai osibini, mi bohönä memapköra melaiza me ambazip wanapnä monej yuai kun memba engimapköra jiza.”

† **13:18:** Gwakötjan tötal niñgiba nuñgumangö jöjöröza, keu mi Israel yengören dopkeu kun. Könanä kewö: Yanjön urunan qetala utaköm niñgiza. * **13:20:** Mat 10.40; Mak 9.37; Luk 9.48; 10.16

³⁰ Judasnöŋ keu mi ölop möt asariba beret kitipni mi memba mianğöreŋök mosöta yaigep aniga sunğem ahök. Mewö.

Jisösnöŋ jöjöpən keu dölökni jim kutuyök.

³¹ Judasnöŋ mosöta yaigep aniga Jisösnöŋ kewö jiyök, “Dölki Anutunöŋ aködamunni Suep gölmegö Azi Ölni al teköm waŋgiiga yaŋön Anutugö qetbuŋaŋi mem qarii asuğuza. ³² Yaŋön Anutugö qetbuŋaŋi mem qariba Anutubuk qekötahözawaŋğöra Anutunöŋ mönö mewöŋanök yaŋğö qetbuŋaŋi mem qarima. Mi nalö qahö körri mem qariiga asakmararaŋan asuhum tiŋgiri mal öŋğöma.

³³ * “O gömokurupni, nöŋön nalö töröptökni kunbuk embuk malmam. Mi mala eŋğömosötpiga könaŋgep jarum niŋgiba malme. Juda yeŋğöra kewö jibi mötket, ‘Ni miri anmami, iŋini mianğöreŋ kabingö osime.’ Keu miyöhök dölki eŋğöra mewöyök jizal.

³⁴ * “Nöŋön jöjöpən keu dölökni jim kutum eŋgizal: Iŋini mönö uruŋinan jöpaköm aŋguba malme. Nöŋön urukalem ak eŋgiba malali, iŋini mönö mianğö dop jöpaköba urukalem ak aŋguba malme. ³⁵ Sutŋine uruŋinan jöpaköm aŋguba malme ewö, ambazip körek yeŋön eŋgeka könaŋamni möt kutuba kewö jiba malme, ‘Aha! Mönö Jisösgö gwarekurupni akze.’ ” Mewö.

Pitönöŋ Jisös qaŋ kölmaqkö keu qeljiŋe jiyök.

Mat 26.31-35; Mak 14.27-31; Luk 22.31-34

³⁶ Saimon Pitönöŋ Jisös kewö qesim waŋgiyök, “Kembu, gi denike anman?” Qesim waŋgiiga melenök, “Ni denike anmami, gi mianğöreŋ nuataŋğöba kamamğö osiman. Nalö kewöŋe osimanmö, könaŋgep mia ölop nuataŋğöba kaman.”

³⁷ Melenniga kewö qesiyök, “Kembu, ni mönö wuanöŋğöra nalö kewöŋe gi guataŋğöba kamamğö osimam? Nöŋön mönö malmalni göhöra aka köleŋda mosötmam.”

³⁸ Qesiiga kewö melenök, “Gi ölna malmalgi nöŋğöra aka köleŋda mosötmamğö jizan me? Keu mi jitkanök jizan. Nöŋön keu öl töhöŋni kun kewö jibi mötnöŋ: Merak kuruknöŋ qetmamğö dopdowiiga göŋön nalö mianğöreŋ qaŋ köl niŋinöŋga indimni karöbut akŋa.” Mewö.

14

Jisösnöŋ gwarekurupni urukölalep mem eŋgiyök.

¹ “Uruŋinan mönö waimanjat kude möta wösöbirik kude aka malme! Mönö Anutu möt narime aka ni mohok möt narim niŋgiba malme! ² Nöŋğö Iwinanğö miri bohonne miri uruŋi

* 13:33: Jon 7.34 * 13:34: Jon 15.12, 17; 1 Jon 3.23; 2 Jon 5

sehisehiŋi ahöze. Mi qahö ahöbeak ewö, mönö enğöra keu kewö jibilenjak: Nöŋön mönö mianğöreŋ öngöba enğö dum miri mem möhamğömam.

³ “Nöŋön mutuk anda öngöba enğö dum miriŋini mem möhamğömam-mö, nöŋön miri malmami, iŋini mewöyök nömbuk mianğöreŋ mohotŋe malbingö sihimŋi mötzal. Mianğöra nöŋön mönö kunbuk lilingöba kaba enğuanğitpiga euyangöreŋ öngöme. ⁴ Nöŋön miri denike anmami, iŋini mianğö könaŋi lök möt kutuze.” Mewö.

Iwigöreŋ anangö köna mi Jisös.

⁵ Jisösnöŋ mewö jüga gwarek qetŋi Tomas yaŋön kewö jiyök, “O Kembu, gi miri denike anmani, nini mi qahö mötzin. Mianğöra mianğö könaŋi mi mönö denöwö möt kutubinak?”

⁶ Mi möta kewö jii mörök, “Nöŋön Köna akzal. Nöŋön Keu ölni aka Malmal köhöikŋi akzal. Kunŋan Iwigöreŋ anğotmamğö möta nöngöreŋ kama ewö, yaŋön mönö köna miwikŋaima. Köna murutŋi kun qahö ahöza. ⁷ Iŋini ni ölna möt kutum niŋgibeak ewö, mönö nani Iwini mewöŋanök möt kutum waŋgibeak. Iŋini nalö kianğöreŋök könahiba nöngö Iwini lök eka möt waŋgize.”

⁸ Mewö jüga Filipnöŋ kewö jii mörök, “O Kembu, gi Iwi kondel neŋginöŋga neŋön i uba ehinga dop köl neŋgima.”

⁹ Mi möta Jisösnöŋ jii mörök, “O Filip, ni nalö köröp tiŋtiŋi embuk pöndaŋ malbigun neka töndup könani qahö möt kutuzan me? Kunŋan ni nek kutuyöhi, yaŋön mönö Iwini mewöyök eka malja. Mianğöra gi mönö denöwögöra Iwi kondel neŋginöŋga ekingöra jizan?

¹⁰ “Nöŋön Iwibuk qekötahöba kinbiga Iwinöŋ nömbuk qekötahöba kinjawi, mi möt narizan me qahö? Keu Buŋa jibiga mörakzei, nöŋön keu mi nani uruneyök qahö memba jimakzal. Qahö! Nup memakzali, mi mewöyök Iwi nömbuk qekötahöba kinjawaŋön nam köl niŋgii ölni ahumakza. Mianğöra nup memakzali, mi mönö yaŋö nuwa memakzal.

¹¹ “Nöŋön Iwibuk qekötahöba kinbiga Iwinöŋ nömbuk qekötahöba kinja. Iŋini mönö mewö möt narim niŋgiget. Keu mi jitnöŋ jibi möta qahö möt narim niŋgibeak ewö, mi mönö anğöletotni ekzeanğöra aka möt narim niŋgime. ¹² Nöŋön keu öl töhöŋni kun kewö jibi mötket: Denike yeŋön ni möt narim niŋgizei, yeŋön mewöyök ni anğöletot memba malali, miyöhök memakŋe. Miyöhök memakŋe aka nalö tosatŋe nöŋön meali, mianğö dopŋi oŋgita mi memakŋe. Nöŋön Iwigöreŋ öngöba malmamaŋöra aka anğöletot öngöŋöŋi ketanŋi megetka asuhume.

¹³ “Iwinan nöngöra aka qetbuŋaŋambuk akŋapkö mötzal. Mianğöra aka Iŋini nöngö qetne wani yuaigöra köulukömei,

nöñön mönö mi akñam. Mewö akigun mianñön Iwinanğö qetbuñañi jigetka qarimakña. ¹⁴ Inini yuai kungöra nöñgö qetne köuluköba qesim niñgime ewö, nöñön mönö mi akñam. ¹⁵ Inini uruñinan jöpaköm niñgimakze ewö, mönö nöñgö jöjöpañ keuni tem köla wuatangöba malme.” Mewö.

Jisösnöñ Uña Töröñi melaimamgö jim jöhöyök.

¹⁶ “Nöñön Iwi köuluköm wañgibiga yañön nam köiput Tonji kun enğiiga eta nöñgö salupni aka teteköñi qahö embuk mal öñgöma. ¹⁷ Nam köiput Tonji mi Uña Töröñi. Yañön keu ölnañgö Tonji akza. Uruñini qahö melenget yeñön i qahö ek kutuba qahö möt wañgize. Mianğöra yeñön i köl öröba möt añañön kölbinağö osimakzemö, Uña yañön lök embuk malja aka könañgep uruñine geba embuk kinma. Mianğöra i kiana qahöpmö, i ölop möt kutum wañgize.

¹⁸ “Nöñön enğömosötpiga gwani morö ewö qahö aka malme. Ni mönö enğöreñ liliñgöba kamam. ¹⁹ Nalö töröptökñi teköigun gölme ambazip omani yeñön ni kunbuk qahö neka malme. Yeñön qahöpmö, uruñini melengeri, enñön ni ölop nehakñe. Nöñön köhöiba maljalanağöra inini mewöñanök guliba köhöiba malme. ²⁰ Iwi, nani aka inini, nini mohok aka maljin. Nöñön Iwinambuk qekötahöba kinbiga inini nömbuk qekötahöba kingetka nöñön embuk qekötahöba kinjal. Mianğö könañi mi Uña Töröñan uruñine gemawangö nalöñe ölop möt asarime.

²¹ “Kunñan nani jöjöpañ keuni pakpak möt añañön köla tem kölakzawi, yañön mönö uruñan ni jöpaköm niñgimakza. Kunñan ni jöpaköm niñgiiga nöñgö Iwinan mönö i jöpaköm wañgimakza aka nöñön i jöpaköm wañgimakzal. Nöñön i jöpaköba könañamni indel wañgibiga möt kutuma.”

²² Jisösnöñ mewö jiiga Judas Iskariotkö wakanñi Judas yañön kewö jiyök, “Kembu, gi denöwögöra könañamgi nengöreñök indelman aka ambazip uruñini qahö melengeri, yeñgöra mi köyatim enğimamgö jizan?”

²³ Mewö jiiga kewö melen wañgiyök, “Kunñan uruñan jöpaköm niñgimakza ewö, yañön mönö nöñgö Buña keuni tem köla wuatangöba malma. Mewö maliga Iwinan i jöpaköm wañgiiga Iwi netkön mönö yañgö uruñe geba pöndañ yambuk mohotñe malbin. ²⁴ Kunñan ni uruñan qahö jöpaköm niñgimakza ewö, i mönö nöñgö Buña keuni qahö tem köla wuatangöba malma. Keu jibi mörakzei, mi nani Buñaya qahöpmö, Iwi melaim niñgiyöhi, yañön mi niñgiiga jimakzal.

²⁵ “Nöñön keu pakpak mi embuk pöndañ malali, nalö mianğöreñ kusum enğiba malal. ²⁶ Mewö malalmö, Iwinöñ Uña Töröñi nöñgö qetne melaiiga eta nam köiput (aka tinjonjon) Tonjini akña. Yañön keu pakpak kusum enğiba nöñön

qambaŋ keu pakpak engjali, mi ölum engubapuköra köl gulim engimakŋa.

²⁷ “Nöŋön luai engizal. Nane luai sorokni qainŋi kun mi albi uruŋine ahöma. Gölmönöŋ ambazip yeŋön luai qem angumakzei, nöŋön mianğö tandök ewö kude qem engimakzalmö, mi onğita luai qainŋi kun engimakŋam. Mianğöra uruŋinan mönö wösöbirik kude aka kengötŋini kude möta malme.

²⁸ “Nöŋön keu kewö jibiga mötket, ‘Nöŋön engömosöta öngöba mala kunbuk engörej lilingömam.’ Inini uruŋinan ni ölŋa jöpaköm niŋgibeak ewö, keu jizali, mianğöra ölop söŋgaibeak. Iwinöŋ nöŋgö ketanjamni akza. Mianğöra ni ‘Iwinanğörej öngömam,’ jizali, inini mi möta ölop urusösöŋgai miwikŋaigetka dop kölbawak. ²⁹ Keu dölki jibi mötzei, mianğö ölŋi bian asuhuma. Ölŋi asuhumawi, inini nalö mianğörej mi ölop mötmöriba möt narime. Mianğöra mi nalö kianğörej qelŋiŋe jibi mötze.

³⁰ “Nalöni törizawanğöra embuk keu gwötpuk kunbuk jimangö dop qahö mötzal. Bölönğö Kambuŋan gölme dop galöm köl engimakzawi, yaŋön mönö kamangö jöjöröza. Yaŋgö ösumŋan mönö luhut qahö al niŋgiba kondondönğöma. Nöŋgörej köna mi yaŋön jim kutumawanğö dop qahö ahöza. ³¹ Qahö ahözapmö, nöŋön Iwi jöpaköm wanğimakzalanğöra yuai pakpak keu jim kutum niŋgimakzawanğö dop ahakzal. Gölme ambazipnöŋ nöŋgö könaŋamni mewö jim kusum engigetka möt asarimeğöra mötzal. Mianğöra mönö mosöta wahöta kagetka anbin.” Mewö.

15

Jisösnöŋ wain ip bömönŋi, neŋön böröŋi akzin.

¹ Jisösnöŋ gwarek yeŋgöra kewö jiyök, “Nöŋön wain ip öl sorokŋi akiga nöŋgö Iwinan wain nupkö toni akza. ² Nöŋön ip ewö qak börönambuk akzal. Ip böröni pakpak ölŋini qahö miwikŋaiba gilipitŋi akzei, Iwinan mi kutum gil engima. Ip böröni pakpak nöŋgörej tatketka ölŋini ahum sirizei, Iwinan mi mönö köl könjorat engima. Ahakmemegö ölŋi qarim kuwulem sehisehŋi miwikŋaimeğöra mönö mem solanim engima.

³ “Inini Buŋa keu jibi mötketka mianğön lök mem solaniba köl könjorat engi sarakŋi aka malje. ⁴ Mianğöra eŋön mönö nömbuk qekötahöba kinme. Mewö kingetka nöŋön embuk kinmam. Wain böröŋi kunŋan ip kambaŋe qahö tata tala etza ewö, mi mönö nanŋi nam köl anguba ölŋi ahum wanğimapkö osima. Mianğö dop inini mewöŋanök nömbuk qahö qekötahöba kinje ewö, mönö nanŋinök ahakmemegö ölŋi öne ahum wanğibingö osime.

⁵ “Ni waingö ipñi akiga eñön miangö böröñi akze. Injini nömosöta nannjinök kinda yuai kun akingö osime. Miangöra kunñan nömbuk qekötahöba kiniga nöñön yambuk qekötahöba kinbiga yañön mönö ahakmemegö ölni önöñi qahö miwikñaiba siriba malma. ⁶ Denike yeñön nömbuk qahö qekötahöba kinje ewö, wain ip tonjan mönö i ip böröñi ewö kutum engiba gili yaigep anme. Anda soholigetka memba tokoba könöpnöñ gili geba jeme.

⁷ “Yeñön jememö, likepñi injini mönö nömbuk qekötahöba kinme. Mewö kingetka nöngö Buña keunan engö uruñine qekötahöba kinja ewö, injini i me wai buña qem angubingö mötzei, mi mönö Iwi köuluköm wangigetka engima. ⁸ Injini nöngö gwarekurupni aka kingetka ahakmemenjanangö ölni önöñi qahö ahuba eta tatketka malme. Mewö memba malgerangöra Iwinangö qetñan mönö aködamunñambuk aka ahöma. ⁹ Iwinan ni jöpaköm ningiba malöhi, nöñön mönö miangö dop mohot jöpaköm engiba malal. Injini mönö nöngö urukalem uruñe kinme. ¹⁰ Nöñön Iwinangören jöjöpañ keu tem köla mala kota yañgö urukalem uruñe kinjal. Miangö dop eñön nöngö jöjöpañ keuni memba tem köla malme ewö, mönö ölop nöngö urukalem uruñe kingetka jöpaköm engiba malmam.

¹¹ “Nöñön uru sösongai al engibi engören kutuiga uruñini kokolak qei ahöiga önöñi qahö söngaim sehiba malmegöra keu mi jibi mötze. ¹² *Nöngören Köna keu mi kewö: Nöñön uru jöpaköm engiba malali, injini mönö miangö dop nannjini jöpaköm anguba malme. ¹³ Kunñan alaurupñi yengöra aka nanñi malmalñi tököba mosötmawi, miangön mönö urukalem öngöngöñi ketañi akza. Kunñan mi ongita jöpaköm engimangö osima. Urukalem tosatñi mi miangö eretñi.

¹⁴ “Nöñön yuai akñegöra jim kutum engimakzali, injini miangö dop ahakze ewö, mönö nöngö alaurupni akze. ¹⁵ Welenqegegö könañi kewö: Galömñan nupñi denöwö aka memakzawi, mi welenqegeñan qahö mörakza. Miangöra engö qetñini ‘Welenqegeurupni,’ mewö qahö toroqeba engoholmam-mö, Iwinangörenök Buña keu mörali, mi pakpak mönö engöra indelbiga mötze. Mewögöra qetñini ‘Alaurupni,’ mewö engoholbiga dop kölja.

¹⁶ “O alaurupni, eñön ni qahö möwölöhöm ningigetmö, nöñön injini möwölöhöba kuñgum engibiga kinje. Miangöra eñön liliköba anda ölni kewö miwikñaiba pöndañ sirigetka ahöahöñi ahi dop kölma: Nöngö qetni qeta yuai mi me mi miangöra Iwi köulukömei, mi mönö engii buñanjini akña. ¹⁷ Injini mönö sutñine jöpaköm anguba malme. Nöñön jöjöpañ keuni mewö jim kutum engizal.” Mewö.

* 15:12: Jon 13.34; 15.17; 1 Jon 3.23; 2 Jon 5

Urumelenğö kopañi yeñön injini kazik ak engime.

18 “Gölmenöñ uruñini qahö melenget yeñön kazik ak engime ewö, mönö keu kewö mi möt kutume: Yeñön mutuk ni mewöñanök kazik ak niñgiba malget. 19 Injini urumelenğö kopa kambunöñ malbeak ewö, kambu-urup mienöñ mönö nanñini alaurupñini urukalem ak engibeak. Mi ak engibeakmö, nöñön injini möwölöhöba yeñgö arenñöhök engömembiga murutñi aka malje. Yeñgöreñ ahakmeme bölöñi mi andö qeba maljeañgöra aka kazik ak engimakze.

20 * “Nöñön keu kun kewö jibi mötkeri, mi mönö urukönömñine ala mötmörime, ‘Welenqeqenöñ eretñi aiga toñan ketañamñi akza. Gwareknöñ böhiñi onğita öngöngöñi akñamğö osima.’ Mianğö dop tosatñan ni sesewerowero ak niñgiba mala kotket ewö, tosatñi yeñön mönö nöñgö undumurupni injini mewöñanök sesewerowero ak engiba malme. Yeñön nöñgöreñ Buña keu möt anğön köla malget ewö, injini nöñgö keuni jim sehiba malgetka mönö mewöñanök ölop möt anğön köla malme. 21 Mewö malmemö, ni melaim niñgiyöhi, yeñön i qahö möt wañgize. Mianğöra silebile qakñe yuai könañi könañi lañ ak engimei, mi mönö nöñgö qetbuñanañgöra aka asuhum engima.

22 “Nöñön yeñgöreñ qahö eta Buña keu jibi mötpeak ewö, yeñön mönö köpösihitñinañgö gamuñi qahö möta malbeak. Mewö öne malbeakmö, nalö kewöñe siñgisöndokñini möt teköba köl turubingö osize. Möndömöndö keuñini mönö denöwö miwikñaibeak? 23 Kunñan ni kazik ak niñgizawi, yañön mönö Iwini mewöñanök kazik ak wañgiza. 24 Anğöletot öngöngöñi ketañi meali, mi kunñan kun engö sutñine qahö memba malök. Nöñön mi qahö membilenak ewö, yeñön mönö köpösihitñinañgö gamuñi mi qahö möta malbeak. Tönpin malbeakmö, nalö kewöñe nöñön mi membiga ek teköbagun töndup ni aka Iwini mewöñanök öne töhön kazik ak netkiba malje.

25 * “Mewö ak netkiba malgetka Buña keu kun ölnambuk ahök. Mosesnöñ köna keu engiyöhi, mianğöreñ keu mi kewö ohoget ahöza, ‘Yeñön öne töhön lañ kazik ak niñgiba malget.’ Keu mianñön lök ölnambuk ahök.

26 Nöñön Iwigöreñ öngöba köiput Toñi melaibiga engöreñ kaba uruñine geba nañgöm engima. Uña Töröñi yañön keu ölnañgö Toñi akza. Yañön Iwigöreñök eta nöñgö könañamni nañgöba jim asarim engiba malma. 27 Yañön mewö malma aka enñön mewöñanök nöñgö könañamni nañgöba jim asariba malme. Nöñön könahiba urugö qenjarök nup memba malali,

* 15:20: Mat 10.24; Luk 6.40; Jon 13.16 * 15:25: Sum 35.19; 69.4

enön mönō kōnakōnahineyök nōmbuk mala kotket. Mianğōra inini mönō mi ölöp jim asariba malme. Mewō.

16

Jisösgö gwarekurupni bim engöhöi utal engime.

¹ Jisösnöñ toroqeba kewō jiyök, “Inini tala eta engui janjun akepekōra nöñön keu mi qeljiñe jibi mötze. ² Uruñini qahō melenget yeñön mönō köuluk miri kambuñineyök utal engigetka yaigep eta malme. Kōnañgep nalō kun kam kuñgumawi, mianğōreñ inini nöñğōra aka engugetka kōmume. Mewō enguba kewō jime, ‘Mewō mianñön Anutugō welenni qeinga Anutugō uruñan ölöwakza.’ Kōreñan mewō möt sohoba jime. ³ Yeñön Iwi aka ni netkō kōnañamniri qahō möt asarimakzeañğōra aka mewō ak engiba malme.

⁴ “Mewō tōnpin malmemō, nöñön keu mi qeljiñe engōra jibi mötze. Mianğōra nalō mi kam kuñguiga keu mianğō öñji asuhumawi, inini nalō mianğōreñ ölöp kewō jime, ‘Kraistnöñ kianğō buzup keuñi lök qeljiñe jii mörin.’ Nanak embuk malalañğōra aka keu mi nalō köröpñi ahōiga mutuk qahō jibi möta kotket.” Mewō.

Uña Töröñan nupni kewō memakza:

⁵ “Nöñön nalō kianğōreñ melaim niñgii erali, mönō yañğōreñ öñğōmamgō akzal aigun engōreñök kunñan kun kewō qahō qesim niñgiza, ‘Gi denike anman?’ ⁶ Keu mewō jizali, enön mi möta mianğōra wösöbiriknōñ uruñini kokolak qei malje.

⁷ “Mewō maljemō, tōndup nöñön mianğō likepñi keu öñji kun kewō jibi mötket: Nöñön engōmosōta lilingōba öñğōmami, mianğō öññan asuhuiga mönō kewō mem ölöwak engima: Nöñön öñğōba köiput Tonji melaibiga engōreñ eta uruñine gema. Nöñön qahō engōmosōta öñğōbilenak ewō, Tonji yañön mönō engōreñ etmamgō osima.

⁸ “Köiput Tonji yañön eta malmalgō kōnañi kewō kondel engiba malma: Gölme dop siñgisöndokñini indela kondeli Anutunōñ keuñini jim tekōiga solanime me uruñini qahō melengetka keuñini jim tekōba likepñi melenğ engima. Am-bazipnöñ kōnañamnini mewō eka möt kutume. ⁹ Ni qahō möt narim niñgizeañğōra siñgisöndokō kōnañi indel engiiga möt kutume.

¹⁰ “Anutugō kōna solanñi möt sohoba nöñğōra keu lan jimakze. Mianğōra yañön nöñğō kōnañamni indela kondel engiiga kewō möt kutum niñgime: Nöñön solanñi mala Iwinañğōreñ lilingōba öñğōbiga ni kunbuk qahō neka malme. ¹¹ Bölöñañğō Kambuñi gölme dop galöm köl engimakzapmō, Anutunōñ yañğō keuñi lök jim tekōyōha könöp siagō Tonji akña. Mianğō dop körek neñğō keunini mewōyök jim tekōma.

12 “Nöñön ölop keu gwötpuk toroqeba jibilenakmö, mi nalö kewöñe jibiga usuñumburañ aka köl gulibingö osibepuk. 13 Mi osibepukmö, keu ölnañgö Tonji, Uña Töröñi yañön eta uruñine geba keu sañep qei mötme. Mi nanñi imbiñangö dop lañ qahö jiba malmappmö, Anutugöreñ keu kezap ala mötzawi, yañön mönö miyök jimakña aka könañgep yuai asuhumawi, mi qeljiñe indela jima. Mianğöra yañön engömemba keu ölni pakkak mianğö o añgöñe al enğiiga keu ölnañgö köna tiba anme.

14 “Yañön mönö nane köwenöhök keu memba jim asariba uru kuñgum enğiba malma. Mianğöra mönö nöngö könani indeliga nöñön qetbuñanambuk ahakñam. 15 Iwinañgöreñ yuai pakkak ahözawi, mi mönö nöngö böröne ali ahöza. Mianğöra jizal, ‘Yañön mönö nane köwenöhök keu memba jim asariba uru kuñgum ak enğiba malma.’ Keu mi mewö.”

Wösöbirik malgetka melenñiga urusösöngai mötme.

16 “Nalö töröpñi kun teköiga inini ni kunbuk qahö nekñe. Mianğö andöñe nalö töröpñi kun teköigun mönö asuhum enğibi ölop kunbuk nekñe.”

17 Mewö jiiga gwarekurupñi yengöreñök tosatñan nanñinök kewö eraum mötket, “Keu kewö jiza, ‘Nalö töröpñi kun teköiga inini ni qahö nekñe. Mianğö andöñe nalö töröpñi kun teköigun mönö asuhum enğibi ölop kunbuk nekñe,’ aka keu kun kewö jiza, ‘Ni Iwinañgöreñ öngömam.’ Mewö jiiga mötzini, keu yahöt mianğö könañi mi denöwö?” 18 Mewö eraum möta uzohola jiget, “Yañön ‘Nalö töröpñi teköigun,’ jizappmö, keu mianğö könañi denöwö? Mi wuanöngöra jizawi, nini mi qahö möt asarizin.”

19 Mewö jiba qesim wañgibingö mötketka Jisösnöñ engek kutuba kewö jii mötket, “Keu kewö jizal, ‘Nalö töröpñi kun teköiga inini ni qahö nekñe. Mianğö andöñe nalö töröpñi kun teköigun mönö asuhum enğibi ölop kunbuk nekñe,’ Inini mönö keu mianğö könañi jaruba eraum mötze me?”

20 “Nöñön keu öl töhöññi kun kewö jibi mötket: Nöñön anbiga inini jinñeñ köla sahötmemö, uruñini qahö melenñet yenñon lañ börum memba sösöngai aka malme. Inini wösöbirik aka malmemö, wösöbirikñini mianñon mönö nöngöra aka melenña sösöngai aka malme. 21 Ambinöñ morö memamgö nalöñi kam kuñguiga masö qeiga qemñeñ qakñe morö mezappmö, morö dölokñi memba kindi i eka sösöngainañgöra mönö sihimbölöñi mi ölum qemakza. 22 Mianğö dop inini mewöyök nalö kewöñe wösöbirikpuk maljemö, nöñön könañgep kunbuk asuhuba engekiga inini ölop urusösöngai buk malme. Urusösöngaiñini mi kunñan kun qahö enğuañgitma.

23 “Nalö mianğoreŋ yuai kungöra ni qahö qesim niŋgimemö, köulukŋini Iwigöreŋ algetka diŋdiŋanök ani amqei malme. Nöŋön keu öl töhöŋŋi kun kewö jibi mötket: İjini nöŋgö qetnöŋ yuai kungöra Iwi köuluköm waŋgime ewö, yaŋön mi mönö tököm eŋgima. 24 Nömbuk mala kageri, iŋini nalö mianğoreŋ yuai kungöra nöŋgö qetne qahö köuluköba malget. Mönö Iwi köuluköba malme. Köulukögetka ölop melen eŋgima. Mi eŋgiiga söŋöŋaiŋinan asuhum sehiba uruŋini kokolak qem teköi malme.” Mewö.

Jisösnöŋ gölmeğö ahakmeme bölöŋi mi luhut alakza.

25 “Keu jibi möta kamakzei, mi keu sainambuk jibi möta malget. Könaŋep nalö kun kam kuŋgumawi, mianğoreŋ keu saini mi kunbuk qahö qeba jibi mötme. Qahöpmö, Iwinanğö könaŋi mi aukŋe jim asariba malmam. 26 Nalö mianğoreŋ iŋini nöŋgö qetni qeta Iwi köuluköba malme. Mianğö könaŋi kewö: İjini köulukŋini Iwigöreŋ albingöra nöŋgöreŋ kunbuk qahö kamakŋemö, nanninak Iwigöreŋ diŋdiŋi köuluköba malme. Nöŋön eŋgö jit memba Iwigö qahö köulukömam.

27 “Iwinöŋ nannak uruŋan jöpaköm eŋgiba köulukŋini kewögöra möta malma: Nöŋön Anutugöreŋök erali, iŋini nöŋgö könani mewö möt nariba pöndaŋ uruŋinan jöpaköm niŋgiba mala kotketka köna mewö ahuiga köulukŋini möta malma. 28 Nöŋön Iwi mosöta gölmenöŋ eta mala gölme mosöta kunbuk liliŋgöba Iwinanğoreŋ öŋgömam.”

29 Mewö jüiga gwarekurupŋan jiget, “Mötnöŋ, keu dölkı jizani, mi saini qahö qeba jizan. Mi mönö aukŋeyök jinöŋga ölop möt asarizin. 30 Nini merak könaŋamgi kewö möt yaközin: Göŋön mönö nanganök yuai pakpak möt tekönöŋga kuŋŋan kun qesiba kusum gihimapköra qahö osizan. Mianğöra gi Anutugöreŋök etnöŋi, nini mi ölop möt narizin.”

31 Mewö jigetka Jisösnöŋ melenđa jiyök, “Merak ölop möt narim niŋgizemö, 32 mötket, nalö tandökŋi kun kama aka mianön lök mesohol köla naŋgunöŋ kinja. Nalö mianön kam kuŋguiga eŋön keŋgötŋini möta nömosöta denqenđa simbisembel aketka nanök malmam. Töndup nanöhök töhöŋ qahö malmam-mö, Iwinan nömbuk malma. Iwinöŋ nömbuk malmawanğöra aka nanöhök töhöŋ qahö malmam. 33 Eŋön toroqeba gölmenöŋ mala kahasililiŋ qakŋe möta malmemö, nömbuk qekötahöba luainöŋ malmegöra möta keu qöndökŋi ki jibi mötze. Keuyök qahö jizalmö, nöŋön gölmeğö ahakmeme bölöŋi mi lök luhut ala wahijambanŋi kusum teköbiga erök. Mianğöra mönö ewebibiŋinambuk köhöiba saitŋgit malme.” Mewö.

17

Jisösnöŋ nanŋaŋgöra Iwi köuluköyök.

¹⁻² Jisösnöŋ keu mewö jim teköba Suepnöŋ göröken ui öngöiga kewö köuluköyök, “Iwini, göŋön gölme dop ambazip pakpak Nahöngi nöŋgö bapne al enŋinöŋga kukösum qakŋe Kembu ak enŋizal. Ambazipnöŋ Nahöngi nöŋgö keuni ölop qahö andö qeba onŋita malme. Göŋön ambazip sutŋineyök tosatŋi meköba nöŋgö böröne al enŋiba kewö jim kutum niŋginöŋ, ‘Gi mönö i körek kusum enŋinöŋga malmal köhöikŋi miwikŋaiba malme.’ Nup mi mem teköbiga Nahöngan qetbuŋagi mem qarimapköra mönö aködamungi niŋginöŋ. Nöŋgö nalöni mi döлки kam kuŋguiga kinda mewö köuluközal.

³ “Malmal köhöikŋaŋgö könaŋi mi kewö: Göŋön mohot Anutu ölni akzan aka azi Jisös Kraist ni melaim niŋginöŋga erali, ambazipnöŋ netkö könaŋamniri mewö möt kutume. Malmal kömbönaŋi mewö miwikŋaime. ⁴ Nup al niŋgiba ‘Me-man,’ jiba jim kutum niŋginöŋi, nöŋön mi tem köla memba mala meköyal. Aködamungabuk mala qetbuŋagi gölmenöŋ indel sehibiga aködamunŋambuk ahök.

⁵ “O Iwi, nöŋön gölme qahö asuhuiga Suep mire miangöreŋ göhö qöhöröŋge asakmararaŋbuk asariba malal. Asakmararaŋ miyöhök mönö döлки kunbuk al niŋginöŋga asuhum kutum niŋgiiga kunbuk göhö qöhöröŋge asakmararaŋbuk asariba malmam.” Mewö.

Jisösnöŋ gwarekurupŋi yeŋgöra aka köuluköyök.

⁶ “O Iwini, göŋön gölme ambazip tosatŋi kewöta nöŋgö böröne al enŋinöŋi, nöŋön göhö qetbuŋagi mi yeŋgöra indela kondela malal. Yeŋön göhö buŋaya aketka göŋön i nöŋgö böröne al enŋinöŋga yeŋön göhö Buŋa keugi mi möt aŋgön köla malje. ⁷ Göŋön yuai niŋginöŋga mi pakpak göhöreŋök kamakzawi, yeŋön mi nalö kewöŋe lök möt kutuze. ⁸ Göŋön keu Buŋa niŋginöŋi, nöŋön mi gwarekurupni kusum enŋibiga möt aŋgön köla malje. Ni gömosöta gölmenöŋ erali, yeŋön mi ölna möt yaköze. Göŋön melaim niŋginöŋga asuhuyali, yeŋön mi mewöyök möt narize.

⁹ “Ni yeŋgöra aka köuluköm gihizal. Urumeleŋgö kopa ambazip yeŋgöra qahö köuluközalmö, könagesö nöŋgö böröne al enŋinöŋga uruŋini melenđa göhö buŋaya akzei, mönö yeŋgöra aka köuluköm gihizal. ¹⁰ Ambazip pakpak nöŋgö buŋa akzei, yeŋön mönö göhö buŋaya akze aka ambazip göhö buŋaya akzei, yeŋön mönö nöŋgö buŋa mewöyök akze. Nani aködamuni al enŋibiga miangö qakŋe kinda ahakmemeni aketka nöŋgö qetbuŋanan qarim sehimakŋa. ¹¹ Ni gölmenöŋ malmalni teköiga göhöreŋ kotmamgö akzalmö, yeŋön toroqeba gölmenöŋ malme. O Iwi Töröŋi, göŋön qetki niŋginöŋga

mianḡö ösumḡan mönö sel jöhöm enḡinönḡa qahö julme. Netkön mohot aka maljiri, yeḡön mianḡö dop mohot aka malmegöra köuluközal.

12 *¹²“Nöḡön yembuk gölmenönḡ mala korali, nalö mianḡöreḡ qetbuḡagi niḡinönḡa mianḡön sel jöhöm enḡiba malal. Buḡa Kimbigö keu kunönḡ öḡḡambuk akḡapköra azi mohok-kunḡan sohoba könöp siagö buḡaya aka sihimbölö möta malma. Nöḡön galöm köḡ enḡialaḡöra yeḡöreḡök tosatḡan qahö janḡuḡ aka sohoget. ¹³Tosatḡan qahö sohogetmö, nöḡön döḡki gölmenönḡ mala göhöreḡ kamangöra kaba keu ki jizal: Nöḡö uru sösoḡgainan mönö yeḡöreḡ kutui megetka uruḡini kokolak qeiga söḡgaiba malme. Mewö asuhumapköra köuluközal. ¹⁴Nöḡön göhö Buḡa keugi kusum enḡibiga möta malje. Nöḡön gölmeḡö ahakmeme bölöḡi mi qahö wuatangömakzali, yeḡön mönö mewöyök mi qahö wuatangöba andö qemakze. Mianḡöra gölmenönḡ uruḡini qahö melenḡet yeḡön mönö kazik ak enḡimakze.

¹⁵“Nöḡön gölmenöhök enḡuaḡgitmangöra qahö qesim gihizalmö, Bölöḡi Toḡaḡöreḡök aḡön köla sel jöhöm enḡiba malmangöra köuluközal. ¹⁶Nöḡön gölmeḡö ahakmeme bölöḡi andö qeba mi qahö wuatangöbiga yeḡön mewöyök mi andö qeba qahö wuatangömakze. ¹⁷Keu öḡḡi mianḡön mönö mem sarahim enḡiba malman. Göhö Buḡa keugan mönö keu öḡ töhöḡḡi akza. ¹⁸Göḡön melaim niḡinönḡa gölme ambazip sutḡine anda nup memba malali, nöḡön mewöḡanök i melaim enḡibiga gölme ambazip yeḡö sutḡine deḡda anme. ¹⁹O Iwini, yeḡön keu öḡḡaḡö dop malmalḡini körek tököm gihimegöra aka bauköm enḡiba nani malmalni jömuk tököm gihizal.” Mewö.

Jisösnöḡ mötnariḡ ambazip pakpak neḡöra köuluköyök.

²⁰“O Iwini, nöḡön gwarekurupni yeḡörök aka qahö köuluközalmö, Buḡa keu jim sehigetka ambazip möt narim niḡimeḡi, mönö yeḡöra aka mewöyök köuluközal. ²¹Iwi göḡön nömbuk qekötahöba kinönḡa nöḡön mewöyök göbuk qekötahöba kinjal. Mianḡö dop yeḡön mewöyök netḡuk qekötahöba kinmegöra mötzal. Nangak melaim niḡinönḡa erali, gölme ambazipnöḡ mi möt narimegöra aka yeḡön körek pakpak mohot aka malmegöra köuluközal. ²²Naniri mohot aka maljiri, yeḡön mewöḡanök mohot aka malmegöra aka aködampungḡ al niḡinönḡi, nöḡön mi yeḡöra al enḡial.

²³“Nöḡön yembuk qekötahöba kinbiga göḡön nömbuk qekötahöba kinjan. Mianḡö dop yeḡön keuḡini jöhöm teköba mohot aka malmegöra köuluközal. Mohot aka kingetka gölme ambazipnöḡ könaḡamni kewö möt asarime: Göḡön

* 17:12: Sum 41.9; Jon 13.18

melaime niŋginöŋ etpiga jöpaköm niŋgiba malnöŋi, miangö dop i mewöyök jöpaköm enŋgiba malnöŋ.

²⁴ “O Iwini, göŋön gölme qahö miwixainöŋi, qeljiŋe nalö miangöŋeŋ lök urugan jöpaköm niŋgiba asakmararaŋ al niŋginöŋga mala koral. Könaŋgep alaurup niŋginöŋi, nöŋön yeŋön mewöyök asakmararaŋ mi ekjegöra mötzal. Miangöra nöŋön miri malmami, yeŋön miangöŋeŋ nömbuk mohotŋe malbingö sihimŋi mötzal.

²⁵ “O Iwi solanŋi, gölme ambazip uruŋini qahö melenŋeri, yeŋön gi qahö möt kutum gihiba mala kotketmö, nöŋön gi ölöpŋanök möt kutum gihizal. Nangak melaime niŋginöŋi, nöŋgö urumelen alaurupnan mi lök möt yaköze. ²⁶ Nöŋön göhö qetki mi jim tuarim enŋgibiga möta malget. Göŋön urugan jöpaköm niŋgiba malnöŋi, urukalem miangön uruŋine ahöi mötketka nöŋön yembuk qekötahöba kinbi malmegöra mönö toroqeba qetki jim tuarim enŋgiba malmam.” Mewö.

18

Jisös memba jöhöget.

Mat 26.47-56; Mak 14.43-50; Luk 22.47-53

¹ Jisösnöŋ keu mi jim teköba gwarekurupŋi enŋgömeiga siti mosöta geba o qetŋi Kidron kutuba likepŋe anŋgota arö kun ahöyöhi, miangöŋeŋ anget. ² Jisös aka yaŋgö gwarekurupŋi yeŋön qösösök miangöŋeŋ tokoba malget. Miangöra Judas mamalolo mem waŋgimangö ahöhi, yaŋön mewöyök arö mi ölöp mörök.

³ Jike nup galöm aka Farisi (Köna keugö kapaŋkölköl) yeŋön jöwöwöl jikegö kiripo galöm (sikiriti) tosatŋi melaime enŋgigetka Judasnöŋ i aka gawmangö yarö azi kambu kun enŋgömeiga mohotŋe kaget. Yeŋön kiwa lambe aka timbi liŋgipŋini memba bisiba arönöŋ kaget. ⁴ Kagetka Jisösnöŋ yuai pakpak mewö asuhum waŋgimawi, mi lök möröhaŋgöra aka wahöta aukŋe kaba kewö qesim enŋgiyök, “Inini dagöra jaruze?”

⁵ Qesim enŋgiiga kewö melenŋet, “Nini Jisös Nazaret toŋi mia jaruzin.” Melenŋetka kewö jiyök, “Mia nöŋön.” Judas mamalolo meme azi yaŋön mewöyök yembuk kinök.

⁶ “Mia nöŋön,” Jisösnöŋ keu mewö jiiga möta andöandö anda gölmenöŋ tala eta enŋguyök. ⁷ Mewö aketka kunbuk qesim enŋgiyök, “Inini mönö dagöra jaruze?” Qesim enŋgiiga jiget, “Jisös Nazaret toŋi ia jaruzin.”

⁸ Jigetka melenŋök, “Mia nöŋön, mi lök jibi mötze. Inini nia jarum niŋgize ewö, mönö azi ki ölöp enŋgömosötketka öne anme.” ⁹ Mutuk köuluköba gwarekurupŋi yeŋgöra keu kun kewö jii mötket, “Ambazip nöŋgö böröne al enŋginöŋga maljei, nöŋön mi köyan köl enŋgiba malbiga yeŋgöŋeŋök kunöŋ kun

qahö sohoba ayuhuyök.” Keu mianjon ölnambuk aknɔapköra Jisösnön jitnememe yengöra keu mewö jiyök.

¹⁰ Mewö jiiga Saimon Pitönön bimgö sou ketani memba malöhi, yanjon mi kupinneyök öröba jike nup galöm bohonjanjö welen azini qeba kezapni ölnje göröken köteköi erök. Welenqeçe azi mi qetni Malkus. ¹¹ *Mewö asuhuiga Jisösnön Pitö kewö jim kutum wanjiyök, “Gi bimgö sou ketani mi mönö kunbuk alnönnga kupinje geyök. Iwinan sihimbölögö qambi o qölnambuk nöngö burjaya qeyöhi, mi ölop möta mökösonda mesohol kölmam.” Mewö.

Jisös wanjitetka Anasgö jeje kinök.

¹² Suahö galömjinan jiiga yarö azi kambu aka Juda yengö nanju galöm (sikiriti) yanjon Jisös memba jöhöget. ¹³ Jöhöba wanjita mutuk jike nup galöm qetni Anas yanjö mire anget. Anasgö qinjini qetni Kaiafas yanjon jike nup galöm bohonji aka yambu (yara) mianjören nup mi memba malök. ¹⁴ *Kaiafasnön mutuk Juda ambazip yengöra qamban keu kewö jiyök, “Ambazip kambu jömuk ayuhum teköbinbuköra azi mohotjan nengöra aka kömuiga dop köлма.” Mewö.

Pitönön Jisös könahiba qan kölok.

Mat 26.69-70; Mak 14.66-68; Luk 22.55-57

¹⁵ Jisös memba angetka Saimon Pitö aka gwarek alani kun yetkön andönjine anohot. Anohotka alani mianjon jike nup galöm bohonji möt wanjiyöhanjöra aka ölop amqeba Jisös wuatangöba jakömbuak miri sel uruje geyök.

¹⁶ Yanjon geyökmö, Pitönön sel yaigepne nanjunön kinök. Mewö kiniga gwarek alanan jike nup galöm bohonji möt wanjiyöhi, yanjon yaigepne geba nanju galöm ambi yambuk keu jii möta nanju öröiga Pitö wanjita sel uruje geyohot. ¹⁷ Gebitkö ahori, mianjören welenqeçe ambi sel nanjuni galöm kölöhi, yanjon Pitö eka kewö qesim wanjiyök, “Gi ölna mewöyök azi mianjö gwarek yengörenök kun akzan me?” Mewö qesim wanji möta “Ni qahö!” jiyök.

¹⁸ Welen azi aka nanju galöm (sikiriti) yanjon amötjanjöra aka könöp jeba ururungöba ahöiga jömöta kinget. Mewö kingetka Pitönön mewöyök yengö sutjine anda könöp jömöta kinök. Mewö.

Jike nup galöm bohonjan Jisös qeqesi al wanjiyök.

Mat 26.59-66; Mak 14.55-64; Luk 22.66-71

¹⁹ Jike nup galöm bohonji Anas yanjon Jisösgö qeqesi al wanjiba kewö jiyök, “Gi ambazip denöwö kusum engiba gwarekurupki niñi niñi engömembra maljan?”

* **18:11:** Mat 26.39; Mak 14.36; Luk 22.42 * **18:14:** Jon 11.49-50

20 Mewö jiiga kewö melen wanḡiyök, “Ni nalö dop aukḡe ambazipḡi ambazipḡi kusum enḡiba malal. Juda könagesö pakpak neḡön jöwöwöl jikenöḡ öḡḡöba köuluk mirininanḡö dop tokomakzini, ni mönö mianḡörenḡ kinda kusum enḡiba malal. Buḡa keu tölapḡi kun qahö jial. 21 Nöḡön keu denöwö ambazip kusum enḡiba malali, wuanöḡḡöra ni mewö qesim niḡgizan? Nöḡön keu jibiga ambazip möta malgeri, yeḡön mönö keunanḡö köḡḡi möt teköze. Mianḡöra i qesim enḡinöḡa dop köлма.”

22 Mewö melen wanḡiyökmö, jikeḡö kiripo galöm (sikiriti) kunöḡ kösutḡe kinda Jisös nuḡgulumḡe qekötahöba jiyök, “Jike nup galöm bohonḡan qesim gihiiga gi keu silik mewöḡi mönö wuanöḡḡöra melen wanḡizan? Gödaqeḡegi qahö.”

23 Mewö jiiga kewö melen wanḡiyök, “Keu bölöḡa jibilenḡak, mi mönö indelnöḡa dop kölmappmö, keu ölnḡi jizal ewö, mönö wuanöḡḡöra ni öne nuḡguzan?”

24 Mewö melen wanḡiiga Anasnöḡ Jisös melaiba jiiga tapeḡḡi (muḡgamuḡa) tok böröḡe tariga wanḡita jike nup galöm bohonḡi Kaiafas yanḡörenḡ anget. Mewö.

Pitönöḡ Jisös qanḡ köliḡa yahöt karöbut ahök.

Mat 26.71-75; Mak 14.69-72; Luk 22.58-62

25 Saimon Pitönöḡ könöp jömöta kiniga tosatḡan qesiba kewö jiget, “Gi ölnḡa mewöyök yanḡö gwarekurupḡi yeḡörenḡök kun akzan me qahö?” Mewö jigetka qanḡ köla “Ni qahö,” jiyök.

26 Pitönöḡ jike nup galöm bohonḡanḡö welen aziḡi qeba kezapḡi qeköi eröhi, yanḡö tinitosolomḡi welenqeḡe alanḡi kunöḡ mi möta qesiba jiyök, “O gi mönö arönöḡ yambuk mohokḡe malohotka gekzal me denöwö?”

27 Mewö jiiga Pitönöḡ kunbuk qanḡ köliḡa nalö mianḡörenḡök kuruknöḡ könahiba qeriga mörök. Mewö.

Jisösnöḡ premiö Pailötkö jeḡe kinök.

Mat 27.1-2, 11-14; Mak 15.1-5; Luk 23.1-5

28 Miri gianḡiiga söḡanök Jisös Kaiafasḡö mirinöhök wanḡita eta Rom premiögö jakömbuak mire anget. Juda yeḡön uruḡini tölöhoba kölköljinḡinḡi akinbuköra waimanḡat möta kewö jiget,* “Ak-kömukömu kendongö lama nemingö osibinbuk.” Mewö jiba möt lömböriba premiögö jakömbuak miri uruḡe qahö öḡḡöget. 29 Mianḡöra premiö Pailötnöḡ yaigep eta enḡeka kewö qesim enḡiyök, “Azi klanḡön mönö wani pinḡit aiga keu jim wanḡiba wanḡita kaze?”

* **18:28:** Rom gawman yeḡöra Juda yeḡön kewö möt nariget: Nini Rom yeḡö jakömbuak mire öḡḡöḡa urunini tölöhoi ösumnini eri kölköljinḡinḡinambuk aka ak-kömukömu kendongö lama töröḡi nemingö osibin. Mianḡöra sombemnöḡ yaigep malget.

³⁰ Qesim enjiiga melenget, “Azi mianjon kegwek me bölöni meme azi kun qahö akawak ewö, nenjon mönö öne töhön i wanjita göhö böröge qahö albinak.”

³¹ Mewö melengetka Pailötnöj jii mötket, “Injini mönö nanjinak keu jakenjine al wanjiba Köna keunjanangö dop kewöta keunji jim teköme.” Mewö jii möta jiget, “Nenjon azi kun kömumapkö keunji jim teköbingö songo ahöi osizin.” ³² *Juda yenjon mewö jigetka Jisös nanjak kömup denöwöni kömumawi, keu mi indela jiiga mewö mianjon ölnambuk ahök.

³³ Pailötnöj Juda yengö keunini möta kunbuk jakömbuak miri uruje öngöba Jisös oholi kaiga kewö qesim wanjiyök, “Gi Juda engören kiñ kembunina akzan me qahö?”

³⁴ Mewö qesim wanjiiga melennda kewö qesiyök, “Keu mi mönö nangi urugeyök jizan me tosatjan nongöra keu mewö jiba jitke algetka jizan?”

³⁵ Mewö qesiiga Pailötnöj melenök, “Yei! Ni mönö Juda azia aka Juda engö keunini nanjomakzal me? Qahöpmahöp! Ni Rom premiö malbiga nangi ambazip kambu-urupki aka jike nup galöm yenjon mönö goanjita nongö böröne al gihize. Göjön mönö wanat yuai aknöj?”

³⁶ Mewö melenniga jiyök, “Nongö kiñtohonni miangö könanji mi gölme kiangören qahö ahöza. Nöjön gölmegö kiñtohon kungö kiñ kembuya akilenjak ewö, nongö sunjgurumurupnan mönö ölop wahöta nongöra aka suahö akeak. Suahö aka nöjön Juda jitjememe yengö böröhine gebilenbuköra kapan köla bim qegetka nömembingö osibeak. Mi osibeakmö, nongö kiñ tohonnanngö könanji mi miri kungen ahöza. Ni gölme azi kembuya qahö akzal.”

³⁷ Keu mi jiiga Jisös kewö qesim wanjiyök, “Gi töndup kiñ kembu qainji kun akzani, mi ölna me qahö?” Mewö qesim wanji melenök, “Ni kiñ kembu qainji kun akzali, mi nanggak jizan. Nöjön keu ölni nanjöba jim tuarimangöra aka gölmenöj eta asuhuyal. Körek yenjon keu ölnangö likepne maljei, yenjon mönö nongö keuni kezap ala mörakze.”

Jisös kömumapkö jim teköget.

Mat 27.15-31; Mak 15.6-20; Luk 23.13-25

³⁸ Mewö melenniga Pailötnöj mepaqepaik aka qesiyök, “Keu ölni mi mönö wania kun?” Mewö qesiba kunbuk Juda yengören geba söndaknöj kinda kewö jii mötket, “Nöjön azi miangö pinjitni jaruba kun qahö miwiknaizal.” ³⁹ “Kun qahö miwiknaizalmö, ahakmemeni kun kewö ahöi mötze: Yambu (yara) dop ak-kömukömu kendon nalöne kösö mireyök azi mo-hot engöra pösatpi erakza, mi mötze. Miangöra Juda engö kiñ

* 18:32: Jon 3.14; 12.32

kembuñini ölop engöra pösatpi etpawak me qahö? Mianğöra inini sihimñinan denöwö mötze?”

⁴⁰ Mewö jii möta melenđa kewö qetket, “Qahö, i qahöpmö, Barabas pösatnöngga neñğoreñ etma!” Mewö qetketmö, Barabas yañön kegwek azia aka bim karim kun megeri, mianğö bohonñi ahök. Mewö.

19

Pailötnöñ Jisös maripomnöñ kömumapkö jim teköyök.

¹ Silata qetketka Pailötnöñ Jisös wañgita anda jiiga yarö azi yeñön ihilek wahiñambuknöñ tauköba qeget. ² Yarö azi yeñön tauköba mepaqepaik kewö ak wañgiget: Yeñön Jisös qeba kösö wahiñambuk memba köpeiba ila möhamğöba nöropñe kölget geiga maluku pisikñi gugakgugakñambuk mi köl wañgigetka geyök. ³ Mewö aka kösutñe areñğöba kinda jiget, “Owe owe! Juda engö Kiñ Kembuñini, owe!” Mewö jiba nuñgulumñe gwötpuk qekötahöget.

⁴ Mewö mepaqepaik ak wañgigetka Pailötnöñ kunbuk yaigepñe geba kewö jii mötket, “Mötket! Nöñön azi mi kewöta pinjitñi kun qahö miwikñaiçal. Mianğöra i kunbuk wañgitpiga engö jeñine eriga könañi mewö möt kutuba ekñe.” ⁵ Mewö jii mötketka Jisösnöñ eta söndakñe kini kewö eket: Tosatñan kösö wahibuknöñ ila köpeiba nöropñe köla maluku pisikñi gugakgugakpuk köl wañgigetka kiniga Pailötnöñ jii kewö mötket, “Azi ölni ki eket!”

⁶ Mewö jii mötketka jike nup galöm aka nañgu galöm (sikiriti) yeñön i eka keu wölwölbuk qeta jiget, “Maripomnöñ qeget kömuma. Maripomnöñ qeget kömuma.” Mewö jigetka Pailötnöñ jitñine memba kewö jii mötket, “Nöñön pinjitñi kun qahö miwikñaiçal. Mianğöra inini mönö nanñinök i memba maripomnöñ qeget kömumbawak.”

⁷ Juda jitñememe yeñön keu mi möta kapañ köla kewö jiget, “Neñğoreñ Köna keu ahöza. Keu mianğö dop kewöringa kömumawañğö dop akza. Nanñi memba öngöba ‘Anutugö nahönñi akçal,’ jimakza. Mianğöra mönö kömupkö buñaya aiga dop kölma.”

⁸ Mewö kapañ köla jigetka Pailötnöñ möta böñni wahöriğa jönömñi undui keñğötñi mörök. ⁹ Mewö möta Jisös wañgita kunbuk jakömbuak miri uruñe öngöba kewö qesim wañgiyök, “Gi denikeğöra?” Qesim wañgiyökmö, yañön kitipñi kun qahö melenđa keu böc kinök. ¹⁰ Keu böc kiniga kewö jii mörök, “Gi nöñğöra keu kitipñi kun melenđaman me qahö? Nöñön jim teköbiga pösat gihime me maripomnöñ guhugetka kömuman. Mianğö kukösumñi mi nöñğoreñ ahöza. Mianğö könañi mötzan me qahö?”

¹¹ Mewö jii möta kewö melenj wanjgiyök, “Kunöñ eu-yanğörenök kukösum qahö al gihiyök ewö, gi mönö azi omanj mala yuai ak niñgimangö osibanak. Mianğöra azi kun danjon ni göhö böröge al niñgizawi, yanğö sinğisöndokñan mönö göhören pinjit onğita ketanji akza.”

¹² Mewö melenj wanjgiyöhanğöra aka Pailötnöñ Jisös pösari etmapkö kapanj kölökö. Mewö kapanj kölököm, Juda yeñon qet gigilahöba kewö jiget, “Pösatnöñga etma ewö, mönö sisa kiñgö alanj qahö toroqeba aka malman. Kunöñ nanñanğö möri öñgöiga ‘Kiñ kembuya akzal’ jizawi, yanjon mönö sisa kiñ tuarenjon ak wanğiza.”

¹³ Mewö jigetka keu mi möta jim kutuiga Jisös wanğita yaigep etket. Etketka premiö Pailötnöñ jake kun kötnöñ ala tömbulget ahöyöhi, mianğörenj öñgöba keu jimtekötekögö dum tatatñe eta tarök. Jake mianğö qetñi Hibru keunöñ Gabata jimalget. Mi nanine keunöñ Jake Kötnöñ mem tömbultömbulñi. ¹⁴ Eta taröhi, Juda ambazipnöñ wehön mianğörenj ak-kömukömu kendon tatpingöra jöjöröget. Wehön mi aiga silim bibiñi dopdowiiga Pailötnöñ dum tatatñe tata Juda yeñgöra kewö jii mötket, “Eket, engö kiñ kembunini ki!”

¹⁵ Mewö jii möta qet gigilahöget, “Yapmakek! Yapmakek! Maripomnöñ qeget kömuma!” Qet gigilahögetka kewö jiyök, “Engö kiñ kembuninanğö keunji jim teköbiga maripomnöñ öñgömapköra jize me?” Mewö jiiga jike nup galöm yeñon melenjda jiget, “Sisa kiñnöñ mohok kiñ kembunina akza. Nengörenj kiñ kembu murutñi kun qahö ahöza!”

¹⁶ Mewö melenjda jigetka Pailötnöñ Jisösgö keunji jim teköba maripomnöñ qeget kömumapköra böröñine alök. Böröñine aliga yarö azi yeñon Jisös memba galöm kölget.

Jisös maripomnöñ qeget.

Mat 27.32-44; Mak 15.21-32; Luk 23.26-43

¹⁷ Galöm kölgetka nanñi maripomñi nanñak anğuba siti kutuba yaigep geba gölme kun qetñi Nöröpsihit qerakzema, mianğörenj anget. Nöröpsihit qet mi Hibru keunöñ Golgota qerakze. ¹⁸ Mianğörenj anda maripomnöñ qeget aka yambuk azi yahöt likeplikep mohotñe etkuba Jisös sutñire algetka kinget.

¹⁹ Mewö qegetka Pailötnöñ kulem ohoba jiiga maripomnöñ Jisösgö nöröpñe göröken eu ala qeget. Kulem mi kewö ohoi kinök, “Jisös Nazaret tonj, Juda yeñgö kiñ kembunina ki.” ²⁰ Jisös maripomnöñ qegeri, gölme mi siti kösutñe ahöyök aka kulem mi keu karöbut, Hibru, Latin aka Grik keu mianjon ohoget kinök. Mianğöra Juda ambazip gwötpukñan onğita anda kaba eu uba kulem mi oyonget. ²¹ Mewö ohoiga Juda yeñgö jike nup galöm yeñon Pailöt kewö jiget mörök, “ ‘Juda

yeŋgö kiŋ kembuŋina ki,' mewö kude ohomanmö, kewö ohoman, 'Nanŋaŋgöra Juda kiŋ kembunina akzal, jiyök.' "

²² Mi möta Pailötnöŋ keu kewö meleŋnök, "Keu lök ohoza-laŋgöra mi mönö mewö ahöma."

²³ Yarö azi yeŋön Jisös maripomnöŋ qebagun opo silepöke öröyuaini memba azi 4 sutŋine mendenä 4 aiga totonjine meget. Mewö megetka malukuŋi ahöi megetmö, mi kewögöra ölop qahö mendenget: Mi körekŋanök opo johanŋi mohotŋan memenja. Opo kitipŋi kitipŋi qahö mindiriba euyök liliklilik uhum megetka emu gegeni ahöyök. Miangöra mi bölibapuköra mendenbingö osiget. ²⁴ *Osiba eraum möta kewö jiget, "Mi mitiinga qahö dop kölma. Miangöra ölop miangö unji qeinga tonji ahuma." Mewö jiba unji qegetka Buŋa keu kun öljambuk ahök. Keu mi kewö ohoget ahöza,

"Yeŋön opo silepökeni memba sutŋine mendenä totonjine memba malukunangö unji mönahot algetka kunöŋ luhut alma."

Yarö azi yeŋön keu miangö dop aket.

²⁵ Jisös maripomnöŋ qeget kiniga ambi kewöŋan könaŋe kinget: Jisösgö nam nasöŋi aka Klopas anömŋi qetŋi Maria aka Magdalagö ambi qetŋi Maria. ²⁶ Jisösnöŋ namŋi aka wölböt gwarekŋi kösutŋe kinohotka etkeka namŋaŋgöra kewö jiyök, "Namni, mönö nahöngi ki eka tönjönögöba malman."

²⁷ Mewö jiba gwarek mi kewö jii mörök, "Mönö namgi ki eka tönjönögöba malman." Mewö jii möta Jisösgö namŋi nalö miangörenök wanŋiriga miriŋe anda mohotŋe malohot. Mewö.

Jisösnöŋ maripomnöŋ kindä kömuyök.

Mat 27.45-56; Mak 15.33-41; Luk 23.44-49

²⁸ *Jisösnöŋ nupŋi pakpak mem teköyöhi, mi möta miangören Buŋa Kimbigö keu kunöŋ öljambuk akŋapaköra kewö jiyök, "Ni ogöra ak ningiza."

²⁹ Miangören qem nene kun wain o asöljambuk mianön kokolak qeba tarök. Mi tariga köwet mömöndö kun kahali tandök mi memba wain onöŋ kundungöba soŋgorep suŋe qesamböta meget öngöiga numbuŋe alget. ³⁰ Algetka wain o asöljambuk mi nembra jiyök, "Mönö teköza." Mewö jiba malmalŋi mosötmangöra nöropŋi wambelahöi eri imutŋi koriga nöŋ qeyök. Mewö.

Jisösgö marömŋi liŋgipnöŋ utohoget.

³¹ Jisösnöŋ nöŋ qeiga Juda ambazipnöŋ silim miangören ak-kömukömu kendon tatpingöra jöjöröget. Ak-kömukömu Sabat kendon mi kendon nalö ketanji ahök. Miangöra Juda

jitnememe yeñon waimanjat möta kewö jiget, “Qamöt mienön Sabat kendon nalöŋe maripomnöŋ kingetka qahö dop kölja.” Mewö jiba premiö Pailötköreŋ anda kewö qesim waŋgiget, “Gi ölop jinöŋga anda maripomnöŋ engugeri, yeŋgö töwat sihitŋini kusugetka qamötŋini meköin etme?” ³² Qesim waŋgigetka jim teköiga yarö azinöŋ kaŋgotket. Kaŋgota Jisösbuk maripomnöŋ etkugeri, mi zilaŋ kömumahotköra mutuk yetköreŋök kungö töwat sihitŋi kusuba likep anda kungöreŋ mewöŋanök aket.

³³ Mewö aketmö, Jisösgöreŋ kaŋgota eketka lök kömuyök. Mewö eka sihitŋi qahö kusuget. ³⁴ Qahö kusugetmö, yarö azi yeŋgöreŋök kunŋan liŋgip memba marömŋi umburatiiga miangöreŋök sep aka o erök.

³⁵ Mewö aketka kunöŋ yuai mi jeŋan ehöhi, yaŋön mi naŋgöba jiba ki ohoi ahöi döлки oyonje. Keu naŋgöba jiba ohoi ahözawi, mi mönö keu ölna akza. Inini mewöyök mi möt narimegöra möta keu ölna jizawaŋgö dop mötza. ³⁶ *Yuai mi asuhuyöhi, mi Buŋa Kimbigö keu kunöŋ ölnambuk akŋapköra asuhuyök. Keu mi kewö, “Yaŋgö sihitŋi mönö kude kusume.”

³⁷ *Aka Buŋa Kimbigö keu kun kewö ahöza,

“Azi utohogeri, yeñon mönö yaŋgöreŋ göröken jeŋini uba ekŋe.”

Inini keu yahöt miangöra aka mi möt narime. Mewö.

Jisösgö qamötŋi köt köteŋnöŋ löm kölget.

Mat 27.57-61; Mak 15.42-47; Luk 23.50-56

³⁸ Miangö andöŋe Arimatia taon toni qetŋi Josef kayök. Yaŋön Jisösgö gwarekŋi aka malökmö, Juda jitnememe yeŋgöra keŋgötŋi möta mötnariŋi köyatiba malök. Yaŋön kaba premiö Pailötköreŋ anda Jisösgö qamötŋi mekömamgö qesim waŋgiyök. Qesim waŋgiiga möta jim teköiga kaba meköyök.

³⁹ *Azi qetŋi Nikodemus mutuk Jisösgöreŋ suŋgem kayöhi, yaŋön mewöyök kayök. Kaba qamöt mirimamgöra kelök köhöwakŋambuk qetŋi mör mi repa oŋambuk melenŋeri, mi esu mohot lömbötŋi 30 kilogö dop bohonŋi memba kaba Josef bauköm waŋgiyök. ⁴⁰ Bauköm waŋgiba mohotŋe Jisösgö qamötŋi meköyohot. Meköba jiniŋ wörönŋi ölopŋi memba qamöt sileŋe ala opo tuatŋi miangön köpeiyohot. Juda ambazip neŋön qamötŋini mewö aka mözözömgöba löm köl engizinma.

⁴¹ Jisös maripomnöŋ qegeri, gölme miangö likepŋe arö kun ahöyök. Arö miangöreŋ qaksirigö köt köteŋ löm dölokŋi kun urorohoget kinök. Miangöreŋ qamöt kun qahö algetka gwamönŋi ahöyök. ⁴² Gwamönŋi aka kösutŋe ahöiga Juda ambazipnöŋ ak-kömükömu kendon tatpingöra jöjörögetka

* **19:36:** Eks 12.46; Jaŋ 9.12; Sum 34.20 * **19:37:** Zek 12.10; Ind 1.7 * **19:39:** Jon 3.1-2

nalõjini törüyök. Mianğöra Jisösgö qamõtñi memba mianğören ala lõm kölohot. Mewö.

20

Jisösgö lõm qaksirinjan gwamõnñi ahök.

Mat 28.1-8; Mak 16.1-8; Luk 24.1-12

¹ Sabat kendon tatket teköiga Magdalagö Maria yañõn Sonda sõñanök wañgaran suruiga qaksirinõñ anök. Anda je ui ani köt ketañi ehiga mianñõn lõk köteñ urorohonñi mianğö numbuñeyök qetalget kaba ahöyök. ² Mewö eka mianğörenñök mosöta ösumok anda Saimon Pitö aka Jisösgö wölböt gwarekñi yetköreñ kaba kewö jii mörohot, “Mönö Kembugö qamõtñi qaksirinöhök memba anda denike alget ahözawi, mi qahö mötzin.”

³ Mewö jii möta mosöta qaksirinõñ anohot. ⁴ Mohotñe ösumok anohotmö, gwarek alañan ösumñan anda Pitö onğita mutuk qaksirinõñ anğorök. ⁵ Anğota köt köteñ urorohonñi mianğö uruñe qahö õngöba numbuñe õne kököriba ui aniga oponñi köpeköpeñanök ahöiga ehök. ⁶ Mi ehiga Saimon Pitõnõñ mewöyök andõñe kañgota köt köteñ uruñe õngöba oponñi köpeköpeñanök ahöi ehök. ⁷ Mi ehök aka nõrõpñi opo jahõnñi kunõñ köpeiba esuhuger, mi tosatñan kusuba silegö oponñi mi-ambuk qahö mindiriba kungen algetka nanñök tariga ehök.

⁸ Mewö ehiga gwarek alañan mutuk qaksirinõñ kañğoröhi, yañõn mewöyök köt köteñ uruñe õngöba yuai mi eka möt nariyök. ⁹ Jisös guliba kömupnöhök wahötmawi, yetkõn Buña Kimbigö keu mewõñi mi qeljine qahö möt asariba tõnpin mala korohot. Mewö.

Jisõsnõñ Magdalagö ambi Mariagöreñ asuhuyök.

Mat 28.9-10; Mak 16.9-11

¹⁰ Mala kota mianğörenñök möt nariba lilingöba mirinire anohot. ¹¹ Yetkõn anohotmö, Marianõñ nanñök qaksirigö köt köteñ numbuñe kinda sahörök. Mewö sahöta köteñ urorohonñi mianğö uruñe kököriba ui anök. ¹² Ui aniga Suep garata yahöt malukuñiri tuat lalamñi etkehök. Jisösgö qamõtñan ahöyöhi, yetkõn mönõ mianğöreñ tarohot. Kunõñ nõrõpñi ahöyõhangöreñ tariga kunõñ kõnañe tarök.

¹³ Mewö tata kewö jiyohot mörök, “Ambi, gi mönõ wuanõngöra sahötzan?” Mi möta jiyök, “Kembunangö qamõtñi memba anda denike alget ahözawi, mi qahö mötzal.”

¹⁴ Mewö jiba lilingöba Jisõsnõñ kösutñe kiniga ehökmö, kaisongolomñi mi qahö ek kutuba tõnpin kinök. ¹⁵ Tõnpin kiniga Jisõsnõñ kewö qesim wañgiyök, “Ambi, gi mönõ wuanõngöra sahötzan? Dagöra jaruzan?” Mewö qesim wañgiiga arö galõmñan kinja me denöwö, mewö mötmöriba

kewö jiyök, “O ketaṇamni, gi qamötṇi memba aṅguba kungen anda alnōṅ ewö, mönō denike ahöza, mi jinōṅga möta anda memam.”

¹⁶ Mewö jiiga Jisösnōṅ qetṇi qeta “Maria!” jiyök. Mi qeta jiiga yaṅgōreṅ lilingöba Hibru keunōṅ qeta “Raboni!” jiyök. Mi nanine keunōṅ “Ketaṇamni.”

¹⁷ Mewö jiiga kewö jii mörök, “Ni Iwinanṅōreṅ qahö öṅgöba ki kinjal. Mianṅōra ni kude nōmisirmanmō, nōṅgō munurupni yeṅgōreṅ anda buzup kewö jinōṅ mötme: Nōṅōn mönō Iwi Anutuni aka eṅgō Iwi Anutuṇini yaṅgōreṅ lilingöba öṅgōmam.”

¹⁸ Mewö jii möta Magdalagö ambi Maria yaṅōn lilingöba anda gwarekurupṇi kewö jii mötket, “Nōṅōn Kembu ekiga keu mewö mewö jii mötzal.” Mewö.

Jisösnōṅ gwarekurupṇi asuhum eṅgiyök.

Mat 28.16-20; Mak 16.14-18; Luk 24.36-49

¹⁹ Sonda mianṅōreṅök miri söṅauiga gwarek yeṅōn ömbibiṅe tokoba Juda yeṅōra keṅgötṇini möta miri naṅṅuṇi köla ki namṇi misiget geiga tatket. Mewö tatketka Jisösnōṅ asuhuba sutṇine kinda kewö jiyök, “Alaurupni, luainōṅ embuk ahöma!”

²⁰ Mewö jiba böröyahötṇi aka marömṇi kondeliga Kembu eketka söṅōṅainōṅ uruṇini kokolak qeyök. ²¹ Kokolak qeiga toroqeba kewö jiyök, “Alaurupni, luainōṅ embuk ahöma! Iwinōṅ ni melaim ningiiga nōṅōn iṇini mewōṅanök melaim eṅgizal.”

²² Mewö jiba nöröpṇine memba ösum eṅgiba uwulamgöba jiyök, “Mönö Uṇa Törōṇi meget. ²³ *Inini ambazip siṅgisöndokṇini mosöta saṅṅonje ewö, mi mönō Anutugö jeṅe solanim teköza. Ambazip siṅgisöndokṇini qahö mosöta saṅṅonje ewö, mi mönō Anutugö jeṅe qahö solaniza.” Mewö.

Jisösnōṅ Tomas asuhum waṅgiyök.

²⁴ Jisösnōṅ gwarekurupṇi mewö asuhum eṅgiyökmö, gwarek 12 yeṅgōreṅök kun qetṇi Tomas, qetṇi alaṇi Siwisiwi qetkeri, yaṅōn nalö mianṅōreṅ sutṇine qahö malök.

²⁵ Tomasnōṅ kaiga gwarek tosatṇan “Mönö Kembu ekzin,” jiget möta kewö jiyök, “Jenan biriṅ löpötṇi börōṅe eka kesötṇan marömṇe misirimam ewö, mönō ölöp möt narimam. Ni nanak mi qahö eka misiriba oseimam ewö, mönō keuyök jiget möta öṅṇa mi qahö möt narimam.”

²⁶ Mewö jiiga sonda mohot teköiga gwarek yeṅōn Sonda mianṅōreṅ kunbuk mire qezaköba naṅṅu köla ki memba Tomasbuk mohotṇe tatket. Mohotṇe tatketka Jisösnōṅ kunbuk asuhuba sutṇine kinda kewö jiyök, “Alaurupni, luainōṅ embuk ahöma!” ²⁷ Mewö jiba Tomasgöra jiyök, “Gi mönō

* 20:23: Mat 16.19; 18.18

börögi böranda böröyahötne eka kesötkan marömne misiriman. Mewö aka yanğiseñ mosöta uruyahötki yaköriba ni möt narim niñgiman.”

²⁸ Mewö jiiga kewö melenök, “O, gi nöñgö Kembu Anutuna!”

²⁹ Mewö melenniga kewö jii mörök, “Gi nekzananğöra ni ölop möt narim niñgizanmö, ambazip qahö neka töndup ni möt narim niñgimakzei, yeñön mönö simbawoñ akze.” Mewö.

Jonöñ Ölöwak Buña ki kewögöra ohoyök:

³⁰ Jisösnöñ nup ösum-mumu qakñe memba maliga anğöletot sehisehñi tosatñi mi gwarek yeñgö jeñini qakñe asuhugetmö, mi buk kianğöreñ qahö ohoyal. ³¹ Keu tosatñi ohoyali, mi kewögöra ohoyal: Jisösnöñ Anutugö Nahönñi aka Amötqeqe Toñi Kraist akzawi, iñini keu mi möt nariba mewö mi-anön Jisösgö qetbuñanğöra aka malmal köhöikñi buña qem anğume. Mewö aka malmegöra nöñön Ölöwak Buña papia ki ohobiga enğöreñ kaza. Mewö.

21

Jisösnöñ gwarek 7 yeñgöreñ asuhuiga söra jök öröget.

¹ Könanğep Jisösnöñ kunbuk gwarek tosatñi yeñgöreñ asuhuyök. Taiberias o anğö jitñe miangöreñ kewö asuhum enğiyök: ² Gwarek azi kewöñan mohotñe malget: Saimon Pitö, Tomas qetñi kun Siwisiwi qetkeri, Natanael azi mi Galili prowinsgö Kana taonöhök aka Zebedigö nahönyahötñi yahöt aka gwarek tosatñi yeñgöreñök yahöt.

³ *Mohotñe malgetka Saimon Pitönöñ jii mötket, “Ni mönö söra örömamğöra anmam.” Mewö jiiga tosatñan jiget, “Nini ölop göbuk mohokñe anbin.” Mewö jiba mosöta wanğenöñ öngöba anda sunğem miangöreñ söra kun qahö öröget. ⁴ Söra qahö öröba öne malgetka miri lök gianjiiga Jisösnöñ saknön kinök. Kinökmö, yanğö kaisongolomñi mi qahö ek kutuget. ⁵ Jisösnöñ kinda enğohola jiyök, “Alaurupni, söra kun öröze me qahö?” Jiiga melenđa “Qahö!” jiget.

⁶ *“Qahö!” jigetka kewö jim kutum enğiyök, “Iñini mönö mösakñini wanğe ölñe göröken gilgetka eri ölop söra mi-wikñaime.” Mi möta mösakñini gilgetka söra sehisehñi geba ölökögeranğöra öröget kotmapkö osiiga öröm suksuköget.

⁷ Mewö aiga Jisösgö wölböt gwarekñi mi-anön Saimon Pitö kewö jii mörök, “Mi mönö Kembuya!” Mewö jiiga Kembugö qetñi möta opo bindoñanök jöhöba malöhanğöra silepökenji köpeiba miangöreñök o anğönöñ luhuba geyök. ⁸ Yeñön sak qöhöröñe 100 mita miangö dop kösutñe anda malget.

* 21:3: Luk 5.5 * 21:6: Luk 5.6

Mianğöra Pitönöŋ geba ani gwarek tosatŋi yeŋön waŋge lökuatnöŋ qem nanğöba anda mösak söraŋambuk örögetka waŋge andöŋe kayök.

⁹ Mewö kaba sak körikŋe öngöba mianğöreŋ yuai kewö eket: Könöp jeiga gapnöŋ söra jejeŋi aka beret soŋsoŋ ahöyök. ¹⁰ Mi eketka Jisösnöŋ kewö jii mötket, “Inini dölki söra örözei, mönö mianğöreŋök tosatŋi memba ki kaget.”

¹¹ Mi jiiga Saimon Pitönöŋ möta waŋgenöŋ öngöba mösak öröiga körikŋe öngöyök. Öngöiga ölni 153 eket. Mösak mi söra ketanŋi sehisehiŋi mienön kokolak qegetmö, mösahnöŋ töndup qahö tiŋgirök. ¹² Ölni mi eketka Jisösnöŋ kewö jii mötket, “Mönö kaba söŋangö neneŋi neget!” Mewö jii möta kaba “Mi Kembunina,” mewö möt kutugetmö, gwarek yeŋgöreŋök kunŋan “Gi daŋön?” mewö qesimangö urulömböt aka qahö qesiyök. ¹³ Qahö qesiyökmö, Jisösnöŋ anda beret memba eŋgiba söra mewöyök mendeŋda eŋgiyök.

¹⁴ Jisösnöŋ kömupnöhök wahöta gwarekurupŋi asuhum eŋgiyöhaŋgö indimŋi karöbut mi ahök. Mewö.

Jisösnöŋ Pitö kunbuk kunğuba mem köhöiyök.

¹⁵ Söŋangö neneŋi neget teköiga Jisösnöŋ Saimon Pitögöra kewö jii mörök, “Saimon Jongö nahönŋi! Alaurupki kienön ni uruŋinan jöpaköm niŋgimakzei, gi mönö i eŋgoŋgita gwötpuk jöpaköm niŋgimakzan me qahö?” Mi möta kewö melenök, “O Kambu, ni göhöra ak niŋgimakza. Gi wölböt alani akzan. Mi nangak ölop mötzan.” Mewö melenniga Jisösnöŋ jii mörök, “Gi mönö nöŋgö lamaurupni moröŋi gumohom eŋgiba malman.”

¹⁶ Mewö jii möri indimŋi yahöt qesim waŋgiyök, “Saimon Jongö nahönŋi! Gi ölna jöpaköm niŋgimakzan me qahö?” Mi möta kewö melenök, “O Kambu, ni göhöra ak niŋgimakza. Gi wölböt alani akzan. Mi nangak ölop mötzan.” Mewö melenniga Jisösnöŋ jii mörök, “Gi mönö nöŋgö lamaurupni galöm köl eŋgiba malman.”

¹⁷ Mewö jii möri indimŋi karöbutŋi qesim waŋgiyök, “Saimon Jongö nahönŋi! Gi mönö ölna wölbötkan (jojopangan) nöŋgö ak gihimakza me qahö?” Mewö qesim waŋgiiga urujöjöpakö qequesiŋi mohot miyök qesiiga indimŋi karöbut ahöhaŋgöra Pitönöŋ wösöbirik möta melennda kewö jiyök, “O Kambu, gi yuai pakpak ölop möt teközan. Gi wölböt alani akzan. Göŋön mönö nangak mi ölopŋanök mötzan.” Mewö jiiga Jisösnöŋ jii mörök, “Gi mönö nöŋgö lamaurupni gumohom eŋgiba malman.”

¹⁸ “Nöŋön keu öl töhöŋŋi kun kewö jibi mötnöŋ: Gi sepgulia mala nangak sileötaŋgi jöhöba köna igen me waigen ‘anmam,’ jiba ak gihiyöhaŋgö dop ölop anda kaba malnöŋ. Mewö

mala malnöhmö, azi namñi akñani, nalö mianğoreñ börögi böranñonga kunñan kaba opo silepökegi jöhöm gihiba kõna kungen qahö anmangö mötmani, mönö mianğoreñ goañgiriga anman.”

¹⁹ Jisösnöñ kezapqetok keu mewö jiba Pitö kömumawañgö keu saini indelök. Yanñon kömup tandökñi qainñi kun kömuiga Anutugö qetbuñani qarimapköra mötmöriba mi jiyök. Keu mi jiba yanğora jii mörök, “Gi mönö kaba ni nuatanğöba malman!” Mewö.

Jisösnöñ Pitöbuk gwarek kungö keuñi eraum mörohot.

²⁰ Pitönöñ Jisösbuk anda lilingöba Jisösgö wölböt gwarekñan andönjire kaiga ehök. Gwarek mianñon ak-kömukömu lama negeri, mianğoreñ nöropñan Jisösgö töptöpñe nariba jiyök, “Kembu, göhöreñ mamalolo azi mi danñon?” ²¹ Gwarek mianñon kõnanjire kaiga Pitönöñ i eka Jisös kewö qesim wañgiyök, “Kembu, gwarek kianğora mönö denöwö asuhuma?”

²² Qesim wañgiiga kewö jii mörök, “Nöñon yanğö malmal areni mewö me mewö albilenak, mi mönö göhöreñ waimanjara qahö. Nöñon jibiga yanñon qahö kömumba nöñon gölmenöñ lilingöba kamamañgö nalöñe toroqeba jebuk mal öngöbawak, keu mi yanğö keuya akawak. Gi mönö yanğö keuñi mosöta nangi malmalgi möhamğöba galöm köl anğuba nöñgö andöne kaba ni nuatanğöba malman.”

²³ Keu mewö jiiga tosatñan lañ möta jim sehigetka urumelen laurup yanğö sutñine keu mi kewö jim sohoget, “Gwarek mianñon qahö kömuma.” Mewö jim sohogetmö, Jisösnöñ jebuk teteköñi qahö mal öngömapköra qahö jiyökmö, keu kewö jiyök, “Nöñon yanğö malmal areni mewö me mewö albilenak, mi mönö göhöreñ waimanjara qahö. Nöñon jibiga yanñon qahö kömumba nöñon gölmenöñ lilingöba kamamañgö nalöñe toroqeba jebuk mal öngöbawak, keu mi yanğö keuya akawak. Gi mönö yanğö keuñi mosöta nangi malmalgi möhamğöba galöm köl anğuba malman.” Mewö.

Nanak mi pakpak jenan eka nanğöba ohom engizal.

²⁴ Gwarek mianñon yuai mi jeñan eka mala mianğö dop mi nanğöba jim asariba Ölöwak Buña ki ohoyök. Körek pakpak enñon gwarek mianğö kõnanjire mötzeañgöra aka ölop tönguba kewö jiba malme, “Yanñon keu nanğöba jiyöhi, mianñon mönö keu öl töhönñi akza.”

²⁵ Jisösnöñ nup aka anğöletot tosatñi sehisehiñi mi mewöyök aka memba malök. Miengö kösohotñini mohot mohot mi lökñanök törörök ohobinak ewö, mönö buk papia böranñi böranñi sehisehiñi asuhugetka kantri dop papia köwe miri (laibreri) pakpak mianğoreñ alinga kokolak qeba ölököiga tinji töndup qahö dop kölbawak. Mewö mötmörizal.

Aposol Nup Meme

Aposol yeñön Uña Töröñangö ösumnön nup meget.

Jim-asa-asari

Dokta Luknön buk qetñi “Kraistkö Ölöwak Buña” ohoba kösohotñi toroqeba buk qetñi “Aposol nup meme” ohoyök. Jisösnön gwarekurupñi mutukñi kusum engii Uña Töröñan sölölohöm engiiga Kraistkö keu buzupñi jim sehigeri, Luknön mianğö kösohotñi aukñe almamğöra möta kewö (1.8) ohoyök, ‘Yeñön mi Jerusalem sitinön könahiba Judia prowins dop köla Samaria prowinsnön anda toroqeba gölme gorañe eu emu likeplikep angetka dop köl teköba anök.’ Mutuk Juda könagesö uruñe nup megetka uruñini melenđa guligetka Kraistkö qeburunñi könahiba yöhöba sehiba anda anda kantrinñi kantrinñi dop köliga urumelenñi könagesö yeñğö bohonñini ahök. Kösohotñi oyonjei, Luknön yeñğö uruñini böñjön almamğö kapanñi köla keu kötñi yahöt kewö ohom asariyök,

1) ‘Kraistkö alaurupñan Rom mindimindiri gawman mi tuarenjon qahö ak engiba malje. Yeñön mi memba et almegöra tuaköpek qahö akze. Tosatñan mewö mötpeak, mi böññi öne wahötpapuk.’

2) ‘Juda yeñön jike nup meget korembenñi aiga ölni asuhumapköra mamböta malgeri, Jisösnön mönö ölni mi memba kaba engiyök.’ Keu kötñi mi.

Jisösgö Buña keuñi kuñguba jim sehiba zioz könahiba mem köhöigetka toroqeba aniga urumelenñi yeñğö kambuñinan qariyök. Mianğö dop “Aposol nup meme,” kösohot mi juliga keu bahöñi bohonñi karöbut kewö akze: 1) Jisösnön Suep mire öngöiga gwarek yeñön Jerusalem malgetka Kraistkö Buña keuñan könahiba qeburunñi yöhöyök. 2) Yöhöba qariba Palestain gölmegö prowins tosatñe anök. 3) Kunbuk qariba kantrinñi kantrinñi Sutñire Köwet liliköba tat anjei, mi dop köla teteköñe siti bohonñi Rom anök.

“Aposol nup meme” mianğö keu bohonñi mi Uña Töröñangö könañi aka nup memenñi. Aposol aka mötnarip ambazip yeñön yambu dölökñangö (Pentekost) nalöñe Jerusalem köulukögetka Uña Töröñan ösumñambuk uruñine geyök. Uruñine geba sölölohöba mem köhöim engiiga denđa kantri liliköba nup megetka ölni könañi könañi asuhuyök. Zioz ambazip aka yeñğö jitñememe yeñön Kraistkö Buña keu mi könakönahiñe denöwö jiba malgeri, Luknön mianğö keuñi ohoiga mi ölop buk kianğorenñi oyonđa mötpin. Ambazip uruñini melenđa

mindiriba naŋgöm aŋguba malgeri, yeŋön Buŋa keugö kukösumŋi möt kutugetka miri dop aukŋe asuhuyök. Denöwö asuhuyöhi, Luknön miangö kösohotŋi ohoba Uŋa Töröŋaŋgö kukösumŋi kondel neŋgiza.

Buk kiangö bahöŋi bohonŋi 4 mi kewö:

1. Buŋa keu naŋgöba jibingöra jöjöröget 1.1-26
 - a) Jisösnön jimkutukutu ala Uŋa engimamgö jiyök 1.1-14
 - b) Judas Iskariotkö salupŋe Matias meköget 1.15-26
2. Jerusalem sitinön Buŋa keu naŋgöba jiget 2.1-8.3
3. Judia aka Samaria Buŋa keu naŋgöba jiget 8.4-12.25
4. Polnön misin nup memba malök 13.1-28.31
 - a) Misin nup liliköba megetka 1 ahök 13.1-14.28
 - b) Jerusalem totoko ala keu jöhöget 15.1-35
 - c) Misin nup liliköba megetka 2 ahök 15.36-18.22
 - d) Misin nup liliköba megetka 3 ahök 18.23-21.16
 - e) Pol Jerusalem, Sisaria aka Rom kösö mire tarök 21.17-28.31

Jisösnön zioz könahiyök.

¹* O Tiofilus!

Luk nönön kösohotni mutukŋi ohoyali, miangören Jisösnön nup könahiba memba liliköba ambazip kusum engiba malöhi, miangö kösohotŋi pakpak arengöba albi eknön. ² Jisösnön nup memba melaimelai azi aposolurupŋi möwölöhöba kusum engiba mala Uŋa Töröŋaŋgö ösum çakŋe nup memegöra jim kutum engiyök. Mi enŋiiga Anutunön waŋgiri Suepnön öngöyök. Nönön kösohotni ohoyali, mi miangören ohom teköyal. Merak miangörenök kösohot mi toroqeba ohomam.

³ Jisösnön sihimbölo möta kömumba kömupnöhök wahöta wehön 40 gölmenön toroqeba malök. Nalö miangö uruŋe aposolurupŋi sömaŋi gwötpuk asuhum engiba Anutu bemtohoŋaŋgö könaŋi toroqeba jim asarim engiba malök. Mewö mala aiwesök tandök könaŋi könaŋi memba kondel engiyök. Yeŋön mi eka Jisösnön guliba maljawi, mi ölop möt yaköget. Aiwesök ekeri, yeŋön mi naŋgöba jiba dangunu ewö kinje aka kunŋan mi qeapkömamgö osima.

⁴ *Nalö kunön yembuk mohotŋe mala kewö jim kutum engiba jiyök, “Injini Jerusalem siti ki mönö zilaŋ kude mosötme. Iwinan ‘Kalem uruŋine al engimam,’ jiba keuŋi jöhöi jibi mötkeri, mi mönö ölnambuk akŋa aiga eŋön mönö miangöra mamböta malme. ⁵ *Mutuk Jonön ambazip o töhönön melun mem engiba malökmö, Anutunön nalö kude köriiga Uŋa Törönj uruŋine ala mianön melun mem engima.” Mewö.

* 1:1: Luk 1.1-4 * 1:4: Luk 24.49 * 1:5: Mat 3.11; Mak 1.8; Luk 3.16; Jon 1.33

Jisösnöj Suep mire öngöyök.

⁶ Aposol yeñon nalö kunöj tokogetka Jisösnöj sutjine asuhuiga kewö qesim wañgiget, “Kembu, göjön mönö nalö kewöje me wani nalönöj Israel kantrigö tohoñi mi kunbuk kuñguba mem köhöiman?”

⁷ Qesim wañgigetka kewö jii mötket, “Iwinöj nanñi kukösum qakñe yambu gwani aka aua nalö arengöba ali ahözawi, mi mönö eñon mötmeanjö dop qahö. ⁸* Mi qahöpmö, Uña Töröñan eta uruñine gemawañon mönö kukösum enjiiga letota nöngö könani nanjöba jiba malme. Mi Jerusalem sitinöj könahiba Judia prowins dop köla Samaria prowinsnöj anda liliköba toroqeba gölme görañe eu emu likeplikep angetka dop köl teköba anma.” ⁹* Jisösnöj keu mi jim teköiga Anutunöj jeñini qakñe wañgita wahöriga kousunöj eta esuhuiga euyangören öngöiga ekingö uget öngöba atatop (jiataton) köliga jaruba kinget.

¹⁰ Mewö öngöiga suepnöj eu ehiba kingetka miangörenök azi yahöt malukuñiri tuat lalamñi yetkön kösutjine asuhuba kinohot. ¹¹ Kinda kewö jiyohot, “Galili azi inñini mönö denöwögöra suepnöj eu ubayök kinje? Anutunöj Jisös ki engö sutjineyök wañgita Suep mire eu öngöi ekzei, yañon mönö tandök mewöñanök kunbuk lilingöba etma.” Mewö.

Judas Iskariotkö salupñe Matias meget.

¹² Mewö jiyohotka aposol yeñon Jerusalem siti kösutñe kundunji qetñi Oil ip kundunji miangörenök lilingöba eta 1 kilomitagö dop kaba sitinöj kangotket*. ¹³* Jerusalem kangota miri urunji kun qakñe tat malgeri, miangören anda öngöget. Öngögeri, yengö qetñini kewö: Pitö, Jon, Jeims aka Andru; Filip, Tomas, Bartolomyu aka Matyu; Jeims Alfiusgö nahönñi, Saimon Zelot politik azia aka Judas Jeimsgö nahönñi†. ¹⁴ Azi pakpak mienñon urumohot aka ambi yembuk kapan köla köuluköba malget. Yengö sutjine Jisös munurupñi aka namñi Maria yeñon mewöyök malget.

¹⁵ Köuluköba mala wehön kunöj mötnarip ambazip jañgöñini 120 miangö dop tokogetka Pitönöj sutjine wahöta keu kewö jiyök, ¹⁶ “Azi alaurupni! Jisös memba jöhögeri, Judasnöj yengöra köna kondelök. Uña Töröñan Judasgö keu mi mutuhök kiñ Deiwidkö uruñe sañep ali numbu jitñan jiiga Sumbara buk (Buña Liñet buk Sam) miangören ohoget ahözawi, miañon

* **1:8:** Mat 28.19; Mak 16.15; Luk 24.47-48 * **1:9:** Mak 16.19; Luk 24.50-51 * **1:12:** Juda yeñon 1100 mita mi Sabat kendonöj qahö ongita anjema.

Miangöra Köna keu qahö ongita kaget. * **1:13:** Mat 10.2-4; Mak 3.16-19; Luk 6.14-16 † **1:13:** Zelot pati yeñon nanñini kinkin mbingöra Rom mindimindiri gawmanbuk tuaköpek aka urukönöp aka malget.

mönö ölnambuk ahuyök. ¹⁷ Jisösnöŋ Judas möwölöhöi nanine kambunöŋ kun mali nupŋi memapkö kuŋgui melaimelai azi bohonŋi aposol ahök.

¹⁸ * “Judasnöŋ ahakmeme bölöŋi aiga söngöröŋi waŋgiget memba mianöŋ gölme köröŋi kun bohonŋi meyök. Mi memba miangöreŋ imbi auba nööröŋan melenäda gölmenöŋ kuŋguiga gölömnöŋ juliga irip kömoŋgokŋi datŋi munŋi mi körek usuba erök. ¹⁹ Mewö ahiga Jerusalem ambazip pakpak miangö buzupŋi möt teköba gölme miangö qetŋi nanŋine keunöŋ Akel-dama qetket. Mi nanine keunöŋ Sep Gölme köröŋi.”

²⁰ * Pitönöŋ toroqeba kewö jiyök, “Sumbara (Sam) buk miangöreŋ keu kun kewö ohoget ahöza, ‘Miriŋi mönö balonŋi gwamön kinma. Mi kunŋan tonŋi qahö aka maliga miriyök kinma,’

aka keu kun kewö ahöza, ‘Kunöŋ ölop yangö salupŋe galöm nup memba kinma.’

²¹⁻²² * “Mewögöra aka nini azi kun möwölöhöba kuŋguinga nembuk jitŋe meme aka dangunu ewö kinda Jisösnöŋ kömupnöhök wahöröhi, miangö Buŋaŋi naŋgöba jiba mali dop kölma. Jonöŋ Jisös o melun mem waŋgiiga Kembunöŋ nalö miangöreŋök qenjaröknöŋ anda nupŋi könahiba memba neŋgö gölmenöŋ liliköba anda kaba mali Anutunöŋ sutnineyök waŋgita öŋgöyök. Azi nalö pakpak miangöreŋ kambunine mohotŋe mala korini, mönö yeŋgöreŋök kun möwölöhöinga dop kölma.”

²³ Pitönöŋ mewö jiiga azigö jaruba azi yahöt qetŋiri qetket. Kun qetŋi Josef, qetŋi alaŋi Barsabas aka qetŋi kun Jastus. Azi kungö qetŋi Matias. ²⁴ Qetŋiri qeta kewö köuluköba jiget, “O Kambu, gi ambazip urunini körek pakpak möt kutuzan. Miangöra gi azi kietköreŋök niŋia möwölöhözani, mi mönö kon-del neŋgiman. ²⁵ Judasnöŋ goŋgiba geŋmoŋ aka eta aposol nup mosöta bölöŋamŋaŋgö dop ayuhuba geyöhi, yangö salupŋe azi kunöŋ mönö aposol aka kinda melaimelai azigö nup memba malma.”

²⁶ Mewö jiba yetkö kiawen (kas, lot) algetka Matias asuhuyök. Asuhuiga aposol 11 yeŋgö sutŋine dum kun waŋgigetka kambunine toroqeyök. Mewö.

2

Uŋa Töröŋan eta gwarek uruŋine geyök.

¹ * Jisösnöŋ kömuyöhi, nalö miangöreŋök sonda 7 teköiga wehöŋ 50* miangöreŋ yambu jeŋi qeŋe nalöŋi kam kuŋguiga

* **1:18:** Mat 27.3-8 * **1:20:** Sum 69.25; 109.8 * **1:21-22:** Mat 3.16; Mak 1.9; 16.19; Luk 3.21; 24.51 * **2:1:** Lew 23.15-21; Dut 16.9-11 * **2:1:** 50 mi Grik keunöŋ Pentekost.

urumelen ambazip pakpak yeñon tokoba kendon tatket. ² Tatketka mianğoreñöhök Suepnöhök yuai kun biliksik eri kouruk ketanji asuhui mötket. Dimbomnöñ köhöikñanök qe-makzawi, mönö mianğö tandök ewö asuhuba eta miri tatkeri, mi körek kokolak qeyök. ³ Miri kokolak qeba yuai mianğon denğenda sehiba könöp bölam tandök ewö nöröpñini qakñe öngöi eket.

⁴ Mewö asuhuiga Uña Töröñan körek yeñgö uruñini kokolak qeiga gölme tosatñe keu ahözawi, mi könahiba jiget. Uña Töröñan sölölohöba keu sanep alöhañgö dop aukñe jiget.

⁵ Juda ambazip tosatñan Anutu göda qeba kantri könani könani suep bapñe tat anjei, mianğoreñ denđa anda mala Jerusalem lilingöba kageri, tosatñi mewöñi mewöyök sitinöñ malget. ⁶ Mewö mala kouruk ketanji mi möta ambazip kambu gwötpukñan kañgota tokoget. Tokoba kingetka mötnarip ambazipnöñ keu murutñi murutñi jigeri, mi pakpak möta nanñak nanñak möt asariba mianğöra aurumpurik aka köñkuñ aket.

⁷ Köñkuñ aka welipköba jiget, “Mötket! Azi ki keuñi keuñi jizei, yeñon mönö körek Galili ambaziwa akze me? ⁸ Nini kantri murutñi murutñi mianğoreñ ahuba kota malinga yeñon mönö denöwö aka malqarip kantrininañgö dop keunini nanñik nanñik jigetka mötzin? ⁹ Nini Partia ambazip, Midia ambazip aka Elam ambazip ki kinjin. Nini tosatñan Mesopotemia malin. Tosatñan Judia malje aka tosatñan Kapadosia gölmenöñ malget. Ambazip tosatñan Pontusgöra, tosatñan Eisia prowinsgöra akzin aka yeñon nanini keunine keu jigetka mötzin.

¹⁰ “Tosatñan Frigia gölme mosöta ki kaba malje. Tosatñan Pamfilia taon mosötket. Tosatñan Ijipt kantrinöñ malget. Tosatñan Sairini gölme likepñe Libia kantrinöñ malget. Tosatñi nini Rom sitiyök kusukñanök ki kaba maljin. ¹¹ Nini tosatñan Juda ambazip ahuba maljin aka tosatñan kantri tosatñe ahuba könanğep Juda ambazip ahin. Mewö kinjin aka yeñon keu jigetka nini keunini mohot mohot mi ölöp möt kutuzin. Neñğoreñök tosatñan gölme jölanñi qetñi Krit mosöta köwet kutuba kaget. Tosatñan Arebia keu jize. Nini mewöñan maljinmö, yeñon söñgaiba Anutunöñ añğöletot öñğöñgöñi ahöhi, miengö könani mi nanine keunöñ nanñik nanñik jigetka mötzin.” ¹² Mewö jiba körek yeñon auruba lalalulu siksauk aka nanñini kewö jim qesim añguget, “Kiañgö könani mönö denöwö?” Mewö qesim añguba keu jaruba tönpin kinget.

¹³ Tönpin kingetmö, tosatñan mepaqepaik aka kewö jiget, “Yeñon wain o nahömñambuk gwötpuk nemba eñololon akze.”

Mewö.

Pitönöŋ Uŋa Töröŋaŋgö könaŋi jim asariyök.

¹⁴ Mewö jigetka Pitönöŋ aposol 11 yembuk mohotŋe wahöta kinda köhöikŋanök qeta ambazip kambu yengöra kewö jii mötket, “Alaurup, Juda ambazip aka ambazip körek Jerusalem maljei, nöŋön yuai asuhuzawaŋgö könaŋi jibi kezap ala mi mötket. ¹⁵ Injini tosatŋan nengöra kewö jize, ‘Yeŋön o köhöikŋi negetka uruŋinan enjololoŋ akza.’ Mewö mötmörizemö, neŋön mewö qahö akzin. Ki söŋangö 9 kilokŋi akza. Söŋan mi o nene nalöya qahö. ¹⁶ Qahöpmö, kezapqetok azi Joelnöŋ Buŋa keu kewö jiyöhi, mianŋön mönö öljambuk akza,

¹⁷ *‘Anutunöŋ jiza: Kembangö kaka nalöŋan törimawi, nöŋön nalö mianŋöreŋ Uŋani Töröŋi mokobiga ambazip körek yengö qakŋine öŋgöma. Öŋgöba sölölohöba kutum enguasöriga kewö asuhuma:

Enŋö nahönböraturuŋinan kezapqetok keuŋi keuŋi jimakŋe.

Enŋö gwabö seramuruŋinan jeŋini meleni imutŋi imutŋi ehakŋe.

Enŋö ambazip namŋi yeŋön gaunŋi gaunŋi ekŋe.

¹⁸ Uŋani Töröŋi mokomami, mi azi aka ambi weleni qeba malmei, yengö qakŋine mewöyök öŋgöiga kezapqetok keu jimakŋe.

¹⁹ Nöŋön anŋöletot suepnöŋ albiga uget eu öŋgöiga ekŋe aka gölmenöŋ aiwesök mi kewö ekŋe:

Yuai sepnambuk, könöp öŋgöŋgöŋi aka köwak köndumjambuk mi asuhume.

²⁰ Wehön jeŋan pandaman meiga köiŋnöŋ pisihiba sep ewö akŋa.

Mewö asuhuiga mianŋö andöŋe Kembangöreŋ nalö ketanŋan kam kuŋguma.

Wehön mi aködamun aka qetbuŋaŋambuk.

²¹ Denike yengöreŋök kunŋan kun Kembangö qetŋi qeta köulukömawi, yaŋön mönö amöt qem waŋgiiga letotma.’ Joelnöŋ mewö ohoi ahöza.

²² “O Israel ambazip, injini mönö kezap ala keu ki mötket: Anutunöŋ Jisösgö malmal nalöŋe sölölohöm waŋgii mali anŋöletot, aiwesök aka aiaka ösum-mumuŋambuk mi enŋö sutŋine gölmenöŋ aukŋe asuhuget. Injini mi ölop mötze. Anutunöŋ yuai mi asuhum waŋgiba mewö mianŋön Nazaret azi mianŋö könaŋi nanŋöba jiba kondel enŋiba malök.

* 2:17: Joel 2.28-32

23 * “Anutunöŋ mönöwök Jisösgö keuŋi qeljiŋe jöhöba möt kutuba kewö jiyöha ahöza, ‘Amötqeŋe Toŋan mönö pinjit azi yeŋgö böröŋine etma.’

Keu mianğö dop Anutunöŋ Jisös qahö aŋğön köli eŋgö böröŋine erök. Mewö eriga inini kömumapkö qetketka kian kantri gawman yeŋön Mosesğöreŋ Köna keu qahö möta töndup jim kutugetka böröŋinan Jisös memba maripomnöŋ qeget kömuyök. Kömuyökmö, sepŋan mönö eŋgö qakŋine öŋgöyöha ahöza. 24 * Jisösnöŋ kömuyökmö, kömupkö kösö gwaröŋe eri kömup Toŋan i jöhöba nalö köröpŋi galöm köl waŋgimamğö osiyök. Mi Anutugöreŋ qahö dop kölök. Mianğöra yaŋön i mem guliba kömupkö sihimbölöŋeyök meköiga wahörök.

25 * Kiŋ Deiwidnöŋ Jisösgöra kewö jiyök ahöza, ‘Nöŋön garaŋguruŋ aka talbilenbuköra Kembunöŋ böröni öŋŋe malja.

Yaŋön nalö dop qöhöröŋne kini imut ewönöŋ eka maljal.

26-27 Mewö mala kömumam-mö, kömupkö uŋem mire gebiga andö qahö nuŋguman.

Göŋön nangi wölböt azi sarakŋi tök-kutukutuŋi ni mönö meköm niŋginöŋga kömupkö lömnöŋ ahöba qahö gisahömam.

Mianğöra urunan sösoŋgai aiga numbu nesilamnan renduŋ liŋet köla maljal.

Silenan mewöyök guliba wahötmawaŋğöra al mamböta jörömqöröm aka luhut memba ahöma.

28 Göŋön malmal köhöikŋaŋgö könaŋi kondel niŋginöŋga möt kutumam.

Nöŋön göhö jemesoholge pöndaŋ malbiga göŋön uruni sösoŋgainöŋ kokolak qeman.’ Deiwidnöŋ Jisösgöra mewö jii ahöza.

29 “O alaurupni! Pitö nöŋön bem ambönini kiŋ Deiwidkö könaŋi mi awösamkakak qakŋe aukŋe kewö jim asarimam: Deiwidnöŋ kömuiga löm kölgetka qaksirinan merak sutnine ki ahöza. 30 * Deiwidnöŋ kezapqetok azia aka malöhaŋön kewö mörök: Anutunöŋ gwölönarökurupŋi yeŋgöreŋök kun möwölöhöba kuŋgui nanŋi ewö azi kembangö dum tatatŋe tatma. Anutunöŋ keu mi jöhöba jöjopaŋ keunöŋ jim köhöiba malök. 31 Kunŋan tatmawi, mi qeljiŋe eka mörök. Amötqeŋe Toŋi Kraist yaŋön kömupnöhök wahötmawi, Deiwidnöŋ mi möta kewö jiyök,

‘Kraistnöŋ mala kömumapmö, kömupkö uŋem mire geiga Anutunöŋ i andö kude qei ahöma.

Yaŋgö sileŋi mi kude mosöri qamötŋan kömupkö lömnöŋ qahö gisahöma.’

* 2:23: Mat 27.35; Mak 15.24; Luk 23.33; Jon 19.18 * 2:24: Mat 28.5-6; Mak 16.6; Luk 24.5 * 2:25: Sum 16.8-11 * 2:30: Sum 132.11; 2 Sml 7.12-13

³² Anutunöŋ Jisös mem gulii wahöriga mewö mianjön keu mi ölnambuk ahök. Nini körek mi je kötninan eka nanğöba jiba dangunu ewö kinjin. ³³ Jisösnöŋ wahöta mala Anutunöŋ wanğiri öngöba böröŋi ölnje tatza. Mianğöreŋ tata Iwinöŋ Uŋa Töröŋi melaimapkö jim jöhöyöhi, yaŋön (promis) mi möta i mokoi eriga ölni merak ki asuhui eka mötze. ³⁴ *Deiwidnöŋ Suepnöŋ kude öngöyök. Yaŋön nanjak keu kewö jii ahöza, 'Anutunöŋ Suep miri uruŋe nani Kembunangöra kewö jim kutui mörök:

Göŋön mönö kaba böröni ölnje asakmararaŋ kiangöreŋ eta tata malman.

³⁵ Mewö tata malnöŋga nöŋön nalö sutŋe kiangöreŋ tuarenjoŋurupki tim tötala luhut al engimam.

Luhut al engibiga yeŋön tala geba sihimbölö möta sahöta köna döŋ ewö akŋe.

Mewö aketka göŋön ölop wahöta yeŋgö qakŋine tiba söŋgaiba malman.'

³⁶ "O Israel ambazip, inini Jisös maripomnöŋ qegetka kömuyökmö, Anutunöŋ Jisös mi kuŋguiga Kambu aka Amötqeŋe Toŋi Kraist ak neŋgiba malja. Israel kambu pakpak inini mönö mianğö könaŋi möt yaköme."

³⁷ Pitönöŋ mewö jiiga ambazip kambunöŋ möta uruŋini qeŋiŋi Pitö aka aposol tosaŋi yeŋgöra kewö jiget, "Azi alaurup, nini mönö dendenöwö ahin dop kölma?"

³⁸ Jigetka Pitönöŋ kewö jii mötket, "Inini mönö uruŋini melenget. Mohot mohot uruŋini melenğeraŋgö dop neŋön mönö Jisös Kraistkö qetŋe o mem melun mem engibin. Mi enğiinga Anutunöŋ siŋgisöndokŋini saŋgoŋda mosöta Uŋa Töröŋ kalemŋi mi buŋa qem engima. ³⁹ Anutunöŋ Uŋa mi engimangö jim jöhöyöhi, keu mi mönö nanŋini aka engö gwölönarökurupŋini engöra aka jiyök. Engöra aka tosaŋi köröwen mal angetka Anutu Kembuninan engoholmawi, yaŋön jöhöjöhö keu (promis) mi mönö körek engöra aka mewöyök jiba jöhöi ahöza."

⁴⁰ Pitönöŋ mewö jiba toroqeba qambaŋ keu tosaŋi gwötpuk mianjön uruŋini kuŋguba kewö jiyök, "Ambazip misimkaulup ki gölmenöŋ maljei, Anutunöŋ mi amöt qem enğiiga letotmegö mötza. Yembuk sihimbölö miwikŋaibepuköra mönö uruŋini melenğda ambazip goŋgoŋi mi jabö ala engömosötme."

⁴¹ Pitönöŋ mewö jiiga ambazip jesöŋgöŋan keuŋi möt anğön kölgetka o melun mem engiget. Mi mem engigetka könagesöŋine toroqegetka jaŋgöŋinan wehön mianğöreŋök 3000 mianğö dop qariyök. Mewö.

Mötnariŋ yeŋön uru jöhöm anğuba malget.

* 2:34: Sum 110.1

⁴² Uruņini melenęeri, yeņön urumohok aka urunöņ jöhöm aņguba nalö dop aņgeka tokogetka aposol yeņön Buņa keu kusum enęigetka beret mindipköba nemba köuluk nup memba malget. Pöndaņ malmal mewöņi malget.

⁴³ Mewö kinda Anutugö qetņan bölibapuköra jönöm undu-undu aka malget. Mewö malgetka Anutunöņ sölölohöm enęiiga aposol yeņön jitņe memenini aka nup megetka aņgöletot aiwesök murutņi murutņi asuhuget. ⁴⁴ *Anutu möt narigeri, yeņön körek malmalņini mohotņe mala sukinap (ainemaluku) yuainini pakpak mindiriba mohotņe memba malget.

⁴⁵ Mewö memba mala gölme sukinap yuainini bohonņi memegöra algetka söņęöröņi enęiget kayöhi, mi sutņine mözöqözöröņ aka osigeranğö dop menden aņguba malget.

⁴⁶ Mewö mindiriba mala qösösök (qörörök) urumohot aka nalö dop jöwöwöl jikenöņ tokomalget. Beret mi miriņini dop mindipköba nemalget aka numbu nenenini mi geņmoņini qahö sösoņgai qakņe tata nemalget. ⁴⁷ Aiakanini mewö aka Anutu möpöseiba malgetka ambazip pakpak yeņön i enęek soriba malget. Enęek soriba malgetka kambuņinan qariiga Kembunöņ nalö dop ambazip tosatņi uru melen enęiiga letota mindimindiri arenine toroqet. Mewö.

3

Pitönöņ lokon azi kun mem ölöwahök.

¹ Juda yeņön mare dop 3 kilok köuluközema. Mare kunöņ Pitö Jon yetkön köuluk nalö miangören jöwöwöl jikenöņ öņęöyohot. ² Öņęöyohotka miangören azi kun nam körö uruņeyök lokon asuhuba tat malöhi, mi aņguba kaba jöwöwöl jikegö kiripo naņguņe alget. Alaurupņan silim dop kaba kulu-
lunöņ aņguba kiripo naņgu qetņi Naņgu Eksihimņambuk qetk-
eri, miangören alget tarök. Tata ambazip jikenöņ öņęögeri,
yeņön monen kalem waņgimegöra ulet enęiba malök.

³ Mewö algetka tari Pitö Jon yetkön jöwöwöl jikenöņ öņęöbitkö ahotka etkeka i mewöņanök kalemğö ulet etkiyök. ⁴ Ulet etkiiga jemesoholņi uba eka Pitönöņ kewö jii mörök, "Mönö niri netkeknöņ!"

⁵ Mewö jii möta je kusumusulņi qahö etkehiba yuai kun böröņireyök niņgimahotkö mambörök. ⁶ Etkehiga Pitönöņ jiyök, "Nöņęören silwö me goul monen qahö ahözapmö, nöņęören yuai kun ahözawi, mi ölöp gihimam: Gi mönö Nazaret azi Jisös, Amötqeqe Toņi Kraistkö qetņe wahöta anman!"

⁷ Mewö jiba böröņi ölņe memba kököbihiiga wahörök. Wahöriga könaņi aka gwaköt sihitņi mönö miangörenök

* 2:44: Apo 4.32-35

köhöiget. ⁸ Köhöigetka wahöta luhuba yetpuk jöwöwöl jikenöŋ öngöba mianğoreŋ anda kaba sererşereŋ unduba Anutu möpöseiyök. ⁹ Mewö anda kaba Anutu möpöseim waŋgiiga ambazip kambu pakpak yeŋön mi eket. ¹⁰ Mi eka kewö jiget, “Azi ki kalem waŋgimegöra jikegö kiripo Nanğu Eksihimŋambukö kösutŋe tata uleta malöhi, mönö mia.” Mewö jiba möt waŋgiba “Sileŋe wani yuaia asuhuzapto?” jiba auruba nemböŋini teköi welipköget. Mewö.

Pitönöŋ jöwöwöl jikenöŋ Buŋa keu jii mötket.

¹¹ Welipkögetka ulet azi mianöŋ sundan Pitö Jon yetpuk mohotŋe anda kaiga ambazip kambu körek pakpak yeŋön ösumŋinan kösutŋine kaba jöwöwöl jikegö tohoŋ uruŋe öngöba kiŋ Solomongo sombem söraŋambuknöŋ tokoba kinda ehiget.

¹² Mewö ehigetka Pitönöŋ eŋgeka könahiba kewö jii mötket, “O Israel alaurupni, iŋini mönö wanigöra yuai ki eka auruze? Wanigöra niri uba netkehize? Azi kianöŋ ölöwaka köna anda kazawi, mi mönö netkö ösumnöŋ me Anutugö Buŋaŋe pitirik maljiraŋgöra aka qahö. Mewö kude mötmörime. ¹³ *Nanine ambösakonini Abraham, Aisak aka Jeikob yeŋgö bem Anutunöŋ mönö Nahönŋi Jisös asakmararaŋ waŋgiiga jitŋememeni öngöŋgöŋi ahiga ölni asuhuiga ekze. Iŋini Jisös mi memba galöm yeŋgö böröŋine algetka premiö Pailötnöŋ pösatmamgö keuŋi jöhöba jiyökmö, eŋön Jisös mi yaŋgö jeŋe qaŋ köla andö qem waŋgiget.

¹⁴ * “Iŋini azi diŋdiŋi aka sarakŋi mi andö qem waŋgiba azi qeŋe azi kun pösatmapkö kapaŋ köla qeta qesiget. ¹⁵ Mewö qeta qesiba mewö mianöŋ malmalgö Toŋaŋ kömumapkö keuŋi jigetka kömuyök. Kömuyökmö, Anutunöŋ i mem guliiga kömupnöhök wahörök. Netköŋ mi jeninan eka naŋgöba jiba yaŋgö dangunu ewö kinjin. ¹⁶ Mewö kinda Jisösgö qetŋi möt narim waŋgiba maljit. Azi ki eka möt waŋgizei, mi mönö qet mianğö ösumŋan mem köhöiiga kinja. Jisösnöŋ sölölohöm netkii mötnariŋniran asuhui mianğö qakŋe kinda jim kutuziga köna gwakötŋan ölöwak teköiga iŋini körek mi ekze.

¹⁷ “O alaurupni! Jisös kömumamgö kapaŋ kölgeri, eŋön mi mönö gukmaulem qakŋe aket, mi mötzal. Nanŋini aka galömurupŋinan mewöyök yuai ak waŋgigeri, mianğö könaŋi kude möt kutuba laŋ aket. ¹⁸ Mewö aketmö, mianğö likeŋi Anutunöŋ kewö ahök: Anutunöŋ keuŋi mönöwök kezapqetok ambazipurupŋi pakpak yeŋgö jitŋine aliga qelŋiŋe kewö jiba ohoget, ‘Anutugö Amötqeŋe Toŋi Kraistnöŋ mönö sihimbölö mötma.’ Mianğöra iŋini mewö aketka Anutugö keu mianöŋ

* **3:13:** Eks 3.15 * **3:14:** Mat 27.15-23; Mak 15.6-14; Luk 23.13-23; Jon 19.12-15

mönö mewö ölnambuk ahök. ¹⁹ Mianğöra mönö uruñini melenđa Anutugören lilingöba kagetka sinğisöndokñini kutuba sanğonma.

²⁰ “Anutunöñ oyaenköyaen Tonji akza. Injini öne lañ malbepuköra Anutunöñ Jisös qeljiñe möwölöhöyök. Mianğöra injini mönö uruñini melenğetka Amötqeçe Tonji Kraist melaiiga engören kaiga yambuk qekötahögetka malmalñinan guliiga oyaenköyaen nalöñinan kam kuñguma. ²¹ Anutunöñ möpñanğö möpñe könahiba keuñi kezapqetok ambazipurupñi tük-kutukutuñi pakpak yengö jitñine aliga qeljiñe kewö jiba malget,

‘Anutunöñ Amötqeçe Tonji anğön köl wañgii Suep mire tata mali yuai pakpak kunbuk arengöba kölönaimawi, mönö nalö mianğörenök melaiiga Suep mosöta etma.’

Jisösnöñ keu mianğö dop eta nengören kayök.

²² *Mosesnöñ kewö jii mötket,

‘Kembu Anutunöñ Juda kambu engö sutñineyök kezapqetok azi kun mem guliiga wahöta Moses ni ewö akña.

Yañön ipñina kinda engöra keu jimawi, mönö mi pakpak kezap ala möta tem köla malme!

²³ *Kunñan kun kezapqetok azi mianğö keuñi qahö tem kölmawi,

Anutugö könagesö enñon mönö yañğö keuñi jim teköba ayuhum wañgime.’

²⁴ Kezapqetok ambazip Samuelgörenök könahiba kota keu jigeri, mienñon mönö körekmakörek mewöyök kezapqetok keu nalö kewöñe ölnambuk akzawi, mia qeljiñe jiba malget.

²⁵ *Anutunöñ ambösakonurupnini yembuk jöhöjöhö arenji aka Abrahamğöra kewö jii mörök,

‘Göhö gwölönarökurupki yengörenök kunñan ahuba wahötmawi, Anutu nöñon mönö yañğöra aka gölmegö ambazip kambuñi kambuñi pakpak kötuetsköm engibi oyaenköyaen akña.’

Anutunöñ jöhöjöhö keuñi indeli kezapqetok ambazipnöñ mi toroqeba jim köhöiba malgeri, mi mönö engöra aka ali ahöza. ²⁶ Anutunöñ Nahönñi mem guli wahöri kötuetsköm engimapköra melaiiga mutuhök engören erök. Mianğöra mönö dölkü uruñini melenđa nanñik nanñik malmalñinanğö köna bölöñi andö qeme. Mewö aka oyaenköyaen akña.” Mewö jiyök.

4

Pitö Jon yetkön jike kaunsöl kambunöñ kinohot.

* 3:22: Dut 18.15, 18 * 3:23: Dut 18.19 * 3:25: Jen 22.18

¹ Pitö Jon yetkôn ambazip kambu yeŋgöra keu mewö jiyohotka jike nup galöm yeŋön, jikegö kiripo galöm bohonjan aka Sadyusi (Jike nupkö kapankölköl) yeŋön wahöta jenjire kaŋgotket. ² Gwarekyahötjan ambazip kambu kusum enjiba kewö jiyohot, “Jisösnöŋ kömupnöhök wahörök. Miangö dop kömugeri, yeŋön mewöŋanök guliba wahötme.” Mewö jiyohotka uruŋini böliiga yetköreŋ kaŋgotket. ³ Kaŋgota etkömembra miri söŋauyöhaŋgöra aka kösö mire al etkiba jiget, “Miri gianjiigun keu jakenje al etkibin.”

⁴ Mewö jigetmö, Buŋa keuŋiri mötkeri, yeŋgöreŋök jesöŋgöŋan uruŋini melenja Jisös möt nariget. Möt narigeri, yeŋgö jaŋgöŋinan qariiga 5000:gö dop aka malget.

⁵ Miri gianjiiga galömkölköl aziurupŋini, Juda yeŋgö jitŋe memeurupŋini aka Köna keugö böhi yeŋön Jerusalem tokoget.

⁶ Tokoba jike nup galöm bohonji qetŋi Anas yaŋön sutŋine tarök. Mewöyök Kaiafas, Jon, Aleksander aka jike nup galöm bohonjaŋgö saiwaurupŋi tosatŋi pakpak mi mohotŋe tatket.

⁷ Tatketka Pitö Jon etkuaŋgita jeŋine al etkiget kinohotka kewö qesim etkiget, “Etkön mönö denöwö ahot? Dagö qetŋi qerohotka ösumŋi etkualöŋni letorök?”

⁸ Qesim etkigetka Uŋa Töröŋan Pitögö uruŋi kokolak qei kinda kewö jii mötket, “Kantrigö galömkölköl azi aka jittjememeurupŋini, mötket! ⁹ Niri lokon azi denöwö alabauk ak waŋgiziga könaŋi guliba ölöwahök, merak mewö qesim netkize. ¹⁰ Miangöra miangö likepŋi mi ölöp jibiga iŋini aka Israel ambazip könagesö pakpak mötme. Enön Nazaret azi Jisös, Amötqeŋe Tonini maripomnöŋ qegetmö, Anutunöŋ i mem gulii kömupnöhök wahörök. Jisös qetŋaŋgö ösumŋan mönö azi ki möhamgöiga enjögö jeŋine ölöwaka kinja. ¹¹ *Keu kun kewö,

‘Miri meme azinöŋ köt tandö kun andö qeba mosötketmö, Anutunöŋ mi aliga ain tandö kömbönaŋi bohonji akza.’
Ain tandö bohonji mi Jisös.

¹² “Jisös mohotnöŋ mönö amöt qem neŋgiza. Qet kun köuluköinga mi osimemö, Jisösgö qetŋan mönö dop kölja. Anutunöŋ qet kun Suepkö bapŋe qahö neŋgiiga ahöza. Qahö! Qet mohot mi qeta letota Suepkö buŋaya akin.”

¹³ Mewö jim teköiga tandökŋiri eka kewö jiget, “Azi yahöt ki-
etkön mötmöt mire qahö öngöba töndup keu köhöikŋi köhöikŋi
jiba awösamkakak kinda suahö ewö akzahot.” Mewö jiba
köŋkuŋ aka welipköba könaŋiri möt kutuba jiget, “Alakŋa! Azi
yahöt mietkön mönö Jisösbuk mala letorohot.” ¹⁴ Könaŋiri
möt kutuba jiba lokon azinöŋ ölöwaka yetpuk kinöhi, mi
eka keuŋiri qeapköbingö osiget. ¹⁵ Mi osiba jike kaunsöl

* 4:11: Sum 118.22

kambu engömosöta yaigep gemahotkö jim kutuget geyohotka nanjınök keu jaruba goro aket.

¹⁶ Goro aka jiget, “Nini azi yahöt ki mönö denöwö ak etkibinto? Yetkön jim kutuyohotka angöletot qainji kun asuhuyöhi, mi Jerusalem körek pakpak yejön möt teköze aka nini mi mewöyök qaş kölbıngö osızın. ¹⁷ Mi osızınmö, miangö keuñi ambazıp sutñine kunbuk sehiba anbapuköra mönö ölop kewö jim kutum etkiinga dop kölma, ‘Injiri mönö Jisösgö qetnöñ keu kunbuk kude jimahot.’ Mewö jiba köhöikñanök jim qetal etkiinga sörauyohotka kunñan kun mi qahö möri teköma.”

¹⁸ Mewö jim jöhöba etkoholget öngöyohotka kewö jim kutum etkiget, “Injiri mönö Jisösgö qetnöñ keu kun kude toroqeba jiba ambazıp kusum engimahot.” Mewö jiba sonjo köhöikñi al etkiget. ¹⁹ Mewö jim kutum etkigetmö, Pitö Jon yetkön melenđa kewö jiyohot, “Netkön engö jimkutukutuñini tem kölbitköra Anutugöreñ keu memba et aljiga omanjı akapuk. Mi Anutugö jemesoholñe dop kölja me qahöwi, mi mönö nanjınak kewöta jiba jöhöme! ²⁰ Mewö me mewö jiba jöhöbeakmö, netkön yuai eka möriri, mi köyatıba keu bök malbirangö dop qahö.”

²¹ Mewö jiyohot mötketka ambazıp körekñan angöletot asuhuyöhi, miangöra Anutu möpöseiget. Mewö möpöseigerangöra aka “Likepñi denöwö ak etkibınak?” jiba köna kun qahö miwikñaiget. Qahö miwikñaıba galöm meme keu köhöıba jim etkıba etkömosötke erohot. ²² Angöletot asuhuıga lokon azi ölöwahöhi, mi (yara) yambuñi 40 lök onğita malök. Miangöra mönö Anutu gwötpuk möpöseıba malget. Mewö.

Mötnarıp yejön köuluköba kin köhöiget.

²³ Jike nup galöm bohonñi aka jıtñememe yejön Pitö Jon galöm meme keu jim etkıba etkömosötke nanjiri alaurupñiri yengöreñ lilingöba anohot. Anda keu pakpak jigeri, mi jiyohotka mötket. ²⁴ *Mi jiyohotka möta urumohot aka uruñini qezaköba jölñini memba wahöta Anutu kewö köuluköm wanğiget, “O Kambu öngöngöñi ketanji, göñön Suep, gölme, köwet aka yuai pakpak miengöreñ ahözawi, mi miwikñaim engıba Tonjına akzan. ²⁵ *Göñön mönöwök nangi Uña Töröñi melainöñ eta nup azigi Deiwid, neğö ambönini yangö numbunje keugi ali göhö jıtki memba kewö jiyök, ‘Urumelengö kopa yejön mönö wuanöngöra göjuñi göjuñi memakze?

Kantrıñi kantrıñi yejön mönö denöwögöra aka mötmöt omanjı omanjı mötmörimakze?

* 4:24: Eks 20.11; Neh 9.6; Sum 146.6

* 4:25: Sum 2.1-2

26 Gölmeḡo kiŋ kembuŋi kembuŋi yeŋön gölmeŋinaŋḡo dop wahörakze.

Pom jembonŋi jembonŋi yeŋön mindiriba tokomakze. Mewö qeburuŋ yöhöi Kembu aka yaŋḡo Amötqeqe Tonji qetal etkimakze.'

27* Ölna, keu miangö dop siti kiangören asuhuyök. Gi Nahöŋgi Töröŋi Jisös kuŋgunöŋga Amötqeqe Tonina akza. Yaŋön asuhuiga azi kembu yahöt Herod aka Pontius Pailöt yetkön Rom gawman galöm aka nanine Israel isikurupnini yembuk mindiriba totoko ala tuarenjoŋ ak waŋgiget. 28 Gi nangak ösumgi aka jitkahö dop yaŋḡora yuai asuhumapkö keuŋi jiba qeljiŋe jöhöba areŋḡönöŋ. Yeŋön yuai mi ak waŋgigetka keu areŋ pakpak mi mewö ölnambuk ahök.

29 "O Kembu, nini gi welen qem gihiinga merak galöm meme keu neŋgizei, gi mönö mi eka naŋḡöm neŋginöŋga ölp göhö Buŋa keugi suahö ewö awösamkakak kinda jiba malbin. 30 Göŋön mönö börögi surunöŋga kawöl ambazip mi Nahöŋgi Töröŋi Jisösgö qet ösumŋe ölöwakŋe aka aŋḡoletot aiwesök murutŋi murutŋi asuhumakŋe. Keu mi ölna."

31 Mewö köulukögetka miri tokoba tatkeri, gölme mi memenjaliba utuköiga Uŋa Töröŋan körek pakpak uruŋini kokolak qeiga anda suahö ewö awösamkakak kinda Anutugö Buŋa keu jiba malget. Mewö.

Mötnarip ambazipnöŋ uru jöhöm aŋguget.

32* Urumeleŋ kambu ketanji yeŋön urumohot aka mötmöt mohot aka malget. Yuai pakpak ahöm enḡiyöhi, mi göhöreŋök me nöŋḡoreŋök, mewö qahö jigetmö, yuai pakpakŋini mi mutulaŋḡöba mohot aiga malget. 33 Mewö malgetka Anutugö ösumŋan eŋgualöŋniga köhöigetka aposol yeŋön jitŋini memba dangunu ewö kinda Kembu Jisösnöŋ kömupnöhök guliba wahöröhi, keu mi naŋḡöba jiba malget. Mewö malgetka Anutunöŋ kalem möriamŋi ketanji mokom enḡiiga ambazipnöŋ göda qem enḡiget. 34 Mewö malgetka miangö dop sutŋine kuŋŋan yuai kuŋḡora qahö mözöröŋḡöba osiba malök. Körek pakpak nene nupŋi nupŋi aka miriŋi miriŋi miengö tonji akeri, yeŋön mi bohonŋi memegöra alget. Mewö algetka söŋḡöröŋi moner kaiga mi memba kaget. 35 Memba kaba aposol yeŋḡo böröŋine algetka körek pakpak mözöröŋḡöba osigeranḡo dop mi sutŋine menderda enḡiba malget.

36 Azi kuŋ qetŋi Josef, aposol yeŋön qetŋi Barnabas qetkeri, mi nanine keunöŋ: Uru naŋḡonaŋḡo azi, yaŋön gölme jölanŋi qetŋi Saiprus miangören asuhaba qariba jike nup azia (Liwait) malök. 37 Yaŋön mewöyök nene nup gölmeŋi

* 4:27: Mat 27.1-2; Mak 15.1; Luk 23.1, 7-11; Jon 18.28-29 * 4:32: Apo 2.44-45

bohonji memegöra ali monen kaiga söngöröni mi memba aposol yengören kaba böröjine alök. Mewö.

5

Ananias Safaira yetkörenj tilipqilip

¹ Mewö aka malgetmö, azi kun qetnji Ananias anömni qetnji Safaira yetkön nup gölmenjirangö bahöni bohonji memegöra alohot. ² Alohotka söngöröni kaiga azinöni monen bahöni nanjanjgöra anjön köla asamböri anömnan mi möt teköi bahöni kun memba kaba aposol yengö böröjine alök.

³ Böröjine alökmö, Pitönöni kewö jiyök, “O Ananias, gi mönö wuanöngöra Satan qahö qetalnönga urugi kokolak qeza? Yanjön urugi kokolak qeiga gönjön esapköba Uña Töröni isimkakalek ak wangiba nup gölmegö monen bahöni anjön köla asambötzan? ⁴ Gi mianjögö toni aknöni, nalö mianjögören mi nangi bujaya ahök me? Aiga nup gölmegi bohonji megetka söngöröni kayöhi, monen mi mönö göhö bujaya ahök me? Gi mönö wuanöngöra urugan keu jöhöba yuai ki akzan? Gi munen jiba mewö mianjön ambazip qahö tilipköm nenjizanzmö, Anutu nanji mönö tilipköm wangizanz!”

⁵ Mewö jiiga keu mi möt sasaba tala gölmenöni geba kömuyök. Mewö kömuiga ambazip pakpak mianjögö buzupni möta sömbu mötmöt ketanji aket. ⁶ Kömuiga azi gwabö yenjön kota qamötjni memba esuhuba anjuba anda löm kölget.

⁷ Aua karöbut teköiga anömnan yuai asuhuyöhi, mi qahö möta kayök. ⁸ Kaiga Pitönöni anömni Safaira kewö qesim wangiyök, “Injiri nup meme gölmenjiri bahöni bohonji memegöra alohotka monen kayöhi, mi mianjögö dop me qahö? Mi jinönga mötpi!”

Qesim wangjiiga kewö melenök, “Monen mi ölnja mianjögö dop kayök.”

⁹ Mewö melenjiga jim wangiyök, “Injiri mönö wuanöngöra urumohok aka Kembangö Uña Töröni tilipköm wangizahot? Mötnöni, apkan kömuiga azinöni memba anda löm köljei, yenjön mönö nanju ki dopdowigetka kourukni mötzan. Yenjön gi mewöyök esuhuba anjum gihiba anme.” ¹⁰ Mewö jiiga mianjögörenök tala Pitögö könanje geba kömuyök. Kömuiga azi gwabö yenjön kota qamötjni miwiknaiba memba anjuba anda anjanjögö qöhöröne löm kölget. ¹¹ Löm kölgetka urumelenj kambu jömukni yenjön möta awöwöligetka buzupni sehiiga körek pakpak mötketka sömbu mötmöt ketanji aket. Mewö.

Aposol yenjön ambazip gwötpuk mem ölöwak enjiget.

¹² Mewö aketka Anutugö kukösumnan aposol inahöm enjiiga nup memba böröjini ambazip qaknjine algetka Anutunöni aiwesök anjögöletot meiga sutnjine gwötpuk asuhuget.

Ambazip Jisös möt narigeri, körek yeñön jöwöwöl jikegö tohon uruñe öngöba kiñ Solomongö sombem söranñambuknön tokoba kambu mohot aka malget.

¹³ Mewö tokoba malgetka ambazip tosatñan kenğötnjini möta ziriñziriñ aketka kunñan totokonjine qahö öngöyök. Mewö qahöpmö, ambazip kambu yeñön göda gwötpuk qem engiba malget. ¹⁴ Mewö tokoba malgetmö, töndup ambazip sehisehiñi yeñön kambuñini toroqem engiba malget. Azi aka ambi kambuñi kambuñi yeñön Jisös möt nariba uruñini melengetka kambuñinan qariba sehiyök. ¹⁵ Aposol yeñön nup mewö megetka ambazip sehisehiñan ölöwaket. Mewö ölöwakeranğöra aka tosatñan kawöl ambazip enğuanğita kululu köla anğuba köna gorañe mewöyök dum möhamğöba möki tumbula miangğoreñ al engiba kewö jiget, “Pitönön kaba neñgoñgitmawi, imutimutñan mönön nalö miangğoreñ yeñğoreñök kungö qakñe öngöi ölöwakawak!”

¹⁶ Mewöyök taon aka miri Jerusalem siti liliköba tat anjei, miengğoreñök ambazip kambu gwötpukñan öröba kaget. Mewö kaba ambazip kawöl engöhöyöhi aka ömenönj töñöt memba* kölköljinjin ak engigeri, mi enğuanğita kaba kañgotket. Kañgotketka körek yeñön ölöwaket. Mewö.

Garatanönj aposol kösö mireyök enğuanğiri etket.

¹⁷ Mewö aka malgetka jike nup galöm bohonñan aka yanğö sunğurumurupñi Sadyusi (jike nupkö kapanğölköl) pati nanğöm wanğigeri, körek yeñö irimñini seholiiga urupik aket. ¹⁸ Urupik aka aposol engömemba jöhöba gawmangö kösö mire al engiget. ¹⁹ Al engigetmö, sunğem miangğoreñ ahögetka Kembugoreñ garata kunönj kösö miri nanğunji öröba enğuanğita yaigep eta kewö jiyök, ²⁰ “Mötket! Injini mönön anda jöwöwöl jikenönj öngöba ambazip jeñine kinda malmal dölöknangö könanj pakpak aukñe jigetka mötme.”

²¹ Mewö jii möta miri gianjiiga jöwöwöl jikenönj öngöba kinda Buña keu kusum engiget. Mewö kinda kusum engigetka jike nup galöm bohonñi aka alaurupñan nanğöm wanğigeri, yeñön anğota jike kaunsöl kambu aka Israel jitñememurup köl öröm engigetka mohotñe tokoget. Tokoba kinda opotöröp tosatñi aposol enğuanğitpingö melaim engigetka kösö mire anget. ²² Angetmö, i miangğoreñ qahö miwikñaim engiba öne liliñğöba kösohotñini kewö alget, ²³ “Nini ölña kösö mire anğota nanğunji köhöikñi kötökñi kölget kini wahip azinönj nanğunönj kingetka ehin. Mi ehinmö, nanğunji öröba öngöba miangğoreñ azi kun qahö miwikñazin.”

* **5:16:** Töñöt mi kewö: Ömenönj numbuñi möwöngöiga keu bök malja.

24 Mewö jigetka jikegö kiripo galöm bohonji aka jike nup galöm bohonji yeñon keu mi möta uruñini lalalulu siksauk aiga jiget, “Opopon! Merak mewö asuhuba könangep kunbuk supapköiga denöwö akapuk!” 25 Mewö jigetka kunjan kota kewö jii mötket, “Mötket, azi kösö mire al enggigeri, yeñon mönö jöwöwöl jikenöñ kinda ambazip Buña keu kusum enggize!” 26 Mewö jii mötketka jikegö kiripo galöm bohonjan opotöröp engömeiga anget. Anda “Ambazipnöñ köt gila neñgubepuk!” jiba keñgötñini möta lolonjanök jöwöwöl jikenöñ öngöba aposol enງuañgita kaget.

27 Mewö enງuañgita kaba jike kaunsöl kambu yeñgö jenine alget kingetka jike nup galöm bohonjan kewö qesim engyiök, 28 * “Injini Jisösgö qetñe keu kun kude kusum enjime! Neñon mewö jiba songo köhöikñi al enjinmö, keu miangö öñjan mönö denöwö asuhuyök? Enñon mönö toroqeba kusum enjiba mala Jerusalem siti ki Jisösgö keunöñ kokolak qegetka maljin. Aiga azi mianñon kömumba sepñi mokoiga enñon neñgöra kewö jimakze, ‘Yañgö keunjan mönö Juda neñgö qakñine öngöyöha ahöza.’ ”

29 Mewö jiyökmö, Pitö aka aposol tosattjan kewö melenget, “Neñon ambazip enḡö jimkutukutuñini tem kölbingöra aka Anutugöreñ keu andö qeinga qahö dop kölma. Qahö! 30 Anutunöñ nanine ambösakonurupninañgö bemñina akza. Injini Jisös ip kemañe möndöba qegetka kömuyökmö, Anutunöñ i mem gulii wahörök. 31 Anutunöñ i mem guliba wañgita öngöi nanñi böröñi öñje ali tatza. Euyangöreñ tari Anutunöñ siñgisöndoknini mosöt neñgimamgöra kuñgui Pom Kembunini aka Amötqeqe Tonini akza. Mewö aka Israel könagesö urumelenḡ ak neñgimamgö mötza. 32 Nini yuai mi eka keu pakpak mi nañgöba jiba dangunuñi aka kinjin. Uña Töröñjan mewöyök keu mi nañgöba jimakza. Anutunöñ Uña Töröñi ambazip jitñi tem köl wañgimakzei, mönö yeñgö uruñine ala buña qem enḡiza.”

33 Pitönöñ keu mewö juiga jike kaunsöl kambu yeñon mötketka uruñini sounöñ qesiñqesiñ ewö qesiñnök. Qesiñniga uruñini könöp jeiga aposol enḡuget kömumegö mötket. Mewö.

Gamalielnöñ alauruñi jim mölöwörim enḡiyök.

34 Mewö mötketmö, Farisi (Köna keugö kapankölköl) azi kun qetñi Gamaliel yañon jike kaunsöl kambu yeñgö sutñine tarök. Yañon Köna keugö böhi azia mali ambazip pakpak göda qem wañgigetka jitñememeñina ahök. Mewö aka wahöta aposol enḡuañgitetka yaigepñe geba borom kun mambötmegöra jim kutuyök.

* 5:28: Mat 27.25

³⁵ Mewö jim kutui gegetka jitnememe alaurupņi kewö jii mötket, “Israel aziurup, inini azi ki denöwö ak engibeak, mianğöra mönö ölöpnanök galöm mem anğume. ³⁶ Mutuk emune azi kun qetņi Teudas yaņön wahöta ‘Nöņön ketanamņina akzal,’ jiiga merak (yara) yambu tosatņi teköi maljin. Teudasnöņ mewö jiiga azi 400:gö dop yambuk öröröņ jöhöba mindiriba malgetmö, kunņan qei kömui tosatņan aziurupņi imbi köl waņgigeri, mi kuņgum engigetka buratigetka qeburuņinan pömsöm qeba qahöwahök.

³⁷ “Yaņgö andöņe Galili azi kun qetņi Judas asuhuyök. Yaņön takis memegöra ambazip qetņini ohoba areņgögeri, nalö mianğöreņ asuhuyök. Asuħuba ambazip mölöwörim enjiiga karim akņegöra suņgurum alabaukurupņi aket. Mewö aketmö, i mewöyök qegetka kömuyök aka tosatņan suņgurumurupņi imbi köl waņgigeri, mi kuņgum engigetka buratiget. ³⁸ Mewö aiga nöņön kewö jibi mötket: Inini mönö azi kiengö silenine yuai laņ kude akņe. Yeņön nup ki megetka qeburuņ ahuzawi, mi gölme ambazipkö mötmöt areņineyök ahuza ewö, mi mönö sohoba pömsöm qeba qahöwakņa. Mianğöra i mönö engömosötketka etme. ³⁹ Mi qahöwakņapmö, Anutugö mötmöt areņnöhök ahubawak ewö, eņön mönö qeburuņ mi jöhöbingö osime. Inini Anutu nanņi qetala tuarenjoņ ak waņgiba malbepuk. Nanņini könanņini mewö miwikņaibepuköra mönö galömnņini mem anğume!”

⁴⁰ Gamalielnöņ mewö jiiga goro keuņi anğön köla wuatangöget. Mi wuatangöba aposol engoholget kotketka opotöröpköra jigetka raukapaņ (raurapaņ) mem engiget. Raukapaņ mem engigetka jike kaunsöl kambu yeņön aposol mi Jisösgö qetņe keu kun toroqeba jibepukö songo köhöikņi al engiba “Eta anme,” jiget.

⁴¹ Mewö jigetka jike kaunsöl kambu mosöta anget. Könanöņ anda kewö jiget, “Jisösgö qetköra aka qetbuņanini mewö mem sohozei, mi Anutunöņ mötza. Yaņön nini sihimbölä mewöņi mötpinangö dop möta neņgehiga ölöp dop kölja.” Mewö jiba uruņinan mianğöra ölöwahiga söņgaiget. ⁴² Söņgaiba nup toroqeba memba silim dop jöwöwöl jikenöņ öņgöget aka miriņi miriņi mianğöreņ anda Buņa keu kusum engiba malget. Jisösnöņ Amötqeqe Tonji Kraist akzawi, yeņön mianğö Ölöwak Buņaņi jiba mianğön ambazip uruņini kuņguba malget. Mewö.

6

Nupbauk azi (dikon) 7 meköm enjiget.

¹ Gwarek jaņgöņinan qariba öņgöiga Juda ambazip kambu yahöt aka malget. Tosatņan kantri tosatņeyök kaba Grik keu jiget aka tosatņan nanņine gölmeņine mala kota Arameik

aka Hibru keu jiget. Mewö malgetka nalö mianğoreŋ gora-nora (noragora) asuhuyök. Grik keu jigeri, yeŋön kewö jigetka böliyök, “Aposol yeŋön nalö dop nene inap menden neŋgimakzemö, Grik keu ambi malö neŋgö nene inap bahöŋi mi bahösapsap neŋgimakze. Öroröŋ qahö misigetka qahö dop kölja.”

² Mewö jigeranğöra aka aposol 12 yeŋön gwarek kambu köl öröm eŋgiget tokogetka kewö jiget, “Neŋön silegö nup memba nene menden da eŋgiba Anutugö Buŋa nupköra nalönini ölop qahö dop köli urugö nupninan etpapuk. Mi kude dop kölja. ³ Mewögöra alaurupnini, mötke! Eŋön mönö nanŋini sutŋineyök nupbauk miwikŋaim eŋgime. Uŋa Töröŋan azi uruŋini kokolak qeiga Anutunöŋ mötkutukutuŋi qainŋi kun al eŋgii qetbuŋa ölopŋi memba kinjei, mönö azi mewöŋi 7 meköm eŋgime. Mi meköm eŋgigetka nup mi eŋgiinga mi galöm köla memba malme. ⁴ Yeŋön mewö malmemö, naninak nalö jömukŋanök köuluköba Anutugöreŋ Buŋa keu jegep kinda jim sehiba malbin. Nup mianğoreŋ mönö pöndaŋ kinbin.”

⁵ Mewö jigetka kambu pakpak yeŋön “Ölop dop kölja!” jiget. Mewö jiba azi qetŋi Stiwen meköget. Stiwen mi Anutu köhöikŋanök möt narim waŋgiiga Uŋa Töröŋan uruŋi kokolak qei malök. Toroqeba azi kewö meköba möwölöhöm eŋgiget: Filip, Prokorus, Nikanor, Timon, Parmenas aka Nikolas. Nikolas mi kian kantrigö siti qetŋi Antiokia mianğoreŋ ahuba könaŋep Juda azia aka uruŋi Kraistköreŋ melenök. ⁶ Mi meköba möwölöhöm eŋgigetka aposol yeŋgö jemesoholŋine öŋgöm angetka böröŋini nöropŋine ala köuluköba kötuatköm eŋgiget.

⁷ Anutugöreŋ keu jim sehigetka töhötmöriamŋambuk aiga gwarek yeŋgö jaŋgöŋinan Jerusalem sitinöŋ qariba sehiyök. Jike nup galöm yeŋgö kambunöhök sehisehiŋi yeŋön mewöyök uruŋini melen da Jisös möt nariget. Mewö.

Stiwen meraköba memba jöhöget.

⁸ Anutugö kalem möriamŋi aka kukösumŋi mianön nupbauk azi Stiwegö uruŋi kokolak qei kinda aiwesök aŋgöletot ketanŋi ketanŋi mi ambazip sutŋine mei asuhuget. ⁹ Mi asuhugetmö, Juda tosatŋan wahöta Stiwen aŋgötuarenjoŋ ak waŋgiget. “Lolohoba kageranğö köuluk miri kambu”^{*} yeŋgö sutŋine Juda tosatŋan Sairini aka Aleksandria Ijipt siti yahöt mianğoreŋök liliŋgöba kaba kinget. Azi mewöŋan mindiriba

^{*} **6:9:** Köuluk miri kambu kungö qetŋi mi kewö asuhui qetket: Ambazip pomŋi yeŋön tosatŋi bohoniŋini eŋgömegetka buŋaŋini aka tonjaŋgö welenŋini öne qeba mala (sleiw) böröŋineyök lolohoba kageri, yeŋön mönö nanŋini köuluk miri kambuŋini ala qetŋini mi mewö qetket.

wahöta Silisia aka Eisia prowinsnöhök kageri, yeŋgö kambunöhök Juda azi tosatŋi enġömemba mohotŋe Stiwenbuk möndönġa goranora aka jitrakölik erauġet.

¹⁰ Mewö jigetmö, Uŋa Töröŋan Stiwen sölölohöi mötkutukutu ketanġö qakŋe keuŋi melenġa jiyöhi, mi Juda yeŋön qeapköbingö osiba etket. ¹¹ Osiba eta mömölaköba anda azi tosatŋi miwikŋaiba kuŋgum enġiba kaba kewö jiget, “Yaŋön mepaqeapaik keu jiba mianŋön Moses aka Anutu qetal etki mörin.”

¹² Mewö jiba anda ambazip kambu, yeŋgö jitrjememe aka Köna keugö böhi miengö urugege keu jigetka uruŋini könöp jeyök. Könöp jeiga kölölohoba kaba Stiwen öröba meraköba memba jike kaunsöl kambu yeŋgö jeŋine anġet. ¹³ Anda azi tosatŋi enġuanġitketka kota Stiwenġö silenġe keu muneŋi ala kewö nanġöba jiget, “Azi kianŋön mönö jöwöwöl jikenini aka Mosesġoreŋ Köna keu tuarenjön aka qahö mosörakzapmö, mi toroqeba jimahakza. ¹⁴ Tuarenjön aka kewö jii mörin, ‘Jisös, Nazaret azinöŋ mönö jöwöwöl jike ki köndenġiga qeġelanġan ahöma aka Mosesnöŋ Köna keu neŋgii ahözawi, mi uteköma.’ ”

¹⁵ Mewö jigetka jike kaunsöl kambuġö totokonöŋ tatkeri, yeŋön körekŋan Stiwen törörök uġetka kaisönġolomŋan Suep garata tandök ewö ahiga eka mötket. Mewö.

7

Stiwenöŋ keu likepŋi melenġa jii mötket.

¹ Stiwen keu jakeŋe al waŋġigetka kini jike galöm bohönŋan kewö qesim waŋġiyök, “Keu mi ölna me muneŋa?”

Stiwenöŋ Abrahamġö kösohotŋi jiyök.

² *Qesim waŋġiiga likepŋi kewö melenġnök, “Aziurup, iwi darumuni, nöŋön kewö jibi mötket: Nanine ambönini Abrahamnöŋ Mesopotemia gölmenöŋ maliga asakmararaŋ Toŋi Anutu yaŋön asuhum waŋġiiga Mesopotemia mosöta Haran mirinöŋ anda malök. ³ Anutunöŋ kewö jii mörök, ‘Gi nangi miri gölmeġi aka tinitosolomurupki enġömosöta gölme kun kondel gihimami, mönö miangöreŋ anda malman.’

⁴ *Mewö jii möta Kaldia gölme mosöta Haran gölmenöŋ anda malök. Miangöreŋ mali iwiŋan kömui Anutunöŋ melaim waŋġiiga iŋini nalö kewöŋe ki maljei, mönö gölme kianġöreŋ kaba könahiba tata malök. ⁵ *Gölme kianġöreŋ tata maliga Anutunöŋ gölme kitipŋi borom kun köna tambönġö dop mi qahö buŋa qem waŋġiyök. Gölme kianġö toŋi qahöpmaöhöp

* 7:2: Jen 12.1 * 7:4: Jen 11.31; 12.4 * 7:5: Jen 12.7; 13.15; 15.18; 17.8

qahöpmö, Abrahamgö gwölönarökñi qahö ahuiga Anutunöñ nalö mianğoreñök yangö keu qeljiñe kewö jiba jöhöyök, 'Nöhön gölme ki mi gi aka göhö andöge gwölönarökurupki ahumei, mönö engöra engibi mianğö tonji akñe.'

6 *Mewö jiba toroqeba keu kewö jiyök,

'Göhö gwölönarökurupkan gölme kungen anda kian aka malme. Kian aka malgetka gölme mianğö tonji yeñön jöhöm engigetka tonjinanğö welenniñi öne qeba malme. Mewö malgetka tulungöm engigetka nup lömbötñi lömbötñi öne megetka söngöröñi qahö engigetka (yara) yambu 400:gö dop wahöjalin çakñe malme.

7 *Mewö malmemö, nöñön könanğep gölme ambazip welenniñi qeba malmei, mi keunöñ ala jim teköm engimam.'

Mewö jiba toroqeba jiyök,

'Mewö asuhuiga gwölönarökurupkan gölme mi mosöta gölme kianğoreñ lilingöba kaba waikni memba möpöseim niñgiba malme.' Mewö.

Aisak, Jeikob aka Josef yeñgö kösohotñini jiyök.

8 *"Anutunöñ Abrahamgöra mewö jiba aiwesök kewö akñegöra jii mörök, 'Inini nömbuk jöhöjöhö akñegöra mönö nöngö aiwesök esöñini köla azi silenine yandiba malme.' Mianğö dop Abrahamnöñ nahönñi Aisak ahuiga silim 8 aiga mianğoreñ aiwesök mi silene yandiyök. Aisaknöñ nahönñi Jeikob qiwikñaiba aiwesök mi yandiyök aiga Jeikobnöñ nahönurupñi qiwikñaim engiba mianğö dop yandim engiyök. Jeikobkö nahönurupñi 12 yeñön Israel neñgöreñ ambösakonurupnina aket.

9 *"Ambösakonurupninan munñini Josef mi andö qem wañgiba bohönñi memegöra algetka tosatñan söngöröñi memba wañgita Ijpt kantrinöñ anda algetka malök. Mianğoreñ malökmö, Anutunöñ yambuk kinök. 10 *Yambuk kiniga köñjilin könañi könañi çakñe öngöi möröhi, körek miengöreñök mönö meköm wañgiyök. Meköm wañgiba kalem möriamñi wañgii mötkutukutuñi ölopñan asuhuyök. Mi asuhuiga Ijpt kantrigö farao kiñ yangö jeñe anğori ehi dop köliga azi kembu kuñgum wañgii Ijpt kantri aka farao kiñgö jakömbuak miri yuaiñi galöm köl engiba malök. 11 *Galöm köl engiiga bödi nalöñi kam kuñguiga Ijpt pakpak aka Kenan gölme mi dop kölök. Mianğöra ambazipnöñ kahasililin

* 7:6: Jen 15.13-14 * 7:7: Eks 3.12 * 7:8: Jen 17.10-14; 21.2-4; 25.26; 29.31-35.18 * 7:9: Jen 37.11, 28; 39.2, 21 * 7:10: Jen 41.39-41 * 7:11: Jen 42.1-2

ketaŋi möta malget. Mewö mala nanine amböurupninan nene miwikŋaibingö meme yaŋgap meget.

¹²“Mewö megetka ‘Ijpt gölme mianğöreŋ padi ahöza,’ mewö jigetka Jeikobnöŋ mörök. Mewö möta nahönurupŋi, nanini amböurupnini mi nalö mutukŋi melaim engii mianğöreŋ anget. ¹³*Mewö anda mala liliŋgöba iwiŋinangöreŋ kaget. Könaŋgep indimŋi kun kunbuk angetka Josefnöŋ könaŋamŋi indeli mötket. Mötketka farao kiŋnöŋ mewöŋanök tinitosolomŋi engeka könaŋini möt kutuyök. ¹⁴*Möt kutuiga Josefnöŋ keu ala iwiŋi Jeikob aka tinitosolomurupŋi pakpak mi köl öröm engii yaŋgöreŋ anget. Ambazip angeri, yeŋgö yaŋgöŋini mi 75 ahök.

¹⁵*“Jeikob mewö waŋgitketka Ijpt gölmenöŋ anök. Anda mala mianğöreŋ kömuyök. Amböurupninan mewöyök kömum teköget. ¹⁶*Kömum tekögetka qamöŋŋini memba aŋguba Kenan gölmenöŋ liliŋgöba Sekem mire kaba löm köl engiget. Mönöwök Abrahamnöŋ Sekem (Sikem) mala gölme kun azi qetŋi Hamor yaŋgö gwölönarökurupŋi yeŋgöreŋök monenŋnöŋ söŋgöŋi meyöhi, mönö mianğö qaksiriŋe köt köteŋ urorohoba mianğöreŋ al engiget.” Mewö.

Mosesnöŋ Ijpt kantrinöŋ ahuba mala korök.

¹⁷*Stiwenöŋ toroqeba kewö jiyök, “Anutunöŋ mönöwök jöhöjöhö keu Abraham waŋgiyöhi, mi öŋambuk akŋapakö nalöŋi töriba dopdowiyök. Dopdowiyöhi, mianğö dop Israel yeŋön Ijpt gölmenöŋ ahum sehiba malgetka kambuŋinan qariba öŋgöyök. ¹⁸Qariba öŋgöiga farao kiŋ kunöŋ wahöta könahiba Ijpt galöm köl engiyök. Kiŋ dölökŋi mianğön Josefgö könaŋi mi qahö möta malök. ¹⁹*Yaŋgö könaŋi kude möta nanini könagesö mi isimkakalek qakŋe tilipköba amböurupnini mulumgöm engii malget. Mewö malgetka kiŋnöŋ köhöiba Israel kewö jim kutum engiyök, ‘Inini mönö morö azi sepsepŋini memba yaigepŋe anda onöŋ gilgetka geba kömume.’

²⁰*“wö jiiga nalö mianğöreŋök morö kun qetŋi Moses asuhuyök. Anutunöŋ i eka möri dop kölök. Mosesnöŋ ahuiga iwinamŋan i köiŋ karöbut mianğö dop miriŋire galöm köla malohot. ²¹*Köiŋ karöbut mi teköiga namŋan waŋgita yaigepŋe anda köndenöŋ o qakŋe ala mosörök. Mosöta ani farao kiŋgö böratŋan miwikŋaiba meiga nahönŋi aiga galöm köl waŋgii malök. ²²Mewö maliga Ijpt yeŋgöreŋ mötmöt aka aiaka pakpak mi kusum waŋgigetka mianğö dop Ijpt yeŋgöreŋ

* 7:13: Jen 45.1, 16 * 7:14: Jen 45.9-10, 17-18; 46.27 * 7:15: Jen 46.1-7; 49.33 * 7:16: Jen 23.3-16; 33.19; 50.7-13; Jos 24.32 * 7:17: Eks 1.7-8 * 7:19: Eks 1.10-11, 22 * 7:20: Eks 2.2 * 7:21: Eks 2.3-10

mötkutukutu azi ketanji ahök. Yanjön keunji aka ahakmemenji mi ösum-mumu qaknje jiba aka malök.

23 **“Mosesgö (yara) yambuñi 40 teköiga mianğörej Israel darumunurupñi yeğö prowinsnön anda engekñamgö mötmöriba keunji jöhöba anök. 24 Anda Ijpt azinön Israel azi kun yambuk öne töhön anğururuk aka öröm ureim ak wañgiba qeyöhi, mi ehök. Mi eka anda Israel azi mi bauköm wañgiba andöñe anda likepñi melenđa Ijpt azi mi qeba qem kömuyök. 25 Qem kömuiga Anutunön Mosesgören nariba Israel ambazip farao kiğö böröñeyök meköm enğimamğöra kukösum wañgii kayök. Yeñön Moses eka könañi mewö ölop möt asarize, mewö mötmöriyökmö, yeñön mi qahö möt asariba öne tönpin malget.*

26 *“Miri gianağa kunbuk yeğörej ani Israel azi yahötñan auyohotka etkehök. Etkeka esapköba sutñire luai ahumapkö möta kewö jiyök, ‘Azi yahöt, injiri darumuna. Nanñiri mo-hot mianön mönö wuanöngöra mewö ayuhum anğuzahot?’ 27 Mewö jiyökmö, azinön alañi mem bölim wañgiyöhañön mönö Moses könöpuk utala kewö jim wañgiyök, ‘Gi mönö neğörej galöm aka jimtekötekö azia akzan me? Dañön mewö kuñgum gihiğa kinjan? 28 Gi uran Ijpt azi qenön kömuyöhi, mönö mewö ni nuñgumamğöra jizan me?’*

29 **Mewö qesim wañgiğa keu mianğöra aka Ijpt kantri mosöta ölöñ köla Midian gölmenön anda kiana malök. Mewö mala ambi memba nahönyahötñi yahöt qiwikñaim etkii malget.” Mewö.*

Mosesnön gölme qararañkölkölñe yambu 40 malök.

30 **Stiwenön keu toroqeba kewö jiyök, “Mewö malgetka (yara) yambu 40 teköiga mianğörej Mosesnön gölme qararañkölkölñe liliköba kundunji qetñi Sainai mianğö könañe mali Suep garata kunñan asuhuyök. Mi ip köhösö kemañe könöp bölam asuha qahö jem kutuyöhi, mianğörej asuhum wañgiyök. 31 Mewö asuhum wañgiğa tandök mianğöra welipköba könañi eka möt kutumamğöra kösutñe ani Anutugörenök keu kun kewö kai mörök, 32 ‘Nöñön göhö ambösakonurupki yeğö Anutunina akzal. Nöñön Abraham, Aisak, Jeikob yeğö Kembunina mala kota maljal.’ Mewö jii möta jönömñi könahiba unduiga mianğörej göröken uba ekñamgö keñgötñi mörök.*

33 *“Keñgötñi mörökmö, Kembunön kewö jii mörök, ‘Gölme tiba kinjani, mi gölme kömbukña. Mianğöra gi mönö köna esugi qeköman! 34 Nöngö ambazip kambu-urupni Ijpt maljei, mi mulumgöm enğigetka sihimbölö qaknje aum-möriba malje. Nöñön mi eka maljal. Yeñön osongom enğui sahöt uletzei,*

nöñön mi möt teközal. Nöñön yeñgö böröñineyök meköm enjimamgöra etzal. Mianğöra gi mönö dölki wahöta ki kanöñga melaim gihibiga Ijpt anman!' Mewö jiyök."

Mosesnöñ Israel enğuanğiri yambu 40 könanöñ malget.

35 *Stiwenöñ keu toroqeba kewö jiyök, "Yeñön Moses qañ köla köndat wañgiba kewö jiget, 'Gi mönö galöm aka jimtekötekö azia akzan me? Dañön mewö kuñğum gihiiga kinjan?' Mewö qañ köla jigetmö, Anutunöñ Moses mi melaim wañgiiga yeñgö pom kembuñina ahök. Suep garatanöñ ip köhösönöñ bölam jeyöhañğoreñ asuhum wañgiyöhi, yañön mönö Anutugöreñ buzup keu mi memba kaba uruñi kuñgui mekömekö aziñina ahök. 36 *Israel mekömekö aziñina aka ambazipurupñi mi aiwesök aņğöletot könañi könañi memba Ijpt kantrinöhök meköba enğuanğiriga mosöta Köwet Pisikñi mianğöreñ kaget. Emu kagetka mianğöreñ aka gölme qararañkölkölñe mewöñanök toroqeba aiwesök aņğöletot murutñi murutñi mi (yara) yambu 40 mianğö uruñe memba kondeli eka malget. 37 *Mosesnöñ pom kembuñina mala Israel könagesö yeñgöra kewö jiyök, 'Anutunöñ Juda kambu enğö sutñineyök kezapqetok azi kun möwölöhöba kuñguiga ni ewö akña.'

38 *"Israel yeñön gölme qararañkölkölñe kaba malgetka pom kembuñini aka nanine ambösakonurupñini yembuk mala könagesöñini galöm köl enğiyök. Galöm köl enğiba kundunji qetñi Sainai mianğöreñ öngöi Suep garata kunñañ keu jii möta yambuk malök. Mewö mala Anutunöñ malmal köhöikñañgö keuñi sundan jii möta malöhi, yañön keu mi mianğö dop jiiga neñgö Buñaya ahök.

39 "Yañön pom kembuñina malökmö, nanine ambösakonini yeñön keuñi tem köl wañgibingö ölan enğöhöiga andö qeget. Andö qeba utal wañgiba uruñini möñaiiga Ijpt kantrinöñ kumbuk lilingöbingö sihimñi mötket. 40 *Mewö möta Mosesgö datñi Aron yañgöra kewö jiget, 'Mosesnöñ pom kembunini aka Ijpt kantrinöhök meköba neñğuanğiriga kaini, yañön kundunje öngöba tandök denöwö akzawi, nini mi qahö mötzin. Mi qahö mötzinañgöra göñön ölop tandö lopion menöñga mienön jittjememenini aketka könañine toroqeba anbin.'

41 *"Mewö jiba mianğöreñök goul memba mianñön lopion kun bulmakau moröñañgö tandök meget. Mi memba jöwöwöl memba kaba al wañgiba lömbuañ ohoba yuai böröñinan megeri, mianğö sösöñgai aka möpöseiget. 42 *Mewö aketmö,

* 7:35: Eks 2.14 * 7:36: Eks 7.5; 14.21; Jañ 14.33 * 7:37: Dut 18.15, 18

* 7:38: Eks 19.1-20.17; Dut 5.1-33 * 7:40: Eks 32.1 * 7:41: Eks 32.2-6

* 7:42: Amos 5.25-27

Anutunöŋ mi eka ölan yöhöiga andö enġui Suepkö senġelau Toŋi waikŋini memba möpöseim enġimegöra enġömosörök. Kezapqetok azi Amosnöŋ keu kun ohoi Buzup Kimbinöŋ ahözawi, mönö miangö dop kewö aket,

‘O Israel ambazip, inġini gölme qararaŋkölkölŋe kaba (yara) yambu 40:gö dop mala nalö miangören söm̄bup jöwöwöl ohoba naluk tosatŋi memba kaba niŋgiba malget me qahö?

⁴³ Mi qahöpmö, enġön mönö bem qetŋi Molok yaŋgö opo seri koumŋi mi aŋguget aka bem qetŋi Refan yaŋgören senġelau imutŋi mi aŋguba kaba malget.

Enġön imut lopionŋ mi waikŋiri memba möpöseim etkibingö meget buŋaŋina ahök.

Miangöra aka nöŋön mönö inġini közöl enġibi kerökurupŋinan kaba enġuaŋgitetka anda mala köröwen Babilon kantrigö andöŋe öŋgöba malme!’ ” Mewö.

Stiwenöŋ opo seri jikegö keuŋi jiyök.

⁴⁴ * “Ambösakonurupnini yeŋön gölme qararaŋkölkölŋe kaba mala Anutugö dangunuŋi kuŋguba opo seri jike memba aŋguba malget. Mi memba aŋguba Anutunöŋ jikenġi memegöra Moses jim kutum waŋgiba söpsöp imutŋi kondel waŋġii ehöhi, mönö miangö dop meget kinök. ⁴⁵ * Mosesnöŋ ambösakonurupnini galöm köl enġiiga yeŋön opo seri jike mi aŋguba malget. Könangep Josuanöŋ wahöta galöm köl enġii gwölönarökurupŋinan jike mi buŋa qem aŋguba toroqeba kaba mala kantri ki kaŋgotket. Kantri ki kaŋgotketka Anutunöŋ gölme toŋi kambuŋi kambuŋi enġuatangöi angetka gölmeŋini aŋgön köla meget. Memba tata malgetka kiŋ Deiwidnöŋ asuhuyök.

⁴⁶ * “Yaŋön asuhuba Anutu jemesoholŋe kalem möriamŋi miwikŋaiba kewö qesim waŋgiyök, ‘Anutu Jeikobkö bemŋi, göŋön ölop jinöŋga nöŋön jim kutubi nini göhöra jöwöwöl jike bohonŋi membin.’ ⁴⁷ * Mewö qesim waŋgiyökmö, Solomonöŋ jiiga Anutugöra jöwöwöl jike meget. ⁴⁸ Mi megetmö, Öŋgöŋgöŋi Ketanġi yaŋön azinöŋ miri böröŋinan megeri, miangören qahö malja. Miangö keuŋi kezapqetok azi kunŋan kewö ohoi ahöza,

⁴⁹ * “Kembunöŋ jiza: Nöŋgören jakömbuak dum tatatni mi Suepnöŋ ahöiga gölme mi könanangö döpnġi aiga miangören tiba tatzal.

Inġini mönö nöŋgöra miri tandökŋi denöwö megetka dop kölbawak?

* 7:44: Eks 25.9, 40 * 7:45: Jos 3.14-17 * 7:46: 2 Sml 7.1-16; 1 Hist 17.1-14

* 7:47: 1 Kiŋ 6.1-38; 2 Hist 3.1-17 * 7:49: Ais 66.1-2

Me miri denikeangören miwikñaim niŋgigetka mianğören öŋgöba luhut memba malbilenak?

⁵⁰ Yuai pakpak mi mönö nanak nani börönan miwikñaim enğial mi mötze.' Mewö.

Stiwenöŋ kaunsöl yeŋgö uruŋini kuŋguyök.

⁵¹ *"O qegetal ambazip, enğö uruŋinan mönö duhuiga kopa akze! Kezapñinan köungöba qahö kötökñi tohoza! Mi duhuzawaŋgöra Anutugören keu qetala kezapjupjup ahakze. Ambösakonñinan Uŋa Töröŋi tuarenjoŋ ak waŋgiba malgetka enjön mönö yeŋgö dop toroqeba mewöŋanök Uŋa Töröŋi sundan dop andö qemakze! ⁵² Enğö ambösakonurupñinan kezapqetok ambazip awamñi qahö sesewerowero ak enğiba malget. Yeŋgörenök danjön mönö kahasililiŋ qahö miwikñaiyök? Yeŋön Azi Solanñan asuhumapkö kezapqetok keuñi jigetka i enğuget kömuget. Yeŋön kömugetka Azi Solanñan nanñak asuhuiga iñini i mamalolo ak waŋgiba qeget kömuyök. ⁵³ Anutunöŋ garataurupñi melaim enğiiga Suepnöhök eta Köna keu enğigetka Buñanini ahökmö, enjön mi qahö tem köla malget." Mewö.

Stiwen kötnöŋ qeget kömuyök.

⁵⁴ Stiwenöŋ keu mewö jiiga jike kaunsöl yeŋön mötkeri, mi uruŋini sounöŋ qesiŋqesiŋi ewö qesiŋnök. Qesiŋniga uruŋini könöp jeiga ambarik (amdabö) yöhöba wahöta kinget. ⁵⁵ Mewö aketmö, Uŋa Töröŋan Stiwengö uruŋi kokolak qeiga jeni Suepnöŋ göröken ui öŋgöiga Jisös Anutugö asakmararan uruŋe euyangören Anutugö böröŋi ölŋe kini ehök. ⁵⁶ Jisös eka jiyök, "Mötket! Suepnöŋ anañiiga Suep gölmegö Azi Ölñan mönö Anutugö böröŋi ölŋe kiniga ekzal."

⁵⁷ Mewö jii möta qet gigilahögetka göju ketani wahöriğa kezapñini böröŋinan gwözöŋda körekñan luhuba anda qeraköba meget. ⁵⁸ Mewö memba taon göräŋe örörahöba anda yaigepŋe ala kötnöŋ könahiba gila qeget. Mewö qegetka tosatñan mi eka kinda malukuŋini qeköba mölohoba azi gwabö Solgö kösutŋe alget. ⁵⁹ Mewö aka kötnöŋ gila qebayök kingetka Stiwenöŋ Anutugö köuluköba kewö jiyök, "O Kambu Jisös, gi mönö uñani memba anğön kölman!" ⁶⁰ Mewö jiba siminñan geba köla qet gigilahöba jiyök, "Kambu, siŋgisöndok ki akzei, mianğö lömbötñi mönö yeŋgö qakñine kude alman!" Mewö jiba nöŋ qeba kömuyök. Mewö.

8

Solnöŋ urumelen kambu sesewerowero ak enğii denğet.

* 7:51: Ais 63.10

¹ Stiwen qeget kömuyöhi, mi Solnön mewöyök möri dop kölök. Nalö mianğoreñök sesewerowero ketani ahuiga Jerusalem sitigö urumelen kambu kazik ak engiget. Mianğöra yeñön körekñanök siti mosöta denđa Judia aka Samaria prowins yahöt mi dop köla angetka aposol yeñönök kapan köla sitinön malget. ² Ambazip Anutu göda qeba waikni memba malgeri, yengöreñök tosatñan Stiwen kömuyöhangöra jingey köla gwötpuk sahöta qamötñi memba anda löm kölget.

³ *Löm kölgetmö, Solnön urumelen könagesö jañgauranga mem engiba mirinji mirinji liliköba öngöba urumelen azi aka ambi örörahöba engömemba gili etketka jiiga kösö mire al engiget. Mewö.

Filipnön Samaria sitinön Buña nup meyök.

⁴ Urumelen ambazipnön denđa miri dop anda kaba liliköba malgeri, yeñön Ölöwak Buña jiba mianön ambazip uruñini kuñguba malget. ⁵ Filipnön Samaria prowinsgö siti kunön geba Amötqeqe Tonji Kraistkö könanji jim asarim engii mötket. ⁶ Mia jim asarim engiba anğöletot meiga letotketka ambazip kambu yeñön mi eka keu jiyöhi, mi urumohot aka kezap ala möta anğön kölget.

⁷ Filipnön nup meiga Anutugö ösumñan öme gwötpuk mi ambazip uruñineyök enğuatangöyök. Enğuatangöiga qet bölöbölö qeta kota anget. Nup meiga ambazip sehisehñi likepñini kömukömuñi aka lokon malgeri, mi ölöwaket. ⁸ Mewö aiga Samaria sitinön sösöngai öngöngöñi asuhuba ahöyök. Mewö.

Sile galöm azi Saimonön timbiqim bilim ahök.

⁹ Sösöngai ahöyökmö, Samaria siti mianğoreñ suña jinan azi kun qetñi Saimon malök. Yanön (yara) yambu tosatñi qarösöngö amötqeqe nup memba Samaria ambazip welipköm engiiga malget. Mewö malgetka “Azi öngöngöñi akzal,” jiba nanñangöra möri öngöyök. ¹⁰ Ambazip öngöngöñi eretñi yeñön körek pakpak Saimongö keugöra kezap ala möta kewö jimalget, “Anutugö ösumñi qetñi ‘Kukösum ketani,’ qetzei, mi-anön mönö azi mianğö uruñe geiga ahöza.” ¹¹ Saimonön qarösöngö amötqeqe nup mi nalö köröññi memba ambazip welipköm engiiga malget. Mewö ak engiyöhangöra aka yanğoreñ qekötahöba malget.

¹² Mewö malgetmö, Filipnön kaba Anutugö bemtohone anğotpingö Ölöwak Buñani aka Jisös Kraist qetñangö könanji mi jim asarim engiyök. Mi jim asarim engiiga ambazip gwötpukñan Buña keu möt nariba uruñini melengetka o melun mem engiyök. ¹³ Mewö aketka Saimonön mewöyök keu mi möt nariiga o melun mem wanğigetka Filipkö kösutñe kaba

* 8:3: Apo 22.4-5; 26.9-11

mala wuatangöyök. Mewö aiga Filipnönj angöletot aiwesök ketanj ketanj mei asuhugetka mi eka welipköba malök. Mewö.

Uña Töröñan Samaria yeñgö uruñine geyök.

¹⁴ Samaria ambazipnönj Anutugörenj Buña keu mewö möt angön kölgeri, miangö buzupñan sehiba Jerusalem sitinönj ani aposol yeñön mötket. Yeñön mi möta Pitö aka Jon meköba melaim etkigetka yeñgörenj anohot. ¹⁵ Anda angota yeñgöra aka köuluköba Uña Töröñan uruñine gemapköra Kembu qesiyohot. ¹⁶ Könañi kewögöra qesiba köuluköyohot: Yeñön Kembu Jisösgö qetje o melun mem engigetmö, Uña Töröñan yeñgörenök kungö uruñe qahö gei öne malget. ¹⁷ Miangöra köuluköba böröñjiri nöropñine alohotka Uña Töröñan uruñine geiga meget. Mewö.

Saimonönj Uña Töröñi söngöröñi memangö jiyök.

¹⁸ Aposol yetkön böröñjiri ambazip nöropñine alohotka Anutunönj miangö dop Uña Töröñi yeñgö uruñine aliga Saimonönj mi eka moneñ memba kaba kewö jiyök, ¹⁹ “Injiri mönö kukösum mewöñi mi nia kun niñgiyohotka memba böröni denike yeñgö nöropñine almami, Uña Töröñan mönö yeñgö uruñine gema.”

²⁰ Mewö jiyökmö, Pitönönj kewö jim wanjiyök, “Aek! Yapmakek! Göñön Anutugö kalemñi mi moneñnönj söngöröñi memangöra jizan. Miangöra gi mönö monengabuk könöp sianönj geman. ²¹ Göhö urugan mönö Anutugö jeje qahö dingiza. Miangöra gi Buña keu kiangö ölni kun qahöp mahöp meman. ²² Bölönjamgeyök mönö urugi melenđa Kembu köulukönönğa yañön uru mötmötkahö siñgisöndokñi mi mosötpawak. ²³ Göhö urugan mönö kömbuhiiga wösökömbuk ewö jula kokolak qem gihiza. Siñgisöndokan mönö kösö ewö köpeim gihiiga qaközan.”

²⁴ Pitönönj mewö jiiga suña jinanñ azi Saimonönj kewö melen etkiyök, “Mönö nöngöra aka Kembugö köuluköyohotka keu jizahori, miangö ölni kun qahö asuhum niñgibawak.”

²⁵ Aposol yetkön Kembugö Buña keu mi siti miangörenj nanğöba jiba jim asariba engömosöta anohot. Könanönj anda Samaria prowinsgö miriñi miriñi liliköba ambazip uruñini Ölöwak Buña keunönj kuñgum engiba mala Jerusalem sitinönj lilingöba anohot. Mewö.

Filipnönj Afrika azi kungöra Buña keu jii mörök.

²⁶ Kembugörenj garata kunñan Filipköra keu kewö jii mörök, “Gi mönö Jerusalem siti mosöta Saut göröken anman. Gölmö qararanj kölkölñe köna isikñi (walñi) Gaza taonönj gemakzei, mönö miangörenj anman.” ²⁷ Mewö jii möta Filipnönj amqeba mosöta anök. Anda Afrika azi kunñan miriñe lilingöba ani

könanöŋ miwikŋaiyök. Yaŋön Etiopia kantrigö kandası qingö jembonŋi öngöŋgöŋi aka ambi kembugö jakömbuak miriŋe monerŋ aka inap yuainŋi galöm köla malök. Silenŋangö yuaigöra aka Juda azi akŋamgö osiyökmö, töndup Anutugö waikŋi memba möpöseimangöra Jerusalem sitinöŋ kayök.

²⁸ Kaba miriŋe lilingömamgöra hos karenöŋ öngöiga hosnöŋ örögetka könanöŋ anök. Miangöreŋ anda kezapqetok azi Aisaiagö buk kötula oyoŋda tarök. ²⁹ Mewö aiga Uŋa Töröŋan Filipköra saŋep ala keu kewö jiyök, “Gi mönö hos kare miangö qöhöröŋe anda mötöteiba anman.” ³⁰ Uŋa Töröŋan mewö jiiga miangöreŋök ösumŋan kösutŋe anök. Anda azinöŋ kezapqetok azi Aisaiagö buk miangö Buŋa keuŋi oyoŋni mörök. Möta kewö qesim waŋgiyök, “Keu oyoŋjani, mi ölop möt asarizan me qahö?”

³¹ Qesim waŋgiiga jiyök, “Kunŋan qahö jim asariiga nanak mi denöwö möt asaribilenak?” Mewö jiiga hos karenöŋ öngöiga mohotŋe tarohot. ³² *Buŋa Kimbi oyoŋnöhi, mi kewö, “Azinöŋ lama qem yandibingöra memba waŋgitzei, yaŋön mönö miangö dop ösöŋ sororöŋgöba ahöyök.

Galömŋan lama moröŋangö jupŋi fitanöŋ mitiiga qöhöröŋe göröŋ qeba tim gwiriŋi qahö kinjawi, yaŋgö numbuŋangö dop mönö qahö waumgöba aŋaŋiyök.

³³ Memba et al waŋgigetka kunŋan keu jakene keuŋangö likepŋi qahö naŋgöba jiiga öne jim teköget. Gölmenöŋ malmalŋi mewö waŋgitket.

Gwölönarökurupŋi qahö mewö kömuyök. Miangöra kunŋan qet areŋi könaŋep qahö oyoŋda jima.”

³⁴ Jembonöŋ mi oyoŋda Filip kewö qesim waŋgiyök, “Kezapqetok azinöŋ keu mi dagöra jiza? Mi nanŋangöra me azi kungöra jiza? Gi ölop miangö könaŋi jinöŋ mötŋi.” ³⁵ Qesim waŋgiiga kezapqetok yengöreŋ Buzup Kimbinöhök könahiba Jisösgö Ölöwak Buŋa mi könaŋambuk jim asarii mörök. ³⁶ Mewö eraum möta könanöŋ anda o kösutŋe aŋgorohotka qin jembonŋan jiyök, “Eknöŋ, o töwatŋi ki ahöza. Miangöra gi ölop o melun mem niŋgiman. Keu kunöŋ aŋgön köl gihiza me qahö?”

³⁷ (Mewö jiiga Filipnöŋ jiyök, “Gi keu jibi mötzani, mi urugi jömuk Anutugöreŋ ala möt narizan ewö, mi ölop akŋam.” Jiiga keu kewö melenök, “Jisös Kraistnöŋ Anutugö Nahönŋi akza, nöŋön mi möt narizal.”

³⁸ Mewö melenŋa jim kutuiga hos kare jöhögetka mohotŋamŋire oe geba Filipnöŋ o melun mem waŋgiyök. ³⁹ Mi mem waŋgiiga onöhök korohotka Kembugö Uŋa Töröŋan Filip waŋgiri öngöba sök aliga qin jembonŋan i kunbuk qahö ehök. Qahö ehökmö, toroqeba sösoŋgai qakŋe miri gölmeŋe Etiopia

* 8:32: Ais 53.7-8

anök. ⁴⁰ Filipnönj sök ala anda taon qetnji Asdod miangören asuhui miwikñaget. Miangörenök toroqeba taonñi taonñi liliköba miangörenj Ölöwak Buña keunönj ambazip urunjni kuñguba anda mala Sisaria taonönj kañgorök. Mewö.

9

Kembunönj Sol asuhum wañgiiga urunji meleşnök.

Apo 22.6-16; 26.12-18

¹ Nalö sutnje miangörenj Solnönj urukönöp qakñe kinda uru silenji bölam tepköiga Kembangö gwarekurupñi engum ureim engiba malök. Mewö mala jike nup galöm bohonñi yañgörenj anök. ² Yañgörenj anda kewö kuñguba qesiyök, “Köna dölökñi wuatañgöba maljei, yeñgörenök tosatñan Damaskus sitinönj köröwen malje. Miangöra nöñön ölop endu anda jarum engiba kun miwikñaimami, i mönö jöhöba wañgita Jerusalem sitinönj kamam. Damaskus sitinönj Juda neñgö köuluk miri galöm kölakzei, yeñön i anğön köl engibepuköra mönö jimtekötekö kimbi ohoba niñginönğa memba anda kondel engimam.” Mewö jii ohoi memba anök.

³ Könanönj anda mala Damaskus siti dopdowimangö aiga yuai kun wölañ kewö asuhuyök: Asakmararañ kun Suepnöhök wölbilik ewö asuhuba eta liliköm wañgiyök.

⁴ Liliköm wañgi tala gölmenönj geba ahöba kouruk kun möriga keu kewö jii mörök, “Sol Sol, gi mönö wuanönğöra sesewerowero qakñe al niñgizan?”

⁵ Mewö jiiga Solnönj qesiba jiyök, “Kembu, gi danñon?” Mewö jiiga meleşnök, “Ni Jisös sesewerowero qakñe al niñgimakzani, ni mönö mi. ⁶ Mi akzalmö, ölop wahöta sitinönj anman. Miangörenj anda wani yuai akñani, kunñan miangö buzupñi jii mötman.”

⁷ Azi yambuk köna anda malgeri, yeñön keunjni qahöwahiga tömtömimba kinget. Yeñön keu kouruk ölña mötketmö, azi kun qahö eket. ⁸ Keu meleşniga Solnönj gölmenöhök wahörökmö, jeñi uba yuai kun qahö eka jipjap kinök. Mewö kiniga börönje memba Damaskus sitinönj wañgita anget. ⁹ Angetka wehön karöbut miangö dop jipjap mala o me nene kun qahö nemba öne malök. Mewö.

Ananiasnönj Sol o melun mem wañgiyök.

¹⁰ Damaskus sitinönj Jisösgö gwarekñi kun qetnji Ananias malök. Kembunönj kutum wasöriga imut ehiga “Ananias!” qerök. Qetnji qeriga jiyök, “O Kembu, ni ki maljal.”

¹¹ Mewö jiiga jii mörök, “Gi mönö wahöta köna qetnji Köna Diñdini jimakzei, miangörenj anman. Miangörenj anda Judasgö mire öngöba Tarsus azi qetnji Solgöra qesiman. Mötnönj, yañön ni köuluköm niñgiba tatza. ¹² Köuluköba tata uruñan

imut kun kewö ehök: Azi qetņi Ananaiasnöņ miriņi uruņe kaņgota jeņi kunbuk tohomapköra böröņi nöröpņe alma.”

¹³ Kembunöņ keu mewö jii möta melenök, “O Kembu, ambazip gwötpukņan azi miangö kösohotņi lök jiget möral. Yaņön Jerusalem sitinöņ göhöreņ könagesourup sarakņi mi gwötpuk eņgum ureim ak eņgiba malök. ¹⁴ Jike nup galöm bohonņi yeņön nam köla kukösum waņgigetka Damaskus siti kiangöreņ mewöyök nup miyök memamgöra kayök. Ambazip göhö qetki qeta köulukömakzini, yaņön mönö nini körek pakpak neņgömembra jöhöm neņgimamgö mötza.”

¹⁵ Mewö melenökmö, Kembunöņ jii mörök, “Nöņön azi mi meköm waņgibiga qetni bisiba nöņgöra bim qeba malma. Mewö mala gölmeņi gölmeņi liliköba Buņani jim sehiiga Israel aka kian kantri ambazipnöņ mötme. Keu jakeņi jakeņi miangöreņ örögetka azi kembu gwötpuk yeņgö jeņine aņgota Buņani jii mötme. Miangöra mönö töndup anöņ. ¹⁶ Yaņön qetni bisiba miangöra sihimbölö gwötpuk mötma. Nöņön miangö areņi kondel waņgimamgö mötza.”

¹⁷ Mewö jii möta Ananaiasnöņ anda miri miangö uruņe öņgöba böröyahötņi Solgö nöröpņe ala jiyök, “Sol alani, köna namņe kanöņga Jisösnöņ asuhum gihiyöhi, Kembu miangö mönö melaim niņgiiga kazal. Göhö jegan kunbuk tohoiga Uņa Töröņan urugi kokolak qemawangöra jiiga kazal.” ¹⁸ Mewö jiiga miangöreņök yuai sönuetņambuk tandök miangö jeņeyök tala et teköi jeņi tohoyök. Jeņi tohoiga ui asariiga wahörök. Wahöta jiiga o melun mem waņgiyök. ¹⁹ O melun mem waņgiiga nene nembra köhöiyök. Solnöņ köhöiba gwarek yeņgö sutņine Damaskus sitinöņ wehön tosatņi malök. Mewö.

Solnöņ Damaskus sitinöņ Buņa nup meyök.

²⁰ Mala miangöreņök wahöta Juda yeņgö köuluk miriņi miriņi miangöreņ öņgöba Jisösgö könaņi jim asariba ambazip uruņini kuņguba kewö jiyök, “Jisösnöņ mönö Anutugö nahönņi akza.”

²¹ Mewö jii möta körek yeņön auruba welipköba jiget, “Jerusalem sitinöņ qet mia qet köulukögeri, azi kiangö mi eņgum ureiba malök me qahö? Mewöņanök kiangöreņ kayöhi, mi mönö nini jöhöba neņguaņgita jike nup galöm bohonņi yeņgö böröņine al neņgimamgöra kayök. Miangöra mönö denöwö letota nanņak Anutugö keu miyök naņgöba jiza?”

²² Mewö jigetmö, Anutunöņ Sol ösum-mumu waņgii kunbuk köhöiba malök. Köhöiba mala Juda ambazip Damaskus sitinöņ malgeri, yeņgö uruņini kuņguba kewö jiba malök, “Jisösnöņ ölna Anutugöreņ Amötqeçe Tonji Kraist akza.” Keu mi jim köhöiba könaņi kondela maliga yeņön köņkuņ aka keu mi qeapköbingö osiba malget.

²³ *Silim gwötpuk teköiga miangören Juda yejön tokoba keu nup memba Sol qeget kömumapkö angönanji alget. ²⁴ Angönanji algetmö, miangö buzupni mi Solgö kezapne gei mörök. Solnön Damaskus siti mosötmamgö aiga miangören qeget kömumapköra siti kiripo nangune yangöra sunjem asak je galöm memba malget. ²⁵ Mewö memba malgetmö, gwarekurupnan sunjem kunön sakap (misak) ketanji memba kösönön jöhöba Sol sakapnön ala siti selgö kinimneyök alget geba anök. Mewö.

Solnön Jerusalem kusukjanök anda malök.

²⁶ Solnön anda Jerusalem sitinön angota Jisösgö gwarekurup yembuk esapköba toroqeyökmö, körek yejön Sol gwarek aka malöhi, mi qahö möt narigerangöra aka yangöra kengetnjini mötket. ²⁷ Kengetnjini mötketmö, azi qetnji Barnabas yanön ala ak wangiba köyan köla wangita aposol yengören anda kondela kösohotnji kewö jim asarim engiyök, “Sol azi kianön könanön kaiga Kembunön asuhum wangii ehiga keunji jii mörök aka könanjep Jisösgö qetnji mi Damaskus sitinön jim asariba köhöikjanök uru kunjum engiba malök.”

²⁸ Kösohotnji mewö jim asarim engiiga yembuk toroqeba Jerusalem siti urune liliköba awösamkakak kinda Kembangö qetnji aukne qeta ambazip urukunjugunju köhöiknji al engiba malök. ²⁹ Mi al engiba mala Juda ambazip Grik keu möta malgeri, yembuk eraum möta möndömkösök keu melenqelen ahökmö, yejön Sol kapan köla qeget kömumapkö mötket. ³⁰ Mi esapkögetka alaurupnan Sol miwiknaiba wangita Sisaria taonön anda kinda melaigetka nanjök toroqeba ahuhahu taonni qetnji Tarsus miangören anök. Mewö.

Urumelen kambu yejön luainön malget.

³¹ Solnön urunji melenniga miangö andöne urumelen könagesö pakpak Judia, Galili aka Samaria prowins dop köla malgeri, yejön luai miwiknaigetka Uña Törönan i mem köhöiba nangöm engiiga malget. Mewö mutulangöba Kembangö keunji ongitpinbuköra kengetnjini möta nup megetka urumelen könagesöjinan qarim sehiiga malget. Mewö.

Pitönön Lida azi kun mem ölöwahök.

³² Pitönön mirinji mirinji liliköba Jisösgö könagesö saraknji engeka anda mala nalö kunön taon qetnji Lida miangören angorök. ³³ Angota miangören azi kun qetnji Ainias miwiknaiyök. Likepni kömukömunji aiga dumnöhök ahöba mali (yara) yambu 8 teköyök. ³⁴ Pitönön i miwiknaiba kewö jiyök, “Ainias, Jisös Kraistnön gi mem ölöwak gihiza. Miangöra mönö wahöta tumbulahöpki qezaköman.” Mewö jiiga miangörenjök

* 9:23: 2 Kor 11.32-33

wahörök. ³⁵ Mewö asuhuiga Lida aka Saron ambazip pakpak yeñön i eka uruñini melenđa Kembangören qekötahöget. Mewö.

Pitönöñ Jopa anda Tabita mem guliyök.

³⁶ Jopa taonöñ gwarek ambi kun qetñi Tabita malök. (Qet mi Grik keunöñ Dorkas, nanine keunöñ teu, Inklis keunöñ deer.) Yeñön nalö dop nup ölopñi ölopñi memba kalem sehisehiñi mendenđa ambazip etqeqeñi bauköm engiba malök. ³⁷ Pitönöñ gölme miangören mali Tabitanöñ nalö miangören kawöl asuhum wañgii kömuyök. Kömui qamötñi sañgonđa memba miri uruñi kunöñ öngöba alget.

³⁸ Lida mi Jopa taon kösutñe tarök. Miangöra Pitönöñ Lida malöhi, gwarek yeñön mi möta azi yahöt melaim etkigetka anda Pitö kewö qesim wañgiyohot, “Gi mönö zilañ kanöñga netpuk Jopa taonöñ anbin.” ³⁹ Qesim wañgiyohotka miangörenök amqeba yetpuk anget. Anda añgotketka qamöt miri uruñe ahöyohañgören wañgita öngöget. Öngögetka ambi malö pakpak Pitö liliköba sahöta Dorkasnöñ yembuk mala opo maluku uhum memba engiyöhi, mi kondel wañgiget. ⁴⁰ Kondel wañgigetmö, Pitönöñ jii körek yeñön gem tekögetka simin köla köuluköyök. Köuluköm teköba qamöt mesohol köla kewö jiyök, “Tabita, mönö wahötnöñ.” Mewö jiiga jeñi uba Pitö eka wahöta tarök.

⁴¹ Tariga Pitönöñ böröñe memba kököbihiiga wahöta kinök. Kiniga urumelen alaurupñi aka ambi malö engoholi öngöget. Öngögetka kömupnöhök guliba wahöröhi, ambi mi jemesoholñine ali eket. ⁴² Miangö keu buzupñi mi Jopa uruñe miri dop ani möta ambazip gwötpukñan könahiba Kembu möt narim wañgiget. ⁴³ Pitönöñ Jopa miangören sömañi tosatñi toroqeba mala Saimongö mire tata ahöyök. Azi mi köna esu memegöra bulmakau silenñi urasiba sañgonđa möhamgöba malök. Mewö.

10

Korniliusnöñ Pitö ohola uruñi melenñök.

¹ Taon qetñi Sisaria miangören suahö galöm kiannñi kun qetñi Kornilius malök. Yeñön yarö kambu bahöñi kun qetñi “Italigö yarö kambu” qetkeri, miangören yarö azi 100 yeñgö galömñina malök. ² Yeñön saiwaurupñi pakpak yembuk Anutu göda qeba waikñi memba möpöseiba malget. Mewö malgetka Juda ambazip wanapñi yeñgöra kalem sehisehiñi engiba Anutu qösösök (qörörök) köuluköba malök. ³ Mare kunöñ 3 kilok miangö dop aiga Kembunöñ Kornilius kutum wasöriña imut kun ehök. Imut törörök eka miangören Anutugören garata kunñan miriñe öngöi ehök. Garata miñön öngöba “Kornilius!” jiba qetñi qerök.

⁴Mewö qeriga garata ehiba sömbuñi möta jiyök, “Ketanjamni, wanigöra ki kazan?” Mewö jiiga melenök, “Gi köuluköba malnönga keugi Anutugörej öngöiga möri ölöwakza. Gi ambazip wanapñi kalemñi kalemñi menden engimakzani, mi Anutunöñ möta anğön köla göhöra mötmöriba melaim ninggiiga kazal. ⁵Miangöra mönö dölki kolek alnönga Jopa taonöñ aniga azi qetñi Saimon, qetñi kun Pitö qetzei, ia wanğita kame. ⁶Yañön sömbup silenğö nup meme azi qetñi Saimon yağö mire köwet jitñe miangören malja.”

⁷Suep garatanöñ Korniliusgöra keu mewö jibagun mosöta anök. Mosöta aniga welenqeqeñi yahöt etkoholi kayohot. Kayohotka yarö azi kun kösutñeyök kapan köla Anutu göda qeba malohori, i mewöyök oholi kayök. ⁸Kagetka garatagören keu mi körek jii mötketka melaim engii Jopa taonöñ anget. Mewö.

Kembunöñ Pitö kutum wasöriğa imut ehök.

⁹Azi yeñön könanöñ angetka miri gianñi taon dopdowigetka silim bibiñe miangören Pitönöñ miri uruñi kun eu miangören öngöba kinda köuluköyök. ¹⁰Kinda köuluköba nenegö kömumba yuai nemangö möta jii ohoget. Ohogetka nalö miangören Kembangö alburupñan qeiga tata imut kun kewö ehök: ¹¹Suepnöñ anañiiga könde ketanñi kun erök. Könde mi opo tuatñi ketanğö tandök ewö ahök. Garata yeñön yuai miangö wanğömñi 4 miangören memba nanğöbeak, miangö tandök ewö gölmenöñ erök. ¹²Yuai miangö uruñe sömbup könanñi könanñi tatket. Sömbup tosatñan köna 4:ñan tiba anakze. Tosatñan wösönöñ ölölöngöba anakze. Mewöyök neiñi neiñi könakemba bölbölgöba anakzei, yuai mewöñi mewöñi mi könde miangö uruñe mohotñe etket. ¹³Etketka miangören qet kun asuhaba keu kewö jii mörök, “Pitö, gi mönö wahöta yuai ki qeba ohoba nenöñ.”

¹⁴Mewö jii mörökmö, Pitönöñ jiyök, “O Kembu, mewö qahö kötökñi! Mi dönqizinñambuk. Ni nalö kunöñ yuai anğöjörakñambuk mi kude neal. Ni miangöra imbilonlon mötzal.”

¹⁵Mewö jiiga qet mianñon kunbuk asuhaba yağöra jiyök, “Anutunöñ yuai jim könjörari ahözawi, göñon miangö qetñi anğöjörakñambuk mewö qetnönga qahö dop kölja.” ¹⁶Yuai mewöñi mi kunbuk asuhui indimñi karöbut ahök. Indimñi karöbut aiga miangörenök könde mi kunbuk örögetka Suepnöñ öngöyök.

¹⁷Pitönöñ imut mi eka miangö könanğöra köñkun aka mötmangö möt bibihibaba tarök. Mewö tariga nalö miangörenök Korniliusnöñ azi melaim engii kaba Saimongö miri jaruba miangöra qeqesi aka miwikñaiba kanğota miri

naŋuŋe kinget. ¹⁸ Miri naŋuŋe kinda kewö qeta qesiget, “Saimon qetŋi alaŋi Pitö qetzei, yaŋön miri kianaŋöreŋ malja me qahö?”

¹⁹ Pitönöŋ toroqeba imut mianŋö könaŋangöra möt bibihiba tariga Uŋa Töröŋan kewö jii mörök, “Mötnöŋ, azi karöbutŋan kaba gi jarum gihize. ²⁰ Nöŋön azi mi melaim enŋibiga ki kaze. Mianŋöra mönö dölki wahöta geba uruyahöt mosöta yembuk anman.” ²¹ Mewö jiiga Pitönöŋ azi mienŋöreŋ geba jiyök, “Mötket, iŋini azi jaruzei, nöŋön mia akzal. Mönö denöwögöra kaze?”

²² Jiiga melenget, “Suahö galöm Kornilius mi azi diŋdiŋi akza. Yaŋön Anutu waikŋi memba möpöseiba mali Juda ambazip kambu körek yeŋön göda öŋgöŋgöŋi qem waŋgimakze. Anutugö garata töröŋi kunŋan asuhum waŋgiba kewö jim kutui mörök, ‘Gi mönö kolek ala Pitö köl öröm waŋginöŋga mirige öŋgöba keu uruŋeyök jimawi, mi kezap ala mötman.’” ²³ Mewö melengetka öröm enŋii miri uruŋe öŋgögetka köyan köl enŋii köisirik tata ahöget. Ahögetka miri gianaŋiiga Pitönöŋ wahöta yembuk anök. Jopa taon mianŋöreŋök ala tosatŋi enŋömeiga yambuk mohotŋe anget. Mewö.

Pitönöŋ kian ambazip yembuk tokoget.

²⁴ Mohotŋe anda sömaŋi mohot ahöba anda mala Sisaria taonöŋ anŋotket. Anŋotketka Korniliusnöŋ yeŋgö mamböt aka malök. Mewö mala tinitosolom aka alaurupŋi ölöŋŋi mi köl öröm enŋii miriŋe tokoba tatket. ²⁵ Anŋota Pitönöŋ mire öŋgömangö aiga Korniliusnöŋ wahöta eta jölöŋi jiba könaŋe geba sipköm waŋgiyök. ²⁶ Sipköm waŋgiyökmö, Pitönöŋ böröŋe memba kököbihiiga wahöri kewö jiyök, “Mönö wahötnöŋ, nia kun gölme aziyök akzal.”

²⁷ Mewö jii yambuk eraum möta miri uruŋe öŋgöyohotka ambazip gwötpukŋan tokoba tatkeri, mi enŋehök. ²⁸ Enŋeka kewö jii mötket, “Iŋini Juda ambazip nenŋö könaŋamnini mötze. Juda nini ambazip kianaŋi enŋö mire öŋgöba embuk köisirik tatatkö soŋgo ahöi osizin. Mi osizinmö, Anutunöŋ keuŋi kun kondel niŋgiba kewö jiyök, ‘Göŋön ambazip iŋi waiŋi yeŋgö qetŋini mi anŋöjörak imbilonŋonambuk mewö kude qetman.’” ²⁹ Mianŋöra iŋini kolek ala köl öröm niŋgigetka nöŋön qahö qetala kaba kaŋgotzal. Kaŋgota kewö qesizal: Iŋini mönö wuanöŋgöra kolek ala köl öröm niŋgiget? Mi ölöŋ jiget mötŋi.”

³⁰ Mewö jiiga Korniliusnöŋ melenök, “Ni mare kunöŋ nalö kewöŋe 3 kilok mianŋöreŋ mirine tata köuluk nup memba mala kotŋi merak sömaŋi 4 akza. Köuluk nup memba malbiga mianŋöreŋök azi kun sileötaŋi asakmararaŋambuk mianŋön

asuhuba wösöne kinök. ³¹ “Wösöne kinda kewö jiyök, ‘Kornilius, gi köuluköba malnönga keugi Anutugöreŋ öngöiga möri ölöwakza. Gi kalemŋi kalemŋi ambazip wanapŋi menden engimakzani, mi Anutunöŋ möta aŋgön köla göhöra mötmöriba melaim niŋgiiga kazal. ³² Mianğöra mönö dölki kolek alnönga Jopa taonöŋ aniga azi qetŋi Saimon, qetŋi kun Pitö qetzei, ia waŋgita kame. Yaŋön sömbup silenangö nup meme azi Saimon yaŋö mire köwet jitŋe malja.’

³³ “Mewö jiyöhaŋgöra aka nöŋön mianğöreŋök kolek albiga göhöreŋ kaget. Göŋön keuni möta kazanangöra uruni ölöwakza. Kembunöŋ keu pakpak jimangö jim kutum gihiyöhi, göŋön mi ölöp jinöŋ mötpin. Nini pakpak dölki mianğöra tokoba Anutugö jemesoholŋe ki tatzin.” Mewö.

Pitönöŋ Korniliusgö mire Buŋa keu jiyök.

³⁴ *Korniliusnöŋ mewö jiiga Pitönöŋ könahiba kewö jiyök, “Aha! Anutunöŋ ambazip tosatŋi qahö engek soriba tosatŋi qahö qepureim engimakzapmö, dop mohotnöŋ kewöt neŋgimakza. Yaŋö jeŋe kunŋan aŋgöjörakŋambuk qahö akza. Nöŋön mi dölki öŋa möt kutuzal.

³⁵ “Mewö qahöpmö, ambazip kambuŋi kambuŋi körek yengö sutŋine denike yengöreŋök kunŋan Anutu waikŋi memba möpöseiba aiakanan köna diŋdiŋi wuatangözawi, yaŋön mönö Anutugö jeŋe dop kölja. ³⁶ Jisös Kraistnöŋ ambazip körek neŋgö Kembuya aka luai qem neŋgimakzawi, Anutunöŋ Buŋa keuŋi mi Israel könagesö neŋgöreŋ ali kayök. Buŋa mianjön kaiga nini mianğö Ölöwak Buŋaŋi jim asariba maljin. ³⁷ Jonöŋ ambazip uruŋini kuŋguba kewö jiyök, ‘Inini mönö uruŋini melengetka nöŋön o melun mem engimam.’ Mewö jiiga mianğö andöŋe keu mi Galili prowinsnöŋ könahiba jiget sehiba anda Judia prowinsnöŋ aŋgota körek dop kölök. Inini mi lök mötze.

³⁸ “Anutunöŋ Uŋa Töröŋi Nazaret azi Jisösgö uruŋe mokoiga kukösum buŋa qem aŋguba gölme dop liliköba malöhi, mi yambuk kiniga anda ambazip ak kömum engiyök. Bölöŋangö Toŋan ambazip ösumŋan jöhöba öröm engii gegeri, yaŋön mi pakpak mem ölöwak engim teköyök. ³⁹ Yuai mi Juda neŋgö gölmenöŋ aka Jerusalem sitinöŋ aka memba maliga ip kembera ala qeget kömuyök. Nini mi pakpak eka nanğöba jiba dangunuŋi aka kinjin. ⁴⁰ Kömumba ahöi sömaŋi karöbut aiga Anutunöŋ mem gulli wahörök. Wahöta indimŋi gwötpuk ambazip asuhum engiyök.

⁴¹ “Yaŋön ambazip kambu pakpak yengöra qahö asuhuyökmö, Anutunöŋ mutuhök nini möwölöhöm neŋgiiga

* 10:34: Dut 10.17

Jisösnöŋ kömupnöhök wahöta malöhi, nalö mianğoreŋ yambuk keu eraum möta nene anğum nem malini, mönö nenğöra asuhuiga nini mianğö keuŋi nanğöba jiba kinjin. ⁴² Mewö kininga Jisösnöŋ kewö jim kutum nenğiyök, ‘Anutunöŋ kuŋgum niŋgiiga nöŋön ambazip maljei aka kömugeri, yenğoreŋ jimtekötekö Tonjina akzal. Mianğöra eŋön mönö nöŋgö könaŋamni mi ambazip kambu dop yenğöra nanğöba jim asariba malme.’ ⁴³ Ambazip denike yeŋön Jisös möt narim waŋgiba qetŋi qerakzei, Anutunöŋ mönö qet mi möta yenğö siŋgisöndokŋini mosöta saŋgoŋmakza. Yaŋgö könaŋamŋi mewö ahözawi, mi kezapqetok ambazip körek yeŋön nanğöba jim asariba ohoget ahöza.” Mewö

Uŋa Töröŋan kian ambazip yenğoreŋ erök.

⁴⁴ Pitönöŋ keu mewö jibayök kiniga Uŋa Töröŋan ambazip kezap ala mötkeri, yenğö uruŋine geyök. ⁴⁵ Anutunöŋ Uŋa Töröŋ kalemŋi mi kian ambazip yenğö uruŋine mewöyök mokoi geyöhi, mi Pitögö alaurupŋan eka auruget. Juda ambazip silenine Anutugö aiwesökŋi yandigetka uruŋini melenđa Jisös möt nariba Pitö wuatangöba kaba tatkeri, mienön mönö auruba kewögöra welipköget: ⁴⁶ Yeŋön kantri tosatŋi yenğö keuŋini murutŋi murutŋi könahiba jiba Anutu möpöseiget. Mianğöra welipkögetka Pitönöŋ kewö qesiba jiyök, ⁴⁷ “Yeŋön Uŋa Töröŋi mi nenön ahin ewö anğön köla buŋa qem anğuzei, mi mötzin. Mianğöra i ölop o melun mem enğiinga dop köлма. Mi ahinga daŋön qetal nenğibawak?”

⁴⁸ Mewö jiba jim kutum enğiiga Pitögö alaurupŋan kinda Jisös Kraistkö qetŋe Kornilius saiwaurupŋi o melun mem enğiget. O melun mem enğigetka Pitö anğön köl waŋgigetka toroqeba silim tosatŋi yembuk malök. Mewö.

11

Pitönöŋ Jerusalem anda nupŋanğö kösohotŋi jiyök.

¹ Kian kantri yeŋön mewöyök Anutugoreŋ keu memba anğön kölgeri, mianğö buzupŋi mi aposol aka urumelen alaurup Judia prowins dop köla mala mötket. ² Mianğöra Pitönöŋ Jerusalem sitinöŋ lilingöba öngöiga Juda silenine Anutugö aiwesök yandigetka uruŋini melenğeri, yeŋön jijiwilit (jelikit) aka jim waŋgiget. ³ Jim waŋgiba kewö jiget, “Kian kantri azi Anutugö aiwesökpuk qahö maljei, gi mönö wuanöŋgöra anda yembuk köisirik tata nene nenöŋ? Mi qahö dop kölja.” ⁴ Mewö jigetka könakönahineyök könahiba yuai asuhuyöhi, mi körek pakpak arenambuk jim asarim enğiba kewö jiyök,

⁵ “Nöŋön Jopa sitinöŋ mala köuluköbiga Kembugö alburupŋan nuŋguiga tata imut kun kewö ehal: Suepnöŋ aŋaŋiiga könde ketanŋi kun erök. Könde mi opo tuatŋi ketanğö tandök

ewö ahök. Garata yeñön yuai mianğö wañğömnı 4 mianğören memba nañğöbeak, mianğö tandök ewö nönğö kösutneyök eta ahöyök. ⁶ Eta ahöiga yuai mianğö uruñe törörök ekiga sömbup könañi könañi mianğören tatket. Sömbup tosatñi mi gölmenön köna 4:ñan tiba anakze. Tosatñi kalñi könöpñinambuk akze. Tosatñan wösöñinan ölölöngöba anakze. Mewöyök nei könañi könañi könakemba bölbölgöba anakzei, yuai mewö mi könde mianğö uruñe mohotñe etketka engehal. ⁷ Engekiga qet kun mewöyök asuhaba kewö jii möral, ‘Pitö, mönö wahöta yuai ki qeba ohoba nenöñ.’

⁸ “Mewö möralmö, nönñon kewö jial, ‘O Kembu, ni mianğöra imbilonlon mötzal. Yuai dönqizin aņğöjörakñambuk mewöni mi nalö kungen nönğö numbunan qahö oseiyök. Mianğöra mi mönö qahö kötökñi nemam.’ ⁹ Mewö jibiga qet mianñon kunbuk Suepnöhök asuhaba kewö jiyök, ‘Anutunön yuai jim köñjörari ahözawi, göñön mianğö qetñi aņğöjörakñambuk mewö kude qetman.’ ¹⁰ Yuai mewöni mi indimñi karöbut asuhuyök. Mewö asuhuiga yuai pakpak mi kunbuk örögetka Suepnön lilingöba öngöyök. ¹¹ Öngöba atatop (jiataton) köliga nalö mianğörenök Korniliusnön Sisaria taonöhök azi karöbut melaim enñii nönğören kageri, yeñön miri tarini, mianğö nañgunje kinget.

¹² “Nañgunje kingetka Uñanön kewö jim kutum niñgii möral, ‘Gi mönö uruyahöt yaköriba yembuk anman.’ Keu mi mötpiga urumelen alaurupni 6 yeñön mewöyök Jopa mosöta nömbuk Sisaria taonön anin. Sisaria aņgota suahö galöm mianğö mire öngöin. ¹³ Öngöinga keu kösohot kewö ak neñgiyök, ‘Garata kunñan nönğö mire asuhuiga ekiga kinda kewö jii möral: Gi mönö Jopa mire kolek ala azi qetñi Saimon, qetñi kun Pitö i wañgita kaget. ¹⁴ Yañön kaiga Buña keu jiiga gi aka saiwaurupkan mi möt nariba uruñini melengetka körek amöt qem enñiiga letotme.’

¹⁵ “Kösohot mi ak neñgiiga nönñon könahiba Buña keu jial. Mi jibi mötketka Uña Töröñan könakönahine neñğö urunine geyöhi, mönö mianğö dop kezap ala mötketka yeñğö uruñine mohot geyök. ¹⁶ *Yañön geiga ekiga mianğörenök Kembugö keu kun nönğö mötmötnön kañgori mötmörial. Keu mi kewö, ‘Jonön o töhönön melun mem enñiyökmö, nönñon Uña Töröñi uruñine ala mianñon melun mem enñimam.’ ¹⁷ Neñön Kembu Jisös Kraist möt narim wañgiinga Anutunön kalemñi neñgiyöhi aka yeñön möt narigetka Anutunön kalemñi miyök enğö uruñine mewöyök alök. Mianğöra aka ni ewöñan mönö denöwö Anutu kukösum Tonji esapköba qetal wañgibileñak? Yañön mewö ak enñiiga nönñon aņğön köl wañgimamğö osial.”

* 11:16: Apo 1.5

18 Pitönöŋ kösohotŋi mewö jii möta uruŋini amörii bönjöŋ aiga Anutu möpöseiba kewö jiget, “Ölŋa, nini urunini melenŋa malmal köhöikŋaŋgö buŋaya akzin mötzinmö, Anutunöŋ köna mohot mi kian kantri ambazip yeŋgöra mewöyök al enŋii ahöza. Mi mönö döлки asariba möt kutuzin.” Mewö.

Kian kantrinöŋ urumelenŋ kambu mutukŋi asuhuyök.

19 *Stiwen qeget kömuyöhaŋgöra aka kahasililinŋ asuhuiga urumelenŋ ambazipnöŋ deŋda liliköba anda kaget. Anda kagetka tosatŋan köwet jitŋe Fonisia gölmenöŋ anget. Tosatŋan köwet kutuba gölme jölanni qetŋi Saiprus mianŋgöreŋ anget. Tosatŋan Siria prowinsgö sitiŋi qetŋi Antiokia anget. Mewö deŋda angetmö, ambazip sutŋine Jisösgö Buŋa keu mi Juda ambazip yeŋgörök jigetka mötket. Kian kantri yeŋgöra mi qahö jiget. 20 Qahö jigetmö, Saiprus aka Sairini azi tosatŋan yeŋgö sutŋine malget. Yeŋön kian gölmenöŋ qariba Antiokia sitiŋöŋ kaŋgota gölme toŋi yembuk Grik keunöŋ eraum möta Kembu Jisösgö Ölöwak Buŋa mi mewö Juda qahö yeŋgöra mewöyök jim asarim enŋiget. 21 Mi jim asarim enŋigetka Kembunöŋ yembuk mali ösumŋan ambazip uruŋini kuŋgum enŋii gwötpuk yeŋön Kembu Jisös möt nariba uruŋini melenŋa yaŋgöreŋ qekötahögetka kambuŋini qariiga ketanŋi ahök.

22 Mewö aiga mianŋgö buzupŋan anda Jerusalem könagesö yeŋgö kezapŋine gei mötket. Mi möta Barnabas melaigetka Antiokia sitiŋöŋ anök. 23 Anda aŋgota Anutunöŋ kalem möriamŋi ambazip enŋii ölöwakeri, mi jeŋan eka möri öŋgöi söŋgaiba qambaŋi kewö jiyök, “Inŋini mönö körek pakpak uruŋini qezaköba köhöiba Kembubuk qekötahöba kinme.” 24 Barnabasnöŋ azi ölöpŋi aiga Uŋa Töröŋan uruŋi kokolak qeiga uruyahöt andö qeba uruŋi jömuk mianŋön Jisös möt narim waŋgiba malök. Mianŋgöra ambazip gwötpukŋan uruŋini melenŋa Kembugö kambunöŋ toroqegetka qariyök.

25 Barnabasnöŋ Antiokia mosöta Sol jarumamgöra Tarsus taonöŋ anök. 26 Anda miwikŋaiba waŋgiri Antiokia sitiŋöŋ kayohot. Kaba mianŋgöreŋ mohotŋamŋire (yara) yambu mohot jömukŋanök mala zioz nup memba uruŋini melenŋeri, mi kambuŋi kambuŋi köla kusum enŋiyohotka ambazip gwötpukŋan mötmöt memba urukönömŋine alget. Antiokia ambazipnöŋ mutukŋi könahiba gwarek qetŋini Kraistkö alaurup (kristen, Kraistkö buŋa) qeta malget. Mewö.

Kian kantrigö urumelenŋ yeŋön Juda naŋgöm enŋiget.

27 Nalö mianŋgöreŋ kezapqetok ambazip tosatŋan Jerusalem mosöta Antiokia sitiŋöŋ eta kaŋgotket. 28 *Yeŋgöreŋök kun qetŋi Agabus mi wahöta Uŋa Töröŋan sölölohöi buzup keu

kewö jii mötket, “Bödi ketañan asuhuba gölmeñi gölmeñi dop köla ahöma.” Mewö jiiga miangö dop sisa kiñ qetñi Klodius yanğö galömkölköl nalöñe asuhuyök. ²⁹ Mi asuhuiga gwarek yeñön mindiriba urumelen alaurupñini Judia prowinsnön malgeri, mi nanğöm engiba mindimindiri naluk ketañi alget anmapkö keu jöhöget. ³⁰ Keu mi jöhöget aka miangö dop ölna aket. Yeñön moneñ aka yuai tokoba Barnabas Sol yetkö böröñire ala melaim etkigetka Jerusalem anda urumelen könagesö yeñö jittjememeurupñini engeka engiyohot. Mewö.

12

Herodnön Jeims qeba Pitö kösö mire alök.

¹ Nalö miangören kiñ Herodnön* urumelen könagesö sesewerowero mem engibingö möta jiiga urumelen ambazip tosatñi engimemba jöhöm engiget. ² Kiñnön jiiga Jongö datñi Jeims mi bingö sou ketañan qegetka kömuyök.

³ Mewö jii kömuiga Juda ambazip tosatñan mi mötket ölöwahiga ehök. Mi eka miangöra toroqeba jiiga Pitö mewöyök memba jöhöget. Yuai mi beret yistñi qahöpkö kendon nalöñe jiiga asuhuyök. ⁴ *Miangöra kiñnön kewö jiyök, “Nöñön ak-kömukömu kendon† teköiga Juda yeñö keu jakeñe almam.” Mewö jiba jii kösö mire alget. Algetka yarö azi 16 yeñön sutñine kambu 4 köla nalö utekutek aketka azi 4:ñan sundan sunğem asak kinda galöm mem wañgiba malget. ⁵ Pitö mewö galöm mem wañgiba malgetka kösö mire ahöyökmö, urumelen könagesö yeñön sundan dop yanğöra aka Anutu kapañ köla köuluköba malget. Mewö.

Suep garatanön Pitö pösata wañgita erök.

⁶ Köuluköba malgetka ak-kömukömu (Pasowa) kendon teköiga sunğem miangören yarö azi yahötñan Pitö tapep (muñgamuñga) yahötnön jöhöm köhöiyohotka sutñire gaun ahöyök aka wahibuk tosatñan nanğu andöñe kinda kösö miri galöm meget. Kiñ Herodnön miri gianjiiga Pitö wañgita keu jakeñe almamgö mötmöriba areñ ali gaun ahöget. ⁷ Gaun ahögetmö, Kembangö garata kunñan wolan asuhuba Pitö qöhöröñe kini kösö mirigö uruñi asarim teköi Pitögö nambulñe qeba jiyök, “Mönö zilañ wahötnön.” Mewö jii tapep (muñgamuñga) yahötñan miangörenök Pitögö böröñeyök öne sulohot. ⁸ Sulohotka garatanön jii mörök, “Mönö opogi jöhöba

* **12:1:** Kiñ Herod Agripa I (mutukñi) yanön (yara) yambu 37-44 miangören Palestain pakpak galöm köñ engiba malök. * **12:4:** Eks 12.1-27 † **12:4:** Pasowa nanine keunön qetñi alanji mi walöñsörak aka goukölköñ. Israel ambazip yeñön Ijipt mala nanğujini sepnön mirigetka Anutuğö garatanön nenğehoriba nenğonğita morö mutukñini qahö enğui kömuget.

köna esugi utnöh.” Mi möta mewö ahök. Mi aiga toroqeba jii mörök, “Mönö malukugi kölnöh geiga ni nuatangöba kaman.”

⁹ Mewö jii möta miri uruñi mosöta wuatangöyök. I wuatangöba anökmö, garatanöh yuai ahöhi, mi ölna asuhuyök me qahö, yañön miangöra möri janjuñ ahök. Yañön gaun ahöba imut ehöhi, miangö tandöktandök möri ahök. ¹⁰ Miri uruñi mosöta nanqu mutukñe galöm memba kinohori, mi etkonçgita nanqu kunöh ançgota etkonçgita öne kutuba anda kösö miri silenangö ain kiripone ançgorohot. Ançgorohotka nanqu köhöikñi ketanñi mianñön mönö nanñök öne taliga yaigepñe siti köna numbuñe geyohot. Geba köna namñi strit kun toroqeba anohotka garatanöh wölañ Pitö mosöta sök alök.

¹¹ Sök aliga Pitögö uruñi tohoiga kewö jiyök, “O Kembunöh mönö garatanñi melaii kaba Herodgö böröñeyök meköm niñgiza, mi mötzal. Juda ambazipnöh nõngö silene yuai asuhumapköra mambötzei, yañön mönö yuai pakpak miangöreñök bohoni jöhöza. Nöhön döлки mi ölna möt kutuzal.”

¹² Mewö möt kutui asariiga Jongö namñi Mariagö mirinöh göröken anök. Jon miangö qetñi kun Mak qetket. Miri miangöreñ ambazip gwötpukñan tokoba Anutu köuluköba malget. ¹³ Mewö malgetka Pitönöh kaba söndaknöh kinda nanñunöh qeyök. Nanñunöh qeiga welenqeçe ambi qetñi Roda yañön kaba “Gi danñon?” jiba qesiyök. ¹⁴ Qesiba kinda Pitögö jölni möt kutuba “I-ia kazan!” jiba söngaiiba luhuba nanqu qahö öröba ösumñan miri uruñe öngöba jiyök, “Pitönöh kaba nanñunöh kinja.” ¹⁵ Jii möta yangöra “Urugi sohoi jizan,” jiget. Jigetmö, yañön bohon köla “Keu ölna jizal!” jiyök. Mewö jiiga jiget, “Mi mönö Pitögö garatanñan kinja.”

¹⁶ Mewö eraum mötketmö, Pitönöh nanqu qebayök kiniga öröba eka auruget. ¹⁷ Aurugetka böröñan söpsöp ala ölöñ almegö jiyök. Jiba Kembunöh kösö mireyök wangiri yaigepñe eröhi, kösohot mi jiyök, “Inñini buzup ki mönö bisop Jeims aka urumelenñ alaurup tosatñi yengöra jigetka mötme.” Mewö jiba engömosöta miri kungen anök. Mewö.

Pitönöh kösö miri mosöriga Herodgö irimñi sehohiyök.

¹⁸ Miri gianñiga yarö azi yehñon Pitö jaruba “Denike sömuniba sök ala anja?” jiba miangöra kahasililij aka waimanjat ketanñi mötket.† ¹⁹ Herodnöh mewöyök Pitö miwikñaimegö jii jarum bibihiba qahö miwikñaigetka azi wahibuk Pitögö galöm megeri, mi keu jakeñe ala gwötpuk qesim engiba jim teköba enguançgita enguget kömumegö jim kutum engiyök. Miangö

† 12:18: Köso azinöh ölöñ kölbawak, azi wahibuk mi mönö engugetka kömuzema. Rom gawman nupkö arenji mewö. Miangöra kahasililij aka waimanjat ketanñi mötket.

andöne Judia prowins mosöta Sisaria taonöj geba miangören malök. Mewö.

Anutunöj kiñ Herod kitipñi wanñi kömuyök.

²⁰ Fonisia prowinsgö taon qetñiri Taiö aka Saidon yeñon nenegö nupñini membingö osiba kiñ Herodkö kantri yengörenök nene yuainini bohonñi memba malget. Mewö malgetka Herodkö irimñi seholiiga Taiö Saidon kerök ak engiba nene engimegö sonjo alök. Miangöra yeñon mindiriba jitñememeurupñini melaim engigetka kambu köla kiñ Herod ekingöra anget. Angetka jembonñi qetñi Blastus jakömbuak miriñangö galömñan i mutuk engehök. Engehiga jiget, “Nini keu jim solaniinga luai ahumapkö qesibingöra kazin.” Mewö jiba jim mölöwörim ak wanñigetka jiyök, “Ölop keunini kötöngöba andöjine kinmam.”

²¹ Mewö jiiga kiñnöj keu melenj engimangö nalö mem engiiga miangörenj tokogetka nanñi silenñi menjölöba kiñ azi kembugö malukuñi köla eta jakömbuak dum tatatñe tata yengöra sösongai keu jiyök. ²² Jiiga ambazip kambu yeñon möta kewö jiba qetket, “Keu mi Anutugörenj keuya. Mi gölme azigö keuya qahö.” ²³ Mewö qetketmö, kiñnöj mewö aka Anutugö qetbuñani qañ köla qahö möpöseiba nanñi möri öngöyök. Miangöra Kembugörenj Sup garata kunñan miangörenök qei döhonöj yöhösii kömuyök. ²⁴ Mewö asuhuyökmö, Anutugörenj Buña keu mi jiba malgetka töhötmöriamñambuk aka sehiyök.

²⁵ Antiokia siti yeñon Barnabas aka Sol nanñonangö misin nup kun[§] etkigeri, yetkön mi Jerusalem mala meköyohot teköyök. Mi teköiga Jon qetñi kun Mak qetkeri, i wanñita mohotñe Jerusalem mosöta Antiokia sitinöj lilingöba kaget. Mewö.

13

Barnabas Sol yetkön misin nupkö könahiba anohot.

¹ Antiokia sitinöj tosatñan urunñini melenja urumelen könagesö aketka jitñemememñini kewöñan kezapqetok keu jiba kusum engiba malget: Qetñini Barnabas aka Simeon qetñi kun Injanñi (Grik keunöj Naijö) aka Lusius (Sairini gölmegöra), Manain (mi kembu gawönö Herod* yambuk öröröj mala qariyohot) aka Sol. ² Urumelenj könagesö yeñon Kembugö waikñi memba möpöseiba nene sinji malgetka miangörenj Urja Töröñan kewö jiyök, “Nöñon Barnabas aka Sol nup qainñi kun

§ 12:25: Antiokia yengören nanñonangö moneñ mi memba anda Jerusalem urumelenj könagesögö jitñemememurup yengö böröjine alohot. Miangöra qetñi nanñonangö misin nup kun izin. Apo 11.30 * **13:1:** Herod Antipas yanñon (yara) yambu 4 B.K.-39 A.D. miangörenj Galili aka Perea prowins yahöt mi galöm köl engiba malök.

memahotköra etkoholal. Mianğöra enjon mönö i jim teköba melaim etkigetka anmahot.”

³ Mewö jiiga köulukömegöra nene sinji mala böröjini nöröpñire algetka Kembugö ösumñan etkualöñniga melaim etkigetka anohot. Mewö.

Saiprus gölme jölanje anda nup meget.

⁴ Uña Töröñan mewö melaim etkiiga miri qetñi Selusia mianğöreñ geyohot. Mianğöreñ geba wañgenöñ öñgöyohotka opo seri öröba möröreñgögetka luhutnöñ nanğöi anda gölme jölanñi Saiprus mianğö wehön kotkotñe angotket. ⁵ Angotketka siti qetñi Salamis mianğöreñ anda Juda ambazip yengö köuluk miriñi miriñi mianğöreñ öñgöba Anutugö Buña keu jiba uru kuñgum enjiyohot. Azi qetñi Jon i mewöyök wañgirohotka yetpuk anda kaba alabaukñira malök. ⁶ Mewö mala gölme jölanñi jömukñi liliköba kutuba likepñe wehön gegene Pafos sitinöñ angotket. Mianğöreñ angota Juda azi qetñi Barjisös miwikñaiget. Yañön suña jinañ azia aka kezapqetok azi takapulakanñi malök.

⁷ Suña azi mi gölme jölanñi mianğö kiapñi qetñi Sergius Pol yangö mire tata malök. Kiap mianñön mötkutukutu azia malök. Mewö mala Anutugöreñ Buña keu mötmamgö sihimñi ahöiga Barnabas Sol köl öröm etkii yangöreñ kayohot. ⁸ Kayohotmö, Elimas, (suña memegöra qetñi Grik keunöñ mewö jimalgeri,) yañön kiapnöñ Anutu möt narim wañgibapuköra tuarenjon ak etkiba kiap uruñi keunöñ enjololon memamgö esapköyök. ⁹ Esapköiga Sol, qetñi alañi Pol qetkeri, Uña Töröñan yangö uruñi kokolak qei Elimas törörök ek kutuyök.

¹⁰ Ek kutuba kewö jiyök, “Yei! Timbiqimbilim azi gi mönö Bölöñi Tonangö moröya akzan! Satanöñ urugi isimkakaleknöñ kokolak qeiga silenöñ alal könanñi könanñi aka malakzan. Keu diñdiñi pakpakö kerökñi aka Kembugöreñ köna diñdiñi möwöramgönöñga gongimakzawi, mi mönö mosötman me? ¹¹ Mianğöra mötnöñ! Kembunöñ mönö böröñi qake aliga ösumñan turum gihiiga jegi gömölii wehön asakñi ekñamgö osiman. Yañön nalö meyöhanğö dop mönö janjuñ aka malman.” Jii mianğöreñök söñaupnöñ qakñe eta turui ömuñ köla jipjap aka ilingösöñ anda kaba böröñe memegö qesiba böröñan mezañqezan ahök. ¹² Yuai mi asuhuiga kiapnöñ mi eka Kembugö Buña keu mötmötñanğöra welipköba möt narim wañgiyök. Mewö.

Pisidiagö Antiokia taonöñ misin nup meget.

¹³ Polnöñ neñakurupñi yembuk Pafos miri mosöta wañgenöñ öñgögetka opo seri öröba möröreñgögetka luhutnöñ nanğöiga anda mala Pamfilia prowinsgö siti qetñi Perga mianğöreñ

anġotket. Mianġoreŋ anġota kinda Jonöŋ etkömosöta elenġa Jerusalem sitinöŋ lilingöyök. ¹⁴ Lilingöyökmö, yetkön Perga siti mosöta toroqeba anda Pisidia prowinsgö taon qetŋi Antiokia mianġoreŋ anġorohot. Mianġoreŋ anġota Sabat kendonöŋ köuluk miriŋine öŋgöba tarohot. ¹⁵ Tarohotka köuluk mirigö galöm yeŋön Mosesgö Köna keu aka kezapqetok yeŋgöreŋ Buzup Kimbi oyonġa welen algetka eta kewö qesim etkiget, “Azi alayahöt, etköreŋ keu kun könagesö urunini kuŋgubingöra ahöza ewö, mi mönö ölop jiyohot mötpin.”

¹⁶ Mewö jigetka Polnöŋ wahöta börö misiba kewö jiyök, “Israel kianurup aka gölme tonġi nembuk Anutu waikŋi memba möpöseimakzei, iŋini mönö kezap ala mötket. ¹⁷ *Israel ambazip kambu nanine bemnini mi Anutu. Yaŋön bömönurupnini möwölöhöm enġiiga amböskonurupninan Ijpt gölmenöŋ anda kian aka malget. Anutunöŋ nalö mianġoreŋ Israel ambazip kambu mi töhötmöriam enġiiga sehiba qetbuŋaŋinambuk aket. Mewö aketka Anutunöŋ anġöletot aka kukösumŋi kondela mianġon enġuaŋgiri Ijpt kantri mosöta yaigep kaget.

¹⁸ * “Kaba mala gölme qararaŋkölkölŋe kutuba kaba ahakeme bölöŋi aka malgetka Anutugö irimŋan seholiiga (yara) yambu 40:gö dop urubölö möta malök. ¹⁹ * Möta malökmö, töndup kaba mala Kenan gölmenöŋ kaŋgotket. Kaŋgotketka mianġoreŋ ambazip kambu 7 közöla köndenġ enġiba gölmenġini memba mendenġa isikurupnini tonġe tonġe akŋegö buŋa qem enġiyök. ²⁰ * “Mewö asuhuiga (yara) yambu 450 mianġö dop anök. Mianġö andöŋe Anutunöŋ jimtekötekögö azi kembuŋi kembuŋi kuŋgum enġiyök. Mi kuŋgum enġi mala kotketka Samuelnöŋ asuhuyök. Yaŋön jimtekötekögö azi kembu qöndökŋi aka kezapqetok azia malök.

²¹ * “Samuelnöŋ ashuba mali nalö mianġoreŋ kiŋ kembugöra uletketka Anutunöŋ azi qetŋi Sol enġiyök. Sol yaŋön Benjamin isikurup yeŋgöreŋök azi qetŋi Kis yaŋgö nahönŋa ahök aka (yara) yambu 40:gö dop kiŋ kembuŋina malök. ²² * Mi malökmö, Anutunöŋ Sol uteköba salupŋe azi qetŋi Deiwid kiŋ azi kembuŋini akŋapköra möwölöhöba kuŋguyök. Kuŋguba könaŋamŋi jim asariba kewö jiyök, ‘Nöŋön Jesigö nahönŋi Deiwid miwikŋaizal. Yaŋgö uruŋi kewöta mötpi ölop dop köl niŋgiza. Yaŋön mönö ahakmemenġi pakpak mianġoreŋ nöŋgö jitni tem köla malma.’ ²³ Anutunöŋ mönöwök Amötqeqe Tonġi melaim

* **13:17:** Eks 1.7; 12.51 * **13:18:** Jan 14.34; Dut 1.31 * **13:19:** Dut 7.1; Jos 14.1
 * **13:20:** Kemb 2.16; 1 Sml 3.20 * **13:21:** 1 Sml 8.5; 10.21 * **13:22:** 1 Sml 13.14; 16.12; Sum 89.20

nenngimapkö jiyöhi, jöhöhöhö keu mianğö öljan mönö kewö asuhuyök: Deiwidkö gwölönarökurupni yenğörenök azi qetnji Jisös asuhuiga Anutunöŋ i Israel kambu nenğö Amötqeqe Tonini aka malmapköra kuŋguyök.

24 **“Jisösnöŋ qahö asuhuiga qeljiŋe mianğören Jonöŋ mutuk kaba kewö jiba malök, ‘Ijini mönö uruŋini melenget. Uruŋini melengetka nöŋön o melun mem enğimam.’ Mewö jiba Israel ambazip kambu pakpak uru kuŋgum enğiba malök.* 25 **Mewö malökmö, yaŋön mirililik nupni mem tekömamğö aka mianğören kewö jii mötket, ‘Ijini nöngöra denöwö mötmörize? Yuai mötmörizei, nöŋön mia qahöpmö, mötket, nöngö andöne azi kun kama. Yaŋön kaiga nöŋön yaŋğö qöhöröŋe eretnji maljalaŋğöra wayangösöŋi tenğöba köna esu kösöŋi pösatmamğö qötötaŋğömam.’*

26 *“O alaurupni, Abrahamğö gwölönarökurupni aka gölme toŋi enön nembuk Anutu waikni memba möpöseimakzei, Anutunöŋ amöt qem nenngimapkö Buŋaŋi mi ali nenğören kaza.* 27 *Mianğö könaŋi kewö: Jerusalem toŋi aka galömurupnini yeŋön Jisösgö könaŋi qahö möt kutuget. Kezapqetok yenğören Buzup Kimbi Sabat kendon dop oyoŋmakzemö, mianğö könaŋi qahö möt asarimakze. Mewö tönpin maljemö, töndup galömkölköl aziurupninan Jisös kömumapkö keuŋi jim tekögetka kezapqetok ambazip yenğören keu mi mewö mianğön ölŋambuk ahök.* 28 **Yeŋön Jisös kömupkö buŋa akŋawaŋğö dop keu könaŋi jaruba kun qahö miwikŋaiba töndup “Yapmakek!” qetket. Qeta Pailötnöŋ jim teköi kömumapkö qeta uletket.*

29 **“Yaŋğöra keu pakpak ohoget ahözawi, yeŋön mönö mianğö dop aketka ölŋi ahum teköiga Jisös ipnöhök meköba eta qaksirinöŋ anda köt köteŋ uruŋe alget.* 30 *Algetmö, Anutunöŋ i kömupnöhök mem gulii wahörök.* 31 **Wahöri yambuk Galili prowinsnöhök Jerusalem sitinöŋ kageri, yenğöra mönö silim gwötpuk mianğören asuhum enğiyök. Alaurupni asuhum enğiyöhi, yeŋön nalö kewöŋe ambazip sutŋine dangunu ewö kinda könaŋi naŋğöba jim asariba malje.* 32 *Anutunöŋ Juda ambösakonurupnini yembuk yuai akŋamğö keu jim jöhöiga nini yenğö gwölönarökurupnini ahinga keu walŋi mianğö öljan mönö nalö kewöŋe nenğöra kewö asuhuyök: Yaŋön Jisös mem gulii wahöta malja. Mianğöra nenğön mianğö Buŋa ölöpni mi jim asarim enğizin.*

* **13:24:** Mak 1.4; Luk 3.3 * **13:25:** Mat 3.11; Mak 1.7; Luk 3.16; Jon 1.20, 27

* **13:28:** Mat 27.22-23; Mak 15.13-14; Luk 23.21-23; Jon 19.15 * **13:29:** Mat

27.57-61; Mak 15.42-47; Luk 23.50-56; Jon 19.38-42 * **13:31:** Apo 1.3

33 *³³“Anutunöŋ Jisösgöra keu jii Deiwidnöŋ möri Sumbara (Buŋa liŋet Sam) jaŋgö yahöt miangöreŋ kewö ohoi ahöza, ‘Göŋön nani nahöna akzani, nöŋön mi merak ambazip engöra kondelbiga eka mötze.’

Yaŋön keu miangö dop Jisös mem gulii wahörök.

34 *³⁴Jisös mem gulii kömupnöhök wahöta köhöiba mala könaŋgep kunbuk qahö kömuma. Miangö keuŋi Anutunöŋ kewö jii ahöza,

‘Ni kalem möriamni kiŋ Deiwid waŋgiba malbiga sarakŋi aka pöwöwöm köhöiba kinöhi, miangö dop mi mönö engöra tököm enjiman.’

35 *³⁵Deiwidnöŋ miangö keuŋi mi Sumbara (Buŋa liŋet Sam) kun miangöreŋ mewöyök kewö ali ahöza,

‘Nangahö wölböt azigi sarakŋi i mönö qahö mosötnöŋga kömupkö lömnöŋ qahö gisahöma.’

36 Nini kiŋ Deiwidkö könaŋi mötzin: Yaŋön malmalŋi mala Anutugö jitiŋi wuatangöba nup waŋgiyöhi, mi mem teköba nöŋ qeba kömuyök. Kömui ambösakonurupŋi yeŋgö kösutŋine löm kölgetka qamötŋan ahöba gisahöba qahöwahök. ³⁷ Deiwidnöŋ gisahöba qahöwahökmö, Anutunöŋ azi mem gulii wahöröhi, yaŋön mönö qahö gisahöyök.

38 “Azi alaurupni, miangöra keu ki mönö mötket: Anutunöŋ Jisösgöra aka siŋgisöndokŋini mosöta saŋgoŋma. Neŋön miangö Buŋaŋi jim asarim enjizin. ³⁹ Mutuk ‘Mosesgöreŋ Köna keu wuatangöba mewö mianön solanŋi akin,’ jiiŋmö, mi inöŋ wainöŋ qaköba osiba malin. Mewö malinmö, nalö kewöŋe denike yeŋön Jisös möt nariba yambuk qekötahömei, Anutunöŋ mönö körek yeŋgö keuŋini jim teköiga solanime.

⁴⁰ Kezapqetok ambazipnöŋ keu jiba ohoget ahözawi, Anutunöŋ miangö dop likepŋi melenŋi qakŋine öŋgöbapuköra mönö galömnŋini mem aŋgume. Keu mewöŋi kun kewö,

⁴¹ *⁴¹‘Nöŋön engö malmal nalöŋe aŋgöletot qainŋi kun memam.

Kunŋan miangö keu buzupŋi jii mötpeak, mi ölni akŋapkö qahö möt naribeak.

Miangöra keu mi memba et ala jijiwilit ahakzei, inŋini mönö öne uba eka welipköba ayuhume.’”

⁴² Polnöŋ mewö jiiga Barnabasbuk köuluk miri mosöta erohotka tosatŋan kewö qesim etkiget, “Nini keu ki kunbuk mötpingö mötzin. Miangöra mi Sabat kendon euneanön ölöp toroqeba jiyohot mötpinak.” ⁴³ Köuluk mireyök eta deŋgetka ambazip gwötpukŋan Pol aka Barnabas könaŋire etkuatangöget. Tosatŋan Juda ahuba malget aka tosatŋan kian kantrinöŋ ahuba könaŋgep Juda ambazip aka malget. Yeŋön

* **13:33:** Sum 2.7 * **13:34:** Ais 55.3 * **13:35:** Sum 16.10 * **13:41:** Hab 1.5

etkuatangögetka eraum möta qamban keu kewö enjyohot, “Anutunöŋ kalem möriam enjyöhi, miangöreŋ mönö böŋ qeba kinme.”

⁴⁴ Sabat kendon kun kam kuŋguyöhi, miangöreŋ taon gölme miangö ambazipni mi kölolohoba “Anutugö Buŋa keu mötpin!” jiba kaŋgota tokoget. ⁴⁵ Kaŋgota tokogetka Juda yeŋön ambazip kambuŋi kambuŋi engeka irimŋini seholim teköyök. Seholim teköiga Polgö keuŋi qemegö jitnakölik aka goranora (noragora) jiba mepaqepaik ak etkiget. ⁴⁶ Mewö ak etkigetka Pol Barnabas yetkön awösamkakak kinda köhöiba keu kewö jiyohot, “Anutunöŋ nup netkiiga Buŋaŋi mutuk Juda ambazip engöra jiinga dop kölbawakmö, inini mi andö qeba laŋ kewö jize, ‘Nini malmal köhöikŋe aŋgotpingö dop qahö.’ Miangöra mötket, netkön mönö engömosöta kian kantriŋi kantriŋi yeŋgöreŋ eleŋda anbit. ⁴⁷ *Kembunöŋ miangö keuŋi kewö jiba jim kutum neŋgyök,

‘Nöŋön kuŋgum gihibiga kian kantri yeŋgö asakŋina aka amötqeqegö könaŋi jim asariba malnöŋga gölme göraŋi göraŋi dop köl teköi likeplikep eu emu yeŋön letota Suepkö buŋaya akŋe.’”

⁴⁸ Mewö jiyohotka gölme toŋi Juda qahö malgeri, yeŋön möta uruŋini ölöwahi Kembangöreŋ Buŋaŋi möpöseiget. Möpöseiba malmal köhöikŋangö buŋa akŋegöra Anutunöŋ möt kewöt enjyöhi, yeŋön miangö dop uruŋini melenŋa Jisösgö Buŋaŋi möt nariget.

⁴⁹ Möt narigetka Kembangö Buŋa keu jim sehiŋgetka prowins pakpak mi dop köla anök. ⁵⁰ Ölöp anökmö, Juda yeŋön taongö azi ipni aka ambi öŋgöŋgöŋi Anutu göda qeba malgeri, miengö uruŋini esiba kuŋguba Pol Barnabas mohotŋe sesewerowero ak etkiba miri gölmeŋineyök etkuatangöget. ⁵¹ *Anbitkö aka nesampurekŋini kondela kewö jiyohot, “Netkön engö gölmenöŋ kaziga sölbuham köna tambönire ahözawi, mi mönö tim töŋjöratziga nannine lilingöba gema.” Mewö jiyohotka könaŋamniri solanŋi möt kutugetka anda Galesia prowins uruŋe siti qetŋi Aikoniam miangöreŋ aŋgorohot. ⁵² Aŋgorohotmö, gwarekurup Antiokia taonöŋ malgeri, Uŋa Töröŋan yeŋgö uruŋini kokolak qei önöŋi qahö söŋgaiba malget. Mewö.

14

Aikoniam sitinöŋ uru kuŋgum enjyohot.

¹ Pol Barnabas yetkön Aikoniam sitinöŋ aŋgota mewöŋanök Juda yeŋgö köuluk mire öŋgöba Buŋa keu jiyohot. Jiyohotka

* **13:47:** Ais 42.6; 49.6 * **13:51:** Mat 10.14; Mak 6.11; Luk 9.5; 10.11

Juda aka kian kantri ambazip yengörenök kambu sehisehini yenön urunini melenđa Jisös möt nariget. ² Möt narigetmö, Juda ambazip qahö möt narigeri, yenön gölme toni Juda qahö malgeri, miengö urunini esiba aposol urunöy gege ak etkimegöra urunini kunğuget. ³ Kunğugetka töndup nalö köröpni miangören mala Kembu möt nariba awösamkakak kinda Buñañi jiba malohot. Kembu kalem möriamñangö keunji jim asariyohotka keunjiri nanğöba ösumñi börönjire ali aiwesök anğöletot meyohotka asuhuget. ⁴ Mewö asuhugetka taongö ambazipñan jula denget. Tosatñan Juda jitñememe yembuk öröröy jöhögetka tosattñan aposol yetpuk toroqeba kinget.

⁵ Mewö arönđa kingetka gölme toni aka Juda ambazip kianni yenön wahöta jitñememeurupñini yembuk urumohot aka melaimelai azi aposol mi “Kötnöy gila etkubin!” jiba mötmöriget. ⁶ Mewö mötmörigetka möta ölöy köla tököba Likaonia prowinsnöy anohot. Miangören anda taon qetñiri Listra aka Derbe aka miri liliköm etkiba tat angeri, miangören angorohot. ⁷ Miangören anğota Ölöwak Buña jim asariba uru kunğum engiba malohot. Mewö.

Listra taonöy Pol Barnabasgöra bem qetket.

⁸ Listra taonöy azi kun köna yahötñi kömukömuñi malök. Mi nam körö uruneyök lokon asuhuba nalö kungen köna qahö tiba öne tatmalök. ⁹ Polnöy Buña keu jii möta tari uba könañamñi kewö eka mötmöriyök, “Yangö urunje mötnariñi ahöm wanğiyöhanğöra aka ölöp ölöwakña,” mewö jiyök. ¹⁰ Mewö mötmöriba qet ketañi qeta jii mörök, “Mönö wahöta kinöy.” Mewö jii pörañ ala wahöta anda kaba kinök.

¹¹ Polnöy mewö aiga ambazip kambu yenön mi eka Likaoonia keunjine kewö silata jiget, “Bem yetkön letota azi silebuk aka sutnine asuhuba nengören eta maljahot.” ¹² Mewö jiba Barnabas qetñi bem bohonñini qetñi Zus qetket aka Polnöy jitñe memba keu jiyöhanğöra aka bem qetñi Hermes qetket. ¹³ Mewö qetketka bem Zus yangö jöwöwöl jikenji taon wösöñe ahöyöhi, miangö jike nup galömñan bulmakau azinji enğuanğita kayök. Mewö kaba ila kösatorom memba kaba taon kiripo nanğunje kinda ambazip kambu yembuk jakenöy ala jöwöwöl ohom etkibingö aket.

¹⁴ Mewö aketka aposolyahöt yetkön mi möta “Qahö dop kölja,” jiba qetala silepökenjiri munjurata ösumñiran ambazip kambu urunje anda qerohot. ¹⁵ *Qeta kewö jiyohot, “Aziurup, injini mönö denöwögöra aka yuai mewöñi akze? Niri mewöyök injini ewö gölme azi töhöna akzit. Niri Anutugö Ölöwak Buña jim asarim engizit. Miangöra injini mönö bem omanji

* 14:15: Eks 20.11; Sum 146.6

andö engume aka uruñini melenđa Anutu malmal Tonanğören qekötahöme. Anutu malmal Tonan Suep, gölme, köwet aka miengö uruñine yuai pakpak ahözawi, mi miwikñaim engii malje. ¹⁶ Gölmeñi gölmeñi pakpak yeñön mönöwök mala kotkeri, Anutunöñ i qahö anğön köl engii nanñini imbinjananğö dop malmalñini ilingösön malget.

¹⁷ “Qahö anğön köl engiyökmö, töndup tönpin jipjap qahö malget. Qahöpmö, Anutunöñ yuai ölöpnji ölöpnji ak engiba malök. Yanñon jiiga kie yöhöi wehön qei töhötmöriamñan nalöñi nalöñi asuhui nem söngaip aka mewö mianñon uruñini kuñgum engii malget. Mewö malgetka nanñi könanji mötmegöra kalemñi mi kondel engiba mewö mianñon dangunuñi ali malget.” ¹⁸ Yetkön mewö jiba ambazip kambu jöwöwöl ohom etkibepuköra jarañbarañ tiba jim susuhum engiyohotka löwöriba mosötket. Mewö.

¹⁹ Listra yeñön Pol Barnabas etkömosötketmö, Juda ambazip tosatñan Antiokia taon aka Aikoniam siti mietköreñök kanğota ambazip kambu urunöñ gege ak engiget. Ak engiba yembuk öröröñ luhuba Pol kötnöñ qeba “Mönö kömuza!” jiget. Mewö jiba örörahöba taon andöñe eta mosötket ahöyök. ²⁰ Ahöyökmö, gwarek yeñön kanğota liliköm wanğigetka wahöta anda taonöñ öngöyök. Mianğöreñ öngöiga ahöyohot miri gianjiiga Barnabasbuk Derbe sitinöñ anohot.

Siriagö Antiokia sitinöñ lilingöba kayohot.

²¹ Derbe sitinöñ Ölöwak Buña jim asariba uruñini kuñgum engiyohotka gwötpukñan uruñini melenđa Jisösgö gwarekurupñi aket. Mewö aketka Derbe taon mosöta Listra Aikoniam aka Antiokia taon miengöreñ lilingöba anda enğehot. ²² Enğeka tata miri dop liliköba Jisösgö gwarekurup yeñgö uruñini nanğöba mem köhöiyohot. Kembu möt narigeri, yambuk qekötahöba kinmegö qambañ keuñi engiba kewö jiyohot, “Nini mönö iririkwarörök qakñe (lömböt könanji könanji miwikñaiba) mala pañpanğöba Anutugö bemtohoññon eu anğotpin.” ²³ Urumelenj könagesö dop jitñememeurupñini möwölöhöba galöm malmegö könanji kusum engiba kuñgum engiyohot. Kuñgum engiba Anutugöra nene sinji mala gwarek kambu yeñgöra köuluköba Kembu möt narigeri, yanğö böröñe al engiyohot.

²⁴ Al engiba engömosöta Pisidia prowins kutuba anda Pamfilia prowinsnöñ anğorohot. ²⁵ Mianğöreñ anğota Perga sitinöñ tata Buña keu jiba uruñini kuñgum engiba Atalia taonöñ geyohot. ²⁶ Mianğöreñ geba wanğenöñ öngöyohotka opo seri öröba möröreñğögetka luhutnöñ nanğöi anda mala Antiokia sitinöñ anğorohot. Antiokia urumelenj könagesö yeñön i Anutugö kalem möriam uruñe misin nup memahotköra mutuk

Anutugö böröñe al etkigetka engömosöta anohot. Anda liliköba nupñiri mi mem teköba kunbuk nanñire sitinöñ lilingöba kayohot.

²⁷ Miangören kaba urumelen könagesö köl öröm engiyohot. Köl öröm engiyohot tokogetka keu kösohotñiri kewö jiyohot, “Anutunöñ netpuk mala anğöletot ketanji ketanji aka memba malök. Yanön nam köl netkiu nup meziga kian kantriñi kantriñi yeñön Jisös möt narimegöra nanju öröm engii uruñini melenget.” ²⁸ Kösohotñiri mewö jiba gwarek kambu yembuk nalö köröñji qem köriba tata malohot. Mewö.

15

Kian kantri yeñgöra aka zioznöñ julmamgö ahök.

¹ *Antiokia malohotmö, Judia prowinsnöñök ambazip tosatñan eta kaba könahiba urumelen ambazip kewö kusum engiget, “Inini Mosesgören Köna keugö dop Anutugö aiwesökñi silenine qahö yandime ewö, mewö mönö Suepkö buñaya akingö osime.” ² Mewö kusum engigeranğöra aka anğururuk ahuiga Pol Barnabas yetkөн tuarenjoñ ak engiba könöpñambuk jim engiyohot. Jim engiyohotka urumohot qahö aka keu kewö jöhöba jiget, “Nini mönö Pol Barnabas aka jitñememe tosatñi melaim engiinga Jerusalem sitinöñ öngöba keu mi memba aposol aka Jerusalem urumelen könagesögö jitñememe yeñgören anda jime.”

³ Keu mewö jöhöba jigetka urumelen könagesö yeñön i melaim engigetka könanöñ anget. Anda mala Fonisia aka Samaria prowins yahöt mi kutuba könanöñ könagesöñi könagesöñi engekot. Engeka kian kantri tosatñi yeñön uruñini melengeranğö buzupñi jiba urumelen kambu yeñgöra sösöñgai ketanji al engiget. ⁴ Al engiba anda mala Jerusalem sitinöñ anğotket. Anğotketka aposol aka jitñememe yeñön urumelen könagesö yembuk köl öröm engiget. Köl öröm engigetka kösohotñini kewö jiget, “Anutunöñ nam köl nenñii misin nup meinga nembuk mala anğöletot ketanji ketanji aka memba malök.” ⁵ Kösohot mi jigetmö, Farisi (Köna keugö kapankölköl) kambunöhök urumelen azi tosatñan wahöta kewö jiget, “Kian kantri yeñön uruñini melengeri, yeñgöra mönö kewö jim kutubin: Yeñön mönö Anutugö aiwesök silenine yandiba Mosesgören Köna keu pakpak wuatangöba malme.” Mewö.

Jerusalem totoko ala anğururuk keu mindiñgöget.

⁶ Mewö jigetka aposol aka jitñememe yeñön keu mi jim kewötpingö tokoget. ⁷ *Tokoba goranora (noragora) keu

gwötpuk jiba jitrakölik aket. Mi aketka Pitönöŋ wahöta kewö jii mötket, “Azi alaurupni, Anutunöŋ mutuhök sutnine nup mendenđa möwölöhöm niŋgiba nöŋgöra kewö jiyök, ‘Gi mönö kian kantrinöŋ anda Ölöwak Buŋa keu jim asarim enŋinöŋga yeŋön uruŋini melenđa Kembu möt narime.’ Injini keu mi mötze. ⁸ *Anutunöŋ ambazip pakpak urunini möt kutuzawanön könaŋamŋi kondela Uŋa Töröŋi Juda ambazip neŋgöra melaiiga eröhi, mianŋö dop mönö kian kantri ambazip yeŋgöra mewöŋanök i melaii uruŋine geyök.

⁹ “Melaii geiga mewö mianön Juda ambazip qahö engek soriba kantri tosatŋi qahö qepureim enŋiyök. Qahöpmö, yeŋön Anutu möt narigetka siŋgisöndokŋini mosöta uruŋini saŋgoŋniga sarakŋi aket. ¹⁰ Mianŋöra injini mönö wuanöŋgöra Anutu esapesapnöŋ al waŋgibeak? Wuanöŋgöra gwarek dölökŋi yeŋgö qakŋine tem könjöŋ toroqeba alinga aŋgubeak? Tem könjöŋ mewöŋi mi nanine ambösakoninan me naninak mewöyök aŋgubingö dop qahö akmalin. ¹¹ Mewö qahöpmö, kewö möt narizin: Kembu Jisösgö kalem möriamŋan mönö Anutu nam köl waŋgiiga amöt qem neŋgiiga Suepkö buŋaya akin. Kian kantri yeŋön mewöyök köna mohot miyök wuataŋgöba letota Suepkö buŋaya akingö möt narimakze.”

¹² Mewö juiga kambu yeŋön lökŋanök keu jaruba bök tatket. Tatketka Pol Barnabas yetkön keu kösohotŋiri kewö jiyohot, “Anutunöŋ nam köl netkii kian kantrinöŋ anda sutŋine misin nup meziga aiwesök aŋgöletot ketanŋi ketanŋi asuhuget.” Mewö jiyohotka kezap ala mötket. Mewö.

Bisop Jeimsnöŋ keu jii mötket.*

¹³ Pol Barnabas yetkön kösohotŋiri jim teköyohot mötketka Jeimsnöŋ keu kewö jiyök, “Azi alaurupni, nöŋön keu jibi kezap ala mötket. ¹⁴ Anutunöŋ nalö mutukŋi kian kantri ambazip mesohol köl enŋiba sutŋineyök ambazip nanŋaŋgöra möwölöhöm enŋiiga qetŋi bisiba könagesöŋi toroqeget. Anutunöŋ mewö aka könaŋamŋi kondel neŋgiyöhi, Saimon Pitönöŋ mianŋö keuŋi jii mötzin. ¹⁵ Keu mewöŋi mi kezapqetok ambazip yeŋön mewöyök naŋgöba jize. Yeŋön keu kun kewö ohoget ahöza,

¹⁶ *Mianŋö andöŋe nöŋön lilingöba kaba kinŋ Deiwidkö kantri tohoŋi kunbuk memba wahötмам.

Yaŋön mutuk jakömbuak koumŋi qeba ambösakonini galöm köl enŋiiga koumŋan buratiba tiŋgita erökmö, nöŋön

* **15:8:** Apo 2.4; 10.44 * **15:12:** Bisop, Grik keunöŋ episkopos, nanine keunöŋ jeŋalöm me inspekta. Yaŋön zioz nup pakpakö mindimindiri galömŋi akza. Jeims kianön Jisösgö gwarekŋi qahöpmö, Jisösgö munŋi. * **15:16:** Amos 9.11-12

mi kunbuk möhamgöba kuᅅgubiga kantrinöᅅ ölöwaka kinma.

17 Mi kewö asuhumapköra akᅅam: Ambazip kambu tosatᅅi pakpak yeᅅön Kembu jarume.

Kian kantri pakpak nani buᅅani akᅅegöra engoholali, yeᅅön Kembu ni göraim niᅅgime.

Kembu nöᅅön mewö jizal aka mianᅅö dop kantrinini mem ölöwakᅅam.

18 Mewö ahakzali, mi mönö möpᅅaᅅgö möpᅅeyök möta kota malje.’

19 “Mianᅅöra Jeims nöᅅön keu mi kewöta mötmötnan kewö möta jizal: Kian kantri ambazip uruᅅini Anutugöreᅅ melenjei, neᅅön mönö lömböt köᅅjöᅅ ketanᅅi yeᅅgö qakᅅine alinga qahö dop kölma. 20 *Mewö qahöp mö, yeᅅgöra kimbi kewö ohoinga dop kölma: Yeᅅön sömbup busuᅅi bem lopionᅅö naluk buᅅa qeba könaᅅine algetka ösumᅅinan walöᅅnöhi, mi kude neme. Sero yoᅅgorö kude akᅅe. Sömbup jölᅅi qeᅅeᅅaᅅgö busuᅅi aka sep mi kude neme. Yuai 4 mi mosötmegöra jim köhöibinak.

21 Mosesgö Köna keu mi mönö möpᅅaᅅgö möpᅅeyök miri dop jim asariba kota maljin. Mi Sabat kendon dop köuluk mirinine oyoᅅda mörakzin. Mianᅅöra keu 4 mi ölop qahö mosötpin.” Mewö.

Jerusalem totokonöᅅ kian kantri yeᅅgöra kimbi ohoget.

22 Jeimsnöᅅ mewö jiiga aposol aka jitᅅememe yeᅅön könagesö pakpak yembuk keu mi mötket dop kölök. Mötket dop köliga sutᅅineyök azi tosatᅅi möwölöhöm engiba Pol Barnabas yetpuk mohotᅅe Antiokia sitinöᅅ melaim engibingöra jiget. Mewö jiba azi qetᅅi Judas qetᅅi alaᅅi Barsabas aka Sailas möwölöhöm etkiget. Azi yahöt mi urumeleᅅ kambugö jitᅅememe azia ahot. 23 Azi mi melaim etkibin jiba kimbi kun kewö ohoba böröᅅire alget,

“Mötnaripkö kian alaurupnini, Antiokia siti aka Siria aka Silisia gölmenöᅅ maljei, neᅅön engö jölöᅅini jizin. Aposol neᅅön mötnarip könagesögö jitᅅememe yembuk engö urumeleᅅ alaurupᅅina akzin. Mewö embuk keu eraum mötpingöra kimbi al engizin.

24 Nanine ambazip tosatᅅi qahö jim kutum engiinga nannᅅinök neᅅgömosöta engöreᅅ kaba uruᅅini kuᅅguba keu murutᅅi kekelolo engigetka uru mötmöᅅnini siksauk aiga mörin.

25 Mianᅅöra nini köreᅅᅅanök totoko ala urumohot ahin dop kölök. Dop köliga azi yahöt meköba melaim etkiinga wölböt alayahöt Barnabas Pol yetpuk engöreᅅ kame.

* 15:20: Eks 34.15-17; Lew 17.10-16; 18.6-23

- 26 Barnabas Pol yetkôn nanine Kembu Jisös Kraistkö qetnjanğöra aka malmalniri kölejnohotka tosatnjan etkuget kömumbitkö ahot.
- 27 Nini Judas Sailas melaim etkiinga kaba keu miyök toroqeba jitnön jiyohotka mötme.
- 28 Uña Töröni aka neñon keu kewögöra urumohot ahinga dop kölja: Engö qaknine lömböt könjön qahö toroqeba albin. Keu bohonni 4 miyök wuatangöme. Mi ongitketka julbinbuk.
- 29 Keu 4 mi kewö: Sömbup busuñi bem lopiongö naluk buña qeba könanjine algetka ösumninan walöjnöhi, mi kude neme. Mewöyök sep me sömbup jölñi qeçenğö busuñi mi kude neme. Sero yonğorö kude akñe. Yuai 4 mi mosöta andö qegetka urumohot ahinga Anutunön kötuetköm enjiiga ölöwaka malme. Mönö uru bönjön malme.” Mewö.

Keu memba angetka Antiokia siti yeñon söngaiget.

- 30 Kimbi mewö ohoba melaim enjigetka anget. Köna anda geba Antiokia sitinön angotket. Anğota urumelen könagesö köl öröm enjigetka tokoget. Tokogetka kimbi mi enjigetka oyonget.
- 31 Mi oyongetka miangöra amqeba urukölalep möta söngaiget.
- 32 Judas Sailas yetkôn nanñirak kezapqetok azia mala goro keu gwötpuk enğiba urugö nanğonğö keu jiba mem köhöim enjiyohot. 33 Mem köhöim enğiba nalö tosatñi miangören toroqeba malohot. Malohot teköiga urumelen alaurup yeñon “Lualbuk anmahot,” jiba melaim etkiget. Jerusalem malohotka melaim etkigeri, Judasnön mönö yeñören lilingöyök.
- 34 (-)†

- 35 Pol aka Barnabas yetkôn toroqeba Antiokia sitinön mala ambazip tosatñi gwötpuk yembuk Kembugören Buña keu kusum enğiba uruñini kuñgum enğiba malget. Mewö.

Pol aka Barnabas yetkôn deñnohot.

- 36 Mewö malgetmö, nalö tosatñi teköiga Polnön Barnabasğöra kewö jiyök, “Netkôn taon miri pakpak liliköba Kembugören Buña keu jim asariba maliri, mönö miangören lilingöba urumelen alaurupniran denöwö maljei, mi ölop anda eka mötpit.” 37 Mewö jiiga Barnabasnön Jon qetñi alañi Mak qetkeri, i mewöyök wañgita mohotñe anbingö mörök.

- 38 *Mewö mörökmö, Jonön mutuk Pamfilia taonön löwöriba etkömosöta yetpuk toroqeba nup qahö meyök. Miangöra Polnön i wañgita anbingö möri qahö dop kölök. 39 Qahö dop kölīga anğururuk aka uruñiri könöp jeiga deñnohot. Deñda

† 15:34: Tosatnjan toroqeba jabö v 34 kewö alje: Lilingöyökmö, Sailasnön keuñi jöhöba toroqeba miangören malök. * 15:38: Apo 13.13

Barnabasnöŋ Mak waŋgita geba waŋgenöŋ öŋgöyohotka opo seri öröba möröreŋgögetka luhutnöŋ naŋgöi gölme jölanŋi Saiprus miangöreŋ anohot. ⁴⁰ Anohotmö, Polnöŋ azi qetŋi Sailas meköiga urumelen alaurup yeŋön Kembugö böröŋe al etkiba kalem möriamŋan sel jöhöm etkimapköra jigetka mosöta anohot. ⁴¹ Anda mala Siria aka Silisia prowins yahöt mi kutuba liliköyohot. Liliköba Polnöŋ urumelen könagesöŋi könagesöŋi engeka mem köhöim enŋiba malök. Mewö.

16

Timotinöŋ Pol aka Sailas yetpuk toroqeyök.

¹ Polnöŋ liliköba anda mala taon qetŋiri Derbe aka Lистра miangöreŋ aŋgorök. Lистра aŋgota miangöreŋ gwarek kun qetŋi Timoti miwikŋaiyök. Namŋan Juda urumelen ambia ahökmö, iwiŋan Grik azia. ² Polgö azi alaurupŋan Lистра aka Aikoniam malgeri, yeŋön Timotigö könaŋi jim ölöwaka jiget mörök. ³ Mewö jiget möta waŋgiri mohotŋe anmamgö mörök. Mi mörökmö, Timotigö iwiŋan Grik azia malöhi, mi körekŋan möt teköget aka miri gölme miangöreŋ Juda ambazip gwötpuk malget. Miangöra yeŋön Pol jim waŋgibepüköra Timoti waŋgita Anutugö aiwesökŋi sileŋe yandiyök. ⁴ Yandiiga anda taon aka miri dop aŋgotkeri, miangöreŋ Jerusalem mindimindiri totokogö keuŋi jiget. Aposol aka Jerusalem urumelen könagesögö jitŋememe yeŋön keu jöhöm köhöigeri, mi wuatangömegöra jim kutum enŋiget. ⁵ Mewö lilikögetka Jisösgö könagesöŋi könagesöŋi miri dop malgeri, yeŋgö mötnariŋŋinan köhöiyök. Mewö köhöiba Buŋa keu jigetka tosatŋan uruŋini melenŋa wehön dop kam toroqeyetka kambuŋinaŋgö jaŋgöŋan qariba öŋgöyök. Mewö.

Anutunöŋ Pol gaunöŋ kutum wasöriŋa Yurop anget.

⁶ Liliköba mala “Eisia prowinsnöŋ anda Buŋa keu jim asaribin,” jigetmö, Uŋa Töröŋan soŋgo ala aŋgön köl enŋiyök. Miangöra yeŋön toroqeba anda Frigia aka Galesia prowins yahöt mi öne kutuba etkongita anget. ⁷ Anda mala Misia gölme göraŋe aŋgota Bitinia prowinsnöŋ aŋgotpingö mötketmö, Jisösgö Uŋa Töröŋan miangöreŋ anmegö urumohot qahö ahök. ⁸ Urumohot qahö aiga mosöta anda Misia gölme öne kutuba köwet jitŋe geba Troas taonöŋ aŋgotket. ⁹ Troas aŋgota sunŋem gaun ahögetka Anutunöŋ Pol kutum wasöriŋa imut kun kewö ehök: Yurop azi kunŋan Masedonia likepŋe kinda ohola kewö jiba köuluköm waŋgiyök, “Gi mönö köwet kutuba Masedonia gölmenöŋ kaba bauköm nenŋiman.”

¹⁰ Polnöŋ jemeleŋ imut mi ehiga nini miangö könaŋi kewö möt kutuba jiin, “Anutunöŋ mönö nenŋohola köwet kutuba

Yurop uruŋe anda Ölöwak Buŋa Masedonia prowinsnön jim asarim enġibingöra jiza.” Mewö jiba mianġoreñök mosöta anbingö mötmöriba amqein. Mewö.

Filipai ambi Lidianön uruŋi meleşnök.

¹¹ Neñön amqeba geba waŋgenön öngöinga opo seri öröba möröreñgögetka luhutnön nanġöi Troas siti mosöta anda diŋdiŋanök Samotres gölme jölanŋe anġorin. Anġota ahöba miri ġianġiiga toroqeba anda Neapolis sitinön anġorin. ¹² Mianġoreñ anġota waŋgenöhök eta köna anda Filipai sitinön anġorin. Rom ambazip yeñön mönöwök kaba Filipai siti mi memba mianġoreñ malmal tatatŋini algetka Masedonia prowinsgö siti ketanġi ahök.* Nini Filipai anġota wehön tosatŋi mianġoreñ malin.

¹³ Mianġoreñ mala Sabat kendonön siti kiripo yaigepŋe anin. Mianġoreñ anda Juda yeñön o sakŋe tokoba Anutu köulukömakzei, mewö mötmöriba geba rowoŋqeŋe kunön anin. Anda ambi tokoba tatkeri, i enġeka tata eraum möta Anu-tugöreñ Buŋa keu yeŋgöra jiinga mötket. ¹⁴ Mötkeri, yeŋgö sutŋine ambi kun qetŋi Lidia malök. Yañön Taiataira sitinöhök Filipai kaba opo pisikŋi gugakgugak aködammunġambuk tokoba bohonġi memegöra ala malök aka Anutu waikŋi memba möpöseiba malök. Kembunön uruŋi mem amqeiġa Polnön keu jiyöhi, mianġöra sihimŋan ahui kezap ala möta anġön kölö. ¹⁵ Anġön köli nanġi aka saiwaurupŋi o melun mem enġiinga qesim neŋgiba kewö jiyök, “Inġini nönġöra ‘Kembu möt narizal,’ jize ewö, mönö ölöp kaba nönġö mire öngöba tata nene namba ahöme.” Mewö jiba kapan köla qesim neŋgiyök. Mewö.

Pol Sailas yetkön kösö mire tarohot.

¹⁶ Nini nalö kunön köuluk rowoŋqeŋeŋe gebingö köna namŋe aninga welenqeŋe ambi kunön miwikŋaim neŋgiyök. Ambi mi andö lawönġambuk mala ambazip könaŋini aukŋe jim miwikŋaimamgö mörök. Mi möta kezapqetok keu asambötŋi jim miwikŋaiba mewö mianġön moneŋ yuai mi gwötpuk öröba mali tourupŋi yeŋgö böröŋine geyök. ¹⁷ Yañön Pol aka nini neŋgeka neŋgö andönine kaba kewö jiba qerök, “Azi kienön Anutu öngöŋgönġi ketanġanġö welenni qeba Suepkö buŋaya akingö könaŋi jim asarim enġimakze.” ¹⁸ Mewö jiba sömaŋi gwötpuk qeta malök. Mi malökmö, Polnön tököba mianġöra sihimbölö mörök. Mi möta nalö kunön liliŋgöba ömeŋi kewö jim kutum waŋgiyök, “Ni Jisös Kraistkö qetŋe jizal: Gi mönö ambi kianġö

* **16:12:** Masedonia prowinsgö siti bohonġi mi Tesalonaika. Distrik mutukŋanġö siti bohonġi mi Amfipolis aka siti keta bölöġkŋi kun Filipai. Rom yeñön Filipai mi Itali ewö galöm köl enġiget. Griik miri tonġi yeñön nanġine gölmenönġi kian ewö aka malget.

uruneyök kota anöj.” Mewö jim kutum wanğii miangörenök kota mosöta anök.

¹⁹ Mi anökmö, ambi tourupņan mi möta moneņ yuai öröbingö kōnaņi jöpköyöhi, mi miwikņaiba irimņini sehohiyök. Irimņini sehohiiga Pol Sailas etkēmembra jöhöba maket sombemņe öröm etkiba galöm azi yenğö jenine etkuanğita anget. ²⁰ Etkuanğita anda keu jake galöm yenğö jenine al etkiba silenjire keu kewö ala jiget, “Nini siti kianğören luainöņ maljinmö, azi yahöt kietkōn kaba eņololon ak neņgimakzahot. Yetkōn Juda azia akzahot ²¹ aka Juda silikņini kusum neņgimakzahot. Nini Rom mindimindiri kantrigö tohoņ toņi akzin. Miangöra nini silikņini mi ölop qahö möt aņğōn kölbin. Mi memba wuatangöbingö soņgo ahöi osizin.”

²² Silenjire keu mewö aka jim etkigetka ambazip kambu yenön mewöyök wahöta mindiriba qetal etkim köhöiget. Qetal etkim köhöigetka galöm yenön kuņgum eņgigetka sileötaņiri öröba munjukunjuritket aka jim kutum eņgigetka arawambu kömbinöņ etkuget. ²³ Gwötpuk etkum teköba kösö mire al etkibingö etkuanğita wahibuknöņ ölopņanök galöm mem etkimapkö jim kutum wanğiget. ²⁴ Mewö jim kutum wanğigetka möta etkēmembra kösö miri bibiņe miri uruņi kunöņ anda kōnayahöņiri ip özöpaņ† sutņire ala kösönöņ jöhöba miri uruņi miangö naņguņi yahöt mi ki misigetka tarohot. Mewö.

Kösö miri galömnan uruņi meleņnök.

²⁵ Pol Sailas yetkōn mewö tarohot. Tata mala suņgem bibiņi aiga miangören Anutu köuluköba liņet köla möpöseiba malohotka kösö azi köreķnan kezap ala mötket.

²⁶ Mewö aketka miangörenök wölaņ kenöņ (naņ) ketanņi giliga kösö mirigö tandöņi pakpak anjaņanjan kölget. Mewö kölgetka miangörenök naņgu pakpak talgetka kösö azi pakpak yenğö ain tapeņņinan (muņgamuņga) lolohoba erök. ²⁷ Mewö asuhuiga kösö miri galöm yaņön gaun uruneyök wahörök. Wahöta kösö mirigö naņguņi pakpak tal tekögeri, mi eka jiyök, “Kösö azinöņ an teköze me denöwö?” Mewö jiba mötmöriba jönömņi unduiga bimgö sou ketanņi mi kupinņeyök öröba nanņi aumamgö ahök.‡ ²⁸ Nanņi aumamgö ahökmö, Polnöņ pauņpauņ teriņgöba kewö jiyök, “Nini köreķnanök ki tatzin. Mönö nangi silegi öne kude ayuhuman.”

²⁹ Mewö jii möta kiwa wanğimegöra qesii wanğigetka ösumņan kösö miri uruņe anda jönömņi unduiga Pol Sailas yetkö kösutņire anda simin köl etkiyök. ³⁰ Simin köl etkiba

† 16:24: Ip özöpaņnöņ kōnaņiri yöhöraköiga osiba tarohot. Imutņi eķnan.

‡ 16:27: Kösö azinöņ ölöņ köliga galömnı mi keu jakeņe ala qegetka salupņe sihibölö möta kömuzapma. Nanņi gamuņi möta aubawak, mewö amqeba kömumbawak.

kösö mireyök etkuangita eta kewö qesim etkiyök, “Azi ketanj yahöt, ni mönö denöwö akiga Anutunöj amöt qem ninjiiga letotpilenjak?”

³¹ Qesim etkiiga jiyohot, “Mönö urugi melenäda Kembu Jisös möt narim wanjinönga gi aka saiwaurupkan mewöyök letota Suepkö bujaya akje.” ³² Mewö jiyohotka miriñe angetka könagesourupñi pakpak yembuk tokogetka Anutugören Buja keu jiyohot mötket. ³³ Jiyohot möta sungemgö aua miangörenök etkuangita anda uziniri sanjoñnok. Sanjoñniga miangörenök i aka saiwaurupñi pakpak mi o melun mem engiyohot. ³⁴ O melun mem engiyohotka etkuangiri nene mire öngöba nene ohoba ala etkiyök. Etkiba nanñi aka saiwaurupñi yeñön körek Anutu möt narigerangöra sösoñgai aket. Mewö.

Kösö mireyök közöl etkigetka erohot.

³⁵ Miri gianjiiga keu jake galöm (majistreit) yeñön opotöröp melaim engigetka kösö mire kaba kewö jiget, “Azi yahöt mi mönö pösat etkinönga etmahot.”

³⁶ Mewö jigetka wahibuknöj kaba buzup mi Polgöra kewö jii mörök, “Majistreit galöm yeñön keu kewö alget kaza: Injiri mönö kösoñjiri pösatpiga etmahot. Miangöra etkön mönö dölki mosöta eta luainöj anmahot.”

³⁷ Mewö jii mörökmö, Polnöj opotöröp yeñgöra kewö jiyök, “Rom mindimindiri gawmanöj sel jöhöm netkiba miangö (jimkutukutu) paspot netkigetka maljit. Miangöra yeñön keuniri qahö kewöta jim teköba töndup aukje ambazip jeñine öne lañ arawambu kömbinöj netkuba kösö mire al netkiget. Mi gamuñambuk. Mewö al netkiget tatziga dölki denöwögöra melaim netkiget öne ölöñ etpirak? Mi qahö dop kölja. Niri qahöpmahöp etpitmö, yeñön mönö nanñinak kaba netkömegetka etpirak.”

³⁸ Polnöj opotöröp yeñgöra mewö jiiga keu mi memba majistreit galöm yeñgören anda jiget mötket. Mi möta Rom gawmangö (jimkutukutu) paspot memba malohori, mi möta auruba sömbuñini mötket. ³⁹ Sömbuñini möta kösö mire kaba ösoñj susuhuba kelök ala kuñgum etkigetka geyohot. Geyohotka Filipai siti mosötmahotkö ulet etkiget. ⁴⁰ Ulet etkigetka Pol Sailas yetkön kösö miri mosöta Lidiagö mire anohot. Miangören anda urumelen alaurupñiri engeka urugö nanjonañgö keu jiba engömosöta anohot. Mewö.

17

Tesalonaika nup megetka sesewerowero aket.

¹ Anda mala Amfipolis aka Apolonia siti yahöt mi kutuba Tesalonaika sitinöj angotket. Siti bohonñi miangören Juda yeñön köuluk mirinini meget kinök. ² Polnöj ahakmemenji

aka malöhi, mianğö dop köuluk mirinjine öngöba Sabat kendon karöbut mianğöreñ yembuk Urumelenğö Buña Kimbi oyoñda könañi eraum möta malget. ³ Mewö mala Buña Kimbigö könañi jim asariba kewö jiyök, “Anutunöñ areñ ala Amötqeqe Toñan sihimbölö möta kömumba kömupnöhök wahötmapkö jiyök.” Mewö jiba mianğö könañi Buña Kimbinöhök kondela uruñini kuñguba kewö jiyök, “Azi Jisös jim asarim engizali, yañön mönö Amötqeqe Toñi Kraist akza.”

⁴ Mewö jiiga Juda könagesö yenğöreñök tosatñan möt nariba uruñini melenđa Pol Sailas yetpuk toroqeba kinget. Grik ambazip tosatñan Anutu waikñi memba möpöseigeri, yenğöreñök mewöyök kambu ketañi yenñon yembuk toroqeget aka ambi öngöñgöñi qetbuñañinambuk yenğöreñök gwötpukñan uruñini melenget.

⁵ Uruñini melengetmö, Juda ipñi yenñon uruñini seholiiga urunöñ mututqutut möta andöqeqe aket. Mi aketka injarere ambazip rowoñqeqenöñ lañ malgeri, yenğöreñ anda azi goñgoñi tosatñi engömeget. Mi engömembra mindiriba ambazip kambu uruñini kuñguba öröm engigetka tokoget. Tokoba lañ qetketka qeburuñ göjupmajup ahuiga siti dop köl teköyök. Lañ qeta luhuba azi qetñi Jeison yañgö miri töungöba (töwöngöba) Pol Sailas ambazip kambu jenjine al etkibingöra jarum etkiget. ⁶ Jarum etkigetmö, qahö miwikñaim etkiba Jeison aka urumelen alaurup tosatñi jöhöm öröm engiba sitigö galömkölköl azi yenğö jenjine angota kewö qetket, “Yei! Azi gölmenji gölmenji liliköba miri dop uru kuñgum engigetka kahapmahap aka sohomakzei, yenñon mönö ki mewöyök kayohot. ⁷ Kianğöreñ kayohotka Jeisonöñ i etkömembra angön köl etkiyök. Ambazip pakpak mienñon kewö jimakze, ‘Azi kun qetñi Jisös yañön kiñ kembunini akza.’ Mewö jiba Rom sisa kiñgö jimkutukutuñi qetala memba eta alakze.”

⁸ Mewö qetketka ambazip kambu aka galömkölköl azi yenñon mötketka uruñinan eta raidimbom ewö siksauk ahök. ⁹ Siksauk aiga Jeison aka urumelen alaurup tosatñi kuñguba qesim engigetka moneñ ala meköm etkiba pösatketka eta anget. Mewö.

Berea angetka Baiböl stadi ala keuñiri kewötket.

¹⁰ Eta angetmö, urumelen alaurup yenñon Pol aka Sailas mianğöreñök melaim etkigetka mosöta sunğem miri qetñi Berea mianğöreñ anohot. Anda angota Juda yenğö köuluk mirinjine öngöyohot. ¹¹ Köuluk mirinjine öngöba Buña keu jiyohori, mi sihim ketañi möta möt angön kölget. Juda könagesö Berea malgeri, yenñon Tesalonaika könagesö engongita ölop sorokñi aket. Keu törörök jiyohot me qahö, mi wehön dop

Buṅa Kimbigö keunöṅ kewöta oyoṅda eraum möta malget.* Silik ölopṅi mewöṅi wuatangöba Juda ambazip Tesalonaika malgeri, mi luhut al engiget. ¹² Buṅa keu jiyohotka Juda yengöreṅök jesöṅgöṅan möt nariba uruṅini melenget. Grik ambazip yengöreṅök mewöyök gwötpukṅan Jisös möt narigetka sutṅine ambi öṅgöṅöṅi qetbuṅaṅinambuk mi gwötpuk malget.

¹³ Jisös möt narigetmö, Polnöṅ Berea miangöreṅ mewöyök Anutugöreṅ Buṅa keu jim asariba malöhi, miangö buzupṅan sehiba Tesalonaika anda Juda jitṅememe yengö kezapṅine geyök. Kezapṅine gei möta wahöta Berea kaba mewöṅanök ambazip uruṅini esiba kuṅguget. ¹⁴ Kuṅgugetka urumelen alaurup yeṅön mi möta miangöreṅök Pol melaigetka köwet jitṅe geyök. Geyökmö, Sailas Timoti yetköṅ toroqeba Berea malohot. ¹⁵ Azi Pol umbulgeri, yeṅön toroqeba wangita anda Atens sitinöṅ aṅgotket. Aṅgotketka kewö jim kutum enṅiiga mötket, “Inini mönö lilingöba Sailas aka Timoti jigetka ösumok nöṅgöreṅ kamahot.” Keu mi möta mosöta anget. Mewö.

Polnöṅ Atens sitinöṅ mala nup meyök.

¹⁶ Polnöṅ Atens sitinöṅ tata Sailas Timoti yetkö mamböta mala liliköyök. Liliköba siti mi tandö lopionṅi lopionṅi mienṅön kokolak qegetka köna töwokṅe töwokṅe kingetka enṅeka awöwöliba tembula uruṅi könöp jeyök. ¹⁷ Polnöṅ Juda yengö köuluk mirinṅine öṅgöba Juda kian ambazip aka gölme tonṅi Anutu waikṅi memba möpöseigeri, yembuk kinda eraum mötket. Polnöṅ wehön dop rowoṅqeṅe sombemṅini dop anda ambazip miwikṅaim enṅiba yembuk aitoṅgöba eraum mötket.

¹⁸ Eraum mötketka Epikuros aka Stoik mötmöt jake yahöt mietköreṅök böhi tosatṅan kaba Polbuk keu siṅinṅi siṅinṅi jiba goranora aka jitnakölik erauget.† Tosatṅan toroqeba Polgö keuṅi möta kewö jiget, “Mötmöt kitipṅi kitipṅi zezengok ewö usuṅda um jaruba laṅ qezaköba mohot yahöt miwikṅaim bibihiba memba kaza. Mi memba kaba sesekṅai ewö laṅ jizapmö, keuṅaṅgö ölnṅi wania jimamgö mötzawi, mi qahö mötzin.”

Polnöṅ Jisösgö Buṅaṅi jim asariba uruṅini kuṅguba kömupnöhök wahörök‡ jiyök. Miangöra tosatṅan toroqeba kewö jiget, “Bem kianṅi memba kaba mietkö könaṅiri jim asariza, miangö tandök ewö akza, ekzin.”

* **17:11:** Berea yeṅön Baiböl stadi ölopṅi alget. † **17:18:** Mötkutukutu böhi qetṅi Epikuros yaṅön uruölöwak mötṅingö könaṅi kusum enṅiyök. Stoik mötmöt jake (akademi) miangö böhiṅi qetṅi Zeno yaṅön sihim ölopṅi aka bölöṅi qömbököba böṅ qeba köhöiba kinbingö könaṅi kusum enṅiyök. ‡ **17:18:** Jisös aka Kömupnöhök wahötwahöt keu yahöt mi qahö möt asariba töṅpin kinda kewö jiget, ‘Yaṅön mönö bem azi ambi yahöt yetkö qetṅiri mewö qetza.’

19 Mewö lanlan jigetka Pol wanğita maket sombem ketani Areopagus miangöreñ öngöba kaunsöl yeñgö jeñine alget kini kewö jiget, “Gi mötmöt areñ dölökñi aukñe kusum neñgimakzani, miangö könañi denöwö? Mi ölop jinönga mötpin. 20 Göñön kian kantri yeñgöreñ keu murutñi memba kaba jinönga kezapnine gei mötzin. Miangöra göhö keu arengahö könañi mi törörök mötpingö mötzin.” 21 Atens toni aka kian miangöreñ malgeri, yeñön pakpak öne lanlan mala mötmöt keu dölökñi dölökñi onğitgoñgit aka jiba möta uruñini miangöreñ ala nalöñini ayuhuba malget. Mewö.

Polnöñ Areopagus sombemnöñ kinda keu jiyök.

22 Polnöñ wahöta Areopagus sombem bibine anda kaunsöl yeñgö jeñine kinda kewö jiyök, “Atens aziurup, nöñön ki kaba yuai pakpak eka könañini kewö ahöi mötzal: Inini bemurupñini göda ölopñi qeba möpöseim engiba malje. 23 Nöñön liliköba engöreñ miri kömbukñi kömbukñi eka miengö sutñine alta kulemñambuk kun miwikñaijal. Miangöreñ kewö ohoget ahöi ehal, ‘Bem könañi qahö mötzini, yanğöra mein.’ Miangöra inini bem kun könañi qahö möta töndup waikñi memba möpöseimakzei, nöñön mönö yanğö könañi indela jibi mötme.

24 * “Bem Anutunöñ Suep gölme aka yuai pakpak mi- etkö uruñire ahözawi, mi miwikñaim engiyök. Yanñön Suep gölmegö Kembuñja akza. Yanñön jöwöwöl jike börönöñ memenji miangöreñ qahö tata malja. 25 Yanñön nanñak malmalgö könañi akza. Mi aka neñön gölmenöñ malbinanğöra sile, unja (imut) aka yuai tosatñi pakpak neñgiiga söñgöro ösum örömakzin. Mewö neñgimakzawanğöra aka nanñak nene me yuai kungöra qahö osiza. Miangöra ambazip nini gumohom wanğibingö osizin. Nini börönanan yuai qahö memba naluk al wanğiin ewö, yanñön mönö qahö kömuma. Yanñön azi tandök qahö malja. Qahö.

26 “Yanñön mutuk azi mohot miwikñaiiga yanğöreñök sehiba denđa gwala injañi aka sile tosatñi aka gölmenji gölmenji pakpak dop köla maljin. Yanñön nalönini pakpak törörök arengöm neñgiiga miangö dop maljin aka miri gölme denike denike ahöm tat ala maljini, miangö görañi aka aiwesökñi ala jim kutuiga miangö dop maljin. 27 Nini mönö Anutu nanñi möt jarum wanğibingöra yuai pakpak mi arengöba al neñgiyök. Yanñön körek pakpak kösutnineyök maljapmö, töndup mezanqezan ala Anutu jaruba mala miwikñaiabin me qahö? 28 Nanñini Grik mötmöt ambazipnöñ keu kötni arengöba

§ 17:19: Areopagus miangö könañi mi yarögö bemñi qetñi Ares yanğö kundunja.

* 17:24: 1 Kin 8.27; Ais 42.5; Apo 7.48

ohogeri, yengörenök yahötñan mewöyök keu kötni kun kewö jiyohot,

‘Ninia kun yanğö gwölönarökurupñi maljin.’

Azi mewöñi kunñan keu kötni kun kewö ohoyök,

‘Yañön mönö mem letot neñgiiga yanğö aumñe malmalnini malakzin, könanini anda kamakzin aka ahöm wahötnini ahakzin.’**

²⁹ Keu miengö dop nini mönö Anutugö gwölönarökurupñi mala kösutñeyök kinjin. Kösutñeyök kinjinmö, töndup yanğö könanji möt sohoba janjuñ akinbuk. Imut ohoho azi yeñön mötmöt qakñe kinda bem kungö tandökñi mötmöriba goul, silwö me köt jamönjiñ memba urorohoba tandö lopionji söhöba meñölöba memakzei, yanğön mönö mewö tandök qahö akza.

³⁰ Ambazipnönj gukmaulem aka jipjap mala kotketka Anutunönj nalö miangören ahakmemeñini möt böliiga likepñi qahö melenja malökmö, nalö kewöñe keuñi indela kewö jiza, ‘Ambazip körek pakpak miriñini dop tat anjei, iñini mönö uruñini melenja nöngören kaget.’

³¹ “Anutunönj nalö ketanji ali kam kuñguma. Yanğön nalö miangören ambazip gölmeñi gölmeñi pakpak mal anjei, mi tokom neñgiba keunini kewöta törörök jim teköma. Yanğön azi kun keunini jim tekömapköra möwölöhöba jimtekötekögö kukösumñi böröñe alök. Yanğön azi mi mem gulii kömupnöhök wahöriga mewö miangön kukösumñi ketanji mi ambazip pakpak kondel neñgiiga eka mötzin. Azi kömupnöhök wahöröhi, yanğön mönö jimtekötekö Tonina akza.”

³² ‘Anutunönj azi kun kömupnöhök mem gulii wahöröhi,’ tosatñan keu mi möta mepaqepaiköget. Mewö aketmö, tosatñan kewö jiget, “Keu jizani, nini mi kunbuk mötpingö mötzin. Miangöra gi ölop nalö kunönj keu mi toroqeba jim tuariman.” ³³ Mewö aketka Polnönj yengö sutñineyök wahöta engömosöta anök. ³⁴ Anökmö, tosatñan kaba Jisös möt nariba yambuk toroqezet. Möt narigeri, yengö sutñine Areopagus kaunsöl kambu yengö jitñememe azi kun qetñi Dionisius malök. Mewöyök ambi ketanji kun qetñi Damaris aka tosatñan yetpuk toroqeba möt nariget. Mewö.

18

Polnönj Korint sitinönj ani uruñini melenjet.

¹ Yuai mi asuhuiga Polnönj Atens siti mosöta Grik siti kun qetñi Korint miangören anök. ² Korint anda Juda azi kun qetñi Aqila miwikñaiyök. Aqila yanğön Eisiagö prowinsñi

** **17:28:** Mötmöt azi ketanji Pol yanğön mötmöt jakeñi jakeñi öngöba Grik yengören buk murutñi murutñi oyonda möt kutuba miangörenök keu kötni kötni amqeba memba aukñe jiyök.

qetnji Pontus miangörej ahuba könangep mindimindiri siti Rom anda malök. Miangörej mali sisa kiñ qetnji Klodius yañon jimkutukutuñi kewö alök, “Juda ambazip inñini mönö körek pakpak Rom siti mosöta denme.” Mewö jiyöhangöra aka Itali kantri mosöta Grik geba nalö miangörej Korint kangorök. Kangoriga Polnön miwikñaiba i aka anömñi qetnji Prisila yetkörej anök. ³ Malmalñiri nangöbitköra opo kounñi kounñi meyohot. Polnön mewöyök opo seri koun meme azia. Miangöra yetkörej ani nupñini örörön ahöiga yetpuk mala ahöba opo seri koun nup mohotje meget. ⁴ Memba malgetka Sabat kendon dop köuluk mire öngöba Juda aka Grik ambazip yembuk Jisösgö könani erauba mesin da uruñini melenmegöra kuñgum engiba malök.

⁵ Kuñguba mali alayahötnji Sailas Timoti yetköñ Masedonia prowinsnöhök kangorohotka Jisösgö Buñani nalö dop jim asariba malök. Mewö mala Jisösnön Amötqeqe Toñi Kraist akzawi, miangö könani aukñe kondela keu miangön Juda ambazip uruñini kuñguyök. ⁶ Uruñini kuñguyökmö, Pol tuarenjon aka uruqeqe keu töhörej jim wangigetka böröñan jenine kuñguba sölburañi tönjörari eriga kewö jiyök, “Nöñön köpösihit qahö akiga inñini ayuhuba miangö likepñi mi mönö nöngö qakne albingö osime. Mi nanñinak bisime. Inñini Buña keu qetalgetka nöñön ölop engömosöta merak kinda öngömawi, miangörej kian kantri ambazip yengörej elen da anmam.”

⁷ Mewö jiba engömosöta köuluk miri görañe azi kun qetnji Titius Jastus yangö mire öngöba malök. Yañon Juda azia qahöpmö, töndup Anutugö waikñi memba möpöseiba malök. ⁸ Görañe anökmö, köuluk mirigö galöm qetnji Krispus aka yangö anöm-moröñi yeñon körek uruñini melen da Kembu möt nariget. Mewöñanök Korint ambazip tosatñi Polgörej keu mötkeri, yengörejök gwötpukñan Jisös möt nariba uruñini melengetka o melun mem engiget.

⁹ Polnön sun gem kunöñ gaun ahöiga Kembunöñ kutum wasoriga imut ehiga kewö jii mörök, “Gi kengetki kude mötmanmö, Buña keu mönö köhöiba jiba malman. ¹⁰ Siti kiangörej ambazip kambu gwötpuk yeñon nöngö buñaya akze. Miangöra nöñön göbuk malbiga kunñan yuai kun qahö könahiba mem bölim gihima.” ¹¹ Mewögöra Polnön nalöñi mem köriba yengö sutñine (yara) yambu mohot aka köiñ 6 miangö dop mala Anutugörej Buña keu kusum engimalök.

¹² Kusum engimalökmö, Rom yeñon azi Galio kuñgugetka Akaia prowinsgö kiap gawönö malöhi, nalö miangörej Juda jitmeme yeñon mindiriba Pol tuarenjon ak wangiba öröba keu jakenje al wangiget. ¹³ Keu kewögöra al wangiget, “Azi ki- anön ambazip enjololñ ak engimakza. Rom yeñon jimkutuku-

tunjini alget ahözawi, yanön ambazip köna mi qösököba Anutugö waikni memba möpöseimegöra uru kungum nenjimakza.”

¹⁴ Keu mewö sileje ala jigetka Polnön keu jimangö aiga kiap gawönö Galio yanön Juda ambazip yengöra jiyök, “Juda ambazip engö sutjine kunjan azi qei kömumbawak me pinjit bölöni kötökni kun akawak ewö, miangöra nöñön ölop keunjini kezap ala mötpilejak. ¹⁵ Mimö, engö sutjine mötnaripkö keu asuhuiga qet murutni murutni qeta anjururuk aka jimkutukutunjini denöwö aknei, mi mönö nanjini lömbötjina. Nöñön yuai mewöni mi kewöta jim tekömamañgö dop qahö akzal.” ¹⁶ Mewö jiba keu jakeneyök enguatanjöiga etket. ¹⁷ Eta nanjinök mindiriba mohotje luhuba köuluk mirigö galöm qetni Sostenes mi qeraköba memba kaba keu jakenañgö köna numbunje ala qeget. Qegetka kiap gawönö Galionön mi eka miangöra möriga ölni kun qahö ahök. Mewö.

Polnön nanji mirije Antiokia sitinön lilingöyök.

¹⁸ *Polnön töndup toroqeba Korint sitinön silim gwötpuk malök. Mal teköba urumelen alaurupni yaizözkök keunjini jiba engömosöta Prisila aka Aqila etkömemba köwetnön geba wanjegöra mamböta tatket. Mutuk Anutugö jeje kewö jiyök, “Nöñön Anutugö nupni pöndan kapan köla memam.” Keu mewö jiba mi jöjöpan keunön jöhöba malök. Nalö mi teköiga köwetnön miri qetni Senkria miangörej geba jöjöpan keunangöra jiiga nörop jupni mitiget. Wanje kun Siria prowinsnön anmamgö ahöhi, mi miwikñaiba miangörej öngöba opo seri öröba mörörengögetka luhutnön nanjöi anget.

¹⁹ Anda Efesus taonön angota Polnön Prisila aka Aqila etkömosörökmö, nanjak köuluk mire öngöba Juda yembuk Jisösgö könani eraum mötket. ²⁰ Eraum möta kewö qesim wanjiget, “Gi ölop nalö köröpani nembuk malman.” Mewö qesim wanjigetmö, Polnön miangö urumohot qahö ahök. ²¹ Miangöra yaizözkök kewö jiyök, “Anutunön miangö On! jima ewö, mönö ölop lilingöba engörej kamam.” Mewö jiba wanje kunön öngögetka opo seri öröba mörörengögetka luhutnön nanjöi Efesus mosöta anget.

²² Anda taon kun qetni Sisaria miangörej angota wanje mosöta gölme köna Jerusalem öngöyök. Öngöba lilingöba urumelen könagesö jölöñini jiyök. Mi jiba tata wahöta geba Antiokia sitinön anök. ²³ Antiokia sitinön anda mali sonda tosatni teköiga engömosöta könanön anök. Könanön anda Galesia aka Frigia prowins yahöt mi ongita miri dop liliköba gwarek pakpak engeka köl gulim engii köhöiget. Mewö.

Apolosnön Efesus aka Korint nup meyök.

* 18:18: Jan 6.18

24 Nalö mianğoreñ Juda azi kun qetñi Apolos mi Efesus kayök. Apolos yañon Ijiptkö taon qetñi Aleksandria mianğoreñ ahuba mala mötmöt mire öngöi teköiga Buña Kimbi Walñanğö keuñi ölopñanök möt kutuyök. Mi möt kutuba könañi jii keuñi tandökñi mianğöra ambazip miri dop sihim gwötpuk möta söngaiget. 25 Kembugö könañi wuatangöbingö könañi kusum wañgigetka Anutugöreñ könöp bölamñan uruñe jeyök. Jisösgö könañi törörök diñdiñi kusum engiba Jonöñ o melun mem engiyöhi, mianğö könañi ölop möt sölöngöba jiyök. Mi jiyökmö, mianğö likepñi kun mosörök. Uña Töröñan melun mem neñgizawi, mi qahö mörök.

26 Yañon kaba köuluk miri uruñe könahiba keu ösum-mumuñambuk jiyök. Jiiga Prisila Aqila yetkön keuñi möta kinda wañgirohotka yetkö mire anget. Anda Anutugö könañi ölopñanök toroqeba jim asariba jiyohotka mörök. 27 Apolosnöñ Grik kantrigö bahöñi qetñi Akaia mianğoreñ anmamgö möriğa Efesus urumelenñ alaurup yeñon kötöngöm wañgiget. Kötöngöm wañgiba Akaia gwarekurup yengöra kimbi kewö ohoget, “Azi ki mönö köl öröm wañgime.” Apolosnöñ kimbi mi memba Akaia prowinsnöñ anda ambazip Anutugö kalem möriamñi möt asariba uruñini melenğeri, mi gwötpuk bauköm engiyök. 28 Bauköm engiba “Jisösnöñ Amötqeqe Tonji akza,” jiba mianğö könañi mi Buña Kimbigö keuñi keuñi oyoñda mianğon kondel engii mötket. Juda yeñon keu mi möta jitnakölik aketka goranora (noragora) ahuyökmö, Apolosnöñ Anutugö kukösum qakñe kinda keuñini aukñe qeapköiga etket. Mewö.

19

Polnöñ Efesus mala nup meyök.

1 Apolosnöñ Korint sitinöñ maliga Polnöñ Antiokia siti mosöta prowins tosatñi* oñgita mala mala köwet görañe Efesus sitinöñ añgorök. Añgota mianğoreñ gwarek tosatñi mi-wikñaiba enğehök. 2 Enğeka kewö qesim engiyök, “Inini möt nariba uruñini melenğeri, Uña Töröñan mönö nalö mianğoreñ uruñine geyök me qahö?” Mewö qesim enğiiga kewö melenđa jiget, “Uña Töröñan maljawi, nini mianğö keuñi qahöpmañöp mörin.”

3 Melenđa jigetka kewö jiyök, “Inini mönö wani o melun mem engigerawa malje?” Mewö jiiga melenğet, “Nini Jonöñ o melungöra jiba malöhi, mönö mi mem neñgiget mein.”

4 *Mewö melenğetka Polnöñ jiyök, “Jonöñ Jisösgöra keu jiba ambazip kambu uruñini kuñguiga kewö mötket, ‘Nöñgö

* 19:1: Gölme mi nalö kewöñe kantri qetñi Töki (Turkey) mianğö uruñe ahöza.

* 19:4: Mat 3.11; Mak 1.4, 7-8; Luk 3.4, 16; Jon 1.26-27

andöne azi kun kamawi, injini mönö i möt nariba uruñini melenget.' Mewö jii möta uruñini melengeri, Jonöñ i o melun mem engiba malök."

⁵ Mewö jii mötketka Polnöñ Kembu Jisösgö qetñe o melun mem engiyök. ⁶ Mem engiba böröñi nöropñine aliga Uña Töröñan uruñine geiga kantri tosatñangö keu murutñi murutñi könahiba jiba kezapqetok keu jiget. ⁷ Azi mi mindiriba 12 miangö dop malget.

⁸ Polnöñ köuluk mire öngöba kinda Anutugö bemtohoñangö könani eraum möta awösamakak kinda suahö ewö uruñini kuñgui keuñi qeapköbingö osiba malget. Mewö malgetka köiñ karöbut teköyök. ⁹ Qeapköbingö osigetmö, tosatñan yanğisen aka qahö möt nariba Kembugöreñ könani aukñe jim böliba ambazip jeñine luasö jiba kinget. Mewö jiba kingetka Polnöñ kewöta mendeñ engiba engömosöta gwarekurupñi enguanğiriga tikep anget. Tikep anda azi qetñi Tiranus yanğö qenjarök mötmöt jakenöñ silim dop (aua 5 tokoba) kusum engiiga eraum-mötmöt aka malget. ¹⁰ Mewö aka malgetka Kembugö Buña keuñan sehiiga (yara) yambu yahöt teköyök. Mi teköiga Buña keu mi Eisia prowins uruñe miri tonji aka Juda ambazip pakpak yanğö kezapñine gei möt teköget. Mewö.

Sewa nahönurupñan öme közölbingö osiget.

¹¹ Anutugö kukösumñan Polgöreñ anğoriga nup memba böröñi ambazip nöropñine ali Anutunöñ anğöletot murutñi murutñi meiga asuhuget. ¹² Mewö mali ambazip kawöl engöhöi malgeri, tosatñan Polgö sileneyök nöngöp mitim-iti aka opo jöhanñi tosatñi mewöyök memba anda kaba qakñine algetka kawölñini engömosöri ömeñini kota angetka ölöwaket. ¹³ Juda sile galöm tosatñan liliköba öme enguatangöba anda kaba malgeri, yeñön mewöñanök könahiba ömenöñ kölköljinjin mem engigeri, yanğö qakñine Kembu Jisösgö qetñi qeta ösumñi köl öröbingö esapköget. Esapköba kewö jiget, "Polnöñ Jisösgö qetñi qeta uru kuñgum neñgimakzawi, nöñön mönö Kembu miangö qetñe öme kota kesalmegöra jim kutum engizal." ¹⁴ Jisösgö qetñi mewö qetkeri, yanğö sutñine Juda jike nup galöm bohonñi qetñi Sewa yanğö nahönurupñi 7 yeñön mewöyök malget.

¹⁵ Yeñön ömewöröme kun mewö jim kutum wanğigetmö, yanğön melenđa kewö jim engiyök, "Ni Jisös möt wanğizal aka Pol möt wanğizalmö, injini mönö niñia?"

¹⁶ Mewö jim engiba azi uruñe kinöhanñön mönö luhuba qakñine öngöba qeraköba engömeyök. Mewö körek pakpak luhut ala yayiapaleñ mem engiba silenini kutumutuba opo malukuñini munjukunjurariyök. Munjukunjurariga nannjik nannjik silenine sepgwörörök eta kini tököba kesala miri uruñi

mi mosöta silenini gwamönñi aukñe eta angaiget. ¹⁷ Mewö asuhuiga Juda kian aka gölme tonji Efesus malgeri, körek yeñön mianğö buzupñi möta gwötpuk auruba awöwöliget. Awöwöligetka tosatñan Kembu Jisösgö qetñi kapan köla möpöseigetka aködampungambuk ahök. ¹⁸ Möt nariba uruñini melenjeri, yeñgöreñök gwötpukñan anda singisöndokñini indela jim kölenget. ¹⁹ Tosatñan qarösongo amötqege memba malgeri, yeñgöreñök gwötpukñan buk papianini memba kaba tokoba ambazip pakpak yeñgö jeñine kinda aukñe könöpnöñ gilget jeyök. Buk papia mienğö söngöröñini oyoñda mindirigetka mindimindiri jañgöñini mi silwö monen (Kina) 50.000 mianğö dop ahök. ²⁰ Tandök mewö aketka Kembugö Buja keuñan mönö ösum-mumungambuk sehiba köhöiba anök. Mewö.

Polnöñ nupñanğö areñi alök.

²¹ Yuai pakpak mi asuhum teköiga Uña Töröñan Pol sölölohöm wangii keuñi jöhöba kewö jiyök, “Ni köwet kutuba Grik kantrigö likepñi yahöt Masedonia aka Akaia mianğöreñ liliköbi teköiga mosöta Jerusalem sitinöñ anmam.” Mewö jiba toroqeyök, “Mianğöreñ anda tata Jerusalem mosöta Rom siti mewöñanök anda ekñam.” ²² Mewö jiba neñakñi yahöt Timoti aka Erastus melaim etkiiga Masedonia anohotka nanñak toroqeba nalö tosatñi Eisia prowins uruñe malök. Mewö.

Efesus yeñön bim karim aket.

²³ Efesus sitinöñ Kembugöreñ köna wuatangögetka mianğöra nalö mianğöreñ enololonğö jupmajup keta bölökñi asuhuyök. ²⁴ Silwö nup meme azi kun qetñi Demetrius yañön silwö ohoiga kolkolgöiga qekötahöba bem ambi qetñi Artemis yañgö jöwöwöl jikegö dop imut morömorö memba malök. Mi meiga bohonñi memba malgetka monen öngöñgöñi öröi kölköl-örörö alaurupñan mendenğa meget. ²⁵ Megetka Demetrius aka kambu tosatñan nup mewöñi memba malgeri, mi mohotñe engoholi kaba tokogetka kewö jii mötket, “Azi alaurup, nini nup ki meinga bohonñi ölöpñi asuha kamakza, mi mötzin. ²⁶ Mi mötzinmö, Pol azi mianğön Efesus kianğöreñ kanğota ambazip uruñini esiba ki aka Eisia prowins pakpak dop köla ambazip kambuñi kambuñi kuñgum enğii janjuñ akzei, mi nalö kewöñe ölöp eka mötze. Yañön kewö jimakza, ‘Bem börönöñ memenji mi bem ölnji qahö.’

²⁷ “Mewö jiba maliga nini kölköl-örörö nupnini memakzini, mianğö qetñi mem bölii jijiwilit akepukö urulömböt akza. Aka miyöhök qahöpmö, urulömböt kun kewö ahöza: Ambazip pakpak Eisia prowins uruñe aka gölmeñi gölmeñi pakpak mianğöreñ bem ambi öngöñgöñi Artemis waikñi memba

möpöseimakzei, yangö bem qetbuñani ketanjan ayuhuba ösumñan etpapuk aka jöwöwöl jikenangö qetñan böliba ambazip jeñine eta omañi akapuk. Urulömböt mewö ahöza. Mianğöra waimanjat möta keu ki jizal.”

²⁸ Demetriusnöñ mewö jiiga sungurum alaurupñan mi möta irimñini seholiiga kewö jiba qet gigilahöget, “Efesus neñğöreñ Artemis mi öngöngöñi!” ²⁹ Qet gigilahögetka enjololonğojupmajup mianñon sehiba sehiba siti körek dop kölök. Mewö aiga Masedonia azi yahöt qetñiri Gaius aka Aristarkus Polgö sungurumyahötñi mi qeraköba etkömemba örörahöm etkiba qezakqezak mirinöñ anda totoko alget. ³⁰ Totoko algetka Polnöñ mewöyök ambazip kambulelemebe yeñgö sutñine anmamgö mörökmö, urumelenğ ambazipnöñ i anğön köl wanğiget.

³¹ Eisia prowinsgö galömkölköl azi tosatñan Polgö alaurupñi akeri, yeñon mewöyök kolek ala kewö ulet wanğiget, “Qezakqezak mirinöñ totoko aljei, gi mönö nangi mianğöreñ kude kondel enğiman.” ³² Totoko algeri, mianğöreñ ambazip gwötpukñan kinda tokogerangö könani kun qahö mötkerangöra nanñik nanñik lanlanğ qet gigilahöba siksauk enjololonğ ketanji megetka sehiba anök. ³³ Mewö ani Juda yeñon azi qetñi Aleksander kunguba nanğögetka kambu yeñon öröba köna algetka qaikñe eu öngöba kinök. Öngöba kinda ambazip jemesoholñine keu likepñi meköba jimamgö möta börö pözöñ misiba aiwesök mem enğiyök.

³⁴ Aiwesök mem enğiyökmö, Juda azia akzawi, mewö möt kutuba mianğöreñök numbuñini mindiriba körekñan könahiba keu kewö qetket, “Efesus neñğöreñ Artemis mi öngöngöñi!” Mewö qeta mala aua yahötkö dop silata qeta kinget.

³⁵ Qeta kingetka siti pomñan ambazip kambu uruñine memba eta ali göröñ algetka kinda kewö jiyök, “Efesus ambazip, nini nanine siti kianğöreñ Artemis öngöngöñi mi möpöseiba maljin. Nini yangöreñ jöwöwöl jike aka köt imutñi kömbukñi Suepnöhök eröhi, mi galöm köla maljin. Keu mi inñini körek ölop mötze. ³⁶ Mi kunñan qañ kölmawangö dop qahö. Mianğöra inñini mönö uruñini ösöñ memba eta ala böñjön malme. Kezapjupjup yuai kun kude akñe. ³⁷ Azi ki jöwöwöl jikenöñ öngöba yuai kun qahö kiom qeba mem böliyohot. Bem ambinini qahö ilit wanğiyohot. Inñini töndup i etkuanğitketka ki kinjahot.

³⁸ “Demetrius aka yangö kölköl-örörö alaurupñan tosatñi yembuk anğururuk aka keu jim anğubeak ewö, kiap mönö ahöze aka keu jakegö totokoñi totokoñi mi keu mindiñgöbingöra alakze. Mianğöra mönö ölop mianğöreñ anda keu jakeñe al anğuba aröñda kingetka dop köлма. ³⁹ Inñini

yuai kun toroqeba jibingö mötpeak ewö, siti kiangö tonjan mönö ölop könagesö öröm enjiiga qenjarök sombemnonj tokoba keu kewöta jim teköme. ⁴⁰ Merak enjololonj göjupmajup ketanji ki könanji qahöpmö, töndup imbisölöm asuhuzawi, mi Rom gawman yeñon möta kewö jibepuk, 'Efesus yeñon Rom mindimindiri gawman qetala bim karim akze.' Mewö jiba keu jakeñe al nengibepuk. Miangö urulömbötñi akza, mi mötzal. Keu jakeñe al nengiba karim kiangö könangöra qesim nengibeak ewö, nini mönö likepñi gagabe köla jibinangö dop qahö mötzin." ⁴¹ Efesus siti pomñan keu mewö jiba ambazip kambu könden enjiiga söörauba denja anget. Mewö.

20

Polnöñ Masedonia aka Grik anda nup meyök.

¹ Efesus miangörenj göjupmajup mianñon sörauba teköiga Polnöñ gwarekurupñi enghoholi kagetka urugö nangönanjögö keu qamban enjiba yaizözkök jiba enghomosöta Masedonia prowinsnönj anök. ² Masedonia anda gölmenji gölmenji kutuba liliköba miangörenj qamban keu gwötpuk jiba mala Grik kantrinönj kayök. ³ Grik kaba köinñ karöbut malök. Mi mal teköiga wanje memba köwet kutuba Siria anmamgö mörök. Mewö mörökmö, Juda jitñememe yeñon könanönj qebingö anjönanji algetka kezapñe gei mörök. Mi möta miangöra Masedonia prowins kutuba gölme köna mirinje lilingömamgö keunji uruñan jöhöyök.

⁴ Keunji jöhöi sunjgurumurupñi kewöñan yambuk anget: Berea azi qetñi Sopater Pirusgö nahönñi, Tesalonaika azi qetñiri Aristarkus aka Sekundus, Derbe azi qetñi Gaius, Timoti aka Eisia prowinsgö azi qetñiri Tikikus aka Trofimus. ⁵ Yeñon qeljine Troas anda miangörenj nengöra mamböta malget. ⁶ Troas anda malgetmö, Luk ni aka tosatñi neñon beret yistñi qahöpkö kendon mi Filipai sitinönj tarin. Mi tarin teköiga wanjenönj öngöinga opo seri öröba mörörengögetka luhutnönj nangöi anda wehön 5 aiga Troas yengörenj angorin. Troas angota miangörenj wehön 7 toroqeba malin. Mewö.

Polnöñ nalö kondikñi Troas malök.

⁷ Wehön 7 malin teköiga Polnöñ wehön 8 miangörenj enghomosöta anmamgö mörök. Mi möta sunjem kondikñi Sondagie miangörenj tokoba Jisös mötmöriba beret mindipköbingöra tarin. Mewö taringa Polnöñ yembuk eraum möta keunji jim köriba mali mali sunjem bibinji ahök. ⁸ Nini miri uruñi kungö qakñe eu öngöba tokoba taringa lambe gwötpukñan jeba asariget. ⁹ Tokoba taringa azi gwabö kun qetñi Yutikus yanñon jengenanñonñ tarök. Tari Polnöñ keu jiba mali möri nalö köriiga gaunñangö möta ahöba gwörörök

öröba könakembayök tala imbiñi qahö möta miri uruñi karöbut ongita gölmenöñ geba qeyök. Geba qeiga luhuba geba memba wahöringa kömuyöhi, ehin.

¹⁰ Mewö ehinmö, Polnöñ geba kepölaköba jiyök, “Kunbuk söngörö ösum ala guliza. Miangöra kude awöwöliget.”
¹¹ Mewö jiba kunbuk eröhañgöreñ öñgöba beret mindipköba neyök. Nemba yembuk nalö köröpñi keu jiba mala mala miri gianjiigun engömosöta könanöñ anök. ¹² Aniga azi gwabö mi wañgitketka guliba malöhi, mi eka urukölalep ketanji möta anget. Mewö.

Polnöñ Troas mosöta Miletus anök.

¹³ Yeñön angetmö, Polnöñ nanñak gölme köna anmamgö möta kewö jim kutum neñgiyök, “Inini mönö qeljiñe köwet köna miri qetñi Asos miangöreñ angetka aitonögöba noañgitketka wañgenöñ öñgöbin.” Miangöra neñön mosöta wañgenöñ öñgöinga opo seri öröba möröreñgögetka luhutnöñ nañgöi anda Asos miangöreñ angorin. ¹⁴ Asos angota nembuk aitonögöba Pol wañgiringa wañgenöñ öñgöba miri qetñi Mitilini miangöreñ anin. ¹⁵ Mitilini anda miangöreñ opo seri kunbuk öröba möröreñgögetka luhutnöñ nañgöi anda mala ahöba wahöta gölme jöhanñi qetñi Kios miangö kösutñe angorin. Angota toroqeba kutuba anda ahöba wahötagun miri qetñi Samos miangöreñ geba kunbuk anda ahöba wahöta miri qetñi Miletus miangöreñ kewögöra angorin: ¹⁶ Polnöñ “Yambu dölökñi (Pentekost) mi esapköba Jerusalem sitinöñ tatmam,” jiba nalö ayuhubinbuköra ösumok anbingö mörök. Miangöra Eisia prowinsnöñ nalö köröpñi ayuhubinbuköra möta wañgenöñ öñgöba Efesus siti ongitpingö keunji jöhöi malin. Mewö.

Polnöñ Efesus yengöra keu kondikñi jiyök.

¹⁷ Miletus angoringa Polnöñ Efesus yengöra kolek ala urumelen könagesögö jitñememeurup yeñön eta kamegöra köl öröm engiyök. ¹⁸ Köl öröm engii miri qetñi Miletus miangöreñ kañgotketka engeka kewö jii mötket, “Nöñön nalö mutukñi Eisia prowinsnöñ kayali, miangöreñök könahiba nalö pakpak embuk mala kota nup meali, inini miangö tandökñi ölöp möt yaköze. ¹⁹ Nöñön Kembugö jeñe uruni mem et al anjum teköba nupñi denöwö memba kota malali, inini mi ölöp mötze. Nupñi memba ambazip engöra sahöta imbilni eriga malal. Juda yeñön uruñini qahö melenjeri, yeñön nalö tosatanji miangöreñ silenöñ alal aket aka nuñgubingöra areñ asa-asambötñi ala malget. Mi ala malgerangöra aka esapesap murutñi murutñi miwikñaiaba sihimbölö möta malal.

²⁰ “Nöñön Buña keu mem ölöwak engimakzawi, mi jim asarim engiba malal. Mi qenjarökñöñ tokoba aka miriñi miriñi

mianğoreŋ öngöba kusum engiba malal. Nöŋön mianğöra poraiba nup qahö mosöral. ²¹ Nup qahö mosöralmö, Juda kian aka gölme tonji engöra mewöyök keu kötnji kewö nanğöba jiba malal, 'İnini mönö uruŋini melenđa Anutugöreŋ qekötahöba Kembunini Jisös Kraist möt narim wanğime.' İnini mi pakpak ölop möt teköze.

²² "Mötket, merak Uŋa Töröŋan ni Jerusalem sitinöŋ anmamgö kuŋgum niŋgiza. Mianğoreŋ anbi wani yuai asuhum niŋgimawi, mi qahö mötzal. ²³ Mohok-kun kewö mötzal: Nöŋön taon denike denike anda malali, Uŋa Töröŋan mianğoreŋ saŋep ala kewö nanğöba jii möta malal, 'Gi mönö ka-hasililiŋ möta malnöŋga kösö mire al gihigetka tatman.' ²⁴ *Mewö jii möta malalmö, muat. Nöŋön toroqeba malbilenjak me kömumbilenjak, mi keu kun qahö ak niŋgiza. Mi qahöpmaöpmpö, Kembu Jisösnöŋ nup al niŋgiyöhi, nöŋön mönö mia mem yakömamgö möt köhöizal. Yanön nöŋgöra kewö jiyök, 'Anutunöŋ kalem möriamŋi ambazip engimamgö mötzawi, gi mönö mianğö Ölöwak Buŋaŋi jim asariba malman.' Mianğöra gölmenöŋ malmami me kömumami, mi mönö yuai omani kötökŋi ak niŋgiza. Ambazip mönahotkö aonğit akzei, kunŋan mianğoreŋ kemaŋe kutuba luhut qahö alma. Nöŋön mönö mianğö dop nupŋi memba kemaŋe kutuba mosötpilenbuköra ösumni pakpakŋan kapaŋ köla anda malmam.

²⁵ "Mewö malmam-mö, mötket, nöŋön engö sutŋine anda kaba Anutu bemtohoŋaŋgö könaŋi jim asaribi mötkeri, iŋini nöŋgö jesöŋgörüni mi kunbuk qahö ekŋe. Engöreŋök kunŋan kun qahö nekŋawi, merak mewö mötzal. ²⁶⁻²⁷ Mianğöra nöŋön iŋini Anutugö jitŋi pakpak wuatangömegöra jiba uru kuŋgum engiba malal. Mi mönö qahö poraiba mosöral. Mianğöra engöreŋök kunŋan kun siŋgisöndokŋaŋgöra sohoba kömumba könöp sianöŋ gema ewö, iŋini mönö ni jim niŋgibingö osime. Nöŋön mi merak engöra aukŋe nanğöba jim köhöizal.

²⁸ "Kembunöŋ nanŋi sepŋi mokoba mianön könagesöurupŋi bohonŋini meiga buŋaŋi ak teközei, iŋini mönö i lama ewö galöm köla köyan köl engiba malme. Uŋa Töröŋi yanön nanŋak nup mi al engiyök. Mianğöra iŋini mönö nanŋini aka Kembugöreŋ lama kambu yeŋgöra galöŋŋini mem aŋguba malme. ²⁹ Nöŋön anbiga mianğö andöŋe ambazip kanjamŋinambuk mi kiam kalŋi ewö engö sutŋine asuhume. Yeŋön asuhuba lama kambu engöra qahö möta piakŋi aka laŋ kaba engöhöme, mi mötzal. ³⁰ Nanŋini sutŋineyök azi tosatŋan wahöta kinda Jisös gwarekurupŋan göraŋe anmegöra öröm engiba munen keu jiba malme. ³¹ Mianğöra iŋini mönö uruguliguli mala

* 20:24: 2 Tim 4.7

keu ki uru könömñine ala mötmörime: Nöñön (yara) yambu karöbutkö dop sunğem asak qambañ keuñi keuñi mi inñini mohot mohot qösösök (qörörök) kusum engiba malbiga imbilni erök.

³² “Nöñön merak inñini Anutugö böröñe al engiba kewö jizal: Yanğö Buña keuñan mönö kalem möriamñi indela köyan köl engimakña. Anutunöñ köhöiba uruñini nanğöba möhamğöiga ölop köhököhöi miwikñaiba mutulanğömakñe. Inñini Anutubuk lapingögetka alaurupñi pakpak tök kutum engiiga sarakñi akzei, mönö yeñgö sutñine anğota dum tatatñini memba oyaenköyaen aka malme. ³³ Ni engörenök kungö guli jalö me moneñ opo mi qahö buña qem anğumamğö möta malal. ³⁴ Ni aka sunğurumurupnan yuaigöra osiba malini, mi mönö nani böröni kianñon nup memba miwikñaiba malal.

³⁵ “Mi pakpak aka memba silik ölopñi kondel engial. Inñini mönö mewöñanök nup memba malme. Mewö mala ambazip löwöriba nup memegö osizei, mi ölop köyan köl engiba malme. Nup megetka ölni ahuiga Kembu Jisösgören keu ki mötmörime: Yanñon nannak keu kun kewö jiyök, ‘Inap yuai buña qem anğuggetka teköba pömsöm qeiga öne malmemö, tosatñi yeñgöra yuai kalemñina engigetka Anutunöñ likepñi meleñniga oyaenköyaen akñe.’ Mewö.”

³⁶ Polnöñ keu mewö jiba eta simin köla körek yembuk Anutu köuluköyök. ³⁷ Köuluköiga körek yeñön amburereñ aka urusahöt qeba anğum wanğiba numbuñi yöhötüm neget. ³⁸ Polnöñ mutuk keu kun kewö jii mötket, “Inñini nöñgö jesöñgöroni kunbuk qahö ekñe.” Keu mewö möta miangöra wösöbirik öngöñgöñi möta kinda wanğita wanğenöñ öngöba yaizözkök jiba umbulget. Mewö.

21

Polnöñ Jerusalem anök.

¹ Yaizözkök jiba nenğömosötketka opo seri öröba möröreñgögetka luhutnöñ nanğöi anda gölme jölanñi qetñi Kos miangören göröken diñdiñanök anda anğorin. Anğota ahöba wahöta toroqeba gölme jölanñi qetñi Rodos miangören anin. Miangörenök toroqeba Lisia prowinsgö mirinñi qetñi Patara miangören anğorin. ² Anğota kinda wanğe kun Fonisia gölmenöñ anmamğö ahiga mi miwikñaiba miangören öngöinga opo seri öröba möröreñgögetka luhutnöñ nanğöi anin.

³ Anda mala gölme jölanñi qetñi Saiprus miangö kösutñe kaba eka mösököba Saut görökenök onğita toroqeba luhutnöñ nanğöiga Siria prowins göröken anin. Anda “Wanğegö inapñi mi Taiö taonöñ anda wanğenöhök memba albin,” jigerangöra miangören anin. Miangören anda wanğe mosöta gein. ⁴ Geba

gwarekurup miwikɲaim enɟiba yembuk toroqeba wehön 7 malin. Mianɟoreɲ malinga Uɲa Töröɲan sölölöhöm enɟii Pol Jerusalem sitinöɲ anɞapuköra galöm meme keu jiget. ⁵ Mi jigetmö, nini wehön 7 mi yembuk malin teköiga enɟömosöta köna anin. Köna anbin jiinga yeɲön körek pakpak anömmoröurupɲinambuk nenɟubula taon mosöta sileɲe kaget. Taon sileɲe kaba köwet sakɲe eta simin köla Anutu köuluköin. ⁶ Köuluköba yaizözköknini jim anɟuinga Jerusalem anbingöra wanɟenöɲ öngöinga yeɲön mirinɲine lilingöget.

⁷ Pol aka nini yanɟö sunɟurumurupɲan mewö Taiö mosöta toroqeba anda miri qetɲi Tolemes mianɟoreɲ anɟota wanɟe mosörin. Wanɟe mosöta urumelen alaurup jölöɲini jiin aka yembuk wehön mohot malin. ⁸ *Mala ahöba wahöta enɟömosöta gölme köna anda Sisaria taonöɲ kanɟorin. Jerusalem urumelen kambu uruɲe urukunɟukunɟu azi (ewanjelis) sewen meköm enɟigeri,* yeɲgöreɲök kun qetɲi Filip yanɟön Sisaria malök. Neɲön Sisaria kanɟota yanɟö mire anda tata ahöin. ⁹ Filipkö böratupɲi 4 malget. Anutunöɲ ambi seram miengö uruɲine kezapqetok keu jijigö mötmöt kalem aliga malget.

¹⁰ *Neɲön Sisaria taon mianɟoreɲ wehön gwötpuk toroqeba malin. Mianɟoreɲ malinga Juda prowinsnöhök kezapqetok azi kun qetɲi Agabus erök. ¹¹ Neɲgöreɲ eta Polgöreɲ örigit memba mianɟön nanɲi köna böroɲi jöhöba kewö jiyök, “Uɲa Töröɲan kewö jiza, ‘Juda jitɲememe yeɲön örigit kianɟö tonɲi mi Jerusalem sitinöɲ kewö jöhöba kian kantrigö galöm† yeɲgö böroɲine alme.’” ¹² Mewö jii möta nini aka urumelen alaurup mianɟoreɲ malgeri, yeɲön mohot Polnöɲ Jerusalem anɞapuköra uleta qetal wanɟiin. ¹³ Qetal wanɟiinga kewö melenɟa jiyök, “Inɲini mönö denöwö akze? Sahöta keu jiba mewö mianɟön uruni munjuratze. Nöɲön Jerusalem anbi gwaröhöm niɲgimegöra jöjörözal aka miyök qahöpmö, Kembu Jisös qetɲanɟöra aka nuɲgugetka kömumbilenɲak, nöɲön mönö mianɟöra mewöyök jöjöröba kinjal.”

¹⁴ Mewö jiiga mölöwörim wanɟibingö osiba urunini böɲjöɲ köliga kewö jiin, “Mi mönö Kembugö jitsihitɲanɟö dop asuhuma.”

¹⁵ Sisaria taonöɲ malin nalö mi teköiga amgöba mözözmögöba enɟömosöta anda Jerusalem sitinöɲ öngöin. ¹⁶ Sisaria mianɟoreɲök gwarek tosatɲan mewöyök nenɟö köinini kaget. Kaget yeɲön kewö jiget, “Inɲini Saiprus azi qetɲi

* **21:8:** Apo 6.5; 8.5 * **21:8:** Aposol nup meme boɲ 6 mianɟoreɲ azi 7 mi meköm enɟigetka nanɟönanɟö nup aka ewanjelis nup mi mindiriba meget. * **21:10:** Apo 11.28 † **21:11:** Kian kantri yeɲgö böroɲine alget, mi Rom gawman yeɲgöra jiza.

Nason yangö mire ahöba malme.” Mewö jiba nennguangita yangö mire anin. Nasonöj mutuhök urunji melenja Jisösgö gwarekñi aka mala korök. Mewö.

Polnöj Jerusalem sitinöj kanğorök.

¹⁷ Neñon Jerusalem anğoringa urumelenj alaurup yeñon nenngömemba söngaiaba jölöñnini jiget. ¹⁸ Jölöñnini jigetka ahöba wahöta Polnöj nembuk bisop Jeims ekingö möta anin. Aninga urumelenj könagesögö jitmememe yeñon körek pakpak miangörej kanğota tatket.

¹⁹ Tatketka Polnöj jölöñini jiba kösohotñi alök. Anutunöj köiput aka nam köl nenngiiga kian kantri yeñgö sutñine anda liliköba misin nup meinga ölni ahuyöhi, miangö kösohotñi mesinja mohot mohot mi körekñanök jii mötket. ²⁰ Mi jii möta Anutu möpöseigetka azi ipñi kunñan kewö jiyök, “Pol alanini, Juda ambazip tausenñi tausenñi yeñon Jisös möt nariba urunji melenja töndup körek pakpak toroqeba Mosesgö Köna keu mi törörök wuatangöbingö kapan kölje. ²¹ Mewö kapan köljemö, göhö buzupki mi kewö lañ jiget mötket, ‘Juda ambazip denja kian kantri yeñgö sutñine anda maljei, göñon liliköba i kewö kusum engiba maljan, jimakze, “Injini mönö Mosesgö köna keu andö qeba Anutugörej aiwesök mi azi morosepsep silenine kude yandime aka Juda ahakmeme tosatñi mi kude wuatangöme.”’

²² “Mi jimakzeangöra aka göñon kazani, yeñon mi möta miangörejök öröba kambu ketanji köla tokobeak. Miangöra nini waimanjat möta mönö denöwö ahinga dop kölbowak? ²³ *Miangöra neñon döki keu göhöra jibini, göñon mönö miangö dop akñan. Azi 4:ñan yuai akingö keunji Anutugörej jiba jöjopañ keunöj jöhöget. ²⁴ Mi keunöj jöhögetmö, monengöra osiba mamböta sutñine ki malje. Miangöra göñon mönö i engömemba yembuk köl könjörat ak anguba yeñgöra aka naluk alnönğa dop köli ölop nörop junñini mitigetka keunji köhöima. Göñon mewö aka Mosesgö Köna keu tem köla wuatangöba maljani, körek pakpak göhö könañangi mi törörök eka möt asarime. Mi möt asariba göhöra keu jiget mötkeri, mi ölni kun qahö miwikñagetka omanji aiga kömuma. ²⁵ *Göhörej keu kömumapmö, kian kantri yeñon Jisös möt nariba urunji melenjeri, neñon yeñgöra keu kewö jöhöba kimbi ohoba alin anök, ‘Sömbup busunji bem lopion yeñgö naluk buña qeba könañine algetka ösumñinan walöñnöhi, mi mönö kude neme. Mewöyök sep me sömbup jölñini qeqenji miangö busunji mi kude neme. Serowilin kude akñe. Yuai kanjamñambuk 4 mi mönö mosöta andö qegetka dop kölma.’”

* 21:23: Jan 6.13-21 * 21:25: Apo 15.29

²⁶ Jitjememe yeñon mewö jigetka Polnön azi 4 mi engömembra ahöba wahöta yembuk köl könjörat ak anguget. Ak angugetka jöwöwöl jikenön öngöba azi mohot mohot engöra naluk ala jöwöwöl ohogetka köl könjörat nalöjini tekömawi, miangö nalö buzupni jii mötket. Mewö.

Jöwöwöl jikegö tohon uruñe Pol memba jöhöget.

²⁷ Polnön mi jii mötketmö, silim 7 mi tekömamgö aiga Juda tosatni Eisia prowinsnöhök kageri, yeñon Pol jöwöwöl jikenön öngöi eket. Eka ambazip kambu körek uruñini kuñgum engiget wahöri Pol qeraköba meget. ²⁸ Qeraköba memba kewö qetket, “Israel ambazip, mönö bauköm nenjiget! Azi kianön mönö gölmenji gölmenji liliköba miri dop kusum engiba uruñini kewö kuñgum engimakza: Inini pakpak mönö Israel ambazip kambu qetala mem bölim nenjime. Nanine Köna keu mosöta jöwöwöl jikenine lan öngöba iwilele aka malme. Mewö kusum engiba malök aka merak Grik azi mi tok wañgita jöwöwöl jikenön öngöiga miri kömbukni kianön mönö töwiba kölköljinjinambuk akapuk.” ²⁹ *Mi kewögöra qetket: Efesus azi Trofimus yanön mutuk siti könanön Polbuk ani etkeka kewö mötmöriget: Polnön i wañgiri mohotñe jöwöwöl jikenön öngöbahotbuk.

³⁰ Mewö qetketka ambazipnön enjololon aka ösumñinan luluñda kaba tokoba göjupmajup aketka qeburun ketani yöhöi siti körek dop kölök. Mewö aiga Pol qeraköba jöhöba jöwöwöl jikenöhök öröba yaigep eta miangöreñök jikegö kiripo nanunji pakpak mi miangöreñök köla jöhöget. ³¹ Pol jöhöba qebingö kapan kölgetka buzupni sehiba Rom yarö kambugö suahö galöm bohonni yanö kezapñe keu kewö geiga mörök, “Jerusalem pakpak yeñon karim aka bim qeze.” ³² Mewö möta miangöreñök yarö azi kambu tosatni suahö galömñinambuk enguañgita luhuba yengöreñ geget. Gegetka i engeka Pol qegeri, mi mosötket.

³³ Mosötketka suahö galöm bohonñan sutñine anda jim kutuiga Pol memba tapep (mungamunğa) yahötnön jöhöget. Jöhögetka kewö jiba qesim engiyök, “Azi ki ninja?” aiga “Wania aiga qeze?” ³⁴ Qesim engiyökmö, ambazip kambunöhök keu murutni murutni melenđa lanlan qetket. Mewö lanlan qeta göju megerañgöra aka könanji törörök mötmamgö osiyök. Mi osiba miangöra jim kutuiga Pol wañgita yarö azi yengö ain kiripo uruñe anget. ³⁵⁻³⁶ Wañgita angetka ambazip kambu ketani yeñon könanine enguatañgöba kaba kewö qetket, “Mönö qeget kömuma. Yapmakek!” Mewö qetketka yarö azi yengö ain kiripo nanunje angoriga könöpuk anda kaba göjupmajup ketani akerañgöra aka gwötpuk lömböriyök. Miangöra yarö azi yeñon Pol memba anğuba anget. Mewö.

* 21:29: Apo 20.4

Polnõj keunãnjõ likepñi kõnahiba melenãda jiyõk.

³⁷ Aŋguba kaba yarõ azi yeŋgõ sel uruŋe õngõbingõ aketka Polnõj suahõ galõm bohonñi kewõ qesim waŋgiyõk, “Ni gõhõra keu kun õlõp jimam me qahõ?” Qesim waŋgiiga mõta kõŋkuŋ aka jiyõk, “O, gi Grik keu mõtzan me? ³⁸ Miangõra gi Ijpt azia akzan me qahõ? Ijpt azi kunñan uruwale tuarenjõn azi timbiñinambuk 4000 mi enjololoŋ ak enjiiga Rom gawman tuarenjõn aka bim karim kõnahiba aka enguanñgiri gõlme qararanñkõlkõlñe anget. Gi galõm azi mia akzan me qahõ?”

³⁹ Mewõ jiiga Polnõj jiyõk, “Ni Juda azia. Ni Silisia prowinsgõ taon qetñi Tarsus mõtzeni, mõnõ miangõren ahuba mala koral. Miangõra qesim gihibi: Gi õlõp jinõnga nõñõn ambazip kambu kiengõra keu jibi mõtme.”

⁴⁰ Mewõ jiiga “Õlõp jiman,” jiiga Polnõj dõpnõj kinda ambazip engõra bõrõ misiyõk. Bõrõ misiiga gõju mosõta keu bõk kingetka Hibru keunõj keu kewõ jii mõtket,

22

¹ Polnõj kinda kewõ jiyõk, “Azi alaurupni, nõñõn keugõ likepñi jimami, mi mõnõ kezap ala mõtket.” ² Hibru keunõj keu jii mõta keunñi kõrek bõkõm tekõi kingetka toroqeba jiyõk,

³ * “Ni Juda azia. Ni Silisia prowinsgõ taon qetñi Tarsus miangõren ahubiga Jerusalem siti kiangõren galõm kõl niŋgigetka mala qarial. Mala qariba kota bõhi qetñi Gamaliel yaŋgõ keu bapñe tatpiga yañõn Juda ambõsakonurupnini yeŋgõren Kõna keu aka ahakmeme mi tõrõrõk kusum niŋgiiga miangõ mõtmetñi mõta malal. Merak enñõn kõrek pakpak Anutugõ keu bapñe aŋgota kapan kõla yaŋgõra bim qeba maljei, nõñõn mõnõ miangõ dop aka malal. ⁴ * Mewõ mala ambazip Kembugõ kõnañi wuatangõba maljei, mi kõndenã sesewerowero ak enñibiga sihimbõlõ mõta tosatñan kõmuget. Nõñõn ambazipñi ambazipñi enguanñgita tapepnõj (munñamunña) jõhõba kõsõ mire al enñial. ⁵ Jike nup galõm bohonñi aka jitñememe pakpak yeñõn mi õlõp mõtze aka yeŋgõren anda qesim enñiinga mi õlõp nanñõba jibeak. Yeñõn Juda azi ipñi Damaskus sitinõj maljei, yeŋgõra kimbi ohoba niŋgiget memba malal. Miangõren ambazip Kembugõ kõnañi wuatangõba maljei, nõñõn mõnõ mi mewõñanõk ‘Likepñi melej enñimegõra gwarõhõm enñiba Jerusalem ki enñuanñgitmam,’ jiba kõnanõj anal.”

* 22:3: Apo 5.34-39 * 22:4: Apo 8.3; 26.9-11

Polnõj nanji urumelenangö kõnanji jiyök.

Apo 9.1-19; 26.12-18

⁶ “Kõnanõj analmõ, Damaskus siti dopdowibiga mianğõren yuai kun kewõ asuhuyök: Silim bibiñe mianğõren asakmararañ ketanji kun Suepnõhök wõlbilik ewõ asuhuba wõlañ eta turum niñgiyök. ⁷ Turum niñgiiga tala gõlmenõj eta ahõbiga Suepnõhök keu kun kewõ asuhui mõral, ‘Sol Sol, gi mõnõ wuanõngõra sesewerowero qakñe al niñgimakzan?’ ⁸ Mi mõta melenal, ‘Kembu, gi dañõn?’ Mewõ melenbiga jiyök, ‘Ni Nazaret azi Jisõs, sesewerowero qakñe al niñgimakzani, nia mõnõ mi.’ ⁹ Azi nõmbuk kaba kingeri, yeñõn asakmararañ mia eketmõ, keu nõngõra jiyõhi, mianğõ kourukñi kun qahõ mõtket. ¹⁰ Mewõ jiiga nõñõn qesiba jial, ‘Kembu, mõnõ nõñõn denõwõ akñam?’ Jibiga jiyök, ‘Gi mõnõ dõlki wahõta Damaskus sitinõj anõnga Anutunõj wani yuaia akñangõ jimawi, mi kunñan jiiga mõtman.’ ¹¹ Asakmararañ mianğõn jeni qeiga janjuñ aka kinbiga azi nõmbuk malgeri, yeñõn bõrõne memba noañgitketka Damaskus sitinõj anin.

¹² “Mianğõren azi kun qetñi Ananaias malök. Yañõn Anutu gõda qeba Mosesgõren Kõna keu törörök wuatangõba malök. Mianğõra Juda ambazip Damaskus malgeri, yeñõn kõrek gõdañi õlõpñi ak wañgiba malget. ¹³ Yañõn nõngõren kaba kõsutne kinda nõngõra kewõ jiyök, ‘Sol alani, jegi mõnõ kunbuk tohoyök.’ Mewõ jiiga aua nalõ mianğõrenğök jeni tohoiga uba ehal. ¹⁴ Ekiga Ananaiasnõj jiyök, ‘Gõñõn ahakmeme diñdiñi solanñangõ Toña eknõnga keu jitñan jii kõnõmñi mõtnõj. Nanine ambõsakonini yeñgõren Anutu yañõn gi mõwõlõhõm gihiiga yañgõ jitsihitñi mõt kutuman. ¹⁵ Gi wani yuai eka mõtzani, mõnõ mi nañgõba jiba yañgõ jitñe memenji aka gõlmenji gõlmenji ambazip jeñine dangunu ewõ kinda malman. ¹⁶ Mewõgõra gi wuanõngõra mambõtzan? Mõnõ wahõta yañgõ qetñi qeta kõulukõba jinõnga o melun mem gihiinga siñgisõndoki sañgoñniga solanima.’ Ananaiasnõj mewõ jiyök.”

Misin nup kian kantri yembuk memangõra noholök.

¹⁷ “Damaskus siti mosõta Jerusalem sitinõj lilingõba jõwõwõl jikenõj kõulukõbiga Kembugõ alburupñan (añsumbemñan) nuñgui kinda imut kun ehal. ¹⁸ Imut mianğõren Jisõs ekiga nõngõren kaba kewõ jiba jii mõral, ‘Gi kantri kianğõren nõngõ kõnani aka Buña keuni mi kude jiba malman. Mi nañgõba jinõnga nesampurek aka andõ qeme. Mianğõra Jerusalem siti ki mõnõ õsumok mosõta anman.’

¹⁹ “Mewõ jiiga jial, ‘Kembu, yeñõn kõnañamni mõtze. Nõñõn mutuk lilikõba ambazip gi mõt narim gihizei, mi kõuluk mirinji mirinji mianğõren õngõba miwikñaim eñgiba jõhõba ihilek wahinambuknõj taukõm eñgiba tosatñi kõsõ mire al eñgiba

malal. ²⁰ *Göhören nupbauk azi Stiwenöŋ könagi nanğöba jiiga qeget seŋŋi mokoï eri nöŋön nalö miangören mewöyök kösutŋine kindä imbi köla malukuŋini galöm memba kinbiga qeget kömuyök.' ²¹ Mewö jibiga Kembunöŋ nöŋgöra jiyök, 'Nöŋön melaim gihizalawa gi mönö köröwen kian kantri ambazip yeŋören anman.' Mewö."

Romgö yarö azi yeŋön Pol galöm kölget.

²² Polnöŋ keu likeŋŋi jiyöhi, mi ambazip kambu yeŋön kezap ala mötkeŋmö, (Kembunöŋ kian kantri ambazip yeŋören anmamgö jiiga jiyöhi,) keu mi möta miangörenök köhöikŋanök silata jiget, "Yapmakek! Azi mewöŋi mi qeget kömuma. Mi gölmenöŋ nembuk malmawaŋgö dop qahö." ²³ Mewö jiba qeta opo keren qeköba gila (könaŋinan börömböröm tiba) sömsöm urata könakemba laŋlaŋ gilget. ²⁴ Mewö aketka Rom eŋgö suahe galöm bohonŋan jim kutuiga yarö azi yeŋön Pol waŋgita anda yarö azi yeŋgö ain kiripo uruŋe alget. Kiripo uruŋe algetka Juda yeŋön i wanigöra aka göju memba qetzei, miangö könaŋi mötmamgöra kewö jim kutuyök, "Inini mönö Pol memba ihilek wahiŋambuknöŋ qeba qesim waŋgigetka könaŋi aukŋe jii mötŋin." ²⁵ Mewö jim kutuyökmö, Pol memba jöhöba ihilek wahiŋambuknöŋ qebingö aketka Rom suahe galöm kunŋan kösutŋe kini Polnöŋ kewö jiyök, "Rom mindimindiri gawman yeŋön sel jöhöm niŋgigetka böröŋine maljal. Nöŋön miangö (jimkutukutu) paspot memba maljal. Miangöra inini nöŋgö keuni qahö möta kewöta laŋ jim teköba öne ihilek wahiŋambuknöŋ nuŋgumei, mi mönö Rom jimkutukutu toŋi yeŋgö jeŋine dop kölma me qahö?"

²⁶ Polnöŋ mewö jiiga suahe galömnöŋ möta miangörenök suahe galöm bohonŋi yaŋgören anda buzup waŋgiba kewö jiyök, "Azi miangö mönö Rom gawmangö (jimkutukutu) paspot memba malja. Miangöra gi mönö denöwö akŋan?"

²⁷ Mewö jiiga suahe galöm bohonŋan Polgören anda qesiba jiyök, "Gi ölna Rom gawmangö (jimkutukutu) paspot memba maljan me qahö? Mi jinöŋ mötŋi." Jiiga Polnöŋ melenök, "Ölna, nöŋön mi memba maljal."

²⁸ Mewö melenniga jiyök, "Ni moneŋ ketanŋi gila Rom mindimindiri gawmangö (jimkutukutu) paspot bohonŋi membi niŋgigetka maljal." Jiiga Polnöŋ jiyök, "Mi ölöpmö, nöŋgö iwinan Rom gawmangören paspot memba maliga nöŋön yaŋgö nahönŋi ahuba miangörenök qet mi memba maljal."

²⁹ Mewö jiiga azi qesim waŋgibingö akeri, yeŋön miangörenök mosöta liliŋgöba anget. Polnöŋ "Ni Rom gawmangö paspot memba maljal," jiiga suahe galöm

bohonŋan mi möta Rom azia gwaröhöm waŋgiyöhanğora aka awöwöliba sömbuŋi mörök.* Mewö.

Polnöŋ jike kaunsöl kambu yeŋgö jeŋine kinök.

³⁰ Miri gianaŋiiga suahö galöm bohonŋan wahöta Juda yeŋön wuanöŋğora Pol keunöŋ al waŋgiba jigeri, mianğö könaŋi törörök mötmamğora möta jike nup galöm bohonŋi aka jike kaunsöl kambu pakpak yeŋön tokomeğora jim kutum eŋgiyök. Mewö tokogetka jiiga Polgö tapepŋi (muŋgamuŋga) pösatketka waŋgita eta yeŋgö jemesoholŋine ali kinök. Mewö.

23

¹ Polnöŋ kindi jike kaunsöl kambu mi uba eŋgeka kewö jiyök, “Azi alaurupni, nöŋön ahakmemeni pakpak mi Anutugö jemesoholŋe aka memba malbiga yaŋön eka ‘Dop kölja,’ jiiga urunaŋgö kezapnan möta ölöwaka kota mala merak ki kinjal.” ² Polnöŋ mewö jiyökmö, jike nup galöm bohonŋi qetŋi Ananaias yaŋön kösutŋe kingeri, i jim kutum eŋgiiga nuŋgulumŋe qekötahöget. ³ *Qekötahögetka Polnöŋ jii mörök, “Anutunöŋ mönö gi qekötahöm gihima. Göŋön miri sel tuatŋaŋgö dop akzan. Silenŋi mundanöŋ ohogetka tuatŋi akzapmö, uruŋi sewön memba injaŋi akza. Göŋön Mosesgö Köna keu memba mianğön kewöt niŋgiba keuni jim tekömamğora tatzanmö, töndup nangak Mosesgö Köna keu miyök qeba jim kutum eŋginöŋga nuŋguze. Mi qahö dop kölja.”

⁴ Polnöŋ mewö jiiga kösutŋe kingeri, yeŋön jiget, “Gi Anutugöreŋ jike nup galöm bohonŋi mepaqepaik aka gamu qem waŋgizan me?”

⁵ *Mewö jigetka jiyök, “O alaurupni, yaŋön jike nup galöm bohonŋi akzawi, mi qahö möta jizal. Buŋa Kimbigö keu kun kewö ahöza, ‘Gi mönö könagesö kambugahö azi kembuŋi kude qesuahöman.’ ”

⁶ *Mewö jiyökmö, jike kaunsöl kambu yeŋgöreŋök tosatŋan Sadyusi (Jike nupkö kapaŋkölköl) pati qekötahögetka tosatŋan Farisi (Köna keugö kapaŋkölköl) pati azia malget. Polnöŋ mi möta mianğora jike kaunsöl kambu yeŋgö jeŋine keu kewö qerök, “Azi alaurupni, nöŋön Farisi azia akzal. Iwinan mewöyök Farisi pati azia. Kömukömuŋi yeŋön guliba wahötmei, nöŋön mewö asuhumapkö al mamböta jörömqöröm aka maljal. Mewö maljalaŋğora aka keu jakeŋe al niŋgigetka kewöt niŋgiba jize.”

* **22:29:** Kun Rom gawmangö paspot memba malöhi, mi kösönöŋ gwaröhöm waŋgibepukö soŋgo ahöyök. Kunŋan soŋgo mi walöŋnök ewö, i mönö keunöŋ al waŋgizema. Mianğora sömbuŋi mörök. * **23:3:** Mat 23.27-28 * **23:5:** Eks

22.28 * **23:6:** Apo 26.5; Fil 3.5

⁷ Mewö jiiga mianğöreñök Farisi aka Sadyusi pati miengö sutñine anğururuk ahui jike kaunsöl kambu yeñön jula kambu yahöt aket. ⁸ *Sadyusi (Jike nupkö kapanğölköl) yeñön kewö jizema, “Ambazip kömükömuñi yeñön kude guliba wahötme. Suep garata qahö malje. Öme aka uña mi qahö malje.” Mewö jigetmö, Farisi (Köna keugö kapanğölköl) pati yeñön keu karöbut mianğöreñ qekötahöba mianğö dop möt nariba kinjema. ⁹ Kambu yahöt mewö aka qetketka göju ketani ahuiga Köna keugö böhi tosatñan Farisi kambu yeñö sutñineyök wahöta könöpñambuk terengöba kewö jiget, “Nini azi kiangö bölönamñi kun qahö miwikñaizin. Suep garata me uña kunñan keu kutum wasöta yangö uruñe ali jibawak, mi mönö denöwö dop köl enğibawak?”

¹⁰ Mewö jigetka anğururuk mianñon kunbuk könöwiba qariyök. Qariiga awörañgöba Pol likeplikep örögetka anda kaiga mesin taköget. Mewö tandök ahök. Mewö aiga suahö galöm bohonñan mianğö kenğötñi möta yarö kambu kun jim kutum enğiiga geba Pol sutñineyök öröba wañgita yarö azi yeñö ain kiripo uruñe alget.

¹¹ Algetmö, sunğem mianğöreñ gaun ahöiga Kembunöñ Polgö qöhöröñe kinda kewö jiyök, “Mönö ewebibigabuk aka saitñgit malman. Nöngö könañamni Jerusalem kiangöreñ nañgöba jiba malnöñi, mianğö dop mönö Rom sitinöñ mewöyök anda mi nañgöba jim asariba malman.” Mewö.

Pol qebingö anğönañ meget.

¹² Kembunöñ mewö jiyökmö, miri gianjiiga mianğöreñ Juda azi tosatñan ölöñ tokoba Pol kömumapkö anğönañ meget. Yeñön areñ mi alget aka mi jöjöpañ keunöñ jöhöm köhöiba kewö jiget, “Nini Pol kömumapköra mamböta nalö sutñe kiangöreñ nene sinği malbin. Sinği mala qein kömuiga mianğö andöñe ölop nene me o kun kunbuk nembin.” ¹³ Azi 40 aka jañgö mi onğitkeri, yeñön mindiriba jöjöpañ keu mi jöhöm köhöiba jiget.

¹⁴ Mi jibagun jitñememe aka jike nup galöm yeñöreñ anda kewö jiget, “Nini Pol kömumapköra mamböta nalö sutñe kiangöreñ nene sinği malbin. Polnöñ qahö kömuma ewö, ambazipnöñ mönö ölña qesuahöm neñgigetka dop kölma. Mianğöra nini mönö mindiriba jöjöpañ keu kewö jöhöm köhöiba maljin: Pol qein kömuiga mianğö andöñe ölop nene me o kun kunbuk nempa malbin. ¹⁵ Mianğöra aka inñini mönö döлки jike kaunsöl kambu yembuk mohotñe mindiriba suahö galöm bohonñangöreñ anda keu kewö ala qesime, ‘Nini Polgöreñ keu könañi kunbuk qesiinga jii ölña mötpingö mötzin.’

* 23:8: Mat 22.23; Mak 12.18; Luk 20.27

Mewö tandök aiga qesigetka ölop Pol wanjiriga engörej etma. Etpawakmö, könanöj kaba engörej kanjotmamgö akjaw, miajgörej mönö i qein kömumapkö jöjöröba malbin.”

¹⁶ Mewö jigetmö, qein kömumapkö anjonañ algeranjö buzupni mi Pol behötñanjö kezapne gei mörök. Mi möta yarö azi yengö ain kiripo urune anda Pol taröhanjgörej öngöba jii mörök. ¹⁷ Jii möta suahö galöm kun qeri kaiga kewö jiyök, “Azi gwabö kianjön keu kun memba kazawanjgöra göñön i ölop wanjita suahö galöm bohonñanjgörej anönga keu mi jii mötma.” ¹⁸ Mewö jiiga i memba wanjita suahö galöm bohonñanjgörej anohotka jiyök, “Kösö azi Polnön noholi yanjgörej anbiga azi gwabö ki wanjita göhörej kamapköra qesim niñgiza. Yanjön göhöra keu kun memba kaza.”

¹⁹ Mewö jiba aniga galöm bohonñan böröñe memba wanjita görañe anda qesim wanjiyök, “Gi wani keuya memba kazan?”

²⁰ Qesim wanjiiga jiyök, “Juda jitñememe yeñön keu kun qesim gihibingöra jöhöba göhörej kaba kewö jime: Nini Polgö keu könani törörök qahö möt kömuzin. Mianjgöra gi ölop Pol uran wanjitnönnga jike kaunsöl kambu yengörej eriga kunbuk qesim wanjinönnga jii könanjamni ölni mötpin. Yeñön mewö asuhumapköra mötze. ²¹ Mewö kaba jimemö, göñön keu mianjgö imbi ölop kude kölman. Juda könagesö yengö sutñineyök azi 40 aka janjgö mi onjiteri, yeñön mindiriba Polgöra kewö jiba mi jöjopañ keunöñ jöhöm köhöiget, ‘Nini Pol kömumapköra mamböta nalö sutñe kianjgörej nene sinji malbin. Sinji mala qein kömuiga mianjgö andöñe ölop nene me o kun kunbuk nembin.’ Mewö jiba göñön imbi kölmangöra mamböta jöjöröba mönöze.”

²² Mewö jiiga azi gwabö mi melaiba kewö jii mörök, “Buzup ki jinöñ mötzali, mi kun kude jinöñ mötma.” Mewö.

Pol wanjitetka Sisaria taonöñ anök.

²³ Suahö galöm bohonñan mi möta suahö galömyahötñi etkoholi kayohotka kewö jii mörohot, “Injiri mönö timbi azi 200, hos yarö azi 70 aka linjip yarö azi 200 mi jim kutum enjiyohotka merak sunjemgö 9 kilok mianjgörej Sisaria anmegöra jöjöröme. ²⁴ Mewöyök hos tosatñi meköba möhamgöm enjiba Pol kungö qakñe ala köyan kölgetka sunjem kianjgörejök premiö Feliksgörej anma.” ²⁵ Mewö jii mörohotka premiögöra kimbi kun kewö ohoyök,

²⁶ “O Öngöngöñamni sorok premiö Feliks! Klodius Lisias, nöñön jölönji jizal.

²⁷ “Juda yeñön azi ki memba jöhöba qein kömumapköra aket. Mewö aketmö, Rom mindimindiri gawmangö (jimkutukutu) paspot memba maljawi, nöñön mi möta

mianğöreñök yarö kambu yembuk kañgota sel jöhöm wañgiba meköba bohonñi jöhöyal.

²⁸ Wani keugöra keu jakeñe aljei, nöñön mianğö könañi mötmamğö möta wañgita Juda yeñğö jike kaunsöl kambu yeñğö jeñine al wañgial.

²⁹ Al wañgibiga keu jakeñe ala nanñini Köna keugö kösawöran keuñi keuñi mianğöra aņgururuk aka tuarenjoñ aka jim wañgigetka miwikñaijal. Mi miwikñaijalmö, yuai bölöñi kömumapkö dop me kösö mire alin tatmawañğö dop mi qahö ahök. Yeñön keu mewöña kun qahö jiget möral.

³⁰ Mi qahö möralmö, kunöñ yañğö buzup keuñi kewö indeli möral: Tosatñan ‘Azi mi qein kömuma,’ jiba aņğönañ alget ahöza. Buzup keu mi möta dölkiangöreñök melaibiga göhöreñ kaza. Keu jakeñe al wañgibingö mötzei, nöñön i mewöyök jim kutum eņgibiga göhö jemesoholge kañgota keuñini pakpak aukñe jim miwikñaijetka mötman.”

³¹ Kimbi mewö ohoiga yarö azi jim kutum eņgigeri, yeñön keu mi wuatañğöba Pol memba wañgita söñauptöñ miri qetñi Antipatris mianğöreñ anget. ³² Anda miri gianañiga yarö azi hosñinambuk yeñön Pol wañgita köna toroqeba angetmö, timbi azi yeñön nanñinak lilingöba yarö azi yeñğö ain kiripo uruñe kaget. ³³ Yarö azi hosñinambuk yeñön Sisaria taonöñ aņgota kimbi mi premiö wañgiba Pol mewöyök yañğö jeñe alget. ³⁴ Algetka kimbi oyoñda “Pol mi wani prowinsğöra?” jiba qesiyök. Qesiiga “Silisia prowins azia,” mewö jiget mörök. ³⁵ Mewö jiget möta jiyök, “Keu jakeñe al ghibingö mötzei, yeñön mewöyök kañgotketka mianğöreñ ölop qesim gihimam.” Mewö jiba jim kutuñga Pol wañgita kiñ Herodkö jakömbuak mirigö kiripo uruñe ala jegalöm mem wañgiget. Mewö.

24

Pol keunöñ algetka premiö Filiksgö jeñe kinök.

¹ Wehön nup memenji 5 teköiga jike nup galöm bohonñi qetñi Ananias yañön jitñememe tosatñi aka loya (Köna keugö mötmöt azi) qetñi Tertulus yembuk aitoñğöba Sisaria taonöñ geba premiö Filiksgö jeñe öngöba Pol keu jakeñe albingö keuñi jiget mörök.

² Mi möta Pol köl öroi kañgori loya Tertulusnöñ könahiba Polgö sileñe keu ala premiögö jemesoholñe keu kewö jiyök, “O Filiks, göñön galöm köl neñgiba malnöñi, nini nalö mianğöreñ lui ketañi möta guñböñjönjöh malin. Göñön ölopñanök köyan köla jim kutum neñginöñga malmal tatatnini likeplikey möhamğögetka kantri kianñön uteköba wahöri ölöwakzin. ³ O ketañamnini Filiks, nini mi miri dop ölopñanök möt kutuba

göhöra söngaiba kilik-kalukñi kun qahö möta saiwap jim gihizin. ⁴ Saiwap jim gihizinmö, nöñön keu köröñji jibi ölan göhöbapuköra kewö qesim gihizal: Nini keu memba kainga kötoñanök jimami, mi mönö neñgöra ak ghiiga kezap ala mötman.

⁵ “Nini azi kiangö könañi kewö eka miwikñainin: Yanñon kegwek-kahasililij azi keñgöt kotkotñambuk akza. Yanñon gölmenji gölmenji liliköba Juda ambazip uruñini esiba kuñgum enjiiga karimñi karimñi miri dop asuhugetka göjupmajup qeta alakze. Tosatñan tuaköpek aka Nazaret azi kungö qetñe pati aljei, yanñon mönö yeñgö ketañamñina akza. ⁶ Yanñon jöwöwöl jike mi mewöyök kapañ köla mem töwiba memba et almangö ahök. Mianñgöra nini i memba jöhöin. Nini keuñi kewöta nanine Köna keu wuatañgöba jim teköbingö mörin. ⁷ (Mi mörinmö, suahö galöm bohonñi Lisias yanñon yarö azi yembuk kaba kukösum ketañi mianñon könöpuk börönineyök meköba wañgitket.* ⁸ Wañgita keu silene ala jim wañgizei, i göhö jemesoholge kañgotmegöra jim kutum neñgiyök.) Göñon nangak qesim wañginöñga könañi indela jima. Mi jiiga keu memba kazini, mianñgö ölni pakpak ölop aukñe asuhuiga mötman.” ⁹ Mewö jiiga Juda ambazip yeñon mewöyök “Keu pakpak mi ölna,” jiba imbi köla mi nanñgöba toroqeba silene ala jim wañgiget. Mewö.

Polnöñ keu likepñi melenñi Filiksnöñ mörök.

¹⁰ Pol jim wañgigetka premiönöñ keu jimapköra böröjöpau kuñguiga kewö melenñda jiyök, “Göñon (yara) yambu gwötpuk ambazip kambu kiangö jimtekötekö tonji aka malnöñ mötzal. Mianñgöra nöñon keunangö likepñi mi göhö jege awösamakak jimam. ¹¹ Nöñon uruwale Anutu waikñi memba möpöseimangöra Jerusalem sitinöñ öngöyal. Mi wehön 12 miyök teköiga merak ki kinjal. Nangak qesim enjibanak ewö, mi ölop nanñgöba jime. ¹² Nöñon jöwöwöl jikenöñ me köuluk miri kungen öngöba azi me ambi kunbuk goranora (noragora) keu jiba jitnakölik akiga mewö qahö miwikñaim niñgiget. Siti uruñe köna me sombem kunöñ ambazip uruñini kuñgubi öloköba liliköm niñgigeri, mewö qahö neket.

¹³ “Mewö qahö neka döлки keu silene ala jim niñgizei, yeñon mianñgö ölni kondel gihibingö osize. Keu omañi jize. ¹⁴ Mi osizemö, keu kun mi ölna jim miwikñaim gihimam: Yeñon Nazaret pati qetñi qetzei, nöñon mönö mianñgö köna wuatañgöba mala nanine ambösakonurup yeñgöreñ bem Anutu mi waikñi memba möpöseimakzal aka Mosesgöreñ Köna keu

* **24:7:** Keu sel uruñe ahözawi, mi mötmöt ambazip yeñon kewöta Luknöñ mi könakönahiñe ohoyök aka tosatañan mi qahö ohoyök, mewö jigetka uruyahötñambuk akza.

aka kezapqetok yengören Buzup Kimbi mianğören keu ohoget ahözawi, mi pakpak möt narim köhöizal. ¹⁵ Anutunöy ambazip diñdiñi aka goñgoñi mi körek pakpak mem gulim engii kömupnöhök wahötmei, Juda azi kienjön mianğöra mambötze. Nöñön yembuk toroqeba öröröy kindä mewö asuhumapköra jörömqöröm aka mamböta maljal. ¹⁶ Mewö mala Anutu aka ambazip jeñine diñdiñi kinbiga Anutunöy keuni nañğöba jiga urunañğö kezapñan mörakzal. Jönömnan qahö unduza. Mönö sarakñi aka malmangöra nalö dop kapañ köla köhöiba malakzal.

¹⁷ *“Nöñön kungen malbiga (yara) yambu tosatñi teköi lilingöba miri tosatñi yengörenök kalem memba uruwale kayal. Mewö kaba ‘Mi nani könagesöurup wanapñi yengöra menden engimam,’ jiba Anutugö jöwöwöl ohoba naluk al wañgimangöra Jerusalem öngöyal. ¹⁸ Mianğören öngöba köl könjörat ak anguba solanñi mala jöwöwöl jikenöy öngöyal. Yuai mi ohoba Anutu al wañgibiga miwikñaim niñgiget. Miwikñaim niñgigeri, mianğören ambazip tosatñan qahö kaba liliköba ölököm niñgiba göju meget. ¹⁹ Juda ambazip tosatñan Eisia prowinsnöhök kaba jikenöy öngöba nekeri, yeñön mönö dölkü göhö jege kianğören kañgota kindä keu kun ahöm engibawak, mi aukñe silene ala jim niñgigetka dop kölbawak.

²⁰ “Me jike kaunsöl kambu yengö jeñine kindä keu jiali, mi wani Köna keu oñgita pinjit akiga keu jakeñe alalgö keuni miwikñaiget? Azi ki tatzei, yeñön mönö mi jigetka dop kölma. ²¹ *Nöñön yengö sutñine kindä keu mohok-kun jiba töhören qetpiga lömböriyök. Köpösihit mewö kun ahal me qahö? Mi denöwö kewötket ahöza? Keu kewö qeta jial, ‘Kömükömuñi yeñön guliba wahötmei, nöñön mewö möt narizalanğöra aka keu jakeñe al niñgigetka merak keuni kewöta jim teköm niñgibingö akze.’ ” Mewö.

Polgö keuñi qahö jim teköba kösö mire alget.

²² Polnöy mewö jiiga premiö Filiksnöy Jisösgö könañi wuatañğöba maljei, mianğö könañi ölop möt soroköba Polgö keuñi kemañe kutuba kewö jiyök, “Suahö galöm bohonñi Lisiasnöy kañgoriga nalö mianğören Polgö keuñi jim tekömam.” ²³ Mewö jiba suahö galöm jim kutuiga Pol qahö jöhöba öne jegalöm meiga kösö mire tarök. Tinitosolomurupñan Pol köyan köla yuai osiyöhi, mi memba wañgimeğöra qahö qetal engiyök.

Polnöy keuñi jiiga Filiks aka Drusila mörohot.

²⁴ Wehön tosatñi teköiga Filiksnöy anömnñi qetñi Drusila, Juda ambi mi wañgita kayohotka Polgöra keu ali kaiga keuñanğöra kezap ali Kraist Jisös möt narim wañgibingö

* 24:17: Apo 21.17-28 * 24:21: Apo 23.6

könaŋi jim asariiga mörök. ²⁵ Mi mörökmö, Anutugö keu tosatŋi toroqeba eraum mötketka lömböriyök. Polnön Anutugö jeŋe solanibingö könaŋi jim asariba nanine ahakmemenini galöm köl aŋgubingöra jiyök aka Anutunön nalö kun ali miangöreŋ kewöt neŋgiba keunini jim tekömawi, keu karöbut miangön uruŋi kuŋguyök. Polnön keu mewöŋi jiiga töwöratiba böc qesiŋda jiyök, “Yapmakek! Muat mosötnön. Dölki ölop mosöta anöŋga nalö kun mötpi dop kölmawi, miangöreŋ ölop kunbuk köl öröm gihibi kaman.” ²⁶ Mewö jiba töndup toroqeba Pol nanŋi töwaya moneŋ waŋgimapköra mötmöriyök. Mewö al mamböta jörömqöröm aka sömaŋi gwötpuk köl öröm waŋgii kaiga keukeu jiba tarohot.

²⁷ Polnön kösö mire tari (yara) yambu yahöt teköyök. Mi teköiga azi qetŋi Porsius Festus yaŋön Filiksgö undumŋa premiö akŋamgö ahök. Mewö aiga Filiksnön Juda ambazipnön nek sorimegöra möta Pol qahö pösari kösö mire toroqeba tarök. Mewö.

25

Polnön premiö Festusgö jeŋe keu likepŋi jiyök.

¹ Festusnön premiö aka prowins uruŋe aŋgota tariga wehön karöbut teköiga Sisaria taon mosöta Jerusalem sitinön öŋgöyök. ² Öŋgöiga jike nup galöm bohonŋi aka Juda jitŋememe yeŋön jemesoholŋe kaŋgota Pol keu jakeŋe albingö jiba aröŋda kinget. ³ Aröŋda kinda kewö jiba uletket, “O premiö, göhön ölop neŋön möringa dop kölmapköra jim tekönöŋga keu algetka Pol waŋgita Jerusalem sitinön ki kame.” Yeŋön mutuk keu kewö jöhöba jiget, “Polnön könanön kaiga miangöreŋ mönö qein kömuma.” Mewö jiba jöjöröba mönögerangöra kaba uletket. ⁴ Mewö uletketmö, Festusnön kewö melen engiyök, “Pol mi Sisaria taongö kösö mire tari galöm kölje. Ni nanak nalö kude köriiga miangöreŋ lilingöba anmamgö mötzal.” ⁵ Mewö jiba toroqeyök, “Miangöra azi miangön bölöŋi kun akawak ewö, ölop engö jitŋememeurup tosatŋan nömbuk Sisaria geba miangöreŋ keuŋini silene ala jim waŋgigetka mötman.”

⁶ Mewö jiba wehön 8 me 10 miangö dop Jerusalem sitinön yembuk mali teköiga lilingöba Sisaria taonön geyök. Geba ahöba wahöta miangöreŋök keu jimtekötekögö dum tatatŋe tata jim kutuiga Pol waŋgita kagetka jeŋe kaŋgota kinök. ⁷ Polnön kaŋgota kiniga Juda jitŋememe yeŋön Jerusalem sitinöhök kageri, yeŋön liliköm waŋgiba kinda kazik qakŋe keu bölöŋi gwötpuk silene ala jiget. Mi jigetmö, keuŋinangö ölni mi kondelbingö osiget. ⁸ Kazik keu öne jiba kingetmö, Polnön mi qeapköba kewö jiyök, “Nöŋön yuai bölöŋi kun qahö ahal.

Juda nenngörej Köna keu qahö qetalal. Jöwöwöl jike qahö mem töwial aka Rom sisa kinngörej keugöra tuarenjon qahö ahal.”

⁹ Mewö jiiga Festusnöh Juda yenjon nanngö mötket öngömapkö möta Pol kewö qesim wanngiyök, “Silenöh alal keu ki jizei, gi ölop miangö likepni mi Jerusalem öngöba miangörej nongö jemesoholne kinda jiman me qahö?”

¹⁰ Qesim wanngiyökmö, Polnöh jiyök, “Rom sisa kinöh jim kutuiga keu jake ki kungugera ki kinbiga kewöt ningiba keuni jim tekönönga dop kölma. Ni Juda ambazip yengöra bölöni kun qahö ahal. Mia nangak ölop möt yaközan. Mönö Wuanöngöra kunbuk yengörej anbilanjak? ¹¹ Bölöni kun qahö ahal, Köna keu kun qösököba yuai kun ak böliba miangöra kömupkö bunaya akilanjak ewö, ‘Nöhön kömumbilanjak,’ jiba qahö öloh köla anmam. Mi qahöpmö, yenjon kazik keu öne töhöntöhön jiba keunjanngö könanji kondelbingö osize ewö, keu omanngöra aka kunjan nömimba yengö böröhine almapkö osima. Rom sisa kinöh mönö keuni mindingöba jim teköi dingima. Miangöra nöhon mönö yangö jene anmamngö köhöiba qesizal.”

¹² Mewö jiiga Festusnöh jembonurupni yembuk qamban keu jaruba kewöta kewö melenj wanngiyök, “Gi sisa kinngörej anmamngö möta qesizani, miangöra mönö ölop Rom anda yangö jene kinman.” Mewö.

Polnöh kin Agripagö jene kinök.

¹³ Wehön tosatni teköiga kin Agripa aka nenji Bernaisi yetkөн Festus eka gödanjiri kondelbitköra Sisaria taonöh kayohot. ¹⁴ Kaba miangörej wehön gwötpuk malohotka Festusnöh Polgörej keu mi kinbuk eraum möta kewö jiyök, “Filiksnöh azi kun qahö pösari kösö mire kianngörej tata malja. ¹⁵ Nöhön Jerusalem anbiga Juda yengö jike nup galöm bohönjini aka jitememeurupninan nöngörej kangota kewö qesim ningiget, ‘Nini azi miangö keu memba kaininga göhön mönö ölop yangö könanji kewöta keunji jim teköman.’

¹⁶ “Mewö qesim ningigetmö, nöhon yengöra kewö jibiga mötket, ‘Rom gawman nenngörej köna mi kewö: Kungö silene keu bölöni ala jizei, nini ambazip kun yangö keunji mi lanj kude jim tekömazin. Mutuk öröba keu jakene alin kazikurupnan kagetka likeplikep öröröh arönda kingetka keu silene ala jim wanngigetka likepni ölop jima. Keu likepni jiiga mi kewöta ölni ahuiga miangö dop ölop keunji jim tekömazin.’ ¹⁷ Yenjon ki kaba tokogetka nöhon nalö qahö köriiga ahöba wahöta miangörejök jimtekötekögö dum tatatje tata jim kutubiga azi mi wanngita kagetka nöngö jene kangorök.

¹⁸ “Kangörökmö, keu memba kageri, yenjon liliköm wanngiba arönda kinda keu silene ala jim wanngiget. Mewö aketka yuai

bölöñji kötökñji kun akawak, mewö jimegöra mamböralmö, keu mewöñji kun qahö jiget möral. ¹⁹ Mi qahö jiget möralmö, salupñe azi mi qetala nanñini mötnaripñinañgö keu kemañji tosatñji aka azi kun qetñji Jisös yangöra anğururuk aket. ‘Jisösnöñ kömuyök,’ jigetmö, Polnöñ ‘Guliba malja,’ jiba kapan köla köhöiyök. ²⁰ Mewö jiba kazik algetka nöñön ‘Keu mewöñji mi denöwö kewötpileñak?’ jiba köna jaruba uruyahöt möral. Mi möta kinda kewö qesim wañgial, ‘Silenöñ alal keu jizei, gi ölop miangö likepñji mi Jerusalem öngöba miangöreñ jibanak me qahö?’ ²¹ Qesim wañgialmö, Polnöñ Öngöñgöñamñinañgö jeñe anmamgö kapan köla kewö qesiyök, ‘Mönö jinöñga galöm köl niñgigetka sisa kiñgöreñ anbiga keuni mindiñgöiga diñgima.’ Mewö qesiiga wahip azi jim kutum engibiga galöm kölgetka tatza. Bian melaim wañgibiga sisa kiñgö jemesoholñe anma.”

²² Festusnöñ mewö jüiga Agripanöñ jüi mörök, “Nia kun azi mianñon keuñji jüi mötmamgö sihimñji mötzal.” Jüiga melenök, “Urangun ölop keuñji mötman.”

²³ Mewö jüiga ahöba wahötketka kantrigö jembon, suahö galöm ketañji aka jitñememe öngöñgöñi yeñön kaba Agripa aka Bernaisi yetköra jura sorom jölñire uta sösongai liñet köla köl öröm etkigetka keugö jake miri öngöñgöñi miangö uruñe anğotket. Festusnöñ jim kutuiga Pol wañgiketka miangöreñ kañgorök. ²⁴ Polnöñ kañgoriga Festusnöñ wahöta kinda kewö jiyök, “Kiñ Agripa aka azi ketañji pakpak nembuk ki tatzei, iñini mönö azi ki eket. Juda ambazip kambu pakpak yeñön yangöra aka uruni kuñguget. Sisaria taon kianğöreñ aka Jerusalem siti miangöreñ ölnja keunöñ kuñgum niñgiba qet gig-ilahöba kewö jiba malget, ‘Azi kianñon gölmenöñ malmawañgö dop qahö. Mönö yapmakek!’

²⁵ “Mewö qeta malgetmö, nöñön kewötpiga yuai kun kömupkö buña akñawañgö dop mi qahö ahök. Nöñön könañji mewö miwikñaiba ehalmö, nanñak Rom Öngöñgöñamñinañgö jeñe ani keuñji mindiñgöiga diñgimapköra kapan köla qesiyök. Mianğöra keu jöhöba melaibiga Rom anma. ²⁶ Rom sitinöñ anmapmö, yangöreñ keu mi denöwö ohoba Rom azi kembunañgöra albi anbawak? Yangöra keu lañ jizemö, keu könañambuk kun mi törörök qahö möt asarizal. Mianğöra jibi wañgita kaba kiñ Agripa göhö jege aka iñini tosatñji kiñgö andöñe ki tatzei, engö jemesoholñine algetka kinja. Iñini ölop böröjañ memba keuñji kewötketka ölnji asuhui mönö mi möta ölop kimbinöñ ohobileñak. ²⁷ Azi kun kösönöñ jöhöba keu jakeñe alalgö keuñji denöwö jizei, mi aukñe jibingö osiba töndup öne melaibinbuk. Silik mi nöñgö mötmötnöñ keza-pjupjup tandök ewö akza.” Mewö.

26

Polnõj keunãgõ likepñi kin Agripagõ jeñe jiyök.

¹ Mewö tatketka kin Agripanõj Polgõra jiyök, “Gi ölop nan-gahõ keu likepñi jinõnga mötpi.” Mewö jiiga Polnõj kinda börõ kutum wanõgiba nanñi keunñi anõn kõla kewõ kõnahiba jiyök,

² “O kin Agripa! Juda jitñememe yeñõn keu silene ala jim niñgizei, nõñõn keu pakpak miangõ likepñi mi merak ölop göhõ jege aukñe jimangõ simbawõj mötzal. ³ Gõñõn Juda neñgõreñ ahakmeme aka anõgururuk keunini pakpak mi törörök möt yakõzan. Miangõra nõñõn õlña simbawõj mötzal. Mewõ aiga qesim gihizal: Keu jimami, mi ölop möta mökõsõnda kezap alman.

⁴ “Nõñõn Juda ambazip kambu uruñe ahuba kõnakõnahiñeyök kõnahiba nani kantri ki aka sitinini Jerusalem miangõreñ mala koral. Miangõra Juda ambazip pakpak yeñõn malmalni gwabõneyök denõwõ kota malali, mi ölop möt kutuze. ⁵ *Yeñõn kõnañamni nalõ körõpñi möt kutuze. Sihimñini ahõi mi ölop kewõ nanõgõba jibeak: Nanine jike nup uruñe Farisi pati neñõn asa yeñgõreñ jike mötmöt mi törörök kötõkñi wuatangõba maljin. Nõñõn mutuk yeñgõ kambu patinõj anõgota Kõna keu kapanõ kõla wuatangõba malal. ⁶ Anutunõj ambõsakonurupnini yeñgõra jõhõjõhõ keu alõhi, nõñõn miangõ õlñi ahumapkõra al mambõta jörõmqörõm aka maljal. Miangõra aka merak keu jakeñe al niñgigetka kinjal.

⁷ “Nanine Israel ambazip kambu 12 neñõn kõrek pakpak jõhõjõhõ keu miangõ õlñi asuhumapkõra mambõrakzin. Mi mambõta jörõmqörõm aka qõsõsõk (qörörök) sunõgem asak Anutu waikñi memba möpõseimakzin. O Öñgõñgõñamni, nõñõn jörõmqörõm mewõ ahakzalanõgõra Juda jitñememe yeñõn keu bölõñi bölõñi silene ala jim niñgimakze. ⁸ Anutunõj ambazip kõmukõmuñi mem gulim enõgii wahõtmei, inini mi mönõ denõwõgõra aka qahõ möt narize?

⁹ * “Nanak mewõyök kewõ mötmõriba malal, ‘Ni Jisõs Nazaret azigõ qetbuñaji sanõgolbi qahõwakñapkõra bim gwõtputuk qemamañgõ dop akzal.’ Mewõ mötmõriba kazik aka malal. ¹⁰ Kazik aka Jerusalem miangõreñ õlña bim qeba malal. Jike nup galõm bohõnñi yeñõn nam kõl niñgiget jim kutubiga Anutugõ ambazip sarakñi mi gwõtputuk enõgõmemba kõsõ mire al enõgiget aka tosatñi kõmumegõ keu jigetka nõñõn mewõyök keu mi kötõngõba imbi kõla (wout ala) malal. ¹¹ Nalõñi nalõñi lilikõba kõuluk miri dop börõjan mem enõgibiga uruñini melenõgeri, mienõn asuhuget. Asuhugetka Jisõs qanõ kõla ilit wanõgimegõra kunõguba tõhöreñ örõm ureim enõjal.

* 26:5: Apo 23.6; Fil 3.5 * 26:9: Apo 8.3; 22.4-5

Mewö ak enġibiga ihileknöŋ könöpuk tauköba enġugetka sihimbölö kahasililiŋ möta malget. Urunan könöp jem sölöŋgöiga sesewerowero ak enġimamgöra köröwen kötökŋi kian kantrigö sitiŋi sitiŋi miangöreŋ anda malal.” Mewö.

Polnöŋ uruŋi melenöhöŋgö kösohotŋi jiyök.

Apo 9.1-19; 22.6-16

¹² “Kaisilik mewö aka malbiga nalö kunöŋ jike nup galöm bohonŋi yeŋön nömbuk urumohot aka nam köl niŋgigetka Damaskus sitinöŋ anmamgöra könanöŋ anal. ¹³ O Öŋgöŋgöŋamni, nöŋön könanöŋ anbiga silim bibiŋe miangöreŋ Suepnöhök asakmararaŋ kun wölaŋ erök. Eta wölbilik ewö asuha wehön jeŋi oŋgita asariiga ehal. Asak miangön mönön ni aka azi nömbuk anini, nini turum neŋgiyök. ¹⁴ Turum neŋgiiga körek tala gölmenöŋ eta kölin. Eta köla ahöinga nöŋgöra keu kun kaiga Hibru keunöŋ kewö jii möral, ‘Sol, Sol, gi wuanöŋgöra sesewerowero ak niŋgizan? Gi mönön bulmakau aziŋi ewö akanbuk. Toŋan gölme mözöamgömapköra bulmakau aziŋi kinöŋnöŋ jöhöi ösöŋ öröiga dop kölĵapmö, laŋ öröba könöpuk yaköriba öröm ureiiga kerösuap jitŋan uiga sihimbölö mörakza. Gi mönön miangö dop laŋ luhuba nangi könisemgi öne töhön kutubanbuk.’

¹⁵ “Mi möta qesial, ‘O Kambu, gi daŋön?’ Qesibiga jiyök, ‘Ni Jisös sesewerowero qakŋe al niŋgimakzani, mönön mia akzal. ¹⁶ Mi akzalmö, ölöŋ wahöta kinöŋ. Ni aka yuai ekzani aka könaŋgep toroqeba asuha kondel gihimami, mi mönön naŋgöba jiba dangunu ewö kinda nöŋgö jittjememeni aka weleni qeba malman. Gi nup mi memba malman. Nöŋön miangöra aka asuhum gihizal. ¹⁷ Nöŋön mönön nangi Israel ambazip kambu yeŋgö böröŋineyök meköm gihimam aka kian kantri ambazip yeŋgöreŋ melaim ghibiga anmani, yeŋön guhubepuköra mewöyök galöm mem gihimam. ¹⁸ Nöŋön melaim ghibiga anda ambazip jeŋini metohonöŋga uruŋini melenċa söŋaupnöhök asakŋe kaŋgotme. Jeŋini tohoiga imbiŋini melenċa Satangö kukösumnöhök lolohoba Anutugö sel uruŋe kame. Mewö kaba möt narim niŋgigetka siŋgisöndokŋini saŋgoŋda mosötmam. Mosötpiga Anutunöŋ alaurupŋi tök kutum enġiiga sarakŋi akzei, mönön yeŋgö sutŋine aŋgota dum tatatŋini memba oyaenċkoyaen aka malme.’ Jisösnöŋ mewö kutum nuasöta jiyök.”

Polnöŋ urugö nupŋaŋgö kösohotŋi jiyök.

¹⁹ “O kiŋ Agripa, Jisösnöŋ mewö jiiga nöŋön Suepnöhök jemelen imut eka könaŋi möta mi köyatiba malmamgö mötpiga osiyök. Miangöra nöŋön imut miangö keuŋi mi tem köla

nup memba malal. ²⁰ *Mi tem köla liliköba Buja keu kewö jim sehiba malal: Injini mönö uruñini melenđa Anutugören lilingöba kaba uru melenđerangö ölnji mi ahakmemerinan kondela malme. Buja keu mi mutuk Damaskus aka Jerusalem siti yahöt miangören maljei, yengöra jim asariba malal. Miangö andöñe Juda kantri pakpak yengöra jial aka kian kantri yengöra jiba uruñini kuñguba malal. ²¹ Könañi miangöra aka Juda ambazip tosatñan jöwöwöl jikenöñ öngöba miangören qeraköba nöminba kapan köla köhömuñi nuñgubingö aket.

²² “Mewö aketmö, uruni melenđalangörenök mala kotpiga Anutunöñ bauköm niñgiba maliga nalö kewöñe toroqeba ölop maljal. Baukbauk miangöra aka ki kinda öngöngöñi aka eretñi engö jeñine keuni ki jizal. Moses aka kezapqetok ambazip yeñon yuai asuhumapkö jigeri, nöñon mönö yengö keuñini miyök törörök wuatangöba keu kewö nangöba jizal:

²³ *Anutunöñ areñ ali Amötqeqe Toñi Kraist yañon sihimbölo möta kömumba azi mutukñi kömupnöhök wahötma. Wahöta Anutu asakñangö könañi mi Juda kambu neñgöra aka kian kantri yengöra indela jim tuarim engiba malmangö jiyök.”

²⁴ Polnöñ keuñangö likepñi mewö jiiga premiö Festusnöñ tereñgöba keu kemañe kutuba jiyök, “Pol, gi kahapmahap akzan. Papia mirinji mirinji miangören öngönöñga mötmötkan sehiba nöropsohop mem gihii maljan.”

²⁵ Mewö jiyökmö, Polnöñ melenñök, “O kembu sorokni Festus, nöñon nöropsohop qahö akzal. Keu jizali, mi mötkutukutu keu ölnja akza. ²⁶ Kiñ Agripanöñ keu kiangö könañi möt soroköza, mewö mötzal. Yuai pakpak mi tölapñe wangöm kunöñ qahö asuhuyök. Miangöra keu buzupñi pakpak mi mönö kiñgö kezapñe gei möt teközawi, mewö möt köhöizal. Miangöra nöñon keuni ki ölop awösamkakak qakñe kinda jibiga mötzan. ²⁷ O kiñ Agripa, Juda azi gi kezapqetok yengören Buzup Kimbigö keuñi möt narizan me qahö? Mi möt narizan, mewö mötzal.”

²⁸ Polnöñ mewö jiiga Agripanöñ melenđa jiyök, “O Pol, göñon nalö töröptökñi kiangören uruni kuñgunöñga nöñon uruni melenđa Kraistkö alañi akilenakgö mötzan me? Mewö mötmörizan me?”

²⁹ Mewö jiiga Polnöñ melenñök, “O kiñ, keu köröpñi me kötoñi jibileñak, mi muatmö, göñonök qahöpmö, döлки keuni kezap ala mötzei, körek eñon mewöyök Kraistkö alaurupñi akñegöra urusihimnan möta kewö köuluközal: O Anutu, uruñini melenđ enginöñga nöñon ki maljali, mönö miangö dop akñe. Tapep (muñgamuñga) miyök al engimapköra qahö köuluközal.”

* 26:20: Apo 9.20, 28-29 * 26:23: Ais 42.6; 49.6; 1 Kor 15.20

³⁰ Mewö jiiga kiñnõñ wahõriga premiõ aka Bernaisi yetkõn mewöyök wahõrohot aka yembuk tatkeri, yeñõn körek wahõtket. ³¹ Wahõta mosõta angetka azi ipñan nanñinõk eraum möta kewõ jiget, “Azi kianñõn bölõñi kun qahõ aiga wuanõngõra mönõ gwarõhõm wañgiget? Yañõn kõmupkõ buña akñawañgõ dop qahõ akza, mi mötzin.” ³² Mewõ jiba eraum möta Agripanõñ Festusgõra jiyök, “Sisa kiñgõreñ anbiga keuni mindiñgõi diñgimapkõra qahõ kapañ kõla qesiba jibawak ewõ, mönõ õlõp pösaringa gebawak.” Mewõ.

27

Pol wañgenõñ algetka kõnahiba Rom anõk.

¹ Azi ipñi yeñõn neñgõra keu kewõ jõhöget: Nini wañgenõñ õngõinga luhutnõñ nañgõi Itali kantrinõñ anbin. Keu mewõ jõhögetka Pol aka kõsõ miri azi tosatñi mi suahõ galõm kun qetñi Julius yañgõ börõñe al eñgiget. Julius yañõn yarõ kambu bahõñi kun qetñi “Rom sisa kiñgõ yarõ kambu” qetkeri, miangõreñ yarõ azi 100 yeñgõ galõmñina malõk. ² Miri kun qetñi Adramitium miangõreñõk wañge kun kaba Eisia prowinsgõ kõwet jitñi mötõteiba wañge döpnji mohot mohot miangõreñ anmapkõ aka jõjõrõyõhi, miangõreñ õngõin. Õngõinga opo seri örõba mörõreñgõgetka luhutnõñ nañgõi kõwetnõñ anin. Masedonia prowinsgõ siti qetñi Tesalonaika miangõreñõk azi kun qetñi Aristarkus yañõn sunğurumnini aiga mohotñe anin.

³ Anda ahõm wahõta miangõreñ Saidon mire anğorin. Anğoringa Juliusnõñ Pol ala ak wañgiba jim tekõiga wañge mosõta alaurupñi yeñgõreñ anda eñgehiga wani yuaigõra osiyõhi, mi baukõm wañgiget. ⁴ Miangõreñõk kunbuk kõwetnõñ aninga luhutnõñ kõna anbin jiini, miangõreñ görõkenõk qeba gilõhañgõra lõmbõriiga toroqeba gõlme jõlanñi qetñi Saiprus miangõ tõlapñe geba qõhõrõngõba mötõteiba anin. ⁵ Aninga luhutnõñ nañgõi kõwet kutuba Silisia aka Pamfilia prowins yahõt mi etkoñgita Lisia prowinsgõ siti qetñi Maira miangõreñ anğorin. ⁶ Anğota miangõreñ suahõ galõmninan wañge kun miwikñaiyök. Wañge miangõn Ijptkõ siti qetñi Aleksandria miangõreñõk kaba Itali kantrinõñ anmamgõ aka jõjõrõyök. Mi miwikñaiiba jim kutum neñgiiga miangõreñ õngõin.

⁷ Õngõba kõwetnõñ aninga luhutnõñ õlõp qahõ nañgõi wehõn gwõtputuk mi õsõñõsõñ anda malin. Mewõ malin tekõiga miangõreñ kupuk-kapak aka kõwet miangõreñ Nidas taon kõsutñe anğorin. Kõsutñe anğoringa luhut kõhõikñanõk gila miangõreñ görõken toroqeba anbinangõ kõnañi jõhöyök. Jõhöiga lõmbõriiga Krit gõlme jõlanñangõ jitñi kõrõpnji qetñi

Salmone mi onğita anda gölme jöhanņangö tölapņe geba qöhöröngöba mötöteiba anin. ⁸ Köwet jitņi dowe mötöteiba osikosibuk anda mala Lasea taon kösutņe miri qetņi “Waņge surusuruņi eksihimņambuk, Fair Hafens” qerakzei, mianğöreņ anğorin.

⁹ Mianğöreņ anğota nalö köröpņi mösöhöba malin. Mewö malinga singisöndok saņgoņsaņgoņgö kendonņi qetņi Yom Kippur* mianğö nalöņan teköiga luhutqeçe nalöņan lök kam kuņgui anğorin. Luhutqeçe nalöņe ambazip köwetnöņ anda “Ayuhubinbuk,” jiba waņgeņini jöhözema. Mianğöra Polnöņ galöm meme keu kun kewö jii mötket, ¹⁰ “Aziurup, nini köwet qakņe toroqeba anbinbuk. Mönö kupuk-kapak qakņe anda ayuayuhu miwikņaibinbuk. Waņgenini raidimbomnöņ qei jömgöiga sukinapņi geņmororoņ öngöngöņi aiga naninak mewöyök kömumbinbuk. Miri tandökņan mewö ahiga ekzal.”

¹¹ Galöm meme keu mewö jiyökmö, suahö galömninan Polğöreņ keu mi qetala waņge toņi aka stia (möņaqöņai lökuat) galömņi yetkön “Ölöp anbin,” jiyohori, suahö galömninan keuņiri mi möt nariyök. ¹² Miri qetņi “Waņge surusuruņi eksihimņambuk” mianğö waņge döpnņi mi luhutqeçe nalö tatatkö dop qahö ahök. Mianğöra aka azi gwötpukņan anbingö keu kötöngöba kewö jiget, “Ki tatpingö ölan neņgöhöza. Ölöp opo seri öröba möröreņgögetka köwetnöņ anbin. Anda kapan köla mala köna ahuiga Finiks waņge döpnöņ anğotpinak. Mianğöreņ anğota luhutqeçe nalö ki ölöp tata malin teköma.” Waņge döp qetņi Finiks mi Krit gölme jölannņi mianğö jitņe wehön gegeni göröken ahöza. Mewö.

Raidimbomnöņ köwet meiga böliyök.

¹³ Anbingö keu mewö jigetka luhutnöņ ösöņösöņ könahiba Saut görökenök gilök. Giliga “Ölöp anda areņnini wuatangöba Finiks ekin,” jiba mötmöriba kinda waņgegö kösö mendannņi musulgetka korök. Koriga waņgenöņ lolohoiga luhutnöņ naņgöi ösöņ neņguanğiriga Krit gölme jölannņangö jitņi mötöteiba dowe anin. ¹⁴ Mewö animmö, nalö kude köriiga luhut ösumņi köhöikņi qetņi mura (yoware, Not Istkö raidimbom (piwi)lilililikņi) mianön mönö gölme jölannņi mianğö qakņeyök geba gila neņguba kayök.

¹⁵ Neņguba kaiga waņgenini galöm köl waņgibingö mem bibihigetka luhut qeba kayöhaņgöreņ göröken anmamğö osiyök. Osiiga mosötketka luhutnöhök waņge kuņguba memba waņgiriga nanņak öne ani utuköm neņgiiga laņ malin. ¹⁶ Utuköm neņgiiga mala gölme jölannņi moröņi kun qetņi

* **27:9:** Yom Kippur sösongai kendon mi Septembe teteköņe me Oktobe könakönahije alakze.

Kauda miangö tölapne Saut göröken anin. Miangören anda gomba kösönöñ jöhögetka wanje andöñe o kutuba kayöhi, mi aum-möriba köwetnöhök öröinga gwötpuk lömböriiga töndup kapañ köla öröinga korök.

¹⁷ Gomba mi öröin koriga wanje ketane alin. Wanjenöñ utuköba jömgöbapuköra möringa kösö memba wanje köpeiba jöhöm köhöiget. Mewö anda mala sak qetñi Sirtis[†] miangören köwet röndumñi köröpñi qahö ahözawangören kunguba qaköbinbuköra kenjötnini mörin. Mewö mörinangöra aka wangegö opo seri yuaini mi meköba eta ala wanje galömkölköl mosötket. Mi mosötketka luhutnöñ wanje kunguba nenjomisiiga öne lañ anin. ¹⁸ Öne lañ aninmö, raidimbom miangön mönö könöpnambuk toroqeba gila utuköm nenjiyök. Mewö utuköm nenjiiga miri gianjiiga miangören könahiba wangegö sukinap tosatñi memba köwetnöñ gilget geyök. ¹⁹ Wehön karöbut aiga miangören wangegö öröyuai aködamunpnambuk mi nanñinak memba gilgetka köwetnöñ geyök. ²⁰ Mewö memenjaliba anda mala sunjem silim gwötpuk miangören wehön me senjelau kun qahö ehin. Raidimbom miangön mewöyök köhöikñanök toroqeba gila ahöyök. Gilayök ahöiga lömböriiga “Mönö qahöwakin!” jiba malmal jöhöjöhögö möta uruninan eri tötbörömnini tali tarin.

²¹ Raidimbom urune nalö köröpñi kaba mala nene kun qahö nein. Miangöra aka Polnöñ sutñine wahöta kinda kewö jiyök, “Aziurup, nöñön Krit gölme jölanñi qahö mosötpingö goro jiali, injini nöñgören keu mi wuatangögetka dop kölbawak. Mewö ahinga genmororon aka ayuayuhu kianön mönö qaknine qahö öngöbawak. ²² Goroni mosötketmö, döлки qambañ keu kewö engizal: Engörenök kunñan kun malmalñi qahö ayuhuma. Mi qahöpmö, wangeyök ayuhuma. Miangöra injini mönö ewebibiñini möta tatme.

²³ “Nöñön bem qetñi Anutu yangö bunjaya aka welenni qeba maljal. Sunjem gaun ahöbiga yanön Suep garatanñi kun melaiiga nöngö kösutne kaba kinja. ²⁴ Kinda kewö jiza, ‘Pol, gi kenjötki kude mötman! Gi ölop Rom sisa kinjö jemesoholne anönga kewöt gihima. Mötnöñ! Anutunöñ körö ölöwakñi kondel gihiba ambazip pakpak göbuk wanjenöñ mohotne maljei, yengö malmalñini mönö göhö böröge ali göbuk kinda kunñan qahö kömuma.’ ²⁵ Suep garatanöñ nöngöra keu jizawi, mönö miangö dop asuhuma. Nöñön Anutu mewö möt narim wangizal. Miangöra aziurup, injini mönö eweñini möta tatme. ²⁶ Mewö asuhumapmö, luhutnöñ gila muwutapköm nenjiiga gölme johannñi kungö jitne angotpinangö dop akza.” Mewö.

[†] 27:17: Sirtis mi Afrika kantri qetñi Libia miangören göröken ahöza. Sirtis miangören köwet dutne sak kukundu ahöza.

Sunjem 14 aiga gölme dopdowiget.

²⁷ Waŋgeninan Gölme Sutñire Köwetkö (Mediterranean Sea) bahöŋi qetñi Adria Köwet miangören öne laŋ aniga sunjem 14 ahök. Mi aiga sunjem bibiŋe miangören waŋge nup meme azi yeŋön “Mönö gölme kun dopdowizin,” jiba uruŋinan mewö mötket. ²⁸ Mewö möta kinda kösö kun lömbötñambuk jöhöba gilgetka geba köwet dutñi misiriyök. Misiriiga köwet röndumgö qötöŋi ahuyöhi, mi 40 mita (120 fit) miangö dop ahök. Borom kun toroqeba anda tandök mohot miyök aketka qötöŋi mi-aŋön 30 mita (90 fit) miangö dop aiga miwikñaiget. ²⁹ Mi miwikñaiba waŋgeninan köt törom kembaŋe kuŋgubapuköra kenğötñini mötket. Mewö möta waŋgegö kösö mendanñi 4 mi waŋge andöŋeyök pösata ösöŋ memba eta alget aka asarimapkö miri qeba mamböta köuluköba tatket.

³⁰ Mewö tatketmö, waŋgegö nup meme azi yeŋön kewö möndöba jiget, “Nini mönö waŋge numbuŋe göröken waŋgegö kösö mendanñi tosatñi gilinga gema.” Mewö möndöba jiba waŋge moröŋi gomba kun waŋgenöhök meköba mem et algetka köwetnöŋ eri waŋge mosöta esapköba tölapŋe ölöŋ köla anbingö aket. ³¹ Mewö aketmö, Polnöŋ suahö galöm aka yarö azi yeŋgöra kewö jiyök, “Yeŋön waŋgenöŋ qahö mösölatiba kinme ewö, eŋgö malmal jöhöjöhögö könaŋi kun qahö ahuma.” ³² Mewö jiiga yarö azi yeŋön anda gombagö kösöŋi yandigetka nanñök aniga nup meme azi yeŋön ölöŋ köla anbingö osiget.

³³ Waŋgaran suruiga miangören Polnöŋ körek pakpak nene nemegö qambaŋ keu jim kutum eŋgiba kewö jiyök, “Inini lök nalö köröpñi uruyahöt mamböta nene kun qahö yöhösöröba malgetka merak wehön 14:ŋi akza. ³⁴ Mianğöra kewö jim kutum eŋgizal: Nini malmal jöhöbingö aum-möröbini, miangören ösumnini etpapuköra mönö köhöiba kinda ölöwahinga dop köлма. Mianğöra inini mönö nene neme. Eŋgörenök kuŋŋan kun silenji qahö qema. Nöröp juŋñini moröŋa kun mi qahö kötökñi sohoma.” ³⁵ Mewö jiba Polnöŋ beret memba körek pakpak yeŋgö jemesoholñine Anutugö saiwap jiba mindipköba könahiba neyök. ³⁶ Mewö neiga eka körek yeŋön awösamñini geiga mewöyök nene memba neget. ³⁷ Nini waŋge uruŋe mindiriba jaŋgö 276 miangö dop malin. ³⁸ Yeŋön körek pakpak nene memba nem timbireŋ aket. Mewö aka waŋgenöŋ amqemapköra wit padi toru memba gilgetka köwetnöŋ geyök. Mewö.

Waŋgenöŋ köwet töromnöŋ kuŋguba qaköba jömgöyök.

³⁹ Miri gianjiiga gölme eka mi qahö möt kutuget. Qahö möt kutugetmö, köwet waŋgömñi (bay) kun sakñambuk mi-wikñaiba eket. Mi eka “Mönö waŋge melenđa esapköba

mianğoreñ anğotpinak,” jiba keu jöhöget. ⁴⁰ Keu mewö jöhöba kinda wañgegö kösö mendannañgö kösöni yandigetka suliga mosötketka köwet dutñe ahöyök. Mi yandiba mianğoreñök likeplikep stia (möñaqöñai) lökuat yahöt ahöyöhi, mietkö kösöñiri pösatketka lolohoyök. Mi pösata wañge wösöñañgö opo serinji öröba möröreñgögetka luhutnönñ nañgöi wañge möñaigetka saknönñ göröken anin. ⁴¹ Mewö aninmö, wañgenönñ köwet töromnönñ anapuköra jöhöbingö osiba mosöta gilgetka anda kuñguyök. Mianğoreñ kuñguba wañge giliñan töromnönñ qeba qaköba anda kamamgö osiba tarök. Mewö tariga köwet siriñan wañgegö andö likepñi gila kinda ösum köhöikñi mianön qeba qesiñmesiñnök.

⁴² Mewö ahiga jiget, “Kösö miri azi yeñğoreñök kunñan o qeba kutuba ölöñ köla anapuk.” Mewö jigetka yarö azi yeñön kösö azi nini körek neñgubingö mötket. ⁴³ Mewö jigetmö, suahö galömninan Polgö malmalñi jöhömamgö möta yarö aziurupñan mewö akepuköra anğön köl enğiyök. Anğön köl enğiba kewö jim kutum neñgiyök, “Denike enön köwet qeba anangö könai mötzei, inini mönö mutuk luhuba geba köwet qeba anda körökñe öñgöme. ⁴⁴ Yeñön mutuk angetka tosatñan andönjine katapa sahötñi qelanjiba meme me wañgegö kitipñi könai könai miwikñaiba mianğö qakñe ahöba köwet qeba anme.” Mewö jim kutum neñgiiga tandök mewö aka körekñan malmalnini jöhöba köwet jitñe anğot teköin. Mewö.

28

Malta gölme jölanñe mamböta malin.

¹ Malmalnini jöhöba köwet jitñe kañgota mianğoreñ gölme jöhanni qetñi Malta qetketka mörin. ² Kañgoringa kienönñ könahiba eri miri amöriyökmö, Malta ambazipnönñ ala-ala tandök ölöp kötökñi kondel neñgiba könöp ohoba neñguañgitketka körekñanök könöp kösutñe anda jömöta tarin. ³ Polnönñ könöp omajarek qezaköba börangöba könöpnönñ alök. Mi ali jeiga qatö kunönñ könöp umñan kösuiga kota böröñe jöhöba yöhöyök. ⁴ Mokoleñnönñ mewö jöhöba böröñe möndöba eta kiniga gölme jölanñañgö tonjan eka nanñini eraum möta kewö jiget, “Azi ki köwetnöhök malmalñi jöhöba korökmö, Sonğoriñnönñ töndup likepñi melenđa malmalñi kutum wañgii kömuma. Mianğöra mönö enğui kömukömu azia akza. Mewö möt köhöizin.”

⁵ Mewö jigetmö, Polnönñ soramen utuköba kinda giliga könöp uruñe geiga silene geñmororoñ kun qahö ahuyök. ⁶ Mewö jiba ehiba “Silenji qariba pisihima me wölanj kömumba gölmenönñ tala eta kölma,” mewö jiba ek tiba mamböta kinget. Nalö köröpñi mamböta kingetmö, Polgö silene yuai bölöñi kun

qahö ahuyök. Mewö aiga mötmötñini melenñiga jiget, “O, azi ki mönö bem azia akza.”

⁷ Malta saknöñ kanğota lañ uba kösutñe nene nup gölme körö jajapini aka bau bulmakau kambuñi kambuñi ahögetka ehin. Mi gölme jöhanñangö azi kembuñini qetñi Publius yangö buñaya ahöyök. Gölme toni mianñön köl öröm nenñii miriñe öngöinga urukalem qakñe köyan köl nenñiiga yambuk köisirik taringa wehön karöbutkö dop anök. ⁸ Taringa Publius iwiñan silekönöp aka irip suaip sepnambuk kawöl (dysentery) mianñön yöhöiga dumnöhök ahöyök. Ahöiga Polnöñ yangören anda köuluköba böröñi nöröpñe ala mem ölöwahök. ⁹ Mewö asuhuiga mianğörenök kawöl ambazip tosatñi pakpak gölme jöhanñe ahögeri, yeñön mewöyök kanğotketka Polnöñ Anutu köuluköiga ölöwaket. ¹⁰ Yeñön kalem könañi könañi gwötpuk nenñiba mewö mianñön göda qem nenñiba malget. Könañep wañgenöñ öngöbingö ahini, nalö mianğören köwet qakñe köna malmalgö yuainñangö osiini, mi memba nenğöra wañgenöñ alget. Mewö.

Malta mosöta anda Rom sitinöñ anğorin.

¹¹ Köiñ karöbut teköiga wañge kun qetñi “Bem Siwisiwi” miwikñaget. Wañge mianğö nundune siwisiwi bemyahöt qetñiri Kastor aka Poluks mietkö imutñira memba menjöläba alget kinohot. Wañge mianñön Ijpt kantrigö siti qetñi Aleksandria mianğörenök kaiga gölme jöhanñe jöhöba luhutqege nalöñi mi tatket. Mi tatket teköiga öngöinga opo seri öröba mörörenğögetka luhutnöñ nanğöi mosöta anin. ¹² Anda mala siti qetñi Sairakyus mianğören anğota gölmenöñ eta wehön karöbut tarin. ¹³ Tata wañgenöñ öngöinga opo seri öröba mörörenğögetka anda Regium sitinöñ anğorin. Anğota ahöm wahöta luhut Saut görökenök könahiba gilök. Gili anda silimñi yahöt aiga mianğören Rom likepñe Puteoli taongö wañge döpnöñ anğorin.

¹⁴ Anğota mianğören urumelen alaurup tosatñi miwikñaiaba engehini. Engehinga kewö qesim nenñiget, “Inini ölop nembuk sonda mohot malbeak me qahö?” Qesim nenñigetka “Ölop!” jiba yembuk malin. Malin teköiga engömosöta Rom sitinöñ öngöin. ¹⁵ Urumelen alaurupninan Rom siti malgeri, yeñön kainangö keu buzupñi mötket. Mi möta miwikñaim nenñibingöra tosatñan wahöta (köna 43 mail kaba) miri qetñi Apius Forum maket mianğören kaget. Tosatñan (33 mail kaba) miri qetñi Kian miri karöbut, mianğören kaba miwikñaim nenñiba angehini. Anğeka Polnöñ “Anutu saiwap!” jiba möpöseiba uruñi anqeiga ölöwahök. Mewö.

Polnöñ Rom tata Juda ambazip uruñini kunğuyök.

16 Rom sitinöŋ kaŋgota miangöŋ Polnöŋ miri kunöŋ nanŋök malmapkö jim teköm waŋgigetka yarö azi kunŋan galöm memba yambuk malök.

17 Mewö jim teköm waŋgigetka miri miangöŋ tari silim karöbut teköiga Juda ambazip ipŋi köl öröm enŋii kaba tokoget. Tokogetka Polnöŋ kewö jii mötket, “Iwi alaurupni, nöŋön nanine Juda ambazip kambunini qahö qetala kazik ak enŋial me ambösakonurupnini yeŋgöreŋök ahakmeme möta maljini, mi qahö ak böliäl. Mewö qahöpmö, töndup Jerusalem sitinöŋ qeraköba nömimba jöhöm niŋgiba kösö mire al niŋgiget tatpiga Rom gawman yeŋgö böröŋine al niŋgiget. 18 Al niŋgigetka böröŋaŋ memba könaŋamnaŋgö qesiba kewötketka ölöwahök. Nöŋön yuai bölöŋi kun qahö aka kömupkö buŋaya akilenakö dop qahö ahal. Yeŋön mewö eka pösat niŋgibingö mötket.

19 *¹⁹“Mewö mötketmö, Juda jitŋememe yeŋön Judia miangöŋ keu mi qetala tuarenŋon aket. Mewö aketka siksauk aka lömböriiga nöŋön köna jaruba kun qahö miwikŋaiba kewö kapan köla qesial, ‘Ni ölöp Rom sitinöŋ anbiga sisa kiŋnöŋ keuni mindiŋgöi diŋgima.’ Mewö qesibiga melaïm niŋgigetka ki kayal. Nani Juda kambu yeŋön kazik al niŋgigetmö, töndup yeŋgö silenŋine keu bölöŋi kun ala jim enŋimamgö qahö mötzal. Mewö qahö. 20 Anutunöŋ azi kun asuhumapkö jöhöjöhö keu al neŋgiiga Israel neŋön keu miangö ölni ahumapköra mamböta jörömqöröm ahakzini, nöŋön mönö azi sorokŋi yaŋgöra aka gwaröhöm niŋgigetka tapep (muŋgamuŋga) ki bisizal. Könaŋamni mewö. Miangöra aka merak enŋeka keukeu eraum mötpingöra köl öröm enŋibiga ki kaba tokoze.”

21 Mewö jiiga jiget, “Judia gölmenöŋ göhöra keu jiba malgetmö, neŋgöra kimbi kun qahö alget kaiga ehin. Mewöyök alaurupninan miangöŋök ki kageri, yeŋgöreŋök kunŋan göhö keu buzup me kösohot bölöŋi kun qahö jii mörin. 22 Mi kun qahö jiget mörinmö, uruge keu ahözawi, nini mi ölöp mötpingö mötzin. Göhöreŋ Nazaret pati kambu miangö keuŋi mi gölme dop jigetka ambazipnöŋ qetalgetka likeplikap miangöŋ goranora keu gwötpuk jiba kazik ahakze. Pati kambu miangö buzupŋan mewö kezapnine gei mötzin.”

23 Mewö jiba Polnöŋ keu kunbuk jimapköra nalö kun areŋgöget. Mi areŋgögetka Juda ambazip jesöŋgöŋan nalö miangöŋ kaba Pol miri malöhaŋgöreŋ tokoget. Tokogetka söŋanök könahiba Anutu bemtohoŋaŋgö könaŋi jim asariba mali miri söŋauyök. Jisösgö könaŋi möt yaköba möt nariba uruyahöt mosötmegöra kapan köla uru kuŋgum enŋiba malök. Mutuk Mosesgöreŋ Köna keu aka kezapqetok ambazip

* 28:19: Apo 25.11

yeŋgöreŋ Buzup Kimbi oyoŋda keu miangöreŋök könahiba Jisösgö könani indela mianön kondela naŋgöba jiba malök. ²⁴ Buŋa keu mewö jiba maliga tosatŋan uruyahöt mosöta möt narigetmö, tosatŋan mi qahö möt nariba tönpin malget. ²⁵ Nanŋini urumohot qahö ak anguba sutŋine mötmöt kambu yahöt aka denbingö aket. Denbingö aketka Polnön keu kewöyök jii mötket, “Uŋa Töröŋan keu kun kezapqetok azi Aisaiağö uruŋe saŋep ali ambösakonŋini jii mötkeri, mi mönö eŋğöra dopŋine törörök jiyök. ²⁶ *Aisaianön keu mi kewö jii ahöza,

‘Gi mönö ambazip kambu kienğöreŋ anda kewö jinön mötme: Inini mönö kezapŋini ala keu ölŋa mötagun könani möt bibihibi töndup qahö möt asarime.

Jeŋinan uba yuai ölŋa ekagun könani ek bibihibi töndup qahö ek kutume.

²⁷ Ambazip kambu kienğö uruŋinan mönö köhöiba gwözöŋda ahöza.

Kezapŋinan keu möt bibihibi jeŋini kömaziliköba malje.

Mewö qahö akeak ewö, mönö jeŋinan yuai ölop ek kutuba kezapŋinan keu möta uruŋinan könani möt asariba uruŋini melengetka nöŋön i ölop mem ölowak eŋgibileŋak.’ ”

²⁸ Polnön keu mi jim teköba kewö jiyök, “Mianğöra inini mönö keu kötŋi ki ölop möt yaköme: Anutunön amötqeqegö Buŋa keuŋi mi mönö kian kantri yeŋgöreŋ ali anma. Yeŋgöreŋ aniga yeŋön mi ölop kezap ala mötme.” ²⁹ (Polnön mewö jim teköiga Juda yeŋön nanŋinök könöpuk jitnakölik aka goranora erauget öngöba eriga mosöta anget.) *

³⁰ Polnön nanŋaŋğöra miri kun kusuk söŋğöröŋi memba mianğö uruŋe (yara) yambu yahöt jömuŋŋanök ahöm malök. Mianğöreŋ mala ambazip denike yeŋön ekingö kageri, yeŋön mi pakpak ölop köl öröm eŋgiba malök. ³¹ Awösamkakak qakŋe kinda Anutu bemptohonğö könani jim asariba uru kuŋgum eŋgiba malök. Kembu Jisös Kraist möt waŋgimeğöra Anutu amötqeqegö könani kusum eŋgiba malök. Mewö maliga kunŋan kun qahö qetal waŋgiiga mala kota malök. Mewö.

* **28:26:** Ais 6.9-10 * **28:29:** Mötmöt ambazip yeŋön Jabö 29:gö keuŋi kewöta tosatŋan Luknön mi könakönahiŋe qahö ohoyök jizemö, tosatŋan keu miambuk urumohot qahö akze. Mianğöra jabö 29 mi sel uruŋe ahöza.

Rom kimbi Polnön Rom yeᅇgöra kimbi alök. Jim-asa-asari

Jim-asa-asari Rom sitinön kopa malgetka urumelen kambuᅇni kambuᅇni yeᅇn sutᅇine simbisembel denᅇda malget. Juda tosattᅇan uruᅇini melenᅇda Juda ahakmemenön aka Köna keunön qekötahöba sileᅇini yandiba sömbup qahö namba malget. Kian kantrigö urumelen kambu yeᅇn Anutugö kalem möriamᅇi qekötahöba Anutugö Köna keu bapᅇe qahö anda söᅇgöroröqök aka siᅇgisöndok amqeba akingö mötket. (6.15) Anutunön Juda könagesö ölnᅇi andö eᅇguba salupᅇine kian ambazip eᅇgoholi buᅇaᅇi akeri, miangöra söᅇgaiba ilit eᅇgiget. (11.18-20) Mewö aka Juda urumelen yeᅇn silikᅇini walᅇi mewöyök wuatangögerangöra aka jijiwilit ak eᅇgiba malget. Juda kambu yeᅇn kian kantrigö urumelen alaurupᅇini qepureim eᅇgiba Juda silikᅇini qahö wuatangögerangöra aka keuᅇini töhöreᅇ jim teköba söᅇgöroröqök aket. (2.17-20; 14.3)

Mindirim eᅇgimangöra Polnön kambu yahöt yeᅇgöra goro keu nanᅇök nanᅇök eᅇgimakza. Juda yeᅇgö könaᅇini indeliga (2.21-27) kian kantri yeᅇn söᅇgaiget. Keu bohonnᅇi kewö jiyök, 'Jisös möt nariinga Anutunön mötnariᅇnini eka keunini jim teköiga solanibin. Köna murutᅇi kun qahö ahöza.' (1.17) Kian kantri ambazip söᅇgöroröqökᅇini qekömapköra könaᅇini indela kewö jiyök: "Anutunön nanᅇini ölöᅇᅇinangöra aka qahöpmö, nanᅇi ak-kömükömuᅇangöra aka iᅇini möwölöhöm eᅇgiyök. (11.30-32) Miangöra mönö kapanᅇ köla Köna keu tem köla malme. (7.12-24) Körekmakörek siᅇgisöndökö kösö gwarönön mala ayuhubingö akzinmö, (3.23; 5.12) Anutunön nanᅇi irimsesewölᅇan etmapköra aka Kraist melaiyök. (5.8-9) Uᅇa Töröᅇan meköba siᅇgisöndok aka kömupkö kukösumnöhök pösat neᅇgima. Miangöra siᅇgisöndok ahakmeme mosöta (6.11-14) mindiriba jöpaköm aᅇguba kopa yeᅇgö sutᅇine kopa tandök kude malme." Goro mewö eᅇgiiga ösöᅇösöᅇ tem köla mindiriba malget. Polnön nalö mutukᅇi Rom ani nanᅇöm waᅇgigetka toroqeba Spein kantrinön anmamgö möta mewö ohoyök.

Buk kianᅇo bahöᅇi bohonnᅇi 7 mi kewö:

Jim asa-asari keu aka keu bohonnᅇi *1.1-17*

Körekᅇan siᅇgisöndökö amötqeqegöra osizin *1.18-3.20*

Anutunön amöt qem neᅇgimakzawaᅇgö könaᅇi *3.21-4.25*

Kraistpuk malmal dölöᅇᅇangö könaᅇi *5.1-8.39*

Israel yeᅇn Anutugö mötmöt areᅇnön malje *9.1-11.36*

Urumelenᅇ neᅇgö silik ahakmemegö keu *12.1-15.13*

Keu teteköñi aka nanñi yaizökzök keuñi 15.14-16.27

¹ Pol ni Jisös Kraistkö nup meme azia aka Rom urumelen ambazip embuk keu eraum mötpingöra kaba kimbi ohozal. Anutunöñ noholiga melaimelai azi aposol akzal. Anutunöñ Ölöwak Buñaji jim sehimangöra möwölöhöm niñgiiga maljal.

² Anutunöñ oyaenköyaen akingö Ölöwak Buñaji indelmapkö keuñi mi qeljine jöhöba jiiga kezapqetok ambazipnöñ möta Buña Kimbi töröñi mianğoreñ ohogetka ahöza. ³ Ölöwak Buñagö könañi mi nanñi nahönñi Jisös Kraist. Yañön gölme azi ewö kiñ Deiwidkö gwölönarökurupñi yengöreñök asuhuyök.

⁴ Suetp azi ewö Uñajan solanñi töröñi ahök. Anutunöñ i mem guliiga kömupnöñök wahöriga kukösunñan aukñe asuhuyök. Anutunöñ mewö mianñön nanñi Nahönñi akzawangö keuñi mi jim köhöiba kuñgum wangiyök. Kembuninanğö könañi mewö. ⁵ Kraistnöñ nupkö ölni kewö asuhumapköra mörök: Neñön kian kantriñi kantriñi liliköba Jisösgö qetñi sutñine jim sehiinga möta urunini melenđa möt narim wangiba keuñi tem köla malme. Mianğöra aposol nupñi aka kalem möriamñi mi neñgiiga memba maljin. ⁶ Anutunöñ ambazip Jisös Kraistkö buñaya aka malmegöra engoholöhi, Rom inini mewöyök yengö sutñine malje.

⁷ Urunini melenđa Rom sitinöñ maljei, nöñön körek engöra kimbi ki ohozal. Anutunöñ inini nanñi ambazip sarakñi malmegöra engohola jöpaköm engimakza. Anutu Iwinini aka Kembu Jisös Kraist yetkön mönö kalem möriam engiyohotka luainöñ malme. Mewö köulukömakzal.

Polnöñ Anutu möpöseiba kewö köuluköyök:

⁸ Gölmeñi gölmeñi pakpak yeñön Rom engö mötnariñinanğö kösohotñi jigetka mörakzal. Mianğöra keuni könahiba Jisös Kraistnöñ nam köl niñgiiga körek engöra aka Anutuni saiwap jimakzal. ⁹ Nöñön mötmöt sihimni pakpak Anutugö nupnöñ ala welenni qeba Nahönñanğö Ölöwak Buñaji jim asarimakzal. Mianğoreñ sundan inini mötmörim engimakzali, mi Anutunöñ nanğöba jimakza.

¹⁰ Nalö dop kewö jiba köulukömakzal, “O Anutu, nöñön Rom yengöreñ anmamğö möta nalö köröpñi lök mambötzal. Mianğöra mönö sihimğahö dop jinöñga köna asuhuiga nalö kewöñe ölop anmam.” Mewö. ¹¹ Engeka mötnariñinan köhöimapköra möta ölop nup memegö mötmöt kalem kun engimam. Mianğöra nalö mutukña engöreñ kaba engekñamğö awöweñğöba maljal. ¹² Kewö akingö awöweñğömakzal: Nöñön engekiga mutulanğöba ni aka inini denöwö möt narimakzini, mi eraum möta urunöñ nanğöba körö-ölöwak gem angubin.

13 *O urumelenj alaurupni, injini mönö kewö mötmöriba malme: Nöñön kian kantri tosatnji yeñgö sutñine liliköba uruñini kuñgum enjibiga melenjeri, mianğö dop enğö sutñine mewöyök ölni asuhui ekñamğö mötzal. Mianğöra nalö gwötpuk lök enğöreñ kusuk kamamğö arenji ala malalmö, yuai tosatñan mönö nalöñi nalöñi jöhöm niñgiiga osial. 14 Anutugö jeñe tosa kewö ahöm niñgiza: Ambazip kambu könañi könañi bauköm enjimamañgö keuñan mönö nöñgö qakne ahöza. Mötmöt ambazip aka gukmaulem ambazip miengö welenqegeñini öröröñ akzal. Mindimindiri keu Grik mötzei aka qandam * mala nanñini keuñine irohowaroho jimakzei, mi körek bauköm enjimamğö mötzal. 15 Mewö möta Ölöwak Buña mi Rom siti enğöra mewöyök jim asarimamğö amqeba urukönöp ahakzal. Mewö.

Ölöwak Buñağö kukösumñi kewö:

16 *Anutugö kukösumñan nini körek mem letot neñgiiga nalö kewöñe Suepkö buñaya akzin. Juda neñön mutuk urunini melenđa mi möt nariin aka neñgö andönine kantri tosatnji yeñön mewöyök mi möt nariget. Mianğöra Anutunöñ kukösumñi Ölöwak Buñañöñ ali ahözawañgöra mi algamusum qahö ahakzal. 17 *Ölöwak Buñañöñ mönö solanñi akingö könañi indelakza. Buña keu kun kewö ohoget ahöza, “Solannji akzawi, yañön mönö Anutu möt nariba mewö mianñön köhöiba mal öñgöma. Keu mianğö könañi kewö: Nini Anutu könahiba möt nariinga mötnariipnini eka keunini jim teköiga solaniin aka gölmenöñ malbinanğö dop toroqeba möt narim wañgiba jeñe solanimakin.” Mewö.

Neñgö siñgisöndoköra Anutugö irimñan seholimakza.

18 Ölöp solanibinakmö, ambazip keu ölni ahakmemenjan közañgöba siksauk memakzei, Anutunöñ mi Suepnöñ euyañgöreñök uba ehi qahö dop köliga irimñi seholimakza. Ambazip mewöñi pakpak engeka anğöjörakñini qetala silikñini bölöñañgöra aka kazikñi indeli asuhumakza. 19 Mi kewögöra: Anutugö könañi möt kutubinanğö dop akzawi, mi mönö nanñak indel enñgiiga sutnine aukñeyök ahöiga mörakze.

20 Anutugö malmalñi qahö ehakzinmö, kukösumñi mi Suep gölme miwikñaim etkiba mianğöreñök könahiba kondela mala koriga nalö teteköñi qahö asuhumakza. Mianğöra Anutugö börösöwöñi törörök ehinga bem aködamunñambuk akzawañgö könañan mönö ölöp möt kutubinanğö dop akza. Mianğöra ambazipnöñ yuai kunöñ möndöba nanñine keuñinanğö likepñi

* 1:13: Apo 19.21 * 1:14: Qandam, Siawari imbinöñ qandak, Nei keunöñ bus kanaka, ambazip arökñe nanñinök tönpin mala mötmöt miriñini qahö gukmaulemnöñ malget. * 1:16: Mak 8.38 * 1:17: Hab 2.4

nanğöba jibingö osimakze. ²¹ *Anutugö könani möt kutuba malgetmö, töndup “Yañon bemnina,” mewö qahö jiba i qahö möpöseigetka qetbuñani sutñine qahö ahöyök. Mewö qahö ahöyökmö, keu omani lanlan mötmörigetka mötmötñinan löwöriiga mötök aket. Uru mötkutukutuñini qahö mianñon mönö ömuñ köla pandaman meiga jipjap malje. Mianğöra “Anutugö könani qahö mötzin,” jiba möndömöndö lan aketka qahö dop kölja.

²² “Mötkutukutu ambazip maljin,” jiba silenini memba öngöba malgetmö, mewö mianñon uruqahö ambazip akze. ²³ *Anutu qetbuñani asakmararañambuk nalö teteköñi qahö mal öngömawi, i qahö möpöseiba waikñi qahö memba malgetmö, i mosöta salupñe tandö lopion aka imut tosatñi kuñguget. Tandö lopion söhögetka kaisongolomñinan azi kömukömuñangö dop akze. Imut tosatñi megetka nei sömbup aka gölmenöñ bapñinan köla ölölöngömakzei, miengö dop akze. Yeñon mi sipköba bem ewö möpöseim engiba malget.

²⁴ Mewö aka malgerağöra Anutunöñ i andö enğuiga nanñini uruñinangö sihim kömbönañini lan wuatangöba serowilin aka nanñini silenini gamu qeba mem et al anguba malje. ²⁵ Anutugö keu ölñi mosöta salupñe keu muneni qekötahöget. Miwimiwikñai Tonji ölña qahö göda qeba welenni qahö qeba malgetmö, yuai miwikñaiyöhi me nanñini böröñinan megeri, mianğö sihimñi asuhui möta börösöwö miengö waikñini memba möpöseim engiba malget. Mewö malgetmö, neñon miwimiwikñai Tonini mi nalö teteköñi qahö möpöseimakin. Keu mi ölña.

²⁶ Mewö aka malgerağöra Anutunöñ i andö enğuiga nanñini sihim kömbönañini gamuñambuk mi lan wuatangöba kewö aket: Yeğö ambiurupñinan awanöm köna diñdiñi mosöta nanñinak melenđa amimba malget. ²⁷ Azi yeñon mewöyök ambibuk amimba malmal mosöta goñgiget. Kaisero akitkö sihim kömbönañini mi azi sutñine öröm anguba mötketka könöpñambuk aiga nanñinak melenđa amimba angöjörakñinambuk aka malget. Goñgiba jaubatbat malgerağö likepñi mi Anutunöñ dopñine melen enğuiga qakñine öngöiga böliget.

²⁸ Anutugö könani möt kutubingöra mötketka eretñi aiga mosötketka Anutunöñ mönö mewöñanök i andö enğuiga nanñini mötmötñini goñgoñan galöm köl enğuiga ahakmeme gamuñambuk aka memba malget. ²⁹ Ahakmeme goñgoñi aka silik bölöñi könani könani mianñon uruñini kokolak qeiga kewö ahakze: Yuaigö nepaqepalok membagun membingö köpösöngöba isimkakalek ahakze. Tosatñi yeğöreñ yuaigöra

* 1:21: Ef 4.17-18 * 1:23: Dut 4.16-18

körögisigisi ahakze. Ambazip enjuget kömumakze. Anjururuk aka tosatji tilipkôm enjimakze. Ambazip tosatji jiliwitin qakje bölöni ak engibingö mörakze. Keu ambazip kezapjine sanep alget geiga diwonɗawon anakza.

³⁰ Andöqege keu jimakze. Anutugö yom jimakze. Silik bölöni könöpɗambuk tem köla wuatangömakze. Jakbak-öranboraɗ aka silenjini memba wahörakze. Silenöɗ alal aka silik bölöni murutji murutji miwikɗaimakze. Iwinam keunini qahö tem kölakze.

³¹ Mötmötjini qahö tohoiga uruqahö mala keu laɗ jöhöba qahö wuatangömakze. Ala-ala qahö aka tosatji yengöra wösömötmöt qahö ak enjimakze. ³² Anutunöɗ köna diɗɗiɗi kewö jim kutui ahöza: Ambazip bölöni mewöni ahakzei, yengön mönö kömup köhöikɗangö buɗaya akɗeangö dop akze. Yengön jimkutukutu mi möt asarizemö, töndup nanɗinak bölöni mi ahakze aka miyök qahöpmö, tosatjan mewö aketka “Ölöp!” jiba imbi köla nanɗöm enjimakze. Mewö.

2

Anutunöɗ keunini kewöta diɗɗiɗanök jim tekömakza.

¹ *O alani, gi tosatji yengö keunini jim tekömakzan me qahö? Gi tosatji yengö keunini jim teköba nangak ahakmeme miyöhök ahakzan. Mianɗöra alagahö keunji kun jim teközan ewö, mönö nangahö keu mewöyök jim tekönönga mianɗö lömbötɗan nangi qake öngöma. Mianɗöra öngöngöɗni me eretɗi akzani, mi töndup mönö yuai kunöɗ möndöba nangahö keugö likepɗi nanɗöba jimangö osimakzan. ² Ambazip ahakmeme bölöni mewöni ahakzei, Anutunöɗ yengö keunini keu ölnangö dop kewöta jim tekömakza, mi mötzin.

³ Mianɗöra denöwö mötmörizan? Gi gölme azia aka töndup yuai mewöni ahakzei, yengö keunini jim teköba nangak ahakmeme miyöhök aknönga dop kölja me qahö? Anutunöɗ keugi kewöta jim teköba likepɗi melen gihiga ölna göhö qake öngöma. Anutugöra jeɗe qahö mömölaköba asambötman.

⁴ Anutunöɗ ala ak neɗgiba bölöɗamninaɗgö likepɗi zilaɗ qahö melenɗmapmö, mamböta möta mökösoɗmakzawi, keu mianɗöra jijiwilit akzan me? Anutunöɗ uruölöpɗi kondela urugi melen-mangöra öröm gihimakzawi, mianɗöra tönpin malbanbuk. ⁵ Gi kezapɗupɗup aka urugi qahö melenmani, mewö mianɗön Anutugö jeɗe qahö mömölakömanmö, irim-sesewölɗan göhö qake sehiba öngöma. Kazik nalöɗan kam kuɗguiga keunini diɗɗiɗanök jim teköma. Likepɗi melen neɗgimawi, nalö mianɗöreɗ irim-sesewölɗi mönö aukje in-deliga eka mötpin.

* 2:1: Mat 7.1; Luk 6.37

6 * Anutunöŋ mönö “Ahakmemeninangö dop mohot mohot nengöra likepŋi melenŋ nengimawi,” mi kewö: 7 Anutunöŋ qetbuŋaŋi nengimapköra mamböta aködamuninambuk akingöra kapaŋ köla pöndaŋ kinda nup ölöpŋi ölöpŋi memba maljini, nengöra malmal köhöikŋi nengima. Mi nenggiiga nalö teteköŋi qahö oyaenŋkoyaenŋ mal öngöbin. 8 Mewö mal öngöbinmö, ambazip nanŋinanŋörök mötmöriba girinŋjabak memba Buŋa keu ölnŋi andö qeba keu bölöŋi wuatangömakzei, Anutugö irimŋan mönö miangöra seholiiga kazikŋi ali qakŋine öngöma. 9 Kazikŋi mi mutuk Juda nengö qakŋine öngöiga nengö andönine kantri tosatŋi aiaka bölöŋi ahakzei, körek yengö qakŋine mewöyök öngöiga sihimbölö kahasililinŋ möta malme.

10 Mewö malmemö, Juda aka nengö andönine kantri tosatŋan mewöyök urunini melenŋda aiaka ölöpŋi ahakzini, Anutugö aködamunŋan mönö körek nengö qakŋine öngöiga qetbuŋa nenggiiga luainöŋ malbin. 11 * Anutunöŋ ambazip tosatŋi qahö nengkek soriba tosatŋi qahö qepureim engimakzapmö, dop mohotnöŋ kewöt nengimakza.

12 Miangö könaŋi kewö: Kantri tosatŋi yeŋön Anutugöreŋ Köna keu qahö oyoŋda möta ŋiŋgisöndok laŋ ahakzei, yeŋön mönö körekŋanök tönpin mala ayuhume. Juda neŋön Anutugöreŋ Köna keu oyoŋda möta töndup ŋiŋgisöndok ahakzini, Anutunöŋ mönö keu miangö dop körek kewöt nenggiba keunini jim teköma. 13 Ambazip Anutugöreŋ Köna keu öne mörakzei, yeŋön Anutugö jeŋe solanŋi qahö akze. Qahöpmö, Köna keu tem köla wuatangömakzei, Anutunöŋ mönö yengö keuŋini jim teköiga solanize. 14 Kantri tosatŋan Anutugöreŋ Köna keu qahö memba maljemö, tosatŋan töndup laŋ nanŋini imbi miangö dop mötmöriba ahakze. Anutugö köna keuŋi qahö mötzemö, töndup mötmötŋinan jim kutum enggiiga Anutugö köna keugö dop aka miangö bapŋe malje.

15 Mewö maljeangö könaŋi mi aukŋe asuhuba kewö ahöza: Anutunöŋ ambazip miwikŋaim nenggiba miangöreŋ Köna keuŋangö jimkutukutuŋi mi körek nengö urunine ali ahöza. Miangöra Anutunöŋ keuŋi jiba saŋep alakzawi, mi kian kantri yeŋön mewöyök mörakze. Mi uruŋinanŋö kezapŋan mötketka keuŋini jiiga Anutubuk öröröŋ mörakze. Anutunöŋ urumötmöt engiyöhi, mianŋön nalö tosatŋe keu jakeŋe ala kuŋgum enggiiga möt bölimahakze aka nalö tosatŋe keuŋini nanŋöba jiiga möt ölöwahakze. 16 Ölöwak Buŋa jim asarimakzali, miangö dop nalö ketanŋe kewö asuhuma: Kraist Jisösnöŋ Anutu bauköm wanŋiiga ambazip nengöreŋ keu tölapŋi tölapŋi kewöta jim teköm nenggima. Mewö.

* 2:6: Sum 62.12; Qam 24.12 * 2:11: Dut 10.17

Köna keu mianjon könanamnini denöwö indelja?

¹⁷ Gi nangi qetki Juda azia qeta Köna keunöŋ amöt qem gihimapkö möt nariba “Anutugö buŋaya akzal,” jiba silegi möpöseinöŋga dop kölja me qahö? ¹⁸ Gi Anutugö jitŋangö dop malmalgö keuŋi möt sölöŋgöba maljan. Anutugö Köna keu kusum gihigerangöra aka köna qetpuk sorok wuatangömamgö jiba keu pakpak kewöta öŋi aka munenji mendenmakzan. ¹⁹ Gi “Ölöp jegömöl ambazip alabaukŋini aka enġuanġitmam,” jiba aiweliköm anġumakzan. Söŋaupnöŋ maljei, mi mem asarim enġimanangö dop awösamkakak akzan.

²⁰ Mewö aka kewö jimakzan, “Köna keu kusum ningigetka mötkutukutu lök miwikŋaiba keu öŋangö könaŋi mötzal.” Mewö jiba anqeba kewö jimakzan, “Ni ölöp ambazip mötmöŋini qahö yeŋgö böhiŋina akŋam. Ölöp mönö namande yeŋgö qaqaŋina aka kusum enġimakŋam.” ²¹ Mewö jiba tosatŋi kusum enġiba wuanöŋgöra nangi qahö kusum anġumakzan? “Yoŋgorö kude meman,” jiba ambazip uruŋini kuŋgum enġimakzanmö, nangak yoŋgorö meme aknöŋga qahö dop kölja.

²² “Sero yoŋgorö kude akŋan,” mewö jinöŋ mötketka nangak kaisero akzan me qahö? Tandö lopioŋ sisit mem enġimakzanmö, töndup nangak jöwöwöl jikenöŋ öŋgöba yuaini anġön köla kiom qeba memakzan. Mi qahö dop kölja.

²³ Anutugöreŋ Köna keubuk maljanangöra silegi laŋ memba öŋgömakzanmö, nangak mi walöŋda mewö mianjon Anutugö qetbuŋaŋi memba et ala malnöŋga gamuŋambuk ahakza.

²⁴ *Miangö keuŋi mi Buŋa Kimbinöŋ kewö ohoget ahöza, “Enġö silikŋinaŋgöra aka kian kantri könagesö yeŋön Anutugö qetŋi ilita sutŋine mepaqepaik ahakze.”

²⁵ Anutugöreŋ Köna keu wuatangöba maljan ewö, Anutugö aiwesökŋi silege yandigeri, mianjon mönö bauköm gihiiga dop kölja. Mi dop köljamö, köna keu walöŋda siŋgisöndok ahakzan ewö, mönö aiwesöki qahö memenji mewö tandök aka öne laŋ maljan. ²⁶ Tosatŋan Anutugö aiwesökŋi silenine qahö yandigetka töndup köna keugö jimkutukutuŋi wuatangömakze ewö, Anutunöŋ aiwesök mi silenine ahözawangö dop ewö enġehiga dop kölja.

²⁷ Mewö enġehiga yeŋgöreŋök kunŋan ölöp Köna keugö dop göhö keugi töhöŋni kewöta jim teköiga etman. Anutugö aiwesökŋi silege yandigetka Köna keugö bohönŋi mohot mohot möt anġön köla maljanmö, mi walöŋda siŋgisöndok ahakzanangöra aka etman. ²⁸ Azi kunŋan silenöhök Juda azia akza ewö, yaŋön mönö Juda azi öŋi qahö akza. Mewöyök

* 2:24: Ais 52.5

Anutugö aiwesökñi sileneyök yandigetka yangisenj ahakze ewö, mi mönö aiwesök omanj, ölnj qahö.

29 *Ölnj qahöpmö, azi kun uruñan Juda azia akzawi, yañön mönö Juda azi ölnj akza. Mewöñanök Anutunöñ urunini qesöñda Uñanji Töröñji miangöreñ ali maljawi, mianñön mönö aiwesök ölnj akza. Köna keugö bohonñi wuatangöba azi silenji yandigetka gölme ambazipnöñ mötketka öngömakzapmö, Anutunöñ aiwesökñi urunine kinjawanğöra möri öngöi möpöseim neñgimakza. Mewö.

3

Anutunöñ keuñi pöñdanj wuatangömakza.

1 Mewö ahöiga Juda ambazip maljini, mianñön mönö denöwö bauköm neñgibawak? Anutugö aiwesökñi silenine yandigeri, miangö ölnjan mönö denöwö ahum neñgiza? 2 Ölnjan mönö malmal pakpak miangöreñ gwötpuk ahuba ölnja bauköm neñgimakza. Miangö keuñi mutukñi kewö: Anutunöñ Buñja keuñi neñgiiga buñjanina aiga maljin.

3 Mewö maljinmö, neñgöreñök tosatñan Anutu qahö möt narim wanğiba malgetka denöwö ak eñgima? Yangisenj malgeranğö likepñi melenđa mönö denöwö ak neñgima? Urukalemñi jöhöba anğön köliga omanj akña me denöwö?

4 *Mi qahöpmahöp! Nini körek pakpak munen ambazip akzinmö, Anutunöñ öl töhöññi akza. Anutugö könanji mi Buñja Kimbinöñ kewö ohoget ahöza,

“Keu jakeñe ala qesim gihigetka keugahö likepñi jim asariba miangöreñ diñdiñi aka luhut al eñgiba kinman. Göhö könanjanji mewö miwikñaiba nanğöba jime.”

5 Neñön ahakmeme gonğonji wuatangöinga Anutunöñ qindiñaim neñgiiga ahakmemeñi diñdiñan mewö aukñe asuhuza ewö, neñön keu miangöra mönö denöwö jibinak? Ni keu mi gölme ambazip mötmötkö dop kewö jizal: Anutunöñ likepñi melenñiga irimsesewölñan qaknine öngözawi, yangö mötmötñan mewö gonğiza me qahö? 6 Qahö, mi yapmakek! Anutunöñ gonğonji akawak ewö, yañön gölmeñi gölmeñi neñgö keunini mönö denöwö kewöta törörök jim teköbawak?

7 Nöñön munen azia akiga Anutunöñ keuñi ölnjan qindiñaim niñgiiga yangö qetbuñjan mewö aukñe asuhum tiñgitza. Mewö aiga nöñön siñgisöndok ahali, Anutunöñ miangö keuñi mönö denöwögöra jim teköza? Nömosöri nani imbi-imbi malbi dop kölbawak me qahö? Keuñan mönö qahö löwöriba etma.

8 Mönö kewö jiinga dop kölbawak, “Nini ölöp bölöñi toroqeba ahinga Anutunöñ mi qindiñaiiga ölöpñanğö ölnjan asuhuiga

keunjan qetbunjanambuk aknja.” Tosatjan nengöra keu sirongen mewö jiba toroqeba kewö jimakze, “Polnön keu mewö jiba miangö dop laj ahakza.” Mewö aka jigerangö keunji mi Anutunönj kewöta dopnjine jim teköm engima, mötzal. Mewö.

Ambazip kunjan solanji qahö akza.

⁹ Keu mewö eraum möta mi denöwö jim teköbinak? Juda neñön kantri tosatnji engongita Anutugö jeñe diñdiji akzin me qahö? Saumbanj! Miangö keunji lök qeljiñe kewö jim köhöinin: Juda me kantri tosatnji akinak, nini körekmakörek singisöndok ahinga köpeim neñgiiga maljin. Miangöra silenini memba öngöbingö osimakzin. ¹⁰ *Miangö keunji mi Buña Kimbinönj kewö ohoget ahöza,

“Kunjan kun solanji diñdiji qahö kötökñi akza.

¹¹ Kungö uruñe mötmöt qahö ahum kutui laj malje.

Kunjan kun Anutu miwikñaimangö qahö kapan kölakza.

¹² Qahöpmö, köreknjan mönö köna ongita janjun aka malje.

Körekmaköreknjan mönö böliba Anutugö jeñe angöjörakñinambuk akze. Ölöpnji ahakzawi, mohot-töwa kun mi qahöpmahöp miwikñaijal.

¹³ *Nesilamñinan isimkakalek ahakze.

Jöl ginaginañinan qaksirigö löm ewö anañiba kiniga kömupkö qösösökñi ewö mianjön ambazip laj ayuhum engimakze. Keu bölöñi mi qatögö jitñi möröm warabe ewö numbuñine kokolak qeba ahöiga jitñinan ambazip laj engöhömakze.

¹⁴ *Sait keu kömbukñambuknönj mönö numbuñini kokolak qeiga ambazip laj qesuahöm engimakze.

¹⁵ *Ambazip laj enguba sepñini mokomegöra könañinan kikkekösumok anda kamakze.

¹⁶ Könañini gongii maljeangö aiwesökñini kewö akza: Denike lilikömakzei, miangöreñ mönö köndeñ-möndeñ aketka ambazip uruñinan böliba kömbuhi-makza.

¹⁷ Luainönj malmalgö könañi mi qahö möt kutum yaköze.

¹⁸ *Anutu göda qebingö keunji mi uruñine qahö ahöza. Jitñi ongitpinbuköra kengetñini qahö möta önewat laj malje.” Anutugöreñ keu mewö ahöza.

¹⁹ Anutunönj Köna keu kewögöra neñgiyök, mi mötzin: Köna keu pakpak mianjön gölme dop jöhöm neñgimakza. Nini keu miangö bapñe anda tem köla malinga dop kölma. Qahö tem kölbin ewö, Anutunönj mönö likepñi melen neñgi ayuhubin. Miangöra sömbunini möta möndömöndönini mosöta keu

* **3:10:** Sum 14.1-3; 53.1-3 * **3:13:** Sum 5.9; 140.3 * **3:14:** Sum 10.7 * **3:15:**

Ais 59.7-8 * **3:18:** Sum 36.1

bök mala tem köl wanjiinga dop kölma. Anutunöj ambazip kōnanini mewō indelōha ahōza.

²⁰ *Kōna keunöj jōhōm neŋgimazapmō, nini lökŋanök mi wuatāŋgōbingō osimakzin. Anutugōreŋ Kōna keunöj siŋgisōndok qiwikŋaiiga aukŋe eka ölöp mōt kutubinmō, kōna mianjōn Anutugō jeŋe solanŋi akingō osibin. Mewō.

Solanŋi akinanġō kōnanġi mi mōtnariġ.

²¹ Naninak osimakzinmō, Anutunöj Kōna keu wuatāŋgōba solanŋi akingōra mi qahō jiyōkmō, kōna murutŋi kewō areŋgōba jii ahōza: Anutunöj nanŋak keunini jim tekōiga yanġō jeŋe solanibin. Anutunöj keu mi Moses aka kezapqetok ambazip yeŋgōra indeliga nanġōba jiba Buŋa Kimbinöj ohogetka nalō kewōŋe aukŋe asuhuiga mōtzin.

²² *Mianġōra denike denike neŋjōn Jisōs Kraist mōt narizini, Anutunöj mōnō kōrek neŋġō keunini jim tekōiga solanibin. Ambazip kambu murutŋi murutŋi neŋjōn Anutugō jeŋe öröröj akzin. ²³ Ambazip kōrek neŋjōn siŋgisōndok aka Anutugō asakmararananġōra osizin.

²⁴ Mi osizinmō, Anutugō kalem mōriamŋan asuhuiga Kraist Jisōsnöj sohōpnini meyōk. Anutunöj kalem mianġōra aka keunini jim tekōiga solanibin. ²⁵ Mutuk siŋgisōndok aka malgeri, Anutunöj mi mōta mōkōsōŋda likepŋi zilāŋ qahō melenġ enġiyōk. Mi qahō melenġ enġiba nanŋi ahakmeme solanŋan aukŋe asuhumapkōra mōta Kraist Jisōs jōwōwōl sōmbup ewō aliga qeget kōmuiga Anutugō jeŋe köl kōnjōrat neŋgimapkō kōnanġa ahōk. Sepŋi mokoyōhi, mi mōt nariinga mewō mianjōn siŋgisōndoknini mosōri solanibin. ²⁶ Kōnanġi mi nalō kewōŋe aukŋe asuhumapkōra mōta Jisōs mewō ak wanġiyōk. Anutugō ahakmeme solanŋi mi kewō: Nanŋak solanŋi akza aka kunŋan Jisōs mōt narizawi, mōnō yanġō keunġi jim tekōiga solanimakza.

²⁷ Mewō aiga mōnō wanġōra silenini mem öŋgōbinak? Yuai kungōra aka qahōpmahōp. Kōna keu wuatāŋgōba solanŋi akingōra mi osizin. Mewō solanŋi qahō akinmō, Jisōs mōt nariinga Anutunöj neŋgeka keunini jim tekōiga solanimakin. ²⁸ Keu ki jim tekōba kōtŋi kewō jim kōhōizin: Kōna keu wuatāŋgōmakzinanġōra qahōpmō, Jisōs mōt narim wanġizinanġōra aka Anutunöj keunini jim tekōiga solanimakin. ²⁹ Anutunöj Juda neŋġō Anutuninanök qahō akza. Mōnō kantri tosatŋi yeŋġō Anutuŋina mewōyōk akza me qahō? Mōnō yeŋġō Anutuŋina mohot akza.

³⁰ *Anutunöj mohot akza. Mianġōra silenini yandiget maljini, neŋjōn mōt narim wanġiinga mem solanim

neŋgimakza aka silenini qahö yandiget maljei, mi mewöyök möt narim waŋgigeranğöra aka mem solanim eŋgimakza. ³¹ Mötnarimegö keu jiba mianjon kunğum eŋgiba mewö mianjon Köna keu memba et alinga omani akña me qahö? Mi yapmakek qahöpmö, Anutugöreŋ Köna keu mi qahö qeapkömakzinmö, mi mem köhöimakzin. Mewö.

4

Abrahamnöŋ Anutu möt nariba solanŋi ahök.

¹ Nini bömön jalönini Abrahamgö könaŋanğöra denöwö jibin? Yaŋön Anutugö könaŋi denöwö miwikñaiba yaŋgö jeŋe solanŋi ahök? ² Ölña, Anutunöŋ yaŋgö keuŋi ahakmemeŋi ölöpŋanğöra aka jim teköiga solanibawak ewö, yaŋön mianğöra ölöp silenŋi memba öŋgöbawakmö, mi Anutugö jeŋe qahö. ³ *Mianğö keuŋi Buña Kimbinöŋ kewö ohoget ahöza, “Abrahamnöŋ Anutu möt nariiga mötnariŋi ehi dop köliga keuŋi jim teköiga solaniyök.” Keu mewö ahöza.

⁴ Keuŋi mönö kalema jim teköiga solaniyökmö, kunğan nup meiga galömnjan töwaŋi kalema qahöpmö, nup memakzawaŋgö dop ek kewöta töwaŋi waŋgimakza. ⁵ Gölme galömnöŋ mewö waŋgimakzapmö, Anutunöŋ anğöjörak ambazip neŋgö keunini jim teköiga solanimakin. Mianğöra kunğan oyaenköyaen akñamğöra nup qahö memba Anutu öne möt narim waŋgizawi, Anutunöŋ mönö mötnariŋi mi ehi dop köliga keuŋi jim teköiga solanima.

⁶ Deiwidnöŋ mewöyök keu mianğö könaŋi naŋgöba keu kewö indela jiyök, “Kunğan oyaenköyaen akñamğöra nup qahö meiga Anutunöŋ mötnariŋi ehi dop köliga keuŋi jim teköiga solanizawi, yaŋön mönö simbawon akza.” ⁷ *Mewö jiiga keuŋi mi kewö ohoget ahöza,

“Ambazip Köna keu walöngetka Anutunöŋ siŋgisöndokñini mosöta köl könjörari maljei, yeŋön mönö simbawon akze.

⁸ Kembunöŋ kungö siŋgisöndokñi saŋgonða ehi dop köliga likeŋi qakñe qahö ali öŋgömawi, yaŋön mönö oyaenköyaen akza.”

Keu mewö ahöza.

⁹ Anutunöŋ oyaenköyaen akingö könaŋi mewö indela Anutugö aiwesökninambuk neŋgörök jii ahöza me qahö? Mi qahö. Mi mönö kantri tosatŋi aiwesökñini qahö yeŋgöra mewöyök ahöza. Neŋön lök kewö jiba ohozin, “Abrahamnöŋ Anutu möt nariiga mötnariŋi ehi dop köliga keuŋi jim teköiga solaniyök.”

¹⁰ Mönö wani nalönöŋ ehi dop köliga keuŋi jim teköiga solaniyök? Anutugö aiwesökñi silene yandiget malöhi, nalö

* 4:3: Jen 15.6; Gal 3.6 * 4:7: Sum 32.1-2

mianğoreŋ qahöpmö, mutuk öne malöhi, Anutunöŋ mönö nalö mianğoreŋ mötnaripŋi ehi dop kölīga keuŋi jim teköiga solaniyök.

11 *Mutuk öne mala Anutu möt nariiga keuŋi jim teköiga solaniyök. Mianğö andöŋe dop köljawanğö aiwesökŋi mi silene yandimeğöra jiiga muŋgem supap ewö ahök. Mewö aiga yanğö andöŋe Anutugö aiwesökŋinambuk qahö mala möt narim wanğiinga mötnaripŋini ehi dop kölīga keunini jim teköiga solanibini, Abrahamnöŋ körek neŋğö bömön jalönina ahök. 12 Bömön jalönini yanğön öne mala nalö mianğoreŋ uruŋi melenđa Anutu möt nariba malöhi, nini aiwesökŋinambuk yanğö dop aka maljin. Anutugö aiwesökŋinambuk mala urunini melenđa maljini, mönö neŋğö bömönina mewöyök ahök. Aiwesök yandim neŋğigetka öne laŋ qahö maljinmö, Abrahamğö köna lasupŋi wuatangöba möt narimakzin. Mewö.

Anutugö jöhöjöhö keu möt nariinga öljambuk akŋa.

13 *Anutunöŋ Abraham gölme buŋa qem wanğiiga toŋi aiga gwölönarökurupŋan yanğö andöŋe mewö mal öŋğömegö keuŋi jiba jöhöyök. Keu mi Köna keu wuatangöyöhanğöra aka qahö jiyökmö, Anutunöŋ mötnaripŋi ehi dop kölīga keuŋi jim teköi solanŋi ahöhanğöra keu mi jiyök.

14 *Tosatŋan oyaenğoyaen akingöra Köna keunöŋ qekötahöba mewö mianğön Anutugöreŋ yuai mi buŋa qem anğubeak ewö, yeŋön mönö möt naribingö keuŋi qeapkögetka omanŋi akawak. Mewö Anutugö jöhöjöhö keugöra qahö osiinga keu mianğön omanŋi akapuk. 15 Anutugöreŋ Köna keu walöŋninga irimŋi seholiiga kazikŋan qaknine öŋğömakzapmö, Köna keu qahö ahöbawak, mewö siŋgisöndokö keuŋi qahö jibinak.

16 *Abrahamnöŋ mewö mindirim neŋğiba körek neŋğö bömönini akza. Mianğöra jöhöjöhö keuŋi neŋğiyöhi, mi Köna keunöŋ qekötahömakzei, yeŋörök qahöpmö, Abraham ahök ewö möt narimakzini, neŋğoreŋ mewöyök öljambuk akŋapköra mörök. Mianğöra Anutunöŋ jöhöjöhö keuŋi mi kewö arengöba alök: Mi möt nariinga ölni körek neŋğöra kalema neŋğiiga kalem möriamŋan aukŋe asuhumakza.

17 *Abrahamğö keuŋi kun mi Buŋa Kimbinöŋ kewö ohoget ahöza, “Nöŋön gi kuŋgum gihibiga ambazip könagesö gwötpuk yeŋğö iwiŋina akŋan.” Keu mianğö dop Abrahamnöŋ Anutugö jeŋe iwi ak neŋğimakza. Anutunöŋ kömukömuŋi mem gulim enğimakza. Könagesö malmalŋini qahö, mi jebuk maljeanğö

* 4:11: Jen 17.10 * 4:13: Jen 17.4-6; 22.17-18; Gal 3.29 * 4:14: Gal 3.18

* 4:16: Gal 3.7 * 4:17: Jen 17.5

tandök ewö enghoholi asuhumakze. Abrahamnönj mönö Anutu mewönj môt narim wanjgiyök.

18 *Anutunönj mutuk Abrahamgöra kewö jii mörök, “Göhö gwölönarökurupkan ahum sehigetka jangöñini senjelau ewö aiga malme.” Jöhöjöhö keu mi möta denöwö öljambuk asuhubawak, mi qahö mörökmö, mi töndup jörömqöröm aka ambazip könagesö gwötpuk yengö iwinjini akñamgö mamböta malök. Jöhöjöhö keu mutukñangö dop asuhumapköra mönö Anutu môt narim wanjgiba malök. 19 *Saragö köröñan morö memegö dop qahö aiga nanjak yambuñi lök 100:kö dop ahök. Miangöra nanñi mötmöriiga lök azi nanñi silenji waziba sohohoholij ahökmö, töndup Anutugöreñ keunönj öljambuk akñapköra môt narim wanjgiba maliga Abrahamgö mötnariñan qahö sörauba löwöriyök.

20 Qahö löwöriyökmö, keuñan öljambuk akñapkö môt nariba miangöreñ köhöiba kinök. Anutugö jöhöjöhö keugöra uruñan an qem kam qem uruyahöt qahö ahökmö, mötnariñan köhöiiga Anutu möpöseiba maliga Anutugö qetbuñan sehiyök. 21 Anutunönj yuai asuhumapkö keuñi jiba jöhöba mi ak tekömamgö köhöimakzawi, mi môt köhöim teköba uruyahöt kun qahö aka malök. 22 Mewö aka malöhañgöra Anutunönj Abrahamgö mötnariñi ehi dop köliga keuñi jim teköiga solaniyök. 23 Mötnariñi ehi dop köliga keuñi jim teköiga solaniyöhi, keu mi Abrahamgörök qahö ohoget ahöza.

24 Abrahamgörök qahöpömo, nengöra aka mewöyök mi ohoget ahöza. Nini Kembunini Jisös mem guli kömupnöhök wahöröhi, Anutu ia môt narim wanjiinga mötnariñnini ehi dop köliga jim teköm nengjiiga solanibin. 25 *Anutunönj nengö siñgisöndok-ninañgöra aka Jisös qahö angnön köli kömuyök aka solanñi akingöra aka mem guliiga kömupnöhök wahöta malja. Mewö.

5

Anutugö jeñe solaniba söñgaiba luainönj maljin.

1 Neñön Anutu môt nariinga keunini jim teköiga solanizin. Miangöra Kembunini Jisös Kraistnönj mönö nam köl nengjiiga Anutubuk luai miwikñaiiba maljin. 2 Mewöyök Jisös Kraist môt nariinga nam köl nengjiiga kalem möriam buña qem anjubingö könanji miwikñaiiba nalö kewöñe kalem möriam uruñe maljin. Anutugö asakmararan uruñe angotpingö jörömqöröm aka söñgaimakzin.

3 Miangörök qahö söñgaimakzinmö, wahöjalij möta miangöra mewöyök söñgaimakzin. Könjilij möta mökösoñda mewö

* 4:18: Jen 15.5 * 4:19: Jen 17.17 * 4:25: Ais 53.4-5

mianjön kapaŋkölköl miwikŋaibin. Mi möta miangöra söngaimakzin. ⁴Kapaŋkölköl miwikŋaiba esapesapnöŋ köhöiba kinbin. Esapesap-nöŋ köhöiba kininga jörömqörömminan köhöimakŋa. ⁵Anutunöŋ Uŋa Töröŋi al neŋgiiga köna asuhuiga urukalemŋi mokoiga urunine geiga maljin. Miangöra jörömqöröm aka oyaenŋkoyaen akingö al mamböta gamumamusum qahö miwikŋaibin.

⁶Miangö könaŋi kewö: Nini mutuk lölöwöröŋi ösumnini qahö malini, Kraistnöŋ mönö nalö diŋdiŋi miangörenök kömumba ambazip aŋgöjörakninambuk neŋgö sohopenini meyök. ⁷Kunöŋ Köna keu törörök wuatangöba diŋdiŋi akzawi, ala mewöŋangöra kunŋan ölop qahö kömumbawak? Mi möriga osibawakmö, kunöŋ urukalem gwötpuk ambazip ak enŋimakzawi, alaŋi kunŋan yangöra aka ölop silenŋi kölenŋa kömumangö mötpawak.

⁸Ambazipnöŋ mewö ahakzinmö, Anutunöŋ uruŋan jöpaköm neŋgimakzawi, yaŋön mi kewö kondelök: Yaŋön Kraist melaiiga eta mutuk aŋgöjörak ambazip malini, nalö miangörenök mönö neŋgöra aka kömuyök. ⁹Kömuiga nalö kewöŋe sepŋan saŋgoŋda jim teköm neŋgiiga solaniba maljin. Töndup mi korembenŋi ewö aiga ölnan mönö könaŋgep kewö asuhuma: Anutunöŋ siŋgisön-dokö urukönöpŋi aukŋe kondeliga yuai kanjamŋambuk gölmenöŋ asuhuma. Mi asuhuiga Anutugö jeŋe solanŋi akzinangöra Jisösnöŋ mönö jeŋberereŋ miangörenök meköm neŋgiiga oyaenŋkoyaen akin.

¹⁰Nini mutuk Anutugö kerökurupŋi malini, nalö miangören nanŋi Nahönŋi melaii kömumba mianjön töwanini ahiga Anutubuk ala-ala ahin. Ahini, mianjön korembenŋi akzapmö, ölnŋi bohonŋan könaŋgep kewö asuhuma: Töwanini ali Anutugö alaurupŋi malinga Jisösnöŋ köhöiba maljawangöra mönö anqeba meköm neŋgiiga oyaenŋkoyaen akin. ¹¹Kembunini Jisösnöŋ Anutugö amötqeŋe nupŋi meiga Anutunöŋ töwanini ali yambuk ala-ala ahini, miyöhök qahöpmö, ölnŋa Anutubuk jöpaköm aŋguba kinda köiraŋ köla söngaimakzin. Mewö.

Adamgöra aka köhömuŋi akzinmö, Kraistköra aka gulibin.

¹²*Azi mohotnöŋ siŋgisöndok gölmenöŋ kondoriga asuhuyök. Anutunöŋ siŋgisöndok miangö likepŋi aliga kömup asuhuyök. Miangö dop ambazip körek neŋön siŋgisöndok aka malinga kömupnöŋ miangöra ambazip körek pakpak dop köl neŋgii maljin. ¹³Mutuk Köna keu qahö asuhuiga nalö miangören mewöyök siŋgisöndok lök aukŋe asuhuba ahöyökmö, Köna keu qahö ahöiga siŋgisöndokö keuŋi mi qahö jim kewöta laŋ malget.

* 5:12: Jen 3.6

¹⁴ Adamgö nalöneyök könahiba laŋ mala kotketka Mosesgö nalöne Köna keu asuhuyök. Ambazip nalö sutŋe miangören siŋgisöndok aketmö, Adamnön köna walöŋnöhi, miangö dowök qahö walöŋda malgetmö, kömupnön töndup i mewöyök galöm köl enŋi malget.

Adam, azi mutukŋi yaŋön mönö azi kun kamawaŋgö söpsöpŋa ahök.

¹⁵ Söpsöpŋa ahökmö, könaŋiri mi örörön qahö akzahot. Adamnön Köna keu walöŋda eri siŋgisöndok asuhum sehiba ambazip gwötpuk dop köl enŋiiga kömumba malget. Mi kömupkö könaŋi akzapmö, oyaenköyaen akingö könaŋi mi kun. Mi kewö: Azi mohot Jisös Kraist yaŋön nam köl neŋgiba kalem möriamŋi indeliga Anutugö kalemŋan aukŋe asuhuba ambazip gwötpuk dop köla qesalöpköm neŋgiyök.

¹⁶ Toroqeba kewö jimam: Köna yahöt mi örörön qahö akzahot. Azi mohotnön siŋgisöndok aiga Anutunön keuŋi jim teköiga siŋgisöndok ambazip körek neŋön könöp siagö buŋaya akzin. Mi gölme azigö könaŋi akzapmö, Suep azigö könaŋi mi kun. Mi kewö: Nalö gwötpuk Anutugö Köna keu walöŋninga kalemŋi kondela jim teköm neŋgiiga solanimakzin.

¹⁷ Mi dumge jimam: Azi mohotnön Köna keu walöŋda kömup kondoriga ambazip körekmakörek kömumba maljin. Adamgö siŋgisöndoköra aka kömupnön körek dop köla galöm köl neŋii laŋ malin. Mi köna etqeqeŋi akzapmö, Anutu ösum-mumuŋaŋgö könaŋi mi kewö: Ambazip nini solanŋi akingö kalemŋi mi kelenmalelen buŋa qem aŋguba kalem möriamŋaŋgö uruŋe maljini, neŋön mönö oyaenköyaen akin. Azi mohot Jisös Kraist yaŋön naŋgöba inahöm neŋgiiga suahö *

¹⁸ Dumge kunbuk jimam: Azi mohotnön Anutugö Köna keu walöŋda eri Anutunön keuŋi jim teköiga ambazip körek neŋön könöp siagö buŋaya ahin. Mewöŋanök azi kunŋan solanŋi akingö kondoriga urunini melenninga Anutunön ölop ambazip pakpak neŋgö keunini jim teköiga solaniba köhöiba mal öŋgöbin. ¹⁹ Dumge kunbuk kewö jimam: Azi mohotnön qeqetal aka siŋgisöndok bohon köli sehiiga ambazip sehiseŋi neŋön melennda siŋgisöndok ambazip ahin. Mewöŋanök azi kunŋan Anutugö jitŋi tem köla siŋgisöndokninaŋgö töwaŋi aliga köna asuhuiga Anutunön ambazip sehiseŋi neŋgö keunini jim teköiga solanibin.

²⁰ Mutuk öne laŋ mala kotketmö, Mosesgö nalöne Anutunön Köna keu ambazip siŋgisöndokŋini möt kutumegöra toroqem enŋiyök. Mi toroqem enŋiyökmö, mi mötketka siŋgisöndokŋinan

* **5:17:** Jembon oŋi nene (Siawari keunön qariwe ilikŋi nene) ewö köhöiba mal öŋgöbin.' ewö köhöiba mal öŋgöbin.

sehiba aukne asuhuyök. Mewö aiga Anutunöj mönö kalem möriamni mewöyök mem sehiiga siŋgisöndok oŋgita asuhuyök. ²¹ Siŋgisöndokö kukösumni mi ketani. Miangöra siŋgisöndok ahinga mianön galöm köl nenngiiga köhömunji mala kömumba mala korin. Anutugö kalem möriamni mianön mönö mewöŋanök kukösumŋambuk akza. Jisös Kraist Kembuninan solanibingö kondoriga Anutunöj keunini jim teköiga diŋgiba malmal köhöikni miwikŋaiba nalö teteköni qahö mal öngöbin. Mewö.

6

Siŋgisöndok andö qeba Kraistpuk guliba malme.

¹ Anutunöj kalem möriamni nenngii sehimapköra siŋgisöndok toroqeba aka malbin me qahö? Miangöra mönö denöwö jiinga dop kölma? ² Siŋgisöndok yapmakek! Nini siŋgisöndokö kösönöhök lolohoba urunini walŋan qamöt ewö aiga siŋgisöndok akingö tököba maljin ewö, mönö denöwögöra siŋgisöndoknöj toroqeba galöm köl nenngii malbinak?

³ Keu ki mötze me qahö: Nini körek Kraistköreŋ qeköta-höbingöra aka o melun mem nenngiget. Miangöreŋ urunini walŋan mönö Jisös qeget kömuyöhanö tandök kömui malbingöra o melun mi mem nenngiget.

⁴ *Iwinöj asakmararaŋi kondela Kraist mem gulii kömupnöhök wahöröhi, nenngö uruninan mewöyök kölönaiiga dölökni aka malinga dop kölma. Iwininan nini Kraistkö tandök ewö guliba wahöta ahakmeme dölökni aka memba malbingöra mötza. Miangöra o melun mi kewögöra mem nenngiget: Urunini walŋan Jisösbuk mohotŋe kömumba ahömapköra urunini walŋi mi mewö löm kölget.

⁵ Urunini walŋan Kraistpuk öröröj kömui miangöreŋ yambuk qekötahöba maljin ewö, Iwininan nini mewöyök Kraistpuk kinbingöra mötza. Kraistnöj kömupnöhök wahöröhi, mönö yanö tandök öröröj guliba malinga dop kölma. ⁶ Urusilegö sihim kömbönaŋnini bölöŋan siŋgisöndok akingö köpösöŋgömakzawi, Anutunöj sihim mi könderŋi gemapköra mörakza. Anutunöj siŋgisöndoknöj toroqeba galöm köl nenngii welenni qeba malbinbuköra mötza. Miangöra urunini walŋi mi Kraistpuk maripomnöj lök qeiga kömuyök. Miangö dop maljin, mi mötzin.

⁷ Kungö uruŋi walŋan kömuiga yanön mönö siŋgisöndokö kösönöhök lolohoba malja. ⁸ Urunini walŋan Kraistpuk kömuyök ewö, mewöŋanök yambuk guliba mal köhöibingö möt narizin.

* 6:4: Kol 2.12

⁹ Mewö möt nariba Kraistkö könañi kewö ahöi möt yaközin: Anutunöñ i mem guli kömupnöñök wahöta mal köhöiba kunbuk qahö kömuma. Kömupnöñ i qahö toroqeba galöm köliga mal öñgöma. ¹⁰ Kömup kömuyöhi, mewö mianjön mönö nalö mohot mianjörenñ sinjisöndökö kukösumñi köndenñiga nalö teteköñi qahö lölöwöröñi ahöm öñgöma. Malmal köhöikñi maljawi, mi mönö Anutugöra mala mal öñgöma. ¹¹ Qamötnöñ sinjisöndök akingö osime. Inini mönö mewöñanök nanninañgö mötketka qamöt ewö aiga Kraist Jisösbuk qekötahöba kinda Anutugöra köhöiba malme.

¹² Sileñini kömumawi, mianjögö sihim kömbönañi bölöñan galöm köñ enjiiga i tem köñ wanjiba sinjisöndök akepuköra mi mönö jöhöba malme. ¹³ Mianjögöra sile kitipñini pakpak mi mönö sinjisöndök Toñangö böröñe kude alme. Mala mewö algetka buñañi aiga bohon köliga anjögörak asuhubapuk. Mewö qahöpmö, köhömuñeyök gulibagun mönö nannini Anutu tököm wanjime. Sile kitipñini pakpak mi Anutugö böröñe algetka buñañi aiga bohon köliga ahakmeme solanñi asuhumakña. ¹⁴ Inini Köna keu bapñe qahöpmö, kalem möriam uruñe malje. Mianjögöra sinjisöndökñöñ mönö öñe jöhöba galöm köñ enji malbepuk. Mewö.

Solanñi malmalgö Toñi welen qeba malme.

¹⁵ Mianjögöra denöwö jibinak? Nini Köna keu bapñe qahöpmö, kalem möriam uruñe mala sinjisöndök ahinga dop kölja me qahö? Mi yapmakek! ¹⁶ To yahöt akzahot. Nannini yetkörenjök kungö böröñe al anjuba jitñi tem köla welenni qemakzei, mianjögöra mönö keu ki möt yaköme: Inini kun jitñi tem kölakzei, mönö yanjögö welenqeurupñi akze. Sinjisöndök Toñangö welenqeurupñi akze ewö, yanjön mönö enjuañgiriga kömum köhöime. Anutugö jitñi tem köla welenni qemakze ewö, yanjön mönö keunñi jim teköiga solanñi aka mal öñgöme.

¹⁷ Inini mutuk sinjisöndök Toñangö welenqeurupñi aka malget. Mewö malgetka Buña keu mindingöm enjimakñapköra kusum enjigetka mötket. Mi möta mianjögö dop uruñini melenja nalö kewöñe Buña keu törörök tem köla Anutugö könañi wuatangömakze. Mewö möta enjögöra "Anutu saiwap!" jiba maljin. ¹⁸ Mi wuatangöba sinjisöndökö kösönöhök lolohoba Anutugö welenni qeba ahakmeme solanñi aka memba malje.

¹⁹ Urusileñinan lölöwöröñi akzawangöra aka keu mianjögö könañi mi mönö gölme ambazip neñgö keu jijigö dop nöñön kewö jimam: Inini mutuk sile kitipñini pakpak tököba iwilele Toñangö (Satangö) böröñe ala welenni qeba malget. Mewö malgetka ahakmeme anjögörakñambuk asuhuiga uruñinan tölöhoi malget. Mewö malgetmö, nalö kewöñe sile kitipñini

pakpak mi mönö tököba Anutugö böröje alme. Mewö ala welenji qegetka ahakmeme solanji asuhuiga sarakji ahakje.

²⁰ Injini singisöndok Tonangö welenqequeurupji malgeri, nalö miangörej ahakmeme solanji mi qahö wuatangögetmö, nannjini imbi-imbi laj malget. ²¹ Nalö kewöje ahakmeme miangöra gamuñini mötzmö, nalö miangörej mewö aka mala ölnji mönö denöwö miwikjaiget? Ahakmeme gamuñambuk miangö ölnji mi kömup köhöikji.

²² Nalö kewöje Anutunöñ singisöndokö kösönöhök pösat enjiiga lolohoba Anutugö welenqequeurupji aketka ölnji asuhuiga sarakji ahakze. Mewö aka malmal köhöikji mala teteköje oyaenkyoaen aka mal öngöme. ²³ Singisöndok ahinga Tonan töwa nenjiiga kömup köhöikji miwikjaibinmö, Anutugö kalemji mi oyaenkyoaen malmal. Kraist Jisös Kembuninambuk qekötahöba kinbin ewö, mönö köhöiba teteköji qahö mal öngöbin. Mewö.

7

Awanöm malmalgö söpsöp keu

¹ O urumelenj alaurupni, injini Köna keu mötzeangö dop engöra kewö jimam: Köna keunöñ ambazip jöhöm nenjiiga. Gölmenöñ mal öngöbinangö dop mönö miangö bapje malbin, injini mi mötze me qahö? ² Miangö söpsöpñi kun kewö: Köna keunöñ ambi apñambuk jöhöiga azinöñ malmawangö dop awanöm malmahotmö, apñan kömuma ewö, anömñan mönö awanöm malmalgö Köna keunöhök lolohoma.

³ Miangöra apñan jebuk maliga azi kungöra On! jiiga mema ewö, yangö qetji mönö qesabulum ambia jimakzin. Mewö jimakzinmö, apñan kömuma ewö, Köna keu mianön qahö toroqeba jöhöi malma. Mewö mala azi kun memawi, yanön mönö qesabulum ambia qahö akña.

⁴ Miangöra urumelenj alaurupni, engö könañamñinan mönö mewöñanök ahöza. Injini mewöyök azi kungö buñaji akñegöra Kraistpuk qekötahöget. Anutunöñ i mem gulii kömupnööhök wahörija malmalninan ölnji Anutugöra miwikjaii asuhumapköra mörakza. Kraistnöñ kömuiga uruñini walñan yambuk kömuiga qamöt ewö aka Köna keugö buñaji qahö malje. ⁵ Mutuk urusilegö sihim kömbönañi bölöñan galöm köl nenjiiga laj malin. Nalö miangörej Köna keunöñ sölölohöba kuñgum nenjiiga singisöndok akingö sihim kömbönañini bölöñan asuhum tiñgita galöm köl nenjiiget. Miangöra urusileninan wahörija malmalninan kömup köhöikñangö ölnji miwikjaiba laj malin.

⁶ Mewö malinmö, mutuk keu mianön jöhöm nenjiiga gwaröje mala köna keugö bohonji mohot mohot

wuatangöbingö kapaŋ köla nupŋi memba malin. Kraistpuk qekötahöba kininga urunini walŋan yambuk kömuiga nalö kewöŋe köna keugö buŋa ahinaŋgöreŋök lolohoba kunbuk welenŋi qahö qemakzin. Nalö kewöŋe könaŋaminan kölönaiiga Uŋa Töröŋan inahöm neŋgiiga amqeba Anutugö nupŋi memakzin. Mewö.

Singisöndok akinbukö kapaŋ köla aum-mörimakzin.

7 *Miaŋgöra denöwö jibinak? Köna keu nanŋak singisöndok-nambuk akza me qahö? Mi yapmakek! Köna keunöŋ mönö singisöndokö könaŋi kondel niŋgiiga möral. Köna keu kun kewö ahöza, “Kungöreŋ yuaigöra kude köpösöŋgöman.” Mewö qahö jibawak ewö, nöŋön yuaigö köpösöŋgömakzali, miaŋgö könaŋi qahö möt kutubilenjak. Miaŋgöra Köna keu qahö möt kutubilenjak, mewö singisöndok qahö möt yaköbilenjak.

8 Köna keu qahö ahöbawak, singisöndoknöŋ mönö keu omani aka köhömuŋi akawak. Mewö akawakmö, jöjöpaŋ keu mötpiga sel jöhöm niŋgiiga mi walöŋmamaŋgö könaŋi ahuiga singisöndok aki asuhuyök. Jöjöpaŋ keunöŋ mönö kuŋgum niŋgiiga urunan wahöriŋa sihim kömbönaŋni bölöŋi könaŋi könaŋi asuhum tiŋgiketka bölöŋaŋgöra laŋ köpösöŋgömakzal.

9 Mutuk Köna keu qahö möta tönpin malalmö, jöjöpaŋ keu mötpiga miaŋön aŋgön köl niŋgiyöhaŋgöra singisöndokö sihinan guliiga urunan wahöri mi ahal. Singisöndok akiga mem kömum niŋgiiga köhömuŋi ahal.

10 Anutunöŋ jöjöpaŋ keu mi wuatangöba mal köhöimamaŋgöra aka al niŋgiyökmö, keu mi wuatangömamgö esapköbiga mem kömum niŋgiiga köhömuŋi ahal. Köhömuŋi ahali, miaŋön mönö aukŋe asuhui miwikŋaijal. 11 *Jöjöpaŋ keu möt kutubiga sel jöhöm niŋgiiga mi walöŋmamaŋgö könaŋi ahui jöjöpaŋ keunöŋ kuŋgum niŋgiiga singisöndoknöŋ tilipköm niŋgiiga mi ahal. Singisöndok aka keunambuk ahal. Mewö miaŋön Anutugö jöjöpaŋ keu miaŋön singisöndok bohon köliga aki mem kömum niŋgiiga köhömuŋi ahal.

12 Mewö ahalmö, töndup Köna keu miaŋön mönö kömbukŋi aka sarakŋi akza. Miaŋgö jöjöpaŋ keunan mönö diŋdiŋi aka ölöpŋi akza. 13 Mewö aiga jöjöpaŋ keu ölöpŋi miaŋön mem kömum niŋgiiga köhömuŋi ahal me qahö? Mi yapmakek! Keu ölöpŋan qahöpmö, Köna keunöŋ mönö nani singisöndoknaŋgö könaŋi indeli möt kutuyal. Singisöndokö gamuŋi aukŋe asuhui kanjamŋambuk mötmamaŋgöra aka jöjöpaŋ keu miaŋön singisöndokö selŋi jöhöiga urunan wahöri walöŋda singisöndok ahal. Nani singisöndokni miaŋön mönö mem kömum niŋgiiga köhömuŋi ahal. Mewö.

* 7:7: Eks 20.17; Dut 5.21 * 7:11: Jen 3.13

Urunne siŋgisöndokö yarö ahöi maljal.

14 Uña Töröŋan Köna keu neŋgiiga diŋdiŋi akzawi, mi mötzinmö, nöŋön siŋgisöndok azia aka sihim kömbönaŋni bölöŋambuk akzal. Eta kölbige siŋgisöndoknöŋ galöm köl niŋgiiga tem köla welenni qeba siŋgisöndok ahakzal.

15 *Miaŋgöra yuai ölöŋŋi akŋamgö mörakzali, mi qahö ahakzal. Mimö, yuai bölöŋŋi akŋamgö tököba sisitŋi memakzali, mönö mia ahakzal. Miaŋgöra yuai ahakzali, nöŋön miaŋgö könaŋi ölöŋ qahö möt kutumakzal. 16 Miaŋgöra yuai bölöŋŋi akŋamgö ölan aka mia ahakzal ewö, Köna keunöŋ mönö töndup ölöŋŋi akza. Köna keugöra mönö urumohot akzal.

17 Mewö aiga nöŋön nanak mi qahö toroqeba ahakzalmö, siŋgisöndok urune ahözawaŋön mönö kuŋgum niŋgiiga mi ahakzal. 18 Ahakmeme ölöŋŋi akŋamgö sihimŋi öŋa mörakzalmö, mi akŋamgö ösumnan qahö asuhum niŋgimakza. Miaŋgöra nöŋgö urune yuai ölöŋŋi kun qahö ahözapmö, urusilenan mönö siŋgisöndok akŋamgö kuŋgum niŋgimakza, mewö mötzal. 19 Miaŋgöra yuai ölöŋŋi akŋamgö sihimŋi mörakzali, mia qahö ahakzalmö, yuai bölöŋŋi qahö akŋamgö mörakzali, mönö mia ahakzal. 20 Mewö aiga yuai akŋamgö tökömakzali, mia töndup ahakzal ewö, mi nanak qahö toroqeba ahakzalmö, siŋgisöndok urune ahözawaŋön mönö kuŋgum niŋgiiga mia ahakzal.

21 Miaŋgöra nani könani kewö ahöi miwikŋaimakzal: Yuai ölöŋŋi akŋamgö sihimŋi mötpiga bölöŋaŋgö sihimŋan mönö uruni jöhöiga qakömakzal. 22 Miaŋgö könaŋi kewö: Uruneyök göröken Anutugöreŋ Köna keugöra urumohot aka tem kölmamgö mörakzal.

23 Mewö mörakzalmö, sileneyök göröken nani könaŋamni kewö ahöi miwikŋaimakzal: Silenaŋgö kitipŋi mienön siŋgisöndokö bohonŋi aketka akŋamgö mörakzal. Siŋgisöndok akŋamgö sihimnan mönö urusihimni ölöŋŋi mi memba et almapköra möri auba yarö qemakzahot. Siŋgisöndok akŋamgö sihim kömbönaŋnan mönö silenaŋgö kitipŋi kitipŋi sölölohöm eŋgiba jöhöm niŋgiiga kösö gwarönöŋ maljal. 24 O nöŋön bölüm teköba aŋgöjöraknambuk akzal. Urusilenaŋgö sihimŋi bölöŋan noaŋgiri kömup köhöikŋi kömumbilenbuköra mönö daŋön sohopeni memba amöt qem niŋgibawak?

25 O Jisös Kraist Kembuni, mönö yambuk nam köla “Anutu saiwap!” jizal. Könaŋamnan mewö aiga nanak urunanöhök Anutugöreŋ Köna keugö bapŋe anda welenni qemakzalmö, sileni siŋgisöndokŋambuk miaŋgöreŋ göröken siŋgisöndok

* 7:15: Gal 5.17

akɲamgö sihim kömbönaɲnan jöhöm niŋgiiga miangö kösö gwarönöŋ maljal. Mewö.

8

Uña Töröŋan tim töndanini aiga mal köhöizin.

¹ Miangöra ambazip Kraist Jisösbuk qekötahöba kinjini, Anutunöŋ mönö neŋgö keunini jim teköiga nalö kewöŋe könöp siagö buɲa qahö aka maljin. ² Miangö könaŋi kewö: Gi siŋgisöndokö sihimɲi tem köla malnöŋaŋgöra aka kömup köhöik-ŋaŋgö buɲaya aka malnöŋ. Mewö malnöŋmö, Kraist Jisösbuk qekötahöba kinöŋga malmal köhöikŋaŋgö Uñaŋan mönö kömup köhöikŋaŋgö kösönöhök pösat gihiiga maljan.

³ Ambazip urusilenine sihim kömbönaɲnini bölöŋi mi ahöza. Mi wuatangöinga Köna keugö ösumɲan löwöriba malmal köhöikɲi neŋgimapkö osiiga qaköin. Qaköba urusileninan siŋgisöndok aka malini, Anutunöŋ siŋgisöndok miangö keuɲi jim teköba likepɲi kewö meleşnök: Yaŋön nanɲi Nahönɲi melaiiga gölmenöŋ eta siŋgisöndok azigö sile tandök ahök. Toroqeba siŋgisöndokö jöwöwöl tandök ewö aiga ohogetka kömuyök. Anutunöŋ malmal köhöikŋaŋgö könaŋi mewö mesarök.

⁴ Anutunöŋ könaŋi mi kewögöra mesarök: Köna keunöŋ nini solanɲi aka diŋdiŋi malbingöra jim kutum neŋgimakzawi, Anutunöŋ keu miangö ölɲan neŋgöreŋ asuhum tekömapköra mörök. Miangöra nini urusileninaŋgö sihim kömbönaɲnini bölöŋi wuatangöbingö tököba Uña Töröŋaŋgöreŋ naŋgöba jitsihitɲi wuatangöba ahakzin. ⁵ Ambazip urusileninaŋgö sihim kömbönaŋi bölöŋi wuatangömakzei, yeŋgö uruɲinan mönö siŋgisöndoköreŋ göröken akingö ahöza. Ambazip Uña Töröŋaŋgöreŋ naŋgöba jitsihitɲi wuatangöba ahakzini, neŋgö uruninan mönö Uña Töröŋaŋgöreŋ göröken akingö ahöza. ⁶ Urusileninaŋgö sihim kömbönaɲnini bölöŋan mönö öröm neŋgiiga kömup köhöik-ŋaŋgöreŋ anbingöra ahözapmö, Uña Töröŋan urunine luai qeiga mal köhöibingö sihimɲi mörakza.

⁷ Anutunöŋ Köna keu neŋgiiga siŋgisöndok akingö sihim kömbönaɲninan mönö keu miangö bapɲe qahö anakza. Mi anmamgö osiza. Mi osiiga laŋ mala uruninan Anutu qe-tala kerök ak waŋgimakzin. ⁸ Ambazip urusilegö sihim kömbönaɲninan galöm köl eŋgigetka laŋ maljei, yeŋön mönö Anutugö jeŋe dop kölbingö juiga qaköme.

⁹ Yeŋön qakömemö, Anutugö Uña Töröŋan eŋgö uruɲine malja ewö, yaŋön mönö galöm köl eŋgii malje. Urusilegö sihim kömbönaɲnini bölöŋi mienöŋ mönö iɲini qahö galöm köl eŋgimakze. Kraistkö Uña Töröŋan kungö uruɲe qahö geiga öne maljawi, yaŋön Kraistkö buɲaŋi qahö akza. ¹⁰ Qahö akzapmö,

Kraistnõj enjõ uruñine malja ewõ, silenjanan sinjisõndokõra aka kõmumemõ, uñanjanan solanñi akzeañgõra aka mal kõhöim õngõme. ¹¹ * Anutunõj Kraist Jisõs mem gulii kõmupnõhõk wahõrõhi, yangõ Uñanjan uruñine malja ewõ, yetkõn inñini Anutubuk qekõtahõba kingetka silenñini kõhömuñi mi mewõyõk mem gulimahot.

¹² O urumelenj alaurupni, guliba maljinanñgõra neñõn mõnõ Anutugõrenj tosabuk maljin. Urusilegõ sihim kõmbõnanñini bölõñi wuatañgõbinanñgõ tosanñi qahõpmõ, Uña Tõrõnanñgõ jitñi tem kõla malbingõ tosanjan mõnõ ahõm neñgiza. Mianñgõra nanini imbi-imbi lañ malbinbuk. ¹³ Urusilegõ sihim kõmbõnanñini bölõñi wuatañgõba malje ewõ, inñini mõnõ kõmup kõhöikñanñgõ buñaya akñe. Mewõ akñemõ, Anutugõ koulukõgetka Uña Tõrõnan urusilenjananñgõ ahakmeme bölõñi mem kõmumakñe ewõ, mewõ mianñõn mõnõ guliba mal kõhöiba malme. ¹⁴ Anutugõ Uñanjan ambazip enjuañgiri maljei, yeñõn kõrek Anutugõ nahõnbõ-raturupñi akze.

¹⁵ ** Ömewõrõme yeñõn ambazip sölõlõhõm enjigetka jõnõmñini undui welenqeçe omanñi aka maljemõ, inñini õme mewõñi mia kun qahõpmõ, Uña Tõrõñi i buña qem anñguba malje. Mianñgõra inñini mõnõ kunbuk toroqeça keñgõt qakñe malbepuk. Uña Tõrõñi yanñõn mõnõ mem letot enñiiga Anutugõ nahõnbõraturupñi akze. Uña mianñõn sölõlõhõm neñgiiga Anutugõra “Aba” ¹⁶ Anutugõ nahõnbõraturupñi akzini, keu mi Uña Tõrõnan nanñak nanini uñaninambuk imbi kõla mohotñe nanñgõba jimakzahot.

¹⁷ Anutugõ nahõnbõraturupñi akzin ewõ, yanñõn nanñi ambazipurupñi neñgõra oyaenñkoyaen mõzõzõmgõi ahõzawi, mi mewõyõk buña qem anñgubin. Anutunõj Kraistkõra yuai mõzõzõm-gõi ahõzawi, mi mõnõ mewõyõk Kraistkõ qõhõrõñe kinda buña qem anñgubin. Kraistpuk mohotñe sihimbölõ mõrakzin ewõ, mõnõ mewõyõk Kraistkõ asakmararanñõñ õngõba yambuk mohotñe asariba malbin. Mewõ.

Malmal asakmararanñambuknõñ õngõba malbin.

¹⁸ Nalõ kewõñe sihimbölõ mõta maljini, mianñõn malmal eretñi akza. Kõnanñep Kraistkõ asakmararanñõñ õngõba asariba oyaenñkoyaen malbini, mianñõn mõnõ malmal õngõngõñi akõdamunñambuk akñe. Malmal yahõt mi likeplikap ala kewõt-pinanñgõ dop qahõ. Mewõ mötmõrizal. ¹⁹ Anutunõñ sõmbup aka yuai pakpak miwikñaiyõha ahõzei, mienñõn mõnõ mambõta Kraistnõñ kaba Anutugõ nahõnbõraturupñi

* **8:11:** 1 Kor 3.16 * **8:15:** Mak 14.36; Gal 4.6 * **8:15:** Gal 4.5-7 * **8:15:** Aba mi Arameik keunõñ iwi.' Iwini!" qerakzin.

meköba kondel enjiiga asakmararaŋ asuhum enjimapköra awöwengömakze.

20 *Anutunöŋ sömbup aka yuai pakpak miwikŋaiyökmö, mienön mala kömumba ayapköme. Nanŋini sihimŋinaŋgö dop qahöpmö, Anutunöŋ mönö nanŋi sihimŋaŋgö dop mewö arengöyök. Yuai pakpak ayapkömemö, töndup jörömqöröm enjiiga oyaenköyaen kewö asuhumapköra al mambörakze: 21 Anutunöŋ sömbup aka yuai pakpak miwikŋaiyöha ahözei, mienön mönö mewöyök kewögöra mambörakze: Anutunöŋ i mewöyök aŋgöjörak malmalgö kösöneyök pösat enjiiga qahö kömumba gisahöba ayapkömemö, Anutugö nahönbörat ewö lolohoba asakmararaŋinambuk asariba ahöm öngöme.

22 Miangö könaŋi kewö: Anutunöŋ sömbup aka yuai pakpak miwikŋaiyöha ahözei, mienön körek pakpak mönö mohotŋe osoŋgom köla morö memegö masö tandök möta ahöba kota nalö kewöŋe mewöyök ahakze. Mi mötzin. 23 *Anutunöŋ sömbup aka yuai pakpak miwikŋaiyöha ahözei, mienönöhök qahöpmö, Anutugö yambu jenjeqe ahinga Uŋaŋi kalema neŋgii maljini, neŋön mönö mewöyök uruninan osoŋgom köla maljin. Anutunöŋ neŋguaŋgiri nahönböraturupŋi qainŋi kun akingö mamböta mala osoŋgom ahakzin. Neŋguaŋgita sile sohpnini meiga kunbuk letotpingöra awöwengöba maljin.

24 Mewö letotpingö jörömqöröm aka urunini melenđa Suepkö buŋaya ahin. Yuaigöra jörömqöröm ahakzini, miangö ölni asuhui ehinga jörömqörömnini mewö mianön teköma. Kunöŋ kun yuaigö ölni asuhui eka miangö jörömqörömŋi mi qahö toroqeba aka mambörakza. Mi qahö. 25 Yuaigö ölnan qahö asuhui ehakzini, miangöra jörömqöröm akzin ewö, mi mönö kapaŋ köla asuhumapköra al mamböringa uruninan qahö erakza.

26 Mewöŋanök löwöriinga Uŋa Töröŋan bauköm neŋgimakza. Denöwö köuluköinga dop kölbawak, mi qahö mötzinmö, Uŋa Töröŋan mönö nanŋak köuluk nupnine bauköm neŋgiba neŋgöra aka köuluköba keu jitŋi aukŋe qahöpmö, osoŋgom aka saŋepnöŋ alakza. 27 Saŋepnöŋ ala Anutugö jitsihitŋaŋgö dop ambazip sarakŋi neŋgöra aka köulukömakza. Anutunöŋ ambazip urunini ek kewörakzawi, yaŋön mönö amqeba Uŋa Töröŋaŋgö uru mötmötŋi mörakza.

28 Anutunöŋ köulukŋi möta öröyuai pakpak galöm köliga miangö mindimindiri ölnan mönö nanŋi alaurupŋan ölöwakŋegöra asuhumakza. Mi mötzin. Ölni mianön ambazip amötqeŋe areŋaŋgö dop engehöli jöpaköm waŋgimakzei, mönö i mewö me mewö bauköm enjimakza. 29 Anutugö

arenangö könani kewö: Nanji nahönñan urumelen alaurup sehisehiji nenğö sutnine mutuknini ak nenğimapkora mörakza. Mianğöra qeljine aren ala nini tandökninan Nahönñangö dop akingöra mörök. Mianğöra ambazip qeljine möt nenğiyöhi, nini mewöyök mewö akingöra jim möwölöhöm nenğiyök. ³⁰ Qeljine jim möwölöhöm nenğiyöhi, nini mewöyök nenğoholök. Nenğoholöhi, nenğö keunini mewöyök jim teköiga solaniin. Solaniini, nenğöra mewöyök köna kondeliga nanje asakmararaññöñ öngöba oyaenköyaen akin. Mewö.

Anutugö urukalemñangö möpömpösei lijet.

³¹ Keu mi möta mianğöra denöwö jibinak? Anutunöñ sel jöhöm nenğiba likepnine malja ewö, dañön mönö qetal nenğibawak? ³² Anutunöñ nanji Nahönñi tok qahö angön kölökmö, i jim teköiga malmalni körek nenğöra aka köleññök. Mi köleñniga Anutunöñ yambuk kalem korembenji tosadni pakpak mi mewöyök amqeba nenğima.

³³ Anutunöñ ambazip nanñangöra möwölöhöm nenğiba keunini jim teköiga solanimakzini, mianğöra dañön mönö keu jakeñe al nenğibawak? ³⁴ Kraist Jisösnöñ kömuiga Anutunöñ kunbuk mem guliiga Suepnöñ öngöba Anutugö böröñi ölñe tata toroqeba nenğöra aka köulukömakza. Mianğöra kunñan kun keunini kewöta könöp sianöñ gebingöra jim teköm nenğimamgö osima.

³⁵ Kraistkö urukalem uruñe malinga dañön mönö mianğöreñök menden nenğiiga etpinak? Kahasililij ak nenğigetka wahöjalij mötpinakmö, Kraistkö urukalemñeyök ölop qahö etpin. Sese-werowero ak nenğibeakmö, mianğöreñök ölop qahö etpin. Bödi akinak me opo söröñinan qahöwahi malbinak, mönö ölop qahö etpin. Kömumbinbukö keñgöt qakñe malbinak me yarö gilgetka kazik asuhubawakmö, mönö ölop qahö etpin. ³⁶ *Mianğö keunji Buña Kimbinöñ kewö ohoget ahöza, "Nalö dop söñanök könahiba kömumbingöra nenğugetka anda mala sunğem ahakza. Lamaya enğum nembinañgörök maljei, nenğöra mianğö tandök mötmörimakze."

³⁷ Keu mianğö dop ak nenğibeakmö, Kraistnöñ urukalemñi indeli mörini, yañön töngum nenğiiga lömböt pakpak mianğöreñ mönö luhut ala köirañ köla malbin. ³⁸ Yuai kunöñ mönö Kraistkö urukalemñeyök menden nenğimamgö osima. Mi öl töhönña möt yaközal. Kömupñöñ me malmalgö yuainji kunöñ mönö menden nenğimamgö osima. Suep garata me ömewöröme yeñön mönö nalö kewöñe me könanğep nini menden nenğibingö osime. Bem suahö kukösumñinambuk yeñön mi osime.

* 8:36: Sum 44.22

³⁹ Euyangö euje me emuyangö emuje maljei, yejön mönö menden neŋgibingö osime. Anutunöŋ öröyui tosatŋi kun miwikŋaiyöha ahözei, mienön mönö mewöyök Anutugö urukalem miangörenök menden neŋgibingö osime. Anutugö urukalemŋi miangön mönö Kraist Jisös Kembunini yangören asuhui indeli, mi mötzin. Mewö.

9

Anutunöŋ sihimjangö dop Israel möwölöhöm enġiyök.

¹ Nöjön Kraistpuk qekötahöba kinda munen keu qahöpmö, keu öl töhöŋŋi kun jimam. Uŋa Töröŋangö keugöra kezap albi keuni naŋgöba jim köhöiba saŋep urune ali kewö möta jizal:

² Nöjön Juda ambazip tosatŋi yeŋgö wösöbirikŋinan nuŋguiga urunan sihimbölö ketanŋi teteköŋi qahö kewögöra mörakzal:

³ Yejön nömbuk gölme silenöŋ Israel könagesöya mohot akz-inmö, uruŋinan Kraistpuk qahö qekötahöba laŋ malje. Nöjön Israel alaumurupnan uruŋini melenmegöra aum-mörimakzal. Anutunöŋ yeŋgö keuŋini keworiga nanak yeŋgö salupŋini akiga likepŋi melenŋa nöŋgö qakne kewö öŋgömapkö mötzal: Yaŋön ni Kraistkörenök menden niŋgii könöp siagö buŋaya akŋamgö mötzal.

⁴ *Yejön Israel kambu uruje malgetka Anutunöŋ enġuangiri buŋaŋi akze. Anutugö qetbuŋaŋi bisiba aködammunŋinambuk akze. Anutunöŋ yembuk oyaenŋkoyaen akingö jöhöjöhö walŋi aka dölökŋi aka Köna keuŋi al enġiyök. Miangöra jöwöwöl jikenöŋ öŋgöba Anutugö waikŋi memba möpöseimakze. Anutunöŋ kötümötuetŋi sehimapkö keu jöhöyöhi, miangö ölŋan asuhumapköra mambörakze. ⁵ Yejön bömön jalönini Abrahamgö gwölönarök-urupŋi yeŋgö isi moröurupŋina malje. Kraistnöŋ yeŋgörenök gölme sile memba azia asuhuyök. Kraistnöŋ Anutunina aka yuai pakpak galöm köliga qetŋi nalö teteköŋi qahö möpöseimakin. Keu mi ölŋa.

⁶ Mewö maljemö, Israel könagesönöhök asuhum sehiba maljini, nejön pakpak mönö töndup Israel ambazip ölŋi qahö akzin. Miangöra Anutugö keuŋan siŋgiiga ösumŋan erök tandök ahakza me? Mewö jibinak, mi keu ölŋa qahö.

⁷ *Abrahamgö gwölönarök-urupŋi yeŋgörenök ahuzinaŋgöra aka körek nejön mönö Anutugö nahönböraturupŋa qahö akzin. Mewö qahöpmö, Anutunöŋ Abrahamgöra kewö jiyök, “Aisakö isimoröurupŋan mönö göhören toroqeba qetki bisiba mal öŋgöme.”

⁸ Keu miangö könaŋi kewö: Abrahamgö gwölönarökurup gölme ambazip siliknöŋ morö ahumakzini, körek nejön mönö Anutugö nahönböraturupŋi qahö akzin. Mewö qahöpmö,

* 9:4: Eks 9.4 * 9:7: Jen 21.12

Anutunöŋ keu jöhöi ahözawaŋgö dop ahuini, Anutunöŋ mönö ninia möt neŋgiiga Abrahamgö gwölönarökurupŋi ölni akzin. ⁹ *Jöhöjöhö keu mianöŋ Abrahamgöreŋ kewö kaiga mörök, “Yambu mohot teköiga miangöreŋ kunbuk kaba gekiga Saranöŋ mönö morö nahönŋambuk akŋa.”

¹⁰ Keu mewö möri yangöreŋ mewö asuhuyökmö, miangöreŋök qahö teköyök. Yangö andöŋe Rebekagöreŋ mewöŋanök Anutugö keugö dop asuhuyök. Bömönini Aisak yaŋön anömŋi mi gölöm waŋgiiga nahönyahötŋiri siwisiwi asuhuyohot. ¹¹ Siwisiwi yetköŋ gölömŋe tata qahö asuhuba yuai ölöŋŋi me bölöŋi kun qahö ahoŋi, Anutunöŋ mönö nalö miangöreŋ nahön yetköreŋök kun nanŋaŋgöra möwölöhöyök. Nanŋi mötmöt areŋan köhöiba ölnambuk ak tekömapköra aka munŋi möwölöhöyök.

¹² *Nanŋi jitsihitŋan ölnambuk akŋapakköra Rebekagöra kewö jiyök, “Datŋan mönö munŋaŋgö welenqeqeŋi aka nembö bapŋe malma.” Anutunöŋ mewö jiba ahakmemenŋi akahorahi, miangö dopŋe i qahö kewöt etkiyökmö, nanŋi mötmöt sihimŋi miyök wuatangöba munŋi oholiga datŋaŋgö ketanŋamŋi ahök. ¹³ *Miangö keuŋi Buŋa Kimbinöŋ kewö ohoget ahöza, “Jeikob urunan jöpaköba malalmö, Iso (Esau) mi tököba kazik ak waŋgiba malal.”

¹⁴ Keu miangöra mönö denöwö jibinak? Anutunöŋ diŋdiŋi qahö akza me? Mewö qahöpmahöp! ¹⁵ *Anutunöŋ Mosesgöra keu kewö jii ahöza, “Nöŋön mönö nani jitsihitni wuatangöba kun niŋia ehoriba ak kömumamgö mötzali, ia mönö ak kömum waŋgi-makzal. Kun dagöra wösö mötmöt ak waŋgimamgö jizali, yangöra mönö wösöni mörakzal.” ¹⁶ Keu miangöra aka gölme azinöŋ Anutu qahö galöm kölakzapmö, yuaigö sihimŋi möta akŋamgö esapköm bibihibawakmö, mi töndup Anutu qahö ongitma. Anutu nanŋak kalem möriamŋaŋgö dop yuai pakpak galöm köliga yangö böröŋe ahöza.

¹⁷ *Anutunöŋ farao kiŋgöra keu jiiga Buŋa Kimbinöŋ kewö ahöza, “Nani qetbuŋani jim sehigetka gölme körek pakpak dop kölmapköra mötzal. Mewö möta kukösumni kondelbi aukŋe asuhumapköra kuŋgum gihibiga göŋön asuhum tiŋgitnöŋ. Asuhum tiŋgita mala tuarenjoŋ ak niŋgiba malnöŋga mönö luhut al gihial.” ¹⁸ Keu miangö dop Anutunöŋ nanŋi jitsihitŋi wuatangöba kun ehoriba ak kömumamgö mötzawi, ia mönö ak kömum waŋgimakŋa aka kungö uruŋi mem gwözöŋmamgö jizawi, ia mönö mem gwözöŋniga yangiŋeŋ ahakŋa. Mewö.

Anutugöreŋ irimesesewöl aka ak-kömukömu

* 9:9: Jen 18.10 * 9:12: Jen 25.23 * 9:13: Mal 1.2-3 * 9:15: Eks 33.19

* 9:17: Eks 9.16

19 Engörenök kunjan nongöra kewö jibawak, “Mewö aiga körek neñon mönö Anutugö jitsihitji tuarenjon ak wanğibingö osimakzin. Mewö aigun Anutunöñ mönö wuanongöra toro-geba jim neñgimakza?” 20 *Kunjan mewö jibawakmö, gölme azi gi mönö niñia aka Anutu tuarenjon aka anğururuk ak wanğibanak? Börösöwönöñ mönö nanñi miwimiwikñai Tonji kewö ölop qahö jim wanğima, “Gi mönö wuanongöra tandök kewöñi miwikñaim niñginöñ?” 21 Kimbut meme azinöñ mönö nanñi kukösum qakñe sihimñangö dop gwaköm melenđa möwölöhöba gwaköm mohot mianğörenök kourañen murutñi murutñi memakza. Tosatñi nalö dop memba nupnöñ alakzin aka tosatñi aködamunñinambuk mi mönö sösöñgai nalöneyök nupnöñ alakzin.

22 Anutu miwimiwikñai Toninan mönö mewöñanök ak neñgimakza. Yanön irimsesewölñi ambazip kondel neñgiiga kukösumñi eka mötpingöra mörakza. Mewö möta irimñan seholiiga kazikñan ambazip tosatñi yengö qakñine öngöiga jöjöröba könderñ enğimamgö aka malök. Mi töndup likepñi zilañök qahö melenñ enğiyökmö, yengöra aka sihimbölö gwötpuk möta mökösöñda uruñini melenñmegöra mamböta malök.

23 Mewöñanök kalem möriamñi indeli keleşmaleleş asuhumapköra mörakza. Mewö möta ambazip aködamunñi buña qem anğubingöra möwölöhöm neñgiyöhi, nini mönö neñgehoriiga aködamunñambuk asarimakzin. 24 Nini mewöyök mewö akingöra neñgoholök. Juda ambaziwök qahöpmö, kian kantriñi kantriñi i mewöyök mewö akñegöra enğoholök.

25 *Anutunöñ mianğö keunji jiiga kezapqetok azi Hoseagö kimbinöñ kewö ahöza,

“Ambazip nani könagesöurupni qahö aka malgeri, nöñon mönö i enğoholbiga nani könagesöni akñe. Tosatñan nani wölböt alani qahö malgeri, yengöra mönö ‘Nani wölböt alaurupni,’ mewö jiba malmam.

26 *Nöñon gölme kungö ambazip yengöra kewö jiba malal, ‘Injini nani könagesöurupni qahö malje.’ Mewö jiba malalmö, i mönö gölmenjine mianğörenök enğohola qetñini kewö qetmam: Injini mönö Anutu malmal Tonjanğö nahönböratuñi akze. Utekutek mewö asuhuma.”

27 *Aisaianöñ mewöyök Israel ambazip neñgöra aka kewö sahöta jiyök, “Israel ambazip janğönini köwet sak ewö akawak ewö, mia kun töndup neñgörenök awamñi neñönök mönö urunini melenñninga amöt qem neñgima. 28 Kembunöñ gölmenji gölmenji pakpak neñgö keunini zilañzilañ kewöta jim teköba likepñi körek melenñ neñgim teköma.”

* 9:20: Ais 29.16; 45.9 * 9:25: Hos 2.23 * 9:26: Hos 1.10 * 9:27: Ais 10.22-23

29 *Aisaianöŋ mewö jiba qeljine keu kun jiyöhi, miangö öljän mönö neŋgöreŋ kewö asuhuza, “Kembu kukösum pak-pak Toninan gwölönarökurupnini tosatŋi qahö engehori uruŋini melenjbeak ewö, gölmeninan lök Sodom ewö melenjni geiga könöp jebawak. Neŋön mönö Gomora ambazip ewö ayuhubinak. Anutunöŋ lök mewö ak neŋgibawak.” Mewö jiyök.

Israel jesöŋgöŋan Anutu yanjiseŋ ak wanjimakze.

30 Miangöra mönö denöwö jibinak? Kantri tosatŋan Anutugö jeŋe solanŋi akingö nupŋi qahö kapan köla megeri, yeŋön mönö Anutugö jeŋe solaniget. Uruŋini melenjda Anutu möt narigetka miangöra keuŋini jim teköiga solaniba malje. 31 Mewö maljemö, Israel neŋön solanŋi akingöra Köna keu wuatangöbingö kapan köla mala kota mi töndup Anutugö jeŋe qahö solaniin.

32 Miangö könaŋi kewö: Nanŋinanök esapköba ahakmeme diŋdiŋi aka mewö mianjön solanŋi akingö kapan köla Jisös qahö möt narim wanjiget. Yanjön köt pöwöwöm ewö akzawi, mönö yanjöreŋ tötangöba enjui qaköba andö qeget. Miangöra solanŋi qahö aket. 33 *Miangö keuŋi Buŋa Kimbinöŋ kewö ohoget ahöza,

“Eket, Anutu nöŋön mönö ain köt kun Zaion kunduje Israel kambu uruŋine kuŋgubiga yeŋön mianjöreŋ tötangöba et enjui andö qemakŋe. Kunŋan azi ip pöwöwöm köhöikŋi mi möt narim wanjimawi, yanjön mönö nalö kunöŋ yanjöra gamu qahö miwikŋaima.” Mewö.

10

1 O urumelenj alaurupni, nöŋön nani könagesöurupnan uruŋini melenjmegöra awöweŋgömakzal. Anutunöŋ amöt qem enjimapköra uruni qezaköba yeŋgöra aka Anutu köuluköm wanjimakzal. 2 Yeŋgö könaŋamŋinan kewö ahöza: Yeŋön Anutugöra urukönöp ahakzemö, mi gukmaulem qakŋe ahakze. Yeŋgö keuŋini mewö nanjgöba jizal.

3 Anutunöŋ keunini jim teköiga solanizini, mianjö könaŋi qahö möt yaköba nanŋinanök esapköba solanŋi akingö kapan kölakze. Mewö aka Anutunöŋ keunini jim teköiga solanibingö jimakzawi, keu mianjö bapŋe qahö anda qaköba öne laŋ malje. 4 Kraistnöŋ nanjök Köna keu wuatangöm teköyök. Nini tosatŋan mi osiba Kraist möt nariba urunini melenjini, mewö mönö Kraistköra aka Anutugö jeŋe solaniba dop köljän. Mewö.

Anutunöŋ nini körek amöt qem neŋjimangö mötza.

5 *Mosesnöŋ Köna keu wuatangöba mewö mianjön solanŋi akingö keuŋi mi kewö ohoi ahöza, “Köna keu wuatangöm

tekömawañon mönö mianğora aka mal köhöima.” ⁶ *Keu mewö ahözapmö, urunini melenđa möt nariinga Anutunöñ keunini jim teköiga solanimakzini, Mosesnöñ mianğora keu kewö jii ahöza, “Urugan kewö mötmöriba jibanbuk: Azi dañon mönö Suep mire öngöbawak?” Ambazipnöñ mi Kraist wañgita etmapköra lañ jiget. ⁷ me “Azi dañon mönö kömup mirigö dutje gebawak?” Ambazipnöñ mi Kraist wañgita kömupnöhök wahötmapköra lañ jiget.

⁸ Mewö jiba toroqeba kewö jiyök, “Buña keu mi köröwen qahöpmö, mönö göhö numbuge aka uruge ahöza.” Buña keu mi möt naribingöra aka ahöza. Neñon keu mianjon ambazip uru kuñgum engiba kewö jim asarim engimakzin: ⁹ Anutunöñ Jisös mem guli kömupnöhök wahörök. Göñon keu mi urugan möt nariba numbu jitkan “Jisösnöñ Kembuni akza,” mewö jim miwikñaizan ewö, mönö amöt qem gihiiga letotman.

¹⁰ Gi urugan Buña keu möt narinöñga Anutunöñ keugi jim teköiga solaniman aka numbu jitkan Jisös jim miwikñainöñga amöt qem gihiiga letotman.

¹¹ *Buña Kimbigö keu kun kewö jiget ahöza, “Dañon i möt narim wañgimawi, yañon mönö gamu qahö miwikñaima.” ¹² Anutunöñ Juda ambazip qahö neñgek soriba kantri tosatni qahö qepureim engimakza. Kembu mohot yañon mönö körek neñgö Kembunini aka dop mohotnöñ kewöt neñgimakza. Ambazip i qeta köulukömakzini, yañon mönö kötümötuetni nini körek kelenj-malelenj neñgimakza.

¹³ *Mianğö keuñi mi Buña Kimbinöñ kewö ahöza, “Ambazip denike yeñon Kembugö qetni qeta köulukömei, yañon mönö i körek amöt qem engiiga letotme.”

¹⁴ Ambazipnöñ Kembu qahö möt narim wañgiba yañgö qetni mönö denöwö qeta köuluköbeak? Yañgö könañi qahö jiget mötkeri, i mönö denöwö möt narim wañgibeak? Kunñan Buña keu qahö jim asarima ewö, yeñon mi mönö denöwö mötpeak?

¹⁵ *Ambazip kun Buña keugöra qahö melaibin ewö, yañon mönö denöwö anda mi jim asaribawak? Mianğö keuñi Buña Kimbinöñ kewö ohoget ahöza, “Ambazip Buña keu ölöpñi memba kamakzei, yeñgö köna ötöñini möringa qetpuk sorokñi akza.”

¹⁶ *Mewö ohoget ahözapmö, nöñgö Israel könagesö ölni yeñon Ölöwak Buña qahö tem köla malje. Mianğö keuñi mi kezapqetok azi Aisaianöñ kewö jii ahöza, “O Kembu, nini Buña keu jim sehiinga dañon mönö uruñi melenđa mi möt

* 10:6: Dut 30.12-14 * 10:11: Ais 28.16 * 10:13: Joel 2.32 * 10:15: Ais

52.7 * 10:16: Ais 53.1

naribawakto?” ¹⁷ Keu mianğö dop Kraistkö keuñi jim sehiinga kezapñine geiga mötketka mötnaripñinan mönö mewö asuhuma.

¹⁸* Mötnarip mewö asuhumapmö, kewö qesim engizal: Buña keu mianğön mönö Juda yeğö kezapñine qahö geiga mötket me? Qahö, mi mönö mötket. Mianğö keuñi mi kewö jigetka Buña Kimbinöñ ahöza,

“Keu jigetka keu kourukñinan mönö anda anda gölme pak-pak dop kölök. Mi gölmeñi gölmeñi eu emu likeplikap mianğöreñ mötket.”

¹⁹* Keu mianğö dop Buña keu lök mötketmö, kunbuk torogeba kewö qesim engizal: Israel ambazipnöñ mi qahö möt asariget me? Mosesnöñ mutuk keu kewö jiyök,

“Ambazip könagesö ölni qahö nöñön mi amöt qem engibiga engö uru mututqututñinan mönö mianğöra aka asuhuma. Kian kambu gukmaulem maljei, yeñön inini engongitketka silik mianğön mönö Juda engö uruñini kuñgubiga irimñini seholiiga uruñinan wahötma.”

²⁰* Aisaianöñ mönö köhöiba kinda kewö jii ahöza,

“Ambazip ni qahö jarum niñgiba lañ malgeri, yeñön mönö ni miwikñaim niñgiget.

Ambazip nöngö könananğöra qahö qesiba malgeri, nöñön könanamni mönö yeñğöra indelbi mötket.”

²¹* Yeñğöra mewö jiyökmö, Israel neñğöra mönö keu kewö jii ahöza, “Silim dop söñanök könahiba qegetal könagesö kezapñup ahakzei, inini nöngöreñ kameğöra engohola engöra börö kaek köla malbiga sunğem ahakza.” Mewö.

11

Israel uruñe urumelen kambu moröñi ahöza.

¹* Mianğöra kewö qesizal: Anutunöñ nanñi könagesöñi andö qem neñgiyök me qahö? Mi qahöpmahöp! Nöñön mewöyök Abrahamğö gwölönarökñi kun akzal. Nanak Israel könagesögö kambu qetñi Benjamin mianğö uruñe maljal.

² Anutunöñ nanñi könagesöñi qeljine möwölöhöm neñgiyöhi, nini mönö qahö andö qem neñgiiga maljin. Kezapqetok azi Elaijagö (Eliagö) kösohotñi mi Buña Kimbinöñ ohogetka ahöza. Yanñön Anutugö jeñe Israel ambazip jim engiba köuluköyöhi, inini keu kemañi mi mötze me qahö? Keu mi kewö, ³* “O Kambu, yeñön mönö göhö kezapqetok ambazipurupki enguget kömugetka göhöreñ jöwöwöl ohoho altañi altañi

* **10:18:** Sum 19.4 * **10:19:** Dut 32.21 * **10:20:** Ais 65.1 * **10:21:** Ais

65.2 * **11:1:** Fil 3.5 * **11:3:** 1 Kiñ 19.10, 14

köndermönderget. Ni mohot nömosötket malbiga mömö-laköba mönömba nungubingö jöjöröze.”

⁴ *Mewö jiyökmö, Anutunöj mi möta mönö kewö melen wanjiba jiyök, “Gi nangok qahö maljanmö, nöjön azi 7000 mewöjanök sel jöhöm engibiga nani bujani aka bem munenji Bal i qahö simin köl wanjiba göbuk toroqeba malje.” ⁵ Keu mianjö dop nalö kewöje mewöjanök Anutugö kambu moröji ahöza. Anutunöj kalem möriamjanjö dop ambazip awamji möwölöhöm nenjiiga maljin.

⁶ Kalem möriamjan mönö nam köl wanjiiga möwölöhöm nenjiyök. Nini ahakmeme ölopji aka memba malbinahi, mianjöra aka qahö möwölöhöm nenjiyök. Gölmé ambazip ahakmemenan nam köl wanjiiga möwölöhöm nenjibawak ewö, yanjö kalem möriamjan mönö yuai omanji akawak.

⁷ Mianjöra mönö denöwö jibinak? Israel könagesönöj solanji akingö kapan köl malgetmö, solanibingö könaji mi qahö miwikjaiget. Yenön qahöpmö, Anutunöj kambu moröji möwölöhöm nenjiyöhi, nenön kalemji mi miwikjaiba solanji ahin. Tosatjan mötmöt bölöjan urunini gwözöjni öne lan malje. ⁸ *Mianjö keuji mi Buja Kimbinöj kewö ohoget ahöza, “Gaun jeje malgetka Anutunöj öme qahö jöhöiga urujine geiga köhömuji aket. Yuai eka könaji ek kutubepuköra jeni mem sohoiga ömuji kölok. Keu kezapjanan möta möt asaribepuköra mi mem gwözöjnök. Mewö tönpin mala kota nalö kewöje mewöyök öne lan malje.” ⁹ *Kinj Deiwidnöj mianjö keuji kewö jii ahöza,

“O Anutu, yenön közölömbuan ala nempa lan söngaimakze. Mianjörej mönö engek miwikjaiba singisöndokjananjöra simba alnönga enjimema.

Mönö nannini dumjine tötanjöba et enjiuga likepji melen enjinönga sihimbölö mötme.

¹⁰ O Anutu, gi mönö jeni mömbauba mem gömölinönga uba ekingö osime.

Mönö likepji melen enjinönga qakjine öngöba lömbörtiga sundan dop upköba malme.”

Deiwidnöj mewö köuluköyök.

Kian kantri yenön Anutugö ipji ölni aket.

¹¹ Toroqeba kewö qesizal: Juda könagesö ölni yenön tötanjöba et enjiuga urujinan gwözöjniga ölöwakingö osime me qahö? Mi qahö osime! Et enjuyöhi, mianön mönö Anutu möt kutubingö awöwengömegöra aka asuhuyök. Juda könagesö ölni yenön köna ongita et enjiuga kian kantri yenön salupjini aka urunini melenja Anutugö bujani aket. Mewö

akeri, mianjön uruñini kuñguiga miangöra irimñini seholiiga uruñini melenmegö sihimñan asuhumapköra aka mewö asuhuyök.

¹² Juda könagesö ölñi yeñön köna singiba et enğuiga miangöra kian gölmeñi gölmeñi yeñön oyaenköyaen akingö könañi miwikñaiget. Mi miwikñaiba uruñini melenđa kötümötuet uruñe maljemö, Juda könagesö ölñi yeñön tönpin mala Anutugö jeñe qahö dop kölje. Könañep Juda yeñön mewöyök körek uruñini melenme. Mewö asuhuiga Anutugö kötümötuetñan sehiba kelenmaleñ aukñe asuhuma.

¹³ Nöñön keuni ki Juda engöra qahöpmö, kian kantri könagesö engöra jizal. Nöñön kian kantri engöreñ melaimelai azi aposol akzalañgöra “Nupni qetbuñañambuk akza,” jiba mewö mötmörizal. ¹⁴ Nupni mi membi ölñi asuhuiga uruñini melenmakzei, nani Israel könagesöurupnan miangö buzupñi mötmegöra kapañ köla awöweñgömakzal. Buzup keu mianjön mohot mohot yeñgö uruñini kuñguiga miangöra irimñini seholiiga uruñini melenbingö sihimñan asuhui melengetka Anutunöñ amöt qem engima. Nupni qetbuñañambuk mi mönö miangöra aka kian kantri engö sutñine memakzal.

¹⁵ Anutunöñ Juda kambu andö qem nenğiiga miangö ölñan mönö kewö asuhuyök: Kian kantriñi kantriñi enñön salupñine aketka Anutunöñ töwañini qeba engömeiga alaurupñi aket. Juda könagesö ölñi yeñön uruñini melengetka Anutunöñ amöt qem engiba möt angön köl engimawi, miangö ölñan mönö kömupnöhök guliba mal köhöimeangö dop akña.

¹⁶ Yambu jenjeqe dölökñe nene Anutugöra kewöta ala sösöñgai ahinga sarakñi akza ewö, nupkö numbu neneñi pakpak mönö mewöyök sarakñi akza. Ip jalöñan töröñi akza ewö, böröñan mönö mewöyök töröñi akze. ¹⁷ Juda kambu mi Anutu nanñangö oil ipñi akza. Anutunöñ nanñi oil ipñi mi öñböñi memba böröñi tosatñi mitii etket aka arökñangö oil ip böröñi memba kaba sutñine ali toroqeba qarimakze. Kantri tosatñi iñini arökñangö oil ip miangö dop akzemö, Anutunöñ töndup engömeiga nalö kewöñe ip börö qainñi kun mienğö sutñine mal köhöimakze. Iñini mönö Juda kambugö oil ip jalöñeyök nene oñi öröba memba qarimakze.

¹⁸ Iñini Juda nembuk kinjemö, töndup Juda nenğongita silenini memba öngöbepuk. Silenini mem öngöbeak ewö, mönö keu ki mötme: Kantri tosatñi iñini ip böröñanök ewö akze. Iñini jalönini qahö bisimakzemö, nanine ip jalöñan mönö iñini engömisiiga kinje.

¹⁹ Keu kewö jibeak, “Anutunöñ nini nanñi ip kembane al nenğimapköra aka ip böröñi mi kutui eriga tiñi asuhuyök.”

²⁰ Keu mi ölña. Anutunöñ Juda ambazip uruñini qahö

melenḁa möt narigeranḁora aka kutum enḁii etketmö, inḁini mönö mötnariḁḁinan töndangöm enḁiiga zeḁ kinje. Mewö kinda jakbak-oraḁböraḁ kude aka aiweliköba malmemö, mönö kewö et enḁubapuköra sömbuḁini möta malme: ²¹ Anutunöḁ nanḁi ipḁanḁö böröḁi ölnḁi qahö enḁehoriba Juda könagesö kutum enḁiyök ewö, inḁini mönö “Ölöḁ nenḁehorima,” mewö jibepuk. Öne mewö mötmöriba laḁ malbepuk. ²² Mianḁöra kian kantri inḁini Anutugö könanḁi mötmöriba kewö jime, “Juda ambazip köna sinḁgiba et enḁuyöhi, Anutunöḁ mianḁö likeḁḁi melenḁa mönö ölnḁa könöpḁambuk ak enḁimakzapmö, nini ölöwak Toḁambuk qekötahöba kininga mem ölöwak nenḁimakza. Yambuk qahö toroqeba kinbin ewö, mönö kantri tosatḁi nini mewöyök kutum nenḁii etḁin.”

²³ Mewö ölöḁ jimemö, Anutunöḁ ambazip köna sinḁgigeri, mi mewöyök ölöḁ köhöiba ip kembraḁe kunbuk toroqem enḁima. Mianḁöra Juda könagesö yeḁön yanḁisenḁini mosöta uruḁini melenḁme ewö, i mönö ölöḁ Jisösbuk toroqem enḁima. ²⁴ Anutunöḁ inḁini arökḁanḁö oil ip mianḁöreḁök kutum enḁgiba kölkömötkö könanḁi onḁgita oil ip qainḁi kungö kembraḁe al enḁii toroqeget. Kantri tosatḁi inḁini mewö ak enḁiyök ewö, mianḁöra nanḁi ip böröḁi ölnḁi Juda könagesö ölnḁi mi mönö amqeba enḁömembra sihimḁan nanḁi oil ipḁanḁö kembraḁe al enḁii kunbuk toroqeme. Mewö.

Anutunöḁ Israel körek ak kömum nenḁimamḁö mötza.

²⁵ O urumelenḁ alaurupni, nanḁini mötkutukutu qakḁe laḁ malbepuköra mönö keu tölapḁi kun indela möt asarimeḁöra mötza. Keu mi kewö: Mötmöt bölöḁan Israel könagesögö bahöḁi kun yeḁḁö uruḁini gwözöhni maljemö, nalö teteköhḁi qahö yanḁisenḁ qahö toroqeba malme. Qahöp mö, mutuk kian kantri yeḁḁöreḁök jesöhḁöhḁan uruḁini melenḁa Anutugö bemtohoḁ uruḁe kaḁgotme. Mewö aketka Anutunöḁ janḁöhḁini ehi dop kölmawi, nalö mianḁöreḁ Juda könagesö nenḁö yanḁisenḁ nalöninan teköiga körek uruḁini melenḁme.

²⁶ *Uruḁini melenḁetka Anutunöḁ Israel könagesö pakpak amöt qem enḁiiga letotme. Mianḁö keuḁi mi Buḁa Kimbinöhḁ kewö ohoget ahöza,

“Amötqeqe Toḁan mönö Zaion kundunḁeyök asuhaḁa Jeikob kambu nenḁö ahakmemenini anḁöjörakḁambuk mi köl könjöratma.

²⁷ *Anutu nöḁön sinḁisöndokḁi köl könjörata oyaenḁkoyaen akingö jöhöjöhö arenḁi mi yembuk akiga mohotḁe malbin.”

Keu mewö ahöza.

28 Juda könagesö ölni yeñön Ölöwak Buja andö qeba Anutugö kerökurupni akerangöra kantri tosatni eñön salupni Anutugö alaurupni akze. Mewö akzemö, Anutunöñ Israel bömön jalö-urupnini möwölöhöm engiyohangöra Juda neñön mönö toroqeba wölböt alaurupni ölbölni akzin. 29 Anutunöñ ambazip niñia möwölöhöba engohola kalem engimakzawi, keu mi mönö kunbuk uruñi möñaiiga utekömawangö dop qahö. 30 Kian kantri inini mewöyök mutuk Anutugö jitni qahö tem köla lañ malgetmö, Juda könagesö ölni yeñön yangiseñ akerangöra aka Anutunöñ inini ak kömum engiiga letotket.

31 Juda könagesö ölni yeñön nalö kewöñe Anutugö jitni qetala lañ mala kotzemö, eñön letotkerangöra aka Anutunöñ Juda könagesö nini mewöñanök nalö kewöñe ak kömum nengimangö mötza. Kian kantri eñön uruñini melenđa letotketka miangö silikñan uruñini kuñgumakzawi, miangöra yeñön mönö mewö-ñanök amqeba uruñini melenđa ak-kömukömuñi buja qem angume.

32 Ambazip lökñanök pakpak nini Anutu qetala lañ malinga qegetalnini miwikñaiba gwaröhöm nengiyök. Körek pakpak ak kömum nengimapköra aka kösönöñ gwaröhöm nengiyök. Mewö.

Anutu möpöseiba omsa liñet kewö kölakzin:

33 *Anutu kalem möriamñangö köweñan mönö keta bölökni akza. Iwinangö jitni, mötmötñi mönö gegeni teteköñi qahö. Mötkutukutuñan nengongita öngöngöñi ketani akza. Yañön keunini kewöta jim tekömakzawi, neñön mi lökñanök jim asarim teköbingö osibin. Malmalninañgö köna arengömakzawi, miangö könañi mönö möt kewöta miwikñaim teköbinañgö dop qahö.

34 *"Kembugö urukönömñangö areñi mi ambazip körekñan möt yaköbingö osiba mala korin. Kunñan kun goro wangimawangö dop qahö."

35 *"Gölme ambazip kalem angumakzinmö, yambuk mewö ak-ingö osiba mala korin.

Yuai wanginga kitipni qahö melen nengiiga ölop dop köl wangiza. Yuai kun bian nengimapkö tosa wangibingö osimakzin."

36 *Mi kewögöra osimakzin: Yañön yuai pakpakö Tonji aka bömön jalöñi akza. Yañön yuai pakpak nam köliga asuhuyök. Mi nanñi aködamun miwikñaim wangimapköra aka asuhuyök. Miangöra neñön qetbuñani möpöseininga teteköñi qahö aködamunñambuk ahöba öngöba ahöma. Keu mi ölna.

* 11:33: Ais 55.8 * 11:34: Ais 40.13 * 11:35: Job 41.11 * 11:36: 1 Kor 8.6

12

Malmalnini denöwö malinga Anutugörey dop kölma?

1 O urumelen alaurupni, Anutunöy mewö ak kömum neŋgiyö-haŋgöra nöŋön mönö uruŋini kewö kuŋgum eŋgizal: Injini mönö ak-kömukömuŋi mi urukönömŋinan mötmöriba miangö dop kitipŋi melen waŋgiba waikŋi memba möpöseiba malme. Mewöyök nanŋini silenini mi Anutugö kötön naluha alme. Mewö alme ewö, injini mönö guliba sarakŋi aketka Anutunöy nalukŋini mi ehi dop köli sihimŋi mörakŋa.

2 Mutuk gölmegö ahakmeme bölöŋaŋgö areŋi wuatangöba malgetmö, nalö kewöŋe mewö kude toroqeba ahakŋe. Mewö qahöpmö, mönö urumötmötŋinan kölöŋaiiga letota malme. Mewö mala Anutunöy eŋgöra sihimŋi denöwö mötzawi, mi jaruba ölop köhöiba kewöta miwikŋaime. Mi miwikŋaiba miangö dop ahakŋe ewö, mönö köna ölopŋi wuatangögetka dop köl waŋgii aködamunŋinambuk ahakŋe.

3 Siksauk laŋ malbepuköra keu kun jimam. Anutunöy kalem möriam niŋgiiga miangö qakŋe kinda körek eŋgöra kewö jizal: Injini mönö nanŋini mötket öŋgöŋgöŋi qahö akŋapmö, mohot mohot injini mönö törörök möt kutum aŋguba malme. Anutunöy mötnariŋ neŋgiiga miangö ölni asuhumakzawaŋgö dop mönö nanŋini kewöt aŋguba miangö dopkeu jiba malme.

4 *Miangö könaŋi kewö: Sileninan mohot akzapmö, sile kitipnini mi gwötpuk. Kitipŋi pakpak mienön nup mohot miyöhök qahö memakze. 5 Miangö dop urumelen ambazip neŋön mewöyök gwötpuk maljinmö, töndup Kraistpuk gekötahöba kinda sile ewö ölni mohot akzin. Mohot akzinmö, nanŋök nanŋök neŋön mönö toroqem aŋguba mohotŋe nup meinga dop köli kinjin.

6 *Anutunöy kalem möriamŋi neŋgiyöhaŋgö dop nup memegö mötmöt kalem murutŋi murutŋi buŋa qem aŋguba maljin. Kunöy kezapqetok nupkö mötmöt kalemŋi buŋa qem aŋguza ewö, yaŋön mi mönö nupnöy alakŋa. Mötnariŋŋan töndangöm waŋgi-makzawaŋgö dop nupnöy ala Anutugö keuŋi jiba malma. 7 Kungöra welenqeŋe nupkö mötmöt kalemŋi waŋgiyök ewö, miangö dop mönö tosatŋi pöndaŋ bauköm eŋgiba malma. Kungöra böhi qaŋazu nup memapkö mötmöt kalemŋi waŋgiyök ewö, yaŋön mönö memburik-qemburikŋi qahö pöndaŋ tosatŋi kusum eŋgiba malma.

8 Kungöra uru naŋgönaŋgö nupkö mötmöt kalemŋi waŋgiyök ewö, yaŋön mönö pöndaŋ kapaŋ köla ambazip uruŋini kuŋguba naŋgöm eŋgiba malma. Tosatŋan yuaigöra mözöröŋgöba osigetka kungöra i naŋgöm eŋgimapkö mötmöt

* 12:4: 1 Kor 12.12 * 12:6: 1 Kor 12.4-11

kalemñi wañgiyök ewö, yañön mönö koñgwarakñi qahö pöndañ nañgöm eñgiba malma. Kungöra galömkölköl nupkö mötmöt kalemñi wañgiyök ewö, yañön mönö zeñ kinda tosatñi galöm köl eñgiba malma. Kungöra urukalem nupkö mötmöt kalemñi wañgiyök ewö, yañön nup mi mönö sösöñgai qakñe memba malma. Mewö.

Urukalemgö könañi törörök wuatañgöme.

⁹ Mönö geñmoñ mosöta törörök urukalem ak añguba malme. Bölöñi sisit memba andö qeba malme. Ölöpñañgöra ak eñgiiga miangöreñ mönö qekötahöba malme. ¹⁰ Urumeleñ alaurupñini mi mönö guñböñjönjön qakñe ak eñgiba törörök jöpaköm añguba malme. Göda qem añgubingö kapañ kölakzei, miangöreñ mönö awöweñgöba möpöseim añguba malme.

¹¹ Uruñinan mönö kude sörauba löwörimapmö, köulukögetka Uña Töröñan inahöm eñgiiga urukönöpnöñ kinda Kembugö nup memba malme. ¹² Jörömqöröm aka sösöñgainöñ malme. Kahasililij möta mökösoñda malme. Mönö böñ kinda Anutu köuluköba malme. ¹³ Anutugö ambazip sarakñan yuaigöra osizei, i mönö bauköm eñgiba malme. Mönö ambazip köl öröm eñgiba mohotñe tata nene nem sösöñgai ahakñe.

¹⁴ *Sesewerowero ak eñgimakzei, ambazip mi mönö kude gesuahöm eñgimemö, mönö Anutu köulukögetka kötuetaköm eñgimakña. ¹⁵ Söñgaizei, yembuk mönö bauköba söñgaime. Sahötzei, yembuk mönö bauköba sahötme. ¹⁶ *Mönö uru-mohot ak añguba luainöñ malme. Nanninañgöra mönö kude mötket öngöma. Jakbak-örañbörañ kude akñemö, ambazip eretñi mönö ala ak eñgiba malme. Nanninañgöra mötketka mötkutukutu ambaziwa maljeañgö dop kude akña.

¹⁷ Jinöñ jibi, nuñgunöñ guhubi, aknöñ aki mi kungöra kude akñe. Ambazip körekñan silik tosatñi mienjöra mötketka ahakmeme ölöpñi akzei, mi mönö kapañ köla memba malme. ¹⁸ Yuai kungöreñ qahö qaköze ewö, mönö köhököhöi ahöm eñgizawañgö dop kapañ köla ambazip körek yembuk luainöñ malme.

¹⁹ *Keu kun mi Buña Kimbinöñ kewö ohoget ahöza, “Nöñön mönö bölöñañgö likepñi melenbiga qakñine öngöma. Mi nöñgö nuwa. Kembu nöñön mewö jizal.” Mianjöra wölböt alaurupni, iñini nanninak bölöñañgö likepñi kude melenmemö, mi Anutugöra mosötketka irimñan seholiiga eñgö kitipñi melenja meköm eñgima.

²⁰ *Mianjöra mi nanninak kude melenmemö, Buña keu ki mönö wuatañgöba malme, “Kerökan nenegö kömuza ewö, i

* 12:14: Mat 5.44; Luk 6.28 * 12:16: Qam 3.7 * 12:19: Dut 32.35 * 12:20: Qam 25.21-22

mönö nene gumohom wanġiman. Göhö kerökan ogö mötza ewö, i mönö o wanġinönġa nema. Mewö aka göhöreġ silik ölöpnġi mianġön mönö uru kuġgum wanġinönġa gamuġi möta mosötpawak.” Keu mi mönö wuataġgöba malme. ²¹ Kunġan silik bölöġi mianġön luhut al gihibapukmö, nangak mönö silik ölöpnġi aka mianġön luhut al wanġiba silikġi bölöġi mi koyonaniman. Mewö.

13

Gawman yeġgö keu bapġine anda tem köla malme.

¹ Gawman kun mi nanġök qahö asuhuyökmö, Anutu, kukösum Toġi yaġön mönö gawman kuġgui mianġö dop ketanaminan kukösum qakġe kinda galöm köl enġimakze. Jimkutukutu nupkö kondotkondotġi mi Anutu. Mianġöra inġini körek mönö nanġini gawman yeġgö keu bapġe anda malme. ² Könaġi mewö mötzeanġöra aka kunġan jimkutukutu galöm yeġgö kukösumġini qetaljawi, yaġön Anutunönġ malmalgö areġi alöhi, mönö mi qetalja. Jimkutukutu Toġi qetaljei, Anutunönġ yeġgö keuġini jim teköba likepġi melenġ enġiiga lömböt miwikġaime.

³ Galömkölköl yeġön ambazip ahakmeme bölöġi ahakzei, mi kenġöt mötmöt ak enġimakzemö, ölöpnġi ahakzei, mi mewö qahö ak enġimakze. Mianġöra galöm kukösumġinambuk yeġgö kenġötki mötmangö mötzan me qahö? Mi qahö mötmangö mötzan ewö, mönö ahakmeme ölöpnġi aka memba malnönġa möpöseim gihimakġe.

⁴ Gawman yeġön mönö Anutu welenġi qeba mem ölöwak gihibingö mötze. Mewö mötzeanġöra ambazip bölöġi akzei, mönö mianġö likepġi melenġa qakġine öġgöi lömböt mötmegöra kinje. Anutugö welenqequeurupġi aketka buldömingö sou ketanġi enġiyöhi, mi öne töhöñ qahö memba malje. Mianġöra yuai bölöġi akzan ewö, mönö kenġötki möta malman. ⁵ Lömböt qakġine öġgöi mötpepeköra mönö gawman jitġini tem köla malme. Mianġörök qahöpmö, Anutugö jeġe mohot dop kölmaköra mönö mewö ahakġe. Qahö tem kölgetka Anutugö irimġan sehooli jii urukönömġinan mewö mötketka uruġinan bölibapuköra mönö mewöyök gawman yeġgö keu bapġe anda malme.

⁶ *Gawman yeġön mönö Anutugö nup bahöġi kun memba mianġöreġ zeġ kinda galöm köl enġimakze. Nupġini mi memegöra enġön mönö bauköm enġiba takis mewöyök alakze. ⁷ Gawmangö takis aka kötön könaġi könaġi dawik enġimegö jimakzei, mi mönö körek mianġö dop enġimakġe. Gawmangö

* 13:6: Mat 22.21; Mak 12.17; Luk 20.25

takis kõnanji kõnanji pakpak mi mönö törörök engimakŋe. Gaw-mangö nup meme ambazip yenğöra mönö ewe ala göda qem engimakŋe. Mewö.

Nalö ketanjan dopdowiiga mönö jöpaköm anğuba malme.

⁸ Mewö aka kungörenj tosa kun embuk kude ahöi malme. Töndup engö tosanjini mohok-kun mi nalö dop kewö ahöza: Injini mönö uru jöpaköm anğuba malme. Kunjan tosatnji jöpaköba urukalem ak engimakzawi, yanjon mönö Kõna keu wuatangöm tekömakza.

⁹ *Jöjöpaŋ keu bohonji kewö, “Nangi jöpaköm anğumakzani, mianğö dop mönö tosatnji pakpak jöpaköm engimakjan.” Keu mianğö uruŋe jöjöpaŋ keu kewöŋi ahöze, “Sero yonğorö kude akjan,” “Ambazip kun kude qenöŋ kömuma,” “Yonğorö kude meman,” “Yuaigöra mönö kude köpösönğöman.” Mi aka jöjöpaŋ keu tosatnji pakpak mi mönö keu bohonji mianğö nemböŋe akze.

¹⁰ Ambazip kun jöpaköm wanğizan ewö, yanğöra mönö yuai bölöŋi kun kude ak wanğiman. Mianğöra urukalem aka mewö mianjon mönö jöjöpaŋ keu körek pakpak tem köla wuatangö-makzan.

¹¹ Nalö kianğö kõnanji mötzeanğöra mönö ahakmeme mewöŋi aka memba malme. Mutuk Kraist möt nariba urunini melenjini, nalö mianğörenjök kõnahiba mala koringa Kembunöŋ meköm nenjii Suepnöŋ öngöbini, mianğö nalöŋan mönö dowe ahöza. Mianğöra injini gaun ahözei, mianğörenjök imbiŋini möta wahötmeanğö nalöŋan mönö lök kam kunğuz. ¹² Sunğem köröpŋi malinga wehön jeni jililingöba koriga asarimangö akza. Mianğöra söŋaupkö ahakmeme mi mönö tömbuluŋaniget geiga asakjanğö bim qebingö aködamunŋi mi mönö memba kölget geiga kinbin.

¹³ Asakjanğö uruŋe maljinanğö dop mönö ahakmeme sarakŋi aka memba malbin. Tosatjan közölömbuan pati ala bau numbu nempa o köhöikjanğöra enololon ahakze. Sero nambönamböŋ aka laŋ ambi yonğorö örömakze. Julia denđa anğururuk aka anğöhöba urunöŋ mututqutut möta andönöŋ qem anğumakze. Ahakmeme mewöŋan mönö qahö dop kölja. ¹⁴ Urusilegö sihim kömbönanjini bölöŋan guliba wahötketka miengö sihimjini tem köl engibepuköra mönö mi kude kezap ala mötmörim engimakŋe. Mewö qahöpmö, Kembu Jisös Kraistkö ahakmemenjan mönö timbi saiwanjini aiga mi maluku ewö löngöt anğuba malme. Mewö.

* **13:9:** Eks 20.13-15, 17; Dut 5.17-19, 21; Lew 19.18

14

Alaurup lölöwöröni i kude jim enjiba malme.

¹ *Kungö mötnaripñan lölöwöröni aiga i mönö köyan köla köl öröm wañgiba malme. Yambuk eraum möta kösawörañ keugöra jitnakölik kude ahakñe. ² Tosatñan mötnaripñinanğö dop nene pakpak ölop nemakzemö, tosatñi yeñgö mötnaripñinan lölöwöröni aiga nene piakñanök nemakze. Uruñinan tölöhobapuköra uruyahöt aka sömbup tandö lopionğö naluk alalñi mi sisitñi memba yöha töhönök inanñik ohom nemakze. ³ Nene pakpak nemakzeañön mönö alaurupñini yöhayök nemakzei, mi jijiwilit kude ak enjimakñe. Anutunöñ alaurupñini nene pakpak nemakzei, mi mewöyök “Dop kölje,” jiba köyan köl enjimakza. Mianğöra yöhayök nemakzei, enñön mönö alaurupñini yeñgö keuñini kude jim teköme.

⁴ Göñön mönö ninia aka kungö welenqeçeni jim teköm wañgibanak? Yañön mönö nanñi toñañgö jeñe keuñanğö likepñi jiiga kewöta jim teköiga dop kölīga kinma me lömböt qakñe öngöiga etma. Kembunöñ mönö köhöiba böñ qeba kinmapköra nañgöm wañgimakña. Mianğöra mönö ölop böñ qeba kinma.

⁵ Tosatñan silim pakpaköra mötmörigetka tandökñini öröröñ ahözemö, tosatñan silimñi silimñi kewöta silim kungö mötket öngöiga qainñi kun aiga silim tosatñan mianğö nemböñe akze. Inini mohot mohot mönö nanñini mötmötñini qekötahöba mianğöreñ uruyahöt körek yaköriba awösamkakak kinda malme. ⁶ Tosatñan silimñi silimñi kewöta öngöba eta alakzei, yeñön mi mönö Kembu qetbuña wañgimapköra aka ahakze. Tosatñan sömbup nemakzei, yeñön mönö Anutu möpöseiba Kembunöñ mewö qetbuñañambuk akñapköra nemakze. Tosatñan sömbupkö siñgi malakzei, yeñön mönö Kembunöñ qetbuñañambuk akñapköra aka mi ahakze aka mewö mala Anutu möpöseimakze. ⁷ Neñgöreñök kunñan kun mönö nanñañgörök qahö malja aka nanñañgörök qahö kömuma.

⁸ Mianğö könañi kewö: Jebuk malbin ewö, mönö malmal-nini Kembugöra köleñda malbin. Kömumbin ewö, mönö Kembugöra kömumbin. Mianğöra malbin me kömumbin ewö, mönö Kembugö buñaya akzin. ⁹ Kraistnöñ mönö kömugeru aka jebuk maljini, körek neñgö Kembunini aka malmapköra kömumba guliyök. ¹⁰ *Anutunöñ mönö körek neñgüañgita nanñi keu jakeñe al neñgiiga kinbin. Mianğöra tosatñi enñön mönö ninia aka urumeleñ alaurupñini jim teköm enjimakze? Mewöyök alaurupni tosatñi enñön mönö wuanöñgöra urumeleñ alaurupñini tosatñi mi jijiwilit ak enjimakze? Jujul silikñini mianñön

mönö qahö dop kölja. ¹¹ *Miangö keuñi mi Buña Kimbinöñ kewö ohoget ahöza,

“Kembu nöñön mal köhöizali, miangö dopkeu öl töhöññi kewö jizal: Ambazip körek pakpak inñini mönö nöñgö jemeso-holne simin köla jitñinan Anutu ni möpöseim niñgime.”

¹² Keu miangö dop nini körekñan mönö inanñök inanñök ahakmemeninangö kösohotnini mi Anutugöra jim asariinga kewöt neñgima. Mewö.

Kunöñ tötañgöba et qebapuköra mötmörime.

¹³ Miangöra mönö kude toroqeba jim bölim anguba keuñini jim teköme. Urumelenj alaurup yeñgö könanöñ tötañgöba et engubapukö yuai kun mönö kude alakñe. Miangö keuñi mönö kapañ köla jiba jöhöme. ¹⁴ Nene yuai kunöñ nanñanök añgöjörakñambuk qahö akzawimö, ambazipnöñ yuaigö mötketka añgöjörakñambuk akzawi, yeñgöröhök mi añgöjörakñambuk akza. Nöñön Kembu Jisösbuk kinda keu mi möta miangöra uruyahöt kun qahö akzal. ¹⁵ Anutunöñ nene pakpak amöt qem teköi sarakñi akzemö, töndup alaurup tosatñan dönqiziziniñini aka sömbup qahö nemakze. Kraistnöñ yeñgöra aka kömuiga tosatñi eñön mönö wuanöñgöra sömbup nempa mewö miañön yeñgö uruñini mem bölimakze? Mewö nanñini imbi-imbi aketka urumelenj alaurupñinan miangöra wösöbirik ahakzei, mewö mönö urukalemgö könanji mi qahö toroqeba wuatangömakze.

¹⁶ Mötmöt ölöññi ahöm engizapmö, miangö qakñe ahakmemeninan lañ aketka tosatñan miangöra sirongen keu jiba jim engimakze. Mewö asuhubapuköra galöm mem anguba malme. ¹⁷ Wani neneya nembini aka wani oya nembini, miañön Anutu bemtohoñangö aiwesökñi qahö akza. Yuai miañön mönö eretñi akza. Yañgö bemtohoñ uruñe mal-malgö ölnji mi kewö: Uña Töröñan inahöm neñgiiga ahakmeme diñdini wuatangöinga luai qem neñgiiga söñgaiba maljin. Miañön mönö aiwesök muñgemñi akza. ¹⁸ Denike yeñön mewö aka Kraistkö welenni qemakzei, yeñön mönö Anutugö jeñe dop kölgetka ambazipnöñ keuñini mötketka dop köl engimakza.

¹⁹ Miangöra nini luai qem anginga urumohot sehimapköra kapañ kölbin. Mewö miañön mönö urunini möhamgöba mem köhöim angubin. ²⁰ Anutunöñ nene pakpak amöt qem teköi sarakñi akze, mi mötzinmö, kunöñ sömbup me nene kun neiga alañangö uruñan miangöra böliiga urukönöññi ahuiga siñgisön-dokpuk akzawi, miañön mönö qahö dop kölja. Kunñan tosatñi yeñgöra qahö mötmöriba nanñangörök möta lañ nezawi, yañön mönö mewöyök siñgisöndokpuk akña.

* 14:11: Ais 45.23

Miangöra Anutunöŋ yeŋgö uruŋine nupŋi meyöhi, tosatŋi eŋön mönö nupŋi ölöŋŋi mi nenegöra aka kude mem bölime.

²¹ Miangöra urumelen alaurupŋini yeŋgöra aka sömbupkö ŋiŋi mala wain o mi kude nemba malme. Mewö mi-aŋön mönö mohotŋe ölöwakŋe. Mewöyök uruŋinan yuaigöra aka böliiga ŋiŋisöndokpuk aka löwöribawak, eŋön mi kude akŋe. Mewö mönö mohotŋe ölöwakŋe. ²² Kösaŋöraŋ keugö mötnariŋi mewö me mewö ahöm gihizawi, mi mönö Anutugö jemesoholŋe aŋgön köla malman. Kunŋan keu kungöra “Dop kölja,” jiba miangöreŋ qekötahöba möt köhöiba miangöra nanŋi qahö jim teköm aŋguzawi, yaŋön mönö simbawoŋ akza.

²³ I me wai mötnariŋ qakŋe qahö kinda ahakzini, mi pakpak mönö ŋiŋisöndok akza. Miangöra kunŋan nene kungöra uruyahöt aka töndup mi neza ewö, yaŋön mönö mewö ŋiŋisöndok akŋa. Mötnariŋ qakŋe qahö kinda nezawaŋöra Anutunöŋ mönö yaŋgö keuŋi jim teköi qaköba lömböt mi-wikŋaima. Mewö.

15

Mönö Kraistkö mötmötŋi wuatangöba malme.

¹ Mötnariŋninan köhöikŋi akzawi, neŋön mönö naninaŋgöörök laŋ söŋgaiba nanini imbi-imbi malbinbuk. Tosatŋi yeŋgö mötnariŋninan lölöwöroŋi aiga tötöpinpinöŋ köna oŋgita törörök qahö wuatangömakzei, neŋön i urukalem ak eŋgiba lömbötŋini bisimegö bauköm eŋgibin. ² Nini mohot mohot mönö alaurup-ninan ölöwakŋe aŋgö dop mötmöriba ak eŋgimakin. Mewö ak eŋgiba uruŋini möhamgögetka köhököhöi miwikŋaima. ³ *Kraistnöŋ mewöyök nanŋaŋgöörök nanŋi imbi-imbi qahö söŋgaiba ahökmö, Buŋa keu kiangö dop ak waŋgigetka malök, “Ambazip keu töhöreŋ jiba gi jim gihimakzei, yeŋgö keuŋinan mönö nuŋguiga sihimbölöŋi mörakzal.” Keu mewö ahöza.

⁴ Anutunöŋ neŋgöra sihimŋi kewö mörakza: Neŋön kapan köla köhöiba kinda Buŋa Kimbi oyoŋninga urunini naŋgöiga mewö mi-aŋön jörömqöröm aka malbin. Miangöra Buŋa keu pakpak mönöwök ohogeri, Anutunöŋ mönö miangö dop kusum neŋgimangö mötza. Miangöra mi ohoget ahöza. ⁵ Anutunöŋ mönö nanŋak uruŋini naŋgöiga ölöŋ kapan köla kin köhöime. Yaŋön mönö Uŋaŋi eŋgiiga inahöm eŋgiiga sutŋine uru jöhöjöhö aka Kraist Jisösgö mötmötŋi wuatangöba malme.

⁶ Mewö mala ölöŋ urumohot qakŋe numbuŋini mindiriba Anutu, Kembunini Jisös Kraistkö Iwiŋi mi möpöseiba malme. Anutunöŋ eŋön mewö aka malmegöra mörakza. Mewö.

Ölöwak Buŋanöŋ kantri tosatŋe anda kayök.

⁷ Kraistnöḡ inini möt aḡḡön köla köyan köl eḡḡimakzawi, mianḡö dop inini mönö mewöyök köyan köl aḡḡuba malme. Anutugö qetbuḡaḡan sehimapköra mönö mewö aka malme. ⁸ Nöḡön keu ölnḡi ki jimam: Anutunöḡ keuḡi keuḡi Juda könaḡesö neḡḡö bömönrupnini yeḡḡöra jiba jöhöyöhi, mianḡön ölnḡambuk akḡapköra mörök. Mianḡöra Kraist melaiḡa Anutugö Buḡa keu ölnḡan köhöimapköra aka Juda neḡḡö sutnine eta welen qem neḡḡiba malök. ⁹ *Juda nini welen qem neḡḡiba malökmö, kantri tosatḡi yeḡḡön mewöyök yaḡḡö akkömukömuḡi möta mianḡöra Anutu möpöseiba malje. Mianḡö keuḡi mi Buḡa Kimbinöḡ kewö ohoget ahöza, “Mianḡöra nöḡön kantri tosatḡi yeḡḡö sutḡine mala möpöseim gihiba qetbuḡaḡan sehimapköra liḡet kölakḡam.”

¹⁰ *Mianḡö keuḡi kun mi kewö jiba ohoget ahöza, “Anutunöḡ Juda nini möwölöhöm neḡḡiḡa könaḡesöḡi aka söḡḡaimakzin. Kantri tosatḡi inini mönö nembuk toroqeba söḡḡaiba köiraḡ ala malme.”

¹¹ *Mianḡö keuḡi kun mi kewö, “Kian kantrigö kambu pakpak inini mönö Kembu möpöseiba malme. Göłme dop maljei, inini mönö körek ‘Anutu saiwap!’ jiba liḡet köla malme.”

¹² *Kezapqetok azi Aisaia yaḡḡön mewöyök mianḡö keuḡi kewö jii ahöza, “Azi qetḡi Jesi yaḡḡö andöjalöḡan mönö söḡḡi jula wahöta ambazip göłme dop galöm köl eḡḡima. Mewö ak eḡḡiḡa jörömqrömqḡini yaḡḡöreḡ ala bauköm eḡḡimapköra mamböta malme.”

Keu walḡi mianḡön mönö nalö kewöḡe ölnḡambuk ahakza.

¹³ Uḡa Töröḡaḡö ösumḡan mönö naḡḡöm eḡḡiḡa jörömqrömqḡinan köhöiba pöwöwöm akḡapköra mötzal. Mianḡöra jörömqrömqḡön Toḡi Anutu yaḡḡön mönö luai qem eḡḡiba sösoḡḡai pakpak mianḡön uruḡini kokolak qema. Mewö köuluköbiga ölop Anutu möt narim waḡḡiba oyaeḡkoyaḡeḡ akingö mamböta malme. Mewö.

Keu köhöikḡi mi denöwögöra ohozal?

¹⁴ O urumeleḡ alaurupni, nanak eḡḡöra kewö möt köhöizal: Inini mönö tönpin qahö maljemö, Anutunöḡ yuai pakpak ölopḡi uruḡine ali kokolak qeḡa mötmöt könaḡi könaḡi miwikḡaiba mianḡön ölop goro qeba kusum aḡḡubinaḡö dop akze. ¹⁵ Mewö akzemö, töndup keu mi ölum eḡḡubapuköra möta mienḡö könaḡini mi kunbuk köl gulim eḡḡizal. Anutunöḡ

* 15:9: 2 Sml 22.50; Sum 18.49 * 15:10: Dut 32.43 * 15:11: Sum 117.1

* 15:12: Ais 11.10

kalem möriam niŋgiiga miangö qakŋe kinjalangöra mönö awösamkakak qakŋe keu köhöikŋi tosatŋi ohom enjizal.

¹⁶ Miangö könaŋi kewö: Anutunöŋ kian kantri eŋön uruŋini melengetka Uŋa Töröŋan mem sarahim enjimapköra mörakza. Mutuk jöwöwöl ohogetka köwakŋan öngöi Anutunöŋ söngaizapma, miangö dop nalö kewöŋe Anutunöŋ ambazip gölme dop buŋaŋi aketka engeka söngaimangöra awöwengömakza. Miangöra Ölöwak Buŋaŋi kantri tosatŋi yeŋgö sutŋine jim sehimangö jiba nupŋi qakne aliga miangö dop urugö nup galöm aka Kraist Jisösgö welenni qemakzal.

¹⁷ Miangöra Kraist Jisösbuk qekötahöba kinda Anutugö nupŋi membiga qetbuŋa niŋgiiga sileni memba öngöba awösamkakak kinjal. ¹⁸ Kraistnöŋ kantri tosatŋi yeŋön Anutugö jitŋi tem kölmegöra möta sölölohöba kuŋgum niŋgimazawi, miangön mönö nam köl niŋgiiga keuni jiba ahakmemeni ahakzal. Keu tosatŋi laŋ jim sehisehigö awösamkakakŋi mi qahö ahöm niŋgiza.

¹⁹ Uŋa Töröŋangö ösumŋan mönö nam köl niŋgiiga angöletot aiwesök kukösumŋinambuk asuhuget. Nöŋön Jerusalem siti mosöta kantriŋi kantriŋi liliköba anda mala mala Yuropkö siti qetŋi Ilirikum miangöreŋ angoral. Mewö gölme dop liliköba Kraistkö Ölöwak Buŋa mi jim asarim enjim teköyal. ²⁰ Kunöŋ tandö kuŋguiga kuŋŋan kaba nanŋi miriŋi miangö qakŋe memba mönö keuŋambuk akŋa. Miangö dop kunöŋ Kraistkö keuŋan mötnaripkö tandö lök kuŋgui kinöhi, nöŋön mönö kaba yangö tandö qakŋe töndangöba kinda uruŋini toroqeba möhamgöba mem köhöim enjimagö tököba malal. Urugö nup mutukŋi memba miangön aködamuni miwikŋaimangö kapan köla malal. Miangöra ambazip denike yeŋön Kraistkö qetŋi qahö möta tönpin malgeri, nöŋön Ölöwak Buŋa yeŋgöra jim asarimagö awöwengöba malal. ²¹ *Miangö keuŋi Buŋa Kimbinöŋ kewö ohoget ahöza,

“Denike yeŋön keuŋi qahö jiget mötkeri, yeŋön mönö mala i ekŋe. Denike yeŋön könaŋi mutuk qahö möta tönpin malgeri, yeŋön mönö mala mi möt asarime.”

²² *Nup mewöŋan jöhöm niŋgiyöhangöra mönö nalö dop enögöreŋ kamangö osiba malal. Mewö.

Polnöŋ Rom anmamgö areŋi alök.

²³ Mewö malalmö, liliköba urukuŋgukuŋgu nup mutukŋi memba gölme pakpak möt enjizini, miangöreŋ mi mem teköba malal. Urugö nup mutukŋi memamangö gölmeŋi mi nalö kewöŋe kunbuk qahö ahöza. Mewöyök iŋini engekŋamgö sihimŋi möta malbiga yambu (yara) gwötpuk lök teköyök.

* 15:21: Ais 52.15 * 15:22: Rom 1.13

²⁴ Mianğöra kantri qetņi Spein anmami, mianğö könaje mönö engörej kamamgö areņi ala engekņamgö jörömqöröm aka kewö mötzal: Engeka embuk sösöņgai aka borom kun köisirik tatpiga bauköm niņgigetka ölöp köna toroqeba Spein anmam.

²⁵ *Mewö mötzalmö, nalö kewöņe Jerusalem sitigö könagesö sarakņi naņgöm enğibingöra mianğörej anmam. Mianğörej andagun engörej kamam. ²⁶ Masedonia aka Akaia prowins yahöt mietkö urumelen könagesö kambuņi kambuņi yeņön mönö Jerusalem sitigö ambazip sarakņi bauköm enğibingö keu jöhöget. Anutugö ambazip sarakņi wanapņi maljei, mönö yeņğöra keu jöhöba naluk gwötpuk ketani ala mindirigetka mi membagun anda enğimam.

²⁷ *Mewö akingö uru sösöņgai möta keu jöhöba mindimindiri naluk ketani mi alget. Mewö almegö tosa ahöm enğiiga algetka ölna dop kölja. Anutunöņ Juda könagesö kötuetköm neņgimamgö keuņi jii ahöiga kötümötuet mianjön kian kantriņi kantriņi dop köla qakņine öņgöi malje. Mianğöra kian kantri yeņğörej tosa ahöiga likepņi melenđa kalemņinan Juda könagesögö wanapņi bauköm enğigetka dop kölja. ²⁸ Nöņön kalem mi memba anda böröņine albi nupni mianjön teköiga mianğö andöņe enğömosöta kusukņanök engörej kaba engekagun toroqeba Spein anmam. ²⁹ Engörej kamami, nalö mianğörej mönö Kraistkö kötümötuetņi mi körek memba kaba enğimam. Mewö möt yaközal.

³⁰ O urumelen alaurupni, nöņön Kembu Jisös Kraistpuk qekötahöba kinda kewö uru kuņgum enğizal: Uņa Töröņan jöpaköba naņgöm enğimakzawangö dop mönö nöņğöra Anutu köuluköba malme. Aum-mörimakzali, mianğörej mönö uruka-lemņinan bauköm niņgiba malme.

³¹ Judia prowinsnöņ anda ambazip Kraistköra yaņgisen ahakzei, yeņgö böröņine gebilenbuköra mönö Anutugö köulukögetka sel jöhöm niņgibawak. Mewöyök naluk kalem ketani memba Jerusalem anda ambazip sarakņi yeņgö böröņine albiga dop köli sihimņi mötmegöra mönö köuluköba malme. ³² Mewö köulukö-getka Anutunöņ sihimņi mötza ewö, nöņön mönö sösöņgai qakņe engörej kaba embuk köisirik tata körö-ölöwak qem niņgigetka malmam. ³³ Luai Toņi Anutu yaņön mönö körek embuk kinma. Keu mi ölna.

16

Yaizözkök keu teteköņi

¹ Alanini Fibi (Foibe) yaņön Senkria urumelen könagesögö nup meme ambia akza. Yaņön Rom engörej kamawi, i köyan

* 15:25: 1 Kor 16.1-4 * 15:27: 1 Kor 9.11

kölmegöra mönö qesim enġiba böröġine aljal. ² Yaġon ambazip gwötpuk aka ni mewöyök bauköm neġiba malök. Mianġöra Anutugö ambazip sarakġan alaurupnini köl öröm enġimakzini, mianġö dop Fibinöġ kaiga i mönö Kembugö qetġe köuluköba köl öröm waġgime. Enġöreġ kaba yuai kungöra osibawak, mianġöreġ mönö bauköm waġgime.

³ *Awanömyahöt Prisila aka Aqila Kraist Jisösbuk kinjahori, neġakyahötne yetköra mönö nöġöreġ yaizözkökni jigetka mötmahot. ⁴ Yetkön mönö nöġöra aka malmalġiri köleġda kömumbitkö ahot. Nöġönök qahö möpöseim etkizalmö, kantri tosatġe urumeleġ könagesö kambuġi kambuġi yeġon mönö mewöyök yetköra saiwap jimakze.

⁵ Urumeleġ könagesö miriġire tokomakzei, yeġöra mewöyök mönö nöġö yaizözkökni jigetka mötme. Eisia prowinsnöġ nup membiga öġi mutukġan asuhuiga Epainetus yaġon uruġi melleġda Kraistkö buġa ahöhi, wölböt alani yaġöra mönö nöġöreġ yaizözkökni jigetka mötma. ⁶ Marianöġ enġöra aka nup ketani memba malöhi, yaġöra mönö nöġöreġ yaizözkökni jigetka mötma. ⁷ Andronikus aka Junias tinitosolomyahötne yetkön mutuk Kraistköreġ qekötahöyohotka nöġon yetkö andöġire uruni melleġbiga mianġö andöġe nömbuk kösö mire malin. Aposol yeġon yetköra mötketka sutġine öġġöġöġi akzahot. Yetköra mönö nöġöreġ yaizözkökni jigetka mötmahot.

⁸ Wölböt alani Ampliatus Kembubuk kinjawi, yaġöra mönö nöġöreġ yaizözkökni jigetka mötma. ⁹ Neġaknini Urbanus Kraistpuk kinjawi aka wölböt alani Stakis yetköra mönö nöġöreġ yaizözkökni jigetka mötmahot. ¹⁰ Apeles Anutunöġ esapesap waġgiiga dop köli Kraistpuk qekötahöba kinjawi, yaġöra mönö nöġö yaizözkökni jigetka mötma. Aristobulus-buk miri mohot maljei, yeġöra mönö nöġöreġ yaizözkökni jigetka mötme. ¹¹ Tinitosolomni Herodion yaġöra mönö nöġöreġ yaizözkökni jigetka mötma. Narsisusbuk Kembu qekötahöba miri mohot maljei, yeġöra mönö nöġöreġ yaizözkökni jigetka mötme.

¹² Trifina aka Trifosa ambi yahöt mietkön nup ketani memba Kembubuk kinjahori, yetköra mönö nöġöreġ yaizözkökni jigetka mötmahot. Wölböt ambi alani Persis yaġon Kembugöra nup keta bölöġi memba maljawi, yaġöra mönö nöġöreġ yaizözkökni jigetka mötma. ¹³ *Rufus yaġon Kembugö nupġi ölöp kötöġi memakzawi aka yaġö namġi nalö dop ni tok nahöġi ewö köyan köl niġiba malöhi, yetköra mönö nöġöreġ yaizözkökni jigetka mötmahot.

* 16:3: Apo 18.2 * 16:13: Mak 15.21

¹⁴ Asinkritus, Flegon, Hermes, Patrobas, Hermas aka urumelen alaurup tosatnji yembuk maljei, yengöra mönö nöngö yaizözkökni jigetka mötme. ¹⁵ Filologus, Julia, Nereus nenjambuk aka Olimpas aka ambazip saraknji tosatnji pakpak yembuk maljei, yengöra mönö nöngören yaizözkökni jigetka mötme.

¹⁶ Urumelen alaurup sutjine mönö anjum anguba nemböjini suhuba jölöjini jiba malme. Kraistkö urumelen könagesö pakpak yejön mönö yaizözkökjini algetka engören kaza. Mewö.

Qambaran keu teteköjini

¹⁷ O urumelen alaurupni, nöjön urujini kewö kunjuba jizal: Ambazip tosatjan uru mendenmenden asuhumapkö nam kölakzei, yengöra mönö je galöm mem anguba malme. Urumohotkö silik ölöjini kusum engigetka mötzmö, keu mi qetala kösawöran keu tosatnji mianön urujini kunjugetka bölii qaköba erakze. Ambazip mewöjini mi mönö engömosöta tikep malme. ¹⁸ Ambazip mewöjan mönö nanini Kembunini Kraistkö nupjini qahö memakzemö, nanjini sihimjinarjögö dop asuhumapköra tuaköpek jiba nanjini welen qem anjumakze. Kelök keu ölöjini ölöjini nahömjambuk jiba ambazip genmojini qahö yengö urujini kunjuba tilipköm engimakze.

¹⁹ Injini Ölöwak Buja tem köla wuatangömakzei, keu mi körek nejjögö kezapnine geiga mötzin. Mianjögöra nöjön engöra aka önöjini qahö söngaimakzal. Mewö akzalmö, injini kewö aka malmegöra mötjal: Mönö bölöjini akingö mötkutukutuujini mosötketka etma. Ölöjini akingö mötkutukutuujini mi mönö pöndañ köl guliba mem qarime. ²⁰ Luai Tonji Anutu yanön mönö Satan ösumok töjöhöi engö bapjine eri köiran köla söngaiba malme.

Kembunini Jisösgö kalem möriamjan mönö embuk ahöma.

²¹ *Nöngö nejakni Timoti yanön mönö yaizözkökjini ali engören kaza. Nöngö tinitosolomurupni Lusius, Jeison aka Sosipater yejön mewöyök yaizözkökjini algetka engören kaza.

²² Tertius nöjön Polgö keujini möta kimbi ki ohozali, nöjön mewöyök Kembubuk kinda yaizözkökni albiga engören kaza.

²³ *Gaiusnöj mirinjini jim teköi malbiga urumelen könagesö pakpak yejön mewöyök ki kaba tokogetka nene köisirik al nenjimakzawi, yanön mönö yaizözkökjini aliga engören kaza. Erastus yanön siti pomjanjögö ofis uruje takis monen galöm kölakzawi aka urumelen alanini Qartus yetkөн mönö

* 16:21: Apo 16.1 * 16:23: Apo 19.29; 1 Kor 1.14; 2 Tim 4.20

yaizözköñjiri alohotka enğoreñ kaza. ²⁴ Kembunini Jisös Kraistkö kalem möriamñan mönö embuk ahöma. Keu mi ölna.

Kembu möpöseiba kewö köulukömakzal:

²⁵ Ölöwak Buña keu ölni mi möpñangö möpñeyök mala kotketka mianğoreñ tölapñe ahöyök. Mewö ahöiga Jisösnöñ eta indela jim asariiga möta jim sehimakzal. Buña keu mianğö dop Anutunöñ mönö köhöiba mötnariñjini mem köhöiiga ölop zeñ kin köhöime. Mianğöra neñön mönö Anutugö qetbuñaji möpöseininga sehimakña.

²⁶ Mutuk Buña keu ölnan asa-asambötñe ahöba korökmö, nalö kewöñe kezapqetok ambazip kulem ohoget ahözawangö dop mönö aukñe asuhuyök. Anutunöñ nalö dop mala kota teteköñi qahö mal öngömawi, yañön ambazip kambuñi kambuñi neñön urunini melenđa Buña keu möt nariba tem köla malbingöra mötza. Mianğöra nup kewö membingö jim kutum neñgiyök, “Inini mönö anda gölme dop liliköba Buña keu jim asariba malme.” Keu mianğö dop neñön Buña keu mi ambazip kambu pakpak mötmegöra jim asariba malin.

²⁷ Anutu nanñök mötkutukutu Toñi akzawi, neñön mönö Jisös Kraistkö qetñe yañgö qetbuñaji möpöseininga nalö teteköñi qahö aködamunñambuk ahöm öngöba ahöma. Keu mi ölna.

Korint Kimbi 1

Polnöŋ Korint yeŋgöra Kimbi mutukŋi alök.

Jim-asa-asari

Polnöŋ misin nup memba liliköiga indimŋi yahöt ahöi Grik siti Korint miangöreŋ anök. Korint mi Akaia prowinsgö siti bohonŋi. Miangö kösohotŋi mi (Apo 18.1-6) eka oyoŋme. Nalö miangöreŋ Korint mi siti keta bölökŋi. Bisnisŋini könaŋi könaŋi gwötpuk ala meget. Korint yeŋön tandö lopionŋ aka bem könaŋi könaŋi waikŋini memba möpöseiba malget. Mönahotŋini könaŋi könaŋi ala söŋgaiget. Gwötpukŋan serowilin aka malget.

Kimbi ki kewögöra ohoyök: Polnöŋ misin nup memba liliköiga indimŋi karöbut ahöi Efesus sitinöŋ maliga tosatŋan Korintnöhök kaba sutŋine lömböt asuhuyöhi, miangö buzupŋi jigetka mörök. Lömböt tosatŋi kewö: Urumeleŋ kambu yeŋön deŋda simbisembel malget (1.10-4.21), serowilin laŋ aket (5.1-13), awanöm malmalgö könaŋan sohayök (Boŋ 7), tandö lopiongö bau nenegö goranora aket (Boŋ 8), semön töröŋi nenegö enjololöŋ aket (11.17-34), zioz malmalgö areŋ qahö wuatangöba ilingösöŋ malget, kantri tosatŋangö keuŋi keuŋi aongit aka jiget (12-14). Tosatŋan keu kewö jiget: “Kömugeri, yeŋön kunbuk qahö wahötme.” (15.12-33) Korint yeŋön kimbi kun mewöyök ohogetka Polgöreŋ kayöhi, miangöreŋ qeqesi tosatŋi al wangiget, (mi 7.1; 8.1; 12.1; 16.1 miangöreŋ oyoŋman).

Polnöŋ qeqesiŋini mi melenŋa lömbötŋinangö qambaŋ keu engiba kimbi ki ohoyök. Urukalemgö keu (Boŋ 13 mi qetpuk sorokŋi. Könaŋep nanŋak Korint anda engekmanngö keuŋi jiba ohoyök (16.5-7).

Buk kiangö bahöŋi bohonŋi 8 mi kewö:

Jim-asa-asari keu 1.1-9

Deŋda kambuŋi kambuŋi malget 1.10-4.21

Serowilin aka awanöm malmal 5.1-7.40

Urumelengö aka urumelengö kopa malmal 8.1-11.1

Urumeleŋ malmal aka möpömöpöse areŋ 11.2-14.40

Kraist aka körek neŋön kömupnöhök wahötpin 15.1-58

Judia urumeleŋ kambu yeŋgöra naluk alget 16.1-4

Polgö areŋi aka yaizökzök keuŋi teteköŋi 16.5-24

1 Kraist Jisösnöŋ Pol ni noholiga Anutugö jitŋangö dop melaimelai azi aposol akzal. Nöŋön urumeleŋ alani Sostenes yambuk tatzit.

² *Anutugörej könagesö Korint sitinöj maljei, nöjön embuk Buja keu eraum mötpingöra kazal. Kraist Jisösnöj injini engoholiga yambuk qekötahögetka tök kutum engiiga saraknji akze. Mewöyök ambazip denike yenjön gölme dop Kembunini Jisös Kraistkö qetnji qeta köulukögetka i aka nini mohok kembu ak nenjimakzawi, mönö körek engöra Buja Kimbi ki ohozit.

³ Anutu Iwinini aka Kembu Jisös Kraist yetkön mönö kalem möriam engiyohotka luainöj malme. Mewö.

Polnöj Korint yengöra Anutu kewö möpöseiza:

⁴ Injini Kraist Jisösbuk qekötahöba kingetka Anutunöj kalem möriamnji engiyöhi, miangöra mönö nalö dop engöra Anutuni saiwap jiba möpöseimakzal. ⁵ Injini Kraistpuk qekötahöba kingetka nup memegö mötmöt kalemnji kelenmalelej engiiga mötmöt könaji könaji buja qem anguba ölop Buja keugö könaji pakpak jimakze.

⁶ Nini Kraistkö könaji nanjöba jingga keu miangö ölnjan ahuba köhöii kinjeangö dop mötmöt kalem pakpak mi engiyök. Miangöra Anutu möpöseimakzal. ⁷ Miangöra nup memegö mötmöt kalem kungöra qahö osiba kinda Kembunini Jisös Kraistnöj kunbuk asuhumapköra mambörakze.

⁸ Kembunini Jisös Kraistnöj mem köhöim engiiga nalö teteköje aukje asuhumawi, nalö miangörej injini solanji aka keunji qahö kinda i ekje. ⁹ Anutunöj keunji törörök wuatangöba bauköm engimaknja. Yanjön injini nanji Nahönji Jisös Kraist Kembuninambuk toroqeba malmegöra engoholök. Mewö.

Könagesöjnan denja kambunji kambunji ala kinje.

¹⁰ O urumelenj alaurupni, nöjön Kembunini Jisös Kraistkö qetje kewö uru kunjum engizal: Injini mönö körekjanök urumohot aka sutnjine jujul kude aka malmemö, urunjini mindirigetka mohot aiga mötmöt mohot wuatangöba malme. ¹¹ O urumelenj alaurupni, injini sutnjine angururuk gwötpuk aka maljei, miangö buzup keunji ambi Kloegö saiwaurup tosatjan mönö jigetka möral.

¹² *Kewögöra mi jizal: Engörejök tosatjan kewö jimakze, “Nejön Polgö keunji wuatangömakzin.” Tosatjan “Nejön Apologö keunji wuatangömakzin,” jimakze. Toroqeba tosatjan kewö jimakze, “Nejön Pitögö keunji wuatangömakzin.” Dumje kunbuk tosatjan kewö jimakze, “Nejön mönö Kraistkö keunji wuatangömakzin.” ¹³ Kraistnöj jula gwötpuk ahök me? Pol nöjön mönö engöra aka maripomnöj kömuyal me? Pol nöngö qetne o melun mem engiget me? Mewö möt sohobepuk?

14 *Nöjön engörejök Gaius aka Krispus o melun mem etkialmö, tosatñi mi qahö mem engialangöra “Anutu saiwap!” jizal. 15 Mianğöra “Polgö qetñe o melun mem nenjiget,” kunñan keu omani mewö jibapuk.

16 *O ölña, Stefanas aka yağö saiwaurupñi mi mewöyök o melun mem engialmö, yeğö andöñine kun o melun mem wañjal me qahöpto, mi törörök qahö mötzal. 17 Kraistnöñ ni ambazip o melun mem engimangöra aka qahö melaim niñgiyökmö, Ölöwak Buña jim sehimangöra jiiga anda kamakzal. Kraistnöñ neğöra aka maripomnöñ kömuyöhi, nup mianğö ösumñan eta omani akapuk. Mianğöra Buña keu mi gölme azigö mötkutukutu qakñe lañ qahö jimakzal. Mewö.

Kraistnöñ Anutugö kukösumñi aka mötmöt areñi indelök.

18 Ambazip könöp siagö buñaya akñei, yeñön maripomñangö Buña keuñi möta mianğöra mötket uruqahö keuya akza. Mewö akzapmö, Suepkö buñaya akzini, neğöra keu mianğön mönö Anutugö kukösumñi indeli mörakzin.

19 *Mianğö keuñi Buña Kimbinöñ kewö ohoget ahöza, “Nöjön mötmöt ambazip mötkutukutuñini köndenbiga sohoma. ‘Möt asarim yakömakzin,’ jimakzei, yeğö mötmötñini mönö mem sohobiga söroraua omani akña.”

20 *Mötkutukutu ambazip ölñi mi denike malje? Buk oyoñda mötmötkö könañi miwikñaigeri, mi denike? Gölmönöñ jitanakölikö böhi aka keu melenqelenđa jimakzei, mi mönö ölña qetpuk akze me? Gölmönöñ mötkutukutu ketañi ahözawi, Anutunöñ mönö mi mem kaheüiga (sahahaüiga) uruqahö mötmöra akza. Keu mi ölña.

21 Anutunöñ nannñi mötkutukutuñangö dop gölmönöñ malmalgö areñi alökmö, ambazipnöñ nannñini mötkutukutuñine nañgöba mewö mianğön Anutugö könañi möt kutubingö osiba tönpin malget. Osiba mala Kraistnöñ maripomnöñ kömuyöhi, mianğöra “Uruqahö keuya!” jiba mötketmö, Anutunöñ Buña keu mi neñön jim sehibingöra jiyök. Mi jim asariinga denike yeñön uruñini melenđa möt narizei, mi dom-amöt qem engimangö möri dop kölök. 22 Juda yeñön aiwesök aňgöletot asuhumegöra kapan kölakzemö, Grik kantri yeñön mötkutukutuñinan sehimapköra jarumakze.

23 Mi jarumakzemö, neñön Kraist maripomnöñ qeget kömuyöhañgö Buña keuñi jim sehimakzin. Juda yeñön keu mi mötketka uruñini bölüiga mianğöreñ qaköba uruñini qahö melenmakze. Kian kantri yeñön mianğöra mötketka uruqahö keuya akza.

* 1:14: Apo 18.8; 19.29; Rom 16.23 * 1:16: 1 Kor 16.15 * 1:19: Ais 29.14

* 1:20: Job 12.17; Ais 19.12; 33.18; 44.25

24 Gwötpukñan mewö mötzemö, Anutunöñ neñgoholi urunini melenjini, neñgöra Kraistnöñ mönö Anutugö mötkutukutuñi indela Anutugö kukösumñi neñgimakza. Juda me kantri tosatñi akzini, mi töndup Kraistpuk qekötahöba kinda mohot akzin.

25 Ambazip neñgö mötkutukutunini aka ösumnini mi eretñi. Anutunöñ uruqahö akawak, mianñon mönö töndup ambazip mötkutukutunini onjita öngöñgöñi ketanji akawak. Anutunöñ lölöwöröñi akawak, mianñon mönö töndup ambazip ösumnini onjita köhöikñi kötökñi akawak.

26 Urumelenj alaurupni, nanñini könañini denöwö ahöiga Anutunöñ engoholöhi, mi mötmöriget? Injini gwötpukñan gölmegö mötkutukutu ketanji qahö memba malget. Gwötpukñan kukösum qakñe sukinapñinambuk qahö malget. Iwiurupñini gwötpukñan qetbuñanambuk qahö malget.

27 Mewö qahöpmö, gölme ambazipnöñ engöra mötketka uruqahö ambazip omanji akzei, Anutunöñ mönö injini mewöñi möwölöhöm engiyök. Gölmegö mötmöt ambazip ipñi mi gamu qem engiyök. Gölme ambazipnöñ engöra mötketka lölöwöröñi akzei, Anutunöñ mönö injini mewöñi möwölöhöm engiyök. Gölmegö kukösum ambazip ipñi mi gamu qem engiyök.

28 Gölme ambazipnöñ jijiwilit ak engiba könañinanğöra mötketka etqeqeñi akzei, Anutunöñ mönö injini mewöñi möwölöhöm engiyök. Gölmeneñ yuai akzei, yengö qetbuñanini mem solanii qahöwakñapköra yuai kun qahö akzei, mönö mi möwölöhöm engiyök.

29 Kunöñ Anutugö jemesoholñe silenji memba öngöbapuköra mönö mewö meköba möwölöhöm engiyök. 30 Anutunöñ nam köl engiba enjuañgiriga Kraist Jisösbuk qekötahöba mal köhöimakze. Yañon Anutugö mötkutukutuñi qainñi kun indeli mörakzin. Kraistnöñ sohohnini memba keunini jim teköi solaniba maljin aka tök kutum neñgiiga sarakñi akzin.

31 *Buñ Kimbinöñ keu kewö ohoget ahöza, “Kunñan silenji memba öngömawi, yañon mönö Kembu möt wañgizawañğöra aka silenji mem öngöma.” Keu mianğö dop ahinga dop kölma. Mewö.

2

Kraist maripomnöñ kömuyöhanğö keuñi jial.

1 Urumelenj alaurupni, nöñon engöreñ kaba Anutugö könañi nañgöba jim asarim enjiali, mi keuni nahöm sorokñambuk akñapköra qahö jiba malal me gölmegö mötkutukutu öngöñgöñi kondela mianñon silenji qahö memba öngöba malal. 2 Nöñon engö sutñine mötmöt murutñi pampakğorañe ala Jisös Kraistkö

* 1:31: Jer 9.24

keuŋi aka maripomnöŋ kömuyöhanğö könaŋi miyök möt kutuba mi jim sehimamğö keu jöhöyal.

³ *Keu mewö jöhöba engören kayali, nalö miangören azi lölöwöröŋi aka jönömni gwötpuk undui kenğöt qakŋe malal. ⁴ Nöŋön Buŋa keu jim asarim engiali, mi mötkutukutu ketanğö kelök keuŋi qahö jiba malal. Mi qahöpmö, Uŋa Töröŋan sölölohöm engii ösum-mumuŋan uruŋine inahömapköra kapan köla jiba malal. ⁵ Gölme ambazipkö mötkutukutuŋinan qahöpmö, Anutugö kukösumŋan nam köl engiiga möt narimeğöra kapan köla malal. Mewö.

Uŋa Töröŋanğö mötkutukutu mi qainŋi kun.

⁶ Nöŋön töndup urumelen alaurup aködamunŋinambuk maljei, yeŋğö sutŋine tatpiga Anutugö mötkutukutuŋi gegeni mi ölop eraum mörakzin. Gölmeğö mötkutukutuŋi mi qahö eraum mörakzin. Gölmeŋi gölmeŋi galöm köl engiba malgetka kukösumŋinan qahöwakŋawi, yeŋğö mötkutukutuŋini mi mewöyök qahö eraum mörakzin.

⁷ Mi qahöpmö, Anutugö mötkutukutu tölapŋi mönö mi eraum mörakzin. Anutunöŋ Suep gölme qahö miwikŋaim etkiiga miangören mönöwök qelŋe lök areŋi kewö ala jöhöyök, “Ambazipnöŋ bian ahuba aködamun miwikŋaiba oyaenŋkoyaen akŋegöra mönö mötkutukutuni qainŋi kun mi engimam.” Mewö jiba tölapŋe ali ahöyök. ⁸ Gölmeğö azi kembuŋi kembuŋi mala kotkeri, yeŋğörenök kunŋan mönö mötkutukutu mi qahö möt kutuyök. Mi möt kutubeak ewö, Kembunini asakmararaŋambuk i mönö maripomnöŋ qahö qegetka kömumbawak. ⁹ *Mötkutukutu qainŋi kun miangöra keu kewö ohoget ahöza,

“Kunŋan yuai mi je kezapŋan qahö eka mörök. Miangö mötmötŋan kungö uruŋe qahö asuhui mörökmö, ambazip Anutu uruŋinan jöpaköm waŋgimakzei, yeŋğöra mi mönö mözözömgöiga jöjöröba ahöza.”

¹⁰ Gölme ambazip yuai mi qahö möta jipjap malgetmö, Anutunöŋ mi mönö Uŋaŋi melaiiga neŋğöra indeli mörin. Yaŋön keu pakpakö könaŋi jaruba miwikŋaimakza. Anutugö mötmöt gegeni mewöyök möt teközawaŋön mönö mi sölölohöm neŋgiiga mörin.

¹¹ Kungö uruŋi kunöŋ qahö mötza. Uruŋanğö uŋaŋi yaŋönök mönö mi möt yaköza. Mewöŋanök Anutugö uruŋi mi kunŋan qahö mötzapmö, Anutu nanŋi Uŋaŋi Töröŋi yaŋönök mi möt yaköza. ¹² Neŋön gölmeğö ahakmeme bölöŋanğö ömeŋi kun qahö buŋa qem anğuinmö, Anutunöŋ yuai kalem neŋgiyöhi,

mianḡö kōnaŋi mötpingōra mōnō nanŋi Uŋaŋi melaii urunine geiga maljin.

¹³ Mianḡö kōnaŋi gegeni tokoba eraum mōrakzin. Gölme ambazipnōŋ mötkutukutuŋinanḡö qakŋe keu kusum nenḡigetka mianḡö dop mi qahō eraum mōrakzin. Mewō qahōpmō, Uŋa Tōrōŋan keu kusum nenḡiyōhi, mianḡö dop mōnō urugō keu ölni kewōringa sölölöhöm nenḡii jim asarimakzin. ¹⁴ Uŋa Tōrōŋan sölölöhöm nenḡiiga keu mi mewō kewōtzin ewō, kōnaŋi mōnō miwikŋaiba möt asaribinanḡö dop akza. Mianḡōra Uŋa Tōrōŋan denike yeḡō uruŋine qahō mali öne laŋ maljei, yeŋōn Anutu Uŋaŋanḡö buŋaŋi mi möt anḡōn kölbingō osimakze. Yeŋōn Buŋa mianḡōra mötketka uruqahō keu tandök aiga kōnaŋi möt asaribingō osize.

¹⁵ Yeŋōn osizemō, Uŋa Tōrōŋan sölölöhöm nenḡiza ewō, mōnō keu pakpakō kōnaŋi kewōta jim tekōbinanḡö dop akzin. Mewō akzinmō, urumelen ambazip kungō kōnaŋamŋi mi gölme ambazip körekŋan törörök jim tekōbingō osimakze.

¹⁶ *Mianḡö kōnaŋi mi Buŋa Kimbinōŋ kewō ohoget ahōza, “Kembugō urumōtmōtŋi mi azi kunŋan kun qahō mörök. Mianḡōra kunŋan i goro qambaŋ waŋgimawaŋḡö dop qahō.” Kunŋan mi qahō mörökmō, nenḡōn Kraistkō urumōtmōtŋi memba maljin. Mewō.

3

Anutugō nup meme ambazip

¹ O urumelen alaurupni, iŋini namande ewō Kraistpuk qekōtahōba kinget. Mianḡōra nōŋōn iŋini gölmegō ahakmeme mötōteimakzeanḡö tandök malgetka Buŋa keu mi jim asarim enḡiba sutŋine malal. Uŋa Tōrōŋan sölölöhöm enḡii maljeanḡö tandök ewō enḡōra jimamḡö osiba malal. ² *Nōŋōn keu möt asarimeanḡö dop juzu oŋi ewō gumohom enḡiba malal. Nene ölni nemingō dop qahō akeranḡōra keu gegeni mi qahō enḡial. Nalō mianḡōren nene ölni nemingō osiget aka nalō kewōŋe mewōyök mi ölöp qahō nemakze.

³ Iŋini toroqeba gölmegō ahakmeme bölōŋi mötōteiba malje. Iŋini urunōŋ mututqutut möta anḡururuk aka keu jijinōŋ nonḡitnōŋ gonḡitpi ahakze. Mewō aketka uru silegō sihim kömbōnaŋini bölōŋan galöm köl enḡiiga urumelenḡö kopa ambazip omani yeḡō tandök ahakze. ⁴ *Tosatŋi iŋini kewō jimakze, “Nini Polgō keuŋi wuatāḡōmakzin.” Tosatŋan kewō jimakze, “Nini Apologō keuŋi wuatāḡōmakzin.” Mewō mewō jiba mōnō gölme ambazip omanan ahakzeanḡö tandök aka malje.

* 2:16: Ais 40.13 * 3:2: Hib 5.12-13 * 3:4: 1 Kor 1.12

⁵ Apolosnõj niñia akza aka Pol nõjõn niñia akzal? Niri mõnõ Anutugõ nuwa memba maljit. Kembunõj nanjik nanjik netkõra nup netkiyõhi, mianğõ dop baukõm engiziga uruñini melenđa Kembu mõt nariba malje.

⁶ *Nõjõn kötji kõmõtpiga Apolosnõj o memba kaba mianğõreñ mokoyõkmõ, Anutunõj mõnõ meiga tõhõtmõriam asuhuyõk. ⁷ Mianğõra kõmõrõhi, yañõn qetñambuk qahõ akza. O mokoyõhi, yañõn mewõyõk qetñambuk qahõ akzadmõ, Anutunõj kötuetkõiga tõhõtmõriamñi kota qarimakzei, yañõnõk mõnõ qetbuñañambuk akza. ⁸ Mewõ akzadmõ, kõmõrakzali aka o mokomakzawi, netkõn mõnõ dop mohot akzit. Mohot akzitmõ, mi tõndup tõwaniri mi mõnõ nupniri memakzirañğõ dop nanjõk nanjõk membit.

⁹ Netkõn Anutugõ nup neñakyahõtñi aka yambuk nup memakzit. Engõ uruñini mi Anutugõ arõ ewõ aiga kõlkõmõt nupñi mianğõreñ memakza. Anutunõj miri ewõ uruñini inahõba mindirim engiiga kõhõiba wahõrakze. ¹⁰ Anutunõj kalem mõriam niñgiyõhi, nõjõn mianğõ dop miri memegõ mõtmõt azi ewõ aka Anutugõ tandõ kõmbõnanñi uruñine kuñguba kõmõtpiga kunõj mianğõ qakñe miri memakza. Ölp memakzadmõ, mohot mohot neñõn mirigõ nupñi ölpñanõk membinanğõ dop akzin. Ek kutuba membingõra mõnõ je galõm mem anğubin. ¹¹ Urugõ tandõñi mi Jisõs Kraist. Nõjõn mi lõk uruñine kõmõtpiga kuñjan mõtnaripkõ tandõ kun mi-wikñaimanğõ osima.

¹² Tandõ mohot akzadmõ, mianğõ qakñe tosatñan miriñini goul silwõnõj me köt õlñinambuk tosatñi mianjõn memakze. Tosatñan miriñini ip kõsõnõj, tõmbõ bohom sinñan me señgwenõj memakze. Siliknini mewõ me mewõ memakzin ewõ, ¹³ urugõ nupninanğõ õlñan mõnõ inanñõk inanñõk aukñe asuhuma. Kembunõj nalõñan kam kuñguiga mianğõreñ mõnõ mirigõ esuñi luluñma. Miri esuninan mõnõ Anutugõ kõnõp bõlamñan asuhuiga jeba eriga õlñan aukñe ekingõ dop akña. Kõnõp mianjõn mõnõ mohot mohot neñğõ mirininanğõ tandõkñi õlñi mi esapesapnõj ala kewõtma.

¹⁴ Kõnõpnõj jeba miri pakpak kewõt engiiga megetka õlñinan kõhõiba kinme ewõ, yeñõn mõnõ nupñinanğõ tõwanñi buña qem anğume. ¹⁵ Tosatñan miriñini megetka õlñinan jeba etme ewõ, yeñõn mõnõ tõwa qahõpmõ, geñmororõj miwikñaima. Mi miwikñaimemõ, nanñinak tõndup Suepkõ buñaya malme. Kõnõp bõlamnõj jem engõhoiga mianğõ tandõk õñgitpingõ jaram tiba kõk alal ewõ aketka Anutunõj mekõm engiiga Suepnõj õñğõme.

* 3:6: Apo 18.4–11.24-28

16 *Nanjinak Anutugö Buña jike (tempöl) aketka Anutugö Uñañan uruñine maljawi, mi mötze me qahö? 17 Anutugö Buña jikenji mi kömbukñi akzawi, mianğö dop enjon sarakñi akze. Mianğöra kunñan Anutugö jike mem böliza ewö, Anutunöñ mönö i nanji mem bölim wañgima.

18 Kunñan nanji gölmegö mötmötñi wuatangöba tilipköm angubapuk. Engö sutñine kunñan nanñangöra möri “Gölmegö mötkutukutu öngöngöñi memba maljal,” jiza ewö, yañon mönö mutuk uruqahö aka mewö mianjon mötkutukutu öñji mi-wikñajabawak.

19 *Anutunöñ gölmegö mötkutukutu öngöngöñi mianğöra möri uruqahö keuya akza. Mianğö keunji Buña Kimbinöñ kewö ohoget ahöza, “Anutunöñ mötkutukutu öngöngöñi memba maljei, mi gwaröhöm engiiga nanjini mötmöt imbi-imbinöñ supapköba qaköme.” 20 *Mianğö keunji kun kewö ahöza, “Kembunöñ mötkutukutu ambazip yengö mötmöt arenjanğöra möri omani akza.” 21 Mianğöra engöreñök kunñan mönö ambazip neñğöra aka silenji memba wahötpapuk. Körek neñon mönö engö buñaya akzin.

22 Pol, Apolos, Pitö* neñon mönö engö buñaya akzin. Ambazip gölme dop maljini, neñon mönö körek engö buñaya akzin. Mianğöra ölop keu mi me mi kewöta memba mewö mianjon malmalñini malme aka kömupñini kömume. Nalö kewöñe maljini, körek neñon mönö engö buñaya akzin aka könanjep nup meme ambazip malmei, yenon mönö mewöyök engö buñaya akñe. 23 Mewö ak engizinmö, enon Kraistkö buñaya aketka Kraistnöñ Anutugö buñaji akza. Mewö.

4

Nini Kraistkö aposolurupñi akzin.

1 Mianğöra ambazip körekñan mönö neñğöra kewö mötketka dop kölma: Kraistnöñ jim kutum neñgiiga nupñi memakzin. Anutunöñ keunji tölapñi neñgiiga buñanini aiga galöm kölakzin. Neñon miri galömñangö tandök ewö akzin. 2 Galöm yengö toñinan miri yuainji galöm kölmegöra böröñine aljawi, yañon mönö keu bohonji kewö kapañ köla jim kutum engimakza, “Nupñini mönö misila pöndañ memba malme. Memburik-qemburik kude akñe. Mewö miwikñaim engibiga dop kölma.” 3 Korint enjon me gölmegö keu jake kungö galömñan ni kewöta jim teköm niñgibeak ewö, nöñon mönö keu mianğöra mötpi eretñi kötökñi akza. Nanak mewöyök nani keuni qahö jim teközal. 4 Uruni kewöta keu kun qahö mötpiga mem lömbörim niñgizapmö, mianğöra töndup solanji qahö akzal.

* 3:16: 1 Kor 6.19; 2 Kor 6.16 * 3:19: Job 5.13 * 3:20: Sum 94.11 * 3:22: Pitö qetñi alanji Sifas

Ambazipnön qahöpmö, Kembunön mönö nönjö keuni kewöta jim teköm ninjimakza.

⁵ Mianğöra injini mönö nalö kewöje kungö keunji kun mi kude jim teköme. Kembunön nalöni ali kam kuᅅgumapköra mönö mambötme. Mamböta malgetka mianğöreᅅ kaba keu yuai ömukᅅe asambötket ahözawi, mi mönö asakᅅan indeliga aukᅅe asuhuma. Yanön kaba ambazip urunini mem asariiga könaᅅamnini ölnᅅan aukᅅe ekᅅamgö dop akᅅa. Könaᅅamnini ölnᅅi eka mohot mohot kewöt neᅅgiiga Anutunön mönö mianğö dop nalö mianğöreᅅ möpöseim neᅅgibawak.

⁶ O urumelenᅅ alaurupni, injini jula jakbak-öranᅅöranᅅ aka laᅅ likeplikep aröᅅda kinda qetal anᅅumakze. Mewö mal-bepuköra mönö Apolos niri mötmörim netkiba nanᅅini imbi-imbisöta keu kianğö könaᅅi mötme, “Buᅅa keu ohoget ahözawi, mi mönö kude oᅅgitme.” Keu mi mötket uruᅅine ahöi tem kölgetka ölöwakᅅegöra mönö kösohotniri mewö ohozal. Mi nani aka Apolos netkö könaᅅamniri kewöta mötmöriba möt asarimegöra ohozal. Jujulᅅinan mewö teköma.

⁷ Gölmegö kunᅅan mönö qahö mem letot gihiiga tosatᅅi enᅅoᅅgita qainᅅi kun akanak me qahö? Mi qahö. Yuai pak-pak ahöm gihizawi, mi mönö Anutunön kalem gihiiga buᅅa qem anᅅunön me qahö? Mi kalema buᅅa qem anᅅunön ewö, mönö wuanönğöra kalem qahöpko tandök ewö silegi memba öᅅgömakzan? Mi qahö dop kölja.

⁸ Yuai pakpak memba malbingö sihimᅅi mötzei, mi mönö lök ahöm enᅅim teköza. Anutunön Suep köweᅅeyök kalemᅅi kalemᅅi mokom enᅅiiga lök simbawoᅅ akze. Neᅅön qahö bauköm enᅅiiga nanᅅinak töndup mötnariᅅkö azi kembu tandök akze. Nanᅅinaᅅgöra mewö mötmörim anᅅuze. O enᅅön ölnᅅa kiᅅ aketka dop kölbawak. Mewö aketka neᅅön mönö mewöyök azi kembu-urupᅅini aka enᅅö qöhöröᅅine ölop silenini memba öᅅgöba aiweliköm anᅅubinak. Nönᅅön mewö akingö sihimᅅi mötzal.

⁹ Nönᅅön mewö mötzalmö, nanini könaᅅamnini eki tandök kewö akza: Anutunön aposol nini al neᅅgiiga ambazip jeᅅine etqeqeᅅi töhöᅅn aka maljin. Ambazip enᅅuget kömumegö jim tekögeraᅅö tandök aukᅅe anda kainga laᅅ qeta gamu qem neᅅjimakze. Yuai ehekᅅi qainᅅi kun ahinga gölme dop miengö toᅅi aka Suep jakeᅅi jakeᅅi miengö pom garataᅅi mienᅅön mönö jeᅅinan neᅅgek kutuba neᅅgehimakze.

¹⁰ Kraistköra aka uruni sohoi maljali, nönğöra mewö jimakzemö, enᅅön Kraistpuk kinda mötmöt ambazip aködahunᅅinambuk akzeanğö tandök akze. Nönᅅön lölöwöröᅅi akzalmö, enᅅön “Ambazip köhöikᅅi akzin,” jize. Ambazipnön injini göda qem enᅅjimakzemö, nönğöra mötket eriga jijiwilit

ak niŋgimakze. ¹¹ Nalö dölkwöŋe mewöyök nenegö kömumba ogöra ak neŋgiiga opo walŋi jujuratŋi löŋgöta malinga bimnöŋ laŋ neŋgugetka dum mirinini qahö mala toroqeba anda kamakzin.

¹² *Nanini börönninan sileqeŋe tandök nup memakzin. Ambazipnöŋ laŋ qesuahöm neŋgimakzemö, neŋön mönö kötuatköm eŋgiba yeŋgöra köulukömakzin. Sesewerowero ak neŋgimakzemö, neŋön mönö mi möta mökösoŋda kapaŋ köla maljin. ¹³ Uruqeŋe keu töhöreŋ jim neŋgimakzemö, neŋön mönö guŋböŋjönjön qakŋe ösoŋnöŋ melenmakzin. Neŋön gölmegö nesak lömŋaŋgö tandök ewö ahinga gölmeŋi gölmeŋi yeŋön sisitnini memba andö qem neŋgimakze. Mewö mala kota nalö dölkwöŋe mewö toroqeba maljin.

¹⁴ Gamu qem eŋgimangöra keu ki qahö ohozalmö, wölböt nahön böraturupni ewö mönö goro qambaŋ eŋgimangö mötzal. ¹⁵ Mötnaripkö böhi 10.000 yeŋön Kraistpuk qekötahöba köyan köla kusum eŋgibeak ewö, mi töndup nöŋön mönö Kraist Jisösbuk qekötahöba Ölöwak Buŋa jim asariba iwiŋini akiga uruŋini melenget. Miangöra iwiurupŋini gwötpuk qahö malje.

¹⁶ *Miangöra uruŋini kewö kuŋgum eŋgizal: Nöŋön silik ahakzali, miangö dop eŋön mönö nöŋgö silikni mi wuataŋgöba malme. ¹⁷ Nöŋön silikni Kraist Jisösbuk qekötahöba aka memba gölmeŋi gölmeŋi liliköba urumelen könagesö dop kusum eŋgimakzali, miangöra mönö ölum eŋgubapuk. Nöŋön miangöra aka wölböt nahöni Timoti melaibiga eŋgöreŋ kama. Yaŋön nömbuk pöndaŋ mala Kembubuk qekötahöba kinda kaba könaŋamni jiba köl gulim eŋgima.

¹⁸ Eŋgöreŋök tosatŋan nöŋön eŋgöreŋ qahö kabilenak ewö möta sileŋini möpöseiba jakbak-oraŋböraŋ aka laŋ malje. ¹⁹ Mewö maljemö, Kembunöŋ sihimŋan ni kamangö mötma ewö, mönö ösumök eŋgöreŋ kamam. Kamami, nalö miangöreŋ jakbak-oraŋböraŋ ambazip yeŋgö kukösumŋinaŋgöra qesim eŋgibiga jim miwikŋaigetka mötmam. Sileŋini memba wahöta keu ketaŋi ketaŋi laŋ jimakzei, mianön nöŋgöreŋ eretŋi akza. ²⁰ Anutugö bemtohoŋ mi keuyök jijigö yuaia qahöpö, ölni mi Anutugö kukösum. Mianön mönö nam köl neŋgiza.

²¹ Miangöra uruŋini qahö melenŋa laŋ malme ewö, nöŋön mönö kömbin memba kaba keunöŋ eŋgohotirimam. Uruŋini melenme ewö, mönö urubönjön qakŋe urukalem ak eŋgimangöra kamam? Keu yahöt mi kewöta nöŋgöra sihimŋini denöwö mötzei, mi möt kewöta jime. Mewö.

5

Kunöŋ serowilin ahöhi, i mönö sutŋineyök közölme.

* 4:12: Apo 18.3 * 4:16: 1 Kor 11.1; Fil 3.17

1 *Keu kun kewö jigetka nöngö kezapne geyök: Tosatñan urumelenj könagesö sutñine serowilin ahakze. Kunñan iwiñangö anömñi memba malja. Serowilin mewöñi mi urumelenjöp kopa ambazip yengö sutñine mewöyök kun qahö ahöza. 2 Kunñan mewö aiga injini töndup silenini memba öngöba lañ jakbak-örañbörañ ahakze. Mi qahö dop köljapmö, silikñangö wösöbiriknön mönö mem kömum engiiga dop kölbawak. Mewö aka ölop azi siñgisöndok mewö ahöhi, i mönö sutñineyök közölgetka yaigep etma. I denöwö aka qahö közöljeye?

3 Nöñön ölna engörenök köröwen malbi sileni qahö nehakzemö, töndup uñanan mönö embuk maljal. Kunñan ahakmeme kanjamñambuk ahöhi, nöñön lök yangö keunji kewöta sutñine maljalangö tandök möta jim teköba kewö jizal: 4 Injini mönö Kembunini Jisösgö qetñe totoko algetka nöngö uñanan embuk toroqeiga Kembunini Jisösgö kukösumñan nam kölj engiiga örörönj kinda keunji jiba mönö kewö jöhöme: 5 Satanönj silenangö sihim kömbönañi bölönj qei etmapköra mönö andö qem wañgiba yangö böröñe algetka mindiñgöm wañgima. Mindingöm wañgiiga löwöriba urunji melenji Anutunönj amöt qem wañgiba Kembugö nalöñe uñañi meköiga Suepkö buñaya akawak.

6 *Silenini memba öngömakzei, mi ölopñi qahö. Injini keu yahöt ki möt yaköze, “Yist kitipñi morönj obuk mindiriba plauanönj alinga mem qariiga dis kokolak qemakza. Mewöyök bau wösö kömbukñan tiñgirakzawi, mianön mönö busu pakpak mem bölimakza.”

7 *Keu miangö dop injini lök plaua dis sarakñi ewö aketmö, siñgisöndokö yistñi kun mi ket ewö sutñine kañgota engöhömakza. Körek bölibepuköra mönö yistñini walñi mi kewöt uteköme. Azi mi wösö kömbuk ewö közöla mönö dumñe kunbuk yambu jeniqeqe dölökñangö plaua dis sarakñi ewö aka malme. Ak-kömukömu kendon nalöñe lama jöwöwöl ohoba beret yistñi qahö nemakzei, miangö dop Kraistnönj nanine ak-kömukömu lamanini aiga lök qeget kömuyök. Miangöra injini ölop plaua dis sarakñi yistñi qahö ewö akñe aka kunbuk oyaenköyaen urunje kañgota malme.

8 *Kraist kömuyöhanğöra mönö sösöñgai kendon aka malbin. Yist me wösö kömbukñi mi ahakmeme bölönj inğonmanğonambuk. Mianğö qakñe mönö sösöñgai kendon kude akin. Mianğöra mönö geñmoñ mosöta keu ölnj wuatangöba beret yistñi qahö ewö aka miangö qakñe sösöñgai kendon aka malbin.

* 5:1: Dut 22.30 * 5:6: Gal 5.9 * 5:7: Eks 12.5 * 5:8: Eks 13.7; Dut 16.3

⁹ Nöjön Buja Kimbi ohom engiba kewö jial: Injini serowilin ahakzei, yembuk mönö kude köisirik tata eraum mötme. ¹⁰ Gölmenöj uruñini qahö melenja ahakmeme bölöñi ahakzei, yengöra keu mi qahö ohoyal. Yenön serowilin aka yuaigö nepaqepalok membagan mendingö köpösöngömakze. Yuai kalöpköba yongorö memakze aka tandö lopion waikñini memba möpöseim engimakze. Yengöra aka mewö ohom engibileñak ewö, injini mönö gölmenöj malbingö osibeak.

¹¹ Yengöra aka qahöpmö, könani kewögöra keu mi ohom engial: Kunjan nanñi qetñi urumelen ala jiba töndup serowilin akza me yuaigö nepaqepalok membagan memangö kösösöngömakza me tandö lopion waikñi memba möpöseimakzawi, yambuk mönö kude köisirik tata eraum mötme. Mötnarip kambu engö sutñine kunjan mepaqepaik ahakza me o köhöikñi nempa enjololon ahakza me yuai kalöpköba yongorö memakza ewö, yambuk tata nene kun kude neme.

¹² Yaigep maljei, nöjön yengö keuñini qahö jim tekömakzal. Mi nöngören nuwa qahö. Injini mewöyök könagesö pakpakö keuñini qahöpmö, uruñini melenja sel uruñe maljei, mönö yengö keuñini miyök kewöta jim tekömakze. ¹³ *Yaigep lan maljei, Anutunöj mönö yengö keuñini kewöta jim teköma. Miangöra mönö Buja keu kiangö dop akñe, “Azi bölöñi mi mönö sutñineyök közölme.” Mewö.

6

Urumelen alanini mi yaigep yengö keu jakeñe kude alme.

¹ Urumelen ambazip sutñine kunjan alan keu jakeñe almangö mötza ewö, yanön Anutugö ambazip sarakñi engongita ambazip gongonji yengö jenine aniga qahö dop kölja. Qahö! Urumelenjö kopa ambazip bauköm wanjimegöra qesim enjiiga gamuñambuk akza. ² Anutugö ambazip sarakñi nenön kantriji kantriji yengö keuñini kewöta jim teköbini, mi lök mötze. Injini gölme pakpak yengö keuñini jim teköbingö dop akze ewö, mönö denöwö aka keu morömorö kewöta jim tekömeanjö dop qahö akze? Injini mönö ölna mianjö dop akze. ³ Urumelen ambazip nenön Suep garataurup yengö keuñini kewöta jim teköbini, mi lök mötze. Mianjö dop akzin ewö, gölmenöj malmalgö keuñi mi mönö amqeba kewöta ölop jim tekömakin.

⁴ Miangöra gölmenöj malmalgö keuñi sutñine asuhumakzawi, keuñini mi mönö wuanöngöra silene yengö keu jakeñe öngöba jim tekömegö qesim engimakze? Urumelenjö kopa ambazip sutñine jijiwilit ak engimakzei,

* 5:13: Dut 13.5; 17.7

yeŋgöra töndup keu nalöŋe mötketka öŋgömakza. Mi qahö dop kölja.

⁵ Keu mi gamu qem eŋgimangöra jizal. Mötnarip ambazip eŋgö sutŋine keu ahözawi, eŋgöreŋök kungö mötkutukutuŋi dop kölīga keu mi ölöp jim tekömawaŋgö dop akza me qahö? Mönö ölöp sutŋineyök azi mewöŋi miwikŋaime. ⁶ Qahö tandök aiga urumelen ala kunöŋ alaŋi silene yeŋgö keu jakeŋe alakza. Mewö ala ambazip Anutu qahö möt narizei, mönö yeŋgö jeŋine anda keu nupköra qesim eŋgimakza. Mi qahö dop kölja.

⁷ Sutŋine keu jakeŋe al aŋgumakzei, mewö mianöŋ mönö nanŋini eta eŋguiga Kraistkö qetbuŋaŋan lök eretŋi aiga malje. Ambazipnöŋ ak bölim eŋgigetka uruŋini miangöra wahöri keunöŋ al eŋgigetka Anutugö jeŋe qahö dop kölja. Tilipqilip aka yuainini öröba megetka iŋini likepŋi qahö melen eŋgigetka mewö mianöŋ Kraistkö könaŋan mönö aködamunŋambuk akŋa.

⁸ Iŋini Kraistkö qetŋi kewö mem bölimakze: Mönö nanŋinak tilipqilip aka ambazip ak bölim eŋgiba yuainini öröba memakze. Urumelen alauruŋini yeŋgöra mewöyök mewö ak eŋgimakze.

⁹ Irimqirim ambazip yeŋöŋ mönö Anutu bemtohoŋaŋgö uruŋe öŋgöba dum qahö meme. Mi mötze. Ahakmemeninan mönö tilipköm aŋguba janjuŋ akepek. Tosatŋan serowilin aka tandö lopioŋ waikŋini memba möpöseimakze. Tosatŋan awanöm malmal oŋgita qesabulum ahakze. Tosatŋan monengöra laŋ amimba malje aka azi nanŋirök ambi nanŋirök amimba malje. Mewöŋi mienöŋ mönö Anutu bemtohoŋaŋgö buŋaŋi qahö akŋe.

¹⁰ Tosatŋan yoŋgorö memba yuaigö nepaqepalok membagun membingö köpösöŋgömakze. Tosatŋan o köhöikŋi nempa enololoŋ aka laŋ mepaqepaik ahakze. Tosatŋan yuai kalöpköba yoŋgorö memakze. Ambazip mewöŋan mönö Anutugö bemtohoŋi buŋa qahö qem aŋgume. ¹¹ Eŋgöreŋök tosatŋan mutuk mewö aka malgetmö, könaŋep Kembunini Jisös Kraist buŋa qem aŋgugetka sepŋan sanŋoŋda tök kutum eŋgiba yaŋgö qetŋe sarakŋi aket. Mem solanim eŋgiiga Anutuninaŋgö Uŋaŋan mönö inahöm eŋgiiga diŋgiba malje. Mewö.

Sileninan Anutugö jike kömbukŋi akza.

¹² *Nöŋöŋ yuai pakpak ölöp memamaŋgö dop akzalmö, yuai pakpaknöŋ mönö qahö mem ölöwak niŋgiza. Yuai pakpak ölöp memamaŋgö dop akzalmö, yuai kunöŋ kembu ak niŋgibapuköra mönö galöm mem aŋgumakzal. ¹³ “Nene mi neneyök. Mi kömoŋgokninaŋgöra aka ahöza. Kömoŋgoknini mi nene nein gemapköra aka ahöza.” Kunöŋ mewö jibawakmö, Anutunöŋ mönö nene aka kömoŋgok mi mohotŋe jim teköi

* 6:12: 1 Kor 10.23

qahöwakhahot. Silenini mi serowilin akingöra qahöpmö, Kembugö nupni memingöra aka ahöza. Mewö ahöiga nannjak silenini ölöwakhapaköra nene yuai nenngimakza. ¹⁴ Anutunöñ nannji kukösumñan Kembu mem gulii kömupnöhök wahöröhi, yanñon mönönini mewöyök mem gulim nenngii wahötpin.

¹⁵ Engö sileninan Kraistpuk toroqeba silenangö kitipni akzei, mi mötze me qahö? Miangöra nöñon Kraist silenangö kitipni kun memba köna ketanji ambibuk qekötahömam me qahö? Mi qahöpmahöp! Mönön yapmakek! ¹⁶ *Anutunöñ keunji kewö jii ahöza, “Yetkön mönön sile mohot akñahot.” Miangöra kunñan köna ketanji ambibuk qekötahözawi, yanñon mönön yambuk sile mohot akñahot. Mi mötze me qahö? ¹⁷ Mohot akñahotmö, kunñan Kembubuk qekötahözawi, yanñon unñan mönön Kembugö Unñambuk mindiriiga mohok aka malmahot.

¹⁸ Serowilin mi mönön misingöba mosötme. Singisöndok tosatni mi me mi ahakzini, mi pakpak mönön sileninanangö yaigepñe asuhumakza. Kunñan serowilin ahakzawi, yanñon mönön nannji silenji mem böliba singisöndok ahakza.

¹⁹ *Sileninan mönön Unñ Töröñangö Buñ jikenji (tempöl) akza. Anutunöñ Unñan enngiiga buñ qem angugetka urunine malja. Miangöra nannjini buñaya qahö akzei, mi mötze me qahö?

²⁰ Nannjini buñaya qahöpmö, Kraistnöñ söñgöronjini ketanñan bohonñini meiga yanñon buñaya akze. Miangöra sileninan mönön ahakmeme sarakñi aketka Anutugö qetbuñanñan sehi-makña. Mewö.

7

Awanöm aka gwabö seram malmal tatat

¹ Injini keu tosatni ohoba qesigeri, mi jim asarimam. Azinöñ ambi qahö memba gwaböya maljawi, mi ölop. ² Mi ölopnji akzapmö, silegö sihimñan sero yonñorö akepuköra injini mohot mohot mönön nannjik nannjik awanöm amemba malme. ³ Azinöñ mönön anömñangö sihimñangö dop awanöm malmalgö arenji wuatangöma. Anömñan mewöyök mönön apñangö sihimñi wuatangöba malma.

⁴ Anömñangö silenñan mönön nannji buñanji qahö aiga nannjök mi qahö galöm kölakzapmö, apñan mi galöm kölakza. Apñangö silenñan mewöyök nannji buñaya qahö aiga nannjanök qahö galöm kölakzapmö, anömñan mi galöm kölakza. ⁵ Miangöra nannjiri mönön kude angön kölon anguba malmahot. Nannjirök urumohot aka pöndanñ kölonuk nup membitköra ölop nannjök nannjök malmahotmö, nalö tosatni mewö malagun mönön kunbuk mindiriiba mohotñe malmahot. Urunjiri ölop qahö

* 6:16: Jen 2.24

* 6:19: 1 Kor 3.16; 2 Kor 6.16

galöm kölohotka Satanöŋ esapköm etkiiga siŋgisöndoknöŋ etpa-hotpuköra mönö mewö aka malmahot.

⁶ Mewö akŋahotköra ölop jizalmö, jöjöpäŋ keu mewöŋi mi qahö al engizal. ⁷ Nöŋön ambazip körek pakpak ni ewö gwabulum malmegöra mötzalmö, injini tosatŋi Anutugö nup memegöra mötmöt kalem mewöŋi mi qahö memba malje. Anutunöŋ mötmöt kalemŋi mendenŋiga mohot mohot neŋön mi me mi nanŋök nanŋök buŋa qem aŋguba maljin.

⁸ Awanöm qahö aka malö maljei, engöra kewö jizal: Eŋön ni ewö toroqeba awanöm qahöpmö, solanŋi malmei, mi mönö ölopŋi akza. ⁹ Ölopŋi akzadmö, awanöm akingö uruŋini könöp jeiga malbepuköra mönö ölop awanöm aketka amqema. Miangöra yeŋön uruŋini galöm kölbingsö osize ewö, mönö ölop awanöm akŋe.

¹⁰ *Awanöm maljei, engöra kewö jim kutuzal, nöŋönök qahöpmö, Kembunöŋ nanŋak mönö keu ki jiza: Anömŋan apŋi kude mosötma. ¹¹ Mewö jizadmö, töndup apŋi mosötma ewö, mönö azi kun kude memba öne malma me apŋambuk kunbuk eraum möta urumohot aka malmahot. Mewöyök apŋan anömŋi kude mosötma.

¹² Mi Kembugö keuyadmö, awanöm tosatŋi engö goronini mi Kembunöŋ qahö jizadmö, nanak mi kewö jizal: Urumelen azi kungö anömŋan uruŋi qahö melenŋa töndup yambuk malmamgö mötzawi, yaŋön mönö anömŋi mi kude mosötma.

¹³ Mewöŋanök urumelen ambi kungö apŋan uruŋi qahö melenŋa töndup yambuk malmamgö mötzawi, yaŋön mönö apŋi mi kude mosötma. ¹⁴ Miangö könäŋi kewö: Kungö apŋan urumelenŋö kopa azia aiga Anutunöŋ i töndup urumelen anömŋi qekötahözawaŋgöra aka tök kutum waŋgiiga sarakŋi akza. Mewöŋanök kungö anömŋan mötnariŋi qahöpmö, urumelen apŋi qekötahözawaŋgöra aka Anutunöŋ i tök kutum waŋgiiga sarakŋi akza. Kunöŋ sarakŋi qahö akawak ewö, nahönböratŋiran mönö Anutugö sel yaigepŋe malbeak. Mewö malbeakmö, Anutunöŋ mohotŋe tök kutum engiyöhängöra mönö sarakŋi akze.

¹⁵ Sarakŋi akzemö, kunŋan qahö möt nariba apŋi me anömŋi mosötmamgö mötza ewö, mönö ölop mosötma. Mewö asuhuiga nöŋgö keunan urumelen alanini mi qahö jöhöma. Anutunöŋ injini luainöŋ malmegöra engoholök. ¹⁶ Ambi, gi apki uru kungum waŋginöŋga uruŋi melenŋa me qahöwi, mi mönö denöwö mötpanak? Me azi, gi anömgi uru kungum waŋginöŋga uruŋi melenŋa me qahöwi, mi mönö denöwö mötpanak? Miangöra mönö luainöŋ malme. Mewö.

* 7:10: Mat 5.32; 19.9; Mak 10.11-12; Luk 16.18

Anutunöŋ engholöhanğo dop mönö toroqeba malme.

17 Kembunöŋ mohot mohot enğö malmalŋini arenğ aliga awanöm me solanŋi malgetka Anutunöŋ engholöhi, mianğö dop mönö toroqeba mala malmalŋinanğö könanŋi kude uteköme. Urumelenğ könagesöŋi könagesöŋi liliköba miri dop mewö jim kutum enğimakzal.

18 Anutugö aiwesökŋi azi kungö silenje yanğiget maliga mewö oholök ewö, mi mönö kutumamğö kude kapanğ kölma. Anutugö aiwesökŋi kungö silenje qahö yanğiget maliga mewö oholök ewö, mönö mi yandimeğö kude kapanğ kölma.

19 Anutugö aiwesökŋi silenine yandiget ahöza me qahöwi, mianğön Anutugö jene yuai omanŋi akzapmö, jöjöpänğ keunŋi tem köla wuatangöinga ölnŋi akza.

20 Anutunöŋ enghololiga nalö mianğörenğ awanöm me solanŋi malgeri, inŋini mohot mohot mönö mianğö dop toroqeba malme. 21 Kungö welenqeçe omanŋi aknönğga Anutunöŋ goholök ewö, mianğöra mönö waimanğat kude aka malman. Urugi melenğda ölop solanŋi aka nup kun miwikŋaibanak ewö, mi mönö ölop miwikŋaiman me urugi amqeiga ölop toroqeba welenqeçe omanŋi malman.*

22 Mi kewögöra: Kunöŋ welenqeçe omanŋi aiga Kembunöŋ mewö oholi urunŋi melenğniga singisöndokŋanğö kösöŋi pösariga solanŋi aka malja. Mewöŋanök kunŋan solanŋi aiga Kembunöŋ mewö oholi urunŋi melenğniga nanŋi imbi-imbi qahöpmö, Kraistkö jitŋi tem kölmapkö kösönöŋ kinda welenŋi qeba malja. 23 Kraistnöŋ bohonŋi ketanğan söngöröŋini meiga maljeanğöra mönö gölme ambazip yenğö keu kenğöt bapŋe anda welenqeçenŋini omanŋi aka malbepuk. 24 Mianğöra urumelenğ alaurupni, Anutunöŋ enghololiga nalö mianğörenğ solanŋi kösöŋini qahö me welenqeçe tonjanğö kösö gwarönöŋ malgeri, inŋini mohot mohot mönö mianğö dop Anutugö jene toroqeba malme. Mewö.

Gwabö seram aka malö yenğö goro keunŋini

25 Ambi seram jömukŋi† enğö goroya mi Kembunöŋ qahö jim kutui mötzal. Mianğöra Kembunöŋ ak kömum niŋgiiga keuni lanğ qahöpmö, möt nariget dop köljawanğö dop jimakzali, mönö mianğö dop kewöta nani mötmötnan kewö jimam:

26 Kahasililiŋ nalöŋi dopdowizawanğöra gwabö seram maljei, körek enğön mönö mianğö dop toroqeba malgetka ölöwakza. Mewö mötmörizal. 27 Ambi memba maljan ewö, anömgi mosötmangö kude akŋan. Anömgi qahö solanŋi maljan

* 7:21: Keu mianğö könanŋi kun kewö: Urugi melenğda ölop solanŋi aka nup kun miwikŋaizan ewö, gi ölop toroqeba welenqeçe omanŋi malman. † 7:25: qesabulum qahö qeçenŋi

ewö, mönö ambigöra kude jaruman. ²⁸ Töndup ambi mani, mianjön mönö sinjisöndokñi qahö akña. Mewöñanök ambi seramnöñ azi memawi, yanjön sinjisöndok qahö akña. Sinjisöndok qahöpmö, mewö akñei, yeñjön mönö silenjanan kahasililiñ gwötpuk miwikñaiba mötme. Eñjön mi mötpepuköra mönö anjön köl engimangö mötzal.

²⁹ Mewö möta goro engizalmö, urumelenj alaurupni, keu kun kewö jimam: Kembu kamawanjögö nalöñan törizawanjögöra aka ambi memba maljei, eñjön mönö mewöyök nalö kianjögorenök könahiba anömñini qahö tandök ewö aka malme. ³⁰ Wösöbirik aka sahötzei, eñjön mönö qahö sahötmeanjögö tandök ewö aka malme. Uruñini ölöwahiga söngaizei, eñjön mönö qahö söngaimeanjögö tandök ewö aka malme. Yuai bohonñi mezei, eñjön mönö mi qahö buña qem anjumeanjögö tandök ewö aka malme.

³¹ Gölmönöñ nalö kewöñe arenj wuatanjögömakzei, mianjön mönö ayapkömawanjögö dop akza. Mianjögöra gölmegö öröyuañi kölköl-örörö aka nupköra alakzei, eñjön mönö mianjön uruñini jöhömakzawanjögö tandök ewö kude aka malme.

³² Injini gölmegö lömbötköra waimanjat qahö malmegö sihimni mötzal. Awanöm qahö solanñi maljawanjön mönö Kembugö öröyuaigöra waimanjat mörakza. Mi möta “Denöwö akiga Kembugö uruñan ölöwahi dop kölbawak,” nanñanjögöra mewö jimakza. ³³ Mewö jimakzäpmö, ambi memba maljawanjön mönö gölmegö öröyuaigöra waimanjat mörakza. Mi möta “Denöwö akiga anömnanjögö uruñan ölöwahi dop kölbawak,” nanñanjögöra mewö jimakza.

³⁴ Kembunöñ likep anömñan likep mötmötñi öröyohotka urudenj aka malja. Mewöñanök ambi apñi qahö aka ambi seram solanñi maljahoranjön mönö Kembugö öröyuaigöra waimanjat mörakzahot. Mi möta “Denöwö akiga unjani aka sileni sarakñi aiga Kembugöra dop kölbawak,” nanñiranjögöra mewö jimakzahot. Mewö jimakzahotmö, azi memba maljawanjön mönö gölmegö öröyuaigöra waimanjat mörakza. Mi möta “Denöwö akiga apnanjögö uruñan ölöwahi dop kölbawak,” nanñanjögöra mewö jimakza.

³⁵ Nanñini bauköm engimangö möta goro mi engizal. Mi tosatñi kösö ewö jöhöm engibi lömböt miwikñaimegöra qahöpmö, könanj kewögöra mi engizal: Nöñjön injini ahakmeme diñdiñi wuatanjögöba urudenj qahöpmö, pöndanj Kembubuk qekötahöba kin köhöimegöra mötzal. Mianjögöra goronjini mi jizal. Mewö.

³⁶ Azi kunñan ambi serambuk buña qeba malagun anjögömosötpitkö mötmörizahori, yetkö goronjiri kewö jimam: Azi mianjön kewö mötmöriba jiza, “Ambi mi memba mewö

törörök qahö ak waŋgibileŋak.” Mewö jiiga ambi memawaŋgö sihimŋi môt köhöiiga ambigö yambuŋi azi memegö dop akza ewö, yaŋön mönö ölop sihimŋaŋgö dop aiga ameyohotka dop kölma. Mewö mianŋön siŋgisöndokŋiri qahö akŋa. ³⁷ Qahö akŋapmö, azinöŋ ambi mi qahö memapkö keuŋi nanŋi uruŋan jöhöba möt köhöizawi, miangöra kewö jimam: Kunŋan azi mi kuŋgui qahö qaközapmö, ölop nanŋi sihimŋaŋgö dop wuatangöba keunöŋ qahö jöhöi ahakza ewö, yaŋön mönö ölop sihimŋaŋgö dop aka ambi mi qahö mema.

³⁸ Mewö aiga ambi seram mezawaŋön mönö dopŋe akzapmö, i qahö mezawaŋön mönö köna ölop sorokŋi wuatangöba törörök akza. Mewö.‡ (v 37b) Qahö akŋapmö, iwiŋan böratŋi azi qahö waŋgimapkö keuŋi nanŋi uruŋan jöhöba möt köhöizawi, miangöra kewö jimam: Kunŋan iwi mi qahö kuŋgui qaközapmö, ölop nanŋi sihimŋaŋgö dop wuatangöba keunöŋ qahö jöhöi ahakza ewö, yaŋön mönö ölop sihimŋaŋgö dop aka böratŋi aŋgön kölma. (v 38b) Mewö aiga börat seramŋi azi waŋgizawaŋön mönö dopŋe akzapmö, i qahö waŋgizawaŋön mönö köna ölop sorokŋi wuatangöiga törörök akza. Mewö.

³⁹ Ambinöŋ apŋan jebuk malmawaŋgö dop amöamögö keuŋan jöhöi maljapmö, apŋan kömuma ewö, keu mianŋön mewöŋanök kömuiga ölop azi sihimŋan jimawaŋgö dop mema. Urumeleŋgö kopa azia qahöpmö, azi Kembubuk qekötahözawi, miyök mema. ⁴⁰ Ölop azi memba sösöŋgai qorembenŋi miwikŋaimapmö, toroqeba solanŋi malma ewö, mönö urusösöŋgai ölni miwikŋaiba söŋgaimakŋa. Nöŋön keu mi kewöta mewö jizal. Anutugö Uŋaŋan nöŋgö urune mewöyök maljawi, miangöra mönö mewö mötmöriba jizal. Mewö.

8

Nene tandö lopiongö naluk alalŋi mi nembin me qahö?

¹ Inini nene tandö lopiongö naluk alalŋi miangöra ohogetka goro kewö jimam: Urukalemnöŋ mönö bauköm eŋgima. Goranora jigetka tosatŋan kewö jimakze, “Körek neŋön tandö lopiongö könaŋini möt yaköŋga omaŋi akza.” Keu mi ölbölna akza, mi mötzin. Inini mötmöt mewöŋi jiba malgetka uruŋinan wahöriga koŋaer ewö terereŋgöba aiwelikömakze. Mewö aka deŋda siksauk malje. Köna bohonŋi mi urukalem. Köna mewö mianŋön mönö nanini urunini möhamgöba mem köhöim

‡ **7:38:** 36b Azi kunöŋ böratŋi azi waŋgimangö uruyahöt mötzawi, yaŋgö goronŋi kewö jimam: Iwiŋan kewö mötmöriba jiza, “Böratni waŋgiba mewö törörök qahö ak waŋgibileŋak.” Mewö jiiga böratŋaŋgö yambuŋi azi memegö dop aiga azi waŋgimangö sihimŋi möt köhöiza ewö, yaŋön mönö ölop sihimŋaŋgö dop aka mosöriga azi meiga dop kölma. Iwiŋan mewö mianŋön siŋgisöndok qahö akŋa.

angubin. ² Kunöŋ “Keu kungö könäŋi möt yaközal,” mi jitröŋ jizawi, yaŋgö mötkutukutuŋi ölnan mönö qahö asuhuiga toroqeba tönpin malja. ³ Mi keunöhök jizapmö, kunjan Anutu uruŋan jöpakömakzawi, Anutunöŋ mönö yaŋgöra möri ölni akza.

⁴ Nene tandö lopionŋ yengöra naluk algeri, mi nembin me qahöpto? Keu kewö jimakze, “Tandö lopionŋ mi bem ölni qahö maljeangö kaisöpsöpŋini akze,” aka keu kun kewö, “Anutu mohotnöŋ malja. Alaŋi kun qahö.” Keu yahöt mi ölna akzahot, mi mötzin. ⁵ Keu miangö könäŋi kewö, “Öme bemŋi bemŋi,” qetŋini mewö qerakzei, mi gwötpuk malje. Suepnöŋ me gölmenöŋ maljei, mi ölop qahö mötzin. Ölna ömewöröme, bem aka azi kembu mi gwötpuk malje.

⁶ Mi maljemö, mi töndup Anutu mohot yaŋönök nanini bemnini aka Iwinini akza. Yaŋön yuai pakpak miwikŋaii asuhuyök. Malmalnini yaŋgöra malbingöra aka al nenŋii maljin. Mewöyök Kembu mohot Jisös Kraist malja. Yaŋön Anutu bauköiga yuai pakpak miwikŋaiyohot. Nini mewöyök bauköm nenŋiiga mal köhöimakzin.

⁷ Mewö möt narizinmö, ambazip körekŋan mönö mötkutukutu mewöŋi mi qahö memba malje. Mi qahöpmö, tosatŋan mutuk tandö lopionŋ waikŋini memba möt köhöigerangöra aka dölkewöŋe mewöyök toroqeba nene tandö lopiongö naluk alalŋi mi memba mewö mianjön amqeba bemurup mi mötmöröiba malje. Uruŋinan lölöwöröŋi aiga uruyahöt aka negetka uruŋinan miangöra tölöhomakza. ⁸ Tölöhomakzapmö, nenenöŋ nenŋuangita Anutu kösutŋe qahö al nenŋimakza. Nene ŋiŋi malbini, mewö geŋmororöŋ qahö miwikŋaibin. Nene memba malbini, qetbuŋaninan mewö qahö qarima.

⁹ Mi töndup nene pakpak nembangö amqezei, eŋön mönö jaubatbat laŋ malbepüköra galöm mem anguba malme. Mewö malgetka tosatŋan eŋgeka uruŋinan lölöwörö aka bölii et eŋgubapuk. ¹⁰ Miangö könäŋi kewö: Göŋön mötkutukutu ölni memba mala amqeba tandö lopionŋ jikeŋe anda tata nene nenöŋga alagi kunjan gehi kewö lömböröima: Uruŋan lölöwöröŋi aiga uruyahöt akzawi, yaŋön mewö geŋka uruŋan wahöri amqeba nene tandö lopiongö naluk alalŋi mi memba et qebawak.

¹¹ Göhö mötkutukutugi ölni mianjön mönö nangi urumelen alagi kuŋguiga uruyahöt qakŋe lölöwöröŋi akzawangöra mönö amqeba memba et qebawak. Kraistnöŋ yaŋgöra aka kömuyökmö, nene mi memba mewö et qeba ayuhuiga qahö dop kölma.

¹² Ayuhumapmö, urumelenj alaurupņini mewö mem bölim engiba uruņini lölöwöröņi mi qeba köndenja sinğisöndok ahakzei, mewö mianjön mönö Kraist nanņi qetala sinğisöndok ahakze. ¹³ Mianğöra nöjön nene kun nembiga mianjön urumelenj alani kölgorom wanņiiga et qeba sinğisöndok akza ewö, nöjön mönö nalö kunöj nene mi qahö toroqeba nemam. Nöjön alani jölöngöba kölgorom wanğibilenbuköra kapan köl kinjal. Mewö.

9

Aposol denöwö akiga dop kölbowak?

¹ Wani kösönöj jöhöm niņgiiga solanņi qahö akilenjak? Eņön kewöt niņgigetka aposol akzal me qahö? Kembunini Jisösnöj asuhum niņgiiga ehal me qahö? Nöjön Kembugöreņ nanğöba nup membiga iņini nup mianğö öļņi akze. ² Kembunöj nanņak aposol nup niņgii yambuk kinda membiga iņini uruņini melenja nöngö muņgem supapni akze. Mianğöra tosatņan kewöt niņgigetka aposol qahö akilenjak ewö, eņön mönö könaņamni mewö möt yaköze. Mi mönö amqeba nanğöba jigetka dop kölma.

³ Ambazip tosatņan nöngöra “Aposola qahö akza,” jiba tokoba andönöj qeçe ak niņgimakzemö, nöjön mönö engöreņ kösohot jiba mianjön nani könaņamni nanğöba jimakzal. ⁴ Mianğöra könöp numbu nene neņgigetka neņakurupni yembuk memba memba malbinak, mianjön mönö dopņe akawak. ⁵ Pitö, aposol tosatņi aka Kembu Jisösgö munurupņi yeņön anömurupņini mötnariņinambuha enğuanğita mohotņe anda kamakze. Nöjön mewöyök mianğö dop akilenjak ewö, silik mianjön mönö köna walöjda qötöņgatpilenjak me qahö? Mi qahöpmaöp.

⁶ Silegö malmalņe iņini ambazip ipņi nanğöm enğimakzemö, ni aka Barnabas qahö. Niri töwa qahö netkigetka öne malakzit. Mi mötketka dop kölja me qahö? Tosatņan urugö nup megetka töwa enğigetka silenianğö nup qahö memakzemö, netköröhök mönö nanğönanğöniri nanirak miwikņaitkö dop jize me? ⁷ Gawmangö yarö nup memakzei, yeņgöreņök kunņan nanņi malmalņi nanğöm anğuba memakza me qahö? Wain nup kömörakzei, yeņön körek mianğö öļņi memba nemakze me qahö? Mewöņanök bulmakau galöm kölakzei, yeņön körek mianğö juzu oņi nemakze me qahö?

⁸ Keu mi gölme ambazip nanine mötmötnöhök mötöteiba qahö jizal. Anutunöj mewöyök mönö keu miyök Mosesgö Köna keunöj jiza. ⁹ *Mosesgö Köna keunöj Juda yeņgö nup

* 9:9: Dut 25.4; 1 Tim 5.18

meme silikɲini mi jim asariba kewö ohoget ahöza, “Wit padigö kötɲi aka kamböɲi kewötɲingöra bulmakau aziɲi waɲgitketka padi kambu qakɲe tiba tözözangömakzawi, yaɲgö numbuɲi mönö kude mözöpköme. Mewö gumohom waɲgigetka ölop nene kitipɲi neiga dop kölma.” Mianɲgö dop kiamnönɲ börojaɲ memba sömbup meköi qeba nene kitipɲi waɲgiget neiga dop kölma. Anutunönɲ kiam bulmakau miengöra waimanjat qahö möta mewö jiza. Mi qahö.

¹⁰ Sömbupköra qahöpmö, keu mi mönö neɲgöra jii ahöza. Keu mi neɲön kewö akingöra aka ohoget ahöza: Kinonönɲ nup barözawaɲön mönö ölni asuhumapkö jörömqröm qakɲe nupɲi memakɲa. Mewöyök padi dudutnönɲ qeba ölni aka kamböɲi kewötzawaɲön mönö bahöɲi memba nemapkö al mamböta nupɲi memakɲa. ¹¹*Neɲön urugö keu kötɲi sutɲine qesij gila malinga eɲön malmalgö naɲgönaɲgö yuai qahö neɲgigetka gamuɲambuk akza. Nönön mem ölöwak engibiga eɲön mianɲgö likepɲi melenɲa niɲgigetka dopɲe akɲa.

¹² Tosatɲan sutɲine urugö nup megetka naɲgöm engigetka dopɲe akza ewö, ni mönö dop mi onɲita naɲgöm niɲgigetka dop kölma. Likepɲi enɲiinga mianɲgö likepɲi neɲgigetka dop kölbawakmö, nönön mianɲgö dop akɲegöra qahö qesim enɲial. Kraistkö Ölöwak Buɲa keu sehimapkö könaɲi jöhöbinbuköra mönö yuai neɲgimegöra qahö qesim enɲiin. Qahöpmö, nani-nahök mönö kapaɲ köla köhöiba lömböt pakpak bisiba malin.

¹³ *Keu ki mönö mötmörime: Jöwöwöl jikenönɲ nup memakzei, yeɲön mönö jike mianɲgöreɲök numbu neneɲini memba nemakze. Jöwöwöl ohoba altagö könöpɲi galöm kölmegöra kuɲgum engigetka kinjei, yeɲön ambazip nene nalukɲini altagöreɲ algetka nene mianɲgö kitipɲi tosatɲi mi mianɲgöreɲök buɲa qem aɲgumakze. ¹⁴*Keu mianɲgö dop Kembunönɲ mewöyök jim kutuba keu kewö jiyök, “Ölöwak Buɲa jim sehiɲgetka ambazipnönɲ mötmei, yeɲön mönö Ölöwak Buɲagö likepɲi kötön naluk algetka malmalɲinaɲgö naɲgönaɲgöɲini miwikɲaiba malme.”

¹⁵ Nönön ölop keu mianɲgö dop mötmöriba urugö nup memba töwa niɲgimegöra qesim engibileɲakmö, kötön naluk almeaɲgö keu pakpak mi mönö mosöral. Moneɲ almeaɲgö keu ohozali, mi eɲön mewö ak niɲgimegöra aka qahö ohozal. Töwa memaɲgö mötmöribi lömböriiga kömükömugö mötpiga amqeza. Nanaɲgöra mi keu omaɲi qahöpmö, töwa qahö niɲgimegö keuɲi mi mönö sileni möpöseiba jizal. Nönögöreɲ keu mi kunönɲ kun qeapkömangö osiiga malmam.

* 9:11: Rom 15.27 * 9:13: Dut 18.1 * 9:14: Mat 10.10; Luk 10.7

16 Ölöwak Buᅇa jim sehimakzali, mianᅇöra sileni möpöseimangö dop qahö akzal. Nöᅇön Anutugö jimkutukutu bapᅇe mala mi jim sehimangö dop akzal. Nup mi mönö mosötmanᅇö osizal. Ölöwak Buᅇa qahö jim sehibilenᅇak ewö, mianᅇöra lömbötnöᅇ qakne öᅇᅇöiga neka pölzik jimeanᅇö dop akilenᅇak.

17 Nani sihimnanᅇö dop nup mi möwölöhöba membilenᅇak ewö, mönö ölop töwa niᅇᅇimeᅇöra mambötpilenᅇak. Mimö, Anutunöᅇ kunᅇum niᅇᅇiiga nani sihimni qahö mötöteiba Buᅇaᅇi galöm kölakzal ewö, mi mönö Anutunöᅇ möt narim niᅇᅇiba nupᅇi niᅇᅇii maljalanᅇö dop memakzal. 18 Mewö aiga wanatnöᅇ mönö töwa ak niᅇᅇimakza? Ölöwak Buᅇa jim sehiba mi söᅇᅇöröᅇi qahö ahakzali, mianᅇön mönö töwa ak niᅇᅇimakza. Anutunöᅇ nupᅇanᅇö likeᅇᅇi niᅇᅇimeᅇöra jim kutui Buᅇa Kimbinöᅇ ahözawi, keu mianᅇö dop töwagöra qahö kapaᅇ kölakzal.

19 Ambazip kunᅇan kun qahö jöhöm niᅇᅇiiga ölop nani imbi-imbi malbilenᅇakmö, mi töndup mönö nani memba et al aᅇᅇuba maljal. Ambazip köreᅇan uruᅇini melenᅇimeᅇöra kapaᅇ kölakzal. Mewö akᅇᅇöra ambazip körek welennᅇini qeba maljalmö, sehiseᅇiᅇi yeᅇön töndup Kraistkö buᅇaya qahö akᅇᅇanᅇö dop akze. 20 Juda yeᅇön uruᅇini melenᅇimeᅇö bauköm eᅇᅇiba sutᅇine Juda tandök aka malal. Mosesᅇö Köna keu bapᅇe malᅇᅇanᅇön uruᅇini melenᅇimeᅇö bauköm eᅇᅇiba nanak Köna keu mianᅇö bapᅇe qahö mala töndup keu mianᅇö gwaröᅇe maljal tandök aka sutᅇine malal.

21 Mosesᅇö Köna keu qahö möta malᅇᅇanᅇön uruᅇini melenᅇimeᅇöra bauköm eᅇᅇiba sutᅇine Köna keu qahö möta maljalanᅇö tandök aka malal. Nanak Anutugö Köna keuᅇöra töᅇᅇin qahö maljalmö, Kraistkö Köna keu bapᅇe anda mi tem kölakzal. Mi töndup yeᅇᅇö sutᅇine Anutugö Köna keu qahö mötmöt tandök aka malal. Ambazip sehiseᅇiᅇan uruᅇini melenᅇimeᅇöra mewö aka malal.

22 Mötnariᅇnöᅇ lölöwöröᅇi malᅇᅇanᅇön uruᅇini melenᅇa köhöimeᅇö bauköm eᅇᅇiba sutᅇine lölöwöröᅇi tandök aka malal. Ambazip tosatᅇi wani awamᅇan köna inöᅇ me wainöᅇ uruᅇini melenᅇimeᅇö meköm eᅇᅇiba ambazip könaᅇi könaᅇi yeᅇᅇö sutᅇine tandök könaᅇi könaᅇi aka malal.

23 Tandök pakpak mi Ölöwak Buᅇanöᅇ sehimapköra aka ahakzal. Sehiiga kötumötuetᅇan nani qakne öᅇᅇöi nanak mewöyök oyaenᅇkoyaen akᅇᅇanᅇöra aka mewö ahakzal. 24 Keu ki mönö mötmörime: Ösumtiti nalöᅇe körek yeᅇön luhut almeᅇöra ösumᅇini qezaköba anakzemö, mohot kunᅇan mönö luhut ala töwa mema. Iᅇini mönö mohot mianᅇö dop ösumᅇinan anda töwa memingöra kapaᅇ köla malme. Mönö mianᅇö dop mötnariᅇ köᅇ guliba malme.

²⁵ Ambazip mönahotnõj luhut albingö anakzei, yeñõn mönõ körekñan nanñini törörök galöm köl anğubingö köl gulimakze. Yeñõn kösasorom julkula gororonğömawi, miyök membingö kapan kölakzemö, neñõn ila jalö qahö ayapkömawi, mönõ töwa mi membingö kapan kölakzin. ²⁶ Mianğöra nõñõn ösumnan lañlañ an köl kam köl qahö anakzal. Börõni misiba bim lañlañ qahö qemakzalmö, aonğit alaurupni luhut al engimamğöra mönõ diñđinanök törörök qemakzal.

²⁷ Nõñõn ambazip tosatñi Buña keunõj uruñini kuñguba malbi teköiga Anutunõj mönõ andö nuñgui nanak ila jalõñi qahö membilenbuk. Mianğöra mönõ nani sileni mindiñgöba törörök köl guliba galöm kölakzal. Mewö.

10

Israel mutuk malgeri, yeñğoreñ galöm meme keu

¹ *O urumelen alaurupni, Israel neñğö amböskoninan Mosesgö andõñe kaba wuatangögetka yuai asuhuyõhi, mianğöra mönõ gukmaulem malbepuk. Mianğöra Israel neñğö kõnanini kewö suariba ohozal: Yeñõn mönõ körek kousu bapñe kaba mala Köwet Pisikñi kutugetka yeñğoreñök kunñan kun qahö ayuhuyök. ² Anutunõj o melunñi kousunõj aka köwetnõj aliga mi kutuba kaba körekñan uruñini melenđa Mosesgö kõnagesõñi aket. ³ *Mewö aka körek yeñõn urugö nene miyöhök miwikñaiba nemba malget.

⁴ *Mewöyök körek yeñõn urugö onji miyöhök miwikñaiba nemba malget. Urugö onji mi köt ketañi kunõj enğuatangöba kõnañine kayõhi, mönõ mianğoreñök miwikñaiget. Köt ketañi mi Kraistkö söpsöpñi. ⁵ *Mewö malgetmö, mi tøndup Anutunõj kõnagesö õlñi mienğöra urusösõngai qahö möta maliga gölme qararanğölkölñe ayuhugetka qamõtñinan qeqelanlañ ahöba gisahöget.

⁶ *Mewö asuhuyõhi, mi nanini kezapqetoknina akza. Anutunõj mönõ söpsöp mi neñğöra aka aliga galöm meme keunina kewö akza: Yeñõn uruñini qahö galöm köla bölõñağöra köpösõngögeri, neñõn mönõ mianğö dop aka ayuhubinbuk.

⁷ *Mewöyök Israel yeñğoreñök tosatñan tandö lopion waikñini memba möpõseiba malgeri, eñõn mönõ mianğö dop aka malbepuk. Yeñğöra Buña Kimbinõj keu kewö ohoget ahöza, “Kõnagesö yeñõn nem sösõngai ala tokoba tatketka uruñinan wahõriga mianñõn melenđa kezapjupjup kewö ahök: Yeñõn liñet gwawet unduba o köhöikñi nemba serowilin lañ aket.” Keu mewö ahöza.

* **10:1:** Eks 13.21-22; 14.22-29 * **10:3:** Eks 16.35 * **10:4:** Eks 17.6; Jan 20.11

* **10:5:** Jan 14.29-30 * **10:6:** Jan 11.4 * **10:7:** Eks 32.6

8 *Yengörenök tosatñan serowilin aketka Anutugö irimsesewölñangöra aka ambazip 23.000 mianğö dop silim mohotkö uruñe kömumba etket. Neñön mönö tosatñi mienğö dop serowilin akinbuk. 9 *Mewöyök Israel yengörenök tosatñan Kembu esapköm wañgigetka mokoleññöñ engöhögetka kömuget. Neñön mönö tosatñi mienğö dop Kembu esapköm wañgibinbuk. 10 *Yengörenök tosatñan galömurupñini irikuruk jimonğot aka andö enguba malgetka mem ayuayuhu garatanöñ mönö engui kömuget. Neñön mönö tosatñi mienğö dop irikuruk jimonğot lañ aka malbinbuk.

11 Mewö asuhum engiyöhi, söpsöp keu mi mönö nanini kezapqetoknina akza. Gölmenöñ malmalgö nalö teteköñan kam kuñgum neñgii maljini, kösohot mi mönö neñgöra aka ohogetka galöm meme keunina akza. 12 Mianğöra kin köhöimangö jizani, mönö et guhubapüköra galöm mem anguba malman.

13 Esapesap qakñine öngömakzei, mi gölme ambazip körek neñgö qaknine öngömakze. Esapesap qainñi kun miwikñabeak, mianğoreñ ösumñinan qahö dop köljawanğöra etpeakmö, Anutunöñ keuñi jöhöyöhanğö dop mi pöndañ wuatangöba ahakza. Yañön esapesap Tonji angön köliga esapesap ösumñini qahö dop kölmawanğö dop mi al engimangö osimakza. Mewögöra esapesap mötketka Anutunöñ ösumñi engiba mewö mianğön ölöñ kölbिंगö köna mewöyök mesat engii asuhumakza. Mianğöra enñön gölmegö esapesapñi mi ölöp kin köhöiba luhut almeanğö dop akze. Mewö.

Tandö lopionğö lömbuañ aka Kembugö semön kömbukñi

14 Mianğöra wölböt alaurupni, tosatñan tandö lopion waikñini memba möpöseim engimakzemö, enñön mi kök ala mosötme. 15 Nöñön mötmöt ambazip aködammunñinambuk akzeangö dopkeu jimami, mi mönö nanñinak kewöta mianğö ölnji miwikñaime.

16 *"Kembugö semön nene nembin," jiba kötümötuetkö qambigöra Anutu saiwap jiba köuluköba qambi mianğoreñök nemakzinangören mönö Kraistköreñ toroqeba sepñi nemakzin. Beret mindipköba mianğoreñök nemakzinangören mönö Kraistköreñ toroqeba busuñi nemakzin. Mianğöra ölüm engubapuk. 17 Körek neñön beret mohot mianğoreñök nemakzin. Beret mi mohot akzawanğöra aka gwötpuk neñön mönö Kraistkö ölnji mohot akzin.

* 10:8: Jan 25.1-18 * 10:9: Jan 21.5-6 * 10:10: Jan 16.41-49 * 10:16: Mat 26.26-28; Mak 14.22-24; Luk 22.19-20

18 * Injini mönö Israel könagesögö malmalñi mötmörime. Am-bazip jöwöwöl ohomegöra nene algetka tosatñan mianğö ki-tipñi nemakzei, yeñon mönö altagöreñ toroqeba nupñi Anu-tugöra memakze. 19 Keu mianğö könani ölni mi mönö denöwö jibileñak? Tandö lopionğ engöra bau qegetka sepñi eri jöwöwöl ohomakzei, mianğon ölnambuk akzawañğöra jiza me qahö? Tandö lopionğ mi ölni akzeañğöra jiza me qahö? Keu mianğö könani denöwö?

20 * Tandö lopionğ mi ölni qahöpmö, urumelenğö kopa yeñon töndup jöwöwölñini ömewöröme yeñğöra ala ohomakze. Mi Anutugöra qahö. Nöñon injini ömewöröme yembuk toroqeba malbepuköra waimanjat mötzal. 21 Injini Kembugö qambinöhök aka ömewöröme yeñğö qambinöhök öröröñ nemingö osime. Mewöyök Kembugö nene dum aka ömewöröme yeñğöreñ nene dum mi öröröñ toroqebingö osime. 22 * Ahakmeme mewöñan mönö Kembugö uruñi qei böliiga irimñi seholimapköra mötzin me? Kukösumninan mönö Kembu oñgita öñğöba maljin me?

Nanine imbi-imbi mosöta Kembu möpöseibin.

23 * Tosatñan kewö jimakze, “Nini ölop nanine imbi-imbi yuai pakpak ahakzin.” Keu mi ölnapmö, ahakmeme pak-pak mianğon mönö qahö bauköm neñgimakza. “Nini ölop nanine imbi-imbi yuai pakpak ahakzin,” mewö jimakzemö, ahakmeme pakpaknöñ mönö urunini qahö nanğöba mem köhöim neñgimakza. 24 Kunñan kun nanñañğörök mötmöriba ölöwakñangöra kapan kölwapukmö, alaurupñan ölöwakñegöra kapan köli dop kölma.

25 Sömbup i me wai maketnöñ aka qeköm nene mire bohonñi memegöra alakzei, mi mönö uruyahöt mosöta nemakñe. Sömbupköra uruñinan tölöhobapukö qesiqesinji kun mönö kude akñe. Qahö! 26 * Keu mianğö könani mi Buña Kimbinöñ kewö ohoget ahöza, “Gölme aka yuai pakpak mianğöreñ ahözawi, mi Kembugö buñaya akza.”

27 Kun Kraist qahö möt narizawañon engoholiga yañğöreñ anbingö möta anda tatketka nene i me wai jeñine al engimei, mi mönö uruyahöt mosöta neme. Nenegöra uruñinan tölöhobapukö qesiqesinji mi mönö kude akñe. Qahö! 28 Nanñinañğöra qahöpmö, “Nene ki mönö tandö lopionğ yeñğö naluk alalñi akza,” kunöñ mewö jii mötme ewö, mi jiyöhi, yañğöra aka uruñan bölipapuköra mönö galöm mem anğuba kude neme.

* 10:18: Lew 7.6 * 10:20: Dut 32.17 * 10:22: Dut 32.21 * 10:23: 1 Kor 6.12 * 10:26: Sum 24.1

29 Nangi urugan tölöhobapuköra qahö jizalmö, alagahö uruñan bölibapuköra mi jizal. Nöñön nani imbi-imbi yuai akiga alanangö uruñan böliiga kewöt niñgiba Anutunöñ keuni jim teköba likepñi melenñ niñgibapuk. Öne mewö mendenñ anguinga jabö ahuiga qahö dop kölja. 30 Nöñön ambazip yembuk toroqeba tata nenenñinañgöra “Anutu pipsaiwap!” jiba sömbup nemami, tosatñan mewö neka miangöra andö nuñgugetka qahö dop kölma. Sömbupköra Anutu möpöseizali, miangöra mönö keu töhörenñ jim niñgigetka qahö dop kölja.

31 Miangöra o me nene nemei aka i me wai akñei, mi pakpak mönö Anutugö qetbuñanñan sehimapköra aka ahakñe. 32 Yuai kun kude aketka kungö uruñan miangöra böliiga mötnariñan söörörauba etpapuk. Juda me kantri tosatñangö ambazip me Anutugö könagesö miengö sutñine kungö uruñan mönö engöra aka bölibapuk. 33 Nöñön mewöyök yuai pakpak ahakzali, miangörenñ mönö ambazip körek pakpak uruñinan ölöwakñapköra kapanñ köla maljal. Nanök ölöwakñangöra qahö kinjalmö, ambazip sehisehiñan ölöwakñegöra jaram tibiga kunbuk letota Suepkö buñaya akñegöra kapanñ kölakzal. Mewö.

11

1 *Nöñön Kraistkö silik ewö ahakzali, miangö dop enñön mönö nöñgö silikni wuatangöba malme. Mewö.

Ambi enñön mönö nööröñjini esuhuba Kembu möpöseime.

2 Nöñön yuai pakpak ahakzali, iñini miangörenñ mötmörim niñgimakzeangöra saiwap jim engizal. Iñini kusum engialangö dopkeuni tem köla wuatangömakzei, miangöra mönö möpöseim engizal. 3 Nöñön iñini keu ki möt kutumegöra mötzal: Kraistnöñ azi körek neñgö bohonini akza. Azinöñ ambigö bohonñi akza aiga Anutunöñ Kraistkö bohonñi akza. 4 Miangöra azi iñini mönö duhuñini qeköba köuluköba Anutugö keu jigetka dop kölja. Azi körekñan nööröñjini turuba köuluközei me Anutugö kezapqetok keu jim asarizei, Anutunöñ mönö yeñgö mötmötñinañgöra möri gamuñambuk aiga nanñini memba et al anñumakze.

5 Mewömö, ambi kunñan nööröñjini qahö esuhuba qenjarök totokonöñ köuluközawi me Anutugö kezapqetok keu jim asarizawi, yañön mönö apñi nööröñjini akzawi, mi gamu qeba nanñi memba et alja. Mewö aka nööröp jupñi körek mitigetka aukñe öne maljawanñgö dop akza. 6 Ambinöñ nööröñjini qahö esuhuza ewö, yañön mönö nööröp jupñi mewöyök jiiga mitigetka dop kölja. Mi dop köljapmö, ambinöñ nööröp jupñi jiiga mitigetka gamuñambuk akapuk. Miangöra mönö nööröñjini

* 11:1: 1 Kor 4.16; Fil 3.17

esuhuba mali dop kölja. ⁷ *Ambinöŋ apŋaŋgö aködamunŋi akzapmö, azinöŋ Anutugö imutŋi aka aködamunŋi akza. Mianğöra azinöŋ mönö nöŋöpŋi kude esuhui dop kölma.

⁸ *Mi kewögöra: Mutuhök azinöŋ ambinöhök qahö asuhuyökmö, ambinöŋ azigöŋök asuhuyök. ⁹ Anutunöŋ azi mi ambigöra qahöpmö, ambi mi azigöra miwikŋaiiga malje. ¹⁰ Könaŋi mianğöra aka ambinöŋ mönö kukösum bapŋe malmalgö aiwesökŋi mi nöŋöpŋi esuhuba maliga dop kölja. Mewö aiga Suep garata yeŋön gödaqeŋgö silik ölöpŋi ehakze.

¹¹ Mewö dop köljapmö, Kembubuk çekötahöba malinga ambinöŋ mönö azigö keuŋi qahö oŋgita nanŋi imbi-imbi laŋ kude malma. Azinöŋ mewöyök ambigö keuŋi qahö oŋgita nanŋi imbi-imbi laŋ kude malma. ¹² Ambinöŋ azigö sihitŋeyök asuhuiga mianğö dop azinöŋ mewöyök ambigö köŋö uruŋeyök asuhuba maljinmö, öŋöyuai pakpakö könaŋi mi Anutu.

¹³ Mianğöra ambinöŋ nöŋöpŋi qahö esuhuba Anutu köuluköiga dop kölja me qahö? Keu mi mönö nanŋinak kewöta jöhöme. ¹⁴ Anutunöŋ ambazip miwikŋaim neŋgiba gölmenöŋ mohotŋe malmal areŋgöyöhi, areŋ mi eka kewöta silik kewöŋi mönö möt asarizin me qahö? Azinöŋ nöŋöp jupŋi qahö mitiiga köŋöza ewö, mianğön mönö gamu qem waŋgiza.

¹⁵ Anutunöŋ ambigö nöŋöp jupŋi köŋöpŋi mi esuŋi akŋapköra waŋgii malja. Mianğöra ambinöŋ nöŋöp jupŋi qahö mitiiga köŋöza ewö, mianğön mönö aködamunŋi ak waŋgiza. ¹⁶ Kunöŋ keu mianğöra goranora akŋamgö mötza ewö, nöŋön mianğöra keu mohok-kun kewö jimam: Anutugö köŋagesöŋi köŋagesöŋi Anutu möpöseibingö tokomakzei, yeŋön mönö nembuk urumohot aka silik miyöhök wuatangöba silik tosatŋi tökömakze. Mewö.

Kembugö semön töröŋi nemegö silikŋi

Mat 26.26-29; Mak 14.22-25; Luk 22.14-20

¹⁷ Inŋini urumelen totokonöŋ tokoba mianğöŋ qahö ölöwahakzemö, mönö toroqeba böliqölimakze. Mianğöra qahö möpöseim eŋgizalmö, areŋ ala jim kutum eŋgizal. ¹⁸ Keu mutukŋi kun kezapne gei kewö möral, “Inŋini urumelen köŋagesögö totokonöŋ tokomakzei, mianğöŋ mönö sutŋine aŋgururuk ahakze.” Keu mi jiget möta bahöŋanök ölni akzawi, mewö möt narizal.

¹⁹ Sutŋine denŋa kambu morömorö aketka Anutunöŋ eŋgehiga denike eŋön mötnaripkö esapesapŋöŋ kin köhöize aka denike eŋön qahö dop köljei, keu mianğön mönö aukŋe asuhumakza. Mianğöra uruyahöt qahö mötza. ²⁰ Urumelen totokonöŋ tokomakzei, mianğöŋ mönö Kembugö semön töröŋi nemingö silikŋi qahö wuatangömakze.

* **11:7:** Jen 1.26-27 * **11:8:** Jen 2.18-23

²¹ Mi kewögöra jizal: Semön töröñi nemakzei, miangören öröröñ qahöpmö, nanñök nanñök nenenini memba könahiba lañ neget teköiga tosatñan toroqeba wösöñini aliga tosatñan o köhöikñi gwötpuk nempa enjololon akze. ²² Ahöahö mirinini ahöm ençiza me qahö? Miangören ölop nene aka o neme. Anutugö urumelen könagesö jijiwilit ak ençibingö mötze me ambazip wanapñi nenenini qahö mi memba et al ençibingö mötze me? Miangöra nöñon inini möpöseim ençimamgöra mötze me? Mewö qahöpmahöpmö, denöwö jim ençibileñak?

²³ Kembunöñ keu niñgiyöhi, nöñon mönö enñon mewöyök mi mötmegöra kewö jimam: Kembu Jisös mamalolo mem wançigetka sunçem miangören beret meyök. ²⁴ Mi memba kötuatköba saiwap jiba mindipköba kewö jiyök, “Ki nani busuna. Mi ençöra aka tököm ençizal. Mi memba mönö ni mötmörim niñgiba malme.” ²⁵ *Mewö juiga neget teköiga mewöñanök qambi memba kewö jiyök, “Qambi ki mönö jöhöjöhö dölökñi akza. Nöñgö sepni kianñon mönö Anutugö jöhöjöhöñi mem köhöii ahöma. Mi nemakñeangö dop mönö ni mötmörim niñgiba malme.”

²⁶ Beret aka qambi miangörenök nemakñei, miangören mönö nalö dop Kembunöñ kömuyöhi, miangö buñaji mem asariba mal öñgögetka lilingöba kaiga teköma. ²⁷ Miangöra kunñan beret me Kembangö qambi miangörenök iwilele qakñe nezawi, yañon mönö Kembangö busuñi aka sepñi memba et ala siñgisöndokñambuk akza. ²⁸ Miangöra ambazip neñon nanini uruninañgö könaji kewötagun mönö beret aka qambi miangörenök neinga dop kölma.

²⁹ Kunñan Kembangö busuñi aka sepñi qahö göda qeba nene töhön ewö lañ nezawi, Kembunöñ mönö yañgö keuñi jim teköiga lömböt qakñe öñgöma. ³⁰ Lañ nempa malgerangöra aka ambazip sehisehiñan mönö sutñine löwöriba kawöl mi-wikñaigetka gwötpukñan lök nöñ qeba kömuget.

³¹ Kömugetmö, nanini urunini kewötpinak ewö, Anutunöñ mönö keunini kewöta jim teköiga lömböt qahö miwikñabin. ³² Mi qahö miwikñabinmö, Kembunöñ keunini kewöta jim teköba mewö mönö nalö kewöñe mindiñgöm neñçimakza. Könañçep jim teköm neñçiiga ambazip uruñini qahö melençeri, yembuk öröröñ könöp sianöñ gebinbuköra mönö mindiñgöm neñçimakza.

³³ Miangöra urumelen alaurupni, nene nemegöra tokomakñei, miangören mönö nanñinañgöra mamböt ançuba öröröñ nemakñe. ³⁴ Kunöñ wösöñi alja ewö, yañon mönö nanñe mire neneñi nema. Tokoba lañ negetka Anutunöñ ençeka keuñini jim teköi lömböt miwikñabepuköra mi jizal.

* 11:25: Eks 24.6-8; Jer 31.31-34

Keu tosatŋi enġoreŋ kamami, nalö mianġoreŋ jim kutum enġimam. Mewö.

12

Nup memegö mötmöt kalem mienġö könaŋini

¹ O urumelenj alaurupni, nöŋön Uŋa Töröŋaŋgö mötmöt kalemŋi kalemŋi mianġö keugöra gukmaulem malbepuköra mötzal. ² Urumelenġö kopa malgeri, nalö mianġoreŋ inöŋ me wainöŋ enġuaŋgiriga tandö lopioŋ omani waikŋini memba möpöseiba malget. Mewö me mewö janjuŋ anda laŋ malgeri, mi ölop mötze.

³ Mianġöra inini keu ki mötmegöra jizal: Anutugö Uŋaŋan kun sölölohöiga “Jisös qesuahözal,” keu mi qahö jiza. Mewöyök Uŋa Töröŋan azi me ambi kun qahö sölölohöm waŋgiza ewö, yaŋön mönö “Jisösnöŋ Kembu ak niŋgiza,” keu mi jimangö osiza.

⁴ *Nup memegö mötmöt kalemŋi mi könaŋi könaŋi akzemö, Uŋa Töröŋan mönö mohot akza. ⁵ Urumelenj könagesö welen qem enġibingöra nup könaŋi könaŋi memakzinmö, Kembunöŋ mönö mohot akza. ⁶ Welen qem enġibingöra Anutunöŋ kukösumŋi körek neŋgöra mendenj neŋgiiga amqeba köhöiba nup meinga ölni könaŋi könaŋi asuhumakza. Ölni pakpak mi Anutugöreŋök kamakzapmö, Anutunöŋ mönö mohot akza.

⁷ Uŋa Töröŋan könagesö urunini naŋgöi köhöibingöra möta nup memegö mötmöt kalemŋi indeliga ölnan mönö mohot mohot neŋgöreŋ kewö me kewö asuhumakza: ⁸ Uŋa Töröŋan kungö uruŋe geba Anutu nam köliga mötkutukutu keu jijigö kalemŋi waŋgiza. Uŋa mohot mianġönök mönö kun sölölohöiga mötmöt qainŋi kun möt yaközawaŋgö kalemŋi buŋa qem aŋguza.

⁹ Kunöŋ Uŋa mohot mi qekötahöba mötnaripkö kalemŋi buŋa qem aŋguza. Toroqeba kunöŋ Uŋa Töröŋi miyöhök qekötahöba mem ölö-ölowakö kalemŋi kalemŋi buŋa qem aŋguza.

¹⁰ Kungöra aŋgöletot memegö ösumŋi waŋgiza. Kungöra Anutugö kezapqetok keu jijigö kalemŋi waŋgiza. Kungöra uŋa aka öme mendenbingö kalemŋi waŋgiiga uŋa ölopŋan me ömewöröme kunöŋ sölölohöiga maljawi, mi ölop kewörakza. Kungöra keuŋi keuŋi qainŋi kun jijigö kalemŋi waŋgiza. Toroqeba kunöŋ keu qainŋi kun jiiga kungöra mi meleyenmapkö kalemŋi waŋgiza. ¹¹ Nup memegö mötmöt kalem pakpak mi Uŋa Töröŋi mohot mianġönök mönö sölölohöba möri dop köljawaŋgö dop mendenjiga körek neŋön nanŋök nanŋök buŋa qem aŋguba maljin. Mewö.

Kraistkö ölni mohotmö, kitipurupŋi gwötpuk.

* 12:4: Rom 12.6-8

12 *Silēnini mohot akzapmō, tōndup miangō uruṇe silegō kitipurupṇi mi gwōtpuk akze. Kitipṇi pakpak mi gwōtpuk akzemō, tōndup mi mindiriba sile mohot akze. Kraistkō ōlṇan mewōyōk mōnō miangō dop akza. 13 Miangō kōnaṇi kewō: Uṇa mohotnōṇ mōnō kōrek nini sōlōlōhōba melun mem neṇgiiga Kraistkō ōlṇi mohot akzin. Nini Juda me kantri tosatṇangō toṇi maljini, nanini nupnini memakzini me tonini ōne welen qem eṇgimakzini, mi tōndup kōrek nini mōnō Uṇa miyōk buṇa qem aṇguinga urunine geiga mōt waṇgizin.

14 Silēninan mōnō sile kitipṇi mohotkō dop qahō akzapmō, miangō uruṇe kitipurupṇi mi gwōtpuk akze. 15 Kōnaninan kewō jibawak, “Ni bōrōya qahō. Miangōra sile qahō toroqeba maljal.” Mewō jibawak ewō, miangōra mōnō tōndup sile mosōta nanṇōk qahō malbawak. 16 Kezapninan kewō jibawak, “Ni jeya qahō. Miangōra sile qahō toroqeba maljal.” Mewō jibawak ewō, miangōra mōnō tōndup sile mosōta nanṇōk qahō malbawak.

17 Silēninan jōmuk je akawak ewō, keu mōtmōtkō kezapninan mōnō denike tatpawak? Mewōyōk jōmukṇanōk kezap akawak, mewō wōrōn mōtmōtkō sōṅgōrōninan mōnō denike tatpawak?

18 Nanṇōk nanṇōk qahōpmō, Anutunōṇ sile kitip mohot mohot mi areṇgōba mōri dop kōljawaṇgō dop mindirim eṇgiiga sile mohot akze. 19 Sile kitip pakpak mi kitip mohot akeak ewō, mōnō denōwō sile mohot akawak? 20 Mewō qahōpmō, sile kitipnini mi gwōtpukmō, silēnōṇ mōnō mohok akza.

21 Miangōra jenōṇ bōrōgōra kewō jimangō osiza, “Ni gōhōra qahō osizal.” Mewōyōk nōrōpnōṇ kōnagōra “Ni gōhōra qahō osizal,” mewō jimangō osiza. 22 Simbisembel qahōpmō, sile kitipnini mōringa lōlōwōrōṇi akzei, mienōn qahōwaketka jebuk malbingō osibin. 23 Sile kitipnini mōringa qetbuṇaṇini eretṇi akzei, mi mōnō esuhuinga qetbuṇaṇinambuk akze. Sile kitipnini mōringa gamuṇinambuk akzei, mi mōnō tōrōrōk esuhuinga ambazip jeṇine dop kōlja.

24 Sile kitipnini aukṇe kondelbingō gamu qahō mōtzini, mi mōnō qahō esuhuinga dop kōlja. Mewō ahakzinmō, Anutunōṇ sile kitipṇi kitipṇi mindiriba jōhōm eṇgiba kitipṇi omanṇi mi qetbuṇa ketanṇi waṇgiiga ōrōrōṇ akze. 25 Sile kitip yeṇōn sutṇine jula aṇgururuk akepukmō, tandōk mohot kōyan kōl aṇgumegōra mōnō areṇgōiga ōrōrōṇ akze. 26 Sile kitip kunṇan sihimbōlō mōtzawi, tosatṇi pakpak mōnō yambuk sihimbōlō mōrakze. Sile kitip kunōṇ qetbuṇa miwikṇaizawi, tosatṇi pakpak mōnō yambuk sōṅgaimakze.

* 12:12: Rom 12.4-5

27 Enjön Kraistkö ölnji akze aka mohot mohot enjön mönö yangö ölnangö sile kitipnji akze. 28 *Miangö dop Anu-tunöñ al enjiiga urumelenj könagesögö nup kewö memakze: Mutuk tosatnji kuñgum enjiiga melaimelai azi aposol akze. Miangö andöñe kambu yahötñi kuñgum enjiiga kezapqetok ambazip akze. Kambu karöbutñi yenjön böhi qağazu akze. Miangö andöñe tosatñan anğöletot meme ambazip akze. Tosatnji yenğöra mötmöt kalem enjiiga kawölñi kawölñi mem ölöwahakze. Tosatñan amqeba köhöiba tosatñi alabauk ak enjimakze. Tosatñi yenğöra kalem enjiiga galömkölköl nup memakze. Tosatñan keu qainñi kun jimakze.

29 Körek enjön mönö melaimelai azi aposol qahö akze. Saumbañ! Körek enjön mönö kezapqetok ambazip qahö akze. Körek enjön böhi qağazu akze me qahö? Körek enjön anğöletot meme ambazip akze me qahö?

30 Kawöl mem ölöwakingö mötmöt kalemñi kalemñi mi körek enğörej ahöza me qahö? Körek enjön mönö keu qainñi kun qahö jimakze. Qahö. Keuñi keuñi qainñi kun jigetka enjön mönö körek mi melenjbingö amqeze me qahö? 31 Enjön mönö nup memegö mötmöt kalemñi kalemñi ölop sorokñi mi buña qem anğubingöra awöwenğömakñe. Mewö awöwenğögetka nöñön köna qetpuk sorokñi kondela miangö mötmöt kalemñi mi kewö jim asarimam:

13

Jöpaköm anğuanğugö kalemñi

1 Nöñön ambazip aka Suep garata yenğö keuñi keuñi qainñi kun miangön keu jiba malbilenjakmö, urukalemnan qahö asuhuza, mönö töndup kewö akilenjak: Goñ qegetka goñgoñ qeri anğötömualñi mörakzini me göjön (biret) uturukögetka kinqororoñ qerakzawi, mönö miangö dop akilenjak.

2 *Kezapqetok keu jijigö mötmöt kalemñi ahöm ningiiga keu asa-asambötñi pakpak mötpilenjak aka keu pakpakö könañi möt yaköbilenjak, miangön mönö dopñe akza me qahö? Mi töndup urukalemnanğö ölnjan qahö asuhuiga mewö mönö yuai omananök aka öne töhön malbilenjak. Mötnarip köhöikñi kötökñi miwikñaiba miangö qakñe kundunangö Toñi jim kutubiga ölop tem köla kundunji qeköba kungen albawakmö, urukalemni qahö asuhuza, mewö töndup mönö yuai omananök aka öne töhön malbilenjak.

3 Sukinapni pakpak ambazip wanapñi yenğöra menden enğibilenjak aka sileni tosatñan ohoget jemapköra tököm

* 12:28: Ef 4.11 * 13:2: Mat 17.20; 21.21; Mak 11.23

engibileŋakmö, urukalemnaŋgö ölŋan qahö asuhuza ewö, mianŋön mönö qahö kötökŋi bauköm niŋgima.

⁴ Kunŋan alaŋi uruŋan jöpaközawi, yaŋön mönö urukönöpŋi qahöpmö, urubönjöh qakŋe ala ak waŋgimakza. Körögisiŋisi qahö möta yuainŋögöra qahö köpösöŋgömakza. Silenŋi qahö mem wahöta jakbak-öranŋböran qahö malja. ⁵ Ahakmemeŋan alaŋaŋgö uruŋi qahö mem bölimakza. Nanŋi ölöwakŋamgörök qahö kapaŋ kölakza. Uruqeŋe ak waŋgigetka urukönöp zilaŋ qahö ahakza. Mem bölim waŋgigetka sihimbölo möröhi, mi qahö mötmöriba mosörakza.

⁶ Tosatŋan bölöŋi akzei, mianŋöra qahö söŋgaizapmö, keu ölni wuatanaŋgömakzei, mönö yembuk mohotŋe söŋgaimakza. ⁷ Nalö dop alaŋi sel jöhöba qöhöröŋe kin köhöiba möt narim waŋgimakza. Mewö me mewö asuhuiga Anutugö jörömqöröm aka al mamböta awösamkakak kinda sihimbölo pakpak möta mökösoŋgömakza.

⁸ Urukalem ahakmeme mi nalö teteköŋi qahö ahöm öŋgöma. Kezapqetok keu jiba keuŋi keuŋi qainŋi kun jimakzei, mianŋön qahöwakŋa aka mötmöt qainŋi kun mianŋön mönö mewöyök omani ak teköma. ⁹ Mötmöt qainŋi kun mi bahösapsap möt yakömakzin aka kezapqetok keu mi bahösapsap jimakzin. ¹⁰ Bahösapsap ahakzinmö, Anutugö kalemŋi kalemŋi aködamunŋinambuk asuhumei, nalö mianŋöreŋ bahösapsap malmalninan mönö qahöwahiga oyaenŋkoyaenŋ siyoŋsayoŋi qahö malbin.

¹¹ Nöŋön namande malali, nalö mianŋöreŋ namande keu jiba malal. Urumötmötŋan namande aiga mianŋö dopkeu kewöta mötmöriba malal. Azi ketanŋi aka mianŋöreŋ namandegöreŋ ahakmeme mi mosöta andö qeal. ¹² Mianŋö dop nalö kewöŋe Anutugö aködamunŋi mi ölop qahö ehakzin. Mi piliknöh uba ehökö tandök ek bibihiba tandökŋi törörök qahö möta öne mötmörimakzin. Mewö mötmörimakzinmö, könaŋgep Anutubuk mesohol köl aŋguba ek soroköbin. Nalö kewöŋe mötmöt qainŋi kun mi bahösapsap möt yaközalmö, nalö mianŋöreŋ mi mönö körek möt yaköm tekömam. Anutunöh ni möt kömum niŋgizawi, nöŋön mianŋö dop yaŋgö könaŋamŋi möt kömum tekömam.

¹³ Keu ki jim köhöizin: Kalem karöbut mötnariŋ, jörömqöröm aka urukalem mi köhöiba ahöm öŋgömemö, urukalem ahakmeme mianŋön mönö sutŋine öŋgöŋgöŋi akza. Mewö.

14

Kezapqetok keu aka keu qainŋi kun jijigö kalemŋi

¹ Urukalemgö könaŋi mönö wuatanaŋgöba malme aka nup memegö mötmöt kalem könaŋi könaŋi mi mönö buŋa qem

angubingö kapan köla malme. Mianjôn ölöpmö, kezapqetok keu jijigö kalemñi membingöra mönö köhöiba kapan köla malme. ² Kunöñ keu qainñi kun jizawanjôn mönö ambazip nenjöra qahöpmö, mönö Anutugörök mi jimakza. Uña Töröñan sölölohöiga keu asa-asambötñi asuhui jimakzawanjöra tosatñi nenjôn keu mi qahö möt asarim wangimaksin. Mönö nanñanök baukôm angumakza.

³ Tönpin maljinmö, kezapqetok keu jimakzawanjôn mönö ambazip urunini mem köhöiba nanjöba urukölalep ak nenjimamgöra aka keu jimakza. ⁴ Kunñan keu qainñi kun jiba mianjôn mönö nanñi uruñi möhamgöba köhököhöi miwikñaimakzapmö, kezapqetok keu jimakzawanjôn mönö urumelenj könagesö pakpak urunini möhamgöba mem köhöim nenjimakza.

⁵ Injini körekñan keu qainñi kun jimegöra mötzalmö, kezapqetok keu jimegöra mönö kapan köla gwötpuk mötzal. Kezapqetok keu jimakzawanjôn mönö keu qainñi kun jimakzawi, mi ongitza. Keu qainñi kun jiba mi mianjörenjök nanine keunöñ melenjawi, mewö mönö öröröñ akzahot. Mewö aiga keuñan mönö urumelenj könagesö urunini möhamgöba mem köhöim nenjiiga dop kölja.

⁶ O urumelenj alaurupni, nöñön enjörenj kaba keuñi keuñi qainñi kun jibileñak, mewö mönö denöwö mem ölöwak enjibileñak? Mewö qahöpmö, Anutugörenj keu indelmam me mötmöt qainñi kun enjimmam me kezapqetok keu jimam me goro kusum enjimmam ewö, mianjôn mönö mem ölöwak enjimmam.

⁷ Awölop me gita kulele me yuai kunöñ lijetkö imbiñi miwikñaimakzini, mienjôn mönö malmalñini qahöpmö, könajini mönö mewöñanök kewö ahöza: Kunñan awölop lañ uba me gita kulele lañ qeiga mianjôn qetñini nanjök nanjök qahö miwikñaimakza ewö, lijetkö imbiñi mönö denöwö möt asaribinak? ⁸ Mewöyök tömun um böligetka qetñi törörök qahö möt asarizin ewö, danjôn mönö bim qeqegöra jöjöröbawak?

⁹ Enjö könajinan mewöñanök ahöza: Nesilamñinan ambazip qahö möt asarimeangö dopkeu lañ jize ewö, kunñan keu mewöñi mönö denöwö möt asaribawak? Keu mewö jizei, mianjôn mönö öne lañ luhutnöñ anakza. ¹⁰ Gölmeñi gölmeñi mianjörenj keu murutñi murutñi dawik jimakzini, mi danjôn mötpawakmö, töndup körek mienjôn mönö keugö könajni möt asaribingöra aka ahöze.

¹¹ Könajni mianjöra aka jimakzinmö, kunöñ keu jiiga keuñangö könajni qahö mötzal ewö, nöñön yanjö keuñangö kiannji akiga yanjôn mewöyök nöñgö keuñangö kiani akza. ¹² Enjö könajinan mewöñanök ahöza: Injini nup memegö

mötmöt kalemni kalemni buña qem anğubingö awöwenğögetka dop kölja. Mianğoreñ mönö kalem kewöni memingöra kapan kölmalme: Mötmöt kalem urumelenñ könagesö uruñini möhamğöba mem köhöimakzei, mönö mi buña qem anğuba nupnöñ algetka qetpuk akña.

¹³ Mianğöra keu qainñi kun jimakzawañön mönö kewö köuluköiga dop kölma, “O Anutu, keu jizali, mi melenmamğö mötmöt kalemni niñgiman.” ¹⁴ Mianğö könañi kewö: Nöñön keu qainñi kun jiba köuluközal ewö, nöngö uñanan keuyök jiba köuluközapmö, urumötmötnan mönö ölni kun qahö miwikñaiza.

¹⁵ Mianğöra mönö denöwö akiga dop kölma? Nöñön mönö uñananöhök qahöpmö, urumötmötni mewöyök mianğoreñ ala köulukömakñam. Liñet kölma möpöseimakzali, mi uñananöhök qahöpmö, urumötmötni mönö mewöyök mianğoreñ ala kölakñam. ¹⁶ Gi Anutu uñagan möpöseim wañgizan ewö, ambazip omanñi kunñan totokoñine kaba tata möpöseizanañgö könañi qahö möt kutumawi, yañön mönö “Keu mi ölna,” mi denöwö jibawak? Wania jizani, yañön mi qahö möt asariba öne tönpin tatza. ¹⁷ Gi ölop Anutu möpöseizanmö, keugan tosatñi yeñgö uruñini qahö möhamğöba mem köhöim engiza.

¹⁸ Nöñön körek iñini engoñgita keuñi keuñi qainñi kun mi gwötpuk jimakzali, mianğöra Anutu möpöseizal. ¹⁹ Anutu möpöseizalmö, urumelenñ könagesö uruñe ambazip kusum engimamğöra kapan kölma möt asarimeğöra keu jitñi 5 jimamğö mötpi ölni akza. Keuñi keuñi qainñi kunöñ keu jitñi 10.000 nanañgörök jimamğö mötpi eretñi akza.

²⁰ Urumelenñ alaurupni, iñini keu kewöta mötmörimakzei, mianğoreñ mönö namande tandök mosöta ambazip ketanñi yeñgö dop mötmöriba malme. Bölöñi akin jigetka mianğoreñ mönö morösepsep ewö aka osimemö, mötkutukutuñinan mönö ambazip ketanñi aka malme. ²¹ *Mosesğö Köna keunöñ keu kun kewö ohoget ahöza,

“Nöñön kian ambazip kuñgum engibiga könagesö kiengöreñ kaba jitñinan keu tandökñi kun jigetka lan welipkömakñemö, mi töndup nöngö keuni qahö mötme. Kambu nöñön mewö jizal.”

²² Keu mianğö dopkeu qainñi kun jiinga uruñini qahö melenget yeñön mötketka Anutugö aiwesökñi ak engizapmö, mötnarip ambazip neñgöra mianñön mönö aiwesökñi kun qahö akza. Mi qahöpmö, kezapqetok keu jiinga mianñön mötnarip ambazip neñgöra Anutugö aiwesökñi akza. Urumelenğö kopa yeñön mi mötketka Anutugö aiwesökñi kun qahö ak engiza.

* 14:21: Ais 28.11-12

²³ Urumelenj könagesö enjôn tokoba körek enjôn keunji keunji gainnji kun mianğorej jigetka tosatñan Buña keu qahö kusum enğigetka urunji qahö melejda öne mianğorej öngömei, yeñôn mönö auruba kewö jibeak me qahö, “Nöröpñinan mönö sohoi kahalalom akze.”

²⁴ Mewö jibeakmö, körek enjôn kezapqetok keunji keunji jigetka kunñan Buña keu qahö kusum wanğigetka mötnaripñi qahö öne totokonjine öngöma ewö, körek enjôn mönö sinğisöndokñi indela urunji qahö melejñöhängö keunji jim tekögetka kónañamñi möt kutuiga aukñe asuhuma. ²⁵ Urunañğö keu tölapñi tölapñi aukñe asuhuiga yanñôn mönö dapköba eta Anutu waikñi memba möpöseiba kewö jim miwikñaiba qetma, “Anutunöñ ölña enğö sutñine malja.” Mewö.

Urumelenj totokogö areñi kewö:

²⁶ O urumelenj alaurupni, mewögöra nini mönö denöwö jiinga dop kölma? Injini Buña keugö tokomakñei, mianğorej mohot mohot enjôn mönö körek areñini kun me kun mi kewö ahakñe: Kunöñ Buña liñetkö areñi aliga kunöñ Buña keu kusum enğiiga kunöñ Anutugö goro dölökñi indeliga kunöñ keu gainnji kun jiiga kunöñ mi melejma. Areñ pakpak mi mönö urumelenj könagesö urunini kuñguget köhöibingöra aka ahakñe.

²⁷ Tosatñan keu gainnji kun jime ewö, ambazip 4 qahöpmö, yahöt me karöbut yeñönök mönö totoko mohotkö urunje mewö jime. Yeñönök mönö areñinanğö dop awatanj jigetka kunñan mi melejma. ²⁸ Kunñan keu melejmamğö dop qahö akza ewö, yeñôn mönö urumelenj könagesögö totokonöñ keu bök tata nanñinanğörök keunji gainnji kun jigetka Anutunöñ mötma. ²⁹ Kezapqetok ambazip yeñğoreñök yahöt me karöbut yeñğörök mönö areñ enğigetka keu jigetka tosatñan mönö keunji kewötme.

³⁰ Mewö akñemö, kunñan totokonöñ tariga Anutunöñ goro keu urunje indeli mötza ewö, yanñôn mönö mi jiiga kezapqetok keu mutuk jizawanñôn keunji mosöta bök tatma. ³¹ Ambazip körekñan Anutugö goroñi mötketka urunji nanğöi ölöwakñegöra injini mönö körek pakpak ölop nalöñini memba areñinanğö dop kezapqetok keu jime. ³² Kezapqetok ambazip yeñôn mönö ölop uñañini galöm kölgetka uñañinan keu bapñe anjeañğö dop akze.

³³ Anutunöñ kizik-kazuk Tonji qahöpmö, luai Tonji akza. Mianğöra totokonjini mönö areññöñ wuatañğöba ahakñe. Ambazip sarakñi yeñğö sutñine könagesö dop ahakzei, injini mewöyök mönö mianğö dop kewö ahakñe: ³⁴ Ambi enjôn mönö urumelenj könagesögö totokonjine keu bök tatme. Yeñôn keu

jimeanğö dop qahö akzemö, Köna keu ahözawañğö dop mönö keu bapñe anda malme.

³⁵ Ambinöñ urumelen könagesögö keu jim kutuba kusum enğiiga qahö dop kölja. Mianğöra keu kungö könañi mötpingö mötze ewö, yeñön mönö miriñine anda tata nanñini apurupñini qesim enğime.

³⁶ Anutugöreñ Buña keu mianñön mönö enğö sutñineyök ahuyök me qahö? Keu mianñön ahuba sehiba mala enğöreñ kaba enğö buñayök akza me qahö? ³⁷ Kunöñ kewö jibawak, “Nöñön kezapqetok keu jibiga Uña Töröñan sölölohöm niñgiiga keu miambuk urumohot qahö akzal.” Mewö jizawañön mönö keu ki möt yaköma: Nöñön ambigöra keu ohom enğizali, mianñön mönö Kembugö jöjopañ keu akza. ³⁸ Kunñan keu mianğö kezap qahö ala silebile malja ewö, iñini mönö azi yangö keugö kude kezap al wañgiba malme.

³⁹ Mianğöra urumelen alaurupni, iñini mönö kezapqetok keu jibingöra awöweñgöba malme aka keu qainñi kun jimegö soñgoñi mi kude alme. ⁴⁰ Mi kude almemö, yuai pakpak mönö törörök areñ ala wuatañgöba ahakñe. Mewö.

15

Kraistnöñ kömupnöhök wahörök.

¹ O urumelen alaurupni, nöñön Ölöwak Buña jim asarim enğiali, mi ölum enğubapüköra mönö köl gulim enğimam. Iñini mi buña qem añguba mötnariñini mianğöreñ ala töndangöba kinje. ² Nöñön Ölöwak Buña jim asarim enğiali, iñini mi mianğö dop töp memba añgön kölme ewö, mianñön mönö mem letot enğiiga Suepkö buñaya akñe. Mewö qahö akñe ewö, uruñini mönö öne töhöñ melenđa malje.

^{3*} Nöñön keu tosatñi pakpak görañe ala nanak Buña keu möt añgön kölali, mi mötpi öngöiga mianğö keu kötñi mötmegöra mi kewö enğial: Kraistnöñ mönö Buña Kimbi ahözawañğö dop neñgö siñgisöndokninañgöra aka kömuyök. ⁴ *Kömuiga Buña Kimbi ahözawañğö dop löm kölgetka sömañi karöbut aiga kömupnöhök wahörök. ⁵ *Kömupnöhök wahöta Pitögöreñ asuhuyök aka mianğö andöñe gwarekurupñi 12 yeñgöreñ asuhuyök.

⁶ Mianğö andöñe nalö mohot mianğöreñök urumelen alaurupnini qötöñini 500 oñgiröhi, mönö yeñgöreñ asuhuyök. Yeñgöreñök ambazip ölni yeñön toroqeba nalö kewöñe mewöyök maljemö, tosatñan lök kömuget. ⁷ Mianğö andöñe

* 15:3: Ais 53.5-12 * 15:4: Sum 16.8-10; Mat 12.40; Apo 2.24-32 * 15:5: Mat 28.16-17; Mak 16.14; Luk 24.34, 36; Jon 20.19

munji Jeimsgörej asuhuyök aka mianğö andöñe aposol pakpak yenğörej asuhuyök.

⁸ *Mienğörej körek asuhubagun qöndökñi mönö nönğörej mewöyök asuhuyök. Nönön aposol mi asai ewö öröpköba aluji asuhuyal. ⁹ *Mianğö könañi kewö: Nönön aposol yenğö sutñine mötpi eriga dagibezupñini akzal. Anutugö urumelen könagesö sesewerowero ak engiba malali, mianğöra nönğö qetni aposol qetketka mötpi gamuñambuk akza.

¹⁰ Gamuñambuk akzapmö, nalö kewöñe yuai akzali, mi mönö Anutugö kalem möriamñan mem letota nam köl niñgiiga maljal. Yanön kalem möriamñi niñgiiga liklak qahö akiga eta qeba omañi qahö ahökmö, nönön mönö aposol körek luhut al engiba köhöiba nup memba malal. Mi nanak qahöpmö, Anutugö kalem möriamñan mönö inahöm niñgiiga nupnanğö ölñi mewö asuhuba sehiyök.

¹¹ Nönön meali me yenön megetka ölñi asuhuyöhi, mi muat. Neñön mönö Ölöwak Buña keu mewö jim asarimakzin aka injini mianğö dop uruñini melenđa Kraist möt nariba malje. Mewö.

Nini kömupnöhök denöwö guliba wahötpin?

¹² Mötket! Kraistnönğ guliba kömupnöhök wahöröhi, yanğö könañi mewö jim asarimakzin ewö, engörejök tosatñan mönö denöwö aka kewö jimakze, “Kömukömuñi yenön qahö guliba wahötme.” ¹³ Mewö jimakzemö, kömukömuñi yenön qahö guliba wahötpcak ewö, Kraistnönğ mönö mewöyök qahö guliba mal köhöibawak. ¹⁴ Anutunönğ Kraist qahö mem gullii kömupnöhök wahötpawak ewö, nini Buña keuñi mi jim asarimakzini mi omañi akawak. Mi möt narigetka mianön mewöyök pömsöm qeba omañi akawak.

¹⁵ Anutunönğ ölña kömukömuñi qahö mem gulim engii wahötpcak ewö, Kraistnönğ mönö mewöyök qahö mem gullii wahötpawak. Nini mi töndup Anutugö könañi kewö nanğöba jimakzin, “Anutunönğ mönö Kraist mem gullii kömupnöhök wahörök.” Keu mi ölñi qahö akawak, ambazipnönğ mönö mianğöra aka könañamnini miwikñajetka munenji aiga ölöp nönğöra kewö jibeak, “Anutugö könañi mönö nanğöba jim sohomakza.” Keu mianön mönö gamuñamñuk akawak. ¹⁶ Anutunönğ kömukömuñi qahö mem gulim engii wahötme ewö, Kraistnönğ mönö mewöñanök qahö guliba wahötpawak.

¹⁷ Anutunönğ Kraist qahö mem gullii wahötpawak ewö, injini mönö öne töhöntöhön möt narim wanğiba toroqeba singisöndokñinanğö kösöğwarönönğ malbeak. ¹⁸ Mewö aiga alaurupninan Kraistpuk qekötahöba kömugeru, yenön mönö

mewöyök sohoba könöp siagö buñaya akeak. ¹⁹ Nini Kraist jörömqröm ak wañgiba gölmenöñ malbinangö dop galöm köl neñgi miangören tekömapköra mambötzin ewö, nini mönö ambazip tosatñi pakpak engongita bapñine geba öngöpñi daböñi malinga körekñan wösö mötmöt ak neñgimakzeangö dop akinak.

²⁰ Mewö akinakmö, Kraistnöñ mönö ölna guliba kömukömuñi yeñgö jitñe memeniñi aka kömupnöñök wahörök. ²¹ Miangö könañi kewö: Azinöñ kömup kondoriga asuhui könahiba kömumba mala korin. Kömumba maljinangöra aka azi kunñan kömumba guliba malmal köhöikñi kondoriga asuhuyök. Miangöra nini körekñan mönö mewöyök guliba kömupnöñök wahötpin. ²² Körek neñön Adam ewö aka kömumbini, mewöñanök Kraistpuk qekötahözini, Anutunöñ nini körek mal köhöibingöra mem gulim neñgima.

²³ Mem gulim neñgimapmö, körek neñön mönö Anutunöñ nalö alöhangö dop guliba wahötpin. Kraistnöñ jitñememenini aka guliiga miangö andöñe yangö buñani akzini, neñön lilingöba kaiga nalö miangören guliba wahötpin. ²⁴ Kraistnöñ mönö lilingöba kaba ömewöröme pakpak gölme dop ösummumu qakñe galöm kölakzei, miengö kukñini memba et ala ösumñini körek könderma. Mi könderda bemtohoñi Anutu Iwigö böröñe aliga gölmenöñ malmal miangören teköma.

²⁵ *Kraistnöñ galöm köla mal öngöiga Anutunöñ Buña keu ahözawangö dop “mönö kerökurupñi körek luhut ala nanñi köna bapñe al engima.” Kraistkö galömkölköl nupñan mönö miangören teköma. ²⁶ Kerökurupñi luhut al engiiga miangören kömup Toñan mönö qöndökñi aiga memba et al wañgima.

²⁷ *Miangö könañi mi Buña Kimbinöñ kewö ahöza, “Anutunöñ mönö yuai pakpak yangö köna bapñe ali ahöza.” Keu mewö ahözapmö, “Yuai pakpak ali ahöza,” keu mewö jiga könañi mönö aukñe kewö ahöza: Anutunöñ yuai pakpak Kraistkö bapñe ali ahöiga nanñi mönö qahö memba eta Kraistkö bapñe al anguyök. ²⁸ Mewö qahöpmö, Anutunöñ yuai pakpak Nahönñangö bapñe aliga galöm köla kerökurupñi pakpak nanñi kukösumñangö bapñe al engima. Mi teköiga miangören Anutunöñ mönö Nahönñi mewöyök nanñi kukösumñangö bapñe ala galöm köl wañgima. Mewö aka Anutunöñ yuai pakpakö Kembuñi ak teköba mal öngöma.

²⁹ Keu kun kewö: Ambazip tosatñan uruñini qahö melennda öne kömugerangöra tosatñan kömukömuñi mi bauköm engimegöra jiba salupñini aketka dumñe kunbuk o melun mem engimakze. Kömukömuñi yeñön qahö guliba wahötpeak ewö, yeñgö nup ölnan mönö denöwö asuhubawak? Anutunöñ

* 15:25: Sum 110.1 * 15:27: Sum 8.6

kömugeri, mi qahöpmahöp mem gulim engii wahötpeak ewö, ambazip mewöñan mönö denöwögöra aka jigetka yengö salupñine o melun mem engimakze? Nupñini mi mönö öne membepuk.

³⁰ Kömumba qahö wahötpinak ewö, neñön mewöyök mönö urunini Anutugö nupnöh qahö ala jöhöbinak. Anutugö nupköra aka kömumbinbukö lömböt bapñe sundan qahö anda malbinak. Qahö.

³¹ Kömupnöh mönö nalö dop gwahöt niñgimangö dop akza. Keu mi ölnja. O urumelen alaurupni, nöñön Kraist Jisös Kem-bunini yambuk kinda engöra aka sileni memba öngömakzali, mianğö dopkeu ölni mi aukñe jibi mötmegöra mötzal.

³² *Nani imbi-imbi wuatangöba nup ki memangö mötmörize ewö, yuai kianön mönö denöwö bauköm niñgima? Mewö qesim engibiga mi mönö mötmöriba melenme: Nöñön Efesus siti kianğoreñ ambazip ubibi kanjamñinambuk ewö miwikñai kōmumbilenbuköra yembuk auba malal. Mönö tötböröm aka auba malal. Kömumbagun qahö guliba wahötpini, mewö mönö qahö aubilenjak. Qahö! Mewö aiga ölop tosatñi yembuk kewö jibilenjak, “Uran kömumbinağöra mönö ölop nene sösoñgai ala o köhöikñi nempa malbin.”

³³ Janjuñ kude akñe. “Ambazip bölöñi yembuk köisirik tatketka ahakmeme ölopñan bölüma.” Keu kun mewö ahöza.

³⁴ Engö sutñine tosatñan Anutu qahö möt wangizei, mianğöra gamuñini mötmegöra mi jizal. Mianğöra mönö gukmaulemñini mosötme. Imbiñinan letoriga törörök möta siñgisöndok kude toroqeba ahakñe. Mewö.

Sileninan guliba wahöta tandökñi kun akña.

³⁵ Kunöh kewö qesibawak, “Anutunöh kömukömuñi mi denöwö mem gulim engii wahötme? Sileninan mönö tandök denöwö melenñiga asuhume?” ³⁶ Mewö qesibawak, mönö uruqahö keuya jibawak. Inini sehoñ kötni qahö kömuiga öne qesin gilme ewö, mianön mönö qahö jula wahötma. ³⁷ Kötnangö ipñi wahötmawi, mi qahö kömötzanmö, kötnanök qesin giljan. Wit me sehoñ kötni me kötni tosatñi gilakzan.

³⁸ Miyök gilakzanmö, Anutunöh mönö sihimñangö dop ipñi wangima. Kötni tandökñi nanñök nanñök mi nanñini ipñi engimakza.

³⁹ Yuai busuñini mi tandökñini mohot qahö. Ambazip busuñini nanñök, sömbup busuñini nanñök, nei busuñini nanñök aka söra busuñini mi nanñök.

⁴⁰ Mianğö dop Suepnöh malmalgö sile mi nanñök akza aka gölmenöh malmalgö sile mi nanñök akza. Nanñök

* 15:32: Ais 22.13

nanjök akzahotmö, Suep silegö aködamunji mi gölme silegö aködamunji onjgita qainji kun akza. ⁴¹ Wehögö asakmararañi mi nanjök, köingö asakmararañi nanjök aka senjelau miengö asakmararañini mi nanjök. Senjelau asarigetka tosatñi miengö asakmararañini mi senjelau tosatñi miengö asakmararañini onjgirakza.

⁴² Guliba kömupnöhök wahötpini, miangö könañan mönö miangö dop ahöza. Sile löm kölbini, mianjön gisahöba qahöwakñapmö, Anutunöñ mi mem gulii wahötmawi, mianjön mönö qahö kömuma. ⁴³ Sile löm kölbini, mianjön lölöwöröñi aködamunji qahö akzapmö, Anutunöñ mi mem gulii wahöta miangöreñ mönö köhöikñi aka asakmararañambuk akña.

⁴⁴ Sile löm kölbini, mianjön gölmenöñ malmalgö sileya akzapmö, Anutunöñ mi mem gulii wahöta miangöreñ mönö uña mire malmalgö sileya akña. Gölmegö sile ahöza ewö, miangö dop uñagö silenji mi mewöyök ahöza. ⁴⁵ *Miangö keunji mi Buña Kimbinöñ mewöyök kewö ohoget ahöza, “Azi mutukñi Adam yañön letota uñañi miwikñaiiba söngörö ösumñi öröba malmalñambuk ahök.” Keu mi möringa likepñi kewö asuhuyök: Adam qöndökñan mönö memguliguligö uñañi ahök. ⁴⁶ Uñagö yuainji mi mutuk qahö asuhuyökmö, gölmegö yuainji mianjön mönö mutukñi akza. Uñagö yuainjan mönö miangö andöñe asuhuyök.

⁴⁷ Anutunöñ azi mutukñi sömsömnöhök miwikñaiiga gölme azia asuhuyök. Azi könañgepñi yañön mönö Suepnöhök eta sutnine asuhuyök. ⁴⁸ Gölme ambazipnöñ azi gölmenöhök asuhuyöhi, mönö yañgö dop akze. Suepkö buña akzinañön azi Suepnöhök eta asuhuyöhi, mönö yañgö dop akzin. ⁴⁹ Nini gölme azi mutukñañgö kaisongolomñi memba maljini, miangö dop Suep azigö kaisongolomñi mi mewöyök memba malbin. Mewö.

⁵⁰ O urumelenj alaurupni, nöñön keu kewö jibi mötme: Sep busuninan mönö Anutugö bemtohoñ uruñe angota dum memegö dop qahö. Mi osimahot. Sile kianjön gisahöba qahöwakñawi, mianjön mönö oyaenjkoyaen qahö akña. Suepkö dum qahö ayapkömawi, sile kianjön mönö mi memangö osima.

⁵¹ *Mötket! Nöñön keu tölapñi kun kewö indelmam: Körek neñön mönö qahö nöñ qeba kömumbin. Qahöpmö, kömukömuñi yeñön letotketka tosatñi neñön mönö sileninambuk letotpin. ⁵² Anutunöñ kömukömuñi mem gulim enjiiga tömun qainji kun qöndökñan qeriga miangöreñ wahötketka neñön biliksik aliga wölañök letotpin. Mutuk kömugeri, yeñön mönö kunbuk qahö kömume.

* 15:45: Jen 2.7 * 15:51: 1 Tes 4.15-17

53 Sep busu ki gisahöba qahöwaktawi, mianön mönö letota qahö ayapkömawangö dop akña. Sile ki kömumawi, Anutunöj mi mönö opo ewö qeköba mianjö salupñe sile qahö kömumawi, mi nenjii memba maluku ewö löngötpin.

54 *Mewö akzapmö, letotletot mi ak teköiga silenini qainñi kun meinga qahö kömumba gisahömawi, nalö mianjörej mönö söngaibin. Buña Kimbinöj keu ohoget ahözawi, mianön mönö öljambuk aiga mianjö dop kewö jime, “Yanjön mönö kömup Tonji könderda luhut aliga köirañ aljin.”

55 *Keu mianjö alañi kun kewö, “O kömup Tonji, göñön mönö luhut almanangö dop qahö. O kömup Tonji, göhörej lingip jitñi mianön mönö nenjöhmangö osima.”

56 Keu mewö ahözapmö, kömupkö lingip jitñi mi singisöndok ahakmeme. Jöjöpañ keuñan mönö singisöndok akinbukö songo aliga töndup ahinga kukñambuk ahakza. 57 Kukñambuk ahakzapmö, Kembunini Jisös Kraistnöj mönö Anutugörej bohon köliga alabauknini aiga yangöra aka luhut ala malbin. Mianjöra “Anutu saiwap!” jizal.

58 O wölböt alaurupni, luhut albinangöra enön mönö kin köhöiba anjanbanjan mosöta uruñini kude öngöba eta ahakña. Kembugörej qekötahöba nupñi megetka öljän mönö eta omani qahö akña. Mi möt yaköba Kembugö nupñi mi mönö urukönöp* qakñe böñ qeba pöndañ memba malme. Mewö.

16

Jerusalem alabauk engimegö jimkutukutuñi

1 *Judia könagesö sarakñi yengöra alabauk moneñ tokomegöra qesim ningigeri, mianjöra kewö jim kutum engizal: Nöñön Galesia prowinsgö urumelen könagesöñi könagesöñi jim kutum engiali, enön tok mönö mianjö dop kewö ahakñe:

2 Sonda dop wehön mutukñi mianjörej inñi körek nanjök nanjök mönö naluk alakñe. Töhötmöriam memakzeangö dop moneñini bahöñi mi köweñini görañe ala galöm köla malme. Mewö aketka nalö engörej kabiga mianjörej naluk sanjabañga almeanjö dop qahö akñemö, mi ölop köweñineyök memba altanöj alme.

3 Mewö aketka engörej kamami, nöñön nalö mianjörej ölop jim-asa-asari kimbi ohoba azi nup mianjö mötket dop köljawi, mönö yengö böröñine ala melaim engibiga mindi-mindiri kalemñini mi memba Jerusalem anme. 4 Nöñön

* 15:54: Ais 25.8 * 15:55: Hos 13.14 * 15:58: Urukönöp mi Kembugörej

ölopñangöra jiza. Urukönöp bölöñi mi qahö. * 16:1: Rom 15.25-26

yembuk mohotje anmamgö anmam ewö, yeñon mönö ölop nömbuk toroqeba mohotje köwet kutuba anbin. Mewö.

Polgö nupñangö aka köna anangö areni

⁵ *Nöñon Masedonia prowins ongita anmam. Miangöra Masedonia mosötagun mönö engören kamamgö mötzal. ⁶ Engören kaba nalö tosatñi embuk tatpileñak me kömunjan kie nalöñi (winter) mi mewöyök engö sutñine toroqeba mal teköbilenjak. Mewö malbi ölop bauköm niñgigetka denike denike anbilenjak, miangören mönö amqeba köna toroqeba anmam. ⁷ Nalö kewöje engören kaba kusukñanök engeka engongita anmamgö qahö mötzalmö, Kembunöñ on jima ewö, mönö nalö tosatñi embuk tatmamgö jöjörözal.

⁸ **Mewö jöjörözalmö, mutuk Efesus siti kiangören toroqeba malbi yambu jeñiqe qe dölökñi (pentekost) mianön kam kuñguma. ⁹ Anutunöñ nöngöra nupkö nanunñi ketanñi öröi ölop nup ketanñi membi ölni asuhum sehimakzapmö, gwötpukñan tuarenjoñ ak niñgimakze. Miangöra kiangören toroqeba malmamgö mötzal.

¹⁰ *Timotinöñ ni ewö Kembangö azi ipñi aka nupñi memba malja. Miangöra yanön engören kama ewö, inini mönö köyan köl wanñigetka kenñöt mötmöññi qahö engö sutñine malma. ¹¹ Kunñan kun kude ek sirik kölmappmö, embuk mal teköba nöngören kamamgö jimawi, miangören mönö bauköm wanñigetka luainöñ engömosöta lilinñöba kama. Nöñon urumelenñ alaurup yembuk i ekingö mambötzin.

¹² Urumelenñ alanini Apolos yangö keunñi kewö jimam: Yanön urumelenñ alaurup yembuk engören kamegöra jiba köhöikñanök uru kuñgum wanñial. Mi wanñialmö, nalö kewöñe engören kamamgö tököm köhöiza. Könanñep nalöñi ölop ahöm wanñimawi, mönö miangören kama. Mewö.

Yaizözkök keu teteköñi

¹³ Inini mönö uruguliguli mala mötnaripñini köl guliba kin köhöiba malme. Azi köhöikñangö dop mönö urugö nanñonangö ambazip aka Kembangö kukösumñambuk kinme. ¹⁴ Yuai pakkak aka memei, mi mönö urukalemnöñ aketka asuhuma.

¹⁵ *Stefanas yangö mire maljei, inini mi möt engize. Akaia prowinsnöñ nup meinga urunñini melenñetka nupninangö ölni mutukñi mewö asuhuyöhi, mötze. Yeñon ambazip sarakñi mi pöndañ welen qem engiba urunñini miangören jöhöba ala maljei, mi mötze. O urumelenñ alaurupni, nöñon urunñini kewö kuñgum engizal: ¹⁶ Inini tok ambazip mewöñi aka yembuk

* **16:5:** Apo 19.21 * **16:8:** Lew 23.15-21; Dut 16.9-11 * **16:8:** Apo 19.8-10

* **16:10:** 1 Kor 4.17 * **16:15:** 1 Kor 1.16

torogeba nup mohotje memba Anutu welenni qemakzei, mönö körek yengö keunini bapje anda malme.

¹⁷ Nöjön Stefanus Fortunatus aka Akaikus ki kagerangöra söngaimakzal. Inini nömbuk Efesus ki qahö malgetka yejön mönö engö salupnini aka köisirik ak ningigetka dop kölja. ¹⁸ Yejön engö uñanini körö-ölöwak qeba maljei, miangö dop mönö nöngö uñani mewöyök körö-ölöwak qem ningiba malget. Miangöra inini mönö azi mewöni yengöra mötket öngöiga mi aukneyök jiba keuninangöra törörök kezap ala malme.

¹⁹ *Urumelen könagesöni könagesöni Eisia prowins kiangoreñ maljei, yejön mönö yaizözköknini algetka engöreñ kaza. Aqila Prisila aka urumelen könagesö yetkö mire tokomakzei, yejön mönö Kembangö qetne yaizözköknini gwötpuk algetka engöreñ kaza. ²⁰ Urumelen alaurup pakpak Efesus ki maljei, yejön mönö yaizözköknini algetka engöreñ kaza. Inini mönö urumelen alaurupnini yembuk jölöñini jiba angum anguba numbuñini yöhötüm nembra malme.

²¹ Nani yaizözkökni engöreñ ala qetni nani börönan kewö ohozal: Pol.

²² Kunñan Kambu qahö jöpaköba urukalem qahö aka malja ewö, Kembunöñ mönö qesuakni yangö qakne ali öngöma. Kembunini, gi mönö kanöñ!

²³ Kambu Jisösgö kalem möriamñan mönö embuk ahöma.

²⁴ Kraist Jisösbuk qekötahöba kinjei, nöngö urujöpaknan mönö körek embuk ahöba kötuatköm engii malme. Keu mi ölnja. Mewö.

* 16:19: Apo 18.2

Korint Kimbi 2 **Polnönj Korint yengöra kimbi aliga 2 ahök.** **Jim-asa-asari**

Pol aka Korint urumelen könagesö yenjon urumohot ölöpnj qahö aketka nalö miangören Polnönj Masedonia mala kimbinji ki ohoyök. Tosatnan Pol tuarenjon köhöiknji ak wangigetmö, Polnönj töndup anjururuk memba et ala yembuk urumohot akingö kapanj kölok. Anjururukjni tekömapkö urusösöngainji kondel enjyök.

Kimbi bahöni mutuknji (Boñ 1-7) miangören Polnönj Korint urumelen könagesö yembuk jöhöjöhö ahöhangö keunji jiza. Könanji denöwögöra urumelen könagesö mi köhöiknanök jim enjyök? Mewö aiga urunini melenja urumohot akeri, miangö sösöngainji kondela jim asariza.

Kimbi bahöni 2 (Boñ 8-9) miangören Judia urumelen könagesö bauköm enjiba naluk enjimegöra kuñgum enjiza.

Kimbi bahöni 3 (Boñ 10-13) miangö keunji kewö: Böhi takapulakanji tosatnan nanjnini qetjni 'Aposol ölnj' jiba Polgöra aposol munenji jigetka Polnönj keu miangö likepnji melen enjyök.

Buk kianjö bahöni bohonnji 5 mi kewö:

Jim-asa-asari keu 1.1-11

Pol aka Korint urumelen könagesö 1.12-7.16

Judia urumelen kambu yengöra naluk alme 8.1-9.15

Polnönj aposol ölnj akzawanjö kukösumnji 10.1-13.10

Keu teteköni 13.11-13

¹ *Anutunönj sihimnanjö dop Pol ni kuñgum ningiiga Kraist Jisösgö melaimelai azi aposol akzal. Nönön urumelen alanini Timotibuk tatzit. Korint sitinönj Anutugö urumelen könagesö maljei aka ambazip saraknji pakpak Akaiia prowinsjni dop köla maljei, netkön embuk Buña keu eraum mötpingöra kaba kimbi ki ohozit.

² Anutu Iwinini aka Kembu Jisös Kraist yetkön mönö kalem möriam enjyohotka luainönj malme.

Polnönj Anutu urukölalepnjanjöra möpöseiza.

³ Nini Kembunini Jisös Kraistkö Anutu Iwinji möpöseimakzin. Yanjon mönö ak-kömukömu Tonji aka urukölalep pakpak nenjimakzawanjö Anutunji akza.

* 1:1: Apo 18.1

4 Nini kahasililin kōnaŋi kōnaŋi miwikŋaimakzini, nalō mianğoreŋ Anutunōŋ uruqesawōlim neŋgimakza. Uruqesawōlim neŋgii mōta mianğō qakŋe kininga tosatŋan kahasililin kōnaŋi kōnaŋi miwikŋaimakzei, mi mōnō ölöp amqeba uruqesawōlim eŋgimakin. 5 Mianğō kōnaŋi kewō: Kraistpuk qekōtahōinga yaŋğō sihimbölōŋan qaknine öŋğöi kelenmaleleŋ mōrakzinmō, mianğō dop uruqesawōlim mewōŋanök neŋgii Kraist qekōtahōinga urukōlalepŋan urunine geiga kelenmaleleŋ mōrakzin.

6 Neŋön köŋjilin uruŋe maljin ewō, Anutunōŋ mōnō iŋini uru qesawōlim eŋgii uruŋini kunbuk melenđa oyaenƣoyaenƣ akŋegōra mōtza. Anutunōŋ uru qesawōlim neŋgiiga eŋön mi eka nanŋinak uru qesawōlim miwikŋaime. Uru qesawōlim eŋgimakzawaŋğō ölnan mōnō uruŋine kewō asuhumakza: Nini sihimbölō mōringa eŋön tok sihimbölō miyöhök miwikŋaime ewō, mi mōnō ölöp mōta mökösōnda kin köhöiba malme. 7 Sihimbölōnōŋ qakŋine öŋğöi mōrakzei, uru kōlalepnōŋ mōnō mewōŋanök qakŋine öŋğöi malje, mōtzin. Mi mōta mianğōra eŋön kin köhöimegōra mambōta jörömğöröm köhöikŋi ahakzin.

8 *O urumelenƣ alaurupni, nini Eisia prowins uruŋe nup memba mala nupkö sihimbölō mōta kahasililin miwikŋaiba mōrini, iŋini mianğōra gukmaulem malbepukōra mōtzin. Nupkö lömbötŋan ösumnini oŋgita öŋğöŋğöŋi aka mulumğöm neŋgiiga kin köhöibingö osiimō, tōndup kapanƣ kölinga mem et al neŋgiiga malin. Mewō asuhuiga toroqeba malbin me qahōwi, mianğōra mewöyök tötböröm aka malin.

9 Mewō mala uruninan kewō mötmōriin: Kunōŋ kömumbingö keuŋi lök jim teköi keu mianğön qaknine öŋğöi ayuhubingö mambörin. Nanini ösumnōŋ nariba malbinbukmō, Anutu kukösum qakŋe nariba malbingōra aka mewō asuhuyök. Anutunōŋ kömukömuŋi mem gulim eŋgii wahötmei, yaŋön mōnō amqeba nini mewöyök baukōm neŋgimakŋa.

10 Kömumbinbukö keŋğöt mötmöt öŋğöŋğöŋi ahinmō, Anutunōŋ mōnō mianğoreŋğök mekōm neŋgiyök. Mekōm neŋgiyök aka toroqeba mekōm neŋgimakŋa. Nini jörömğörömnini Anutugoreŋ ala mewō möt narim waŋgiba kinjin. 11 Iŋini mewöyök baukōm neŋgiba neŋğōra aka köulukögetka mekōm neŋgimakŋa. Gwötpukŋan neŋğōra aka köulukögetka Anutunōŋ mōta mianğō likepŋi melenƣni kalem mōriamŋan dop köl neŋgii neŋgehorimakŋa. Mewō mekōm neŋgiiga alaurup gwötpukŋan mi mōta neŋğōra aka mindiriba möpöseigetka köiraŋ köulukŋinan öŋğōba Anutugö kezapŋe

* 1:8: 1 Kor 15.32

gemakŋa. Mianğöra mönö toroqeba nönğöra aka Anutu köulukömakŋe. Mewö qesizal.

Polnöŋ köna anangö areŋi uteköyök.

¹² Tosatŋi iŋini nönğö könaŋamnağöra uruyahöt akzei, mianğöra keu kewö jimam: Anutunöŋ solanŋi malbingö mörakzawi, neŋön mianğö dop gölmeŋi gölmeŋi liliköba mianğöreŋ ahakmeme sarakŋi mi pöndaŋ wuatangöba malin. Engö sutŋine mi mönö kapaŋ köla törörök wuatangöba malin. Mi gölme ambazip mötkutukutuninağö dop qahöpmö, Anutugö kalem möriamŋan inahöm neŋgiyöhangö dop mi aka memba malin. Anutunöŋ ahakmemeni mi eka nağöba “Dop kölja,” jiiga urukezapnan keu mi mörakzal aiga mianğöra silenini memba öngömazin.

¹³ Kulem ohomakzali, mianğö keuŋi pakpak mönö ölop oyoŋda möt asarimeağö dop akza. Keuni mi geŋmoŋi qahö. Keu könaŋi asa-asambötŋi kun qahö ohomakzal. Mi aukŋeyök ahöza. Mianğöra nönğö könani mi körek möt asarim tekömegöra möta jörömqöröm akzal. ¹⁴ Nönğö könani mi lök bahösapsap kewö möt asarize: Kembunini Jisösnöŋ kunbuk kamawi, neŋön mönö nalö mianğöreŋ engöra aka sileni memba öngömam. Mianğö dop iŋini mewöyök ölop nönğöra aka silenini möpöseigetka dop kölma. Iŋini nönğö könani mewö möt asarim tekömegöra mötzal.

¹⁵ Nönğön keu mianğö qakŋe awösamkakak kinalağöra aka mutuk engöreŋ kaba engekŋamgö areŋi alal. Indimŋi yahöt engekiga kötümötuet mötmegöra aka köna anmamgö areŋi kewö albi ahöyök: ¹⁶ *Masedonia prowinsnöŋ anmamgö könanöŋ mutuk iŋini engeka toroqeba Masedonia anda liliŋgöba kunbuk engöreŋ kamamgö jial. Kaba malbi yuai tosatŋi bauköm niŋgiba melaim niŋgigetka engömosöta Judia prowinsnöŋ anmamgö möral.

¹⁷ Areŋni mewö albi ahöyökmö, mi uteköyal. Mewö aka an köl kam köl qakŋe möndöba laŋ qahö ahal. Nani areŋni mi gölme ambazipkö dop nanağöra laŋ mötmöriba qahö ahal. Mewö kude mötmörime. Numbu ösum mohot mianğönök “Oŋ, ölop kamam!” aka “Qahö kamam!” keu yahöt mi mindiriba qahö jial. Mönö ahakmeme sarakŋi wuatangömakzal.

¹⁸ Anutunöŋ keu jiba mianğö dop pöndaŋ ahakzawi, neŋön mönö yağö jeŋe kewö jim köhöizin: Neŋön nalö kunöŋ “Oŋ, mi ölop akin,” jim jöhöba mianğö andöŋe “Mi qahö akin,” pötagororöŋ keu mewö melenqeleŋ qahö jiba malin.

¹⁹ *Anutu Nahönŋağö könaŋi kewö: Nönğön Sailas aka Timoti yetpuk engö sutŋine Kraist Jisösgö könaŋi jim asariba

malinga yañon “Anutugö jitñi tem kölmam!” aka “Qahö tem kölmam!” keu jöl yahötyahötkö qakñe melenqelenja qahö kaba malökmö, Anutugöra keu jiba jöhöyöhi, miangöra mönö “On!” jiba miangö dop aka memba malök.

²⁰ Anutunöñ jöhöjöhö keu (promis) sehisehijni dawik neñgiyöhi, qötöñini qahö mötzinmö, Kraistnöñ keu körek miengöra “On!” jiba mem köhöiiga pöwöwöm ahöza. Miangöra Kraistnöñ mewöyök nam köl neñgi keu miengö ölninan asuhui möta “Keu mi ölnja,” jibin. Mewö ahinga Anutugö qetbuñajan sehimakña.

²¹ Anutu nanñak mönö nini aka injini mohot mem köhöim neñgiiga Kraistpuk qekötahöba kin köhöibin. Yañon mönö Buña keu jim sehibingöra aka bedu mem neñgi maljin.

²² Anutunöñ urunine Uña Töröñi mekötahöiga yañon oy-aenköyaen malbingö keuñi nanñöba jim köhöimakza. Anutunöñ mewö aka buñani akzinangö mun gem supañi mi mekötahöm neñgiyök.

²³ Nöñon tembula lömböt engbilenbuköra möta zilañ Korint engören qahö lilingöba kayal. Mewö jiba Anutugö qetñi qetpi ölop keuni mi nanñöba jima. ²⁴ Silik denöwö aka Anutu möt narimakzei, miangören kembu ak engimangö qahö mötzal. Mötnaripñinan lök töndangöm engiiga kin köhöimakze. Miangöra sösongai qakñe malmegöra bauköm engimangö möta embuk mohotñe urugö nup memakin. Mewö.

2

¹ Mutuk engören kaba siksauk akerangöra jim engibiga gamuñini möta wösöbirik aket. Miangöra engören kabiga kunbuk mewö akepuköra möta urunan keu jöhöba köna anangö areñni uteköyal. ² Miangö könañi kewö: Gamu qem engibi wösöbirik akeak ewö, dañon ölop uruni qesawölim niñgiiga kunbuk sösongai miwikñabilenjak? Janjuñinangöra aka jim engibi wösöbirik akeak ewö, tosatñan sösongai ak niñgibingö osigetka nanak mewöyök wösöbirik aka malbilenbuk. Miangöra zilañ kaba gamu qem engimangö töközal.

³ Kimbi köhöikñi mi könañi kewögöra ohoba alal: Nöñon söngaibiga körek eñon mönö nömbuk söngaime. Nöñon injini körek mewö uruyahötñi qahö möt narim engizal. Nöñon tosatñi engöra sösongai miwikñaimangö mötzalmö, kabiga könañamñini sohoi lañ malgetka engeka wösöbirik akilenbuk.

⁴ Wösöbirik akñegöra kimbi mi qahö ohoyalmö, öñöñi qahö uru jöpaköm engimakzali, injini miangö könañi möt yakömegöra mönö keu köhöikñi mi kimbinöñ ohoyal. Urunan engöra aka waimanjat ketañi möta könjilij qakñe tata imbilnan eriga ohoyal. Mewö.

Kunjan köna ongiröhi, yangö sinjisöndokni mönö mosötme.

⁵ Kunöñ sinjisöndok aiga gamu aka wösöbirik asuhuyöhi, mianön mönö nöngö qakneyök qahöpmö, körek engö qakñine mewöyök öngöyök. Keu mi jim qaribi sohobapuköra mönö kewöyök jimam: Gamu mianön mönö körek dop köl engii miangöra gwötpuk me borom kun wösöbirik aket. ⁶ Könagesö ölnan keunangö likepñi melen wangigeri, mianön mönö dop köl wangii urunji kunbuk melenök.

⁷ Nalö kewöñe gamu aka wösöbirik keta bölökñi möriga mianön jem keleleñgöbapuköra mönö lömböt kude toroqem wangime. Lömböt qahöpmö, mönö kapan köla sinjisöndokni mosöta urukölalep ak wangime. ⁸ Miangöra kewö uru kunjum engizal: Inini mönö keu jöhöba urukalemñini kunbuk toroqeba köhöiba kondel wangiba malme. ⁹ Nöñön kimbini mi kewögöra ohoyal: Inini nöngö keuni pakpak tem köla esapesapnöñ kin köhöime me qahö tem köla töteköba etme, miangö könanji kewöta mötmangöra möta mi ohoyal.

¹⁰ Inini kungö sinjisöndokni mosötze ewö, nöñön mi mewöyök mosöt wangizal. Bölöñi ak niñgiyöhi, miangöra qahö mötpi öngözapmö, enön kunbuk ölöwaka mindirim angumegöra mötzal. Miangöra bölöñamñi mi lök Kraistkö jeñe ölna mosöt wangibiga teköyök. ¹¹ Satanöñ arenji ala silenöñ alal könanji könanji ahakzawi, miangöra tönpin qahö maljal. Miangöra Satanöñ luhut al neñgibapuköra aka azi miangö sinjisöndokni mönö mosöt teköme. Mewö.

Polnöñ Troas mala Taitusgöra waimanjat mörök.

¹² *Nöñön Kraistkö Ölöwak Buñani jim sehimangöra aka Troas taonöñ anbiga Kembunöñ nangu öröm niñgiiga nupñi miangöreñ memangö amqeyök. ¹³ Mewö amqeyökmö, urumelen alani Taitus qahö miwikñaibi keunini qahö jii möralangöra aka waimanjat möta luainöñ urune qahö ahöyök. Miangöra yaizököñini jiba engömosöta Taitus jarumangöra Masedonia prowinsnöñ anal. Mewö.

Kraistnöñ ösum neñgiiga luhut alakzin.

¹⁴ Neñön Anutu kewögöra möpöseimakin: Kraistkö buñi aka welenñi qeinga Anutunöñ nalö dop suahö galöm ewö aka neñguanñiriga anda köiran kölakzin. Luhutnöñ plaua juranangö wöronñi ölöpñi memba kaiga mörakzin. Miangö dop Anutunöñ nam köl neñgiiga denike denike liliköba Kraistkö könanji jim asariinga aukñe asuhum sehiba aniga gölme dop mörakze. Miangöra Anutu möpöseimakzin.

¹⁵ Miangö könanji kewö: Neñön ambazip Suep mire öngömei aka könöp sianöñ gemei, yeñgö sutñine anda kainga wöronini

* 2:12: Apo 20.1

sarakñi mörakze. Kraistkö könañi jim sehiinga Anutunöñ nupninañgö wörönñi möt ölöwahakza.

¹⁶ Könöp sianöñ gemei, yeñön Buña keunini mötketka mianöñ keuñini jim teköiga kömum köhöimegö möta mönö qamötkö mumu wörönñi ewö akza. Suep mire öñgömei, yeñön Buña keunini mötketka oyaenköyaen engimapkö möta mönö malmal kömbönañgö wörönñi umköhöwaktambuk ewö akza. Dañön nup mewöñi memawañgö dop akza? ¹⁷ Ambazip tosatñi gwötpukñan mönö ni ewö qahö akze. Yeñön malmalñini nañgöbingöra möta Anutugöreñ keu mi kölköl-örörö ewö lañ memba ala jimakze. Nöñön yeñgö dop qahö ahakzalmö, Kraist qekötahöba köñbiñ mosöta uruni sarakñi aiga kinjal. Anutunöñ melaim niñgiyöhi, mi möta yañgö jemesoholñe kinda Buña keuñi törörök jim sehimakzal. Mewö.

3

Jöhöjöhö areñ dölokñangö nup meme ambazip akzin.

¹ Nanak könañamni kunbuk könahiba jim ölöwaktamañgöra mötmörize me? Mi qahö. Nup meme ambazip tosatñan Korint eñön yeñgö könañini mötmegöra möta jim ölöwak kimbi ohobingö kapañ kölakze. Tosatñan Korint eñön yeñgö könañini nañgöba jiba jim ölöwak kimbiñi kimbiñi ohomegöra inini kuñgum engimakze. Nöñön nupni diñdiñanök mealangöra jim ölöwak kimbi mewöñañgöra qahö osizal. ² Anutunöñ Korint inini böröne al engii letota wölböt kötni aka nanñinak nöñgö jim ölöwak kimbi ewö akze. Anutunöñ nöñgö jim ölöwak kimbi mewö ohoiga ambazip körekñan silik tandökñini dölokñi mi eka oyoñmakze.

³ *Inini Kraistkö papia kimbi ewö akzei, mianöñ aukñe ahöza. Mosesnöñ Köna keuñi nañim onñi inñ mianöñ köt tafenöñ ohoyöhi, inini miangö dop qahö akzemö, Kraistnöñ kimbiñi engö uruñinañgö tafene kewö ohoi kinje: Neñön nup meinga ölni asuhui Kraistnöñ Anutu malmal köhöikñi Toñangö Uñañi uruñine ali letotket. Ambazipnöñ nupninañgö ölni mi eketka mianöñ bauköm engiiga nupninañgö könañi möt asarimakze.

⁴ Kraistpuk qekötahöinga Anutunöñ nupninañgö tandökñi mötza. Miangöra nup meinga inini Kraistkö buñañi akeri, mi ölöp Anutugö jeñe awösamkakak kinda jizin. ⁵ Nanini köhököhöi qakñe nup ölöpñi ki Anutugö jeñe membinangö dop akzini, mewö ölöp qahö jibin. Nanini yuai kunöñ qahö lapingömakzinmö, Anutunöñ nanñök inahöba mötmöt neñgiiga nup ki memakzin.

* 3:3: Eks 24.12; Jer 31.33; Eze 11.19; 36.26

6 *Anutunöŋ inahöba mötmöt neŋgiiga jöhöjöhö areŋ dölökŋaŋgö nup meme ambazip akzin. Mosesgö Köna keuŋaŋgö kulemŋi mohot mohotköra urukönöp akinak ewö, keu mianön mönö keunini jim teköiga kömum köhöibinak. Uŋa Töröŋaŋgö nup areŋi jim asariinga yaŋön mem gulim neŋgiiga mal köhöibin. Miangöra Köna keugö areŋi miyök wuatangömegöra qahö kapan kölakzinmö, Uŋa Töröŋi möt aŋgön kölmegöra uru kuŋgum eŋgimakzin. Mewö.

Jöhöjöhö areŋ dölökŋaŋgö nupŋi mi aködamunŋambuk.

7 *Anutunöŋ Köna keuŋi jiba kulemŋi kötnöŋ möndömgöba ohoyökmö, ambazipnöŋ mi qahö tem kölgetka Anutunöŋ keu miangö dop kewöta likepŋi meleŋ eŋgiiga kömumba köhömuŋi mala kotket. Anutunöŋ mutuk Köna keuŋi neŋgiiga nalö miangöreŋ asakmararaŋan Mosesgö jemesoholŋi qei asariyök. Asakmararaŋ mianön waziba ayapkömawaŋgö dop ahökmö, mi töndup Israel ambazipnöŋ jemesoholŋi törörök uba ekingö dop qahö aket. Gwötpuk asariyöhaŋgöra mi osiget. Köna keugö Buŋa areŋ walŋan lök mewö asakmararaŋambuk asuhuyök.

8 Mewö asuhuyökmö, Uŋa Töröŋan Buŋa areŋ dölökŋi neŋgi miangö asakmararaŋan asuhumawi, mianön mönö jöhöjöhö areŋ walŋaŋgö asakmararaŋi oŋgita önöŋi qahö asariba jenini gamugamu ahakŋa. 9 Mutuk Mosesgö Köna keu asuhuba kewöt neŋgiiga miangö dop könöp siagö buŋaya akzin. Buŋa keu mi lök aködamunŋambuk asuhuyök. Miangöra Anutunöŋ keunini kewöta jim teköi solanibini, Buŋa keu miangö aködamunŋan mönö keta bölökŋi akza. Mianön jöhöjöhö areŋ walŋaŋgö aködamunŋi mi gwötpuk oŋgita qetbuŋaŋambuk akza.

10 Buŋa nup walŋan mutuk aködamunŋambuk ahökmö, mi Buŋa nup areŋ dölökŋambuk mindiriba kewöringa walŋi mianön mönö qetbuŋaŋi qahö akza. Uŋa Töröŋaŋgö nup areŋ miangö aködamunŋan öŋgöŋgöŋi akzawaŋgöra nup areŋ walŋan mönö yuai omaŋi ewö akza.

11 Anutu amötqeqeŋaŋgö köna walŋan lök waziba ayapkömawaŋgö dop ahök. Mianön lök asakmararaŋambuk asuhuyök. Miangöra köna dölökŋi teteköŋi qahö ahöm öŋgömawi, miangö asakmararaŋan mönö köna mutukŋaŋgö asakmararaŋi mi önöŋi qahö oŋgita jenini gamugamu ahakza.

12 Jöhöjöhö dölökŋan teteköŋi qahö bauköm neŋgiiga asakmararaŋan asuhumawi, mewö Anutu jörömqöröm al waŋgimakzin. Miangöra keŋgötnini qahöpmahöp möta awösamakak kinda keu mi kusum eŋgimakzin. 13 *Mosesnöŋ

Israel ambazip asakmararanj waziba ayapköyöhi, mi ehibepuköra manjat möta jemesoholñi opo jahönñan esuhuyök. Neñön miangö dop qahö ahakzinmö, Buñanini aukñeyök jimakzin.

¹⁴ Buña walñangö asakmararanji eketmö, uruñinan töndup gwözöñni lañ mala kotket. Nalö kewöñe mewöyök yuai kunñan mönö opo jöhan miangö dop Juda ambazip gwötpuk yeñgö uruñini gwözöñni malje. Miangöra Jöhöjöhö Walñangö Buña keunji keunji oyonñei, mienjö könañini mi törörök qahö möt asarimakze. Uruñini melenja Kraistpuk toroqegetka mewö mianjönök mönö opo jöhanñini mi qeköi möt asarime. ¹⁵ Nalö kewöñe mewöyök Mosesgö Köna keunji oyonñetka yuai kunñan mönö opo jöhan ewö uruñini gwözöñni mötmötñinan lömbörii malje.

¹⁶ *Mewö maljemö, Buña Kimbigö keu kun kewö ahöza, “Mosesnöñ ‘Kembubuk eraum mötpit,’ jiba opo jöhanñi mesoholñeyök qeközapma.” Keu mewö ahöiga yeñgöreñök kunñan uruñi melenja Kembubuk toroqezawi, nalö mianjöreñök mönö yuai opo jöhanñangö dop mi qeköi Anutugö amötqeqeñangö könañi möt asarima. ¹⁷ Keu mianjön “Kembugöra” jiba mi mönö Kembugö Uñañangöra jiza. Kembugö Uña Töröñan denike yeñgö uruñine maljawi, yanjön mönö singisöndokñinañgö kösöñi pösariga solanñi (fri) malje. (Mewö mala solanñi diñdiñi akingöra Köna keu wuatangöbingö qahö kapan kölakze.)

¹⁸ Miangö dop urunini melenninga Kembugö asakmararanjan körek neñgö je mesoholnine kuñguiga bilikbilik aliga jenini qahö esuhuinga ambazipnöñ neñgeka Anutugö aködamunñi qetpuk mi piliknöñ uba ehökö tandök ehakze. Nini mi qarim sehiba ehakñeangö dop letorakin. Mewö letota aködamunñi qetpuk mi qariba asariba Kembugö tandöktandök ahakin. Kembunöñ Uñaya akzawi, yanjö asakmararanjan mönö mewö mem letot neñgimakza. Mewö.

4

Nini kourañen ewö ahinga Uña Töröñan ölni akza.

¹ Anutunöñ ak kömum neñgiyöhanjö dop nup ki qaknine ali memakzini, miangöra mönö böñ kininga uruninan qahö etma. Qahö! ² Neñön nup memegö köna tölapñi gamuñinambuk mi körek andö qein. Tilipqilip qahö aka Anutugö keunji qahö möwöramgömakzinmö, keu ölni mi aukñeyök alakzin. Mewö Anutugö jemesoholñe ambazip uruölöwak möt neñgimegöra kininga jim ölöwak keuninan asuhui körekñan keunöñ törörök jim neñgibingö osimakze.

* **3:16:** Eks 34.34

³ Mewö ahakzinmö, injini tosatjan kewö jimakze, “Polnöy Ölöwak Buñani mi esuñambuk jimakza.” Mewö jibileñak ewö, esu mianjon könöp sianöy gemei, mönö yengö uruñine ahöba mianjöra gwözöñniga qakömakze.

⁴ Kraistnöy Anutugö imutji akza. Kraistkö aködamunji mi nanji Ölöwak Buñanan indela asakñi ewö asarimakzapmö, yengö jeñinan ömuñ köli jipjap ahakza. Nalö kewöñe bölöñangö Kembuñi gölme dop galöm köl engimakzawi, yanjon urumelenjö kopa ambazip yengö mötmöt jeñini mem gömöliiga lañ malje. Mianjöra Ölöwak Buñagö asakñi ek asaribingö osimakze.

⁵ Nani qetbuñanan qarimapkö Buña keñi qahö jim asarimakzalmö, enjon Kembu Jisös Kraistkö könañi möta jitji tem kölmegöra uru kuñgum engimakzal. Neñon Kembugö jitji wu-atanjöba injini welen qem engimakzin. ⁶ *Könañi kewögöra welen qem engimakzin: Anutunöy mutuk kewö jim kutuyök, “Asaknan mönö söñaup qeiga asarima.” Mewö jiyöhanjon mönö Buñanangö asakñi ali urunini qeiga asariyök. Kraistnöy ahakmemeñi aka meiga Anutugö asakmararañan jemesoholje asarii ekeri, Anutunöy nini mianjö könañi möt kutubingöra kapan kölakza. Asakñangö könañi jim sehibingöra aka asakñi mi nengiyök.

⁷ Asakñan urunini qei asariinga mötkutukutu mianjö bohonji mi milyön kina ongita öngöñgöñi akzapmö, silenini mi kourañen ewö amqeba julakza. Anutu asakñan mönö sile mewöñangö uruñe ahöza. Ambazipnöy mianjö könañi ekñegöra Anutunöy areñi al nengiyök. Dopkeu mianjö könañi kewö: Kukösum önöñi qahö al nengimakzawi, mi nengöreñök öne asuhumakzawangö dop qahöpmö, Anutunöy mönö mianjö Tonji akza.

⁸ Eu emu likep likep mianjöreñök lömböt könañi könañi qaknine öngöba qölölömbörim nengigetka wahöjalij mörakzin. Mi mörakzinmö, töndup mienjon qahö qözöjahöm nengigetka erakzin. Nalö tosatje juñ ewö wangömmje qaköba köna qahö miwikñaimakzinmö, töndup tötböröm qahö ahakzin.

⁹ Ambazipnöy sesewerowero ak nengimakzemö, Anutunöy andö qahö nengumakza. Ambazipnöy mulungöm nengimakzemö, töndup qahö ayuhumakzin. ¹⁰ Jisös qem kömugeri, mianjö dop nini mewöñanök buñani jim sehimakzianjöra aka nenguget kömumbinbukö möta anda kaba maljin. Jisösbuk mal köhöninga inahöm nengimakzawi, ambazipnöy mianjö könañi möt kutumegöra aka mewö malbingö urumohot akzin.

* 4:6: Jen 1.3

¹¹ Gölmenöŋ jebuk mala Jisösgö nupŋi memakzinanğöra aka nalö dop kömumbingö dop akzin. Sileninan kömumawanğö dop akzapmö, Jisösnöŋ urunine mal köhöiba silenini mem gulimakzawi, ambazipnöŋ mianğö ölni ek asarimeğöra aka kinjin. ¹² Nini nalö dop sihimbölö möta kömumbingö dop ahakzinmö, nöŋön engö sutŋine nup memba malali, eŋön mianğöra aka guliba malmal köhöikŋe anğota mal öngöme.

¹³ *Sumbara (Sam) kunöŋ keu kewö ohoget ahöza, “Anutu möt nariba kömupnöhök meköm niŋgimapkö köuluköba malal.” Neŋön keu mianğö dop kömupnöhök meköm neŋgimapkö möt narizin. Mötnaripkö Uŋa Töröŋi miyök buŋa qem anğuzinanğöra neŋön mönö mewöyök keunini jiba köulukömakzin. ¹⁴ Anutunöŋ Kambu Jisös mem gulii kömupnöhök wahöröhi, yaŋön mönö nini mewöyök mem gulim neŋgii wahöta Jisösbuk öngöinga jemesoholŋe al neŋgii embuk mohotŋe mal öngöbin. Mi mötzinanğöra aka keunini jiba köulukömakzin.

¹⁵ Keunini jiba köuluköinga Anutugö kalem möriamŋan toroqeba ambazip sehisehiŋi dop köl eŋgima. Mewö aiga yeŋön amqeba Anutu kelenmaleleŋ möpöseigetka qetbuŋaŋan sehi-makza. Eŋön mewöyök Anutu möpöseim sehimeğöra mötzal. Mianğöra lömböt könaŋi könaŋi bisiba aum-möriba maljin.

Mötnarip malmalŋanğö tandök mi kewö:

¹⁶ Nini mem gulim neŋgimapkö möta mönö böŋ qeba kininga uruninan qahö etma. Ölna silenini ewö waziba soholimakzinmö, mi töndup urunini ewö nalö dop kölönaimakzin. ¹⁷ Mi kewögöra: Gölmenöŋ kahasililiŋ nalö töröptökŋi möta malbinmö, mianğö andöŋe asakmararaŋ önöŋi qahö miwikŋaiba teteköŋi qahö oyaenŋkoyaen malbin. Asakmararaŋ aka kahasililiŋ yahöt mi kewöt etkiinga asakmararaŋ mianğön mönö öngöngöŋi aiga gölmegö kahasililiŋ könaŋi könaŋi mi möringa awamŋi aka eretŋi akza.

¹⁸ Ambazip aka öroyuai jenöŋ ehekŋi mi nalöŋini teköi ayapkömemö, Suep mirigö öroyuaiŋi nalö kewöŋe qahö ehakzini, mienöŋ mönö nalö teteköŋi qahö ahöm öngöme. Mianğöra neŋön jeninan ehekŋi mia qahöpmö, qahö ehekŋi mönö mienğöreŋ göröken uba eŋgehakzin. Mewö.

5

Polnöŋ Suepkö oyaenŋkoyaen koumnöŋ anmamgö mörök.

¹ Neŋön keu ki mötzin: Gölme silegö opo seri koumŋe malinga kömupnöŋ mi köndeŋniga etmawi, Anutunöŋ nalö mianğöreŋ silegö miri dölökŋi nanŋak meiga Suepnöŋ

* 4:13: Sum 116.10

ahömawi, mi buña qem neŋgiiga mianğoreŋ malbin. Silegö miri qainŋi kun mi teteköŋi qahö köhöikŋi ahöm öŋgöma.

² Keu mi möta nalö sutŋe kianğoreŋ letotpingö osongom köla Suep malmal mirinine öŋgöbingö möta awöweŋgömakzin. ³ Suepnöŋ öŋgöingä sile qainŋi kunöŋ löŋgöt neŋgii tatpini, nalö mianğoreŋ mönö uña sile meinga kunŋan aukŋe qahö miwikŋaim neŋgima.

⁴ Gölme sile ki qekömegöra qahö mötzinmö, Suep malmal mirinine öŋgöba silenini dölökŋi memingö awöweŋgömakzin. Sile ki kömumawi, mi malmal köhöikŋan gwahöri qahöwahiga Anutunöŋ salupŋe oyaenköyaen sileya neŋgimapkö mötzin. Mianğöra nalö kewöŋe seri koum kianğö uruŋe mala urulömbötnini bisiba letotpingö osongom ahakzin. ⁵ Anutu nanŋak Suep sile memingöra möta miwikŋaim neŋgiba Uña Töröŋi urunine aliga oyaenköyaen akingö dangunuŋi akza.

⁶ Mianğöra neŋön mönö nalö dop ewebibininambuk saitŋgit mal köhöiba kewö mörakzin: Sileninangö malmal koumnine ki malbini, nalö mianğö dop eu Suep malmal mirinine Kembu Jisösbuk qahö malbin. ⁷ Nalö kewöŋe Suep mirigö öröyuaiŋi qahö uba engehakzinmö, töndup mi möt nariba mianğö dop aka memba malinga nam köl neŋgimakze. ⁸ Mianğöra ewebibininambuk köhöiba sileninanğö malmal koumŋi ki mosötpingö kapan köla mirinini öŋi eu öŋgöba Kembubuk malbingö mötzin.

⁹ Mianğöra mirinine ki me eu malbini, neŋön mönö urunini Kembu Jisös uruölöwak ak waŋgibingöra jöhöba mianğöra köhöiba kapan kölakzin. ¹⁰ *Mianğö könaŋi kewö: Körek neŋön mönö Kraistkö keu jakeŋe asuhubin. Gölmenöŋ silebuk mala Kembugö jitsihitŋi dopŋe tem kölini me qötömötötaŋ ahini me önewat laŋ malini, nanŋak mönö keunini mi kewöta mianğö dop töwanini nanŋök nanŋök neŋgii buña qem anğubin. Mewö.

Ambazip Anutubuk urumohot akŋegö nupŋi memakzin.

¹¹ Kraistkö keu jakeŋe kinbini, neŋön mi möta Kembugö mötmötŋi ongitpinbuköra keŋgötnini mörakzin. Mi mötzinanğöra ambazip könanini sarakŋi mötmegöra kapan köla uru kuŋgum enğimakzin. Könaninan mönö Anutugö jeŋe aukŋe ahöza. Nöŋön tilipqilip azia qahö, enön mewöyök mi uruŋinan möt yakömegöra möta jörömqöröm akzal.

¹² Mewö jiba nanini jim ölöwak keunini mötmegöra kunbuk qahö kapan kölakzalmö, könanini miyök jim asarim enğimangö mötzal. Inini mi möta ölop neŋgö silenini mi böhi takapulakaŋi yeŋgö jeŋine möpöseigetka dop kölma. Yeŋön yuai enğö uruŋine ahözawi, mianğöra qahöpmö, sileninanğö yuaiŋi jeŋöŋ ekingö dop akzawi, mönö mianğöra aiweliköba nanŋini

* 5:10: Rom 14.10

silenjini memba öngöba keu laj jimakze. Miangöra keuni ki jizal. Enjon yengö keunjini gilipitji (ambetakji) mötzeangöra mönö neנגö könanini jim asariba törörök melen engime.

13 Enjon nöngöra “Urusohop tandök ewö akza,” jiget ewö, nöjon mönö Anutu nupņangöra aka urukönöp aka malal. Tosatņan nöngöra kewö jize, “Urukönöpji qahöpmö, keuji ösöjök jimakza,” Mewö jize ewö, mi mönö injini bauköm engibingöra aka ahal. Miangöra ölum engubapuk.

14 Miangö könaji kewö: Kraistnöj jöpaköm neנגimakzawi, mianjon mönö kondota kuņgum neנגiiga nupņi memakzin. Azi mohotnöj körek neנגö salupnine neנגö kömupnina kömuyök. Miangöra singisöndokninangö likeņji qahö melen neנגiyökmö, körek neנגö singisöndoknini mosöri toroqeba köhömuņi qahö akzin. Keu mi möt asariba möt yaközini, Kraistkö urukalemņan mönö körek nini jölöngöba nupņi memingöra kuņgum neנגimakza.

15 Yaņon mönö kewögöra körek neנגö salupnine kömuyök: Gölmenöj jebuk maljini, neņon mönö malmalnini toroqeba naninangörök malbinbuk. Mewö qahöpmö, kun neנגöra aka kömumba wahöröhi, malmalnini mönö yaņgöra tököba ala malbingöra kömuyök.

16 Miangöra urunini melenjini, nalö miangöreņök könahiba ambazip silesile qahö kewöt engizin. Ambazip kun gölmenöj silikņangö dowök qahö möt kutum waņgizin. Mutuk Kraist kewöta möringa gölme azi töhön ahökmö, nalö kewöņe möt kutum waņginga Suepkö Amötqeqe Tonina akza. 17 Miangöra kunņan Kraistpuk qekötahöza ewö, yaņon mönö ahuahu dölökņi ahuba dömņi dölökņi akza. Malmal walņan ayapköiga malmal dölökņan mönö salupņe asuhum waņgiza.

18 Mewö maljapmö, yuai pakpak miangö kondotkondot Tonji mi Anutu. Yaņon Kraist melaiiga töwanini qeba neנגömeiga Anutu nanņambuk urumohot akingö könaji möwölöhöyök. Köna mewö asuhuiga Anutunöj nup neנגiiga neņon ambazip Anutugö alaurupņi akņegöra jölöngöba kuņgum engimakzin.

19 Anutubuk urumohot akingö könaji kewö: Kraistnöj eta gölmeņi gölmeņi neנגö töwanini qeiga dop köli Anutunöj neנגömeiga alaurupņi ahin. Köna oņgita mala korini, singisöndok miengö keunjini qahö oyoņda mötmöriba likeņji qahö melen neנגiyök. Anutugö alaurupņi ahinga möt narim neנגiba Kraistkö töwagöra aka Anutubuk urumohot akingö Buņa keuji mi börönine alök.

20 Mi aliga Kraistkö jitņememeurupņi akzin. Anutunöj keu saņep al neנגii miangö dop ambazip uruņini kuņgum engimakzin. Kraistkö jitņi memba kapaņ köla kewö qesim

engimaksin: Mönö Kraistkö töwanji buña qem anğuba Anutugö alaurupñi akñe. ²¹ Anutunöñ körek neñgö sinğisöndokninañgö keunji jim teköba likepñi melenđa Kraist sinğisöndok kun qahö ahöhanğö qakñe ali öngöiga salupnine sihimbölö mörök. Kraistkö sihimbölöñi mianğöra aka yanğoreñ qekötahöinga Anutunöñ ölop keunini jim teköi solanibin. Mewö.

6

¹ Nini Anutu nanñanğö nup meme alaurupñi akzinañgöra aka uruñini kewö kuñguzin: Anutugö kalem möriamñan omanji akapuköra mi mönö buña qem anğuba malme. ² *Anutunöñ keu kun kewö jii Buña Kimbinöñ ahöza, “Gehorimangö nalönan kam kuñguiga nöñön köuluki möral. Amötqeçe nalönan kam kuñguiga mianğoreñ bauköm gihial.” Keu mewö ahöiga mötket! Nalö dölkianñön mönö Anutugö amötqeçe nalöñi akza. Anutunöñ engehorimangö möri nalöñan kam kuñguiga ak-kömukömuñi mi mönö dölki buña qem anğume. Mewö.

Polnöñ kahasililih könanji könanji miwikñaiyök.

³ Neñön mönö kungö uruñan neñgöra aka bölii etpapuköra galömnini mem anğumaksin. Jim neñgigetka nupninan keuñambuk aka etpapuköra mewö ahaksin. ⁴ Anutugö nup meme ambazip ölop sorokñi akzini, ahakmeme pakpakninan mönö mi kondelakza. Kahasililih aka janğauranğa könanji könanji ak neñgigetka wahöjalih uruñe maljinmö, mianğoreñ mönö mökösoñđa kapan köla kin köhöimakzin.

⁵ *Ihilek wahinambuknöñ neñguba kösö mirinji mirinji mianğoreñ al neñgigetka malin. Karimñi karimñi asuhugetka mianğö uruñe kömumbinbukö keñgötnini möta malin. Gaun guli aka nenegöra wösönini aliga malinmö, töndup silenini qeba nup memba malin.

⁶ Ahakmeme sarakñi wuatangöba Anutugö sihimñi möt asariba lömböt möta mökösoñđa ambazip ala ak engimaksin. Uña Töröñan urunini kokolak qeiga sutñine geñmonji qahö jöpaköm engiba maljin. ⁷ Keu ölñanök jiinga Anutugö kukösumñan bohon köl neñgiiga ahakmeme solanñanğö timbi saiwanji meinga böro ölnine aka qaninine ahöiga kinjin. Mewö kinda likep Buña keu jim sehiba likep keu munenji silenine algetka mianğö likepñi jim mindinğöba malin.

⁸ Qetbuña neñgigetka silenini qahö möpöseimakzin. Yom jiba gamu qem neñgigetka uruninan qahö erakza. Neñgöra kösohot ölopñi kösohot bölöñi mi lañ jimakze. Munenji jiji ambazip ewö ak neñgimakzemö, töndup keu ölñanök pakpak jimaksin.

* 6:2: Ais 49.8 * 6:5: Apo 16.23

⁹ Ambazipnōḡ kōnanini ōlōp mōt kutumakzemō, tōndup tosatḡan nōnōḡgan aka nesampurek ak neḡgimakze. Nalō tosatḡe kōmumbingō aka malinmō, tōndup toroqeba jebuk maljin. Kegwek-kahasililiḡ ewō neḡguba malgetmō, tōndup qahō kōmuin. ¹⁰ Wōsōbiriknōḡ neḡguiga tōndup nalō dop sōḡgaiba maljin. Wanapḡi mala tōndup ambazip gwōtpuk baukōm eḡḡinga uruḡinan pomḡi ahakze. Gōlmeḡō sukinap-nini qahōpmō, tōndup oyaeḡkoyaeḡ pakpak buḡa qem aḡguba pipsimbawōḡ maljin.

¹¹ O Korint ambazip, neḡōn mōnō uruninaḡḡō naḡḡuḡi eḡḡōra ōrōba keu kun qahō kōlin geiga kōnanini aukḡeyōk jibiga mōtze. ¹² Eḡōn neḡḡō urumōtmōtnini mōtpepukōra mi qahō aḡḡōn kōlakzinmō, neḡōn eḡḡō uruḡini mōtḡinbukōra mōnō nanninanōk aḡḡōn kōl aḡḡumakze.

¹³ Nōḡōn urumōtmōtni eḡḡibiga eḡōn mōnō miāḡḡō likeḡḡi mewōyōk tōrōrōk niḡḡime. Nōḡōn nahōnbōraturupni ewō tandōk keu eḡḡōra kewō jiba ohozal: Inini mewōyōk mōnō nannini uruḡinaḡḡō naḡḡuḡi ōrōba urukalemḡini mi sehiba kondel neḡḡime. Mewō.

Mōtnariḡḡini qahō yembuk kude qekōtahōme.

¹⁴ Ambazip uruḡini qahō melenḡeri, yembuk mōnō uruḡini kude jōhōba* ōrōrōḡ kude malme. Malmal solanḡi aka malmal goḡḡōḡi mi nannōk nannōk akzahot. Mi mindirim etkibingō osibin. Sōḡaup aka asakḡi mi mohotḡe qahō akzahot. Qahō! ¹⁵ Kraist aka Katakōmulat (Satan) yetkōn mōnō urumohot aka mohotḡe malbitkō osimahot. Miāḡḡōra urumelenḡ ambazip kunḡan ahakmemenḡi urumelenḡḡō kopa ambazip kun yambuk mohotḡe mindiriba akitkō osimakḡahot. ¹⁶ *Anutu nannak keuḡi kun kewō jii ahōza,

“Nōḡōn kōnagesōni yeḡḡō uruḡine mala sutḡine anda kaba Kembunḡini ak eḡḡibiga yeḡōn nōḡḡō weleni qeba mōḡōseim niḡḡiba malme.”

Keu miāḡḡō dop Anutugō Uḡanḡan uruḡine maliga sileninan Anutu malmal kōhōikḡi Toḡanḡḡō jikeḡi akza. Anutunōḡ nannḡi jōwōwōl jikeḡe tandō lopionḡ mōḡōseibingō sōḡḡo ali ahōi osimakzin. Anutugō jikeḡi aka asa jikeḡi mi inannōk inannōk. Miāḡḡō dop neḡōn urumelenḡḡō kopa ambazip yembuk qekōtahōbingō sōḡḡo ali ahōi osimakzin.

¹⁷ Miāḡḡōra inini mōnō Kembunōḡ keu kewō jiyōhanḡḡō dop akḡe,

“I mōnō eḡḡōmosōta yaigep kaba kambu nannḡi kun malme.

* **6:14:** Kōḡḡōḡ me mōtōp (yoke) mi hos me bulkamau yahōtkō imbiḡire alget geiga kare me kinōḡ yuai ōrōmakzahot. Mewō nannḡiri imbi-imbi akitkō osimakzahot. Mewō janḡuḡ anbanbuk. * **6:16:** Lew 26.12; Eze 37.27; 1 Kor 3.16; 6.19; Ais 52.11; 2 Sml 7.14; 1 Hist 17.13; Ais 43.6; Jer 31.9

Angjöörakñinambuk ahakzei, mi mönö kude engoseigetka nöñön möt angön köla köyan köl engiba malmam.

18 Nöñön mönö Iwiñini akiga iñini nöngö nahönböraturupni aka malme.

Kembu kukösum pakpakö Tonjan mewö jiza." Mewö.

7

1 O wölböt alaurupni, Anutunöñ mönö köyan köl neñgimamgö keuñi mewö jöhöm neñgii ahöza. Miangöra yuai sile uñanini mem tölöhozawi, neñön mönö mi körek qeköbingöra Kraist köuluköinga amöt qem neñgima. Anutugö jitñi ongitpinbuköra mönö kenjgötnini möta kapañ kölinga mem solanim neñgiiga sarakñi ak teköbin. Mewö.

Uruñini melengerangöra Polnöñ uruölöwak mörök.

2 Neñön kun qahö mem bölim wangiinga ayuhuyök. Kun qahö geñmororöñ ak wangiin. Miangöra eñön mönö uruñinañgö nañuñi öröba nini urunöñ jöhöm neñgiba malme.

3 Tosatñan sutñine nup memba silenöñ alal keu mewö jiba jim neñgigetmö, nöñön keu mi engö keuñini jim teköba likepñi melenj engimamgöra aka qahö jizal. Nöñön lök keu kewö jibi mötket: Neñön uruninañgö nañuñi öröba iñini uruninan jöhöm engimakzin. Mewö aka ölop embuk öröröñ jöhöba kömumbin aka öröröñ mal köhöibin.

4 Engö uruyahöt qahö mötnaripni ketañi engiba maljal. Engö silenini mönö gwötpuk möpöseimakzal. Engöra aka urukölalepni ketañi miwikñajizalangöra kahasililiñ könañi könañi möta miangöreñ mönö töndup önöñi qahö söngaizal.

Masedonia prowinsnöñ anda Taitusbuk aitongöit.

5 *Taitus jaruba malalangöra* jiali, keu mi toroqeba jimam. Masedonia prowinsnöñ kañgota miangöreñ mönö mewöyök uruluai miwikñaimamgö osial. Denike denike anali, miangöreñ mönö köñjiliñ könañi könañi miwikñaijal. Anutugö bim qeba tosatñi yembuk aņgururuk aka engöra waimañjat möta malal. 6 Mewö malalmö, Anutunöñ urueret ambazip nañgöm neñgimakzawi, yañön mönö Taitus kayöhi, mianñön urukölalep ak niñgiyök.

7 Taitusnöñ kayöhi, mianñönök qahöpmö, Korint eñön urukölalep ak wangiigetka yañön jii mötpiga Anutunöñ mianñön mewöyök urukölalep ak niñgiyök. Engö kösohotñini kewö jiyök, "Eñön ni nekingö köpösöngöba kinje. Wösöñini ölna möt niñgiba lömböt niñgigerangö keuñi jiba nöngö likepne nañgöba jibingö jöjörömakze." Kösohot mi jii möta urusösöngai keta bölökñi möral.

* 7:5: 2 Kor 2.13 * 7:5: 2 Kor 2.13 miangöreñ Taitusgöra jiyök.

⁸ Nöñön uruñini Buña keunöñ kuñguba kimbi mi ohobi oyoñda nanñini möt bölim anğugeri, mianğöra qahö möt bölim anğuzal. Mutuk möt bölim anğuyali, mi töndup nalö kewöñe kewögöra kunbuk söñgaizal: Kimbi keunan uruñini mem bölü wösöbirik aketmö, wösöbirik mianñön mönö melenđa nalö töröptökñanök ahöba teköyök. Könañini mewö ehal.

⁹ Nalö kewöñe inñini möt bölim anğugerañğöra aka qahö söñgaizalmö, kewögöra söñgaizal: Inñini ahakmemenñinañğöra aka möt bölim anğugeta gamu wösöbirikñinan bauköm enñiiga uruñini kunbuk melenđa diñgiget. Mi Anutugö jitñanğö dop asuhuiga uruñinan mönö neñğöra aka qahö bölüyökmö, ölña bauköm enñial.

¹⁰ Siñgisöndökñinañğöra aka möt bölim anğuzin ewö, gamu wösöbirik mianñön mönö bauköm enñiiga urunini kunbuk melenđa diñgibin. Diñgibinañğöreñ Anutunöñ mönö neñganañgiri Suepnöñ öñgöbin. Mianğöra kunñan uruñi melenđa mianğöra qahö möt bölim anğuma. Gölme ambazip tosatñan siñgisöndökñinañğö wösöbirik mörakzemö, Anutunöñ mi mosötmapkö qahö qesime ewö, yaññön mönö likepñi melen enñiiga kömum köhöime.

¹¹ Enñön Anutugö sihimñanğö dop wösöbirik aketka gamu mianğö ölñan uruñine ahui letotkeri, mi kewöta ek welipköba kewö jime, “Nini gönmönahotnini mosöta urunini tokoba urukönöp qakñe wahöta könanini sohosohoñi kewöta mindiñgöin. Ambazip siñgisöndök akeri, mienğöra uruninan wahöri sisit memba jim enñiin. Anutugö jitñi onğitpinbuköra auruba keñgötnini möta Polnöñ kaba uru melenñinañğö ölñi ekñapkö köpösöñgöba malin. Urunini ahakmeme diñdiñi akingöra alin aka kunöñ köna qiwitipköyöhi, mi mindiñgöm wañgibingö jöjöröba malin.” Mewö jigetka dop kölma. Nalö kewöñe köna diñdiñi wuatanañğözei, mi kondel niñgigetka ehal.

¹² Mianğöra kunñan sutñine bölüyöhi, iyök mindiñgöm wañgimeğöra aka kimbini qahö ohoyal me kun i mem bölim wañgiyöhi, iyök bauköm enñimeğöra kimbi mi qahö ohoba alal. Mi kewögöra ohoyal: Inñini Anutugö jemesoholñe nömbuk urumohot akingö kapan kölakzei, silik mianñön mönö aukñe asuhumapköra kimbi mi ohoyal.

¹³ Nani urukölalepni miyök qahö mötzalmö, Taitusgö uruñan sutñine ölöwahi ehinga mianñön mewöyök uruni nañğöi önöñi qahö söñgaimakzal. Enñön körekañanök Taitus körö-ölöwak qem wañgigerañğöra söñgaimakzawi, sösongai mianñön mönö mewöyök nañgöm köl niñgii mianğöra önöñi qahö söñgaizal.

¹⁴ Nöñön silikñinañğöra silenini Taitusgö jeñe möpöseiba malali, enñön mianğöra gamu qahö niñgiget. Nöñön enğö sutñine mala keu pakpak jibi mötkeri, mi ölñanök jial. Mianğö

dop engö keunini Taitusgö jeje jim möpöseiba malali, keu mianjon mönö mewöñanök könani mindingögetka ölni ahök.

¹⁵ Injini körek pakpak mönö nongö keuni tem köla Taitusnön kaiga sömbuninambuk möta jönömñini undui köl öröm wanjiget. Taitusnön silikñini mi mötmöriba keu jiiga uru ölöwakñan engöra aka qariiga köhöiba möpöseim engimakza.

¹⁶ Nönön ahakmemeñini pakpak mötmöriba miangörej mönö ölop engöra aka ewebibinambuk möt köhöiba saitingit malam. Miangöra söngaimakzal. Mewö.

8

Urumelen alaurup nanjom engibingö keuji

¹ *O urumelen alaurupni, Anutunön kalem möriamñi urumelen könagesöñi könagesöñi miangörej nengii ölnan mönö Masedonia prowins uruñe ölopñanök asuhuyök. Nönön injini miangöra gukmaulem malbepuköra möta kösohotñi kewö jimam: ² Yeñön kahasililiñ miwikñaiba mötketka lömbötñambuk esapköm engiiga wanapñi kötökñi maljemö, mi töndup önöñi qahö söngaigerangöra aka urumelen alaurup nanjom engibingöra moneñ naluk keta bölökñi alget.

³ Yeñgö könani kewö nanjöba jimam: Kunñan qahö kunjum engii nanñini sihimñinan töndup ahuiga amqeba ösumñinangö dop nalukñini alget aka mi tok ongita enjiget.

⁴ Yeñön mönö kapan köla gwötpuk kunjum nengiba kewö uleta jiget, “Nini tok Judia prowinsgö ambazip sarakñi bauköm engibingö mötzin. Miangöra Pol, gi ölop On! jinönga mönö simbawon möta nup miangö bahöñi amqeba membin.”

⁵ Mewö jiget jibiga naluk almegö mambörali, miangö dowök qahöpmö, mi ongita kewö aket: Yeñön mutuk nanjönangö Kembangö jeje dop köljawi, mi akingöra uruñini jöhöget aka miangö andöñe Anutugö jitñi tem kölbingö möta nanñini malmalñini mi mewöyök nengö böröñine alget. ⁶ Miangöra Taitus kewö jim kutum wanjal, “Gi mönö nanjönangö nup mi lök könahiba menön. Miangöra mi mönö toroqeba Korint könagesö bauköm enginönga urukalemñini kondela moneñ naluk ketani mi kunbuk toroqeba algetka sutñine teköma.”

⁷ Urugö yuai könani könani mi kelenmaleñ buña qem anguba kewö aka malje: Ölopñanök Kraist möt nariba Buña keu ölni jim soroköba Anutugö sihimñi möt kutuba tosatñi nanjom engibingö pöndan köpösöñgömakze. Enön mönö tosatñi enjonngita ölopñanök jöpaköm nengiba qetpuk akze. Miangö dop nanjönangö nup ki mewöyök mönö ölop mem soroköba tosatñi enjonngitketka qetpuk akña.

* 8:1: Rom 15.26; Eks 16.18

⁸ Mewö jiba monej almegöra qahö jim kutum engizal. Mi qahöpmö, urukalemñini geñmoñambuk akza me qahöwi, mönö mi esapesapnöj ala könañini mötmangö mötzal. Könagesö tosatñan gönmonahot mosöta nañgönañgö nupñini öl töhönña memba zeñ kinjei, keu mi jiba mianñon injini esapköm engizal.

⁹ Naluk dawik almegöra kewötmei, mianğoreñ mönö Kem-bunini Jisös Kraistkö könañangö tandökñi mötmörime. Injini yañgö kalem möriamñi ketanji mi kewö mötze: Yañon Suepkö öröyuai pakpakö Tonji öngöngöñi ahökmö, töndup injini oy-aenkyoaengö pomñi akñegöra aka gölmenöj eta etqeçenji aka malmalñi tököba mosörök.

¹⁰ Monej almegöra qahö jim kutum engizalmö, Jisösnöj söpsöp alöhi, mianğö dop qambañni miyök engizal. Eñon yambu emune lök nañgönañgögö mutukñi aka mianğö nupñi kapañ köla meget aka mi toroqeba membingö sihimñi köhöikñi mötket. ¹¹ Nalö kewöñe nupñini mi mönö mem teköme. Mutuk nañgönañgö nup membingö kapañ köla awöweñgögeri, mianğö dop mi mönö toroqeba mem teköme. Yuai ahöm engizawañgö dop mönö nalukñini gwötpuk alme. ¹² Mianğö könañi kewö: Naluk albingö sihimñinan ahuba ahöza ewö, mönö yuai ahöm engizawañgö dop algetka Anu-tunöj möt anğon köli dop kölja. Yuai qahö ahöm engizawañgö dop mönö qahö kewöta jim engimakza.

¹³ Naluk ketanji algetka alaurup yeñgö malmalñinan amqeiga nannjini qakñine lömböt öngömapköra qahö mötzinmö, alaurup osiba mözöröngözei, yembuk mendenđa örörönj malbingöra mötzin.

¹⁴ Mianğöra nalö kewöñe yuai kelenmaleleñ ahöm enjiiga tosatñan malmalñinañgö yuaigöra osizei, injini mönö mi bauköm engigetka dopñe akña. Mewö aka nannjini könañgep yuaigö osigetka yeñgö öröyuaiñinan kelenmaleleñ ahömawi, nalö mianğoreñ mönö i kun bauköm engime. Mewö ak anğugetka alabauk silikñinan örörönj akña. ¹⁵ Mi Buña keu ki ohoget ahözawañgö dop akña, “Gwötpuk mem tokoba malgerañon nannjini dop negetka numbu surukñini qahö ahöiga boromborom mem tokoba malgerañon nene yuaigöra qahö osiget.” Mewö.

Neñakurup karöbut melaim enjiingña kaba bauköm engime.

¹⁶ Anutunöj Taitusgö uruñi sölölohöiga engöra ni ewö waimanjat möta bauköm engimangö kapañ köla malja. Mianğöra “Anutu saiwap!” jizal. ¹⁷ Nöñon Taitus engöreñ kamapkö qesiba uruñi kuñgubiga imbinji melenñök. Miyök qahöpmö, nannjak injini bauköm engimangö möta köpösöngöba nannji sihimñañgö dop neñgömosöta Korint engöreñ kamangö jiyök. ¹⁸ Neñon urumelen alanini kun melaininga yambuk

kamahot. Kiangörenj Ölöwak Buña jim sehimakzawaŋgöra i mönö urumelenj könagesö dop möpöseim waŋgimakze.

¹⁹ Yaŋgö keuŋi toroqeba kewö jimam: Masedonia urumelenj könagesö yeŋön mönö i möwölöhögetka naŋgönaŋgö nalukŋi mi memba nembuk mohotŋe köna anbin. Neŋön Kembu nanŋaŋgö qetbuŋaŋan sehimapköra möta naluk ketanji mi ölop galöm köla Judia prowinsnönj anda engibin. Alabauk engibingö urukalemnini mewö aukŋe kondeljin.

²⁰ Mewö aka naŋgönaŋgö naluk ketanji mi tilipqilip asuhui sohobapuköra ölop galöm köl soroköbin. Kunŋan siliknini mianŋgöra jim neŋgibapukö möta kapaŋ köla kinjin. ²¹ *Keu mianŋgö könaŋi kewö: Neŋön silik Kembugö jeŋe diŋdiŋi akzawi, mi qötöŋgatpinbukö galöm mem aŋgumakzin. Miyök qahöpmö, silik ambazip jeŋine dop köljawi, mi mewöyök akingö möta kapaŋ köljin.

²² Yetpuk urumelenj alanini kun mi mewöyök melaininga kama. I nalö gwötpuk esapköm waŋgiba tandökŋi kewö ehin: Yaŋön mönö nalöŋi nalöŋi Kembugö nupŋi memaŋgö könöpkönöp ahakza. Nalö kewöŋe iŋini tosatŋi alabauk engibingö mötzei, mewö möt narim engizawaŋgöra mönö engörenj kaba bauköm engimamaŋgö möta urukönöp ketanji ahakza.

²³ Nöŋön Taitus kewögöra möwölöhöyal: Yaŋön nöŋgö alabaukni aka nup meme neŋakni akza. Urumelenj könagesöŋi könagesöŋi yeŋön alayahötnini yahöt mi möwölöhöm etkigetka jitŋememeŋini akzahot. Kraistkö qetbuŋaŋan mönö yetköra aka qarimakza. ²⁴ Mianŋgöra azi karöbut mi kamei, i mönö urukalem ak engiba könaŋini mewö kondelgetka ekŋe. Mewö akŋe ewö, neŋön silikŋinaŋgöra silenini möpöseini, keu mianŋgö ölnaŋ mönö aukŋe asuhuiga eketka urumelenj könagesö gwötpuk yeŋön mötme. Mewö.

9

Mönö urumelenj alaurupŋini bauköm engime.

¹ Anutugö ambazip sarakŋi alabauk moneŋ engimegöra ohomamaŋgö mötzalmö, iŋini keu mi lök möta mianŋgöra qahö osize. ² Iŋini alabauk akingö sihimŋinan ahui mötze. Nöŋön mi möta engö silenini mi mianŋgöra Masedonia urumelenj ambazip yeŋgö jeŋine möpöseiba kewö jial, “Korint aka Akaia urumelenj alaurup tosatŋan mönö yambu emuneyök könahiba Judia alabauk ak engibingö jöjöröba malje.” Mewö jibiga engö urukönöpŋinaŋgöra mötketka keu mianŋön mönö kuŋgum engiyök. Mianŋgöra könagesö ölni yeŋgö uruŋinan mönö amqeba alabauk akingö urukönöp aket.

* 8:21: Qam 3.4

³ Engö sihimñinan ahui mötzmö, töndup neñakurupni karöbut ki melaim engizal. “Korint yeñön mönö moneñ tokobingöra jöjöröba malje,” mewö jial aka keu mianğöra engö sileñini möpöseial. Keu mianğön omani aiga gwötpukñan ekepukmö, keuñinağö dop moneñ ölña algetka kahaimök tari körekñan mewö engekeñegöra mötzal.

⁴ Keu mianğön omani aiga moneñinan qahö kahaimök tari öne malgetka Masedonia neñakurup tosatñan nömbuk kaba mewö miwikñaim engibeak ewö, nöñön mönö engöra aka gamu miwikñabilenbuk. Tem kölmegö möt narim engiba malbiga ölñi qahö asuhubawak ewö, inini mönö mewöñanök keuñini omaniğöra aka gamu miwikñabepuk.

⁵ Mianğöra urumelen aaurupnini karöbut mi uru kuñgum engimamgö mötppi dop köli kewö jial, “Inini mönö qeljiñe Korint yeñğoreñ anda nañğonağö naluk ketani almegö keu jöhögeri, areñ mi wuatağöba al tekömegöra mönö kuñgum engime. Mewö aketka alabauk nalukñini mi kik-kukñambuk ekbonep qakñe qahöpmö, mönö sakalakñi aka amqeba gwötpuk alme. Mi mindirigetka zioz köwenöñ kahaimök tari kabiga ölop membin.” Mewö jial.

Kötñi mönö amqeba gwötpuk qesinđa gilme.

⁶ Keu ki mönö mötmöröba malme: Nene kötñi awamñanök qesinđa giljawañön mönö ölñi mewöyök awamñanök mema. Nene kötñi gwötpuk qesinđa giljawañön mönö ölñi mewöyök gwötpuk mema. Mianğöra gwötpuk algetka Anutunöñ salupñe gwötpuk engima. ⁷ Inini nannök nannök nalukñini mönö uruñinan jöhögerağö dop alakñe. Sösöñgainöñ amqeba mözöközöröñ ambazip kalem engizei, Anutunöñ mönö i jöpaköm engimakza. Mianğöra nalukñini kunñan kuñgum engizawañğöra aka uruyahöt qakñe kude alme. Mi kik-kukñinambuk kude alme.

⁸ Uruawam qakñe kötönñini gwötpuk algetka Anutunöñ mönö köhöiba kalem möriamñi pakpak mem sehim engimakña. Mewö engiiga malmal pakpak mianğoreñ yuaigöra osimei, mi pakpak mönö nalö dop buña qem angugetka dop köl engimakña. Mewö aiga nup ölopñi kónañi kónañi mi ölop megetka ölñi kelenmalelen asuhuma. ⁹ *Ekbonep mosöta naluk ketani ketani alakzei, mi Buña Kimbi keu ki ohoget ahözawañğö dop akze,

“Yañön amqeba kalemñi kalemñi mendenđa ambazip wanapñi engimakza.

Ahakmemenñi diñdini kik-kukñi qahö mianğön mönö nalö teteköñi qahö Anutugö jeñe ahöm öñğöma.”

* 9:9: Sum 112.9

10 * Anutunöŋ qesin gilgil azigöra nene kötŋi waŋgiiga nene asuhui nemakzini, yaŋön mönö nenegö mözöközörön ahakŋei, mi mewöyök engimakŋa. Mi engii uruŋinan lolohoiga ölop amqeba keu kötŋi qesin sehiba gilgetka ahakmeme solanŋaŋgö ölni asuhui Anutunöŋ mi mem qarri sehimakŋa. 11 Mewö aketka Anutunöŋ mönö malmal pakpak mianŋören sehiba kötuetköm engiiga ölöwahakŋe. Mewö ölop amqeba ambazip nalö dop geŋmoŋi qahö kalem gwötpuk engimakŋe. Mewö aketka mi memba (Jerusalem anda) engiinga ambazip gwötpukŋan kötönŋinaŋgöra aka Anutu möpöseigetka ölni engören asuhumakŋa.

12 Naŋgönaŋgö nup ki memakŋei, mianŋön mönö Anutugö ambazip sarakŋan yuaigöra mözöközörön aketka bauköm engimakŋa. Miyök qahöpmö, mianŋöra “Anutu saiwap!” keu mi gwötpuk jimegöra aka ölni engören asuhumakŋa.

13 Mianŋö könaŋi kewö: Naŋgönaŋgö nup ki memba mewö mianŋön mötnariŋinaŋgö könaŋi kondelgetka ambazip gwötpukŋan mi eka Anutu tem kölmeaŋgöra möpöseim waŋgiba kewö jime, “Korint yeŋön mönö Kraistkö Ölöwak Buŋaŋi ke-unöhök qahö jim miwikŋaizemö, Polgö keuŋi geŋmoŋi qahö tem köla amqeba sakalakŋi aka neŋgöra aka tosatŋi pakpak yeŋgöra kalem jesöŋgö engimakze.”

14 Mewö jiba engöra köuluköba mianŋören waikŋini gwötpuk mem engiba kewö jime, “Ia! Anutunöŋ mönö kalem möriamŋi kelemaleleŋ Korint engiiga urukalemŋinaŋgö ölni gwötpuk neŋgiget.” Mewö jigetka Anutugö kalemŋan aukŋe asuhuma. 15 O nini Anutu kalemŋaŋgöra aka möpöseimakin. Yaŋgö kalemŋi Jisös Kraistnöŋ mönö qetpuk sorok akza. Naŋgönaŋgö almeaŋgö keuŋi mi mewö kaba teköza.

10

Polgö nupköra keu jigetka likepŋi meleŋnök.

1 Tosatŋan engö sutŋine nöŋgöra kewö jimakze: Mesohol köl aŋguba köhöikŋi tandök qahö akzadmö, kungen anda mianŋören mönö keu köhöikŋanök jim neŋgimakza. Mewö jimakzemö, Kraistnöŋ ak kömumba guŋböŋjönjönŋ niŋgimakzawi, nöŋön mönö mianŋö qakŋe nanak uruŋini kewögöra kuŋgumam:

2 Tosatŋi mienŋön neŋgöra kewö tandök mötmöriba jimakze, “Pol aka yaŋgö neŋakurupŋi yeŋön gölmegö ahakmeme tandök wuatanaŋgöba nanninaŋgöra mötmöriba ahakze.” Nöŋön engören kaba keu mewö jimakzei, i mönö tembul engiba awösamakak kinda jim engimamgö mötzalmö, töndup uruŋini köhöikŋi kötökŋi kuŋguba jim engimamgö töközal. Mianŋöra

* 9:10: Ais 55.10

inini ambazip nōngōra keu mewō jimakzei, i mōnō zilaŋ andō enḡume. Keuŋini mewō mindiŋgōgetka enḡeki urunan mōnō luai qei sutŋine kaba bōnjōŋ malmam.

³ Ōlŋa, ahakmemeni gölmenōŋ ahakzalmō, mi tōndup nananḡōra aka gölmegō ahakmeme bōlōŋanḡō dop bim qahō qemakzal. Mewō qahōpmō, Anutugō suahō galōm aka kerōkurupŋi kiripo kuŋgum enḡiba mianḡōreŋ aren sarakŋi wuatāḡōba bim qemakzal. ⁴ Gölme ambazip uruŋini walŋanḡō dop bimgō yuaini pakpak miambuk bim qemakzin. Yarō azi yeŋōn jakōmbuak ain selŋi selŋi eriba kōndenḡetka erakzemō, Anutunōŋ timbi saiwaŋi kukŋinambuk neŋgii inahōm neŋgigetka mianḡōn mōnō kerōk yeŋgō keu areniŋi pōwōwōm kōhöikŋi kuŋguba qeapköinga erakze.

⁵ Urumelenḡō kopa yeŋōn Anutugō kōnaŋi mōt kutubepukōra aka nanŋini sileniŋi memba öŋgōba mötmōtŋini kōzambōta liklak ahakzemō, neŋōn yeŋgō kiripo areniŋi goŋgoŋi pakpak mi qeapköba kōndenḡinga erakze. Ambazipnōŋ keu mötmōtŋini bōlōŋi merakōba jōhömegōra kōna kondel enḡiinga ölöp keuŋini pakpak Kraist tem kōl waŋgimakingō dop mötmōrimakŋe.

⁶ Mewō mötmōriba Korint inini mutuk Kraistkō keu pakpak tem kōla aposol nupni nanḡōmegōra mambōtzin. Inini uruŋini mewō kunbuk melenḡetkun nini mōnō qeḡetal ambazip yeŋgō keuŋini pakpak kewōta jim tekōba likepŋi melenḡibingō jōjōrōba maljin. Mewō.

⁷ Inini yuai pakpak mōnō silegōrōk kude eka kewōtme. Sutŋine ahakmeme sohomakzawi, mianḡō kōnaŋi ölŋi mōnō mötmōrime. Tosatŋan sutŋine ni memba et ala nanŋini Kraistkō jitŋememeurupŋi akzeanḡōra uruyahōt qahō aka mōt kōhöize ewō, yeŋōn mōnō toroḡeba nōngōra mewōyōk kewō mötmōrime: Yeŋōn Kraistkō buŋaŋi akzei, nōŋōn mōnō mewōyōk Kraistkō buŋaya akzal.

⁸ Kembunōŋ kewōgōra kukōsum niŋgiyōk: Inini mem et al enḡimangōra qahōpmō, mōnō uruŋini möhangōbi kōhöimegōra aka maljal. Mianḡōra kukōsum mianḡōra aiwelikōba koŋaen ewō sileni memba öŋgōba terereibileŋak ewō, mi tōndup mōnō gamu kun qahō miwikŋaibileŋak. ⁹ Kimbiŋi kimbiŋi ohoba albi oyoŋda kukōsumni mötketka keŋgōt mötmōt mem enḡibileŋbuk. Mianḡōra keu mi nalō kewōŋe qahō toroḡeba jimam. Mewō.

¹⁰ Tosatŋan keu kewō jimakze: Polnōŋ kimbiŋi mianḡōreŋ mōnō keu lömbōtŋambuk ohoba urunini ölŋa kuŋgumakzapmō, sutŋine kini ehinga azi löwōtŋi akza aka keuŋi jii mōringa ḡetpuk qahō akza. ¹¹ Nōŋōn keu mianḡō likepŋi kewō jimam: Keuŋini omanŋi mōnō mosōta nōngō kōnananḡōra

kewö mötmörime: Ni kungen anda kimbinöŋ keuni köhöikŋi ohomakzali, mianğö dop mönö sutŋine mala mewöyök köhöikŋanök mindiŋgöm enğimam.

12 Timbiqimibilim mienöŋ nanŋini jim ölöwak ak anğumakzemö, ölna ni nonğita aposol qetpuk akeak ewö, nöŋön mönö gamuni mötpileŋak. Mewö aiga nani aka enğö silikŋini likeplikep ala kewötmamğö qötötaŋgöba kölköldömdöm akileŋakmö, yeŋön mönö mötmötŋini töröpŋi wuatangöba nanŋini imbiŋinanğö dop uruŋini dop ala kewörakze. Ahakmemeŋini mewö laŋ kewöta “Pol onğitzin,” jiba uruölöwak mörakze. Keu omanŋi mewö jiba uruqahö akze. Anutugö dopnöŋ kewöt niŋgigetka ölop enğonğita maljal.

13 Anutunöŋ nup memegö jaböŋi al niŋgiyöhi, mi qahö onğita sileni gwötpuk möpöseimamğöra qahö mötzal. Anutunöŋ nup meme areŋni al niŋgii memakzali, mianğö dop mönö enğö sutŋine mewöyök nup memakzal aka mianğö ölnaŋgörök mönö sileni möpöseimakzal.

14 Tosatŋan keu kewö jim sohomakze, “Polnöŋ Korint sutŋine nup meyöhanğöra sileni möpöseiiğa qahö dop kölja. Anutunöŋ gölme mesiŋda nup memapkö jabö al waŋgiyöhi, Polnöŋ mi onğita laŋlaŋ walöŋmakza.” Yeŋön mutuhök nup sutŋine qahö megetmö, töndup ni mem et al niŋgiba nanŋini sileni keunöhök jiba möpöseimakze. Nöŋön Kraistkö Ölöwak Buŋa jim sehiba anda mala mutuk Korint enğoreŋ kaba urugö nup meal. Mutuk qahö kabileŋak ewö, timbiqimibilim böhi mienöŋ nöŋgö keuni mewö jigetka dop köli nöŋön nani könananğö könaŋi jiba jim sohobileŋak.

15 Anutunöŋ gölme mesiŋda nup memegö jabö al enğiyöhi, yeŋön selŋini mi walöŋda enğö sutŋine kaba urugö nup memakze. Nanak selni qahö walöŋda tosatŋi yeŋö sutŋine nup mealanğöra sileni qahö möpöseimakzal. Böhi tosatŋan urugö nup memba malgeri, mianğöra mewöyök sileni qahö möpöseimakzal. Enğö sutŋine mutuk nup mealanğöra mewö akiga ölop dop kölja. Anutugö areŋi wuatangöba sutŋine nup memba malinga mötnariŋinan toroqeba qariiga nanğöm neŋgimeğöra mamböta jörömqöröm akzal.

16 Nanğöm neŋgigetka ölop gölmeŋi gölmeŋi Korint likepŋine Not göröken ahözei, mönö enduyanğoreŋ mewöyök anda Ölöwak Buŋa jim asaribin. Nupninan mewö qariiga andöqeŋe keuŋinan teköma. Anutunöŋ tosatŋi yeŋö nup meme jaböŋini al enğii megetka ölni lök asuhuyöhi, mianğöra nani sileni möpöseimamğöra qahö mötzal.

17 *Mewö qahöpmö, Buŋa keu kianğö dop akŋamğö mötzal, “Kunŋan sileni möpöseimamğö mötzawi, yaŋön mönö Kembugö

* 10:17: Jer 9.24

nupkö ölnanğöra aka silenji möpöseii dop kölma.”¹⁸ Keu miangö könañi kewö: Nannini jim ölöwak ak anğumakzeanön mönö Anutugö jeñe qahö dop köljemö, Kembunöñ ninia jim ölöwak ak wanğimawi, yanön mönö esapesapnön köhöiba kinma. Mewö.

11

Aposol takapulakanji yeñön tilipköm engibepuk.

¹ Nöñön borom kun uruqahö keu qakñe silememe aki miangöra mönö kude möt lömbörime. Mi töndup ni kude andö nuñguze, mötzal. ² Nöñön inini azi mohot Kraist yanğö buñañi aketka ambi seram jömukñi sarakñi ewö engibiga yanönök engömemapkö keuñi jiba jöhöyal. Miangöra Anutunöñ uruñan engöra aka mututqutut mörakzawi, nöñön mönö miangö dop tosatñan kelök keunöñ jiba engömeget bölibepuköra waimanjat mörakzal.

^{3*} Kewögöra waimanjat mörakzal: Mokoleñnön isimmakakalek aiga Iwnöñ (Ewanöñ) bölüyöhi, miangö dop timbiqimibilim yeñön mewö me mewö jiba tilipköba engömegetka uruñinan tölöhoiga janjuñ akepuk.

⁴ Miangö könañi kewö: Tosatñan kaba Jisös jim asariini, mi qahöpmö, Jisös murutñi kungö könañi jim sehiba malgetka yeñgöra qahö mötket lömböriza. Uña Töröñi buña qem anğugeri, mi qahöpmö, öme kunöñ tosatñi engö uruñine gei lolonqalon mala miangöra töndup könjilij qahö mötze. Ölöwak Buña möt anğön kölgeri, mi qahöpmö, keu tandökñi kun qetñanök Ölöwak Buña qeta lañ jigetka tosatñan mi awamñanök möt anğön kölakze. Mewö asuhumakzawanğöra mönö töndup waimanjat kun qahö akze.

⁵ Miangöra waimanjat mörakzalmö, ahakmemeni mewö me mewö kewötketka etqegeñi qahö akzal. Tosatñan aposol qet memba timbiqimibilim lañ ahakzei, nöñön mönö yeñgö nembö bapñine qahöpmahöp maljal. ⁶ Keu niñgizei, miangö likepñi kewö jizal: Keu ölop sorokñi jijigö tandökñi mi ölop qahö mötzalmö, Buña keugö könañi mönö möt soroközal. Mi mönö nalö dop pöndañ aukñe indelbiga möt yaköze.

⁷ Inini mem wahöt engimangö möta nani mem et al anğuba malmalni nanğömamangöra nup memba malal. Miangöra Anutugö Ölöwak Buña mi engöra söñgöronji qahö jim asarim engiba malal. Mewö aka malalanğöra tosatñan nöñgöra uruqahö keu kewö jimakze, “Polnöñ mönö köna onğita siñgisöndok ahakza.” ⁸ Urumeleñ könağesö tosatñe nup qahö membiga töndup nalukñini öne niñgigetka membi nanğöm niñgiiga inini welen qem engiba malal. Tosatñan miangöra kewö jimakze,

* 11:3: Jen 3.1-5, 13

“Polnöh yon̄gorö nene silik tandök ak engiba malja. Mian̄göra aposol qahö akzapmō, nan̄ji nup̄ña memakza.” Nön̄göra mewö jiba jim sohomakze.

9 *Embuk mala yuaigöra osiba mözörön̄göba mian̄gören̄ mönö engören̄ök kun qahö kuᅅguba mem lömbör̄iba nene yuain̄ji qahö memba malal. Mewö qahöp̄mō, urumelen̄ alaurup Masedonia prowinsnöhök kaba yuaigöra osiali, mi ek asariba monej niᅅgigetka dop kölök. Ahakmemeni pakpak mian̄gören̄ mem lömbör̄im engibilen̄buköra möta galöm mem aᅅguba malal aka mewö toroᅅeba malmam.

10 Mem lömbör̄im engibilen̄bukö keuni mian̄göra mönö nani sileni memba öᅅgöba maljal. Kun̄jan keuni mi Akaia prowins̄jinan̄gö gölmen̄ji gölmen̄ji pakpak mian̄gören̄ qeap̄kōmangö osima. Kraistkō keu öln̄an mönö nam köl niᅅgiiga keu mewö jöhöba jiba kinjal. 11 Mi wuan̄ön̄göra? Mi in̄jini qahö jöpaköm engibilen̄ak, mian̄göra me? Mönö öln̄a jöpaköm engimakzali, mi Anutunöh̄ mötza.

12 Aposol sesek̄nai ewö ahakzei, yeᅅön̄ nembuk “Örörön̄ akingö nup tandök miyöhök memakzin,” mewö jibingö mötze. Mian̄göra kewö kuᅅgum engimakze, “Polgö tandök ewö nup memakzinaᅅgöra mönö Pol ewö nan̄göm neᅅgime.” Nup̄jinan̄göra silen̄jini möpöseibingö möta mian̄gö kön̄an̄ji jarumakzemö, mi ölop̄ qahö miwik̄naime. Nön̄ön̄ i ewö qahö akzal. Mian̄göra mem lömbör̄im engibilen̄buköra mönö nani galöm mem aᅅguba maljal aka toroᅅeba mewö malmam.

13 Yeᅅön̄ aposol öln̄i qahöp̄mō, mönö aposol takapulakan̄ji aka nup meme ambazip isimkakalek̄ninambuk akze. Kraistkō aposol neᅅgö tandök kondel aᅅguba nup laᅅ memakze. 14 Satanöh̄ nan̄jak asak̄nan̄gö garata tandök ewö kondel aᅅguba nup laᅅ memakza. Mian̄göra timbiq̄imbilim mien̄ön̄ mewö akeran̄göra qahö welip̄kōmakin.

15 Mian̄göra Satangö welen̄qeᅅe ambazipurup mien̄ön̄ ambazip welenn̄jini qebingö tandöktandök aka Kōna keu wuataᅅgöba mewö mian̄ön̄ solan̄ji ak̄neᅅgöra jim sohoba kondel aᅅgumakze. Mewö nup laᅅ memakzean̄göra mönö qahö auruba welip̄kōmakzin. Silememe mewö ahakzemö, nalö teteköᅅe Anutunöh̄ mönö likep̄ni ahakmemen̄jan̄gö dop melen̄j engima. Mewö.

Polnöh aposol nup memba sihimbölö gwötpuk mörök.

16 Keuni kunbuk kewö jimam: Engören̄ök tosat̄nan̄ nön̄ön̄ uruqahö maljal, mewö mötmör̄ibeak. Mewö mötmör̄ibeak ewö, ni mönö uruqahö azigö tandök köl öröm niᅅgime. Mewö aketka ölop̄ i ewö nani sileni memba öᅅgöba sut̄jine malmam.

* 11:9: Fil 4.15-18

17 Awösamakak ketanji möta sileni memba öngöba keuni jizali, mi Kembangö mötmöt sihimñangö dop qahöpmö, mi uruqahö azigö tandök ewö jizal.

18 Ambazip gwötpukñan sutñine gölmegö ahakmeme bölöni wuatangöba silenini memba öngömakzei, mianğöra nöñön mönö mewöñanök aka keuni mianğö dop jizal. 19 Nanñinak “Mötmöt ambazip öngöngöñi akzin,” jizeangöra mönö uruqahö ambazip yeñğöra mötketka qahö lömbörimakza.

20 Inini öl közömña kewö akze: Ambazip kewöñi yeñğöra mötketka uruñinan qahö lömbörimakza: Kunñan enğömemba jöhöiga welenqeçeurupñi etqeçeni akze. Kunñan tutuhum enğiba nenenini nem tekömakza. Kunñan jim kelök ak enğiiga buñani akze. Kunñan nanñi silenini memba öngöba keu töhöreñ jiba nuñgulumñini qekötahömakza.

21 I ewö öröm ureim ak enğimangöra mönö lölöwöröñi aka malal. Ösöñ ak enğialangöra “Kengöt moröya akza,” jiba nöñğöra mewö mötmörize me qahö? Keu mewö jiba mianğön ölop gamu qem niñgimeangö dop akzal me? Keu jimami, mi mönö uruqahö azigö dop jimam. Timbiqimibilim yeñön nup memakzeangöra silenini memba öngömegöra gamuñini qahö mötze ewö, nöñön mönö mewöyök nupnangöra aka silenini memba öngömangö möt köhöimakzal.

22 Yeñön keu kewö jiba silenini memba öngömakze, “Nini Juda ambazip aka Hibu keu jimakzin.” Mewö jimakzemö, nia kun mewöyök akzal. “Israel ambazip akzin,” jimakzemö, nia kun mewöyök akzal. “Abrahamgö isi amböurupñi akzin,” jimakzemö, nia kun mewöyök akzal.

23 *Keu kun mi uruqahö azigö keu tandök ewö jimam, “Yeñön Kraistkö nupñi memakzin,” jimakzemö, nöñön mi mönö i luhut ala enğongita memakzal. Nöñön mönö ambazip mi enğongita nup köhöiba memba malal. Kraistkö nupköra aka kösö mire al niñgigetka mianğöreñ i enğongita nalö gwötpuk taral. Ihilek wahinambuknöñ mönö könöpuk könöpuk nuñguba malget. Nalöñi nalöñi lömböt miwikñaiba kömumangö dop aka malal.

24 *Juda jike galöm tosatñan jigetka arawambu kömbinöñ nuñgugetka areñi 39 aiga sihimbölöñi möta malal. Mewö ak niñgigetka indimñi 5 ahök. 25 *Rom gawman yeñön jigetka ihilek wölzikenöñ nuñgugetka indimñi karöbut ahök. Sömani mohot kötnöñ nuñgugetka kömumangöra ahal. Wanje ketanje malbiga köwet töromnöñ kuñguba qaköba jömgöiga indimñi karöbut ahök. Nalö kunöñ wanje jömgöiga köwetnöñ geba silimñi mohot aka sunğemñi kun köwet qakñe lañ malal.

* 11:23: Apo 16.23 * 11:24: Dut 25.3 * 11:25: Apo 16.22; 14.19

26 *Nalöŋi nalöŋi köna anda kaba malal. O töwatŋi töwatŋi (göwöŋi göwöŋi) kutuba miangöreŋ lömböt miwikŋaiba ayuhumangö dop aka malal. Kegwek-kahasiliŋ ambazip yeŋgöra aka kömumangö keŋgötŋi möta malal. Juda könagesöurupŋi yeŋgöra aka lömböt miwikŋaiba ayuhumangö dop aka malal. Kian kantri yeŋgöra aka lömböt miwikŋaiba ayuhumangö dop aka malal. Taonŋi taonŋi miangöreŋ lömböt miwikŋaiba ayuhumangö dop aka malal. Arökŋangö miriŋi miriŋi miangöreŋ lömböt miwikŋaiba ayuhumangö dop aka malal. Köwet kutuba anda miangöreŋ lömböt miwikŋaiba ayuhumangö dop aka malal. Alaurup takapulakanŋi yeŋön nuŋguget kömumbilenŋbuköra wösöni kot gwözöŋniga malal.

27 Malmalni nanöömangöra nup köhöiba memba malal. Gaun guli gwötpuk malal. Nup gwötpuk mealangöra nenegö nalöni qahö ahöiga nenegö kömumba ogö kömumba malal. Nene qahöwahiga nalö gwötpuk bödi aka malal. Opo malukugöra osiba sanŋenŋi möta malal. 28 Miyök pakpak qahöpmö, toroqeba kewö möta malal: Urumelenŋ könagesöŋi könagesöŋi pakpak yeŋön waimanjatŋini jigetka urunan mönö nalö dop möt lömböriba malal.

29 Mötnariŋ alaurup denike yeŋön sörauba löwörize ewö, nöŋön mönö mewöŋanök i uru al eŋgizal. Kunŋan kölgörom aliga urumelenŋ alanan siŋgisöndok akzawi, siŋgisöndok miangö könöpŋan mönö nöŋgö uruni mewöyök nohoiga tembulakzal.

30 Silememe keuyök mönö mötŋingö ak eŋgiza. Miangöra sileni memba öngömamangö dop akilenŋak ewö, ni memba et al niŋgigetka ösumeret tandök akzali mönö miangöra aka sileni memba öngömakzal. 31 Kambu Jisösgö Iwi Anutuŋi nalö dop möpöseininga teteköŋi qahö aködamunŋambuk mal öngömawi, yaŋön mönö nöŋgö könaŋamni möri munenŋ keu qahöpmö, keu öŋŋi mi jizal.

32 *Damaskus sitinöŋ malbiga kiŋ Aretasgö kiapŋan mönö buldömin aziurupŋan nöminba jöhöm niŋgimegö jim kutum eŋgiiga Damaskus ambazip yeŋgö siti sel nanŋuŋe mönimba ölöŋ köla anbilenŋbuköra galöm memba kinget. 33 Mewö kingetmö, alaurupŋan nömemba sakapnöŋ al niŋgiba kösönöŋ jöhöba siti sel jeŋgenanŋeyök ösöŋösöŋ algetka gölmenöŋ eta köla böröŋeyök ölöŋ köla kayal. Mewö.

12

Polnöŋ jemelenŋ imut eka indelindel keu mörök.

1 Eŋgö silememe alaurupŋinan jemelenŋgö keuŋi keuŋi jimakzei, miangöra nöŋön mewöyök sileni möpöseiba

* 11:26: Apo 9.23; 14.15 * 11:32: Apo 9.23-25

jemelenḡo keuni jimam. Keu mi ölop qahö bauköm enḡimapmö, töndup keu toroqeba jemelen imutḡi imutḡi eki Kembunöḡ keuḡini indeli mörali, miangö kösohotḡi jimam.² Azi kun möt waḡgibi Kraistpuk qekötahöba malja. Uḡa Töröḡan i waḡgiriga gölmegö kousu luhut jaböḡi onḡita öḡgöba seḡgelau jaböḡi onḡita öḡgöba Anutu nanḡaḡö Suep miri uruḡe eu öḡgöyök. Nalö miangöreḡök yambu 14 lök teköi maljin. Silebuk me silenḡi qahö uḡaḡanök öḡgöyöhi, mi qahö mötzal. Anutunöḡ mi mötza.

³⁻⁴ Uḡa Töröḡan azi mi waḡgiri Anutugö oyaenḡkoyaenḡ miriḡe öḡgöi keu qainḡi kun jigetka mörök. Gölme azi nöḡön keu mi jimamḡo soḡgo ahöza aka keu mi gölme ambazip neḡḡo keunin an jibinaḡö dop qahö. Silebuk me silenḡi qahö öḡgöyöhi, mi Anutunöḡ mötza. Nöḡön mi qahö mötzalmö, yaḡḡo kösohotḡi mötzal.

⁵ Nöḡön azi yaḡöreḡ yaui asuhuyöhi, miangöra sileni memba öḡgömamaḡö dop akzal. Nanangöra mi asuhuyökmö, töndup miangöra aka nani sileni qahö möpöseimakzal. Miangöra qahöpmö, ösumeret akzalaḡörök mönö mewö ahakzal.

⁶ Nanangöra sileni mewöyök memba öḡgömamḡö mötpilenḡak ewö, keuni mönö keu ölnaḡö dop jibilenḡak. Mewö keu omaḡi jiji azia qahö akilenḡakmö, mi kewögöra köyatim anḡumakzal: Körek enḡon jemelen mi ehalangöra keu diḡdiḡi onḡita nöḡöra mötket öḡgöḡḡöḡi akilenḡbuk. Ahakmemeni aki eketka keu jibi mötkeri, mönö miangö dowök kewöt niḡgimegöra mötzal.

⁷ Indelindel keu öḡgöḡḡöḡi mötpi keu tosatḡi onḡirakzawi, miangöra aiweliköm anḡubilenḡbuköra Anutunöḡ yaui jitḡambuk nöḡö silene aliga kondi sötmangö dop nuḡgumakza. Satangö garatanöḡ sihimbölö mi niḡgiiga mörakzal.⁸ Miangöra Kembunöḡ mi sileneyök mem gilmapköra köuluköbiga indimḡi karöbut ahök.

⁹ Mewö köuluköyalmö, keu kewö jii möral, “Qahö. Ösumeret aknöḡga nöḡö kukösumnan mönö amqeba urugi kokolak qeiga aködamungabuk ahakḡan. Miangöra nöḡö kalem möriamni mönö buḡa qem anḡunöḡga dop köлма.” Keu mi jii möta Kraistkö kukösumḡan qakne öḡgömapköra mörakzal. Miangöra ösumeret ahakzalaḡöra sileni möpöseimakzal. Lömböt mi qahöwakḡapköra qahö toroqeba köulukömakzal.

¹⁰ Kraistnöḡ ni ösumeret ahakzali, nalö miangöreḡ ösum niḡgiiga köhöiba kinakzal. Miangöra ösumeret akzalaḡöra töndup mötpi dop köli siksuk qahö akzal. Tosatḡan uruqeqe keu töhöreḡ jim niḡgigetka mötpi dop köl niḡgiza. Kraistköra aka kahasililiḡ sesewerowero ak niḡgigetka wahöjalinḡ möta miangöreḡ töndup uruböḡjöḡ miwikḡaimakzal. Mewö.

Polnõj Korint yengõra waimanjat mörök?

11 Sileni memba õngõba mönõ uruqahõ tandök akzal. Dingimegõra aka kõna murutji kun qahõ miwikñaiba nõngõra mötket õngõmapkõra mi jizal. Õlña, Anutunõj qahõ baukõm niñgibawak ewõ, nanak mönõ yuai kun qahõ aki andõqeqe keunjan õlñi akawak. Õlñi akawakmõ, ahakmemeni mewõ me mewõ kewõtzi, mönõ etqegeñi qahõ akzal. Tosatjan aposol qetpukõ qet memba timbiqimbilim lañ maljei, nõñõn mönõ yengõ nembõ bapñine qahõpmahõp maljal.

12 Engõ sutñine nup memba lömbõt gwõtputuk möta mökõsõnda malali, mianğoreñ Anutugõ kukõsumñan sõlõlõhõm niñgiiga aņgõletot aiwesõk kõnañi kõnañi asuhuget. Ahakmeme mianğõn mönõ aposol akzalaņgõ kõnañi kondel eņgiiga eket.

13 Inini baukõm eņgial aka urumelen kõnagesõ tosatji mi embuk örõrõj ak eņgial. Tosatji eņgõmembali wahõtketka inini mönõ denõwõ eņgõmosõtpi õne malbeak? Õlña, naņgõm niñgimegõ lömbõtñi mi eņgõ qakñine qahõ alal. Aposol takapulakañi yeñõn lömbõt mi eņgõ qakñine alakzemõ, nõñõn mi tosatji yengõ qakñine albi bisimakze. Naņgõm niñgimegõra qahõ kuņgum eņgiba mewõ köpõsihit ak eņgial me? Mianğõra “Polnõj köpõsihit azia akza,” jibeak, mönõ pinjitni mi mosõtmegõra qesim eņgizal.

14 Mötket, nalõ kewõñe kunbuk eņgõreñ kamamgõ jõjõrõbiga indimñi karõbut akña. Kaba nupni naņgõmegõ lömbõtñi mi dumñe kunbuk eņgõ qakñine qahõ almam. Mi qahõ. Nanñini sukinapñinaņgõra qahõ köpõsõņgõmakzalmõ, nanñinak mönõ nõngõra ak eņgimapkõra mötzal. Nahõnbõrat yeñõn iwinamurupñini naņgõba inap tokoba eņgimeañgõ dop qahõ akzemõ, iwinam yeñõn mönõ mi nahõnbõraturupñini yengõra tokogetka dop kõlja. Mianğõ dop urugõ nupnõj gõrõken nõñõn iwinini akzal. Mianğõra urunõj gõrõken baukõm eņgimamgõ mötzal.

15 Mianğõra eñõn õlõwakñegõra yuaini pakpak mi sõsõņgai qakñe tõkõm eņgibi eņgõ buña akñapkõra mötzal. Nani malmalni mewõñanõk õlõwakñegõra mosõtmamgõ mötzal. Mewõ õnõñi qahõ jõpakõm eņgibi urukalemnan qarimakzapmõ, eņgõ urukalemñinan mönõ tõndup wuanõņgõra wazimakza?

16 Õlña, naņgõm niñgimegõ lömbõtñi mi eņgõ qakñine qahõ alal. Nõņgõ tuarenjoņurupnan keu mianğõra urumohot akzemõ, tosatjan kewõ jibeak, “Pol mi mötmõt azia aka tilipqilipñambuk uruñini mezaņda kõpeim eņgiba monenini mewõ me mewõ örõmakza.” Keu mianğõn õlñi qahõ. 17 Mi denõwõgõra jize? Neņakurupni melaim eņgibiga eņgõreñ kageri, yeņgõreñõk kunñan Pol inap waņgimegõra kuņgum

engiyök me qahö? Qahö. ¹⁸ Taitus engörej kamapkö kuṅgum waṅgiba urumelen ala kun yambuk melaibi kayohot. Taitusnöṅ ni inap niṅgimegö kuṅgum engiyök me qahö? Qahö. Uṅa mohot mianṅön mönö sölölöhöm netkiiga nup naṅgönaṅgögö köna mohot anda kaba malit. Mewö.

Polnöṅ mönö Anutugö kukösum qakṅe kama.

¹⁹ Kimbi ki oyoṅda mianṅörej nöṅgöra kewö mötmöribepuk, “Keu jim engiinga mianṅö likepṅa kapaṅ köla jiba mewö ohoza.” O wölböt alaurupni, mianṅöra kewö jimam: Mönö Kraistpuk qekötahöba keuni Anutugö jemesoholṅe jiba ohoyal. Nupnini pakpak mi eṅön uruṅini möhamgöba köhököhöi miwikṅaimegöra memakzin.

²⁰ Engörej kaba eki ahakmemenṅini tökömakzali, mi wuatangöba malbepuk. Mewö miwikṅaim engibileṅbuköra waimanjat mötzal. Ahakmemenṅinaṅgö likepṅi melenṅ engibi qakṅine öṅgömawi, eṅön mönö tandök akṅami, mi tökömegöra mötzal. Sutṅine ahakmeme kewö akepuköra goro mötzal: Uruṅöṅ mututqutut aka aṅgururuk akepuk. Urusingok aka yom jibepuk. Silenöṅ alal ak aṅguba denṅa nannṅini kambugörök mötmöriba malbepuk. Andöqeṅe keu töhörej jiba mianṅön mem bölim aṅgubepuk. Tosatṅi yeṅgö keuṅini tölapṅe jigetka diwoṅdawoṅ anṅapuk. Jakbak-öraṅböraṅ aka areṅi törörök qahö wuatangöba nannṅini imbi-imbi laṅ malbepuk.

²¹ Mewö aka malme ewö, nöṅön mönö kewö asuhumapköra waimanjat möta kamam: Ambazip gwötpukṅan mutuk siṅgisöndok aka malgeri, yeṅgöra mönö urukömbuk aka sahötpileṅbuk. Ahakmeme töwötṅambuk laṅ wuatangöba sihimṅini kömbönaṅi miwikṅaimegöra serowilin akerangöra gamu qahö möta qahö möt bölim aṅguget. Sutṅine kabiga uruṅini kunbuk qahö melenṅet eṅgekiga Anutunöṅ mönö uruni kuṅgui kunbuk urueret akileṅbuk. Mewö.

13

Galöm meme keu qöndökṅi

¹ *Nalö kewöṅe engörej kabiga indimṅi karöbut akṅa. “Keugö jakeṅe alalgö keuṅi pakpak mi mönö ambazip yahöt me karöbutṅan naṅgöba jigetka köhöimakza.” ² Nöṅön Buṅa keu mianṅö dop akzal. Engö sutṅine malbi indimṅi yahöt aiga mianṅörej lök galöm meme keu eṅgial. Keu mi nalö kewöṅe kunbuk köl guliba qelṅiṅeyök jizali, mianṅön teköza. Mianṅöra kunbuk kamami, nalö mianṅörej ambazip siṅgisöndok mutuk akeri me akzei, mi mönö qahö

* 13:1: Dut 17.6; 19.15

enqehorimam. Bölönjamñinambuk injini mönö körek mindingöm enqimam.

³ Kraistnöñ mönö ösumeret qakñe qahö ak enqimakzapmö, kukösumñi sutñine kondelakza. Kraist mianjönök mönö sölölohöm niñgiiga aposol aka keu jimakzali, injini mianjögö könañangöra uruyahöt aka kapan köla qesim anqumakze. Mianjögöra silikñinañgö dop mönö keu enqiba mindingöm enqimam.

⁴ Kraist maripomnöñ qegetka kömuyöhi, nalö mianjögören mönö ösumeret tandök malökmö, töndup Anutugö kukösumñan nam köl wañgiiga mal köhöiza. Nöñön mewöñanök yambuk qekötahöba nani ösumeret aka maljalmö, Anutugö kukösumñan mönö nam köl niñgiiga Kraistkö jitñi memba mindingöm enqimangö mal köhöizal.

Mönö nanñini kewöt anquba uruñini melenqe.

⁵ Mönö nanñini törörök kewöt anqume. Uruñini melenqa ölña Kraist möt narize me qahö, mianjögöra mönö esapesapnöñ ala kewöt anqume. Kraist Jisösgö Uñañan uruñine mal köhöizawi, mi möt kutuze me qahö? Uruñine qahö malja ewö, injini mönö esapesap mianjögören et enquga Kraistkö bunaya qahö akze.

⁶ Nöñön enjögören aposol ölñi akzal me qahö, injini mewö kewöt niñgigetka esapesap mianjögören kude eta nunguma, mewö mötzal. Injini nöngö köñani mewö aukñe eka möt kutumegöra jörömqöröm aka maljal. Mianjögöra mindingöm enqibi ölña dop kölma.

⁷ Keu pakpak ohoba kotzali, mi ak sohobepuköra Anutu köuluközin. Keu kun jim sohoba malgetka kaba mindingöm enqibiga tuarenjoñurupnan mönö aposol kukösumni ölña eka ek asarime. Mewö asuhumapköra qahö köuluközal. Injini qahö mindingöm enqimamangö dop nekepuköra qahö köuluközalmö, enñön urumelen diñdiñi akñegöra köuluközal. Uruñini ölña melenqe ewö, nöñön mönö qahö mindingöm enqibi tuarenjoñurupnan nöngöra toroqeba azi lölöwöröñi tandök ewö mötpeakmö, mi muat.

⁸ Nini keu ölñi qetala kun uteköbingö osibinmö, keu ölñan sehimapköra ölop kinbin. ⁹ Nöñön kukösumni qahö kondela ösumeret tandök malbiga enñön köhöiba kinmei, nalö mewöñe mönö sösongai ahakin. Urumelengö aködamunñini körek miwikñaiba köhöiba kinmegöra neñön Anutu köulukömakzin. ¹⁰ Kembunöñ injini memba et al enqimamgöra qahöpmö, uruñini möhamgöbi köhöimegöra möta kukösumñi mi al niñgiyök. Kukösum mianjögö qakñe kinda enjögören kamami, nalö mianjögören köñöpuk ak enqibilenbuköra mönö keu ki körowen mala enjögöra kimbi ohozal. Nanñinak mindingöm anqume ewö, mönö ösöñ ak enqimam. Mewö.

Yaizözkök keu teteköni

¹¹ O urumelen alaurupni, keuni jim teköba qambañ kewö engizal: Mönö söngai ba malme. Könañamñini sohoyöhi, mi mönö körek mindiñgöm teköme. Urukunḡukunḡu keu engizali, mi mönö buña qem anḡuba tem kölme. Keu jiali, mi anḡören mönö urumohot aka luainöñ malme. Mewö aketka Anutu jöpaköm anḡumegöra inahöm neñgiba luai qem neñgimawi, yañön mönö embuk malma.

¹² Inini urumelen alaurupñini yembuk jölöñini jiba mönö köna sarakñi wuatangöba jölöñini jiba anḡum anḡuba numbuñini yöhötim nemba malme. Anutugö ambazip sarakñi pakpak ki maljei, yañön yaizözkökñini algetka anḡören kaza.

¹³⁻¹⁴ Kembu Jisös Kraistnöñ mönö kalem möriamñi anḡiiga Anutugö urujöpakñan nam köl anḡiiga Unḡa Töröñan körek inahöm anḡiiga urumohot aka köisirik malme. Mewö.

Galesia Kimbi Polnönj Galesia yeŋgöra Kimbi alök. Jim-asa-asari

Polnönj Buŋa Kimbi ki Galesia prowinsgö urumelen könagesö yeŋgöra ohoyök. Galesia prowins mi Eisia Mainö (Töki) urunje Rom yeŋgö bapŋine malget.

Aposol yeŋön Anutugö Buŋa keu jim sehigetka mutuk Juda tosatŋi aka könanŋep kian kantri tosatŋan mewöyök urunini melenget. Nalö mianŋörej Juda yeŋön kapan köla keu yahöt kewö jigetka lömböriyök:

- 1) “Kian kantri yeŋön Mosesgörej Köna keugö dop Anutugö aiwesökŋi silenine qahö yandime ewö, yeŋön mönö urumelen könagesö ölni qahö akŋe.” Anutunönj ambazip nanŋanŋöra möwölöhöm enŋiyöhi, yeŋgö aiwesökŋi mi sile yandiyandi. Jen 17.10–12. Polnönj mi möta “Keu mi ölni qahö!” jiba kewö jim kutum enŋiyök, “Kian kantri yeŋön Jisös möt narigetka Anutunönj mötnariŋini mianŋöra aka keunini jim teköi solaniba urumelen kambu ölni akŋe.”
- 2) Böhi takapulakanj yeŋön Polnönj Uŋa Töröŋanŋö ösumnönj nup meyöhi, mi memba et ala kewö jiget, “Pol mi aposol ölni qahö akzawaŋgöra keunji kude mötme.” Mewö jigetmö, Polnönj köhöiba jiyök, “Nönjön Jisösgö Ölöwak Buŋa jiji azia aka Anutunönj meköba kuŋgum niŋgiiga aposol ölna maljal.” Mewö jiba Galesia yeŋgö urumelen kambunji kambunji ahakmemegö qambaŋ keu ohoyök. Urunini melenbin ewö, mönö amqeba Kraist jöpaköba nupŋi meinga ölni asuhuma.

Buk kianŋö bahöŋi bohönji 5 mi kewö:

Keu mutukŋi *1.1-10*

Pol ni aposol ölni akzal *1.11-2.21*

Anutu kalem möriamŋanŋö Buŋa keu *3.1-4.31*

Nanini imbi-imbi akinbukö soŋgo *5.1-6.10*

Kimbigö keu kötnji bohönji *6.11-18*

¹ Pol nöŋön keu eraum mötpingöra Galesia urumelen könagesö enŋöra kimbi ki ohozal. Melaimelai azi akzalanŋö könanj kewö: Ambazipnönj aposol nupköra qahö kuŋgum niŋgigetka memba maljal. Gölmelae azi kunŋan qahö melaim niŋgiyökmö, Jisös Kraist aka Iwi Anutu i kömupnöhök mem guliyoŋi, yetkön mönö areŋgöba aposol nup al niŋgiyohotka kinjal. ² Neŋakurup pakpak nömbuk kinjei, yeŋön ni kötöngöm niŋgigetka kimbi ki albi Galesia prowinsnönj anda urumelen könagesö kambunji kambunji enŋörej kaza.

³ Anutu Iwinini aka Kembu Jisös Kraist yetkön mönö kalem möriam enjyohotka luainöŋ malme.

⁴ Jisösnöŋ nanine Anutu aka Iwi yaŋgö numbu jitŋi wu-ataŋgöba neŋgö siŋgisöndokninanŋöra aka malmalŋi köleŋniga qeget. Nalö kewöŋe gölmegö nalö bölöŋe malakzini, yaŋön mönö kianŋöreŋök amöt qeba meköm neŋgimapköra aka kömuyök. ⁵ Mianŋöra Anutugö qetbuŋaŋi nalöŋi nalöŋi möpöseininga teteköŋi qahö aködamunŋambuk ahöba ahöm öŋgöma! Keu mi ölna.

Ölöwak Buŋa mi kude jim sohoba mondokqondoköme.

⁶ Nöŋön enŋö könaŋinanŋöra aka aurubiga je kötni jölja. Anutunöŋ Kraistkö kalem möriamŋi buŋa qem anŋumegöra enŋoholiga yambuk malgetmö, nöŋön enŋömosötpiga tosatŋan kaba Ölöwak Buŋa murutŋi jigetka nalö qahö köriiga eleŋda keu goŋgoŋi mianŋöreŋ qekötahöba enjololon malje. Mianŋöra mönö ölna auruzal. ⁷ Keuŋini mi Ölöwak Buŋa ölni qahöpmahöp akzapmö, ambazip tosatŋan Kraistkö Ölöwak Buŋaŋi mi enjololon memba melenqeleŋ aketka möwököwöramgöiga goŋgiza. Mewö aiga laŋ liliköba ambazip kuŋgum enŋigetka uruŋinan siksauk aiga malje.

⁸ Ambazip mewöŋi mi yapmakek! Neŋön Ölöwak Buŋa lök jim asarim enŋiba malini, kunŋan mi qeapköba buŋa keu murutŋi jim asaribawak ewö, yaŋön mönö Anutugö jeŋe könöp siagö buŋaya akza. Mi neŋgöreŋök kunŋan me Suepkö garata kunŋan eta jibawak, mi töndup keu mewöŋi mönö qahöpmahöp tem kölme. Keu goŋgoŋi mi muat. ⁹ Keu mutuhök jiba malini, miyöhök mönö dölki kunbuk jizal: Enön Ölöwak Buŋa lök möt anŋön kölgeri, kunöŋ mi qeapköba buŋa keu murutŋi jim asaribawak ewö, Anutunöŋ mönö i jörahöm wanŋiiga könöp sianöŋ gema.

¹⁰ Keu mewö jizali, mi ambazipnöŋ nek soriget nanak jeŋine dop kölmamgöra aka qahö jizalmö, Anutunöŋ nehi yaŋgö jeŋe dop kölmamgöra aka mi jizal. Nöŋön gölme ambazip uru ölöwak möt niŋgimegöra qahöpmahöp kapaŋ kölakzal. Toroqeba ambazip kelök ak enŋiba sipköbilenak ewö, nöŋön mönö Kraistköreŋ nup memamgö osibilenak. Mewö.

Kraistnöŋ mem letot niŋgiiga aposol ahal.

¹¹ O alaurupni, Ölöwak Buŋagö könaŋi mi kewö möt yaköme: Buŋa keu jim asarimakzali, mi gölme azi kunŋan qahö jimbu-
reŋ jiyöha ahöza. ¹² Kunŋan kun mi qahö kusum niŋgiyök. Mi gölme azi kungöreŋök qahö möt anŋön kölalmö, Jisös Kraistnöŋ nanŋak asuhum niŋgiba Ölöwak Buŋaŋi indeliga möt asaribiga nöŋgö buŋaya ahök.

13 *Enjön nongö könañamni ölop mötze. Juda ambazipnöy Anutugö Köna keugöra urukönöp ahakzei, nöjön mutuhök yengö mötmötñini wuatangöba yengö dop aka memba malal. Mewö mala Anutugöreñ urumelenj könagesö mi engum ureiba jangauranga mem engiba malal. Könöpñambuk sesewerowero ak engiba mem ayuhum engimangö esapköba malal. 14 *Juda ambazip gwabö alaurupni qötönini mohot kota malini, nöjön yengöreñök sehisehiñi mi luhut al engiba Köna keugöra urukönöp aka malal. Mewö mala Juda ahakmemegö könañi törörök wuatangöba ambösakoninañgö jimkutukutu keu et-papuköra mönö önöñi qahö kapan köla malal.

15 *Mewö aka malalmö, Anutunöy mutuhök nam körö uruñeyök neka nanñangöra möwölöhöba al niñgiyök aka könañgep kalem möriamñangöra aka noholök. Noholöhi, yañön mönö nongöra areñ kewö möri dop kölok: 16 Yañön Nahönñangö könañi nongöra indeli mötmangö möta Jisösgö Ölöwak Buñaji memba kian kantri tosatñe anda yengö sutñine jim asariba malmangö jiyök. Yañön mewö jiyöhangöra aka nöjön wahöta könakönahineyök könahiba gölme ambazip yengö goro keuñinañgöra mönö qahöpmahöp jaruba qesim engiba mala koral.

17 Mewöñanök Jerusalem sitinöy qahö öngöba melaimelai azi aposol mutuk mala kotkeri, yengöreñ qahö anda asuhuyal. Mewö qahöpmö, miangöreñök Arebia gölmenöy anda mala kunbuk Damaskus sitinöy lilingöyäl. 18 *Damaskus lilingöbiga yambu (yara) karöbut teköiga “Pitö eka möt kutumam,” jiba Jerusalem sitinöy öngöba yambuk sömañi 15 miangö dop malal. 19 Miangöreñ malalmö, melaimelai azi aposol tosatñi i qahö engehal. Kembangö munñi Jeims iyök ehal.

20 Miangöra mötket, keu ohom engizali, mi keu ölni akza. Munñi kun qahö. Keu mi Anutugö jemesoholñe jizal.

21 Jerusalem mosöta Siria aka Silisia gölmenöy anda miri tosatñi liliköba malal. 22 Mewö anda malalmö, Judia prowinsgö urumelenj könagesö kambuñi kambuñi Kraistpuk qekötahöba kinjei, yañön qahö nekerangöra nalö miangöreñ ni qahö möt kutum niñgiba malget. 23 Nöngöreñ buzup keu kewöyöktöp yengö kezapñine geiga mötket, “Mutuk sesewerowero ak neñgiba malöhi, yañön mönö letota malja. Mötnarip keu ayapkömapköra jangauranga mem neñgiyöhi, yañön nalö dölkewöñe nanñak keu miyöhök jim asarimakza.”

24 Mewö möta nongöra aka Anutu möpöseim wañgiba malget. Mewö.

* 1:13: Apo 8.3; 22.4-5; 26.9-11 * 1:14: Apo 22.3 * 1:15: Apo 9.3-6; 22.6-10;

26.13-18 * 1:18: Apo 9.26-30

2

Aposol yeñon Pol örögetka sutñine kayök.

1 *Miangö andöñe yambu (yara) 14 teköiga miangören “Barnabasbuk Jerusalem sitinöñ kunbuk öngömam,” jiba Taitus mewöyök wanğitpiga mohotñe öngöin.

2 Anutunöñ mutuk nöñgöra asuhuba anmamgö keu in-delöhanğöra aka yetpuk anda Jerusalem anğota nupnanğö könani jim asarim enğial. Nup pöndan memba kota maljali, miangön aposol yeñgöra qahö dop köliga nupnanğö ölnan eta qeiga pöröpköbapuk. Mewö mötmöriba kösohotni ambazip omani yeñgöra lan qahö jialmö, jitñememeurupnini göda qem enğimakzini, iyök öröm enğibiga tokoget. Tokogetka miangören Ölöwak Buña kian kantri sutñine liliköba jim sehimakzali, mi aukñe al enğibiga mötket. 3 Yeñon mi möta “Ölöp!” jiget. Mewö jiba neñakni Taitus Grik azi yanön nömbuk malökmö, töndup ketañamninan Anutugö aiwesökñi silene yandimegö qahö jim kutum wanğiget. Juda neñgören Köna keu mi qahö al köhöim wanğiget.

4 Juda ketañi yeñon qahöpmö, tosatñan sileni yandibingö möta sutñe sutñe kunğuba jigeri, böhi takapulakani miengö könani kewö: Yeñon “Urunini melenjin,” jiba mewö möndöba neñgö könanini ek kutumegöra ölöñ janjan kaba ala tandök sutñine kanğota malget. Nini Kraist Jisösbuk qekötahöinga malmal walñangö kösönöhök pösat neñgiiga solanji maljini, miangö silikñi ek kutumegöra kinget. Yeñon neñgöra kewö möta köpösöngöget: Ölöp malgetka enğömeinga nanine sel uruñe kagetka Mosesgö Köna keu bapñe al enğiinga nanine welenqeçeurupnini akñe. 5 Mewö köpösöngöba metal neñgigetmö, neñon mönö Ölöwak Buñagö keu ölnan lolonqalon akapüköra kinjin. Mi enğö sutñine kahaimök ahöm köhöimapköra kinjin. Miangöra nalö kunöñ qahö löwöriba keuninañgö bapñe anbingö qahöpmahöp imbi köl wanğiin.

6 *Totokonöñ nöñgö Buña keuni jim asaribiga jitñememe yeñon “Ölöp!” jiba nöñon keu kun toroqeba jimamgö qahö jiget. Azi mi ipñina aketka göda qem enğimakze. Qetbuñanini mewö me mewö akzawi, nöñon miangö mötpi dop mohot akza. Anutunöñ ambazip tosatñi qahö neñgek soriba tosatñi qahö qepureim enğimakza. Dop mohotnöñ kewöt neñgimakza.

7 Buña keuni qahöpmahöp utekögetmö, Anutugö nup areñi miangöra mönö “Aha!” jiba kewö ek asariget: Anutunöñ möt narim neñgiba Ölöwak Buña jim asaribingö nupñi mi kewö mendenök: Nöñon mi kian kantri sutñine jim sehibiga

* 2:1: Apo 11.30; 15.2 * 2:6: Dut 10.17

Pitönöŋ Buŋa keu miyök Juda könagesö yengöra jim asariba uruŋini kuŋgum enŋimakza.

⁸ Nupŋi mewö mendenŋa aposol Pitö inahöm wanŋiiga Juda azi silenŋini yandigeri, yengö sutŋine urukuŋgukuŋgu nup memakza aka ni mewöŋanök inahöm niŋgiiga melaimelai azia aka kian kantri sutŋine liliköba nup miyöhök memakzal.

⁹ Mianŋöra Jeims, Pitö aka Jon, azi ipŋi qetbuŋaŋinambuk yeŋön Kembunöŋ kalem möriam mewöŋi niŋgii malali, keu mi möt kutugetka urumohot ahin. Nup mewö mendenŋa mianŋö kaisöpsöpŋa Barnabas niri böröniri qegetka kewö jim köhöinin, “Niri kian kantri yengöreŋ anda nup meziga nanŋini Juda könagesö yengö sutŋine toroqeba nup memakŋe.”

¹⁰ Mohot-kungöra qesim netkiba kewö toroqeba jiget, “Ambazip wanapŋi bauköm enŋibitköra mönö toroqeba mötmöriba malmahot.” Mewö jigetka mönö mewöyök ak enŋimamgö kapan köla maljal. Mewö.

Polnöŋ Pitö qetala jim wanŋiyök.

¹¹ Mewö jim köhöininmö, Pitönöŋ Antiokia sitinöŋ kaba möŋaqöŋai aiga ambazip uruŋinan gwötpuk böliyök. Mianŋöra Pitönöŋ kaiga ehali, nalö mianŋöreŋ mönö jeŋe kuŋguba kewögöra tuarenjoŋ ak wanŋial: ¹² Pitönöŋ mutuk kian kantri yembuk mala nene mohokŋe nemba malgetmö, azi tosatŋan Jeims mosöta Jerusalemök kagetka mianŋö andöŋe ambazip mi enŋek siriköba tikeptikep kinök. Anutugö aiwesökŋi silenŋine yandiget yengöra keŋgötŋi möta zirinŋirin aka Juda kambu yembuk qekötahöba malök.

¹³ Mewö kian kantri ambazip mi ölan enŋuba koŋwarak aiga Juda urumelenŋ ambazip tosatŋan mewöyök Pitöbuk qekötahöba silesile silik aket. Silesile silik aka Barnabas mewöyök örögetka yembuk janjuŋ ahök. ¹⁴ Mewö aka ahakmemeŋinan Buŋa keu ölni diŋdiŋanök qahö wuatangögeri, nöŋön mi eka ambazip körek yengö jemesoholŋine kinda kewö jial, “Pitö, gi Juda aziapmö, töndup kian kantri yengö ahakmemeŋini wuatangöba maljan. Nangak Juda nanine ahakmeme qahö wuatangöba töndup kian kantri ambazip mi wuatangöba kinmegöra kuŋgum enŋiba urukönöp ahakzan? Mi qahö dop kölja.” Mewö.

Juda aka kian kantri neŋön Anutugö jeŋe öröröŋ akzin.

¹⁵ Juda asuhaba urunini melenŋini, neŋön mönö kian kantri ambazip siŋgisöndokŋinambuk qahö aka maljin. ¹⁶ *Mewö maljinmö, amötqeqegö könaŋi mi kewö ahöi möt yaközin: Jisös Kraist möt nariŋga keunini jim teköi solanizin. Kunŋan Köna keu wuatangöba mewö mianŋön solanŋi qahö akŋa.

* 2:16: Sum 143.2; Rom 3.20, 22

Miaŋgöra neŋön tok solanŋi akingö möta Kraist Jisös möt narim waŋgiinga keunini jim teköi solaniin. Mi Köna keu tem kölbinahaŋgöra aka qahö.

¹⁷ Mewö Kraist qekötahöba Anutugö jeŋe solanibingö kapaj kölinga Anutunöŋ töndup miwikŋaim neŋgiiga nani-nak kantri tosatŋi tandök siŋgisöndokninambuk maljin ewö, Kraistnöŋ mönö siŋgisöndok akingö nam köl neŋgiza me qahö? Qahöpmahöp! Keu mi yapmakek! ¹⁸ Köna keu wuatangöba solanŋi akingö keuŋi lök köndenŋa qeapköyal. Qeapköyalmö, mi kunbuk esapköba jim kuŋgubilenjak ewö, mönö Köna keu miyök qetala siŋgisöndok azia aka könaŋamni kunbuk mewö miwikŋaibilenbuk. ¹⁹ Mutuk könaŋamni mewö miwikŋaiba Köna keugöra aka kömukömuŋi tandök ewö ahal. Mewö akiga Köna keunöŋ mönö qahö toroqeba galöm köl niŋgiiga solanŋi maljal. Nöŋön malmalni Anutugöreŋ albiga Kraist-puk maripomnöŋ nuŋguget ewö kömumba kinda yambuk köhöiba maljal.

²⁰ Miaŋgöra nanak qahö toroqeba maljalmö, Kraistkö Uŋaŋan mönö nöŋgö urune köhöiba malja. Kraistnöŋ uru jöpaköm niŋgiba malmalŋi nöŋgöra kölenŋa sohopni meyök. Miaŋgöra toroqeba silebuk malmal malmami, mi mönö Anutugö Nahönŋi möt narim waŋgiba malmam. ²¹ Köna keu wuatangöba mewö mianöŋ solanŋi akinak ewö, Kraistnöŋ mönö öne töhöŋ kömumbawak. Kömuyöhi, mi möt nariba Anutugö kalem möriamŋi mewö qahö qeapkömakzal. Mianöŋ mönö nam köl neŋgiiga solanimakzin. Mewö.

3

Köna keugörök kinme me Jisös möt narime?

¹ O Galesia kahapmahap ambazip, uruŋini qahö! Nöŋön Jisös Kraist maripomnöŋ qegeraŋgö könaŋi mi jeŋine ala jim kondel enġialmö, kunŋan nöŋgö andöne kaba kahalalom mem enġiiga janjuŋ akze. Mi qahö dop kölja. ² Yuai mohot-töp qesim enġibiga jiget mötmamgö mötzal: Enöŋ Uŋa Töröŋi mi mönö denöwö aka buŋa qem aŋguget? I Köna keu wuatangögeraŋgöra aka qahöpmö, Ölöwak Buŋa möta Jisös möt narigetka Uŋa mi uruŋine ali buŋa qem aŋguget. Nöŋön keu mia ölum enġubapuköra kinda uruŋini kuŋguzal. ³ Mia ölum enġuyök tandöktandök melenŋa mötmöŋŋini mosöta kahalalom akze. Mutuk Uŋa Töröŋan uruŋine geba inahöm enġiiga könaŋi könahiba angetmö, kunbuk Mosesgö Köna keugö könaŋe geba anakze. Nalö kewöŋe nanŋini ösum qakŋe solanŋi akingö esapkömakze me? Ösumŋini mianöŋ mönö qahö dop kölja.

⁴ Kraistköra aka sihimbölö gwötpuk ak enġigetka qakŋine öŋgöyöhi, mi mönö öne töhöŋ möta bisiba malget me? Ölni

qahö aiga mi mönö ölja öne töhön bisiget. Mianğöra injini mönö uruqahö ambaziwa malje. ⁵ Mianğöra Anutunöŋ Uŋa Töröŋi enğiba sutŋine anğöletot ösum-mumuŋambuk memakzawi, mi enjön Buŋa keuŋi möta Jisös möt nari-makzeanğöra aka memakza. Köna keu wuatangömakzeanğöra aka mi qahö memakza. Qahö. Keu mi kude ölum enğuma. Mewö.

Abrahamgö köna wuatangöinga dop kölma.

⁶ *Keu mianğö dop Anutunöŋ Abraham ak waŋgiiga mi Buŋa keunöŋ kewö ohoget ahöza, “Abrahamnöŋ Anutu möt narim waŋgiiga eka keuŋi jim teköiga solaniyök.” ⁷ Mianğöra Abrahamgö könaŋi mötmöriba kewö mötme: Denike yejön Anutu möt narimakzei, yejön mönö Abrahamgö undumurupŋi aka malje. ⁸ *Anutunöŋ qeljiŋe areŋi kewö alök, “Ambazip Juda qahö yejön ni möt narim niŋgigetka keuŋini jim teköbi solanime.” Areŋi mewö ala mianğö dop Abrahamgöra Ölöwak Buŋa keu qeljiŋe kewö jii mörök, “Göhöra aka nöŋgö kötuetnan mönö gölmegö ambazip kambu pakpak yengö qakŋine öŋgöma.” Tosatŋan keu mi qeljiŋe ek asariba Buŋa keunöŋ ohoget. ⁹ Abrahamnöŋ Anutu möt narim waŋgiiga kötuetköm waŋgiiga mötnaripkö bömönjalöŋi ahök. Mianğö dop denike yejön Abrahamgö dop möt narizei, Anutunöŋ i mewöyök kötuetköm enğiiga Abrahamgö undumurupŋi akŋe.

Jisösnöŋ salupnine qesuahöp buŋa qem anğuyök.

¹⁰ *Mewö akŋemö, körek yejön Köna keu wuatangöba mianğö qakŋe nariba maljei, Anutunöŋ mönö jörahöm enğiiga malme. Keu mi Buŋa keunöŋ kewö ohoget ahöza, “Köna keu Kimbinöŋ keu pakpak ohoget ahözawi, kunŋan kun mi körek qahö tem köla wuatangömakzawi, Anutunöŋ mönö i qesuahöm waŋgiiga malma.” ¹¹ *Buŋa keu kun kewö ohoget ahöza, “Ambazip solanŋi kungö mötnariŋan mönö nam köl waŋgiiga köhöiba malma.” Mianğöra kunŋan Köna keu wuatangöba mianğön solanŋi akŋamgö mötzawi, yanğön mönö Anutugö jeŋe qahö solanima. Qahö. Keu mi lök aukŋe kondel enğibiga teköza. ¹² *Mötnariŋnöŋ Mosesgö Köna keu qahö nam kölja. Keu mianğön jöjöpaj keu pakpak tem köl teköbingöra urunini kuŋgumakza. Köna yahöt mi nanŋök nanŋök. Köna keugö könaŋi mi kewö jii ohoget ahöza, “Köna keu pakpak tem köla wuatangömakzawaŋön mönö köhöiba malma.”

¹³ *Köna keu qahö walöŋbinak, mewö malmal köhöikŋi mi-wikŋaibinak. Mewömö, Anutunöŋ nini nanŋi Köna keuŋanğö

* 3:6: Jen 15.6; Rom 4.3, 7; Rom 4.16 * 3:8: Jen 12.3 * 3:10: Dut 27.26

* 3:11: Hab 2.4 * 3:12: Lew 18.5 * 3:13: Dut 21.23

dop qesuahömamgö tököba Kraist melaiiga alabauknini aka sohpnini meyök. Buña Kimbinöŋ keu kun kewö ohoget ahöza, “Ambazip ip kembaŋe möndöm enŋizei, Anutunöŋ mi körek qesuahöm enŋiiga malje.” Mianŋö dop Kraist ipnöŋ möndögetka nanini salupnini aiga Anutunöŋ qesuahöm waŋgiiga mewö mianŋön sohpnini meyök. Jöramörahöp nenŋö qaknine öŋgöyöhi, mi qeköyök.

¹⁴ Bömönini Abrahamnöŋ Anutu möt nariiga kötuetsköm waŋgiyöhi, mianŋö dop kötümötuet mianŋön kian kantri pak-pak dop köla yeŋgö buñaŋina akŋapkö mörök. Mewö möta körek nenŋö sohpnini meyök. Sohpnini meiga Kraist möt nariinga köna kewö ahuma: Anutunöŋ Uñaŋi nenŋimamgö keuŋi jöhöyöhi, nini urunini melenŋa Uña mi ölop buña qem anŋubin. Mewö.

Köna keu aka oyaenŋkoyaen akingö jöhöjöhö keu

¹⁵ O urumelenŋ alaurupni, nöŋön gölmenöŋ malmalgö söpsöp keuŋi kun kewö jimam: Kunöŋ börösamotŋi tosatŋi yeŋgö buñaŋina akŋapkö keuŋi kambunöŋ jiiga jöhögetka ahözawi, mi kunŋan kun qeapköba könaŋep keu kun qakŋe toroqe-mamgö osima. ¹⁶ *Mötket, Anutunöŋ jöhöjöhögö keuŋi mi Abraham aka yaŋgö gwölönarökŋi yetköra jiba jöhöi ahöza. Buña keu mianŋön “gwölönarökurupki” nenŋöra gwötpuk tandök ewö qahö jizapmö, azi mohotkö tandököra kewö jiza, “Mi göhö gwölönaröki waŋgimam.” Azi mohot mi Kraist.

¹⁷ *Keu mianŋö könaŋaŋöra kewö jizal: Jöhöjöhögö keu mianŋö ölnan mönö etmapkö osima. Anutunöŋ mi mutuhök jiba jöhöba yambu (yara) 430 teköiga mianŋörenŋ Köna keuŋi miwikŋaiba Moses waŋgiyök. Köna keu mianŋön mönö jöhöjöhö keuŋi mutuk jiyöhi, mi qeapkömamgö osima. ¹⁸ *Oyaenŋkoyaen akingö kötümötuetŋi mi Köna keu wuatanaŋöba miwikŋaibinak ewö, Anutugö jöhöjöhö keugöra qahö toroqebea osiinga öne töhön ahöbapuk. Buña keuŋi Abraham waŋgiyöhi, mi öne töhön qahö ahöyökmö, Anutunöŋ keuŋi mianŋö dop Abraham kötuetsköm waŋgiiga oyaenŋkoyaen ahök.

¹⁹ Abraham öne kötuetsköm waŋgiba Köna keu mi mönö denöwögöra ali ahöza? Mianŋö könaŋi kewö: Ambazipnöŋ köna onŋgita janjuŋ aka malgeraŋöra Anutunöŋ Köna keu mi könaŋep toroqebea jim miwikŋaiyök. Jim miwikŋaiiga Suet garata yeŋön mi memba eta alabauk azi (namel man, mediator) Mosesgöra indela böröŋe algetka Anutugö jitŋe memba ambazip sutnine kinda jim kutuyök. Köna keu mianŋön nalö dop ahöm öngöba galöm köl nenŋimapaköra aka qahöpmö,

kōnaŋgep Kōna keugō ösumŋan etmapkōra mi neŋgiyök. Abrahamgō gwölōnarök kungō jöhöjöhö keuŋi neŋgiiga azi mianjōn asuhuyōhi, nalō mianjōreŋ Kōna keugō ösumŋan eri teköyök.

²⁰ Alabauk azi yaŋōn Anutu aka ambazip sutnine kinda keu nup memakza. Anutunōŋ jöhöjöhö keuŋi mi alabaukŋi qahöpmö, mönō nanŋak Abraham waŋgiyök. Mianjōra oyaenŋkoyaen akingō jöhöjöhö keuŋi mi öŋgöŋgōŋi aiga Kōna keuŋi mianjōn nembōŋi akza. Mewö.

Kōna keugō nupŋi öŋi mi denöwö?

²¹ Mewö aiga Kōna keu aka oyaenŋkoyaen akingō jöhöjöhö keu mi auzahot me qahö? Saubanŋ! Anutunōŋ mal köhöibingō Kōna keuŋi neŋgibawak ewö, mönō öŋa Kōna keu wuatangōba Anutugō jeŋe solanŋi akinak. Mianjōra keu yahöt mi qahö auzahot. ²² Qahöpmö, keu yahöt mi nanjök nanjök. Anutunōŋ jöhöjöhö keuŋi mi mötnariŋ ambazip oyaenŋkoyaen ak neŋgimangōra aka ali ahöza. Jöhöjöhö keu mianjōn Jisös Kraist möt narizini, mönō neŋgöreŋ öŋjambuk akŋapakōra möta kewö areŋgōba jiyök, “Siŋgisöndok ambazipnōŋ uruŋi qahö meŋeŋme ewö, mönō öne töhōn Anutugō jeŋe qahö solanime.” Mianjō kōnaŋi mi Buŋa keunōŋ kewö jii ahöza, “Siŋgisöndoknōŋ mönō gölme dop ambazip pakpak gwaröhöm neŋgiiga maljin.”

²³ Mutuk urunini qahö meŋeŋninga mötnariŋninan qahö asuhuiga Kōna keunōŋ jöhöba galöm köl neŋgiba gwarö uruŋe misim neŋgiyök. Kōnaŋgep Anutunōŋ mötnariŋkö kōnaŋi in-deli asuhuyōhi, nalō mianjōreŋ kösö gwarö malmalninan teköyök.

²⁴ Mewö taringa Kōna keunōŋ mönō böhinina aka Kraistkö kōnaŋi mötpingōra kusum neŋgimakza. Böhi leuam kusum enŋgigeri, mianjō dop keu mianjōn mönō neŋguangita solanŋi akingō mindiŋgōba galöm köl neŋgimakza. Mewö aka Kraistkö kōnaŋi möt asariba möt narim waŋgiinga keunini jim teköi solanibingōra kuŋum neŋgimakza. Urunini meŋeŋninga böhigö nupŋan mönō nalō mianjōreŋ teköza. ²⁵ Urunini meŋeŋninga mötnariŋninan asuhuiga Kōna keu bapŋe qahö malinga mianjōn böhi ewö qahö toroqeba galöm köl neŋgimakza. Mewö.

Anutugō nahönböraturupŋi aka maljin.

²⁶ Körek eŋōn mönō Jisös möt narim waŋgigetka ahuahu dölökŋi enŋgiiga Anutugō nahönböraturupŋi aka Kraistpuk qekötahöba kinje. ²⁷ Kraistpuk kinmegōra o melun mem enŋgigeri, körek eŋōn mönō Kraist möt aŋgōn köla mianjōn maluku tuatŋi ewö esuhum aŋguba yambuk qekötahöba kinje. ²⁸ Inŋi körek pakpak Kraist Jisösbuk qekötahöba kingetka

mindirim enjiiga mohot aka malje. Mianğöra Juda aka kantri tosatnji enjon Anutugö jeje kambu yahöt mi kunbuk qahö akze. Nanjini nupnjini memakzei aka welenqeçe omanj akzei, Anutunöñ engehiga kambu yahöt qahö toroqebe akze. Azi ambi enjon Anutugö jeje kambu yahöt qahö toroqebe akze.

²⁹ *Injini Kraistkö buñaya akze ewö, mönö Abrahamgö gwölönarökñi yangörenök ahuba tinibaniurupñi malje. Mewö ahuba jöhöjöhö keuñangö ölnji oyaenköyaen mi buña qem anğumeañgö dop akze. Mewö.

4

Neñon Kraistköra aka Anutugö nahönböratñi ahin.

¹ Keu mi toroqebe könañi kewö jimam: Nahönöñ iwiñangö börösamotñi buña qem anğumawañgö dop akzapmö, morö gwabö mala nalö mianğören welenqeçe omanj yembuk öröröñ tandök akza. Iwiñangö börösamot yuai pakpakö tonj akñapmö, töndup welenqeçe yeñgö qöhöröñine alanina aka nup töwañi qahö memakza.

² Mewö morö mala galömnji yeñgö nembö bapñine kiniga yeñon malmalñi pakpak arengöba galöm köla jim kutum wañgimakze. Iwiñan nalö al wañgii kam kuñgumawi, mianğörenök könahiba nanjak börösamot tonj aka malma.

³ Nanini mewöñanök mutuk urugö likepñe morö gwabö ewö malin. Nalö mianğören bem suahö galöm Suep gölme sutñire yuai pakpak galöm köl enğimakzei, mienon mönö nini mewöyök galöm köl neñgigetka öne yeñgö welennjini qeba nemböñini bapñe malin.

⁴ Mewö malinmö, Anutugö nalöñan kam kuñguiga Nahönñi melaiiga ambigörenök asuhuyök. Juda neñgö Köna keu bapñe malmamğöra asuhuyök. ⁵ *Köna keu bapñeyök pösat neñgiba sohpnini memamğöra asuhuyök. Mewö Anutugö nahönböraturnpñi aka buñañi möt anğön köl teköba maljin.

⁶ Mewö Anutugö nahönböratñi akzeañgöra aka Anutunöñ Nahönñangö Uñañi melaiiga urunine geba kewö qerakza, “O Aba Iwini!”* ⁷ Mewö qerakzawañgöra aka qahö toroqebe welenqeçe omanj akzanmö, Anutugö nahönböratñi aka maljan. Mewö maljanañgöra aka Anutunöñ oyaenköyaen Buñañi gihiiga buña qem anğuba galöm köla malman. Mewö.

Polnöñ Galesia yeñgöra waimanjat mörök.

⁸ Injini mutuk Anutu qahö möt kutuba malget. Nalö mianğören tandö lopionj aka bem suahö galöm bem ölnañgö malmalñi qahö memba maljei, mi töwañini qahö welen qem

* 3:29: Rom 4.13 * 4:5: Rom 8.15-17 * 4:6: Aba mi Arameik keunöñ Iwi.

engiba etqeçenji malget. ⁹ Mewö malgetmö, uruñini melenđa nalö kewöñe Anutugö könañi möt kutuba malgetka Anutunöñ möt kutum enğiiga malje. Anutunöñ möt engizawi, keu mi-anñon bohonñi ak enğiza. Mewö maljemö, wuanöñgöra dumñe kunbuk bem suahö galöm yuai pakpak galöm kölakzei, mönö yengören enğizawi melenđa mesohol köl enğiba malje? Bem suahö galöm mi ösumñini eretñi akzemö, enñon mönö tondup mi welen qem enğiba etqeçenji akingö sihimñi mötze. Mi qahö dop kölja.

¹⁰ Mi welen qem enğiba kendon tatat nalö könañi könañi mi mötket öngöiga törörök wuatangömakze. Sabat kendon tarakze. Köiñ dölökñi koriga bemñini mötmöriba köiñ dop söñgaimakze. Yambu jeñiqeçe söñngai aka söñngai tosatñi mi yambu (yara) dop törörök wuatangömakze. ¹¹ Nöñon enğöra aka keñgötni kewögöra mötzal: Nöñon enğö sutñine nup membiga ölni qahö ahuiga öne töhön sileqeçe akilenbuk.

Galesia yeñon Pol andö qebingö aket.

¹² O urumelen alaurupni, nöñon kewö kuñguba qesim enğizal: Nöñon inñi ewö aka malalangöra enñon mönö nöngö dop akñe. Yuai bölöñi kun kude ak niñgiget. ¹³ Nöñon mutuk enğören kaba kawöl nöhöi sileni eri malali, könañi mewögöra tata Ölöwak Buña jim asaribiga mötket. Enñon mi möt kömuze. ¹⁴ Nöñon sile-eret malbiga andö nuñgubingö esapesapñi mi-wikñaiget, mi mötzalmö, tondup qahö jijiwilit aka qepureim niñgiget. Mewö qahöpmö, ni neketka Anutugö garata ewö akiga nömeget. Opopon, nöngöra Kraist Jisös nannangö tandök mötmöriba öröm niñgiba “Owe owe!” jiget.

¹⁵ “Owe owe!” jiba silene pölpöl qeba je kötnini uzula niñgibingö mötketmö, mi qahö dop kölīga mosötket. Enğö könañamñini möta mi ölna mewö nanğöba jizal. Yei! Nalö miangören jim söñngai önöñi qahö akeri, mi mönö denöwögöra nalö kewöñe qahöwahi öne malje? Mi qahö dop kölja. ¹⁶ Enğöra Buña keu ölni jimakzalanğöra mönö kerök ak niñgize me?

¹⁷ Ambazip tosatñi mienñon enğöra aka urukönöp ahakzemö, mi urukönöp ölöpñi qahö. Mi ölöpñi qahöpmö, yeñon inñi neñgörenök enğuanğita sutñine jabö ala tököm niñgimegöra mötze. Mewö menden neñgigetka urukönöp qakñe nannini nanğöm enğimegöra kapan kölakze. ¹⁸ Inñi ahakmeme ölöpñi akñegöra urukönöp ahakzei, mi mönö qetpuk. Nöñon enğö sutñine malbiga nalö miangörenök qahöpmö, mönö nalö dop mewö aketka dop kölma.

¹⁹ O gömukurupni, ni ahuahu dölökñi ahumegöra masö tandök nuñguiga sihimbölö mörali, miyöhök mönö dumñe kunbuk mötzal. Kraistkö ahakmemeñan enğören ahum kutumapköra sihimbölö mi möta maljal. ²⁰ Nöngö urunan

mönö enğöra aka lalalulu siksauk akza. Mianğöra nönön nalö kewöñe enğö sutñine malmamğö mötkurumkurum akzal. Embuk mala keu imbini memba eta ala keu ösön jimamğö ak niñgiza. Mewö.

Hagar aka Sara yetkö söpsöp keuñiri

²¹ Tosatñi enjön Juda nenğö Köna keu Kimbi wuatangöbingö mötzmö, keu mianğö könañi mi ölna möt kutuze me qahö? Könañi mi möt asarimeğöra qesiba kuñgum enğizal. ²² *Buña keu kun kewö ohoget ahöza: Abrahamğö nahönyahötñi yahöt ahuyohot: Kun welenqeçe ambi etqeçenjan (sleiw) meyök aka kun mi nanñi soñgojarin anömñi solanñi (fri) malmalñan meyök. ²³ Welenqeçe ambinöñ nahönñi meyöhi, mianön morö ahuahugö könanöñ ahuyökmö, kun ambi solanñi (fri) malmalñan meyöhi, yanön Anutunöñ morö nahön ahumapkö keu jöhöyöhi, mönö keu mianğö ölnan asuhumapköra ahuyök.

²⁴ Keu mianğö könañi mi tölapñi. Ambi yahöt mi Anutunöñ ambazip nembuk jöhöjöhö aren yahöt alöhi, mönö mietkö söpsöpñira. Jöhöjöhö aren kun mi Sainai (Sinai) kundunje alöhi, mianğö söpsöpñi mi ambi qetñi Hagar. Ambazip jöhöjöhö aren mi wuatangömakzei, yeñön mönö Köna keugö jimkutukutu bapñe malje aiga gwölönarökurupñinan keu mianğö welenni qemakñegöra ahumakze.

²⁵ Hagar mi Sainai kundunji, Arabia gölmenöñ kinjawangö söpsöpñi akza. Sainai mianğö alañi mi Juda gölmegö siti qetñi Jerusalem. Siti mianğö könagesögö ketanji moröñi yeñön nalö kewöñe Köna keu bapñe malgetka jöhöm enğii solanñi (fri) qahö akze. Mianğöra dopñiri mohok akzahot. ²⁶ Solanñi (fri) qahö akzemö, Jerusalem siti kun euyangören maljei, yeñön mönö kösö gwaröñini qahö solanñi malje. Nenğö namnini Sara yanön mönö siti mianğö söpsöpñi akza. ²⁷ *Mianğö kezapqetok keunji mi kewö ohoget ahöza,

“Ambi azinöñ ölan qeyöhi, yanön mönö nahönbörat enğömiiga sehigetka mewö ambi apñambuk mi luhut alma.

Mianğöra ambi köpin morö qahö menöñi, gi mönö töndup söñgaiba malman.

Masö qahö guhui malnöñi, gi mönö töndup qet gigilahöba morö ahumapköra köiran ala malman.”

²⁸ O urumelen alaurupni, inini mönö Aisakö dowa Anutugö jöhöjöhö keunan nam köl enğiiga ahuahu dölökñi ahuba malje. ²⁹ *Nalö mianğören morö ahuahugö könanöñ ahuyöhi, yanön munñi Uña Töröñan nam köl wanggiiga ahuyöhi, mi sesewerowero ak wangiba malök. Nalö kewöñe mewöñanök sesewerowero mewöñi mi ahöza.

* 4:22: Jen 16.15; 21.2 * 4:27: Ais 54.1 * 4:29: Jen 21.9

30 *Mewö ahözapmö, Buja keu kun mi toroqeba kewö jigetka ahöza, “Welenqege ambigö nahönjan mönö Iwinjanğoreñ börösamotñi qahö mema. Ambi solanñi malmalñi yanğö nahönjambuk mi mohotñe qahö menderda anğön kölmahot. Mianğöra welenqege ambi etqegeñi mi mönö közölnönğa nahönjambuk anmahot.” 31 O urumelenğ alaurupni, söpsöp keu mewöñanğö dop neñön mönö welenqege ambigö undumurupñi gwaröninambuk qahö akzinmö, ambi solanñi malmalñanğö undumurupñi akzin. Mianğöra lolonqalonğ ahakmeme mi közölme. Mewö.

5

Lolongöba Kraistpuk kinkin solanñe kinme.

1 Kraistnönğ Köna keu bapñeyök pösat neñgiiga solanñi maljin. Mewö mala tosatanğ inini kunbuk öröba Köna keugö mötöpnönğ* jöhöm enğibepuköra mönö galöm mem anğuba malme. Welenqege omanğ ewö akepuköra mönö köhöiba böñ qeba kinme.

2 Mötket! Pol nönjön kewö jibi mötket: Tosatanğ Anutugö aiwesökñi silenine yandimegö mötketka imbi kölme ewö, Kraistnönğ mönö bauköm enğimamğö osima. 3 Keu mi toroqeba kewö nanğöba jimam: Azi pakpak silenine aiwesök yandimegö mötketka imbi kölmei, yeñön mönö Köna keu pakpak tem köla wuatangöme. Mi qahö wuatangögetka qahö dop kölma. 4 Köna keu tem köla wuatangöba mewö mianğön solanñi akingö mötzei, enğön mönö Kraistkö selñi qösököba yambuk qahö toroqeba kinje. Enğön mönö Anutugö kalem möriamñi mosöta yaigep eta lanğ malje.

5 Lanğ maljemö, neñön mönö Anutugö jeñe diñdini akingö jörömqörömñi aka awöweñğömakzin. Mewö ahinga Uña Töröñan inahöm neñgiiga Anutu möt narim wanğiinga keunini jim teköi solanibingöra mambörakzin. 6 Kraist Jisösbuk kininga urugö ölni mötnarip mi mohotñan mönö bauköm neñgimakza. Anutu möt nariinga inahöm neñgiiga amqeba urukalem ak anğuinga dop kölğapmö, mötnarip ölni qahö mi qahö bauköm neñgimakza. Mewöyök Anutugö aiwesökñi silenine yandiget ahöza me qahö, mi mönö dop mohot akza. Silegö kun me kun mi Anutugö jeñe qahö bauköm neñgima.

7 Mutuk uru melenğmelenğö aonğitnönğ mönahot ewö ösumñinan anget. Ölöpnanök angetmö, böhi takapulakanğ kunönğ kaba siksauk mem enğiba kembangan kutuiga keu

* 4:30: Jen 21.10 * 5:1: Ip kembangan (yoke) mi bulmakau yahötkö jölnire ala jöhögetka mindirim etkiiga mianğön mohotñe kare me gölmeqegeğö kinonğ örömakzahot. Mianğö dop Köna keu gwarönönğ maljan ewö, nupñi mönö töp meman.

ölñi qahö toroqeba tem kölakze. ⁸ Kun danön engoholakzawi, yanön mönö kembangan kutumegöra qahö tutuhuba kuŋgum engimakza. Mi qahö. ⁹ *Yist boromdökñi kimbutnön ala plauabuk melenninga körek pakpak meiga qariba wahörakza. Miangö dop siksauk moröñan mönö dop köl engiiga körekmakörek janjuñ akepek.

¹⁰ Böhi takapulakanj yanön siksauk mem engiiga janjuñ ahakzei, Anutunön mönö yangö ahakmemeñangö likepñi melen wañgiiga sihimbölöñi möta malma. Nönön Kembubuk kinda möt narim engiba engöra kewö möta awösamakak akzal: Injini Kraistkö Buña keu törörök wuatangöba mötmöt murutñi pakpak yaköribingö möt köhöiba malme.

¹¹ O urumelen alaurupni, injini mewö malmemö, nönön Kraist maripomnöñ kömuyöhangö könañi jim sehibiga Juda yengö uruñinan miangöra bölimakza. Maripomgö keuñi mosötpileñak ewö, mönö sesewerowero qahö ak ningibeak. Anutugö aiwesök azi silenine yandiyandimegö Buña keuñi toroqeba jiba uru kuŋgum engibileñak ewö, mönö kahasililin qahö ak ningibeak. ¹² Tosatñan kuŋgum engiba siksauk memakzei, yanön mönö yandiyandigö keuñini wuatangöm teköba nanñini sile kitipñini körek yandim angugetka mötpi dop kölbawak.

¹³ O urumelen alaurupni, Anutunön injini köna walñangö keunöhök lolohoba gwaröñini qahö malmegöra engoholökmö, kewögöra mönö galöm mem anguba malme, “Mönö lolohoba solanñi maljin,” mewö jiba möndöba uruñinan wahöri si-legö sihim kömbönañini bölöñan mönö galöm köl engibapuk. Nanñini imbi-imbi qahöpmö, mönö urukalem qakñe kinda welen qem anguba malme. ¹⁴ *Köna keu bohonñi mohot wuatangögetka Anutugöreñ keu pakpak mönö mewöyök ölñinambuk akñe. Keu bohonñi mohok mi kewö, “Nangi jöpaköm angumakzani, miangö dop mönö ambazip pakpak urugan jöpaköm engimakñan.” ¹⁵ Mewö jizapmö, bau kiam ewö angöhöm söksök aka aumakze ewö, mönö nanñini ayuhum angubepuköra töhötnini pöndañ möta malme. Mewö.

Uña Töröñan galöm köl engiiga malme.

¹⁶ Nönön kewö jimam: Uña Töröñan mönö ahakmemeñini galöm köliga malme. Mewö malgetka urusilegö sihim kömbönañini bölöñi qei eri kude tem köla wuatangömakñe. ¹⁷ *Miangö könañi kewö: Urusilegö sihim kömbönañi bölöñan mönö Uña Töröñi qetala lañ köpösöñgöiga Uña Töröñan uru

* 5:9: 1 Kor 5.6 * 5:14: Lew 19.18 * 5:17: Rom 7.15-23

walňangö kukñi qemamgö möriga sutñire jujul ahöi aumakzahot. Mewö aumakzahoraňgöra eňön yuai ölöpnji aka membingö möta mi osimakze. ¹⁸ Mi osimakzemö, Uña Töröňan enġuanġiriga anda malje ewö, mönö Köna keu bapñe qahö malje.

¹⁹ Urusilegö ahakmeme walňangö nup ölnji mi aukñe ahöi mötzin. Mi kewö: Kaisero namböňnamböň laň aketka uruňinan tölöhoiga serowilin ahakze. ²⁰ Tandö lopion waikñini memba bemñini möpöseim enġigetka uruňini sölölohöm enġii suña jinaň ahakze. Kerök asuhui anġururuk aka aumakze. Kungöreň yuaigöra uruňöň mututqutut möta eröm ota yom jiba urusingok ahakze. Nanñinaňgörök mötmöriba yuai öröba girinjabak memakze. Jula menden anġuba kambuñi kambuñi ala jijiwilit ak anġumakze.

²¹ Tosatñi yeňgö yuaigöra eksihim möta körögisigisi aka közölömbuan pati ala bau numbu nemba o köhöikňangöra eňololon ahakze. Mi aka silik tosatñi mewöñi ahakzei, yeňgöra mutuk jial aka mianġö dop galöm meme keu mi qeljiñe dumñe kunbuk kewö jizal: Ambazip silik mewöñi ahakzei, yeňön mönö Anutugö bemtohon uruñe qahö öňgöme.

²² Yeňön qahöpmö, Uña Töröňan nup memakzawaňgö ölnji mi urukalem, sösongai, luai aka ahakmeme ölöpnji kewö: Lömböt pakpak möta mökösongda tosatñi ala ak enġiba ahakmeme sakalakñi ahakze. Keuñi misila pöndaň wuataňgömakze. ²³ Gunböñjönjön qakñe tosatñi ak enġiba nanñini törörök galöm köl anġumakze. Ambazip silik mewö ahakzei, yeňön Köna keu qahö qetalakze. ²⁴ Ambazip Kraist Jisösgö buñaya aka maljei, yeňön uru sileninaňgö sihim kömbönañini bölöñi aka bölönaňgö urukönöpnini mi körek Jisösbuk maripomnöň algetka mem kömuyöhawa malje.

²⁵ Uña Töröňan urunine geiga maljin ewö, ahakmemenini mönö mewöyök Uña mianön galöm köl nenġii aka memba malbin. ²⁶ Mewö mala qetbuña omani nenġimegö kude kapañ köla öne töhön kude aiweliköm anġumakñe. Urubölo ak anġubepuköra mönö uruköňgan kude aka uruöngöp qakñe kude ak anġumakñe. Mewöyök körögisigisi kude ahakñe. Mewö.

6

Lömbötñini mönö bisiba bauköm anġumakñe.

¹ O urumelen alaurupni, kunñan köna onġita siñgisöndok aiga miwikñaize ewö, urumelen alaurup eňön mönö mökököli qakñe ala ewö mindingöm wañgigetka kunbuk köna miwikñaima. Mewö aka nangak mewöyök esapesapnöň et guhubapuköra mönö galöm mem anġuba malman.

² Lömbötņini mōnō baukōm aņguba bisimakņe. Mewō mianņōn Kraistkō Kōna keuņi wuatangōgetka ōļņambuk ahakņa.

³ Kunņan eretņi mala tōndup nanņangō mōri ōņgōņgōņi akzawi, yaņņōn mōnō nanņi tilipkōm aņgumakza.

⁴ Mewō kude akņemō, mohot mohot eņņōn mōnō nanņini ahakmemeņini kewōta esapkōgetka dop kōlma. Mewō aka alaņini oņgita qetbuņaņinambuk akzeangōra kude aiwelikōmemō, mōnō nanņini kōnaņinangōrōk silenņini mōpōseigetka dop kōlma. ⁵ Anutunōņ lömbōtnini murutņi murutņi mendenē neņņiiga nanņōk nanņōk bisimakzin. Mianņōra nanini tosatņi yembuk likeplikep ala kewōt aņgubingō osimakzin.

⁶ Bōhi qaņazunōņ kungōra Buņa keu kusum waņgimakzawi, yaņņōn mōnō mianņō tōwaņi melenđa yuaini ōlōpņi pakpak mendenđa bahōņi waņgimakņa.

⁷ Nanņini mōnō kude tilipkōm aņgumakņe. Kunōņ nene warōkņi kōmōriga ōļņi mianņō dop ahui miwikņaima. Keu mianņō dop Anutunōņ bōlōņamnini eka likepņi mianņō dop neņņima. Mianņōra Anutu mi azi omaņi ewō mepaqepaik ak waņgibingō osimakzin. ⁸ Urusilegō sihim kōmbōnaņi bōlōņan kun nam kōl waņņiiga mianņō warōkņi laņ kōmōrakzawi, yaņņōn mōnō mianņō kōndenēmōndenē miwikņaiiba bōlimakņa. Yaņņōn bōlimakņapmō, Uņa Tōrōņan kun sōlōlōhōm waņņiiga mianņō warōkņi kōmōrakzawi, yaņņōn mōnō ōļņi mianņō dop miwikņaiiba malmal kōhōikņangō buņaya aka malma.

⁹ Nini jegep kinda nup ōlōpņi ōlōpņi memba mala mianņōreņ mōnō lōwōriba zōlokzōlok kude akņe. Taņqaņ aka nup qaņō mosōtpin ewō, ōļņi meme nalōņan kam kuņņiiga nupninangō tōwaņi mōnō miwikņaiibin. ¹⁰ Mianņōra gōlmenōņ malbinangō dop neņņōn mōnō ambazip ōlōpņi ak eņņibingō jegep kinda malbin. Urumelenē kōnagesō uruņe maljei, i mutuk alabauk ak eņņimakin aka yeņņō andōņine ambazip tosatņi pakpak kōna asuhuiga mem ōlōwak eņņimakin.

Galōm meme aka yaizōkzōk keu tetekōņi

¹¹ Pol nōņōn kirifi memba nani bōrōnan kulem je ketanņi ki eņņōra ohozali, mi ekņe. ¹² Ambazip Anutugō aiwesōkņi silenņine yandimegōra kuņņum eņņimakzei, yeņņōn mōnō kōrek sile megetka gōlme ambazipnōņ yeņņōra mōtket ōņgōmapkōra kapaņ kōlakze. Kraistnōņ maripomnōņ kōmuyōhi, keu mianņōra sesewerowero ak eņņibepukōra mōnō mewō kuņņum eņņimakze. Mianņō kōnaņi murutņi kun qaņō. ¹³ Anutugō aiwesōkņinambuk mienņōn mōnō nanņinak mewōyōk Kōna keu qaņō wuatangōm tekōba malje. Mewō qaņōpmō, eņņō silenņini yandimegō mōtzeañņōn mōnō eņņō sile kitipņinangōra

aka nanjini silenini mem öngöba qetbuñaninambuk akingö mörakze.

¹⁴ Mewö mörakzemö, nöñön Kembunini Jisös Kraist maripomnöñ kömuyöhi, mönö Buña miangöra aka sileni möpöseimakzal. Qetbuña murutñi kun qahö jarumakzal. Mi yapmakek! Kraistnöñ maripomnöñ kömuiga yambuk toroqebiga mötmöt arenñan uteköiga silik bölöñangö sisitñi memakzal. Gölme ambazipnöñ silegö ahakmeme bölöñi memingö mötmöriba keu jimakzei, nöñön mönö miangören göröken köhömuñi tandök akzal. Möpöseim niñgimei me silene keu almei, miangö likepñi mi qahö melenmam. Gölmenöñ keu kewöta tosatñi mötket öngöi tosatñi mötket eretñi akzawi, mi mönö nöñgö mötmöt arenbuk dop mohot qahö akzahot.

¹⁵ Silenine aiwesök yandiget me qahöwi, miangön mönö dop mohot akza. Miangön gorosonñi akzapmö, ahuahü dölökñangö dömnñi akzini, miangön mönö öl töhöññi akza.

¹⁶ Ambazip ahuahü dölökñangö jimkutukutu keu wuatangöba maljei, Anutunöñ Juda körek mi aka Anutugö urumelen könagesö pakpak inñi mönö ak kömum enjiiga luainöñ malme.

¹⁷ Keu teteköñi kewö jizal: Nöñön Jisös qegerangö löpötñi mi nani silene ahöiga bisimakzalanğöra kunöñ mönö urulömböt kude toroqem niñgima.

¹⁸ O urumelen alaurupni, Kembunini Jisös Kraistkö kalem möriamñan mönö embuk ahöba uñañini kötuetkömakña. Keu mi ölnja.

Efesus Kimbi Polnõḡ Efesus yeḡgõra Kimbi alök. Jim-asa-asari keu

Polnõḡ Rom sitigö kösö mire tata Efesus urumelenḡ kambu yeḡgõra Kimbi ki ohoyök. Efesus mi Eisia prowinsgö siti bohonḡi. Siti miangö uruḡe kölköl-örörö gwõtḡuk ahömalget. Polnõḡ misin nup memba liliköi indimḡi karöbut ahiga Efesus kaba yambu karöbut miangöreḡ Buḡa keu jiba malök. Efesus sitinõḡ Juda ambazip tosatḡi miri tonḡi yeḡgö sutḡine malgeraḡgõra Polnõḡ kimbi ki ohoba kewö kusum enḡiyök, “Kraistnõḡ lök kambu yahöt toroqeiga urumelenḡ kambu mohok-kun akzahot.” (2.15-16), (3.6) Anutunõḡ jitsihitḡi aka kalem möriamḡi urumelenḡ kambu neḡgõra denöwö ali ahözawi, mi gwõtḡuk jim asariza. (3.10) Miangö dopkeu karöbut kewö jiyök:

1. Urumelenḡ könagesö enõn sile sep busu mohot aketka Kraistnõḡ nanḡak nöröpḡini akza. (1.23; 4.15-16)

2. Urumelenḡ könagesö enõn miri mohot tandök aketka Kraistnõḡ enḡö tandõḡini kömbõnaḡi akza. (2.21-22)

3. Urumelenḡ könagesö enõn ambi buḡa ewö aketka Kraistnõḡ apḡaḡgö tandök akza. (5.25-27) Mewöyök Kraistnõḡ Efesus enḡö kambu yahöt toroqem etkiiga miangõra sile sep busu mohot akze. Asakḡaḡgö ambazip akerangõra malḡinaḡgö goro keuḡi keuḡi ohoyök. Mewö.

Buk kiangö bahõḡi bohonḡi 4 mi kewö:

Keu mutukḡi keu 1.1-2

Kraist aka urumelenḡ könagesö 1.3-3.21

Kraistḡuk malmal dölökḡi 4.1-6.20

Kimbigö keu köḡḡi bohonḡi 6.21-24

1* Anutunõḡ Pol ni jitsihitḡaḡgö dop melaim ningiiga Kraist Jisösgö aposol akzal. Mötnariḡ alaurup sarakḡi Kraist Jisösbuk qekõtahöba Efesus sitinõḡ maljei, nõḡõn embuk keu eraum möḡḡpingõra kimbi ki ohozal.

2 Anutu Iwinini aka Kembu Jisös Kraist yetkõn mönõ kalem möriam enḡiyohotka luainõḡ malme.

Kraistnõḡ Anutugö kötumötuetḡi neḡgimakza.

3 Neḡõn Kembunini Jisös Kraistkö Iwi Anutunḡi möpöseimakin. Yaḡõn nini Kraistḡuk qekõtahöinga uruninan ölöwakḡapköra Sueḡ mirigö kötumötuetḡi aka kalemḡi könaḡi könaḡi mi urunine alöha kayambu asuhui mala kotket.

* 1:1: Apo 18.19-21; 19.1

⁴ Anutunöŋ nini mutuk möpŋaŋgö möpŋeyök kewö akingöra möwölöhöm neŋgiyök: Kraistnöŋ nam köl neŋgiiga neŋön yaŋgö buŋaŋi sarakŋi aka Anutugö jemesoholŋe keunini qahö kinbin. Mewö möwölöhöm neŋgiba mianŋgö andöŋe Suep gölme miwikŋaiba al etkiyök. Nalö mianŋgöreŋök könahiba ambazip jöpaköm neŋgiba mala korök.

⁵ Jöpaköm neŋgiba urusihimŋaŋgö dop qeljiŋe keu jit areni ala keunini kewö jim teköyök: Jisös Kraistnöŋ nam köl neŋgiiga Anutunöŋ neŋgömeiga nanŋi nahönböraturupŋi akin.

⁶ Wölböt Nahönŋi neŋgöra melaiiga eta Anutugö kalem möriamŋaŋgö kukösumŋi buŋabuŋaŋambuk köleŋda söŋgörüŋi qahö öne neŋgiyök. Nini mönö kalem möriamŋi mianŋgöra Anutu möpöseim waŋgimakin. ^{7*} Anutugö kalem möriamŋaŋgö köweŋi mi keta bölökŋi. Mianŋgö dop Jisösnöŋ sepŋi mokoba mianŋön sohopeni meyök. Mi meyöhaŋgöra Anutunöŋ ölop siŋgisöndoknini mosöta saŋgoŋ neŋgimakza.

⁸ Yaŋön kalem möriamŋi mi köweŋeyök kelenmaleleŋ mokoiga qaknine öŋgöyök. Mötikutukutuŋi öŋgöŋgöŋi pakpak mianŋgö dop kewö möt asarim neŋgiyök: ⁹ Anutunöŋ mutuk nanŋi uruŋe keu areŋ jöhöba möri ölöwahiga tölapŋe ahöi öne mala kotketmö, Kraistnöŋ Anutugö keu jitŋaŋgö dop wuatŋgöba eta neŋgöreŋ indeliga eka mörin. ¹⁰ Anutunöŋ mutuhök kalem möriam areŋaŋgö könaŋi kewö mötmöriyök, “Anutu nöŋön areŋ mi wuatŋgöba mala malbiga nalöŋi törörök kam kuŋguiga mianŋgöreŋ ölnambuk aiga kewö asuhuma: Körek Suep mirigö jakeni jakeni mianŋgöreŋ me gölmenöŋ ahuba maljei, nöŋön mönö mi pakpak mindiriba jöhöm eŋgimam aka Kraist kuŋgum waŋgibiga körek yeŋgö bohonŋini mohot aka malma.”

¹¹ Anutunöŋ mutuhök nanŋi uruŋaŋgö dop keu jöhöi ahözawi, mönö areŋ mianŋgö dop kuŋgukuŋgu keuŋi jiiga yuai pakpak asuhumakza. Nanŋi areŋi mianŋgö dop qeljiŋe Juda könagesö nini nanŋi buŋaŋi aka malbingöra jim teköba al neŋgiyök. Mianŋgö dop nini tosatŋan Kraistpuk qekötahöinga meköm neŋgiiga buŋaŋi börösamot ewö aŋgön köla memba maljin. ¹² Juda könagesö neŋön Kraistnöŋ galöm köl neŋgimapkö mamböta qeljiŋe jörömqöröm ak waŋgiba mala korini, yaŋön nini Anutugö kukösumŋi buŋabuŋaŋambuk möpöseiba malbingöra aka möwölöhöm neŋgiyök.

¹³ Kian kantri eŋgöreŋök tosatŋan mewöyök Kraistpuk toroqeba qekötahöget. Amötqeqegö Ölöwak Buŋaŋi jigetka keu ölni mi möta uruŋini melenget. Uŋa Törüŋi yaŋön Anutu buŋaŋaŋgö muŋgem aiwesökŋi akza. Uŋa mi melaii etmapkö keu jöhöyöhi, yaŋön mönö mi uruŋine ali geyök. Kraist

* 1:7: Kol 1.14

möt narim waŋgigetka Anutunöŋ aiwesökŋi kömbönaŋi mi mekötahöm enŋiiga malje. ¹⁴ Anutunöŋ könagesöurupŋi Suep Buŋa neŋgimamgö keu jöhöyöhi, mi memingö aiwesökŋi Uŋa Töröŋi mi mutuk al neŋgiyök. Uŋa Töröŋi urunine ali maljawanğöra mönö kewö möt köhöizin: Anutunöŋ lök sohopenini memba buŋaurupŋi aHINGA bian gölmenöhök neŋguanğiriga Suepnöŋ öngöba oyaenğoyaen akin. Mianğöra mönö Anutugö kukösumŋi buŋabuŋaŋambuk möpöseimakin. Mewö.

Polnöŋ Anutu möpöseiba kewö köuluköyök:

¹⁵ Mewö oyaenğoyaen akingöra aka nöŋön Efesus enğöra köulukömakzal. Enön Kambu Jisös pöndaŋ möt nariba ambazip sarakŋi pakpak uruŋinan jöpaköm enğimakzei, tosatŋan mianğö buzup keuŋi jigetka möral. ¹⁶ Mianğöra buzup keu mi mörali, nöŋön mewöyök enğöra aka Anutu möpöseiba mala qahö mosöral. Qahö. Nöŋön köuluköba mianğöreŋ mötmörim enğimakzal.

¹⁷ Mötmörim enğiba Kembunini Jisös Kraistkö Anutuŋi mi kewö köuluköm waŋgimakzal, “O Iwi kukösum Toŋi, gi mönö Uŋagi Töröŋi Efesus alaurup enğiman. Uŋa mi uruŋine alnöŋga mötkutukutuŋini qainŋi kun asuhuiga Anutugö könaŋi ölöpŋanök indeliga möt yaköme. ¹⁸ Anutu, gi mönö uru jeŋini mem asarinöŋga nangi Buŋagahö könaŋi möt yaköme.” Anutunöŋ nanŋi ambazip sarakŋi neŋğöra Suep Buŋa kukösumŋi buŋabuŋaŋambuk mi neŋgimamgö keu jöhöiga injini yuai mi asuhumapkö al mamböta jörömqöröm akneğöra enğoholök. Jörömqöröm aketka Jisösnöŋ kunbuk asuhuiga aködamunŋinambuk akŋei, injini oyaenğoyaen mianğö könaŋi möt sölöngömegöra köulukömakzal.

¹⁹ Möt narim waŋgiinga Anutugö kukösum köhöikŋan urunine sehiba nup memakzawi, mianğön mönö keta bölökŋi teteköŋi qahö akza. Injini mianğö könaŋi möt kutumegöra köulukömakzal. Ösum-mumuŋi wewelipŋambuk mianğön silenini kutuba inahöm neŋgimakzawi, Anutunöŋ mianğö kukŋi kewö kondel neŋgiyök:

²⁰ *Anutunöŋ kukösumŋi nupnöŋ ala Kraist mem gulim waŋgii kömupnöhök wahörök aka waŋgiriga Suep mire öngöba selŋi selŋi liliköba jakenŋi jakenŋi enğonğiriga Anutunöŋ böröŋi ölŋe dum tatat mutukŋe ali tatza. ²¹ Ali jakömbuak dumŋe tata öröyuai pakpakö bohonina kinja. Bem suahö galöm aka yeŋgö nemböŋine jembon pom aka gawman kiap öngöŋgöŋi eretŋi kukösumŋinambuk kambu ak neŋgimakzei, Kraistnöŋ mönö mi körek pakpak galöm köl enğimakza. Suep mire, gölmenöŋ aka mietkö sutŋire galöm qet pakpak qet enğigetka bisizei,

* 1:20: Sum 110.1

Kraistnōŋ mi körek enŋonŋita öngöza. Gölmegö nalö kewōŋeyök qahöpmö, könanŋep nalö qainŋi kun asuhuiga mal öngöbini, mianŋöreŋ mewōyök öroyuai pakpak galöm köla mal öngöma.

22 ** Anutunōŋ uŋa, ömewöröme, ambazip aka öroyuai pakpak mi memba eta Kraistkö bapŋe al neŋgii malinga Kembunini öngöŋgöŋi akza. Anutunōŋ Kraist mi urumelen könagesö neŋgiba bohonini kinmapköra kuŋgum waŋgiiga malja. 23 Yanŋon kötal neŋgiba bohonini aiga neŋon yanŋö ölnanŋö köna börö su-urupŋi akzin. Kraistnōŋ nöröwök aiga qahö dop kölbawakmö, neŋon yanŋö törömunŋi aka toroqeinga ölnan asuhum tiŋgiriga dop kölja. Kraistnōŋ mewōŋanök öroyuai pakpakö törömunŋina kun aka toroqeiga körek pakpak mienŋon mönö Anutugö aködämunŋinambuk asuhuba dop köla anakze. Mewö.

2

Köhömuŋeyök guliba Kraistpuk köhöiba maljin.

1 * Mutuhök köna onŋita ŋiŋisöndokŋi ŋiŋisöndokŋi akeranŋöra malmal köhömuŋi mala kotket. 2 Inini nalö mianŋöreŋ gölmegö ahakmeme bölöŋi wuatangöget. Ömewöröme yeŋgö Kembuŋinan nalö kewōŋe Suep gölme sutŋire mala qeŋetal ambazip uruŋini sölölohöba galöm köl enŋimakzawi, mönö yanŋöreŋ qekötahöba tem köl waŋgiba malget.

3 Neŋon körek mewōŋanök mutuk yeŋgö sutŋine silebile aka laŋ malin. Uru silegö sihim kömbönaŋnini bölöŋi wuatangöba nanine imbi-imbi malin. Mewö laŋ malinga Anutunōŋ neŋgehi qahö dop köliga irimesesewölŋi qaknine ali malin. Qeŋetal ambazip tosatŋi yeŋgö dowök Anutugö irimesesewölŋanŋö buŋaya aka malin.

4 Mewö malinmö, nalö kewōŋe mewö qahö. Anutunōŋ akömökümüŋi teteköŋi qahö mianŋon mönö jöpaköm neŋgiyök. 5 Köna onŋita Anutu qetala mianŋöra köhömuŋi aka malinmö, Anutunōŋ Kraist mem guliyöhi, nini mewōyök mönö mewōŋanök mem gulim neŋgiiga köhöiba maljin. Yanŋö kalem möriamŋan mönö amöt qem enŋiiga kunbuk letotket.

6 Kraistnōŋ wahöröhi, nini mewōyök mönö mewōŋanök neŋgömindiiiga köhömuŋeyök wahörin. Anutunōŋ Kraist Jisös waŋgiriga Suep mire öngöyöhi, nini mewōyök mönö mewōŋanök Suep malmalgö jake ahözei, mönö mianŋöreŋ al neŋgiiga yambuk tosatŋi galöm köl enŋgiba maljin.

7 Anutunōŋ kewögöra mewö al neŋgiyök: Anutunōŋ kalem möriamŋanŋö köwenŋi teteköŋi qahö mianŋon aukŋe asuhui möt

asaribingöra mörök. Möt asariba könangep nalöni nalöni gainni kun asuhugetka teteköni qahö mal öngöbini, nalö mianğoreñ mi neñgim qarimapkora mörök. Anutunöñ Kraist Jisös melaiiga kaba urukalemni mewö kondel neñgiyök.
⁸ Anutu möt narim wangigetka kalem möriamñan mönö amöt gem enğiiga kunbuk letotket. Nannini nam köl anguba mewö mianñon qahö letotketmö, Anutunöñ mi kalemña ak enğiyo. ⁹ Nanninak yuai kun ak sorokögerangöra aka qahö letotket. Kunöñ kun nanni silenji memba öngöbapukora mönö kalem möriamñangörök aka mewö ak enğiyo.

¹⁰ Nini Anutugö börösöwöya maljin. Kraist Jisösbuk qekötahöinga Anutunöñ uru dölokni miwikñaiba al neñgiyök. Anutunöñ qeljine nup ölopni ölopni möwölöhöba mözözömgöyöhi, neñon mi memba malbingöra mewö miwikñaim neñgiiga maljin. Mewö.

Kraistpuk qekötahöba ölni mohot akzin.

¹¹ Mianğöra aka Efesus inini mutuk Juda ambazip qahö ahuba Anutugö könagesö qahö malgeri, mönö mi mötmöriba malme. Tosatñan engöra kewö jiba jim engimalget, "Nini Anutugö aiwesökkninambuk maljinmö, kantri tosatni inini ambazip omanji aiwesökñini qahö!" Qet mi azi börönöñ aiwesök silenine yandimakzei, mönö mi mötmöriba jimalget. ¹² Inini nalö mianğoreñ uruñini Kraistpuk qahö jöhöba öne yaigep malget. Kian kantri inini Juda könagesö neñgö kau likepupurnina malget. Anutunöñ ambazip nanñangöra möwölöhöm neñgii maljini, inini neñgö sutnine qetñini qahö malget. Anutunöñ Buñaji alaurupni engimangö jiba keu jöhöyöhi, inini mi qahöpmahöp möt kutuba tönpin malget. Oyaenköyaen akingö jörömqörömnini qahö. Anutuñini qahö tandök gölmenöñ önewat lan malget. Mönö mia mötmöriba malme.

¹³ Inini mutuk tikep malgetmö, Kraist Jisösbuk qekötahögetka sepñan sanğon enğiiga nalö kewöñe amqeba Anutugö kösutñe kaba malje. ¹⁴ Kraistnöñ nanjak luai Tonini akza. Yanñon Juda könagesö aka kian kantri ambazip kambu yahöt nini mindirim neñgiiga kutulangömakzin. Sutnine kerök ahöba sel paset köhöikni ewö menden neñgiyöhi, yanñon mönö sonğo mi tumbaköba luluñniga urumelen könagesö mohot akzin.

¹⁵ *Jisösnöñ nanni gölme silenñan kömuiga mewö mianñon Juda neñgoreñ Köna keu aka mianğö jöjöpñ keuñi aka jimkutukutu tosatni mi köndenök. Sile kambu yahöt mindirim neñgiba könagesö dölokni mohot akingöra mi köndenök. Mianğöra uru dölokni miwikñaiba al neñgiiga Kraistpuk qekötahöinga sutnine luai qei asuhum neñgiyök.

* 2:15: Kol 2.14

16 *Kraistnönj kömumba keröknini maripomnönj qem kömui erök. Silenji mohot miangö sepñan mönö ambazip kambu yahöt neñguañgiriga ölop lilingöba Anutugö kösutñe kabin. Mewö mindirim neñgiiga ölop böröqeçe akin. Mi ak teköba Kraistkö ölnji mohot aka maljin. 17 *Kraistnönj kaba luai asuhumapkö Buñañji mi kian kantri ambazip Anutu andö qeba tikep malgeri, engöra jim asarim engiyök aka Juda ambazip Anutugö kösutñe malini, mönö neñgöra mohot jim asarim neñgiba malök. 18 Kraistnönj Juda aka kian kantri ambazip nini körek nam köl neñgiiga Uña Törönji mohotñan köna kondel neñgiiga ölop amqeba Iwigö jemesoholñe añgotpin.

19 Miangöra inini Juda ambazip qahöpmö, töndup kian ambazip qandakñi mi qahö toroqeba malje. Anutugö miri gölme tonji sarakñi aketka nembuk mohotñe Anutugö urumelen könagesö akzin.

20 Kezapqetok ambazip yeñön mutuhök Anutugö keunönj tandö esim kuñgugetka Kraist Jisösnönj nanñak kaba tandö kömbönañnini aka aposol melaim neñgiba bohonini kiniga Anutugö urumelen jikeya akzin. Inini mewöyök tandö miangöreñ angota nañgönañgö ak anguba köhököhöi miwikñaimakze. 21 Yanön mönö miri mi jömukñanök mindirim jöhöiga kinakza. Nini Kembubuk qekötahöba kinda kutulañgöinga mötnaripninan köhöim qariiga Anutugö urumelen jike kömbukñi akzin. aka 22 Inini mewöyök Kembugöreñ qekötahöba urumelen alaurup tosatñi yembuk kutulañgöba mohotñe kinda uruñini nañgöm anguba köhököhöi miwikñaimakze. Mewö kinda Anutugö urumelen jike aketka Uña Törönji uruñine ala mianön nanñak jikenji miangö uruñe malja. Mewö.

3

Polnönj kian kantri yeñgöreñ anda Buña nup meyök.

1 Könañji miangöra aka Pol nönjön kian kantri ambazip inini bauköm engimangöra nup memba maljal. Mewö malbiga Kraist Jisösgö nupñi mealangöra kösö mire al niñgigetka tata simin köla köulukömakzal. 2 Anutunönj kalem möriamñi kantri tosatñi engöra mendenj engiiga ölöwakñegö nup niñgiyöhi, inini mi ölña möt teköze. 3 Anutunönj keu arenji tölapñi indela jiiga möt yaközali, keu miangö könañji lök töröpñanök ohom enjial. 4* Ohom enjiali, inini kulem mi oyoñda ölop nöngö könani kewö möt asarime: Nönjön Kraistkö könañji tölapñi mi ölopñanök möt kutuzal.

* 2:16: Kol 1.20 * 2:17: Ais 57.19 * 3:4: Kol 1.26-27

⁵ Mōpṅaṅgō mōpṅeyōk ambazipnōṅ kōnahiba mala kota malgeri, yeṅōn nalō miangōreṅ Buṅa tōlapṅi miangōra tōnpin malget. Mewō mala kotketmō, nalō kewōṅe Uṅa Tōrōṅan mi Anutugō aposol aka kezapqetok ambazip tōk-kutukutuṅi neṅgōra jim indeli mōtzin. ⁶ Buṅa tōlapṅi mi kewō: Kraist Jisōsnōṅ Buṅa neṅgimapkō jiba keu jōhöyōhi, iṅini mi Juda nembuk örörōṅ aṅgōn kōla memba malje. Ölöwak Buṅanōṅ miangō kōnaṅi mi kian kantri ambazip eṅgōra mewōyōk kondel eṅgimakza. Iṅini uruṅini melenḍa ölöp nembuk mohotṅe kōtumōtuetṅaṅgō Buṅaṅi dop mohot memba malje. Uruṅini Anutubuk jōhöba mohotṅe Kraistkō ölni aka nembuk kambu mohot kinjin.

⁷ Yaṅgō kukōsumṅan mōnō nōṅgō uruni sölölöhōiga uruni melenḍiga Anutunōṅ kalem mōriamṅi sōṅgōrōṅi qahō niṅgiyōk. Mi niṅgiiga kōna asuhiiga Ölöwak Buṅagō nup meme azia ahal. ⁸ Nōṅōn Anutugō kōnagesō sarakṅi pakpak eṅgō nembō bapṅine eretṅi kōtōkṅi maljal. Mewō maljalmō, Anutunōṅ tōndup kalemṅi öṅgōṅgōṅi kewōṅi niṅgiyōk: Nōṅōn Kraistkō oyaeṅkoyaeṅ Buṅaṅi mi kian kantri ambazip eṅgōra jim asarimangō simbawōṅ mōtzal. Oyaeṅkoyaeṅ miangō kōnaṅi mi körek esiba mōt kutum tekōbinangō dop qahō.

⁹ Anutunōṅ mōpṅaṅgō mōpṅe yuai pakpak miwikṅaiba Buṅaṅi tōlapṅi kōzambōriga ambazipnōṅ mala kota malgetka nalō miangōreṅ tōnpin malget. Miangōra nōṅōn Anutugō Buṅa areṅ tōlapṅi mi galōm kōla malbiga ölnambuk ahakza. Nōṅōn miangō kōnaṅi aukṅe jibiga ambazip körekṅan mōt sölōṅgōmegōra simbawōṅ mōtzal.

¹⁰ Anutunōṅ mōtkutukutuṅi qainṅi kun kōnaṅi kōnaṅi indel neṅgiiga nalō kewōṅe urumelenḍ zioz kambu sutnine eraum mōringa aukṅe ahum sehimakza. Anutunōṅ urusihimṅan kewō mōrakza: Bem suahō galōm aka pom garata öṅgōṅgōṅi eretṅi Suetp gölme sutṅire örōyulai pakpak galōm kōlakzei, yeṅōn mewōyōk Anutugō mōtkutukutuṅi mi kezap ala mōtmegōra mōrakza. ¹¹ Yeṅōn mi mōtmegōra Anutunōṅ Buṅa areṅi mi mōpṅaṅgō mōpṅeyōk nalō qahōṅe uruṅan jim kōhöiba ali ahōyōk. Miangō dop Kembunini Kraist Jisōs melaiiga ölni miwikṅaiiga kōnagesōuruṅi aka mindiriba kinjin.

¹² Kraistpuk qekōtahōba kinda mōt narim waṅgiinga Anutugō naṅṅuṅan mewō taliga ölöp yaṅgō jemesoholṅe aṅgotpingōra awōsamkakak kinjin. ¹³ Miangōra kewō ulet eṅgizal: Nōṅōn kōsō mire tata eṅōn ölöwakṅegōra aka kōṅjilinṅ mōta malakzali, miangōra uruṅinan mōnō kude etma. Iṅini nōṅgō sihimbölōni miangōra aka ölöp akōdamunṅinambuk akṅe. Mewō.

Polnōṅ Efesus yeṅgōra kewō kōulukōyōk:

¹⁴ Könañi miangöra nöñön Iwinini simin köl wañgiba köulukömakzal. ¹⁵ Yañönök mönö iwinini mutukñi akza. Yañgö dop Suep aka gölmegö könagesö pakpak neñön iwi qet memba qerakzin. ¹⁶ Kewö köulukömakzal, “Anutu, gi mönö Uñagi Töröñi al enjinöñga uruñinan köhöimakña. Göhö Buñagi kukösumñi buñabuñañambuk mi teteköñi qahö köwege ahözawi, gi mönö kukösumgi miangö dop mem köhöim enjimakñan. ¹⁷ Mem köhöim enjinöñga ölop Kraist möt narim wañgigetka uruñine dumñi memba malma. Mewö maliga kesötñini Kraistkö urukalemnöñ möndömgöba mendawölget geiga töndangöba kinme.

¹⁸ Urukalemñan nam köl enjiiga könagesö sarakñi pakpak yembuk ölop Kraistkö urukalemñangö könañi möt kutume. Jöpaköm neñgimazawi, urukalem miangö dopñi kewö: Görañi likeplikep teteköñi qahö an bibihiza. Köröpñi enduyangö enduñe angaiza. Köröpñi euyangö euñe öngöza. Mewöyök dutñe emuyangö emuñe geba ahöza. ¹⁹ Kraistkö urukalemñan mönö gölmegö mötmötninañgö dopñi oñgita. Mi möt kömumegöra kewö köulukömakzal: Anutu, gi mönö aködamungi pakpakö dop mötmöt Buñagan uruñini kokolak qeba musulungöm enjiman.”

²⁰ Anutu mewö köuluköba kewögöra möpöseimakzal: Nini mötmötnini oñgita yuaigöra köuluköba qesibinak me jemelen imut ala mötmöribinak ewö, yañön mönö yuai mi ölop köhöiba neñgima. Anutu kukösumñan urunine nup memakzawi, yañön mönö miangö dop köuluk aka mötmöt dopnini oñgit teköba anqeba yuai pakpak ölop ak neñgimakña. Miangöra möpöseim wañgimakin. ²¹ Urumelen könagesö neñön tokoba Kraist Jisösgöra aka Anutugö qetbuñani möpöseininga aködamunñambuk aka ahöma. Mi gwöt isik ahöm köhöiba teteköñi qahö ahöba öngömei, nalö miangören mönö mewöñanök aködamunñambuk aka ahöma. Keu mi ölna.

4

Kraistnöñ mindirim neñjiiga ölni mohot akzin.

¹ Nöñön Kembubuk qekötahöba kinda nupñi mealangöra kösö miri azia akzal. Keu mi jim teköba uruñini keu kewö jiba kuñguzal: Anutunöñ ahakmeme aködamunñambuk aka memba malmegöra engholöhi, miangö dop injini mönö mal-mal qainñi kun malme. ² *Mönö uruñini memba et ala keu bapñe anda guñböñjñjñ qakñe ambazip ak enjiba malme. Lömböt mökösoñda malme. Mönö lolongöba bölöñangö kitipñi kude mememö, qaqaenjiba jöpaköm anjuba malme. ³ Uña Töröñan uruñini qezaköba luaigö kösönöñ jöhöba mindirim

* 4:2: Kol 3.12-13

enġimakzawi, iġini mōnō uru jōhōjōhō mi sutnjine ahōmapkōra kapaŋ kōla kinme.

⁴ Anutunōŋ enġoholōhi, mianġōrenċ mōnō örōrōŋ oyaenġkoyaen akingō jōrōmqōrōmŋini mohot miyōk al enġiiga al mambōta malje. Mianġō dop iġini mewōŋanōk Kraistkō ōl kempaŋi mohot aketka Uŋa Tōrōŋi mohotnōŋ mōnō inahōm enġiiga malme. ⁵ Kembunini mohotnōŋ galōm kōl enġiiga örōrōŋ mōt narim waŋġigetka o melun mohot miyōhōk mem enġigetka mohot aka malje. ⁶ Anutunini mohotnōŋ kōrek iwi ak neŋġimakza. Yaŋōn yuai pakpak kōrek neŋġoŋgita Kembu ōŋgōŋgōŋi ak neŋġimakza. Mewō aka jitŋi tem kōlbingōra kōrek kuŋguba inahōm neŋġiba urunini dop malmal tatat ak neŋġimakza.

⁷ Mianġō dop örōrōŋ Kraistkō ōlŋi mohot maljinmō, Kraistnōŋ kalem mōriamŋi mokoba sihimŋaŋġō dop neŋġiyōk. Nup memegō mōtmōt kalem kōnaŋi kōnaŋi mi mohot mohot neŋġōra dopnine mendenċ neŋġiiga maljin. ⁸ *Mianġō keuŋi mi kewō jigetka Buŋa Kimbinōŋ ahōza,

“Yaŋōn euyaŋġōrenċ ōŋgōba kinda kōsō ambazip gwōtpuk enġōmeiga buŋaurupŋi aketka kalemŋi kalemŋi mi ambazip neŋġōra neŋġiyōk.”

⁹ “Euyaŋġōrenċ ōŋgōyōk,” Anutunōŋ keu mi mōnō denōwōgōra jiyōk? Mianġō kōnaŋi kewō: Kraistnōŋ mutuk Suepnōhōk erōk. Mōnō gōlme dutŋe emuyaŋġōrenċ geyōk. ¹⁰ Erōhi, yaŋōn mōnō mewōyōk liliŋgōba eu ōŋgōyōk. ōŋgōba Suep mirigō jakeŋi pakpak enġoŋgita qakŋe euyaŋġōrenċ ōŋgōba malja. Mianġōrenċ mala Suep gōlmegō örōyuaiŋiri pakpak mi ōsumŋan kokolak qeba jōmuk dop kōl tekōba malja. ¹¹ Kraistnōŋ ambazip neŋġōra mōtmōt kalemŋi kōnaŋi kōnaŋi kewō mendenċ neŋġiyōk: Nupŋi mendenċ neŋġiiga tosaŋŋan melaimelai ambazip bohōŋŋi (apōsol) aket. Tosatŋan kezapqetok ambazip (profet) aket. Tosatŋan urukuŋgukuŋgu ambazip (ewanġelis) aket. Tosatŋan lama galōm (pasta) aka kusum neŋġinēŋgi bōhi qaqaŋu aket.

¹² Kraistkō ōlŋi mi urumelenċ ambazip. Neŋōn yēŋgō uruŋini naŋgōinga kōhōkōhōi miwikiŋaibingōra nupŋi mewō mendenċda kuŋgum neŋġiyōk. Kōnagesō sarakŋi neŋōn kōrek urugō nupŋi mēmbiŋgō jōjōrōm tekōba malbingōra aka mewō inahōm neŋġiyōk. ¹³ Mewōŋa mewō nup murutŋi murutŋi mēmba mala Anutu mōt nariba kōnaŋġep Nahōŋŋi mōt yakōm sorokōba mianġōrenċ qezakōm aŋguba mohot aka kinbin. Anutugō mōtmōtŋi aka akōdamun yuaiŋi pakpak mi mōnō kōrekŋanōk Kraistkōrenċ ahōza. Neŋōn Kraistkō kōwenġeyōk

* 4:8: Sum 68.18

mötmöt ösumñi öröinga musulungöm nenğiiga qarim sehiba köhöiba malinga aködamunñi köl nenği körek asuhui malbin.

¹⁴ Toroqeba namande tandök malbinbuköra Kraistnön urunini kuñguba nanñi ewö aködamuninambuk akingöra inahöm nenğimakza. Namande tandök malinga qewöloñ ambazipnön areñ i me wai ala möndöba tutuhum nenğigetka tala et nenğuyöhi, inñini mönö miangö dop aka lañ malbepuk. Luhutnön lilikqilik qeiga köwetnön kunduriga sirinön gödöwöröt lañ wañgiriga an qem kam qem aka simbiñsambañ ahakza. Miangö dop gölme ambazipnön silenön alal aka unji memba tilipmötöt miwikñaiba ambazip lañ kusum enğigetka janjuñ ahakze.

¹⁵ Miangö dop lañ kude malmemö, keu ölnanök töp jiba jöpaköm anğuba malme. Mewö mala Kraistnön nöroñnini akzawı, kesötñini mönö yañgöreñ möndömgöget geiga töndangöba yuai pakpak miangöreñ qarim köhöiba aködamunñinambuk aka malme. ¹⁶ *Kraistnön nöroñnini aka ölni jömuhök galöm köl nenğiiga ginimuramñi körekñan mönö ölnanğö köna böröñi mindiriba jöhöm nenğigetka kutulanğömakzin. Ösum mohot mohot ahöm nenğizawañgö dop mönö nupnini memba kötöngöba jöpaköm anğuinga ölni mianön köhöiba qarimakza. Mewö.

Asakñanğö ahakmeme dölökñi aka memba malme.

¹⁷ Mewö akzinanğöra nöñön Kembugö jıtçe memba galöm meme keu kewö jibi möt yaköme: Urumelenğö kopa ambazip uru mötmötñini sohoiga nesak ewö aka öne omanñi lañ malakzei, inñini yengö tandök bölöñi kude toroqeba aka memba malme. ¹⁸ Urumelenğö kopa ambazip yengö urumötmötñinan söñauiga Anutubuk malmalgöra siksauk aka sohoze. Mötmöt bölöñan uruñini gwözöñda duhuyöhanğöra aka gukmaulem aka tönpin malje. Miangöra Anutugöreñ malmal köhöikñe qahö qekötahömakzemö, nanñinök lañ töhön malje. ¹⁹ Galömñini qahö mem anğugetka uruñini gwözöñ teköiga gamu tanğen malje. Uruñini kaiseröñ jöhöba qewöloñ yuaigöra lañ söñgaiba tölöhomakze. Yuai membangun membingö nepaqepalok köpösöngömakze.

²⁰ Yeñön mewö ahakzemö, inñini Kraistpuk malmalgö könanñi mi mewö qahö kusum enğiget mötket. ²¹ Inñini keu ölnanğö Toñi Jisösbuk qekötahögetka miangö dop könanñi kusum enğigetka ölni kewö möt yaköget: ²² *Mutuk ahakmemenñini walñi wuatañgögetka sihim kömbönanñini bölöñan isimkakalek ak enğiiga ayuhum anğubingö aket. Köna kusum enğiget mötkeri, miangö dop mönö uruñini walñi meteköm gila andö qeme.

* 4:16: Kol 2.19 * 4:22: Kol 3.9

²³ Urumötmötņini mem guliget kölönjaiba malmegöra köna kusum enġiget. ²⁴ *Anutunöņ nini nanņi kaisoņgolomņanġö dop sarakņi aka mal köhöibingöra miwikņaim neņġiyök. Uru dölökņanġö malmal solanņi wuatangöbingöra mönö al neņġiyök. Mianġöra uru dölökņi miyöhök mönö bök kölget geiga malme. Köna mi mönö mewö kusum enġigetka möt yaköget.

²⁵ *Köna mewö ahöiga nini Kraistkö ölni mohot mianġö uruņe darumun ewö mindiriba ala-ala aka maljin. Mianġöra munen mi mönö meteköm gilget geiga sutņine keu ölnanök pakpak eraum möta malme. ²⁶ *Tembula kukpiriņnöņ akņe ewö, mönö töndup siņġisöndok kude akņe. Irimņini seholidmawi, keuņini mi mönö zilaņ wehön jeņan qahö teköba geiga jim tekögetka solanima. ²⁷ Mewö Bölönanġö Tonjan sutņine kaņgotpapuköra qeapköba nalö kun kude waņgiba zilaņ yakörime.

²⁸ Kunņan yoņgorö meme malöhi, yaņön mewö kunbuk kude akņa. Mewö qahöpmö, mönö nanņi böröņan nup kapan köla memba malma. Nup memba nanņi nene inapņi miwikņaiiba ölöp amqeba ambazip wanapņi nanġöm enġimakņa.

²⁹ Keu lösö kun jitņineyök kude etmapmö, keu ambazip uruņini nanġöba mem köhöimawi, mönö miyöhök jiba malme. Ambazip keuņini möta uruņini ahözawaņġö dop qambaņġöra osizei, mönö mianġö dop goro enġigetka keu nahömņi möta ölöwakeak. ³⁰ Anutunöņ buņaurupņi sohopenini meiga Suepnöņ öņġöbini, nalö mianġöra aiwesökņi kömbönaņi mekötahöm enġiiga uruņine geba Anutugö muņgemņi akza. Mianġöra Anutugö muņgemņi Uņa Töröņi mi mönö wösöbirik kude qem waņgime.

³¹ İņini mönö urukömbuk, urukondum aka urusiņġok pakpak mi qeköba gilget köröwen tatma. Urukönöpnoņ kude jula enġohoiga uruņinan auba yom qeta jim anġubepuk. Mewöyök andöqege keu töhöreņ mi kude jime. Anġöjörak könaņi könaņi uruņini tölöhobapuköra mi mönö körek andö qegetka tikep ahöma. ³² *Tikep ahömappmö, ala-ala ak anġuba mököliba guņböņjönjön qakņe ak anġuba malme. Kraistpuk qekötahögetka Anutunöņ siņġisöndokņini mosöta saņġon enġiyöhi, İņini mönö mianġö dop toroqeba köpösihitņini mosöt anġuba malme. Mewö.

5

Anutugö asakņe malmal mi kewö:

* 4:24: Jen 1.26; Kol 3.10

* 4:25: Zek 8.16

* 4:26: Sum 4.4

* 4:32: Kol

¹ Anutugö wölböt nahönböraturupñi akzeañgöra silikñini mönö kapan köla Anutunöñ ahakzawañgö dop aka wuatañgöba malme. ² *Kraistnöñ jöpaköm nenñgiba malmalñi nenñgöra aka kölenña mosörök. Jöwöwöl ohogetka köwakñan öñgözapma, Anutunöñ miangö dop Kraist malmalñangö kalemñi mi möt añgön köli wöröññi umköhöwakñambuk ewö aka yañgö jeñe pukpuköiga söñgaiyök. Inini mönö mewöyök urukalemnöñ kinda Kraistkö dop jöpaköm añguba aka memba malme.

³ Serowilin, qewölon añgöjörakñambuk könañi könañi me yuai membagan membingö nepaqepalok (gridi) silikñi mi Anutugö jeñe qahö dop kölja. Miangöra Anutugö ambazip sarakñi akzeañgö dop yuai mewöñangö keuñi kun mi sutñine kude misiriba jigetka mötme. Saumbañ!

⁴ Añgögönahitnöñ lösö keu imbilonñambuk aka uruqahö keu sinñi sinñi mi kude jime. Mianñon uruñini tölöhoiga qahö dop kölja. Miangöra mi mönö mosöt teköba möpömpösei keu jim sehiba malme.

⁵ Keu kötni ki mönö möt kömume: Kunñan serowilin me qewölon añgöjörakñambuk me membagan membingö nepaqepalok köpösöñgömakzawi, yañon mönö Anutugö bem-tohoñi buña qem añgumangö osima. Ahakmeme mianñon bem muneñi me tandö lopion möpöseim enñimakzeañgö tandökñi akza. Mewö akzawañon mönö Kraist aka Anutu yetkö bem-tohoñ uruñe añgotpingö osima.

⁶ Anutunöñ siñgisöndok mewöñangöra aka tembula irim-sesewölñi qegetal ambazip yengö qakñine ali öñgömakza. Miangöra kunñan keu omani mewöñi jiba kelök ala tutuhuba tilipköm enñibapuk. ⁷ Miangöra ambazip mewöñi mönö andö enñguba yembuk köisirik kude malme. ⁸ Mutuk söñaupuk malgetmö, nalö kewöñe Kembubuk qekötahöba kinda yañgö asakñambuk malje. Ahakmemeñini mönö asakñangö buñaya akzeañgö dop aka memba malme. ⁹ Asakñangö buña akzeañgö töhötmöriam ölni mi kewö: Inini ahakmeme ölöpnj wuatañgögetka Anutunöñ keuñini jim teköi solanime aka keu ölö töhöññanök jiba malme. ¹⁰ Wani yuai Kembangö jeñe dop kölmawi, miangö könañi mönö jaruba kewöta möt asarime.

¹¹ Söñaupkö ahakmeme gilipitñi (ambetakñi) aka memakzei, yembuk mönö köisirik kude toroqeba malme. Yengö bölöñamñini mi mönö indela asakñe ala jim enñime. ¹² Tosatñan siñgisöndok tölapñe ahakzei, mi mönö aukñe jibingö gamuñambuk akapuk. ¹³ Anutugö asakñan siñgisöndokñini pakpak mem asariiga könañamñini öññan mönö aukñeyök asuhuma. ¹⁴ Asakñangö Tonjan mönö

* 5:2: Eks 29.18; Sum 40.6

tölapnangö yuaini pakpak indeliga asakne aukneyök ahöma. Miangöra keu kun kewö jigetka ahöza, “Gaun ahözani, gi mönö imbigi mötnöñ. Mönö köhömuñeyök guliba wahötnöñga Kraistnöñ mem asarim gihima.”

¹⁵ Keu miangö dop ahakmemenini mönö mötkutukutu qakne aka memba malme. Morop aka tönpin malbepuköra mönö ölöpnanök galöm mem anguba malme. ¹⁶ *Kewöñe nalö bölizawangöra aka urugö nup membingö köna kun ahumawi, nalö mi mönö kude mösöhöba ayuhumemö, ambazip qöhöröñine anda ösöñ qamban köl engime. ¹⁷ Miangöra uruqahö ewö lañ kude malmemö, Kembugö jitsihitji mi ölöpnanök möt asariba kinme.

¹⁸ Wain o köhöikñi nempa enololon akepek. Nanñini imbi-imbi malgetka mötmötñini bölöñan asuhugetka söñaup malmalnöñ titeköba geba ayuhubepuk. Miangöra enololon akepekmo, Uñan Töröñan mönö uruñini kokolak qemapköra kapañ köla kinme. ¹⁹ *Möno Buña keu eraum möta Sumbara (sam), möpömmöpösei liñet (omsa) aka urugö liñet tosatñi mi urukönömñinan köla Kembu möpöseimakne. ²⁰ Mewö me mewö asuhuiga miangöra mönö Kembunini Jisös Kraistkö qetñi qeta Iwi Anutu sundan saiwap jim wangiba malme. Mewö.

Awanöm yenjö goro qamban keu

²¹ Kraistkö jitñi ongitpepuköra kenjötnini möta mönö sutñine keu bapne anan ak anguba malme.

²²⁻²³ *Kraistkö ölni mi urumelen könagesö. Yanön miangö nöropñi aka Amötqeqe Tonji akza. Miangö dop azinöñ mewöyök anömñangö nöropñi akza. Miangöra ambi inini mönö Kembugö keu bapne anangö dop nanñini apurupñini göda qem engiba keuñini bapne anda malme. ²⁴ Urumelen könagesö neñon Kraistkö keu bapne kinjini, miangö dop ambi enön mewöyök mönö apurupñinangö keu pakpak wuatangöba malme.

²⁵ *Kraistnöñ nanñi könagesöñi jöpaköm neñgiba neñgöra aka malmalñi tököba köleñnöhi, miangö tandök azi enön mönö mewöyök anömurupñini jöpaköba urukalem ak engiba malme. ²⁶ Kraistnöñ könagesöñi Buña keuñan tök kutuba ambi buñanji sarakñi akingöra o ewö miangön sanjonja mösolonanim neñgiyök. ²⁷ Yanön nini ölülop sorok akingöra möta uru sönuetnini mösolonaniba töwöt boromñi kun qahö akingöra kapañ kölakza. Könagesö sarakñi köpösihitkö keunini qahö akingöra mörakza. Kraistnöñ kaba neñguanñiriga asakmararane

* 5:16: Kol 4.5 * 5:19: Kol 3.16-17 * 5:22-23: Kol 3.18; 1 Pitö 3.1 * 5:25: Kol 3.19; 1 Pitö 3.7

eu angoringa jihilalomnjan nenjuiga ambi buñani ewö nini nanñi jemesoholne al nenjuiga aködaminambuk kinbin.

²⁸ Azi injini mewöyök mönö Kraistkö tandökñi mewöñi wuatangöba anömurupñini jöpaköm engiba malme. Anömñi jöpakömakzawanön mönö nanñi köyan köl angumakza. Miangöra nanñini silenini köyan köl angumakzeangö tandök mönö anömurupñini köyan köl engigetka dop kölma. ²⁹ Kunjan kun nanñi silenini nalö kunöñ kazik qahö ak wangiyökmö, körek neñön silenini gumohoba köyan kölakzin. Kraistnöñ mewöyök könagesourupñi nini silenini ewö keujan gumohoba köyan köl nenjimakza.

³⁰ Urumeleni könagesö neñön Kraistkö ölni akzin. Neñön Kraist ölnangö törömunñi aka maljin. Miangöra gumohom nenjimakza. ³¹ *Buña keu kun kewö ahöza, “Miangöra azinöñ mönö iwinamñi etkömosöta anömñambuk qekötahöba yahöt yetkөн silemohot aka malmahot.” ³² Keu mi söpsöp keu tölapñi. Mi Kraist aka urumeleni könagesö nenjö uru jöhöjöhöninangöra jiba ohozal. Keu areñ miangö könani mi tölapñi aka dutñi gejen. ³³ Mewö akzappmö, engöra keu mi kewö jizal: Injini mohot mohotñan mönö mewöyök anömurupñini nanñini köyan köl angumakzeangö dop jöpaköm engiba malme. Anöm enñön mönö mewöyök apurupñini göda gem engiba malme. Mewö.

6

Nahönbörat aka iwinam yengö uru jöhöjöhö

¹ *Nahönbörat engöreni ahakmeme diñdini mi kewö: Injini mönö Kembubuk qekötahöba iwinamyahötñini yetkö jitrini tem köla wuatangöba malme. ² *Anutunöñ jöjöpañ keu 1-2-3 miengö teteköñe töwa likepñi nenjimangö qahö jii ahözappmö, jöjöpañ keu jañgö 4 mi törömunñambuk. Mutuk kewö jiza, “Iwinamyahötki mönö göda gem etkiba malman.” Keu mi tem kölinga Anutunöñ töwa likepñi nenjimangö keuñi kewö jöhöi ohoget ahöza, ³ “Göda gem etkinöñga Anutunöñ töhötmöriam gihiiga toroqeba gölmenöñ nalö köröpñi malman.”

⁴ Nahönbörat urupñinan irimsesewöl akepuköra iwi enñön mönö urukanjam kude ak engiba malme. Mewö qahöppmö, Kembugö Köna keu tem kölmegöra kusum engiba miangö dop mindingöm engigetka qarime. Mewö.

Welenqege aka galöm yengö qambañ keuñini

⁵ *Welenqege injini mönö gölme qakñe galömurupñini yengö keuñini Kraistkö keu ewö tem köla jörantauat kude ahakñe.

* 5:31: Jen 2.24 * 6:1: Kol 3.20 * 6:2: Eks 20.12; Dut 5.16; Kol 3.21 * 6:5: Kol 3.22-25

Keuñini ongitpepuköra sömbuñini möta jönömñinambuk undui malme. Urugenmoñ kude aka böñ kinda aka memba malme. ⁶ Köñdowon aketka ambazipnön engek sorimegöra qahöpmö, uruñini nupnön ala memba Anutugö jitsihitñi wuatangöba Kraistkö welenqeçe tandök ahakñe. ⁷ Gölme ambazip welen qem engiba mewö mianñon Kembangö welenñi qemakzin. Mewö möta nupñini mönö Kembangö jeñe dop kölmawanğö dop uruölöwakpuk memba malme.

⁸ Keu ki mönö mötme: Engö sutñine tosatñan nup tonñ malje aka tosatñan tonñini töwa qahö öne welen qem engiba etqeqeñi malje. Mi töndup denike yeñon nup ölöpnñi mi me mi memakzei, Anutunön mönö mianğö töwanñi al enğiiga buñja qem anğume. Keu mia mönö mötmöriba malme.

⁹ *Tourup aka welenqeçe engö Kembangini mohot yanñon Suep mire malja. Yanñon ambazip tosatñi qahö engek soriba tosatñi qahö qepureim engimakzapmö, dop mohotnön kewöta keunini jim teköm nenğima. Galöm inñini mi möt kutuzeangöra mönö welenqeçe alaurupñini simin titit ölöpnñi dop mohot ak engiba öröm könöpkönöp memtöröp qemtöröp mosöta malme. Mewö.

Anutugö jurujamba jömkuk memba malme.

¹⁰ Kimbini tekömangö aiga keu kewö ohozal: Inñini Kembangubuk qekötahöba kingetka kukösumñi ketanñan mönö inahöba töngum enğiiga köhöimakñe.

¹¹ Bölönangö Tonjan silenön alalgö mötmöt areñ könanñi könanñi alakzawi, inñini mi mesohol köla kin köhöimegöra mönö Anutugö wahijamba pakpak memba kölget gem anğum teköiga malme.

¹² Nini gölme ambazip sep busuñinambuk yembuk bim qahö aumakzinmö, bem suahö galöm aka iwiluhut bölönñi bölönñi tuarenjon ak engibingöra kinjin. Bem suahö galöm bölönñi Suep gölme sutñire jakömbuak dumñine kinda kembu ahakzei, mönö mi qetal engimakzin. Mewöyök pom böhi öngöngöñi eretñi sutñine panamangö öme tohongö azi ipñi mala öroyuai pakpak galöm kölakzei, neñon mönö yembuk yarö gilakzin.

¹³ Mianğöra tuarenjon ak engibingöra mönö Anutugö jurujamba lökñanök memba kölget gem anğuiğa kinme. Mewö kingetka kerökñinan nalö bölönñe engubingö gangömakñei, nalö mianğoreñ mönö ölöp amqeba yarö gila tötal engime aka yarö mi teköiga ölöp miri gölmeñine kanjam köla kinme.

¹⁴ *Wahijambañini mönö kewö löngöt anğume: Keu ölnanök jijigö irimunğañi mönö anjönñine jöhöba kinme. Ahakmeme solan sorokñi mi töptöpñine göwanğowan (kapa maluku) ewö

* 6:9: Dut 10.17; Kol 3.25; 4.1 * 6:14: Ais 11.5; 59.17

köla sel jöhöm aŋguba kinme. ¹⁵ *Köna esu böŋtöŋök löngöta ölop töndangöba tiba anakzin. Mianğö dop inini mönö lu-aigö Buŋaŋi jim sehibingö jöjörögetka mianğön bohon köl enğima. ¹⁶ Jurujamba miembuk toroqeba saiwa bohonŋi qetŋi mötnarip mi mönö buŋa qem aŋguba sundan tengöba kinakŋe. Bölöŋaŋğö Toŋan neŋgeriba qönsihim neŋgimamğöra möta timbi liŋgipŋi mulahakzawi, mianğö esapesap könöpŋi pakpak mönö suman mianğön qeapköba aŋğön köl aŋgumakŋe.

¹⁷ *Anutugö Amötqeŋe Toŋi i mönö buŋa qem aŋgume. Buŋa qem aŋguba kunbuk letotmei, dom-amöt mianğön mönö nöröpŋini ain irikmarik ewö turuba aŋğön köl enğimakŋa. Uŋa Töröŋan bingö sou ketanŋi neŋgizawi, mi Anutugöreŋ Buŋa keu. Mi mewöyök mönö buŋa qem aŋguba urukönömŋine ala binŋini mianğön qemakŋe. ¹⁸ Wahöjambaŋini pakpak mi löngöt aŋguba mönö nalö dop Anutu köuluköba qesiba malme. Uŋa Töröŋan enğuasöta inahöm enğimakzawaŋğö dop mönö uletnöŋ sahot waŋgimakŋe. Mönö pöndaŋ uruguliguli mala sundan Anutugö ambazip sarakŋi pakpak yeŋğöra aka kapaŋ köla köulukömakŋe.

¹⁹ Nöŋğöra mewöyök kewö köulukömakŋe, “Anutu, gi mönö keu kötŋi diŋdiŋi Pol waŋginöŋga göhö Ölöwak Buŋagi tölapŋi mi keu jitŋan jimawaŋğö dop jim asariba awösamkakahök kinda uru kuŋgum enğimakŋa.” ²⁰ Nöŋön Ölöwak Buŋa mianğöra aka Anutugö jitŋememe azi bohonŋi akzalmö, nupŋi memakzalaŋğöra aka nalö kewöŋe kösö mire tatzal. Mianğöra Buŋa keu mi Anutugö jeŋe dop kölmawaŋğö dop awösamkakahök jiba malmamğöra mönö köuluköba malme. Mewö.

Yaizözkök keu teteköŋi

²¹ Wölböt alani Tikikus yaŋön nöŋğö kösohotni alma. Yaŋön Kembubuk qekötahöba nupŋi memburik-qemburikŋi qahö memakza. Kianğöreŋ denöwö aka memba tarakzali, mi pakpak jüiga inini mewöyök mi mötme. ²² Neŋön denöwö maljin tatzin, inini kösohot mi mötmegöra Tikikus melaim waŋgibiga Efesus enğöreŋ kama. Yaŋön kaba urukölalep enğiiga ölop böŋjöŋ malme.

²³ Iwi Anutu aka Kembu Jisös Kraist yetkön mönö urumelen alaurup enğöreŋ luai qeba urukalem ak enğiba mötnaripŋini mem köhöimakŋa. ²⁴ Ambazip Kembunini Jisös Kraist nalö teteköŋi qahö jöpaköba malmei, Anutugö kalem möriamŋan mönö körek embuk ahöba ahöm öŋğöma. Mewö.

Filipai Kimbi **Polnön Filipai yenğöra Kimbi alök.** **Jim-asa-asari**

Polnön misin nup liliköba meiga indimñi yahöt aiga Eisia Mainö (Töki) mosöta Yuröp gölmenön anök. Anda Rom prowins qetñi Masedonia miangörej uruñini kungui melengetka Kraistkö könagesö mutukñi mi Filipai sitinön asuhuyök. Könangep aposol Pol mi Rom sitigö kösö mire alget sihimbölö qakñe tariga nup meme ambazip tosatñan tuarenjoñ ak wañgiget. Mi ak wañgigetka tosatñan Filipai uruñe mewöñanök keu gonñoni kusum engigerangöra waimanjat mörök. Nalö miangörej Buña Kimbiñi ki Filipai mötnarip könagesö yenğöra ohoyök. Waimanjat mörökmö, töndup urukölalep keu aka urunangönanğö keu ki sösöñgai qakñe ohoba alök.

Polnön kösö mire tariga Filipai mötnarip könagesö yenön bauköm wañgibingöra kalem alget kayöhi, yañön miangö saiwap jim engimangöra Kimbi ki ohoyök. Mi ohoba toroqeba urunangönanğö keuñi gwötpuk mohotñe alök. Nanñak köñjilij könañi könañi möriga Filipai yenön Polgö keuñi mi mötketka töndup köhöiba awösamkakak kinmegöra uru nanğöm engiyök. Goro keu tosatñi kewö: Nanñini silenini memba öngöba aiweliköbepüköra mönö galöm memba malme. Dogo jimamon möta toroqeba nepaqepalok köpösöngöbepükömö, Jisös ewö uruñini mem et al anguba malme. Keu ki ölum engubapuk: Kraistpuk qekötahöba kinjei, mi Anutugö kalemñi akza. Juda yenön Mosesgörej Köna keu arenji tem köla wuatangöba Anutugöra silik yuai ahakzemö, urumelen alaurup enön mewö qahö. Enön mönö Anutu möt narim wañgigetka kalem möriamñi söngöröñi qahö engiiga buña qem anguba mewö mi anön malmal dölökñi miwikñaiba malje. Denike yenön Kraistpuk qekötahöba maljei, Anutunön mönö i luai qem engiiga söñgaiba malme.

Kraist möt nariinga Anutunön urusösöñgai nenjiiga ölop awösamkakak qakñe mal köhöibin aka urumelen alaurup yembuk mohotñe kapan köla köhöiba kinbin. Polnön miangö keuñi mi gwötpuk ohoyök. Polnön Filipai könagesö yenğö waikñini köhöikñi membingö möta malöhi, miangö keuñi mi mewöyök aukñe ohoyök.

Buk kianğö bahöñi bohonñi 7 mi kewö:

Keu mutukñi *1.1-11*

Polnön denöwö aka malök *1.12-26*

Kraistpuk malmalgö könanji 1.27-2.18
 Timoti Epafroditus yetkö nup arenji 2.19-30
 Tuarenjon yejon tilipköm engigetka etpepuk 3.1-4.9
 Polgö alaurup Filipai malgeri, yengö keunjini 4.10-20
 Kimbigö keu kötñi bohonji 4.21-23

1 *Pol Timoti netkôn Kraist Jisös welenni qeba maljit.

Urumelen könagesö sarakñi pakpak Kraist Jisösbuk gekötahöba kinda Filipai sitinön maljei, niri embuk aka engö bohonjini (bisop, pasto) aka Buña nup meme ambazip tosatñi (dikon) embuk keu eraum mötpingöra möta kimbi ki ohozal.

2 Anutu Iwinini aka Kembu Jisös Kraist yetkôn kalem möriam engiyohotka luainön malmegöra mötzal.

Polnön Anutu möpöseiba köuluköza.

3 Nönön mötmörim engimakzalanjö dop Anutu möpöseimakzal. 4 Nalö dop körek pakpak engöra Anutu köulukömakzali, mi mönö sösöngai qakñe köulukömakzal.

5 Nönön Anutu kewögöra möpöseimakzal: Inini Ölöwak Buñanön gekötahögeri, nalö mutukñi miangörenök könahiba nömbuk bim qeba kötöngöm niñgiba mala kota malje. 6 Anutunön uruñine nup ölöpnji könahiba memba maljawi, mi mönö toroqeba meiga Kraist Jisösnön kunbuk asuhumapkö nalöñe teköma. Mewö möt narim köhöiba Anutu möpöseimakzal.

7 O sepnjini nembu, wölböt alaurupni akzeangöra körek injini mewö mötmörim engibiga ölöpnjanök dop kölja. Anutunön nup niñgiiga kösö mire tarakzal me awörök nönön Ölöwak Buñagöra bim qeba enjololon keu qeapköba keu ölñan jalöñi memba köhöimapköra lilikömakzal. Mewö me mewö ahakzali, körek enön mönö nömbuk kingetka kalem möriam miyöknön dop köl engiiga nupni nangögetka mohotñe simbawon akzin. 8 Kraist Jisösnön injini jöpaköba inahöm engimakzawi, nönön mi möta miangö qakñe kinda körek engöra ak niñgiiga engekñamgö kapañ köla maljal. Mewö jibiga keu ölñi jizali, mi Anutu nanñak ölop nangöm niñgiba jima.

9 Nönön engöra kewö köulukömakzal: Anutu, gi mönö Filipai alaurup inahöm enginönga toroqeba köhöiba jöpaköm angugetka urukalemñinan qarim sehima. Mewö aiga ölop köna ölñi ek kutuba enjololon keu mosöta malme. 10 Mewö mala ölop keu kewöta köna ölop sorokñi möwölöhöba sarakñi aka köpösihitkö keunjini qahö mal öngöme. Kraistnön lilingöba kamawi, nalö miangören lömbötninan teköma. 11 Jisös Kraistnön ahakmeme solanñi nam köliga miangö ölñi asuhumakña. Ölñi miangön uruñini kokolak qeiga ambazipnön mewö engeka

* 1:1: Apo 16.12

Anutu möpöseigetka qetbuñan sehimapköra köulukömakzal. Keu mi ölña.

Pol kösö mire algetka Buña keunöñ köhöiyök.

¹² O urumelen alaurupni, enön nongö könani möt kutumegöra kewö möta ohozal: Yuai bölöñi nongören asuhuyöhi, miangö buzupñan sehiiga Ölöwak Buñaninan ambazip dop köl engiiga nupninan töhötmöriamñambuk akza. ¹³ *Ni Kraistköra aka kösönöñ gwaröhöm niñigetka Rom kiangören tatzali, keu mi yarö azi pakpak sisa-kiñgö jakömbuak miri galöm memakzei, yeñön mötze aka mewöyök ambazip tosatñi gwötpuk yeñgö kezapñine geiga möt teköze.

¹⁴ Toroqeba ölñi kewö asuhuyök: Urumelen alaurupninan kösö mire tatpi Kembunöñ bauköm niñgimakzawañgö keunji mötket. Mi möta sehisehiñan Kembubuk qekötahöba kinda köhöiba kapan köla awösamkakak aket. Mewö aka Anutugören keu keñgötñi qahö jim sehiigetka toroqeba anakza.

¹⁵ Tosatñan nongöra mötket öngöiga urusihim sarakñe kinda Kraistkö könani jim asarimakzemö, tosatñan nongöra aka uruñinan mututqutut möta andö nuñguba anjururuk akingö mötze. ¹⁶ Alaurupni ölñi yeñön nongö könani kewö mötze: Anutunöñ kuñgum niñgiiga awörök nöñön Ölöwak Buñagöra bim qeba enololon keu qeapkömakzal. Mewö möta jöpaköm niñgiba nañgöm niñgimakze. ¹⁷ Andöqeçe ambazip yeñön nanñinañgörök mötmöriba töwagöra möndögetka uruñinan tölöhoiga Kraistkö könani mewö jim asarimakze. Mewö aka kösö mire tatzali, nalö kewöñe anjösirip toroqeba ak niñgibingö mötze.

¹⁸ Mewö mötzemö, mi muat. Kraistkö könani mi yuaigöra möndöba silebile aka me Anutu törörök tem köla jim asarigetka mötpi dop kölja. Mewö me mewö ahakzei, urunan mönö miangöra ölöwahiga ölña söñgaizala söñgaimakñam. ¹⁹ Söñgaibiga nongöra köulukögetka Jisös Kraistkö Uña Töröñan nañgöm niñgiiga ölöp pösat niñigetka etmamgö tandök mötzal. Mewö asuhumapköra möta miangöra mewöyök söñgaimakzal. ²⁰ Yuai kun aka gamu miwikñaibilenbuköra mönö jörömqöröm aka maljal. Gamu qahöpmö, nalö dop Kraist möpöseiba malali, miangö dop nalö kewöñe mewöyök asuhumapköra mötzal. Silenan kömuma me malmawi, mi töndup mönö awösamkakak pakpak qakñe Kraist möpöseibiga qetbuñan qarimakña.

²¹ Malmam ewö, malmalni mönö Kraistkö qetbuñan qarimaköra aka malmam. Nuñguget kömumbilenak ewö, mi-anön mönö mem ölöwak niñgiiga oyaenköyaen akñam. ²² Mewö akilenakmö, gölmenöñ silebuk malmam ewö, mönö urugö

* 1:13: Apo 28.30

nup membiga toroqeba öljambuk ahakña. Mi mötmöriba nanangöra malmal me kömuwa möwölöhöbilenjak, mi ölop qahö mötzal. ²³ Malmal aka kömup sutjire pañpañgöba maljal. Kraistpuk eu malbilenjak, mianjon mönö yuai pakpak ongita möriam ketani ak ningibawak. Miangöra gölme mosötmamgö sihimni möta maljal.

²⁴ Mewö maljalmö, silebuk qeköriba malmam ewö, mianjon mönö injini bauköm engibiga ölni engören asuhuma. Kömumbilenjak, mianjon mönö injini qahö bauköm engibawak. ²⁵ Mewö möt narim köhöiba miangöra nehorigetka toroqeba mala körek injini bauköm engiba malmamgö mötzal. Bauköm engibiga mötnaripñinanö ölnan mönö qarim köhöiiga ölop önöni qahö söngaiba malme. ²⁶ Mewöyök Kraistnöñ nehoriiiga kunbuk engören kabiga injini ölop nöngöra aka Kraist Jisös önöni qahö möpöseim wanjiba malme. Mewö.

Mötnaripñinan köhöimapköra bim qeba malme.

²⁷ Ahakmemeñini mi mönö Kraistkö Ölöwak Buñan aködamunjabuk akñawanö dop aka memba malme. Mewö malgetka engören kaba engekñami me qahö kaba sikep mala keu buzupñini mötpi könañini kewö ahöi dop kölma: Injini mindimindiri aren mohotkö keu jöhöba urumohot aka kinme. Mewö kinda Ölöwak Buñagö keu ölnan sömböleibapaköra örörön jöhöba bim qeba malme. ²⁸ Mewöyök tosatñan tuarenjon ak engimakñei, enjon mönö keu jitñini könañi könañi miangöra kude töwöratigetka uruñinan kude etma. Könañamñini mewö mötpi dop kölma. Anutunön kukösum engiiga tuarenjon ambazip yeñon könañamñini eka kewö möt asarime: Nanñini et enjuiga ayuhugetka Anutunön meköm nenjiiga oyaenköyaen aka malbin.

²⁹ Anutunön areni al engiyöhi, mi kewö: Injini Kraist möt narim wanjiba likepñi söngaiba likepñi yangöra aka sihimbölo möta malme. ³⁰ *Nöñon mötnaripkö bim mutuk embuk mala qeali, neket aka nalö kewöñe toroqeba qemakzalanö keu buzupñi ki mötzei, injini mönö bim miyöhök nömbuk tönguba qeba malje, mi mötzal. Mewö.

2

Kraistkö dop nanñini mem et al anguba malme.

¹ Injini Kraistpuk qekötahöba kinjeangöra mönö uruñini nanööm angubingö qamban miwikñaima. Urukalemñini mianjon mönö urukölalep ak angumakñe. Uña Töröñambuk ösupköba kinda waikñini memba ak kömum angumakñe. ² Mewö akzeangöra mönö mötmöt mohot wuatangöba örörön

* 1:30: Apo 16.19-40

jöpaköm anğuba luainöñ malme. Urusihimñini mönö mötmöt arenñ mohot akingöra jöhöme. Keu mewö jöhöba urumohot aketka ölnji asuhui möta nöñön enğöra önöñji qahö söñgaiba malmam.

³ Öroyuai nanñinanğörök öröbingö sihimñan mönö kude nam köl enğima. Nanñini qetbuñanñan qarimapköra mönö silenñini kude memba öngömömö, uruñini memba et ala tosatñi yengöra mötketka öngömakña. ⁴ İnini mohot mohot mönö nanñini uruñinanök ölöwakñapköra kude mötmörimemö, tosatñi yengö uruñinan ölöwakñapköra mewöyök kapañ köla mötmörim yaköme. ⁵ Kraist Jisösnöñ gölmenöñ maliga imbi mötmöt ahöm wañgiyöhi, miyöhök mönö enğoreñ ahöi mi wuatangöba malme.

⁶ Anutugö kaisongolom tandökñi ahöm wañgii malökmö, töndup Anutugö dop malöhañgöreñ qahö möndöba aiweliköba malök.

⁷ Mewö qahöpmö, nanñak amqeba Anutugö asakmararañi mosöta eta melenđa azi tandök asuhuba welenqegegö kaisongolomñi memba malök.

Mönö gölme azi nanini tandök aka malök.

⁸ Mewö mala uruñi memba et al anğuba Iwiñanğö keu jitñi nalö dop tem köla malök. Mewö maliga gamu qem wañgiba “Maripomnöñ qebin,” jigetmö, nalö mianğöreñ mewöyök tem köl teköyök.

⁹ Mewö tem köla malöhañgöra aka Anutunöñ wañgiriga euyangöreñ öngöba tariga qetbuña wañgiyöhi, mianñon qet tosatñi pakpak enğonğita aködammunñambuk akza.

¹⁰* Anutunöñ qetbuña öngöñgöñji mi kewögöra wañgiyök: Ambazip körek pakpak neñön mönö qet mianğöra aka nalö kunöñ simin köla möpöseim wañgibin. Tosatñan Sup mire euyangöreñ malje. Tosatñan gölmenöñ ki maljin. Tosatñan kömumba uñem mire me senjom mire malje. Neñön mönö körekmakörek mindiriba sipköba simin köl wañgibin.

¹¹ Körek nini simin köl wañgiba numbu nesilam dop Iwi Anutu aukñe göda qebingöra qetñi jim miwikñaiba kewö jibin,

“Jisös Kraistnöñ mönö Kembu ak neñgiza.” Mewö.

Jisösgö asakñi mi ambazip sutñine kondela malme.

¹² Mianğöra wölböt alaurupni, inini mönö Kraistkö söpsöpñi wuatangöba mianğöreñ kude sörauba etme. Nalö dop Anutugö keu tem köla letota malgeri, mianğö dop silik urumelenñ ambazip enğöreñ dop köljawi, mi mönö kapañ köla wuatangöba urugö nup memba malme. Nöñön embuk malali, nalö

* 2:10: Ais 45.23

mianğoreŋ Buŋa keu ölopŋanök köl guliba zen kinda malget. Engömosöta sikep maljalangöreŋ mönö mewöŋanök Anutugö jeŋe sömbuŋinambuk möta jönömŋini unduiga pöndaŋ nup mi mem soroköba malme.

¹³ Anutunöŋ nanŋak mönö iŋini sundan sölölohöba nam köl engiba nanŋi areŋaŋgö dop uruŋini kuŋgumakza. Mewö urusi-himŋini Anutu dop köl waŋgimawaŋgö dop ahuiga inahöm engiiga nupŋi megetka ölni asuhumakŋa.

¹⁴ Galömurupŋini yembuk keu mekömpötak kude aka malme. Jimoŋgot aka urunöŋ ihururuk laŋ kude ahakŋemö, areŋini pakpak mönö uruyahöt ziakpiak mosöta töp memba malme. ¹⁵ *Ahakmemenjanan mönö köpösihitkö keuŋi qahö sarakŋi aka memba malme. Ambazip goŋgoŋi misimkaulup merak gölmenöŋ maljei, iŋini mönö yeŋgö sutŋine Anutugö nahönbörat solan sorokŋi malme. Seŋgelau suepnöŋ eu asarizei, iŋini mönö mewöŋanök gölmenöŋ silik ölopŋi aka mianğön ambazip asarim engiba malme.

¹⁶ Mewö mala malmal köhöikŋaŋgö Buŋa keuŋi töp memba ambazip engibingö jöjöröba malme. Mewö malgetka Kraistnöŋ lilingöba kamawi, nalö mianğoreŋ nöŋgö könaŋamnan aukŋe kewö asuhuma, “Mönahot azinöŋ aonğitnöŋ luhut almangöra ösumŋi qezaköba anakzawi, nöŋön mianğö dop urugö nupköra sile qeba mem köhöiba malal. Mi öne töhöntöhön qahö memba malalmö, ölni asuhuyök.” Könaŋamni mewö asuhuiga ölop nani sileni engöra aka möpöseimam.

¹⁷ Nöŋön malmalni köleŋda tököba engiba Anutugö nupŋi tem köla memba malal. Mewö malbi iŋini uruŋini melenđa Anutu möt narigetka mianğö ölni asuhumakza. Mianğöra Rom gawman yeŋön keuni jim teköba sömbup ewö nuŋguba jöwöwöl ohoho ewö ak niŋgibeak. Silenaŋgö sepnöŋ mewö mokobileŋak ewö, mi mönö o ewö öne töhön qahö gebawak. Engö mötnarip nupŋinaŋgö ölnaŋgöra aka mi mönö aködamunŋambuk ahiga dop kölbawak. Mianğöra nuŋguget kömumbilenakmö, urunan mönö töndup söŋgaimakzal aka körek embuk mohotŋe söŋgaimakin. ¹⁸ Mewöŋanök iŋini tok mönö söŋgaime aka nömbuk köiraŋ ala söŋgaiba malbin. Mewö.

Timoti melaibiga Filipai engöreŋ kama.

¹⁹ Kembu Jisösnöŋ nöŋgöra möri dop kölma ewö, mönö zilaŋ Timoti melaimangö möta jörömqöröm akzal. Engöreŋ kaba denöwö maljei, mi möta lilingöba kaba jii möta nöŋgö imbinan mewöyök ölöwak soroköbawak. ²⁰ Mötnaripŋine köhöize me löwörizei, yaŋön nanŋök engöra waimanjat mewö möta nöŋgö qöhöröŋne kinja. Tosatŋan ki maljei, yeŋön mönö

* **2:15:** Dut 32.5

“Nanɲini manjatɲina,” jiba qahöp mahöp kötöngöm engibingö mörakze. ²¹ Yeɲön körek nanɲinanɲö yuaigöra möta mi köl öröba mem qaribingöra jaram timakzemö, Kraist Jisösgö nupɲan ölnambuk ahakɲapköra qahö kapan kölakze. Mönö gemasolokep laɲ malje.

²² Laɲ maljemö, Timotinöɲ könaɲi ölöpnɲi kondelöhi, mi nanɲinak möt yaköze. Nahönöɲ nanɲi iwiɲi welen qem waɲgimakzawi, yaɲön mönö mianɲö dop ni Ölöwak Buɲa nupkö bauköm niɲgiba malök. ²³ Mianɲöra Rom gawman yeɲön nöngö keu denöwö ak niɲgibingö jöhömei, mi mötagun mönö ölöp Timoti melaibiga zilaɲ engöreɲ kamapkö jörömqröm akzal. ²⁴ Nanak mewöɲanök Kembubuk kinda nalö kude köriiga engöreɲ kamangö awösamkakak mewö möt narizal.

Epafroditus melaibiga Filipai engöreɲ kama.

²⁵ Nöɲön yuai jaruba osiba malbiga eɲön neɲakni Epafroditus melaigetka kaba naɲgöba bauköm niɲgiyök. Yaɲön nöngö qöhöröɲne nup memba bim qeba malökmö, toroqeba jöhöm waɲgibileɲak, mianɲön qahö dop kölbowak. Mewö mötmöriba urumelaɲ alani i nalö kewöɲeyök melaibiga engöreɲ lilingöba kama. ²⁶ Yaɲön körek iɲini engekɲamgö kapan köla malja. Kawöl yöhöi ahöyöhi, iɲini keu mi mötket engöreɲ lömböriiga möta mianɲöra urueret malja. ²⁷ Yaɲön ölna kawölbuk ahöba kömupkö jitɲe ahöyökmö, Anutunöɲ ak kömum waɲgiiga ölöwahök. Anutunöɲ Epafroditus iyök qahö ak kömum waɲgiyökmö, ni mewöyök nehoriba mem amqem niɲgiyök. Yaɲön kömumbawak ewö, nöngö wösöbiriknan mönö sehii qaknöɲ qaknöɲ öngöi malbilenak.

²⁸ Iɲini Epafroditus eka kunbuk söɲgaigetka nöngö wösöbiriknan mewöyök amqemapköra mötzal. Mianɲöra nalö kewöɲeyök zilaɲ melaibiga engöreɲ kama. ²⁹ Iɲini Kembugö ambazipköra önöɲi qahö söɲgaimakzei, sösoɲgai mianɲö qakɲe mönö yaɲön kaiga köl öröm waɲgime aka nup meme ambazip mewöɲi mi mönö göda qem engiba malme. ³⁰ Yaɲön Kraistkö nupköra aka kömupkö jitɲeyök öngöba kömum taköyök. Iɲini ni naɲgöba bauköm niɲgibingö mötketmö, mi osigerangöra yaɲön engö salupɲine mewö ak niɲgimangöra kaba malmalɲi mosöta ayuhum taköyök. Mewö.

3

Solanɲi akingö köna ölnɲi mi kewö:

¹ O urumelaɲ alaurupni, keu kötnɲi kewö toroqeba jiam: Mönö Kembubuk qekötahöba söɲgaiba malme. Keu mi dumɲe kunbuk ohom engimangöra qahö ölan nöhöza. Ambazip tosatɲan tilipköm engibepuköra mi ohom engibiga ölöp

dop kölja. ² Zioz nup meme ambazip bölöñi yeñgöra mönö galömñini memba malme. Yeñön urumelenğö kopa ambazip sutñine liliköba uruñini kuñguba kewö jimakze, “Anutugö buñañi akñegöra mönö aiwesökñi silenine yandime.” Mewö kapañ köla keuyök jiba kiam ewö kohop köla “Könagesö walñi akzin,” jiba öne töhön jimakze.

³ Yeñön Anutugö jeñe qahö diñgize. Silenine aiwesök miyök yandim enğigetmö, ölñan mönö neñgöreñ kewö asuhuyök: Anutugö Buña keuñan urunini mesinñöhi, neñön mönö yanğö urumelenğö könagesö ölbölñi aka maljin. Anutugö qetñe silenine aiwesök al neñgigeri, neñön miangö qakñe qahö kinda tönguba möt narimakzinmö, Kraist Jisösnöñ amöt qem neñgiyöhi, miangöra mönö silenini mem öngömakzin. Anutugö Uña Töröñan inahöm neñgiiga amqeba Anutugö waikñi memba möpöseimakzin.

⁴ Tosatñan sileninanğö yuainöñ tönguba Anutugö buñañi akingö möt narizei, nöñön mönö i enğonğital. Miangöra ölöpñanök korua ewö tererenğöba gingini memba wahöta aiweliköbilenğak. ⁵ *Nöngö aködamuni kewö: Nöñön Israel ambazip kambu uruñe jitñememe kun akzal. Isik bömöni qetñi Benjamin. Iwinamni Hibru ambaziwa. Nöñön yetkörenğök ahuba Hibru azi ölñi akzal. Asuhuba ahöbiga wehön 8 aiga miangöreñ sileni yandiget. Farisi aka malalanğöra Mosesğöreñ Köna keu mi törörök wuatangömamğö kapañ köla malal. ⁶ Farisi mala urunan uturuñgöba könöwiiga urumelenğö könagesö mi ölña sesewerowero ak enğiba malal. Mosesğöreñ Köna keu tem köla wuatangöba diñdiñi akinak ewö, nöñön mönö miangö dop köpösihitkö keuñi qahö solanñi malal.

⁷ Yuai mi mötpi öngöiga miangöreñ tönguba möt nariba malalmö, uruni melenğda mi pakpak mosöta zuen jizal. Nalö kewöñe Kraistnöñ amöt qem niñgii letorali, miangöra mönö mötpi öngömakza. ⁸ Kembuni Kraist Jisös möt kutuba oyaenğoyaenğ akñami, mi möt kewötpiga bohonñi öngöñgöñi ewö akza. Miangöra malmalni walñanğö aködamun yuaini pakpak mi Kraist toroqeba miangöreñ mosöta zuen jizal. Kraist miwikñaiba nöngöreñ yuai pakpak mi mötpiga nesak irip töhön ewö aiga qepureiba andöne gilal.

⁹ Tosatñan “Mosesğöreñ Köna keu tem köl teköba mewö mianñon naninak diñdiñi akin,” jizemö, nöñön dop miangöreñ solanñi kunbuk qahö maljal. Nalö kewöñe Kraist möt naribiga Anutunöñ mewö mianñon keuni jim teköi solaniba maljal. Mötnarip qakñe malbiga Anutunöñ ak kömum niñgiba

* 3:5: Apo 23.6; 26.5; Rom 11.1, 6; Apo 8.3; 22.4; 26.9-11

jim kutuiga siŋgisöndoknaŋgö keuŋan kömuiga maljal. Kraist-puk qekötahöba kinda malbiga Anutunöŋ nöŋgö könaŋamni mewö miwikŋaimapköra kapaŋ kölakzal.

¹⁰ Nöŋön Kraist kewö möt kutumamgöra kapaŋ kölakzal: Sihimbölö möröhaŋgöreŋ yambuk toroqemamgö jöjörözal. Sihimbölö möta kömuyöhi, nöŋön tandök miyöhök kömumba mewö mianöŋ yaŋgö tandök ewö akŋamgö jöjörözal. Kömumba wahöröhi, yaŋgö ösumŋi mianöŋ mönö tilingöm niŋgiiga köhöimamgö mötzal. ¹¹ Kömumbiga Anutunöŋ mem gulim niŋgii kömupnöhök wahötmaŋgö jörömqöröm akzal. Mewö.

Mönö aŋgŋitnöŋ kapaŋ köla tohotnöŋ anme.

¹² Nanaŋgöra kewö qahö jizal, “Anutunöŋ tohot alöhi, miangöreŋ lök kaŋgota urumelenŋö aködamunŋi pakpak miwikŋaiba maljal.” Mewö qahö aka maljalmö, Kraist Jisösnöŋ luhut ala nömeyöhaŋgöra mönö oyaenŋkoyaenŋi buŋa qem aŋgumamgöra kapaŋ kölakzal.

¹³ O urumelenŋ alaurupni, Anutugö tohot miangöreŋ qahö aŋgot teközali, mi mötzal. Mohot kewöya möta ahakzal: Yuai köteköba andö qeali, mi ölum nuŋguiga Anutunöŋ yuai mesoholne ali ahözawi, mönö miangöreŋ göröken ösumnan anmamgö awöweŋgömakzal. ¹⁴ Anutunöŋ euyangöreŋ öŋgömamgö nohola tohotŋi mewö al niŋgiyök. Miangöra Kraist Jisösnöŋ amöt qem niŋgiyöhaŋgöra nöŋön esapesapnöŋ köhöiba luhut ala Anutugö tohotnöŋ aŋgotpiga yaŋön ila jalö nööröpne köl niŋgima. Mi memamgöra awöweŋgöba tohot miangöreŋ göröken diŋdiŋanök uraköba ösumni qezaköba kiŋkiŋgömakzal.

¹⁵ Miangöra urugö aködamuninambuk akzini, Anutunöŋ nini körek mötmöt mohotkö qakŋe Kraist möt kutuba malbingö mötza. Keu kungöra mötmöt imbi murutŋi kun ahöm enŋibawak ewö, Anutunöŋ mönö keu miangöra denöwö mötketka dop köljawi, mi mewöyök jim indel enŋima. ¹⁶ Mewö qahöpmö, enŋöreŋ waimanŋat bohonŋi mi kewö aiga dop kölma: Nini nalö köröpŋi me töröpŋi urunini melenŋda Anutugö könanöŋ mala korini, mönö ahakmemegö köna mohot miyök toroqeba aninga dop kölma.

¹⁷ *O urumelenŋ alaurupni, nöŋön ahakmemeni ahakzali, iŋini mönö ni neka nöŋgö silikni mi wuatangöba malme. Neŋön silik ölöpŋi kondel enŋiinga tosatŋan miangö dop tiba öröm enŋimakzei, iŋini mönö yeŋgöreŋ uba enŋek kutuba malme. ¹⁸ Ambazip kelenmalelenŋ yeŋön ahakmemeninan Kraist kerök ak waŋgiba nanŋini imbi-imbi laŋ malje. Maripomnöŋ kömuyöhi, miangö könaŋi tim koyonŋaniba malje.

* 3:17: 1 Kor 4.16; 11.1

Keu mi nalö gwötpuk janjuj akepuköra jibi mötketmö, nalö kewöje mi sahöta imbilni eriga jizal.

¹⁹ Silenjanangö sihim kömbönañini bölöñan bemñini akza. Yuai gamuñambuk ahakzei, miangöra mötket öngöiga aködamunñina aiga söngöröqök akze. Urumötmöñini gölmegö yuainöñ jöhögetka gwaröhöm engii lañ mala teteköñe könöp sianöñ geme. ²⁰ Yeñön emu gememö, tosatñi neñgö mindimindiri tohoñnini mi Suepnöñ eu ahöza. Gölmenöñ kiannji aka kusukñanök mala Kembu Jisös Kraist Amötqeqe Toninan kunbuk asuhuba neñguanñitmapköra mambörakzin. ²¹ Yanñön neñgöreñ gölme silenini etqeqeñi ki melenñiga nanñi Suep sile asakmararañambukö tandök akña. Kukösum mewöñi mi Kraist ahöm wañgiza. Yanñön kukösum mewöñi mianñön ambazip aka gölme Suepkö öröyuai pakpak mi ölop köhöiba memba et al neñgiiga yanñö nembö bapñe aninga galöm köl neñgiiga malbin. Mewö.

4

Qambañ keu tosatñi

¹ O wölböt alaurupni, mewö asuhumapköra Kembunöñ mönö bauköm engiiga böñ qeba köhöiba kinme. Nöñön engöra ak niñgiiga engekñamgöra kapan kölakzal. Inini sösongai ak niñgiget. Sutñine nup mealangö ölnji asuhui kondelgetka Anutunöñ miangö töwa neñgimawi, miangöra mönö söngöröqök aka söngaimakzal.

² Jitñememe ambi yahöt Yuodia Sintike, etkön jula angururuk aka maljahot, mewö möral. Miangöra nöñön uruñiri kewö kuñguzal: Injiri Kembubuk mohot kinjahot, miangöra mönö urumohot aka malmahot. ³ O neñakni ölnji, nupkö könjöñi mohotñe bisiba maliri, gi mewöyök kewö qesim gihizal: Ambi yahöt mietkön urumohot akñahotköra mönö bauköm etki-man. Yetkön nömbuk Ölöwak Buña köhöiba sehimapköra bim qeba malohot. Yetkön Klemen aka neñakurupni tosatñi yeñgö qöhöröñine mohotñe bim qeba malohot. Tosatñi yeñgö qetñini mi malmal köhöikñangö buk papianöñ eu ahöza.

⁴ Nalö dop mönö Kembubuk kinda söngaiba malme. Söngaimel! keu mi dumñe kunbuk jizal.

⁵ Inini mönö guñböñjönjön qakñe ambazip ak engigetka körekñan tandökñini mi mötme. Kembunöñ lök kamangö dop-dowiza. ⁶ Yuai kungöra mönö könjilij kude möta malmemö, yuai pakpak miangöreñ qeqesiñini mönö Anutugöra jigetka mötma. Mewö me mewö asuhumawi, mönö Anutu köuluköba uleta saiwap jiba malme. ⁷ Anutunöñ uruluai engizawi, nini miangö könañi möt kutubingö osimakzin. Mi mötkutukutunini

pakpak onḡita qainḡi kun akza. Kraist Jisösbuk kingetka Anu-tunöḡ mönö uruḡini aka keu mötmöḡḡini sel jöhöba kölközizip mem enḡiiga malme.

⁸ O urumelenḡ alaurupni, keuni jim tekömamḡö aka qam-baḡ keu kewö jizal: Anḡöjörak keu kude mötmörimemö, yuai pakpak göda qeinga aködahunḡambuk akzawi, uruḡini mönö miangörenḡ jöhöba malme. Keu ölnḡi, keu diḡḡiḡi aka sarakḡi mia mönö mötmöriba malme. Keu ehöhölöḡi sihimn-inan mörakzini, miangön mönö uruḡini kokolak qeiga kinme. Keu ewebibiḡambuk möpömöpösei ahumawaḡö dop akzawi, uruḡini mönö miangörenḡ qekötahöba malme. ⁹ Nöḡö ahak-memeni eka Buḡa keuni möta uru könömḡine ala buḡa qem anḡugeri, iḡini mönö mi köl guliba aka memba malme. Mewö malgetka luai Toḡi Anutu yaḡön embuk kinma. Mewö.

Polnöḡ Filipai yeḡö kalemḡinaḡöra saiwap jiza.

¹⁰ Nöḡön Kembubuk qekötahöba kinda enḡöra uruölöwak ketanḡi mötzal. Iḡini mutuhök ni köyan köla moneḡ niḡgibingö sihim möta malgetmö, denöwö akingö köna jaruba os-iget. Nalö köröpḡi osiba malgetka Kembunöḡ nalö kewöḡe uruḡini mem guliiga amqeba kunbuk bauköm niḡgiget. ¹¹ Silenaḡö lömbötnöḡ tata osibileḡak, miangöra keu ki qahö jizal. Nöḡörenḡ yuai ahözawi, nöḡön mönö miambuk urulu-ainöḡ böḡjöḡ malmamḡö mötzal. ¹² Ni jaram tiba luainöḡ malal aka malmal pomḡi siyoḡsayoḡi qahö mala luainöḡ malal. Miri dop nalö dop uruni böḡjöḡ köli malmamḡö mötzal. Nem timbireḡ akileḡak me bödi (buörö) tatpileḡak, miangöra mönö uruni qahö memba et al anḡumakzal. Yuaini kelenmalelenḡ me boromḡi ahöm niḡgibawak, mi muat. Mönö ölop böḡjöḡ malmam. ¹³ I me wai kun asuhubawak, Kraistnöḡ mem köhöim niḡiiga yuai kunḡan kun mönö qahö memba et al niḡiiga ölop malmam.

¹⁴ Töndup köḡjiliḡni miangö uruḡeyök alabauk aka mem amqem niḡgigetka dop kölök. ¹⁵ *Filipai iḡini mewöyök nöḡö könani möt kömuze. Nöḡön könahiba liliköba Ölöwak Buḡa nup memba embuk Masedonia prowinsnöḡ mala enḡömosörali, nalö miangörenök könahiba mötnarip könagesö tosatḡan ni si-legö yuaininan qahö naḡöm niḡgiget. Nöḡön urugö Buḡa enḡigiba buḡa qem anḡugetmö, silegö likepḡi kun qahö melenḡ niḡgiget. Filipai urumelenḡ könagesö iḡini mohotḡan mönö nömbuk jöhöjöhö aka malmalni naḡögetka naluk moneḡini buḡa qem anḡuba malal.

¹⁶ Nöḡön yuaigöra osiba malali, iḡini mi nöḡöra algetka Tesalonaika sitinöḡ kayök. Indim mohot qahöpmö, indim

* 4:15: 2 Kor 11.9, 16; Apo 17.1

yahöt silenangö yuaigöra osiali, mi algetka nongören kayök. ¹⁷ Engö inap kalemñinanğöra köpösöngöbilenğak, miangöra keu ki qahö ohozal. Anutunöñ engö alabaukñinanğö likepñi melen engimakñawi, nönön mönö öñji mi engören sehimapköra mötzal. ¹⁸ *Enön nalö kewöñe yuai algeri, mi buña qem anguba nongören yuai pakpak miangön mönö dopni onğita gwötpuk ahöm niñgiza. Epafroditus yanön engö alabauk kalemñini memba kaba niñgiiga möriamnambuk aka maljal. Inini naluk kötinñini algetka yanön memba kayöhi, Anutunöñ miangö sihimñi möri ölop dop kölja. Anutunöñ engö nalukñini möt angön köli wöronñi ölopñi umköhökambuk aka yanğö jene pukpuköiga söñgaimakza.

¹⁹ Nongö Anutunan töhötmöriam pakpakö Tonji akza. Yanğö köweñe yuai pakpak mi teteköñi qahö ahöza. Miangöra inini Kraist Jisösbuk qekötahöba kinda yuaigöra osizei, mi pakpak mönö ahöm wanğizawanğö dop engimakña. ²⁰ Miangöra Anutu Iwinini mönö nalö dop möpöseimakin. Mewö ahinga Anutugö qetbuñanjan nalö teteköñi qahö sehimakña. Keu mi öñja.

Yaizözkök teteköñi

²¹ Nönön yaizözkökni alaurup sarakñi Kraist Jisösbuk mohot kinjei, körek engöra albi kaza. Neñakurup nömbuk ki maljei, yeñön yaizözkökñini algetka engören kaza. ²² Anutugören ambazip sarakñi tosatñi pakpak ki maljei, yeñön yaizözkökñini algetka engören kaza. Yeñgörenök tosatñan sisa kiñgö jakömbuak mire nup memakzei, yeñön mönö mewö möta kapañ köla jize.

²³ Kambu Jisös Kraistkö kalem möriamñan mönö embuk ahöm öngöba unañini kötuetkömakña.

* **4:18:** Eks 29.18

Kolosi Kimbi Polnönj Kolosi yengöra Kimbi alök. Jim-asa-asari

Kolosi mi Eisia prowinsgö taon kun. Mi Efesus siti miangöreñök wehön kotkotñe göröken ahöyök. Polnönj Kolosi nalö kungen qahö anökmö, Eisiagö siti ketanji Efesus miangöreñ yambu karöbut Buña nup memba Kolosi yengöra mewöñanök waimanjatñi möta malök. Könangep Kolosi tosatñan uruñini melenget (1.7; Apo 19.10). Polnönj Rom sitigö kösö mire tariga neñakñi Epafras yañön Kolosi urumelen kambugö buzup keuñi memba yañgöreñ kayök. (1.7-8) Kösohotñini tosatñi mi ölopñi aketmö, Kolosi miangöreñ böhi takapulakanji tok malget.

Böhi mienjön ambazip kewö kusum sohom engimalget: “Urumelen könagesö eñön Anutu waikñi membingö köna keu könanji könanji mi ölop wuatangöme. Eñön ölop uruñini memba et ala silenji qeba sihimbölo mötme.” (2.16, 20-21, 23) Toroqeba kewö jim kutum engiget, “Mötnarip eñön mönö simin köla garata waikñini memba malme.” (2.18) Jisös mewöyök mem et al wañgiba kewö jiget, “I Anutugö Nahönñi qahöpmö, garata bohönñi kun.” Mewö jiba kewö toroqeget, “Nengö keunini wuatangömei, yañön mönö mötmöt tölapñi qainñi kun miwikñaime.”

Miangöra Polnönj Kimbi ki ohoba Kolosi urumelen kambu kewö kusum engiyök, “Yuai pakpak mönö Jisösgö bapñe ahöiga yañön Anutu öl töhönñi aka (1.15-17) urumelen kambu nengö Bohonina malja.” (1.18) Toroqeba keu kewö kon-del engiyök, “Kraist Jisös möt narigetka yañön Anutugö mötmöt aka mötkutukutu tölapñi ölop kondel engima. Anutugö mötmötñi mi mötmöt tosatñi pakpak ongita qainñi kun akza.” (2.2-3, 9-10) Polnönj mewöyök urumelen ambazip malmalñanangö jimkutukutu keu tosatñi ohoba al engiyök. (3.1-4.1)

Buk kiangö bahöñi bohönñi 4 mi kewö:

Keu mutukñi 1.1-8

Kraistkö malmalñi aka nupñi 1.9-2.19

Kraistpuk malmal dölokñi 2.20-4.6

Kimbigö keu kötñi bohönñi 4.7-18

¹ Anutunönj Pol ni melaim ningiiga jitñangö dop Kraist Jisösgö aposol akzal. Urumelen alanini Timoti yañön nömbuk tatza.

² O urumelenj alaurupnini saraknji Kolosi taonöj mala Kraistpuk qekötahögetka mötnaripninan qahö sörauiga zen kinjei, nöñön embuk keu eraum mötpingöra kimbi ki ohozal. Anutu Iwininan mönö kalem möriam enggiiga luainöj malme.

Engöra Anutu möpöseiba köulukömakzin.

³⁻⁴ Injini Kraist Jisös pöndañ möt nariba ambazip saraknji pakpak uru könömñinan jöpaköm engimakzei, mianjö keu buzupñi jiget mörin. Mianjöra engöra köulukömakzini, mianjöreñ mönö nalö dop Anutu, Kembunini Jisös Kraistkö Iwini möpöseimakzin. ⁵ Ölöwak Buñagö keu ölnan mutuk engöreñ kaiga jigetka jörömqörömninanjö könañi lök möta möt asariget. Möt asariba Anutunöj engöra yuai ali Suep mire kahaimök ahözawi, injini mi buña qem angubingö al mamböta jörömqöröm akze. Jörömqöröm mianjön nam köl enggiiga amqeba Anutu möt nariba uru jöpaköm anguba maljei, mönö mianjöra möpöseim wañgimakzin.

⁶ Ölöwak Buña keu mianjön sehiba gölmeñi gölmeñi dop köla ölnambuk aka qarimakza. Mianjö dop engöreñ kaiga injini Anutugö kalem möriamñanjö könañi ölni möta möt asariget. Mi mutuhök möt asarigeri, wehön mianjöreñök könahiba engö sutjine mewöñanök ölnambuk aka kötuatköm engimakza. ⁷*Wölböt neñaknini Epafras yanön Kolosi engöra Ölöwak Buña mi kusum enggiiga mötket. Epafras yanön nengö salupnine kinda Kraistkö nupñi pöndañ kapañ köla memakza. ⁸ Uña Töröñan sölölohöm enggiiga jöpaköm angumakzei, Epafrasnöj engö könañamñini mewö eka nini jii mörin.

⁹ Mianjöra buzup keu mi mörini, neñön mewöyök nalö mianjöreñök könahiba engöra Anutu köuluköba mala kotzin. Eñön Anutugö jitsihitñi möt yakögetka mötmöt mianjön uruñini kokolak qemapköra ulet wañgimakzin. Mianjön kokolak qem enggiiga Uña Töröñan mönö sölölohöba mötmöt engimakña. Mewö mianjön mönö ölop Anutugö sihimñi pakpak diñdiñanök möt kutuba malme.

¹⁰ Engöra kewö köulukömakzin: Mötkutukutu mianjön nam köl enggiiga mewö ölop malmalñini Kembangö jeñe dop kölmawanjö dop malme. Jitsihitñi ahözawanjö dop ahakmemenini pakpak aka memba malme. Mewö ölop nup ölopñi könañi könañi pöndañ megetka mianjö ölni asuhumakña. Mötkutukutuñini mewö köl guligetka ölop köhöimakñe aka Anutugö könañi toroqeba möt yaköm soroköba malme.

¹¹ Anutugö kukösumñi mi aködamunñambuk. Mianjö dop nannji ösum-mumuñi pakpak al enggiiga engualöñda mem köhöim engimakñapakköra köulukömakzin. Anutunöj mewö mem köhöim

* 1:7: Kol 4.12; Flm 23

enjiiga ölop köhöiba nalö dop kapan köla urubönjöhönön kinda lömböt möta mökösorjda söngaiba malme. ¹² Söngaiba mala Iwigö saiwap jiba malmegöra köulukömakzal. Iwininan alaurupñi sarakñi neñgöra buña yuaini arengöba ali asakmararañgö uruñe ahöza. Yanön injini mewöyök letotqetot mem enjiiga buñani mi buña qem angumeañgö dop akze.

¹³ Pandamanöñ galöm köl neñgiyöhi, Iwinöñ miangörenök meköba neñgungita kaba wölböt Nahönñangö bemtohon uruñe al neñgiyök. ¹⁴ *Nahönñi yanön sohopnini memba sinjisöndoknini sanjonjda mosötmapkö mörakza. Miangöra mönö saiwap jim wanjimaksin. Keu mi ölna.

Kraistnöñ yuai pakpakö könani aka bohönñi akza.

¹⁵ Kraistnöñ Anutu qahö ehekñi yangö imutñi akza. Möpñangö möpñe malmal pakpak qahö asuhuiga Kraistnöñ mönö mutuhök Iwinjambuk azi bohönña malök. Mewö Iwi Anutu bauköm wanjiiga öroyuai pakpak miwikñaim enjiyotka ahuget.

¹⁶ Nahönñan Anutu bauköm wanjiiga öroyuai pakpak miwikñaim enjiyohot. Yuai tosatñi Suep mirigö jakeni jakeni miangörenj ahögetka qahö engehakzini aka yuai tosatñi gölmenöñ ahögetka engehakzini, mi Kraistnöñ jiiga letotket. Yuai pakpak mi galöm köl engimegöra uña suahö galömñi galömñi miwikñaim enjiiga Suep gölme sutñire jakömbuakñine kinda jimkutukutuñini alakze. Yengö nemböñine pom jembonñini öngöngöñi eretñi mi al enjiiga jakenine kukösumñinambuk kinda tosatñi kembu ak enjimakze. Nahönñan yuai pakpak asuhumapkö bömön jalöñi aiga Anutunöñ miwikñaim enjiyöhi, mi mönö Kraist aködamun miwikñaim wanjimegöra al enji ahöze.

¹⁷ Kraistnöñ mutuhök maligun öroyuai pakpak miangö andöñe asuhuget. Yanön mönö yuai pakpak mindiriba nam köl enjiiga kutulanjöba yangörenj töndangöba kinje. ¹⁸ *Kraistnöñ bömön jalönini akza. Öroyuai pakpak nengö öröm neñgineñgi bohonina aka malmapköra kömupnöhök wahörök. Kömugeri, yengö sutñineyök jitñememenina aka guliba wahörök. Mewö mutukñamnini aiga nini könagesö walñangö zioz dölök-kunñi asuhuba kinjin. Miangöra urugö, silegö, yuai pakpakö nörop bohonini aiga urumelenj könagesö neñön yangö öl kembangan akzin.

¹⁹ Anutunöñ Nahönñi nanñangö dop köröndöñ aka malmapkö möt teköi dop kölök. Miangöra nanñi mötmötñi aka aködamun yuaini pakpak mi körek pakpak Kraistpuk qekötahöba kinjawanjöra körö-ölöwak möta malja. ²⁰ *Öroyuai

* 1:14: Ef 1.7 * 1:18: Ef 1.22-23 * 1:20: Ef 2.16

pakpak gölmenöŋ aka Suepnöŋ Anutubuk kazik ahakzei, Anutunöŋ mi pakpak töwanini ala enġuanġiriga nanġambuk qekötahöba urumohot akŋegöra möta kewö jim teköi dop kölö, “Mönö nani Nahöni melaibi geba maripomnöŋ kömumba sepŋi mokoba luaigö nam köli asuhuma.”

21 Inġini mewöyök mutuk ahakmemeni bölöŋi ahöyöhaŋgöra aka uruŋinan Anutubuk urumohot qahö aka kerök möt waŋgiba tikep malget. 22 Mutuk mewö malgetmö, nalö kewöŋe Anutunöŋ nanġambuk urumohot aka kinmegöra Nahönŋi melaiga gölme silebuk kömumba köl köŋjorat mem enġiyök. Mewö kingetka qewöloŋini saŋgoŋda mala enġuanġita nanġi jeŋe sarakŋi köpösihitkö keuŋini qahö al enġii aŋgotmegöra al mamböta jörömqöröm ahakze.

23 Jörömqöröm ahakzemö, mala anjaŋbanjaŋ köla et enġubapüköra mönö Kraist pöndaŋ möt nariba kinme. Anutunöŋ Ölöwak Bujaŋan tandö kuŋguyöhi, inġini miangö keuŋi mötket. Uruŋinan miangöreŋ nanġöba töndangöba kin köhöiba malme ewö, mönö oyaenġoyaen akŋe. Nini Ölöwak Bujaŋi mi jim sehimakzin. Anutunöŋ ambazip miwikŋaim enġiiga Suep baŋŋe mal anjei, yeŋgö sutŋine mi liliköba jim asariba maljin. Pol nöŋön mewöyök Ölöwak Bujaġö nupŋi mi memba maljal. Mewö.

Polnöŋ zioz kambugö nup denöwö memba malök?

24 Kraistkö ölni mi urumelen könagesö neŋön akzin. Kraistnöŋ neŋgöra aka köŋjilin möriga kitipŋi ahöba urumelen könagesö qaknine öŋgömakzawi, mia Kraistkö ölni bauköm enġimangöra aka silenana meköba möta malakzal. Mewö aiga enġöra aka sihimbölö möta malali, miangöra nalö kewöŋe söŋgaimakzal.

25 Anutunöŋ kuŋgum niŋgiiga urumelen könagesöŋi könagesöŋi welenŋini qeba nup memba maljal. Anutunöŋ kalem möriamŋi ambazip mendeŋ neŋgimangö areŋ alöhi, miangö dop Buja keuŋi körek jim sehim tekömamgöra jiyök. Eŋön ölöwaka köhöimegöra nup al niŋgiyök. 26 Anutunöŋ Buja keu mi möpŋaŋgö möpŋeyök asamböriġa ambazip julkösöŋ aka kömugetka gwölonarökŋi wahöta kömugetka mewö mewö aka mala kota tönpin malget. Malgetka nalöŋi nalöŋi tölapŋe ahöyökmö, nalö kewöŋe könagesöŋi könagesöŋi sarakŋi neŋgöra indel neŋgiiga mötzin.

27 Anutunöŋ kalem möriamŋaŋgö areŋi kewö jiba ali ahöza, “Nöŋön keuni tölapŋi mi nani könagesöurupni enġöra indelbi mötmegöra mötzal. Yeŋön mi möt yaköba anda jim sehiġetka Bujaŋi tölapŋaŋgö aködamunŋan mönö kian kantriŋi kantriŋi yeŋgö sutŋine qariba qetbujaŋambuk akŋa.” Keu kötŋi tölapŋi

mi kewö: Kraistnöŋ engö uruŋine malja ewö, mönö asakmararaŋe aŋgotpingö jörömqörömŋi al engimakŋa.

²⁸ Neŋön Anutugö areŋ miangö dop Kraistkö könaŋi ambazip pakpak engöra jim asariba maljin. Yeŋön körek Kraistpuk qekötahöba kin köhöiba aködamunŋinambuk akŋegöra kusum engimakzin. Mewö enŋuanŋiringa Anutugö jemesoholŋe aŋgotmegöra mötzin. Miangöra mötkutukutunini pakpak qezaköba qambaŋ keuŋi keuŋi engimakzin. ²⁹ Nöŋön miangöra aum-mörimakzal. Kraistnöŋ kukösumŋangö qakŋe solölöhöba inahöm niŋgimawkawi, nöŋön mönö miangö dop bim qeba malakzal. Mewö.

2

Polnöŋ Kolosi yeŋgöra waimanjat mörök.

¹ Nöŋön Kolosi engöra aka bim qeba maljal. Mewöyök Laodisia sitinöŋ maljei aka urumelen alaurup tosatŋan silenangö jemesoholni qahö nekeri, mönö körek yeŋgöra köuluköba gwötpuk aum-mörimakzal. Nöŋön inini miangö könaŋi mötmegöra mötzal.

² Kewö köulukömakzal: Anutu, gi mönö uruŋini naŋgöm enŋinöŋga öröröŋ jöhöba jöpaköm aŋguba mohotŋe urugö aködamunŋini pakpak miwikŋaime. Mi miwikŋaiba ölop köhöiba yuai pakpak möt kutum teköme. Mewö aka ölop Anutugö Buŋa tölapŋi, Kraistkö könaŋi mi körek möt asarim teköme. ³ Anutunöŋ mötmötŋi aka mötkutukutuŋi mi körek Kraistköreŋ ala asamböriga ahöza. Anutu mötkutukutuŋangö köweŋi mi guli dötnam ewö köwe tölapŋe ahöiga Kraistnöŋ miangö kiŋi moröŋi akza. Kraist tem köla mewö miangön ölop mötkutukutuŋi miwikŋaibin.

⁴ Kunŋan mondoqondoroŋ ala kelök keu jiba uruŋini kuŋguba tilipköm enŋibapuköra Kraistköra keu mi jizal. ⁵ Silenan engö kösutŋine qahö maljalmö, urumötmötŋan mönö embuk kinja. Inini köhöiba Kraist möt nariba tem köla sutŋine areŋinaŋgö dop bönjöŋ maljei, engöra mewö möta mötmöriba söŋgaimakzal. Mewö.

Gölmegö mötmötŋan jöhöm enŋibapukö galöm meme keu

⁶ Miangöra inini Kraist Jisös möt aŋgön kölgetka Kembuŋini aka kinjawi, mönö yambuk qekötahömakzeangö dop ahakmemeŋini aka memba malme. ⁷ Keu kusum enŋigeri, miangö dop mönö kesötŋini Kraistköreŋ möndömgöba mendawöla yambuk qekötahöba kinda uruŋini naŋgöm aŋguba mötnaripkö köhököhöiŋi toroqeba miwikŋaiba malme. Saiwapŋini mönö o saksaköba erakzawangö dop jiba möpöseiba malme.

⁸ Ambösakon yeŋön gölmegö mötkutukutu kusum enŋigetka köna walŋi miwikŋaiba tosatŋan mi wuatangömakze. Mewöyök

bem suahö galöm Suep gölme sutñire mala mietkö öröyuainñiri pakpak galöm köl engimakzei, tosatñan Kraist ongita yeñgören qekötahöba keu kusum engimakze. Mewö ahakzei, yeñgörenök kunñan engömembra tilipqilip omani mianğö kösönan jöhöm enğiiga eta böhi miengö bunaya akepuk.

⁹ Anutugö mötmötñi aka aködamun yuainñi pakpak mi körekmakörek Kraistköreñ ahöiga gölme sile memba asuhuyök. Mianğöra böhi takapulakanñi mewöñi yeñgöra mönö galömnini mem anguba malme. ¹⁰ Kraistnöñ uña suahö galöm aka pom jembon pakpak miengö nöröp bohonñini akza. Kraistpuk qekötahögetka yañön Anutugö mötmötñi aka aködamun yuainñi pakpak mi ölop dopñine enğiiga malje.

¹¹ Mewö mala Kraistpuk qekötahögetka yañön aiwesökñi ölni mi engören mewöyök yandim enğiiga malje. Aiwesök mi börönöñ silenine yandimakzeangö dop qahöpmö, Kraistnöñ sile yandiyandi qainñi kun ak enğiyoök. Mi kewö: Yañön silegö ahakmeme walñan galöm köl engibapuköra mönö sihim kömbönañini bölöñi jöhöiga malje. ¹² *Kraistkö qamötñi lömnöñ algeri, engö uru walñan mönö mewö tandöktandök kömumba o melun mianğöreñ kömup lömnöñ geyök. Mewö geyökmö, Anutunöñ Kraist mem guliiga kömupnöhök wahöröhi, yangö kukösumñan mönö inñini mewöñanök inahöba o melun mianğöreñ nam köl enğiiga guliget. Inñini Anutugö kukösumñi mi möt angön köla möt narim wanğigerangöra aka Kraistkö qöhöröñe guliba köhöiba malje.

¹³ *Mutuk kunöñ engö sihim kömbönañini bölöñi mi qahö jöhöiga uru walñinan galöm köl enğiiga malget. Siñgisöndok akerangöra aka uru köhömuñi malgetmö, Kraistpuk qekötahögetka Anutunöñ yangö qöhöröñe mem gulim enğiyoök. Siñgisöndoknini mönö körek sanğon teköiga köhöiba maljin. ¹⁴ *Bölönamnini aka miengö likepñangö jimkutukutuñi mi Suep mire löpöt kimbinöñ ohogetka ahöyök. Kraistnöñ löpöt mi körek pakpak kutuba qeapköyök. Löpöt mianğön Anutubuk kinda andönine qeba tuarenjoñ ak neñgiba ahöyöhi, yañön mi köteköba maripomnöñ kösökoi teköyök.

¹⁵ Maripomnöñ kömumba bem suahö galöm aka uña pom Suep gölme sutñire öröyuai pakpak galöm kölakzei, Kraistnöñ miengö kukösumñini luak jaugem jitñi ewö qeapköba tölököba tözangöm teköyök. Mewö kazikurupñi kösö gwarö memba gamu qem enğiyoök. Mewö aka enğuanğita köirañ ala renduñ köliga qenjarökñe kagetka luhut al enğiyoħangö könañi mi aukñe asuhuiga eket.

* 2:12: Rom 6.4 * 2:13: Ef 2.1-5 * 2:14: Ef 2.15

16 *Kraistnōḡ luhut al enḡiyōhi, miangōra inḡini mōnō Kraistpuk kinda ewebibiḡinambuk saitiḡgit malme. Mewō malgetka enḡō sutḡine kunḡan wani oḡi aka ōlḡi ohoba nemakzei, miangōra ōne dōnḡizizin ala jim kutum enḡibapuk. Yambu (yara) dop kendon kōmbukḡi kun aka kōiḡ dop kōiḡ dōlōkḡi kotzawaḡḡō sōḡḡaipḡi mi alakze me qahō, miangōra ōne jim bōlim enḡibepuk. Sabat kendon mi Sondagienōḡ me silim kunōḡ tarakzei, miangōra ōne mesoholḡine qeba jim enḡibepukōra mōnō galōmḡini mem aḡuba malme. 17 Sōḡḡo mewōḡi miengōra mōnō kezap kude alme. Mi sōpsōp yuaiyōk akze. Ōlḡan dopdowiba imutḡi gilakzawi, miangō dop ōlḡi mi Kraist. Nenegō me kendon tatatkō keuḡi mi Kraistkō sōpsōpḡi aka eretḡi akza. Kraistnōḡ lōk kaiga mala ōne kōna sōpsōpḡi walḡe qekōtahōbepuk.

18 Tosatḡi yeḡḡō sihimḡini mi nanḡini urunini memba et ala Suep garata waikḡini memba bem ewō mōpōseim enḡibingōra ahōza. Mewōyōk jeḡini melenḡi imutimutḡini eka miengōra sōḡḡorōqōk ahakze. Mewō nanḡine gōlmegō mōtmōtḡan kuḡḡum enḡiiga sileḡini ōne tōhōn memba ōḡḡōba tiwokmawok ahakze. Yeḡḡoreḡōk kunḡan tilipkōm enḡiba Kraistkōreḡōk utum enḡibapuk. Mewō mōtnaripkō aonḡitnōḡ luhut qahō ala tōwanḡini qahō membepuk. Miangōra mōnō galōmḡini mem aḡuba malme. 19 *Yeḡōn Kraist nōrōpnini akzawi, yambuk qekōtahōba kinkinḡini mosōta laḡ malje. Kraistnōḡ nōrōpnini aka nanḡi ōlḡi kōrek nini galōm kōl nenḡiiga ōlōp mōsōlatim aḡuba maljin. Sihit toroqeqeḡi aka ginimuramḡi mienḡōn mōnō ōlḡaḡḡō kōna bōrōurupḡi mindiriba jōhōm nenḡigetka kutulaḡḡōba mohot akzin. Mewō aka Anutunōḡ nam kōl nenḡimakzawaḡḡō dop qarim kōhōimakzin.

Kraistpuk kingetka gōlmegō mōtmōtḡan galōm ak enḡibapuk.

20 Inḡini Kraistkōreḡ qekōtahōgetka uru walḡinan kōmuiga bem suahō galōm yeḡḡō kōsō gwarōnōhōk lōk lolohoget. Mienḡōn Suep gōlme sutḡire mala yuainḡi pakpak galōm kōl enḡimakzemō, inḡini qahō galōm kōl enḡigetka malje. Miangōra bōhi takapulakaḡi mewōḡan jimkutukutu laḡ al enḡimakzei, mi mōnō wuanōḡḡōra ōne wuatāḡḡōmakze? Suepkō buḡaya akzemō, tōndup gōlmegō keuya wuatāḡḡōgetka siksauk ahakza.

21 Sōḡḡonḡini kewō alakze, “Mi kude gōjupkōba meman. Kun mi kude yōhōsōrōman. Yuai mi kude misiriman.” 22 Gōlme ambazipnōḡ nanḡini nōrōpḡinan mewō jim kutuba tosatḡi kusum enḡimakzemō, Anutunōḡ mewō qahō. Yaḡōn yuai pakpak mi lōkḡanōk aka mēbingōra jiiga nupḡini enḡigetka qahōwakḡegōra ali ahōze.

* 2:16: Rom 14.1-6 * 2:19: Ef 4.16

²³ Mi töndup tosatñan bem suahö galöm aka garata waikñini memba bem ewö möpöseim engimegöra kapan kölakze. Mi kapan köla “Nanini urunini memba eta aljin,” jiba mianğöreñ möndöba silegö sihim kömbönañini bölöñan galöm köl engibapuköra sonğonji sonğonji ala silenini qeba qölsihim anğumakze. Mewö aka jimkutukutuñini alakzei, mi mönö mötkutukutu qakñe alalñangö tandök aiga gwötpukñan mi möta mötket öngömakza. Öngömakzapmö, mi töndup mewö silegö sihim kömbönañini bölöñi anğön kölbingö osiba mi lan wuatangömakze. Mianğöra jimkutukutuñini mienön mönö yuai omanji kötökñi akze. Mewö.

3

Kraistnöñ malmal dölökñe malbingö ösumñi neñgimakza.

¹ *Kraistnöñ euyangöreñ öngöba Anutugö böröñi ölñangö jakömbuak jakenji memba qetbuñambuk tatza. Anutunöñ Kraist mem gulim wañgiyöhi, mianğö tandök injini mewöyök mem gulim engiiga köhömuñeyök wahöta malje. Mianğöra injini Suep mire eu öroyuai ahözawi, uruñini mönö mianğöreñ jöhöba malme.

² Gölmegö öroyuaigöreñ qahöpmö, euyangöreñ öroyuai ahözawi, uruñini mönö mianğöreñ jöhöm köhöiba malme.

³ Engö uruñini walñan mönö kömuiga Anutugöreñ tönğuba malje. Mewö Anutugö aumñe anda malmal köhöikñangö könañi miwikñaget. Kraistnöñ Suep malmal tölapñe maljawi, engö urumalmalñinan mönö mianğö dop asa-asambötñe ahöza. Mianğöra uruñini mönö Kraistpuk jöhöba malme. ⁴ Kraist malmal köhöikñangö Toninan kunbuk kaiga asakmararañan asuhumawi, nalö mianğöreñ injini mönö mewöyök asuhugetka enğuanğiriga yambuk Anutugö asakmararañe anğotme.

Uru walñi aka uru dölökñi awöranğözahot.

⁵ Gölmegö sihim kömbönañini bölöñi könañi könañi mi uruñine kinda yayasenñeñ mem engimakzei, miengö nööröñini mönö körek tözangöm teköme. Bau kiam tandök serowilin aka qewölon anğöjörakñambuk mi mönö andö qeme. Urusilegö sihim kömbönañi bölöñi mi mosöta urukönöp bölöñi mi mönö qömbökögetka bököma. Yuai membagun memböngö nepaqepalok köpösöngömakzei, mianğön tandö lopion waikñini memba möpöseim engizeanğö tandökñi akza. ⁶ Mi akerañğöra aka Anutugö irimñan seholiiga urukazikñi qakñine ali öngömakza.

* 3:1: Sum 110.1

⁷ Sihim kömbönanjini bölöñi mewöñan mönö mutuk nanjini malmalñini mewöyök galöm köliga köna bölöñi mi tiba wu-atanğöba maljema.

⁸ Mewö malgetmö, nalö kewöñe injini mewöyök yuai kewöñi pakpak mi mönö gilget anma: Urusingok möta urukönöpnöñ jula engohoiga uruñinan auba urubölö mötzemö, mi uzeta gilget anma. Mewöyök uruqeçe keu töhöreñ aka keu anğöjörakñambuk jiba uruñini tölöhozei, mi mönö körek andö qeba mosötme. ⁹ *Injini uru walñi aka mianğö ahakmeme anğöjörakñambuk mi köteköba mem kömumba malje ewö, keu muneñi mönö kude eraum mötme.

¹⁰ *Injini uru walñi köteköba kunbuk letota uru dölökñi löngöta malje. Miwimiwikñai Toninan nanñi könañi möt teköm wañgibingöra söpsöp alöhi, yañön mönö mianğö dop uru dölökñi mi letot wañgiiga toroqeba kölöñaimakza. ¹¹ Mianğöra nini Juda me kantri tosatñanğö ambazip maljini, mi mönö dop mohot akza. Anutugö aiwesökñi silenine yandiget me qahö, mi töndup Anutugö jeñe dop mohot akzin. Taon ambazip mötmötninambuk me qandam (bus kanaka) mala nanjini keuñine irohowaroho jiba gukmaulem maljei, mi töndup Kraistnöñ urunine kiniga mohot akzin. Nanini nupnini memakzin me toninanğö welenñini töwañi qahö qemakzini, mianğön yuai korembenñi akzapmö, ölbölñi mi Kraist. Yañön kutulanğöba körek nenğonğita öngöba Kin Kembunini bohonñi mohot akza.

¹² *Anutunöñ möwölöhöm enjiiga uru dölökñi wuatanğöba Anutugö wölböt alaurupñi sarakñi akze. Mianğöra injini mönö sutñine ak kömumba ala ak anğuba malme. Uruñini memba et ala tosatñi guñböñjönjön qakñe ak engiba lömböt möta mököşönđa malme. Silik mianğön mönö malukuñini aiga kölget geiga mi töp memba malme.

¹³ *Mönö lolongöba bölöñanğö kitipñi kude mememö, mönö qaqaengim anğuba malme. Köyan köl anğugetka sutñine keu köpösihit ahuiga kunñan alañi jim wañgimamğö mötzawi, mi mönö mosöt anğume. Kembunöñ siñgisöndokñini sanğonđa mosöröhi, injini mönö sutñine mewöñanök ak anğumakñe. ¹⁴ Mewö aka urukalemgö malukuñini mi kölget geiga mianğö qakñe mönö urukalem aka jöpaköm anğugetka qetpuk akña. Urukalem mianğön mönö aködamun tosatñi pakpaköra jizali, mi köyamğöba mindiriba bohonñina kinja.

¹⁵ Kraistnöñ injini luainöñ silemohot malmegöra engoholök. Mianğöra yanğö luainan mönö uruñine ahöba ölöpnanğö injup lökuatñi ak enjiiga urubönjönjön jim möpöseip aka malme.

* 3:9: Ef 4.22 * 3:10: Jen 1.26; Ef 4.24 * 3:12: Ef 4.2 * 3:13: Ef 4.32

16 *Kraistköreñ Buña keu mianjõn mönõ urujine kinda sutjine gwõtputuk asuhum sehima. Mönõ mötkutukutu keu pakpak jiba kusum anğuba qambañ qem anğumakñe. Uña Törõñan sölölöhöm enğimakzawañgõ dop mönõ Buña Liñet Sumbara (Sam), möpömöpõsei liñet (omsa) aka urugõ liñet tosatñi mi urukõnõmñinan Anutu möpõseiba kólakñe. 17 Ahakmeme mi me mi jitrõñ me siliknõñ aka memei, mi pakpak mönõ Kembu Jisõsgõ qetñe ahakñe. Mewõ aketka Kraistnõñ nam kól enğiiga Iwi Anutu pipsimbawoñ jim wañgiba malme. Mewõ.

Awanõm, iwinam aka welenqeçe enğöreñ qambañ keu

18 *Ambi iñini mönõ apurupñini yengõ keu bapñe anda malme. Kembugõ buñaya akzeañgõra mönõ mewõ aketka dop kólma.

19 *Azi iñini mönõ anõmurupñini urukalemnõñ jõpakõm enğiba urupik wõsõkömbuk qakñe kude ak enğiba malme.

20 *Nahõnbõrat iñini Kembubuk qekõtahõba kinda iwinamyahõtñini yetkõ jitrñiri wuatangõgetka Kembunõñ engehiga dop kólma. Mianğõra iñini mönõ keuñini jimeañgõ dop pakpak tem kól enğiba malme.

21 *Iwiurup enğõ nahõnbõraturupñinan awõsamkakakñini mosõtpepukõra mönõ kude enğum ureim ak enğiba malme.

22 *Welenqeçe iñini mönõ gólme qakñe galõmurupñini yengõ keuñini pakpak tem kõla ahakñe. Köñdõwoñ aketka ambazipnõñ engek sorimegõra qahõpmõ, geñmoñ mosõta Kembugõ jitrñi oñgitpinbukõ sömbuñini möta urujini nupnõñ ala memba malme. 23 Yuai aka memakñei, urujini mönõ mianğõreñ jõhõba kewõ mötmõrime: Gólme ambaziwõk qahõpmõ, Kembu nannji mönõ welen qeba malje.

24 Kembu Kraist welenni qeba malgetka yañõn tõwañini Suep mire ali ahõzawi, mi mönõ enğiiga buñañini akña. Mönõ mewõ mötmõriba malme. 25 *Kunñan nupñi mem sohomawi, Anutunõñ mewõñanõk mem sohosohonangõ likepñi melen wañgima. Anutunõñ tosatñi qahõ engek soriba tosatñi qahõ qepureim enğimakzapmõ, körek nini dop mohotnõñ kewõt neñgiba keunini jim tekõma.

4

1 *Galõmurup enğöreñ Kembu ketañi mi Suep mire malja, mi möt kutuzeañgõra mönõ welenqeçeaurupñini titit diñdiñi aka dop mohot ak enğiba malme. Mewõ.

Goro qambañ keu tosatñi

* 3:16: Ef 5.19-20 * 3:18: Ef 5.22; 1 Pitõ 3.1 * 3:19: Ef 5.25; 1 Pitõ 3.7

* 3:20: Ef 6.1 * 3:21: Ef 6.4 * 3:22: Ef 6.5-8 * 3:25: Dut 10.17; Ef 6.9

* 4:1: Ef 6.9

² Kōuluk nup mōnō kapan kōla memba malme. Mianğōren mōnō uruguliguli mala jim mōpōseip aka malme. ³ Mōpōseip akreji, mianğōren mōnō neᅅgō mohotᅅe kewō kōulukōba malme, “Anutu, gi mōnō Pol neᅅakurupᅅi kōna mem enᅅinōᅅga ölop Kraistkō Buᅅa keu tōlapᅅi mi jim asarigetka sehima.” Nōᅅōn mōnō Buᅅa nup mianğōra aka kōsō gwarōnōᅅ tatzal. ⁴ Nōᅅōn Buᅅa keu Anutugō sihimᅅaᅅgō dop jibi asarimegōra mōnō kōulukᅅinan tōᅅgum niᅅgiba malme.

⁵ *Ambazip urumelen ᅅahō aka yaigep maljei, i mōnō mōtkutukutu ᅅaᅅᅅe ak enᅅiba malme. Urugō nup memb- ingō kōna kun ahumawi, nalō mi mōnō kude mōsōhōba ayuhumemō, ambazip ᅅōhōrōᅅine anda ösōᅅ ᅅamban kōl enᅅime. ⁶ Keu eraum mōtmei, mi mōnō nalō dop howeᅅambuk mindiriba jigetka nahōmᅅambuk ahakᅅa. Jigetka mohot mohot nahōmᅅini ahuiga kōrek yeᅅgōra keu denōwō melen enᅅime, mi mōnō ölop mōt yakōba mianᅅgō dop jimakᅅe. Mewō.

Polnōᅅ Tikikus Onesimus melaim etkiiga kamahot.

⁷ *Wōlbōt alani Tikikus yaᅅōn Kembubuk ᅅekōtahōba kinda nōmbuk nupᅅi tōrōrōk memba neᅅakni akza. Yaᅅōn enᅅōren kaba denōwō aka malakzali, mianᅅgō kōsohotᅅi kōrek jii mōtme. ⁸ Denōwō aka memba tata maljini, iᅅini mōnō kōsohot mi mōtmegōra melaim waᅅᅅibiga enᅅōren kama. Yaᅅōn kaba ölop urukōlalep ak enᅅima. ⁹ *Mewōyōk wōlbōt alanini Onesimus Kolosi enᅅōrenōk kaba Kembangō keuᅅi pōndaᅅ wuatangōba mem yakōmakzawi, nōᅅōn i melaibiga lilingōba kama. Azi yahōt mietkōn kaba kianᅅōren yuai pakpak denōwō asuhui maljini, mianᅅgō kōsohotᅅi ölop jim tekōyohotka mōtme. Mewō.

Yaizōkzōk keu tetekōᅅi

¹⁰ *Aristarkus nōmbuk kōsō mire tatzawi aka Barnabasgō numbutᅅi Mak yetkōn yaizōkzōkᅅiri jiba alohotka enᅅōren kaza. Makōra lōk keuni kewō jim kutubiga mōtket: Enᅅōren kaba kaᅅgotma ewō, mōnō ölop kōl örōba ala ak waᅅᅅime. ¹¹ Josua ᅅetᅅi kun Jastus ᅅetzei, yaᅅōn mewōyōk yaizōkzōkᅅi jiba ali enᅅōren kaza. Neᅅakurupᅅan nōmbuk Anutugō be- mtōhoᅅaᅅgō nup memba maljei, yeᅅᅅō sutᅅine azi karōbut mienᅅōnōk Juda asia malje. Yeᅅōn mōnō urukōlalep ak niᅅᅅimalget.

¹² *Nanᅅine azi Epafras Kraist Jisōs welenᅅi ᅅemakzawi, yaᅅōn mōnō yaizōkzōkᅅi jiba aliga enᅅōren kaza. Yaᅅōn nalō dop enᅅōra aka kōulukōmakza. Keu pakpak Anutugō

* 4:5: Ef 5.16 * 4:7: Apo 20.4; 2 Tim 4.12; Ef 6.21-22 * 4:9: Flm 10-12

* 4:10: Apo 19.29; 27.2; Flm 24; Apo 12.12, 25; 13.13; 15.37-39 * 4:12: Kol 1.7; Flm 23

jitɲaŋgö dop akzawi, iɲini mianɲgöreɲ tøndangöba kin köhöiba aködämunɲinambuk aka malmegöra aum-mörimakza. ¹³ Nöɲön yaŋgö könaɲi möta kewö naŋgöba jizal: Yaɲön iɲini bauköm enɲimamgöra nup gwötpuk memakza. Mewöyök Laodisia aka Hierapolis taon yahöt mianɲgöreɲ möt nariba maljei, yeŋgöra aka wani awamɲi nup memba aum-mörimakza. ¹⁴ *Wölböt doktanini Luk aka Demas yetkөн mewöyök yaizözköɲini jiba alohotka enɲöreɲ kaza.

¹⁵ Nöɲön yaizözköɲini jiba ohozali, mi mönö urumelen alaurup Laodisia taonöɲ maljei, yeŋgöra jiget mötme. Mewöyök Nimfa aka yaŋgö mire könaɲesö tokomakzei, mönö yeŋgöra jiget mötme. ¹⁶ Kimbi ki oyoɲ enɲigetka mötket teköiga mianɲgö andöɲe mi mönö algetka Laodisia urumelen könaɲesö yeŋgöreɲ aniga oyoɲme. Laodisia yeŋgöra kimbi kun ohobiga anöhi, mi alget enɲöreɲ kaiga iɲini mi mewöyök oyoɲme. ¹⁷ Arkipus azi mi mönö kewö jigetka mötma, “Kembunöɲ Buɲa nup memangö jim kutuba köiputki tariga maljani, göɲön mönö mi mötmöriba körek mem teköman.”

¹⁸ Pol nöɲön yaizözkökni jiba nane börönan qetni kewö ohozal: Pol. Iɲini mönö kösö gwarö azi ni mötmörim niɲgiba malme. Kalem möriamnöɲ mönö embuk ahöma. Mewö.

* **4:14:** 2 Tim 4.10, 11; Flm 24; Flm 2

Tesalonaika Kimbi 1

Polnõj Tesalonaika yengöra Kimbi mutukji alök. Jim-asa-asari

Rom mindimindiri kantrigö prowins qetji Masedonia miangö siti bohonji mi Tesalonaika. Polnõj misin nup memba liliköba Filipai siti mosöta Tesalonaika kaba nup meiga tosatjan urunini melengetka kusum engii urumelen kambu alget. Mi algetmö, tuarenjon mi miangörenök asuhuyök. Polnõj Kraistkören Buña keu jim asariba urunini kunguiga miangören Grik ambazip Juda akeri, yengörenök gwötpukjan urunini melengetka kambu miangön sehiyök. Miangöra Juda ambazip urunini qahö melennda uruninan böliiga Pol andö qem wangiget. Andö qem wangigerangöra lömböriiga köna jaruba engömosöta Berea taonõj anök. Könanjep Korint sitinõj maliga nejakji Timotinõj alabaukji aka Tesalonaika sitiyök kaba denöwö möt narigeri, miangö kösohotji ali mörök.

Polnõj Kimbinji mutukji Tesalonaika alöhi, mi Kraistkö alaurupji yengö urunini nangöba mötnaripjini mem köhöimapköra ohoyök. Kembu möt nariba urukalem ak anjumakzei, miangö buzupji mötagun yengöra Anutu möpöseiza. Nannjak malmal yembuk denöwö aka malöhi, mia ölum engubapuköra mi papianõj ohoza. Tesalonaika urumelen kambu sutjine keu tosatji asuhui jigeri, Polnõj mi melennda jim asariba ohoza. Keu tosatji mi kewö: Kraistnõj lilingöba kaiga Suep malmalnõj angotpini, miangören tosatjan urunini melennda kömupnõj ahözei, yengöra mönö denöwö asuhuma? Kraistnõj wani nalönõj lilingöba kama? Keu mi melennda kewö jim kutum engiyök, "Injini Kraist kunbuk kamapkö jörömqöröm aka al mamböta mala miangören mönö nup ölöpji ölöpji mi jegep kinda pöndan memba malme."

Buk kiangö bahöji bohonji 6 mi kewö:

Keu mutukji 1.1

Saiwap jiba söngaiba möpöseiza 1.2-3.13

Ahakmeme dinjinji akjegö kunjum engiza 4.1-12

Kraistnõj kamapkö keunji kusum engiza 4.13-5.11

Qamban keu teteköji tosatji 5.12-22

Kimbigö keu kötji bohonji 5.22-28

1*Pol, Sailas, Timoti nejon Tesalonaika urumelen könagesö embuk keu eraum mötpingöra kimbi ki ohozin.

* 1:1: Apo 17.1

Injini Iwi Anutu aka Kembu Jisös Kraist yetpuk qekötahöba kingetka yetkön mönö kalem möriam engiyohotka luainöŋ malme.

Mötnarip köl gulizeaŋgöra söŋgaizin.

² Neŋön qösösök mötmörim engiba körek engöra “Anutu pipsaiwap!” jiba möpöseimakzin aka köuluk nup memba miangöreŋ nalö dop qetŋini qerakzin. ³ Injini Jisös Kraist jöpaköba möt narigetka urukalemŋan nam köl engiiga nupŋi köhöiba memakze aka Kembuninan lilingöba kamapkö jörömqöröm aka kapan köla mambörakze. Neŋön mi pakpak Anutu Iwininaŋgö jemesoholŋe ölop mötmörimakzin.

⁴ Urumeleŋ alaurupnini, Anutunöŋ jöpaköm engiba injini nanŋaŋgöra kewö möwölöhöm engiyöhi, mi mötzin. ⁵ Neŋön Jisösgö Ölöwak Buŋaŋi memba engöreŋ kaba sutŋine denöwö aka malini, injini mi mötze. Neŋön Buŋa mi keu töhönök qahö jün mötketmö, Uŋa Töröŋan mönö sölölohöm neŋgi awösamakak kinda ösum-mumuŋambuk uruŋini kuŋguba malin. ⁶ *Mewö malinga injini köŋjiliŋ ketaŋaŋgö uruŋe mala Buŋa keu möt aŋgön kölget. Mi aŋgö kölgetka Uŋa Töröŋan sösoŋgai engiiga Kembu aka neŋgö siliknini wuatangöba malje. Mi denöwö asuhuyöhi, neŋön mi ölop mötzin. ⁷ Mewö andönine kaba mala Masedonia Akaia prowins yahöt miangöreŋ Jisös möt narizei, körek pakpak yengöra silik ölopŋi kondel engimakze.

⁸ Mi kewö: Injini Kembugöreŋ keu möta aŋgön köla jiba malgetka tosatŋan mi aŋgötömual ewö toroqeba jim sehigetka anök. Anda mala Masedonia aka Akaia prowins yahöt mi dop köl teköyök. Mi dop köl teköyökmö, miyök qahö. Injini Anutu möt nariba nupŋi megeri, miangö ölnan mönö gölme dop anda kaba sehiiga gwötpukŋan uruŋini melenget. Mi kilik-kalukŋi qahö. Miangöra nini miangö keuŋi kun qahö toroqeba jibin.

⁹ Nini engöreŋ kainga denöwö asuhuyöhi, miangö kösohotŋi mi miri tosatŋi yeŋön jigetka aŋgötömual ewö mörakzin. Injini tandö lopioŋ aka bem munenŋi andö enguba Anutu ölbölŋi aka malmal Toŋi yangöreŋ melenŋa nupŋi memba malje. ¹⁰ Anutunöŋ Nahönŋi mem gulii kömupnöhök wahöröhi, injini yaŋön Suep mireyök eta asuhumapköra mambörakze. Anutugö irimsesewölŋan könaŋgep aukŋe asuhuiga Jisösnöŋ mönö eta jeŋberereŋ kanjamŋambuk miangöreŋök meköm neŋgima. Mewö.

2

Polnöŋ Tesalonaika uruŋe nup denöwö meyök?

* 1:6: Apo 17.5-9

1 O urumelen alaurupnini, nini engören kaba nup meini, mianjon mönō qahō pömsöm qeyökmö, ölni ölop asuhuyök. Nanjinak mi mewöyök ölop mötze. 2* Qahō pömsöm qeyökmö, mutuk Filipai sitinön nup meinga öröm ureim ak nenjigetka sihimbölö mörini, mi mötze. Sihimbölö mi mötagun engören kainga tosatñan tuarenjon köhöikñi ak nenjigetmö, mi töndup Anutunön awösamkakak nenjii kinda Ölöwak Buñaji jim asarim engiba malin.

3 Nenjö könanini kewö: Urukunjugunju keunini mi isimkakalek qakñe qahō jimakzin. Naninak janjuñ ahinga uruninan tölöhobawak, mewö mi qahō jimakzin. 4 Mewö qahöpmö, Anutunön Ölöwak Buña jim sehibingöra nenjeka urunini kewöri dop köliga möt narim nenjiba Buñaji nenjiyöhi, mianjö dop mönō keunji memba jim asarimakzin. Anutunön urunini esapköba kewörakza. Mianjöra nenjon yuai pakpak Anutugö jeñe dop kölbindingöra ahakzin. Mi ambazip sihimñini wuatangöbingöra aka qahö. 5 Nenjon nalö kungen ambazip kelewele keu kelök ak engibingöra qahö anda kaini, mi mötze. Nini nepaqepalok dogonini esuhuba moneñ yuai nenjimegö möndömöndö keu siñinñi qahö jiiñ. Anutunön könañamnini mi ölop jim nanjöma. 6 Enjon me ambazip tosatñan qetbuña nenjimegöra qahö kapan köla malin.

7 Kraistkö aposolurupñi akzinañgöra ölop uruñini kewö kunjubinak, "Injini mönō nanjöm nenjigetka sutñine urugö nup membin." Mewö jiiñga dop kölbawakmö, nenjon engö sutñine mököqököli aka malin. Nahönbörat namñinan juzu engiba köyan köl engimakzawi, mianjö dop mönō nanini memba et al añguba ösön ak engiba malin. 8 Nenjon iwinam ewö mökökölüm ak engiba malinañgöra Anutugören Ölöwak Buña enjiin aka toroqeba nanine malmalnini mewöyök kölen engibingö jöjöröba malin. Injini ölna wölböt nahönböraturupnini aket.

9 O urumelen alaurupnini, nenjon engöra aka nup memba silenini qeba malini, mönō mi mötmörime. Nanjöm nenjimegö lömbötñan engörenök kungö qakñe öngöbapuköra sunjem asak nanine börönanan nup memba Anutugö Ölöwak Buñaji jim asarim engiba malin. Mi mönō ölüm engubapuk.

10 Jisös möt narizei, nenjon engö keunini pakpak diñdiñanök kewöta sarakñi köpösihitkö keunini qahö malin. Injini mi eka möta nanjöba jim nanjömeañgö dop akze. Anutunön mewöyök mi jim nanjöba dangunu ewö kinja. 11 Iwinön nanñi nahönböraturupñi ösön ak engimakzawi, mianjö dop nenjon injini mohot mohot ak engiba malin. Mi mewöñanök ölop

* 2:2: Apo 16.19-24; 17.1-9, 14; Apo 17.5

mötze. ¹² Neñön urugö nanğönanğö keu jiba urukölalep ak enğiba malin. Anutunöñ inini nanñe bemtohoññöñ anğota asakmararañe asarimeğöra enğoholök. Mianğöra neñön uruñini kuñguba keu kewö jim tuariba malin, “Ahakmemenñini mönö Anutugö jeñe dop kölmawanğö dop sarak sorokñi aka memba malme.”

¹³ Mianğöra neñön mewöyök sundan Anutu kewögöra möpöseimakzin: Anutugö Buña keu enğiini, mi gölme ambazipkö keu ewö qahö buña qem anğugetmö, öñña Anutugö keu jtkö dowa möta mi anğön kölget. Mi möt narigetka mianñön mönö kölönaim enğiiga letorakze. ¹⁴ Juda ambazip Judia prowinsnöñ uruñini melengetka Juda tosatñan anğösirip ak enğigetka sihimbölö mötket. Yeñön mi möta töndup Kraist Jisösbuk qekötahöba kinda Anutugö urumelen könagesöñi aket. Urumelen alaurupnini, enğö sutñine mönö mewöñanök asuhuyök: Nanñini Grik ambazipnöñ Juda yeñgö tandök ewö ak enğigetka inini sihimbölö öröröñ möta Anutugö könagesöñi aket.

¹⁵ *Juda yeñön kezapqetok ambazip enğuget kömugetka Kembu Jisös mewöyök qegetka kömui nini sesewerowero ak neñgiba malget. Yeñön Anutugö jeñe qahö dop köla ambazip pampak kerök ak neñgimakze. ¹⁶ Neñön kian kantri enñön uruñini melenđa letotmegöra Buña jibinbukö anğön köl neñgimakze. Mewö siñgisöndok sundan aka qerakögetka qakñine öngömakza. Siñgisöndokñini qerakögetka dopñi Anutugö jeñe kokolak qeiga irimsesewölñi toroqeba anğön kölmamğö osiba nalö kewöñe kondeli qakñine lök öngöza. Mewö.

Polnöñ Tesalonaika kunbuk anmamğö mörök.

¹⁷ O urumelen alaurupnini, neñön nalö kewöñe nalö töröpñi denđa maljin. Sileninan denđa maljinmö, uruninan jöhöba mohotñe maljin. Mianğöra enğö jesöñğöröñini ekingöra mönö kapan köla awöwenğöba maljin. ¹⁸ Mianğöra enğören kabingö möta malin. Pol nöñön sömañ mohot-töp qahöpmö, indimñi yahöt kamamğö esapköyalmö, Satanöñ jöhöm neñgiiga osiin. ¹⁹ Inini nanine ila jalö soroknini ewö kinje. Kembunini Jisösnöñ lilingöba kaiga yanğö jemesoholñe anğota kinbini, mianğören enğeka “Urugö nup önewat qahö memba malin,” mewö jibingö mötzin. Neñön keu mi inini aka tosatñi yeñgöra aka awamñanök jibingö jörömqöröm akzin. Mianğöra enğöra önöñi qahö söñgaiba silenini memba öngömakzin. ²⁰ Neñön enğöra aka qetbuña miwikñaininga sösoñgai ak neñgimakze. Mewö.

* 2:15: Apo 9.23, 29; 13.45, 50; 14.2, 5, 19; 17.5, 13; 18.12

3

Timoti melaiyohotka Tesalonaika anök.

¹ *Inini denöwö aka maljei, mi mötpingö mötkurumkurum ketanji ak bibihiba toroqeba öne malbingö osiin. Mianğöra nanirök Atens sitinöŋ malbitkö keu jöhöba ² alaniri Timoti melaiziga engören kayök. Yanön Anutugö nup memba netpuk Kraistkö Ölöwak Buŋa jim sehimakza. Yanön uru nanğönanğö keu engiba mötnaripŋini mem köhöimapköra kayök. ³ Anutunöŋ arenini jim teköiga tosatŋan anğösirip ak engimakze, mi nanŋinak ölop mötze. Engörenök kunŋan könjiliŋ uruŋe koŋgwarak aka löwöribapüköra jiinga kayök.

⁴ Neŋön Tesalonaika embuk mala nalö mianğören engöra qeljiŋe keu kewö jiin, “Kembugö jitsihitŋi tem kölinga ambazipnöŋ sesewerowero ak neŋgigetka wahöjalin miwikŋaibin.” Mewö jiinga mianğö dop ölŋa asuhuyöhi, mi ölop mötze. ⁵ Mewö asuhuiga esapesap Toŋan esapköm enğii löwöriba etketka nupninanğö ölŋan eta pömsöm qebapuk. Mianğöra denöwö möt nariba maljei, mi mötpingö mötkurumkurum ketanji ahin lömbörri kunbuk öne malmamğö osiba Timoti melaibiga qesiba mötmamğöra kayök. Mewö.

Timotinöŋ kösohotŋini ali möt ölöwahin.

⁶ *Mötkurumkurum aka malinmö, Timotinöŋ anda engömosöta lilingöba kaba buŋanini ölopŋi memba kaba kewö jiyök: Inini Kembu ölop möt nariba urukalem ak anğumakze aka nalö dop neŋgöra mötmöriba ölöwahakze. Neŋön enğekingö sihimŋi möringa enön mewöyök nini neŋgekingö kapan kölakze.

⁷ O urumelen alaurupnini, neŋön sesewerowero könjiliŋ könaŋi könaŋi möringa nalö mianğören kaba möt narizeanğö kösohotŋi ölopŋi jii mötziga keu mianön mönö ölŋa urukölalep ak neŋgiyök. Mianğöra nalö kewöŋe engöra aka amqeba lu-ainöŋ ölöwaka maljin. ⁸ Inini Kembubuk qekötahöba böŋ qeba kinmeanğöra neŋön mönö ölŋa köhöiba maljin. ⁹ Engöra aka Anutugö jemesoholŋe önöŋi qahö söŋgaimakzini, söŋgai pak-pak mianğöra mönö denöwö Anutu möpöseiba saiwap jiinga dopŋe akawak?

¹⁰ Neŋön suŋgem asak urunini qezaköba kapan köla kewö köulukömakzin, ‘Anutu, mönö bauköm neŋginöŋga Tesalonaika anda jesöŋgöronŋini eka mutulanğöba mötnaripŋinanğö yuaigöra osizei, mönö mi enğibin. Keu mi ölŋa.’

¹¹ Mewö köuluköingä Anutu Iwinini nanŋi aka Kembunini Jisös yetkön mönö köna mesat neŋgiyohotka ölop engören kabin. ¹² Toroqeba kewö köulukömakzin, ‘Nini urukalem önöŋi

qahö ak enġimakzini, Kembu göñön mönö urukalemgi toroqeba kondel enġinönnga sutñine sehiiga kondel aņgumakñe aka ambazip pakpak kondel enġimakñe. ¹³ Kembu, göñön mönö uruñini mem köhöimakñan. Kembunini Jisös göñön könaņgep könaġesögi sarakñi pakpak yembuk kunbuk kamani, nalö mianġöreñ Tesalonaika yeñön sarakñi köpösihitkö keuñi qahö Iwinini Anutugö jeñe kinme.' Mewö köulukömakzin.

4

Ahakmeme solanñi urukalemñambuk mi dop kölma.

¹ Urumelen alaurupnini, keu kun kewö: Ahakmemeñini Anutugö jeñe aket dop kölmawaņġö könañi kusum enġiinga mi lök köl guliba wuatañġömakzemö, mi toroqeba gwötpuk ahakñegöra uruñini kuņguzin. Neñön qambañ keu mi Kembu Jisösgö qetñe enġizin. ² Neñön Kembu Jisösgö kukösum qakñe kinda jöjopañ keuñi jim kutum enġiini, iñini keu mohot mohot mi lök möt teköze.

³ Anutunöñ enġöra jitsihitñi kewö mötza: Iñini mönö sero yoņġorö andö qeba sarakñi aka tök-kutukutuñi aka malme. ⁴ Anutugöreñ köna diñdiñi mi mönö kewö möt kutume: Uru sileninaņġö sihim kömbönañini galöm köla sarakñi (mala nanñini anömqini nanñik nanñik memba) malgetka aködamurañambuk akña. ⁵ Urumelenġö kopa yeñön Anutugö könañi qahö möt kutuba uruñini könöp jeiga ambi lan memakze. Mianġö dop kude aka malme.

⁶ Mewö qahöpmö, ambi apan kungen aniga kunöñ ölöñ kaba ambi kude saitköma. Kunöñ bölöñi mewöñi ahiga uruñiran kömbuhibapuk. Mutuk qambañ keu mi jiba galöm mem enġiini, mianġö dop kunöñ ambi mem böliiga Kembunöñ siņgisöndokñi pakpakö likepñi melen waņgima. ⁷ Anutunöñ nini qewöloñ malbingöra qahöpmö, malmal sarakñi malbingöra neņgoholök. ⁸ Mianġöra jöjopañ keu mi mosötmawañön mönö gölme ambaziwa qahöpmö, Anutu nanña andö qema. Anutu Uñañi Töröñi enġimakzawi, ia mönö andö qebepuk.

⁹ Sutñine jöpaköm aņgumakzei, mianġö könañi Anutunöñ kusum enġii nanñinak lök möta malje. Mianġöra neñön urukalem ak aņgubingö keuñi kunbuk ohom enġibingö qahö osizin. ¹⁰ Masedonia prowins uruñe urumelen alaurup pakpak uruñinan jöpaköm enġiba maljemö, urumelen alaurupni, mi mönö toroqeba gwötpuk ahakñegöra uruñini kuņguzin. ¹¹ Mönö ösöñ mala nanñini malmal naņġönaņġöñini galöm köla böroñinan nup memba malme. Mewö aka aködamurañinambuk akingö kapañ köla kinme. Mutuk mewö jim kutum enġiinga mianġö dop mönö aka memba malme.

¹² Mewö aketka uruñini qahö melenđa yaigep kinjei, yeñon ahakmemenini solanji ek yaköba göda qem enğiba malme. Injarere lañ mala nene yuaigö uleta kungö qakñe kude malme. Mewö.

Kembugö kaka nalöñe kewö asuhuma:

¹³ Urumelen alaurupnini! “Tosatñan uruñini melenđa kömumba ahözei, yeñgöra denöwö asuhubawak?” Injini keu mewö jiba mianğöra gukmaulem malbepuk. Ambazip uruñini qahö melenđa jörömqöröm qahö maljei, yeñon kömukömuñi yeñgöra aka wösöbirik maljemö, enjon i ewö wösöbirik malbepüköra keu kewö jibin: ¹⁴ Jisösnöñ kömumba wahöröhi, nini keu mi möt nariba kewö jizin: Anutunöñ Jisös mem guliyök. Mianğöra ambazip yambuk kömumba nöñ qegeri, Anutunöñ mönö i mewöyök mem guliba Jisösbuk mohotñe enğuanğiri aukñe asuhume. Keu likepñi möt narizin ewö, likepñi kun mi mewöyök möt nariinga dop kölma.

¹⁵ *Kembunöñ keu kusum neñgiiga neñon yangö jitñi mi enğöra kewö jibin: Tosatñi neñon qahö kömumba toroqeba silebuk malinga Kembunöñ lilingöba kamawi, nini nalö mianğoreñ mutuk qahö öngöbin. Nini ambazip kömukömuñi qahö enğonğitpin. Qahö. ¹⁶ Mianğö areñi kewö: Anutunöñ tömunñi qainñi kun uiga ötoñi asuhuiga Suep garata bohonñan jimkutukutuñi qeriga ambazipnöñ kourukñiri mötketka Kembunöñ nanñak Suepnöhök etma. Kraistnöñ eriga i möt narim wañgiba kömugeri, yeñon mönö mutuk kömupnöñök wahötme.

¹⁷ Yeñon mutuk wahötketkun nini qahö kömumba jebuk malbini, Anutunöñ mönö neñuanğiri könakemba öngöbin. Wahötkeri yembuk öröröñ kousunöñ öngöba Kembubuk aitonğöba yambuk Suep mire sundan dop malbin. ¹⁸ Mianğöra keu mewöñi jiba mianjon mönö uruñini nanğöm anğuba malme. Mewö.

5

Kembunöñ kamapköra mönö jöjöröba malme.

¹ O urumelen alaurupnini, Kraistnöñ lilingöba kamapmö, wani yambunöñ aka wani nalönöñ asuhumawi, nini mianğö keuñi ohom enğibingöra qahö osizin. ² *Injini nanñinak keu mi ölopñanök kewö möt kömuze: Yoñgorö memenöñ suñgem ölöñ kañgorakzawi, Kembugö kaka nalöñan mönö mianğö dop wölañ kam kuñguma.

³ Ambazipnöñ kewö jime, “Merak luai qem neñgi siyonşayonji qahö maljin.” Mewö jigetka mianğoreñök

* 4:15: 1 Kor 15.51-52 * 5:2: Mat 24.43; Luk 12.39; 2 Pitö 3.10

köndenmönder asuhaba qakñine öngöma. Ambinöñ morö memangö masöñi qei mörakzawi, mönö mianjö dop asuhuiga misinjöba anbingö osime. ⁴ Yeñön osimemö, urumelen alaurupnini, eñön pandaman uruñe jipjap qahö maljeangöra nalö mianjön mönö sanjabañga yongorö meme ewö engö qakñine öngömapkö osima. ⁵ Körek eñön mönö asakñangö ambaziwa akze aka yuai pakpak aukñe akingö ak engimakza. Nini söñaupkö ambaziwa qahö akzin aka ömukñangö yuainji tököba sisit memakzin.

⁶ Mianjöra tosatñi i ewö uruninan gaun ahöbapuk. Mewö qahöpmö, nanini galöm köl anguba uruguliguli malbin. ⁷ Gaun ahözei, yeñön sunjem gaun ahömakze. Ambazip o köhöikñi nempa enjololon ahakzei, yeñön mönö söñaupnön mewö aka malje.

⁸ *Söñaup uruñe mewö ahakzemö, asakñangö ambazip neñön mönö nanini galöm köl angumakin. Wahöjambanini mönö opo maluku ewö kewö löngöta kinbin: Neñön mötnarip aka urukalem köl guliba mewö mianjön töptöpnine göwanjöwanj kepölaköba (suman ewö köla) sel jöhöm anguba kinbin aka Suep mire öngöbingö mamböta jörömqröm aka mewö mianjön nöropnini ain irikmarik ewö esuhaba turubin.*

⁹ Anutunöñ nini et neñgui irimsesewölñi mötpingöra qahö jim teköyökmö, Kembunini Jisös Kraistnön mem letot neñgii oyaenköyaen buña qem angubingöra jim teköiga maljin. ¹⁰ Jisösnön neñgöra aka kömuyöhanjöra malmalnini gölmenön malbini me kömumba nön qeba ahöbini, mi mönö Jisösbuk köhöiba malbin. ¹¹ Mianjöra uru nanjönanjö aka möhamgöm anguba köhököhöi miwikñaiba mutulanjömakzei, mi mönö toroqeba memba malme. Mewö.

Qambar aka goro keu qöndökñi

¹² Urumelen alaurupnini, neñön kewö jim kutum engizin: Galömñinan Kembubuk qekötahöba kinda sutñine nup memba qambar engimakzei, i mönö göda qem engiba malme. ¹³ Göda qem engiba nupñini memakzeangöra mönö ölna jöpaköm engiba yeñgöra mötket öngöma. Könagesö sutñine mönö luai qem anguba malme.

* **5:8:** Ais 59.17; Ef 6.13-17 * **5:8:** Ömewöröme yeñön sölölohöm neñgimegöra yuai bölöñi bölöñi mi liñip kesarek ewö gila neñgöra mulahakzemö, mianjö jitñi mi ölop Jisös möt nariba urukalem kondela kinda likeplikep suman ewö közamböt anguba közangömakin. Mötmötninan siksauk aiga janjuñ anbinpuköra ölop Anutubuk ösupköinga kalem möriamñan nöropnini irikmarik ewö sel jöhöm neñgiiga amöriiga Suepkö könañi wuatangömakin.

¹⁴ Urumelen alaurup, nenön urukungukungu keu tosatni kewö engizin: Tosatnan nanñini imbi-imbi wuatangöba injarere lañ maljei, mi mönö jim engiba galöm meme keu engime. Zirinžirin ambazip yengöra mönö uru nanğönanğö keu jigetka köhöiba awösamkakak akñe. Ambazip uruñini löwöriiga maljei, i mönö köyan köl engime. Urukönöp kude akñemö, ambazip pakpak mönö urubönjöh qakñe ak engime. ¹⁵ Jinöh jibi, nunğunöh guhubi me akñöh aki mi kunñan kude akña. Songö mi walöhbepeköra mönö galöm mem anğuba malme. Nalö dop yuai ölöpnj ölöpnj mi kapan köla ak anğumakñe aka ambazip tosatni pakpak ak engiba malme.

¹⁶ Mönö nalö dop sösöngai aka malme. ¹⁷ Sundan dop Anutu köuluköba malme. ¹⁸ Mewö me mewö asuhumawi, miangören mönö Anutu möpöseiba malme. Kraist Jisösbuk qekötahöba kinjei, Anutunöh engöra jitsihitni mewö mörakza.

¹⁹ Uña Törönanğö bölamñi mönö kude qömbököme. ²⁰ Anutugören kezapqetok keu jimakzei, miangö jijiwilitni mönö kude akñe. ²¹ Keu pakpak mönö kewöta esapköme. Esapkögetka keu ölöpnj asuhumawi, mi mönö anğön köla malme. ²² Keu aka ahakmeme bölöñi könani könani mi mönö andö qeba malme.

²³ Nöhön engöra kewö köulukömakzal, 'Luaigö bemñi Anutu, gi nangak mönö lökñanök tök kutum enginönga sarakñi aka malme. Göñön mönö uruñini, uñanñini aka silenñini mi lökñanök sel jöhöm enginönga köpösihitkö keuñi qahö aka malme. Mewö nalö dop malgetka Kembunini Jisös Kraistnöh lilingöba kaba mewö miwikñaim engima. Keu mi ölna.' ²⁴ Engoholjawi, yanöh keuñi pöndañ wuatangömakza. Mianğöra mönö köuluk miangö dop ak engim teköma.

²⁵ Urumelen alaurupnini, enön mönö nenğöra aka Anutu köuluköba malme.

²⁶ Urumelen alaurup pakpak sutñine mönö anğum anğuba numbuñini yöhötüm namba malme.

²⁷ Nöhön Kembangö qetñe jim kutum engiba jöjöpan keunöh jöhöba kewö ohozal: Kimbi ki mönö urumelen alaurup pakpak yengöra algetka oyon engigetka mötme.

²⁸ Kembunini Jisös Kraistkö kalem möriamñan mönö embuk ahöma. Mewö.

Tesalonaika Kimbi 2 Polnöŋ Tesalonaika yeŋgöra Kimbi aliga 2 ahök. Jim-asa-asari

Tesalonaika urumelen kambu uruŋe Kraist kamapköra mambötketka tosatŋan “Löŋ kayök,” jigetka tosatŋan “Keu mi muneŋa,” mewö lanlan jiba siksauk aka malget. Tosatŋan “Kembugö kaka nalöŋan löŋ kam kuŋguyök,” jiba möt nariget. Miangöra “Polnöŋ Kimbi Tesalonaika aliga 2 ahök,” buk mi ohoba keu mi jim tuariyök. Polnöŋ keu muneŋi mi mindiŋgöba könaŋi kewö indelök: Kraistkö kaka nalöŋan dopdowimawi, nalö miangöreŋ ambazip ahakmemeŋinan goŋgiba bölima. Mewö böliiga azi tandökŋi kun qetŋi Iwilele Toŋi yaŋön asuha mutuk tölapŋe mala könaŋep Kraist aukŋe tuarenjoŋ ak waŋgiba ambazip kantri dop galöm köl eŋgima.

Tosatŋan Tesalonaika urumelen kambu kahasililin mem eŋgigetka sihimbölö möta malget. Miangöra aposol Polnöŋ keu bohonŋi tosatŋi kewö jim tuarim eŋgiyök, “Injini mönö kapaŋ köla köhöiba Kembubuk qekötahöba kinda möt nariba malme.” Keu kötŋi kun kewö jim tuariyök, “Nöŋön neŋakurupni yembuk malmalnini naŋgöm aŋgubingöra nup memba malini, injini mönö miangö dop injarere malmal mosöta nanŋini nene yaka miwikŋaiba mi memba malme aka nup ölöŋŋi ölöŋŋi kapaŋ köla jegep kinda memba malme.”

Buk kiangö bahöŋi bohonŋi 5 mi kewö:

Keu mutukŋi 1.1-2

Uruölöwak ak eŋgiba söŋgaiba möpöseiza 1.3-12

Kraistnöŋ kamapkö keuŋi kusum eŋgiza 2.1-17

Ahakmeme diŋdiŋi akrjegöra kuŋgum eŋgiza 3.1-15

Kimbigö keu kötŋi bohonŋi 3.16-18

¹ *Pol, Sailas aka Timoti neŋön Tesalonaika urumelen könaŋesö embuk keu eraum mötpingöra kimbi ohozin. Eŋön Iwinini Anutu aka Kembu Jisös Kraist yetpuk qekötahöba kinje.

² Iwi Anutu aka Kembu Jisös Kraist yetköŋ mönö kalem möriam eŋgiyohotka luainöŋ malme. Mewö.

Sihimbölö mötaŋun mönö oyaerŋkoyaerŋ aka malbin.

³ Urumelen alaurupnini, eŋgö mötnariŋinan gwötpuk köhöiiga körek pakpak urukalem ak aŋgumakzei, silik mianöŋ mohot mohot eŋgö uruŋine sehimakza. Miangöra neŋön

* 1:1: Apo 17.1

engöra nalö dop “Anutu saiwap!” jiba möpöseim wanġimakzini, mi ölöpnanök dop kölja. Buġa keu köl guligeranġöra saiwap ġimakzini, mi mönö nupnina. ⁴ Sesewerowero anġösirip könaġi könaġi ak engigetka mörakzei, mi pakpak kapaġ köla mökösoġda böġ qeba kingetka mötnaripġinan qahö sörauba löwöriza. Naninak mewöyök miangö kösohotġi mi Anutugö könagesöġi könagesöġi yeġgö jeġine jiba engöra aka silenini möpöseimakzin.

⁵ Anutunöġ keu diġdiġanök kewöta ġim tekömakzawi, anġösirip mötmötnġinan mönö miangö aiwesökġi akza. Anutugö bemtohoġ uruġe kaġgota maljeanġöra sihimbölö mötketka enġehiga Suep mire öġgömeanġö dop sarak sorokġi akġegöra kapaġ kölakza. Miangöra köġjiliġ qahö anġön köliga nalö kewöġe qakġine öġgömakza. ⁶ Anutunöġ diġdiġi akzawanġöra kinda kahasililiġ ak enġimakzei, i mönö kahasililiġ miyöhök melenġniga qakġine öġgöma.

⁷ Qakġine öġgömapmö, kahasililiġ möta maljei, enġön mönö oyaenġoyaen akġe. Kembu ġisösnöġ garataurupġi kukösumġinambuk enġuanġita yembuk Suepnöhök eta asuhumei, nalö miangöreġ mönö nembuk mohotġe luhut meme. ⁸ ġisösnöġ könöp bölam uruġe etma. Mewö eta ambazip Anutu qahö möt wanġiba Kembunini ġisösgö Ölöwak Buġaġi qahö tem kölakzei, i mönö likepġi melenġ enġiiga sihimbölö kewö möta malme: ⁹ *Kembunöġ mönö “Yapmakek!” jiba jemesoholġeyök közöl enġiiga Anutugö kukösumġi asakmararaġambuknöġ qahö öġgömemö, yaigepġe mala könöp siagö sihimbölöġi teteköġi qahö möta malme.

¹⁰ Kembunöġ liliġöba kamawi, nalö miangöreġ kambu-urupġi sarakġi neġön mönö yanġö asakmararaġi eka miangö dop letota “Owe, ġisös Kembunini owe!” ġibin. Möt narim wanġiini, körek neġön mewö welipköinga ambazip omanan neġgeka Yei! jiba auruba kinme. Neġön ġisösgö könaġi nanġöba ġiinga enġön mewöyök mi möt nariba uruġini melenġeranġöra mönö letota ġihilalomġinambuk asariba nembuk mohotġe kinme.

¹¹ Mewö asuhumapköra neġön nalö dop engöra kewö köulukömakzin, “Anutunini, nangak enġohola miangö dop mönö nam köl enġinöġga sarak sorokġi aka malme. Mönö kukösumġi ala inahöm enġinöġga yuai ölöpnġi pakpak aka membingö sihimġini körek asuhum teköma. Mewö mötnaripkö nupġini megetka ölnġi körek asuhuma.” ¹² Mewö köuluköinga Kembunini ġisös möpöseigetka qetġan engöra aka sutġine aködamunġambuk akġa. Nanine Anutu aka Kembu

* 1:9: Ais 2.10

Jisös Kraist yetkön kalem möriam enjgijohot maljeangö dop mönö nanñinak mewöyök aködamunñinambuk akñe. Mewö.

2

Kembunöñ kamamgö aiga Iwilele Tonjan asuhuma.

1 *Urumelen alaurupnini, Kembunini Jisös Kraistnöñ lilingöba kaba nenguanñiriga yangören eu tokobini, inini keu mi mötzemö, neñön kewö qesiba qambañ enjgin:

2 Kembangö kaka nalöñan lök kam kuñguzawañgö tandök tötbörömñinan mönö miangörenök kaiga siksauk möta tat-pepuk. Keu mi denöwö asuhuyök? Uña kunöñ azi kun alburup qeiga imutimut eka kezapqetok keu jim sinjguyök me kunöñ “Uruñini kuñgumam,” jiba keu jim sinjgiiga asuhuyök? Tosatñan kewö jibepuk, “Pol alaurup yeñön keu mi kimbinöñ ohoba alget kayök.” Keu omani miangöra mönö öne töhön töwöratiba jönömñini undui malbepuk.

3 Kunñan kun mewö me mewö tilipköm enjgibapuköra mönö galömñini mem anguba malme. Mi kewögöra: Mutuk aiwesök yahöt kewö asuhuyohotka Kembunöñ miangö andöñe kama: Ambazip kelenmaleleñ yeñön Kembu iwilele aka andö qeme aka Iwilele Tonjan nanñak mewöyök aukñe asuhuma. Anu-tunöñ i jim teköiga könöp sianöñ gema. Aiwesök yahöt mi mutuk asuhuyohotka miangö andöñe nalö ketanjan kama.

4 *Tuarenjoñ Tonji yanön jakbak-öranböran aka nanñi silenji mem öngöm teköma. Ambazipnöñ yuaigö waikñi memba möpöseimakzei me qetñi bem qetzei, yanön mönö mi pakpak engoñgita silenji memba öngöba malma. Mewö mala Anutugö jöwöwöl jikenöñ öngöba jakömbuak dumñi ala “Anutu akzal,” jiba kantri pakpak galöm köl nengiba malma.

5 Nöñön Tesalonaika embuk malali, nalö miangören keu mi lök jibi mötket. Inini mi ölum enjgubapuk. 6 Iwilele Tonjan zilañzilañ asuhumapkö osima. Wani yuainöñ könani angön kölakzawi, enön mi nalö kewöñe mötze. Nalöñi törörök kam kuñgumawi, miangörenök mönö asuhuma.

7 Nalö kewöñe Iwilele Tonjangö ösumñi tölapñan lök asuhuba ambazip sölölohöm enjgimakza. Aukñe asuhubapukö könani angön köljawañön mi mosöri köna ahumapköra mamböta malja. 8-9 Mamböri könani asuhuiga miangörenök mönö amqeba asuhuma. Satanöñ Iwilele Tonji sölölohöba nam köl wañgii angöletot muneñi aka aiwesök kimbi könani könani meiga eka malme. Mi eka malmemö, Kembu Jisösnöñ asak-mararañambuk asuhuba auyohotka i numbu ösumñan qeba yayiapaleleñ mem wañgima.

* 2:1: 1 Tes 4.15-17 * 2:4: Dan 11.36; Eze 28.2, 8; Ais 11.4, 9; Mat 24.24

¹⁰ Ambazip Anutunöŋ amöt qem engimapköra tököba keu ölni buŋa qem aŋgubingö qahö ak engiiga laŋ mala könöp sianöŋ gemei, yeŋön İwilele Tonŋaŋö aŋgöletotŋi eketka kölgorom könäŋi könäŋi engiiga janjuŋ ahakŋe. ¹¹ Mianğöra Anutunöŋ mötmöt janjuŋ kawikŋambuk ali asuhuiga ambazipnöŋ mi kukösumŋinambuk jim sehigetka sesegilgil yeŋön keu kelökŋi gwahöta munenji möt narime. ¹² Könäŋamŋinan aukŋe asuhumapköra Anutunöŋ janjuŋ al engii qaköme. Ambazip keu ölni qahö möt nariba urusihimŋini ahakmeme goŋgoŋe ala qakögeri, Anutunöŋ mönö körek yeŋgö keuŋini jim teköiga könöp sianöŋ geme. Mewö.

Keu ölni tem köla kapaŋ köla köhöiba kinme.

¹³ Yeŋgöreŋ mewö asuhumapmö, Kembugö wölböt alaurup, engöra mönö nalö dop “Anutu saiwap!” jiba möpöseininga dop kölja. Mi nupnina. Anutunöŋ inini könakönahineyök Suepkö buŋaya aka letotmegöra möwölöhöm engiyök. Mianğö dop keu ölni möt narigetka Uŋa Töröŋan mem sarahim engiiga malje. ¹⁴ Mewö malmegöra Ölöwak Buŋa al neŋgii jim asariinga mi-aŋön inini engoholök. Mewö toroqeba mala Kembunini Jisös Kraistkö asakmararaŋnöŋ öŋgöba aködamuraŋinambuk akŋe.

¹⁵ Mianğöra urumelenj alaurup, koŋgwarak mönö kude aka malme. Neŋön keu kusum engiba jitininan jiin me kimbinöŋ ohoinga mötkeri, keu kötŋi mi mönö qekötahöba wuatangöba malme. Mewö.

¹⁶ Kembunini Jisös Kraist nannaŋak aka Anutu Iwinini yetkön jöpaköm neŋgiba kalem möriam qakŋe oyaenŋkoyaen akingö jörömqrömmŋi neŋgiyohotka mianğöra mamböta urukölalep teteköŋi qahö möta maljin. ¹⁷ Yetkön mönö uruŋini nanğöba nup ölöpŋi pakpak memba keu ölöpŋi pakpak jiba malmei, mianğöreŋ mönö mem köhöim engiiga malme. Mewö.

3

Ölöp neŋgöra köuluköba malme.

¹ Keu teteköŋi kun ki: Kembugö keuŋan sehiba engö sutŋine aködamuraŋambuk ahöhi, mianğö dop mönö zilaŋ miri tosatŋe mewöŋanök anda jim sehiinga ölnjambuk ahuba anma. Mianğöra urumelenj alaurup, eŋön mönö neŋgöra aka Anutu köuluköba malme. ² Ambazip sesegilgilŋan Anutu qahö möt narimakze. Mianğöra misimkaulup ambazip goŋgoŋi aka bölöŋi meme yeŋön kahasililiŋ ak neŋgibepüköra mönö Anu-tugö köuluköba malgetka sel jöhöm neŋgima.

³ Sesegilgil yeŋön bölizemö, Kembu keuŋi pöndaŋ wu-atangömakzawaŋön mönö mem köhöim engiba bölöŋeyök sel jöhöm engima. ⁴ Keu jim kutum engiini, eŋön mi nalö kewöŋe

aka kōnaṅgep tem kōla malmei, mi mōta uruyahōṅṅi qahō akzin. Neṅṅōn Kembubuk qekōtahōba kinda mewō mōtzin.

⁵ Kembunōṅ mōnō uruṅṅini mōṅṅaiba Anutubuk jōhōiga urukalemṅi mōt yakōba Kraist ewō kapan kōla mōkōsōṅṅa malme. Mewō.

Injarere malbinbukō galōm meme keu

⁶ Urumelen alaurup, iṅṅini nanṅini imbi-imbi wuatāṅgōba laṅlaṅ malbepukōra kusum eṅṅiimō, tosatṅan keu bapṅe qahō anda ōnewat laṅ malje. Miāṅgōra nini Kambu Jisōs Kraistkō qetṅe kewō jim kutum eṅṅizin: Iṅṅini mōnō urumelen alaurup mewōṅi pakpak mi eṅṅōmosōta misīṅgōba tikep malme. ⁷ Neṅṅōn eṅṅō sutṅine nanini imbi-imbi laṅ qahōpmō, keu bapṅe malin. Miāṅgōra neṅṅō kōna lasupnini wuatāṅgōmegō kōnaṅi mi nanṅinak ōlōp mōtze. ⁸ Nini injarere qahō malin aka eṅṅōreṅṅōk kungō nene yuai mi ōne qahō nemba malin. Qahō! Naṅṅōm neṅṅimegō lōmbōṅṅan eṅṅōreṅṅōk kungō qakṅe ōṅṅōbapukōra mōnō suṅgem asak nup sundansundan memba silenini qeba malin.

⁹ Anutunōṅ nupṅi membingō kukōsumṅi neṅṅii maljināṅgōra ōlōp naṅṅōm neṅṅimegō keunōṅ uruṅṅini kuṅṅum eṅṅibinakmō, neṅṅō kōna lasupnini wuatāṅgōmegō silik ōlōpṅi kondel eṅṅibingō mōtzin. ¹⁰ Embuk malini, nalō miāṅṅōreṅ lōk kewō jim kutum eṅṅiin: Nup memaṅṅō tōkōzawaṅṅōn mōnō nene mewōyōk kude nema.

¹¹ Eṅṅō sutṅine tosatṅan keu bapṅe qahō anda nanṅini imbi-imbi wuatāṅgōba laṅ malje. Yeṅṅōn nup ōlṅi qahō memakzemō, nup meme tandōktandōk ōne laṅ memba inōṅ wainōṅ mōndōba tosatṅi yeṅṅōreṅ yuai mem sohoba qewōlōṅ silekmalek laṅ malakze. Eṅṅōreṅ keu kun mi mewō kaiga mōrin. ¹² Neṅṅōn ambazip mewōṅi mi Kambu Jisōs Kraistkō qetṅe jim kutuba uruṅṅini kewō kuṅṅum eṅṅizin: Iṅṅini mōnō an qekōtahōm kam qekōtahōm mosōta zeṅ mala nup megetka ōlṅi asuhuiga nanṅini nene yakaṅṅini nemba malme.

¹³ O urumelen alaurupnini, eṅṅōn nup ōlōpṅi ōlōpṅi memba miāṅṅōreṅ mōnō taṅṅaṅ kude akṅe. ¹⁴ Neṅṅōn kimbi ki ohoba jim kutum eṅṅizini, kunṅan mi qahō tem kōlma ewō, iṅṅini mōnō uruṅṅi melenṅmapkōra gamu qem waṅṅiba ehōrōṅ kōla yambuk keukeu jiba kōisirik kude tata malme. ¹⁵ Mewō mala kerōk qahōpmō, ala ewō ak waṅṅiba qambaṅ kōl waṅṅiba malme. Mewō.

Kōuluk aka yaizōkzōk keu tetekōṅi

¹⁶ Kambu luai Toṅṅan nanṅak mōnō nalō dop ahakmeme pakpak miāṅṅōreṅ luai qem eṅṅiiga bōṅṅōṅ malme. Kembunōṅ mōnō kōrek embuk malma.

¹⁷ Pol nanak yaizözkökni nani börönan ohozal. Kimbi pakpak ohomakzali, miaᅅgöreᅅ nani yaizözkök qet kimbi ki nanak alakzal. Qetni kewö ohozal: Pol*

¹⁸ Kembunini Jisös Kraistkö kalem möriamᅅan mönö körek embuk ahöma. Mewö.

* **3:17:** Mutuk kunöᅅ tilipköba Polgö qetᅅe kimbi kun aliga uru siksauk asuhuyök. Miaᅅöra nanᅅe böröᅅan qetᅅi ohoyök.

Timotigö Kimbi 1

Polnöŋ Timotigöra Kimbi mutukŋi alök.

Jim-asa-asari

Timoti sepguli azi yaŋgö namŋi Juda ambi aka iwiŋi Grik azi. Yaŋön Eisia prowinsnöŋ mala uruŋi melenḁa Kraistkö alaŋi aka malök. Mewö mala Polgö neŋakŋi aka bauköm waŋgiiga mohotŋe liliköba misin nup memba malohot. Polnöŋ lömbötnöŋ memba et al waŋgibapuköra waimanjat keu bohönŋi karöbut mötmöriba Buŋa Kimbi ki ohoyök.

Waimanjat bohönŋi ketanŋi mi böhi takapulakani. Tosatŋan zioz uruŋe kinda keu goŋgoŋi kusum sohom eŋgiba malgeri, Polnöŋ yengöra aka galöm meme keu köhöikŋi ohoyök. Böhi mienön Juda yengören mötmöt aka gölmegö mötmöt tosatŋi mindirigetka könaŋamŋini lolonqalon aiga kewö möt nariba jiba ambazip kusum eŋgiba malget: “Gölme aka yuai pakpak ehakzini, mi bölöŋi akza. Miangöra tosatŋan Suepkö buŋa akingö kapan köla mötmöt asa-asambötni qainŋi kun qahö buŋa qem anguba nenegö dönqizizin aka songo tosatŋi walöŋda awanöm akze ewö, Anutunöŋ mönö keu miangören qaköba amöt qem eŋgimangö osima.”

Waimanjat keu bohönŋi kun mi: Denöwö urumelen könagesö galöm köl eŋgiinga törörök Anutugö waikŋi memba möpöseibeak. Polnöŋ miangö qambaŋ keuŋi papianöŋ ohoyök. Mewöŋanök zioz galöm, babafi aka nup meme ambazip tosatŋan denöwö aka malgetka dop köljawi, miangö keu arenŋi mi jim asariba ohoyök.

Teteköŋe keu bohönŋi karöbutŋi miangören Timotigöra goro keu tosatŋi ohoyök. Undumŋi yaŋön mönö denöwö Jisös Kraistkö welenqeŋe ölöpnŋi aka mötnarip ambazip kambuŋi kambuŋi eŋgöbisiba bauköm eŋgiiga dop kölmawi, miangö goronŋi ohom waŋgiyök.

Buk kiangö bahöŋi bohönŋi 3 mi kewö:

Keu mutukŋi 1.1-2

Ziozgö nup meme yengören jimkutukutu 1.3-3.16

Timotinöŋ nupŋi memapkö jimkutukutuŋi 4.1-6.21

¹ Anutu, Amötqeŋe Tonini aka Kraist Jisösnöŋ galöm köl neŋgimapkö jörömqöröm al mamböt ak waŋgizini, yetkön Pol nöŋgöra jim kutuba kuŋguba melaim niŋgiyohotka aposol maljal. Kraist Jisösgö jitŋememe mewöŋi aka göbuk keu eraum mötpitköra kimbi ki ohozal.

² *O Timoti! Gi urugi melenḡa Jisös möt nariba mötnaripkö nahön sorokni aka maljan. Iwi Anutu aka Kembunini Kraist Jisös, yetkön mönö ak kömumba kalem möriam gihiyohotka luainöḡ malman.

Enjololoḡ kusum enḡibepukö galöm meme keu

³ Masedonia prowinsnöḡ anmamḡo ahali, nalö mianḡöreḡ kewö jim kutum gihial, 'Gi mönö Efesus sitinöḡ toroḡeba mala urumelenḡ kambu bauköm enḡimakḡan. Tosatḡan mötnaripkö keu kemaḡi tosatḡi kusum sohomakzei, mi toroḡeba akepuköra galöm mem aḡuba malme.' Mewö jim kutum enḡiba malmangöra jial. ⁴ Tosatḡan bem sambannḡi sambannḡi aka ambösakon yeḡḡo ḡet arenḡi arenḡi mi teteköḡi ḡahö eraum mötketka supapköiga aḡgururuk aka keu ḡeḡesi omaḡi asuhui mötmörimakze. Yeḡḡon uruḡini mianḡöreḡ ala sohobepuk. Keu sinḡi sinḡi jiji mewöḡi mi ḡahöpmaḡöp bauköm enḡimappmö, Anutugö malmal arenḡi mi kewö ahöza, 'Kunḡan Jisös möt nariba uruḡi melenḡniga yeḡḡon mönö i amöt ḡem waḡḡiiga letotma.' Merak mewö ak enḡimangöra kunbuk uruwahöt keu jim gihizal.

⁵ Jim kutum gihazali, mianḡo tohotḡi mi urujöpak. Nöḡon urukalem ahumapköra bim ḡeba kewö jim tuarim enḡiba malmangö kuḡum gihazal: Yeḡḡon uruḡinan sarakḡi ahömapköra galöm köl aḡgugetka mötmöt bölöḡan mi ḡahö gwözöḡma. ḡahö gwözöḡniga Anutunöḡ saḡep alakzawi, mi urukezapḡinan ölöḡ möta malme. Mewö mala Kraist törörök möt narigetka Anutunöḡ mönö urukalemḡi uruḡine ali ölöḡ ahumakḡa. Urujöpak mianḡon sutḡine ahumapkö kapaḡ kölakzal.

⁶ Tosatḡan Anutugö malmal arenḡi mi sinḡiba janḡuḡ aka oyoḡdewedewet keu omaḡi omaḡi laḡ jimakze. ⁷ Yeḡḡon Anutugö Köna keugö böhi malbingö mötzemö, nanḡinak keugö könaḡi ḡahö möt asariba mesohol kölayök jimakze. Öne ambazip jeḡine awösamkakak kinda keu laḡlaḡ köhöiba jiba bim ḡemakze.

⁸ Anutugö Köna keu mianḡon mönö ölöḡ sorokḡi akza. Mi könaḡaḡö dop törörök kusum aḡuba wuatḡöinga ölöḡ möhamḡöm neḡimakza, mi mötzin. ⁹ Anutu Köna keuḡaḡö könaḡi mönö kewö möt yaköme: Mi ambazip solannḡi diḡdiḡi yeḡḡöra aka ḡahöpmpö, Anutunöḡ mi ambazip ḡoḡḡoḡi mindiḡöm enḡimapköra aka ali ahöza. Tosatḡan ḡoḡḡiba kewö ahakze: Iwilele jaubatbat aka keu ḡeba yeḡḡiseḡ ḡakḡe aum jesöksök ahakze. Aḡḡöjörak aka sinḡisöndokḡinambuk mala töndup Anutu nesampurek ak waḡḡigetka uruḡini tölöḡoba nöḡḡan malje. Iwinamḡini aka tosatḡi enḡuget kömumakze.

* 1:2: Apo 16.1

¹⁰ Serowilin ahakze. Sodom taonöŋ akeri, mianğö dop köna oŋgita azi nanŋirök aka ambi nanŋirök amimakze. Ambazip mem bölim eŋgimeğöra qeraköba jöhömakze. Keu muney jimakze. Keu jiba jöjopaŋ keunöŋ jöhöba tondup tilipkömakze. Anutunöŋ ahakmeme diŋdiŋi akingöra Ölöwak Buŋa neŋgiyöhi, mi iŋi waiŋi aka memba mianğön qetalakze. Anutugö Köna keu mianğön ambazip mötnaripkö köna diŋdiŋi siŋgimakzei, mönö i mindiŋgöm eŋgimapköra aka ahöza. ¹¹ Anutu, oyaenkyoayen Toŋi yaŋön mötnaripkö köna diŋdiŋi mi Buŋa keunöŋ ali ahöza. Nöŋön Ölöwak Buŋaŋi aködamuraŋbük jim sehimamğö möt narim niŋgiba Buŋa keuŋi mi al niŋgiyök. Mewö.

Polnöŋ Kembu kalem möriamŋaŋğöra möpöseiza.

¹² Kraist Jisösnöŋ uruni keworiga nupŋi pöndaŋ memamaŋğö dop nehi dop köliga nupŋi niŋgiiga memakzal. Nup memamğöra kukösum niŋgiba mala kotzawi, mianğöra Kembunini möpöseiba maljal. ¹³ *Nöŋön mutuk Jisös mepaiköba alaurupŋi ilita sesewerowero könöpuk ak eŋgiba malal. Mewö malalmö, yuai mi Jisös qahö möt nariba silebile tönpin mala laŋ aka memba malal. Siŋgisöndok mewö aka malalangöra mönö ak kömum niŋgiiga kölöŋaiba letoral.

¹⁴ Kembuninan kalem möriamŋi niŋgiba kelenmalelen mokoiga nöŋğö qakne öŋgöyök. Mewö öŋgöiga mötnaripnan asuhuiga urujöpakö kondotkondot Toŋi Kraist Jisös miwikŋaial. Yambuk qekötahöba kinda urukalemŋi buŋa qem aŋguba ambazip tosatŋi urunan jöpaköm eŋgimakzal.

¹⁵ Nöŋön ambazip tosatŋi pakpak eŋgoŋgita siŋgisöndokö ambazip yengö sutŋine ketaŋamŋini aka malal. Mewö malalmö, Kraist Jisösnöŋ siŋgisöndok ambazip amöt qem neŋgimamğöra aka gölmenöŋ erök. Keu kötŋi mi nöŋğöreŋ öŋŋambuk ahök. Mianğöra keu kötŋi mianğön mönö pöwöwöm köhöikŋi akza. Mi ambazip körekmakörek möt nariba aŋgön kölbinanğö dop akza.

¹⁶ Siŋgisöndokö ambazip yengö ketaŋamŋini aka malalmö, Kraist Jisösnöŋ ni kewögöra ak kömum niŋgiyök: Yaŋön nömbuk uruluai qakŋe amöt qem niŋgiba Anutugö uru tandökŋi aukŋe asuhumapkö möt köhöiyök. Nöŋğö könane ambazip tosatŋan Jisös möt narimei, tandökŋi mi yengöra kondel eŋgimamğö mörök. Mi kondel eŋgiiga ölop amqeba uruŋini melenđa mal-mal köhöikŋanğö buŋaya akŋe. ¹⁷ Ak kömum niŋgiyöhanğöra aka Anutu möpöseimakzal. Yaŋön Kiŋ Kembu teteköŋi qahö aka malma. Anutu mohotŋan qahö göröŋ qeiga kaisoŋgolomŋi

* 1:13: Apo 8.3; 9.4-5

qahö ehakzin. Nöñön yangö qetbunajni nalö dop möpöseibiga teteköñi qahö aködamunñambuk aka ahöma. Keu mi öñja.

¹⁸ O mötnaripkö nahöni Timoti! Mutuk kezapqetok keu tosatñi göhöra jigeri, keu mianñön kötöngöm gihiiga ölop aködamungabuk aka malman. Keu mianñö dop kewö jim kutum gihizal: Göñön mönö malmal sarakñi malmangöra bim köhöikñi qeba malman.

¹⁹ Bim qeba mianñöreñ mötnaripki söörauba sohobapuköra mönö töp meman. Urugi köyan köl anñunönga mötmöt bölöñan qahö gwözöñniga Anutunöñ urukezapnöñ sañep alakzawi, mi ölop möta malman. Ambazip tosatñan uru köyankölköñini mosöta lañ malgetka mötnaripñinan löwöriba köhömuñi aka pömsöm qeyök. Wañgenöñ köwet töromnöñ kuñguba jömgözawi, mönö mianñö dop kumkanjan aka böliget. ²⁰ Mötnaripñinan pömsöm qeyöhi, yengö sutñine azi yahöt qetñiri Himeneus aka Aleksander maljahot. Nanak mindiñgöm etkimangö osiba uruñiri melenmahotköra i Satangö böröñe al etkial. Al etkibiga Satangö kukösumñi ahakmemeñirangö dop möta uruñiran sihibölögöra löwöriiga melenña mepaqepaik kunbuk qahö akahorak. Mewö.

2

Buñ nupkö köuluk areñ

¹ Yuai bohonñi mi köuluk nup. Nöñön mianñö uruwahöt keuñi jiba uruñini kewö kuñguzal: Inini mönö ambazip körek pakpak engöra köuluköba kapan köla uleta Anutu qesim wañgiba saiwap jiba malme.

² Kiñ azi kembu aka gawmangö galöm ambazip könañi könañi yengöra aka köuluköba malme. Mewö kötöngöm engigetka diñdiñanök galöm köl nengigetka luai qakñe guñböñjönjön malbin. Mewö mala Anutugö jitñi wuatangöba ahakmeme diñdiñi aka memba malinga aködamunñambuk ahakña. ³ Köuluk nup mewöñi mianñön ölop sorokñi akza. Mi Anutu, Amötqeqe Toninañö jemesoholñe ölop dop kölja. ⁴ Yanñön ambazip körekñan Buña keu öñji möt kutuba uruñini melengetka amöt qem engii letotmegöra jitsihitñi mörakza.

⁵ Anutu mohok-kun ahöza aka ambazip Anutubuk mindirim nengimapköra azi mohok-kun mewöyök ahöza. Azi mohot Jisös Kraist yanñön mönö mi köhöiiga tosatñan mi osimakze. ⁶ Yanñön siñgisöndok ambazip pakpak nengö sohopnini memapköra malmalñi köleñda mosörök. Buña keu mi Anutunöñ nalö ali tosatñan nalö törörök mianñöreñ könahiba nañgöba jim asarigetka nengöreñ kayök. ⁷ *Mianñöra aka Anutunöñ aposol akñamgö kuñguba melaim niñgiiga

* 2:7: 2 Tim 1.11

kantri dop lilikömakzal. Ambazip Jisös möt narimegöra Buja keu ölbölnji jim asariba kusum engiba uruñini kuñgum engimakzal. Könani mewö jiba munen kun qahöpmö, keu ölnja mewö jizal. Mewö.

Azi aka ambi yeñgö malmal areñini

⁸ Miangöra jitsihitnan kewö jizal: Azi eñön mönö pöndañ miri dop tokoba köuluk nup töp memba malme. Yom kazik aka anğururuk mosötketka uruñinan sarahiiga ölop böröñini mem wahöta Anutu köulukömakñe. ⁹ *Ambi engö qambañ keuñini kewö jizal: Eñön mönö kinisöröñini löngöta silenini törörök turuba malme. Opo söro sorokñi aködamunñambuk mi mosötm. Nöröp juñini qeba gawasü könañi könañi kude ala minjinda öñböñ meme. Kösasorom me goul mianñön kude meñölöm anğume aka löngölöngöt söñgöröñi ketañi mianñön memba aiwelikqaiwelik kude akñe.

¹⁰ Aködamunñini ölnji mi ahakmeme ölopñi. Ambi Anutugö jitiñi onğitpinbukö keñgötñini möta qetñi jim aumakzei, eñön mönö nup ölopñi ölopñi jegep kinda memakñe. ¹¹ Azinöñ kusum engigetka ambi eñön mönö uruñini memba et al anğuba Buja keu ösöñ möta nesilam qakñe takpararak aka jitiñöñ söhöp kude melenmemö, mi urukönömñine ala malme.

¹² Ambi eñön azi galöm köla kusum engimegöra nöñön 'On!' qahö jizalmö, tokogetka ösöñ keu böc tatme. ¹³ *Anutunöñ mutuk Adam miwikñaiba yañgö andöñe Iw (Ewa) miwikñaiyök. ¹⁴ *Mokoleñnöñ Adam qahö tilipköyökmö, ambi mi tilipköm wañgiiga keu onğita siñgisöndok ahök. ¹⁵ Töndup ambi yeñön nup areñini wuatañgöba morö memba Kraist möt nariba ahakmeme sarakñi wuatañgöba urumelen alaurupñini urunöñ jöpaköm engiba ösöñ malme ewö, Anutunöñ mönö ölop amöt qem enğiiga letota Suepnöñ öngöme. Mewö.

3

Ziozgö nup galöm yeñgö keu areñ

¹ Kunñan urumelen könağesögö uru galöm pasto akñamgö ak wañgizawi, yañön mönö nup sorokñi aködamunñambuk miwikñaima. Keu mi öl töhöñña. ² *Miangöra urumelen könağesögö uru galöm nupköra mönö azi kewöñi möwölöhöba kuñgugetka dop kölma: Kungö silenö köpösihitkö keuñi qahö, ambi mohot-kungö apñi, kekpurikñi qahö, ahakmemeñi törörök galöm köl anğuiiga göda qem wañgimakze. Yañgöreñ

* 2:9: 1 Pitö 3.3 * 2:13: Jen 2.7, 21-22 * 2:14: Jen 3.1-6 * 3:2: Tai 1.6-9

kamei, i ölop köl öröba köyan köl engiba mötmöt törörök kusum engimakza.

³ Kunöj o köhöikñi nempa bim lañ qeba anjururuk aka monen membagan memangö köpösöngömakzawi, i qahöpmö, kunjan ölop ambazip mutulangöba mökölim engiba gunböñjönjön ak engimakzawi, mönö azi mi kunjume.

⁴ Kunöj nanñi anöm-moröurupñi ölop galöm köla goro engiiga nahönböraturupñan göda qem wangiba keunji pakpak tem köla maljei, mönö ia kunjgugetka kinma. ⁵ Galöm azi kunjan nanñi saiwaurupñi galöm köl engimangö qötötangöza ewö, yanön Anutugö urumelen könagesöurupñi mönö denöwö köyan köl engibawak? Mi mönö osibawak.

⁶ Azi kunjan nalö köröpñi urunji melenja zen kinjawi, yanön ölop kutukutulaj galöm nup memenina aka malma. Kunjan nalö töröpñi urunji melenja an köl kam köl aka tiwokmawok aka töptöpñe qeba silenji memba öngöbapuk. Bölöñangö Tonjan kezapjupjup aiga Anutunöj keunji jim teköba közöl wangii erök. Mianjö dop engö galömjinan silenji memba öngöiga Anutunöj i Satan ewö jim teköiga etpapuk. ⁷ Galöm kunjan urumelenjö kopa yengö sutñine qetbuña ölopñi qahö bisi-bawak ewö, ambazipnöj i lañ jim böligetka Bölöñangö Tonjan mötöp simbanji ali mianön töteköi qeiga etpapuk. Mewö.

Ewanjelis aka Buña nup ambazip yengö keu

⁸ Buña nup ambazip* yenön mewöyök ambazipnöj göda qem engimeangö dop tanörakñini qahö aka malme. Tosatñan keu jöl yahötyahöt jiba wain o gwötpuk nempa möndö möndö qakñe injarere mala monen yuaigöra kapan kölakzei, i mönö kude kunjum engigetka kinme.

⁹ I qahöpmö, ambazipnöj mötnaripkö keu ölnji asa-
asambötñi Anutunöj indelöhi, mi nöm tik memba mianjören qekötahöba urunjan tolöhobapüköra galöm mem anguba sarakñi maljei, mönö ia kunjum engime. ¹⁰ I mewöyök mönö mutuk kewöt engigetka keu jizalangö dop köhöiba kingetka dop kölma ewö, mönö ölop kunjum engigetka kinda Buña nupkö ambazipñini aka malme. ¹¹ Yengö ambiurupñinan† mewöyök ambazipnöj göda qem engimeangö dop tanörakñini qahö aka andöqe qe keu jitnöj yöhösan qahö jiba malmemö, kekpurikñini qahö mala yuai pakpak memburik-qemburikñini qahö memba malme.

* **3:8:** Dikon mi azi aka dikones mi ambi, yenön pasto qöhöröñine bauköba nup memba urumelen kambu köyan köl engiba Buña keunöj gumohoba silegö nup tosatñi memba mianön nangöm engimakze. Ewanjelis me urukunjukunju ambazip yenön sel yaigepñe kinjei, yenön urunji melenmegöra Buña keu kusuba mianön urunji kunjuba goro engimakze. † **3:11:** Buña nup ambi aka Buña nup azigö anömñi yengö jimkutukutunji jiza.

12 Buᶇa nup azinöᶇ mönö ambi mohot-kungö apᶇi aka nanᶇi anöm-morö aka welenqeᶇeurupᶇi ölop galöm köl enᶇimakᶇa. 13 Buᶇa nup ambazip nupᶇini ölopᶇanök memakzei, ambazipnöᶇ i göda qem enᶇigetka qetbuᶇa ölopᶇi miwikᶇaime. Mi miwikᶇaiba ölop awösamakak kinda ambazip uruᶇini kuᶇguba Jisös Kraist möt naribingö keu mi köhöiba jimakᶇe. Mewö.

Anutunöᶇ Buᶇaᶇi asa-asambötᶇi indelök.

14 O Timoti, nöᶇön zilaᶇ göhöreᶇ kaba gekᶇamgö jörömᶇöröm al mamböt akzalmö, töndup kimbi ki göhöra ohozal. 15 Nalöni qeköriiga kabilenᶇbuköra mutuk kimbi ki kewögöra ohobi kaza: Gi Anutugö urumelenᶇ könagesöurupᶇi denöwö galöm köl enᶇinöᶇga ahakmemenᶇinan diᶇgiba ölöwakᶇawi, mönö qambaᶇ keu mi oyoᶇda mötman. Anutugö könagesöurupᶇi neᶇön Anutugö mindimindiri zioz selᶇi akzin. Malmal Toᶇi yaᶇgöreᶇ qekötahöingᶇa mindirim neᶇgiiga miri dop tokoba keu ölnᶇi jim sehimakzin. Keu ölnᶇan böliba ösumᶇi etpapuköra miangö wötᶇi aka tandöᶇi akzin. 16 Anutunöᶇ amötqeqegö könᶇaᶇi asa-asambötᶇi indelöhi, neᶇön Buᶇa keu mi möt asariba kewö jim miwikᶇaimakzin:

Buᶇa Toᶇi yaᶇön nanᶇak gölme azia aka sutnine asuhuyök. Asuhuiga keu jakeᶇe albingö keuᶇi laᶇ jarum bibihigetka Uᶇa Töröᶇan könᶇaᶇi solanᶇi aukᶇe kondelök. Mi kondela meiga Kembu aka wahöta Suep garata galöm köl enᶇiiga aködamunᶇi uba eket.

Mi eketka Anutunöᶇ waᶇgiri Suepnöᶇ öᶇgöba Anutubuk tata galöm köl neᶇgimakza. Galöm köl neᶇgiiga Buᶇa keuᶇi mi kantriᶇi kantriᶇi liliköba jim asarigetka gwötpuk yeᶇön gölme dop möt narim waᶇgimakze.

Mewö jim miwikᶇainingᶇa ölnᶇa aködamunᶇambuk akza. Mewö.

4

Keu munenᶇi kusum enᶇigetka eᶇololonᶇ akza.

1 Anutugö Uᶇaᶇan keu kewö jim asariiga törörök möt yaközin: Gölmegö nalöᶇan tekömamgö akᶇawi, nalö miangöreᶇ ambazip kelenᶇmaleleᶇ yeᶇön mötnarip mosöta Kembu andö qeba ömewöröme yeᶇgö böröᶇine geme. Mewö gegetka ömenöᶇ sölölohöba kusum enᶇimakzei, mönö yeᶇgöreᶇ mötmöt wuataᶇgöba eᶇololonᶇ aka siksauk malme.

2 Siksauk mi kewö asuhuma: Tosatᶇan urumelenᶇ sile-sile aketka Satanöᶇ aiwesökᶇi uruᶇine ain könöpᶇambuknöᶇ qekötahöba urukezapᶇini gwözöᶇᶇiga köhömuᶇi aiga keu munenᶇi laᶇ jim sohomakze. 3 Yeᶇön ambazip kewö kusum sohom enᶇimakze, 'Urumelenᶇ ambazip eᶇön mönö awanöm aᶇgömeme kude akᶇe aka nene tosatᶇi kude nemba malme.'

Mewö kusum sohom engimakzemö, Anutunöŋ nene pakpak mi nembangöra miwikŋaiyök. Mi ambazip Anutu möt nariba keu ölni möt yaközini, yaŋön mi kötuetköiga ölop saiwap jiba nembangöra al nenŋiyök.

⁴ Anutunöŋ yuai pakpak miwikŋaiyöhi, mienön mönö ölopŋi akze. Mi andö qebinangö dop qahöpmö, yuai al nenŋimawi, mi ölop saiwap jiba buŋa qem angubin. ⁵ Yuai ambazip jenine dönqizinnambuk akawak ewö, mi mönö ölop Anutugö keu jiba köuluköinga ösumŋan walöŋda dom-amöt qeiga sawölŋi akŋa. Mewö.

Kraist Jisösgö welenqeŋe ölopŋi mi kewö:

⁶ Göŋön urumelen ambazip mewö kusum engiba mala Kraist Jisösgöreŋ Buŋa nup meme azi ölopŋi aka malman. Göŋön Buŋa keu wuatangöba mala kotzani, mi tosatŋi kusum engiba nangak mewöŋanök keu ölopŋi mi aka mötnaripkö qambaŋ keu pakpak oyonŋda mötmöriba mianön urugi gumohom anguba malman. ⁷ Gölmö ambazipnöŋ bem samban keuŋi oyondewedewet jigetka Anutugö Buŋa keunöŋ böbölohot akŋangö akzawi, mi mönö yaköriba andö qeman. Mi andö qeba Kraist ewö aka malmangöra urugö kölguliguli aka malman.

⁸ Anutunöŋ malmal nalö kewöŋe gölmenöŋ maljini, mi kötuetköm nenŋiiga könangep oyaenŋkoyaen malbingö jöhöjöhö alök. Mönahot angolat mi boromdökŋanök sile guliguligöra bauköm nenŋiba eretŋi akzapmö, urugö kölguliguliŋi mi tandönini bohonŋi akza. Miangöra urugö likepŋi pöndaŋ kölguliba malnöŋga mianön mönö yuai pakpak miangöreŋ bohon köla nangöm gihimakŋa. ⁹ Keu jizali, mi ambazip körekŋanök möt angön kölbinaŋgö dop pöwöwöm köhöikŋi akza. Keu pöwöwöm köhöikŋi kun mi kewö,

¹⁰ “Anutu malmal Tonji yaŋön ambazip körek pakpak amöt qem nenŋimangö mötza. Urunini melenŋda möt narim wanŋimakin ewö, mönö ölna amöt qem nenŋimakŋa. Mewö möt narizin. Nini tosatŋan mewö asuhumapköra jörömqöröm mewöŋi Anutu al wanŋiba kinda nupŋi memba silenini qeba aum-mörimakzin.”

¹¹ Ambazip keu miangö dop aka memegöra jim kutuba kusum engiba malman. ¹² O Timoti, kunöŋ sepgwölö maljanangöra memba et al ghibapüköra mönö mötnarip ambazip sutŋine silik ölopŋi kewö kondel engiba malman: Keu ölopŋanök jiba ahakmeme diŋdiŋi wuatangöba ambazip törörök jöpaköm engiba malman. Mötnaripkö kölguliguli pöndaŋ memba Anutugö nupŋi mem sorokönöŋga miangöra möt narim ghibiba malme. Mewö sarakŋanök aka menöŋga ambazipnöŋ ölop göda qem gihigetka malman.

¹³ Mönö pöndaŋ Urumelenğö Buŋa Kimbi mi jegep oyoŋda kapaŋ köla jim asariba könagesö uruŋini mianğon kuŋguba kusum eŋgiba malman. Nalö sutŋi kianğoreŋ mewö aka malnöŋga nöŋön kabiga dop kölma. ¹⁴ Jitnememe yeŋön böröŋini göhö qake ala köulukögetka Anutugö kezapqetok keu göhöra asuhuiga Anutunöŋ nup memegö mötmöt kalem gihi-iga uruge ahözawi, mi kude köyatimanmö, mianğö qakŋe nup memba malman. ¹⁵ Kude köyatimanmö, Buŋa Kimbi oyoŋda jim asariba kusum eŋgiba malman. Yuai karöbut mi mönö kapaŋ köla jegep köl guliba malman. Tanqan qahö akŋan ewö, urugahö töhötmöriamŋan mönö qariiga köhöiba awösamkakak akŋani, mi köreŋan ek kutume.

¹⁶ O Timoti, mönö nangi uru silegi galöm köl aŋguba urumelen nup törörök kusum eŋgimangöra galöm mem aŋguba malman. Mewö aka malman ewö, mönö nangi oyaenköyaen ak aŋguman aka keugi mörakzei, mi mohotŋe oyaenköyaen ak eŋginöŋga Suepnöŋ öŋgöme. Mewö.

5

Malö aka ambazip namŋi mi kewö galöm köl eŋgime:

¹ Azi namŋi mi köhöikŋanök kude mindiŋgöba jim waŋgimanmö, iwiki ewö qambaŋ keu ösöŋ jinöŋga mötma. Azi sepgwölö mi darumungi ewö ak eŋgiba malman. ² Ambi namŋi mi namurupki ewö qambaŋ eŋgiman. Ambi seram mi nenurupki ewö ahakmeme sarakŋi wuatangöba göda qem eŋgiba malman.

³ Malö tinitosolomŋini qahö mi mönö gödaqeŋe qakŋe ak eŋgiba malman. ⁴ Malö kungö isimoröurupŋi malje ewö, yeŋön mönö mutukŋi aka bohon köla i galöm köl waŋgime. Anutunöŋ jim kutum neŋgiyöhi, yeŋön mönö mianğö dop nanŋini saiwaurupŋini köyan köl eŋgibingö könaŋi mötme. Iwinamurupŋinan mutuk nalö köröpŋi köyan köl eŋgiba malgetka yeŋön mianğö kitipŋi melenđa tosaŋini meköm eŋgigetka Anutugö jeŋe dop kölma.

⁵ Malö ambi öŋŋi, tinitosolomŋi qahö nanŋök maljawi, yaŋön mönö jörömqöröŋŋi Anutu al waŋgiba i sundan dop suŋgem asak qesiba köuluköm waŋgimakza. ⁶ Yaŋön mewö maljapmö, ambi malö tosaŋan uruŋinan könöwiiga sihim kömbönaŋinangö dop yuai laŋlaŋgöra böröjaŋ suhumakzei, yeŋön gölmenöŋ silebuk maljemö, töndup köhömuŋi akze. ⁷ Mianğöra malö yeŋön sileŋine köpösihitkö keuŋi qahö ahöi malmegöra mönö mewöyök jim tuarim eŋgiba malman.

⁸ Kunŋan nanŋi tinitosolomurupŋi qahö köyan köla eŋgömosöri garömiŋ maljei, yaŋö ahakmemeŋan mönö bölim teköza. Yaŋön Kembu möt narizawaŋgö keuŋi mi

siliknan qan köla urumelengö kopa tandök ongita böliqöliba malja.

⁹ Urumelen könagesö enön malö tosatni kutukutulan aka köyan köl engimakzei, malö kunjan yengö arenön kaŋgotmapköra qeçesi alma ewö, ambi mi mönö kewötme. Kewötketka kewö asuhuiga iyök mönö qet aren miangören toroqeba ohoba alme: Kunöŋ yambuŋi (yaraŋi) 60 ongita azi mohotkö anömŋa malök. ¹⁰ Mewö maliga tosatnan könaŋaŋgöra kewö naŋgöba jimakze: Yaŋön nup ölöŋŋi ölöŋŋi memba mala morö galöm köla goro enŋiiga qariget. Ambazip kianŋi miriŋe köl öröba köyan köl enŋiiga Kraistkö alaurupŋi saraknan kagetka uziŋini saŋonŋa esuhuba yaka tawen enŋiba malök. Wahöjalin uruŋe malgeri, mi mem ölöwaka nup ölöŋŋi pakpak memangöra uruŋi pöndaŋ jöhöba jegep kinda malök. Malö mewöŋi mönö aren papianöŋ ohoba köyan köla malme.

¹¹ Malö ambi namŋi qahö, yengö qetŋini mönö qet aren papia miangören kude alman. Mi albanak ewö, yengö sihim kömbönaŋinan könöp jeiga azi kunbuk membingö mötmötŋini ahum köhöiiga Kraist silekmaek ak waŋgiba zioz nup mosötpepuk. ¹² Mi mosöta mutuk Kraist tem kölbingöra jöjöpän keuŋini aukŋe jim jöhögeri, mi qegetka pömsöm qeiga Kraistnöŋ keuŋini jim teköba gamu qem enŋiiga önewat laŋ malbepuk.

¹³ Önewat laŋ mala toroqeba kewö bölibepuk: Miriŋi miriŋi laŋ liliköba nalö ayuhumegö könaŋi möt anŋön kölbepuk. Toroqeba böliba luasö keu laŋ jiba keu bapŋe qahö anda nanŋini imbi-imbi wuatangöba nup meme tandöktandök lilikqilik akepuk. Inöŋ wainöŋ laŋ möndöba nup ölni qahö memba tosatni yengören yuai mem sohobepuk. Keu tosatni yengören yuaia qahöpmö, töndup mi öne laŋ jim sehibepuk.

¹⁴ Mewö akepüköra sihimni kewö möta jizal: Malö ambi namŋi qahö yenön mönö azi memba morö memba nup miriŋini galöm köla malgetka dop kölma. Mewö aketka tuarenjoŋninan jim bölim neŋgimangö könaŋi jaruba mi qahö miwikŋaima.

¹⁵ Malö tosatnan galöm qahö mem anŋuba lök Kraist andö qeba eta Satangö könaŋe wuatangöba malje. ¹⁶ Urumelen könagesö neŋön mönö malö ambi ölni, tinitosolomŋini qahö maljei, mi köyan köl enŋibingöra ahakzin. Miangöra mötnariŋ ambi kungö tinitosolomurupŋan malöya akzei, yaŋön mönö mi köyan köl enŋiba malma. Miangö lömbötŋan mönö zioz kambu enŋö qakŋine kude öŋöma. Mewö.

Ziozgö jitŋememe mi kewö köyan köl enŋibin:

17 Jitnememeurup urumelen könagesö ölöp galöm köl engimakzei, enön mönö miangö likepni melenja gödaqeqe öngöngöni kondel engiba malme. Yengörenök tosatjan Buja keu jim asariba kusum engimakzei, miangöra mönö kötönjini toroqetget öngöi engiba malme. 18 *Buja Kimbigö keu kunjan miangö könani kewö jiza,

“Wit padigö kötni aka kamböni mendenjingöra bulmakau aziñi wanğitketka padi kambu qakñe tiba tözözamgömakzawi, yanğö numbuñi mönö kude muzupköme. Mewö gumohom wanğigetka ölöp nene kitipni neiga dop kölma.”

(Miangö dop kiamnöñ böröjan memba sömbup meköi qegetka kitipni wanğiget neiga dop kölma.) Keu kun kewö ahöza,

“Kunöñ nup meiga tosatjan töwani wanğigetka dop kölma.”

19 *Jitnememe kungö silenje keu lan ala jim wanğigetka yahöt me karöbutjan mi qahö nanğöbeak ewö, i mönö keu jakenje kude alman. 20 Denike yenön siñgisöndok ahakzei, göñön mönö i aukñe tembula jim enğinöñga körek pakpak keugi mi möta siñgisöndok akinbukö kenğötñini möta galömñini mem anğumakñe.

21 O Timoti, keu ohoba jim kutum gihizali, mi mönö tem köla wuatangöba malman. Azi me ambi kun kude ek soriba tosatñi kude qepureim enğiman. Miangöra kungö keuñi mi qeljiñe lan kude jöhöman. Ambazip körek pakpak mönö öröröñ kewöta ak enğiman. Mewö akñangö keuñi mi mönö Anutu, Kraist Jisös aka Suep garataurup sarakñi yanğö jemesoholñine jiba mi jöjopan keunöñ jöhönöñga mötpi dop kölma.

22 Tosatñi yanğö siñgisöndokñinan göhö qake öngögetka gamu miwikñai banbuk. Miangöra kunjan “Kembugö nup memam,” me “Urumelen kambu toroqemam,” jizawi, yanğö könanamni mutuk qahö kewöta börögi zilañzilañ yanğö qakñe kude ala kötuetsköm wanğiman. Nangak sarakñi malmangöra mönö galöm köl anğuba malman.

23 O Timoti, gi nalö tosatñi kawöl ahum gihüiga “Yainmain!” geta ahakzan. Miangöra mönö oyök kude nemanmö, wain o tosatñi mewöyök nenöñga kömönğoki bauköiga amqema.

24 Keu kun kewö: Ambazip tosatjan siñgisöndok aketka zilañ aukñe asuhugetka ambazipnöñ eka qeljiñe jim tekögetka nalö kewöñe gamuñinambuk kinje. Mewö kinjemö, tosatjan siñgisöndok aka tölapköba mala könanğep Anutugö jene anğotketka aukñe asuhui jim teköm enğima. 25 Ambazip nup ölöpñi aködamunñambuk memakzei, nup miangön mewöyök nalö kewöñe aukñeyök ahöza. Nup ölöpñi tosatñi aukñe qahö

* 5:18: Dut 25.4; Mat 10.10; Luk 10.7 * 5:19: Dut 17.6; 19.15

ahöbeak ewö, mi mönö mewöyök tölapne ahöbingö osiba könanjep asuhugetka ekin. Mewö.

6

Welenqege yengören qamban aren

¹ Welenqegeurupnini pakpak tonjanngö mötöp bisiba nup töwanjini qahö memakzei, enjön mönö tourupnini iwilele lan kude ak engimemö, gödaqege pakpak kondel engibingö dop engeka malme. Enjön mönö tosatjan Anutugö qetnji mepaiköba jibepuköra kapan köla kinme. Anutugö Buja keunji ambazip kusum enjiinga mi engö ahakmemejinanngöra aka andö qegetka bölibapuk. ² Tourupnini tosatjan urumelen alaurupnini akzei, mianngöra mönö gödaqegejnini mötket eretnji akapuk. Mewö qahöpmö, tourupnini welen qem engigetka nupnini ölöwahakzawi, yenjön Kraist möt narigetka wölböt ala ak engigetka mianngöra mönö kapan köla tourupninanngö keu bapne anda urunini nupnöj ala ölöpnanök memba malme. Mönö mewö jim kutuba kusum engiba malman. Mewö.

Buja keu jim sohogetka urukönöp akepuk.

³ Kembunini Jisös Kraistnöj urugö kölguliguli akingöra Buja keunji nenjiyöhi, nenjön mönö mianngö dop ambazip ölöwaknegöra kusum engimakzin. Kunjan Buja keu ölnji qiwitipköba keu kembangan murutnji ambazip kusum engimakzawi, yanjön mönö kopa akza.

⁴ Yanjön silenji mem öngömakzapmö, keugö könanji qahö möt kutuza. Qahö möt kutuba mötnaripkö keu kembangan jim melenqelenja jitnakölik ahumapkö köpösöngömakza. Mewö möta tosatnji yembuk möndömkösök aketka ölnji kewö asuhuma: Likeplikep urunöj mututqutut angururuk ak anquba uruqege keu töhören jiba mem bölim anqubepukö sömbu mötmöt akze. ⁵ Mewö aka mötmötjnini sohoi kahapmahap aka malmal ölnjanngö könanji singiba kewö mötmörimakze, 'Urunöj kölguliguli ahinga mianjön döpnini aiga mianngören tiba monej inap miwikjaibin.' Mewö mötmöriba tokoba sundan dop jitnakölik eraumakze.

⁶ Mewö ahakzemö, nenjön Anutu Bujananngö kölguliguli aka monej inap ahöm nenjiyöhi, mianjön uru luai qem anqumakzin. Uja Töröjan döpnini aka mem bönjöj ak nenjiyökzawanngöra mönö ölnja oyaenjoyaen ketanji miwikjaiba simbawon maljin. ⁷ Mianngö könanji kewö: Nini mutuk börönanan yuai kun qahö memba öne töhöngölmenöj asuhuin. Könanjep mewöyök börötak kömumba gölme ki mosöta anbin. ⁸ Mewö anbinmö, nalö kewöne nene aka opo maluku ahöm nenjiyögi miambuk mönö mem bönjöj aka luai qem anqumakin.

⁹ Mewö akinmö, ambazip monej inap ketanj miwikñabingö mötzei, yejön mönö esapesapnöj simba ewö tötökögetka eta engumakza. Eta enguiga sihim kömbönanjini bölöni bölöni mi gwötpuk ahuba uru enjololöj mem engigetka kezapjupjup ahakñe. Sihim kömbönanjini gonjonj mienön mönö öröm jöhöm engigetka ulupköba köndermönden miwikñaiba ayuhume. ¹⁰ Monej inapkö sihim kömbönanj mianön mönö yuai bölöni pakpakö jalöni akza. Gwötpuk yejön monej inapkö urukönöp möta lilikqilik aka janjun aketka mötnaripñinan pömsöm qeiga laj malje. Urukönöp möt bibihigetka mianön mönö wösöñjini qösöñniga sihimbölo gwötpuk möta malje. Mewö.

Polnöj Timoti nupköra jim kutum wanjiyök.

¹¹ Gwötpukñan mewö maljemö, Anutugöreñ azi gi mönö yuai mewöni mi qizingöba andö qeba malmal kewöni malmangöra kapañ köla malman: Ahakmeme diñdiji wuatañgöba Anutugö malmal köhöikñi köl guliba malman. Mötnaripkö kölguliguli pöndañ memba ambazip öña jöpaköm engiba malman. Mönö kapañ köla köhöiba kinda ambazip guñböñjönjöh qakñe ek engiba malman.

¹² Mönahot angot azinöh aonjit miangöreñ luhut almapköra ösumñi pakpak qezaköba anjawi, gi mönö miangö dop mötnarip köl guliba aonjit aködamunñambuk miangöreñ köhöiba pöndañ bim qeba malman. Anutunöh malmal köhöikñe angotmangöra goholöhi, gi mönö malmal mi buña qem anguba qekötahöba malman. Malmal köhöikñangö buñaya akzani, göñön keu mi ölopñanök jim miwikñainönga gwötpukñan mi möta ölop nañgöba jimakze. ¹³ *Anutu yuai pakpak mem gulimakzawi, gi mönö yanjö jeñe könañamgi jim miwikñainöh aka Kraist Jisösgö jeñe mi mewöyök jim miwikñainönga mörök. Jisösnöh premiö Pontius Pailötkö jemesoholñe könañamñi jiba keu ölopñi jim miwikñaiyöhi, mönö Kraist yanjö jeñe kewö jim kutum gihizal:

¹⁴ Gi mönö Buña keu köl guliba pöndañ tem köla wuatañgöba malman. Mewö malnönga kunñan siñgiba bölimanangöra aka keu jim gihimangö osima. Kembunini Jisös Kraistnöh kumbuk asuhumawi, nalö sutñi kiangöreñ mönö urugö nup mewö memba malman.

¹⁵ Anutunöh oyaenköyaen Tonji aka nalöni ali kam kuñguiga miangöreñ Jisös Kraist melaiiga aukñe asuhuiga ekin. Anutunöh nanñök Öngöngöñamnini aiga körekñan yanjö nembö bapñe kinjin. Yanön kin kembu yanjö Kembunini aka pom jembon yanjö bohonñini akza. ¹⁶ Anutu, oyaenköyaen Tonji yanön mohot nalö kunöh qahö kömuma. Yanön asakmararan

* 6:13: Jon 18.37

mire euyangören maliga körek neñon naninak miangören öngöbingö qaközin. Gölmegö kunñan i jeñan qahö uba ehök aka ekñangö osiza. Yangö qetbuñani möpöseininga kukösum Tonj aködamunñambuk aka nalö teteköñi qahö yuai pakpak galöm köla malma. Keu mi ölna.

¹⁷ Ambazip pomñi nalö kewöñe gölmenöñ öngöngöñi maljei, göñon mönö i kewö jim kutum engiba malman: Sukinapnön nalö kungen qahöwak teköma. Miangöra yeñon mönö uruñini miangören kude ala malme. Sukinap qakñe kinda aiweliköba söngöröqök akze ewö, jörömqörömninan mönö pömsöm qema. Uruñini gölmegö ainemalukunöñ kude almemo, Anutunöñ yuai pakpak miangören köyan köl engimapköra al mambötketka dop kölma. Anutubuk qekötahöba kingetka ölop yuai könani könani malmal söngaibingöra kelermaleleñ neñgimakza.

¹⁸ Kewö jim kutum engiba malman: Yeñon mönö nup ölopñi ölopñi jegep kinda memba mewö miangön aködamunñinambuk akñe. Anutugö jeñe aködamunñinambuk aka amqeba jöjöröba tosatñi bauköm engiba kalem sehiba mendenña malme. ¹⁹ Mewö Anutugö jeñe qetbuñaninambuk aka malmalgö guli dötnam ölni miwikñaiba mem sehimakñe. Guli dötnam mewöñi mi malmalgö tandö wötñi köhöikñi akza. Mi mem sehiba galöm köla ölop könangep tandö wötñi miangören nanñöba kinda malmal ölbölni buña qem anguba malme.

²⁰ O Timoti, Anutunöñ möt narim gihiba nup memegö mötmöt kalem uruge alöhi, mi mönö nupnöñ ala sohobapuköra galöm memba malman. Gölmegö keu oyonñdewedewet omani aka angururuk supapköba jigetka sohomakzawi, mi mönö mosöta andö qeba malman. Tosatñan “Mötkutukutu eraum mötpin,” jiba keu sinñi sinñi jim sehiyetka anakza. Mötkutukutu ölni mi mewö jim sohomakze. ²¹ Tosatñan mötmöt sohosohonñ buña qem anguba jim miwikñaiba janjun aketka mötnariñinan söroraua löwöriba sohayök.

Anutugö kalem möriamñan mönö embuk ahöma.

Timotigö Kimbi 2

Polnönj Timotigöra Kimbi aliga 2 ahök.

Jim-asa-asari

Polnönj undumñi aka gwabö alabaukñi Timotigöra “Andö qambañi qöndökñi wañgimam,” jiba Buña Kimbi ki ohoyök. Keu areñi bohonñi mi kapañkölköl. Polnönj mi jim asariba uruñi nañgöba qambañi kewö wañgiba ohoyök: Timoti göñön mönö pöndañ kinda Jisös Kraistkö könañi nañgöba jiba malman. Ölöwak Buña aka Jöhöjöhö Areñ Walñi mötzani, mönö mianğöreñ qekötahöba mianğö keuñi ölbölñi mi ambazip kusum enğiba urukunğukunğu nup memakñan. Tuarenjoñ ak gihigetka sihimbölö könañi könañi miwikñaiba mötpanak ewö, mönö töndup Anutunönj nup gihiyöhanğö dop mi kapañ köla memakñan.

Polnönj galöm meme keu köhöikñi Timoti kewö wañgiyök: Tosatñan “gukmaulem qakñe añgururuk omani aka kezapjupjup ahakzei,” göñön mönö mianğö keunönj añgota nalögi mösöhöba ayuhubanbuk. Añgururuk keu mewöñi mienön ambazip qahöpmahöp bauköm enğimakzemö, ambazip kezap ala mörakzei, mönö i mem bölim enğiiga ayuhume.

Polnönj qambañ keuñi pakpak nañgömamğöra nanñi malmalñanğö kösohotñi ohoyök. Wuanönğöra aka denöwö nup areñi ala bim qeba malöhi, Timotinönj mianğö keuñi ölüm qebapüköra mi kewö jim asariyök, “Nöñön Jisös möt nariba lömböt möta mökösoñda urukalem aka malal. Sesewerowero ak niñgigetka sihimbölö möta kapañ köla köhöiba kinal.”

Buk kianğö bahöñi bohonñi 5 mi kewö:

Keu mutukñi 1.1-2

Anutu möpöseiba Timoti qambañ wañgiyök 1.3-2.13

Goro aka galöm meme keu tosatñi 2.14-4.5

Pol öröm ureim ak wañgigetka malök 4.6-18

Kimbigö keu kötñi bohonñi 4.19-22

¹ Anutunönj jitsihitñi jim kutuba Pol ni kunğum niñgiiga Kraist Jisösgö aposol akzal. Kraist Jisösbuk qekötahöba kininga malmal köhöikñi nengimapkö keu jöhöyöhi, mianğö Buña keuñi jim asarimamğöra melaim niñgiiga maljal.

² *Timoti göñön mötnaripkö wölböt nahöni akzan. Nöñön göbuk keu eraum mötpitköra kimbi ki ohozal.

Iwi Anutu aka Kembunini Kraist Jisös, yetkön mönö ak kömumba kalem möriam gihiyohotka luainönj malman.

* 1:2: Apo 16.1

Polnõj Timoti urunji nanğõba keu jiyök.

³ Nõngõ ambösakonnan Anutu welenni qeba malgetka nõñõn toroqeba nupñi membiga Anutunõj “Dop kõlja,” jiiga urukezapnan mewõ mörakzal. Uruni sarakñi aiga Anutu möpöseimakzal. Möpöseiba sunğem asak köulukõba gi qösösök mötmörim gihimakzal. ⁴ Gömosõt-piga sahõtnõnga imbilgi erõhi, nõñõn mi mötmöriba gekñamgõ awõweñgõba kapan kõlakzal. Geka köisirik tatziga sösõngainõj uruni kokolak qemapkõra mötzal.

⁵ *Gõñõn geñmonj qahõ õlña Jisõs möt nariba maljani, keu mi urukõnõmne ahõiga mötmörimakzal. Mutuk abugi Lois aka namgi Yunis yetkõn urunji melenohotka mötnaripñiran ahuyök. Yetkõ andõñire gõñõn mewõyök aka maljani, mewõ möt narim kõhöizal.

⁶ Mianğõra ikmaok malbanbukõra keu kewõ kõl gulim gihizal: Nõñõn mutuk bõrõni nõrõpke ala köulukõbiga Anutunõj nup memegõ mötmõt kalem gihiiga uruge ahõzawi, mi mönõ mem gulinõnga kõnõp bõlam ewõ kõhöiba jeba qahõ ilin alma. ⁷ Keu ki mötmörinõj anõk: Anutunõj Uña Tõrõñi mi zirin zirin aka qarõsõmbu mötpingõra qahõpmõ, nanñi kukõsumgõ Uñañi neñgiiga õlõp uruninan jõpakõm aņguba ahakmemenini tõrõrõk galõm kõl aņguba kinbin.

⁸ Mianğõra Kembuninaņgõ keunji nanğõba jim sehimamgõ taņqañ kude akñan. Mewõ qahõpmõ, mönõ ni ewõ aka malman. Nõñõn Kembugõ nupñi memba malbiga mianğõra kõsõ mire al niņgigetka tatzalmõ, tõndup nõngõra aka gamu kude möta malman. Mönõ kõhöiba ni ewõ awõsamkakak kinda urugõ nup memba malman. Ölöwak Buņagõra aka aņgõsirip ak gihibeak ewõ, mönõ mianğõ sihimbõlõñi möta mökõsõņda bisiba malman. Anutunõj kukõsum gihimakzawaņgõ dop mi õlõp nõmbuk mohotņe kapan kõla bisiba malbit.

⁹ Anutunõj möpñañgõ möpñe Suep gõlme qahõ miwikñaim etkiba nalõ mianğõreñ neņgõra mötmöriba areñ kewõ alõk: Anutunõj Kraist Jisõsgõra aka kalem möriam neņgima. Areñ mi ali ahõiga mala kota malgetka nini ahuin. Ahuinga Anutunõj nini yaņgõ buñañi aka sarakñi malbingõra neņgohola amõt qem neņgiyök. Naninak yuai õlõpñi ahinaņgõra aka qahõ möwõlõhõm neņgiba neņgoholõkmõ, nanñi areñ walñi mi wuatañgõba kinda neņgoholõk. ¹⁰ Areñ walñi mianğõ õlñi mi nalõ kewõñe aukñe asuhuyök. Amõtqeçe Toninan asuhuba Anutugõ kalem möriamñi mokom neņgiyök. Kraist Jisõsnõj asuhuba kõmupkõ õsumñi qeba tulumgõi eriga Ölöwak Buñañi indeliga asariyök. Buña keu mi möt nariba õlõp malmal

* 1:5: Apo 16.1, 11; 1 Tim 2.7

kömbönanji miwikñai ba teteköñji qahö köhöiba mala nalö kunöñ qahö kömum köhöibin.

¹¹ Anutunöñ ni Ölöwak Buña jim asariba ambazip kusum enjimangöra kunyum niñgiiga melaimelai azi aposol akzal. ¹² Aposol akzalanöñ aka nupñi köhöiba membiga anöñsiripñi bisiba sihimbölö mörakzal. Suep Azi möt narim wanjimakzali, nöñön yanö könanji ölop möt yaközal. Mianöñra awösamkakak kinda gamuni qahö mörakzal. Qahö! Anutunöñ möt narim niñgiba Buña nupñi al niñgiyöhanö dop ni galöm köl niñgimapakö köhöiba malma. Mewö maliga nupñan qahö sohoba eriga mal öñgöba nalö ketanö anöñgotpin. Mewö möt narim köhöizal. ¹³ Mötnaripkö keu urunini möhamgömapkö köhöizawi, nöñön keu ölni mi kusum gihiba silik ölopñi kondel gihiba malal. Mi mönö uru köñömge ala wuatangöba malman. Nini Kraist Jisösbuk mohot kininga jöpaköm enjimakzawi, göñön mönö urukalem mianöñ urunö malman.

¹⁴ Anutunöñ geke möt narim gihiba yuai ölopñi pakpak gihiiga bunöñgi akzawi, mianöñ lolonqalon aka sohobapuköra mönö mi galöm memba malman. Unöñ Töröñan urunine kinda maljawi, mönö yanö kukösum qakñe yuai ölni mi galöm kölnöñga kahaimök ahöma.

¹⁵ Eisia prowinsö neñakurupni yeñön körek nömosöta andö nunguget, mi mötzan. Azi qetñiri Figelus aka Hermogenes yetköñ yanöñ sutñine maljahot. ¹⁶ Tosatñan nömosötketmö, Onesiforus yanöñ qahö. Mianöñra Kembu, gi mönö Onesiforusöñ saiwaurupñi ak kömum enjinöñga malme. Azi mianöñ mönö nöñgö tapepnöñra (munögamunöñga) sisit gamu qahö ak niñgimakzapmö, nalö gwötpuk mianöñreñ köñö-ölöwak qem niñgiiga imbini böñjöñ kölökö. ¹⁷ Onesiforusnöñ Rom sitinöñ ki kanöñga nalö mianöñreñök nöñgöra kapan köla jaruba mala miwikñaim niñgiyök. ¹⁸ Yanöñ mutuk Efesus sitinöñ denöwö baukbauk ketanö ketanö aka mem amqem niñgiba malöhi, mi nangak ölop möt kömuzan. Mianöñra nalö ketanö Kembangö qöhöröñe anöñgoringa Onesiforusnöñ ak-kömukömugö töwanö miwikñaimapaköra köuluközal. Mewö.

2

Kraist Jisösgöra mönö bim qeba malman.

¹ O mötnarip nahöni Timoti, gi mönö Kraist Jisösbuk qekötahöba kalem möriam urunö böñ qeba köhöiba kinman. ² Nöñön Buña keu kusum gihibiga gwötpukñan neka nanöñgöba jiget mötnöñi, mi ambazip möt narim engienöñgö dop akzei, mönö yanö bunöñga ahömapköra al enjiman. Mewö al enjinöñga ahöi ölop ambazip tosatñi toroqeba kusum enjimeanöñgö dop akñe.

³ O Timoti, gi mōnō Kraist Jisōsbuk kindā yarō aziñi akōdamunᶅambuk aka kapaᶅ kōla kōhöikᶅanōk bim qeba malman. Anᶅōsirip ak gihimeī, miāᶅᶅō sihimbōlōñi mōnō mōta mōkōsōᶅᶅda bisiba malman. ⁴ Yarō azigō tandōkᶅi kewō: Suahō galōm bohōñinan azi eᶅᶅōmeiga yarō kambugō areᶅñōᶅ aᶅᶅota anda kaba nup tōp memba maljei, yeᶅñ mōnō kōrek galōmñinan jim kutumakzawaᶅᶅō dop tem kōla akingō jōjōrōba kinje. Mewō kindā nanᶅini malmalgō naᶅᶅōnaᶅᶅōᶅōra yuai kun qahō memba malje. Uru deᶅᶅeᶅ qahō malje.

⁵ Miāᶅᶅō dopkeuᶅi kun kewō: Mōnahot aᶅᶅolat azinōᶅ aonᶅitnōᶅ aᶅᶅota jimkutukutu galōmᶅᶅō keuᶅi oᶅᶅita osumᶅan laᶅ anjawi, yaᶅñ mōnō akōdamunᶅambuk qahō akᶅa. Yaᶅᶅō nōrōpᶅe luhut alalgō ila kun qahō kōlgetka gema. Miāᶅᶅōra gi mōnō diᶅᶅiᶅanōk anman. ⁶ Mewōᶅanōk kōlkōmōt azinōᶅ nup lōmbōtᶅi meiga oᶅᶅi asuhuiga mutuk anda jeᶅi qeba neiga dop kōlma. Tosatᶅan lōwōrigeri, yeᶅñ yaᶅᶅō andōᶅe kame. Gi mōnō miāᶅᶅō dop kōhöiba nup memba malman. ⁷ Keu ohozali, mi oyoᶅñōᶅ lōmbōriiga Kembunōᶅ mōnō mōtkutukutu gihiiᶅa mi pakpak oᶅp mōt asariman. Miāᶅᶅōra mi mōnō uru kōnōmᶅe ala mōtmōriiba malman.

⁸ Mōnō Jisōs Kraist mōtmōriiba malman. Nōᶅñ Ōlōwak Buᶅa jim asarimakzali, Jisōsnōᶅ keu miāᶅᶅō dop kiᶅ Deiwidkō gwōlōnarōkᶅa ahuba Amōtqeᶅe Tonji aiga Anutunōᶅ mem gulii kōmupnōhōk wahōrōk.

⁹ Nōᶅñ Ōlōwak Buᶅa keu kapaᶅ kōla jim asariba aᶅᶅōsiripkō sihimbōlōñi mōtpiga kegwek-kahasiliᶅi azi ewō kōsō gwarō mem niᶅᶅigetka tatzal. Mewō tatzalmō, Anutugō Buᶅa keuᶅi mi mōnō qahō jōhöba gwarōhöᶅet. ¹⁰ Kōnaᶅi miāᶅᶅōra aka nōᶅñ sihimbōlō pakpak mōta mōkōsōᶅᶅda kōhöiba kinjal. Anutunōᶅ ambazip nanᶅaᶅᶅōra mōwōlōhōm eᶅᶅiyōhi, nōᶅñ mōnō yeᶅᶅōra aka kapaᶅ kōla bim qeba maljal. Kraist Jisōsnōᶅ amōt qem eᶅᶅii yeᶅñ mewōyōk letota oyaeᶅkoyaeᶅ akᶅeᶅōra mōtzal. Uruᶅini melenᶅda malme ewō, mōnō Suepkō asakmararaᶅñōᶅ oᶅᶅōba tetekōᶅi qahō kōhöiba mala mal oᶅᶅōme. ¹¹ Keu ki mōnō pōwōwōm kōhöikᶅi akza,

“Nini urunini walᶅan yambuk mohotᶅe kōmui maljin ewō, mōnō mewōᶅanōk yambuk kōhöiba malbin.

¹² *Yambuk mohotᶅe sihimbōlō mōta mōkōsōᶅᶅda maljin ewō, mōnō mewōᶅanōk yaᶅᶅō bentoᶅoᶅ uruᶅe yambuk galōmkōlkōl akin.

Nini i qaᶅ kōljin ewō, yaᶅñ mōnō mewōᶅanōk qaᶅ kōl neᶅᶅiba neᶅᶅehōrōᶅ kōlma.

* 2:12: Mat 10.33; Luk 12.9

13 Nini andö qem wanjiinga likepni melenj neŋgimapkö keu jöhöi ahözawi, yañön mi qeapkömamgö osima. Mindinçindinç aka nanñi könañi utekömamgö qötötançömakza. Miançöra peksek aka keunini pöndañ qahö wuatañgöbin ewö, yañön mönö töndup (misila) keunji pöndañ wuatañgöba miançö dop ak neŋgima.” Mewö.

Anutugö Buña nup azi kewö aka malman:

14 O Timoti, keu ki ölüm engubapüköra mi mönö jim gulim engiba Anutugö jemesoholñe kewö jim kutum engiba malman: Mötnaripkö keu imbiñi imbiñi mi mönö melençelença möndömkösök kude akñe. Jitnakölik mönö qahöpmañöp bauköm neŋgimakzapmö, tosatan çoranora keu mewöñi möta enjololoñ aketka mötnariçñinan sohoi ayuhubepuk. 15 Göñön mönö Buña nupkö esapesap könañi könañi mi luhut alnönça Anutunöñ geke “Dop köljan,” jimapköra kapan köla kinman. Gi Kraistkö nupköra gamu kude möta malmanmö, Buña keu ölnji mönö törörök mendença uruñini kuñgum engiba malman.

16 Gölmegö keu oyoñdewedewet omanji omanji mi mönö yaköriba andö qeman. Tosatan mi sehiba jiba mala mewö mianön gölmegö ançöjörakñe qekötahöba Anutu toroçeba nönönçan aka kahapmahap ahakze. 17 Uzi köhöikñi (qetñi kensö) mianön busu siribuk qem qariba yöhöba anakzawi, yeñön miançö dop keu omanji jiba mianön ambazip mem bölim engimakze. Yeñgö kambunöñ azi yahöt qetñiri Himeneus aka Filetus maljahot. 18 Yetkön keu ölnjançö könañi mosöta janjuñ aka keu sinñi kewö jimakzahot, “Urumelen ambazip neñön lök guliba wahöta maljin. Miançöra könañep kömupnöhök kunbuk qahö guliba wahötpin.” Mewö jiba tosatan enjololoñ mem ençiyohotka mötnariçñinan bölimakza.

19 *Mewö bölimakzapmö, Anutunöñ tandö pöwöwöm köhöikñi kuñguyöhi, mianön mönö töndup qahö uruba kinja. Miançö muñgemñi mi kewö ohoget ahöza, “Kembunöñ nanñi buñañi akzei, mi ölöp möt kutum engiza.” Muñgemñi kun kewö, “Ambazip Kembangö qetñi memba qetzei, yeñön körek mönö ahakmeme bölöñi qem yaköriba malme.”

20 Miri ketanji miançöreñ jout, kimbut, alnene, umnene könañi könañi ahöza. Tosatan ipnöñ aka gwaköm gölmenöñ memenji, mi nalö dop memba nupnöñ alakzin. Tosatan goul aka silwönöñ memenja. Aködamunñinambuk mewöñi mi sösoñgai nalöneyök nupnöñ alakzin. 21 Miançö dop kuñjan keu omanji mosöta nanñi köl köñjorat mem ançuzawi, yañön mönö kimbut goulnöñ memenji kun ewö akñe. Toñan i memba nup aködamunñambuknöñ ali memakñe. Mi meiga töhötmöriamñambuk aiga Ketanjanñan yançöra söñçaimakñe.

* 2:19: Jan 16.5

Anutunöŋ mem sarahim waŋgiiga titingitŋi kinda nup ölöŋŋi pakpak memangö jöjöröba kinma.

²² Sepguli malmalgö sihim kömbönaŋi bölöŋan galöm ak ghibapuköra mönö galöm mem aŋguba malman. (Nupkahö ölnan etpapaköra mi jizal.) Esapesapnöŋ öröm gihimakzei, mi mönö qizingöba andö qeba malmal kewöŋi malmangöra kapaŋ köla malman: Ambazip uru sarakŋaŋgö qakŋe Kembu bauköm eŋgimapköra qerakzei, yembuk mönö ahakmeme diŋdiŋi wuatanaŋöba Anutu törörök möt nariba ölna jöpaköm aŋguba luainöŋ malme.

²³ Tosatŋan kezapjupjup keu jiba oyoŋdewedewet ala jit-nakölik aketka goranora aŋgururuk asuhumakza, mi ölna mötzan. Mianaŋöra mi mönö yaköriba andö qeba malman.

²⁴ Kembugö nup meme azi akzawaŋön mönö aŋgururuk akŋawaŋgö dop qahöpmö, ambazip körek guŋböŋjönjön qakŋe ak eŋgiba aŋqeba kusum eŋgiba malma. Aŋgösirip ak waŋgigetka mi köhöiba mökösoŋda malma. ²⁵ Tosatŋan tuarenjoŋ ak waŋgigetka i ölöŋ uruluai qakŋe mutulaŋgöba mindiŋgöm eŋgimakŋa. Mewö ak eŋgiiga Anutunöŋ uru mölöwörim eŋgiiga ölöŋ Buŋa keu möt kutuba uruŋini melenbeak. ²⁶ Tuarenjoŋ ambazip yeŋön Bölöŋi Toŋaŋgö mötöp simbanöŋ tetekögetka gwaröhöm eŋgii jitŋi tem köla ahakze. Mewö aka imbiŋini möta urumötmötŋini ahuiga yaŋgö kösönöhök lolohoba etpeak. Mewö.

3

Nalö teteköŋe malmal böliba aŋgöjörakŋambuk akŋa.

¹ Keu kötŋi ki mönö möt kutuba malman: Jisös kaka nalöŋan töriiga ambazip könaŋamŋinan bölöŋa teteköŋe malmal kan-ŋamŋambuk kewö asuhuma: ² Ambazipnöŋ nanŋinaŋgörök mötmöriba moneŋ yuai giriŋjabak membagun membingö nepaqepalok (gridi) köpösöŋgömakŋe. Silenŋini möpöseiba korua ewö ginginŋini töröreiba söŋgöröqök mala uruqeŋe keu töhöreŋ laŋ jimakŋe. Iwinamŋini yeŋgö jitŋini qahö tem köla yuai ölöŋnaŋgöra saiwap qahö jiba nemsep-pamsep (nemhölöök) ahakŋe. Anutugö nesampurek nöŋöŋan ahakŋe.

³ “Nanŋi lömböra,” jiba wösö mötmöt qahö ahakŋe. Tosatŋi yeŋgö siŋgisöndokŋini qahö mosöta mianaŋgö urubölöŋi bisi-makŋe. Andöqeŋe keu yöhösaŋ jiba nanŋini qahö galöm köl aŋguba ambazip lapköba öröm ureim ak eŋgimakŋe. Ahakmeme ölöŋŋi tököba mianaŋgö ölan eŋgöhömakŋa.

⁴ Mamalolo aka nanŋini imbi-imbi wuatanaŋöba jaubatbat ahakŋe. Söŋgöröqök mala jakbak-oraŋböraŋnöŋ uruŋini uwu-tapköiga urukönöp ahakŋe. Silegö sihim sösoŋgainanaŋgöra gwötpuk ak eŋgiiga Anutugöra mötket eretŋi aiga göragöra

ahakne. ⁵ Anutugö Buja nup bahösapsap bisiba silebile memba Sonda areñ lañ wuatangöba möndömakzemö, ahakmemeninan Anutugö kukösumñi mi je köndat qeba qañ kölakze. Ambazip mewöñi mi mönö jabö ala qizingöba andö enguba malman. ⁶ Yengöreñök tosatñan lañ liliköba ambazip mirinñine öngöba kelök keunöñ uruqeçe mem engiba kezapñini kumbaumakze. Kumbauegetka ambi tosatñan löwöriba yengöreñ qekötahömakze. Ambi singisöndokñinanğö gamugöra et enguiga sihim kömbönañini könañi könañi mienön yeyasenñeñ mem engigetka siksauk akzei, yeñön i bawian mönera aka köpeim engigetka keu mötöpñine et engumakza.

⁷ Ambi mewöñi mienön möt lömböriba sundan keu kusum engimegö möndöba mörakzemö, Buja keu ölnangö könañi mi nalö dop möt kutubingö osimakze. ⁸ *Ijpt kantrigö tirip qözölgözöl azi qetñiri Janes aka Jambres yetkön Moses tuarenjoñ ak wañgiyohot. Takapulaka ambazip yeñön mi- etkö dop Buja ölnangö tuarenjoñ ahakze. Ambazip mewöñi yengö mötmötñinan sohoiga kahapmahap akzei, mienön Anu- tunöñ mötnariñini esapköi et enguiga Kembubuk kinkinñinan sööreima.

⁹ Nalö töröpñi silenini memba öngömemö, nupñinanğö ölni mi nalö qahö köriiga pömsöm qema. Ijpt azi yetkö könañamñiran aukne asuhuyöhi, yengö uruqahöpñinanğö könañan mönö miangö dop aukne asuhui ambazip körekñan ek asarime. Mewö.

Polgöreñ jimkutukutu keu teteköñi

¹⁰ Yengöreñ mewö asuhumapmö, nöñön malmalnangö tohotñi murutñi kuñguba areñ alal. Ambazip Buja keu kusum engiba ahakmemeni aka memba malali, göñön mi lök eka möt kömuzan. Malmalnangö tohotñi wuatangöba mötnaripkö kölguliguli pöndañ memba sihimbölö mökösoñda malali, miangö kösohotñi jiba jigetka möt sölöngözan. Urumelen alaurup urunan jöpaköm engiba malal. Tuarenjoñ angösirip ak niñgigetka miangöreñ kapañ köla köhöiba kinda malal. ¹¹ *Sesewerowo kahasililiñ könañi könañi ak niñgiba malgeri, mi mötzan. Antiokia, Aikoniam aka Listra taon karöbut miangöreñ sihimbölö nöngö qakne öngöiga wahöjalini mörali, mi yuai kanjamñambuk ahök. Iwinangö jitiñi! Angösirip mökösoñda bisiba malalmö, Kembunöñ mi pakpak miangöreñök meköm niñgiyök.

¹² Keu ki mötnöñ: Ambazip Kraist Jisösbuk mohot kinda malmal köhöikñi mala miangö kölguliguliñi akingö mötzei, yeñön körek sesewerowo miwikñame. Ni angösirip ak niñgiget ewö, tosatñi iñini mewöyök ak engime. ¹³ Tirip qözölgözöl

* 3:8: Eks 7.11 * 3:11: Apo 13.14-52; 14.1-20

ambazip bölöñi Buña nup silesile memba öñömböböp akzei, yeñön toroqeba bölömqölimakñe. Yeñön ambazip tosatñi tilipköm engiba nanñini mewöyök tilipköm anguba malme.

¹⁴ Yeñön mewö malmemö, Timoti gi Buña keu öñi möta uru könömge ala möt narim köhöizani, mönö miangören toroqeba böñ qeba kin köhöiba malman. Denike yeñön kusum gihigeri, göñön yeñgö könañamñini möt kutuzan. I möt narim engizanañgöra mönö Buña keu töp memba kude söörauba mosötman. ¹⁵ Urumelenjö Buña Kimbi Töröñi mi morökötkeyök möt sölöñgöba mala kotzan. Göñön mönö mi oyoñda mötmörinöñga mötkutukutugi asariiga miangö qakñe kinda Amötqeqe Tonañgö könañi möt asariman. Mi möt asariba Kraist Jisös möt narim wañginöñga amöt qem gihiiga toroqeba letota malman.

¹⁶ Anutunöñ Buña Kimbigö keuñi pakpak mi ambazip tosatñi sölölohöm engii ohogetka kewö mem ölöwak neñgimapköra aka ahöza: Mi oyoñninga Anutunöñ urunine sölölohöba köna öñi kusum neñgiba bölöñamñinañgöra tembula jim neñgiba mindiñgöm neñgimakza aka malmal solanñi malbingöra goro neñgiba köl gulim neñgimakza. ¹⁷ Anutugö ambazip neñön mi oyoñda köl guliba Anutu jitañgö dop köhöiba aködamuninambuk aka nup ölöñi pakpak membingö jöjöröba malbin. Mewö.

4

Polnöñ nupñi undumñi Timotigö qakñe alök.

¹ Kiñ Kembunini Kraist Jisösnöñ asuhuba jebuk malbini me kömumba ahöbini, neñgö keunini kewöta jim teköba tosatñi nini bemtohoñe ala galöm köl neñgima. Nöñön Jisös mi aka Anutu yetkö jemesoholñire kinda gi urugö nup memangöra jim kutum gihizal. Mi wuatangömangö jiba keu mi jöjöpañ keunöñ jöhönöñga mötpi dop kölma.

² Kewö jim kutum gihizal: Göñön Buña keu jiba ambazip uru kuñgum engiba malman. Mötmegö nalöñini dop köl engiza me qahö dop köl engiza, mönö töndup kapañ köla wahöta keu jim asariba malman. Ambazip bölöñamñinañgöra jim engiba mindiñqindiñ aka galöm meme keu jiba uruwahöt keu engiba malman. Keu mötme me qahö mötmea kun, mi töndup mönö mökösoñda kinda köna öñi nalö dop kusum engiba malman.

³ Neñön mötnaripkö keu nalö kewöñe ambazip ölöwakñegöra kusum enjimakzinmö, nalö murutñi kun kam kuñguiga miangören mötnaripkö keu kemañi kun mötpepuköra tököba kezapñini gwözöñ akñe. Keu murutñi murutñi mötpingö kezapñini köröpñi köröpñi aka aziña azi sesegilgil öröm

enğıgetka kaba ambazip keu i me wai mötpingö sihimñi mötzei, miangö dop kusum enğıgetka malme.

⁴ Mewö mala Buña keu ölni mötpinbuköra nönöngan aka kezapñini gwözönda bem sambanñi sambanñi lañ jiji jimakzeangörej göröken melenđa mi kezap ala möta malme.

⁵ Malmal mewö me mewö uteköba asuhumawi, Timoti gi mönö töndup böñ qeba zeñ kinda ahakmemegi törörök galöm köl aŋguba malman. Aŋgösirip ak gihimei, miangö sihimbölöñi mönö mökösoñda bisiba malman. Urukunğukunğu (ewanjelis) azigö nup areñ mi körek dop köla mem teköman.

⁶ Nalö köröpñi bauköm gihimangö osimamangöra mewö jizal. Tandö lopioñ möpöseibingöra sömbup qeba jakenöñ ala ohogetka köwaknöñ öngözapma. Miangö dop nöñön malmalni Anutugöra ala kölenđa nupñi memba malalajöra gawman yeñön keuni jöhöba nunğuetka nani sepi mokomangö dopdowizal. Gölme ki mosötmami, miangö nalöñan lök kam kunğumangö dopdowiiga mötzal.

⁷ Mönahot aŋğolat azinöñ ösumtiti aonğit nalöñe luhut almangöra ösumñi pakpak qezaköba tiba anjawi, nöñön miangö dop mötnarip köl guliba aonğit aködahunğambuk ak teközal. Kraist möt narimangö keu jim jöhöyali, mi qahö köyatiba qan kölalmö, miangö bimñi mönö pöndañ köhöiba qeba malal.

⁸ Kembunöñ jimtekötekö Toñ diñdiñi aka malmalni kewöta solanñi aka malali, miangö ila soromñi mi jim teköm niñgiiga nöngö mamböt ahöza. Kembunöñ lilingöba kamawi, nalö miangörej mi niñgiba imbine köli geiga qetbuñanambuk akñam. Mi nöngörök qahö niñgimapmö, ambazip jöpaköm wañgiba kunbuk asuhumapkö al mambörakzei, mi yeñgö imbiñine mewöyök köli gem enğima. Mewö.

Neñakurupnan nömosöta qeñgalanğa kölget.

⁹⁻¹⁰ *Nalö kewöñe gölmegö ahakmeme aka memakzei, neñakni Demas yañön uruñi miangörej jöhöba nömosöta Tesalonaika sitinöñ anök. Neñakni Kresens yañön Galesia prowinsoñ anök. Taitusnöñ Dalmesia gölmenöñ anök. Miangöra gi mönö zilañ nöngörej kamangö kapan kölman. ¹¹ *Luk yañön nanjök nömbuk maljit. Maknöñ welen qem niñgimapköra gwötpuk möta yañgöra osizal. Miangöra Mak wañgita mohotñe kamahot. ¹² *Neñakni Tikikus melaim wañgibiga Efesus sitinöñ anök. ¹³ Troas taonöñ mala malukuni azi qetñi Karpus yañgö mire mosörali, mönö mi memba kaman. Mewöyök kulem lama sileñe ohoba lipiñgeri, nöngörej lama sile mi

* **4:9-10:** Kol 4.14; Flm 24; 2 Kor 8.23; Gal 2.3; Tai 1.4 * **4:11:** Kol 4.14; Flm 24;

Apo 12.12, 25; 13.13; 15.37-39; Kol 4.10 * **4:12:** Apo 20.4; Ef 6.21-22; Kol 4.7-8; Apo 20.6

mönö kapan köla meman aka mianğö andöje buk tosatji mi mohotje memba kaman.

14* Aleksander, silwö kopö ohom qeköqekötahö azi mötzani, yañön bölöñi kónañi kónañi gwötpuk ak ningiba malök. Kembunöñ ahakmemenji kewöta mianğö dop likepñi melen wañgiiga qakñe öñgöi sihimbölö mötmawi, mi mötzal. 15 Yañön keuninañgöra gwötpuk tuarenjoñ ak nenğiba malök. Mianğöra gi mewöyök mönö yañgöra galöm mem aņguba malman.

16 Indim mutukñi kutukutulan keu jake bohonje al niņgigetka keuni likepñi jibiga kunjan kun qahö kaba ni nañgöm niņgiba jiyökmö, alaurup pakpak yeñön buratiba nömosötket. Anutunöñ siņgisöndokñini mianğö likepñi qakñine albatpuköra köuluközal.

17 Yeñön nömosötketmö, Kembunöñ bauköm niņgiyök. Nöñön Buņa keu jiba ambazip uru kuņgum eņgiba nup mi körek mem tekömangöra aka mem köhöim niņgiyök. Kantri pakpak yeñön Buņa mi mötmegöra möta bauköm niņgiba laion sömbup kalñi yeņgö numbuņine gil niņgibepukö aņgön köla jitñineyök meköm niņgiiga eral.

18 Kembunöñ bölöñi kónañi kónañi mem niņgibepuköra meköm niņgiiga ölop Suep bemtohoņaņgö uruņe eu öñgömam. Kembugö qetñi mönö sundan möpöseininga nalö teteköñi qahö aködamunñambuk aka ahöba öñgöma. Keu mi öñja.

Yaizözkök keu teteköñi

19* Gi mönö nöñgö yaizözkökni Prisila aka aņñi Aqila yetköra aka Onesiforusgö saiwaurupñi yeņgöra jinöñ mötme.

20* Neñakni Erastus mosötpiga Korint sitinöñ malja. Trofimius i Miletus sitinöñ mosötpiga kawöl yöhöi ahöza. 21 Mianğöra kömunjañ kie uru nalö qahö kaiga mönö bapñe kianğöreñ nöñgöreñ kamangö kapan kölman. Azi qetñini Yubulus, Pudens, Linus, Klodia aka urumelen alaurup pakpak yeñön yaizözkökñini jiba algetka göhöreñ kaza.

22 O Timoti, Kembunöñ unagi kötuetaköba göbuk kinma.

Anutugö kalem möriamñan mönö embuk ahöma. Mewö.

* 4:14: 1 Tim 1.20; Sum 62.12; Rom 2.6 * 4:19: Apo 18.2; 2 Tim 1.16-17

* 4:20: Apo 19.22; Rom 16.23; Apo 20.4; 21.29

Taitusgö Kimbi Polnöŋ Taitusgöra Kimbi alök. Jim-asa-asari

Azi gwabö qetŋi Taitus yaŋön uruŋi melenŋda Polbuk öröröŋ jöhöba bauköba misin nup meyohot. Memba köwet sutŋe gölme jölanŋi qetŋi Krit (Arete) miangöreŋ malohotka Polnöŋ kembaŋe kutuba alabaukŋi mosöriŋa zioz nup arengöba ek kewöta galöm kölöök. Polnöŋ mosöta anda yaŋgöra köuluköba mala Buŋa Kimbi ki ohoyök.

Krit mi keu Grik miambuk mindiribanbuk. Krit mi köwet sutŋe gölme jölanŋi kun aka Grik (Greece) mi kantri kun.

Polnöŋ Taitusgöra waimanŋat karöbut möta qambaŋ keu kewö ohom waŋgiyök: Krit yeŋgö könaŋini mi gongim teköi baunam jegömöl aka malget. Tosatŋan uruŋini melenŋetka malmalŋinan diŋgiyöhi, yeŋön kunbuk bölibepuk. Miangöra yeŋgö jitmemeŋinan silik ölop kötökŋi kondela köuluk aka Baiböl stadi nup qahö mosöta kambuŋini mindiŋgöba malmegöra jiza. Uru melenŋet yeŋgö sutŋine kambu morömorö mi denöwö mindiŋgöba kusum engiba malme? Azi namŋi, ambi namŋi, ambi seram, azi gwabö aka welenqeŋe yeŋgö goro keuŋini mi nanŋök nanŋök kewö jim asariza, “Uruŋini melenŋda Buŋa keu wuatangöba luainöŋ mala ketanŋi yeŋgö keu bapŋe anda jeŋep uruk nup ölopŋanök memba kinda julbepüköra kazik aŋgururuk mosöta malme.”

Buk kiangö bahöŋi bohonŋi 5 mi kewö:

Polnöŋ aposol nupŋaŋgö könaŋi jiza 1.1-4

Anutugö jitmeme yeŋgö goro keuŋini 1.5-16

Ambazip kambu morömorö yeŋgö goro keuŋini 2.1-15

Urukunŋukunŋu aka galöm meme keu 3.1-11

Yaizökzök aka keu teteköŋi tosatŋi 3.12-15

Polnöŋ aposol nupŋaŋgö könaŋi jiza.

¹ Anutunöŋ ambazip möwölöhöm engiyöhi, engö mötnariŋinan asuhaŋa qarimapköra aka Jisös Kraistnöŋ Pol ni melaim niŋgiiga yaŋgö aposolŋi akzal.

Nöŋön Anutu welenŋi qeba keu ölni kusum engimakzal. Keu ölni mi möt kutuba kölö gulime ewö, engö malmalŋinan mönö uteköba letorakŋa. Miangöra kimbi ki ohozal.

² Anutunöŋ keu muneni jimawaŋgö dop qahö yaŋön möpŋaŋgö möpŋe malmal köhöikŋi neŋgimamgö jim jöhöba miangö andöŋe yuai pakpak miwikŋaiyök. Enön keu ölni möt kutuba möt narigetka mianŋön mönö nam kölö engiiga malmal köhöikŋe aŋgotpiŋgöra al mamböta jörömqröm ahakze.

³ Anutu, Amötqeqe Toninan oyaenƙoyaenƙö keuƙi jim jöhöba mianƙö nalöŋi diŋdiŋi ali kam kuŋguiga mianƙöreŋ Buŋa keuƙi indela mi jim sehibingö jimkutukutuŋi alök. Mianƙö dop mi jim asarigetka Anutunöŋ nöŋön mi jim sehimamgö möt narim niŋgiba kuŋgum niŋgiyök.

⁴ *O mötnarip nahön sorokni Taitus! Nöŋön bauköm gihibi urugi melenƙa alabaukni aka mohotŋe Kembu möt nariba maljit.

Iwi Anutu aka nanini Amötqeqe Tonini Jisös Kraist yetkөн mönö kalem möriam gihiyohotka luainöŋ malman.

Galöm jütjememe yenƙöreŋ keu areŋ

⁵ Köwet jölanŋi Krit (Crete) mianƙöreŋ mohotŋe misin nup memba kambaŋe gömosötmanƙö aka kewö jim kutum gihial, “Uruŋini melenƙet yenƙön ilinƙösöŋ laŋ maljei, i mönö areŋgöm enƙiba (pasta aka) jitŋe memeni miri taon dop kuŋguba kusum enƙinöŋga areŋinambuk zioz nup memba malme.” Mewö jiba deŋnit.

⁶ *Uruŋini melenƙeri, yenƙö sutŋineyök azi kewöŋi möwölöhöman: Kungö sileŋe pinjitkö keuƙi qahö, anömŋi mohok-kun memba mali nahönböraturupŋan uruŋini melenƙa Anutu möt nariba yanƙiseŋ kezapjupjup silikö keu sileŋine qahö ala jim enƙimakze.

⁷ Urumelenƙönagesögö ketanƙamŋini pasta (bisop)* yanƙön Anutugö könagesö galöm köl enƙimakŋawi, mianƙöra mönö azi kewöŋi kuŋguman: Kungö sileŋe pinjitkö keuƙi qahö, jakbak-öranboraŋ qahö aka urupik qahö. O köhöikŋi qahö namba bim laŋ qahö qeba möndömöndö qakŋe injarere mala monenƙ yuaigöra qahö kapaŋ kölakza. ⁸ Yanƙöreŋ kamei, i ölop köl öroba köyan köl enƙiba keu ahakmeme ölopŋanƙö sihimŋi möta uruŋi mianƙöreŋ ala malma. Kilik-kaluk kekpurikŋi qahö, keu pakpak diŋdiŋanök kewöta sarakŋi töröŋi qainŋi kun aka nanŋi ahakmemeni törörök galöm köl anƙumakŋa.

⁹ Buŋa keu kusum nenƙigetka tandö söran ewö malmal töngumamgöra ahözawi, pastonöŋ mi mönö töp memba mianƙöreŋ qekötahöba kinma. Mewö kinda ölop Buŋa Kimbigö dop mötnaripkö keu kambaŋi kambaŋi ambazip kusum enƙiba mianƙön uruŋini kuŋgumakŋa aka tosatŋan Buŋa keu möwöramgöba qetalakŋei, yenƙö keuŋini goŋgoŋi ölop qeapköba mindinƙögömakŋa. Mewö.

Böhi takapulakani mönö qetal enƙime.

* **1:4:** 2 Kor 8.23; Gal 2.3; 2 Tim 4.10 * **1:6:** 1 Tim 3.2-7 * **1:7:** ouwösiö, zioz paris lida, bisop, nup meme bohonŋi yanƙön qet ketanŋi öne qahö bisimapmö, paris kambu-uruŋi yenƙöra köuluköba kusum enƙiba uruŋini kuŋguba nupŋinanƙö areŋini enƙiba goro qambaŋ qakŋe galöm köla mindinƙögöm enƙimakŋa.

¹⁰ Ambazip gwötpukñan keu qetala kezapjupjup aka sesekñai ewö keu sinñi sinñi jiba ambazip tilipkôm engimakze. Anutugö aiwesökñi silenine yandigeri, yeñgö kambunöhök ambazip jesöñgöñan mewö ahakze.

¹¹ Ambazip mewö miengö keuñini mönö qömbököme. Yeñön Buña keu kusum engibingö möndöba monen yuainini öröbingö möta kösawörañ keu lañ jigetka gamuñambuk ahakza. Mewö aka saiwa tosatñi lök körekñanök mem sohom engigetka enololon aket. ¹² Krit nanñine kezapqetok azi kunñan aiakaninañgöra kewö jiba ohoyök, “Krit ambazipnöñ mönö nalö dop keu munen jiba injarere qölzöm mala ubibi kömböt ewö lilikqilik aka bau numbu nemakze.” ¹³ Yeñgöra keu mewö nanğöba jiyöhi, mianñön mönö ölna. Mianğöra kawölñinan qahöwahi mötnaripñinan asuhuba ölnambuk akñapköra i mönö köhöikñanök terengöba jim engimakñan.

¹⁴ Mötnaripñinan ölnambuk aiga Juda neñgö bem sambanini aka ambazip keu ölni sinğiba jimkutukutu alakzei, keu mewö mianğö kezap kude alme. ¹⁵ Urunini melenñinga Uña Töröñan köl könjörat ak neñgiiga sarakñi akzini, neñgöra nene kungö dönqizizinni qahö ahöza. Neñön nene pakpak ölop nembinañgö dop akzappmö, qewölon ambazip keu ölnañgö yangisen ahakzei, yeñön i me wai aketka uruñinan töndup tölohomakza. Uruñinan kölköljinñambuk aiga uruñinañgö kezapñan duhui mönö bau jegömöl tandök malje.

¹⁶ Yeñön “Anutugö könañi möt yaközin,” jitñinan mewö jigetka aiakaninan mi qañ köla qeapkömakze. Mewö aka Anutugö keuñi qetalgetka imbilonlon möt enñgiiga ahakmeme ölopñi kun memeanğö dop qahö akze. Mewö.

2

Ambazip ketañi yeñgö qambañ keu

¹ Göñön mewö qahö maljanañgöra mönö mötnaripkö keu kemañi kemañi mi Buña Kimbigö dop kewö kusum engimakñan: ² Azi namñi yeñön mönö kilik-kalukñini qahö malgetka göda qem engibinañgö dop akñe. Nanñini ahakmemeñini törörök galöm köl anğugetka mötnaripñinañgö kawölñinan qahöwahi ölni urukalem asuhumakña. Ölni asuhui ambazip törörök jöpaköm engiba malme aka kapan köla böñ qeba kinme. Mewö malmegöra kusum engimakñan.

³ Ambi namñi yeñön mewöyök Anutugöreñ ambi sarakñi yeñgö dop ahakmemeñini aka memba malme. Andöqeçe keu yöhösañ kude ahakñe. Wain o gwötpuk nemegö mötöp simbañe kude anğota qaköme. Urumelen ahakmemegö silikñi ölopñi kondela tosatñi kusum engimakñe.

⁴ Mewö aka mala ambi nembö bapņine maljei, yeņgöra ölöp goro eņgiba malgetka yeņön mewöyök apmoröurupņini urukönömnņinan jöpaköm eņgiba malme. ⁵ Jöpaköm eņgiba nanņini ahakmemeņini törörök galöm köl aņguba sarakņi aka mirigö nupņini nem qerak aka nöņgöp törön qakņe memba apmoröurupņini köyan köl eņgiba apurupņinaņgö keu bapņe anda kötöngöm eņgimakņe. Mewö kusum eņgigetka aka memba malgetka tosatņan Anutugö Buņa keu mi mepaiköba ilitnöj albingö osime. Mewö.

Azi gwabö aka welenqeçe yeņgö qambaņ keuņini

⁶ Azi gwabö yeņgö uruņini mewöyök kewö kuņgum eņgimakņan: Yeņön mönö ölöpņaņgö oyankasak mala nanņini ahakmemeņini törörök galöm köl aņgumakņe. ⁷ Uruņini mewö kuņgum eņgiba nangak ahakmeme pakpak mianğöreņ silik ölöpņi kondel eņgiba malman. Mönö geņmoņ qahö böņ qeba kinda taņörakņi qahö kusum eņgimakņan. ⁸ Keu mötsihimņambuk jiba malnöņga ambazipnöj mepaiköba memba et al gihibingö osime. Mewö jiba malnöņga tuarenjoņurupņinan keu bölöņi jim neņgibingö keu jaruba öļņi qahö miwikņaiba gamuņini mötme. Mewö kusum eņgimakņan.

⁹ Welenqeçeurup mi kewö kusum eņgimakņan: Yeņön ketaņamņini yeņgö keuņini pakpak tem köla keu bapņe anda malme. Sösöņgai ak eņgibingö kapaņ köla kinme. Keu jimei, mi nesilam qakņan kude melen eņgimakņe. ¹⁰ Ketaņamņinaņgö mireyök yuai mohot-hök yahöt-hök mi ölöņ kude memakņemö, ketaņamņinan eņgeka möt narim eņgimakņapköra mönö kapaņ köla kinme. Nupņini pakpak mönö geņmoņi qahö pöndaņ memba malme. Mewö mala Anutu Amötqeçe Toninaņgö Buņa keu kusum eņgimakzei, mi kötön kölgetka öļņi ahui nahömnņambuk ahakņa. Mewö.

Malmal sarakņaņgö nam köipitņi mi kalem möriam.

¹¹ Malmal sarakņaņgö nam köipitņi kewö: Anutunöņ ambazip körek amöt qem neņgimapköra aka kalem möriamņi indeli gölme dop asuhuyök. ¹² Kalem möriam mianğön mönö kopa aņgöjörak malmalgöra “Qahö,” jibingö köna kondela gölmeğö sihim kömbönaņi bölöņi qömbököbingöra köl kusuba mindiņgöm neņgimakza. Ahakmemeņini törörök galöm köl aņguba keu pakpak diņdiņaņök kewöta malbingöra köl gulim neņgimakza. Mewö mianğön Anutugö malmal köhöikņi mi nalö kewöņe köl guliba gölmenöņ malbin.

¹³ Mewö malinga Jisös Kraistnöj kunbuk kamawi, nini nalö mianğöreņ Anutu qetbuņaņambuk aka Amötqeçe Tonini yetkö asakmararaņiri asuhuiga ekin. Nini oyaeņkoyaeņ nalöņi mi kam kuņgumapköra jörömqöröm al mamböt aka maljin.

14 *Jisös Kraistnöŋ mönö neŋgöra aka nanŋi malmalŋi köleŋda mosörök. Nini ahakmeme bölöŋi könäŋi könäŋi miaŋgöreŋök meköm neŋgiba sohopeni memamgö möta köl köŋjörat ak neŋgiba nanŋi buŋaŋi sarakŋi akingöra aka malmalŋi köleŋda mosörök. Mi mosöta qewöloŋnini saŋgoŋniga nanŋi könagesöŋi aka ölop nup ölopŋi ölopŋi membingö urukönöp aka jöjörömakin.

15 Miaŋgö keuŋi mönö kusum eŋgiba ambazip uruŋini naŋgöba köna siŋgimei, mi kukösum pakpakö qakŋe tembula jim eŋgimakŋan. Mewö aknöŋga kunŋan jijiwilit ak gihibapuköra galöm mem aŋguba malman. Mewö.

3

Urumeleŋ eŋön mönö silik kewö aka memba malme:

1 Kusum eŋgiba keu ki mönö köl gulim eŋginöŋga ölop urukönömŋine ala mötmörime: Urumeleŋ könagesö yeŋön mönö kiap gawman aka ketaŋamŋini tosatŋi yeŋgö keu baŋŋine anda keuŋini tem köla malme. Mindimindiri nup ölopŋi memegöra jigetka mi pakpak mönö jöjöröba memakŋe.

2 Uruqeŋe keu töhöreŋ mi kungöra kude jim waŋgime. Aŋgururuk kude akŋemö, ala ak aŋguba urumohot malmegöra kinme. Ambazip pakpak mi guŋböŋjönjönŋ pakpak ak eŋgiba uruluai qakŋe mutulaŋgöm aŋguba malme. Mewö.

3 Nini mewöyök mutuk uruqahö mala qeŋetal aka janjuŋ malin. Sihim kömbönaŋnini bölöŋi könäŋi könäŋi miengö mötöp simbaŋe qaköŋga galöm köl neŋgigetka silegö sihim sösoŋgaiŋi laŋ jarubingöra malin. Körögisigisi qakŋe kegwek-kahasiliŋ aka miaŋgöreŋ malmalnini ayuhuba malin. Tosatŋan imbilonloŋ möta kazik ak neŋgigetka sutnine urukerök ak aŋguba malin.

4 Mewö malinmö, Anutu Amötqeŋe Toninan ahakmemeŋi ölopŋi köleŋda indeliga urukalemŋan asuhum tiŋgiriga kötala uruŋan jöpaköm neŋgiyök. 5 Jöpaköm neŋgiba bohonini jöhöba amöt qem neŋgiyök. Naninak diŋdiŋi mala nup ölopŋi ölopŋi memba malbinahi, miaŋgöra aka qahö neŋgehoriyök. Miaŋgöra qahöpmö, nanŋi ak-kömukömuŋan mönö nam köl waŋgiiga siŋgisöndoknini saŋgoŋniga ahuahu dölökŋi ahuinga Uŋaŋi Töröŋi urunine aliga kölöŋaim neŋgiyök. 6 Anutunöŋ amöt qem neŋgiba Amötqeŋe Tonini Jisös Kraistköra jiiga Uŋa Töröŋi melaiba keleŋmaleleŋ mokoiga urunine geiga maljin.

7 Anutugö kalem möriamŋan nam köl waŋgiiga keunini jim teköi solanibingöra aka Uŋa Töröŋan urunine geiga kölöŋainin. Kölöŋaiba kinda oyaenŋkoyaen malmal teteköŋi qahö malbingö

* 2:14: Sum 130.8; Eks 19.5; Dut 4.20; 7.6; 14.2; 1 Pitö 2.9

jörömqöröm al mamböt akzini, mi ölop buña qem anğubin. Mewö.

⁸ Keu ohozali, mianjön öl töhönña. Göñön mönö keu kewö kapan köla jim tuarim enğiba malman: Ambazip Anutu möt narizei, yeñön mönö jegep aka kinda uruñini pöndañ nup ölopñi ölopñi memegöra ala malme. Mewö akñei, mianjön mönö ambazip bauköm enğiiga nupñinanğö ölni eka “Qetpuk!” jiba malme. ⁹ Tosatñan uruqahö keu aka ambösakon yeñğö qet areñi areñi eraum mötketka goranora anğururuk asuhumakzawi, göñön mönö mi yaköriba andö qeman. Mewöyök Mosesnön Köna keu neñgiyöhi, tosatñan keu mohot mohot mianğöra möndömkösök aketka supapköiga sohomakza. Jitnakölik mewöñi mi yuai omani töhön aka qahöp mahöp bauköm enğimakza. Mianğöra mi mönö andö qeba mosötman.

¹⁰ Kunñan keu mewö jim öröba mianjön urujjul mem enğimakzawi, i mönö galöm meme keu jim wañginönğa qahö tem köliga kunbuk jim wañginönğa yahöt aiga töndup yangisen akña ewö, i mönö közölnönğa urumelen kambu mosöta yaigepñe malma. ¹¹ Yanğö könañi kewö ahöi möt yaközan: Yanjön köna siñgiba öñömböböp köla lolonqalon aka siñgisöndok ahakmeme ahakza. Siñgisöndokñi mianjön mönö könañi kondeli sohom teköi Anutunön keuñi jim teköi könöp siagö buñaya akña. Mewö.

Yaizözkök keu teteköñi

¹² *Ni kömunjañ kie uru nalö ki siti qetñi Nikopolis Grik mianğoreñ mösöhöba malmangö mötzal. Mianğöra Artemas me Tikikus salupke malmapköra melaibi göhöreñ kanğotmawi, nalö mianğoreñ mönö nalö kude qem körimanmö, zilañ mosöta Nikopolis kaba miwikñaim niñgiman. ¹³ *Köna keugö mötmöt azi (loya) qetñi Zenas aka Apolos yetkөн yuai kungöra osiba mözöqözörön aka Krit mianğoreñ qaköba tatpahotpuk. Mianğöra mönö kapan köla öroyuai tosatñan dopñire nañğöm etkinönğa ölop toroqeba anmahot. ¹⁴ Alaurupninan mönö nup ölopñi ölopñi memegö könañi möt soroköba pöndañ jegep aka zeñ kinda uruñini mianğoreñ ala malme. Mewö aketka tosatñan lömböt keta bölökñi sangabañga miwikñaimi, i ölop nañğöm enğimakñe. Mötnaripkö ölni mewö ahuiga malmal gilipitñi (ambetakñi) önewat qahö malme.

¹⁵ Nömbuk ki maljei, yeñön körek yaizözkökñini jigetka göhöreñ kaza. Göñön alaurupnini Krit mianğoreñ Kembu möt nariba uruñinan jöpaköm neñgimakzei, yeñğöra mönö nöñğö yaizözkökni jinönğa mötme.

Kalem möriamnön mönö körek embuk ahöma.

* **3:12:** Apo 20.4; Ef 6.21-22; Kol 4.7-8; 2 Tim 4.12
16.12

* **3:13:** Apo 18.24; 1 Kor

Filemongö Kimbi Polnönj Filemongöra Kimbi alök. Jim-asa-asari

Azi öngöngöñi Filemon mi Kolosi sitinönj mala urunji melenja zioz nup memba welenqeqeñi qetñi Onesimus galöm köliga töndup unjurata Rom sitinönj anök. Mianğoreñ anda Polbuk mutulangöba keunji möta urunji melenja Polbuk Buña nup meyohot. Polnönj kösö mire tata Onesimus toñangöra Kimbi ki ohoba böröñe ala melaiiga Kolosi lilingöyök. Kimbi kianğoreñ urunji melennöhi, mianğö buzupñi indela Filemon urunji kewö kuñguyök: “Gi mönö welenqeqegahö pinjitñi mosöta yambuk urumohok aka köl öröm wañginönğa urumelenj alagi ewö qöhörönge kiniga yañğöra söñgaiba malman.”

Buk kianğö bahöñi bohonñi 4 mi kewö:

Keu mutukñi 1-3

Polnönj Filemon möpöseiza 4-7

Onesimusgöra Filemongö urunji kuñguyök 8-22

Kimbigö keu kötñi bohonñi 23-25

¹ O wölböt alani aka neñakni Filemon!

Pol nöñön Jisös Kraistkö nupñi memakzalanğöra aka gwaröhöm niñgigetka kösö mire tatzal. Urumelenj alani Timoti yañön nömbuk tariga nöñön göbuk keu eraum mötpitköra kimbi ki ohozal.

²* Mewöyök ambi ketañi urumelenj nenini Apia aka Arkipus urumelenğö bimqeçe azinini aka urumelenj könagesö göhö mire tokomakzei, nöñön kimbi ki engöra ohozal.

³ Anutu Iwinini aka Kembu Jisös Kraist yetkön kalem möriam enğiyohotka luainönj malme.

Filemongö urukalemñangöra möpöseiza.

⁴ Nöñön nalö dop köuluköba gi mötmörim gihimakzalanğö dop kewögöra Anutuni saiwap jim wañgimakzal: ⁵ Gi Kembu Jisös möt nariba jöpaköm wañgiba Anutugö ambazip sarakñi pakpak jöpaköba urukalem ak engiba maljan.

⁶ Saiwap jiba kewö köulukömakzal: Mötnaripkan mönö köhöiba pöwöwöm aiga ölop qöhörönñine kinda nembuk mötnaripkö keunji jim sehiba malman. Mewö Kraistpuk qekötahöba kininga kalem ölopñi ölopñi neñgimakzawi, gi mianğö könani körekñanök möt sölonğöman. ⁷ O urumelenj alani, gi ambazip sarakñi körö-ölöwak qem enğinönğa amğöba

* 1:2: Kol 4.17

malje. Urukalemgi miangöra nöñon gwötpuk söñgaibiga miangön uruni nangömakza.

Filemonöñ Onesimus köl örömapköra qesiza.

⁸ Mewö malnöñga Kraistpuk qekötahöziga ölop awösamkakak aka kukösum qakñe kinda yuai akñangö jim kutum gihibilenak. ⁹ Mi töndup Anutunöñ uruñan jöpaköm netkizawangöra aka ölop jimkutukutuni mosöta ulet miyök ulet gi-himam. Gi Pol nöñgö silikni mötzan. Nöñon azi namñi akzal aka Kraist Jisösgö nupköra aka nalö kewöñe kösö miri azia mewöyök akzal. ¹⁰ *Ni kösö miri kiangöreñ alagi qetñi Onesimus aitonögöba bauköm wangibiga uruñi melenäda mötnaripkö nahöni ahök. Miangöra merak yangö numbu jit memba yangöra aka ulet gihizal. ¹¹ Yanön mutuk welen qeba lan möndöba injarere mala qemasolokep ak gihiba malökmö, nalö kewöñe letota gi aka ni ölopñanök bauköm netkiiga ölni asuhumakñawangö dop akza.

¹² Yanön nani wölböt nahöni akza aiga nani wölbötñi ewö melaim wangibi lilingöba göhöreñ kaza. ¹³ Nöñon Ölöwak Buñagöra aka kösö mire tatzal. Miangöra Onesimus jöhöbi nömbuk mala göhö salupke bauköm niñgimapkö mötzal. ¹⁴ Mewö mötzalmö, bauköm niñgimapkö qahö kuñgum gihizal. Sihingan jiiga bauköm niñginöñga dop köljapmö, göñon welenqeqegi niñgiman me angön kölman, miangöra On! qahö jinöñga nanök jöhöm wangimangö osizal.

¹⁵ Onesimusnöñ kewögöra aka gömosörök me? Yanön nalö töröptökñi yaigep mala kunbuk lilingöba kaba göbuk nalö teteköñi qahö malma. ¹⁶ Mutuk welenqeqe omanñi aka malökmö, nalö kewöñe mi ongita azi qainñi kun akza. Uruñi melenäda mönö wölböt alanina akza. Nöñon yangöra gwötpuk ak niñgiiga göñon azi mi eknöñga Kembangö buñani aiga yangöra mewö ni ongita önöñi qahö ak gihimakña.

¹⁷ Göñon nömbuk ala-ala aka maljit mötnöñga nöñon kabi köl öröm niñgibanak ewö, mönö Onesimusnöñ kaiga mewö köl öröm wangiman. ¹⁸ Yuai kun ak bölim gihiyök me yangöreñ tosa kun göhöreñ ahöza ewö, mia mönö nöñgö tosaya jinöñ ahöma. ¹⁹ Ni Pol mönö nani börönan kewö ohozal, "Nöñon mi mekömam." Nöñon bauköm gihibi urugi melenöñga tosagi ketani mi mekömangöra nangi mewöñanök nöñgö buñaya jim teköm angunöñga dop kölbawak. Miangöra ölop kewö jibilenak: Onesimusgö tosanñi mi mönö jinöñga nange tosaya ahöma. ²⁰ O urumelen alani, Kembangö Buñ gihiali, mi mönö melenäda bauköm niñgimangö ak niñgiza. Kraist qekötahözani, miangö

* 1:10: Kol 4.9

dop mönö Onesimus köl örönönga nöngö urunan amgöba ölöwakŋa.

²¹ Keuni tem kölmani, mi möt nariba keuni ohoba könaŋamgi kewö ahöi mötzal: Keu jizali, mi mönö oŋgita qetpuk ak soroköman. Mewö. ²² Keu kun ki: Eŋön köulukögetka Kembunöŋ ni meleş niŋgii eŋgöreŋ kamamgö al mamböta jörömqöröm akzal. Miangöra mönö miri uruŋi kun nöngöra mem kelötman.

Yaizözkök aka kötuetmötuet keu teteköŋi

²³ *Alani Epafraŋs yaŋön Jiŋös Kraistkö nupköra aka nömbuk kösö mire tata yaizözkökŋi ali göhöreŋ kaza. ²⁴ *Neŋakurupni nup mohotŋe memakzini Mak, Aristarkus, Demas aka Luk yeŋön mewöyök yaizözkökŋini algetka göhöreŋ kaza.

²⁵ Kembu Jiŋös Kraistkö kalem möriamnöŋ mönö uŋaŋini kötuetköba embuk ahöma. Mewö.

* **1:23:** Kol 1.7; 4.12
4.10, 14; 2 Tim 4.10-11

* **1:24:** Apo 12.12, 25; 13.13; 15.37-39; 19.29; 27.2; Kol

Hibru Kimbi **Kunöŋ Hibru yenğöra Kimbi alök.** **Jim-asa-asari**

Jisösnöŋ Suepnöŋ öngöi miangö andöŋe yambu 35 miangö dop teköiga azi kun qetŋi qahö mötzini, yaŋön Kimbi ki ohoba Juda urumelen ambazip yenğöŋ alök. Juda yenön Hibru (kian) keu jigeranğöra qetŋini Hibru qetket. Tosatŋan Juda urumelen ambazip mi sesewerowero gwötpuk ak engigetka Jisösgö köna diŋdiŋi mosötŋingö mötmöriba Juda yenğö köna walŋe dumŋe kunbuk anğotŋingö mötket. Köna walŋi mi Köna keugö kapanğölköl.

Kimbi kianğö keu kötŋi 3 mi kewö:

1. Jisös, Anutugö Nahönŋi yaŋön sihimbölä ketanŋi möta mewö mianön Iwiŋi tem kölmangö könanŋi mörök. Mianğöra Suep garata, Moses aka kezapqetok ambazip pakpak enğonğita öngönğöŋi akza.

2. Anutunöŋ Jisös kuŋguiga nalö teteköŋi qahö jike nup galömnini bohonŋi aka malma. Nanŋi sepŋi mokoyöhangöra jöwöwöl ohohonöŋ teköiga jike nup galöm tosatŋi yenğöra qahö osibin.

3. Urumelen neŋön Jisös möt nariinga siŋgisöndoknini mosöta amöt qem neŋgiba kömupnöhök meköm neŋgiiga keŋğötnini qahö mötzin. Jike nup walŋi mi imutimut ewö aiga megetka Jisösnöŋ amötqeqegö könanŋi ölnŋi indela nanŋi jöwöwöl ohoho ewö akŋegöra al anğuyök.

Mötnariŋ ambazip ketanŋi yenğö silikŋinanğö kösohotŋi mi teteköŋe (Boŋ 11) ohoba mötnariŋŋinan sööraubapuköra kewö kuŋgum enğiza, “Sesewerowero ak engigetka miangö sihimbölöŋi mi mönö kapan köla mökösoŋda möta Jisösbuk luhut alme.” Buk kianğö qambanŋi aka galöm meme keunŋi mi nahömŋambuk.

Buk kianğö bahöŋi bohonŋi 10 mi kewö:

Keu mutukŋi: Kraistnöŋ Anutugö könanŋi indel teköyök *1.1-3*

Kraistnöŋ garata pakpak enğonğitza *1.4-2.18*

Kraistnöŋ Moses aka Josua etkoŋgitza *3.1-4.13*

Kraistnöŋ jike nup galöm pakpak enğonğitza *4.14-7.28*

Kraistkö jöhöjöhö arenŋi mi jöhöjöhö arenŋ walŋi onğitza *8.1-9.28*

Kraistkö sep busuŋan jöwöwöl pakpak enğonğitza *10.1-39*

Mötnariŋ mi yuai mutukŋi aka bohonŋi *11.1-12.29*

Ahakhemeninan Anutu uru ölöwak mem waŋgime *13.1-19*

Köuluk teteköŋi *13.20-21*

Uruwahöt keu aka yaizökzök keu teteköŋi *13.22-25*

Anutunöŋ Nahönŋi melaiiga keunji indelök.

¹ Anutunöŋ mönö möpŋaŋgö möpŋeyök könahiba köna murutŋi murutŋi wuatŋaŋgöba keunji indelmamgö mörök. Mewö möta keunji nalö gwötpuk kezapqetok ambazip yengö uruŋine aliga aukŋe jigetka ambösakonurupninan möta mala kotket. ² Mewö mala kotketmö, nalö teteköŋe malinga kewöŋe mönö Nahönŋi melaiiga keunji indela aukŋe jiiga mörin. Nahönŋi yaŋön Iwiŋi bauköiga Suep gölme aka mietkö öröyuainiri pakpak miwikŋaiyo-hotka Nahönŋan nalö teteköŋe yuai pakpakö Toŋi akŋapakö jim teköi malja. ³ Anutugö kaisoŋgolomŋan Nahönŋi ahöm waŋgiiga eta kondelök. Anutugö asakmararaŋan mönö i kuŋguiga biliksik aliga imutimut ewö ehin. Siŋgisöndoknini köl könjörat teköbagun mönö Suep mire öŋgöba dumŋi memba Öŋgöŋgöŋamninaŋgö böröŋi öŋe tatza. Mianŋöreŋ tata Suep gölmeŋgö öröyuai pakpak mi keunji kukösumŋambuknöŋ bisiba galöm köla malja.

Anutugö Nahönŋan Suep garata eŋgoŋgita.

⁴ Anutunöŋ Nahönŋi qet waŋgiiga mianŋön mönö Suep garata yengö qetŋini oŋgita aködamunŋambuk akzawi, mianŋö dop Nahönŋan Suep garata eŋgoŋgita ketaŋamŋini aiga nembö bapŋe malje. ⁵ *Anutunöŋ nalö kunöŋ Suep garataurupŋi yengöreŋök kungöra keu kewö qahö jiyök, “Göŋön nöŋgö Nahöni aknöŋga nöŋön merak göhö Iwigi akzal.”

Mewöyök keu kun kewö jii ahöza, “Nöŋön yaŋgö Iwiŋi akiga yaŋön nöŋgö Nahöni akŋa.”

⁶ *Keu mi dumŋe kunbuk Nahönŋi mutukŋi jim teköiga gölmenöŋ etmamgö ahöhi, nalö mianŋöreŋ mönö qeljiŋe kewö jiyök, “O Suep garataurupni, iŋini mönö körek pakpak yaŋgö waikŋi memba möpöseiba malme.”

⁷ *Suep garata yengöra keu kewö jii ahöza, “Anutunöŋ mönö garataurupŋi mem letot eŋgiiga luhut ewö aka anda kame. Welengeqeurupŋan mönö letota könöp bölam ewö aka anda kame.”

⁸ *Yengöra mewö jiyökmö, Nahönŋaŋgöra keu kun kewö jii ahöza, “O Kambu, göŋön mönö jakömbuak dum tatatke nalö teteköŋi qahö tat öŋgöman. Öröpki kukösum-ŋambuk mianŋön qindinaim neŋginöŋga ahakmeme diŋdiŋan mönö bemtoŋgahö muŋgemŋi aka ahöm öŋgöma.

⁹ Göŋön ahakmeme solannaŋgöra ak gihiiga ahakmeme goŋgoŋaŋgöra irimgi seholiiga kazik aka mala kotnöŋ.

* 1:5: Sum 2.7; 2 Sml 7.14; 1 Hist 17.13 * 1:6: Dut 32.43 * 1:7: Sum 104.4

* 1:8: Sum 45.6-7

Miangöra göhö bemgi Anutu yañon mönö al gihiiga alaurupki enğonğita sösöngai kelöknöñ gömirii maljan.”

10 *Nahönñangö keuñi kun mi kewö, “O Kembu, göñon könakönahije gölmegö tandöñi kuñgunöñga Suepkö jakeni jakeni mienön mönö göhö börösöwögi akze.

11 Suep gölme pakpak mienön opo maluku ewö walñi aka ayapkömemö, göñon mönö köhöiba kin öñgöman.

12 Möki köpeimakzini, göñon mönö miangö dop suep ehekñi mi opo sörö jöhözin ewö köpeim enğinöñga letotme. Yuai pakpak utekömapmö, göñon mönö tandök mohot miyök aka yambugi (yaragi) teteköñi qahö mal öñgöman.”

13 *Anutunöñ nalö kunöñ Suep garataurupñi yeñgörenök kungöra keu kewö qahö jiyök, “Göñon mönö kaba böröni öñje tatnöñga nöñon mönö tuarenjoñurupki nalö sutñi kiangören tim tötal enğibiga et enğuiga göhö köñagahö döññi aketka köiran albin.”

14 Nahönñangöra keuñi keuñi mewö jiyökmö, Suep garata i mönö niñia akze? Körek yeñon Anutugö welenqeçe uñaurupñi akze. Mewö aka ambazip oyaenköyaen buña qem anğumei, i bauköm enğimegöra melaim enğii malje. Mewö.

2

Urunini qahö melenbinbukö galöm meme keu

1 Miangöra Buña keu mörini, mi mönö törörök möt asaribingö kapan köla kezap alme. Gölmönöñ malmalgö iñi me waiñi kunñan neñğuanğiri lañ anda kaba liklak malbin ewö, mönö Jisösgö amötqeçe nupñi onğita öne mala ayuhubinbuk.

2 Keu mi kewö jim tuarimam: Mutuk Suep garata yeñon Buña keu jigetka ambazip jöhöm enğii malget. Mewö mala denike yeñon Köna keu qahö tem köla selñi walöñgeri, Anutunöñ mönö körek yeñgö keuñini diñdiñanök jim teköba likepñi melen enğii lömböt qakñine öñgöi mala kotket.

3 Yeñon lömböt miwikñiaigetka neñon mewöñanök akzin ewö, lömbötköra mönö denöwö ölöñ kölbinaç? Amötqeçe nup ketanñi mi nesampurek qakñe nöñöñgan akin ewö, mönö lömbötnöhök ölöñ kölbिंगö osibin. Kembunöñ köñahiba amötqeçegö köñanñi indeliga tosatñan keu mi jitñeyök möta nañgöba jim köhöigetka sehiba dop köñ neñgiyök. 4 Mi nañgöba jim köhöigetka Anutunöñ yembuk mohotñe kinda keuñini nañgöba jiiga anğöletot aiwesök köñanñi köñanñi mi kukösumñinambuk asuhugetka Uña Töröñi mokoba jitsihitñangö dop mendenñiga dop köñ neñgiyök. Mewö.

Jisösnöñ datnini aka Suepnöñ neñğuanğitmamgö mötza.

⁵ Suep gölme dölöknji asuhumegö keunji jimakzini, Anutunöñ nini mianğörej Suep garata nembö bapñine malbingö arenji qahö ala jim kutuyök. ^{6*}Mewö qahöpmö, keu mi kunñan nañgöba jiiga Buña Kimbigö kembanganji kunöñ kewö ahöza, “Gölme azinöñ mönö niñia aiga i mötmörim wañgimakzan? Suep gölmeğö azi ölñan mönö niñia aiga i köyan kölakzan?

⁷ Göñön i memba et al wañginöñga nalö töröpñi Suep garata yengö nembö bapñine eta eretñi aka malök. Mali wañgitnöñga asakmararañnöñ öñgöiga kösasorom ila jalö wañginöñga aködamunñambuk aka qetbuñañambuk malja. Mewö mala öroyuai pakpak galöm köla malja.

⁸ Börösöwögi pakpak mönö yañgö jimkutukutuñangö bapñe malmegöra memba et al enñinöñga malme.”

Keu mianğö dop yuai pakpak mi yañgö kukösum bapñe malmegöra memba et al enñgiba mianğörej yuai kun qahö mosöriğa yañgö keuñangö bapñe qahö ahöbawak. Arenj mewö alökmö, nalö kewöñe börösöwöñi pakpak mi yañgö kukösum bapñe memba et al enñgii tem kölakzeangö dop qahö engehakzin.

⁹ Mewö qahö engehakzinmö, Jisösnöñ mönö kewö letota mali ehakzin: Kömupkö sihimbölöñi möröhañgöra Anutunöñ wañgiri asakmararañnöñ öñgöiga kösasorom ila jalö wañgiiga ehinga aködamunñambuk aka qetbuñañambuk malja. Anutunöñ kalem möriamñi kondel nenñimangö möta körek nenñgöra aka kömupkö sihimbölöñi mötmapkö jim teköyök. Mianğöra memba et al wañgiiga nalö töröpñi Suep garata yengö nembö bapñine eta eretñi aka malök. Mewö malökmö, nalö kewöñe qetbuña öñgöñgöñi memba malja. ¹⁰ Anutunöñ mönö öroyuai pakpakö könañi akza. Yañön körek nini nanñi möpöseim wañgibingöra aka miwikñaim nenñiiga maljin. Yañön ambazip sehisehiñi nenñuanñgiri asak-mararañnöñ öñgöbingöra mötza. Mewö möta amötqeqeninangö Tonji mi qahö añgön köliga sihimbölö möta mewö mianñön nupñi mi mem teköi asakmararañi pakpak miwikñaimapkö möri dop kölök.

¹¹ Kunöñ mem sarahim nenñimakzawi aka ambazip sarakñi ahakzini, körek nenñö kondotkondot Toninan mönö mohot akza. Mianğöra Jisösnöñ qetnini “Alaurupni,” mewö qetmamgö gamuñi qahö mötza. ^{12*}Könaninangöra Buña keu kun kewö jii ahöza, “Nöñön mönö göhö qetki mi nani alaurupni yengöra qet asarim enñgiba urumelenj könagesö sutñine kinda möpöseim gihimakñam.”

^{13*}Mewöyök mianğö Buña keunji kun kewö jii ahöza, “Nöñön mönö mötnaripni Anutugörej ala malmam.” Dumñe kunbuk

* 2:6: Sum 8.4-6 * 2:12: Sum 22.22 * 2:13: Ais 8.17, 18

mianğö Buŋa keuŋi kun mi kewö jii ahöza, “Mötnöŋ, ni aka Anutunöŋ nahönbörat niŋgiyöhi, neŋön mönö ki maljin.”

¹⁴ Kunöŋ mem kömum neŋgimangö kukŋi memba maljawi, Jisösnöŋ mönö i tulumgöi gemapköra aka kömumba mianğön luhut alök. “Bölöŋağö Toŋi tulumgömam,” jiba ambazip sep busuni-nambuk maljini, mianğöra yaŋön mönö mewöyök nembuk tandök mohot miyöhök gölme azia ahök. ¹⁵ Ambazip malmalŋini gölmenöŋ maljeangö dop kömumbingö keŋgötŋinan jöhöm eŋgii mala kotkeri, mi mönö körek pösat eŋgii solanimegöra aka gölme azia ahök. ¹⁶ Suep garata köyan köl eŋgimapköra gölme azia qahö ahökmö, Abrahamgö gwölönarökurupŋi nini möt aŋgön köla bauköm neŋgimakŋapköra mönö mewö ahök.

¹⁷ Könaŋi mianğöra aka yaŋön öröyuai pakpak mianğöreŋ alaurupŋi nembuk tandök mohot miyöhök ahök. Jike nup galömnini bohonŋi aka nupŋi nömtik memba ak kömum neŋgiba malmapköra mönö nembuk tandök mohot ahök. Tandök mohot akagun mönö ölop jitŋememenini aka jike galöm bohonŋağö nupŋi memakza. Mi memangöra siŋgisöndokninağö töwaŋi ala Anutugö jeŋe mi köl könjörarök. ¹⁸ Gölme azia aiga esapköm waŋgigetka nanŋak sihimbölä möta malöhi, mianğöra ambazip esapköm neŋgimakzei, nini mönö ölop bauköm neŋgimakŋa. Mewö.

3

Jisösnöŋ Moses oŋgita öŋgöŋgöŋi akza.

¹ Mianğöra urumeleŋ alaurupnini sarakŋi, Suep Toŋan eŋgoholi nembuk kambu mohot maljei, eŋön mönö urumötmötŋini pöndaŋ Jisösgöreŋ ala malme. Anutunöŋ i melaiiga aposol aka jike nup galömnini bohonŋi akzawi, yaŋgöra mewö jim miwikŋaimakzin. ² *Mosesnöŋ Anutugö könagesöŋi pakpak mi memburikŋi qahöpmö, pöndaŋ galöm köl eŋgiba malök. Mianğö dop Jisösnöŋ mewöyök kun kuŋgum waŋgiyöhi, yaŋgö keuŋi (misila) törörök wuatangöba memburikŋi qahöpmö, pöndaŋ nömtik memba malök. ³ Miri aka azi miri meyöhi, mi kewöt etkiinga mitimqeŋe azigö qetbuŋaŋan mönö mirigö qetbuŋaŋi gwötpuk oŋgitza. Mianğö dop Moses aka Jisös kewöt etkiinga Jisösgö asakmararaŋi öŋgöŋgöŋan mönö Moses gwötpuk oŋgitza. Könaŋi mewö eka miwikŋaimakzin.

⁴ Miri pakpak mi kungö börösöwöya akzemö, yuai pakpak mi mönö Anutugö börösöwöŋi akza. ⁵ Mosesnöŋ Anutugö könagesöŋi pakpak mi memburikŋi qahöpmö, pöndaŋ welen gem eŋgiba malök. Mewö mala Anutunöŋ könaŋgep azi

* 3:2: Jan 12.7

kungöra jiyöhi, mönö keu miangö söpsöpñi mi qeljine indela dangunuña kinök. ⁶ Mewö kinökmö, Kraistnön mönö Anutugö Nahönñi aka Iwiñangö keuñi (misila) nömtik memba könagesöñi pöndañ galöm köl neñgiba malja. Anutugö könagesöñi mi neñön akzin. Oyaenköyaen akingö jörömqöröm aka miangören qekötahöba silenini memba öngöba awösamkakak kin köhöim teköbin ewö, mönö Anutugö urumelen könagesöñi aka malbin. Mewö.

Yangiseñ aka malbinbukö galöm meme keu

⁷ *Miangöra inini mönö Uña Töröñan keu kewö jimakzawangö dop akñe, “Dölkewöñe Anutunön engehola keuñi sañep ali mötze ewö,

⁸ uruñini mönö mötmöt bölöñan kude gwözöñme. Enjö ambösakonurupñinan gölme qararankölkölñe kaba nalö kunön Anutu qetala esapköm wangiba karim akeri, inini mönö miangö dop Anutu qetala akepuk.

⁹ Yeñön gölme qararankölkölñe kaba Anutu ni esapköm niñgiba malget. Anjöletot aka memba malali, inini mi yambu (yara) 40 miangö dop eka mala mi töndup ni qahö möt narim niñgigetka urunan böliiga malal.

¹⁰ Miangöra ambazip kambu nalö miangören gölmenön malgeri, yeñgöra aka irimni seholiiga kewö jial, ‘Yeñön mönö sundan uruñinan kahapmahap aka janjuñ anakze. Malmalgö köna kusum enñgiba malalmö, mi qahö möt kutuget. Qahö!’

¹¹ Mewö jiba irimesewöl qakñe keuni jim kutuba jöjöpañ keunan mi jöhöba kewö jial, ‘Luhut memba malmegö areñ al enñgialmö, yeñön mönö oyaenköyaen miangören qahö angotme.’ ”

¹² O urumelen alaurupni, inini mönö kewögöra galöm mem anğuba malme: Enğorenök kungö uruñan gonñgiiga mötnaripñan sörauba eri Anutu malmal Tonj andö qeba malbapuk. ¹³ Mewö qahöpmö, siñgisöndokö isimkakalekñan tilipköm enñgi mi-anön enğorenök kungö uruñi gwözöñbapuköra mönö silim dop sutñine uru kuñgum anğuba malme. “Merak” keu mi jimakzini, miangö dop mönö jölöngöm anğuba malme. ¹⁴ Nini Kraist möt anğön köla yambuk kambu mohot aka maljin. Mutuk urunini melenđa uruyahöt yaköriba awösamkakak mi-wikñaiba malini, mewö gölmenön malbinangö dop kapan köla köhöiba kinbin ewö, mönö oyaenköyaen akin.

¹⁵ *Buña keu mi kunbuk jiba kewö ohozal, “Merak Anutunön engehola keuñi sañep ali mötze ewö, uruñini mönö kude

gwözönme. Engö ambösakonurupñinan Anutu qetala karim akeri, inini mönö Anutu miangö dop qetala akepuk.”

¹⁶ *Ambazip denike yeñön Buja keu möta Anutu qetala karim aket? Mosesnöñ könagesö enjuangiri Ijpt mosöta kageri, yeñön mönö körek mewö aket. ¹⁷ Ambazip denike yeñgöra aka yambu (yara) 40 miangö dop irimñi sehologi-iga kazik ak enñii malget? Ambazip singisöndok aketka mem kömum enñii silenñinan gölme qararañkölkölñe eta kölgeri, yeñgöreñ mönö mewö asuhuyök. ¹⁸ Luainöñ luhut memba malmegö areñ ala nanñini gölmeñine kude añgotmegö keuñi jim kutuba jöjöpaj keuñan jöhöyöhi, keu mi mönö dagöra jiyök? Ambazip keuñi qetala yañgiseñ malgeri, mi mönö yeñgöra aka jiyök. ¹⁹ Keu miangö könajñi mi kewö ek asarizin: Yeñön Anutu qahö möt nariba yañgiseñ akerañgöra aka nanñini gölmeñine añgotpingö osiget. Mewö.

4

Anutunöñ könagesöñi sonda kendon neñgima.

¹ Anutugöreñ añgota luainöñ luhut memba malbingö keu jöhöyöhi, keu miangön mönö pöwöwöm köhöikñi ahöm neñgiza. Miangöra engöreñök kunñan löwöriba nanñi Suep köna ananñi mi kemañe kutui mewö miwikñaim wañgibinbuk. Miangöra mönö sutnine galöm mem añgubin. ² Gölme qararañkölkölñe kagetka Ölöwak Buja jim asarim neñgiget ewö jiget mötketmö, keu mi mönö silesile mötketka uruñine qahö geyök. Miangöra mötnariñini qahö qiwikñaiiga tönpin öne malgetka qahö bauköm enñiba pömsöm qeyök. ³ *Urunini melenja möt nariba maljini, neñön mönö Anutugöreñ añgota luhut memba oyaenköyaen malbin, mi mötzin. Anutunöñ miangö Buja keuñi mi kewö jii ahöza, “Mewö jiba irimsesewöl qakñe keuni jim kutuba jöjöpaj keuñan mi jöhöba kewö jial, ‘Luhut memba malmegö areñ al enñialmö, yeñön mönö oyaenkö-yaen miangöreñ qahö añgotme.’”

Anutunöñ Suep gölme miwikñaim etkii nalö miangöreñök könahiba oyaenköyaen miriñan lök memteköteköñi ahözapmö, töndup keu mewö jiyök. ⁴ *Anutunöñ silim 7:ñangö keuñi jiiga Buja Kimbigö kemañi kunöñ kewö ahöza, “Sömañi 7 aiga Anutunöñ nupñi pakpak mem teköyöhañgö luhut memba kendon tarök.” ⁵ *Anutunöñ Buja keu mi toroqeba kewö jii ahöza, “Luhut memba malmegö areñ al enñialmö, yeñön mönö oyaenköyaen miangöreñ qahö añgotme.”

⁶ Ambazip tosatñan Anutugö oyaenköyaen miwikñaiiba luhut memba malmei, keu miangön mönö pöwöwöm köhöikñi ahöm

nenḡiza. Ölöwak Buḡa mutuk könagesö jim asarim enḡigeri, yenön mönö qeḡetalḡinanḡöra aka oyaenḡkoyaenḡönḡ qahö anḡota luhut qahö meḡet. ⁷ *Luhut qahö meḡeranḡöra aka Anutunönḡ mönö kunbuk nalö kun ala qetḡi Nalö dölkewönḡi qerök. Nalö köröpḡi teköiga nalö mianḡö Buḡa keuḡi dölkü jiba ohozali, mi mönö Deiwidkörenḡ indeli kewö jiyök, “Dölkewönḡe Anutunönḡ enḡohola keuḡi saḡep ali mötze ewö, uruḡini mönö kude gwözönḡme.”

⁸ *Mewö jiiga Josuanönḡ enḡuanḡiri oyaenḡkoyaenḡönḡ anḡota luhut membeak ewö, Anutunönḡ mönö nalö kungö keuḡi mi könḡep qahö jibawak. ⁹ Mi qahö jibawakmö, Anutunönḡ mönö ölnḡa könagesö luhut meme nenḡii oyaenḡkoyaenḡ miwikḡaibin. Keu mianḡön mönö pöwöwöm köhöikḡi ahöm nenḡiza. ¹⁰ *Mianḡö könḡi kewö: Anutunönḡ nanḡi nupḡi meyöhanḡö luhut memba kendon taröhi, mianḡö dop kunönḡ Anutugö oyaenḡkoyaenḡönḡ anḡota luhut memawi, yanön mönö nanḡi nupḡi meyöhanḡö luhutḡi mi mewönḡanök memba oyaenḡkoyaenḡ malma. ¹¹ Mianḡöra nini mönö Anutugö oyaenḡkoyaenḡönḡ anḡota luhut memenḡi miwikḡaibingö kapan kölbün. Enḡörenḡök kunönḡ et qeba könagesö walḡi yenḡö qeḡetal tandökḡini miyöhök wuatḡnḡöbapuköra mönö kapan kölbün.

¹² Anutugö keuḡi mi menguliguligö könḡi aka kukösumḡambuk akza. Bingö sou ketanḡi mi likep likep jitḡirambuk akzapmö, Anutu keuḡanḡö jitḡan mönö sou ketanḡi pakpak enḡonḡita jüt kötök aiga jitḡi bahöbahö mi mauḡambuk akzahot. Keu mianḡön mönö uru uḡanini kutuba ömenönḡ me Anutugö Uḡanḡan inahöm nenḡimakzawi, mi undenḡa kungum nenḡimakza. Sile kitip toroqeqenini aka sihitninanḡö digonḡi mi mewöyök kewöta (keunini asa-asambötḡi miwikḡaiba) ölöḡḡi aka bölöḡḡi mendenḡ etkimakza. Urukönömnini aka mötkutukutu arenḡini mi kewöta keunini jim tekömakza.

¹³ Anutunönḡ yuai pakpak miwikḡaii ahözawi, mianḡörenḡök yuai kun mi asa-asambötḡe qahö ahöiga ölöḡḡanök ehakza. Yuai kun esuhuinga Anutunönḡ esunini mi ölöḡ luluḡda ehi yanḡö jemesoholḡe aukḡeyök ahöza. Ahakmemeninanḡö kösohot pakpak mi mönö yanḡöra jim asaribinanḡö dop akzin. Mewö.

Jisösnönḡ jike nup galömnini öḡḡönḡönḡi akza.

¹⁴ Jisösnönḡ jike nup galöm bohonḡi öḡḡönḡönḡi ak nenḡizawanḡöra aka nenön “Möt narim wanḡizin,” jiba jim miwikḡanaimakzini, mianḡörenḡ mönö köhöiba kinbin. Jisös Anutugö Nahönḡan mönö Suep jakenḡi jakenḡi enḡonḡita öḡḡöba tatza. ¹⁵ Urumötmötnini tosätḡan lölöwörönḡi aketka jike nup galöm

* 4:7: Sum 95.7-8

* 4:8: Dut 31.7; Jos 22.4

* 4:10: Jen 2.2

tosatŋan mianğöra wösömötmöt qahö ak neŋgimakzemö, nanine jike nup galömninan mönö qainŋi kun kewö akza: Yaŋön mönö nini ewö ahakmeme pakpak mianğöreŋ nembuk tandök mohot esapköm waŋgiba malgetmö, mi töndup siŋgisöndok kun qahö ahök.

¹⁶ Jike galömninan mönö eu kalem möriamgö dum tatatŋe tata ak kömum neŋgimamgö mörakza. Mianğöra mönö awösamakak qakŋe kinda yaŋgö kösutŋe anbin. Yaŋgö kösutŋe aninga kalem möriamgöra osizini, mianğö nalö diŋdiŋe mönö bauköm neŋgiiga mi ölop miwikŋaibin. Mewö.

5

Galöm bohonini Jisösnöŋ mönö bauköm neŋgimakza.

¹ Gölmegö jike nup galöm bohonŋi pakpak mi ambazip sutŋineyök möwölöhöm eŋgiba nup kewö memegöra kuŋgum eŋgimakzin: Yaŋön ambazip jitŋememenini aka Anutubuk urumohot aka malbingö nupŋi memba siŋgisöndok ahinaŋgö sömbup kalemŋi kalemŋi mi Anutugöra ala mianğön jöwöwöl ohomakza.

² Nanŋi urumöt-mötŋi tosatŋan mewöyök lölö-wöröŋi akza. Mianğöra ambazip gukmaulem qakŋe janjuŋ ahakzei, mi ölop wösömötmöt qakŋe ak neŋgimakza.

³ *LöLöwöröŋi akza-waŋgöra mönö nanŋi siŋgisön-dokŋi aka könagesöurupŋi yeŋgö siŋgisöndokŋini mewöyök köl könjöratmapköra sömbupnöŋ jöwöwöl ohomakza. ⁴ *Kunŋan qetbuŋa mi nanŋaŋgöra qahö buŋa qem aŋgumapmö, Anutunöŋ Aron oholöhi, mianğö dop mönö i mewöyök oholja.

⁵ *Mianğö dop Kraistnöŋ mewöyök nanŋak jike nup galöm bohonŋi akŋapkö qetbuŋaŋi mi nanŋaŋgöra qahö buŋa qem aŋguyökmö, Anutunöŋ kewö jim kutum waŋgiyök, “Göŋön nöŋgö Nahöni aknöŋga nöŋön mönö merak göhö Iwigi akzal.” Keu mianğö dop jike nup galöm bohonini ahök.

⁶ *Keu miyöhök jii Buŋa Kimbigö kemaŋi kunöŋ kewö ahöza, “Göŋön mönö Melkizedek ewö jike nup galöm aka nalö teteköŋi qahö mal öŋgöman.”

⁷ *Jisösnöŋ silebuk gölmenöŋ mala mianğöreŋ mönö nalöŋi nalöŋi köuluköba köhöikŋanök qeriga imbilŋan eri Anutu kömupnöhök mekömapkö köhöiyöhi, i qesim waŋgiba malök. Qesim waŋgiba mala Anutu göda qeba keuŋaŋgö bapŋe al aŋguba malöhaŋgöra Anutunöŋ köulukŋi mörök. ⁸ Nahönŋi ahökmö, Anutunöŋ mi töndup sihimbölö qahö jöhöi qakŋe öŋgöi möta mianğöreŋ temkölkölgö könaŋi miwikŋaiba möt soroköyök. ⁹ Mi möta aködamunŋi pakpak miwikŋaibagun

* 5:3: Lew 9.7 * 5:4: Eks 28.1 * 5:5: Sum 2.7 * 5:6: Sum 110.4 * 5:7: Mat 26.36-46; Mak 14.32-42; Luk 22.39-46

mönö oyaenköyaen teteköni qahö malbingö kondotkondot Tonji ahök. Mianğöra ambazip yangö jitni tem köla maljei, mi pakpak mönö ölop kondot enğıiga oyaenköyaen akne. ¹⁰ Tonji mi aiga Anutunöni i Melkizedek ewö jike nup galöm bohonni aknapkö jim teköba al wanğiyök. Mewö.

Mötnaripkö ölni sohobapukö galöm meme keu

¹¹ Keu mi ölop toroqeba gwötpuk jim qaribinakmö, enön keu möta wuatangöbingö tanqan aka gaunjeje akze. Mianğöra mi jim asarim enğibingö osikosi akzin. ¹² *Inini nalö köröpni könagesö walni mala ölop nalö kewöne lök böhi qaqazu akneangö dop akeakmö, nanñinak Anutugö keu kötni mutukni mi kunñan dumne kunbuk kusum enğimapköra osimakze. Inini mönö qaköba Buña keu mi juzu ewö nemingö mötze. Nene köhöikni ewö mi nemingö osimakze. ¹³ Kunñan mi juzu ewö nempa maljawi, yanön mönö toroqeba morösesep ewö akza. Anutugö jeñe solanñi akingö keu kusum enğiinmö, yanön mianğö könani qahö möt kutuba tönpin malja.

¹⁴ Morösesep ewö maljapmö, nene köhöikni mi ambazip mötmötñinan qariyöhi, mönö yeñon nemegöra aka ahöza. Ambazip Buña keu sundan köl guliba malgetka urumötmötñinan lök möñaiiga ölop anqeba silik pakpak kewöta ölopni aka bölöni menden etkiba ölopni wuatangömakze. Nene köhöikni mi yeñgöra aka ahöza.

6

¹ Mianğöra Kraist könangö keu kötni mutukni lök möta mianğoreñ mönö kude qaköbin. Mewö qahöpmö, mönö toroqeba qariba aködamuninambuk akingö kapan köla malbin. Mötnaripkö tandöni lök kuñguba mi mönö dumne kunbuk könahiba kuñgubinbuk. Tandö mi uruñine kewö kuñguin: Ahakmemenini köhömuñi mosöta urunini melenđa Anutu möt narim wanğin.

² Urunini melenñinga mötnaripkö keu kembangan kembangan kewö kusum nenğigetka mörin: Singisöndoknini köl könjöratmegöra o melun aka amötqeçe könani könani miengö könani kusum nenğiget. Böröñini qaknine alagö könani kusum nenğiget. Guliba kömupnöhök wahötpingö könani kusum nenğiget. Anutunöni keunini jim teköi teteköni qahö köhöikni ahömapkö könani kusum nenğiget. ³ Mötnaripkö tandöni mewö kuñgubagun mönö toroqeba möt qaribingö mötzin. Anutunöni ösum-mumu nenğimakzawangö dop mönö aködamunini pakpak miwikñaibingö kapan köla kinbin.

⁴ Mewö kinbingö möta mianğoreñ qaköba etpinbuköra aka kinjin. Ambazip kewöni mi uruñini melenmegöra

* 5:12: 1 Kor 3.2

enġuanġitpingö osimakzin: Tosatġan uruġini nalö kunöŋ asariġa Anutunöŋ Suep kalemŋi enġii möta söŋgaigetka Uŋa Töröŋan ösupköm enġii malget. ⁵ Anutu Buŋa keuŋaŋgö nahömnġi mötketka oyaenġkoyaenġ nalö könaŋgepŋaŋgö kukösumŋan mönö uruġine gei mötket. ⁶ Mi pakpak mötagun mönö mötnariŋŋini mosöta Anutu andö qeget. Ambazip mi uruġini kunbuk melenmegöra enġuanġitpingö osimakzin. Yeŋön Anutugö Nahönŋi ilita dumŋe kunbuk maripomnöŋ qege ewö memba et ala aukŋe gamu qem waŋgimakze. Mewö mianġön mönö nanŋini geŋmororoŋ ak aŋgumakze.

⁷ Mi söpsöp keu kianġö dop: Kienöŋ nalö gwötŋuk yöhöba gölme qakŋe eta uruŋe geba gölme mem kelöriġa nup toŋaŋgö welenqegeurupŋan nene kömötketka Anutunöŋ gölme kötuetsköiġa ölnġ asuhui kölkömöt toŋi yeŋön mi memba köweŋine alakze. ⁸ *Mewö alakzemö, koururuk aka siriuret wahinambuk mianġön gölmenöŋ asuhuba wahörakzawi, gölme mianġön mönö nesakŋi akza. Toŋi yeŋön mi saitköbingö mötze aka kapan köla mambötketka ölnġ qahö asuhui eka teteköŋe mönö kuŋgugetka jema.

⁹ O wölböt alaurupni, neŋön söpsöp keu mewö jizinmö, mi töndup inġini uruġini melenġda malmeaŋgöra mönö uruyahöt qahö akzin. Enġö uruġine Buŋa keugö ölnġan mönö asuhum qarimapköra möta awösamkakak kinjin. Anutunöŋ ölnġ mi eka mönö meköm enġii letota Suepnöŋ öŋgöme. ¹⁰ Anutunöŋ mönö ekbonep qakŋe goŋgoŋi qahö akza. Inġini Anutugö ambazip sarakŋi bauköm enġiba mala kota toroqeba bauköm enġiba nup memba malakze. Mewö urukalemŋini Anutu kondel waŋgigetka qetbuŋaŋan qarimakzawi, yaŋön nupŋini aka urukalemŋini mianġöra mönö qahö ölum qeiga kitipŋi melenġ enġima.

¹¹ Nini oyaenġkoyaenġ akingö jörömqöröm aka mianġöreŋ awösamkakak uruyahöt qahö kinmegö sihimnini möta kewö awöweŋgömakzin: Inġini nanġök nanġök Anutugö urukönöp ahakzei, miyöhök mönö toroqeba kondela malme. Aködamun-ŋinambuk akingö kapan köla gölmenöŋ mal tekömeaŋgö dop mianġöreŋ mönö kude löwörime. ¹² Qölzöm akepuköra mönö awöweŋgömakzin. Anutunöŋ oyaenġkoyaenġ yuai neŋgimamgö keu jöhöyöhi, tosatġan Anutu möt nariba sihimbölöŋini möta mökösoŋda mewö mianġön mi buŋa qem aŋgumakze. Inġini yeŋgö silikŋini wuatanaŋgömegöra mötzin. Mewö.

Anutugö jöhöjöhö keu mi uruyahötŋi qahö.

¹³ Anutunöŋ Abraham jöhöjöhö keu waŋgiba mi nanŋi qetŋi qeta jöjöpaŋ keuŋan jim köhöiyök. Kunöŋ Anutu oŋgita öŋgöŋgöŋi malbawak, ölöp yaŋgö qetŋi qetpawakmö, mewöŋi

* 6:8: Jen 3.17-18

kun qahö maliga miangöra mönö nanñi qetñi qeta jöjöpañ keuñi jiiga köhöiyök. ¹⁴ *Jöhöjöhö keuñi mi Abrahamgöra kewö jiba jiyök, “Nöñön mönö ölna kötuetköm gihimam. Mönö ölna gwölönarök gihibiga sehime.”

¹⁵ Mewö jiiga Abraham yuai wañgimapkö keu jöhöi ahöyöhi, yañön mi ölnambuk akñapkö kapañ köla mamböta mala ölni buña qem aņguyök. ¹⁶ Ambazipnöñ ketañamñinañgö qetñi qeta jöjöpañ keu jiget mörakze. Jöjöpañ keuñinan keu jizei, mi mem köhöiiga qeapköbingö osigetka keu jijininan teköza. ¹⁷ Miangö dop Anutunöñ keuñi Abrahamgö gwölönarökurupñi neñön mötpingöra jöhöba jiyök. Keu areñi mi kunöñ qeapköba utekömamgö osizawi, gwölönarökurupñi neñön jöhöjöhö keu miangö könañi mi törörök möt yaköbingö mörök. Miangöra jöhöjöhö keuñi jiiga mutukñi aiga keu mi kunbuk jöjöpañ keuñan jim köhöiiga indimñi yahöt ahök.

¹⁸ Anutunöñ keu mi jiba miangö muney jimamgö osiyök. Yañön keu utekutekñi qahö mi jibagun jim köhöiyöhi, mianñön mönö urunini nañgömapköra mörök. Miangöra mi jibagun jim köhöiyök. Neñön gölmegö ahakmeme bölöneyök ölöñ köla Anutugöreñ aņgota oyaenköyaen neñgimapkö jörömqröm neñgiyöhi, mi mönö töp memba mamböta maljin. ¹⁹ *Oyaenköyaen akingö al mamböta miangö uruyahötñi kun qahö ahakzin. Jörömqrömnini mianñön uruninañgö kösö mendannñi tandök ewö aka nini Jisösbuk jöhöm neñgimakza. Jörömqrömninañgö kösö mendannñi köröpñi mianñön mönö neñgöreñök könahiba Sup jikegö uruñe öngöba jike oleni yahötkö sutñire opo sel ahözawi, mi mewöyök kutuba toroqeba Jisös jakömbuak dum kömbukñe tatzawañgöreñ anja. ²⁰ *Jisösnöñ mönö jitñememenini aka mutuk euyañgöreñ öngöba jakömbuak dumñi memba nalö teteköñi qahö tat öngöma. Mewö Melkizedek ewö jike nup galömnini bohonñi aka malja. Mewö.

7

Jike nup galöm Melkizedekö kösohot

¹ *Melkizedek azi mi miri qetñi Salem miangö kin kembuñi aka Anutu öngöñgöñañgö jike nup galömña malök. Mewö maliga Abrahamnöñ kin kembuñi kembuñi bim qeba luhut al enjiba lilingöba miriñe kayöhi, nalö miangöreñ kaba Abraham miwikñaiba kötuetköm wañgiyök.

² Kötuetköm wañgiiga sukinapñi pakpak mendenña ten miengöreñök mohot mohot (1/10) memba nalukña al wañgiyök. Melkizedek qet miangö könañi mi “ahakmeme

* 6:14: Jen 22.16-17 * 6:19: Lew 16.2 * 6:20: Sum 110.4 * 7:1: Jen 14.17-20

11 Anutunöŋ Köna keuŋan Israel ambazip jim kutum nenŋiiga miangö dop Liwai kambunöhök azi kuŋgum enŋiinga jike nup galömnina aket. Nup mi megetka mewö mi-anöŋ aködamunini pakpak miwikŋaibinak ewö, nini mönö jike nup galöm qainŋi kungöra qahö osibinak. Nup miangö ölnan qahö dop kölöhanŋöra aka Jisösnöŋ mönö Melkizedek ewö asuhuyök. Ambazipnöŋ i Arongö arenanŋö dop qahö kuŋgugetka asuhuyök. 12 Jike nup galöm nupnanŋö könanan uteközawi, nalö miangören köna keuninan mönö mewöŋanök uteköza. 13 Jike nup galöm qainŋi kun keu mi Kembuni-nanŋöra jizinmö, yanöŋ Liwai kambunöhök qahöpmö, mönö kambu kunöhök asuhuyök. Kambu miangö azi kuŋnan mönö jöwöwöl jikegö altanöŋ kinda nup qahö memba malök. 14 Kembuninan Juda kambunöhök asuhuyöhi, keu mi aukŋe ahöza. Mosesnöŋ Juda kambu yenöŋ jike nup galöm kölmeŋö keu kun qahö jiyök.

Jike nup galöm Melkizedek ewö kun

15 Miangöra jike nup galöm kun Melkizedekö tandök ewö asuhuzawi, mi-anöŋ mönö keu jizinanŋö ölni mi aukŋeyök kondeliga dopŋe akza. 16 Yanöŋ gölme ambazipnöŋ Köna keu wuatangöba kambunanŋö dop jim kutugeranŋöra aka jike nup galöm qahö ahökmö, malmal köhöikŋi qahö ayapkömawi, miangö kukösumnan mönö nam köl wanŋiiga jike nup galöm ahök. 17 *Kunöŋ yanŋö könanŋi nanŋöba jiiga Buŋa Kimbinöŋ kewö ahöza, “Gönöŋ Melkizedek ewö jike nup galöm aka nalö teteköŋi qahö mal öngöman.” 18 Anutunöŋ mewö jiba jimkutukutu mutukŋi mi qeapköyök. Keu miangö kukösumnan qahöwahiga bauköm nenŋimapkö osimakzawi, miangöra mi qeapköyök. 19 Köna keunöŋ ambazip aködamunini miwikŋaibingö qahö bauköm nenŋiyök. Qahö. Miangöra keu aren mutukŋi qeköba salupŋe jörömqöröm qetpuk sorok nenŋiza. Nini jörömqöröm miangö qakŋe kinda ölop Anutugö kösutŋe anda köulukömakin.

20 Anutunöŋ jike nup galöm döloknanŋö keuŋi jiba mi jöjöpaŋ keuŋan jim köhöiyök. Mewö ahökmö, jike nup galöm tosatŋi yenŋö keuŋini mi jöjöpaŋ keunöŋ qahö jim köhöigetka töndup mewö aket. 21 *Tosatnan jike nup galöm öne aketmö, Anutunöŋ Jisös kuŋguba keuŋi mi jöjöpaŋ keuŋan jim köhöiba yanŋöra kewö jiyök, “‘Gi mönö jike nup galöm aka nalö teteköŋi qahö mal öngöman.’ Kembunöŋ keuŋi mi jöjöpaŋ keuŋan jim köhöiba urunan mi qahö uteköma.”

22 Jöjöpaŋ keu miangöra aka Jisösnöŋ mönö jöhöjöhö aren döloknanŋö ölni asuhumapkö galömnŋi akza. Mewö Anutu aka

ambazip sutnine nup memba malja. Jöhöjöhö areñ میانۆن walñi oñgita qetpuk sorok akza.

²³ Jike nup galöm tosatñi mi mönöwök gwötpuk malget. Kömumba nupñini toroqeba membingö osigeri, میانğöra mi mönö gwötpuk malget. ²⁴ Yeñön gwötpuk malgetmö, Jisösnöñ nalö teteköñi qahö mal öngömawi, میانğöra jikegö galöm nup mi mönö teteköñi qahö memba mal öngöma. ²⁵ Nup mi memba maljawangöra Jisösnöñ ambazip yangören kagetka enğuanğiri Anutugö kösutñe anakzei, mi ölop köhöiba amöt qem enğii keuñinan kömumakza. Nalö dop yeñğöra aka Anutu köulukömak-ñapaköra maljawi, میانğöra mönö ölop amöt qem neñgim tekömakza.

²⁶ Jike nup galöm bohonñi mewöñan mönö ölop dop köl neñgiza. Yañön töröñi köpösihitkö keuñi qahö aka sarakñi akza. Anutunöñ Jisös siñgisöndok ambazip neñğöreñök tirin kutuba wangiri Suep jakeñi pakpak kutuba euyangören öngöba qainñi kun akza. ²⁷ *Jike nup galöm tosatñan sömañi sömañi mutuk nanñini siñgisöndokñinañğöra aka میانğö andöñe könagesö yeñğö siñgisöndokñinañğöra aka sömbupnöñ jöwöwöl ohoba maljema. Jisösnöñ nanñi silenñi köleñniga jöwöwöl ohoho ewö ak wangigetka mewö میانۆن könagesö neñğö siñgisöndoknini mi indim mohot میانğöreñök lök köl köñjörari dop köl teköza. Miangöra Jisösnöñ mi jike nup galöm tosatñi ewö nalö dop ahakñapakö qahö osiza.

²⁸ Anutunöñ Köna keuñi Moses wangüiga میانğö dop ambazipnöñ azi mi kuñgum enğigetka jike nup galöm bohonñi ahakze. Gölme azi yeñön kukösumñini qahö maljemö, Anutunöñ oyaenköyaen akingö keuñi mi könañgep neñgiba mi jöjöpau keuñan jim köhöiyöhi, میانğö dop Nahönñi kuñguiga bohonini akza. Bohonini yañön mönö aködamunñi körek pakpak lök miwikñaiba nalö teteköñi qahö köhöikñi mal öngöba malma. Mewö.

8

Jöhöjöhö areñ döläkñangö jike nup galöm bohonñi

¹ *Keu jizini, میانğö keu kötni bohonñi mi kewö: Nini mönö jike nup galöm bohoninambuk akzin. Bohonini yañön mönö Suep mire öngöba Öngöngöñamnini yangö jakömbuak dum tatat qöhöröñe böröñi ölñe tatza. ² Opo seri jike ölni mi Suepnöñ ahöza. Mi gölme azinöñ memenñi qahöpmö, Kembunöñ nanñak mi meyök. Jike nup galöm bohonini yañön mönö opo seri jikegö olenñi töröñi kötökñi میانğöreñ mala Anutu welenni qemamgö nupñi memakza.

* 7:27: Lew 9.7 * 8:1: Sum 110.1

³ Gölmegö jike nup galöm bohonji pakpak mi naluk kalem Anutugöra ala sömbupnöh jöwöwöl ohoba malmegöra kuŋgum enġimakzin. Mianġö dop jike nup galöm bohonini Jisösnöh mewöŋanök nanji Anutugö nalukŋa al waŋgiyök. ⁴ Mosesgö Köna keugö dop naluk kalem Anutugöra alakingöra azi lök kuŋgum enġigetka malje. Mianġöra jike nup galöm bohonini mianön gölmenöh malbawak ewö, yaŋön mönö gölmegö jike nup galömni akŋamgö osibawak.

⁵ *Gölmegö jike nup galöm yeŋön gölmegö jöwöwöl jikenöh Anutu welenji qebingö nupji memakze. Jike mianön mönö Suep jike kömbukŋaŋgö söpsöpŋi aka imutji akza. Mosesnöh jike kömbukŋi opo serinöh memamgö ahöhi, nalö mianġoreŋ Anutunöh Suep jikeŋaŋgö areŋi mi indelök. Indel teköba galöm meme keuŋi kewö jii mörök, “Mötnöh, kunduje malnöhga areŋ kondel gihiali, yuai pakpak mönö mianġö dop törörök wuatanaŋgöba memam.” Mianġö dop opo serinöh jöwöwöl jike meiga mianön mönö Suep jikegö korembiŋi ahök.

⁶ Anutunöh oyaenköyaen akingö jöhöjöhö keu dölökŋi neŋgiiga mianön jöhöjöhö keu walŋi oŋgita ölöp sorokŋi akza. Jöhöjöhö keu mianön areŋ dölökŋaŋgö tandöŋi akza. Jöhöjöhö areŋ dölökŋi mianön mönö areŋ walŋi oŋgita qetbuŋaŋambuk akza. Qetbuŋa mianġö dop Jisösnöh jöhöjöhö areŋ dölökŋaŋgö nupji ölöp sorokŋi mi buŋa qem aŋguba Anutu aka ambazip sutnine kinda bauköm neŋgimakza. Nupji mianön mönö gölmegö jike nup memenji mi gwötpuk oŋgita aködamuraŋambuk akza.

⁷ Jöhöjöhö areŋ mutukŋan keuŋi qahö aka dop kölbawak ewö, jöhöjöhö areŋ könaŋepŋan asuhumapköra öne qahö mamböt-pinak. ⁸ *Mewömö, ambazipnöh töndup böligetka Anutunöh könaŋini miwikŋaiba jim enġiba kewö jiyök, “Kembu nöŋön kewö jizal: Mötket! Nalö kun kam kuŋgumawi, mianġoreŋ Israel kambu aka Juda kambu embuk jöhöjöhö areŋ dölökŋi akŋam.

⁹ Nöhön ambösakonurupŋini böröŋine memba Ijpt kantrinöhök enġuaŋgitpiga yaigep kagetka yembuk jöhöjöhö areŋ ahalmö, yeŋön nöŋgö jöhöjöhö areŋ mi qahö qekötahöba tem kölget. Mianġöra nöŋön mewöŋanök i andö enġuyal. Kembu nöŋön mewö jizal. Jöhöjöhö areŋ dölökŋi akŋami, mi Buŋa keu walŋaŋgö dop qahö.

¹⁰ Mewö qahöpmö, nalö mianön kam kuŋgiiga Kembu nöŋön mönö Israel könagesö yembuk jöhöjöhö areŋ dölökŋi kewö aka jimam: Nöhön mönö nani Köna keuni pakpak mi yeŋgö mötmötŋine ala uruŋine kimbi ewö ohobi ahöma. Mewö aka yeŋgö Anutunini akiga yeŋön mönö nöŋgö könagesöni aka malme.

* 8:5: Eks 25.40 * 8:8: Jer 31.31-34

- 11 Nalö mianğöreñ ketanji moröñji mi körekmakörek nöñgö könani möt yaköba malme. Mianğöra böhi kunöñ Kembugö könanji mötmegöra sutñine qahö kusum engiba malma. Datñan munñanğöra kewö qahö jima, 'Gi mönö Kembu möt yaköman.'
- 12 Kewögöra ni möt yaköm niñgiba malme: Nöñön ahakmemeñini bölöñji mi sanğonđa mosötmam. Siñgisöndokñinanğöra mönö ölum nuñgui mi qahö toroqeba mötmörimam."
- 13 Anutunöñ jöhöjöhögöra "Dölökñi" jiba mewö mianjön jöhöjöhö areñ mutukñanğöra "Mönö walñi ahök," jiiga könanji mewö asuhuyök. Keu areñ kunöñ nalö köröpñi ahöba walñi akzawi, mianjön mönö ayapkömamgö dop akza. Mewö.

9

Gölmegö opo seri jikenöñ Anutu kewö möpöseiget:

1 Anutunöñ jöhöjöhö areñ mutukñi aka mianğöreñ mewöyök waikñi memba möpöseibingö areñji mi jim kutui wuatangöget. Mi wuatangöba gölmenöñ opo seri jike megetka ahöyök. 2 *Anutugö opo seri jike kömbukñi mi kewö meget: Jike olenji mutukñi mianğöreñ lambegö dum tatatñi aka beret kömbukñi mi Anutugö jemesoholñe tebolnöñ buñaña alget tarök. Jike uruñji mianğö qetñi mi jike olenji kömbukñi. 3 *Mianğö andöñe jike uru qetñi jike olenji töröñji kötökñi mi ahöyök. Jike olenji yahöt mietkö sutñire opo sel kinök.

4 *Jike olenji töröñji kötökñi mianğöreñ jininñ ohohogö altanji aka jöhöjöhö arengö bokisñi mi ahöyohot. Altanji mi goulñöñ memeni aiga bokis silenji mi körek goulñöñ turuturuñji ahök. Paura qetñi mana mi goul kumbutnöñ ala bokis mianğö uruñe galöm kölget. Mewöyök Arongö öröpñi sötñi jujulñi aka Anutunöñ jöhöjöhö areñji kötnöñ ohoi ilanji mi bokis mianğö uruñe galöm kölget. Bokis uruñe yuai karöbut mi mewö ahöget. 5 *Bokis qakñe imut yahöt goulñöñ memeni mi Anutunöñ dowe mali asakmararanğö söpsöpñi aka kinohot. Imut yahöt mi ginginñiri kötula bokis önunñi turuba kinohot. Bokis önunñi mi Anutugö köl könjörat dumñi ahök. Keu mohot mohot mi nalö kewöñe nanñök nanñök törörök eraum mötpinanğö dop qahö.

6 *Anutugö opo seri jike kömbukñanğö yuai pakpak mi mönö mewö arengögetka ahöiga jike nup galöm yeñön nalö dop jike olenji mutukñi mianğöreñ öngöba Anutu welenni

* 9:2: Eks 26.1-30; 25.23-40 * 9:3: Eks 26.31-33 * 9:4: Eks 30.1-6; 25.10-16; 16.33; Jan 17.8-10; Eks 25.16; Dut 10.3-5 * 9:5: Eks 25.18-22 * 9:6: Jan 18.2-6

qeba nupņini memba malget. ⁷ *Mewö malgetmö, jike nup galöm bohonņi yaņönök (yara) yambu dop indimņi mohot mianğöreņ jike oleni töröņi kötökņi mianğöreņ öngöba malök. Sep memba mianğöreņ öngöba nanņanğöra aka könagesö yeņön gukmaulem qakņe siņgisöndok akeri, mönö mianğöra aka jöwöwöl ohoba sepņi mokoï erök.

⁸ Mewö areņğöba aketka Uņa Töröņan söpsöp mi kondela mianğön ambazip kewö kusum neņgiba malök: Jike oleni mutukņan toroqeba kinjawi, nalö mianğöreņ Anutunöņ jike oleni töröņi kötökņanğö könani mi aukņe qahö indeliga malget. ⁹ Keu mi nalö kewöņanğö söpsöpņi akza. Könani kewö: Ambazipnöņ kalemņi kalemņi naluk ala jöwöwöl memba kagetka ohomakzemö, uruņinan töndup luai miwikņaingö osimakze. Uruņinan siņgisön-dok akeranğöra aka tölöhoi jöwöwöl memba kaba Anutugö jike kömbukņe öngöba köulukömakzemö, mianğön mönö siņgisöndok-ņini köl könjöratpingö osimakze.

¹⁰ Nene kalem aka o kalem memba kaba aņ köl kaņ köl aketka o melun könani könani mem eņgimakzemö, mewö silegö jimkutukutuņi miyök wuatangömakze. Yuai mi mutuk dop köli aka malgetmö, Anutugö areņ dölökņanğö nalöņan kam kuņguiga mianğöreņök könahiba qahö toroqeba dop kölma. Mewö.

Kraistkö sepņanğö könani

¹¹ Kraistnöņ kaba oyaenķoyaen neņgimakzawanğö jike nup galöm bohonņi ahöhi, yaņön gölmegö opo seri jike kömbukņi azinöņ memenı mianğöreņ qahö öngöyökmö, mönö Suepkö jike kömbukņe öngöyök. Jike kömbukņi mianğön öngöngöņi akza. Aködamunņan mönö asakmararanğambuk. ¹² Mianğöreņ öngöba uruņi mutukņi kutuba meme (noniņ) aka bulmakau moröņi mienğö sepņini qahö memba anökmö, nanņi sepņi mokoïga mianğön nam köl wanğiiga Suepkö jike oleni töröņi kötökņi mianğöreņ öngöyök. Mianğöreņ nalö mohotkö dop öngöïga dop köl teköza. Sohohnini mewö memba oyaenķoyaen akingö kondoriga nalö teteköņi qahö dop köla ahöm öngöma.

¹³ *Mutuk meme (noniņ) aka bulmakau azinı eņguba sepņini memba kaba bulmakau ambi seramņi mianğön jöwöwöl ohoba mianğö bupgahajöņi mewöyök memba kaba ambazip kölköl-jinjinambuk mianğön qewösahöba eņgömirigetka dop köl eņgiyök. Mewö amöt qem eņgigetka mianğön silenıini sanğonđa mem sarahim eņgii malget. ¹⁴ Mewö aket ewö, Kraistkö sepņan mönö amötqeqe tandök mi gwötpuk onğita kewö ak neņgimakza: Sepņan mönö urunini tölöhoi sanğonđa kömup köhöikņanğö buņa akingö ahakmemenini mi köl könjörarakza. Mewö ak neņgiiga malmal Tonı Anutu welenni qebingö nupņi

* 9:7: Lew 16.2-34 * 9:13: Lew 16.15-16; Jan 19.9, 17-19

mi amqeba memba malbin. Uña Töröñan mala kota teteköñi qahö mal öngömawi, yañön mönö Kraist bauköm wanğiiga köpösihtñi qahö malökmö, nenğöra aka nanñi köleñ anguba Anutugö jöwöwöl lamanñi ahök.

¹⁵ Könañi kewögöra Kraistnöñ jöhöjöhö areñ dölökñangö galöm bohonñi akza: Anutunöñ ambazip oyaenğoyaen aka nalö teteköñi qahö mewö malbingö keu jöhöba engoholöhi, mienön Anutugö Buñañi mi buña qem angumegöra mötza. Mianğöra Kraist aliga Anutu aka ambazip sutnine uru-mohot akingö nupñi memba malja. Jöhöjöhö areñ mutukñangö nalöñe ambazipnöñ köna onğita sinğisöndok aketka mianön jöhöm enği malgeri, Kraistnöñ i mienğoreñök pösat enğimangöra aka kömumba sohopñini meyök.

¹⁶ Kunñan öroyuainñi pakpak malmalñi tekömawi, mianğoreñ alañangö buñañi akñapkö jim kutui keu ahözawi, alañan buña mi zilañ qahö mema. Zilañ qahöpmö, keu toñan kömui könañan aukñe asuhui eketka mianğoreñ mi ölop buña qema. ¹⁷ Jebuk maliga nalö mianğoreñ keuñi mianön ölnambuk qahö akñapmö, keu toñan kömuigun keuñan mönö kukñambuk akña. ¹⁸ Keu mianğö dop jöhöjöhö areñ mutukñi mi mewöyök sep qahö öne ölnambuk qahö ahök.

¹⁹ *Ölnambuk kewö ahök: Mosesnöñ Köna keugö jöjöpañ keu pakpak mi könagesö körek yengöra oyoñdagun mönö bulmakau moröñi aka meme (noniñ) enğuiga sepninan erök. Eri mi memba obuk mindiriba lama jupñi pisikñi gugakgugak memba soñgorep suñe jöhöba sepnöñ kundumgöba qewösahöi Köna keu Kimbi lama silene ohoba lipiñğögeri, mi miriyök. Mi miribagun könagesö pakpak sutñine liliköba sep onöñ kundumgöba giliga mianön qewösahöi engömiriyök. ²⁰ Mewö engömiriba kewö jiyök, “Anutunöñ keuñi tem kölmegöra jim kutum enğiba embuk jöhöjöhö akzawi, mönö mianğö sepnja ki.”

²¹ *Mewöñanök opo seri jike kömbukñi mi tok sepnöñ kundumgöba giliga mianön kundumgöba miriyök. Amötqeçe nup memegö aködamun yuainñi pakpak mi mewöyök kundumgöba gili miriyök. ²² *Köna keunöñ jim kutuzawangö dop i me wai pakpak mi mönö sepnöñ sanğonninga sarakñi ahakza. Kunöñ sep qahö mokoza ewö, Anutunöñ mönö sinğisöndoknini qahö mosötma. Mewö.

Kraistkö sepnjan sinğisöndoknini köl könjörarakza.

²³ Suep jike kömbukñangö söpsöp imutñi imutñi mi gölmenöñ jöwöwöl ohoho aka mewö mianön amöt enğugetka sarakñi aketka dop köljamö, Suepkö öroyuaigöra mi qahö dop kölja.

Miaᅅgöra Kraistnöᅅ jöwöwöl ohoho qainᅅi kun aka miaᅅön Suep jikegö öröyuaᅅi pakpak mi mönö amöt enᅅuiga sarakᅅi aketka dop kölöök. Jöwöwöl ohoho qainᅅi kun miaᅅön mönö gölmegö jöwöwöl ohohöᅅi öᅅgita aködamuraᅅambuk akza. ²⁴ Miaᅅgö könaᅅi kewö: Kraistnöᅅ jöwöwöl jike olenᅅi töröᅅi kötökᅅi azinöᅅ memeni miaᅅgörenᅅ qahö öᅅgöyök. Mi Anutugö jike öᅅᅅaᅅgö söpsöpᅅi miyök ahök. Kraistnöᅅ mönö Suep miri öᅅᅅi miaᅅgörenᅅ öᅅgöba nalö kewöᅅe bauköm nenᅅimakeᅅapköra jiteᅅememenini aka Anutugö jemesoholᅅe asuhumakza.

²⁵ Jike nup galöm bohonnaᅅ yambu (yara) dop sömbup seᅅᅅini memba jöwöwöl jike olenᅅi töröᅅi kötökᅅi miaᅅgörenᅅ öᅅgöba malök. Kraistnöᅅ miaᅅgö dop qahö ahakza. Yaᅅön Suep mire indimᅅi gwötpuk qahö öᅅgöyök. Anutugö jöwöwöl lamaanᅅ aiga yambu (yara) dop qemakeᅅgöra aka eu qahö öᅅgöyök.

²⁶ Indimᅅi mohotᅅaᅅ qahö dop kölbawak ewö, yaᅅön mönö Anutunöᅅ Suep gölme miwikᅅaim etkiyöhi, nalö miaᅅgörenᅅök könahiba sihimbölöᅅi bölöᅅi möri indimᅅi sehiseᅅiᅅi akawak. Mewö qahöpmö, gölmegö nalöᅅaᅅ tekömamgö aiga nalö kewöᅅe indim mohot miyök siᅅgisöndok köᅅ köᅅjöratmapköra aka asuhuyök. Asuhuba nanᅅi jöwöwöl ohoho ewö ak waᅅgimegöra al aᅅguyök. ²⁷ Göᅅme ambazip nenᅅgö areᅅnini kewö ahöza: Nini nalö kunöᅅ kömumbin aka miaᅅgö andöᅅe Anutunöᅅ keunini kewöta jim teköm nenᅅgima.

²⁸ *Areᅅ miaᅅgö dop Kraistnöᅅ mewöᅅaᅅök ambazip sehiseᅅiᅅi nenᅅgö siᅅgisöndoknini köᅅ köᅅjöratmapköra indim mohotkö dop kaba nanᅅi jöwöwöl ohoho ewö ak waᅅgimegöra al aᅅguyök. Yaᅅön nalö kunöᅅ lilingöba kama. Siᅅgisöndököra aka kunbuk qahö kamapmö, ambazip asuhumapkö mambörakzini, mönö nini oyaenᅅkoyaenᅅ nenᅅgiba nenᅅuaᅅᅅitmapköra aka asuhuma. Mewö.

10

Indim mohot kömupnöᅅ al aᅅᅅi dop köᅅ teköza.

¹ Köna keu walᅅi miaᅅön oyaenᅅkoyaenᅅ akingö könaᅅi öᅅᅅi qahö akzapmö, oyaenᅅkoyaenᅅ asuhumawaᅅgö imutimutᅅi miyök ahöza. Köna keugö könaᅅi mewö ahözawaᅅgöra aka ambazip Anutu möpöseibingöra jike kömbukᅅe nalö dop öᅅgömakzei, yeᅅön mönö letota aködamuraᅅinambuk akingö osimakze. Yeᅅön nalö teteköᅅi qahö naluk kalem waᅅgita ala jöwöwöl ohoho miyök yambu (yara) dop toroqeba aka malgetmö, miaᅅön qahö dop kölöök. ² Miaᅅön dop kölbawak ewö, jöwöwöl ohoho mi öᅅöp mosötpeak. Jike kömbukᅅe Anutu waikᅅi memba möpöseigeri, yeᅅön indim mohot

* 9:28: Ais 53.12

amöt enjgugetka sarakñi ak teköbeak, mewö mönö siŋgisöndokñinaŋgö gamuñi mi qahö toroqeba mötpeakmö, mi toroqeba mötket. Mianğöra sömbup kalem mi toroqeba nalukñina almalget.

³ Yambu (yara) dop jöwöwöl ohoba malgeri, mianğön mönö toroqeba siŋgisöndokñinaŋgö gamuñi mi jim gulim enjii malget. ⁴ Bulmakau aziñi aka meme (noniñ) yeŋgö sepñinan mönö siŋgisöndok köl köñjöratmapkö osiza. Mi esapkögetmö, qaköba mala kotket.

⁵ *Mianğöra Kraistnöñ gölmenöñ eta asuhuyöhi, nalö mianğöreñ kewö jiyök, “Anutu, göñön naluk kalemğöra aka jöwöwöl ohome-göra qahö köpösöngöba malnöñmö, gölmenöñ malmalgö silenji mi mözözömgöba niñginöñ.

⁶ Jöwöwöl ohoba siŋgisöndokñinaŋgöra aka naluk kalemñi kalemñi ala malgeri, mi eka mianğöra qahö söñgaiba malnöñ.

⁷ Nalö mianğöreñ kewö jial, ‘Anutu, mötnöñ, nöñön ki kazal. Nöñgö könani mi papia lipiñlipiñi mianğöreñ ohogetka ahöza. Mianğö dop mönö göhö sihimğahö dop aka memba malmam.’ ”

⁸ Mutuk kewö jiyök, “Naluk kalem ala jöwöwöl ohoba siŋgisöndokñinan solanimapköra yuai könañi könañi aka malgeri, mianğöra mönö sihimğan qahö asuhui möta malnöñ. Mi eka mianğöra qahö söñgaiba malnöñ.” Yuai mi Köna keu walñangö dop toroqeba ahakzemö, mi töndup mewö jiyök.

⁹ Mianğö andöñe keu kewö jiyök, “Anutu mötnöñ, nöñön mönö ki kaba göhö jitsihitkahö dop aka memba malmam.” Mewö jiba Anutu waikñi memba möpöseibingö könañi mutukñi mi qeapköba köna dölökñi kuñguyök. ¹⁰ Anutugö jitsihitñan nam köl wañgiiga silenjan jöwöwöl ohoho ewö aket teköi mianğöra mönö tök kutum neñgii sarakñi ak teközin. Indim mohotkö dop silenji köleñniga mianğön nalö dop mönö söp köla ahöm öñgöma.

¹¹ *Nalöñi nalöñi jike nup galöm pakpak mienñön kinda jike nupñini memakze. Sundan dop jöwöwöl ohoho miyöhök dumñe kunbuk ahakzemö, mienñön siŋgisöndokñini köl köñjöratpingö osimakze. ¹² *Mienñön osimakzemö, Suepkö jike nup galöm bohonñan mönö indim mohotkö dop siŋgisöndoköra aka silenji köleñniga nalö teteköñi qahö dop köla ahöm öñgöma. Jöwöwöl ohoho ewö ak wañgigetka Suep jikenöñ öñgöba Anutugö böröñi ölñe tatza. ¹³ Mianğöreñ tata nalö sutñi kianğöreñ Anutunöñ tuarenjoñurupñi tötali

et enjuiga Kraist kõnanangö döpnj* aketka köirañ kölbingö mamböta malja. ¹⁴ Indim mohotkö dop kömupnõñ al anjuigi jöwöwöl ohoho ewö ak wanjigetka miañõn dop köl teköi ölöp ambazip tök kutum nenji sarakñi akingö dop akzin. Mewö ölöp mem letot nenjiiga aködamunini pakpak miwikñaiba nalö tetekõñi qahö mewö mal õngöbin.

¹⁵ Uña Törõnan mewöyök keu mi nangöba jiiga mötzin. Mutuk keu kewö jii ahöza:

¹⁶ **“Kembu nõñõn kewö jizal: Nalö tosatñan tekögetka miañgõrenj mönõ jöhöjöhö arenj yembuk akñami, mi kewö: Nõñõn Köna keuni pakpak mi mönõ uru kõnõmjine ala mötmõtñine kimbi ewö ohomam.”*

¹⁷ **Mewö jiba kewö toroqeyök, “Nõñõn mönõ yengö siñgisõndok-ñini aka ahakmemenini iwilelebuk akeri, miañgõra ölum nuñgui mi qahö toroqeba mötmõriba malmam.”* ¹⁸ Keu miañgö dop Anutunõñ mi mosõri keuninan kömuyõhi, siñgisõndok mienjgõra jöwöwöl ohobinanangö dop qahö akzin. Mewö.

Anutubuk kapan köla malbingõra nenjgoholök.

¹⁹ Miañgõra urumelenj alaurupnini, Jisösgö sepñan sanjon nenjiiga mönõ ölöp Anutugö jike oleni törõñi kötõkñi miañgõrenj õngöbin. Mewö möt narim köhöiba uruyahöt qahö ahakzin. ²⁰ Jisõsnõñ kõna anangö kõna dölõkñi mesariga nanñak malmal köhöikñangö kõnanj ak nenjiza. Köna mi nanñi silenj kölenja mewö miañõn mesari ahöza. Köna mi tiba Anutugö jikenangö opo selñi kutuba jike oleni törõñi kötõkñi miañgõrenj õngöbin. Jisösgö silenjan nam köl nenjiiga opo selñi mi ölöp kutubin. ²¹ Jisõsnõñ jike nup galõm õngõngõñi ak nenjimakza. Yanõn Anutugö kõnagesõñi pakpak galõm köl nenjiba malja.

²² **Mewö maljawangõra nenñõn mönõ genmonj mosõta uruyahöt körek yakõriba põndanõk mötnarip qakñe kinda Anutugö kösutñe anda köulukõba malbin. Sepñan qewõsahõi nenjõmiriba uru tõlõhopnini sanjonñiga sarakñi aka malbin. Uruninan qahö toroqeba jim nenjiiga mönõ awõsamkakak malbin. O sarakñi ariinga mem tuarim nenjiiga mewö mönõ Anutubuk qekõtahõba malbin.* ²³ Anutunõñ oyaenjkoyaenj akingö keu jöhõba nenjiyõhi, yanõn mönõ keunji põndanj wu-atanjõba nembuk kinja. Mewö kinjawangõra aka mewö akingö mamböta jörõmqörõmñi jim miwikñaimakzin. Miañgõrenj mönõ konjwarak mosõta zenj kin köhöiba malbin. ²⁴ Urukalem

* **10:13:** Kerõkurupñi memba et al engiba luhut ala gamu qem engibingõra kõnanjan tuapkõba qakñine döp ewö tõlanjiba malget. Juda yengõrenj kõna mewö.

* **10:16:** Jer 31.33 * **10:17:** Jer 31.34 * **10:22:** Lew 8.30; Eze 36.25

aka ahakmeme ölopñi akingöra mönö uru kuñgum aka nañgöm añguba malbin. Mewö malbingöra mönö pöndañ galöm mem añguba malbin. ²⁵ Tosatñan nanñini urumelen könagesögö totokonñini mosörakzei, neññon mönö silik mianğö dop kude aka malbin. Mewö qahöpmö, Kembu kamawañgö aiwesökñi eka nalöñan dopdowimapkö mötzini, mianğö dop mönö kapañ köla köhöiba uru kuñgum añguba malbin.

²⁶ Buña keu ölni mötagun nanini imbi-imbi qakñe siñgisöndok lañ akin ewö, siñgisöndoknini mianğöra mönö naluk jöwöwöl kun albingö osibin. Jöwöwöl ohoho kun mi qahö bauköm neñgima. ²⁷ *Mi qahö bauköm neñgimapmö, Anutunöñ keunini mi jim teköba likepñi melenñi qaknine öngömapkö mamböringa jönömninan undui keñgötnini möta malbin. Anutugö könöpñan tuarenjon-urupñi engohomawi, mianğö kukñi miyök asuhumapköra mönö mamböta malbin.

²⁸ *Kunñan Mosesgö Köna keu andö qezawi, i mönö keu jakenñe algetka yahöt karöbutñan keuñi nañgöba jigetka keuñambuk akña ewö, i mönö kude ak kömum wañgigetka kömupkö buñaya akña.

²⁹ *Mewö akñapmö, ambazip kun kewöñangö keuñangöra mönö denöwö mötmörize? Kunöñ Anutu Nahönñangö keuñi könañan tökötahöba gilakza. Jöhöjöhö areñ dölokñangö sepñan lök tök kutum wañgii sarakñi ahökmö, sep mi yuai omañi ewö memba et alakza aka kalem möriam Toñi Uña Töröñi mi ilita mepaqepaik ak wañgimakza. Kunñan mewö aiga Anutunöñ keuñi kewöta likepñi dawikö dop wañgii dop kölbawak? Köna keu qetala kömupkö buñaya akingö dop akzinmö, Anutunöñ ambazip mewöñangö likepñi mi mönö könöpuk ak wañgii qakñe öngöi sihimbölö önöñi qahö möta malma. Wani sihimbölönöñ mönö dop köl wañgibawak? Yangö könañangöra mönö denöwö mötmörize?

³⁰ *Keu kun kewö ahöza, “Jinöñ jibi, nuñgunöñ guhubi, aknöñ aki mi nöñgö nuwa. Nöññon mönö ambazip keuñinañgö likepñi melenmam.” Toroqeba keu kun kewö jii ahöza, “Kem-bunöñ könagesöurupñi engö keuñini kewöta jim teköma.” Kun daññon mewö jiyöhi, neññon i möt wañgizin. ³¹ Anutu malmal Toñangö jene kinda et neñgui böröñan neñgumawi, mianñon mönö kanjamñambuk kötökñi akña. Mewö.

³² Löwöribepuköra kewö jizal: Anutugö asakñan kaiga buña gem añguba asarigeri, mönö nalö mutukñi mi mötmöriba malme. Nalö mianğöreñ mötnaripkö bim qeba sihimbölö gwötpuk miwikñaiba mi töndup aum-möriba aongit aka kin köhöiget. Mi mönö kude ölum enguma. ³³ Nalö tosatñe gamu

* 10:27: Ais 26.11 * 10:28: Dut 17.6; 19.15 * 10:29: Eks 24.8 * 10:30: Dut 32.35, 36

qem engiget könjilin mötketka qenjaröknöj engehiba malget. Nalö tosatne alaurupñini tandök mewöyök ak engigetka yengö qöhöröjine kinget. ³⁴ Tosatni kösö mire alget tatkeri, mönö i engeka sihimbölöjini mohotne möta malget. Sukinapñini kiom qeba megeri, mi mönö sösöngai qakne möt anğön köla malget. Suepkö ainemaluku qainni kun qahö ayapkömawi, mi ahöm engizawanğö möta miangöra urukölalep möta malget.

³⁵ Miangöra awösamkakakñini mönö nalö kewöje kude gila mosötme. Mi kude mosötketka Anutunöj mönö miangö towañi ketañi engima. ³⁶ Anutunöj yuai engimapkö keu jöhöi ahözawi, enñon mi buña qem anğumegöra kinje. Miangöra Anutugö jitsihitñi wuatangöba lömböt möta mököşönda kapan köla malme ewö, Suepkö buñani mianjön mönö enğö buña akña. ³⁷ *Kewögöra mönö kin köhöiba malme: Nalö töröptökñi miyök mönö toroqeba mamböringa “Kunbuk kamawanñon mönö kam kuñguma. Nalöñi qahö qem körii öngömapmö, nalöñangö dop törörök kama.

³⁸ Törörök kamapmö, nöngö alanan ahakmeme diñdiñi wuatangömakzawi, yangö mötnaripñan mönö nam köl wanğii mal köhöim öngöma. Kunbuk elennda mötnaripñi mosötma ewö, mi qahö dop köli urunan mönö yangöra qahö söngaima.”

³⁹ Keu mewö ahözapmö, neñon ambazip uruñini kunbuk elennda mötnaripñini mosöta könöp siagö buñaya akñei, mönö yengö kambunöj qahö kinjin. Mewö qahöpmö, mötnaripñini mi mönö galöm kölinga Anutunöj amöt qem neñgii mala Suep mire öngöbinangö dop akzin. Mewö.

11

Ambazip mötnaripköra aka yuai kewö asuhuyök:

¹ Mötnaripkö könañi kewö: Yuaigö jörömqöröm akzini, mi asuhumapköra mönö köhöiba uruyahötñi qahö möt narizin. Yuai qahö ehəkñi miangö dop aka memba ölni ek-ingö mamböta awösamkakak kinjin. ² Möpñangö möpñeyök könahiba ambazip mötnaripñinan nam köl enğiiga uruñini melengetka Anutunöj engehi dop köliga jim ölöwak enğiiga malget. ³ *Mötnaripñinan nam köl neñgii yuai pakpakö könañi kewö möt asarimakzin: Anutunöj keuñi jim kutuba mianjön Suep gölmegö öröyuaiñi pakpak miwikñaiyök. Miangöra nalö kewöje yuai ehakzini, mi yuai ehəkñi miangöreñök qahö letota asuhuyök.

Abel, Enok, Noa yengö mötnaripñini

⁴ *Kein (Kain) Abel yetkön Anutugöra jöwöwöl ohoyohotka

* 10:37: Hab 2.3-4 * 11:3: Jen 1.1; Sum 33.6, 9; Jon 1.3 * 11:4: Jen 4.3-10

Abelnöy uruñi melenjiga mötnaripñan nam köl wañgi törörök tem köliga köwakñan diñdiñ öngöyök. Mewö öngöiga Anutunöy jöwöwölñi ehi dop köli jim ölöwahök. Jim ölöwaka Abelnöy solanñi ahöhi, Anutunöy keuñi mi nañgöba jiiga mötnaripñan nam köl wañgi mörök. Mewö möta mala kömuyökmö, mi töndup nalö kewöñe ahakmemeñi möringa keu mianjön mönö toroqeba urunini kuñguba nañgöm neñgimakza.

⁵ *Azi qetñi Enok yañön mönöwök uruñi melenjiga Anutunöy keuñi nañgöba jim ölöwahiga möta yañgö jeñe dop köla malök. Mewö mala mali mötnaripñan Anutu nam köl wañgiiga wañgiri jebuk öngöyök. “Anutunöy wañgiri öngöiga toroqeba miwik-ñaibingö osiget.” Buña Kimbi miangö dop Enok mötnaripñan añgön köl wañgiiga qahö kömuyök. ⁶ Uruñi Anutugöreñ melenjawañön mönö keu kewö möt narima: Anutunöy malja aka Anutunöy ambazip yañgö jeñe dop kölbingö jaruzei, mi töwa qem eñgima. Keu yahöt mi möt nariba ölop Anutugö kösutñe kamapmö, qahö möt narim wañgiba öne yañgö jeñe dop kölbingöra mönö osibin.

⁷ *Anutunöy Noagöra yuai asuhumapkö galöm meme keuñi indelök. Indeli Noanöy möt asariba sömbuñi qainñi kun möta ölni qahö ehiga mötnaripñan nam köl wañgiiga tem köla wañge meyök. Anutunöy nanñi aka saiwaurupñi añgön köl eñgimapköra möta wañge mi meyök. Noa mötnaripñan nam köl wañgiiga wañge meyöhi, ahakmeme mianjön mönö gölme ambazip könañamñini goñgoñi indeli Anutunöy keuñini jim teköiga ayuhuget. Uruñini qahö melenja ayuhugetmö, Noagö mötnaripñan nam köl wañgiiga Anutugö jeñe solanñi akingö kalemñi mi buña qem añguyök. Ambazip Anutu möt narim wañgiinga keunini jim teköi solanimakzini, Noanöy mönö miangö dop solanñi ahök. Mewö.

Abraham Sara yetkö mötnaripñiri

⁸ *Anutunöy Abraham gölme yañgö buña akñapkö jiyöhi, mönö miangöreñ anmapkö oholök. Oholi mötnaripñan nam köl wañgiiga keu mi tem kölök. Denikeañgöreñ anda añgotpawak mi qahö mörökmö, mi töndup nanñi gölmeñi mosöta anök.

⁹ *Anda Anutunöy gölme yañgö buña akñapkö jim jöhöhi ahöyöhi, mönö miangöreñ añgorök. Añgota kian aka ambazip ahakmemeñini qahö mörökmö, mötnaripñan nam köl wañgiyöhanjöra mönö töndup opo koumñi kuñguba ali miangöreñ ahöba malget. Isimoröñi Aisak Jeikob yetköñ mewöyök Anutunöy gölme eñgimapkö jöhöjöhö keuñi miyök buña qem añguba gölme miangöreñ toroqeba opo koumñini kuñguba ala

ahöba malget. ¹⁰ Suep siti tandöñan qahö gisahömawi, Abrahamnön mi ekñangö mamböta malök. Anutunön siti miangö arenji ala imutñi memba miri tandöñini esiba meiga pöwöwöm köhöikñi ahöm öngömawi, mönö miangörej angotmamgö al mamböta opo koumnön malök.

¹¹ *Mewö mala lök azi namñi aiga mötnaripñan nam köl wañgiiga köhöiba iwi ahök. Abrahamgö anömñi Sara yañön köpin malökmö, mi töndup gölöm ala morö meyök. Anutunön Abrahamgö könagesöñi ketañi akñapakö keu jöhöm wañgiyöhi, yañgöra aka keuñan öljambuk akñapakö möt nariba malök. Mötnaripñi mianñon mönö nam köl wañgiiga nahönña asuhui ehök. ¹² *Azi mohot miangö mötnaripñan nam köl wañgiiga lök kömükömugö dop ahökmö, mi töndup yañgörejök könagesö keta bölöknji asuhuget. Senjelau suepnön asarigetka jañgöñini oyonbingö osizini, me sak köwet jitñe ahözei, gwölönarökurupñan mönö miangö dop sehiba asuhuget.

Ambazip kewöñan Suep mirigöra awöweñgöba malget:

¹³ *Ambazip kösohotñini lök jizini, mi körek uruñini melenña Anutu möt narim wañgiba mala kömuget. Anutunön gölme enjimapakö keu jöhöm enjii malgetmö, gölme miangörej qahö angotket. Mewö qahöpmö, gölmenjini mi köröwen kinda uba eka waikñi memba söñgaiget. Eka öne söñgaiba kewö jim miwikñaija jiget, “Gölmenön mönö kiana aka qandak maljin.” ¹⁴ Ambazip nanñine miri gölmenjine angotpingö jaram timakzei, yeñön mönö keu mewö jimakze. ¹⁵ Gölme mosötkeri, miangö mötmöriba keuñi jibeak ewö, yeñön mönö ölöp lilingöba miangörej angetka uruñinan teköbawak.

¹⁶ Mönö ölöp lilingöbeakmö, yeñön miangöra qahö mötmöriba malget. Miangöra qahöpmö, kantri qainñi kun Suepnön ahözawi, mönö miangörej angotpingö awöweñgöba malget. Anutunön yeñgöra siti kun meiga ahözawi, miangöra qetñi “Nanine Anutu!” qetketka mi möta söñgaiba yeñgöra aka gamu kun qahö mörakza.

Abraham, Aisak, Jeikob, Josefyenñgö mötnaripñini

¹⁷ *Anutunön Abraham esapesapnön al wañgiiga mötnaripñan nam köl wañgiiga Aisak Anutu kalema wañgiyök. Anutunön Aisaköra gölme wañgimamgö jiiga Abrahamnön jöhöjöhö keu mi buña qem anguyökmö, töndup nahönñi mohok-kun mi mosöta mianñon jöwöwöl ohomamgö ahök. ¹⁸ *Anutunön Abrahamgöra keu kewö jii mörök, “Aisaknön mönö gwölönarökurupki nam köl enjiiga asuhuba göhö qetki

* **11:11:** Jen 18.11-14; 21.2

* **11:12:** Jen 15.5; 22.17; 32.12

* **11:13:** Jen

23.4; 1 Hist 29.15; Sum 39.12

* **11:17:** Jen 22.1-14

* **11:18:** Jen 21.12

bisiba malme.” Keu mi mörökmö, töndup nahönñi altanöñ ala mosörök. ¹⁹ Mosöta kewö kewöta mötmöriyök, “Kömumapmö, Anutunöñ ölop köhöiba mem gulii kömupnöhök wahötma.” Söpsöp keu mewö jiyöhi, miangö dop nahönñan dumñe kunbuk kömupnöhök ewö wahöri wanğirök.

²⁰ *Mötnaripñan Aisak nam köl wanğiiga nahönyahötñi Jeikob aka Iso (Esau) mi kötuetköm etkiyök. Anutugö kötümötuetñi miangön mönö nalö könangepñe mewöyök dop köl etkii qakñire öngömakñapköra köuluköyök.

²¹ *Jeikobnöñ kömumangö ahöhi, nalö miangören mötnaripñan nam köl wanğiiga nahönñi Josefgö nahönyahötñi yahöt mi kötuetköm etkiba öröpñangö kitipñe nariba Anutu waikñi memba möpöseiyök.

²² *Josefgö kömupñan dopdowiyöhi, nalö miangören mötnaripñan nam köl wanğiiga Israel könagesö Ijpt mosöta kageri, miangö kösohotñi mi jim guliba jiyök. Mewö jiba könangep qamötñi denike löm kölmegö keunji mi jim kutum engiyök. Mewö.

Mosesgö mötnaripñi

²³ *Mötnaripñiran Mosesgö iwinamñi nam köl etkiiga Mosesnöñ asuhuyöhi, i nalö miangörenök könahiba köiñ karöbutkö dop asambörohot. Morö mi eksihimñambuk tandökñi kun ahöhi, mi eka kiñ kembugö jimkutukutunji onğitpitpuköra kenğötñiri qahö möta moröñiri asamböta galöm kölohot.

²⁴ *Mosesnöñ qariiga qetñi farao kiñ böratñangö nahönñi qetketka mötnaripñan nam köl wanğiiga qet mi bisimangö tököba farao kiñgö miriñi mosöta angaiyök. ²⁵ Ölop toroqeba Ijpt yembuk siñgisöndökö sösongainji miwikñaiba mi nalö töröpñi lañ söngaibawakmö, malmalñi mi andö qeyök. Mi andö qeba Anutugö urumelen könagesö yembuk toroqei kahasililiñ ak engigetka mi mohotñe möta aum-möribingö möri öngöngöñi ahök. ²⁶ Anutunöñ töwa wanğimapkören göröken uba kin köhöiyök. Miangöra Ijpt yeñon guli dötnamñinambuk aka siyonşayonji qahö malgeri, miangö möri yuai eretñi ahök. Miangön yuai eretñi aiga andö qeba Amötqeqe Tonambuk toroqeiga yangöra aka mepaqepaik ak wanğiba malgetmö, mi möri töndup ölni aka öngöngöñi ahök.

²⁷ Mötnaripñan Moses nam köl wanğiiga Ijpt kiñ kembunñangö irimñi seholibapuköra kenğötñi qahö möta kantriñi mosöta kayök. Anutu ehəkñi qahö mi ehökö tandök mötmörim wanğiba malöhi, miangöra mönö kapan köla kin

* 11:20: Jen 27.27-29, 39-40 * 11:21: Jen 47.31-48.20 * 11:22: Jen 50.24-25;

Eks 13.19 * 11:23: Eks 2.2; 1.22 * 11:24: Eks 2.10-12

köhöiyök. ²⁸ *Mötnaripņan nam köl waņgiiga ak-kömukömu kendon* ala mianģö areņi jim kutum enģiiga sönģaiba tatket. Kömupkö garatanöņ Ijpt uruņe nahönņini mutukņi enģugetka Israel yengö nahönurupņinan kömumbepuköra mönö jim kutum enģiiga naņģuņine sep miriget.

²⁹ *Mötnaripņinan Israel ambazip nam köl enģiiga Köwet Pisikņi mi gölme örönņe anangö dop kutuba kaget. Ijpt yarö azi yenģon mi kutubingö esapkögetmö, mönö onöņ nemulahöba ayuhuget.

Rahab aka mötnaripkö ambazip ipņi tosatņi

³⁰ *Mötnaripņinan Israel könagesö nam köl enģiiga Jeriko taonöņ kaba kiripo selņi silim 7:gö dop liliköba mohotņe anda kagetka kiripo selņi selņi köhöikņan mönö gororongöba etket. ³¹ *Mötnaripņan köna ketañi ambi Rahab nam köl waņgiiga kewö aiga Anutunöņ ehoriyök: Israel jitņememe yetkön gölme ek miwikņaibitköra ölöņ kayohotka ala aka köl öröm etkiyök. Anutunöņ mi eka könaņep yaņģiseņ ambazip enģui ayuhugetka Rahab ehorii yembuk mohotņe qahö kömuyök. Mewö.

³² *Wani keuya kunbuk toroqeba jibileņak? Gideon, Barak, Samson, Jefta, Deiwid, Samuel aka kezapqetok ambazip tosatņi yengö kösohotņini toroqeba jibileņak ewö, nönģö nalönan mönö qahö dop kölbawak. ³³ *Mötnaripņinan tosatņi nam köl enģiiga jakömbuak tohoņi tohoņi tulungöba memba ambazip mindiņģöm enģigetka ahakmeme diņđiņi wuatañģöba malget. Anutunöņ yuai neņģimapkö keu jöhöi ahözawi, gwötpukņan keu mianģö dop köuluköba möt narigetka ölni asuhui meget. Tosatņan laion sömbup sutņine köuluköba möt narigetka Anutunöņ laion numbuņini jöhöyök.

³⁴ *Tosatņan könöp bölam uruņe köuluköba möt narigetka Anutunöņ könöp ösumņi qömbököiga qahö enģohoyök. Tosatņi bingö sou ketañi mianģon enģubingö aketka Anutunöņ yengö souņini jitņi jöhöiga kök alget. Gwötpukņan lölöwöröņi aka köuluköba möt narigetka Anutunöņ ösum enģiiga köhöiget. Tosatņan bim qeba köuluköba möt narigetka Anutunöņ kuk enģiiga suahö köhöikņi aket. Kian yengö yarö kambuņinan kagetka tosatņan köuluköba möt nariba mewö mönö enģuatañģögetka unjurata anget.

* **11:28:** Eks 12.21-30 * **11:28:** Anutugö garatanöņ Israel ambazip enģehoriba enģonģiröhi, mianģö kendonņi mi nanine keunöņ ak-kömukömu kendon ĵiinga Nei keunöņ Pasowa jize. * **11:29:** Eks 14.21-31 * **11:30:** Jos 6.12-21 * **11:31:**

Jos 2.1-21; 6.22-25 * **11:32:** Kemb 6.11-8.32; 4.6-5.31; 13.2-16.31; 11.1-12.7; 1

Sml 16.1; 1 Kiņ 2.11; 1 Sml 1.1-25.1 * **11:33:** Dan 6.1-27 * **11:34:** Dan 3.1-30

35* **Ambi tosatņan kitipņinan kōmui kōulukōba mōt narigetka Anutunōņ mem gulim waņgii kōmupnōhōk wahōriga kunbuk toroqeba aitoņgōget.** Ambazip tosatņan kōmup andōņe oyaenķoyaen ōņgōņgōņi miwikņajbingōra mōta kapaņ kōla kinget. Mewō kingetka ihileknōņ enģuba kahasililiņ kōnaņi kōnaņi ak enģiba kewō jii mōtket, “Anutu qaņ kōlnōņga zilaņ pōsat gihibin.” Mewō jii mōtketmō, yeņōn mi tōkōgetka toroqeba jaņgaurāņa mem enģiba malget. 36* **Tosatņan Anutu mōt narigetka mepaqepaik aka ihilek wahinambuknōņ enģugetka sihimbōlō kōnaņi kōnaņi miwikņajiba malget.** Toroqeba tosatņi gwarōhōba kōsō miriņi miriņi mianģoreņ al enģiget malget.

37* **Tosatņi kōtnōņ enģugetka kōmuget.** Tosatņi segenōņ mitim enģigetka yahōt aket. Tosatņi bimģō sou ketaņi mianōn enģugetka kōmuget. Tosatņan lama sileņi aka meme (noniņ) sileņi mianōn opo ewō lōņģōta laņ anda lilikōget. Mewō wanapņi tōhōn aketka sesewerowero aka kahasililiņ laņ mem enģigetka malget. 38 **Suepkō akōdamunņinambuk aka gōlmegō ahakmeme bōlōņaņ-gōra mōtketka qahō dop kōl enģiiga mianģoreņ qahō toroqeget.** Qahō toroqeba laņ lilikōba gōlme qararaņkōlkōlņe anda kaba kundunņi kundunņi ōņģōba eta baņet me gōlme titiņgit uruņe ahōba malget. Mewō.

39 **Ambazip kōsohotņini jizali, kōrek mi mōtnariņņinan nam kōl enģiiga uruņini melenģetka Anutunōņ enģehi dop kōliga jim ōlōwak enģiiga malget.** Mewō malgetmō, mi tōndup Anutunōņ oyaenķoyaen qainņi kun neņģimapkō keu jōhōi ahōzawi, mianģoreņ yeņģoreņōk kunōņ kun mōnō qahō aņgorōk. Qahō!
40 **Anutunōņ i nanņinōk qahōpmō, mōnō nembuk mohotņe akōdamuninambuk ak tekōbingōra mōtza.** Mewō mōta mianģōra oyaenķoyaen qainņi kun neņģii miwikņajbingō keu areņi ali ahōza. Mewō.

12

Anutunōņ iwi aka mindiņģōm neņģimakza.

1 **Ambazip kambu keta bōlōkņi mewōņaņ mōtnariņkō kōnaņi naņģōba jiba kousu ewō lilikōm neņģiba kinjei, mi mōtzin.** Mianģōra neņōn mewōņaņōk mōnō lōmbōtnini pakpak aka siņģisōndok awamņanōk kōpeim neņģimakzawi, mi gilin anma. Anutunōņ nini mōtnariņkō bimņi qeba Satan luhut al waņģibingō areņi ali ahōza. Mianģōra malmal sutņi ki malagun kōmumbini, sutņi mi mōnō aņģit tandōk kapaņ kōla bim qeba ōsumninan anbin. 2 **Jisōsnōņ mōtnariņņini mem letori ahui mem qarii kōhōiba akōdamunņambuk ahakzawi, Tonņi mi mōnō jeninan uba tōrōrōk ehakin.** Yaņōn ōlōp toroqeba Suep

* **11:35:** 1 Kiņ 17.17-24; 2 Kiņ 4.25-37 * **11:36:** 1 Kiņ 22.26-27; 2 Hist 18.25-26;

Jer 20.2; 37.15; 38.6 * **11:37:** 2 Hist 24.21

mire mala söngäibawakmö, mi mosöta eta miangö salupne sihimbölö mörök. Maripomnöy kegwek-kahasililiy ewö kömumangö gamu möta qahö tököyökmö, mi qenjaröknöy möta mökösoñda kömuyök. Kömumba Anutugö jakömbuak dum tatatnöy öngöba böröñi ölnje tatta.

³ Singisöndok ambazip yenön mewö tuarenjöy ak wangetka sihimbölö möröhi, enön mönö i mötmöröba malme. Sörauba löwöröba urueret aka kinda mötnaripñini aka jörömqörömñini mosötpepuköra mönö mewö ahakne.

⁴ Singisöndok akinbuköra aum-möröba bim qeba malgetka miangöreñ singisöndokö Toñan mönö sepgwörörök (gulibambam) qahö enguyök. ⁵ *Iwinöy nahönböraturupñi yenjöra qambañ keu engizawi, Anutunöy miangö dop keu kun engöra kewö jiiga mönö mi ölum engui malje, “O nahöni, Kembunöy mindiñgöm gihimakzawi, miangöra mönö mötnöñga silebile kude akña. Keu jim gihiiga miangöreñ mönö urueret kude aka malman.

⁶ Kembunöy ambazip jöpaköm engimakzawi, ia mindiñgöm engimakza. Ambazip morö ewö engömemba köyan köl engimakzawi, mi körek kömbinöy engumakza.”

⁷ Morö kun iwinan qahö mindiñgöi lañ malbawak, mewö mönö yangö moröñi qahö akawak. Miangöra Anutunöy inini nahön-böratñi ewö tandök ak engimakza. Miangöra lömböt engii mi mönö mindiñgöm engimapkö tandök mötmöröba möta mökösoñda diñgiba malme. ⁸ Anutunöy nahönböraturupñi pakpak mindiñgöm engimakzawangö dop inini qahö mindiñgöm engibawak ewö, mönö yangö nahönböraturupñi ölni qahö akeak. Mewö mönö iwi qahö wilin morö (bastet) akeak.

⁹ Keu mi kunbuk kewö jimam: Gölmegö iwininan mindiñgöm nengetka yenjöra göda qem engiba malin. Silegö iwininan korembiñi akzemö, uruninangö Iwininan mönö ölni aka öngöñgöñi akza. Miangöra mönö yangö keu bapne anda diñgiba mal köhöininga dop kölma. ¹⁰ Silegö iwininan mönö nanñini mötmötñinangö dop kapañ köla gölmenöy nalö töröpñi malbingöra aka mindiñgöm nengetka malakze. Yenön mewö malakzemö, Anutunöy mönö tök kutum nengetka yangö dop sarakñi akingöra aka mindiñgöm nengetka. Mewö aka ölna ölöwaka oyaenköyaen akingöra mötza.

¹¹ Kunöy mindiñgöm nengetka nalö miangöreñök mönö sösoñgai tandök qahö ahakzinmö, wösöbirik sihimbölönambuk mörakzin. Keu mi ölnapmö, miangö ölnan mönö könangetka kewö asuhuma: Anutunöy ambazip mewö miangön köl gulim engimakzawi, yenjö ahakmemenjanan diñgiiga luai qem engii möta malme. Mewö.

* 12:5: Job 5.17; Qam 3.11-12

Qambaran aka galöm meme keu tosatnji

12 *Mianğöra “awötñini teköi böröñini lömböriba sörörauba kinjawi, mi mönö memba wahöta mindingöme. Tambuñini jula siminñini suljawi, mi mönö mem köhöime.” Buña keu kun mewö ahöza. 13 *Kekporörökñambuknöñ (kerekporikñambuknöñ) töwölatiba eta qeiga könañan sula bölim teköbapuk. Keu mianğö dop alanini anğösirip kude ak wanğimemö, mönö ölöwakñapköra kapan köla malme. Buña keu kun kewö ahöza, “Köna tiba anangö könañini mönö mem qölöleigetka diñdiñi akñe.”

Keu mianğö dop mönö uru ölöwak qem anğuba malme.

14 Ambazip körek yembuk luainöñ urumohot malmegöra mönö köhöiba kapan köla malme. Kunñan malmal sarakñi qahö miwikñaimawi, mönö öne Kembu qahö ekña. Mianğöra Anutunöñ mem sarahim enğimapköra mönö kapan köla kinme. 15 *Kunöñ Anutugö kalem möriamñi onğita qahö buña qem anğubapuköra mönö galöm mem anğuba malme. Nene nupnöñ siriuret kömbukñambuk mi jalöñinambuk qözölmakzin. Mianğö dop uru mötökömbukö könañi pakpak mi qeapköme. Qahö qeapkögetka mianñon qariba kota enjololon mem enğii gwötpuk enğö uruñinan tölöhobapuk.

16 *Mewöyök kunöñ kaisero akapuk me Iso (Esau) ewö anğöjörakñambuk malbapuköra mönö galöm mem anğuba malme. Isonöñ morönahön mutukñi ahöhanğö börösamot tonji ahökmö, keu mi nene indim mohot nemapköra aka qeapköyök. Qeapköiga munñi Jeikobnöñ börösamotkö keunji mi nene mianñon bohonñi memba buña qem anğuyök.

17 *Könañgep jöhöjöhö keunjanğö dop asuhui Iwiñanğö kötümötuetñan mönö Jeikob qakñe öngöyök, mi mötze. Mewö öngöi Isonöñ kötümötuet mi buña qem anğumamğö möta uleta sahöri imbilñan erök. Mewö kapan köla ulerökmö, töndup keu munñambuk jöhöyohori, mi utekömamğö köna kun qahö miwikñaiyök. Mianğöra morö mutukñanğö kötümötuetñi mi buña qem anğumamğö mörökmö, mianğöreñ qaköba osiyök.

18 *Mönöwök Israel könagesö yeñon Sainai (Sinai) kösutñe kaba kingetka kundunji mianñon könöp bölamnöñ jeyök. Jeba köwak-köwak eta panaman meiga raidimbom qeiga Anutunöñ mianğöreñ yembuk jöhöjöhö areñ ahök. Sainai (Sinai) kundunji mianñon börönöñ oseibinanğö dop akzapmö, enñon kundunji mewö mianğö kösutñe qahö kaba malje. 19 Anutunöñ jöhöjöhö areñi mi Sainai kundunje kewö ahök: Garataurupñan tömun qainñi kun ugetka anğötömuallñi azöñda kaiga keu

* 12:12: Ais 35.3 * 12:13: Qam 4.26 * 12:15: Dut 29.18 * 12:16: Jen 25.29-34 * 12:17: Jen 27.30-40 * 12:18: Eks 19.16-22; 20.18-21; Dut 4.11-12; 5.22-27

köhöikni jiyöhangö kourukni mötket. Mi möta keu mewöni kunbuk kude jii mötmegöra uletket. Enön kundunji mewö miangö kösutje qahö kaba malje. ²⁰ *Anutunöñ keu köhöikni jiba kewö jim kutum engiyök, “Kunñan kun ambazip me bau sömbup kunöñ kundunji mi oseima ewö, i mönö kötnöñ qegetka kömuma.” Mewö jim kutum engiiga keu mi wu-atanjöbingö möt lömböriba osiget. Miangöra keu kunbuk kude jimapköra uletket. ²¹ *Yuai kanjamñambuk kötökni mi uba eketka Mosesnöñ kewö jiyök, “Ni mönö kenjötni möta jönömmi undui kinjal.”

²² Enön mewö qahöpmö, mönö urunini melenja Zaion kundunji dopdowiba kanjuta malje. Anutu malmal Tonangö sitiñi qetñi Jerusalem Suepnöñ ahözawi, miangören garataurupñi ten tausenni ten tausenni yeñon kambunji kambunji köla unduba sösongai ahakzei, enön mönö siti mi dopdowiba malje.

²³ Mutuk ahuahu dölokni ahuba urumelenj könagesö aketka qetñini malmalgö bukñöñ ohogetka Suepnöñ ahözawi, enön mönö yeñgö kambunini toroqeba malje. Anutunöñ ambazip körek neñgö keunini kewöta jim tekömakzawi, enön mönö bemnini yambuk toroqeba malje. Anutunöñ ambazip solanji mem letot engiiga aködamunñinambuk aka kömugeri, enön mönö yeñgö uñaninambuk toroqeba malje.

²⁴ *Enön jöhöjöhö arenj dölokñangö galömmi Jisös yanjörenj kaba yambuk qekötahöba kinje. Yanön sepñan qewösahöi engömirimakzawi, mönö malmal mewöñe kanjuta malje. Abelnöñ sepñi mokoyökmö, Jisösgö sepñan Abelgö sepñi ongita keu aködamunñambukö munjemñi akza.

²⁵ *Mutuk azi kunöñ gölmenöñ mala Anutugö keu jitsihitñi ambazip indel engiiga gwötpukñan mi mötpingö tökögetka Anutunöñ likepñi melenji qakñine öngöyök. Yeñon miangörenjök kök albingö osiget ewö, neñon mönö denöwö kök albinak? Nalö kewöñe alanini kunöñ Anutugö keu jitsihitñi Suepnöhök indela jimakzawi, nini i nöñöñgan aka mosötzin ewö, mönö lömbötnöhök kök qahöpmahöp albin. Qegetalninañgö likepñi mönö ölña qakñine öngömapkö mötzin. Miangöra kunñan sanjep qei mötzei, enön keu mi mötpingö kezapölök kude akñe. Kezapölök malbepuköra mönö galöm mem anguba malme.

²⁶ *Mönöwök keunji jiiga mötketka gölme utuköba memenjalyökmö, kezapqetok keunji kun jiba jöhöiga nalö kewöñe kewö ahöza, “Nalö kungen dumñe kunbuk gölme utuköba memenjalinam. Gölmeyök qahöpmö, yuai akiga suepnöñ mewöyök utuköma.” ²⁷ Keu mewö ahözapmö, “Nalö kungen

* 12:20: Eks 19.12-13 * 12:21: Dut 9.19 * 12:24: Jen 4.10 * 12:25: Eks

20.22 * 12:26: Hag 2.6

mönö dumnje kunbuk” jizawi, keu mianğö kōnañi kewö: Anutunöñ öröyuai miwikñaiiga ahözawi, mianğönök mönö utuköba utekömapmō, Suep mirigö öröyuai qahö utukömawi, mianğön mönö kin köhöiba ahöm öngöma.

²⁸ Neñön bemtohoñ qahö utukömawi, mia buña qem anguba kinjin. Mianğöra mönö “Anutu saiwap!” jiba mewö mianğön waikñi memba möpöseiba uru ölöwak mem wanğimakin. Mi jitñi ongitpinbukōra kenğötnini möta aka gödañi qeba malbin.

^{29*} Neñgö Anutuninan mönö könöp bölam ewö akza. Mianğöra neñgohoi sihimbölö mötpinbukōra mönö kenğöt mötmöt qakñe göda qem wanğimakin. Mewö.

13

Qambañ keu teteköñi

¹ Urumelen alaurup nanñini mönö jöpaköm anguba malme.

^{2*} Kian ambazip sutñine kamei, mi mönö köyan köl engigetka köisirik miwikñaimakñe. Mewö akingö mönö kude ölum engumakña. Tosatñan mewö akeri, mianğön Suep garata tosatñi qahö möt asariba mohot köl öröm engigetka miriñine malget. ³ Tosatñan kösö mire maljei, mi mötmörim engimakñe. Nanñinak yembuk gwaröhöm engigetka malbeak tandök möta mönö i mötmörim engimakñe. Tosatñi ak bölim engigetka mianğö sihimbölöñi mötzei, mi mönö nanñinak mewö malbeak ewö möta mötmörim engimakñe.

⁴ Ambazip qesabulum aka serowilin akzei, Anutunöñ i jim teköm engima. Mianğöra körek eñön mönö awanöm malmal göda qegetka sarakñi aiga awanöm sutñire tötekqötek töwötñi kun qahö ahöma.

^{5*} Anutunöñ nanñak keu kun kewö jii ahöza, “Nöñön mönö nalö kunöñ qahö gömosöta andö guhumam.” Keu mianğöra aka ahakmemenjanan membagan mendingö nepaqepalok kude köpösöngömakñemö, yuai ahöm engizawi, mianğöra mönö mötket dop köl enğiiga sösongaibuk malme. ^{6*} Mewö möta ölop ewebibininambuk saitñgit kinda kewö jiba malbin, “Kembunöñ baukbaukni aiga gölme ambazipnöñ ayuhum niñgimeangö dop qahö akze. Mianğöra kenğötni kun qahö möta maljal.”

⁷ Galömurupñinan Anutugö keu jiget mötkeri, i mönö mötmörim engiba malme. Ahakmemenini denöwö aka megetka malmalñinan teköyöhi, mönö mi mötmöriba mötnaripñinanğö silikñini wuatangöba malme. ⁸ Jisös Kraist utekutekñi qahö. Mutuk malöhi, miyök merak malja aka

* **12:29:** Dut 4.24 * **13:2:** Jen 18.1-8; 19.1-3 * **13:5:** Dut 31.6, 8; Jos 1.5

* **13:6:** Sum 118.6

nalö teteköñi qahö mal öñgöma. ⁹ Kalem möriam toroqeba buña qem anginga urunini mem köhöiiga ölöwahakñapmö, nene nemingö silikñi mi me mi mianjón mönö urunini mem köhöimapkö osimakza. Tosatñan nenegö dönqizizin könañi könañi wuatangögetka ahakmeme mianjón mönö qahöpмахöp bauköm enjiiga pöröpköyök. Miangöra tosatñan dönqizizin murutñi murutñi ambazip kusum enjimakzei, enjón mönö keu mi mosötme. (Silikö keunöñ mönö janjuñ kude ak enjima.)

¹⁰ Jöwöwöl ohoho alta qainñi kun mi neñgöreñ ahöza. Gölmenöñ opo seri jikegö nup memakzei, yeñön jöwöwöl qainñi kun miangö bahöñi memba nemingö osimakze. Anutunöñ yeñgöra keu mewö qahö jim teköi ahöza. ¹¹ *Gölmegö jike nup galöm bohonñan kinda ambazip singisöndokñini köl köñjöratmapköra aka sömbup qeba sepñi memba jike oleni töröñi kötökñi miangöreñ öñgömakzapmö, sömbup öñini mi memba miri qandak maljei, miangö sel yaigepñe anda miangöreñ ohogetka jeba ayapkömakze. ¹² Miangö dop Jisös mewöyök könagesöurupñi nanñi sepñan mem sarahim enjimapköra aka siti selgö nanju yaigepñe qegetka sihimbölä möta kömuyök.

¹³ Miangöra miri qandak* maljini, neñön mönö miangö sel yaigepñe anda Jisösgöreñ toroqebin. Yangöra aka mepaqe-paik ak neñjimakzei, mönö mi bisiba malbin. ¹⁴ Mi kewögöra: Siti teteköñi qahö ahöm öñgömawi, mi gölmenöñ qahö ahöm neñgizapmö, siti könañgep asuhum neñjimawi, mi ekingö mönö jaram tiba maljin. ¹⁵ Miangöra mönö qösösök Jisösnöñ nam köl neñjiiga Anutugöra möpömöpösei naluk ala malbin. Jisös qetñi möpöseimakzei, yeñgö numbu jitñinangö öñan mönö Anutugö nalukñi akza. ¹⁶ Yuai ahöm enjizawi, mi menden anquba mem ölöwak anjumakzei, mianjón mönö Anutugö nalukñi kun akza. Anutunöñ naluk mi ehi uruñan ölöwahiga dop kölakza. Miangöra mewö akñegöra mönö kude ölum enjumakña.

¹⁷ Galömurupñini mönö tem köl enjiba kukösumñini bapñe anda malme. Nup megerangö kösohotñini Anutugö jeñe almei, yeñön mönö miangö tandök engeka uruñini galöm kölakze. Yeñön nupñini mi urulömböt qakñe membepuk. Mianjón inini qahö bauköm enjibawak. Miangöra mönö keuñinangö bapñe anda malgetka sösoñgai qakñe nupñini megetka dop kölma.

¹⁸ Mönö neñgöra aka Anutu köulukömakñe. Yuai pakpak miangöreñ ahakmeme qetbuñanjambuk akingö sihimñi ahöm neñjiiga Anutunöñ neñgeka “Dop kölja,” jiiga urukezapninan möringa ölöwahakza. Keu mi möt yaközin. ¹⁹ Nöngöra

* **13:11:** Lew 16.27 * **13:13:** Gölmenöñ kujuk maljini, miangö qetñi qandak.

köulukömakɲegöra mönö kapan köla kewögöra kuɲgum ɲgizal: Inini köulukögetka Anutunöɲ nalö qahö mem köriiga ölöwaka ölöp kunbuk ɲgöɲen kamam.

Kewö köulukömakzin:

²⁰ Jisösnöɲ kömuyöhanğöra aka lama galöm qetbuɲanambuk aka malja. Sepɲi mokoba miangö muɲgem silimbanɲan Anutugö jöhöjöhö arenɲi qekötahöba mem köhöiiga nalö teteköɲi qahö ahöm öngöma. Anutunöɲ Kembunini mi mem guliiga kömupnöhök wahöta köhöiba malja.

²¹ Anutu luai Tonjan mönö inahöm ɲgiba jitsihitɲangö dop aka memba malmegö aködamunɲi pakpak ɲgimakɲa. Mewö ölöp köhöiba nup ölöpɲi könaɲi könaɲi memba malme. Yanön mönö möwölöhöba kuɲgum ɲgiiga Jisös Kraistköɲen nanğöba malmal Anutugöɲen dop köljawi, mewö malme. Kraistkö qetbuɲanɲi mönö nalö dop möpöseininga nalö teteköɲi qahö aködamunɲambuk ahöm öngöma. Keu mi ölna.

Keu teteköɲi

²² O urumelen alaurupni, nöɲön kewö qesim ɲgizal: Buɲa Kimbi töröpɲi kiyök ohom ɲgizal. Miangöra andö qamba keuni ki mönö kapan köla buɲa qem anğume. ²³ Buzup ki mötme: Urumelen alanini Timoti i kösö mireyök pösatketka erök. Ösumok ki kaɲgotma ewö, mönö yambuk kaba ɲgekit.

²⁴ Yaizökzök keuni albiga galömurupɲini pakpak aka Anutugö ambazip sarakɲi körek yengöra jigetka mötme. Itali alaurupninan yaizökzökɲini algetka ɲgöɲen kaza.

²⁵ Anutugö kalem möriamɲan mönö körek embuk ahöm öngöba ahöma.

Jeimsgörej Kimbi

Jeimsnöñ Kimbiñi alök.

Jim-asa-asari

Gölmeñi gölmeñi miangörej ambazip könañi könañi uruñini melenđa letorakzei, yeñgö ahakmemeñinan siksauk loloñqaloñ aiga töñtañgöba et enğuiga Anutugö qetbuñañan etpapuk. Miangöra Jerusalem bisop Jeims yañön goro keu murutñi murutñi qezaköba ki ohoza. Goro keuñi tosatñi kewö: Mötkutukutu öñji mi denöwö? Zioz nup öñji aka muneñi. Esapesap uruñe malmal. Tosatñi kude engek qepureime. Numbu jit galömkölköl. Silenini möpöseime me uruñini memba et al anğume? Anğururuk me alabauk akñe? Kapañkapañ aka köuluk nup meme.

Waimanjatñi bohonñi kewö: Kraistkö Buñañan qariba aködamun-ñambuk akñapköra qetñi bisiba keuñi köl guliba meinga öñji asuhuma me qahö? Numbu jitrinanök möt nariinga qahö dop kölja. Zioz öñji qahö mi köhömuñi qamöt tandök ewö akza.

Kimbi kianğö bahöñi bohonñi 10 mi kewö:

Keu mutukñi 1.1

Mötnarip aka mötkutukutu 1.2-8

Ambazip wanapñi aka pomñi 1.9-11

Esapesap (manambatok) ölöñji aka bölöñi 1.12-18

Buña kezapnöñök mötmöt aka temkölköl 1.19-27

Etqeqeñi mi kude engek qepureime 2.1-13

Mötnarip nupñi qahö mi omanñi akza 2.14-26

Numbu nesilamninan ayuhum neñgibapuk 3.1-18

Luainöñ malmal me gölmegö ahakmeme 4.1-5.6

Lömböt bisiba köuluköinga öñji asuhuma 5.7-20

¹ *Jeims nöñön Anutu aka Kembu Jisös Kraistkö nupñi memba maljal.

Israel kambu 12 neñgöreñök tosatñi iñini Israel mosöta gölmeñi gölmeñi denđa anda maljei, nöñön embuk keu eraum mötpingöra kimbi ki ohoba jölöñini jizal.

Möt nariba köuluköba mötmöt öñji miwikñaibin.

² O urumelen alaurupni! Esapesap könañi könañi qakñine öñgömakzawi, miangöra uruñinan mönö kude eri simba-woñ miyök möta söñgaiba malme. ³ Esapesapnöñ qakñine öñgöiga mötnarip-ñinan miangörej köhöimakña ewö, mönö kapañ köla kin köhöimakñe. Mi mötzeañgöra mönö söñgaiba

* 1:1: Mat 13.55; Mak 6.3; Apo 15.13; Gal 1.19

malme. ⁴ Kapaŋ köla kin köhöimakŋe ewö, mianŋön mönö toroqeba mem letot enŋiiga ahakmemeninaŋgö ölni pakpak mi aködamunŋambuk ahumakŋa. Mianŋön ahuiga Anutunöŋ oyaenŋkoyaenŋan uruŋini kokolak qeiga urugö yuai kungöra (meme amgöba) mözöqözöröŋ qahö aka malme.

⁵ Enŋörenŋök kunŋan “Denöwö akŋam,” jiba mötkutukutugöra osizawi, yaŋön mönö Anutu köuluköiga mi waŋgima. Anutunöŋ kalemŋi sakalakŋi amqeba körek nenŋöra nenŋiba sirongen qahö jim nenŋimangö mörakza. Mianŋöra mi ölöp waŋgiiga buŋa qem aŋguma. ⁶ Köulukömawi, mianŋören mönö niŋgimapkö möt nariba uruyahöt qahöpmahöp akŋa. Uruyahöt akzawaŋön mönö köwet sirigö dop öngöba eta ahakza. Luhutnöŋ köwet kunduriga lanlan anda kamakza. Mianŋö dop akapuköra köulukŋaŋgö uruyahöt kude akŋa.

⁷ Uruyahöt ambazip mewöŋi kunöŋ mönö Kembunöŋ yuai waŋgimapkö kude mötmörima. ⁸ Yaŋgö uruŋan mönö julkuliga aiakanŋi pakpak mianŋörenŋ kökölolonŋ aka koŋgwarak qeba anqem-kamqem keu jimakza. Mewö.

Wanapŋi malmal aka pomŋi malmal

⁹ Urumelenŋ alaurupni, enŋö sutŋine tosatŋan etqeŋeni malgetka Anutunöŋ enŋöra möri öngöŋgöŋi akze. Mianŋöra mönö ölöp nanŋini möpöseim aŋgumakŋe. ¹⁰ *Tosatŋan öngöŋgöŋi maljemö, monenŋ inapŋinaŋgöra qahö mötket öngömakzawaŋgöra aka etqeŋeni tandök mala mönö nanŋini möpöseim aŋgumakŋe. Yeŋgö malmalninan mönö buörö (roro) juranŋi ewö aka soholima. Etqeŋeni aka öngöŋgöŋi nenŋön kömumba mianŋörenŋ öröröŋ akin. ¹¹ Wehönöŋ kota roro ohotiriiga qararanŋ köla soholiba juranŋan bolonanimakza. Juranŋan eriga kemaŋaŋgö kaisoŋgolomŋi eksihimŋambuk mianŋön piahimakza. Pomŋi yeŋön sukinapŋini mem sehibingö lilikqilik ahakzemö, mala buörögö (rorogö) dop gororonŋöme. Mewö.

Esapesap (manambatok) ölöpŋi aka bölöŋi.

¹² Anutunöŋ keuŋi kewö jöhöi ahöza, “Ambazip uruŋinan jöpaköm niŋgimakzei, nöŋön i malmal köhöikŋi enŋiba nööröŋine goul ila köl enŋimam.” Keu mianŋö dop bölöŋaŋgö esapesapnöŋ kungö qakŋe öngöiga mianŋörenŋ kapaŋ köla köhöii teköiga mönö malmal köhöikŋaŋgö ila sorom buŋa qem aŋguba oyaenŋkoyaenŋ akŋa. Yaŋgöra “I-ia simbawonŋ!” jizin. ¹³ Bölöŋaŋgö Toŋan Anutu esapköm waŋgimawaŋgö dop qahö aiga Anutunöŋ kun siŋgisöndok akŋapkö qahö esapköm waŋgiza. Mianŋöra kunŋan esapesap uruŋe mala

* 1:10: Ais 40.6-7

kewö kude jima, “Anutunöŋ esapköm niŋgiiga siŋgisöndok akŋamgö akzal.”

¹⁴ Anutunöŋ qahöpmö, nanini sihim kömbönaŋnini bölöŋan mönö töpötiŋ (nemban, pöraŋ) ewö öröm neŋgiiga mötöp bitimnöŋ qaköinga siŋgisöndokö esapesapŋi mewö mohot mohot neŋgöreŋ asuhumakze. ¹⁵ Kunŋan sihim kömbönaŋi bölöŋi qahö jöhöba siŋgisöndok kondotza. Kondoriga sihim kömbönaŋan gölömŋi ala siŋgisöndok mi morö ewö meiga ahumakze. Siŋgisöndoknöŋ ahuba qarim teköba kömup köhöikŋi ahum waŋgimakza.

¹⁶ O wölböt alaurupni, sihim kömbönaŋini bölöŋan mönö kude tilipköm eŋgima. ¹⁷ Kalem ölöŋŋi aködamunŋinambuk pakpak mi Anutunöŋ ali Suep euyaŋgöreŋök asuhumakza. Köiŋ wehön jeŋiri kota kutuba geyohotka imutimutŋiran körim törim ahakzapmö, asakŋi pakpakö Toŋan mönö nanŋak qahö uteköma. Imutimut me söŋaup kun mi yaŋgöreŋ qahö ahöza. ¹⁸ Anutunöŋ yuai pakpak miwikŋaiyöhi, nini miŋgö sutŋine yambu döLöŋŋi jeŋiqeŋe aka malbingöra mörök. Miŋgöra nanŋi sihimŋaŋgö dop keu ölnaŋgö kötŋi urunine aliga miŋön ahuahu döLöŋŋi neŋgii ahuin. Mewö.

Buŋa keu öne mötŋin me tem köla membini?

¹⁹ O wölböt alaurupni, mönö keu ki mötmöriba kude ölum eŋguma: Inini mönö körek keu mötŋingö kezap köröpŋi zilaŋ alme. Keu laŋ mi ösumök kude jime. Irimŋinan mönö zilaŋ kude seholima. ²⁰ Anutunöŋ ahakmeme diŋdiŋi akingö sihimŋi mörakzapmö, irimsesewölnöŋ mia qahö kondorakza. Miŋgöra mönö irimsesewöl mosöta keu ösöŋ jiba malme. ²¹ Qewöloŋ könaŋi könaŋi aka ahakmeme töwötŋambuknöŋ qekötahözei, mia mosötme. Mönö yaŋgiseŋini mosöta Anutugö keu bapŋe anda keu kötŋi uruŋine kömörakzawi, mi möt aŋgön köla malme. Mewö aketka keu miŋön ölöŋ amöt qem eŋgiiga letota Suepŋöŋ öŋgöme.

²² Buŋa keu mi öne töhöŋ mötketka ölni qahö ahubapuk. Mewö silebile aka tilipköm aŋgubepukmö, keu mi mönö köl guliba malme. ²³ Kunŋan keu öne töhöntöhön möta miŋgö dop qahö ahakzawi, yaŋön mönö azi kiangö dop akza: Kunŋan jemesoholŋi piliknöŋ uba aŋgehakza. ²⁴ Uba aŋgeka mosöta kungen anda kaisoŋgolomŋi denöwö, mi ösumök ölum qemakza. ²⁵ Mi ölöŋŋi qahöpmö, kunŋan köna keu aködamunŋambuköra kezap ala ehiba miŋgöreŋ qekötahöba siŋgisöndokö kösönöhök lolohomakzawi, yaŋgö ahakmemegöra mönö “Esop simbawoŋ!” jibin. Yaŋön keu möta mi qahö ölum qemakzapmö, mi ölna tem köla miŋgö dop ahakza.

²⁶ Kunñan urumelenğö köl guliguli akñamğö jiba numbu jitñi qahö galöm köla nanñi mewö tilipköm anğumakzawi, yanğö liñet köulukñan mönö yuai omanñi, ölni qahö akza. ²⁷ Anutu Iwigahö jemesoholñe Buña nup sarakñi silebilenji qahö memamğö jiba mönö kewö akñan: Gwani morö aka malö könjilij qakñe maljei, mönö i anda enğeka köyan köl enğiba malman aka gölmegö ahakmemeñanğö qewöloñan urugi tölohobapuköra galöm mem anğuba malman. Mewö.

2

Etqeçeni mi kude enğek qepureime.

¹ O urumelenñ alaurupni! Jisös Kraist Kembunini qet-buñanñam-buk möt naribingö jize ewö, mönö ambazip tosatñi kude enğek soriba tosatñi kude qepureim enğimemö, dop mohotnönñ ak enğiba malme.

² Mianğö dopkeuñi kewö: Azi pomñi kun, kesötñi goul binenñambuk aka opo malukuñi ekjeritñambuk, yanön kambu miriñine öngöiga azi wanapñi kun sileötanñi jujuratñi töwötñambuk yanön mewöyök öngöbawak. ³ Öngöyohotka inñini azi ipñi ekjeritñambuk mi köl öröm wanğiba kewö jibeak, “Ketanamnini, gi ölop qaikñe eu anda dum tatat löwötñi mianğoreñ tatman.” Mewö jiba azi etqeçeni mi ehörön köla jime, “Gi ölop gorañe anda kinman me köna kutukutunine eta tatman.” ⁴ Silik mewöñan asuhuiga inñini könagesö sutñine könjabö ala mendenñ anğuba qemasolokep aka keuñinambuk akze. Mötmötñini bölöñi wuatañ-göba jimtekötekö ambazip goñgoñi akze.

⁵ O wölböt alaurupni, mötket! Anutunönñ bemtohoñi ambazip jöpaköm wanğimakzei, yanğö buña ahömapkö keuñi jim köhöiba jöhöyök. Keu mianğö dop tosatñan gölme ambazip jeñine etqeçeni akzemö, Anutunönñ mi nanñanğöra jim möwölöhöm enğiiga mötnaripñinanğöra aka öngöngöñi akze. Yanön bemtohoñanğö uruñe anğotketka galöm köl enğiiga suk-inapñinambuk akñe.

⁶ Ölna öngöngöñi akzemö, inñini ambazip wanapñi enğehörön köla enğek siriba malje. Ambazip pomñi yanön mönö monen inapñini qahöpköra kewöta mem et al enğigetka etqeçeni akze. Yanön mönö inñini örörahöm enğigetka keu jakenñi jakenñi mianğoreñ anğorakze. ⁷ Inñini Kraistkö buñanñi aketka qet ölop sorokñi mi enğiba mianğö dop enğoholakzemö, pomñi yanön mönö qet mi luasönönñ ala lañ jimakze? Gölmegö öngöngöñi yanön mönö mi pakpak ahakze.

8 *Mewö ahakzemö, enjön Anutu bemtohoŋaŋgö jöjöpaŋ keu bohonŋi tem köla wuatanaŋgögetka dop kölma. Anutugöreŋ keuŋi mi Buŋa Kimbinöŋ kewö ahöza: “Nangi jöpaköm anŋumakzani, mianaŋgö dop mönö ambazip tosatŋi mewöŋanök urugan jöpaköm enŋimakŋan.” 9 Mianaŋön dop kölmapmö, inŋini ambazip tosatŋi enŋek soriba tosatŋi qepureim enŋiba dop mohotnöŋ qahö ak enŋimakze ewö, mönö ŋiŋisöndok ahakze. Anutugöreŋ jöjöpaŋ keu walöŋgetka yaŋön mönö keuŋini mi miwikŋaiba jim teköm enŋima. 10 Kunŋan jöjöpaŋ keu pakpak tem köla wuatanaŋgöba miŋgöreŋök mohotnöŋ eta qezawi, yaŋön mönö jöjöpaŋ keu körek pakpak walöŋda keuŋambuk akza.

11 *Mianaŋgö könaŋi kewö: Anutu “Sero yoŋgorö kude akŋan,” jiyöhaŋön mönö mewöŋanök jöjöpaŋ keu kewö jiyök, “Ambazip kun kude qenöŋ kömuma.” Gi sero yoŋgorö qahö akzanmö, töndup kun köhömuŋi qezani, mianaŋön mönö jöjöpaŋ keu körek walöŋ teköba maljan. 12 Anutugöreŋ köna keu mi ŋiŋisöndokö kösönöhök lolohoba malbingöra ahöza. Anutunöŋ köna keu mianaŋön kewöt neŋgiba keunini jim teköi solanimegöra mötmöribaba keuŋini mianaŋgö dop jimakŋe aka ahakmemenŋini urukalem qakŋe ahakŋe. 13 Kunŋan urukalem qakŋe ambazip qahö ak kömum enŋiba maliga Anutunöŋ keuŋi kewöta jim teteköŋi ak kömukömu qakŋe qahö ak waŋgima. Kunŋan urukalem kondela malöhi, Anutunöŋ i kewöt waŋgiba ölop ak kömum waŋgiiga simbawoŋ aka silenŋi memba öŋgöma. Mewö.

Mötnariŋ ölnŋi qahö mi köhömuŋi akza.

14 O urumeleŋ alaurupni, kunŋan “Jisös möt narizal,” jiba mianaŋgö nupŋi qahö meiga mötnariŋi mianaŋön mönö denöwö bauköm waŋgibawak? Keuŋanök möt nariiga Anutunöŋ eka amöt qei letotma me qahö? Mi qahö! 15 Mianaŋgö keuŋi kun kewö: Uruŋini melenŋeri, enŋö sutŋine ambazip kunŋan opo kerengöra osiba mözöröŋgöba neneŋi wehön kungöra qahö malbawak. 16 Mewö maliga enŋöreŋök kunŋan yambuk aitoŋgöba silegö naŋgönaŋgö qahö waŋgiba kewö jii mötpawak, “Gi ölop anda nene memba könöŋ jömöta böŋjöŋ tatman.” Keu töhön mi möriga mianaŋön mönö denöwö bauköm waŋgibawak? Mi qahö!

17 Mewöŋanök mötnariŋ töhönök mi köhömuŋi akza. Mötnariŋkö nupŋi ölnŋi qahö mezawaŋgö mötnariŋan mönö qamöt ewö akza.

18 Kunŋan kewö jibawak, “Göŋön mötnariŋuk aknöŋga nöŋön ahakmeme diŋdiŋi wuatanaŋgömakzal.” Nöŋön mianaŋgöra kewö

jimam, “Göñön ‘Anutu möt narizal,’ jiba mianğö nupñi qahö memba öne mötnaripkahö ölni mönö denöwö kondel niñgibanak? Nöñön ahakmeme aka membi eknönga mianñön mönö ölop nani mötnaripnañğö ölni kondel gihima.”¹⁹ Gi “Anutu mohok akzawi, mi möt narizal,” jizani, mi ölop! Ömewöröme yeñön mewöyök mi möt narize. Mi möt narizemö, mianñön kundut enğıga Anutugöra jönömñini undumakza.

²⁰ O uruqahö azi, gi ömewöröme yeñğö tandök möt narizan me? Mötnaripkö nupñi qahö menönga ölni qahö ahui keu mi öne töhöntöhön jinönga mötnaripkan mönö yuai omani, ölni qahö akza. Mianğö könañi söpsöp keuni mianñön kondel gihiza me qahö? ²¹ * “Qahö!” jibanbuköra söpsöp keu kun jimam. Mötnaripkö bömön jalönini Abraham yañön mönö denöwö diñdiñi ahök? Yañön Anutugö jitñi tem köla nahönñi Aisak wañgita altanöñ ala mianñön jöwöwöl ohomamğö ahök. Mewö aka mötnarip qakñe nup meiga Anutunöñ mi eka keuñi jim teköi solaniyök. ²² Söpsöp keu mianğö könañi ek asarizan me qahö? Abrahamnöñ möt nariba keuyök qahö jiyökmö, mötnarip qakñe kinda mianğö silikñi mewöyök ahiga nam köliga dop kölük. Ahakmeme diñdiñi aka memba maliga mötnaripñan mewö qariba aködamunñambuk ahök.

²³ * Buña Kimbinöñ keu kun kewö ahöza, “Abrahamnöñ Anutu möt narim wañğıga qetñi Azi Diñdiñi jiyök.” Keu mi mönöwök öñambuk ahuyöhañğö dop mi ohoget aka tosatñan Abrahamğö qetñi “Anutugö alaña!” mewö qeta jimalget. ²⁴ Solanñi akingöra mötnaripkö keu jitinananöhök jiinga qahö dop kölja. Silikninan mötnaripkö ahakmeme ölni akin ewö, Anutunöñ mönö keunini jim teköiga solanibin. Kösohotnan mönö mianğö könañi kondelja.

²⁵ * Söpsöp keu kun mewöyök jibiga mi kondelma: Israel yeñön gölme ek kutubingöra azi yahöt melaim etkiget anohotka köna ketanñi ambi qetñi Reihab yañön etkuangita köyan köl etkiba köna kunöñ etkumbuliga mosöta anohot. Yañön mötnaripkö ahakmeme mewö ahiga Anutunöñ mi eka keuñi jim teköi solaniyök. Mewö.

²⁶ Nöñön keuni ki kewö jim tekömam: Azi uñañi qahö mi qamötñi. Mianğö dop mötnarip ahakmemeñi qahö mianñön mönö köhömuñi akza. Mewö.

3

Numbu nesilamninan ayuhum neñgibapuk.

* 2:21: Jen 22.1-14 * 2:23: Jen 15.6; 2 Hist 20.7; Ais 41.8 * 2:25: Jos 2.1-21

¹ O urumelenj alaurupni, engörenök gwötpukñan uruñini wahöriga (“Tosatñi yengörenj pinjit mindiñgöbin,” jiba) kusum engienji böhi akingö akepuk. Nini tosatñi kusum engiba nanini mötmötnini qahö mindiñgöbin ewö, Anutunöñ mi ehi qahö dop köliga keunini kewöta köhöikñanök jim teköba mianjö dop likepñi ongita ak nenjima. ² Mi kewögöra jizal: Nini körekñan köna keu gwötpuk qiwitipkömakzin. Kunñan nesilamñi galöm köla keu qahö qiwitipkömakzawi, yañön mönö azi aködamunñambuk sorokñi akza. Yañön ölop köhöiba malmalñi pakpak mewöyök galöm köla malma.

³ Hosnöñ (beosi) sihimnini tem kölmegöra ain injup numbuñine ala kösönöñ öröba mianjön ölop ölni ketanji jömuk mi mindiñqindiñ ak engiinga anakze. ⁴ Mewöyök wanje ketanji mienjö silikñini mötmörime. Mienjön ketanji aketka luhut köhöik-ñan nanjöm engigetka köwet kutuba anakze. Keta bölökñi akzemö, mi tondup anangö galömñi pailöt yañön wanje gilije tata sihimñi wuatangöba stia lökuatñi moröñi miyök melenqelenj aiga wanje ketanjan mianjö dop melenja anakza.

⁵ Nesilamgö könanji mi mewöñanök. Mi sileninanjö kitipñi morörökña kun akzapmö, tondup ölop keu ketanji könanji könanji mianjön silenini memba öngöba jimakzin. Mönö ki mötmörinöñ anök:

Könöp jít-tökñi moröñan tereñda geba ölop jölöm jitñe möndöba arökñi keta bölökñi jem kutuiga etpawak.

⁶ Nesilamninan mewöyök könöp bölam ewö akza. Mi sileni-nanjö kitipñi kitipñi mienjö sutñine tata qewölongö kondotkondot namñi akza. Mewö aiga könöp siagö Tonjan jönbölanñan ohotiriba mianjöreñ uwulamgöiga awamñanök urukönöpnöñ möndöba jeiga uru pakpak kutumutuba tölöhoiga malmalñe ahakmemenji pakpak mi sanjöp ewö töwima. ⁷ Anutunöñ yuai pakpak miwikñaiyöhi, mi sömbup könanji könanji, nei me yuai bapñinan köla ölölongömakzei me köwetnöñ maljei, mi ambazipnöñ mölöwörim engimeanjö dop akze. Mi lök köl tutuhaba mölöwörim engigetka mire (köhömgep) akze.

⁸ Mewö akzemö, nesilamninan mönö sömbup kalñi tandök akza. Mi möröm warabe (röbek) mianjön kokolak qeqeñi aka anjamumu ewö öñöngöba nenjöhöba mem kömum nenjimangö jöjörömakza. Ambazip körekñan mi mölöwöriba jöhöm wanji-bingö osimakze. ⁹ *Nesilamninan Kembu Iwinini möpöseim etkimakzin aka likepñe ambazip nanñi kaisongolom ewö miwik-ñaim engiyöhi, mi sait keunöñ lan qesuahöm engimakzin.

* 3:9: Jen 1.26

¹⁰ Numbu nesilam mohok mianjon Anutugö qetnji möpösei-makzin aka sait keunöj tosatnji qesuahöm engiba jimakzin. O urumelenj alaurupni, könajamjinan mewö ahöi qahö dop kölja. ¹¹ O sawölñi aka kömbukñambuk mi o jeni mohok mianjörenjök uzumgöba korakzahot me qahö? Mewö qahö. ¹² O urumelenj alaurupni, joganj ipneyök danam (sam) mi ölop asuhumakze me qahö? Mewöyök jaunöhök mandarina ölop asuhumakze me qahö? Mianjö dop o sawölñan köwuk kömbukñambuknöhök uzumgö-mamgö osimakza. Mönö mi.

Mötkutukutu ölni aka muneni

¹³ Engö sutñine danjon mötkutukutubuk aka keu mindingö-mawanjö dop akza? Kunöj “Mewö akza,” jime ewö, yanjon mönö urunji mötkutukutuñanjö dop memba et ala silikñan gunböñjñjñj ahakmemeni kondeli aukñe asuhui ehinga dop kölma. ¹⁴ Mianjon dop kölmapmö, urunine mututqutut ahöiga irimsesewöl mötököm-bukñambuk möta körögisigisi aka nanjini yuainöj qarimapköra köpösöñgöba andöqeqe ahakze ewö, mötkutukutuñini mianjöra mönö silenini öne kude memba öngöme. “Keu ölni wuatangözin,” jiba mönö ölni köyatibepuk. ¹⁵ Yengörenj mötkutukutu mewöni mi gölmegö mötkutukutuya akza. Mi Suepnöhök qahö erakzapmö, ömewöröme yenjon ambazip sölölohöm engiget jigetka Uña Töröñan mianjöra wösöbirik ahakza.

¹⁶ Denike yengö urunine mututqutut ahöiga irimsesewöl möta körögisigisi aka nanjini yuainöj qarimapköra köpösöñgömakzei, yengö malmalñine siksauk ilingösöñ ahöiga silik anjöjörakñambuk könaji könaji wuatangömakze. ¹⁷ Mi wuatangömakzemö, möt-kutukutu Suepnöhök erakzawi, mianjö könaji mutukñi mi ahakmeme sarakñi. Mötkutukutu sarakñanjö silikñi tosatnji mi kewö: Luainöj malbingö ak engiiga gunböñjñjñj qakñe tosatnji ak engiba keu bapñe angetka Uña Töröñan urunini kokolak qeiga tosatnji bauköm engibingö sihimñi gwötpuk mötketka urumöt-mötninanjö ölni ölopñi ölopñi mi gwötpuk asuhumakze. Geñmoñ mosöta ambazip keunini bahösapsap qahö kewöta silesile silik qahö malje. ¹⁸ Luaiqeqe ambazipnöñ luainöj malbingö möta mianjö kötni kömötketka ölni ahakmeme diñdñi ahuiga oyaenköyaen malakze. Mewö.

4

Gölmegö mötkutukutu mosöta Anutugö ala aka malme.

¹ Wani yuainöj bim aka anjururuk sutñine kondori ahumakze? Nanjini sihim kömböñanjan mönö wahöta silenini dop köliga ölopñi bölöñan awöranjöyohotka bim aka anjururuk ahumakze. ² Injini yuai könaji könaji memingöra sihimñi

köhöikñi bökbök mörakzemö, mi engö buñaya qahö ahakza. Yuaigö eksihim möta eröm ota uruñinan könöp jeiga ambazip engugetka kömumak-zemö, töndup mi qahö memakze. Mianğöra yom jiba anğururuk aka bim qemakze. İñini Anutugöreñ qahö köuluköba nanñinak öne memingö mötzeanğöra mi qahö buña qem anğumakze.

³ Anutugöreñ köulukömakzemö, töndup mi kewögöra qahö memakze: Uruñinan qahö diñgiiga yuai engiiga mi mösöhöba nanñini sihim kömbönañini bölöñi meköba silenjanğö sösongai akingöra möta ulerakze. Mi qahö dop köliga Anutunöñ mi anğön kölakza. ⁴ O iñini qesabulum ambazip ewö akze. Awanöm köna diñdiñi mosöta serowilin ahakzei, iñini mönö mianğö dop Anutu mosöta urumelenğö kopa ambazip yembuk ala-ala aka monen inapnöñ göröken uruñini jöhöba malje. Tandök mewöñi aka mianjön mönö Anutubuk kerök-kerök ahakze. Mi möt kutuze me qahö? Mianğöra kunñan gölmegö sihim kömbönañi bölöñi mekömamğöra uruñi alakzawi, yañön mönö Anutugö kerökña ahakza.

⁵ Buña Kimbigö keu kun kewö ohoget ahöza, “Uñañi Töröñi urunine al neñgii maljawi, Anutunöñ i sihim kömbönañi mienjön kokolak qem wanğiiga malja.”* Keu mi omaña könañi qahö mötmöribepuk. ⁶ *Keu mi omaña qahöpmö, iñini mianğö dop sihimñini törörök Anutugöreñ alme ewö, yañön mönö kalem möriamñi önöñi qahö engimakña. Mianğöra Buña Kimbi ki jiba ohoget ahöza: “Anutunöñ söngöröqök ambazip tuarenjon ak engimakzapmö, uruñini memba et alakzei, ia kalem möriam engimakza.”

⁷ Mianğö dop iñini mönö uruñini kewöta Anutugö keu bapñe anda malmemö, Bölöñanğö Tonji tuarenjon ak wanğigetka engömosöta söreiba misiñgöba anma. ⁸ Mönö Anutubuk jöhöjöhö aka kösutñe kagetka yañön embuk jöhöjöhö aka kösutñine kinma. Siñgisöndok megetka böröñinan töwiiga Jisösgö sepñan mi sanğonmapkö köuluköme. Uruñinan julkuliga an qem kam qem lañ aketka uruñinan tölöhoiga köl könjorat engii sarakñi akñegöra köulukömakñe. ⁹ Mönö dabökörökñini möt kutuba jinğen köla wösöbirik möta silata sahötme. Gön köisirikñini mosöta melenđa amburereñ akñe. Sösongainñini mosöta wösöbirik möt anğume. ¹⁰ Mönö Kembugö jeñe memba et al anğuetka yañön mem wahöt engima. Mewö.

Urumelen alaurup kewöta keuñini kude jim teköme.

¹¹ Urumelen alaurup, andönöñ qeçe keu mönö kude jim anğuba malme. Kunñan keu mewö yöhösañ jiba urumelen

* **4:5:** Buña Kimbigö keu mianğö könañi kun kewö, “Uña Töröñi uruñine ali maljawi, yañön jöpaköm neñgimangö sihim kömbönañi möta neñgöra mututqutut mörakza.” * **4:6:** Qam 3.34

alajaŋgö keuŋi jim teközawi, yaŋön mönö Anutugöreŋ köna keu jim teköba memba et alja. Gi Anutugöreŋ köna keu jim teköba göragöra ala mewö mianŋön mi qahö tem kölakzanmö, mi silebile memba timbiqimbilim azia aka maljan. ¹² Anutunöŋ köna keu jim kutum neŋgiba mianŋö dop mönö keunini kewöta jim teköiga ayuhubin me ak kömum neŋgiiga oya-eŋkoyaŋ akin. Yaŋönök jimtekötekö Tonini akzapmö, gi mönö nangahöra “Niŋia akzal?” jiba alagi kewöta keuŋi jim tekömakzan? Mewö.

Sile memegö galöm keu

¹³ *Mönö kezap alget! Tosatŋi iŋini sile memba kewö jimakze, “Nini merak me uran ki mosöta taon mi me mi mianŋöreŋ anda kölöl-örörö aka moner ketanŋi öröba yambu (yara) mohok malin teköiga mianŋöreŋ lilingöba kabin.” Nöŋön mianŋöra kewö jibi mötme: ¹⁴ Malmalŋini uran denöwö malmei, iŋini mi qahö möt kutuze. Eŋgö malmalŋinaŋgö könaŋi mi denöwö? Mi köwak kousugö dowa ahözawa, nalö töröptökŋi asuha ayapköma. ¹⁵ Mianŋöra eŋön mönö kewö jigetka dop kölma, “Kembugö jit sihitŋan neŋgöra mewö ahöiga jebuk malbin ewö, mönö mewö mewö aka membin.” ¹⁶ Mewö qahö jimakzemö, öne töhön jakbak-öraŋböraŋ aka nanŋini silenŋini memba öngöba möpösei-makze. Ahakmeme pakpak mewöŋi mianŋön mönö bölöŋi akza.

¹⁷ Keuni jim tekömangöra kewö jizal: Kunŋan silik ölöŋŋi aka memawaŋgö dop aka mianŋö könaŋi möt kutubagun mi qahö aka memawi, yaŋön mönö siŋgisöndok akza. Mewö.

5

Ambazip sukinapŋinambuk yeŋgö galöm meme keu

¹ O ambazip sukinapŋinambuk, iŋini kezap ala keuni ki mötket: Kahasililiŋ sihimbölä qakŋine öngömawi, mianŋöra mönö amburereŋ aka silata sahötme. ² *Moneŋ sukinapŋinan mönö gisahöba gororöŋgöza. Kezaplonŋon jijilukut yeŋön opo malukuŋini yöhöqöhötiba nemakze.

³ Iŋini nalö teteköŋi kewöŋe goul, silwö aka yuai tosatiŋi qaknöŋ qaknöŋ qezaköget ahözawi, mi kahawet muetmuetnöŋ turum teköba törom (rust) memba ahöza. Törom kahawet mianŋön dangunu ewö ahöba könaŋini nalö teteköŋe kewö kondelma: Iŋini malmalŋini moner inapnöŋ jöhöba mösöhögetka pömsöm qeiga ayuhume. Törom kahawet mianŋön mönö könöp bölam ewö sile busuŋini mewöyök mem bölima. ⁴ *Ki mötmöriget: Nup meme ambazip nupŋine barö memba siri uret qözöla malgeri, iŋini yeŋgö töwaŋini ekbonep

* 4:13: Qam 27.1 * 5:2: Mat 6.19 * 5:4: Dut 24.14-15

möta anğon kölget. İnini yengören sahöt irikuruknini mötze me qahö? Silatnini mianğon mönö Kembu Anutu, kukösum pakpakö Toğanğö kezapne gem teköiga mötza.

⁵ İnini gölmenöy ki yuai kōnañi kōnañi sesegilgil buña gem anğuba siyonşayon qahö mala silegö sösöngai algetka nahömñini dop köl enğiiga malget. Gölmegö kelök möriamñan jöhöm enğiiga lañ mala nem qarip ketañi aka malje. Anutunöy keunini jim teköiga enğuget kōmumeanğö nalöñinan kam kuñgumawi, mönö nalö mianğora jöjöröba kelökñinambuk aka malje. ⁶ Ambazip qewölonjini qahö inini qahö tuarenjon ak enğigetka tōndup keunini jim teköba lañ enğuget kōmumba malget.* Mewö.

Lömböt mökösöñda bisiba köuluköba malme.

⁷ O urumelen alaurupni, inini Kembunöy kanğotmapkōra mamböta nalö sutne kianğoreñ mönö mökösöñda lömböt bisiba kinme. Mewö kinda kölkömöt azigö tandökñi mötmörime: Yanğon nene gölmenöy kōmōta kinda ölni söngöröñi öngöngöñi asuhumapkōra kapan köla mambörakza. Kapan köla mamböta mali maliga kie bedu nalöñan kaiga kunbuk mamböriga kōmunjañ kie uru nalöñan kam kuñgumakza. ⁸ Enğon mewöñanök mönö mökösöñda lömböt bisiba kinme. Kembunöy kunbuk kamawañğö nalöñan törizawañğora aka mönö uruñini qezaköba böy qeba kinme.

⁹ O urumelen alaurupni, Anutunöy keunini jim teköi lömböt miwikñaibepukōra mönö nanñini sutñine jimongot kude aka uruñinan irikuruk kude jim anğumakne. Mötket, jimtekötekö Toğan mönö dopdowiba nañgunöy kinja. Mewö. ¹⁰ Urumelen alaurupni, kezapqetok ambazip yenğon mönöwök Kembugö qetne Buña keu jigetka kahasililiñ mem enğigetka möta tōndup mökösöñda lömböt bisiba kapan köla malget. Enğon mönö yengö tandökñini mötmöriba kōna lasupñini wuatangöba malme. ¹¹ *Tosatñan kapan köla lömböt bisiba mala luhut algeri, nini yengöra “I-ia simbawon!” jizin. Azi qetñi Job (Hiobe) yanğon kahasililiñ möta tōndup kapan köla luhut alöhi, mi mötze. Luhut aliga teteköñe mianğoreñ Kembunöy ak kōmukömu Toñi aka neñgehormakzawi, yanğon mönö oy-aenğoyaenñi wañgiiga malök. Mönö mi mötmörime. Mewö.

¹² *O urumelen alaurupni! Keu kötni mutukñi kun ki jimam. İnini keu mi me mi jimei, mi jöjöpañ keunöy kewö kude jim köhöime, “Keuni ölni qahö akza ewö, Suet Toğan ölop lömböt ali qakne öngöma me gölme toğan meren mumbaköiga

* **5:6:** Keu mianğö kōnañi kun kewö: İnini azi qewölonjini qahö tōndup keunini jim teköba qegetka kōmuyöhi, yanğon inini kunbuk qahö qetal enğimakza. * **5:11:** Job

gölmenöŋ turum niŋgima.” Keu mi me jöjöpaŋ keu tosatŋi mewöŋi mianöŋ mönö keuŋini kude jim köhöime. Mewö qahöpmö, oŋ-keugöra möta “Oŋ!” miyök jime aka qahöp-keugöra “Qahö!” jime. Pötagororoŋ keu jigetka Anutunöŋ keuŋini jim teköba likepŋi meleni qakŋine öŋgöma. Mewö.

Mötnarip qakŋe köulukögetka öŋi asuhuma.

¹³ Mötnarip ambazip enögöreŋök kunŋan qemjem-mamje-ŋambuk malja ewö, yaŋön mönö Anutu köuluköma. Kunŋan sösoŋgainöŋ malja ewö, yaŋön mönö liŋet köla Anutu möpöseima. ¹⁴ *Enögöreŋök kunŋan kawöl yöhöi malja ewö, yaŋön mönö mötnarip könagesögö jitŋememe öröm enğiiga kaba Kembugö qetŋe kelöknöŋ silene miriba yaŋgöra köuluköme.

¹⁵ Mötnarip qakŋe köulukögetka Kembunöŋ kawöl ambazip mi amöt qem waŋgii ölöwaka kunbuk wahötma. Siŋgisöndok aka kawöl miwikŋaiyök ewö, Anutunöŋ mönö siŋgisöndokŋi mi saŋoŋda mosötma.

¹⁶ Mewö aiga Anutunöŋ amöt qem enği ölöwakŋegöra mönö siŋgisöndokŋini jim miwikŋaim aŋguba bauköm aŋguba Anutugö köulukömakŋe. Ambazip solanŋi kunŋan uruŋi qezaköba Anutu köulukömwai, miangö öŋan mönö wewelipŋambuk asuhuma. ¹⁷ *Miangö söpsöpŋi kun mi kezapqetok azi qetŋi Elaija (Elia). Yaŋön gölme azi naninaŋgö dowa malök. Yaŋön kie qahö kamapköra uruŋi qezaköba kapaŋ köla köuluköiga kienöŋ yambu (yara) karöbut aka köiŋ 6 miangö uruŋe gölmenöŋ qahö erök. ¹⁸ *Nalö mi teköiga kunbuk köuluköiga suez injaŋ köla kie yöhöba bedu meiga nene kunbuk töŋgöniba asuhuyök. Mewö.

Kunöŋ janjuŋ aniga alaŋan bauköiga dop kölma.

¹⁹ Urumelen alaurupni, enögöreŋök kunöŋ keu öŋaŋgö könaŋi qiwitipköba janjuŋ aniga kunŋan i miwikŋaiba köna öŋe kunbuk waŋgita alma ewö, ²⁰ *miangöra mönö kewö mötmörime: Siŋgisöndok ambazip kunŋan janjuŋ könaŋe aniga alaŋan i miangöreŋök waŋgiriga uruŋi löwörii kunbuk melenmwai, yaŋön mönö qahö kömum köhöima. Alaŋan i könöp sianöŋ gebapüköra aŋgön köl waŋgiiga Anutunöŋ siŋgisöndokŋi sehisehŋi mi saŋoŋda köl turuma. Mewö.

* 5:14: Mak 6.13 * 5:17: 1 Kiŋ 17.1; 18.1 * 5:18: 1 Kiŋ 18.42-45 * 5:20: Qam 10.12; 1 Pitö 4.8

Pitögöreᅇ Kimbi 1

Pitönöᅇ Kimbiᅇi mutukᅇi alök.

Jim-asa-asari

Pitönöᅇ Buᅇa Kimbiᅇi ki ohoba Kraistkö alaurupᅇi Eisia prowinsgö Not likepᅇe deᅇda malgeri, yeᅇgöra ali anda liliköyök. Könaᅇhiba qetᅇjini kewö qeta ohoyök, “Anutunöᅇ ambazip nanᅇaᅇgöra möwölöhöm enᅇgiyöhi, mienᅇön.” Mötnarip ambazip sesewerowero miwikᅇaiba sihimbölö möta malgeri, yeᅇgö uruᅇjini nanᅇgömapköra aka Kimbi ki ohoyök. Kraistkö Ölöwak Buᅇagö könaᅇi ölum enᅇgubapuköra aka Jisösgö keuᅇi kunbuk kewö jim asariyök, “Jisösnöᅇ kömuyökmö, kunbuk kömupnöᅇök guliba wahöta kunbuk liliᅇgöba kamamgö jim jöhöba oyaenᅇkoyaenᅇ akingö jörömqörömᅇi neᅇᅇgiiga al mambörakzin. Mianᅇgöra sihimbölö mörakzei, mi mönö möt anᅇgön köla kapanᅇ köla köhöiba kinda malme. Sihimbölö mianᅇön mötnaripᅇjini kewöriᅇa öᅇᅇambuk akᅇa ewö, Anutunöᅇ mönö likepᅇi melenᅇ enᅇgima. Jisös Kraistnöᅇ asuhumawi, nalö mianᅇgöreᅇök mönö aködahunᅇinambuk akᅇe. Keu mi möta awösamkakak kinme.” Mewö qambaᅇ enᅇgiba ohoyök.

Wahöjalinᅇ nalöᅇe uruᅇjini nanᅇgöm enᅇgiba toroqeba köhöiba kewö uruᅇ kunᅇum enᅇgiyök, “Inᅇi Kraistkö buᅇaya akzeanᅇgö dop mönö malmal sarakᅇi malme.”

Buk kianᅇö bahöᅇi bohönᅇi 6 mi kewö:

Keu mutukᅇi 1.1-2

Anutugö amötqeqe nupkö könaᅇi 1.3-12

Malmal sarakᅇi malbingö jimkutukutu 1.13-2.10

Sihimbölö qakᅇe nup denöwö bisibin 2.11-4.19

Uruᅇjini melenᅇda memba et ala nup meme 5.1-11

Buᅇa kimbi kianᅇö keu köᅇᅇi bohönᅇi 5.12-14

¹ Anutunöᅇ ambazip nanᅇaᅇgöra möwölöhöm neᅇᅇgiiga neᅇgöreᅇök inᅇi tosatᅇan Israel mosöta prowins qetᅇjini Pontus, Galesia, Kapadosia, Eisia aka Bitinia mianᅇgöreᅇ deᅇda anda malje. Pitö nöᅇön Jisös Kraistkö melaimelai azi aposol aka embuk keu eraum möᅇᅇpingöra kimbi ki ohozal. ² Iwi Anutunöᅇ qelᅇje möᅇᅇaᅇgö möᅇᅇe möᅇᅇmöt areᅇ ali ahöiga mianᅇö dop Uᅇa Töröᅇan inᅇi mem sarahim enᅇgiiga Anutugö buᅇaᅇi aket. Anutunöᅇ inᅇi Jisös Kraistkö jitᅇi tem kölmegöra möwölöhöm enᅇgiiga Kraistkö seᅇᅇan qewösahöi enᅇgömiriba sanᅇonᅇ enᅇgimakza.

Anutugö kalem möriamᅇan mönö uruᅇjini dop seᅇiiga luainöᅇ malme. Mewö.

Oyaenƙoyaenƙö jörömqörömninaŋgöra Anutu möpöseibin.

³ Neƙön Kembunini Jisös Kraistkö Iwini Anutu i kewögöra möpöseimakin: Anutunön ak kömukömu ketani neŋgiba neŋgömeiga ahuahu dölökni ahuin. Ahuahu dölökni ahuaba Jisös Kraistnön guliba kömupnöhök wahöröhi, neƙön mianƙö dop guliba wahöta oyaenƙoyaen akingö jörömqöröm aka maljin. ⁴ Oyaenƙoyaen buƙa qem aŋgubingöra jörömqöröm aka al mambörakzin. Anutunön oyaenƙoyaen mi urumelen alaurupni neŋgimapköra Suep mire ali ahöza. Mianƙören ahöba qahö sahaha kahawet memba töwiba gisahöba ayapköma. ⁵ Mötnarip köl gulime ewö, Anutugö ösumƙan sel jöhöba kölközizip enƙiiga Suepkö buƙaya malgetka Jisösnön ölop enƙuanƙiriga Suepnön öngöba oyaenƙoyaen akne. Anutunön Amötqeqe Toƙaŋgö könaƙi nalö teteköŋe mewö indel teköiga ambazip jim asarim enƙibingöra aka ahöza.

⁶ Oyaenƙoyaen akingöra söŋgaiba maljemö, gölmenön malinga Anutunön esapesap Toƙi qahö jöhöiga lömböt aŋgösirip könaƙi könaƙi asuhugetka sihimbölo miwikƙaiba möta malje. Nalö töröpni mewö malmemö, mi töndup sösoŋgai aka malje. ⁷ Anutunön esapesap qahö jöhöiga qakƙine öngöba mötnaripƙinaŋgö tandökni kewörakza. Köt ölni köhöikni goul mianƙö söŋgöronan mönö guli dötnam onƙitzapmö, töndup nalö kunön ayapköm teköma. Nalö töröpnaŋgöra aka ambazipnön goul mia kun könöpnön delasi ohoba ölnan gizikörörök ahöbapüköra kewöta esapkömakze. Mianƙö dop inini ölna törörök möt nariba kin köhöimakze me qahö, esapesapnön mönö mianƙö könaƙi kondelakze. Anutunön urunini ölni keworiga goul kewögöra onƙitmapköra mötza: Mötnaripƙinan pöwöwöm köhöikni aiga söŋgöroni öngöngöŋan goul silwö gwötpuk onƙita nalö teteköŋi qahö bauköm enƙii dop kölma. Mewö engehi dop kölma ewö, Jisös Kraistnön kunbuk asuhumawaŋgö nalöŋe mönö möpöseim enƙiiga Anutugö jeƙe qetbuƙa miwikƙaiba aködamunƙinambuk akne.

⁸ Inini Kraist qahö eka töndup jöpaköm waŋgiba malje. Nalö kewöŋe Kraist qahö eka töndup möt narim waŋgimakze. Mewö aka sösoŋgai sorokni aködamunƙambuk söŋgaimakze. Sösoŋgainini mianön mönö jitnön jijigö dop qahö akza. ⁹ Inini Jisös möt narigetka amöt qem enƙiiga letotket. Mötnaripƙinaŋgö tohotni mi Suep mire eu ahöza. Anutunön uƙaƙini enƙömeiga enön euyangören öngöba tohot mi zilan misirimegö möta sösoŋgai ahakze. Mewö.

Kezapqetok ambazipnön jörömqöröm aka malget.

¹⁰ Kezapqetok ambazip yeƙön amötqeqegö könaƙi jaruba Anutu köuluköba qeqesi ala möt kewöta mala kotket. Mewö mala Anutunön kalem möriam enƙimapkö möt asariba mianƙö

kezapqetok keuñi mi qeljine jiba mala kotket. ¹¹ Kraistkö Uña Töröñan kezapqetok ambazip sölölohöm engiba asuhumapkö keuñi indela sañep ala kewö jii mötket, “Kraistnöñ sihimbölo möta miangö andöñe asakmararañ aködamunñambuk mi-wikñaiba asariba malma.” Mewö jiiga möta Amötqeqe Tonjan wani nalönöñ aka dendenöwö asuhumawi, miangö könañi jaruba qeqesi ala möt kewöta malget. Mewö mala söpsöp keuñi keuñi qeljine nañgöba jiba mala kotket.

¹² Amötqeqe Tonjangö könañi jaruba qeqesi ala möt kewöta malgetka Uña Töröñan mötmöt kewö indel engiba jiyök, “Inini mönö nanñini welennina kude qem anğumemö, ambazip könañep ahuba keuñini oyonmei, mönö i bauköm engiba malme.” Mewö jiba kezapqetok keu engiyöhi, nini tosatñan mi nalö kewöñe liliköba jim asarim engiinga mötket. Kraistnöñ Uña Töröñi Suepnöhök melaiiga eta ambazip sölölohöba inahöm engiiga Ölöwak Buña jiba uru kuñgum engiba malgeri, yeñön Buña keu miyöhök jiba malget. Kezapqetok keu miangö ölni asuhuiga Suep garataurupninan mewöyök mi uba eka könañi möt asaribingö awöweñgöba malje. Mewö.

Anutunöñ sarakñi malbingöra neñgoholakza.

¹³ Buña keuñi mewö ahözawañgöra eñön mönö uruñini Anutugö nupköra ala oponñini öröget yöhöiga mem kurukñini memba kinme. Mönö böñ qeba nanñini ahakmemenñini galöm köl anğuba malme. Jisös Kraistnöñ kunbuk asuhuba miangö nalöñe kalem möriam engimawi, mönö miangöra al mamböta jöröm-qörömñini pakpak miangören ala malme. ¹⁴ Anutugö nahönbörat-urupñan keuñi tem kölakzei, eñön mönö miangö dop köna sarakñi wuatangöba malme. Mutuk gukmaulem tönpin malgetka nanñini sihim kömbönañini bölöñan yeyasenñen mem engigetka lañlañ malget. Mewö malgetmö, nalö kewöñe ahakmemenñini mönö sihim miengö dop kude toroqeba aka memba malme. Lañ siksauk malbepuköra mönö galömñini mem anğuba malme.

¹⁵ Lañ siksauk qahöpmö, Anutu sarakñan engoholiga eñön mönö mewöyök yangö dop ahakmemenñini pakpak miangören sarakñi aka malme. ¹⁶ *Buña Kimbigö keu kun kewö ohoget ahöza, “Nöñön töröñi sarakñi maljalañgöra nöñgö buñani eñön mönö sarakñi aka malme.”

¹⁷ Anutugöra “Iwinini!” jiba ösumñi köl örömazkini, yañön iwi ölöpñangö dop ambazip tosatñi qahö neñgek soriba tosatñi qahö qepureim engimakza. Körek neñgö ahakmemenini mönö dop mohotnöñ kewöta mohot mohot neñgö keunini jim teköma. Miangöra Anutu töröñangö buñaya akze ewö,

* 1:16: Lew 11.44-45; 19.2

mönö gölmenöŋ kusukŋi malmeaŋgö dop sarakŋi aka malme. Jitŋinanök qahöpmö, ahakmemeninan mönö Anutugö jitŋi oŋgitpinpuköra sömbuŋini möta malme. ¹⁸Mewöyök Anutunöŋ sohopŋini meyohaŋgö könari mötagun mönö sarakŋi aka malme. Ambösakonurupninan tandö lopioŋ mötmöt laŋ wuataŋgöba ahakmeme omani kondel neŋgigeri, Anutunöŋ iŋini yeŋgö dop toroqeba laŋ malbepuköra bohonŋini öŋgöŋgöŋi gila sohopŋini meyök. Bohonŋi mi silwö goul oŋgita gilöhi, mi mötze. Gölmegö moneŋ inap ayapkömawaŋgö dop akzawi, yuai mewöŋi mianöŋ bohonŋini qahö meyök.

¹⁹Mianöŋ qahöpmö, Kraistkö sepŋi söŋgöroŋi öŋgöŋgöŋi mianöŋ mönö bohonŋini meyök. Kraistnöŋ lama moröŋi solanŋi uzi poretŋi qahö tandök aiga jöwöwöl ohohogö tandök qegetka sepŋi mokoyök. Miangöra mönö sarakŋi aka malme. ²⁰Anutunöŋ mutuhök Suep gölme qahö miwikŋaim etkiba nalö miangöreŋök Kraist möwölöhöba sohopnini memapkö nup areŋ mi lök qeljiŋe ala areŋgöyök. Mi areŋgöiga ahöi mala kota malgetmö, nalö teteköŋe kiangöreŋ iŋini ölöwakŋegöra aka indeli aukŋe asuhuyök. ²¹Kraistnöŋ nam köl enŋiiga ölöp Anutu möt narim waŋgimakze. Anutunöŋ Kraist mem gulim waŋgii kömupnöhök wahöriŋa asakmararaŋ al waŋgii malja. Mewö maljawaŋgöra aka iŋini Anutu möt nariba kinda yuai pakpak jiyöhi, miangö dop ahakŋapkö jörömqröm ak waŋgimakze.

²²Jörömqröm ak waŋgiba keu ölni tem kölgetka Kraistkö sepŋan köl könjörat mem enŋiiga malme. Mewö mala ölöp urumelen alaurupŋini geŋmoŋi qahö jöpaköm enŋiba malme. Urukönömŋini pakpak mianöŋ mönö kapaŋ köla törörök urukalem ak anguba malme. ²³Malmal köhöikŋaŋgö keuŋi mianöŋ mönö nam köl enŋiiga ahuahu dölökŋi ahuget. Gölmegö keu kusukŋi kunŋan qahö nam köl enŋiiga Iwi ketanŋgö nahönböraturupŋi aket. Anutugö keuŋan mönö qahö ayapkömapmö, teteköŋi qahö zeŋ ahöm öŋgöma. ²⁴*Keu miangö könari mi Buŋa Kimbinöŋ kewö ohoget ahöza: “Ambazip pakpak iŋini mönö gwözözak luplup tandök akze. Aködamunŋini pakpak mi juranŋi asakasak-ŋinambuk tandök akza. Gwözözak luplupnöŋ mönö soholiba gororoŋgögetka juranŋinan buratiba teköqeköba etme.

²⁵Mewö etmemö, Kembangö Buŋa keu malmal köhöikŋi neŋgimakzawi, mianöŋ mönö teteköŋi qahö ahöm köhöiba ahöm öŋgöma.”

Buŋa keu mianöŋ Ölöwak Buŋaya aiga tosatŋan mi jim asarim enŋigetka mötze. Mewö.

* 1:24: Ais 40.6-8

2

Köt malmalḡambuk yambuk kinda sarakḡi akḡe.

¹ Buḡa keu mötzeanḡöra mönö bölöḡamḡini pakpak köteköba gilme. Geḡmoḡ köḡbiḡ pakpak mosötme. Ahakmeme silesile mi sisitḡi memba tököme. Köroḡisigisi aka andöqeḡe keu yöhösaḡ ahakzei, mi pakpak mönö qekögetka et teköma. ² Morösesep geḡmoḡini qahö yeḡön juzu nemingörök möta awöweḡömakze. Eḡön mönö mianḡö dop Buḡa keu qahö möwöramḡögeri, mi urukönömḡine albingö awöweḡöba malme. Mewö mala möt-nariḡini köḡ guligetka qarim köhöiḡa letota mala oyaenḡoyaen akḡe. ³ *Buḡa Kimbigö keu kun kewö ahöza, “Nene kun nepöleköba nahömḡi mötkeri, mianḡö dop Kembu ölöḡni yambuk qekötahöba nahömḡi mötket.” Keu mianḡö dop Kembangö nahömḡi mötze ewö, mönö Buḡa keunöḡ qarim köhöiba malme.

⁴ Kraistkö söpsöp keuya jimam: Kraistnöḡ wahöta Anutugö tandö kömbönaḡi aka malmal köhöikḡanḡö wötḡi akza. Iḡini mönö yanḡöreḡ kaba kunbuk letotme. Ambazipnöḡ tandö kungöra “Köt omaḡi,” jiba andö qeba mosötketmö, Anutunöḡ i Amötqeḡe Toḡi akḡapköra möwölöhöba yanḡöra möri bohonḡi öḡḡöḡöḡi ketanḡi akza. ⁵ Kraistköreḡ kaba guliba nanḡinak mewöyök köt jamönḡiḡ malmalḡinambuk ewö akḡe. Mewö aka mal köhöigetka Suepkö mitimqeḡe yanḡön enḡömemba uruḡini möhamḡöḡiḡa köhököhöi miwikḡaiba urugö malmalgö jöwöwöl jike öḡḡi akḡe. Uḡa Töröḡan uruḡine mala sölölohöba mem letot enḡiḡa jöwöwöl jike mianḡö jike nup galöm sarakḡi aka kinme. Uḡa Töröḡan nam köla inahöm enḡiḡa tem köla Anutugö waikḡi memba möpöseim waḡgiba malme. Mewö malgetka Anutunöḡ enḡeka Jisös Kraistköra aka ahakmemeḡini mewöḡanḡö sihimḡi möta malma. ⁶ *Buḡa Kimbinöḡ keu kun kewö ahöza: “Eket, Anutunöḡ mönö köt tandö kun möwölöhöba Zaion kundue Israel kambu uruḡine kömötpiga tandö kömbönaḡi guli damandanḡ (milyön Kina) ewö akḡa. Denike yeḡön tandö pöwöwöm köhöikḡi mi möt narim waḡgimakḡei, yeḡön mönö yanḡöra aka gamu qahö möta malme.”

⁷ *Möt narim waḡgiba maljei, enḡö jemesoholḡine mi tandö kömbönaḡi aködamunḡambuk akzapmö, tosatḡan uruḡini qahö melenḡa maljei, yeḡö jeḡine mi Buḡa keu kianḡö dop ahöza: “Miri meme yeḡön ‘Köt omaḡi,’ jiba tandö kun andö qeba mosötkeri, tandö mianḡön mönö tandö kömbönaḡi ahök. Könaḡep tandökḡi ain ewö miwikḡaiget. Tandö pöwöwöm

* 2:3: Sum 34.8 * 2:6: Ais 28.16 * 2:7: Sum 118.22

köhöikñi mewöñjan tinjitpawak ewö, mirinöñ mönö gororongöba eta kölbawak.”

8 *aka Buña keu kun kewö ahöza, “Ambazipnöñ köt jamönjin miangören tötangöba enjuiga miangön mönö engum mizit ak engima.”

Yeñon Buña keu qahö tem köla nanñini imbi wuatangö-makzeangöra aka tötangöba erakze. Anutunöñ mewö arengöm engiyöhangö dop erakze.

9 *Yeñon mewö erakzemö, eñon ambazip kambu qainñi kun kewö akze: Anutunöñ inini nanñangöra möwölöhöm engiiga qainñi kun akze. Anutunöñ söñaupnöñök engoholiga asakñi wewelip-ñambuk miangören angota jike nup galöm kambu sarakñi akze. Angöletot aködamunñambuk memba malöhi, miangö Buña keunji mi jim asaribingöra engoholök. Engoholiga Anutugö buña könagesöñi mala Kiñ Kembangö jembonurupñi aka nupñi liliköba memakze. 10 *Mutuk Buña Kimbigö keu kungö dop “simbisembel lañ malgetmö,” nalö kewöñe uru jöhöm anguba kutulangöba “Anutugö urumelen könagesö kambu” aka malje. Mutuk Anutugö ak kömükömugöra “gukmaulem malgetmö,” nalö kewöñe “engehoriiga kalem möriamñi ölop möt kutuba malje.” Mewö.

Anutugö welenqege ambazip kewö aka malbin:

11 O wölböt alaurupni, Suepkö buñaya aka gölmenöñ ki kusuk kiana maljei, nöñon engö uruñini kewö kungumam: Silegö sihim kömbönañini bölöñan galöm köñ engibapuköra mönö nanñini angön köñ angume. Sihim murutñi murutñi mienön mönö uruñini mem bölimegöra bim qemakze. 12 Uruñini qahö melenjeri, yeñgö sutñine ahakmemenini ölopñanök aka memba malme. Tosatñan inini bölöñi meme ambazip ewö keunöñ jim bölim engimakzei, yeñon ahakmemenini ölopñi eka könañamñini törörök möt asarigetka mötmötñinan uteköma. Mötmötñinan uteköiga nanñini singisöndokñini aka möt sohosohonini ek kutuba uruñini melenja Kraist asuhumawangö nalöñe engöra aka Anutu möpöseim wangime.

13 Anutunöñ malmal arengöiga ambazip tosatñan galöm köñ nengimakze. Kembangö qetñi bisize ewö, eñon mönö körek yeñgö keu bapñe anda malme. Kiñ aka ministö yeñon bohonñini akzei, inini mönö yeñgö jitñini tem köla malme. 14 Kiap aka gawönö yeñgö jitñini mewöyök tem köla malme. Yeñon ambazip bölöñi akzei, yeñgö keunñini kewöta likepñi melen engimakzemö, ölopñi ahakzei, yeñgö qetñini möpöseimakze. Anutunöñ miangöra aka gawman ambazip al engiiga malje.

* 2:8: Ais 8.14-15 * 2:9: Eks 19.5-6; Ais 43.20-21; Dut 4.20; 7.6; 14.2; Tai 2.1;

Ais 9.2 * 2:10: Hos 2.23

¹⁵ Anutugö jit sihitñan mönö kewö ahöza: Kezapjupjup ambazip gukmaulem kinda engöra uruqahö keu omanji omanji jimakzei, injini mönö ahakmeme ölöpnji aka memba mianjõn yengö numbuñini muhungögetka ölöñ malme.

¹⁶ Anutunõñ bölõñangö kösö gwarõneyök pösat engiiga lolohogeri, injini mönö mianjõ dop ahakmeme solanji aka memba malme. Mewö malmemö, bölõñamñini turumegöra “Kösö gwarõnini qahö solanji (fri) maljin,” jiba mianjõren möndöba nanñini imbiñini kude wuatangöme. Mewö qahöpmö, Anutugö jitñi tem köla welenji qemakzei, mönö mianjõ dop gwarö qahö malme. ¹⁷ Ambazip körek mönö göda qem engiba malme. Urumelen alaurupñini mi urukönömñinan jöpaköm engiba malme. Anutugö keunji ongitpinbuköra mönö sömbuñini möta malme. Kiñ aka ministöurupñini yengöra mönö mötket öngögiga göda qem engiba malme. Mewö.

Kraistnõñ sihimbölögö silik ölöpnji kondel nenjiyök.

¹⁸ Welenqegeurup injini mönö ketañamñinanjõ keu bapñe anda göda pakpak kondel engiba malme. Urubõnjõñnõñ galöm ölöpnji ak engimakzei, yengörök qahöpmö, öröm ureim ak engimakzei, mi mewöyök törörök göda qem engiba malme. ¹⁹ Denike yenjõn Anutugö jitñangö dop ambazip göda qem engiba malgetka töndup könani qahöpmö, öne kahasililij ak engigetka sihimbölö möta kapañ köla mökösõñmakzei, Anutunõñ mi eka likepñi melenja kötuetkõm engiiga simbawon akze. ²⁰ Bölõñi aketka kömbinõñ engugetka mi möta mökösõñda kinme ewö, nanñinanjõra mönö denöwö aka mötket öngöbawak? Dopñine engugetka qetbuñani-nambuk qahö akñe. Mewö qahöpmö, ahakmeme ölöpnji akeranjõra aka sihimbölö miwikñaiba mökösõñda malme ewö, Anutunõñ mönö mianjõ likepñi melenja kötuetkõm engiiga simbawon akze.

²¹ Kraistnõñ mewõñanök engöra aka sihimbölö möta silik ölöpnji kondel engiyök. Mianjõra injini mönö yangö kõna tambõñi mötöteiba sihimbölö möta mökösõñda malmegöra engoholök. Mewö mala simbawon akñe. ²² *Buña Kimbigö keu kun kewö ahöza, “Yanjõn siñgisöndok kun qahö ahök aka yangö numbu jitñeyök munen keu kun qahö erök.” Injini keu mianjõ dop aketka dop kölma. ²³ *Ambazipnõñ uruqege keu töhören Kraist gwötpuk jim wanjigetka kitipñi kun qahö melenjök. Sihimbölö ak wanjigetka möta kitipñi mekömamgö qahö töröpköm engiyök. Mewö qahöpmö, Anutunõñ keu diñdiñanök jim tekömakzawi, mönö i möt nariba keunji yangö börõñe ala jim tekömapkõ mambörök.

24 *Kraistnöj nengöra kapan köla siŋgisöndok andö qeba ahakmeme solanji wuatangöba malbingöra aka sihimbölö mörök. Mi möri Buja Kimbigö dop “silenji qegetka uzi asuhuyöhanğora aka Anutunöj injini mem ölöwak enğiyök.” Ölöwaknegöra mönö “nanjak siŋgisöndoknini memba silene anguba” maripomnöj öngöba kömuyök. Miangöra injini mönö Kraistkö dop sihimbölö möta mökösongögetka ölöwakja. Siŋgisöndokö esapesapnöj öröm nenğiiga miangören mönö qamöt tandök aka köhömuñi malbin. 25 *Mutuk injini “lama ewö janjuñ anda kaba lanlan malget.” Mewö malgetmö, nalö kewöñe uruñinanğö galömnjanğoren lilingöba kaba malje. Yanğon injini lama ewö sel jöhöba köyan köl enğimakza. Mewö.

3

Awanöm yenğoren qamban keu

1 *Anutu welen qebingö keuñi lök jizalmö, ambi injini mönö mewöñanök apurupñini yenğö keu bapñe anda malme. Mewö malgetka apurup tosatñan Buja keu qahö tem köla maljei, yenğon mönö mewöñanök anömurupñini yenğö ahakmemeñini eka uruñini melenbeak. Uruñini melenđa malmalñini Kraistkö böröñe almegöra Buja keu jitñinanök qahö jimemö, Kraistkö könañi mönö silikñinan kondel enğigetka ek asaribeak. 2 Ahakmeme sarakñi diñdiñi aka memba Anutugö jitñi onğitpepuköra kenğötñini mötketka azinöj mewö enğek yakögetka Kraistpuk qekötahöba malbingö sihimñini ahubawak. 3 *Silegö aködamunñinanök mönö kude mem öngömakñe. Nöröp sawañini qeba gawasu könañi könañi kude ala minjñiđa öñböñ kude memba malme. Kösasorom goul yuainöj silenji kude meñölöm angume. Sileötañ qetpuk sorok aködamunñambuk mi kude mem angume.

4 Mewö qahöpmö, aködamunñini öñji mi mönö töp megetka uruñine ahöma. Uñanñan luainöj böñjöñ malgetka aködamunñini öñji miangön tölapñe ahöba mönö nalö kunöj qahö ayapköma. Urubönjöñ malgetka Anutunöj enğeka möri öngömakñe. 5 Mönöwök ambi sarakñi yenğon Anutubuk kinda jörömqöröm ak wañgiba yuai pakpaköra mamböta malgeri, yenğon mewöyök uruñinanğö aködamunñinan meñölöm anguba apurupñini yenğö keu bapñe anda malget. Mönö ambi miengö dop aka malme. 6 *Saranöj apñi Abraham tem köl wañgiba “Azi kembuni!” jiba ohola malök. Injini mewöyök zeñ kinda nup ölöpñi ölöpñi memba awösamkakak kinda yuai kungöra

* 2:24: Ais 53.5 * 2:25: Ais 53.6 * 3:1: Ef 5.22; Kol 3.18 * 3:3: 1 Tim 2.9

* 3:6: Jen 18.12

jönömñini qahö undui apurupñinambuk malme ewö, mönö Saragö dop ambi aköda-munñinambuk aka malme.

⁷ *Ambi yeñön ösumñini eretñi akzemö, töndup malmalgö kalem möriamñi mi azibuk öröröñ buña qem anguba malje. Ösumñini eretñi akzeangöra azi mohot mohot inñini mönö anömurupñini törörök köyan köla lolongöm engiba malme. Anutunöñ azi engö köulukñini qepureibapuköra mönö göda qem engiba malme. Mewö.

Nup ölöpnji memakzemö, sihimbölö töndup mötze.

⁸ Keuni tekömawangö qambañi kewö jizal: Inñini mönö körek urumohot aka urumelenñ alaurupñini urubönjönñöñ jöpaköm anguba malme. Gunñönjönñöñ mala nanñini memba et al anguba uruñinan jöhöm anguba mohotñe kinme. ⁹ Jinöñ jibi nuñgunöñ guhubi aknöñ aki mi kude ahakñe. Uruqeqe keu töhöreñ jim engigetka kitipñi kude meköme. Mewö qahöpmö, keu bölöñangö likepñi melenñda mönö kötuetköba uruölöwak engiba malme. Mewö aka malgetka Anutunöñ likepñi melenñniga kötümötuetñi buña qem angumegöra engoholök. Mewö aka mala Kembu asuhumawi, nalö mianğöreñ mönö oyaenköyaen akñe. ¹⁰ *Mewö akñegö keuñi mi Buña Kimbinöñ kewö ohoget ahöza: “Kunöñ malmal nahömñambuk malmamgö ak wanggiiga wehön ölöpnji ölöpnji eka malmamgö mötzawi, yañön mönö nesilamñi keu bölöñi jibapuköra jöhöba malma. Numbu suñeyök geñmoñ keu asuhubapuköra mönö galöm mem anguba malma.

¹¹ Ahakmeme bölöñi mönö andö qeba nup ölöpnji ölöpnji memba malma. Luainöñ malmalgö jaruba mi buña qem angumamgö kapan köla kinma.

¹² Mi kewögöra: Kembangö jeñan ambazip solanñi engek galöm aka köulukñinağöra kezap alakzadmö, gonñonji mi qahö mesohol köla engehakza.”

Keu mewö ahöza.

¹³ Inñini nup ölöpnji memingö urukönöp aka malme ewö, ambazip sehisehñan mönö nupñini geñmororoñ memba mem bölim engibingö qahö mötme. ¹⁴ *Mi qahö mötmemö, töndup ahakmeme solanñi akerangöra aka sihimbölö mötpeak ewö, inñini mönö töndup Anutunöñ kötuetköm engiiga oyaenköyaen akñe. Kahasililij mem engibepuköra mönö öne töwöratiba kenğötñini möta uruñini eri möt bölöbölöñinan engubapuk. ¹⁵ Uruñinan kude etmapmö, uruñini mönö Kembu Kraistköreñ jöhöba könañi sarakñi pöndañ mötmörigetka öngöi malme. Nalö dop jöjöröba Kraistkö könañi ambazip jim asarim engiba malme. Oyaenköyaen akingö jörömqöröm akzei, ambazipnöñ

mianḡö könāḡḡōra qesim enḡigetka mönō körek yeḡōra keu melenḡ enḡiba malme. Mönō ḡuḡbōḡḡōḡḡōḡ qakḡe ambazip ḡōda qem enḡiba uru kuḡḡum enḡiba malme.

¹⁶ Keuḡini mewō galōm kölḡetka Anutunōḡ enḡeka “Dop kölḡa,” ḡiḡa urukezapḡinan mewō mötmegōra kinme. Kraist-puk qekōtahōba kindā ahakmeme ölpḡi aketka uruqeqe keu töhöreḡ laḡ jim enḡimakzei, yeḡōn mönō nanḡini keu bölōḡḡōra aka gamu miwikḡaime. ¹⁷ Nup ölpḡi ölpḡi memba malḡetka ambazip tosatḡan töndup kahasililiḡ ak enḡigetka Anutugōra sihimbölō mötketka dop kölḡa. Yuai bölōḡi aka memba mianḡōn sihimbölō miwikḡaigetka gamuḡambuk akza. ¹⁸ Kraistnōḡ mewöyök nalō kunōḡ siḡḡisöndokōra aka kömuyök. Nini ḡoḡḡōḡi ahinga Diḡḡiḡi yaḡōn neḡḡuaḡḡiriga Anutugōreḡ aḡḡotḡingōra aka sihimbölō mörök. ḡölme azia aiga silenḡi mem kömuḡetmō, Uḡa Törōḡan mem ḡulim waḡḡiiga wahōta malḡa. ¹⁹ Uḡa Törōḡan waḡḡiriga neḡḡōmosōta kömupkō senjom mire geba uḡa kösō ḡwarōnōḡ malḡeri, mönō yeḡōra Buḡa keuḡi jim asarim enḡiyök.

²⁰ *Mönöwök Noagō nalōnōḡ waḡḡe ketanḡi meḡetka Anutunōḡ uruḡini melenḡmegōra kapanḡ kölā mökösōḡḡa mambörökmō, ambazipnōḡ keu qahō tem kölā ayuhuba kömupkō kösō ḡwarōnōḡ geḡet. Ambazip saiwa morörökḡi 8 mewōḡan Anutugō ḡitḡi tem kölḡetka o aliga ḡölme turuba waḡḡe siriiga ḡölunōhök ḡouḡini kölā bohonḡini ḡöhöyök. ²¹ Yuai mewō asuhuyōhi, mi o melungō söpsöpḡi akza. Jisōs Kraistnōḡ kömupnōhök wahōta malḡawaḡōra aka nalō kewōḡe o neḡḡōmirigetka Kraistkö ösumḡan neḡḡualōḡḡa bohonini ḡöhōmakza. O mi sileḡō töwötḡi saḡḡoḡmapkōra aka qahō al neḡḡizemō, o melungō ölnḡi mi kewō: Nini Anutubuk malbingō ḡöhöḡöhō aka ḡöḡöpaḡ keunōḡ ḡöhōba kewō köulukō-makzin, “Anutu, ḡi mönō qewōlonḡi saḡḡoḡnōḡḡa uruḡan sarakḡi aiga ḡöhō jeḡe dop kölma.”

²² Jisōs Kraistnōḡ Suep mire eu öḡḡōba Anutugō börōḡi ölnḡe buḡabuḡaḡambuk tatza. Anutunōḡ kukōsum waḡḡiiga tata Suep ḡarata aka Suepkō bem suaḡō könāḡi könāḡi ösum-mumuḡinan neḡḡek galōm aka kuḡḡum neḡḡimakzei, mi tok galōm köl enḡiiga keuḡi bapḡe malḡe. Mewō.

4

Mönö letota malmal qainḡi kun malme.

¹ Kraistnōḡ silenḡe sihimbölō mörök. Mianḡōra iḡini mewöyök silenḡine sihimbölō mötḡingō ḡöḡörōba malme. Yambuk mötmöt mohot kewō memba mötmörime: Kunōḡ siḡḡisöndok ahakzawi, yaḡōn mönō nanḡi silenḡḡō

* 3:20: Jen 6.1-7.24

sihimñangöra ak wangimakza. Kunöñ Kraistköra aka sihimbölö mörakzawi, yangö sihim kömbönañi bölöñan mönö söroraua eri siñgisöndok tököba qahö akñangö kapan köla malma. Urumötmöt mianñon mönö wötñini mem enñiiga miangören tondangöba aködampunginambuk aka malme.

² Urumötmöt miangören tondangöba kindu uru silegö sihim kömbönañi bölöñi jöhöba galöm köla malme. Nalö kewöneyök könahiba gölmenöñ toroqeba mal öngömei, miangören mönö Anutugö jit sihitñi tem köla wuatangöba malme. ³ Inñini nalö mala kotkeri, miangören angjöörak ambazip uruñini qahö melenña ahakmeme bölöñi lañ akingö mötzei, mönö yengö dop kewö lañ malget: Serowilin aka sihim kömbönañini bölöñi lañ wuatangöba malget. O jawat, gojak dauñ yuai mi otoñomborañ memba kanjam köla negetka nöropñini sohoi enjololon malget. Közölömbuanñ ala liñet unduba ambi kenam mem bölim enñiba kezapjupjup aket. Tandö lopionñ liliköba simin köl enñiba yuai kanjamñambuk aket. Mewö aketmö, nalö kewöñe ahakmeme mewöñi mi qahö toroqeba ahakze.

⁴ Angjöörak ambazipnöñ söñaup malmalgö sömuk piliñ-piliñgöba ahözawi, miangören öröba luhuba gemakze. Inñini yembuk kude öröba gegetka eka auruba uruqeqe keu töhörenñ jim enñimakze. ⁵ Mewö ahakzemö, Anutugö jeñe angotketka qesim enñiiga könañamñini aukñe indela jim asarigetka möndömmöndöñini kesalma. Anutunöñ ambazip malñini aka kömukömuñi mönö körek neñgö keunini kewöta jim tekömangö jöjöröza. ⁶ Sileninan kömumba keuninan miangören qahö teköma. Miangöra Ölöwak Buña mi kömupkö senjom mire maljei, mienñon mewöyök mötmegöra Kembunöñ mutuk jim asariyök. Mi kewögöra: Anutunöñ ahakmemeñini kewöta ambazip tosatñi neñgö dowu jim teköm enñiiga silebuk malgerangö likepñi miwikñaimemö, tosatñan uruñini melenña uñañinan guliba malmal köhöikñangö buñaya aket. Anutunöñ nanñak mal köhöimakzawi, miangö dop körekñan malmal köhöikñi mal öngömegöra möt köhöimakza. Tosatñan Buña keu mi uruñini kuñgum enñimegöra jiget. Mewö.

Nup memegö mötmöt kalemñi mönö galöm köla malme.

⁷ Yuai pakpakö nalöñan mönö tekömangö dopdowiza. Miangöra inñini köuluköbingöra mönö ikmaok kude malmemö, nanñini ahakmemeñini galöm köl anguba zenñ kindu köuluk nup memba malme. ⁸ *Buña Kimbigö keu kun kewö ahöza, “Ambazip uruninan jöpaköm enñiba siñgisöndokñini sehisehñi kölaleiba gamuñini turumakzin.” Miangöra alaurup sutñine mönö törörök jöpaköm anguba malme. ⁹ Inñini mönö alaurupñini

* 4:8: Qam 10.12

köl öröba miriñine köisirik tata uruñinan jimongot ihururukñi qahö köyan köla anğuba malme.

¹⁰ Anutunöñ kalem möriam könañi könañi mianğö Toñi akza. Yañön nup memegö mötmöt kalem murutñi murutñi mendenğ enğii malje. İnini mohot mohot mönö mötmöt kalemñini ölopñanök galöm köla mianğön könagesöurupñini welen gem enğiba malme. Mi buña gem anğugeranğö dop nupnöñ ala kambu sutñine bauköm anğuba malme. ¹¹ Nup memegö mötmöt kalem yahöt mi kewö: Denike yeñön Buña keu jim asarimakzei, yeñön mi mönö Anutunöñ sölölohöm enğimakzawanğö dop jiba malme. Denike yeñön alaurup welennini qeba nanğöm enğimakzei, yeñön mönö Anutunöñ inahöba ösum enğimakzawanğö dop alabauk ak enğiba malme. Jisös Kraistkö buña akzeanğöra yuai pakpak mianğoreñ mönö Anutu möpöseigetka qetbuñan anködampungbuk aka ahöma. Yañön asakmaranğ Toñi aka kukösum Toñi mi nalöñi nalöñi mala kota malja aka teteköñi qahö mal öngöma. Keu mi ölña.

Kraistpuk kinda sihimbölö möta malme.

¹² O wölböt alaurupni, sihimbölö qakñine öngöi mötketka könöpñan enğohotiriba esapköm enğimakzawi, mianğöra mönö kude auruba malme. Yuai asuhum enğimakzawi, mi upnina, mewö mötmöríbepuk. Mi gölmenöñ maljinanğö dop asuhumakza. ¹³ Kude aurumemö, Kraistnöñ ölopñi aiga kahasililij ak wanğigetka möröhi, inini mönö sihimbölö mianğö kitipñi mötzeanğö dop sösongai aka malme. Yambuk mewö malgetka lilingöba kaiga asakmaranğ an asuhuiga nalö mianğoreñ mewöyök söngaiba oyaenğoyaenğ akñe. ¹⁴ Ambazipnöñ enğeka uruñini Kraistköreñ melenğeranğöra aka uruqege keu töhöreñ jim enği-makze ewö, enñön mönö simbawonğ akze. Mewö jim enğimakze-anğöra aka Anutugö Uña Töröñi asakmaranğambuk yañön mönö qakñine köla ösumñan turum enğiba kötuetköm enğimakza.

¹⁵ Enğoreñök kunñan yuai bölöñi ahöhanğöra sihimbölö miwikñaiba mötpapuk. Kunöñ kegwek-kahasililij aka ambazip enğuba yuai yonğorö meyöhi me tosatñi yeñğoreñ keu jim supapköba nup meme tandöktandök möndöba lañ lilikqilik aka lömböt miwikñaimakzawi, yañön mönö sihimbölöñi dopñe mötza. ¹⁶ Kunñan Kraistkö alañi akzawanğöra anğösirip miwikñaiba sihimbölö mötza ewö, yañön mönö mianğö gamumamusumñi kun öne kude mötma. Gamu qahöpmö, Kraistkö qetñi bisizawanğöra mönö Anutu möpöseiba malma.

¹⁷ Anutunöñ ambazip keunini kewötmapkö nalöñan kam kuñguiga nanñi urumelenğ könagesöurupñi neñğö keunini mi mutuk jim teköma. Mutuk neñğö keunini jim teköma ewö, ambazip Anutugö Ölöwök Buña qahö tem kölgetka lömböt

qakñine öngöiga teteköñe mönö denöwö asuhum engibawakto?
 18 *Buña Kimbinöñ keu kun kewö ahöza: “Solannji yeñön Suep mire öngöbingö kupuk-kapak akñe ewö, siñgisöndok ambazip angjöörakñinambuk yeñgö keuñini mönö denöwö asuhubawakto?”

19 Miangöra alaurup Anutugö jitñi tem köla angösirip miwikñaiba sihimbölö mörakzei, eñön mönö uñañini miwimiwikñai Tonangö böröñe alme. Tonji yanñon keu jiyöhangö dop alaurupñi sel jöhöba kölközizip aka köyan köl engimakza. Uñañini yanñgö böröñe ala mönö jegep kinda nup ölöpnji ölöpnji pöndañ memba malme. Mewö.

5

Jitñememe engöreñ qambañ keu

1 Nöñön urumelen köñagesögö jitñememe kun aka Kraistnöñ sihimbölö möröhi, miangö keuñi nanñgöba jimakzal. Köñangep lilingöba kaiga asakmararañan asuhuiga qetbuña ningii miwik-ñaimangö mötzal. Engö sutñine nöñgö jitñememe alaurupni akzei, nöñön engö uruñini kewö kuñgum engizal:

2 *Anutunöñ möt narim engiba lama kambuñi böröñine alöhi, eñön mönö i köyan köl engiba malme. Nup mi ölan qakñe qahöpmö, Anutugö jitñangö dop urusihimñini nupnöñ ala mi amqeba urukönöp qakñe zeñ memba kinme. Möndömöndö qakñe injarere mala moneñ yuaigöra kude kapañ köлма malme.

3 Lama kambu bapñine kaba kinjei, i mönö azi kembu tandök kude galöm köl engime. “Zioz galöm akzin,” jiba töptöpñine kude qeba miwidimgöm angumemö, ahakmemegö silik ölöpnji mi lama kambu kondel engiba malme.

4 Ahakmeme ölöpnji aka malgetka lama galöm bohonñan kunbuk asuhumawi, nalö miangöreñ mönö sorom jölñine uta ila jalö aködamunñambuk nööröpñine köl engigetka buña qem angume. Aködamun mianñon mönö nalö kunöñ qahö tahöliba piahima. Mewö.

Sepguli engöreñ qambañ keu

5 *Sepguli iñini mewöyök galömurup yeñgö keuñini bapñe anda malme. “Anutunöñ söngöröqök ambazip tuarenjon ak engimak-zapmö, nanñini memba et al angumakzei, yeñgöra mönö kalem möriamñi engimakza.” Miangöra iñini mönö körekmakörek sutñine nanñini memba et al anguba malme. Tandök mianñon mönö maluku ewö kölget gem enñiiga malme.

6 *Miangöra mönö nanñini memba et al anguba Anutu böröñi kukösumñambuk mianñgö bapñe angetka nalöñan kam kuñguiga

* 4:18: Qam 11.31 * 5:2: Jon 21.15-17 * 5:5: Qam 3.34 * 5:6: Mat 23.12; Luk 14.11; 18.14

ölöp memba öngöba al engima. ⁷ Buña keu kun kewö ahöza, “Yañön injini köyan köl engimakzawangöra waimanjatjni pakpak mönö yañgö böröñe ala mosötme.”

⁸ Ahakmemenini galöm köl anguba zeñ kinda pöndañ uru guliguli malme. Bölöñangö Toñan lañ liliköba ambazip tuarenjoñ aka jarum neñgimakza. Kunñan sipkömturuk aiga yañön mönö laion sömbup ewö gwahöt neñgimangö jöjöröza. (Laionöñ görörök qeriga silatñi mötketka böññini wahörakza.) ⁹ Injini sihimbölö mörakzei, engö urumelen alaurupñinan mönö mewöñanök gölme dop kahasililij miyöhök möta mökösoñda malje. Mi mötmöriba kengötnini yaköriba mötnaripnöñ töndangöba kinda laion mi köhöikñanök tuarenjoñ ak wangiba malme.

¹⁰ Injini nalö töröpñi sihimbölö möta malgetka mösöhöba nañgöm engiba töngum engiiga ölöp kin köhöiba malme. Mewö Kraistpuk kingetkun aködamunñi tököm engiiga asakmararaje öngöba teteköñi qahö asariba malme. Anutu, kalem möriam pakpakö Toñi akzawañön mönö injini mewö aka malmegöra engoholök. ¹¹ Yañön kukösum Toñi mala kota malja aka nalö teteköñi qahö mal öngöba malma. Keu mi ölnja.

Pitönöñ yaizözkök keu teteköñi jiyök.

¹² *Anutugö kalem möriamñan mönö ak kömukömu öl töhöññi akza. Nöñön keu mi köhöiba nañgöba jiba eñön kalem möriam miangöreñ tönguba kin köhöiba malmegöra jim kutum engizal. Miangöra kimbi töröpñi ki jibiga neñakni Sailasnöñ ohom engiyök. Yañön nömbuk pöndañ kinda urumelen neñakni akza. Yañgöra mewö mötmörizal.

¹³ *Anutunöñ urumelen könagesö injini ewö nanñangöra möwölöhöm engiiga Babilon siti bölöñi miangöreñ* maljei, mienön mönö yaizözkökñini algetka engöreñ kaza. Mötnaripkö nahöni Mak yañön mewöyök yaizözkökñi alja. ¹⁴ Injini sutñine urukalem-ñinañgö waikñini memba angum anguba nemböñini susuhuba malme.†

Alaurup Kraistpuk qekötahöba kinjei, luainöñ mönö körek embuk ahöma. Mewö.

* 5:12: Apo 15.22, 40 * 5:13: Apo 12.12, 25; 13.13; 15.37-39; Kol 4.10; Flm 24

* 5:13: Babilon mi Rom sitigö qet tölapña. Indelindel buknöñ mewöñanök qet mi miangö dop ohoget ahöza. † 5:14: Nalö miangöreñ jölöñini jiba waikñini memba numbuñini yöhötim memba malgeri, mönö miangöra jiza.

Pitögörej Kimbi 2

Pitönöŋ Kimbiŋi aliga 2 ahök.

Jim-asa-asari

Pitönöŋ Kimbi ki Kraistkö alaurup gölme dop tat angeri, yeŋgöra ali anda liliköyök. Tosatŋan keu sohoboho miwikŋaiba ambazip kusum sohom engigeranğöra malmal sarakŋi mosöta sero namböŋnamböŋ yuai laŋ aka malget. Böhi takapulakanŋi mi Anutugö keu bapŋe qahö anda (2.10) iwilele (3.17) aka silenŋini möpöseiba (2.18) jakbak-öranğöbran (2.10) aka nanŋini imbi-imbi malget. Aiakaninan Jisös qan köl waŋgiget. Yeŋön ilit ambazip gödaqeŋini qahö mala anjanbanjan ambazip (2.3) lölöwöronŋi (2.18)janjuŋ mem enğiget. (3.3-4)

Pitönöŋ keu aka ahakmeme miangöra waimanjat ketanŋi möta diŋgimapköra bim qeba amötqeŋegö könanŋi jim tuariza. Uruŋini kuŋguba jimkutukutuŋi kewö ohoyök, “Anutu aka Kembu Jisös Kraist ölna möt narim etkiba yetpuk gekötahöinga lömböt mi mem et ali amqema. Mötmöt mewöŋi mi jimburenŋ qahöpmö, ambazip nanŋini jeŋinan Jisös eka ambazip kusum enğiba malöhi, mi möta jiget kaiga mörin. Mianğöra mönö malmal sarakŋi mala kopa malmal aka uruyahöt mi andö qeme.”

Tosatŋan kapan köl a kewö laŋ jiba ambazip kusum sohom enğiba malget, “Kraistnöŋ kunbuk qahö lilingöma.” Keu mi jimburenŋ keuya. Pitönöŋ keu miangöra waimanjat ketanŋi möta likepŋi kewö melenđa jiba ohoyök, “Kraistnöŋ nalöŋi könjörari öngöiga lilingömawaŋgö tandök akzawi, mi kewögöra: Anutunöŋ ambazip neŋgöreŋök kunŋan ayuhumapkö qahö mötzapmö, körek neŋön urunini melenđa siŋgisöndok malmal-nini mosötŋingö möta kapan kölakza.”

Buk kianğö bahöŋi bohönŋi 4 mi kewö:

Keu mutukŋi 1.1-2

Anutunöŋ sarakŋi malbingöra neŋgoholök 1.3-21

Böhi takapulakanŋi yeŋgö könanŋini 2.1-22

Teteköŋe Kraistnöŋ lilingöba kama 3.1-18

¹ Saimon Pitö nöŋön embuk keu eraum mötŋingöra kimbi ki ohozal.

Jisös Kraistnöŋ melaim niŋgiiga aposol aka welenŋi qeba malakzal. Bem Anutuninan Amötqeŋe Toŋi Jisös Kraist melai-iga eri yaŋgöra aka keunini jim teköi solaniinga mötnariŋinan ahuyök. Inŋini mötnariŋ miyök buŋa qem anğugetka bohönŋi öŋgöŋgöŋi aiga nini ewö simbawaŋ malje.

² Injini Anutu aka Kembunini Jisös möt kutum etkizei, yetkön mönö kalem möriamñi keleşmaleleş enjigiyohotka lu-ainöñ malme. Mewö.

Anutunöñ enghohöhi, miangöreñ köhöiba kinme.

³ Anutunöñ asakmararañ Toñi aködamunñambuk akza. Miangö dop nini sarakñi aka malbingöra neñghohök. Mewö könañi möt yaköinga kalem neñgimazawangö könañi asuhuyök. Nini malmal köhöikñi mala urugö köl guliguli pitirik akingöra yuai osimakini, yangö bem ösumñan mönö mi pakpak neñgiiga buñanina ahakña.

⁴ Asakmararañ Toñi yanön urunine nupñi nupñi wewelipñambuk memba kalemñi pakpak neñgimangö mörakza. Anutunöñ jöhöjöhö keuñi neñgiyöhi, miangö söngöröñan mönö öngöngöñi akza. Injini mutuk gölmegö sihim kömbönañini bölöñi lañ wuatangöba aņgöjörak uruñe malgetmö, Anutunöñ injini miangö-reñök meköba bohonñini jöhöyök. Mewö aiga kopa malmal sööreiba andö qemegöra amötqeqe areñi ali ahöza. Mötmöt ahakmeme aködamunñambuk Anutugöreñ ahözawi, yanön injini miangö dop letota kölönaimegöra kapañ kölakza. Injini jöhöjöhö keuñi keta bölökñi miangöreñ qekötahöze ewö, yanön mönö inahöm engiiga kunbuk letota Suepkö aködamunñi miwikñaiba buña qem aņguba malme. Aködamunñi miangön ölop tönjonjonğöba dop köl ençima.

⁵ Anutugöreñ jöhöjöhö keu mewö ahözawangöra aka injini mönö mötnaripkö ölni ahum engiiga kondela malme. Mewö malmegöra mönö kapañ köla zeñ kinda bim qeba malme. Ölni ahum ençimawi, mewö ölop Anutugö könañi toroqeba möt kutume. ⁶ Mötkutukutuñinan qariiga ölop ahakmemenñi toroqeba galöm köl aņgumakñe. Galöm köl aņguaņgunñinan qariiga ölop kin köhöiba lömböt mökösoñda bisiba malme. Kin köhököhöiñinan qariiga ölop kunbuk Anutugö jitñangö dop urugö köl guliguli aka malme.

⁷ Urugö köl guliguliñinan ahum qariiga ölop urukalemñinan sehiiga urumeleñ alaurup ala-ala aka köyan köl aņguba malme. Urukalemñinan sehiiga ölop ambazip pakpak jöpaköm ençiba malme. ⁸ Injini Anutugö aködamun mewöñi buña qem aņguba mem sehiba malme ewö, mönö gilipitñi (ambetakñi) kude malme. Mewö qahöpmö, aködamunñi miangön mönö nam köl engiiga amqeba Kembunini Jisös Kraistkö könañi möt kutuba ölop nupñi jegep kinda megetka ölni ahumakña. ⁹ Ölop ahumakña pmö, denike yeñgöreñ Anutugö aködamun mewöñi qahö ahöm ençiza ewö, yeñgö mötkutukutuñinan mönö töröpñi aiga bau jegömöl ewö kinkuñ kañkuñ akze. Anutunöñ siņgisöndokñini walñi sanğonñi sarakñi akeri, mi ölum ençui ikmaok malje.

¹⁰ O urumelen alaurupni, Anutunöŋ möwölöhöm enġiba enġoholöhi, inini mianġoreŋ tim tondangöba kinme ewö, mönö nalö kunöŋ qahö tala kaman kölme. Mianġöra enġon mönö mianġoreŋ köhöikŋanök tondangöba kinbingö kapan köla malme. ¹¹ Mewö aka malgetka Anutunöŋ enġehi dop köli köl öröm enġiiga Suep miri nanġujan lökŋanök taliga ölopŋanök uruŋe öngöme. Kembunini Jisös Kraistnöŋ Amötqeŋe aka bemtohoŋ Toŋi akza. Yanġö bemtohoŋ uruŋe öngögetka nalö teteköŋi qahö galöm köl enġiiga oyaenŋkoyaen aka malme.

¹² Buŋa keu ölnan köna mewö kondel enġizawi, inini mi lök buŋa qem anġuba mianġoreŋ böŋ qeba kin köhöize. Mianġöra keu areŋ jizali, mi ölop möt asarizemö, nöŋön tondup mianġöra nalö dop jim gulim enġimamgö mötzal. ¹³ Mewö möta sile kianġö sepö koumnöŋ malmamanġö dop keu areŋ mi ölum enġubapuköra mötmötŋini jim guliba kuŋgum enġimamgö mötpi dop kölja. ¹⁴ Nöŋön sileni kusukŋi ki sepö koumni ewö lulunġa zilaŋ kömumba uŋem mire öngömami, mewö möt yaközal. Kembunini Jisös Kraistnöŋ mewöyök buzup keu mewöŋanök jii möral. ¹⁵ Keu areŋ kusum enġiali, mianġon urukönömmŋine ahöiga nöŋön nöŋ qeba kömup mire anbiga mianġö andöŋe mewöyök mi ölop nalö dop mötmöriba malme. Nöŋön mianġöra köhöiba kapan kölakzal. Mewö.

Kraistkö asakmararaŋi mi jeninan eka nanġöba jizin.

¹⁶ Kembunini Jisös Kraistnöŋ qetbuŋaŋi öngöŋgöŋi memba nup kukösumŋambuk memba malöhi, neŋön mi nanine jeninan uba eka malin. Mewö mala mianġö dop kukösumŋanġö könaŋi aka liliŋgöba kamawaŋgö keuŋi mi jim asarim enġiba malin. Mi bem samban kösohot* ewö qahö jimbuŋen ahin. Girabu mötmöt ewö mi laŋ qahö wuatangöba malin. ¹⁷ *Nöŋön Jisösgö qetbuŋaŋi öngöŋgöŋi mi naninak kewö asuhuiga ehin: Asakmararaŋ Toŋi öngöŋgöŋi yanġon keu jiga qet kewö asuhuiga mörök: “Azi ki nani wölböt nahöni aiga yanġöra urunan ölöwahiga eknahöm ak waŋgizal.” Yanġon mi möriga Iwi Anutunöŋ asakmararaŋ waŋgiiga aködamunŋi buŋa qem anġuba malök. ¹⁸ Neŋön yambuk kundunċi töröŋi mianġoreŋ öngöba malinga qet mianġon Suepnöhök asuhuiga mörin.

¹⁹ Kezapqetok ambazip mutuhök Buŋa keu jiba ohogeri, mi nalö kewöŋe möt sölöngöba anġön kölinga pöwöwöm köhöikŋi ak neŋgiza. Mianġöra Buŋa Kimbi walŋanġö keuŋi mi mönö törörök kezap ala buŋa qem anġuba malme. Kiwanöŋ miri

* **1:16:** Bem samban miengö könaŋini kun mi kewö: Mötmöt ambazip yengö uruŋine jimbuŋen mötmöt letoriga keu könaŋi könaŋi laŋ mötmöriba numbu o algetka asuhumakze. * **1:17:** Mat 17.1-5; Mak 9.2-7; Luk 9.28-35

söhsöñauñe asarimakzawi, kezapqetok keu mienön mönö mianğö dop jim asarim enğimakze. İñini mianğö asakñe qekötahöba kinme ewö, mönö ölop Anutugö köna ölni eka söñaupkö ahakmemeni yaköriba mosöta malme. Mewö mal öngöba mambötketka miri wañgaran suruiga söñangö undiñi asuhuiga uruñinan asarima. Kembuninan lilingöba kamawanğö undiñan mönö mem asarim enğii eka Anutugö yuai pakpak ek asarim teköme.

²⁰ Keu nöropñi mutukñi ki mönö möt asarigetka kude ölum enğuma: Gölme ambazip kunñan Buña Kimbigö kezapqetok keuñi mi nanñi mötmöt qakñe jim asarimangö osimakña. ²¹ Mi kewögöra osimakña: Gölme ambazip kungö jit sihitñan nalö kunöñ qahö nam köliga kezapqetok keu asuhui jiget. Mewö qahöpmö, Uña Töröñan kezapqetok ambazip uruñine sölölohöm enğiiga Anutugö jitleyök keu memba mönö mia jiget. Mewö.

2

Böhi takapulakanan mönö mala ayuhume.

¹ Kezapqetok ambazip takapulakanı mi mewöyök Israel köñagesö sutñine asuhuget. Mianğö dop enğö sutñine böhi sohoboho mewöyök asuhume. Asuhuba kinda mötnaripñini ayuhumapkö enjololñ keu kembangan kembangan mi tölapköba memba sutñine kame. Ketañamninan sohopñini meyöhi, Kembu mi mewöyök qañ köl wañgiba mewö mianön nanñini köñden anğuba wölan ayuhume.

² Mewömö, mi töndup ambazip sehisehiñan mönö yeñğoreñ serowilin silikñini wuatangöba nanñini imbi-imbi malme. Mewö malmeangöra ambazip mötmötñini qötömötötañ aketka urumelengö köna ölnan mötmötñine gamuñambuk ahakña. ³ Böhi takapulakanı mienön mönö yuai membagan mbingö köpösöngöba nepaqepalok aka kösohot könanı könanı jimbureñ (zöm mindiriwa) aka lañ jim sehiba malme. Mewö malgetka enön mi möta anqeba moneñ yuai tokogetka lañ örömgöjup memgöjup aka malme. Anutunöñ ambazip mewöñi yeñğö keuñini lök möpñangö möpñe jim teköiga likepñi melenñiga qakñine öngömapkö ahöza. Anutunöñ köñdenmöñden enğimangö tañqañ ikmaok qahö akñapmö, ölö töhöñña sihimbölö möta malme.

⁴ Köñdenmöñden asuhumapkö galöm meme keu tosatñi kewö: Suep garata tosatñan Anutugö jitleñ qetala siñgisöndok akeri, Anutunöñ i qahö engehoriyökmö, aköm enğiiga köñöp mire emuyangöreñ geget. Yaköriba panaman miri dutñe ala ain tapepnöñ (muñgamuñga) gwaröhöm enğiyök. Gwaröhöba galöm köl enğiiga keuñinanğö kitipñi jim

tekömapkö mamböt tatkerata tata kotze. ⁵ *Möpñangö möpñe ambazip angjöörakñinambuk gölmenöñ malgeri, Anutunöñ i mewöyök qahö engehoriyökmö, göulu ketanji jüiga wahöta enguba turum engiyök. Turum engiyökmö, töndup azi Noa mianön urumelenjö keu jiba ahakmeme diñdiñi akñegö uru kuñgum engiba malöhi, i aka ambazip 7 mia malmalñini angön köla sel jöhöm engiyök.

⁶ *Mewöyök Sodom Gomora taon yahöt mi ayuhumahotkö keuñini jim teköba könöpnöñ engohoiga gapñiranök ahöyohot. Ambazip angjöörakñinambuk yenjöra yuai denöwö asuhumawi, mianjö söpsöpñi ekingöra mi al engii akzahot.

⁷ *Könöpnöñ körek engohomangö ahökmö, töndup azi solanñi Lot mi mutuk sutñineyök meköba angön köl wanjiyök. Iwilele ambazip sero namböñnamböñ aka nanñini imbi-imbi ahakmeme tosatñi lañ aket eka yenjöra möt böliba uruñan eri malök. ⁸ Azi solanñi mianön yenjö sutñine mala ahakmeme iwilele kanjamñambuk eka möta malöhi, mianjöra mönö wehön dop möt jinjingöba malök. Uruñi sarakñan mönö sundan böliiga malök.

⁹ Galöm meme keu jizali, mienön Anutugö könanji kewö kondelakze: Kembunöñ ambazip Anutugö malmal köhöikñi köl gulimakzini, nini ölop esapesapnöhök meköba bohonini jöhömangö mörakza. Mi mörakzapmö, ambazip gonñi mi keuñinangö likepñi melenñi qakñine öngöiga garataurupñan galöm köl engigetka malme. Mewö mala öngögetka nalö ketanñan kaiga keuñini jim teköiga toroqeba sihimbölo möta malme.

¹⁰ Ambazip silenñinangö sihim kömbönanji bölöñi wuatangöba angjöörakñinambuk aka iwilelenöñ Anutugö kukösumñi memba et alakzei, Anutunöñ mi mönö mutuhök jim teköm engiyöhawa sihimbölo ketanji möta malme. Böhi takapulakanji mienön mönö jakbak-öranjörañ qakñe nanñini imbi-imbi mala Suepkö bem suahö asakmararanñinambuk euyangören maljei, yenjöra sömbu-ñini qahö mörakze. Mi qahöpmahöpmö, i mewöyök uruqege keu töhöreñ jim engimakze. ¹¹ Mewö ahakzemö, Suep garata kukö-sumñinambuk böhi sohoboho mi engonñgita öngöngöñi akzei, mi töndup Suepkö bem suahö ambazip mi Kembugö je mesoholñe qetala uruqege keunöñ töhöreñ qahö jim teköm engimakze.

¹² Garata yenön mewö qahö ahakzemö, ambazip mienön silenñini memba öngöba Buña keu qahö möt kutuba mi töndup yenjöra uruqege keu töhöreñ lañ jimakze. Sömbup soñ ewö mötkutukutuñini ölni qahö asuhuiga sömbup malmalgö sihim yuai korembinji miyök mörakze. Sömbup soñ mi asuhugera

ambazipnõj laj enjuget kômumakzei, yeñõn mõnõ miangõ dop lajlañ tõnpin mala ayuhume. Nanñini sihim mõtmõtñini goñgoñmañgoñan mõnõ kõnderj engigetka ayuhum tekõme. ¹³Tosatñi örõm ureim ak engigetka kahasililij mõtketmõ, Anutunõj nanñini keunjanangõ likepñi melenj engiiga sihimbölö miyök qakñine õngõma. Urumelenj enñõn urukalem kondel angubingõra tokoba lõmbuañ algetka takapulaka böhi mienñõn mõnõ miangõrenj mewöyök kamakze. Kaba dogoñini aukñe kondela bau numbu nemakze. Mewö aka engõ sile tõwõtñini boromñi boromñi gamuñinambuk ewö akze. Nanñinak silenjanangõ sihimñi meköbingõra totoko yuai asakñe ala sero aukñe aka lajlañ sõngaimakze. “Ziozgõ lama galõm akzin,” jiba ala engõra qahõ mõtmõriba tilipkõm engibingõ sõsõngai mõrakze.*

¹⁴Jenini kaisero jeje aka ambi engehakzei, mi serowilinök akingõra mõrakze. Sero siñgisõndok yuai akingõ sihimñi mi qahõpmahõp mosõtpingõ mõrakze. Ambazip koñgwarak kõlakzei, mi örõm engigetka kõna jitñe gegetka örõmbõknõj jõlñini mesinmakza. Membagun membingõ nepaqepalok kõpõsõngõgetka urumõtñini kõhöikñi miangõrenj ahõza. Mewö ahakzeangõra Anutunõj saitkõm engiiga ayuhume.

¹⁵*Yeñõn kõna diñdij andõ qeba kahalalom janjuñ anda kezapqetok azi Balam Beorgõ nahõnñi yanğõ urukõnõp kõna wuatangõmakze. Kerök azi kembu kunõj Balam Israel ambazip tilipqilip ak engimapkõra tõwa wañgiyõhi, urusihimñan mõnõ monen miangõra ak wañgiyök. ¹⁶Ak wañgiyõkmõ, donki kunõj bölõnamñangõra jim bölim wañgiyök. Donki sömbup keu qahõ jijini miangõn mõnõ azi jõlnõj keu jiba kezapqetok azi miangõ urusohop ahakmeme mi jõhõm wañgiiga osiyök.

¹⁷Ambazip mienñõn mõnõ o jeni jõpjõpkõni ewö tandök malje. Raidimbom luhutnõj kousu omanj tõhõntõhõn muwutapkõm engimakzawi, mõnõ miangõ dop õne lajlañ anda kamakze. Anutunõj pandaman gõjiwinangõ uruñe yeñõra miri arengõm engiyõhi, mõnõ emuyangõrenj dutñe geba malme. ¹⁸Yeñõn kezapjupjup keu omanj jiba silenini memba õngõba laj tiwok-mawok aka terengõmakze. Silegõ sihim kõmbõnanjini bölõni wuatangõba sero nambõjnambõjnõj ambazip laj örõm engimakze. Janjuñ maljei, tosatñan yeñgõ sutñineyök õlõj kõlakzei, mõnõ mi kelök keunõj kuñgum engigetka kõna jitñe gegetka örõmbõknõj jõlñini mesinmakza.

¹⁹Yuai kunõj ambazip kun jõhöba galõm kõl wañgimakzawi, miangõ kõsõñan mõnõ i jõhöiga mi tõwa qahõ õne welen qeba malja. Miangõ dop böhi takapulakanj mienñõn kelök keu kewö

* **2:13:** Böhi mienñõn tõrom ewö asambõta tatzemõ, wañgeñinan yeñgõrenj qakõba jõmgõbapuk. * **2:15:** Janj 22.4-35

laŋ jimakze, “Inini mönö nini toroqem neŋgigetka ölop kösöŋini qahö solanŋi aka nanŋini imbi-imbinöŋ malme.” Keu mewö jimakzemö, mi töndup nanŋinak aŋgöjörakŋinanŋö welenqe- qeŋi aka mianŋö kösönöŋ malje.

²⁰ Yeŋgö könaŋamŋinan kewö goŋgiiga malje: Kembunini Jisös Kraist Amötqeŋe Tonini i möt kutuba mewö mianŋön gölmegö ahakmeme aŋgöjörakŋambuk miŋgöba andö qeba- gun mönö kunbuk mianŋö kösönöŋ köpeim aŋguba qaköba tatze. Mianŋöra könakönahiŋe ölopölöp malgetmö, teteköŋe böliqölim teköba malje. ²¹ Anutunöŋ keunini jim teköi solanib- ingö könaŋi mutuk qahö möt kutuba tönpin malbeak, mianŋön mönö eretŋi ak eŋgibawak. Mewö akawakmö, Buŋa mi ölna jigetka möta könaŋi möt kutugetka buŋaŋina ahök. Uruŋini melenŋa mianŋö andöŋe jöjöpäŋ keu töröŋi andö qegeri, mi- aŋön mönö yuai kanŋamŋambuk aka gamu qem eŋgimakza. ²² *Andö qeba köpeim aŋguba etkeri, mi uruqesiŋ keu ölbölni yahöt mietkö dop akza. Keu jitŋi kun kewö, “Kiamnöŋ loŋnöhaŋgöreŋ liliŋgöba kamakza.” Keu jitŋi kun kewö, “Bau saŋgoŋninga dumge elenŋa sömuk piliŋpiliŋnöŋ luhuba geba lömu aumakza.” Mewö.

3

Kembu kamawaŋgö jöhöjöhö keuŋi

¹ O wölböt alaurupni, nöŋön kimbi yahötŋi ki albi eŋgöreŋ kaza. Keu jizali, inini mi lök mötzemö, nöŋön keugö ölni ahumapköra uruŋini sarakŋi kuŋguba jim gulim eŋgiba kimbi yahöt ki kewögöra ohozal: ² Kezapqetok ambazip sarakŋi yeŋön mönöwök Buŋa keu jiba malgeri, mianŋöra mönö ölüm eŋgubapuk. Mewöyök Kembu Amötqeŋe Tonjan jimkutukutu neŋgiiga nanŋini melaimelai azi aposolurupŋinan kusum eŋgigeri, mönö mi mötmöriba köl guliba malme. Mianŋöra nöŋön keu miyöhök ohobiga yahöt akŋa.

³ *Keu mutukŋi kun kewö möt asarime: Kraistnöŋ liliŋgömamgö aiga nalö teteköŋe mianŋöreŋ mepaqepaik ambazip asuhuba ahakmemenjanan nanŋini sihim kömbönaŋini bölöŋi wuatangöba ilit keu jiba malme. ⁴ Tosatŋan liliŋgöba kamawaŋgö keuŋi kewö jiba qeapköba malme: “Kamawaŋgö jöhöjöhö keuŋi mi mönö denikeaŋgöreŋ ahöza? Ambösakoninan mala kota kömugeri, nalö mianŋöreŋök yuai kunŋan kun qahö melenŋi geyök. Anutunöŋ Suep gölme miwikŋaim etkiiga öröyuai pakpak könahiba ahöyöhi, mi mönö mewöŋanök ahöba kori maljin.”

* 2:22: Qam 26.11 * 3:3: Jud 18

5 *Mewö jiba keu kötñi ki ölan qemakze: Anutunöñ möpñangö möpñeyök jim kutuba keuñangö ösumñan suep jakeni jakeni miwikñaim enñiyök. Mewöyök o jim kutum enñiiga denða angetka mianñön gölme miwikñaiiga onöhök asuhum tinñirök. Yeñön keu kötñi mi mötzemö, mi qahö mötzin tandök möndöba lañ jiba nöñongan ahakze. 6*Köñangep jim kutuiga o gölunöñ wahöta gölme turuiga ambazip nalö mianñören gölmenöñ malgeri, mi o nemba kömumjaiget. 7 Yeñön onöñ kömumjaigetmö, suep gölme nalö kewöñe etkehakzini, mi könöpnöñ ayuhumawanö dop akza. Anutunöñ mianñö keuñi lök böñtöñ jim kutuiga ahöza. Mianñö ölni asuhumawanö nalöñan kam kuñguiga Anutunöñ ambazip anñöjörakñinambuk maljei, yeñö keuñini jim teköba könden enñiiga ayuhume.

8 *Mewö asuhumapmö, wölböt alaurupni, naninak ehinga yambu 1000 mi nalö köröpñi akzapmö, Buña keu mohot ki mönö kude ölum enñuma, “Wehön mohot mi Kembugö je mesoholñe yambu 1000:gö dop akza aiga yambu 1000 ehiga wehön mohotkö dop akza.” 9 Kembugö jöhöjöhö keu mianñön ölnambuk akñapmö, mianñö nalöñi mi törörök qahö mötzin. Tosatñan nalö mi könjörari öngömapköra mötmöriba lañ jimakze. Nanñak nalöñi qahö könjörari öngömapmö, mökösoñda ambazip körekñan urunini melenñbingöra mambörakza. Kunñan könöp sianöñ gebapuköra kapan kölakza.

10 *Keuñangö ölni asuhumapmö, Kembugö kaka nalöñan mönö yoñgorö meme azigö tandök kam kuñguma. Mi ouktuknine tiiga osibin. Nalö mianñören suep gölmegö yuai ehekñi pakpak mi mönö könöwiba jeba gapñanök ahöma. Wehön köiñ senñelau aka suepkö yuaiñi pakpak mi julkula ötöñ bölöbölöñambuk ayapköba qahöwakñe. Gölme aka ambazipnöñ yuai pakpak mianñören memba alget ahözawi, Anutunöñ mi körek köndenñmondenða melenñi gema. Geba jem teköiga yuai kun qahöpñmahöp ahöma. Saumbañ!

11 Öroyuai pakpak mi tandök mewö julkula qahöwakñeanñöra enñön mönö ambazip denöwöñi aka malgetka dop kölbawak? Mianñöra mönö ahakmeme sarakñi wuatangöba Kraist ewö aka malbingö köl guliba malme. 12 Injini Anutugö nalö ketañi mi kam kuñgumapköra mamböta zilañ kamapkö nupñi kapan köla memba malje. Nalö mianñören gölmegö öroyuaiñi aka wehön köiñ senñelau aka mewöñi mi könöwiba jeba bolbolgöma. Anutunöñ suepkö öroyuaiñi mi körek köndenñmondenñ aliga julkula jem teköma.

* 3:5: Jen 1.6-9 * 3:6: Jen 7.11 * 3:8: Sum 90.4 * 3:10: Mat 24.43; Luk 12.39; 1 Tes 5.2; Ind 16.15

13 *Mewö jem tekömapmö, Anutunöŋ yuai asuhumapkö keu jöhöi ahözawi, neŋön miangö dop Suep gölme dölökŋi miwikŋaim etkimapkö mambörakzin. Mi miwikŋaim etkiiga miangöreŋ angota ahakmeme diŋdiŋi wuatangöba malbin.

14 O wölböt alaurupni, eŋön nalö ketanji mi kam kuŋgumapkö mamböta malje. Miangöra mönö kewö akingö kapan köla kinme: Uruŋini sarakŋi aiga Anutunöŋ töwöt boromŋinangö keuŋi kun qahö miwikŋaiiga yambuk ösupközeangöra luainöŋ malme. 15 Mamböta Kembuninangö uru tandökŋangöra kewö mötmöriba malme: Yaŋön inini uruŋini melenđa kunbuk letotmegö nalöŋi mem körim al eŋgiba ösöŋ mamböt eŋgiba malja. Wölböt alanini Pol yaŋön mewöyök keu miyök ohom eŋgiyökmö, Anutunöŋ mötkutukutu öŋgöŋgöŋi wanjiiga miangö dop keuŋi ohom eŋgiyök. 16 Miangö keuŋi mi kimbiŋi pakpak miangöreŋ jiba ohomakzappmö, Buŋa Kimbiŋangö uruŋe keuŋi tosatŋi mi lömbötŋambuk. Miangöra tosatŋan mi möt asaribingö jaram tiba lömbörimakze. Gukmaulem ambazip koŋgwarak qeba tötöpinpin laŋ malakzei, yeŋön kimbiŋi kimbiŋi mi laŋ möwöramgömakze. Miangö dop Polgö keuŋi mewöyök melenqeleŋ aketka supapköba sohomakza. Mewö möwöramgöba kinda nanŋini mem bölim anguba könöp sianöŋ geme.

17 Yeŋön gememö, wölböt alaurupni, eŋön mewö asuhumapkö keuŋi lök qeljiŋe möta malje. Miangöra mönö nanŋini galöm mem anguba malme. Iwilele ambazip köna siŋgiba qiwitipkömakzei, eŋön mönö yeŋgö kelök keuŋinan örom eŋgi eŋguatangöba jinjauŋ anbepuk. Malmalgö tandö pöwöwöm köhöikŋi miangöreŋök mewö tala kaman kölbepuk. 18 Kembunini Jisösgö kalem möriamŋe kinjei, miangöreŋ mönö kunbuk suariba köhöiba malme. Amötqeqe Tonini Kraistkö könaŋi möt kutuzei, mi mönö toroqeba möt yaköm soroköba malme. I möpöseininga qetŋi nalö kewöŋe aködamun-ŋambuk aka könaŋgep teteköŋi qahö mewö ahöm öŋgöma. Keu mi ölja.

* 3:13: Ais 65.17; 66.22; Ind 21.1

Jongöreŋ Kimbi 1

Jonöŋ Kimbiŋi mutukŋi alök.

Jim-asa-asari

Jonöŋ jöpaköm anġuaŋġugö keuŋi köhöiba jiba malök. Urumelen ambazip neŋön Anutu aka Jisös Kraist yetpuk gekötahöba kindu uru jöhöm anġuba mohok aka maljin.

Tosatŋan keu munenji ambazip kewö kusum sohom enġiba malget: “Jisösnöŋ Suep aziyök akza. Gölmenöŋ yuai pakpak mi bölöŋi akza. Mianġöra Jisösnöŋ gölme azi ölni qahö aka malök.” Keu mianġöra aka tosatŋan “Anutu möt narizin,” jiba ahakmeme ölöŋŋi mosöta siksauk silekmalak mala ambazip tosatŋi yom kazik ak enġiget aka qölmöm injarere malget. Keu sinji sinji mewöŋan zioz mem bölöbapuköra Jonöŋ goro keuŋi kimbinöŋ kewö ohoba ali kayök, “Jisösnöŋ Suep aka gölme azia mohok akza. Gölmenöŋ nup meme aka mötmöt meme mi yuai bölöŋi qahö. Mianġöra ‘Anutu möt narizin,’ jiba Nahönŋi Jisös kude mosötpin aka alaurupnini uruninan jöpaköm anġubin. Urukalem mi mönö kapan köla ak anġumakin.”

Kimbi kianġö bahöŋi bohönŋi 6 mi kewö:

Malmalgö könaŋi mi Jisös 1.1-4

Asak aka söŋaup uruŋe malmal 1.5-2.29

Anutugöreŋ aka Satangöreŋ nahönbörat 3.1-24

Uŋa ölöŋŋi aka öme mi mönö kewötme 4.1-6

Urukalemġö könaŋi aka jimkutukutuŋi 4.7-21

Mötnarip neŋön bölöŋi luhut alakin 5.1-21

Malmal köhöikŋaŋö keuŋi mi Jisös Kraist

¹ *Nöŋön malmal köhöikŋaŋö keuŋi jimamġöra kimbi ki ohozal. Mutuhök malmalgö keu Tonjan maliga mianġö könaŋe öroyuai pakpak asuhuyök. Yaŋön mala kota gölmenöŋ eriga i jeninan eka böröninan silenji misiriinga keuŋi jii möta malin.

² *Oyaenġoyaen malmalgö Tonjan asuhuiga neŋön i eka könaŋi naŋgöba jiba dangunu ewö kinjin. Malmal teteköŋi qahö mianġö Tonjan Iwibuk mala kota eta asuhum nenġiyöhi, neŋön mianġö Buŋaŋi jim asariba uruŋini kuŋguzin. ³ Neŋön Iwi aka yaŋgö Nahönŋi Jisös Kraist yetpuk urunini jöhöba mohot maljin. Injini mewöyök uruŋini nembuk jöhöba mohot malbingöra yuai eka mörini, mi jim tuarim enġizin. ⁴ Sösönġainöŋ urunini kokolak qei malbingöra keu ki jim tuariba ohozin. Mewö.

Kembugö asakŋe malmal

* 1:1: Jon 1.1 * 1:2: Jon 1.14

⁵ Buña keu yangö Nahönñangörenök möta jim tuarim engizini, mi kewö: Anutunöñ asakñangö Tonji akza aka yangören söñaup kun qahö ahöza. ⁶ “Neñön yambuk urunini jöhöba mohot maljin,” mewö jitnöñ jiba töndup aiakaninan jipjap aka söñaupnöñ maljin ewö, mönö keu munen jiba ahakmemeninan keu ölni qahö wuatangömakzin. ⁷ Anutunöñ asakñangö uruñe maliga neñön miangö dop aiakanini asakñangö uruñe ahakzin ewö, mönö sutnine urunini jöhöm anğuba mohok malinga Nahönñi Jisös Kraistkö sepñan mönö siñgisöndoknini pakpak sanğonmakza.

⁸ Urunine siñgisöndok qahö ahöza, mewö jibinak ewö, mönö nanini tilipköm anğuinga keu ölnan urunine qahö kinma. Qahö! ⁹ Siñgisöndoknini jim miwikñaizin ewö, yangön mönö uruñi diñdiñangö dop jöhöjöhö keuñi pöndañ wuatangöba siñgisön-doknini mosöta ahakmemenini gongonji pakpak sanğonmakza. ¹⁰ “Siñgisöndok qahö ahin,” mewö jibin ewö, mönö keu Tonji onğiringa Anutunöñ munen jiji azi tandök aiga keuñan urunine qahö kinma. Mewö.

2

Jisösnöñ awörök köiput Tonini akza.

¹ O (koko) gömokurupni, inñi siñgisöndok akepuköra keu ki ohozal. Mi ohozalmö, kunöñ töndup siñgisöndok akawak ewö, awörök köiput Toninan mönö ahöm neñgiza. Jisös Kraist yangön Iwigö kösutñe mala keu pakpak diñdiñanök kewöta ak neñgimakza. ² Awörök köiput Tonini yangön siñgisöndokninañgö töwañi ala köl könjörat neñgiyök. Mi neñgö siñgisöndokörök qahöpmö, mönö gölmeñi gölmeñi neñgöreñ siñgisöndok mi mo-hotñe köl könjöratmamğöra kömuyök. Mewö.

Temkölköl mi aiaka diñdiñi.

³ Anutugö jöjöpañ keuñi tem kölakin ewö, mewö mianjön i möt wañgizini, mi ölöp uruyahötñi qahö möt yaközin.

⁴ Kunñan “Anutu möt wañgizal,” jiba jöjöpañ keuñi qahö tem köla wuatangömakzawi, yangön mönö munen jiji ambaziwa aiga keu ölnan yangö uruñe qahö kinja. ⁵ Qahöpmö, kunöñ Anutugö keuñi tem köla wuatangömakzawi, Anutugö urukalemñan mönö ölna yangö uruñi kokolak qei aködamanñambuk malja. Mewö mianjön Anutubuk qekötahöba mohok maljini, mi möt yaközin. ⁶ Kunñan “Anutubuk qekötahöba maljal,” jizawi, yangön mönö Jisösnöñ ahakmemenji ahök, mönö miangö dop aka memba malma. Mewö qahö aka maliga qahö dop kölja. Mewö.

Urukalem akingö jöjöpañ keu dölöknji

7 *O wölböt alaurupni, nöñön jöjöpañ keu dölök-kunñi qahöpmö, jöjöpañ keu walñi könakönahiñeyök ahöm engizawi, mönö mia ohom engizal. Jöjöpañ keu walñi miangö Buña keunñi mi lök möta mala kotket. 8 Töndup miangö jimkutukutuñi dölökñi mi engöra ohozal. Söñaupnöñ ayapkömangö aiga asakñi ölnan lök asarim qarimakzawi, miangöra jöjöpañ keu miangö ölnan mönö Anutugöreñ aka engöreñ ahuba ahöza.

9 Kunñan jitñan “Asakñe maljal,” jizapmö, alañi kazik ak wañgizawi, yañön mönö toroqeba söñaup uruñe malja. 10 Kunñan alañi jöpaköm wañgimakzawi, yañön mönö asakñañgö uruñe pöndañ maliga silikñan tosatñi siñgisöndok akñegöra qahö kondorakza. 11 Mewömö, kunñan alañi kazik ak wañgizawi, yañön mönö ömuñe jipjap mala ahakmemenñi söñaup uruñe ahakza. Söñaupnöñ jeñi mem sohoiga janjuñ aka maljawañgöra aka denike anmawi, mi nanñak qahö möt kutumakza. Qahö.

Anutunöñ siñgisöndoknini kösöloñanimakza.

12 O nahönböraturupni, Jisösnöñ kömumba qet ketañi memba maljawañgöra aka Anutunöñ engö siñgisöndokñini mosöta kösöloñanim teköyök. Miangöra keu ki engöra ohozal. 13 O iwiurupni, kunöñ könakönahiñeyök mala kotzawi, inñini i möt wañgiba mala kotze. Miangöra keu ki engöra ohozal. O gwaböurupni, inñini bölöñañgö Toñi luhut al wañgiba maljei, miangöra keu ki engöra ohozal. Nahönböraturupni, inñini Iwigö könañi möt kutuba maljei, miangöra keu ki engöra ohozal.

14 Iwiurup, kunöñ könakönahiñeyök mala kotzawi, inñini i möt wañgiba mala kotze. Miangöra keu ki ohobiga engöreñ kaza. Azi gwaböurup, inñini Anutugöreñ Buña keu uruñine algetka köhöiba kiniga ösum-mumuñinambuk aka bölöñañgö Toñi luhut al wañgiba malje. Miangöra keu ki ohobiga engöreñ kaza. Mewö.

Gölmegö ahakmeme bölöñi mi yakörime.

15 Inñini gölmegö ahakmeme bölöñi aka yuai pakpak miangöreñ ahözawi, miangöra kude ak engima. Kunñan uruñan gölmegö ahakmemegöra ak wañgiza ewö, Iwigö urukalemñan mönö yañgö uruñe qahö kinja.

16 Gölmegö ahakmeme mi kewö: Ambazipnöñ sileninañgö sihim kömböñañini bölöñi mörakze. Yuai jeñinan eka eksihim aka köpösöñgömakze aka gölmegö malmalñinañgöra piririköba töröraiba silenini memba öngömakze. Mi aka urukönöp tosatñi mi Iwigöreñök qahö kaza. Qahö! Mi mönö gölmegö ahakmeme bölöñi akza. 17 Gölmegö ahakmemenöñ göröñ qema aka miangö sihimñi bölöñi bölöñi mi mewöyök göröñ qememö,

* 2:7: Jon 13.34

kunjan Anutugö jit sihitji tem köla wuatangömakzawi, yanjon mönö böj qeba nalö teteköni qahö mal köhöima. Mewö.

Kraistkö tuarenjonurupni lök asuhuze.

18 O (koko) gömokurupni, Kraistkö salupne* kinda tuarenjon ak wangimawanjon nalö teteköne asuhumawi, mi lök jigetka mötze. Keu miangö dop nalö kewöne Kraistkö tuarenjonurupni gwötpuk lök asuha kinje. Keugö ölni mewö asuhuyöhanjöra aka nalö tetekönanjögö urunje lök kanjota maljin, mi mötzin. Miangö aiwesökni mewö. 19 Tuarenjon ambazip mienjon nanine kambunöhök mala nenjömosöta anget. Urunjini nembuk munen-munen jöhöba mötnarip könagesö sutnine lan mala buratiget. Nenjörenjön könagesö ölni akeak ewö, mönö nembuk pöndanj qekötahöba mohokne malbinak. Nenjömosöta tikep kinjei, silik mianjon mönö könanjini kewö kondeliga eka mötzin: Yenjörenjök kunöj nembuk ölna mohot qahö aka malök.

20 Yenjon tikep kinjemö, Kraistnöj Unjanj Töröni engö urunjine mokoiga bedu memba inahöm engiiga körek enjon keu ölni möt kutuba malje. 21 Injini keu ölni qahö möt kutubepüköra aka keu ki qahö ohom engizal. Mewögöra qahöpmö, injini keu ölni möt kutuze aka keu ölnan keu munenji kun kondotmamgö osimakza. Mianjögöra keu ki ohom engizal.

22 Jisösnöj Amötqeqe Tonji Kraist akzapmö, kun danjon keu mi qanj köljawi, yanjon mönö isimkakalek ambaziwa akza. Yanjon Kraistkö salupne kinda tuarenjon ak wangiba Iwi aka yangö Nahönnji mi mohokne qanj köl etkimakza. 23 Kunjan Iwigö Nahönnji qanj kölakzawi, yanjon Iwinji qahö öne malja. Kunjan Nahönnji jim miwiknajimakzawi, yanjon mönö Iwi mewöyök miwiknaiba yambuk malja.

24 Injini Buja keu könakönahinjeyök möta kotkeri, mi urunjine köhöiba kinmapköra galömnjini meme. Buja keu möta kotkeri, mianjon urunjine kinma ewö, injini mewöyök mönö böj qeba Iwi aka yangö Nahönnji yetpuk qekötahöba kinme. 25 Kraistnöj jöhöjöhö keu kewö nenjii ahöza, "Nömbuk kinme ewö, mönö oyaenjoyaenj malmal engibiga teteköni qahö mal köhöime."

26 Tosatjan esapköba janjun mem engimakzei, nöjön yengöra aka keu mi ohom engizal. 27 Tosatjan janjun ahakzemö, Kraistnöj Unja Töröni engö urunjine mokoiga bedu memba inahöm engimakza. Unja yanjon urunjine böj kini qahö löwörime ewö, enjon mönö böhi kungöra qahö osime. Mi kewögöra: Yangö Unjanjan mönö ahakmemegö keu pakpak

* **2:18:** Kraistkö tuarenjoni mi Antikraist. Grik keu anti, miangö könanji yahöt. Yanjon Kraistkö salupne kinja aka Kraist ölni tuarenjon ak wangimakza.

kusum engimakña. Bedu memba inahöm engimakzawi, mianjon yuai munenji kun qahöpmö, mötmöt ösumñi öl töhöññanök akza. Miangöra keu ölnji kusum engiyöhanjö dop mönö keunji pakpak tem köla Kraistpuk töp qekötahöba kinme.

²⁸ O (koko) gömökurupni! Inini mönö Kraistpuk töp qekötahöba kinme. Yambuk kinda malinga kunbuk asuhumawi, nalö miangöreñ qahö közöl nenjiiga gamu qakñe qahö mömölaköba anbinmö, ölop yangö jeñe awösamkakak qakñe tamehök kinbin. ²⁹ Kraistnöñ solanñi akzawi, inini keu mi möt kutuze ewö, mönö keu ki mewöyök ölop möt asarime: Ambazip körekñan ahakmeme solanñi ahakzei, yeñon mönö mewöyök Anutugöreñök ahuba nahönböraturupñi akze. Mewö.

3

Neñon Anutugöreñök ahuba nahönböratñi akzin.

¹ *Mötket! Suep Iwininan nenjöra “Nani nahönböraturupni,” mewö nenjohola mianjon urukalemñi ketanji kondel nenjimakza. Nini ölnja Anutugö nahönböraturupñi akzin. Mi akzinanjöra gölme ambazipnöñ könanamnini qahö möt kutuba malje. Anutugö könanji qahö möt kutuzeanjöra nanine könanamninanjöra mewöyök tötöpinpin malje. ² O wölböt alaurupni, nalö kewöñe nini Anutugö nahönböraturupñi aka maljin. Mewö mala könanjep denöwö aka malbini, mi aukñe qahö asuhuyök. Mohok kun mötzini, mi kewö: Yanjon kunbuk aukñe asuhuiga kaisongolomñi ölnji jeninan ekini, nalö miangöreñ mönö letota i ewö akin. ³ Denike yeñon Kraistköra jörömqöröm mewöñi ak wangizei, yanjon mönö i köl könjörat mem enjiiga yangö tandök ewö sarakñi aka malme.

⁴ Denike yeñon singisöndok akzei, yeñon mönö köna keu qeba walöñmakze. Singisöndok mi iwilele ahakmemeya.

⁵ *Kraist nanjak singisöndokñi kun qahö yanjon nanine singisöndoknini köl könjöratmangöra eta asuhuyöhi, mi ölop mötze. ⁶ Denike yeñon Kraistpuk böñ qeba kinjei, yeñon singisöndok qahö aka malje. Kunñan singisöndok toroqeba ahakzawi, yanjon Jisös qahö eka könanji qahö möt kutuba malja. Mewö.

⁷ O (kokourupni) gömökurupni! Kunñan janjuñ mem engibapüköra mönö galömñini mem anjuba malme. Kraistnöñ solanñi akzawi, yangö dop ahakmeme solanñi törörök wuatañ-gömakzawanjon mönö solanñi akza. ⁸ Bölöñanjö Toñan köna-könahineyök singisöndok aka kota malja. Mianjö dop denike yeñon singisöndok ahakzei, yeñon mönö Bölöñi

* 3:1: Jon 1.12 * 3:5: Jon 1.29

Toŋaŋgö buŋaya akze. Anutugö Nahönŋan mönö yaŋgö nupŋi yaŋ memamgöra eta asuhuyök.

⁹ Denike yeŋön Anutugöreŋök asuhugeri, yeŋgöreŋök kunŋan malmal qainŋi kun uruŋe ahözawaŋgöra mönö siŋgisöndok qahö toroqeba ahakza. Ahuahu dölökŋi ahuba maljawaŋgöra aka siŋgisöndok toroqeba akŋamgö osimakza.

¹⁰ Denike yeŋön Anutugö nahönböratŋi aka denike yeŋön Bölöŋi Toŋaŋgö nahönböratŋi akzei, mi kewö kewöta möt asaribin: Kunŋan ahakmeme solanŋi qahö wuatanaŋgömakzawi, yaŋön mönö Anutugö buŋaŋi qahö akza. Mewöŋanök kunŋan alaurupŋi qahö jöpaköm enŋimakzawi, yaŋön Anutugö buŋaya qahö akza. Mianŋgö aiwesökŋi mewö.

Iŋini mönö jöpaköm aŋguba malme.

¹¹ *Buŋa keugö kötŋi könakönahiŋeyök möta kota maljini, mianŋgö jöjopaŋ keuŋi kewö: Nini mönö urunöŋ jöpaköm aŋguba malbin. ¹² *Kein (Kain) yaŋön Bölöŋi Toŋaŋgö buŋaya mala munŋi qei kömuyök. Nini mönö i ewö aka malbinbuk. Yaŋön kewögöra munŋi qeyök: Nanŋi ahakmemeŋan bölöŋi ahökmö, munŋaŋ-göreŋan solanŋi ahök. Mönö mianŋgöra qeyök.

¹³ O urumelen alaurupni, gölme ambazipnöŋ kazik ak enŋime ewö, mianŋgöra mönö kude welipköme. ¹⁴ *Nini urumelen alaurupnini jöpaköm enŋimakzinaŋgöra aka keu ki möt asarizin: Nini kömup köhöikŋaŋgö jaböŋi walöŋda malmal köhöikŋe aŋgota maljin. Kunŋan urukalem qahö ahakzawi, yaŋön mönö toroqeba kömup köhöikŋaŋgö uruŋe kinma. ¹⁵ Ambazip alaurupŋini kazik ak enŋimakzei, körek yeŋön mönö köhömuŋi enŋuenŋu ambaziwa akze. Malmal köhöikŋi mi enŋuenŋu ambazip mewöŋi kungö uruŋe qahö ahöza, mi ölöŋ möt yaköze.

¹⁶ Jisös Kraistnöŋ malmalŋi neŋgöra aka kölenŋa mosöta jöpaköm aŋguaŋgugö könaŋi mewö kondel neŋgiiga eka möt kutuzin. Neŋön mönö mewöŋanök malmalnini urumelen alaurup yeŋgöra aka kölenŋa mosöringa dop kölma. ¹⁷ Kunŋan gölmegö öröyuainŋi dopŋe memba maliga alanaŋ yuaigöra osiba mözöqözöröŋ aiga ekzapmö, töndup ekbonep aka uruŋi jöhöza ewö, Anutugö urukalemŋan mönö yaŋgö uruŋe denöwö kinbawak? ¹⁸ O (koko) gömokurupni, jöpaköm aŋguaŋgu mi numbu jitninan keu töhönök timbiliba jimakinbukmö, mi mönö ahakmemeŋan keu ölnŋi wuatanaŋgöba aka malbin.

Mönö Anutugö jemesoholŋe tamehök kinbin.

19 Nini keu öljangö buñaya akzin me qahö? Akzin ewö, mönö ölop urunini böñjöh köliga Anutugö jemesoholñe awösamkakak kinbin. Keu mi nanini kewöt anguba kewö möt kutubin: 20 Uruninan yuai böljangöra aka jim neñgiza ewö, nini keu ki ölop möt yaközin: Anutunöh kewötkewöt Tonini aka keunini diñdijanök kewötma. Anutugö mötmötñan mönö nanine mötmötnini oñgita öñgöñgöñi aiga keu pakpak ölop möt teköza. Mianğöra ölop urunini böñjöh köliga malbin.

21 O wölböt alaurupni, uruninan qahö jim neñgiza ewö, nini mönö Anutugö jemesoholñe awösamkakak aka tamehök kinbin. 22 Nini Anutugö jöjöpañ keuñi tem köla ahakmemenini dop köl wañgimakzawañgö dop aka memba malakzin. Mianğöra yuai kungöra köuluköba qesim wañgibini, mönö mia neñgii buña qem angubin.

23 *Anutugöreñ jöjöpañ keu yahöt mi kewö: Nini mönö Nahöñji Jisös Kraistkö qetñi memba möt nariba urunini melenbin aka jöjöpañ keu jim kutum neñgiyöhañgö dop jöpaköm anguba malbin. Mewö qahö aka malbinak, mi Anutugö jeñe qahö dop kölbawak. 24 Denike yeñöh Anutugö jöjöpañ keuñi tem kölakzei, yeñöh mönö Anutubuk qekötahöba malgetka Anutunöh yembuk lapingöba kinja. Yañöh nembuk lapingöba kinjawi, mi Uñañi Töröhñi neñgiiga urunine sañep ala maljawañgöra möt kutuzin. Mewö.

4

Uñaya me ömeya mi mönö könañini kewöta mötme.

1 O wölböt alaurupni, kezapqetok ambazip takapulakanji gwötpuk mi gölme dop liliköba maljei, mianğöra keu pakpak mi zilañ kude memba möt narime. Anutugö Uñañan me öme kunjan sölölohöiga asuhuzawi, mi mönö mutuk esapesapnöh ala kewötme. 2 Anutugö Uñañangö könañi mi mönö kewö kewöta möt miwikñaima, “Jisös Kraistnöh eta silebuk aka malök,” denike yeñöh keu mi jim miwikñaimakzei, yeñöh mönö körek Anutugö buñaya akze. 3 Kunjan Jisösgö könañi mewö qahö jim miwikñaimakzawi, yañöh Anutugö buñaya qahö akza. Kraist tuarenjoñangö ömeñan mönö yañgö uruñi sölölohöiga keu jimakza. Kunöh asuhaba Kraistkö salupñe kinda tuarenjoñ ak wañgimawi,* keu mewö jiget mötketka yañöh lök nalö kewöñe gölmenöh asuhuza.

4 O (koko) gömokurupni, iñini Anutugö buñaya aketka Uña Töröhñan uruñine kinda gölmegö ömewörömeñi mi engoñgita

* 3:23: Jon 13.34; 15.12, 17 * 4:3: Kraistkö tuarenjoñi mi Antikraist. Grik keu anti, mianğö könañi yahöt. Yañöh Kraistkö salupñe kinja aka Kraist öljñi tuarenjoñ ak wañgimakza.

luhut al engimakza. Mianğöra kezapçetok ambazip takapulanı mi ölop luhut al engiba malje. ⁵ Yeñön gölmegö buñaya aketka gölmegö ömenjan sölölohöm engimakze. Mianğöra gölmegö ahakmemenji wuatangöba keu jigetka urumelengö kopa ambazip yeñön keunjanğöra kezap ala mörakze.

⁶ Nini Anutugö buñaya ahinga Uña Töröñan sölölohöm nengimakza. Anutu möt wangizeañön mönö nengö keunjanğöra kezap ala mörakze. Anutugö buñaya qahö akzei, yeñön nengö keunjanğöra kezap qahö ala mörakze. Keu ölnangö Uñanı aka isimkakalekö ömenji yetkö könanjiri mi mönö mewö kewöta möt kutumakzin. Mewö.

Anutunöñ urujöpakö könanji akza.

⁷ O wölböt alaurupni! Anutunöñ jöpaköm anğuanğugö jalöñji akza. (Mianğöra urukalem mi o jeñangö tandök ewö ahöba korakza.) Mianğöra nini mönö jöpaköm anğuba malbin. Mewö aka maljini, körek neñön mönö Anutu möt wangiba yangörenök ahuhahu dölokñi ahuba maljin.

⁸ Anutunöñ urujöpakö Tonji akza. Mewö akzawangöra kunjan ambazip qahö jöpaköm engimakzawi, yanñön mönö Anutu qahö möt wangiba tönpin malja. ⁹ Anutunöñ urukalemñi kewö kondeli sutnine asuhuyök: Yanñön Nahönñi mohok-kunjan nam köl nengii mal köhöibingöra aka melaiiga gölmenöñ erök. ¹⁰ Nini Anutu jöpaköm wangiinmö, mianñön urukalemgö könanji qahö. Urujöpakö könanji mi kewö: Anutunöñ jöpaköm nengiba singisöndoknini köl könjöratmamgöra Nahönñi melaiiga nengören erök.

¹¹ O (koko) gömokurupni, Anutunöñ mewö önöñji qahö jöpaköm nengiyöhanğöra neñön mönö mewöñanök uruninan jöpaköm anğumakin. Urukalem qahö ak anğuinga qahö dop kölja. ¹² *Kunjan kun Anutu nalö kunöñ qahö ehökmö, jöpaköm anğuba maljin ewö, Anutunöñ mönö urunine lapingöba kiniga urukalemñan urunini kokolak qeiga aködamuninambuk maljin.

¹³ Nini Anutubuk qekötahöba malinga yanñön urunine lapingöba kinjawi, mi Uñanı Töröñi nengiyöhanğöra aka möt kutuba uruyahöt qahö ahakzin. ¹⁴ Iwinöñ Nahönñi gölmenji gölmenji nengö Amötqeqe Tonini akñapköra melaiiga erök. Neñön mi eka möta nanğöba jimakzin. ¹⁵ Kunjan "Jisös Anutugö Nahönñi akza," jiba jim miwikñaimakzawi, Anutunöñ mönö yangö uruñe lapingöba kiniga yanñön Anutubuk qekötahöba malja.

¹⁶ Anutunöñ uruñan jöpaköm nengimakzawi, nini mianğö könanji möta mianğören möt narimakzin. Anutunöñ urujöpakö Tonji akza. Mewö akzawangöra kunjan ambazip

* 4:12: Jon 1.18

jöpaköm engiba maljawi, yañon mönö Anutubuk qekötahöba kiniga Anutunöñ yañgö uruñe lapingöba malja. ¹⁷ Mewö malinga köñgörököm neñgiiga Anutugö urukalemñan urunini kokolak qeiga aködamu-ninambuk maljin. Nini Kraistkö tandök ewö gölme kusukñi kiangöreñ maljin. Mewö maljinangöra aka Anutugö jimtekötekö nalö ketañe Kraistkö jeñe añaota mianğoreñ awösamkakak aka tamehök kinbin.

¹⁸ Anutunöñ jöpaköm neñgiiga kinda öne töhön keñgötnini mötpinbuk. Siñgisöndok ambazip yeñon Anutunöñ siñgisöndok-ñinanğö likepñi melenğ engibapuköra keñgötñini mörakzemö, Anutugö urujöpakñan urunini kokolak qeza ewö, mianğon mönö keñgöt mötmöt pakpak yakörim tekömakza. Mianğöra kunñan keñgötñi mörakzawi, yañon jöpaköm neñgimakzawañgö könañi mi törörök qahö möt teköza.

¹⁹ Yañon mutuk jöpaköm neñgiyöhañgöra aka nini urukalem ahakzin. ²⁰ Kunñan “Anutu jöpaközal,” jizapmö, alañi kazik ak wañgimakzawi, yañon mönö munenğ jiji ambaziwa akza. Mianğö könañi kewö: Alañi eka töndup qahö jöpaköm wañgiza ewö, yañon Anutu qahö eka i mönö denöwö jöpaköm wañgibawakto? ²¹ Kunñan Anutu jöpaköm wañgimakzawi, yañon mönö alaurupñi mewöyök jöpaköm engiba malma. Anutunöñ jöjöpañ keuñi mewö al neñgiyök. Mewö.

5

Mötnariñ ambazip neñon luhut alakin.

¹ Denike yeñon Jisös möt nariba “Amötqege Tonina akza,” jimakzei, körek yeñon mönö Anutugöreñök ahuahu dölokñi ahuba malje. Denike yeñon Iwi jöpakömakzei, körek yeñon mönö yañgö Nahönñi mewöyök jöpaköm wañgimakze. ² “Anutugö nahönbörat-urupñi jöpaköm engizin,” jiinga keu mianğö ölni mi nanini kewögöra kewöt añauba mötzin: Anutu jöpaköm wañgiba jöjöpañ keuñi tem köla wuatangömakzin ewö, mönö Anutugö nahönbörat-urupñi mewöyök jöpaköm engimakin. Mianğö aiwesökñi mewö. ³ *Anutu jöpaköm wañgibingö ölni mi temkölköl. Anutugö jöjöpañ keuñi wuatangöinga dop kölja. Jöjöpañ keuñi tem kölinga lömbötñambuk qahö akña.

⁴ Anutugöreñök ahuahu dölokñi ahuini, körek neñon ölop yañgö jitñi tem köla gölmegö ahakmeme bölöñi luhut alakin. Anutunöñ mötnariñ neñgiiga mianğö qakñe köuluköinga lök gölmegö ahakmeme bölöñi memba et alök. Luhut albingö köna murutñi kun qahö ahöza. ⁵ Neñon luhut qahö albinak ewö, denike yeñon mönö mi akeak? Jisösnöñ Anutugö

* 5:3: Jon 14.15

Nahönña akzawi, mi möt narizawañön mönö gölmegö ahak-meme bölöñi luhut alakza. Mewö.

Anutunöñ Nahönñañgö keu kewö nañgöba jiyök:

⁶ Jisös Kraistnöñ Anutugö Nahönña akzawi, mi denöwö mötzin? Jisösnöñ oe geiga Jonöñ o melun mem wañgiiga Anutunöñ nalö miañgöreñ keu mi jiiga mötket aka könäñgep sepñi mokomangö aiga miañgöreñ qet kun Suepnöhök asuhuiga mötket. Keu onöñ indim mohok asuhuyöhi, miyök qahö. Suep Toñan keu nañgöba jiyöhi, miañgö aiwesökñi mi o aka sep, yahöt mi. Toroqeba Uña Töröñan keu mi jimakza. Yañön keu öññañgö Toñi akzawañgöra aka muney jimangö osimakza.

⁷ Nañgönañgö keu karöbut mi mewö mörin ahöza. ⁸ Keu karöbut miengö aiwesökñini mi Uña, o aka sep. Keuñini mi öröröñ aukñe möringa dop köl teköza. ⁹ Keu jakeñe kañgota nañgönañgö ahakzei, mi ölop möt añañön kölakzinmö, Anutugö nañgönañgö keuñan mönö ambazip keunini ongita pöwöwöm köhöikñi akza. Anutunöñ Nahönñañgöra “Nani Nahöna!” qeta könäñi mewö aukñe nañgöba jiyök. Miañgöra keu mi andö qebinbuk.

¹⁰ Kunñan Anutugö Nahönñi möt narimakzawi, nañgönañgö keu Toñan mönö nanñak yañgö uruñe maliga yañgö könäñi ölop möt yaköza. Kunñan Anutu qahö möt narimakzawi, yañön mönö nañgönañgö keu Toñi nanñi memba et aliga muney jiji azia ahakza. Anutunöñ keu kötni Nahönñañgöra nañgöba jiyöhi, yañön keu mi qahö möt narizawañgöra mönö Anutu nanñi andö qeba qetalakza. ¹¹ *Anutunöñ keuñi kewö nañgöba jiyök, “Nöñön malmal köhöikñi engimangö jiali, nani Nahönan mönö malmal kömbönañi miañgö kondotkondot Toñi akza.” ¹² Yañgö Nahönñambuk maljawañön mönö malmal köhöikñi buña qem añañguba malja. Anutugö Nahönñambuk qahö maljawañön mönö malmal köhöikñi mi qahö buña qem añañguba malja. Mewö.

Malmal köhöikñañgö könäñi

¹³ Uruñini melenña Anutu Nahönñañgö qetñi memba möt narimakzei, nöñön kimbi ki engöra ohozal. Malmal köhöikñañgö buñaya akzei, inñini miañgö könäñi törörök möt kutumegöra ki ohozal. ¹⁴ Nini ölop awösamakak aka Anutugö kösutñe anda köuluköba kinda kewö möt yaközin: Wani yuaigöra yañgö jit sihitñañgö dop köuluköm wañgibini, yañön mönö köuluknini mi mötma. ¹⁵ Mi me mi miañgöra köuluköinga köuluknini mötmapkö mötzin ewö, mönö keu ki mewöyök möt

* 5:11: Jon 3.36

kutuzin: Wani yuaigöra köuluköm waŋgizini, mi pakpak mönö neŋgö buŋanina akŋa.

¹⁶ Kunŋan alaŋi ehi siŋgisöndok ahiga mianjön kömup köhöikŋaŋgö buŋaya qahö akŋawi, yaŋjön mönö alaŋi miangöra Anutu köuluköiga amöt qem waŋgiiga malmal köhöikŋe aŋgotma. Siŋgisöndok Anutunöŋ mosötmawaŋgö dop akeri, keu ki mönö yeŋgöra jizal. Tosatŋan siŋgisöndok aketka mianjön kömup köhöikŋaŋgö buŋaya akŋei, yeŋgöra köulukömegöra mi qahö jizal. Qahö. ¹⁷ Ahakmeme bölöŋi pakpak mi siŋgisöndok akza. Köpösihit tosatŋi ahinga mianjön kömup köhöikŋaŋgö buŋaya qahö akin. Mewö.

Mötnariŋ ambazip neŋjön Anutubuk qekötahöba kinjin.

¹⁸ Denike yeŋjön Anutugöreŋök ahuahü dölökŋi ahugeri, yeŋgöreŋök kunŋan siŋgisöndok qahö toroqeba ahakzawi, mi mötzin. Anutugöreŋök ahuahü dölökŋi ahuba maljawaŋjön mönö nanŋi galöm mem aŋguiga Bölöŋaŋgö Toŋan i qahö qeraköba mema.

¹⁹ Nini keu ki mötzin: Nini Anutugö buŋaya akzinmö, gölme dop yeŋjön uruŋini qahö melaŋda Bölöŋi Toŋaŋgö kukösum bapŋe malgetka galöm köl eŋgimakza.

²⁰ Keu ki mewöyök mötzin: Kunöŋ öl töhöŋŋi akzawi, nini i möt waŋgibingöra Anutunöŋ Nahöŋŋi melaiiga eta möt-asa-asari neŋgiyök. Kunöŋ öl töhöŋŋi akzawi, nini yambuk qekötahöba mohok aka maljin. Öl töhöŋŋi yaŋjön mönö Anutugö Nahöŋŋi Jisös Kraist. Yaŋjön Anutu ölbölŋi aka malmal köhöikŋaŋgö kondotkondot Toŋi akza.

²¹ O (koko) gömukurupni, tandö lopioŋ aka bem munenji tosatŋan köpeiba qeraköm eŋgibepuköra mönö nanŋini galöm mem aŋguba malme. Mewö.

Jongörej Kimbi 2

Jonöñ Kimbiñi aliga 2 ahök.

Jim-asa-asari

Buņa Kimbi kianğö tonji yañön nanñi qetñi “Jitñememe kun,” qerök. Yañön kimbi mi “Wölböt ambi aka yañğö nahönböraturupñi,” yengöra alök. Keu tölapñi mi urumelen könagesö kungö söpsöp keuya. Nahönbörat mi könagesö aiga wölböt ambi mi yengö galömñina. Buņa Kimbigö keu töröpñi kianñon jöpaköm aņgubingöra uru kuņgum neņgimakza aka böhi takapulakanñi yepñon ambazip kusum engigetka keuñinan sehibapukö galöm meme keuya akza.

Buk kianğö bahöñi bohonñi 4 mi kewö:

Keu mutukñi 1-3

Urukalem mi yuai bohonñi 4-6

Keu goņgoņan sehibapukö galöm meme keu 7-11

Kimbigö keu kötni bohonñi 12-13

¹ O ambi sorok!

Anutunöñ möwölöhöm gihiiga urumelen könagesöurupki galöm köl engiba kinjan. Nöñon iñini keu ölñangö dop uru könömnan jöpaköm engimakzal. Nanök qahöpmö, ambazip keu ölñi möt kutuzei, körek yepñon mönö mewöyök iñini jöpaköm engiba malje. Nöñon jitñememeya akzal aka göbuk keu eraum mötpitköra kaba kimbi ohozal. ² Keu ölñan urunine kinja aka nembuk teteköñi qahö ahöm öņgöma. Nöñon Buņa keu miangöra aka jöpaköm engizal.

³ Nini keu ölñi wuatangöba urunöñ jöpaköm aņguba maljin ewö, Iwi Anutu aka Iwigö Nahönñi Jisös Kraist yetkön mönö ak kömumba kalem möriam neņgiyohotka luainöñ malbin.

Urukalem aka keu ölñi mi mohotñe wuatangöme.

⁴ Iwinöñ urukalemğö jöjöpañ keuñi neņgiyöhi, miangö dowök göhö könagesöurup tosatñan keu ölñangö dop ahak-memeñini aka memba malje. Nöñon silikñini mewöñi ekiga sösoņgai ketañi ak neņgimakza. Mewö.

⁵ *O wölböt alani ambi ketañi, nalö kewöñe jöjöpañ keu ohom gihizali, mi keu dölokñi qahö. Keu könakönahinneyök könahiba mörini, nöñon mönö keu mi kunbuk ohoba kewö qesim gihizal: Nini mönö uruninan jöpaköm aņguba malbin. ⁶ Jöpaköm aņguba malbingö keuñi jizali, miangö ölñi kewö: Nini mönö Anutugö jöjöpañ keuñi pakpak tem köla ahakmemenini ak memba malbin. Körek epñon jöjöpañ keu

* 1:5: Jon 13.34; 15.12, 17

könakönahıneyök möta malgeri, mi kewö: İnjini mönö uruñinan jöpaköm anğuba malme.

⁷ İsimkakalek ambazipnöñ Jisös Kraistköra kewö jim miwik-ıñaimakze: “Amötqeçe Toñan gölme azi silebuk asuhumangö osiyök.” Mewö jim miwikıñıba tilipqilip aketka enjololon asuhumakza. Ambazip isimkakalek mewöñi mi Kraistkö salupñe kindu tuarenjon ak wañgimakze. Ambazip mewöñi gwötpukñan lök gölmeñi gölmeñi liliköba lañ anda kaba malje. ⁸ Neñön urugö nup meinga ölni uruñine asuhuyöhi, mianñon sohoba pömsöm qebapuköra mötzal. Mianğöra isimkakalek ambazipnöñ enjololon ak enğibepuköra mönö galömqini mem anğuba malme. Mewö malgetka uruñıanğö ölnan qahö sohoıga Kembunöñ töwanini körek enğim teköma.

⁹ Kraistnöñ keu kusum neñgiyöhi, kunñan mi qahö qekötahözapmö, mi onğita keu toroqeıga lolonqalon jimakzawi, yañön Anutuñi qahö. Denike yeñön Kraistkö Buña keuñe qekötahözei, yeñön mönö İwi aka Nahön yetpuk köhöıba malje. ¹⁰ Kunöñ Buña keu jömqunji mi qahö memba enğöreñ kazawi, inini mönö yañğö jölöñi kude jıba miriñine kude örögetka öñğöma. ¹¹ Kunñan yañğö jölöñi jimawi, yañön mönö bölöñamñanğö lömbötñi öroi qakñe öñğöıga öröröñ bisimahot. Mewö.

Keu teteköñi

¹² Nöñön enğöra keu sehisehiñi ohomangö sihimñi mötzalmö, mi papia sinñe inknöñ ohomangö qahö möta mosötzal. Enğöreñ kujuk kaba mesohol köla keu eraum mötpingö mamböta jörömqöröm akzal. Aitonğöbini, nalö mianğöreñ köisirik tata eraum möta sösöñgainini körek ahum teköba urunini kokolak qeıga malbingö mötzal.

¹³ Anutuñöñ ambi alagi galöm nupköra möwölöhöyöhi, ambi sorok yañğö könagesöurupñan yaizökzökñini algetka göhöreñ kaza.

Jongörej Kimbi 3 Jonöñ Kimbiñi aliga 3 ahök. Jim-asa-asari

Buñä Kimbi kiangö tonji yañön nanñi qetñi “Jitñememe kun,” qerök. Yañön Kimbi mi urumelen könagesö kungö jitñememe kun qetñi Gaius yañgöra alök. Gaiusnöñ urumelen ambazip tosatñi miri aka nene yuai bauköm engiba malök. Mianğöra i möpöseim wañgiyök aka tuaköpek azi kun qetñi Diotrefes yañgöra galöm meme keu jiyök.

Buk kiangö bahöñi bohonñi 5 mi kewö:

Keu mutukñi 1-4

Jonöñ Gaius möpöseiza 5-8

Diotrefesgö galöm meme keu 9-10

Demitriusgö sösöñgai keu 11-12

Buk kiangö keu kötni bohonñi 13-15

¹ *O wölböt alani Gaius!

Nöñön jitñememe kun aka göbuk keu eraum mötpitköra kaba kimbi ohozal. Nöñön keu öññangö dop urunan jöpaköm gihiba maljal.

² O wölböt alani, göhö uñagan Anutubuk qekötahöba ölöwahi maljani, mi mötzal. Mewöñanök sile unditundit mala yuai pakpak mianğoreñ töhötmöriam miwikñaiba malmangöra Anutu köuluközal. ³ Urumelen alaurup tosatñan göhöreñök kaba göhö kösohotki kewö nañgöba jigetka möral, “Göñön Anutugö keu öññi pöndañ wuatangöba aka memba maljan.” Mewö jiget mötpiga sösöñgai ketañi ak niñgiyök. ⁴ Nöñgö (koko) gömokurupnan Anutugöreñ keu öññi wuatangöba aka memba maljei, nöñön keu buzup mewöñi möta öñöñi qahö söñgaimakzal. Buzup murutñi kunöñ sösöñgai öñgöñgöñi mi qahö öñgiri mötzal. Mewö.

Jonöñ galöm azi qetñi Gaius möpöseiza.

⁵ O wölböt alani, gi urumelen alaurup welen qem engiba mianğoreñ pöndañ kindä malakzan. Yengöreñök tosatñan miri liliköba engöreñ kamakzei, mi köyan köl engimakzan. Möt engizani me qahö, mi töndup ölöpñanök bauköm engimakzan.

⁶ Gi urugan jöpaköm engiba malnöñi, yengöreñök tosatñan ki kaba mötnarip kambugö jeñine könañangi mewö nañgöba jiget mörin. Mianğöra alaurup mewöñan engöreñ kamei, mi mönö bauköm engiba malnöñga ölöp amqeba nup memba könañini toroqeba anme. Nup mewöñi mi Anutugö jeñe dop

* 1:1: Apo 19.29; Rom 16.23; 1 Kor 1.14

köl waŋgimawaŋgö dop toroqeba memba malman. ⁷ Yeŋön Kraistkö buŋaya akzeanğöra aka nanŋini miriŋini mosöta liliköba qetbuŋaŋi jim sehimakze. Nup mewö memba urumelenğö kopa ambazip yeŋğöreŋök nene yuai kun qahö memakze. ⁸ Mianğöra Jisösgö alaurup neŋön naninök alaurup mewöŋi köl öröba naŋgöm enğiinga dop kölma. Nini nup bahöŋi mi memba mianğön keu ölŋaŋgö Tonji mohotŋe welen qem waŋgiinga keuŋi ölŋan sehimakŋa. Mewö.

Diotrefes ewö akanbukö galöm meme keu

⁹ Nöŋön mötnarip kambu enğöra kimbi kun ohoyal. Mi ohoyalmö, Diotrefes jitŋememe azi yaŋön sutŋine galöm bohonŋi malmangö sihimŋi mötzawi, yaŋön mönö mem-sepqemsep aka keunaŋgö kezap qahö ala nesampurek ak neŋgimakza. ¹⁰ Mianğöra nöŋön enğöreŋ kabilerŋak ewö, mönö yaŋgö ahakmemeŋi bölöŋi mi aukŋe jibiga kewö mötme: Yaŋön neŋgöra luasö keu munenŋi andönöŋ qeŋe jimakza aiga keu jiiyök qahö ahakza. Qahö! Urumelenğ alaurupnini miri lilik nup memakzei, yaŋön mi qahö köl öröm enğimakza aka alaurup tosatŋan köl öröm enğibingö mötzei, yaŋön i aŋgön köl enğiba mötnarip kambuŋineyök utal enğiiga yaigep erakze.

¹¹ O wölböt alani! Gi ahakmeme bölöŋi qahöpmö, ahakmeme ölöŋŋi mia mönö wuatangöba malman. Denike yeŋön ahakmeme ölöŋŋi aka memba maljei, yeŋön Anutugö nahön böraturupŋi akze. Denike yeŋön ahakmeme bölöŋi aka memba maljei, yeŋön Anutugö könaŋi qahö möt kutuba sel yaigepŋe malje.

¹² Demitrius azi mianğö könaŋi mi ölöŋŋi. Alaurup körekŋan mewö jimakze. Keu ölŋaŋgö Tonjan nanŋak mi mewöŋanök naŋgöba jimakza aka neŋön toroqeba yaŋgöra keu öröröŋ jimakzin. Neŋön keu jimakzini, mi keu öl töhöŋŋi akza, mi mötzan. Mewö.

Yaizözkök keu teteköŋi

¹³ Nöŋön göhöra keu sehisehiŋi ohomangö sihimŋi mötzalmö, mi kirifi aka iŋknöŋ ohom gihimangö dopŋi qahö möta mosötzal. ¹⁴ Nöŋön ösumok göhöreŋ kaba gekŋamgö mamböta jörömqöröm akzal. Aitongöbini, nalö mianğöreŋ ölöŋ mesohol köl aŋguba keukeu eraum mötŋin.

¹⁵ Anutunöŋ luai qem gihiiga malman!

Mötnarip alaurup ki maljei, yeŋön yaizözkökŋini algetka göhöreŋ kaza. Göŋön mewöŋanök urumelenğ alaurup göbuk kinjei, mi nanŋik nanŋik yaizözkökŋini jinöŋga mötme!

Judagöreᅇ Kimbi Judanöᅇ Kimbiᅇi alök. Jim-asa-asari

Juda mi Jisös aka Jeimsgö munᅇi. Tosatᅇan “Kraist möt narizin,” jiba keu gongonᅇi ambazip kusum sohom engiba malgeri, Judanöᅇ yengöra aka galöm meme keu ohoyök. Buᅇa Kimbi ki töröptökᅇi. Keuᅇi mi 2 Pitö 2 keu miangö dop. Judanöᅇ Kraistkö alaurupᅇi neᅇgö urunini kewö kuᅇguyök, “Anutunöᅇ nini nalö dop möt naribingöra mötnarip neᅇgiiga könagesöurupᅇi akzini, eᅇön mönö mötnaripᅇinan sehiba köhöimapköra toroqeba bim qeba malme.”

Buk kiangö bahöᅇi bohonnᅇi 4 mi kewö:

Keu mutukᅇi 1-2

Böhi sohoboho yengö könaᅇini aka jimteköteköᅇini 3-16

Toroqeba pöndaᅇ möt naribingö jimkutukutunᅇi 17-23

Kötumötuet keu 24-25

1 *Juda bisop Jeimsgö munᅇi nöᅇön Jisös Kraistkö welennᅇi qeba urumelenᅇ alaurup embuk keu eraum mötpingöra kaba kimbi ohozal.

Anutu Iwinöᅇ engohola uru könöᅇᅇan jöpaköm engii Jisös Kraistnöᅇ sel jöhöm engiiga malje.

2 Anutunöᅇ mönö ak kömumba urukalemᅇi kelenmalelen engiiga luainöᅇ malme. Mewö.

Buᅇa keu möwököwöramgö galöm meme keu.

3 O wölböt alaurupni! Anutunöᅇ amöt qem neᅇgiiga letota mohotᅇe Suepkö buᅇaya akzini, nöᅇön miangö keuᅇi jim tuariba ohom engimamgö sihimni ketanᅇi möta malal. Mala malbi lömböriiga toroqeba mambötmamgö osizal. Miangöra ohoba uruᅇini kewö kuᅇgum engizal: Anutunöᅇ mötnaripkö keu kemaᅇi pakpak mi ambazip sarakᅇi neᅇön memba galöm kölinga qahö utekömapköra ali buᅇanina akza. Miangöra böhi takapulakanᅇi tosatᅇan Buᅇa keu lolonqalonᅇ akepüköra mönö böᅇ kinda bim qeba malme.

4 Ambazip tosatᅇan möndöba urumelenᅇ kambu sutᅇine ölöᅇ ölölöᅇgöba kaᅇgotketka könaᅇamᅇini gongonᅇi mi aukᅇe qahö asuhui malje. Anutunöᅇ ambazip mewöᅇi yengö keuᅇini lök mönöwök jim teköiga ohogetka sihimbölöᅇinan qakᅇine öᅇgö-mamgö akza. Anutuninan keuᅇi ala kalem möriamᅇangö könaᅇi öᅇᅇa indelakzapmö, ambazip aᅇgöjörakᅇinambuk mienᅇön mönö nanᅇini sero namböᅇnamböᅇini turumegöra aka

* 1:1: Mat 13.55; Mak 6.3

kalem möriamgö keunji mi möwököwöramgöba mönjaqöñaigetka bölimakza. Mewö aka nanine Ketañamnini mohot Jisös Kraist Kembu ak neñgi-makzawi, i qañ köla andö qemakze.

⁵ *Injini keu pakpak mi lök nalö köröpñi möt teköba maljemö, töndup galöm meme keu ki ölum engubapuköra kunbuk kewö jim gulim engimamgö mötzal: Kembunöñ könagesöurupñi Ijpt kantrinöhök meköm engiiga kagetmö, könangep tosatñan nalö kunöñ qahö möt narim wañgigetka mi köndenmönden ak engii ayuhuget. Galöm meme keu mi engöra aka kunbuk jizal.

⁶ Mewöyök Anutunöñ Suep garataurupñi jakömbuak tohoñini al engiiga malgetmö, yengörenök tosatñan urukönöp aka keu bapñe qahö anda nanñini jakömbuak tohoñini galöm köl engibingö urumohot qahö aka selñini kösököget. Qeçetal akerangöra aka Anutunöñ i aköm engiiga jakömbuak miriñini mosöta etket. Etketka “Nalö ketañe keunji jim tekömam,” jiba tapepnöñ (muñgamuñga) gwaröhöba pandaman uruñe al engiiga tata kotkera nalö teteköñi qahö tat öngöme. Galöm meme keu mi engöra aka kunbuk jizal. ⁷ *Tandök mohot miañön Sodom, Gomora aka miri tosatñi liliköba tatkeri, yengören asuhuyök. Ambazip mienñön mewöñanök serowilin aka silegö sihim kömbönañini möwöramgöba tandökñi kun kewö aket: Azi nanñirök ambi nanñirök amimba malget. Mewö malgetka Anutunöñ likepñini melen engiiga könöp jitñi teteköñi qahö engohoi sihimbölö möta mala kota malme. Mewö mala böhi takapulakanji yengö galöm mem añgubingö kaisöpsöpnina ahakze.

⁸ Ambazip takapulakanji mienñön mönö nalö kewöñe tandök mohot mewöñanöhök ahakze. Jeñini meleni imutimutñini lañ eka miañgören möndöba wuatangöba nanñini silenjanagö malmalñini mem böliba kölköljinjin miwikñaimakze. Mewö miañön Anutu jijiwilit aka jimongot jim wañgiba kukösumñi memba et alakze. Mewö aka Suepkö bem suahö ambazip asakmararañinambuk euyangören maljei, yengöra uruqeçe keu töhöreñ jim engimakze.

⁹ *Mewö ahakzemö, Suep garata bohonñi qetñi Maikel yañön mewöyök mewö akñamgö lömböriba osiyök. Maikelnöñ Mosesgö qamötnangöra Bölöñangö Toñambuk añgururuk aka möndöm-kösök ahök. Mi aka öngöba erökmö, töndup uruqeçe keu töhöreñ mi jim teköm wañgimamgöra awösamkakak qahö miwikñaiba osiyök. Osiba kewöyök jim wañgiyök, “Kembunöñ mönö mindiñ-göm gihima.”

¹⁰ Maikelnöñ mewöyök mi osiyökmö, ambazip sohoboho mienñön mönö silenini memba öngöba Buña keu qahö möt

* **1:5:** Eks 12.51; Jañ 14.29-30 * **1:7:** Jen 19.1-24 * **1:9:** Dan 10.13, 21; 12.1; Ind 12.7; Dut 34.6; Zek 3.2

kutumakzemö, töndup miangöra uruqege keu töhören laŋ jimakze. Tönpin mala sömbup soŋ ewö laŋlaŋ malje. Mötkutukutuŋini ölni qahö asuhuiga sömbup malmalgö sihimŋini korembiŋi miyök mörakze. Nanŋini sihim mötmötniŋi goŋgoŋmaŋgoŋi mienŋön mönö köndenŋ enŋigetka ayuhume. ¹¹ *Anutunöŋ böhi takapulakaŋi miengö likepŋi melenŋ enŋiiga sihimbölö ketanŋi mötmeangöra wöziköba Yei! jizal. Ambazip sohoboho mienŋön azi Kein (Kain) yangö könanŋi mötöteiba anakze. Könanŋep kerök azi kembu kunöŋ azi qetŋi Balam töwa waŋgiiga Israel ambazip tilipköm enŋiiga janjuŋ anget. Böhi takapulakaŋi mienŋön Balamgö silikŋi wuatangöba monenŋ miwikŋaibingöra urukönöp möta yuai ilinölaŋ ak bibihiba laŋ sohomakze. Azi qetŋi Kora yanŋön Moses aka Aron tuarenjoŋ ak etkiba köndenŋmöndenŋ miwikŋaiiga ayuhuyöhi, böhi mienŋön mönö Kora ewö kezapjupjup aka mala ayuhume.

¹² Urumelenŋ enŋön urukalem kondel angubingöra tokoba lömbuan algetka takapulaka böhi mienŋön mönö miangören mewöyök kamakze. Kaba dogoŋini aukŋe kondela nanŋinanöhök gumohom anguba bau numbu nemakze. Mewö aka enŋö sile töwötniŋi boromŋi boromŋi gamuŋinambuk ewö akze. “Ziozgö lama galöm akzin,” jiba ala enŋöra qahö mötmöriba kelök keu laŋ jimakze.* Kousu omanŋi töhöntöhön kienŋini qahö mewö malgetka luhutnöŋ muwutapköm enŋiiga laŋlaŋ anda kamakze. Ölni ahumapkö nalöŋe ipŋi ipŋi araronŋi ölniŋi qahö ewö kinje. Guluŋ sinŋinanök ewö aka mutuk köhömuŋi aka jalöŋini malmal köhöikŋangö könanŋeyök qözöla tala kunbuk kömum köhöigetka yahöt aiga köhömuŋi kötökŋi aka malje.

¹³ Yenŋön köwet siri kukŋinambuk ewö laŋ kundutketka ahakmemeŋinan gamuŋambuk mi qölqölsöut gödöwörötŋambuk ewö aukŋe asuhumakza. Senŋelau tosatŋan könanŋini siŋgiba laŋ erakzei, yenŋön mönö miangö dop janjuŋ qemakze. Senŋelau miengö dop eta Anutunöŋ yengöra pandaman göjiwinangö uruŋe miri arengöm enŋiyöhi, mönö emuyangörenŋ dutŋe geba nalö teteköŋi qahö tat öŋgöme.

¹⁴ *Adamgö sakonŋangö isiŋi qetŋi Enok yanŋön mewöyök ambazip takapulakaŋi miengö kezapqetok keuŋini qeljine kewö jii ahöza: “Mötket, Kembunöŋ Suep suahö ambazip töröŋi tausenniŋi tausenniŋi janŋö öngöŋgöŋi ketanŋi mi enŋömemba eta asuhume. ¹⁵ Asuhugetka körek pakpak nenŋö keunini jim teköma. Ambazip angöjörakŋinambuk yenŋön

* **1:11:** Jen 4.3-8; Jan 22.1-35; 16.1-35 * **1:12:** Böhi mienŋön törom ewö asamböta tazemö, waŋŋenŋinan yengörenŋ qaköba jömgöbapuk. * **1:14:** Jen 5.18, 21-24

ahakmeme anğöjörakñambuk wuatañ-göba sinğisöndokñini anğöjörakñinambuk aka kotkeri, mi pakpak kewöta mianğö likepñi melenj enğiiga körek yeñgö qakñine öngöma. Pinjit ambazip anğöjörakñinambuk mienjön keu jenön gege gamuñambuk mianjön Anutu jim qetal wañgiba kotkeri, mianğö likepñi pakpak melenj enğiiga sihimbölöñini möta malme.” Enoknön galöm meme keu mewö jiyök.

¹⁶ Böhi sohoboho mienjön jimongot aka sesekñai ewö ihururuk lañ jim anğumakze. Nanñini sihim kömbönañini bölöñi wuatañ-göba terenqerenđa silenini memba öngöba jakbak-orañbörañ ahakze. Ambazip tosatñi göda qeba kelök enğuze ewö, mi yuai melenđa nanñine enğimegö sihimñi möta kelewele ahakze. Mewö malje.

Galöm meme aka qambañ keu tosatñi

¹⁷ Mewö maljemö, wölböt alaurupni, Kembunini Jisös Kraistkö aposolurupñan böhi takapulakanj yeñgö keuñini lök qeljine jiget ahöza. Injini yeñgö keuñini mi ölum enğubapuköra galömñini mem anğuba malme. ¹⁸ *Aposol yeñön enğöra keu kewö jiget, “Jisösgö kaka nalöñan töriiga nalö teteköñe mianğöreñ mepaqepaik ambazip asuhume. Yeñön nanñini sihim kömbönañini bölöñi wuatañgöba malmal anğöjörakñambuk malme.” Mewö jiget.

¹⁹ Ambazip takapulakanj mienjön mönö sutñine urujujul ak enğigetka simbisembel akepuk. Uña Töröñan qahö sölölohöm enğiiga gölmegö sihim kömbönañi bölöñan galöm köl enğiiga mi wuatañgömakze. ²⁰ O wölböt alaurupni, Anutunön mötnarip qainñi kun enğiyöhi, mianjön mönö tandöñini bohonñi öngöngöñi ewö akza. Enön mönö mötnarip mianğö qakñe kinda nañgöm anğuba köhököhöi miwikñaimakñe. Uña Töröñan inahöm enğimakzawañgö dop mönö yañgö ösumnön kinda köuluköba malme. ²¹ Anutunön jöpaköm enğimakzawi, injini mönö yañgö urukalemñe böñ qeba kinme. Kembunini Jisös Kraistnön ak-kömükömu enğiba kunbuk asuhuba malmal köhöikñe anğota oyaenkyoaen malme. Injini mönö nalö mi kam kuñgumapköra kapañ köla mamböta malme.

²² Ambazip uruñini melenjbingö uruyahöt akzei, mi mönö ak kömumba urukalem ak enğiba malme. ²³ Tosatñan könöp bölamnön an taköbingö tandök akzei, i gebepuköra mönö wölañ öröba bohonñini jöhöm enğigetka letotpeak. Tosatñan sihim kömbönañini bölöñan galöm köl enğiiga qemasolokep maljei, i mönö ak kömumba jöpaköm enğiba malme. Mewö malmemö, nanñini malmalñinan bölibapuköra mönö keñgötñini möta malme. Qemasolokep yeñön sinğisöndokñi sinğisöndokñi aketka mianjön uruñini silenini

* 1:18: 2 Pitö 3.3

kokolak qeiga aukne töwiba maljei, yengöra mönö galömnini mem anguba malme. Kölköljinjin akepuköra mönö opo söröjini töwötjinambuk mi tok sisitjini memba kude misirime. Mewö.

Möpömöpösei keu

²⁴ Mönö Anutu möpöseimakin. Yanön injini tala et engubapuköra sel jöhöm engimangö köhöiza. Yanön ölop enguangita nanji je mesoholje al engii angota solanji keunji qahö kinda asakmararaji eka söngaiba köiraj köla malme. ²⁵ Anutu mohotjan Amötqeqe Tonini akza. Kembunini Jisös Kraistnöj nam köl nenjiiga Anutu möpöseim wanjiinga qetji aködamunjambuk aka ahöma. Yanön möpnanjö möpneyök könahiba kota Öngöngö-ñamnini kukösumjambuk akza aiga nalö kewöje toroqeba yuai pakpak ösum-mumuñan galöm köla nalö teteköji qahö Kambu ak nenjiba malma. Keu mi ölña.

Indelindel keu Kraistnöŋ keu tölapŋi Jongöŋ indelök. Jim-asa-asari

Jisösnöŋ gölme mosöta Suep mire öngöiga yambu 65 miangö dop teköiga aposol Jonöŋ Kimbi ki ohoyök. Nalö miangöŋ urumelen könagesö Jisös möt narigeri, i sesewerowero ketanji ak engiget. Jon mi gölme jölanŋi qetŋi Patmos miangöŋ al wanŋigetka kösö mire ewö tarök. Patmos maliga Anutunöŋ jenji melenŋiga yuai könaŋgep asuhumapkö imutŋi ehök.

Keu bohonŋi kewö: Jisösnöŋ Satan aka kerökurupŋi pakpak luhut ala memba et al engim teköma. Mewö aka mötnarip ambazip kötuatköm nenŋiiga Suep dölökŋi aka gölme dölökŋi miangöŋ anŋota teteköŋi qahö oyaenŋoyaen malbin. Sesewerowero uruŋe malgeri, yeŋön lömböt möta mökösoŋda Jisös möt nariba pöndaŋ böŋ qeba kinmegöra kuŋgum enŋimakza. Jisösnöŋ keuŋi keuŋi mewöŋi jim kutuba indeliga Jonöŋ möta Kimbi ki ohoyök. Mi urumelen ambazip urunini nanŋömangöra aka ohoyök. Söpsöp keu aka keu tölapŋi mi gwötpuk. Keu tosatŋi möt kutubingö möt bibihizin.

Buk kianŋö bahöŋi bohonŋi 11 mi kewö:

Keu mutukŋi *1.1-8*

Zioz kambu 7 yeŋö kimbiŋini *1.9-3.22*

Kimbi köpep supap 7:ŋan jöjöhöŋi *4.1-8.1*

Tömun qainŋi kun 7 uget *8.2-11.19*

Sekak namŋi aka jemnemba yahöt *12.1-13.18*

Jemelen imutimut könaŋi könaŋi *14.1-15.8*

Anutugöŋ irimesewöl qambi 7 mokoget *16.1-21*

Babilon siti, jemnemba, kezapqetok takapulakanŋi aka Satan yeŋö ayuayuhu *17.1-20.10*

Jimtekötekögö nalö ketanŋi *20.11-15*

Suep gölme dölökŋi aka Jerusalem dölökŋi *21.1-22.5*

Keu kötŋi teteköŋi *22.6-21*

¹ Anutunöŋ yuai könaŋgep zilaŋ asuhumawi, miangö könaŋi nup memeurupŋi nenŋöra kondel nenŋimapkö möta Jisös Kraistköra kondela kezapqetok keu jiba indelök. Indeliga Suep garata kun melaiiga welenqeqenŋi Jon nöŋgöŋ kaba jiiga möral.

² Jisös Kraistnöŋ Anutugöŋ Buŋa keu nanŋöba jim asariba kondel niŋgiiga Jon nöŋön yuai mi jeni melenŋiga uba ehali, mi pakpak miangö dop toroqeba nanŋöba jim asariba ohozal.

³ Kunŋan kezapqetok keu ki oyoŋmawi, yaŋön mönö simbawoŋ akza. Jisösgö kaka nalöŋan töriza. Miangöra kimbi

kiangörej keu ohoi ahözawi, ambazip mi kezap ala mötmei aka mi möt sölöngöba anğön kölmei, yeñön mewöyök simbawon akze. Mewö.

Jonöñ Eisia prowinsgö zioz kambu 7 yeñgö jölöñini alök.

⁴ *Jon nöñön Eisia prowinsgö zioz kambu 7 enğöra kewö ohozal:

Kunöñ mal köhöizawi, möpñanğö möpñeyök mala koröhi, aka kunbuk lilingömawi, yanñön mönö kalem möriam enğiiga luainöñ malme. Mewöñanök Anutugö uña bohonñi 7 yanğö jakömbuak dum wösöñje kinjei, yeñön mönö kalem möriam enğigetka luainöñ malme.

⁵ *Jisös Kraistnöñ Anutugö könanñi pöndañ nanğöba jim asariba mala mutukña kömupnöñök wahörök. Yanñön gölmegö kiñ kembu yeñgö Kembuñini akza. Yanñön mönö sepñan sanğonđa sinğisöndoknineyök pösat neñgiba jöpaköm neñgimakza. ⁶ *Yanñön nini nanñi bemtohoñje ala mem letot neñgiiga kiñ ewö akzin. Buña nup galömurupñi (prist) aka nanñi Iwi Anutuñanğö welenñi qemakzin. Neñön yanğö qetbuñanñi aka kukösumñi möpöseininga nalö teteköñi qahö aködamunñambuk ahöm öñgöma. Keu mi ölna.

⁷ *Eket, Kraistnöñ mönö kousu uruñje eta kama! Kamawi, nalö miangörej nini körekmakörek i jeninan uba ekin. Börö marömñi qetohogeri, yeñön mönö mewöyök i ekñje. Ambazip kambuñi kambuñi gölme dop tat anjini, neñön mönö i eka körekmakörek yanğöra aka jinğen kölamburereñ akin. Keu mi ölbölna, uruyahötni kun qahö.

⁸ *Kembu Anutu mal köhöizawañön kewö jiza, “Nöñön mutuhök mala (yuai pakpak miwikñaiba könanğep jiba qahöwahiga) qöndökña mal öñgömam. Mianğö dop nöñön kulem namñi mutukña A aka kulem namñi qöndökña Z akzal.” Nöñön kukösum pakpakö Tonñi möpñanğö möpñeyök mala kota maljal aka kunbuk lilingömam. Mewö.

Suep gölmegö azi ölnanğö tandökñi kewö ehal:

⁹ Jon nöñön enğö urumelen neñakñini akzal. Kraistpuk gekötahöbiga nanñi bemtohoñje al niñgiiga ambazipnöñ si-himbölö ak niñgigetka wahöjalij mörakzal. Mi embuk möta mökösonđa kapan köl köhöiba kinjal. Anutugöreñ Buña keu jim sehiba Jisösgö könanñi nanğöba jim asariba malalangöra

* 1:4: Eks 3.14; Ind 4.5 * 1:5: Ais 55.4; Sum 89.27 * 1:6: Eks 19.6; Ind 5.10

* 1:7: Dan 7.13; Mat 24.30; Mak 13.26; Luk 21.27; 1 Tes 4.17; Zek 12.10; Jon 19.34,

37 * 1:8: Ind 22.13; Eks 3.14

nömemba köwet jölanji qetji Patmos* miangören al niingiget malal. ¹⁰ Kembugö sonda kendon tatat nalö kunöj Uña Törönan nömeiga alburup umumñan qakne öngöiga andöneyök qet ketanji kun möral. Qet kourukñi mi tömun qainji kun (biugel) qetzawi, miangö tandöktandök ahöyök.

¹¹ Qet mianön kewö jiyök, “Öroyuai uba ekñani, miangö keunji mönö kimbi köpepnöj ohoman. Ohoba alnönga zioz kambu 7 yengören anma. Siti 7 miengö qetjini kewö: Efesus, Smörna, Pergamum, Taiataira, Sardis, Filadelfia aka Laodisia.”

¹² Keu mewö jiiga ötoñi mörali, “Mi danön?” jiba eka mötmangöra lilingöyal. Lilingöba kinda lambegö dum tatat goulnöj memenji 7 kingetka ehal. ¹³ *Lambegö dum tatat miengö sutñine azi kun ekiga kaisongolomñan gölme azigö tandök ahök. Malukuñi köröpñi köla öröiga köna susuñe eta turuyök. Opo jöhan mañgihlakñi goulñambuk mi örigit ewö töptöpñe embahöm anguba kinök.

¹⁴ Nöröp jupñan tuat lalamñi kousu köpköp (snow) ewö ahök. Lama jupñi sanongetka tuarizawi, mönö miangö dop ehal. Jekötñan könöp bölam ewö jem asariiga kinök. ¹⁵ Köna susuñan sösönihiba gohotñi ahök. Ain bras könöpnöj ala delasi ohogetka jeiga gögöriñ tohomakzawi, mönö miangö dop kölköl-bilikbilikñambuk ahöyök. Keu jii mörali, mi o ketanjan sianöj giliga ötoñi ketanji mörakzini, mönö miangö dop ahöyök. ¹⁶ Böröñi ölnan senjelau 7 memba kinök. Numbuñeyök bingö sou ketanji (bainat) jityahötñi likelike zuluk alalñan erök. Jemesoholñan wehön jeñi körek asarim tekömakzawangö dop asariiga ehal.

¹⁷ Nöñön i eka uruni duhui yangö könañe tala eta kömup tandök ahöyal. Mewö ahöbiga böröñi ölnan nöngö nöröpne ala kewö jiyök, “Mönö kengetki kude mötnöj! Nöñön mutuhök mala (yuai pakpak miwikñaiba könañep jiba qahöwahiga) qöndökña mala öngömam.

¹⁸ “Nöñön malmal Tonji akzal. Kömumba malmal mötnöj, nöñön mönö guliba wahöta malmal köhöikñi teteköñi qahö mal öngömam. Nöñön kömupkö kondotkondot Tonji galöm köla kömupkö unjem miri Tonji ongita kiñi moröñi memba maljal. ¹⁹ Miangöra yuai nalö kewöñe asuhuzawi aka könañepñe asuhumawi, nöñön miangö könañi kondelbi ekñan. Yuai

* **1:9:** Patmos mi köwet jölanji moröñi (Yurop aka Afrika) Sutñire Köwet miangören ahöza. Efesus mosöta Saut göröken 80 kilomita anman. Rom gawman yeñon kegwek-kahasililij ambazip keunji jim teköba közöla enguangetketka miangö kösö mirinöj malget. Ölöñ kölbingö osiget. Gölme mi qararankölkölña, kötñi sehisehijni. Jonöj yengö sutñine maliga sisa-kiñ Nerwagö nalöñe (yara 96-98) pösatketka erök. * **1:13:** Dan 7.13; 10.5, 14-15; Dan 7.9; 10.6, 15; Eze 1.24; 43.2, 17; Ais 44.6; 48.12; Ind 2.8; 22.13

ekñani, mi mönö papianöñ ohonöñga ahöma. ²⁰ Senjelau 7 böröni ölnje ahözei aka lambegö dum tatat goulnöñ memenji 7 ekzani, mienjö könañini tölapñi kewö: Senjelau 7 mi zioz kambu 7 mienjö garata galömninañjö söpsöp akze. Lambegö dum tatat goulnöñ memenji 7 mienjön mönö zioz kambu 7 mienjö söpsöp akze.” Mewö.

2

Efesus urumelenj könañesö yengö qambañ keu

¹ Jisösnöñ toroqeba jiyök, “Jon göñön mönö Efesus sitigö zioz kambu yengö pom garatanañjöra kimbi kewö ohoman,

“Kunöñ böröñi ölnjan senjelau 7 memba lambegö dum tatat goulnöñ memenji 7 mienjö sutñine anda kaba kinakzawi, yañön keu kewö jiza: ² Nöñön göhö ahakmemegahö könañi möt kutubi kewö ahöza: Göñön nöngöp ariba nupni köhöikñanök memba malakzan. Anjösirip kapañ köla möta mökösoñda malakzan. Ambazip gonjonji yembuk ala qahöpmahöp aka ölnja qepureiba közöl engimakzan, mi mötzal. Tosatñan melaimelai azi aposol qahö aka töndup qetñini mewö qerakzei, göñön i esapesapnöñ ala kewöt enjinöñga munen jijiñinañjö könañinan aukñe asuhuyök.

³ “Tosatñan nöngö qetnañjöra aka kahasililij ak gihigetka sihimbölö kapañ köla möta mökösoñda malnöñ. Ösumeret ölan qahö aka malnöñmö, yuai pakpak möt kösoñda kinda malnöñ, mi mötzal. ⁴ Mewö malnöñmö, urugahö keu kun kewö mötpi qahö dop kölja: Mutuhök urugi melenja önöñi qahö jöpaköm niñgiba malnöñmö, urugan mönö sörauiga nalö kewöñe amöriba maljan.

⁵ “Mutuhök urusösöñgai ketañi möta malnöñmö, mianjöreñök löwöriba eta eta amöriba et qeba maljan. Gi mönö nangi könagi mi mötmöriba möt kutuman. Mianjöra mönö urugi melenman. Mutuhök urumelenjö yuainji aknöñi, mönö mianjö dop kunbuk suariba akñan. Urugi siñgisöndok mianjöreñök qahö melenman ewö, nöñön mönö göhöreñ kaba lambegö dum tatatki qeköbiga urumelenj könañesö Efesus mianjöreñ kunbuk qahö ahöma. ⁶ Et guhuyökmö, göhöra kewö mötpi ölöwakza: Göñön Nikolait yengöreñ ahakmemenini tököba uru önön ahakzan. Nöñön mewöñanök mi tököba mianjöra uru önön ahakzal.

⁷ *“Engöreñök kunñan kezapñambuknöñ malja ewö, Uña Töröñan zioz kambuñi kambuñi neñjöra keu jimakzawi, yañön mönö mi kezap ala möt kutuma.

“Kunñan esapesap bölöñi pakpak ongita luhut almawi, nöñön mönö i wañgitpiga Anutugö oyaenköyaen nupnöñ

* 2:7: Jen 2.9; Ind 22.2; Eze 28.13; 31.8

(paradais) euyangören öngöba malmal köhöiknangö ip aumne tata kötni nemba malma.” Mewö.

Smörna urumelen könagesö yengören qamban keu

8 **“Smörna sitigö zioz kambu yengö pom garataninangöra mönö kimbi kewö ohoman,*

“Kömumba guliba mal köhöizawañön mutuhök mala (yuai pakpak miwikñaiba könangep jii qahöwahiga) qöndökña mal öngömawi, yañön keu kewö jiza: ⁹Göñön wahöjalin möta etqeqeñi akzani, mi mötzalmö, Anutugö jeñe qetbuñagan öngöngöñi aiga simbawon akzan. Tosatñan Juda ambazip qahö aka töndup qetñini mewö qerakzei, yañön mepaqepaik aka andö qem gihigetka angösirip mörakzani, mi mötzal. Yeñön ‘Köuluk miri ölni akzin,’ jiba aiakaninan Satan möpöseimakze.

10 *“Sihimbölö möta malmanmö, miangöra kengetki kude mötman. Mötnöñ, Bölöñangö Tonjan esapesapnöñ al engimangöra ambazip kuñgum enjiiga engörenök tosatñi engömemba kösö mire al engime. Angösirip ak engimei, iñini mi silim 10 möta malme. Malbeak me kömumbeak, mönö nömbuk pöndañ kingetka nöñön malmal köhöiknangö ila jalöñi engimam.*

11 **“Engörenök kunñan kezapñambuknöñ malja ewö, Uña Töröñan zioz kambuñi kambuñi neñgöra keu jimakzawi, yañön mönö mi kezap ala möt kutuma.*

“Kunñan esapesap bölöñi pakpak ongita luhut almawi, yangö silenñan kömuiga mohot akñapmö, kömup yahötni qahö kömumba geñmororöñ qahö miwikñaima.” Mewö.

Pergamum urumelen könagesö yengö qamban keu

12 *“Pergamum sitigö zioz kambu yengö pom garataninangöra mönö kimbi kewö ohoman,*

“Kunöñ bingö sou ketanji (bainat) jityahötni likelike zuluk alalñi memba maljawi, yañön keu kewö jiza: ¹³Göñön malmal tatatki denike ala maljani, mi mötzal. Satanöñ nanñak jakömbuak dum tatatñi ali ahözawi, gi mönö miangö kösutñe malakzan. Töndup nöñgö qetni memba nömbuk toroqeba qekötahöba kinakzan. Satangö malmal tatatñi Pergamum siti miangören ahöiga Antipas yañön nöñgö könananni nanñgöba jiba jembon onji nene (qariwe ilikñi nene) ewö kinökmö, i engö sutñine miangören qeget kömuyök. Göñön ni möt narim niñgimakzani, keu mi nalö miangören mewöyök qahö köyatiba qañ kölnöñ.

* 2:8: Ais 44.6; 48.12; Ind 1.17; 22.13 * 2:11: Ind 20.14; 21.8

14 **“Mewömö, urugahö keu moröñi kun kewö mötpi qahö dop kölja: Göhö könagesö sutñine tosatñan kezapqetok azi takapulakanñi qetñi Balam yanğö janjunbuk mala wuatangömakze. Kantri tosatñi yeñön nene memba tandö lopionğ yeñğö naluk kötin buña qeba könañine algetka ösumñinan walöñnöhi, Israel ambazipnöñ mi qahö nezema. Mutuk qahö negetmö, Balamnöñ azi qetñi Balak kewö kusum wangiyök, ‘Gi mönö Israel ambazip mi nemegöra tutuhum engiman.’ Mewö kusuba kuñgum engiba simba ewö utuba alöhi, yeñön mönö miangören qaköba amqeba neget aka serowilin lañ aket. Engörenök tosatñan Balangö mötmöt mi wuatangömakze.*

15 *“Mewöñanök göhö könagesö sutñine tosatñan Nikolait yengören mötmöt muneñi memba wuatangömakze. 16 Miangöra gi mönö urugi melenman. Mewö qahö akñan ewö, nöñön mönö zilañ göhöreñ kaba könagesöurupki mewöñi mi qetal engimam. Numbune bimgö sou ketanñi (bainat) ahözawi, miangön mönö yarö gil engimam.*

17 **“Engörenök kunñan kezapñambuknöñ malja ewö, Uña Töröñan zioz kambuñi kambuñi neñğöra keu jimakzawi, yanğön mönö mi kezap ala möt kutuma.*

“Kunñan esapesap bölöñi pakpak oñgita luhut almawi, nöñön mönö nene tölapñi qetñi mana aka köt tuatñi wangimam. Yahöt mi wangibiga köt tuatñi miangören qetñi dölokñi ohogetka ahömawi, mi nanñök oyoñda mötma. Tosatñan mi qahö mötme.” Mewö.

Taiataira urumelen könagesö yengö qambañ keu

18 *“Taiataira sitigö zioz kambu yengö pom garatanñanğöra mönö kimbi kewö ohoman:*

“Anutugö Nahöññanğö jekötñan könöp bölam ewö jem asariiga köna susuñan sösönihiba ain bras ewö kölkölbilikbilikñambuk akzawi, yanğön keu kewö jiza: 19 Nöñön göhö ahakmemegahö könañi möt kutubi kewö ahöza: Göñön Anutu jöpaköba möt narim wangiba nupñi memakzan aka añğösirip kapañ köla möta mökösoñda malakzan. Könakönahiñe yuai aka menöñi, mi mönö nalö kewöñe mem sehiba aka memakzan.

20 **“Mewö memakzanmö, urugahö keu kun kewö mötpi qahö dop kölja: Göñön ambi qetñi Jezebel yambuk urumohot aka i qahöpmañöp qepureim wangimakzan. Yanğön kezapqetok ambia qahö akzapmö, töndup nanñi qetñi mewö qerakza. Yanğön ambazip tutuhuba kewö kusum engimakza: Tandö lopionğö naluk kötin neneya buña qeba könañine algetka ösumñinan walöñnöhi, mi mönö ölop nembra malme.*

* **2:14:** Jan 22.5, 7; 31.16; Dut 23.4; Jan 25.1-3 * **2:17:** Eks 16.14-15; 16.33-34;

Jon 6.48-50; Ais 62.2; 65.15 * **2:20:** 1 Kiñ 16.31; 2 Kiñ 9.22, 30

Mewö kusum engiba nup meme alaurupni kunḡum engiiga löwöriba janjuḡ anda mi nemakze aka serowilin laḡ ahakze. ²¹ Nöḡön Jezebel uruḡi melenḡmapköra nalö waḡḡialmö, serowilinḡi mosöta uruḡi melenḡmapkö qahö möta töndup malja.

²² “Miaḡöra nöḡön ambi mi qeiga kawöl yöhöiga salöknöḡ ahöba sihimbölö mötma. Mewöyök yambuk sero yoḡgorö ahakzei, yeḡön ahakmemeḡini bölöḡi mi qahö mosöta uruḡini melenḡme ewö, nöḡön mönö i mohot engubiga sihimbölö kanḡamḡambuk mötme. ²³ *Yaḡö nahönböroraturuḡi i mönö engum köḡjöratpi kömume. Mewö akiga zioz könagesö körek enḡön enḡeka nöḡö köḡnani kewö möt yaköme: Nöḡön ambazip urumötmötḡini kewöta jit aka urusihimḡini körek möt kömumba ahakmemeḡinaḡö dop likeḡḡi melenḡda körek mohot mohot enḡö qakḡine öḡöma. Nöḡönök mönö miaḡö Toḡi akzal.

²⁴ “Yeḡöra mewö asuhumapmö, Taiataira enḡöreḡök tosatḡan Jezebelḡö mötmöt areḡi mi qahö wuatḡömakze. Mewö qahö aketka enḡöra mepaqepaik kewö aka jim enḡimakze, ‘Iḡini mötmöt öḡöḡöḡḡaḡö köḡaḡi qahö möt kutuba yaigep malje.’ Mepaqepaik mewö jiba ak enḡimakzemö, Satangö buḡa mötmötköra qet mewö qerakze. Nöḡön zioz kambu körek enḡöra kewö jibi mötme: Nöḡön lömböt kun qahö suariba albi enḡö qakḡine öḡöma. ²⁵ Iḡini Buḡa keu memba maljei, mönö miaḡöreḡ qekötahöba malme. Nöḡön kunbuk lilingömamaḡö dop mönö mia wuatḡöba malme.

²⁶ * “Kunḡan esapesap bölöḡi pakpak oḡgita luhut ala kömumawaḡö dop mönö töndup jitni tem köla ahakḡawi, nöḡön i kukösum waḡḡibiga kian kantriḡi kantriḡi galöm köḡ enḡiba malma. ²⁷ Iwinan kukösum niḡḡiiga mi buḡa qem aḡguba Kembu maljal. Mewöḡanök enḡöreḡök kunḡan luhut almawi, nöḡön i jakömbuak nupkö ilaḡi aka ain öroḡḡi waḡḡimam. Mi waḡḡibiga miaḡön gölmeḡi gölmeḡi ambazip galöm köḡ enḡiba köhöikḡanök mindiḡöm enḡiba malma. Gwaköm kimbut öroḡḡi qeba qesiḡei, yaḡön mönö miaḡö dop qeḡetal ambazip öroḡḡi pöwöwöm köhöikḡi miaḡön enḡuba köḡdenḡda mendeḡ enḡiiga qeḡelaḡlaḡ malme. ²⁸ Mewöyök söḡaḡö undi seḡgelau waḡḡimam.

²⁹ “Enḡöreḡök kunḡan kezapḡambuknöḡ malja ewö, Uḡa Töroḡan zioz kambuḡi kambuḡi neḡöra keu jimakzawi, yaḡön mönö mi kezap ala möt kutuma.” Mewö.

3

Sardis urumelenḡ könagesö yeḡö qambaḡ keu

* 2:23: Sum 7.9; Jer 17.10; Sum 62.12

* 2:26: Sum 2.8-9

¹ Jisösnöŋ toroqeba kewö jiyök, “Sardis sitigö zioz kambu yeŋgö pom garataŋinaŋgöra mönö kimbi kewö ohoman,

“Kunöŋ Anutugö uŋa bohonŋi 7 aka seŋgelau 7 mi böröŋe ahöi memba maljawi, yaŋön keu kewö jiza: Nöŋön göhö ahakmemegahö könaŋi möt kutubi kewö ahöza: Göŋön ambazip jeŋine guliba maljanaŋgö qetŋi bisimakzanmö, Anutugö jeŋe köhömuŋi akzan. ² Miangöra mönö imbigi möta wahötman. Göhö ahakmemegan nöŋgö Anutunaŋgö jeŋe aködamunŋambuk qahö akza. Göhö könaŋamgi kewöta mewö miwikŋaial. Göhö könagesö uruŋe urumelen ambazip tosatŋi kunbuk maljemö, yeŋön mewöyök kömum taköbingö akze. Miangöra göŋön mönö mem köhöim eŋgiba malman.

³ * “Anutugö yuai gihigetka buŋa qem aŋguba mötnöŋi, mi mönö urukönömge jöhöba mötmöriman. Buŋa mi mönö tem köla urugi meleŋman. Guliguli qahö malman ewö, nöŋön mönö yoŋgorö meme ewö ölöŋ kaba asuhumam. Kamamaŋgö aua nalöŋi qahö mötnöŋga keunan mönö zilaŋ qake öŋgöiga lömböt miwikŋaiman. ⁴ Mewömö, Sardis zioz kambu eŋgö sutŋine ambazip awamdökŋi eŋön opo söröŋini ölöŋŋanök galöm kölgetka töwötŋambuk qahö akze. Miangöra yeŋön ölöŋ maluku tuatŋan sileŋine löngöta nömbuk anda kaba malme. Yeŋön mönö mewö aka malmeaŋgö dop akze.

⁵ “Kunŋan esapesap bölöŋi pakpak oŋgita luhut almawi, yaŋgöra mönö maluku tuat lalamŋi waŋgigetka köla malma. Yaŋgö qetŋi malmal köhöikŋaŋgö buk papianöŋ ohoget ahözawi, nöŋön mi qahö kutumam. Iwinaŋgö jemesoholŋe aŋgoriga Suep garataurupŋan eketka qetŋi ölöŋ aukŋe jim miwikŋaim eŋgimam.

⁶ “Eŋgöreŋök kunŋan kezapŋambuknöŋ malja ewö, Uŋa Töröŋan zioz kambuŋi kambuŋi neŋgöra keu jimakzawi, yaŋön mönö mi kezap ala möt kutuma.” Mewö.

Filadelfia urumelen könagesö yeŋgö qambaŋ keu

⁷ * “Filadelfia sitigö zioz kambu yeŋgö pom garataŋinaŋgöra mönö kimbi kewö ohoman,

“Kunöŋ Azi Töröŋi aka Ölbölŋi aka kiŋ Deiwidkö ki moröŋi memba galöm köla maljawi, yaŋön keu kewö jiza: Yaŋön naŋgu metaliga kunŋan mi köla kiŋi memaŋgö osima. Yaŋön mi köla jöhöiga kunŋan mi musulmaŋgö osima. ⁸ Nöŋön göhö ahakmemegahö könaŋi ölöŋ möt kutuzal. Alani mötnöŋ, göhö ösumgan eretŋi akzawi, mi mötzal. Eretŋi akzapmö, göŋön mönö nöŋgö Buŋa keuni tem köla könani wuatanaŋgöba qetŋi

* **3:3:** Mat 24.43-44; Luk 12.39-40; Ind 16.15; Eks 32.32-33; Sum 69.28; Ind 20.12; Mat 10.32; Luk 12.8 * **3:7:** Ais 22.22; Job 12.14

qahö qañ köla malnöñ. Mianğöra nöñön nanju kun wösöge metalbiga kunñan mi kölmangö osima.

9 **“Mötnöñ, kambu kun yeñön ‘Köuluk mirininambuk akzin,’ jiba aiakanjanan Satan möpöseimakze. Juda ambazip qahö aka töndup qetñini mewö qeta munen jimakze. Nöñön ambazip mi kuñgum enğibiga göhö könañamgi möt asarime. Mi möt asariba kaba göhö könage sipköba eta jöpaköm gihi-makzali, mi aukñe jim miwikñaima. 10 Nöñön kapañ köla lömböt möta mökösoñda kin köhöimangö jiali, göñön nöñgö jimkutukutuni mi añgön köla wuatanağöba malnöñ. Mianğöra nöñön mewöyök gi kewö añgön köl gihimam: Wahöjalinj nalö tandökñi kun kaba kantriñi kantriñi dop köla gölmenöñ mal anjei, mi esapesapnöñ al enğima. Nalö mianñön kam kuñguiga nöñön gi wahöjalinj mianğörenök meköba bohongi jöhömam.*

11 *“Nöñön mönö zilañ lilingöba kamam. Kunñan utum gihiba ila jalö memene luhut al ghibapuköra mönö urugö inap ahöm gihizawi, mi mönö töp memba malnöñga qahö sohoba kahaimök ahöma. 12 *Kunñan esapesap bölöñi pakpak onğita luhut almawi, nöñön mönö i wañgita nöñgö Anutunangö möpömöpösei jike (tempöl) uruñe kuñgubiga tandöñi akña aka nalö kunöñ mi kunbuk qahö mosötma. Mianğören maliga silenje nani Anutunangö qetñi, Anutugö sitiñangö qetñi aka nani qetni dölökñi qet karöbut mi ohomam. Anutunan Jerusalem sitiñi dölökñi mi nanñi mire euyangören ali ahözawi, mianñön Suepnöhök eta gölmenöñ asuhuma.*

13 *“Enğörenök kunñan kezapñambuknöñ malja ewö, Uña Töröñan zioz kambuñi kambuñi neñgöra keu jimakzawi, yañön mönö mi kezap ala möt kutuma.” Mewö.*

Laodisia urumelenj könağesö yeñgö qambañ keu

14 **“Laodisia sitigö zioz kambu yeñgö pom garatanjanangöra mönö kimbi kewö ohoman,*

“Kun qetñi Amen. Yañön Anutugö keuñi pöndañ nanğöba Dangunu ölbölñi akza. Anutu bauköiga yuai pakpak mi-wikñaiyohotka galöm kölakzawi, yañön keu kewö jiza: 15 Nöñön göhö ahakmemegahö könañi möt kutubi kewö akza: Urugi qahö amöriza aka nöñgö könöp bölamnan uruge qahö jemakza. Ö urugan amöribawak me könöwibawak, mianñön mötpi dop kölbawakmö, jöñañe malnöñga qahö dop kölja.

16 *“Kun me kun dop kölbawakmö, urugan borom kun könöpkönöp aiga könöpkan qahö jezawi me uruamöt qahö akzani, mi qahö dop kölja. Könöp aka amöt sutñire uruyahötnöñ lañ maljanangöra mönö numbuneyök söwötköm gihibi geman. 17 Nangi silegi mem onğöba kewö jimakzan:*

* 3:9: Ais 49.23; 60.14; 43.4

* 3:12: Ind 21.2; Ais 62.2; 65.15

* 3:14: Qam

Nöñön azi kindinbirik qetbuñanambuk akzal. Sukinap mem sehiba dopne miwikñajal. Siyonşayonñi qahö mala yuai kungöra qahö osizal. Mewö jimakzanmö, könangangi ölni qahö möt kutuzani, mi kewö: Göñön mönö kumkanjam aka tapötkokorok (dabökokorok) malnöñga tosatñan wösömötmöt ak gihimakze. Wanapñi mala jegi gömöliiga tiktauk sile aukñe malakzan.

¹⁸ “Miangöra qambañ keu kewö gihizal: Göñön nöñgöreñök yuai karöbut ki söñgörüñi meman: Azi kindinbirik qetbuñagabuk akñangöra mönö goul könöpnöñ delasi ohoba gödöwörötni mendenget sösonihiba eta qahöwahöhi, mi mönö bohonñi meman. Sile aukñe malakzani, miangö gamuñi közambötmangöra mönö maluku tuatñi bohonñi memba löngötman. Jegi gömölizawi, miangöra mönö jepisik kelök mi bohonñi memba jegi törörök umangöra miriman.

¹⁹ *Nöñön wölböt alaurupni jöpaköm engimakzali, mi körek bölöñamñinañgöra tembula jim engiba mindinçindin ak engimakzal. Ölöwakñegöra mewö ahakzal. Miangöra gi mönö jaulalañ mosöta urugi melença singisöndoki andö qeba malman.

²⁰ “Mötnöñ, nöñön nañgunöñ qeba kinjal. Kunñan nöñgö keu imbini möta uru nañguni musulmawi, nöñön mönö yañgö miri uruñe öñgöba yambuk tatpi yañön nömbuk köisirik tata mohotñe nene nembit.

²¹ “Nöñön esapesap bölöñi pakpak oñgita luhut ala Iwinan noañgiri yañgö jakömbuak dumñe eta qöhöröñe tatzal. Miangö dop kunñan esapesap bölöñi pakpak oñgita luhut almawi, nöñön mönö i wañgitpiga nöñgö jakömbuak dumne eta qöhöröñe tatma.

²² “Engöreñök kunñan kezapñambuknöñ malja ewö, Uña Töröñan zioz kambuñi kambuñi neñgöra keu jimakzawi, yañön mönö mi kezap ala möt kutuma.” Mewö.

4

Jeni melenñiga kunöñ Suep jakenöñ tariga ehal.

¹ Miangö andöñe jemelen kunbuk asuhuiga Suep miri nañguni kun añañiiga ehal. Ekiga imbi mutuk tömun qainñi kun (biugel) ewö keu jiiga mörali, yañön mönö suariba kewö jiyök, “Gi mönö kewö kotnöñga andöñe yuai asuhumawi, mi kondel gihimam.”

² *Mewö jiiga miangöreñök Uña Töröñan nömeiga alburupñan qakne öñgöiga yuai kewö ehal: Suep miri uruñe jakömbuak dum ahöiga kunñan miangöreñ tarök. ³ Taröhi, yañgö jemesoholñangö asakñan mönö eröknam me jamönjin

* 3:19: Qam 3.12; Hib 12.6 * 4:2: Eze 1.26-28; 10.1

qetnji jaspö aka wale bönbönñi me köt qetnji karnilian miangö dop gilikbilikñambuk asariba ahöyök. Kiam nesilam kun kulem mundañi mumunene kamböñi me jamönñiñ qetnji emerald ewö miangön jakömbuak dum mi lökñanök liliköba töngönñi göröhiba ahöyök.

Dum bohonñi liliköba dum 24:ñan tatze.

⁴Jakömbuak dum tosatñi 24 miengön dum bohonñi mi liliköba tatketka miengö qakñine Anutugö jitñememeurup 24 tatket. Yeñön malukuñini tuat lalamñanök öluñ geiga nööröñine goul ila jalö kunduta tatket. ⁵*Dum bohonñi miangörenök wöl bilikbilik jesöngö asariiga giñgururuñ asuhiiga imbi wölpöndañgö ötöñ kourukñi ewö möral. Dum bohonñangö wösöñe tos kiwa asakñi 7 jeba asariba kinget. Kiwa 7 mi Anutugöreñ uña bohonñi 7 akze. ⁶*Mewöñanök jakömbuak jake wösöñe yuai gilikbilikñambuk köwet ewö ehal. Mi kirin jöhanñi jöhanñi kölköl-bilikbilikñinambuk melenña asarimakzei, mönö miangö dop asariyök. Jake bibiñe dum liliköba bem jembon 4 kinget. Andöñini aka wösöñini mi jeñinanök dop köliga kinget.

⁷Bem jembon mutukñan laion sömbup ewö ahök. Alañan bulmakau azinji ewö ahök. Alañiri kungö kaisongolomñi mi azi jesöngöröñangö tandök ahök. Alañini 4:ñan tukapkap bölbölgömakzawañgö tandökña ahök. ⁸Bem jembon 4 mohot mohot yeñgö ginginñini 6 pakpak ahöm engiyök. Silenini lökñanök aka ginginñini bapñe mewöyök jekötñinanök dop köl engiiga kinget. Kinda sunjem silim liñet kewö qörörök kölakze, “Kembu Anutu kukösum pakpakö Tonji göñön mönö töröñi aka töröñi aka töröñanök akzan.

Malmal Tonji göñön mönö möpñangö möpñeyök mala kota maljan aka kunbuk lilingöba asuhuba mal öngöman.”

⁹Bem jembon 4 miengön mönö mewö möpömöpöse liñet kölakze. Kunöñ jakömbuak dumnöñ kinda nalö teteköñi qahö mal öngöba malmawi, i aködamun qetbuña al wañgiba saiwap jimakze. ¹⁰Mewö ahakzeangö dop Anutugö jitñememe 24 miengön eta kun jakömbuak dumnöñ tatzawi, yangö jeñe simin köla sipkömakze. Kunöñ nalö teteköñi qahö mal öngöba malmawi, yangö waikñi memba möpöseim wañgimakze. Möpöseim wañgiba ila jalöñini qeköba jakömbuak dum wösöñe ala kewö jimakze,

¹¹“O Kembu Anutunini, göñön öroyuai pakpak miwikñaim enginöñ. Göhö jitsihitkan nam köl engiiga letota malmal miwikñaiba malje. Miangöra aködamun qetbuña mi al

* 4:5: Eks 19.16; Ind 8.5; 11.19; 16.18; Eze 1.13; Ind 1.4; Zek 4.2
1.5-10, 22; 10.14; Eze 1.18; 10.12; Ais 6.2-3

* 4:6: Eze

gihiba saiwap jim gihimakzin. Göñon mohotjan mönö möpöqöpösei pakpak anjon kölmanangö dop akzan.”
Mewö.

5

Lamanöy Anutugö böröneyök kimbi köpöp meyök.

¹ *Miangö andöñe kimbi köpöp kun ekiga jakömbuak dumnöñ tatzawangö böröñi öñe ahöyök. Kimbi miangö sinji mi likeplikep lökjanök kulemöhök ohoba köpeiba sapönöñ ala muñgem supap (sil)* 7:nöñ köla mekötahögetka ahöyök. ² Mewöyök Suep garata ösum-mumuñambuk kun ekiga köhöikjanök qeta buzup keu kewö qesiba jiyök, “Danön sarak sorokñi aka ölop kimbi köpöp kiangö muñgem supapñi (sil) munjurata kötulmawangö dop akza?”

³ Mewö jiyökmö, Suepnöñ, gölmenöñ aka kömupkö uñem miri miangöreñ körekmakörek engegetka kunjan kun mi mutula kulemñi ekñawangö dop qahö ahök. ⁴ Kunjan kun sarak sorokñi aka kimbi mi mutula kulemñi ekñawangö dop qahö miwikñaigeri, miangöra nöñon gwötpuk sahöt böliäl. ⁵ *Sahöt bölibiga Anutugö jitñememe yengöreñök kunjan nöngöra keu kewö jiyök, “Mönö kude sahötnöñ. Mötnöñ, Juda kambunöhök Deiwidkö gwölönarökñi kun ahuba laion sömbup ewö aka Bölönangö Tonji luhut ala malja. Yanön mönö ölop köhöiba kimbi köpöp kiangö muñgem supapñi (sil) 7 mi munjurata kötulma.”

⁶ *Mewö jiiga Lama moröñi ekiga jakömbuak dum bibiñe bem jembon 4 mienjö sutñine kiniga Anutugö jitñememe yeñon liliköm wangiget. Lama moröñi miangön mönö qeget kömuyöhangö tandökña kinök. Ilikñi 7 aka jekötñi 7. Anutunöñ unaurupñi bohonñi 7 melaim enjiiga gölmegö ambazip pakpak yengöreñ anda maljei, jekötñi 7 mi mönö yengö söpsöpñina akze. ⁷ Lama moröñi mi ekiga kaba kimbi köpöp supapñambuk mi jakömbuak dumnöñ tatzawangö böröñi öñeyök meyök. ⁸ *Mi meiga bem jembon 4 aka Anutugö jitñememe 24 mienjön mönö miangöreñök Lama moröñangö wösöñe sipköba eta simin kölget. Yeñon mohot mohot kulele aka goul qambi memba kinget. Ambazip sarakñan köulukögetka Anutugöreñ öngömakzawi, miangön mönö jiniñ ohohogö dop aiga wörönñi umköhöwakñambuknöñ öngöba pukpukömakza.

* **5:1:** Eze 2.9-10; Ais 29.11 * **5:1:** Kantri tosatñe kimbi ohoba esunöñ ala sapö memba kunjan mi kötulbapuköra aka muñgem supapnöñ kölakze. Kunjan muñgem supap (sil) mi lan munjurata kulemñi yongorö oyonbawak, mi mönö miwikñaigetka keubuk akña. Kimbi tonjanök mi galöm kölakza. Miri mi ki namñi ala misiin gemakzampö, kimbi mi muñgem supapnöñ jöhömakze. * **5:5:** Jen 49.9; Ais 11.1,

10 * **5:6:** Ais 53.7; Zek 4.10 * **5:8:** Sum 141.2

Wörön mewöñan mönö goul qambinini kokolak qeiga kinget.
 9 *Simin köla liñet dölökñi kewö köla jiget,

“Göñön qainñi kun akzan. Gi guhugetka kömumba sepki
 mokoba mianön ambazip bohonñi memba engömenöñ.
 Ambazip mi bem isikñinanğö dop, keu jöl jijiñinanğö dop,
 kambuñinanğö dop aka kantriñinanğö dop. Göñön
 mönö mienğoreñök tosatñi engömenöñga Anutugö
 buñaya akze.

Miangöra göñön mönö sarak sorokñi aka kimbi köpöp
 supapñambuk memba muñgem supapñi (sil)
 mutulmananğö dop akzan.

10 *Yeñön Anutugö buñaya aketka kusum engiba kunğum
 enğinöñga bemtohonğahö kiñ kembu kambu aka jike
 nup galömurupñi akze. Yeñön Anutuninanğö nupñi
 memba mala gölme dop ambazip galöm köl engiba mal
 öñgöme.”

11 *Liñet mewö köla jigetka möta toroqeba uba Suep garata
 janğöñini tausenni tausenni aka milyönñi milyönñi mi enğeka
 liñet kourukñini möral. Yeñön jakömbuak dum kösutñe kinda
 bem jembon 4 aka Anutugö jitrjememe 24 mi liliköm engiba
 liñet kölget. 12 Liñet köhöikñanök qeta kewö kölget,

“O Lama moröñi qeget kömuyöhi, yañön mönö sarak sorokñi
 aiga Anutunöñ ösum-mumu aka töhötmöriam wañgiiga
 dopñe akza.

Mötkutukutu öñgöñgöñi aka kukösum pakpak buña qeiga
 dopñe akza. Sarak sorokñi aiga ölop qetbuña pak-
 pak wañgiinga asakmararañ buña qeiga möpöseim
 wañgin.”

13 Mewö köla möpöseigetka liñet kambu kun kewö möral:
 Anutunöñ malmalbuk miwikñaim enğiyöhi, mienön mönö
 körekmakörek liñet kölgetka möral. Suepnöñ maljei, gölmenöñ
 maljei, kömupkö uñem mire aka köwet qakñe maljei, mienön
 mönö körek numbuñini mindiriba liñet kewö kölget,

“Jakömbuak dumñe tatzawi aka Lama moröñi neñön inñiri
 möpöseim etkizin.

Kötuet Toñi etkö qetbuñanñiri jim qarimakzin. Nalö dop asak-
 mararañ etkiinga kukösum Toñi mi teteköñi qahö mal
 öñgömahot.”

14 Mewö kölgetka bem jembon 4 mienön “Keu mi ölna,” jiget.
 Jigetka Anutugö jitrjememe yeñön eta dapköba simin köla
 Anutu waikñi memba möpöseim wañgiget. Mewö.

* 5:9: Sum 33.3; 98.1; Ais 42.10

* 5:10: Eks 19.6; Ind 1.6

* 5:11: Dan 7.10

6

Lama moröñan munğem supap mohot mohot munjuratza.

¹ Mewö möta yuai kewö asuhui ehal: Lama moröñan kimbi köpöp supapñambukö munğem supapñi (sil) 7 miengörenök mutukñi munjurata kötülök. Kötuliga bem jembon 4 yeğörenök kunñan keu kewö jiyök, “Mönö asuhuba kanöñ!” Keuñi mi wölpöndañ tandök ewö köhöikñanök qeri möral.

² *Mewö jiiga möta miangörenök hos tuatñi kun asuhuiga ehal. Hos miangö qakñe azi kun timbiñambuk tari tosatñan ila jalö wañgigetka nöröpñe kölök. Mi köla yarönöñ luhut ala malöhañön mönö kunbuk hos qakñe yarönöñ luhut almangöra anök. Mewö.

³ Lama moröñan munğem supap (sil) yahötñi munjurata kötuliga bem jembon yeğörenök yahötñi yañön keu kewö jii möral, “Mönö asuhuba kanöñ!” ⁴ *Mewö jiiga miangörenök hos kun silenji pisikñi somabölambuk asuhuiga ehal. Azi kun hos miangö qakñe taröhi, Anutunöñ mönö i yom karim gili luai qahöwakñapkö kukösumñi wañgiyök. Mi wañgiiga gölmenöñ aum aňğöhöba kömumegöra kuñguiga ambazip uru mem wahöt engimawañgö kukösumñi miwikñaiyök. Mi miwikñaiiga bingö sou keta bölökñi wañgigetka memba anök. Mewö.

⁵ *Lama moröñan munğem supap (sil) karöbutñi munjurata kötuliga bem jembon yeğörenök karöbutñi yañön keu kewö jii möral, “Mönö asuhuba kanöñ!” Mewö jiiga miangörenök hos injañi kun asuhuiga ehal. Azi kun hos miangö qakñe taröhi, yañön inapkö lömbötñi kewötpingö dop ipñi (skeil) mi böröñan memba tarök. ⁶ Mewö tariga bem jembon 4 yeğö sutñineyök kunöñ keu jiiga kourukñi tandök ewö kewö möral, “Silim mohotkö töwañi (Kina 5) miañön ölöp 1 kilogram wit flaua me 3 kilogram bali flaua mi bohonñi meman. Töndup nenegö oil ip aka wain kösö nup mi mönö kude mem bölime.” Mewö.

⁷ Lama moröñan munğem supap (sil) 4:ñi munjurata kötuliga bem jembon 4:ñan keu jiiga kourukñi kewö möral, “Mönö asuhuba kanöñ.” ⁸ *Mewö jiiga miangörenök hos kun silenji gohotgohot aka kaukaunambuha asuhuiga ehal. Hos miangö qakñe taröhañgö qetñi mi kömupkö kondotkondot Toñi. Yangö kösutñe kömupkö unem miri Toñan mewöñanök i wuatangöba kayök. Gölme mendengetka bahöñi 4 ahöiga miengörenök kungö ambazipñi mi galöm köl engibitkö kukösumñi mi Anutunöñ etkiyök. Kukösum mi etkiiga ösumñiran gölmeğö ambazip bahöñi mi kewö mem kömum engiyohot: Tosatñan sou

* 6:2: Zek 1.8; 6.3, 6 * 6:4: Zek 1.8; 6.2 * 6:5: Zek 6.2, 6 * 6:8: Eze 14.21

ketaŋan (bainat) auba kömuget. Tosatŋan bödinöŋ kömuget. Kawöl kanjamŋambuknöŋ tosatŋi enġömeiga kömuget aka tosatŋi mi gölmegö sömbup kalŋi mienön enġöhögetka kömuget. Mewö.

⁹Lama moröŋan muŋgem supap (sil) 5:ŋi munjurata kötuliga mianġöreŋök Anutugö ambazip tosatŋi enġugetka kömugeri, yeŋgö uŋaŋini enġehal. Yeŋön Anutugö Buŋa keuŋi aŋgö köla naŋgöba jim sehiba malgeraŋgöra enġugetka kömumba alta bapŋe ahöget. ¹⁰Euyaŋgöreŋ ahöba köhöikŋanök kewö qetket, “O Kambu kukösum Toŋi, göŋön diŋdiŋi aka ölbölŋi akzan. Mianġöra mönö nalö dawik mamböŋin teköiga mianġöreŋ gölmegö ambazipŋi kewöt enġiba keuŋini jim teköman? Neŋön gi welen qem gihiinga neŋugetka sepninaŋgö kitipŋi mi mönö wani nalönöŋ melenŋöŋga qakŋine öŋgöma?”

¹¹Mewö jigetmö, maluku tuatŋi köröpŋi mi mohot mohot yeŋgöra köl enġiget geiga Anutugö jimkutukutu kewö enġigetka mötket, “Iŋini mönö toroqeba nalö töröptökŋi mamböta malme. Mötnariŋ alaurupŋinan toroqeba urugö nup memba malgetka iŋini ewö mewöŋanök enġugetka kömume. Yeŋön kömugetka jaŋgö alali, mianön dopŋe aiga nalö mianġöreŋök mönö enġugeri, yeŋgö keuŋini jim tekömam.” Mewö.

¹²*Lama moröŋan muŋgem supap (sil) 6:ŋi munjurata kötulöhi, mi uba ehal. Mi munjurata kötulöhi, nalö mianġöreŋ kenöŋ tandökŋi sohosohoŋi gilök. Wehön jeŋan böuktutuk ala injaŋ köla wösöbirikö malukuŋi sanjöp ewö (meme juŋŋan memenaŋgö tandök) aiga söŋauyök. Köiŋ jeŋan melenġa lökŋanök pisihiba sep ewö ahök. ¹³*Mewö aiga seŋgelau suepnöŋ ahözei, mienön mönö gölmenöŋ etket. Newaŋ kötŋi gohoriba tatketka luhut köhöikŋan qeba utuköba mumburati-iga erakzei, mönö mianġö dop buratiba gölmenöŋ tata pilpil etket.

¹⁴*Mewö etketka suep ehakzini, mianön mönö ayapköyök. Kimbi köpep köpeigetka öröba anakzawaŋgö dop mönö wölakzak öröba anda ayapköyök. Mi ayapköiga kundunŋi pakpak aka köwetkö gölme jölanŋi jölanŋi mi mönö körek ahöahöŋineyök zilaŋ kök ala sömuniget.

¹⁵*Mewö asuhuiga gölmegö kiŋ kembuŋi kembuŋi, azi jembonŋi jembonŋi aka suaö galömnŋi galömnŋi mienön mönö ölöŋ köla asambötket. Ambazip kindiŋbirik qetbuŋaŋinambuk, ambazip kukösumŋinambuk mi mönö körek kök ala asambötket. Nannŋini nupŋini memakzei aka toŋinaŋgö welennŋini öne qemakzei, mi mönö körek

* **6:12:** Ind 11.13; 16.18; Ais 13.10; Joel 2.10, 31; 3.15; Mat 24.29; Mak 13.24-25; Luk 21.25 * **6:13:** Ais 34.4 * **6:14:** Ind 16.20 * **6:15:** Ais 2.19, 21

pakpak banjet, köt kinimñi aka kundunangö sem sianj jaruba miangöreñ asambötketka engehal. ¹⁶ *Miangöreñ asamböta kundunñi Tonji aka sem sia Tonji engohola kewö uletket, "Inini mönö kundunñi jim tekögetka buaköba kaba turum nenngiget. Jakömbuak dumñe tatzawanön jemesohol köl nenngibapuköra aka Lama moröñangö irimsesewölñan nenngubapuköra mönö jim tekögetka közamböt nenngiget." Mewö uletket. ¹⁷ *Yetkөн irimsesewölñiri aukñe kondeljahori, miangö nalöñi ketanjan mönö kam kunguba ahöza. Mi kunñan kun mesohol köla kinmawanö dop qahö. Mewö.

7

Israel ambazip 144.000 mi Anutunöñ asö köl engima.

¹ *Miangö andöñe Suep garata 4 engekiga gölmegö wangömnñi 4 miangöreñ kinget. Yenön gölmegö luhut Tonji bohonñi 4 mi jöhöm engiba angön kölget. Luhutnönñ gölme qakñe me köwet qakñe lañ gilbapuköra me ip kunñan qebapuköra mönö Tonji 4 mi böröñinan memba jöhöba kinget. ² Anutunöñ Suep garata 4 mi gölme aka köwet köndenñ enngibingö kukösumñi enngiiga gölme wangömnñine kinget. Mewö kingetka engehiga Suep garata kunöñ wehön kotkotñeyök asuhuba wahöri ehal. Yanön malmalgö Tonji Anutugö munñem asö öröpñi galöm köla kaba Suep garata 4 yenjöra köhöikñanök qerök.

³ Qeta keu kewö jiyök, "Inini mönö gölme me köwet mi zilañzilañ kude köndenñ etkime aka ip mi kude ayuhum enngime. Mi qahöpmö, mönö mambötketka mutuk zilañök Anutunöñangö munñem asöñi mi nupñi memakzei, yenjö mesoholñine mekötahöm enngibin. Mi mutuk kösöba mekötahöm enngiingun andöñe mi ölop köndenñda ayuhume." ⁴ Mewö jüiga Anutugö munñem asöñi mi Israel ambazip tosatñi yenjö mesoholñine kösöm enngiget. Kunöñ yenjö jañgöñini jüiga kewö möral: Israel ambazip kambu 12 pakpak miengöreñök mindiriba ambazip 144.000 mi kösöm enngiget.

⁵ Israel kambu mohot mohot miengöreñök 12.000 mewö mewö kösöm enngiget. Juda kambugö 12.000, Ruben kambugö 12.000, Gad kambugö 12.000, ⁶ Aser kambugö 12.000, Naftali kambugö 12.000, Manase kambugö 12.000, ⁷ Simeon kambugö 12.000, Liwai kambugö 12.000, Isakar kambugö 12.000, ⁸ Zebulun kambugö 12.000, Josef kambugö 12.000 aka Benjamin kambugö 12.000. Mewö mewö asö köla mekötahöm enngigetka mindiriba 144.000 ahök. Mewö.

Oyaenñkoyaenñ malmeanjö kambu ketanji ehal.

* 6:16: Hos 10.8; Luk 23.30
7.2; Zek 6.5; Eze 9.4, 6

* 6:17: Joel 2.11; Mal 3.2

* 7:1: Jer 49.36; Dan

⁹ Mianğö andöŋe kambu jitŋi buburatiŋi jaŋğöŋini kude oyoŋoyoŋğö dop mi ehal. Ambazip mi kambuŋinaŋğö dop, bem isikŋinaŋğö dop, kantriŋinaŋğö dop aka keu jöl jijiŋinaŋğö dop tokoba jakömbuak dum aka Lama moröŋi yetkö wösöŋire kinget. Mianğöreŋ kinda maluku köröŋŋi tuatŋi köteköm anğuget geiga böröŋinan nip sinŋaŋğö böröŋi memba kinget. ¹⁰ Mi memba kinda köhöikŋanök qeta kewö jiget, “Anutuninan jakömbuak dumŋe tatzawi aka Lama moröŋi yetkön mönö mem letot neŋgiyohotka oyaenŋkoyaen akzin.”

¹¹ Mewö qeta jigetka Suep garata pakpak yeŋön jakömbuak dum kösutŋe areŋnöŋ kinda Anutugö jitŋememe aka bem jembon 4 mi liliköm enğiget. Mewö kinda jakömbuak dum wösöŋe bamğöba eta simin köla Anutu waikŋi memba möpöseim waŋgiget. ¹² Anutu möpöseim waŋgiba kewö jiget, “Keu mi öŋŋa! Anutu gi mönö kötuet, asakmararaŋ aka mötkutukutu öŋğöŋğöŋaŋğö Toŋi akzan. Neŋön gi möpöseim gihiba qetbuŋagi jim qarimakzin. Anutunini, göŋön ösum-mumu aka kukösum Toŋi akzan. Neŋön nalö dop mewö jim köhöininga Toŋi mi teteköŋi qahö mal öŋğöba malman. Keu mi öŋŋa!”

¹³ Mewö möpöseiba jigetka Anutugö jitŋememe yeŋğöreŋök kunŋan kewö jiba qesim niŋgiyök, “Ambazip maluku köröŋŋi tuatŋi löŋğöta kinjei, mi daŋön? Mi mönö denikeyök kaba mewö tokoba kinje?”

¹⁴ *Qesim niŋgiiga kewö melen waŋgial, “O ketaŋamni, mi nöŋön qahö mötpiga nangok mötzan.” Mewö melen waŋgibiga jitŋememe yaŋön kewö jii möral, “Kahasililiŋ keta bölökŋaŋğö sutŋeyök kotkeri, yeŋön mönö mia akze. Lama moröŋaŋğö sepŋan mönö opo malukuŋini saŋgoŋni tuariiga malget. ¹⁵ Mewö malgeraŋğöra aka Anutugö jakömbuak dumŋi mesohol köla suŋgem silim möpömpösei jikeŋe (tempöl) mala Anutugö nupŋi memba malme. Mewö malgetka jakömbuak dumŋe tatzawaŋön mönö opo kounŋi möröreŋğöba köl turum enğiiga malme.

¹⁶ *Mewö malgetka nalö kunöŋ nenegö me ogö qahö kömume. Wehönöŋ me yuai könöŋŋambuk kunöŋ mönö qahö enğohotirima. ¹⁷ *Kewögöra oyaenŋkoyaen malme: Lama moröŋan jakömbuak jake bibiŋe tata galöm köl enğiba enğuaŋgiriga malmal köhöikŋaŋğö o töwatŋaŋğö jeŋe anakŋe. Anutu nanŋak jeŋineyök imbilŋini pakpak kutuiga teköma.” Mewö.

8

Lama moröŋan muŋgem supap 7:ŋi munjuratza.

* **7:14:** Dan 12.1; Mat 24.21; Mak 13.19 * **7:16:** Ais 49.10 * **7:17:** Sum 23.1; Eze 34.23; Sum 23.2; Ais 49.10; 25.8

¹ Lama morōñan munjem supap (sil) 7:ñi munjurata mutuliga Suep miri miangōreñ kouruk pakpak görōñ ala 30 minitkō dop nōñ qeba ahōyōk. ² Mewō asuhuiga Suep garata 7 Anutugō wōsōñe kinjei, mi engekiga kunōñ tōmun qainñi kun (biugel) 7 mi bōrōñine ala enjgiyōk.

³ *Mi engekiga Suep garata kun asuhaba jiniñ ohohogō goul qambiñi memba kaba alta kōsutñe kinōk. Ambazip sarakñi pakpak Anutugō kōlulukōgetka yañōn jiniñ altanōñ ohoiga wōrōññi umkōhōwakñambuk mi kōlulukñinambuk toroqeba pukpukōba mohotñe ōngōba Anutugōreñ anakza. Goul alta mi jakōmbuak dum wōsōñe kinjawi, yañōn mōnō miangō kōsutñe kiniga tosatñan jiniñ mi gwōtpuk ohomapkōra wañgiget. ⁴ Yañōn jiniñ mi ohoiga miangō kōwakñan mōnō Anutugō ambazip sarakñi yeñgō kōlulukñinambuk toroqeba Suep garata yañgō bōrōñeyōk wahōta Anutugō jemesoholñe ōngōget. ⁵ *Suep garata miañōn jiniñ qambi mi memba altanōhōk kōnōp jitiñ mei jeiga qambi miangōreñ uiga kokolak qeiga gōlmenōñ gili geyōk. Gili geiga miangōreñōk wōlpōndañgō gōjuñi gōjuñi asuhaba giñgururuñ qerōk. Wōlbilik ōsumñinambuk asuhugetka kenōñi kenōñi nalōñi nalōñi meyōk. Mewō.

Garata yeñōn tōmun qainñi kun uget.

⁶ Suep garata 7 tōmunñini qainñi kun (biugel) megeri, yeñōn mi ubingō jōjōrōget.

⁷ *Garata mutukñan wahōta tōmunñi qainñi kun uyōk. Mi uiga ais kōtñi aka kōnōp bōlamñi mi kie ewō asuhaba sepuk toroqetgetka kunōñ mi mokoiga mohotñe gōlmenōñ erōk. Mi-añōn kōnōpñambuk eta gōlme qeiga gōlmegō bahōñi karōbutñan jem tekōyōk. Arōkñañgō ipñi miengō bahōñi karōbutñan jem tekōget aka gwōzōzak sinñi görōkñi mi kōrek jeba jem tekōyōk.

⁸ Garata yahōtñi yañōn wahōta tōmunñi qainñi kun uyōk. Mi uiga kunōñ kundunñi ketanñi kōnōp jejenñi tandōk ewō (wolkeno) yuai mi giliga kōwetnōñ geyōk. Geba kōwet meiga kōwetkō bahōñi karōbut miengōreñōk kunñan melenđa sep ahōk. ⁹ Mewōñanōk Anutunōñ kōwetkō yuainñi pakpak mi-wikñaiiga maljei, miangō bahōñi karōbut miengōreñōk kun mi kōmuget aka wañge pakpak miengō bahōñi karōbut miengō likepñini kun mi jōmgōba ayuhuget.

¹⁰ *Garata karōbutñan wahōta tōmunñi qainñi kun (biugel) uyōk. Mi uiga sengelau ketanñi kiwa bōlamñi ewō tandōk jeba suepnōhōk tekōba erōk. Eta kōla gōlmegō o tōwatñi enğuba miengō bahōñi karōbut miengōreñōk kun aka o jeni pakpak

* **8:3:** Amos 9.1; Eks 30.1, 3 * **8:5:** Lew 16.12; Eze 10.2; Eks 19.16; Ind 11.19;

16.18 * **8:7:** Eks 9.23-25; Eze 38.22 * **8:10:** Ais 14.12

mi dop köl enjgiyök. ¹¹ *Sengelau mianğö qetnji mi röbek kömbukñambuk. Röbek mianğön eriga onji onji mienğö bahöni karöbutnji mi melenđa kömbukñinambuk aket. Kömbukñinambuk akeranğöra aka ambazip gwötpukñan mi nemba kömuget.

¹² *Garata 4:ñi yanğön wahöta tömunñi qainñi kun uyök. Mi uiga kunöñ wehön jeñi aka köiñ jeñi mietkö asakñiranğö bahöñiri karöbutnji mi etkuiga bahösapsap ömun köla söñauyohot. Mewöñanök sengelau bahöñini karöbutnji enjuiga melenđa söñauget. Mianğöra silim nalöñanğö bahöni karöbutñan söñauba pandaman ahök. Mewöñanök sunğemgö asakñan törtiiga bahöni karöbutñan söñauyök.

¹³ Mewö aiga eu uba tukapkap kun eka mötpiga könakembañe eu bölbölgöba suep bibiñe kutuba kaba köhöikñanök qeta kewö jiyök, “O ambazip gölmenöñ maljei, Suep garata karöbut yeñön mönö toroqeba tömunñini qainñi kun ubingö dop akze. Tömun karöbut mienğö kourukñini mötketka lömböt kanjamñambuk karöbut asuhumei, mianğöra mönö wöziköba yei! yei! yei! jiba sahötzal.” Mewö.

9

Suep garata 5:ñan tömunñi qainñi kun uyök.

¹ Suep garata 5:ñi yanğön tömunñi qainñi kun (biugel) uiga ekiga suepnöhök sengelau kun teköba gölmenöñ erök. Eriga kunöñ ömewöröme yenğö löm dutnji qahö mianğö ki moröni mi sengelau Tonji mi wanğiyök. ² *Mi wanğiiga öme löm dutnji qahö mianğö önunñi musuliga mianğöreñök köwak ketani söngok imarurubuk jeba köwak wahörakzawi, mönö mianğö dop kundumgöba wahöta wehön jeñi esuha luhut köwaknööhök dop köl teköyök. ³ *Köwak mianğö uruneyök gawötñi gawötñi mosöta gölmenöñ kanğotketka Anutunöñ kukösum enjgiyök. Kukösum mi skorpion (omeqaqa) yenğöreñ kukösum tandök ewö ahök.

⁴ *Mi enjiiga Anutunöñ kewö jim kutum enjgiyök, “Injini mönö gölmegö yuai görökñi gwözözak me ip mewöñi mi kude ayuhum enjimemö, ambazip mesoholñine Anutugö munğem asöñini qahö miyök mönö mem bölim enjgime.” Mewö jim kutum enjgiyök. ⁵ Anutunöñ gawöt mi kukösum enjiiga ambazip enğöhögetka köiñ 5:gö dop sihimbölä önöñi qahö mötket. Sihimbölä mi skorpion (omeqaqa) azi yöhöiga sihimñi mötzawi, mönö mianğö dop. Sihimbölä mewö mötketmö, Anutunöñ anğön köl enjiiga mem kömum enjgimeanğö kukösumñi mi gawöt yeñön qahö memba öne enğöhöget. ⁶ *Ambazip

* 8:11: Jer 9.15 * 8:12: Ais 13.10; Eze 32.7; Joel 2.10, 31; 3.15 * 9:2: Jen

19.28 * 9:3: Eks 10.12-15 * 9:4: Eze 9.4 * 9:6: Job 3.21; Jer 8.3

engöhögeri, yeñon nalö miangörej kömumbingö jarumemö, kömup mi qahö miwikñaiba kömumbingö osime. Kömumbingö möta qemjen qememö, kömupkö kondotkondot Tonjan mönö kungen anma.

7 *Gawöt engekiga mienjon hos yarögöra aködamunjinambuk jöjörömakzei, mönö miengö dop aket. Nöröpjine yuai mundañi goul ewö kölgeri, mi ila jalö tandöktandök ahök. Jemesoholjinan ambazip jemesohol tandök ewö aket. 8 *Gawöt miengö nöröp jupñini mi gwala ambi yeñgö nöröp jup ewö aket. Gawöt jitñinan laion sömbupkö jitñi ewö aket.

9 *Göwanğöwanjini (töptöp maluku) mi ain suman ewö tandök aket. Ginginñini qegetka ötöñ asuhui mörali, mi kewö: Hos sehisehñi yeñon yarögö karenji karenji öröba luhuba bimnön angetka giñgururuñ asuhumakzawi, mönö miangö dop.

10 Dagiñini mi skorpion (omeqaqa, anamumu) ewö jitñinambuk aket. Mienjon ambazip köiñ 5:gö dop sihimbölö mötmegöra engöhögeri, miangö kukösumñan mönö gawöt dagiñine ahöm engiyök. 11 Gawöt miengö kiñ kembuñini mi ömewöröme yeñgö löm dutñi qahö miangö garatañi qetñi Ayuayuhu Tonji. Mi Hibru keunöñ Abadon aka Grik keunöñ Apolion.

12 Yei wölzik mutukñi kanjamñambuk mi mewö teköyök. Mötket, miangö andöñe yei wölzik yahöt kanjamñirambuk mi mönö toroqeba könañgep asuhumahot. Mewö.

Suep garata 6:ñan tömunñi qainñi kun uyök.

13 *Suep garata 6:ñi yañon tömunñi qainñi kun (biugel) uyök. Mi uiga Anutugö wösöñe goul alta ahözawi, miangö ilikñi 4 miengöreñök kouruk kun kaiga möral. 14 Kouruk miangö Suep garata 6:ñi tömunñambuk yañgöra kewö jiyök, “Anutunöñ garata 4 jöhöba gwaröhöm engiba o töwatñi ketanji qetñi Yufreitis miangö qöhöröñe al engiyöhi, mi mönö pösat engiman.”

15 Anutunöñ garata 4 mi jöhöm engiba gwarönöñ tatmegö (yara) yambuñini, köiñini, silimñini aka auañini mi törörök arengöm engiiga tatket. Yeñon nalöñini mi kam kuñguiga miangöreñök ambazip kantriñi kantriñi miengö bahöñi karöbutñi mi engubingö jöjöröba tata nalöñinangöra mambötket. Miangöra Suep garata 6:ñan altanöhök kouruk möta miangöreñök anda garata 4 mi pösat engiyök. 16 Pösat engiiga yarö kambu keta bölökñi mi hosñinambuk asuhuba kaget. Nöñon jañgöñini mötpiga 200 milyön ahök.

17 Jemelen miangörej azi hos qakñe tata kageri, miengö kaisongolomñini ekiga kewö tandök aket: Göwanğöwanjini

(töptöpkö ain sumanņini) mi könöp jít pisikņi, asoņi in-
janĵkölĵambuk aka gohotņi salfa könöp köt ewö. Hos miengö
kaisoņgolomņini enĵekiga nöröpņini laion sömbupkö nöröp ewö
aketka numbuņineyök könöp, köwak aka köt könöpĵambuk
qetņi salfa mi eta kayök. ¹⁸⁻¹⁹ Hos yengö numbuņineyök
könöp, köwak aka könöp köt qetņi salfa eröhi, mianĵön mönö
ambazipņi ambazipņi enĵuyök. Hos miengö kukösumņini mi
numbuņine aka dagiņine ahöyök. Dagiņini mi mokoleņ ewö
aketka dagiņinaņgö kitipņi mi jitņinambuk. Kitipņi jitņinambuk
mienĵön mönö ambazip ihilek ewö enĵohotirimakze. Lömböt
kanjamņinambuk karöbut mi mönö gölmegö ambazip pakpak
yengö bahöņini karöbutņi mi enĵuiga kömuget.

²⁰ *Lömböt kanjamņinambuk mienĵön ambazip tosatņi qahö
enĵuget kömumba toroqeba malgeri, yeņön mönö töndup
uruņini qahö melenĵet. Nanņini böröņinan yuai memba
waikņini memba möpöseigeri, mianĵöra qahö möt bölim
anĵuget. Ömewöröme aka tandö lopioņ waikņini memba
möpöseim enĵienĵi mi qahö mosötket. Tandö lopioņ tosatņi
mi goul, silwö me brons ainöņ memeņa. Tosatņi mi köt
urasiba me ip söhöba memeņa. Mianĵöra tandö lopioņ mienĵön
yuai eka mötpingö me anda kabingö osimakze. Töndup am-
bazipnöņ mi qahö mosötket.

²¹ Mewöyök ambazip enĵuget kömukömu me sait qarösoņgo
amötqeqe mi qahö mosötket. Mi toroqeba aka memba serow-
ilin aket aka yuai laņ yoņgorö memba malĵet. Mianĵöra
uruņini qahö melenĵet. Mewö.

10

Suep garata aka kimbi köpöp moröņi

¹ Mianĵö andöņe Suep garata kukösumņi oņgotonĵotņi kun
ekiga Suepnöhök kousunöņ esuhum waņgiiga erök. Nöröpņi
kiam nesilamņan kutuba liliköba ahöyök. Jemesoholņi wehön
jeņi ewö aiga könäņi yahöt mi tandö könöp bölamņirambuk
yahöt ewö jeba kinök. ² Böröņan kimbi köpöp moröņi
meiga kötükötulņi ahök. Könäņi ölni köwetnöņ ala qaniņi
mi gölmenöņ ala kinök. ³ Mewö kinda laion sömbupnöņ
görörökömakzawi, qetņi mönö mianĵö dop köhöikņanök qerök.
Qeriga wölpöndaņgö ĵiņgururuņ 7 mienĵön mönö melenĵa
görörököba keuņini qetketka möral.

⁴ Wölpöndaņgö ĵiņgururuņ 7 mienĵön qeta keuņini jigetka
mörali, nöņön mi mönö mianĵöreņök papianöņ ohomamĵö
ahal. Kimbi ohomamĵö ahalmö, kouruk kun Suepnöhök
mötpiga keu kewö jiyök, “Wölpöndaņgö ĵiņgururuņ 7 keu jizei,
mi mönö nangohok ölöņ mötnöņ ahöma. Mi kude ohoman.”

* 9:20: Sum 115.4-7; 135.15-17; Dan 5.23

⁵ *Suep garata könəŋi köwet aka gölme qakŋire tiba kini ehali, yaŋön böröŋi ölni memba wahöta Suepnöŋ göröken alök. ⁶ Jöjöpaŋ keu jimamgöra böröŋi mewö ala mi jim köhöiba alök. Kunöŋ Suep, gölme, köwet aka yuai pakpak miengören ahözawi, mi miwikŋaiba kinda nalö dop teteköŋi qahö köhöiba mal öngömawi, mönö yaŋgö qetŋe jöjöpaŋ keu kewö jiyök, “Anutunöŋ mönö nalö kunbuk qahö qekörii öngöma. ⁷ Mewö qahöpmö, Suep garata 7:ŋan tömunŋi qainŋi kun (biugel) uiga kourukŋi mötmei, nalö miangörenök Anutugö keu areŋ asa-asambötŋan mönö ölnambuk akŋa. Kezapqetok ambazip Anutugö nupŋi memba mala kotketka yengöra Buŋa keuŋi ölöpŋi jim indel engiiga möta kota malgeri, Buŋa keu miangö dop mi mönö zilaŋ ölnambuk akŋa.”

⁸ Miangö andöŋe kouruk kun mutuk Suepnöhök mötpiga keu jiyöhi, mianön mönö dumŋe kunbuk keu jiiga kewö möral, “Suep garatanöŋ köwet aka gölme qakŋire tiba kinda kimbi köpöp meiga böröŋe kötökötulŋi ahözawi, mi mönö anda man.”

⁹ Mewö möta Suep garatagören anda kimbi köpöp moröŋi mi niŋgimapkö qesial. Qesibiga nöngöra kewö jiyök, “Mi mönö memba nenöŋ! Nenöŋga gölömge geba melenŋiga kömbuk usukömappmö, numbuge mi mönö moron onangö nahömŋi ewö asuhuma.”

¹⁰ Mewö jiiga kimbi köpöp moröŋi mi yaŋgö böröŋeyök memba neal. Nembiga numbune moron onangö nahömŋi ewö ahökmö, gwahötpi gölömne geiga melenŋiga kömbuk usuköyök. ¹¹ Mewö aiga nöŋön keu kewö möral, “Gi mönö dumŋe kunbuk Anutugö kezapqetok keuŋi keuŋi jim sehiba malman. Kantriŋi kantriŋi aka bem isikŋi isikŋi keu tandök jijiŋinangö dop maljei, mönö yaŋgö aka yaŋgö kiŋ kembuŋini miengö kezapqetok keuŋini mi qeljiŋe jiba malman.” Mewö.

11

Anutugö jitiŋememe yahötŋan keuŋi nanğöba jiyohot.

¹ *Mewö jii möta kinbiga Suep garata mianön dop alalgö öröpŋi jehot ewö mi niŋgiba kewö jim kutum niŋgiyök, “Gi mönö wahöta anda Anutugö jöwöwöl jike aka miangö jöwöwöl altaŋi mi dop öröp (rula mesa) mianön dopŋi ala oyoŋman. Mewöyök miangören öngöba Anutu möpöseiba köulukŋini alakzei, mönö mi kewöta jaŋgöŋini oyoŋman. ² Jöwöwöl jike dopŋi ala miangören sombem yaigepŋi mi mönö ongita mosötman. Mi kian kantri yaŋgöra al engigetka ahöiga yeŋön

* **10:5:** Eks 20.11; Dut 32.40; Dan 12.7; Amos 3.7-10; Eze 2.8-3.3 * **11:1:** Eze 40.3; Zek 2.1-2; Luk 21.24; Zek 4.3, 11-14; 1 Kiŋ 17.1; Eks 7.17-19; 1 Sml 4.8; Dan 7.7, 21; Ind 13.5-7; 17.8; Ais 1.9-10; Eze 37.10; 2 Kiŋ 2.11; Ind 6.12; 16.18

siti töröŋi mi köiŋ 42 miangö dop tiba anda kamakŋe. Miangöra sombem yaigepŋangö dopŋi mi kude oyoŋman. ³ Nöŋön jitŋememe yahötni melaim etkiba keuni naŋgöba jimahotkö kukösumŋi al etkibiga asuhumahot. Asuhuba wösöbirikö maluku sanjöp ewö mem aŋguba liliköba (gölme gwakötak ariba) silim 1260 nalö miangö dop kezapqetok keu nup memba malmahot.”

⁴ Oil ip yahöt aka lambe dum tatatŋi yahöt gölmegö Kembugö wösöŋe kinjatori, mi mönö melenđa eta asuhuba dangunu ewö kinda nöŋgö könani naŋgöba jiba malmahot. ⁵ Kunöŋ me kunŋan etkum mizit ak etkimangö mötza ewö, könöp bölamnöŋ mönö numbuŋireyök eta kerökurupŋiri eŋgohoiga ayuhumakŋe. Kunöŋ me kunŋan etkumangö mötza ewö, i mönö köna mewöŋanök miangön qeyohot kömuma.

⁶ Suepkö kousuŋi jöhöbitkö kukösumŋi mi yetköreŋ ahöiga kezapqetok keu jim sehimahori, nalö miangö dop kie qahö yöhöma. Kukösumŋiran o jeŋi pakpak mewöŋanök dop köliga miangön ölöp o pakpak meleŋ eŋgigetka sep akŋe. Mewöŋanök kukösumŋiran öŋgöŋgöŋi ahözawaŋgöra aka sihimŋiran jimawaŋgö dop ölöp jigetka lömböt kanjamŋinambuk könaŋi könaŋi asuhuba gölme mem böliba ambazip eŋgumakŋe.

⁷ Anutugö keuŋi naŋgöba jim teköyohotka ömewöröme yeŋgö löm dutŋi qahö miangöreŋök jemnemba kunöŋ wahöta bim gem etkiba luhut ala etkuiga kömumahot. ⁸ Kömuyohotka qamötŋiri siti qetbuŋaŋambukö köna namŋe etkömosötketka laŋ ahömahot. Siti miangö qetŋi tölapŋi mi Sodom aka Ijpt qerakze. Kambuŋiri Jisös i mönö mewöyök miangöreŋ maripomnöŋ qegetka kömuyök. ⁹ Qamötŋiran laŋ ahöyohotka ambazip pakpak mi etkehakŋe. Gölmenöŋ löm köl etkibingö jiba jöhöme. Mewö öne laŋ ahöyohotka ambazip kantriŋi kantriŋi, kambuŋi kambuŋi, bem isikŋi isikŋi keu tandökŋini nanŋik nanŋik jimakzei, yeŋön mönö qamötŋiri mi silim karöbut aka bahöŋi kun miangö dop uba etkehiget.

¹⁰ Kezapqetok azi yahöt yetkön ambazip gölme qakŋe maljei, mi uru kuŋgum eŋgiyohotka miangöra sihimbölö önöŋi qahö miwikŋaiba malget. Miangöra kömuyohotka qamötŋiri etkekŋei, miangöreŋ mönö köiraŋ ala sauren unduba nem söŋgaip pati ala nanŋini kalem könaŋi könaŋi aŋgubingö alget anda kama. ¹¹ Silimŋi karöbut aka bahöŋi kun mi teköiga Anutunöŋ söŋgöörö ösum söŋgööröŋire ui geiga guliba wahöta köŋgep kinohot. Wahöta kinohotka ambazipnöŋ etkeka töwöratiba jönömŋini unduiga sömbuŋini mötket. ¹² Köŋgep kinohotka Suepnöhök qet köhöikŋi kun kewö qeta jii mörohot, “Injiri mönö kewö korohot.” Mewö jii möta kousu uruŋe wahöta

Suepnöŋ öngöyohotka kerökurupŋiran öne etkeka nemböŋini teköiga kinget.

¹³ Könaŋiran gölme mosöta öngöyohotka nalö mianŋgöreŋök kenöŋ tandökŋi sohosohöŋi gila siti bahöŋi 10% (bahöŋi tenöhök mohot) mianŋgö dop kusuba köndenŋmöndenŋök. Köndenŋmöndenŋda ambazip 7.000 mianŋgö dop enŋui kömuget. Ambazip qahö kömuger, mienöŋ mi eka töwöratiba sömbuŋini möta Suepkö bemŋi Anutu i ösumŋanŋö möpöseim waŋgigetka qetbuŋaŋambuk ahök.

¹⁴ Wölkik yei qet kanjamŋambuk yahötŋan mewö teköyökmö, mötket, wölkik yei qet karöbutŋanŋö ölnan mönö zilaŋ asuhuba qakŋine öngöma. Mewö.

Suep garata 7:ŋan tömunŋi qainŋi kun uyök.

¹⁵ *Suep garata 7:ŋi yaŋön tömunŋi qainŋi kun (biugel) uyök. Mi uiga Suepnöŋ keu köhöikŋanök eraum mötketka kou-ruŋini mötpi kewö jiget, “Ayop, nanine Kembunini aka yaŋgö Amötqeŋe Tonŋ Kraist yetkön mönö gölme pakpak galöm köl enŋibitkö kukösumŋi mi lökŋanök buŋa qem anŋum teközahot. Yaŋön mönö nalöŋi nalöŋi galöm köl enŋiba malma, ee-aa-ee. Galömkölkölnan mönö nalö kunöŋ qahö teköma, ee-aa-ee.” ¹⁶ Mewö jiget mötpiga Anutugö jitŋememe 24 Anutugö jemesoholŋe jakömbuak dumŋine tatzei, yeŋön mönö eta bangöba sipköba Anutugö waikŋi memba möpöseim waŋgiget.

¹⁷ Möpöseim waŋgiba kewö jiget,

“O Kembu Anutu kukösum pakpakö Tonŋi, göhön mönö mala kotnöŋ aka mal köhöizan.

Göhön kukösumgi öngöngöŋi memba könahiba gölme pakpak galöm köl enŋiba kiŋ kembuŋina aka malman.

Mianŋgöra neŋön mönö möpöseiba saiwap jim gihizin.

¹⁸ Kian kantriŋi kantriŋi yeŋön irimŋini seholiiga kazik ak gihiba malgetmö, göhö kazik nalögan mönö dölkewöŋe kam kuŋguba ahöza.

Göhön nalö kewöŋe kömukömuŋi yeŋgö keuŋini kewöta jim teköm enŋiman aka nangi ambazipurupki töwaŋini enŋiman.

Kezapqetok ambazip aka ambazip sarakŋi tosatŋi göhö nupki memba malgeri aka öngöngöŋi eretŋi göhö qetki ayuhubapukö kenŋötŋini möta malgeri, i mönö töwaŋini enŋiman.

Mewöyök tosatŋan ambazip enŋuba kantri köndenŋda malgeri, mi mönö köndenŋ enŋiman.” Mewö möpöseiba jiget.

¹⁹ Mianŋgö andöŋe Suepnöŋ aŋaŋiiga Anutugö möpömöpösei jikegö (tempöl) naŋuŋan tali ekiga jike uruŋe Anutugöreŋ

* 11:15: Eks 15.18; Dan 2.44; 7.14, 27; Sum 2.5; 110.5; 115.13; Ind 8.5; 16.18, 21

jöhöjöhö areŋ bokis aködammunŋambuk mianŋön ehekŋi ahöyök.* Suepnöŋ aŋaŋiiga nalö mianŋöreŋök wölbilik aliga wölpöndaŋ aka giŋgururuŋ qeriga möral. Kourukŋi kourukŋi mi mötpiga kenöŋ memba kie römbum giliga ais kötŋi ketanŋi ketanŋi etket. Mewö.

12

Ambi aka sekak namŋi ilikŋambuk

1 Suepnöŋ aiwesök ketanŋi wewelipŋambuk kun kewö asuhuiga ehal: Ambi kun wehön jeŋan malukuŋi aiga köiŋnöŋ köna tamböŋi bapŋe asariiga seŋgelau 12 mi ila jalö ewö nöropŋe kölgetka gömgöm-bilikbilikŋinambuk tatket. ²Köröŋambuk (gölöŋambuk) mala morö memenŋgö nalöŋan dopdowiiga lömböriiga masö qeiga sihimbölö möta qet gigilahöyök.

³*Mianŋö andöŋe aiwesök kun Suepnöŋ kewö asuhuiga ehal: Sekak namŋi ilikŋambuk (dragon), mundaŋi pisikŋi pötpöt, nöropŋi 7 aka ilikŋi 10. Nöropŋi 7 mianŋöreŋ ila jalö 7 kölgetka tarök. ⁴*Sekak namŋi mianŋön dagiŋan suep qeapköba seŋgelau miengöreŋök bahöŋi karöbutŋi öröba gili gölmenöŋ etket. Etketka ambi nanŋi morö memangö ahöhi, yanŋö wösöŋe kinök. Mewö kinda moröŋi memawi, mi mönö mianŋöreŋök gwahötmangöra mörök.

⁵*Ambi mianŋön morö nahön azia meyök. Yanŋön kantriŋi kantriŋi pakpak ain öröpnöŋ galöm köl engiba malma. Ambinöŋ morö meyöhi, garatanöŋ mi mönö mianŋöreŋök zilaŋ memba anda Anutugö jakömbuak dum qöhöröŋe alök. ⁶Mianŋöreŋ aliga ambinöŋ nanŋök mosöta kök ala anök. Anutunöŋ ambi mi silim 1260 mianŋö dop gölme qararaŋkölkölŋe köyan köl waŋgiget malmapköra miri gölme kun möhamgöiga mianŋöreŋ kök ala anök.

⁷*Suep uruŋe yarö juliga kewö auget: Suep garata bohönŋi Maikel aka yanŋö garataaurupŋi yeŋön sekak namŋi tuarenjoŋ aka i aka yanŋö garataaurupŋi yembuk auget. ⁸Auba sekak namŋi aka yanŋö garataaurupŋi yeŋö ösumŋini qahö dop köliga luhut qahö al engiba miriŋini mosöta Suep uruŋe toroqeba malbingö osiget. ⁹*Osigetka sekak namŋi ilikŋambuk mi mönö közöla Suepnöhök wuatangöget. Sekak namŋi mianŋön möpŋangö möpŋeyök mokoleŋ aka Iw (Ewa) isim waŋgiyök. Qetŋi alaŋi Bölöŋangö Tonŋi aka Satan. Yanŋön

* **11:19:** Anutugöreŋ jöjöpaŋ keu 10 aka jimkutukutu tosatŋi mi köt ilaŋan ohoba bokis mianŋö uruŋe alget tari galöm kölakze. * **12:3:** Dan 7.7 * **12:4:** Dan 8.10 * **12:5:** Ais 66.7; Sum 2.9 * **12:7:** Dan 10.13, 21; 12.1; Jud 9 * **12:9:** Jen 3.1; Luk 10.18

kantrinji kantrinji pakpak kunḡum enḡiiga janjuḡ anda malgeri, mi aka yanḡo garataurupḡi mi mōnō yambuk Suepnōhōk kōzōla akōm enḡigetka ḡōlmenōḡ etket.

10 *Etketka Suepnōḡ qet ketanji kunōḡ kewō jii mōral, “Keu silenōḡ alal Toḡan sunḡem asak Anutuninanḡō wōsōḡe kinda urumelenḡ alaurupnini jim enḡiba malōhi, mi mōnō yakōriba akōm wanḡigetka yaigep eriga kōiranḡ kōljin. Nanine Anutuninan mōnō nalō kewōḡe ambazip amōt qem enḡiba kukōsumḡi qakḡe ḡalōm kōl enḡiiga bemtohonḡō ḡlḡan lōk asuhuza. Amōtqeqe Toḡanḡō ḡsum-mumuḡan lōk asuhum tekōza. 11 Yanḡōn mōtnarip alaurupnini keunōḡ al enḡiba malōkmō, Toḡi mi mōnō kewō luhut al wanḡiget: Lama morōḡanḡō sepḡan i amōt qem enḡiiga kōhōiba Buḡa keu ḡlbōlḡi nanḡōba jim sehiba malget. Mewō mala jōjōrōba silenḡini tōkōba bōḡ kinda bim qeba luhut alget.

12 “Mianḡōra Suep mire maljei, enḡōn mōnō kōrek pakpak sōḡgaiba kōiranḡ ala malme. Mewō malmemō, ḡōlmenōḡ aka kōwetnōḡ maljei, inḡini mōnō lōmbōt kanjamḡambuk bisimei, mianḡōra mōnō Yei! jiba sahōtzal. Bōlōḡanḡō Toḡan luhuba eta tiba enḡōreḡ kaba nup meme nalōḡi tōrōptōkḡi ahōi mōtzawanḡōra mōnō kazik ketanji ahakza.”

13 Sekak namḡi ilikḡambuk yakōriba akōm wanḡigetka ḡōlmenōḡ erōhi, mi ek asariba ambi morō nahōn meyōhi, mi kazik ak wanḡiba wuatāḡōyōk. 14 *Wuatāḡōyōkmō, ambinōḡ kōk aliga Anutunōḡ tukapkap ketanḡōḡō ḡinginnḡi yahōt wanḡiiga mianḡōn bōlbōlḡōba ḡsumḡan anōk. Anutunōḡ ḡōlme qararanḡkōlkōlḡe yanḡōra miri ḡōlme kun mōhamḡōyōhi, mōnō mianḡōreḡ anōk. Mianḡōreḡ anda asambōta maliga (yara) yambu 3 aka bahōḡi kun mi kōyan kōl wanḡigetka mokolenḡnōḡ i qahō miwikḡaiba qelanjima. 15 Ambinōḡ bōlbōlḡōba aniga mokolenḡō irimḡi tekōiga numbuḡeyōk ambigō andōḡe o ḡwaulu suaiiga o tōwatḡi ahōk. O mianḡōn ambi mi yōhōsanḡa memba jōhōm wanḡimapkōra mōta mewō sōwōtkōba loḡnōk.

16 Mewō loḡnōkmō, ḡōlmenōḡ ambi mi baukōm wanḡiba tiḡgiriga lōm ahōk. Sekak namḡan numbuḡeyōk o suaiiga o tōwatḡi ahōhi, mianḡōn mōnō lōm mianḡōreḡ geba jōpkōba qahōwahōk. 17 Mewō asuhuiga sekak namḡanḡōḡō irimḡi mōnō ambi mianḡōra aka sehōliiga mosōta ambi mianḡō ḡwōlōnarōkurupḡi tosatḡi qetala yarō ḡil enḡimamḡōra anōk. ḡwōlōnarōkurupḡi mienḡōn Anutugō jōjōpaḡ keu tem kōla Jisōḡō Buḡa keu tōp nanḡōba jim sehimakzei, mōnō yembuk karim aubingō anōk. 18 Aubingō anda kōwet sakḡe anḡota kinōk. Mewō.

* 12:10: Job 1.9-11; Zek 3.1 * 12:14: Dan 7.25; 12.7

13

Jemnemba köwetnöhök korök.

1 *Miangö andöje jemnemba kun ilikni 10 aka nöropni 7 mi köwetnöhök koriga ehal. Ilikni 10 miangörej ila jalö 10 kölgetka tatket aiga nöropni mohot mohot miangörej qet mepaqepaikninambuk ohogetka ahöyök.

2 Jemnemba mi ekiga kewö ahök: Kaisongolomni mi lepad taigögö tandök ewö ahök. Köna böröñangö sölöpnj mi beö sömbupkö sölöp ewö ahök. Numbuñi mi laion sömbupkö numbuñi ewö tandök. Sekak namñan mönö ösumñi, jakömbuak dumñi aka ambazip galöm köl engimapkö kukösumñi öngöñgöñi mi jemnemba wañgiyök. 3 Wañgiiga nöropni kun mi uzi köhöikni kunöñ mei kömumawañgö dop ahökmö, uziñan misiriiga löpötñanök tarök. Gölmegö ambazip körek pakpak yeñön auruba jemnemba mi andöje wuatangöba anget. 4 Wuatangöba anda sekak namñangö waikni memba möpöseiba malget. Kukösum mewöñi mi jemnemba wañgiyöhañgöra i aka jemnembagö waikni mewöñanök memba möpöseiba kewö jiget, "Dañön jemnembagö dop akawak? Dañön i tuarenjon ak wañgiba yambuk aumamgö köhöibawak?"

5 *Mewö jigetka Satanöñ jemnembagö numbuñi sölölohöiga köhöiba jakbak-örañbörañ qakne mepaqepaik keuñi lanlan jiba malök. Anutunöñ Satan qahö angön köliga ilitmamgö kukösumñi mi köiñ 42 miangö dop ahöm wañgimapköra jim teköyök. 6 Mi jim teköiga numbuñan añañiiga Anutu ilita malök. Anutugö qetñi, Suep miriñi aka Suep uruñe maljei, mi pakpak mönö mepaqepaik ak engiba malök. 7 *Mewö maliga Satanöñ ambazip sarakni tuarenjon ak engimamgö kukösumñi wañgiiga yembuk bim auba luhut al engiyök. Luhut al engiiga Satanöñ ambazip isikni pakpak kambuñinañgö dop, keu tandökñinañgö dop aka kantriñinañgö dop mi mönö jemnembagö böröñe al engiyök.

8 *Ambazip körekmakörek gölmenöñ maljei, yeñön mönö jemnembagö waikni memba möpöseiba malme. Anutugö ambazip solanñi qetñini Suep mire papianöñ ohoget ahözawi, yeñönök mönö jemnemba mi qahö möpöseime. Möpñangö möpñe Anutunöñ Suep gölme miwikñaim etkiyöhi, nalö miangörejök könahiba qetñini mi malmal köhöikñangö papia miangörej ohoba mala kotket. Malmal papia mi Lama moröñi qeget kömuyöhi, mönö yangö buñanñi ahöiga galöm kölakza.

* 13:1: Dan 7.3; Ind 17.3, 7-12; Dan 7.4-6

* 13:5: Dan 7.8, 25; 11.36

* 13:7:

9 “Kunjan kezapņambukņoņ malja ewö, yaņon mönö keu ki kezap ala möt kutuma! 10 *Kun kösö mire anmawaņgö dop akzawi, yaņon mönö mianğöreņ anma. Kun bimgö sou ketaņan ugetka kömumawaņgö dop akzawi, yaņon mönö mewö kömuma.* Mianğöra ambazip sarakņi, eņon mönö kapaņ köla lömböt memba mökösoņda pöndaņ möt nariba malme.” Mewö.

Jemnemba kun gölme uruņeyök korök.

11 Kunbuk ekiga jemnemba kun gölme uruņeyök korök. Mi ilikņi yahöt Lama moröņaņgö ilikņi ewöya aka keuņi mi sekak namņi ilikņambukņoņ jiyöhi, mönö mewöņaņök jiba malök. 12 Yaņon kota alaņi mutukņaņgö jitņememeņi aka kukösumņi pakpak memba mianon yuai pakpak alaņaņgö jeņe ahök. Mewö aka gölme ambazip kuņguba sölölohöm eņgiiga auruba alaņi mutukņaņgö waikņi memba möpöseiget. Jemnemba mutukņi mi uzi köhöikņan mei kömumamğö ahökmö, misiriiga löpötņaņök tarök.

13 Jemnemba yahötņi yaņon aņgöletot ketaņi tandökņi könaņi könaņi meyök. Kun meyöhi, mi könöp bölamņöņ suepnöhök eta gölmenöņ kaba jeiga ambazipņöņ mi jeņinan eket. 14 Anutunöņ Satan qahö aņgön köliga kukösum waņgiiga jemnemba mutukņaņgö jitņememeņi aka yaņgö jeņe aņgöletot könaņi könaņi memba malök. Mianon mönö gölmegö ambazip tilipköm eņgiiga jaņjuņ aka sohoget. Sohogetka kewö kuņguba jim kutum eņgiyök, “Inini mönö jemnemba mutukņaņgö imutņi söhöba kuņguget kiniga göda qem waņgiba malme. Jemnemba mutukņi mi bimgö sou ketaņan (bainat) qegetka uzi mei kömumamğö dop ahökmö, töndup guliba maljawi, mönö yaņgö imutņi kuņgume.”

15 Mewö aketka Satanöņ kukösum jemnemba könaņeņņi waņgiiga tandö lopioņ mi mem gulim waņgiiga könahiba söņgöro-ösum alök. Mewöyök jemnemba mutukņaņgö imutņi mem letoriga azi keu jiba ambazip kuņgum eņgiiga kewö asuhuyök: Denike yeņon tandö lopioņ mianğö waikņi qahö memba möpöseigeri, i mönö körek eņgugetka kömuget. 16 Jemnemba könaņeņņan ambazip körek pakpak kewö kuņgum eņgiba jiyök, “Inini mönö jemnemba mutukņaņgö muņgem supapņi mi jemesoholņine me böroņini ölņe mekötahöme.” Mewö jiiga nanņini nupņini memakzei aka toņinaņgö welenņini öne qemakzei, ambazip pomņi aka wanapņi, ketaņi aka moröņi yeņon mönö körekmakörek muņgem supapņi mi memba silenine mekötahöba kösoget.

* **13:10:** Jer 15.2; 43.11 * **13:10:** Tosatņan keu mi kewö melenje: Kunöņ bimgö sou ketaņi (bainat) mianon tosatņi eņgiiga kömumei, tosatņan mönö nanņi mi sou mewöņaņ ugetka kömuma.

17 Denike yeñon jemnembagö qetji me qetjanğö jañğöni silenine qahö memba malgeri, yeñon mönö nene yuai stuanön me maketnön söngörönji memingö aka albingö osiget.

18 Keu ki möt asaribingö mötkutukutuñi kewö: Kunjan mötkutukutuñambuk maljawi, yañon mönö jemnembagö jañğöni oyoñma. Jañğöni mi gölme azigö jañğöni akza. Supap jañğöni mi 666. Mewö.

14

Lama moröñi aka könagesöurupñi 144.000.

1 *Miañğö andöñe uba Lama moröñan Zaion kundunje kini ehal. Yambuk könagesöurupñi jañğöñini 144.000 mi mo-hotñe kingetka Lama moröñanğö qetji aka yañğö iwiñanğö qetji mi körek yeñğö mesoholñine ohohoña ahöi engehal.

2 Miañğöreñök mötpiga Suepnöhök kouruk kun o ketanjanğö sia qetji ewö asuhuyök. Mi wölpöndañ giñgururuj ketanjanök qetzawañğö kourukñi miañğö tandök ewö ahök. Kourukñi mi gita kulele gwötpuk qegetka kourukñi asuhumakzawañğö dop möral.

3 Anutunön ambazip 144.000 mi gölmenöhök söngörönjini memba engömeyöhi, yeñon mönö Anutugö jakömbuak dum wösöñe kañgota bem jembon 4 aka jitñe meme bohonñi 24 miengö jemesoholñine kinda liñet dölökñi kölget. Körek yeñon nanñini liñetñini mi kölgetka yaigep yeñon mi kusum anğuba mötpingö osiget. 4 Yeñon ambazip qainñi kun aka mala kotket. Qahö tölohoba sarakñi malbingöra nanñini galöm köl anğuba ambi yembuk töwöt qahö miwikñaiba malget. Lama moröñan denike denike anakzawi, yeñon mönö i wuatangöba miañğöreñ anakze. Anutunön i ambazip sutñineyök bohonñini memba meköba engömeiga Anutu aka Lama moröñi yetkö yambunñiri dölökñi akze. 5 *Yeñğö jitñineyök muney keu kun qahö miwikñaigetka keunñini qahö sarakñi mala kotket. Mewö.

Suep garata karöbut yeñon keunñi jiba bölbölgöget.

6 Miañğö andöñe Suep garata kun ekiga suep kutuba könakemba bölbölgöyök. Yañon Ölöwak Buña koñkoñ* memba kaba gölme ambazip yeñğöra jim asarimamğöra kayök. Ambazip mi kambuninañğö dop, bem isikñinañğö dop, keu tandökñi jijiñinañğö dop aka kantriñinañğö dop gölme dop köla tat anjei, mönö körek yeñğöra jim sehimamğöra kayök.

7 Kaba köhöikñanök silata kewö qerök, "Anutunön ambazip

* 14:1: Eze 9.4; Ind 7.3

* 14:5: Sef 3.13

* 14:6: Kambu bem

koñkoñ Toñanğöreñ Buña keu tömbunñi mi koñkoñ. Mi möpñanğö möpñeyök könahiba teteköñi qahö ahöm öñğöma.

kewöta jim teköm engimawangö nalöjan mönö töriba dop-dowiza. Miangöra injini mönö Anutugö jitni ongitpinbuköra kenngötjini möta möpöseiba qetbuñani mem sehime! Kunöñ suep, gölme, köwet aka o jeni miwikñaim engiyöhi, mönö yangö waikñi memba möpöseiba malme.”

⁸ *Mewö qeriga yangö könaje Suep garata alani kun mutkñi wuatangöba kaba kewö qerök, “Babilon siti ketani mi meleni geiga ahöza. Babilon ambi qetbuñanambuk mianön mönö serowilin aka mianön kantri pakpak mem tölohom engiiga dop köl engiyök. Yanön wain o ewö nemegöra engiiga uruñini sohoiga kahalalom aka malget. Mewö aka malöhanngöra Anutugö irimni seholiiga kazik aka jiiga siti qetbuñanambuk mi mönö köndengetka meleni gei ahöza.” Mewö.

⁹ Mewö qeriga yangö könaje Suep garata karöbutni kun etkuatangöba bölbölgöba kaba köhöikñanök silata kewö qerök, “Kunñan jemnemba aka yangö imutñangö waikñi memba möpöseiba muñgem supañi angön köla mesoholje me böröje mekötahöba kösöza ewö, ¹⁰ *yanön mönö mewöñanök Anutugö irimesewölñi mi wain o köhöikñi ewö nemba mötma. Anutunöñ wain o mi o töhöñnambuk qahö mindiriba wain köhöikñi töhöñök irimesewölñangö qambinöñ mokoitatzawi, yanön mönö mi nema. Mi memba Suep garata töröñi aka Lama moröñi yengö wösöñine kiniga salfa kötkö könöp bölamñan koasikpuk ohoiga sihimbölö önöñi qahö möta malma.

¹¹ *Mianön engohoiga sihimbölö önöñi qahö möta malmei, miangö köwakñan mönö nalö dop teteköñi qahö wahöta öngömakña. Ambazip jemnemba aka yangö imutñangö waikñi memba möpöseimakzei, yanön mönö suñgem asak senjom möta malme. Kunñan muñgem supañi angön köla silenje kösözawi, yanön mönö silenjan unduiga qemjen qeba luhut memangö osiba malma.”

¹² Miangöra ambazip sarakñi Anutugö jöjöpañ keuñi tem köla wuatangömakzei, enön mönö kapañ köla lömböt memba mökösoñda Jisös pöndañ möt nariba malme.

¹³ Miangö andöje Suepnöhök keu kun mötpiga kewö jiyök, “Gi mönö kimbi kewö ohoman: Ambazip Kembubuk qekötahöba kinda nalö kewöñeyök könahiba kömumei, yanön mönö oyaenkyoayan akñe. Uña Töröñan keu kitipñi mi meköba ‘Keu mi ölña,’ jiza. Yanön nup köhöikñi memba qemjemmamjen möta kaba malget teköiga nupñinangö ölñi asuhuiga Suep Tonñan kösohotñini möri dop köli miangöra sösoñgai engii tata luhut memba öñsöñ malme.” Mewö.

* 14:8: Ais 21.9; Jer 51.8; Ind 18.2 * 14:10: Ais 51.17; Jen 19.24; Eze 38.22

* 14:11: Ais 34.10

Gölmegö nene möriam ölni memegö nalöni

14 *Mewö jiiga uba kousu tuatni ekiga miangö qakne kun kaisongolomni gölme azigö tandök ewö mianön tarök. Ila jalö goulnöy memenji mi nöropne tariga börönan sou kapenkapengöni jitjambuk mi memba tarök. 15 *Mi ekiga Suep garata kunjan möpömöpösei jikenöhök (tempöl) aukne kangota kousu qakne tatzawi, yangöra keu kewö jiba köhöikjanök qerök, “Gölmenöy möriam ölni lök öliiga ölni memegö nalönan mönö akza. Miangöra gönyön mönö sougi kapenkapengöni memba nupnöy anda mianön gölmegö möriam ölni mi kutum tokoman.” 16 Kousu qakne tatzawi, yangöra mewö qeriga souji kapenkapengönan gölmenöy gila nupkö möriam ölni kutum tokoyök.

17 Mi tokoiga Suep garata kunjan Suepkö möpömöpösei jikenöhök (tempöl) aukne kangorök. Yanön mewöyök sou kapenkapengöni jitjambuk kun memba kangorök.

18 Kangoriga Suep garata karöbutni kun Suepkö altagö könöp galömni aka alta mi mosöta kangorök. Kangota köhöikjanök qeta Suep garata sou kapenkapengöni jitjambuk memba kinöhi, yangöra kewö jiyök, “Gönyön sougi kapenkapengöni jitjambuk mi mönö memba nupnöy anda mianön gölmegö wain kangenj kangenji mi yandiman. Kangenji miengö kötni lök ölim yaköba tatzel!”

19 Mewö jiiga souji kapenkapengöni gölmenöy gila gölmegö wain kösö ölni mi köteköm tokoba Anutugö wain jout ketani miangörenj tözöhölmegöra gilök. Wain jout mi Anutugö irimsesewöljanjö kaisöpsöpni akza.† 20 *Wain bagem ölni mi siti yaigepne könanöy tiba tözöhölgetka sepnan wain jout ketanjö numbuje kota qöl tandök ewö lanlan wahöta kota o töwatni ahök. Sep miangö diginni mi wan mita aka bahöni kun ahök. Hosnöy miangörenj tiba aniga numbuje koriga hos injutjanjö kösönan samuruyök. Diginni mewö aiga köröpni 300 kilomita miangö dop ahök. Mewö.

15*Suep garata 7 aka lömböt kanjamjinambuk 7.*

1 Miangö andöje suep uruje uba angöletot ketani kun asuhuiga eka kewö welipköyal: Suep garata 7 mi lömböt kanjamjinambuk (plague) 7 memba kinget. Ambazip sinjisöndokjanjöra Anutugö irimni sehöliiga jim teköba likepni meleni lömböt kanjamjinambuk qaknine öngöi

* 14:14: Dan 7.13 * 14:15: Joel 3.13 † 14:19: Anutugö irimsesewöljni mi wain jout ketanje tözöhölgetka urunan amöriba teköma. Indelindel 19.15 mi ekjan.

* 14:20: Ais 63.3; Seru 1.15; Ind 19.15

mötketka uruñan amöriiga keuñinan kömuma. Mianğöra qetñini lömböt kanjamñinambuk qöndökñi 7 qetket.

² Mi eka yuai gilikbilikñambuk köwet ewö ekiga könöp bölamñambuk lolonqalon ahöyök. Mianğö qöhöröñe Anutugö ambazip kingetka engehal. Yeñon luhut ala jemnembagö keuñi qahö tem köla imutñangö waikñi qahö memba qetñangö jañgöñi silenine qahö angön köla malget. Anutunöñ i mohot mohot kulele enğiiga memba kinget. ³ *Mianğören kinda Anutugö nup meme azi Mosesgö liñetñi aka Lama moröñangö sauren liñetñi mi kewö kölget,

“O Kembu Anutu kukösum pakpakö Tonj, göñon angöletot ketanj ketanj welipñinambuk ahakzan.

Göñon kantriñi kantriñi mi kiñ kembu ak enğinöñga ahakmemegahö könañi mi diñdiñi aka öl töhöññi akza. Mianğöra Anutu qainñi kun aka maljan.

⁴ O Kembu, göhöreñ ahakmemegi diñdiñi mi mönö aukñe asuhuiga mötzin.

Mianğöra kantri pakpak yeñon kaba göhö waiki memba möpöseim gihimakze.

Göñon nangok töröñi akzan. Mianğöra aka dañon mönö göhöra kenğötñi qahö mötpawak? Körek neñon göhö qetbuñagi mem sehiba möpöseimakzin.”

⁵ *Mianğö andöñe uba yuai kewö ehal: Suepkö möpömöpösei jikegö (tempöl) nanğujan taliga mianğö uruñe Anutu dangunñangö opo seri jikenan kini ehal.

⁶ Möpömöpösei jike mianğöreñök Suep garata 7 lömböt kanjamñinambuk 7 memba kingeri, yeñon mönö eta aukñe kaget. Malukuñini tuat lalamñi bilikbilikñinambuk löngötketka opo jöhan mañgihilakñi goulñambuk mi örigit ewö töptöpñe embahöm anguba kinget.

⁷ Yeñon kagetka bem jembon 4 mienğöreñök kunñan goul qambi 7 enğiiga Anutugö irimsesewölñan qambi mi numbuñe kotket. Anutu irimñi seholizawi, yañon mala kota malja aka teteköñi qahö mal öngöma. ⁸ *Qambi mi enğiiga Anutunöñ asakmararañi aka kukösumñi kondeliga mianğöra köwak pukpuköba möpömöpösei jike (tempöl) kokolak qeiga kunñan kun Suep jike mi öngö-öñgögö dop qahö ahök. Suep garata 7 yeñon mutuk qambiñini mokogetka lömböt kanjamñinambuk 7 asuhaba ölñinambuk akñei, mianğö andöñe ölop kunbuk öñgöme. Mewö.

16

Qambi 7 mokogetka Anutugö irimsesewölñan asuhuyök.

* 15:3: Eks 15.1; Jer 10.7; Sum 86.9 * 15:5: Eks 38.21 * 15:8: Eks 40.34; 1 Kin 8.10-11; 2 Hist 5.13-14; Ais 6.4

¹ Möpömöpösei jike (tempöl) uruñeyök qet ketanji kun asuhuiga Suep garata 7 miengöra keu kewö jim kutuiga möral, “Injini anda Anutugö irimsesewölñan qambi 7 numbunje kota ahözawi, miengö ölnji mönö gölmenöñ mokome.”

² *Suep garata mutukñan mosöta anda qambinangö ölnji mi gölmenöñ mokoyök. Mokoiga uzi imbilonñambuk si-himbölöñini tandökñi sohosohonji mi qeçetal ambazip yengö silenine asuhuget. Ambazip jemnembagö muñgem supapñi silenine memba imutñangö waikñi memba möpöseigeri, mönö yengö silenine asuhuget.

³ Yahötñi yanön mosöta anda qambinangö ölnji mi köwetnöñ mokoyök. Mokoiga köwetnöñ melenða sep ahök. Mönö azi qeçenangö sepñi ewö ahök. Mewö aiga köwet uruñe yuai pakpak malmalñinambuk maljei, mi mönö lökñanök kömum teköget.

⁴ *Suep garata karöbutñan qambinangö ölnji mi o töwatñi aka o jeñi miangöreñ mokoiga melenða sep aka dop kölöc.
⁵ Mewö aiga Suep garata o galöm kölakzawañön keu kewö jiiga möral, “O Anutu töröñi, göñön keu kewöta kewö jim tekönöñga lömböt ki asuhuzawañöra diñdiñi akzan. Mönö solanñi mala kota maljan. ⁶ Yeuñön göhöreñ ambazip sarakñi aka kezapçetok ambazip ençuba malgetka sepñinan mokoyök. Göñön i ençugerañgö likepñi melenða sep ençinöñga negeri, mi mönö dopñe alnöñga çakñine öñgöyök. Miangöra Anutu göñön mönö diñdiñanök akzan.”

⁷ O galöm kölakzawañön mewö jiiga keu kun altanöhök kewö kaiga möral, “Keu mi ölnja! O Kembu Anutu kukösum pakpakö Toñi, göñön mönö ambazip keuñini kewöta diñdiñanök jim teköm ençimakzan.”

⁸ Suep garata 4:ñan qambinangö ölnji mi wehön jeñe mokoiga mianön wehön ösum wañgiiga könöpñi kötökñi aka ambazip könöp ewö ençohoyök. ⁹ Wehön jeñi könöpñambuk mianön ençohoiga silenini dölatiyök. Anutunöñ lömböt kanjamñinambuk miengö Toñi aka ali çakñine öñgöyöhi, ambazipnöñ mi möta miangöra Anutugö qetñi jim qesuahöm wañgiba malget. Mewö malgetmö, Anutu möpöseiba qetbuñanji mem sehimegöra mönö uruñini qahö melençetmö, toroçeba yañgiseñ aka malget.

¹⁰ Suep garata 5:ñan qambinangö ölnji mi jemnembagö jakömbuak dumnöñ mokoyök. Miangöreñ mokoiga söñaup ketanjan jemnembagö ömetohonji (kingdom) mi dop köla pandaman meyök. Pandaman meiga ambazip irimñini seholiiga nesilamñini jitñinan yöhötiçetka tinçirök. ¹¹ Ambazipnöñ

sihimbölö aka uzi nömböjinaŋgö sihimbölöŋi ketanji möta mianŋgöra Suepkö Anutuŋi mi jim qesuahöm wanŋiba malget. Mewö malgetmö, ahakmemenini bölöŋi aka memba malgeri, mi qahö kewöta mosöta uruŋini qahö melenŋet.

12 *Suep garata 6:ŋan qambiŋaŋgö ölnji mi o töwatŋi ketanji qetŋi Yufreitis mianŋgöreŋ mokoiga jöpköyök. Wehön kotkotŋeyök kiŋ kembuŋi kembuŋi kabingö möta jöjöröba malgeri, yeŋön o jöpköiga kunbuk qahö paŋpaŋgögetmö, kutuba kamegö könaŋi mönö asuhuyök. 13 Mianŋgöreŋök uba öme bölöŋi karöbut tandökŋini kaŋ ewö mi enŋekiga sekak namŋi ilikŋambuk, jemnemba aka kezapqetok azi takapulaŋi yeŋgö numbuŋineyök kota etket. 14 Ömewöröme mienŋön eta anda aŋgöletotŋi könaŋi könaŋi ahakze. Mewö aka gölmenji gölmenji pakpak liliköba kiŋ kembuŋini enŋeka Anutu tuarenjoŋ akŋegöra uruŋini kuŋguba kewö jiget, “Mönö mindirim aŋguba Anutu kukösum pakpakö Toŋaŋgö nalö ketane mohtŋe bim aubin.”

15 *Jisösnöŋ jiza, “Kezap alget! Nöŋön mönö yoŋgorö meme ewö ölöŋ kamam! Kunŋan uruguliguli malmawi, yaŋön mönö simbawoŋ akza. Sile aukŋe laŋ anda kaiga gamuŋi ekepuköra sile esuŋi galöm kölakzawaŋön mönö oyaenŋkoyaen akŋa.”

16 *Öme welenŋeŋe yeŋön kiŋ kembuŋi kembuŋi mi kuŋguba enŋuaŋgita gölme köröŋi qetŋi Hibru keunöŋ Armagedon jizei, mianŋgöreŋ qezaköba al enŋigetka enŋeŋal. Mewö.

17 Suep garata 7:ŋan qambiŋaŋgö ölnji mi könakemba mokoyök. Mokoiga möpömpösei jike (tempöl) uruŋaŋgö jakömbuak dumŋeyök qet ketanji kun asuŋuba keu kewö kaiga jiyök, “Mi lök mokogetka asuŋum teköza.” 18 *Mewö jiiga mianŋgöreŋök wölbilik aiga wölpöndaŋ giliga giŋgururuŋ qeta ahöiga kenöŋ jitiŋi buburatiŋi kun meyök. Iw (Ewa) Adam yetkö nalönöhök könahiba gölmenöŋ mala korini, nalö mianŋgöreŋ kenöŋ mewöŋi kun qahö gilgilŋa. Mianŋgö dop tandökŋi sohosohöŋi giliga bölöŋi kötökŋi ahök.

19 *Mewö asuŋuiga siti ketanji Babilon mianŋön jula bahöŋi karöbut aket aiga kantriŋi kantriŋi pakpak miengö sitiŋini mi mewöŋanök ayuŋuba melenŋi geget. Anutunöŋ siti qetbuŋaŋambuk Babilon miengö bölöŋamŋini qahö ölum qeiga likeŋamŋini melenŋ enŋiyök. Anutunöŋ urukönöp aka irimsewölŋan qambi kokolak qeba taröhi, mi mönö mokom enŋiiga qakŋine öŋgöiga wain o ewö neget. 20 Köwetnöŋ gölme jölanni pakpak ahögeri, mi mönö kök ala sömuniget aiga

* 16:12: Ais 11.15 * 16:15: Mat 24.43-44; Luk 12.39-40; Ind 3.3 * 16:16: 2

Kiŋ 23.29; Zek 12.11 * 16:18: Ind 8.5; 11.13, 19 * 16:19: Ais 51.17; Ind 6.14

kunduŋi kunduŋi kingeri, mi mönö mewöŋanök ayapköba qahöwaket.

21 *Mewö asuhuiga ais kötni ketanji lömbötŋini 45 kilogram mienjön suepnöhök ambazip qakŋine erök. Lömböt kanjamŋambuk mi tandökŋi sohosohöŋi ahök. Kie kötni tandökŋi mewö mianjön eta enŋuiga ambazipnöŋ mianŋöra Anutu jim qesuahöm waŋgiget. Mewö.

17

Ambi kunöŋ jemnembagö qakŋe tari ehal.

1 *Suep garata 7 qambi 7 mi memba kingeri, yeŋgöreŋök kunŋan kaba nöŋgöra keu kewö jiyök, “Gi mönö kanöŋga köna ketanŋö ambi qetbuŋanambuk o gwötpuk mienŋö qakŋine tatzawi, mi kondel gihimam. Anutunöŋ keuŋi kewöta likepŋi meleni qakŋe öŋgöi malja. 2 *Gölmegö kiŋ kembuŋi kembuŋi yeŋön yambuk serowilin aka malget. Könagesöŋinan gölmenöŋ maljei, yeŋön mönö mewöyök ambi mianŋö serowilinŋanŋöra aka uruŋini wahöta sohoiga kahalalom aket. Wain o nempa enololon ahakzei, mönö mianŋö dop könahiba sero yonŋorö aka mala kahapmahap aket.”

3 Mewö jiiga Uŋa Töröŋan nömeiga alburuŋan qakne öŋgöiga Suep garata mianjön noanŋiriga gölme qararaŋkölkölŋe anŋoral. Mianŋöreŋ anŋota ambi kun jemnemba pisikŋi pötpöt yanŋö qakŋe tariga ehal. Jemnembagö silene mepaqepaik qetŋi qetŋi ohogetka kokolak qeiga nöropŋi 7 aka ilikŋi 10 mewö kinök.

4 *Ambi mianjön opo söro pisikŋi gugakgugak aka pisikŋi pötpöt mi löŋgöta tarök. Aködamunŋi goul, jamönjin ölninambuk aka kösatorom tosatŋi mianjön meŋölöm anŋuiga tandökŋan kölköl-bilikbilikŋambuk ahök. Böröŋe goul qambi memba taröhi, mi serowilin aka malöhanŋö anŋöjörakŋi imbilonlonambuknöŋ kokolak qeŋeŋa. 5 Ambi mianŋö mesoholŋe qetŋi tölapŋi mi kewö ohogetka ahöyök, “Babilon qetbuŋanambuk, gölmegö köna ketanji ambazip aka anŋöjörak imbilonlonambukö namŋini.” 6 Qetŋi mewö ahöiga Anutugö ambazip sarakŋan Jisösgö könanji nanŋöba böŋ qeba kinda jiba malgeri, mi enŋuba sepŋini nempa mianŋöra kahalalom ahöi ehal. Mi eka aurum tililingöyal.

7 Aurum tililingöbiga Suep garatanöŋ nöŋgöra keu kewö jii möral, “Gi mönö denöwögöra aurum tililingözan? Nöŋön ölop ambi kianŋö könanji tölapŋi indel gihimam aka jemnemba nöropŋi 7 aka ilikŋi 10 ambi mi bisimakzawi, yanŋö könanji

* 16:21: Eks 9.23; Ind 11.19 * 17:1: Jer 51.13 * 17:2: Ais 23.17; Jer 51.7;

Ind 13.1 * 17:4: Jer 51.7

tölapñi mi mewöyök indela jim miwikñaim gihimam. ⁸ *Jegi meleşniga jemnemba ekzani, yañön mutuk malökmö, nalö kewöñe jebuk qahö malja. Yañön ömewöröme yeñgö löm dutñi qahö miangörenök guliba wahötmappmö, Kraistnöñ kaköm wañgiiga könöp sianöñ gema. Anutunöñ Suep gölme miwikñaim etkiyöhi, nalö miangörenök könahiba gölmenöñ mala kotketka qetñini malmal köhöikñangö papianöñ qahö ohoget ahözawi, ambazip mienöñ mönö jemnemba eka aurume. Jebuk malökmö, nalö kewöñe jebuk qahö malja aka könangep kunbuk guliba asuhumawi, miangöra mönö aurume.

⁹ “Nini keu ki möt asaribingöra möringa mötkutukutuñan kewö ahöza: Nöröpñi 7 mi ambinöñ kundunji 7:gö qakñine tatzawi, mönö kundunji miengö söpsöpñi akze. ¹⁰ Nöröpñi 7 mi mewöyök kiñ kembu 7 miengö kaisöpsöpñi akze. Yeñgörenök 5 lök kömumba etketka 6:ñi yañön mala ambazip galöm köl enjimakza. Qöndökñan bian asuhumawañgö dop akza. Yañön asuhumawi, miangören mönö nalö töröpñi kukösum qakñe kinmawañgö dop akña. ¹¹ Jemnemba malökmö, nalö kewöñe qahö toroqeba maljawi, yañön 7 yeñgörenök kun akza. Yañön kunbuk guliba nanñak kiñ kembu jañgöñi 8 akña. Mewö akñapmö, Kraistnöñ könden wañgiiga ayuhuba könöp sianöñ gema.

¹² *“Ilikñi 10 engekzani, mi mönö kiñ kembu 10 miengö kaisöpsöpñini akze. Yeñön qahö könahiba ambazip galöm köl enjimakzemö, Anutunöñ könangep kukösum engiiga kiñ kembu ewö akñe. Mewö aka jemnembabuk aua mohotkö dop ambazip galöm köl enjiba malme. ¹³ Kiñ kembu 10 mienöñ mötmöt areñ mohot miyök wuatangöba jemnemba nañgöba kukösumñini i wañgigetka malma. ¹⁴ Ösumñini mewö mindiriba Lama moröñi tuarenjoñ aka bim aumemö, Lama moröñan mönö luhut al engiiga etme. Yañön kiñ yeñgö Kiñini aka azi kembu yeñgö Kembuñini akza. Yañön neñgohola möwölöhöm neñgiiga yambuk pöndañ kinda malbini, neñön mönö mohotñe luhut al enjiba köiranj kölbin.”

¹⁵ Suep garatanöñ keuñi mewö jiba toroqeba kewö jii möral, “Köna ketanañgö ambi ketanan o gwötpuk miengö qakñine tariga engek teközani, o mi ambazip kantrinji kantrinji miengö kaisöpsöpñini akze. Yeñön kambuñini aka bem isikñinañgö dop likeplikep tat angetka silenini könañi könañi aiga keuñini tandökñi murutñi murutñi jimakze. ¹⁶ Jegi meleşniga ilikñi 10 engekzani, yeñön mönö ösumñini jemnembabuk mindiriba köna ketanañgö ambi mi kazik ak wañgigetka kewö asuhuma: Yeñön öröyuaiñi pakpak kiom qegetka piromñi aiga opo söronji

* 17:8: Dan 7.7; Ind 11.7; Sum 69.28 * 17:12: Dan 7.24

köteköm tekögetka sile aukneyök aiga busunı nemba sihitni könöpnöy ohogetka jem teköma.

17 “Mewö asuhumawi, mi Anutunöy kiñ kembu miengö urunıni kunğuba sölölohöm enjiiga urumohot aka mindiriba akne. Anutugö mötmöt areni mönö mewö wuatangöme. Miangö dop kukösumni jemnemba wanğigetka ambazip galöm köl enğiba malma. Mewö maliga Anutugö keunjan öljambuk akjawı, nalö miangören teköma. ¹⁸ Ambi tari ekzani, mi siti qetbuñambuk tonjan gölmegö kiñ kembuñi kembuñi galöm köl enğimakzawi, mönö kiñ miangö söpsöpni akza.” Mewö.

18

Babilon siti köndengetka gororöngöma.

1 Miangö andöñe Suep garata kun kukösumni öngöngöni ekiga Suepnöhök asuha eriga asakmararañan gölme mem asariyök.

2 *Eta köhöikñanök silata kewö qerök, “Babilon siti ketani mi köndenget. Mi ölja köndengetka gororöngoyök. Ambazip qahöwaketka öme wöröme könañi könañi yeñönök mönö tokoba mirinini miangören megetka yeñgö gölmenini bohonni ahök. Neini neini dönqizininambuk aka imbilonloninambuk miñönök mönö miangören tokoba aipni lan ala örsöy malje.

3 * “Anutunöy mi kewögöra jiiga köndenget: Kantri pakpak yeñön ambi miangö serowilinñangöra aka urunıni wahoriga enjololon aketka Anutugö irimni seholiyök. Irimsewölñi mi qakñine öngöiga wain o nemakzeangö tandök mötket. Gölmegö kiñ kembuñi kembuñi yeñön ambi miambuk sero namböñnamböy aka malget. Kölköl-örörö ambazipnöy gölme dop miangörenök kaba sukinap aködamuninambuk bohonni memapköra algetka önöni qahö öröba siyonşayonı qahö malök. Yangö örömgöjup memgöjupñangöra aka yeñön pomni kindinbirik aka öngöngöni aket.”

4 * Miangö andöñe Suepnöhök kunöy keu jiiga kewö möral, “Nöngö könagesöurupni, inini mönö siti mi mosöta yaigep etket. Ambi miañön şingisöndok ahakzawi, miañön mönö enğualöñni yambuk kindi urunıni tölohobepuk.

Anutunöy likepni melen enjiiga lömböt kanjamninambuk qakñine öngömei, lömböt mewöñi kunöy mönö nanñini qakñine öngöiga mewöyök sihimbölö mötpebuk. Miangöra yembuk mönö kude mindiriba malme.

* 18:2: Ais 13.21; 21.9; Jer 50.39; 51.8; Ind 14.8 * 18:3: Ais 23.17; Jer 51.7

* 18:4: Ais 48.20; Jer 50.8; 51.6, 45

5 *Ambi mianjōn sinjisōndokñi aka qaknōj qaknōj aliga öngöba lök suep misirim tekōza.

Kegwek-kahasililiñ aka malgeri, Anutunōj mi mönō nanñi mötmōtnōj ala mianjōra qahö ölum qema.

6 *Ahakmeme gonjonji tosatñi ak engiba malgeri, injini mönō mianjō dop melenja ak engime. Bölōñi aka memba malgeri, injini mönō mianjō likepñi sömañi yahōtkö dop melenj engigetka qakñine öngöma.

Sinjisōndokö qambiñi nemegōra mokoba malgeri, nanñini qambi mianjōrenjök mönō sömañ yahōtkö dop uba melenja wain o kömbukñi kötökñi mi engōra mokoget neme.

7 *Ambi mianjōn sukinap akōdamunjinambuk önōñi qahö öröba qetbuña öngöngöñi miwikñaiba siyonjsayonji qahö malök. Mianjō likepñi mönō nanñi ihileknōj ohotiriba ip özöpaññōñi sihimbölö önōñi qahö ak wanjigetka jinjenj köla wösöbirik malma. Nanñi uruñe kewö mötmöriba lanj jimakza,

‘Nōñjōn qin ambi kembugö jakömbuak dum tatatñe tatzal. Malö qahö akzal aka nalö kunōñ jinjenj qahö kölmam.’

8 Mewö lanj jimakzawanjōra aka Anutunōj likepñi melenj wanjiiga nalö mohotkö uruñe yanjō qakñe öngöma.

Kembu Anutunōj keuñi kewöta jim teköm wanjiyöhi, yanjō kukñan mönō öngöngöñi akza.

Mianjōra lömböt kanjamjinambuk könāñi könāñi mienjōn mönō zilanj kewö asuhum wanjime:

Tinitosolomñan kömugetka jinjenj köla bödi tariga nanñi könöpnōñ ohogetka jema.”

9 *Könöpnōñ ohogetka jeiga köwak wahötmawi, kantriñi kantriñi pakpak mienjō kin kembuñinan mi eka mönō amburereñ aka sahötme. Kin kembu mienjōn yambuk serowilin aka malget. Sukinapñi akōdamunjinambuk önōñi qahö mianjō nem söngaipñi yambuk ala söngaiba malgeri, yeñjōn mönō yanjōra aka jinjenj kölme. ¹⁰ Jinjenj köla ihileknōj ohotirigetka ip özöpaññōñi sihimbölö önōñi qahö mötzawi, mianjōra mönō töwōratiba tikep kinda kewö sahöta jime, “O Babilon siti qetbuñañambuk, lömböt qakñine öngöyöhanjōra mönō Yeil! Yeil! jiba sahötzin. O siti kukösumñini ketañi, Suep Toñan likepñi melenj engjiiga ösumok aua mohotkö uruñe qakñine öngöiga sihimbölö ketañi mötze. Yeil Yeil! jiba sahötzin!”

11 *Kantriñi kantriñi mienjō kölköl-örörö ambazip yeñjōn mewöyök amburereñ akñe. Kunñan toroqeba yanjō inapñini bohonñi qahö memakñawanjōra mönō jinjenj köla sahötme.

* 18:5: Jen 18.20-21; Jer 51.9

* 18:6: Sum 137.8; Jer 50.29

* 18:7: Ais

47.7-9 * 18:9: Eze 26.16-17

* 18:11: Eze 27.31, 36

¹² *Aködamunḡini goul, silwö, jamönjin ḡḡinambuk aka sorom kötni mi Babilon yeḡön me tosatḡan qahö bohönḡi meme. Oponini tuat lalamḡi, pisikḡi gugakgugak, pisikḡi pötpöt aka opo qetḡi silk mi qahö bohönḡi meme. Ip qetpuk könaḡi könaḡi miengö kempaḡini aka börösöwöḡini könaḡi könaḡi mi qahö toroqeba bohönḡi meme. Aködamunḡini elefant sihitḡan memeni, mi öne ahöme. Dum tebol yuainini ip söḡgöroröḡini ketanḡi in, qönqön, mihinik, nanim aka yuari mianḡön memeni, mi öne ahöme. Börösöwö ain gohotḡi brons aka ain injaḡan memeni aka köt qetḡi mabol mianḡön memeni mi mönö öne ahöme.

¹³ Babilon yeḡön kömusönönik (sinamon) aka gipḡi tosatḡi mi qahö bohönḡi meme. Silegö sanda qetḡi mör, jiniḡ samburup aka sile ömön tosatḡi mi qahö bohönḡi meme. Wanafu, berat, wölömjikjik aka wöronḡi asuhumapkö yuai tosatḡi mi qahö bohönḡi meme. Mewöyök wain o, oil ipkö oilḡi, wit kötni aka flaua nenenḡi mi qahö bohönḡi meme. Bulmakau, lama, hos aka hos kare mi qahö bohönḡi meme. Mutuk welenqeḡe ambazip bohönḡini memba nupnöḡ al enḡigetka sile me urumötmötninan böliba ayuhuyök. Mewö qahö toroqeba ahakḡe.

¹⁴ Kölköl-örörö ambazip yeḡön Babilon ambi miangöra kewö jime, “Ip öḡi nemangö sihimḡi möta eröm ota malnöḡi, mi mönö qahöwaketka öne maljan. Töhötmöriamḡi aka sukinapki aködamunḡinambuk mi mönö körek pakpak gömosöta ayapkögetka tömtömimba maljan. Mi mönö nalö kungen kunbuk miwikḡaimanaḡgö dop qahö.” ¹⁵ *Kölköl-örörö ambazip sukinapḡini mewö mewö bohönḡi memegöra ala siti miangörenḡök monenḡ goul (guli dötnam) öröba qetbuḡanambuk aket. Yeḡön tikep kingetka tosatḡan ihileknöḡ ohotirigetka ip özöpaḡnöḡ sihimbölä önöḡi qahö möröhi, miangöra mönö auruba sahöta jinḡenḡ kölme.

¹⁶ Jinḡenḡ köla kewö jime, “O siti ketanḡi, lömböt qakḡine öḡgöyöhangöra mönö yei! yei! qeta jinḡenḡ köljini. Yeḡön oponini tuat lalamḡi, pisikḡi gugakgugak aka pisikḡi pötpöt mi löḡgötket. Aködamunḡini goul, jamönjin ḡḡinambuk aka kösatorom tosatḡan meḡölöm anḡugetka tandökḡinan kölkölbilikḡinambuk aket. ¹⁷ *Mewö aketmö, sukinapḡini mewöḡi önöḡi qahö mi mönö ösumok aua mohotkö uruḡe ayuhuba ayapköba qahöwaket.” Mewö jiget.

Waḡe pilot pakpak aka ambazip waḡenöḡ anda kamakzei, yeḡön mewöḡanök körek Babilon siti ohoget jeiga köwakḡi mi tikep kinda ekḡe. Mewöyök waḡe ambazip opo

* **18:12:** Eze 27.12, 13, 22 * **18:15:** Eze 27.31, 36 * **18:17:** Ais 23.14; Eze 27.26-30

seri möröreṅgetka luhutnōṅ naṅgōi anakzei aka kōwetnōṅ nup tosatṅi memba malmalṅini naṅgōmakzei, mienōn mōnō kōrek pakpak mi tikep kinda ekṅe. ¹⁸ *Ambi ketanṅi qetbuṅaṅambuk ohoget jeiga kōnōp bōlamṅaṅgō kōwakṅi wahōtmawi, mi tikep kinda eka amburereṅ aka kewō jime, “Siti qetbuṅaṅambuk kianṅō alaṅi mōnō nalō kunōṅ qahō ahōyōk.”

¹⁹ *Mewō jiba sōmsōm urata kau ariba qeta jinṅeṅ kōla unduba sahōta kewō jiget, “O siti ketanṅi, aua mohotkō uruṅe yuainṅi pakpak mōnō ayuhuba ayapkōba qahōwahōk. Ambazip waṅṅeṅinambuk pakpak kōwetnōṅ anda kaba sukinapṅini bohōnṅi memegōra ala mianṅōreṅōk moneṅ goul (gulī dōtnam) sehisehṅi örōgetka siti mianōn qetbuṅaṅambuk ahōk. Lōmbōt qakṅine ṅṅōzawaṅgōra mōnō yei! yei! jiba sahōtzin.” Mewō jiget.

²⁰ *Yeṅōn ahakmeme goṅgoṅi tosatṅi ak eṅgiba malgeri, Anutunōṅ mōnō mianṅō keuṅi jim tekōba likepṅi meleṅniga qakṅine ṅṅōiga sihimbōlō ketanṅi mōrakze. Mianṅōra Suep mire maljei, inṅini mōnō yaṅgōra aka kōiraṅ kōlme. Anutugō ambazip sarakṅi, aposolurupṅi aka kezapqetok ambazip inṅini mōnō sōṅgaiba saureṅ qeba malme.

²¹ *Mianṅō andōṅe Suep garata ṅsumṅi ṅṅōṅṅōṅi kunōṅ kaba kōt keta bōlōkṅi memba wahōta kōwetnōṅ gili geiga kewō jiyōk, “Anutunōṅ siti ketanṅi qetbuṅaṅambuk mi mōnō kianṅō dop kōnōpuk kōndenṅa meleṅni geba qahōwak tekōma. Qahōwak tekōiga kōnaṅep nalō kunōṅ qahō miwikṅaimeanṅō dop akṅa. ²² **Inṅini siti mianṅōreṅ kōmam kōla gita kulele qeba awōlop tōmun uba liṅet kōla undumalgeri, mianṅō kourukṅi mōnō nalō kunōṅ kunbuk qahō mōtme. Babilon eṅgōreṅ ambazip mōtmōt nupṅini kōnaṅi kōnaṅi memba malgeri, mi mōnō tekōyōk. Dokta didiman, qaṅazu klak aka mewōṅi mi mianṅōreṅ kunbuk qahōpmahōp miwikṅaim eṅgime. Wit padi kōtṅi jamōnṅin yahōtkō sutṅire mōjōjahōgetka (mill) kourukṅi asuhuyōhi, mianṅō isikusukṅan mōnō qahōwahiga sitinōṅ mōnō gōrōṅ qeba ahōma.

²³ “Mutuk sitiṅinaṅgō miriṅi pakpak mi kiwanṅinambuk asarigetmō, asakṅi mianōn mōnō bōkōiga pandaman ahōma. Azigō andōurupṅinan ambigō mam bohōnṅi bau aṅguba bōrum megetka ambigō sepkitipurupṅan kōiraṅ ala nem jōwōsōk aka sōsōṅgai almalgeri, okōiraṅ mewōṅaṅgō kourukṅi mi mōnō kunbuk mōtmeanṅō dop qahō. Babilon eṅgō kōlkōl-ōrōrō

* **18:18:** Eze 27.32 * **18:19:** Eze 27.30-34 * **18:20:** Dut 32.43; Jer 51.48

* **18:21:** Jer 51.63-64; Eze 26.21 * **18:22:** Eze 26.13; Ais 24.8 * **18:22:** Jer 7.34; 25.10

ambazip mi kantriŋi kantriŋi miangöreŋ möt enŋigetka qet-buŋaŋinambuk aka malget. Yeŋgöreŋ qarösoŋgo amötqeqe ambazip mi gölme dop ambazip uruŋini mem sohogetka janjun aka malget.” Suep garatanöŋ mewö jiyök.

24 *Babilon mi kewögöra ayuhuyök: Kezapqetok ambazip aka Anutugö ambazip sarakŋi mi mönö yeŋgö sutŋine töndup taköwölaŋ aka enŋuget kömugetka sepŋinan erök. Yeŋgöreŋ sep aka gölmenöŋ ambazip tosatŋi enŋugetka kömumalgeri, körek yeŋgö sepŋinanöŋ kitipŋan mönö yeŋgö qakŋine öŋgöi malget. Könaŋamŋini mewö miwikŋaigetka ahöyök. Mewö

19

Suep yeŋön Babilon geyöhaŋgöra Anutu möpöseiget.

1 Miangö andöŋe Suepnöhök keu kun mötpiga kambu ketanŋi yeŋön köhöikŋanök saurenŋ liŋet köla qetzei, mönö miangö tandöktandök asuhui kewö jiget, “Anutu möpöseizin aleluya! Anutunöŋ amöt neŋguba neŋgömeiga yaŋgö buŋaŋi akzin. Anutuninan kukösum Tonŋi aiga möpöseim waŋgiinga qet-buŋaŋambuk akza. 2 *Anutunöŋ mönö keu ölnaŋgö dop ambazip keuŋini kewöta diŋdiŋanök jim teköm neŋgimakza. Köna ketanŋi ambi serowilin aka mewö mianöŋ ambazip gölme dop mem bölim enŋgiba malöhi, Anutunöŋ mönö yaŋgö keuŋi kewöta jim teköyök. Ambi mianöŋ Anutugö nup meme ambazip enŋuiga sepŋinan eröhi, miangö likepŋi mönö melen waŋgiiga qakŋe öŋgöiga sihimbölö möta malja. Miangöra Anutu möpöseim waŋgizin.”

3 *Mewö jiba kunbuk qeta kewö jiget, “Ambi mi ohoget jeiga köwakŋan mönö nalö dop teteköŋi qahö wahöta öŋgömakŋa. Miangöra Anutu möpöseim waŋgimakzin, aleluya!” 4 Mewö qeta jigetka Anutugö jitŋememe bohonŋi 24 aka bem jembon 4 mienöŋ mönö bamgöba simin köla Anutu, jakömbuak dumŋe tatzawaŋgö waikŋi memba möpöseiba kewö qetket, “Keu mi ölna, aleluya!”

Lama moröŋaŋgö maren lömbuaŋ

5 *Mewö qetketka jakömbuak dumnööhök keu kun kewö asuhuyök, “Anutugö nup meme ambazip ketanŋi moröŋi jitŋi oŋgitpinbuköra keŋgötŋini mörakzei, iŋini mönö körek pakpak Anutunini möpöseiba malme.”

6 *Keu mi asuhuiga keu kun mörali, mi kiangö tandöktandök: Kambu ketanŋi yeŋön liŋet köla qet qerakzei aka o sianöŋ tonŋala kiniga ötoŋi asuhumakzawi aka wölpöndandaŋ ketanŋan qeiga giŋgururuŋ asuhumakzawi, keu mi mönö miangö

* 18:24: Jer 51.49 * 19:2: Dut 32.43; 2 Kiŋ 9.7 * 19:3: Ais 34.10 * 19:5: Sum 115.13 * 19:6: Eze 1.24; Sum 93.1; 97.1; 99.1

tandöktandök ewö asuhuiga kewö jiget, “Kembu Anutunini, kukösum pakpakö Tonjan mönö könahiba gölme dop galöm köl engiba kiñ Kambuñina aka malma. Mianğöra Anutu möpöseizin, aleluya! ⁷ Lama moröñağö ambi buñañan mönö marengö möta nanñi mözözömgöba jöjöröm anğuiga amqeiga ambi memegö nalöñan mönö kam kuñguiga maljin. Mianğöra neñön mönö köirañ köla söñgaiba Anutu möpöseim wañgiinga qetbuñañan sehimakña. ⁸ Anutunöñ maluku tuat lalamñi asakmararañambuk mi enğiiga löngötket.” (Maluku tuat lalamñi mi ambazip sarakñi yeñgö ahakmeme solanñağö kaisöpsöpñi, mönö mianğören löngöt anğuget.)

⁹ *Kambu ketanğö tandöktandök mewö qeta jigetka Suep garata qambiñambuk mianñön mönö toroqeba kewö jii möral, “Keu ki mönö ohoman: Anutunöñ ambazip engoholiga Lama moröñağö maren (ambi memegö) lömbuaññöñ kanğotmei, yeñön mönö simbawoñ akze.” Mewö jiba dumñe kunbuk nöñgöra kewö jiyök, “Keu mi mönö Anutugö keu öl töhöññi akza.”

¹⁰ Suep garatanöñ mewö jiiga nöñön mianğörenök yañgö waikñi memba möpöseim wañgimangö möta yañgö könañe simin köla sipköyalmö, nöñgöra kewö jiyök, “Aek! Mewö kude akñan. Gi aka göhö urumelen alaurupkan Jisösgö könañi nañgöba jiba malgetka welen qem engimakzini, nöñön mönö yeñgörenök kun akzal. Jisösnöñ Buña keu ölni indelöhi, mianğö ösumñan mönö kezapqetok ambazip inahöm enğiiga Uña Töröñağö keuñi möta jim sehiget. Mianğöra mönö Anutugöra sipköba waikñi memba möpöseiba malman.” Mewö.

Kraistnöñ yarö kambuñi yembuk bim aubingö anget.

¹¹ *Nöñön Suep añañiiga hos tuatñi kun ekiga kayök. Qakñe tariga kayöhañgö qetñi mi Pöndañ Kinkin (Jembon onji nene) aka Azi Ölbölñi. Qetñi mewö qerakzei, yañön keu diñdini wuatangöba keu kewöta jim teköba mianğö dop bim qemakza.

¹² *Jenjan könöp bölam tandök jeiga nööröñe ila jalö gwötpuk kölgetka qetñi aukñe ohohöña kayök. Qetñi nanñök mötzapmö, kunöñ kun mi qahö mötza. ¹³ Malukuñi sepnöñ kusakusaholñi mi löngöta kayök. Qetñi qerakzei, mi Anutugören keu.

¹⁴ I wuatangöba kageri, mi Suep mirigö yarö azi kambuñi kambuñi. Yeñön hosñini tuatñi engömemba qakñine tata malukuñini tuat lalamñi sarakñi löngöta kaget. ¹⁵ *Suahöñinañgö numbuñeyök bimgö sou ketanji (bainat) jitñi zuluk alalñambuk kunöñ kayök. Mi kantriñi kantriñi enguba luhut al engimapköra aka kayök. Yañön

* 19:9: Mat 22.2-3 * 19:11: Eze 1.1; Sum 96.13; Ais 11.4 * 19:12: Dan 10.6

* 19:15: Sum 2.9; Ais 63.3; Joel 3.13; Ind 14.20

galömkölkölgö ain öröpñan kantri dop qindinaiba galöm köl engiba malma. Yanön Anutu kukösum pakpakö Tonangö wain joutñi ketanji tözöhölma. Wain jout mi Anutugö irimsesewölñi urupikñambukö kaisöpsöpñi akza.* ¹⁶ Malukuñe qetñi kun ohogetka marömñe kewö kinök, “Kiñ yengö Kiñini aka azi kembu yengö Kembuñini.” Mewö.

¹⁷ *Miangö andöñe Suep garata kun ekiga wehön jeñe kinök. Euyangörej kinda köhöikñanök qeta neiñi neiñi suep bibiñi kutuba könakemba bölbölgöba anakzei, mönö körek mi engohola kewö jiyök, “Inini mönö kame-e! Anutunöñ közölömbuan ketanji mözözömgöyöhi, mönö miangörej tokome. ¹⁸ Kaba tokoba kiñ kembu, suahö galöm aka yarö azi yengö busuñini neme. Hos aka hos qakñine tarakzei, mönö yengö busuñini neme. Ambazip körek yengö busuñini mönö kaba neme. Ambazip öngöngöñi eretñi, nanñini nupñini memakzei aka tonjanangö welenñini öne qemakzei, mönö körek miengö busuñini neme.”

¹⁹ Miangö andöñe jemnemba aka gölmeñi gölmeñi yengö kiñ kembuñini mienön mönö yarö kambuñini enguangita kaba tokogetka engehal. Kunöñ hos qakñe tata yarö kambuñi yembuk kinöhi, mönö i tuarenjoñ ak engiba bim aubingöra tokogetka engehal.

²⁰ *Augetka jemnemba memba jöhöget. Kezapqetok azi takapulakanji jemnembagö jittjememba angöletot aka malöhi, i mewöyök jemnembabuk memba jöhöget. Kezapqetok azi takapulakanjan angöletot aka mianön ambazip tosatñi kewöñi mi tilipköm engiiga janjuñ aka malget: Ambazip jemnembagö supapñi memba angön kölgeri aka tosatñan imutñangö waikñi memba möpöseiba malgeri, mi mönö tilipköm engiba malök. Etkömembra jöhöba gwölögwölö aköm etkigetka löm salfa kötkö könöp bölamñan koasikpuk jemakzawi, mönö miangö sianöñ geyohot. ²¹ Geyohotka hos qakñe taröhangö numbuñeyök bingö sou ketanji (bainat) kayöhi, mianön mönö kiñ kembu aka yarö azi pakpak mi enguiga kömuget. Kömugetka nei pakpak yeñön kangota busuñini uba nemba nem timbiren aket. Mewö.

* **19:15:** Jisösnöñ Anutugö irimsesewölñi aka urupikñi tözöhölmawi, keu miangö könani kewö: Nini siñgisöndok ahinga Anutugö irimñi seholiiga irimsesewölñan qaknine öngöba ahöma. Toroqeba siñgisöndok aka urunini qahö meleñninga Anutugö irimñan toroqeba seholiiga urupikñambuk akña. Wain kösögö öñji pisikñi (greip) miangö kanjeñi mi jout ketane ala tözöhölgetka qösököiga onan dutñangö kinimñe lalanöñ geiga baket algetka miangö uruñe gemakza. Anutugö irimsesewölñi aka urupikñi miangö söpsöpñi mi wain kösögö öñji. Jisösnöñ miangö sihibölöñi möta tözöhöli geiga Anutugö uruñan amöriba teköiga luai asuhuma.

* **19:17:** Eze 39.17-20 * **19:20:** Ind 13.1-18

20

Satan jöhögetka yara 1.000:gö dop kösö mire tarök.

¹ Miangö andöñe Suep garata kun ekiga Suepnöhök erök. Yanjön ömewöröme yeñgö löm dutñi qahö miangö ki moröñi aka tapep (munğamunğa) ketañi kun mi böröñan memba erök.

² *Garata mianjön eta sekak namñi ilikñambuk (dragon) mi memba (yara) yambu 1.000 tatmawañgöra jöhöyök. Sekak namñi mi möpñanğö möpñeyök mokoleñ aka mala korök. Qetñi alañi mi Bölöñanğö Tonji aka Satan. ³ Yambu 1.000:gö uruñe toroqeba ambazip kantri dop kuñguba gölme dop janjuñ akñegöra tilipköm enğibapuköra jöhöyök. Jöhöba gili ömewöröme yeñgö löm dutñi qahö miangöreñ geiga önunñi köla sapö ala munğem supapnöñ (sil) qekötahöba ki namñi misii geiga uruñe tarök. Mewö tari Suep garatanöñ kewö jiyök, "Yambu 1.000 teköiga miangö andöñe Anutunöñ jii kunbuk pösatketka nalö töröpñi nupñi memba malma." Mewö jiyök.

⁴ *Miangö andöñe jakömbuak dumñi dumñi ehal. Anutunöñ tosatñi kukösum enğiiga ambazip keuñini jim tekömei, yeñön mönö dumñi dumñi miangöreñ eta tatket. Mewöyök ambazip Jisösgö könañi nanğöba jigeranğöra aka Anutugö Buña keugöra aka jölñini yandigetka kömugeri, mönö yeñgö uñañini engehal. Mewöyök ambazip jemnemba aka yanğö imutñanğö waikñi qahö memba möpöseigeri aka yanğö supapñi mi mesoholñine me böröñine qahö memba anğön kölgeri, mönö yeñgö uñañini engehal. Uñañini mi engekiga mönö guliba wahötket. Wahöta Kraistpuk (yara) yambu 1.000:gö dop yuai pakpak galöm köla malget.

⁵ Kömugeri, yeñgöreñök tosatñan kömupnöhök wahötwahöt mutukñi miangö nalöñe qahö guliget. Qahöpmö, (yara) yambu 1.000 mi mambötket teköiga miangö andöñe mönö guliba wahötme. ⁶ Denike yeñön kömupnöhök wahötwahöt mutukñanğö nalöñe gulimei, yeñön mönö oyaenğoyaen aka töröñi sarakñi akze. Nalö miangöreñ gulibagun mönö indimñi yahöt qahö kömume. Kömup yahötñanğö kukösumñan mönö yeñgö qakñine qahö öñgöi kömumbingö osime. Yeñön mönö Anutu aka Kraist yetkö jike nup galömurupñiri akñe. Mi aka Kraistpuk (yara) yambu 1.000 mi yuai pakpak galöm köla mal öñgöme. Mewö.

Anutunöñ Satangö keuñi jim teköiga etma.

⁷ (Yara) yambu 1.000 mi teköiga Satan kösö mireyök (kopurumñeyök) pösatketka etma. ⁸ *Eta anda ambazip kantri dop tilipköm enğimamğöra gölme dop liliköma. Gölme gorañi

* 20:2: Jen 3.1 * 20:4: Dan 7.9, 22 * 20:8: Eze 7.2; 38.2, 9, 15

likeplikep eu emu anda kaba (uruñini mongosohowa) siksauk ak engiba kantri qetñiri Gog aka Magog mi tok dop köla anma. Anutu tuarenjon aka bim qemegöra kuñgum engiiga tokogetka jañgöñinan köwetkö sak kösakö dop akña. ⁹ Tokoba kaba kutuba Israel gölme dop köl teköba anda Anutugö könagesö yengö selñini aka Anutugö wölböt sitiñi (Jerusalem) mi liliköba tatme. Mewö tatmemö, Anutunöñ könöp bölam aliga suepnöhök eta jem kutum engim teköma.

¹⁰ Jem kutum engim teköiga Bölöñangö Toñi tilipköm engiiga janjun akeri, garata yeñön i aköm wañgigetka löm salfa kötkö könöp bölamñan koasikpuk jemakzawi, mönö miangö sianöñ geyök. Mutuk jemnemba aka kezapqetok azi takapulakanñi mewöyök aköm etkigetka miangöreñ geba maljahot. Miangöreñ suñgem asak ihileknöñ ohotirim engigetka teteköñi qahö sihimbölä önöñi qahö möta mal öngöme. Mewö.

Anutunöñ ambazip kömugeri, yengö keuñini jim teköma.

¹¹ *Miangö andöñe jakömbuak dum ketanñi tuatñi aka miangöreñ tatzawi, i ehal. Ekiga suep gölme mi yangö jemesoholñeyök qahöwaka angaiyohot. Angaiba kunbuk etkekinangö dop qahö ahot. ¹² Angaiyohotka ambazip kömukömuñi öngöñgöñi eretñi engekiga jakömbuak dum wösöñe kingetka Anutunöñ buk papianñi papianñi kötülök. Papia alañi kun qetñi malmal köhöikñangö qet areñ papia mi mewöyök kötülök. Kötula ambazip kömukömuñi yengö keuñini kewöriña ahakmemenñinangö kösohotñi buk papianöñ ohogetka ahöyöhi, yanñön mönö miangö dop oyonña ambazip jim teköm engiyök.

¹³ Köwetnöñ kömumba geba malgeri, mi köwet Toñan melen engiiga Anutugö jeñe kañgotket. Kömupkö kondotkondot Toñangö böröñe malgeri, mi Toñi mianñön köleñda al engiyök. Kömumba kömupkö uñem mire geba malgeri, mi miangö Toñan melen engiiga Anutugö jeñe kañgotket. Mewö kañgota asuhugetka Anutunöñ keuñini mohot mohot kewöta ahakmemenñinangö dop jim teköm engiyök. ¹⁴ Jim teköm engiiga kömupkö kondotkondot Toñi aka kömupkö uñem miri Toñi mi aköm etkigetka löm könöp koasikpuk jemakzawi, mönö miangö sianöñ geyohot. Könöp sia miangöreñ gegeri, mianñön mönö kömup indimñi yahöt akza.

¹⁵ Anutunöñ kungö qetñi malmal köhöikñangö qet papianöñ qahö ohogetka ahöi miwikñaiyöhi, i mönö aköm wañgi löm könöp koasikpuk jemakzawi, miangö sianöñ geyök. Mewö.

21

Suep döläkñi aka gölme döläkñi etkehal.

* 20:11: Dan 7.9-10

1 *Suep gölme mutukñi yetkôn mewö qahöwaka ayapköyohotka köwetnöñ mewöyök qahö toroqeba ahöyök. Miangö andöñe Suep gölme dölökñi etkehal.

2 *Jerusalem dölökñi, siti töröñi mi Suepnöhök Anutugö mireyök eriga ehal. Siti mi möhamgöm tekögetka eksihimñambuk kewö ahök: Ambi maren wanğigetka maluku eksihimñambuk löngöta azi buñañambuk aitonğömapköra menjölöm anğuba jöjöröba aködammunñambuk kinjawî, siti mianğön mönö mianğö dop aiga ehal. 3 *Mi eka kinda jakömbuak dumnöhök keu kun asuhui mötpiga köhöikñanök qeta kewö jiyök, “Eknöñ, Anutugö mirinöñ mönö ambazip sutñine eta ahöza. Anutunöñ sutñine maliga yambuk malgetka nanñak bem Anutuñini aka yembuk mal öngöma. 4 *Yembuk mala je imbilñini mi lökñanök kutum teköma. Yuai pakpak mutuk ahöyöhi, mianğön mönö qahöwak teköyök. Mianğöra kunbuk qahö kömugetka jinğenkölköl qahö akñe aka toroqeba sihimbölo kun qahö mötme. Yuai kungöra qahö osiba sahötme.”

5 Jakömbuak dumñe tatzawañön kewö jiyök, “Mötnöñ, nöñön jibiga öröyuai pakpak mönö kölönjaiba dölökñi akña.” Mewö jiba jiyök, “Keu mi öl töhöññi uruyahötñi qahö, mianğöra mi mönö papianöñ ohoman.” 6 *Toroqeba kewö jii möral, “Mi mönö jibiga asuhum teköza. Nöñön mutuhök mala (yuai pakpak miwikñaiba könañgep jibi qahöwahiga) qöndökña mal öngöba malmam. Mianğö dop nöñön kulem namñi mutukñi A aka kulem namñi teteköñi Z akzal. Kunñan ogöra mötzawi, nöñön mönö malmal köhöikñanğö o jeñeyök o mi kalema wanğibiga mianğöreñök söñgöröñi qahö um nemba malma. 7 *Kunñan lömböt pakpak onğita luhut almawi, nöñön mönö yanğö Anutuñi aka yuai pakpak mi wanğibiga buñañi aiga nöñgö nahönböratni aka qetni bisiba malma.

8 “Mewö malmappmö, tosatñan ambazip jeñine zirinñirin aka böñ qahö kinda mötnaripñini mosötketka uruñinan tölohozawi, yeñgö mirinñinan mönö löm salfa kötkö könöp* bölamñan koasikpuk jemakzawi, mianğöreñ ahöma. Yeñgöreñ toroqeba ambazip kewöñi yeñön mewöyök mianğöreñ geba malme: Ambazip enğuet kömugetka kaisero qarösongo amötqeqe aka tandö lopionñ waikñini memba möpöseiba muney keu jimakzei, nöñön mönö i aköm enğibiga sia mianğöreñ geba malme. Mi kömup indimñi yahöt akña.” Jakömbuak dumñeyök keu mewö kaiga möral. Mewö.

* 21:1: Ais 65.17; 66.22; 2 Pitö 3.13 * 21:2: Ais 52.1; 61.10; Ind 3.12 * 21:3: Eze 37.27; Lew 26.11, 12 * 21:4: Ais 25.8; 35.10; 65.19 * 21:6: Ais 55.1
* 21:7: 2 Sml 7.14; Sum 89.26-27 * 21:8: Salfa kötkö könöpñi mi közupkö kötñan jeba göğöriñ qeba jemakzawañgö dop akza.

Jerusalem siti dölökñi mi qainñi kun.

⁹ Lömböt kanjamñinambuk qöndökñi 7 mianñon qambi 7 kokolak qegetka Suep garata 7 mienñon mi memba kingeri, yengörenök kunñan kaba nöngöra kewö jiyök, “Mönö kanöñga Lama moröñangö ambi buñaji anömñi akñamgö akzawi, mi kondel gihimam.”

¹⁰ *Mewö jiiga Uña Töröñan nömeiga alburupñan qakne öngöiga Suep garata mianñon noangiriga kundunji köröpñi qet-buñanjambuk kunöñ öngöit. Miangören öngöba siti töröñi Jerusalem Suepnöhök Anutugö mireyök eröhi, mi kondel niñgiiga kewö ehal:

¹¹ Anutugö asakmararañan miangören asariiga kölköl-bilikbilikñan goul aka jamönñij ölnambuk söngöröñini öngöñgöñi miengö tandök ahök. Jamönñij ölnambuk qetñi jaspö mi kirin jöhanñi jöhanñi kölköl-bilikbilikñinambuk melenða asarimakzei, mönö miangö dop tuatñi ahöyök. ¹² *Kiriponji öngöñgöñi mi aködamunñambuk. Kiriponñangö nanñunji 12 kingetka kösutñine Suep garata 12 dop köla kinget. Israel könagesögö kambunji 12 miengö qetñini mi nanñu miengö silenñine ohogetka kinök. ¹³ Nanñu 12 mi likeplikep eu emu kewö kinget: Wehön kotkotñe karöbut, gegene karöbut, Not likepñe karöbut aka Saut likepñe karöbut. ¹⁴ Siti kiripo mi jamönñij tandö welipñinambuk 12 miengö qakñine megetka kinök. Lama moröñangö aposolurupñi 12 yengö qetñini 12 mi tandö 12 miangören ohogetka kinök.

¹⁵ *Suep garata nömbuk keu jiyöhi, yanñon siti, miangö kiriponji aka nanñunji 12 miengö dopñini dop ala mötmamgöra jöjöröba dop alalgö goul öröpñi (rula mesa) memba kinök. ¹⁶ Siti mi arengöba megetka wangömñi 4 ahök. Likeplikep eu emu köröpñi mi öröröñ. Köröpñi mohot mohot mi goul öröpñi mianñon dop ala 2400 kilomita miangö dop ahöi mi-wikñaiyök.† Andipñi mi mewöyök öröröñ ahöyök. ¹⁷ Suep garatanöñ mewöyök siti kiriponji mi gölme azigö dopnöñ dop ala 60 mita ahöi miwikñaiyök.

¹⁸ *Siti kiriponji mi jamönñij ölnambuk qetñi jaspö mianñon memenja. Siti nanñak mi goul töhönöhök megetka asakmararañan mönö kirin tuatñangö dop asakasakñambuk asariyök. ¹⁹ Siti kiriponñangö tandöñi mi jamönñij söngöröñini öngöñgöñi könaji könaji mianñon menjölöm engigetka aködamunñinambuk kewö aketka engehal: Tandö mutukñi mi jamönñij ölnambuk qetñi jaspö mundanji inñanji tandöktandök. Tandö yahötñi mi jamönñij asonji qetñi safaiö, karöbutñi mi

* **21:10:** Eze 40.2 * **21:12:** Eze 48.30-35 * **21:15:** Eze 40.3 † **21:16:**

Kambu 12 mohot mohot miengöra 200 kilomita.

* **21:18:** Ais 54.11-12

jamönjin tönğöntönğön qetnji ageit. Tandö 4:ni mi jamönjin görökñi qetnji emerald.

²⁰Tandö 5:ni mi jamönjin pisikpisik qetnji sardoniks. Tandö 6:ni mi jamönjin pisikñi qetnji karnilian, 7:ni mi jamönjin qetnji krisolait (qortz), mundañi goul kirin ewö. Tandöni 8:ni mi jamönjin asonason qetnji beril, 9:ni mi jamönjin gohotñi qetnji topaz. Tandö 10:ni mi jamönjin qetnji kalsedoni (krisopreis) mundañi kaukau, 11:ni mi jamönjin gohotgohot qetnji jeisint (turqois). Tandö 12:ni mi jamönjin pisikñi gugakgugak qetnji ametist. ²¹Siti kiripo nanğu 12 mi sorom kötni welipñinambuk 12 mianön memenja. Nanğu mohot mohot mi sorom kötni mohot mohot mianön urasiba memenja. Sitinöñ köna ahözawi, mi goul töhönöhök megetka kirin tuatñi ewö asariyök.

²²Siti pakpak yeñön Kambu Anutu kukösum pakpakö Tonji aka Lama moröñi törörök etkeka urunji lök melenja waikñiri memba möpöseimakze. Mianğöra jöwöwöl jike (tempöl) kungöra qahö osimakze. Mi qahö ehal.

²³*Anutugö asakmararanan siti mem asarim enğıga Lama moröñan kiwanjini akza. Mianğöra wehön köin asarimahotköra qahö osimakze. ²⁴*Yañön kiwanjini aiga kantriñi kantriñi yeñön mönö yanğö asakñe anda kaba malme. Gölmegö kiñ kembuñi kembuñi yeñön buñajini aködamunñinambuk mi enğuanğita siti mianğöreñ alme. ²⁵*Siti söñaupñi qahö, mianğöra kiripo nanğunji mi nalö kunöñ qahö kölmemö, sundan dop tala kinme.

²⁶Kantriñi kantriñi yeñön urunji melenja aködamunñinangö buñajinangöra aiweliköba qet-buñajinambuk aka malgeri, mi mönö enğuanğita siti mianğöreñ alme. ²⁷*Ambazip qetjini malmal köhöikñangö qet aren papianöñ ohogetka ahözawi, yeñönök mönö siti mianğöreñ öngöme. Lama moröñan qet aren papia mi galöm kölakza. Kunñan urunji tölohozawi me anğöjörak imbilonlonambuk aka muneñ keu jimakzawi, yañön mönö mianğöreñ öngömangö osima. Mewö.

22

Malmal köhöikñangö o töwatñi ehal.

¹*Mianğö andöñe Suep garata mianön malmal köhöikñangö o jeñi kondel niñğıga Anutu aka Lama moröñi yetkö jakömbuak dumnöhök uzumgöba kaba o töwatñi ahök. Mianğö onji mi kirin jöhanñi jöhanñi kölköl-bilikbilikñinambuk melenja asarimakzei, mönö mianğö dop tuat lalamñi ahök.

* 21:23: Ais 60.19-20 * 21:24: Ais 60.3 * 21:25: Ais 60.11 * 21:27: Ais

52.1; Eze 44.9 * 22:1: Eze 47.1; Zek 14.8

² *O töwatñi mianñon sitigö köna namñi bohonñe eta bibinji mötöteiba kutuba kayök. O töwatñangö görañe likelike mianğöreñ malmal köhöikñangö ipñi mi kinök. Ip mianğö ölnan mönö (yara) yambu dop sömañi 12, mi köin mohot mohotkö dop söhöba asuhumakze. Ip mianğö sinñan mönö ambazip kantri dop ölöwakñegöra aka kinje.

³ *Kunñan kun qahö toroqeba alañi saitköba gesuahöma. Anutu aka Lama moröñi yetkö jakömbuak dumniran mönö siti mianğöreñ ahöiga Lama moröñangö nup meme ambazipurupñan welen qem wañgimakze. ⁴ Welen qem wañgiba jemesoholñi eka Anutugö qetñi mesoholñine kösöba mekötahögetka ahöma.

⁵ *Miri qahö toroqeba söñauma. Kembu Anutunöñ mem asarim enğimakzawañgöra kiwa asakñangöra me wehön asakñangöra qahö osime. Mewö oyaenköyaen mala nalö dop teteköñi qahö kin kembu ewö galömkölköl nup memba mal öngöme.

⁶ Mi ekiga Suep garatanöñ nöngöra kewö jiyök, “Buña keu mötzani, mianñon mönö öl töhöññi uruyahötñi qahö akza. Kembu Anutunöñ kezapqetok ambazip sölölohöm enğimakzawi, yañon mönö Suep garatani ni melaim ninğiiga asuhum gihiba malal. Yuai pakpak zilañ asuhumeangö dop akzawi, mötnarip ambazipurupñan mi mötmegöra mi asuhuba kondel gihial.” Mewö.

Jisösnöñ kunbuk lilingöba kama.

⁷ Jisösnöñ jiza, “Mötket, nöñon mönö zilañ lilingöba kama. Tosatñan buk kiangö kezapqetok keuñi buña qeba gekötahömakzei, yeñon mönö simbawon akze.”

⁸ Jon nöñon Buña keu ki möta jeni melenñiga imutñi ehal. Mi möta ek teköba Suep garatanöñ imut ki kondel ninğiyöhi, nöñon yañgö waikñi memba möpöseimangö möta gölmenöñ eta könañe simin kölal. ⁹ Simin kölalmö, nöngöra kewö jiyök, “Aek! Mewö kude aknöñ. Nöñon gi aka kezapqetok alaurupki aka ambazip buk kiangö Buña keuñi buña qeba gekötahömakzei, mönö körek enğö qöhöröñine kinda mohotñe Anutu welen qem wañgimakzin. Nia qahöpmö, mönö Anutu waikñi memba möpöseimakñan.”

¹⁰ Mewö jiba nöngöra kewö jiyök, “Nalö töriza. Mianğöra buk kiangö kezapqetok keuñan tölapñe ahöbapüköra mi papianöñ ohomanmö, mi mönö muñgem supapnöñ (sil) kude gekötahöman. ¹¹ *Bölöñi memakzawañon mönö toroqeba mewö memba böliqölima. Tölohoba maljawañon mönö toroqeba tölohoba añğöjörakñambuk aka malma. Ahakmeme

* 22:2: Jen 2.9; Eze 47.12 * 22:3: Zek 14.11 * 22:5: Ais 60.19; Dan 7.18

* 22:11: Dan 12.10

diŋdiŋi ahakzawaŋön mönö toroqeba diŋdiŋanök aka memba malma. Sarakŋi ahakzawaŋön mönö toroqeba sarakŋi kötökŋi aka malma.” Suep garatanöŋ mewö jiyök.

12 *Jisösnöŋ jiza, “Mötket, nöŋön mönö zilaŋ lilingöba kamam. Kamami, miangöreŋ mönö töwaŋini memba kamam. Ahakmemeŋini aka memba malgeri, mönö mi kewöta miangö dop töwaŋini mohot mohot al engimam.

13 *Nöŋön könäkönahiŋe mutukŋi mala (yuai pakpak miwikŋaiba könangep jibi qahöwahiga) teteköŋe qöndökŋa mal öngöba malmam. Miangö dop nöŋön A aka Z, kulem namŋi mutukŋi aka teteköŋi akzal.

14 *Nöŋön ambazip malukuŋini galöm kölakzei, yeŋgöra kiripo naŋguŋi öröbiga ölop siti uruŋe öngögetka qahö aŋgön köl engibiga malmal köhöikŋangö ip ölni neme. Miangöra opo malukuŋini galöm köla saŋgoŋmakzei, ambazip mienöŋ mönö simbawoŋ aka oyaenŋkoyaenŋ akze.

15 “Yeŋön oyaenŋkoyaenŋ akŋemö, tosatŋi yeŋgöra naŋgu köl jöhöbiga yaigep malmei, mi ambazip kewöŋi: Kiam ewö kaisero aka qarösoŋgo amötqeŋe ahakze. Serowilin aka ambazip enguget kömumakze. Tandö lopioŋ waikŋini memba möpöseimakze aka isimkakalekö sihimŋi möta mi ahakze. Ambazip mewöŋi pakpak mi mönö kiripo yaigepŋe (luhutŋe) malme.

16 *Jisös nöŋön garatani melaibiga liliköba urumelen könagesö engöra kezapqetok keu ki naŋgöba jiiga mötme. Nöŋön kiŋ Deiwidkö bömönjalöŋi aka undumŋi akzal. Nöŋön söŋangö undiŋi asakmararaŋnambuk aka asarimakzal.” Jisösnöŋ mewö jiyök.

17 *Uŋa Töröŋi aka ambi buŋa yetkön kewö jimakzahot, “Jisös, gi mönö kanöŋ.” Mewö jiyohotka mötmei, inŋini mönö mewöŋanök kewö jime, “Jisös, gi mönö kanöŋ.”

Kunŋan ogöra mötzawi, yaŋön mönö kama. Kunŋan malmal köhöikŋangö ogöra sihimŋi mötzawi, yaŋön mönö kaba mi kalema möt aŋgön köлма. Mewö.

Galöm meme aka jöjöpaŋ keu teteköŋi

18 *Nöŋön buk kiangö kezapqetok keuŋi mötmei, körek engöra galöm meme keu kewö jizal: Kunŋan kezapqetok keu kiambuk keu kun toroqeba jimawi, lömböt kanjamŋinambuk asuhumapkö keuŋi buk kiangöreŋ ohoyali, Anutunöŋ mi mönö yaŋgö qakŋe ali öngöme. ¹⁹Kunŋan buk kiangö kezapqetok keuŋi miangöreŋök keu kun qekömawi, Anutunöŋ mönö

* 22:12: Ais 40.10; 62.11; Sum 28.4; Jer 17.10 * 22:13: Ind 1.8, 17; 2.8; Ais

44.6; 48.12 * 22:14: Jen 2.9; 3.22 * 22:16: Ais 11.1, 10 * 22:17: Ais 55.1

* 22:18: Dut 4.2; 12.32

i aŋgön köliga malmal köhöikŋaŋgö ip ölni qahö nemba siti töröŋe qahö öŋgöma. Miangö keuŋi Anutunöŋ jöhöiga buk kiangören ohoyalmö, keu mianön mönö yangören öljambuk qahö akŋa.

²⁰ Buŋa keu ki naŋgöba jizawaŋön kewö jiza, “Keu mi ölna. Nöŋön mönö zilaŋ liliŋöba kamam.”

Mewö jiiga nöŋön kewö jizal, “Keu mi ölna. O Kembu Jisös, gi mönö kanöŋ.”

²¹ Kembu Jisösgö kalem möriamŋan mönö körek embuk ahöma. Keu mi ölna.